


Topẽ vĩ rá



New Testament in Kaingang (BR:kgp:Kaingang)

Topẽ vĩ rá
New Testament in Kaingang (BR:kgp:Kaingang)

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

Contents

MATEUS	1
MARCOS	55
LUCAS	85
JOÃO	143
HAN KÃME	182
ROMA	230
1 CORINTO	254
2 CORINTO	276
GALÁCIA	290
ÉFESO	299
FILIPOS	307
COLOSSOS	313
1 TESSALÔNICA	318
2 TESSALÔNICA	323
1 TIMÓTEO	326
2 TIMÓTEO	333
TITO	338
FILEMOM	341
HEBREU	343
TIAGO	361
1 PEDRO	368
2 PEDRO	375
1 JOÃO	379
2 JOÃO	385
3 JOÃO	386
JUDAS	387
NÉN VENH KE	389

MATEUS TÏ RÁ

*Jesus jóg'jóg ve ag
(Lc 3.23-28)*

¹ Jesus Cristo jóg'jóg ve ag rán ke vē. Jesus Cristo vÿ tÿ Davi krē'krē nÿ, kÿ Davi vÿ tÿ Abraão krē'krē nÿ.

² Abraão vÿ Isaque han. Kÿ Isaque vÿ Jacó han. Kÿ Jacó vÿ Judá han, ti mré ke ag ke gé.

³ Kÿ Judá vÿ Peres han. Zera ti ke gé. Ā prÿ tÿ Tamar fi ki tóg ag hyn han, Judá ti. Kÿ Peres vÿ Esrom han. Kÿ Esrom vÿ Arão han.

⁴ Kÿ Arão vÿ Aminadabe han. Kÿ Aminadabe vÿ Nasom han. Kÿ Nasom vÿ Salmom han.

⁵ Kÿ Salmom vÿ Boaz han, ā prÿ tÿ Raabe fi ki. Kÿ Boaz vÿ Obede han, ā prÿ tÿ Rute fi ki. Kÿ Obede vÿ Jessé han.

⁶ Kÿ Jessé vÿ pã'i mág tÿ Davi ěn han.

Kÿ pã'i mág tÿ Davi vÿ Salomão han, ā prÿ ěn fi ki, ũ tÿ Urias prÿ ja nÿ ěn fi ki.

⁷ Kÿ Salomão vÿ Roboão han. Kÿ Roboão vÿ Abias han. Kÿ Abias vÿ Asa han.

⁸ Kÿ Asa vÿ Josafá han. Kÿ Josafá vÿ Jorão han. Kÿ Jorão vÿ Uzias han.

⁹ Kÿ Uzias vÿ Jotão han. Kÿ Jotão vÿ Acáz han. Kÿ Acáz vÿ Ezequias han.

¹⁰ Kÿ Ezequias vÿ Manassés han. Kÿ Manassés vÿ Amom han. Kÿ Amom vÿ Josias han.

¹¹ Kÿ Josias vÿ Jeconias han, ti jãvy ag ke gé. Israel ag tÿ cidade Babilônia ra mÿ ěn kã tóg ag hyn han, Israel ag tÿ sigse kÿ mÿ ěn kã.

¹² Ag tÿ cidade ěn tá vÿnvÿn ke kar kÿ Jeconias vÿ Salatiel han. Kÿ Salatiel vÿ Zorobabel han.

¹³ Kÿ Zorobabel vÿ Abiúde han. Kÿ Abiúde vÿ Eliaquim han. Kÿ Eliaquim vÿ Azor han.

¹⁴ Kÿ Azor vÿ Sadoque han. Kÿ Sadoque vÿ Aquim han. Kÿ Aquim vÿ Eliúde han.

¹⁵ Kÿ Eliúde vÿ Eleazar han. Kÿ Eleazar vÿ Matã han. Kÿ Matã vÿ Jacó han.

¹⁶ Kÿ Jacó vÿ José han, Maria fi mén ěn ti. Maria ěn fi ki Jesus tóg mur ja nÿ, hã vÿ: Cristo, he mÿ.

¹⁷ Hã kÿ ag tóg 14 (ke) nÿtÿ, Abraão krē'krē ag, Davi mré nÿgrén kÿ. Kÿ Davi krē'krē ag tóg 14 (ke) nÿtÿ gé, ag tÿ ag sigse kÿ nÿtÿ tá ag nÿgrén kÿ, ag tÿ cidade tÿ Babilônia tá sigse kÿ nÿtÿ tá ag nÿgrén kÿ. Tag pãte ag krē'krē vÿ 14 (ke) nÿtÿ gé, Cristo mré nÿgrén kÿ. Cristo jóg'jóg ve ag hã vē.

*Jesus Cristo mur
(Lc 2.1-7)*

¹⁸ Jesus Cristo mur vÿ ge nÿ, ha mÿ. Ti mÿnh fi vÿ tÿ José prÿnh ke fi nÿ, hã ra fag tóg ver jagnē mré nÿ ja tÿ nÿ. ěn kã fi tóg kufy nÿ ha. Topē kuprÿg tÿ fi mÿ gÿr han jan hã vē.

¹⁹ Kÿ José tóg mēg mÿ sir, fi tÿ kufy nÿ ti, kÿ tóg ti mÿ e tÿ. Ũn jykré kuryj vē mÿr, José ti, hã kÿ tóg fi mÿ'ág han sór tÿ nÿ, kÿ tóg fi to vÿ tÿ nÿ sir. Hã ra tóg fi pin kÿ fi mÿ: “kÿ inh hÿn ā tÿ prÿ nÿnh ke tÿ nÿ ha.” he sór mÿ sir.

²⁰ Ti tÿ ver fi tovãnh to jykrén kÿ Topē tÿ jēnē jafã tóg ti mÿ vēnh ven mÿ sir, ti vēnh péti kÿ. Kÿ tóg ti mÿ: “José,” he mÿ. “Tÿ ā Davi krē'krē ag kã ũ nÿ,” he tóg. “Maria fi to jykrén kónãnh tÿg nÿ. Jatun mÿ fi tÿ prÿg nÿ, fi tovãnh tÿg nÿ. Ũ tÿ pijé', fi kósin ti. Topē kuprÿg tÿ fi mÿ han ja vē.

²¹ Ti mur kÿ tóg gré nÿnh mÿ, ha vemnÿ. Kÿ ti mÿ: Jesus, hemnÿ. Ā povo krenkren han jé tóg ke mÿ, ag tÿ Topē vÿ mranh mÿ ra,” he tóg, José mÿ, Topē tÿ jēnē jafã ti.

²² Hã ra Topē vÿ vãsÿ ā vÿ tó tÿ ũ mÿ tag tó ja nÿ, ha mÿ.

²³ “Ũn mén ja tÿ fi vÿ kufy nÿnh mÿ,” he ja tóg nÿ. “Fi kósin fi ki mur ken kÿ ag tóg ti to: Emanuel, henh ke mÿ,” he ja tóg nÿ, Topē vÿ tÿ rán kÿ nÿ ki. Emanuel to ke vē, hã vÿ: “Topē vÿ ěg ki rÿr há han mÿ,” he mÿ, ěg vÿ ki, hã vÿ: Emanuel, he mÿ. José vÿ Topē vÿ tag ve ja nÿ.

²⁴ Kÿ José tóg rÿr mÿ sir, ti vēnh péti kar kÿ. Kÿ tóg Topē tÿ jēnē jafã ěn vÿ ki króm mÿ sir. Vēnh prÿg han tóg mÿ, Maria fi mré.

²⁵ Hã ra tóg ver fi mré nÿ tÿ nÿtÿ. Kejēn fi tóg ā kósin vég mÿ. Kÿ José tóg ti jÿjin kÿ ti mÿ: Jesus, he mÿ. Fi tÿ ti ve kar kÿ tóg vãhã fi mré nÿ mÿ sir.

2

Pã'i ag tỹ Jesus venh kãmũ

¹ Fi tỹ Jesus ve ên kã fag tóg cidade tỹ Belém tá nỹtĩ, ga tỹ Judéia tá. Herodes vỹ tỹ pã'i tỹ rei nĩ, fi tỹ ti ve ja ên kurã ki. Kỹ kejên ù ag tóg Jerusalém tá junjun mũ. Kuvar há tá ag tóg kãmũ ja nĩ, rã jur ja tá, ãjag jamã tá. Ûn estudo mág han mũ ag vë, krĩg to ag tóg estudar he mág han tĩ.

² Ag tỹ Jerusalém tá junjun kỹ ag tóg sir: “ũ tỹ ùri mur mũ vỹ tỹ Israel ag pã'i mág nĩnh mũ,” he mũ. “Ti kri êg krĩg vé, êg tỹ êg jamã tá nỹtĩn kỹ, rã jur ja tá nỹtĩn kỹ. Êg tỹ ti venh kãmũ vë, êg tỹ ti mỹ nén ù há vin sór vë. Êg hỹn hẽ tá ti venh ke mũ?” he ag tóg, ù tỹ kuvar há tá kãmũ mũ ên ag.

³ Ag vỹ tag vỹ pã'i tỹ Herodes mỹ e tĩ, kỹ tóg krĩ kufy nĩ sir. Jerusalém tá ke kar ag mỹ tóg e tĩ gé.

⁴ Kỹ Herodes tóg Topẽ tũ ki rĩr tĩ to pã'i ag jé prêr mũ sir, Topẽ vỹ to professor ag ke gé. Kỹ tóg ag mỹ: “Cristo hỹn hẽ tá mur ke mũ nêji?” he mũ.

⁵ Kỹ ag tóg ti mỹ: “Belém tá ke nêji, ga tỹ Judéia tá,” he mũ. “Topẽ vỹ tóg tĩ ù vỹ vãsỹ ti to tag rán ja nĩ, ha mẽ,” he ag tóg.

⁶ “Sĩ ti nĩ, cidade tỹ Belém ti, ga tỹ Judéia tá, he ja tóg nĩ. Ti sĩ nĩ ra tóg cidade mág ag kar kãfór kar nĩ, pã'i mág ên tỹ tá mur kenh ke tugrĩn. Pã'i mág ên vỹ tỹ êg povo tỹ Israel kri pã'i mág jênh ke mũ, ù tỹ Belém tá mur ke mũ ên ti, he ja tóg nĩ, Topẽ vỹ tỹ rán kỹ nĩ ki,” he ag tóg, professor ag, Herodes mỹ. “Hã kỹ tóg Belém tá mur ke mũ, Cristo ti,” he ag tóg, professor ag.

⁷ Kỹ Herodes tóg vënh péju kỹ fóg ên ag mré vëmén mũ sir, ù tỹ krĩg to estudo mág han mũ ên ag mré. Kỹ tóg ag mỹ: “kurã tỹ hẽ ki ãjag krĩg ên ve vén?” he mũ.

⁸ Ag tỹ ti mỹ kurã tóg kỹ tóg Belém ra ag jêgnêg mũ sir. “Ãjag tỹ tá junjun kỹ ti jãvãnh nĩ,” he tóg. “Vënh kar ki ti jêmêmni. Ãjag tỹ ti ve kỹ inh mỹ tónh kãmũmnĩ. Kỹ sóg ti venh tĩg sór mũ gé, sỹ ti mỹ nén ù há nĩm jé,” he tóg, Herodes ti.

⁹ Ag tỹ pã'i ên vỹ mẽ kar kỹ ag tóg mũ mũ sir, Belém ra. Ag mũ ên ki ag tóg krĩg ên ve mãn mũ gé sir, ag tỹ rã jur ja tá krĩg vég mũ

ên. Krĩg ên vỹ ag jo tĩ mũ. Ag tỹ Belém tá junjun kỹ krĩg tóg ùn sĩ nĩgja kri hã sa nĩ sir.

¹⁰ Ag tỹ krĩg ên ve kỹ ag fe tóg mrin ke mũ sir.

¹¹ Ìn kãra ge kỹ ag tóg ùn sĩ ti vég mũ, ti mỹnh fi ke gé. Kỹ ag tóg ti krêm grĩnhgrĩnh ke mũ, ti mỹ: “tỹ ã Topẽ kósin nĩ,” he jé. Kỹ ag tóg sir ti mỹ ãjag tũ ti vin mũ, ouro ti, ka jênjo tỹ incenso ti ke gé, êg tỹ ti pũn kỹ ger há han jafã ên, kar kỹ ka tỹ mirra jênjo ke gé, êg tỹ ti pũn kỹ ger há han jafã ù vë gé.

¹² Hã ra Topẽ tóg, ag vënh péti ki (tóg) ag mỹ: “Herodes mỹ tóg tũg nĩ,” he mũ sir. Hã kỹ ag tóg êpry ù jagma mũ mũ, êmĩn ù jagma mũ kỹ ag tóg ãjag jamã ra vỹnvỹn ke mũ sir, rã jur ja ra.

José fag tỹ vënh pigju

¹³ Ag mũ kar kỹ José tóg kejên Topẽ tỹ jênê jafã vég mũ, ti vënh péti kỹ. Kỹ Topẽ tỹ jênê jafã tóg ti mỹ: “nĩ ra,” he mũ. “Ûn sĩ va tĩg, ga tỹ Egito ra, ti mỹnh fi mré. Herodes vỹ ùn sĩ tag tén sór mũ. Hã kỹ vënh péju kỹ Egito ra tĩg. Kejên sóg ã mỹ: ha vỹn ké, henh ke mũ. Egito tá inh vỹ jãvãnh nĩ,” he tóg, Topẽ tỹ jênê jafã ti, José mỹ. Ti vënh péti kỹ tóg ti mỹ ke mũ.

¹⁴ Kỹ José tóg kuty ên kã jêgnê kỹ fag tatĩn tĩ mũ sir, ga tỹ Egito ra, vënh péju jé.

¹⁵ Tá tóg nĩ nĩ. Herodes tỹ kejên ter kỹ tóg tá vỹn ke mũ. Hã ra ti tĩg ja tag vỹ rán kỹ nĩ gé. Vãsỹ Topẽ tóg ã vỹ tóg tĩ ù mỹ: “tag rán ra,” he ja nĩ, hã vỹ: “ga tỹ Egito ra sóg vënh vỹ jênê, inh kósin tỹ tá vỹn ke jé,” he mũ.

Herodes tỹ gĩr ag kygrên

¹⁶ Hã ra Herodes tóg fagrĩnh mỹ fóg ên ag jãvãnh ja nĩ, ùn estudo mág han mũ ên ag. Vãhã tóg: “ag tỹ inh mỹ tóg tũg hỹn,” he mũ. Kỹ ti fe tóg gỹm ke mũ sir. Kỹ tóg ã pã'i ag mỹ: “ha mũ jêg, Belém ra,” he mũ. “Tá gĩr ag kygrên kãn nĩ, ùn gré ag, ùn kri prỹg tỹ 2 anos tá krỹg tũ ên ag,” he tóg, ag mỹ. Ag mỹ tóg 2 anos tóg, fóg ag tỹ ti mỹ: “1 ano kãfór ti nĩ ha, êg tỹ ti kri krĩg ve ja ti,” hen kỹ. Kỹ polícia ag tóg gĩr ag kãgtén mũ mũ sir.

¹⁷ Hã ra tag tóg rán kỹ nĩ gé. Vãsỹ Topẽ vỹ tóg tĩ tóg tag rán ja nĩgtĩ, ti jiji hã vỹ: Jeremias, he mũ. Ên tóg tag rán ja nĩ, ha mẽ:

¹⁸ “cidade tỹ Ramá tá êg tóg vënh kygfỹ mêng mũ, vësỹrénh mág ke gé. Raquel fi vỹ

vēsýrénh mũ, fi krē ag jé. Ag tỹ fi mỹ: fỹ tũg nĩ, he mũ ra fi tóg vēsýrénh mũ. Fi kré ag vỹ tũ' he kãn, hã kỹ fi tóg fỹ mũ, vēsýrénh mũ,” he ja tóg nĩ, Jeremias ti. Hã ra tóg tag ri ke nĩ, polícia ag tỹ gĩr ag kygrēn mũ ti.

José fag tỹ Egito tá vỹn ke

¹⁹ Kejēn Herodes ěn vỹ ter mũ gé sir, pã'i ti. Kỹ Topē tỹ jēnē jafã vỹ José mỹ vēnh ven mũ, ti vēnh péti kỹ. Ga tỹ Egito tá tóg ti mỹ venh ven mũ. Tá fag tóg nỹtĩ nĩ, ga tỹ Egito tá. Tá tóg ti mỹ vēnh ven mũ, José mỹ, Topē tỹ jēnē jafã ti.

²⁰ Kỹ tóg ti mỹ: “nĩ ra,” he mũ. “Gĩr va tĩg, ti mỹnh fi pére tĩg gé, ga tỹ Israel ra. Ũ tỹ fi kósín tén sór mũ ěn vỹ hur ter,” he tóg, Topē tỹ jēnē jafã ti, José mỹ.

²¹ Kỹ tóg jēgnē kỹ tĩ mũ sir. Gĩr va tóg tĩ mũ, ti mỹnh fi pére tóg tĩ mũ gé. Kỹ fag tóg Israel ag ga ra mũ mũ sir.

²² Tá jun kỹ tóg pã'i mág tãg jyjy jēmēg mũ, José ti. Hã ra tóg tỹ Arquelau nĩ. Ti panh tỹ Herodes ri kén tóg tỹ pã'i tỹ rei nĩ, ga tỹ Judéia tá. Kỹ tóg ti kamēg mũ. Kỹ Topē tóg ti vēnh péti kỹ ti mỹ: “ga tỹ Judéia tá nĩ mãn sór tũg,” he mũ. Kỹ tóg tĩg mãn kỹ ga tỹ Galiléia ra tĩ mũ sir.

²³ Kỹ tóg cidade tỹ Nazaré tá jamãn mũ sir. Hã ra tóg rán kỹ nĩ gé, Nazaré ti. Vãsỹ Topē vỹ tó tĩ ũ tóg tag rán ja nĩ gé, kỹ tóg: “ti to ag tóg: Nazaré tá ke vē, henh ke mũ,” he ja tóg nĩ, Topē vỹ tỹ rán kỹ nĩ ki, Jesus to. Hã ra tóg ge nĩ.

3

João Batista tỹ ag jyvēn

(Mc 1.1-8; Lc 3.1-18; Jo 1.19-28)

¹ Kejēn João tóg ěmã tũg ja ra tĩ mũ, ga tỹ Judéia tá ga kórég ra. João Batista ěn vē. Ga kórég tá jē kỹ tóg ag jyvēn mũ sir.

² “Ājag jykre tovãnh nĩ, ũ tỹ kanhkã tá nĩ ěn tỹ tỹ ājag pã'i nĩ jé,” he tóg, João ti.

³ João ěn to tóg tag rán ja nĩ, vãsỹ Topē vỹ tó tĩ ěn ti, Isaías he mũ ěn, ha mē. “Ěmã tũg ja tá tóg jēnh ke mũ, ga kórég tá,” he ja tóg nĩ. “Tá tóg ag mỹ jamã hár(a) ke mũ sir. “Ěg Senhor kãtĩg ke jo vēnh jãnhkrigkrig nĩ,” he jé tóg ke mũ. “Ěpry kurég ājag tóg tĩ, ěmĩn kuryñh ājag tóg tĩ gé, ājag pã'i mág jun ken kỹ. Kỹ tag ri ke han nĩ, ājag jykre pãno

togvãnh nĩ, ěg Senhor kãtĩg ken jo,” he jé tóg ke mũ,” he ja tóg nĩ, Isaías ti, João to.

⁴ Jo João ěn kur tóg tỹ cavalo pãnĩ sór kyki tỹ há nĩ. Nén ũ fár tỹ tóg vēsógfĩn ja han tĩ gé. Ópã hã ko ti tĩ, mỹg mré hã, João ti.

⁵ Kỹ ag tóg ti tá junjun kãn mũ sir, cidade tỹ Jerusalém tá kãmũ kỹ, ga tỹ Judéia kar tá kãmũ kỹ, goj tỹ Jordão tá ke kar ag ke gé. João tá ag tóg junjun kãn mũ sir.

⁶ Kỹ tóg ag kygpég mũ sir, goj tỹ Jordão ki, ag tỹ: “Topē vỹ mranh ja sóg nĩgtĩ,” hen kỹ.

⁷ Kỹ ũ tỹ Fariseu he mũ ag vỹ ti tá junjun mũ gé sir, ũ tỹ Saduceu he mũ ag ke gé, pã'i ag. Ōn kỹ ag tóg ti to kãmũ mũ, ti tỹ ag kygpe jé. Kỹ tóg ag jyvēn tar han mũ sir, João ti. “Pỹn ri ke ājag tóg nỹtĩ, ājag jykre pãno tãvĩ nĩn kỹ,” he tóg ag mỹ. “Ũ nỹ ājag mỹ: “Topē jũ venh ke tũ ājag nĩ,” he tĩ’?

⁸ Ājag jykre si tovãnh nĩ, ājag tỹ ti jũ ve jãvãnh tĩn kỹ. Vēnh jykre há han nĩ, ěg tỹ ājag jykre tãg hã ve jé.

⁹ Hã ra ājag tóg jagnē mỹ: “Abraão vỹ tỹ ěg jóg'jóg ve nĩ, kỹ Topē hỹn tóg ěg to jũnh ke tũ nĩ, ěg tỹ tỹ Abraão krē'krē nỹtĩn tugrĩn,” he tĩ. Ke tũ vē hã ra. Ājag jykre kórég ěn to ājag tóg jagtar ke mũ, ha vemnĩ. Topē vỹ Abraão krē'krē hyn han ki kanhró nĩ, pó tag tỹ mỹr, ti tỹ Abraão krē'krē ve sór kỹ, Topē ti.

¹⁰ Hã ra tóg ājag tỹ tũ' henh ke mũ, ājag tỹ ājag jykre kórég tovãnh tũ nĩn kỹ. Ěg tỹ ka gỹn ri ke tóg nĩ. Ti kanēn vãnh kỹ ěg tóg ti gỹn tĩ, ti tỹ pĩ han jé. Ri ke han jé tóg ke mũ, Topē ti, ājag tỹ vēnh jykre há han sór tũ nĩn kỹ. Kỹ tóg pĩ ki ājag vãm ke mũ, Topē ti,” he tóg ag mỹ, João ti, Fariseu ag mỹ, Saduceu ag mỹ ke gé.

¹¹ Kỹ João tóg vēnh kar mỹ: “goj hã tỹ sóg ājag kygpég tĩ, ājag tỹ ājag jykre tovãnh kỹ,” he mũ. “Inh nón tóg kãtĩg mũ hã ra, Cristo ti. Inh kãfór ti nĩ. Tỹ sóg ti camarada nĩ jãvãnh nĩ, sỹ tỹ ti krēm ke pē jēn kỹ. Ěg camarada ag vỹ ěg pēn né gé mũgtĩ, ěg pēn to ró ti. Sỹ ti mỹ gé tĩg ke vē vē, hã ra sóg tỹ ti krēm ke pē nĩ, ti tỹ inh kãfór nĩn kỹ. Ěn hã tóg Topē kuprĩg tỹ ājag jagrē han ke mũ. Kỹ tóg tỹ pĩ nĩ ve nĩ. Ti tỹ ājag kygpenh ken hã vē,” he tóg, João ti, Jesus to.

¹² “Ti kãtĩg vỹ ěg tỹ rãgró rēn ri ke nĩ. Ti rēn kar kỹ ěg tóg ti fár pũn tĩ. Ti kanē hã vin

han ãg tóg tĩ. Cristo kãtĩg ken kũ tóg ge nĩnh mũ. Tĩ to há nỹtĩ ag mũ tóg: “ha kãmũ jẽg,” henh ke mũ. Tĩ to há nỹtĩ tũ ag vãm jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti.

João tỹ Jesus kypé
(Mc 1.9-11; Lc 3.21-22)

¹³ Ën kã kejẽn Jesus tóg João tá jun mũ gé sir, goj tỹ Jordão tá. Ga tỹ Galiléia tá tóg kãtĩ mũ. Kũ tóg João mũ: “ha inh kypé gé,” he mũ sir.

¹⁴ Hã ra tóg João mũ e tĩ, kũ tóg ti mũ: “ã hã tỹ inh kypenh ke vẽ vẽ,” he mũ. “Inh mũ tóg e tĩ, ã tỹ inh mũ: ha inh kypé, hen kũ,” he tóg mũ, João ti, Jesus mũ.

¹⁵ Hã ra Jesus tóg ti mũ: “hỹ,” he mũ. Hã ra tóg isỹ vẽn jykre kuryj han kãn há tĩ,” he tóg, João mũ. Kũ tóg ti kypég mũ sir.

¹⁶ Tĩ tỹ Jesus kype kar kũ ag tóg goj kãtã kãpa mũ sir. Kũ Jesus tóg kanhkã nor nĩ ãn vэг mũ, ha mẽ, kũ tóg Topẽ kuprĩg kãtère ãn vэг mũ. Sórãg ri ke tóg nĩ, ti kãtère ti. Jesus kri tóg kãtère mũ.

¹⁷ Kũ vẽn vĩ tóg mẽ há tĩ, kanhkã tá, kũ tóg: “inh kósin pir vэгtĩ,” he mũ. “Inh fe pẽ vэгtĩ,” he tóg, ã tỹ kanhkã tá vĩ mũ ti.

4

Japo tỹ Jesus krĩn kónãn sór
(Mc 1.12-13; Lc 4.1-13)

¹ Kũ Topẽ kuprĩg vỹ Jesus mũ: “ẽmã tũgja ra tĩg,” he mũ. Kũ tóg tĩ mũ. Ëmã tũgja tá nĩn kũ Japo vỹ ti tỹ ã jóg vĩ mranh han sór mũ, hã ra Jesus tóg ke jãvãnh nĩ.

² Kurã tỹ 40 (ke) han tóg, ẽmã tũgja tá nĩn ki. Kũ tóg jẽg tũ nĩ, kurã tỹ 40 (ke) ãn ki, kuty mré ke gé. Kar kũ tóg sir kókĩr mũ, vějẽn tũ nĩn kũ.

³ Kũ Japo tóg ti to kãtĩ mũ sir, ã tỹ ãg tỹ Topẽ vĩ mranh han sór mũ ãn ti. Kũ tóg Jesus mũ: “Topẽ kósin vỹ tỹ ã nĩ,” he mũ. “Ã tỹ tỹ Topẽ kósin nĩn kũ pó tag tỹ ẽmĩ han, ã tỹ kon jé,” he tóg ti mũ, Nén-Kórég ti, Jesus mũ.

⁴ Kũ Jesus tóg ti mũ: “hã ra tag tóg rán kũ nĩ, ha mẽ,” he mũ. “Ëg pi(jé) ẽmĩ tãvĩ jamẽn kũ rĩnrĩr mũgtĩ, hã ra ãg tóg Topẽ vỹ hã jamẽn kũ rĩnrĩr mũgtĩ, he tóg, Topẽ vỹ tỹ

rán kũ nĩ ki. Kũ tóg isỹ ti vỹ mranh jãvãnh tĩ, ẽmĩ to,” he tóg, Jesus ti, Nén-Kórég mũ.

⁵ Kũ Japo vỹ ti pére tĩ mũ, Jerusalém ra, cidade mág ãn ra. Tá ag tóg Topẽ jo ãn kri nỹtĩnh mũ mũ. Hã ra kãgnó tóg tá nĩ, Topẽ jo ãn mã tá.

⁶ Kũ Japo tóg Jesus mũ: “ã hã ne tóg tỹ Topẽ kósin nĩ,” he mũ. “Ha kema ki hũm,” he tóg. “Topẽ vỹ ki tag tóg rán kũ nĩ, hã vỹ: ã tỹ jẽgnẽ jafã ag mũ tóg tónh mũ, Topẽ ti, kũ ag tóg ã jy nĩgãn mũ, he mũ. Kũ ã tóg rỹj ke tũ nĩ. Æ pẽn vỹ rỹj ke tũ nĩ, ag tỹ ã ki rĩr kũ, he tóg, Topẽ vỹ tỹ rán kũ nĩ ki. Kũ ki kema hũm,” he tóg, Japo ti. “Rỹj ke tũ ã nĩ ã tỹ tỹ Topẽ kósin nĩn kũ,” he tóg, Nén-Kórég ti, Jesus mũ.

⁷ Kũ Jesus tóg ti mũ: “kũ tag vỹ rán kũ nĩ gé, ha mẽ,” he mũ. “Topẽ mũ: ã mũ ã tỹ tó ja ãn han mũ vỹ? he tũg nĩ, he tóg mũ gé, Topẽ vỹ tỹ rán kũ nĩ ki. Hã kũ sóg ti tỹ inh mũ nén to: “han ra,” he mũ ãn hã han tĩ, kũ sóg hũm ke tũ nĩ,” he tóg, Jesus ti, Nén-Kórég mũ.

⁸ Kũ Japo tóg ti mré tĩg mãn mũ. Pãnónh téj ra ag tóg mũ mũ sir. Kũ Japo tóg ti mũ ga kar ven kãn mũ, ga kri mũ kar ag ke gé. Tĩ sĩnvĩ kar ãn ven tóg ti mũ.

⁹ Kũ tóg ti mũ ke mũ. “Isũ vỹ, tag kar ti,” he tóg. “Hã ra sóg ã mũ tovãnh kãn sór mũ, ã tỹ ã jakrĩ tỹ krỹ' hen kũ, inh krẽm, inh mũ: Topẽ vỹ tỹ ã nĩ, he jé,” he tóg, Nén-Kórég ti, Jesus mũ.

¹⁰ Kũ Jesus tóg ti mũ: “ha tĩg, Satanás,” he mũ. “Ëg pã'i tỹ Topẽ hã krẽm ãg tóg ãg jakrĩ tỹ krỹ' he tĩ, ti hã to ãg tóg: Topẽ vỹ, he tĩ, hã kũ tóg rán kũ nĩ, Topẽ vỹ tỹ rán kũ nĩ ki,” he tóg, Jesus ti, Nén-Kórég mũ.

¹¹ Kũ Japo vỹ tóg sir tĩ mũ, ti tovãnh kũ. Kũ Topẽ tỹ jẽgnẽ jafã ag tóg sir ti tá junjun mũ, Jesus ki rĩr jé. Æ jóg vỹ mranh ja tũ tóg nĩ.

Jesus tỹ Galiléia tá Topẽ vỹ tó
(Mc 1.14-15; Lc 4.14-15)

¹² Kejẽn ag tóg João ség mũ sir, kũ Jesus tóg mẽg mũ, ag tỹ ti se ti. Kũ tóg ga tỹ Galiléia ra tĩ mũ, vẽn pēju jé.

¹³ Cidade tỹ Nazaré tá kãkutẽ kũ tóg cidade tỹ Cafarnaum ra tĩ mũ, tá nĩ jé, goj nig tá, Zebulom ag jamã tá, Naftali ag jamã tá.

14 Hã ra tag tóg rán ky ñi gé. Vãsý Topê ví tó tí tóg tag rán ja ñi, Isaías ti, ky tóg:

15 “Zebulom ag jamã tá ti ñinh mũ, Naftali ag jamã tá, goj nig tá, goj tý Jordão mã tá. Fóg ag jamã tá ti ñinh mũ, Israel tũ ag jamã tá, ù tý Topê ki kagtĩg ag jamã tá, goj nig tý Galiléia fyr ki.

16 Tá ag tóg Topê ki kagtĩg nýtĩ, hã ky tóg tá ag kri kuty ri ke ñi. Ti tý tá jun ky tóg ag kri kurãg ên ri ke han mũ, ag kanhrãn ky. Ag kãgter ke vë vë, hã ra tóg ag kanhrãn mũ ag krenkren jé,” he tóg, Topê ví rán ki. Ky tóg ge ñi, Jesus tý tá ñinh ky.

17 Ga ên tá ñi ky tóg ag jyvën mũ, ky tóg ag mý: “ãjag jykre si tovãnh ra,” he mũ, “ãjag tý ùri ù tý kanhkã tá ñi ên tý tý êg pã'i ñi ve jé,” he tóg, Jesus ti. Ti tý ù tý ki kagtĩg ag mý Topê ví tón hã vë.

*Jesus tý ã mré mũ tí ag jé prër
(Mc 1.16-20; Lc 5.1-11)*

18 Ky tóg kejën goj nig tý Galiléia ên fyr jagma tí mũ. Ky tóg tá ùn régre ag vëg mũ. Û vỹ tý Simão ñi, ag tý ù to: Pedro, he mũ tag ti. Ky ti jãvy vỹ tý André ñi. Kur tý pirã kugmĩ jafã tý ag tóg goj kãki fón mũ, pirã kugmĩ jé. Ag rãnhraj vë, pirã kugmĩg tí ag vë.

19 Ky Jesus tóg ag ve ky (tóg) ag to tí mũ sir. Ky tóg ag mré ví mũ. “Inh mré kãmũjêg,” he tóg mũ ag mý. “Pirã kugmĩ há ãjag nýtĩ. ãjag kanhrãn jé sóg ke mũ, ãjag tý êprã ke ag tý inh ki ge han jé,” he tóg ag mý, Jesus ti.

20 Ky ag tóg vësýmér ãjag tý nén tovãnh ky mũ mũ, ti mré, Pedro ti, André ti ke gé.

21 Ky ag tóg mũ mũ, goj fyr jagma. Ag mũ sĩ han mũ ra Jesus tóg ùn régre ù ag ve mân mũ gé. Tý ti Tiago ñi, Zebedeu kósin, ky ti jãvy vỹ tý João ñi gé. Canoa kãki ag nýtĩ, kur tý pirã kugmĩ jafã ki ag tóg han nýtĩ ñi. Ag panh vỹ ag mré ñi ñi. Ky Jesus tóg ag jé prër mũ sir.

22 Ky ag tóg vësýmér (ag tóg) ãjag tý nén tovãnh ky ti to kãmũ mũ, canoa tovãnh ky, ãjag panh ti tovãnh ky ke gé. Jesus mré ag tóg mũ mũ, Tiago ti, ti jãvy tý João ti ke gé.

*Jesus tý ag tý há' he
(Lc 6.17-19)*

23 Ky Jesus tóg ga tý Galiléia kar mĩ tí mũ sir, ag mré. Judeu ag vënh kanhrãn jafã

krëm tóg ag kanhrãn mũ. Ag mý tóg Topê ví sér tó mũ, ù tý kanhkã tá ñi tý tý êg pã'i ñi tí. Ûn kagyga kar ag hyn han tóg, fag kar ke gé, gĩr kar ke gé.

24 Hã ky ti kãme tóg vënh kar kri rũm mũ sir, ga tý Síria tá ke kar kri. Ky ag tóg sir ùn kagyga ag tatĩn kãmũ mũ, ti to, vënh kaga vënhmỹ han mũ ag mré hã, ky tóg ag tý há' he kãn mũ sir. Vënh jagrê kórég ag pan kãn tóg mũ gé. Û tý ter tí han mũ ag tý hághá' he tóg mũ gé, ùn grĩngrĩn ky nýtĩ ag tý ke gé, fag kar tý ke gé.

25 Hã ky ùn tý hën ri ke ag tóg ti mré mũ mũ sir. Û ag tóg ga tý Galiléia tá kãmũ mũ, ky ù ag tóg cidade tý Decápolis tá kãmũ mũ gé, cidade tý Jerusalém tá ke gé, ga tý Judéia tá ke gé, goj tý Jordão mã tá ke gé.

5

*Jesus tý ag kanhrãn
(Lc 6.20-23)*

1 Ûn e ag tý Jesus venh kãmũ ky tóg ag mré pãnónh ra tãpry mũ. Tá tóg ñi mũ, ky ti mré mũ tí ag tóg ti mré ñignĩ mũ, ti rã hã.

2 Ky tóg sir ag kanhrãn mũ, ag mý kãmén ky. Ky tóg ag mý tag tó mũ, ha mẽ.

3 “Topê vỹ ãjag ve há han mũ, ãjag tý: kórég inh ñi, hen ky. Sý Topê kuprig tý jagrën ky ñi tũ ñi ra sóg tý ùn kórég ñinh mũ vë, hemñi. Ky Topê vỹ ãjag ve há han mũ. Ky ãjag tóg ti tý tý êg pã'i ñi venh ke mũ, kanhkã tá,” he tóg, Jesus ti.

4 “Topê vỹ ãjag ve há han mũ, ãjag fỹn ky. Ky tóg ãjag fỹ ên tý tũ' henh ke mũ,” he tóg.

5 “Topê vỹ ãjag ve há han mũ, ãjag tý vënh kar mý komër hã vĩn ky. Ky ãjag tóg ga kar kri tý pã'i nýtĩnh ke mũ, ùn mág pë,” he tóg.

6 “Topê vỹ ãjag ve há han mũ, ãjag tý vënh jykre kuryj ve sór nýtĩn ky, ti tý ãjag mý ãjag kókĩr ri ke tĩn ky, ãjag tý vënh jykre kuryj ve sór ñinh ky. Ky ãjag tóg venh ke mũ,” he tóg.

7 “Topê vỹ ãjag ve há han mũ, ãjag tý jagnë jagãgtãn ky. Ky Topê vỹ ãjag jagãgtãn ke mũ gé,” he tóg.

8 “Topê vỹ ãjag ve há han mũ, ãjag jãnhkri nýtĩn ky. Ky ãjag tóg Topê venh mũ, ãjag jãnhkri nýtĩn ky,” he tóg.

9 “Topê vỹ ãjag ve há han mũ, ãjag tý jagnë krĩ tý kãnhvy' hen ky. Ky Topê tóg ãjag to:

“inh krê ag vê,” henh ke mũ, ãjag tỹ jagnê krĩ tỹ kãnhvy' hen kỹ,” he tóg.

10 “Topê vỹ ãjag ve há han mũ, ag tỹ vênh jykre kuryj to ãjag vóg kónãn mũ ra. Topê vỹ tỹ kanhkã tá ãjag pã'i nĩnh mũ, ag tỹ ti tugrĩn ãjag vóg kónãn mũ ra,” he tóg.

11 “Topê vỹ ãjag ve há han mũ, ag tỹ isugrĩn ãjag mỹ vĩ kónãn mũ ra, ag tỹ ãjag vóg kónãn mũ ra. Ag tỹ ón kỹ ãjag to vĩ vĩ he kỹ tóg há tĩ, ag tỹ ón kỹ ãjag jykre pãno tó mũ ra, isugrĩn.

12 Mỹ sér nỹtĩmnĩ, ãjag fe tỹ há' hemnĩ, ag tỹ ón kỹ ãjag kato vĩn kỹ. Kanhkã tá ãjag tóg nén kar há venh ke mũ, vênh kato. Ge ja ag tóg nĩgtĩ vãsỹ, Topê vĩ tó tĩ ag mỹ, ãjag jo ke ag mỹ. Ag ri kén ãjag tóg tag venh ke mũ,” he tóg, Jesus ti.

Sa to comparação

(Mc 9.50; Lc 14.34-35)

13 “Sa ri ke ãjag nỹtĩ, ãjag tỹ ga kri mũn kỹ. Sa kãhór nĩn kỹ ãg tóg ti tỹ sa há han mãn ki kagtĩg nỹtĩ. Kórég ti nĩgtĩ, ti kãhór nĩn kỹ. Kỹ ãg tóg ti vãm tĩ sir, kỹ tóg tũ' he tĩ sir,” he tóg, Jesus ti. Ti tỹ ãg tỹ ti jykre tovãnh ke tũ kãmén hã vê.

Jẽngrẽ kãme

(Mc 4.21-23; Lc 8.16-17)

14 “Ga kri mũn kỹ ãjag tóg jẽngrẽ ri ke nỹtĩ, ãjag tỹ vênh jykre há han kỹ, ag tỹ ãjag ki ve jé, Topê jykre há ti. Cidade mág vỹ ve há tĩgtĩ, kuvar há tá jé kỹ, ti tỹ pãnónh kri nỹn kỹ. Ti pi(jé) vênh péju kỹ nỹ'.

15 Ri ke ti nĩ, néj gru ti. Ëg tỹ ti grug kỹ ãg pi(jé) lata krêm ti fẽg tĩ'. Ti fẽg jafã kri ãg tóg ti fẽg tĩ. Kỹ vênh kar tóg ên vэг tĩ sir, ãn kãtã nỹtĩ kar ên ti.

16 Gemnĩ, néj gru ri ke nỹtĩmnĩ. Topê jykre han nĩ, vênh kar tỹ ãjag ki ve jé, ãjag jykre há ti. Hã kỹ ag tóg ãg jóg tỹ Topê mỹ vĩ há han mũ, ãg jóg tỹ kanhkã tá nĩ ên mỹ,” he tóg, Jesus ti.

Topê tỹ Moisés mỹ vênh jykre nĩv

17 “Ãjag hỹn iso: ti hã ne tóg Moisés tỹ ãg mỹ nén tó ja tỹ tũ' he sór mũ', he mũ, ti hã ne tóg Topê jykre ên tỹ tũ' he sór mũ', he ãjag hỹn tĩ. Vãsỹ Topê vĩ tó tĩ ag vỹ ãg mỹ tó ja nĩgtĩ, Topê jykre ên ti, hã ra tóg tỹ tũ' he sór mũ', he ãjag hỹn tĩ iso. Hã tũ vê. Sỹ ki króm kãn sór vê, Moisés tỹ nén tó ja ên ki, sỹ ki

króm kỹ sóg tỹ ãjag kanhrãnrãn kãn ke mũ,” he tóg.

18 “Topê vỹ ã jykre ên tỹ tũ' henh ke tũ nĩ, ha mẽ. Ga tỹ ver kanhkã mré nỹn kỹ tóg ã jykre tỹ tũ' henh ke tũ nĩ, ga tỹ ver tũ' he tũ nĩn kỹ. Sỹ ki króm kãn ke vê, kỹ tóg ki krov kãn kỹ nỹnh mũ, Topê jykre kar ti mỹr, ha mẽ,” he tóg.

19 “Kỹ ãjag tỹ tỹ tũ' he sór kỹ tóg kórég nỹ, ãjag tỹ ti vĩ pir tỹ tũ' he sór kỹ. ãjag tỹ ti vĩ pir to ã mỹ: han tũg nĩ, henh kỹ ãjag tóg tỹ ãn kãsir nỹtĩnh mũ, vênh kar krêm, kanhkã ki. ãjag tỹ hã ra han kãn kỹ ãjag tóg tỹ ãn mág nỹtĩnh mũ, ãjag tỹ vênh kar mỹ: “ki króm kãn sórmnĩ,” henh kỹ. Kỹ ãjag tóg tỹ ãn mág nỹtĩnh mũ, kanhkã tá,” he tóg, Jesus ti.

20 “Fariseu ag ri ke nỹtĩ sór tũg nĩ. Topê vĩ to professor ag ri ke nỹtĩ sór tũg nĩ gé. Ón kỹ ag tóg Topê vĩ ki króm tĩ, hã ra ag tóg ki króm há han tũ nĩgtĩ. Ag jykre pi(jé) kuryj nỹ'. ãjag tỹ kanhkã ve sór nỹtĩn kỹ vênh jykre kuryj han nĩ,” he tóg, Jesus ti.

Ëg tỹ jagnê to há nỹtĩnh ke to vênh jykre

21 “Topê tỹ vãsỹ ãg si ag jyvên mẽ ãjag huri, hã vỹ: ã tén tũg nĩ, he mũ. ã tỹ ã tén kỹ ag tóg ã senh ke mũ, ã tỹ ti mré ter jé, he ja tóg nĩ, Topê vĩ tỹ rán kỹ nĩ ki.

22 Sỹ ãri ãjag jyvên hã vê, ha mẽ. ã régre to ã fe tỹ gỹm ke tũg nĩ. ã tỹ ã régre to ã fe tỹ gỹm ke kỹ tóg ã tỹ ti tén ri ke nĩ. Kỹ tóg inh mỹ há tĩnh mũ, ag tỹ tag to ã se kỹ. Kỹ ã régre mỹ vĩ kónãn tũg nĩ gé. ã tỹ ã régre mỹ vĩ kónãn kỹ tóg inh mỹ há tĩnh mũ, ag tỹ tag to pã'i mág mỹ ã ven kỹ. Kỹ ã régre mỹ féfén tũg nĩ gé. ã tỹ ã régre mỹ féfén kỹ ã tóg nũgme ki kutênh ke mũ, inferno ki, pĩ ên ki,” he tóg, Jesus ti.

23 “Tag to jykren nĩ, ã tỹ Topê mỹ nén ã pũn sór kỹ. Topê jo ãn krêm. ã tỹ tá jên kỹ ã régre kar mĩ êkren nĩ. “Û mỹ iso jykren kónãn tũ nĩ vỹ?” he jé ã tóg ke mũ. “Inh mỹ ã jũ han tũ nĩ vỹ?” he jé ã tóg ke mũ.

24 Û tỹ ã to jykren kónãn kỹ ti venh tĩg nĩ ver, Topê mỹ nén ã pũn tovãnh nĩ ver. ã régre ên mỹ: “inh mỹ vênh pãte fón nĩ,” hemnĩ ver. Kar kỹ Topê mỹ nén ã pũn sórmnĩ sir, ã tỹ ã régre mré vĩ kar kỹ,” he tóg, Jesus ti.

25 “Kejĕn ã tóg ã mré ke ũ mÿ név(e) jĕ, kÿ tóg pã'i ag mÿ ã kãmén tĭg ke mũ. Ti tÿ pã'i ag mÿ tónh tĭg ke mũ ĕn ti to hã ti mré vĭmnĭ, ti mÿ: “kajãm jé sóg ke mũ,” hemnĭ. Ke tũ nĭ (mũ) ra pã'i vÿ ã jykre pãno venh ke mũ, kÿ tóg polĭcia mÿ: “ti se ra,” henh ke mũ sir, kÿ tóg sir ã senh mũ.

26 Ha mĕ, ki hã sóg tó mũ. Tá ã kãnhmar kãkutĕ mãn ke tũ nĭ. Ā tÿ kajãm kãn kar ã tóg kãkutĕ mãn mũ, tá, hĕn ri ke mũn,” he tóg, Jesus ti.

Ā prũ tũ fi mré nÿ tũ to vĕnh jykre

27 “Topĕ tÿ ĕg si ag jyvĕn ũ tag mĕ ãjag huri, ke gé, hã vÿ: “ã prũ tũ fi mré nÿ tũg nĭ,” he mũ.

28 Sÿ ũri ãjag jyvĕn hã vĕ, ha mĕ: ã tÿ ũn tÿtã ũ fi ki vĕ'ĭ kÿ tóg ã tÿ fi mré nÿ sÿ han ĕn ri ke nĭ sir, ã tÿ fi ki vĕ' ĭ mũ ti. Ā tÿ ũn tÿtã ũ fi mrĕ nÿr sór kÿ tóg ã tÿ fi mrĕ nÿr ri ke nĭ sir, ã tÿ fi to ĕn mũ ti. Ke tũg nĭ.

29 Ā tÿ nĕn ũ ki vĕ'ĭ tugrĭn Topĕ vĭ mranh kÿ ã kanĕ tÿ nám kemnĭ, ã tÿ ki vĕ'ĭ jagy han mãn tũ nĭ jé. Ā kyvó nĭn kÿ tóg jagy tĭ gé vĕ vĕ. Ā tÿ hã ra nũgme ki kutĕ kÿ tóg jagy kãfór nĭ. Jagy pĕ ti nĭ, ã tÿ inferno ki kutĕ ti. Kÿ tag hã ve sór tũg nĭ.

30 Ā tÿ ã nĭgé tÿ nĕn ũ kórég han kÿ ã nĭgnó kym nĭ, ã tÿ ke mãn tũ nĭ jé. Ā nĭgnó pir nĭn kÿ tóg jagy tĭ gé. Ā tÿ hã ra nũgme ki kutĕ kÿ tóg jagy kãfór nĭ sir, kÿ tag hã kamĕg nĭ,” he tóg, Jesus ti.

Ā prũ fón tũ to vĕnh jykre

(Mt 19.9; Mc 10.11-12; Lc 16.18)

31 “Tope tÿ ĕg si ag jyvĕn ũ hã vÿ nÿ gé, hã vÿ: “ã tÿ ã prũ fi fón sór nĭn kÿ tóg há tũ nÿ,” he mũ. “Ā tÿ ge ra fi fón sór nĭn kÿ fi mÿ vĕnh rán kÿ nĭm nĭ, fi tÿ vĕnh rán ma tĭg jé,” he ja tóg nĭ.

32 Sÿ ũri ãjag jyvĕn hã vĕ, ha mĕ: ãjag prũ fón tũg nĭ. Ā tÿ fi fón kÿ fi tÿ ũ mré nÿ mãn kÿ fi tóg ã tugrĭn Topĕ vĭ mranh mũ sir, ã tÿ tÿ fi mén pĕ ra. Fi tÿ ã jãvo vĕsóg ki ũ mré nÿ ja nĭn kÿ tóg há sĭ nÿ, ã tÿ fi mÿ: ha tĭg, hen kÿ. Kÿ fi mén tÿ fi fón kÿ fi tÿ prũg sór tũg nĭ gé. Ā prũ tũ fi vĕ, fi mén tÿ fi fón ja nĭn kÿ,” he tóg, Jesus ti.

Jagnĕ to ón ke tũ to vĕnh jykre

33 “Vãsÿ Topĕ tÿ ĕg si ag jyvĕn ũ tag mĕ ãjag tóg huri ke gé, hã vÿ: “jagnĕ mÿ ón tũg nĭ,” he mũ. “Ā tÿ ũ mÿ: Topĕ vÿ ki kanhró nĭ, hen kÿ ti mÿ ón sór tũg nĭ. Kÿ hã han nĭ gé, ã tÿ Topĕ mÿ: tag hã han jé sóg ke mũ, hen kÿ. Ón kÿ vĭ tũg nĭ,” he ja tóg nĭ, ĕg si ag mÿ, Topĕ ti.

34 Sÿ ũri ãjag jyvĕn hã vĕ, ha mĕ: “Topĕ vÿ ki kanhró nĭ,” he sór tũg nĭ, ón kÿ. “Ũ tÿ kanhkã tá nĭ ĕn vÿ ki kanhró nĭ,” he sór tũg nĭ gé, ón kÿ. Topĕ nĭgja vĕ, kanhkã tá, kÿ ón kÿ tag tó sór tũg nĭ.

35 Kÿ: “ũ tÿ ga kri ke ĕn vÿ ki kanhró nĭ,” he tũg nĭ gé. Topĕ tũ vĕ, ga ti, hã kÿ ón kÿ tag tó sór tũg nĭ. Kÿ: “ũ tÿ Jerusalém tá ke ag ki rĭr tĭ ĕn vÿ ki kanhró nĭ,” he tũg nĭ gé. Ēg pã'i mág tũ vĕ mÿr, Jerusalém ti, hã kÿ ón kÿ tag tó sór tũg nĭ.

36 Kÿ: “ũ tÿ inh krĭ han mũ ĕn vÿ ki kanhró nĭ,” he tũg nĭ gé. Ā tÿ ã gãnh kuprig sór mũ ra ã tóg ã tÿ nĕn tÿ ã gãnh kuprig ke mũ ĕn ki kagtĭg nĭ, ã tÿ ã gãnh sán sór mũ ra ã tóg ã tÿ nĕn tÿ sán ke mũ ĕn ki kagtĭg nĭ gé. Hã kÿ ón kÿ tag tó sór tũg nĭ gé.

37 Ki hã tómnĭ, jagnĕ mÿ, ón sór tũg nĭ. Ón kÿ Topĕ jiji tó sór tũg nĭ gé. Ũ tÿ ã mÿ ki hã tó kÿ: hÿ, hemnĭ. Ti tÿ ki hã ke tũ nĭn kÿ: vó, hemnĭ gé. Ā tÿ han ke nĭn kÿ: hej, hemnĭ. Ā tÿ han ke tũ nĭn kÿ: nejé, hemnĭ. Ki hã tómnĭ, jagnĕ mÿ. Ā tÿ ón sór kÿ ã tóg Nĕn-Kórég jykre hã han ke mũ. Ke tũg nĭ,” he tóg, Jesus ti.

Ēg tÿ vĕnh kajãm ke tũ to vĕnh jykre

(Lc 6.29-30)

38 “Topĕ tÿ ĕg si ag jyvĕn ũ tag mĕ ãjag huri, hã vÿ: “ũ tÿ ã kanĕ pir ki tãnh kÿ vĕnh kato ti kanĕ pir ũ ki tãnh nĭ gé,” he ja tóg nĭ. “Ũ tÿ ã jã pir ki tãnh kÿ mranh kÿ vĕnh kato ti jã pir ki tãnh kÿ mranh nĭ gé. Pãtĕn tũg nĭ,” he ja tóg nĭ, Topĕ ti.

39 Sÿ ũri ãjag jyvĕn mũn hã vĕ, ha mĕ: ũ tÿ ã vóg mũ ra ti vóg tũg nĭ. Ti tÿ ã jamĕ ki tãnh kÿ ti mÿ ã jamĕ ũ ti ven nĭ, ti tÿ ã mÿ ki tãnh jé gé.

40 Ti tÿ ã palitó mãn sór kÿ ti mÿ ã camisa mré nĭm nĭ gé.

41 Ti tỹ ã mỹ: “mũ nỹ, tag tá, kakó ja tá inh fón nĩ,” hen kỹ ti mré tĩg nĩ, hã ra ti mỹ: “kór há tá inh ã fón tĩg mũ ha,” hemnĩ.

42 Ti tỹ ã mỹ nén ù to: “inh mỹ nĩm,” hen kỹ ti mỹ nĩm nĩ. Ti tỹ ã mỹ: “inh mỹ prestar hemnĩ,” hen kỹ ti mỹ: vó, he tũg nĩ,” he tóg, Jesus ti.

Ëg tỹ ãg kato vãsãn mũ ag tó há nỹtĩnh ke (Lc 6.27-28, 32-36)

43 “Topẽ tỹ ãg si ag jyvẽn ù mẽ ãgag huri, hã vỹ: “ã mré ke ag to há nĩmnĩ, kỹ ù tỹ ã kato vãsãnsãn mũ ag to jũ nĩmnĩ gé,” he ja tóg nĩ, Topẽ ti.

44 Isỹ ùri ãgag jyvẽn hã vỹ, ha mẽ: ù tỹ ãgag kato vãsãnsãn mũ ag to há nỹtĩmnĩ, ù tỹ ãgag vóg kónãn mũ ag to Topẽ mré vĩmnĩ.

45 Hã ki ãgag tóg tỹ Topẽ krẽ nỹtĩ, ti ri ke han kỹ, ãgag jóg tỹ kanhkã tá nĩ ãn ri ke han kỹ. Ti hã ne tóg rã han', ti tỹ vẽn kar kri jẽngrẽg kỹ san jé, ùn jykre kuryj ag kri, ùn jykre pãno ag kri ke gé. Ta han ti ke gé, ti tỹ vẽn kar há han jé, ùn jykre kuryj ag, ùn jykre pãno ag ke gé. Ver tóg vẽn kar to há nĩ, Topẽ ti,” he tóg, Jesus ti.

46 “Ãgag mré ke ù ag tóg ãgag to há nỹtĩ. ãgag tỹ tag ag hã to há nỹtĩn kỹ tóg tỹ nén ù tũ tĩ ver. Ùn jykre kórég ag vỹ ge nỹtĩgtĩ gé, governo mỹ jãnkamy mäg tĩ ag. ù tỹ ãgag to há nỹtĩ ag hã to ag tóg há nỹtĩ, vẽn kato. Há ti nĩ, hã ra tóg tỹ nén ù tũ nĩ ver.

47 Kỹ ãgag tỹ ãgag mré ke ag hã mỹ: ã mỹ há? hen kỹ tóg tỹ nén ù tũ nĩ gé ver. ù tỹ Topẽ vĩ ki kagtĩg ag vỹ ge nỹtĩgtĩ gé. ãgag mré ke ag hã mỹ ag tóg: ã mỹ há? he tĩ gé, hã ra tóg tỹ nén ù tũ nĩ ver.

48 Hã kỹ vẽn kar to vẽn jykre kuryj han kỹ nỹtĩmnĩ, ù tỹ ãgag kato vãsãnsãn mũ ag mré hã, ãg jóg tỹ kanhkã tá nĩ ãn ri ke han nĩ. Ti hã ne tóg vẽn kar to vẽn jykre kuryj han kỹ nĩ nĩ'. Ti ri ke han nĩ,” he tóg, Jesus ti.

6

Ëg tỹ ù jagãgtãn ke to vẽn jykre

1 “Kỹ ãgag tỹ Topẽ jykre han sór kỹ ù tỹ vẽn jykre pãno han mũ ag jykre ri ke han tũg nĩ. Ón kỹ ag tóg vẽn kar rĩnve Topẽ jykre han sór tĩ, vẽn kar tỹ ag ve jé, ag tỹ Topẽ jykre han mũ ãn ti. Kar kỹ ag tóg hã

ra hã tũ han tĩ sir. Kỹ ag ri ke han tũg nĩ, ke tũ nĩ (mũ) ra ãg jóg tỹ kanhkã tá nĩ ãn vỹ tóg ãgag mỹ ven ke tũ nĩ, ãgag tỹ ãg jóg jykre han mũ ãn kaja ti,” he tóg.

2 “Hã kỹ ãgag tỹ ùn jagãgtar ag jagãgtãn kỹ ù mỹ: “ag jagãgtãn inh tĩ,” he tũg nĩ. ù tỹ vẽn jykre régre han mũ ag jykre ri ke han tũg nĩ. Ag tỹ ón kỹ ù jagãgtãn kỹ ag tóg ãgag jagma mũ kỹ (ag tóg) vẽn kar mỹ: “ag jagãgtãn inh tĩ,” he tĩ. Ëg vẽn kanhrãn jafã jo ãn krẽm ag tóg tag tó tĩ gé. Ag tỹ ãgag ke ag tỹ ag mỹ vĩ há han ve sór vỹ, hã jé ag tóg ón kỹ ùn jagtar ag jagãgtãn tĩ. Ag ganho hã vỹ, ãgag ke ag tỹ ag mỹ vẽn vĩ há tó mũ ãn ti. Kanhkã tá ag ganho ù ve mãn ke tũ nĩ ha. ãgag mỹ sóg ki hã tó mũ, ha mẽ,” he tóg, Jesus ti.

3 “Ag ri ke han tũg nĩ. Ùn jagtar ag jagãgtãn nĩ. ù mỹ tó tũg nĩ, ãgag tỹ ùn jagãgtãn mũ ãn ti, ãgag mré ke fag mỹ tó tũg nĩ gé.

4 Kỹ ãgag tỹ ag jagãgtãn kỹ ãg jóg tỹ kanhkã tá nĩ ãn tóg ãgag vég mũ sir, kỹ tóg ãgag mỹ nĩm ke mũ sir, ãgag ganho ti. Ëg tỹ vẽn vatánh tá nén han mũ ãn ve kãn tóg tĩ (mỹr), Topẽ ti,” he tóg, Jesus ti.

Ëg tỹ Topẽ mré vẽn to vẽn jykre (Lc 11.2-4)

5 “Kỹ ãgag tỹ Topẽ mré vẽn kỹ ù tỹ vẽn jykre régre han mũ ãn ag jykre ri ke han tũg nĩ gé. Ag tỹ ón kỹ Topẽ mré vĩ kỹ ag tóg ãgag vẽn kanhrãn jafã jo ãn kãki jẽgĩ kỹ nỹtĩ, ke tũ nĩ kỹ ãn kri, ãn to hã. Kỹ vẽn kar vỹ ag tỹ Topẽ mré vĩ mũ tag vég mũ sir. Kanhkã tá ag tóg ganho ù ve mãn ke tũ nĩ ha. ãgag mỹ sóg ki hã tó mũ, ha mẽ.

6 Ag jãvo ãgag tỹ Topẽ mré vẽn kỹ ãgag ãn kãra gemnĩ. Kỹ jãnkã nĩfénh nĩ. Kỹ tá Topẽ mré vĩmnĩ sir, ãg jóg mré, ãg tỹ ùn vég tũ ãn mré. Kỹ tóg kanhkã tá ãgag mỹ nĩm ke mũ, ãgag ganho ti. Ëg tỹ vẽn vatánh tá nén han mũ ãn vég tóg tĩ (mỹr), Topẽ ti,” he tóg, Jesus ti.

7 “ãgag tỹ ti mré vẽn kỹ fagrĩnh mỹ ti mré vẽn mág han tũg nĩ. ù tỹ Topẽ vĩ ki kagtĩg ag ri ke han tũg nĩ. ãgag jãnjãn kỹ ag tóg ón kỹ vĩ mág han tĩ. “Ëg tỹ vĩ mág han kỹ ti hỹn ãg vĩ mẽg mũ,” he ag tóg tĩ, ón kỹ.

⁸ Ag ri ke han tũg nĩ. Ęg jóg vỹ nén kar ki kanhró nĩ, ãjag tỹ ti mỹ tó tú ra tóg ki kanhró nĩ,” he tóg.

⁹ “Ājag tỹ Topẽ mré vĩ kỹ tag tómnĩ, ha mẽ:

“Ęg jóg mág, kanhkã tá ã tóg nĩ nĩ.

Ā jiji tó Ęg tóg tĩ, kỹ vẽn kar jé ã tỹ tỹ ùn mág nĩ vé.

¹⁰ Ęg jé kãnhmar ã tỹ tỹ Ęg pã'i nĩ vé.

Vẽn kar jé ã tỹ nén to jykrén mũ ãn han sór, ga tá ke kar, ag jé kanhkã tá ke kar ag ri ke han.

¹¹ Ęg mỹ ùri Ęg jẽn ti nĩm, Ęg tỹ kurã kar ki ko tĩ ãn.

¹² Kỹ Ęg mỹ vẽn pãte fón nĩ, Ęg tỹ ã vĩ mranh ja ti.

Hã jé Ęg tóg Ęg tỹ jagnẽ to jũ tỹ jagnẽ mỹ vẽn pãte fón ke mũ gé.

¹³ Kỹ Ęg tỹ ã vĩ mranh sór kỹ Ęg kren han nĩ, Ęg tỹn mranh tũ nĩ jé.

Nén-Kórég jo Ęg vemnĩ.

Ā hã ne tóg tar nĩ'.

Ā hã ne tóg mág nĩ inhhã'.

Ā jykre tóg tũ' henh ke tũ nĩ,”

hemnĩ, Topẽ mỹ,” he tóg, Jesus ti.

¹⁴ “Hỹ, ge ti nĩ,” he tóg. “Ũ tỹ ãjag to jũ kỹ ti mỹ vẽn pãte fón nĩ. Ũ tỹ ãjag mỹ vĩ kónãn kỹ ti mỹ vẽn pãte fón nĩ gé. Ājag tỹ gen kỹ Ęg jóg vỹ ãjag mỹ vẽn pãte fón ke mũ gé.

¹⁵ Ājag tỹ tag han tũ nĩn kỹ, kỹ Ęg jóg tóg ãjag mỹ vẽn pãte fón ke tũ nĩ gé, ãjag tỹ ti vĩ mranh ja ti,” he tóg, Jesus ti.

Ęg vãkre to vẽn jykre

¹⁶ “Kỹ ãjag vãkre kỹ fe ù nỹtĩ tũg nĩ, ãjag tỹ Topẽ mỹ há nỹtĩ jé jẽg tũ nỹtĩn kỹ. Vãkre ki ù tỹ vẽn jykre régre han mũ ag jykre ri ke han tũg nĩ. Ag tỹ ón kỹ vãkre kỹ ag tóg fe ù nỹtĩnh mũ sir, vẽn kar tỹ ag vãkre ve jé. Ag ganho hã vẽn. Kanhkã tá ag tóg ganho ù vẽn ke tũ nĩ ha. Ājag mỹ sóg ki hã tó mũ, ha mẽ.

¹⁷ Ājag vãkre kỹ ãjag gãnh tãg nĩ, ãjag jamẽ kupemnĩ, festa han nỹtĩ ve nĩmnĩ, ãjag vãkren kỹ.

¹⁸ Hã kỹ ag tóg vég tũ nĩ, ãjag vãkrég mũ ti. Ęg jóg hã ne vég mũ inhhã', Ęg tỹ ùn vég tũ ãn hã vỹ vég mũ. Kỹ tóg kanhkã tá ãjag mỹ nĩm ke mũ, ãjag ganho ti. Ęg tỹ vẽn vatãnh

tá nén han mũ vég tóg tĩ (mỹr), Topẽ tĩ,” he tóg, Jesus ti.

Ęg rico to vẽn jykre

(Lc 12.33-34)

¹⁹ “Ga kri mũn kỹ rícon ke to vãsãn sór tũg nĩ. Ga vỹ ãjag tỹ nén kar ti konh ke mũ, ãjag tỹ rico hã to vãsãn mũ ra. Kỹ ãjag jãnkamy vỹ vẽn jãgfanh ke mũ gé sir, ti e nỹtĩn kỹ. Kỹ ag tóg pigju kỹ ma mũnh ke mũ gé sir, ãjag tỹ nén ti, ti e nỹtĩn kỹ.

²⁰ Ājag tỹ inhhã kanhkã tá tũ mág pẽ nỹtĩn kỹ tóg inhhã ãjag mỹ há tĩnh mũ. Tá ti pi(jé) tỹ ga nĩ', ãjag tũ ti, tá ti pi(jé) vẽn jãgfanh mũ'. Tá ag pi(jé) péju kỹ ma mũnh mũ'. Hã kỹ tá ãjag tũ vin han sórmnĩ.

²¹ Ājag tỹ ga kri tỹ nén ù mág nỹtĩn kỹ ãjag tóg ga kri mũ mág sór mũ. Ājag tỹ hã ra kanhkã tá tỹ nén ù mág nỹtĩn kỹ ãjag tóg kanhkã ra mũ sór mũ, kỹ tag hã ne há nĩ’,” he tóg, Jesus ti.

Ęg kanẽ tỹ Ęg mỹ kurã han

(Lc 11.34-36)

²² “Ęg kanẽ tỹ Ęg vég tĩ. Kỹ tóg tỹ Ęg mỹ kurã ri ke nĩ, Ęg kanẽ ti, ti há nĩn kỹ. Tỹ Ęg tóg kurã ve há han tĩ, Ęg kanẽ há nĩn kỹ.

²³ Ęg kanẽ kórég nỹtĩn kỹ tóg Ęg mỹ kuty tĩnh mũ. Kỹ tóg Ęg mỹ kurã vég tĩ ãn mỹ (tóg) kuty nĩ sir, kỹ kuty tag vỹ kuty kar kãfór nĩ. Ge ti nĩ, Ęg jykre kórég nĩn kỹ. Ęg kanẽ kórég ri ke vẽn sir, Ęg jykre kórég ti,” he tóg, Jesus ti.

Ęg tỹ ga kri rico to vãsãn sór ke tũ

(Lc 16.13; 12.22-31)

²⁴ “Ā jagrẽ régre nĩn kỹ tóg vẽnhmỹ tĩ. Ā tỹ Topẽ hã tỹ jagrẽ nĩn kỹ jãnkamy tãn ãn tỹ jagrẽ nĩ sór tũg nĩ. Ā tỹ jãnkamy e ve sór kỹ ti hã mĩ ãkren kỹ ti hã vỹ tỹ ã jagrẽ nĩnh mũ. Kỹ Ęg tóg Topẽ tỹ Ęg mỹ nén tó mũ ãn to jykrén há han tũ nĩgtĩ. Ā tỹ Topẽ to há nĩn kỹ ã tóg sir ga kri rico to vãsãn sór ke tũ nĩ. Ā tỹ ga kri rico nĩ sór kỹ ã tóg Topẽ mĩ ãkreg tũ nĩ, hã vemnĩ,” he tóg, Jesus ti.

²⁵ “Hã kỹ sóg ãjag mỹ tó mũ. Ājag tỹ nén ve sór mág mũ to krĩ kufy han tũg nĩ. “Inh hỹn ùri ne konh mũ', inh hỹn ne tunh mũ'?” he tũg nĩ. Topẽ tỹ Ęg han ja vẽn mỹr, Ęg tỹ ga kri mũ jé. Hã kỹ tóg Ęg mỹ Ęg jẽn ki rĩr mũ gé sir, Ęg kur ki ke gé, Topẽ ti.

26 Sēsī to jykrén nī. Ag mǝ ēkrān tī? Vó. Ag mǝ pājó krēm vin tī? Vó, ke tū ag tóg nǝgtī. Ge ra ěg jóg tǝ kanhkā tá nī ěn tóg ag ki rīr nī nī. Ājag mǝ jēsī kāfór tū nǝtī', Topē mǝ'? Vó, sēsī kāfór ājag tóg nǝtī.

27 Topē tǝ ěg kā ũ jé prēr kǝ ěg tóg ter ke mǝ, ěg ter sór tū ra. Ter jé ěg tóg ke mǝ gé, ěg tǝ to krī kufy han mǝ ra. ěg krī kufy ěn pi(jé) ěg kren han mǝ'.

28 Kǝ kur to krī kufy han tǝg nī gé. Ka fej hā to jykrén nī. Jatun mǝ tóg mog tī. Rānhrāj tū tóg nǝgtī, kur han tū tóg nǝgtī.

29 Hā ra tóg sīnvī nǝtī, ka fej ti. Kǝ pā'i mág tǝ Salomāo kur tóg ri ke tū nǝgtī, ti sīnvī ra, vēnh kar kur sīnvī kāfór ti nī, Salomāo kur ti. Hā ra tóg ka fej sīnvī ri ke tū nī. Ki hā sóg tó mǝ mǝr.

30 Topē hā ne ka fej sīnvī han, tǝ tóg kur sīnvī ri ke nī, ka fej ti. Hā ra tóg kānhmar kāgter tī, ka fej ti, ti sīnvī ra. Ūri tóg há nǝtī. Kǝ tóg vaj kǝ kógungun kǝ pūr mǝ sir, re mré. Hā kǝ Topē tóg ājag ki rīr kāfór han mǝ, ājag kur mré hā. Hā kǝ Topē ki ge kǝ nǝtīmni, ti vī kri fi kǝ.

31 Krī kufy han tǝg nī. “Inh hǝn ne konh mǝ'? Inh hǝn ne kron mǝ'? Inh hǝn ne tunh mǝ'?” he tǝg nī.

32 Ū tǝ Topē vī ki kagtǝg ag vǝ tag to jykrén mág tī, hā ra ěg jóg tǝ Topē vǝ ěg vég tī, ěg tǝ nén ve sór mág mǝ ti. Kǝ to krī kufy han tǝg nī. Ti hā ne ěg vég mǝ, ěg jóg tǝ Topē ti.

33 Topē tǝ tǝ ěg pā'i nī ěn hā ve sórmni. Kǝ tag hā to vāsān nī. Ti jykre kuryj tag hā to vāsān nī. Kǝ tóg ājag mǝ ājag tǝ nén ve sór mág mǝ ěn tǝ ājag mǝ vin ke mǝ sir.

34 Hā kǝ ājag tǝ vaj kǝ nén venh ke to krī kufy han tǝg nī. Vaj kǝ ājag tóg venh ke mǝ, kǝ ājag tóg to jykrén ke mǝ sir. Ūri ājag tǝ nén tǝ ūri vég mǝ hā to jykrén há han nī. Ājag tǝ ūri nén ũ jagy vég mǝ vǝ há nī, kǝ ājag tǝ vaj kǝ nén venh ke to jykrén tǝg nī, ūri,” he tóg, Jesus ti.

7

*ěg tǝ ũ to jykrén kónān ke tū
(Lc 6.37-38, 41-42)*

1 “Ā régre to jykrén kónān tǝg nī, ti jykre kórég ra. Kǝ Topē vǝ ā to jykrén kónān ke tū nī gé.

2 Ā tǝ ũ to jykrén mǝ ěn ri ke han jé tóg ke mǝ, Topē ti, ā mǝ. Ā tǝ ũ mǝ kāmūn mǝ ri ke han jé tóg ke mǝ, ā mǝ, Topē ti.

3 Jykre kórég mág ā tóg nī gé, hā ra ā régre jykre pāno sī ěn ne ā mǝ kórég nǝ'.

4 Kǝ ā hā ne tóg ā régre mǝ: ā jykre kórég kurynh jé sóg ke mǝ, he mǝ', ā tǝ ā jykre pāno tāvī ěn kurynh jāvānh (hā) ra'.

5 Ke tǝg nī. Ke tū nī (mǝ) ra ā tóg jykre régre nǝtī. Ā jykre kurynh vén nī. Kar kǝ ā tóg sir ā régre jykre kurynh há han mǝ,” he tóg, Jesus ti.

6 “Hā ra cachorro jykre ri ke ag mǝ Topē jykre sīnvī tó tǝg nī. Porco jykre ri ke ag mǝ Topē jykre sīnvī ěn tó tǝg nī gé. Jykre kavėj ag nǝtī, hā kǝ ag tóg Topē jykre to é henh ke mǝ. Ti tǝ tū' he sór ag tóg tī, ti sān kǝ, Topē jykre sīnvī ěn ti. Kar kǝ ag tóg sir ā mré vēnh génh sór mǝ gé, ha vemni, ā tǝ ag mǝ Topē jykre sīnvī ěn tó kǝ,” he tóg, Jesus ti.

*Topē tǝ tǝ ũn vī há nī
(Lc 11.9-13)*

7 “Topē mǝ nén kar to vīmni, kǝ tóg ājag mǝ han mǝ. Ājag tǝ ti mǝ nén ũ to vī mǝ ěn jāvānh nī, kǝ ājag tóg venh ke mǝ. Ti mré vī kǝ ěg tǝ ti jānkā tǝ tórón tórón ke ěn ri ke han nī. Kǝ tóg ājag mǝ nón ri ke han mǝ sir, ti tǝ ājag mǝ ājag tǝ nén to vī mǝ ěn han kǝ.

8 Hǝ, hā vē. Ājag tǝ ti mǝ nén (ũ) to vīn kǝ tóg ājag mǝ han mǝ sir. Ājag tǝ ti jāvānh kǝ ājag tóg ti venh mǝ sir. Ājag tǝ ěg tǝ jānkā tǝ tórón tórón ke ri ke han kǝ tóg ājag mǝ nón ri ke han mǝ sir,” he tóg.

9 “Kejēn ājag kósin tóg ājag mǝ ěmī to vī mǝ. Kǝ ājag pi(jé) ti mǝ pó nīm ke mǝ'. Ti mǝ ājag tóg ěmī hā nīm ke mǝ.

10 Ājag kósin tǝ ājag mǝ pirā to vīn kǝ, kǝ ājag pi(jé) ti mǝ pǝn nīm ke mǝ'. Pirā hā nīm jé ājag tóg ke mǝ.

11 Jykre pāno ājag nǝtī. Ge ra ājag tóg ājag krē mǝ nén ũ há vin tī. Ge ti nī gé, ājag tǝ Topē mǝ nén ũ to vīn kǝ. Nén ũ há hā nīm jé tóg ke mǝ. Hā ra tóg ājag kāfór han tī, ěg jóg tǝ kanhkā tá nī ti. Ājag tǝ ti mǝ nén (ũ) to vīn kǝ tóg ājag mǝ nén ũ há tāvī han tī mǝr,” he tóg.

12 “Ājag tǝ ājag mré ke ũ to: “ti tǝ ěg mǝ tag han há tóg tī vē,” he mǝ ra ěg hā tóg ti mǝ

han ke mũ. Moisés tỹ ẽg jyvẽn hã vễ, Topẽ vĩ tó tĩ ag tỹ ẽg jyvẽn hã vễ,” he tóg, Jesus ti.

*Jãnkã régre
(Lc 13.24)*

13 “Ủ tỹ inh ki rã mũ vỹ tỹ jãnkã sĩ fĩn rãm ke ri ke nĩ. Jãnkã sĩ fĩn rãm jé ẽg tóg vãsãn tĩ. Ri ke ti nĩ, ủ tỹ inh ki rãnh ke mũ ti. Jãnkã mág vỹ nĩ gé. Hã ra ủ tỹ fĩn rãm ke mũ ag vỹ kãgter pẽ han ke mũ. Ajag tỹ jãnkã mág ẽn fĩn rãm sór kỹ tóg ver jagy tũ nĩ, fĩn rãm há tóg tĩ. Kỹ nũgme to ẽpry jagma tĩg, pĩ to ẽmĩn jagma tĩg pi(jé) jagy tĩ', ti mág pẽ nĩn kỹ. Hã kỹ ủ tỹ hẽn ri ke ag vỹ jagma mũ mũ. Kar kỹ ag tóg kãgter pẽ han mũ sir, pĩ ki vár kỹ.

14 Ag jãvo jãnkã sĩ ẽn fĩn rãm nĩ, ajag tỹ rĩr krỹg ja tũ ve jé. Sĩ ti nĩ, kanhkã to ẽpry ti, kanhkã to ẽmĩn ti. Ủn pipir ag vỹ jagma mũnh mũ. Aj sĩ san kỹ tóg vég tũ sag tĩ, hã kỹ ủ tỹ jagma mũnh ke mũ ag vỹ pipir nỹtĩ,” he tóg, Jesus ti.

*Ón kỹ Topẽ vĩ tó tĩ ag
(Lc 6.43-44)*

15 “Ón kỹ Topẽ vĩ tó tĩ ẽn ag vĩ kri fig tũg nĩ. Há nỹtĩ ve ag tóg nỹtĩ, hã ra ag tóg ajag kókén sór nỹtĩ. Ajag kókén sór to ag tóg mĩg jũ ẽn ri ke nỹtĩ, mỹr, ha mẽ.

16 Ajag tỹ ag jykre tugnỹm kỹ ajag tóg ag tỹ Topẽ vĩ mranh mũ ẽn ki kanhró nỹtĩ. Ha vé, vãn h tỹ jóhó ki ẽg tóg uva vég tũ nĩgtĩ mỹr. Kỹ ẽg tóg sónh ki pẽnva vég tũ nĩgtĩ gé.

17 Ka vỹ ge nỹgtĩ. Ti há nĩn kỹ tóg kanẽ há han tĩ, kỹ ẽg tóg ko tĩ. Ti kórég nĩn kỹ tóg kanẽ kórég han tĩ, kỹ ẽg pi(jé) ko tĩ'.

18 Ka há vỹ kanẽn kónãn ki kagtĩg nĩ, kỹ ka kórég vỹ kanẽ há han ki kagtĩg nĩ gé.

19 Kỹ ẽg tóg ka kórég ẽn gỹn tĩ, tỹ ẽg pĩ han tĩ. Ka tỹ kanẽ há han vãn h ẽn tỹ ẽg pĩnh ti.

20 Ge ti nĩgtĩ, ón kỹ Topẽ vĩ tó tĩ ag tỹ. Ag tỹ Topẽ vĩ mrynhmranh kỹ ag tóg ón kỹ Topẽ vĩ tó tĩ. Ag tỹ nẽn han mũ ki ẽg tóg ag jykre kórég vég mũ,” he tóg, Jesus ti.

*Ẽg tỹ Topẽ vĩ ki króm ke
(Lc 13.25-27)*

21 “Vẽn h kar tóg iso: “pã'i vễ, pã'i vễ,” he tĩ. Hã ra ủ ag tóg Topẽ tỹ nẽn tó mũ ẽn han vãn h nỹtĩgtĩ. Hã kỹ ag tóg Topẽ tỹ tỹ ẽg pã'i mág nĩ venh ke tũ nĩ. Ủ tỹ inh jóg vĩ han mũ ẽn ag hã vỹ Topẽ tỹ tỹ ẽg pã'i nĩ venh ke mũ.

22 Kurã ẽn kã, isỹ vẽn h kar jykre tugnỹm ke kurã ẽn kã ag tóg inh mỹ tag tónh mũ, ha mẽ. “Senhor, Senhor, ã jykre tó ẽg mỹr,” he jé ag tóg ke mũ. “Aj jykre hã ki ẽkrén kỹ ẽg tóg ẽg tỹ nẽn han vãn h han ja nĩgtĩ mỹr. Aj jykre hã tỹ ẽg tóg vẽn h jagrẽ kórég pan mỹr,” he jé ag tóg ke mũ, inh mỹ.

23 Hã ra sóg ag mỹ: “ajag pi(jé) tỹ inh mré ke nỹtĩ,” henh ke mũ. “Ajag ki kagtĩg sóg nĩ mỹr. Ha mũ jẽg. Jykre kórég ajag tóg nỹtĩ,” he jé sóg ke mũ, ủ tỹ inh panh vĩ han vãn h ag mỹ,” he tóg, Jesus ti.

*Ỉn nũna gunh gunh kãme
(Lc 6.47-49)*

24 “Ha mẽ, inh vĩ mẽg ajag tóg nỹtĩ,” he tóg. “Ajag tỹ inh vĩ ki króm kỹ ajag tóg sir ùn há ri ke nỹtĩ. Ỉn han ken kỹ tóg to jykrén mũ. To jykrén há nĩn kỹ tóg ga kũm kỹ pãró kri ỉn nũna ka fẽg mũ sir.

25 Kỹ vãn h ta tóg kutẽ mũ, kỹ goj vỹ var mũ sir. Kóho jũ vỹ kãtĩ mũ, ỉn to, hã ra tóg kutẽ tũ nĩ sir, ỉn ti. Pãró kri tóg nỹtĩ, ti nũna ti, hã kỹ tóg kutẽ tũ nĩ. Ge ti nĩ, ajag tỹ inh vĩ kri fi kỹ.

26 Ajag tỹ inh vĩ mẽg mũ ra ki króm tũ nĩn kỹ ajag tóg ùn jykre kórég ri ke nỹtĩ. Ỉn han ken kỹ tóg to jykrén kónãn mũ, kỹ tóg ga tỹ rỹnh rỹj hã ki ka fẽg mũ, krĩg mỹ, ỉn nũna ti.

27 Kỹ ta tóg kutẽ mũ, kỹ goj vỹ var mũ sir. Kóho jũ vỹ kãtĩ mũ gé, ỉn to, kỹ ỉn tóg vom ke tere kỹ kutẽ mũ sir. Mráj kãn tóg mũ sir, ỉn ti. Ge ti nĩ, ajag tỹ inh vĩ kri fig tũ nĩn kỹ,” he tóg, Jesus ti.

Jesus vĩ tỹ vẽn h kar vĩ kãfór nĩ

28 Hã ki Jesus tóg krỹg he mũ sir, ag kanhrãn ki. Kỹ tóg vẽn h kar mỹ e tĩ sir, ti vĩ ti.

29 Ti vĩ tóg vẽn h kar vĩ kãfór nĩ, Topẽ vĩ to professor ag vĩ kãfór ti nĩ, kỹ tóg pã'i vĩ kãfór pẽ nĩ gé, ti vĩ ti. Hã kỹ tóg ki hã tó mũ. Kỹ tóg ag mỹ e tĩ sir.

8

*Jesus tỹ ùn kaga kren vãn h tỹ há' he
(Mc 1.40-45; Lc 5.12-16)*

1 Jesus tỹ ag mỹ tó kãn kỹ tóg pãnónh ẽn to tere mũ sir. Kỹ ùn e ẽn ag tóg ti nón mũ mũ sir.

² Kÿ vâhã ù tóg ti tá jun mũ. Vênh kaga kren vânh han kÿ tóg nĩ, vênh kaga tÿ lepra he mũ ên, ù tÿ tá jun mũ ti. Kÿ tóg ti krêm grĩnh ke kÿ ã jakrĩ tÿ jê nĩ, kÿ tóg ti mÿ: “Senhor,” he mũ. “Ã mÿ isÿ há' he sór tũ nĩ? Ã há tóg isÿ há henh mũ, ã tÿ isÿ há' he sór kÿ,” he tóg ti mÿ.

³ Kÿ Jesus tóg ti mÿ: “hej,” he mũ. “To há sóg nĩ, há' he ja há ã tóg nĩ,” he tóg ti mÿ, Jesus ti. Kÿ tóg ti kaga kren vânh ên tÿ kren han mũ vêsÿmér. Jãnhkri tóg nĩ, ti fár ti.

⁴ Kÿ Jesus tóg ti mÿ: “ker ù mÿ tó hê', ã han tag ti,” he mũ. “Ha tÿg, Topê tũ ki rĩr tĩ to. Ti hã mÿ tómnĩ. Kÿ ti mÿ nén ù nĩm nĩ, ti tÿ Topê mÿ pũn jé, Moisés tÿ vãsÿ êg mÿ nén tó ja ên ti. Hã tugrĩn vênh kar vÿ ã tÿ há' he mũ tag ki kanhrãn mũ,” he tóg ti mÿ, Jesus ti. Kÿ tóg ti mũ, há' hen kÿ.

Jesus tÿ pã'i mág camarada tÿ há' he (Lc 7.1-10)

⁵ Kÿ Jesus tóg kejên cidade tÿ Cafarnaum tá jun mũ. Kÿ fóg tÿ capitão tóg ti venh kãti mũ, ti mÿ nén ù to vĩ jé.

⁶ Kÿ tóg ti mÿ: “Senhor,” he mũ. “Inh camarada tóg nÿ nĩ, inh ãn tá. Kãnhgrĩn kãn kÿ tóg nÿ nĩ, hã ra tóg kaga jagy nÿ,” he tóg ti mÿ, capitão ti, Jesus mÿ.

⁷ Kÿ Jesus tóg ti mÿ: “kÿ inh hÿn tóg ti venh tÿg ha, ã mré, sÿ ã mÿ ti han jé,” he mũ.

⁸ Hã ra capitão tóg Jesus mÿ ke mãn mũ. “Ã mÿn hÿn jagy nĩ, ã tÿ inh ãn kãki sãn ke ti, isÿ tÿ fóg nĩn kÿ,” he tóg ti mÿ. “Ã vĩ pir ki inh camarada vÿ há' henh mũ. ã vĩ hã tÿ ã tóg ti tÿ há' henh ke mũ,” he tóg, capitão ti.

⁹ “Ha vé, tÿ sóg pã'i krêm ke nĩ gé, kÿ soldado ag tóg tÿ inh krêm ke nÿtĩ gé. Hã kÿ sóg pã'i jÿkre ki kanhró nĩ. Isÿ soldado ù mÿ: kutÿg, hen kÿ tóg tĩ mũ. Sÿ ti mÿ: kunÿg, hen kÿ tóg kãti mũ gé. Isÿ inh camarada mÿ: tag han ra, hen kÿ tóg han mũ. Inh vĩ tÿ sóg ag jêgnêg tĩ. Hã kÿ sóg ki kanhró nĩ. ã vĩ tÿ ã tóg inh camarada tÿ há' he há nĩ,” he tóg, capitão ti, Jesus mÿ.

¹⁰ Kÿ tóg Jesus mÿ e tĩ, ti vĩ tag ti. Kÿ tóg ã mré mũ ag mÿ: “ha mẽ, Israel ag vÿ ti ri ke tũ nÿtĩ,” he mũ. “Ki kanhró tóg nĩ (mÿr), kÿ tóg inh ki rã kÿ jê. Ge ve ja tũ sóg nĩ,” he tóg.

¹¹ “Ha vé, ù tÿ hên ri ke ag vÿ kãmũnh ke mũ, rã jur ja tá ag kãmũnh mũ, rã pur ja tá

ke gé. Abraão mré ag tóg ù tÿ kanhkã tá nĩ ên tÿ tÿ êg pã'i nĩ venh ke mũ, Isaque mré, Jacó mré ke gé, Topê tóg ag ki rĩr ke mũ.

¹² Ag jãvo Israel krê'krê ag tóg kuty ki vár ke mũ. Ag tÿ ù tÿ kanhkã tá nĩ ên tÿ tÿ êg pã'i nĩ venh ke vê vê, hã ra ag tóg venh ke tũ nĩ. Kÿ ag tóg vêsÿrênh ke mũ, ãjag jã tÿ ag gángán ke mũ, tÿ gangan ke mũ, vêsó jũn kÿ,” he tóg, Jesus ti. ã mré nÿtĩ ag mÿ tóg ke mũ.

¹³ Kÿ tóg capitão mÿ: “ha tÿg ge,” he mũ. “Inh ki rã kÿ ã tóg jê nĩ, hã kÿ ã tóg venh ke mũ sir, ã tÿ nén ve sór mũ ti. ã camarada tÿ inh hur há' hê,” he tóg, Jesus ti, capitão mÿ. Kÿ tóg tĩ mũ sir. Hã ra ti camarada tóg há' he mũ. Hora ên ki tóg há' he mũ, Jesus tÿ hora ki tó mũ ên ki.

Jesus tÿ ùn kagyga ag tÿ hághá' he (Mc 1.29-34; Lc 4.38-41)

¹⁴ Kÿ Jesus tóg sir Pedro ãn kãra rã mũ. Kÿ tóg ti prũ fi mÿnh fi vég mũ. Kaga fi tóg nÿ nĩ, rÿg kÿ.

¹⁵ Kÿ tóg fi nĩgé mēg mũ sir. Kÿ fi rÿg ên tóg tũ' he mũ sir. Kÿ fi tóg nĩ kÿ ag ki rĩr mũ sir.

¹⁶ Kuty ên kã ag tóg ùn jagrê kórég ag tatĩn kãmũ mũ ti to. Kÿ tóg ag mÿ vĩ mũ, kÿ ag tóg pa kãn mũ sir, vênh jagrê kórég ag. ùn kagyga ag hÿn han tóg mũ gé sir, Jesus ti.

¹⁷ Hã ra tag tóg rãn kÿ nĩ gé. Vãsÿ Topê vĩ tó tĩ tÿ Isaiás vÿ tag rãn ja nĩ, ha mẽ: “êg kaga nÿtĩn kÿ tóg êg han, kÿ êg tóg há' he kãn mũ, ti tÿ êg jagfy jagtar tugrĩn,” he ja tóg nĩ, Isaiás ti. Hã ra tóg ge nĩ.

Û tÿ Jesus mré mũ sór mũ ag (Lc 9.57-62)

¹⁸ Kejên ag tóg Jesus pênĩn e nÿtĩ, kÿ Jesus tóg ag ve kÿ: “mũ jé ha,” he mũ, ã mré mũ tĩ ag mÿ. “Goj kafã ù ra êg mũnh mũ,” he tóg.

¹⁹ Ag mũnh ke to hã Topê vĩ to professor ù tóg ti mré vĩnh kãti mũ. “Senhor,” he tóg. “Sÿ ã mré tÿg há tóg tĩ. ã tÿ hê ra tÿg kÿ sóg ã mré tĩ mũ,” he tóg.

²⁰ Hã ra Jesus tóg ti mÿ: “hã ra tóg jagy tĩ,” he mũ. “In tũ sóg nĩ,” he tóg. “Mĩg vÿ kré nÿtĩgtĩ. Sêsĩ vÿ jagfe nÿtĩgtĩ gé. Ag jãvo isÿ hê tá nÿr ke tóg tũ tĩ. Tÿ sóg êprã ke fi kósĩn nĩ,” he tóg, Jesus ti.

21 Kĩ Jesus mré tĩ ù tóg Jesus mĩ vĩ mũ gé. “Ă mré sóg tĩ mũ, hã ra sóg ver inh panh tỹ ga ki ti fón sór mũ,” he tóg, Jesus mĩ.

22 Kĩ Jesus tóg ti mĩ: “vó,” he mũ. “Ti kénh tĩ tũg,” he tóg. “Inh mré kãtĩg,” he tóg. “Inh ki ge tũ ag vĩ ã panh ti kej han mũnh mũ. Ă tỹ inhhã inh mré kãtĩg há tóg tĩ,” he tóg, Jesus ti.

23 Kĩ tóg sir canoa kãki rã mũ. Kĩ ti mré mũ tĩ ag tóg ti mré ki ge mũ gé sir, goj kafã ù ra mũ jé.

Jesus tỹ kóho jũ tỹ tũ' he
(Mc 4.35-41; Lc 8.22-25)

24 Ag tỹ goj kãmĩ mũ (hã) ra kóho jũ tóg sir krog he mũ, ha mẽ. Kĩ goj tóg canoa kãki krém krém ke mũ, ti fãn sór tóg mũ. Hã ra Jesus tóg nũr kỹ nỹ nĩ.

25 Kĩ ag tóg ti rĩn kỹ ti mĩ: “Senhor,” he mũ. “Ĕg kren han nĩ,” he ag tóg. “Ĕg kãgter ha mẽ tóg tĩ,” he ag tóg.

26 Kĩ Jesus tóg ag mĩ: “ãjag tỹ nejé mũmẽgmẽg nẽ?” he mũ. “Ăjag mĩ inh ki ge há han tũ'?” he tóg. Kĩ tóg nĩ kỹ jẽgnẽ mũ sir, kỹ tóg goj mĩ vĩ mũ sir, kóho mĩ. Kĩ tóg tũ' he mũ sir. Katy' he tóg mũ, katy tãvĩ tóg tĩ mĩr, ha mẽ.

27 Kĩ tóg vẽn kar mĩ e tĩ. “Ti jykre tóg ěg mĩ e tĩ,” he ag tóg mũ. “Kóho tóg ti vĩ han, goj ti ke gé,” he ag tóg.

Jesus tỹ vẽn jagrẽ kórég pan
(Mc 5.1-20; Lc 8.26-39)

28 Kĩ tóg goj fĩn rãm kỹ nig kafã ù tá jun mũ sir, Gadara tá, Jesus ti, ti mré mũ tĩ ag ke gé. Kĩ ùn régre ag tóg ti kato tẽgtẽ mũ, ùn jagrẽ kórég ag. Vẽnh kej tá ag tóg kãmũ mũ. Ag jamã vẽn, vẽnh kej ti. Jũ mẽ ag tóg nỹtĩ, kỹ ù ag tóg hẽn ra mũ vãn nỹtĩ, ag kamẽg kỹ.

29 Jesus kato ag tóg kãmũ mũ, ùn jagrẽ kórég ěn ag. Ti ve kỹ ag tóg sir prẽr mũ, ha mẽ. “!..Ă hỹn ěg tỹ hẽ ri kenh mũ ha, Topẽ kósin'..!” he ag tóg mũ. “!..Ă mĩ ěg vóg kónãn sór mũ ha, ěg kurã to hã..!” he ag tóg. Jesus mĩ.

30 Hã ra porco tóg ki e nỹtĩ. Kakó tá ag tóg jẽg nỹtĩ.

31 Kĩ Nén-Kórég ag tóg Jesus mĩ: “ã tỹ ěg pan kỹ ã tỹ porco to ěg jẽgnẽnh há tóg tĩ,” he mũ.

32 Kĩ tóg ag mĩ: “hej,” he mũ. “Ha mũ jẽg ge,” he tóg. Kĩ ag tóg ěn ag togvãn kỹ porco ki ge mũ sir, Nén-Kórég ag. Kĩ vãnã porco ag tóg rán ki re kãn mũ sir, goj nig ki ag tóg vár kãn mũ. Nãgnãr kãn ag tóg mũ sir, tũ' he ag tóg mũ sir, porco ěn ag, mĩr, ha mẽ.

33 Kĩ porco ki rĩr tĩ ag tóg pẽtẽ kãn mũ sir, cidade ra, kamẽg kỹ. Tá ag tóg kãmén kãn mũ. Nén-Kórég tỹ jagrẽ ja ěn ag tóg ag tóg mũ sir, Jesus tỹ ag pan ěn ti.

34 Kĩ vãnã cidade tá ke kar ag tóg sir Jesus vẽn kãmũ mũ. Kãmũ kãn ag tóg mũ. Kĩ ag tóg tá junjun kỹ (ag tóg) Jesus mĩ to vĩ mũ, ti tỹ tá kutẽ jé, ti tỹ ag rã hã nĩ tũ nĩ jé, hã kỹ tóg tĩ mũ.

9

Jesus tỹ ùn kãnhgrĩn kỹ nỹ tỹ há' he
(Mc 2.1-12; Lc 5.17-26)

1 Kĩ Jesus tóg canoa ki rã kỹ goj nig kafã ù ra tĩg mãn mũ. Kĩ tóg ã jamã tá jun mũ.

2 Ti tỹ ã jamã tá jun kỹ vãnã ag tóg ti mĩ ù vyn kỹ junjun mũ, ùn kónhgrĩn kỹ nỹ ěn, ha mẽ. Ă cama kri tóg nỹ nĩ. Kĩ Jesus tóg ag tỹ ti ki ge mũ vég mũ sir. Hã kỹ tóg ùn kãnhgrĩ mĩ: “inh kósin',” he mũ. “Ă fe tỹ há' hé. Ă tỹ Topẽ vĩ mranh ja ěn tỹ tũ' hen hã vẽn ha,” he tóg, ti mĩ, ùn kónhgrĩ mĩ.

3 Hã ra Topẽ vĩ to professor ag vĩ tá nỹtĩ gé. Ti vĩ mẽ kỹ ag tóg to jykrén mũ. “Topẽ to vĩ kónãn tóg mũ mĩr. Vẽnỹ tóg Topẽ han mũ mĩr,” he ag tóg mũ, Jesus to, ti tỹ ti mĩ: “ã tỹ Topẽ vĩ mranh ja ěn tỹ tũ' hen hã vẽn,” hen kỹ. Kĩ tóg ag mĩ tỹ ù nỹ, ti jykre ti.

4 Hã ra Jesus tóg ki kanhró nĩ, ag tỹ nén to jykrén mũn ki. Kĩ tóg ag mĩ: “ãjag ne tog nén ù vẽnhmỹ to jykrén mũ,” he mũ.

5 “Ne nỹ ãjag mĩ vẽnhmỹ nỹ?” he tóg. “Ûn tĩg vãn tag mĩ sóg: “ã tỹ Topẽ vĩ mranh ja ěn tỹ tũ' hen hã vẽn ha,” he mũ mĩr. Kỹn mĩ ãjag mĩ vẽnhmỹ?” he tóg. “Sỹ ti mĩ: “nĩ ra, tĩg ra,” henh ke vẽn gé. Kỹn mĩ ãjag mĩ vẽnhmỹ ke gé?” he tóg.

6 “Hã ra isỹ ãjag mĩ inh jykre ven sór vẽn. Tỹ sóg ěprã ke fi kósin nĩ. Tá sóg krỹg ke mũ, Topẽ vĩ mranh tỹ vẽnh pãte fón ke tá, ùn kãnhgrĩ tag mĩ. Sỹ tá krỹg mũ ven jé sóg ke mũ, ãjag mĩ,” he tóg.

Hã kỹ tóg ùn kónhgrĩ mĩ: “nĩ ra, jẽg ra, ã kur gé (g) tĩg ra, ã ãn ra,” he mũ.

⁷ Kÿ tóg vym ke nĩ mũ, kÿ tóg sir jëgnë kÿ tĩ mũ. Ā ĩn ra tóg tĩ mũ (mÿr) sir, ha mẽ.

⁸ Kÿ vënh kar ag tóg vég mũ. Kÿ tóg ag mÿ e tãvĩ tĩ. Topë mÿ ag tóg vĩ há han mũ, ti tÿ Jesus mÿ vënh jykre há nĩm kÿ. Ēg mré ke vë mÿr, Jesus ti, êprã ke, hã ra Topë tóg ti tar han, hã kÿ tóg ti tÿ há' he mũ.

*Jesus tÿ Mateus mré vĩ
(Mc 2.13-17; Lc 5.27-32)*

⁹ Kÿ Jesus tóg ã jamã tá kã kutë kÿ tĩ mũ sir. Kÿ tóg Mateus vég mũ sir. Governo mÿ tóg jãnkamy mäg tĩ, imposto kaja ti, kÿ tóg ã rãnrãj han kÿ nĩ nĩ. Kÿ Jesus tóg ti mÿ: “inh mré kãtÿg,” he mũ, Mateus mÿ. Kÿ tóg jëgnë kÿ ti mré tĩ mũ sir.

¹⁰ Kÿ tóg kejën ti mré jëg mũ, Jesus ti. Kÿ ù tÿ hën ri ke ag tóg tá vënh mãn mũ, ti ĩn krëm, governo mÿ jãnkamy mäg tĩ ag, Topë vĩ mranh tĩ ag. Jesus mré ag tóg jëgjëg mũ, Jesus mré mũ tĩ ag mré ke gé.

¹¹ Kÿ Fariseu ag tóg vég mũ. Kÿ ag tóg ti mré mũ tĩ ag mÿ vĩ mũ. “Ājag pã'i ne tóg ag mré jëg mũ', governo mÿ jãnkamy mäg tĩ ag mré. Topë vĩ mranh tĩ ag mré hã tóg jëg mũ',” he ag tóg, Fariseu ag, Jesus mré mũ tĩ ag mÿ.

¹² Hã ra Jesus tóg mëg mũ, ag vĩ ti. Kÿ tóg ag mÿ kãmén mũ, ha mẽ. “Ûn kagyga tũ ag vÿ médico venh mũ tũ nĩgtĩ,” he tóg. “Hã ra ùn kagyga ag hã vÿ ti venh mũ tĩ,” he tóg.

¹³ “Ha vé, tag to jykren, Topë vĩ tag to, ha mẽ. “Ājag tÿ jagnë jagãgtãn kÿ tóg inh mÿ há tĩ inhhã,” he tóg, Topë ti. “Ājag tÿ inh mÿ nén ù pũn kãfór tóg nĩ, ãjag tÿ jagnë jagãgtãn mũ ti,” he tóg, Topë ti. Hã kÿ jagnë jagãgtãn nĩ, ag to vĩ tũg nĩ,” he tóg, Jesus ti. “Inh pi(jé) ù tÿ vënh jykre kuryj han mũ ag mÿ: “ãjag jykre tovãnh nĩ,” he sór tĩ'. Û tÿ Topë vĩ mranh ja nĩ ãn ag hã mÿ sóg: “ãjag jykre kórëg tovãnh nĩ,” he sór tĩ. Hã jé sóg ãjag mÿ vënh ven,” he tóg, Jesus ti.

*Jesus tÿ ěg vãkre kãmén
(Mc 2.18-22; Lc 5.33-39)*

¹⁴ Kÿ João mré mũ tĩ ag tóg ti tá junjun mũ sir, Jesus tá. Kÿ ag tóg ti ki jëmëg mũ. “Ēg hã ne tóg vãkrëg tĩ', Fariseu mré ke ag ke gé. Ēg jãvo ã mré mũ tĩ ag tóg vãkre vãnh nÿtÿgtĩ.

Hë ri ke jé?” he ag tóg, Jesus mÿ, João mré mũ tĩ ag.

¹⁵ Kÿ Jesus tóg ag mÿ: “hÿ,” he mũ. “Vënh kyprÿg to kãmũ ag pi(jé) vãkrëg tĩ',” he tóg. “Festa vë mÿr, vënh prÿgprÿg ti, kÿ ti mré ke ag tóg ùn prÿg mũ ãn venh kãmũ tĩ. Hã ra sóg ùn prÿg mũ ãn ri ke nĩ, hã kÿ tóg inh mré mũ tĩ ag mÿ sér tĩ ver,” he tóg. “Vãhã tóg jun mũ, inh kurã ti. Kÿ hã ag tóg inh pére mũnh mũ. Ēn kã hã ag tóg ãjag vãkrenh ke venh mũ, kurã ãn kã, inh mré mũ tĩ ag,” he tóg, Jesus ti.

¹⁶ “Ti si fag pi(jé) vãfe kygnej tũ tÿ kur si jar ki hyn han tĩ ja nÿtÿgtĩ'. Ûn kygnej tũ tÿ ki hyn han mũ ra tóg jaran kenh mũ. Kÿ kur si jar ãn tóg mág mũ. Ûn kygnej hã tÿ fag tóg ki han han tĩ, kÿ tóg jaran ke tũ nĩ,” he tóg, Jesus ti. Ti tÿ ã jykre tãg tón hã vë, hã ra tóg kur kygnej ja tũ ri ke nĩ.

¹⁷ Kÿ tóg ag mÿ: “kÿ vinho vÿ ge nĩgtĩ gé,” he mũ gé. “Ēg pi(jé) vinho kajãg mũ tÿ ti fãr si tÿ sacco ki kujëg tĩ'. Ke tũ nĩ (mũ) ra tóg kunãnh kÿ jaran ke mũ, kógnãj kÿ. Kÿ vinho ãn tóg tũ' he mũ, sacco ke gé. Vinho kajã tÿ ti fãr tãg tÿ ki kujën ke vë mÿr',” he tóg, Jesus ti. Ti tÿ ã jykre tãg tó vë, hã ra tóg vinho kajãg mũ ri ke nĩ gé.

*Jesus tÿ ùn kagyga fag tÿ há' he
(Mc 5.21-43; Lc 8.40-56)*

¹⁸ Ti tÿ ver ag mré vëmén kÿ pã'i ù tóg tá jun mũ, ha mẽ. Ti krëm tóg grĩnh ke mũ. Kÿ tóg ti mÿ: “ha vé,” he mũ. “Inh kósin fi tóg ter ke mũ. Fi venh kãtÿg. Ā tÿ ã nĩgë tÿ fi mẽ kÿ fi fe tóg mrin kenh ke mũ, ha vemnĩ,” he tóg, pã'i ti, Jesus mÿ.

¹⁹ Kÿ Jesus tóg jëgnë kÿ ti mré tĩ mũ sir. Jesus mré mũ tĩ ag vÿ ti mré mũ mũ gé sir.

²⁰ Ti tÿ ti mré tÿg mũ ra ù fi tóg ti tá jun mũ, ùn kaga ù fi. Kyvënh krÿg ja tũ han kÿ fi tóg nĩ, prÿg tÿ 12 (ke) ki. Jesus vatánh tá fi tóg ti kur mëg mũ sir, ti kur mráj ki.

²¹ “Sÿ hën ri ke mũn ti kur mẽ kÿ inh hÿn han mũ,” he fi tóg, to jykren kÿ. Hã kÿ fi tóg ti kur mẽnh kãtĩ mũ.

²² Hã ra Jesus tóg vÿrĩn ke kÿ fi vég mũ. Kÿ tóg fi mÿ: “inh kósin',” he mũ. “Kamëg tũg nĩ,” he tóg mũ. “Ā tÿ inh ki rã hã kÿ ã tóg há' he mũ,” he tóg. Kÿ fi tóg há' he mũ sir vësÿmër, ha mẽ.

²³ Kÿ tóg tĩg mãn mũ, Jesus ti. Kÿ ag tóg pã'i ên ãn tá junjun mũ sir. Kÿ tóg tá fôr nĩ, ãn kygfÿ mũ fag tÿ, ag tÿ êg jẽnky tÿ vãkyr ên kynkyn tĩ ag tÿ ke gé, ti kósin fi ter kÿ. Kÿ Jesus tóg fag vég mũ.

²⁴ Kÿ tóg: “ha mũ jêg,” he mũ. “Gĩr sĩ fi vÿ ter tũ nĩ. Nũr fi nÿ nĩ,” he tóg. Hã ra fag tóg ti nyg mũ.

²⁵ Hã ra tóg fag pan kãn mũ sir. Kÿ tóg gĩr fi nĩgé kãgmĩg mũ sir. Kÿ fi tóg nĩ mũ sir.

²⁶ Kÿ tag kãme tóg vênh kar kri rũm ke mũ, ga ên kar mũ hã, Jesus tÿ fi rĩn mãn mũ ti.

Jesus tÿ ãn kyvó ag tÿ êvãnh há hyn han

²⁷ Kÿ Jesus tóg tá kãkutẽ mũ sir. Kÿ ãn kyvó régre ag tóg ti nón mũ mũ. Ti nón mũ kÿ ag tóg ti jé prẽr mũ: “!..Davi kósin!..!” he ag tóg. “!..Êg jagãgtãn ra..!” he ag tóg, prẽnprẽr kÿ.

²⁸ Kÿ Jesus tóg ãn kãra rã mũ sir. Kÿ ãn kyvó ên ag tóg ti nón ge mũ gé sir, ãn kãra. Kÿ Jesus tóg ag mÿ: “inh mÿ ãjag mÿ ãjag hyn han há nĩ?” he mũ. Kÿ ag tóg ti mÿ: “hÿ,” he mũ.

²⁹ Kÿ Jesus tóg ag kanẽ mẽg mũ sir, ã nĩgé tÿ. Kÿ tóg ag mÿ: “ãjag tÿ inh ki ge kÿ nÿtĩn kÿ ãjag tóg há' henh mũ,” he mũ.

³⁰ Kÿ ag kanẽ tóg mrin ke mũ sir. Êvãnh há' he ag tóg mũ. Kÿ Jesus tóg ag mÿ vĩ tar han mũ. “Ker ã mÿ tó hẽ,” he tóg ag mÿ.

³¹ Hã ra ag tóg mũ kÿ (ag tóg) vênh kar mÿ tugtó mũ. Kÿ ti kãme ên tóg vênh kar kri rũm ke mũ sir.

Jesus tÿ ãn vĩ vãnh vĩn

³² Kÿ ag mũ kÿ ã tóg ti tá jun mũ gé, ãn jagrẽ kórég. Ti jagrẽ tóg ti vĩ vãnh han.

³³ Kÿ Jesus tóg ti jagrẽ kórég kutẽm mũ sir. Ti tÿ ti kutẽm kÿ tóg sir vĩ há han mũ sir, ãn vĩ vãnh ja ên ti. Kÿ tóg vênh kar mÿ e tĩ. “Ge ve ja tũ êg tóg nÿtĩ, êg povo tÿ Israel kãmĩ,” he ag tóg mũ.

³⁴ Hã ra Fariseu ag tóg mẽg mũ. Kÿ ag tóg ón kÿ Jesus to vĩ kónãn mũ. “Vênh jagrẽ kórég pan há tóg nĩgtĩ. Hã ra tóg vênh jagrẽ kórég ag pã'i jykre tÿ ag pan tĩ nĩ, ti tÿ tÿ Japo mré ke nĩn kÿ,” he ag tóg, ón kÿ, Fariseu ag. Ag tÿ Jesus to ón hã vẽ.

Jesus mÿ ãn jagtar ag

³⁵ Kÿ Jesus tóg cidade kar mũ tĩ mũ, êmã kar ên mũ. Êg vênh kanhrãn jafã krẽm tóg ag

kanhrãn tĩ. Ag mÿ tóg ã tÿ kanhkã tá nĩ ên tÿ tÿ êg pã'i nĩ ên tóg ti sir. Kÿ tóg ãn kagyga ag hyn han tĩ gé sir.

³⁶ Vênh e ên tóg ti mÿ jagãgtar nÿtĩ. ã tÿ ag ki rĩr há han ke tóg tũ tĩgtĩ, jo ag tóg vênh ki rĩr há han ki kagtĩg nÿtĩ gé. Ti tÿ ag ve kÿ tóg carneiro tÿ mẽg mũ êkrég mũ sir. ã tÿ carneiro tÿ mẽg ki rĩr tũ nĩn kÿ ag tóg véké mũgtĩ. Tag ri ke ag tóg nÿtĩ, Jesus mÿ, ãn e ên ag.

³⁷ Kÿ tóg ã mré mũ tĩ ag mÿ: “sÿ ag ve kÿ sóg êg jakré mũ êkrég tĩ,” he mũ. “Ti e nĩn kÿ êg tóg kejẽn kre kãn tũ nĩgtĩ, êg pir nÿtĩn kÿ. Ge ti nĩgtĩ. ãn e ag tóg inh ki ge to há nÿtĩ, hã ra tóg ver ã tÿ ag mÿ tónh ke tóg tũ tĩ,” he tóg, Jesus ti.

³⁸ “Hã kÿ Topẽ mré vĩ, ti tÿ ã jêgnẽ jé, ag tÿ ag mÿ ti vĩ tóg jé,” he tóg, Jesus ti, ã mré mũ tĩ ag mÿ.

10

Jesus tÿ apóstolo ag kuprẽg mũ (Mc 3.13-16; Lc 6.12-16)

¹ Kÿ Jesus tóg ãn tÿ 12 (ke) ag jé prẽr mũ sir, ti mré mũ tĩ ên ag jé. Kÿ tóg ag mÿ vênh jykre nĩm mũ, ag tÿ vênh jagrẽ kórég pan jé, ag tÿ ãn kagyga ag hyn han jé ke gé. Vênh kaga kar tÿ ag tóg hẽ ri ke mũ sir, ti tÿ ag mÿ tag to vênh jykre nĩm kÿ.

² ã tÿ 12 (ke) ag jijin hã vẽ, ha mẽ, Jesus tÿ ãn vin mũ ag jygjyn hã vẽ, ha mẽ. ãn ve vÿ tÿ Simão nĩ, kÿ ti jiji ã hã vÿ: Pedro, he mũ. Kar kÿ ti jãvy vÿ nĩ gé, hã vÿ: André, he mũ, Tiago ke gé, Zebedeu kósin tag ti, ti jãvy tÿ João ke gé,

³ Filipe ke gé, Bartolomeu ke gé, Tomás ke gé, Mateus ke gé, governo mÿ jãnkamy mäg tĩ tag ti, Tiago ã ke gé, Alfeu kósin tag ti, Tadeu ke gé,

⁴ Simão ke gé, ag tÿ ã to: Zelote, he mũ tag ti, kar kÿ Judas Iscariotes ke gé, Jesus vatánh tá pã'i ag mÿ ti kãmén ke tag ti.

Jesus tÿ apóstolo ag jêgnẽ (Mc 6.7-13; Lc 9.1-6)

⁵ Ên ag jêgnẽg tóg mũ sir, Jesus ti, ag tÿ vênh kar mÿ Topẽ kãmén jé. ã tÿ 12 (ke) ên ag jêgnẽg tóg mũ, Jesus tÿ ãn kuprẽg ja ên ag. Kÿ tóg ag mÿ: “ver fóg ag mÿ inh kãmén mũ tũg nĩ, kanhgág ag mÿ kãmén tũg nĩ gé

ver,” he mǔ. “Kǔ Samaria tá ke ag jamã ki ge tǔg nǐ gé,” he tóg.

6 “Israel ag távĩ mǔ tómnĩ inhhã. Topẽ mǔ ag tóg tǔ carneiro vãfor ri ke nǔtĩ, kǔ ag hã mǔ tómnĩ ver,” he tóg.

7 “Ăjag tǔ ag mǔ tó kǔ tag tómnĩ, ha mẽ. Ũ tǔ kanhkã tá nĩ ěn tǔ tǔ Ăjag pã'i nĩnh ke vẽ ũri, hemnĩ, ag mǔ.

8 Ũn kagyga ag hyn han nĩ gé. Ũn kãgter mǔ ag rĩnrĩn mǎn nĩ. Ũn kaga kren vǎnh ěn kren han nĩ. Vẽnh jagrẽ kórég ag pan nĩ. Ăjag mǔ sóg ge ra inh jykre nĩm mǔ, kǔ ge ra ag mǔ han nĩ gé. Ag mǔ: inh mǔ kajãm, he tǔg nĩ.

9 Kǔ jãnkamy ma mǔ tǔg nĩ, jãnkamy mág, jãnkamy sĩ ke gé.

10 Kǔ saco ma mǔ tǔg nĩ gé, bolso ěn. Kur tǔ vẽnh kri rĩnh tǔg nĩ, pẽn né ũ gé mǔ tǔg nĩ gé, pẽn to ró ěn. Kǔ vátó vyn tǔg nĩ gé, kãtó ti. Inh rãnrãj han Ăjag tóg mǔ. Kǔ ag tóg to Ăjag jẽn ke mǔ, vẽnh kato, ha vemnĩ,” he tóg, Jesus ti.

11 “Kǔ Ăjag tóg kejẽn ěmã ũ tá junjun ke mǔ. Tá ũn jykre há jãvãnh nĩ. Kǔ ěn ĩn ra gemnĩ. ěn ĩn krẽm Ăjag tǔ kurã ki kã panh ke ěn tá krỹg nĩ.

12 Kǔ ĩn ěn krẽm nǔtĩ fag mǔ: “Topẽ jé Ăjag ki rĩr, kǔ Ăjag jé jatun mǔ nǔtĩ nĩ,” hemnĩ.

13 Fag tǔ Ăjag mǔ vĩ há han kǔ fag tóg jatun mǔ nǔtĩ. Fag tǔ Ăjag mǔ vĩ há han tǔ nĩn kǔ fag tóg jatun mǔ nǔtĩ tǔ nĩ. Fag javo Ăjag tóg jatun mǔ nǔtĩ.

14 Kejẽn ũ tóg Ăjag mǔ: “kãge jẽg ra,” henh ke tǔ nĩ, ěmã ũ tá. Kǔ tá kãpamnĩ, ag tǔ Ăjag vĩ mẽ jãvãnh nǔtĩn kǔ. Tá kãpa kǔ Ăjag pẽn hã kykũnh nĩ. Kǔ ag tóg ki kanhró nǔtĩ, Topẽ tǔ ag to kórég nĩ ti.

15 Ha mẽ, ki hã sóg tó mǔ. Kurã tǔ ěgno ki, isỹ vẽnh kar jykre tugnỹm ke kurã ěn ki ag tóg jagãgtar nǔtĩnh mǔ sir, ag tǔ Ăjag vĩ mẽ jãvãnh nǔtĩn kǔ. Cidade tǔ Sodoma tá ke ag tóg jykre pãno nǔtĩ ja nĩgtĩ, cidade tǔ Gomorra tá ke ag ke gé. Kǔ ag tóg jagãgtar nǔtĩnh mǔ gé, kurã ěn kã. Hã ra ũn tǔ Ăjag vĩ mẽ jãvãnh ěn ag tóg ag jagãgtar kãfór han ke mǔ (mỹr), ha mẽ,” he tóg, Jesus ti.

*Ag tǔ Jesus tigrĩn ěg to jũnh ke
(Mc 13.9-13; Lc 21.12-17; 12.11-12)*

16 “Carneiro vỹ vẽnh jy nĩgãn han ki kagtĩg nǔtĩ, mĩg tǔ ag mǎn sór nĩn kǔ. Carneiro ri ke Ăjag nǔtĩ, hã ra sóg Ăjag jẽgnẽg mǔ, ũ tǔ mĩg ri ke ag to, kǔ Topẽ hã tóg Ăjag jy nĩgãn ke mǔ sir. Hã kǔ vẽnh ki rĩr há han nĩ. Pỹn jykre han nĩ. Vãjig ti tĩ, pỹn ti, kǔ ěg tóg kãnhmar ti tǔ hẽ ri ke tǔ nĩgtĩ. Pỹn ri ke han nĩ. Kǔ sórãg jykre han nĩ gé. Jũ vãnh pẽ ti nĩ, nén ũ vẽnhmỹ han tǔ ti nĩ. Kǔ sórãg ri ke han nĩ gé.

17 Ěprã ke ag tóg Ăjag vóg kónãn ke mǔ, isugrĩn. Ăjag pã'i ag mǔ ag tóg Ăjag kãmén ke mǔ, ag tǔ Ăjag vóg kónãn jé. Ăjag vẽnh kanhrãnrãn jafã krẽm ag tóg Ăjag mrãnmrãn ke mǔ. Hã kǔ vẽnh ki rĩr há han nĩ.

18 Fóg tǔ pã'i mág mǔ ag tóg Ăjag ven ke mǔ, pã'i mág ũ ag mǔ ke gé. Isugrĩn Ăjag tóg vẽnh jagtar tag venh ke mǔ, Ăjag tǔ ag mǔ inh vĩ ti tó jé, fóg ag kar mǔ ke gé, kanhgág ag mǔ ke gé.

19 Pã'i ag tǔ Ăjag jé ke kǔ to jykrén tǔg nĩ, Ăjag tǔ ag mǔ nén tónh ke mǔ ěn ti to. Topẽ kuprĩg hã ne Ăjag krĩn ke mǔ', kǔ Ăjag tóg ti tǔ Ăjag mǔ nén tó mǔ ěn hã tónh ke mǔ, hora ěn kã.

20 Hã kǔ Ăjag tǔ tó tǔ vẽ sir. Ěg jóg kuprĩg tǔ Ăjag tǔ vẽmẽn hã vẽ,” he tóg.

21 “Hã ra ũ ag tóg Ăjag mré pafa mǔ fag kãmén ke mǔ, pã'i ag mǔ, ag tǔ fag kãgtén jé. Kǔ ũ ag tóg Ăjag krẽ kãmén ke mǔ gé. Kǔ ũ ag tóg Ăjag han mǔ fag kãmén ke mǔ gé, pã'i ag mǔ, ag tǔ fag kãgtén jé, mỹr, ha mẽ.

22 Vẽnh kar vỹ Ăjag to jũ kǔ Ăjag vóg sór nǔtĩ, isugrĩn. Hã ra ũ tǔ isovãnh tǔ ěn hã krenkren ke mǔ, kurã tǔ ěgno ki,” he tóg, Jesus ti.

23 “Ag tǔ cidade ũ tá Ăjag vóg kónãn kǔ, kǔ cidade ũ ra pẽtẽmnĩ. Ki hã sóg tó mǔ, ha mẽ. Israel ag cidade fĩn rãm kãn ke tǔ Ăjag nĩ, kurã ěn kã. Sĩ ti nĩ, ag tǔ Ăjag vóg kónãn ke kurã ti. Kãtĩg jé sóg ke mǔ, ag tǔ ge kǔ Ăjag vóg kǔ, mỹr, ha mẽ. Tǔ sóg ěprã ke fi kósin nĩ, mỹr, ha mẽ.

24 Aluno pi(jé) ã professor kãfór nĩ'. Ũn camarada pi(jé) ã patrão kãfór nĩ'.

25 Aluno tǔ ã professor ri ke nĩn kǔ tóg há tĩ. Ũn camarada tǔ ã patrão ri ke nĩn kǔ tóg há tĩ gé. Iso ag tóg: Belzebu, he ja nĩgtĩ, inh kato vãsãnsãn mǔ ag, hã vỹ: Japo, he mǔ, hã

vỹ: Belzebu, he mũ. Tỹ sóg ãjag professor ri ke nĩ, ãjag patrão ri ke. Ag tỹ iso: Japo, hen kỹ ag tóg ãjag to vĩ kónãn ke mũ gé, ha vemnĩ, ãjag tỹ inh jykre hã han ti kỹ,” he tóg, Jesus ti.

*Ēg tỹ Topẽ hã kamẽg ke
(Lc 12.2-7)*

26 “Ge ra ag kamẽg tũg nĩ, pã'i ag. Ēg tỹ péju kỹ nén han mũ tóg vènh ven kãn ke mũ, Ēg tỹ vènh kar vatánh tá nén to jykren mũ tóg vènh ven kãn ke mũ.

27 Isỹ vènh kar vatánh tá ãjag mỹ nén tó mũ tag tỹ vènh kar mỹ tó kãn nĩ. Isỹ komẽr hã ãjag mỹ nén tó mũ tag tỹ vènh kar mỹ jamã há ra tómnĩ.

28 Mũmẽg tũg nĩ, ag kamẽg tũg nĩ, pã'i ag. Ēg tén há ag nỹtĩ, hã ra ag tóg nũgme ki Ēg vãm ke kagtĩg nỹtĩ, pã'i ag. Ũn pir kamẽg nĩ, hã vỹ: Topẽ, he mũ. Ti hã ne Ēg tén kar kỹ nũgme ki Ēg vãm ki kanhró nĩ', inferno ki, kỹ ti hã kamẽg nĩ.

29 Ha vé. Sēsĩ vender he ag tĩ, jãnkamy to, kỹ ag tóg ũn régre to jãnkamy pir mãng tĩ. Hã ra Topẽ tóg jēsĩ ag ki rĩr tĩgtĩ. Ti tỹ: “hej,” hen kỹ Ēg tóg ag pin tĩ, ke tũ nĩn kỹ Ēg tóg ag krenkren tĩ.

30 Hã ki Topẽ tóg ag ki rĩr tĩgtĩ, sēsĩ ag ki. Ēg ki rĩr tóg tĩ gé, Topẽ ti. Ēg tỹ nén vég mũ kar ki kanhró tóg nĩ. Hã kỹ tóg Ēg gãnħ kar nĩgkren ja nĩ gé, Topẽ ti.

31 Hã kỹ pã'i ag kamẽg tũg nĩ. Jēsĩ kãfór ãjag tóg nỹtĩ, Topẽ mỹ. Ājag kãmĩ ũn pir tóg sēsĩ e kãfór nĩ, ti mỹ,” he tóg, Jesus ti.

*Ēg tỹ Jesus kãmén ke
(Lc 12.8-9)*

32 “Hã kỹ inh kãmén nĩ, ěprã ke ag mỹ. Ājag tỹ ag kamẽg tũ nĩn kỹ ag mỹ inh kãmén kỹ sóg inh jóg tỹ kanhkã tá nĩ ěn mỹ ãjag kãmén ke mũ gé, kurã ěn kã.

33 Ājag tỹ hã ra inh kãmén tũ nĩn kỹ sóg inh jóg tỹ kanhkã tá nĩ ěn mỹ ãjag kãmén ke tũ nĩ gé, kurã ěn kã, ãjag tỹ iso: “ti ki kagtĩg sóg nĩ,” hen kỹ,” he tóg, Jesus ti.

*Ēg tỹ ěg jykre finħ ke
(Lc 12.51-53; 14.26-27)*

34 “Ājag hỹn iso: “vènh kar tỹ jagnẽ to há han jé tóg ke mũ,” he tĩ. Hã tũ vè, ũ tỹ hèn ri ke tỹ jagnẽ to jũ han jé sóg ke mũ, ha vemnĩ.

35 Hã kỹ ũ tóg ã panħ kato tènħ mũ, kỹ ũ fi tóg ã mỹnh fi kato tènħ mũ gé. Kỹ ũ fi tóg ã má fi kato tènħ mũ gé, mỹr, ha mẽ.

36 Ti mré ke ag vỹ tỹ ti kato vãsãnsãn mũ ag nỹtĩnh mũ, kỹ fi mré ke fag tóg fi kato vãsãn ke mũ gé, ha mẽ.

37 Iso há kãfor nỹtĩmnĩ, ãjag han mũ fag kri, ke tũ nĩ (mũ) ra ãjag tóg inh mỹ há tũ nỹtĩ. Iso há kãfór nỹtĩmnĩ, ãjag krẽ kri, ke tũ nĩ (mũ) ra ãjag tóg inh mỹ há tũ nỹtĩ.

38 Isỹ inh cruz va tĩg ri ke han nĩ gé, isỹ tá ter ke ti, hã vỹ: iser ěn ri ke han sór mũ, he mũ. Ke tũ nĩ (mũ) ra ãjag tóg inh mỹ há tũ nỹtĩ.

39 Ājag tỹ iser ri ke han sór tũ nỹtĩn kỹ ãjag tóg nũgme ki kutènħ mũ, ãjag tỹ ãjag jykre tovãnħ sór tũ nỹtĩn kỹ. Ājag tỹ isugrĩn kãgter sór kỹ ãjag tóg rĩr krỹg ja tũ ěn venħ ke mũ, ãjag tỹ ãjag jykre tovãnħ kỹ,” he tóg, Jesus ti.

*Topẽ tỹ ěg mỹ nén ũ há tónħ ke
(Mc 9.41)*

40 “Ũ tỹ ãjag mỹ: hej, hen kỹ tóg inh mỹ: hej, he mũ gé sir, kỹ tóg inh ki rã mũ sir. Ti tỹ inh ki rã kỹ tóg ũ tỹ inh jènẽg mũ ěn ki rã mũ gé sir, hã vỹ: Topẽ, he mũ.

41 Ũ tóg Topẽ vĩ tó tĩ ag mỹ: “ha kãrã,” he tĩ, ag tỹ Topẽ vĩ tó tĩ tũgrĩn. Ti tỹ ag mỹ vĩ há han kỹ tóg Topẽ mỹ há nĩ sir. Kỹ tóg kejẽn ti mỹ nén ũ há tónħ ke mũ, Topẽ ti, ũ tỹ ti vĩ tó tĩ ag mỹ: “ha kãrã,” he mũ ěn mỹ. Ũ tóg ũn jykre kuryj ag mỹ: “ha kãrã,” he tĩ, ag jykre kuryj nỹtĩ tũgrĩn. ěn mỹ tóg nén ũ há tónħ ke mũ gé, Topẽ ti.

42 Ũ tóg kejẽn ũn sĩ mỹ nén ũ nĩm tĩ, goj hèn ri ke mũn. Ũn sĩ tỹ inh ki rã nĩ tũgrĩn tóg ti mỹ nén ũ nĩm tĩ. ěn mỹ tóg nén ũ há tónħ ke mũ gé, Topẽ ti. Ti pi(jé) to nén ũ há venħ ke tũ nĩ,” he tóg, Jesus ti.

11

*João Batista tỹ Jesus ki jẽmẽ
(Lc 7.18-35)*

1 Jesus tỹ ã mré mũ tĩ ag mỹ tó kãn kỹ tóg tá kãkutẽ mũ sir, ũ tỹ 12 (ke) ag mré. Kỹ tóg cidade kar mĩ tĩ mũ sir, vènh kar kanhrãn kỹ, ag mỹ Topẽ vĩ tón kỹ.

2 Kỹ kejẽn João tóg ti kãme mẽg mũ. Se kỹ tóg nĩ nĩ, João ti, hã ra tóg Jesus tỹ nén

han mũ mễg mũ sir. Kĩ tóg Jesus mỷ vễnh vĩ jễnễg mũ, ả mré mũ tĩ ag tỹ, João ti.

³ Kĩ tóg Jesus mỷ: “ả hã mỷ?” he mũ. “Ễg tỹ ừn jãvãnh mũ mỷ tỹ ả nĩ?” Topễ tỹ ừn jễnễg mũ hã mỷ tỹ ả nĩ?” he tóg. “Ễg mỷ ừ jãvãnh mãn ke tũ nĩ ha', ả pãte'?” he tóg, João Batista ti, Jesus mỷ.

⁴ Kĩ Jesus tóg ti mỷ vễnh vĩ jễnễg mũ gé sir. “Ha João mỷ ảjag tỹ nén vég mũ tag ti tómnĩ, ảjag tỹ nén mễg mũ tag ti, ha mẽ,” he tóg.

⁵ “Tag han inh tĩ, ha mẽ: ừn kyvó ag vĩ isugrĩn ễvãnh há nỹtĩ. Ừn kãnhgrĩ ag vĩ mũ há han mũ, ừ tỹ vễnh kaga kren vãnh han mũ ễn ag krenkren han inh tĩ, lepra han mũ ag. Ừn kutu ag vĩ ễmẽ há nỹtĩ ha, ừn kãgter mũ ag vĩ rĩnrĩr mãn nỹtĩ. Ừn jagãgtar ag vĩ Topễ vĩ mễg tĩ, ừ tỹ kanhkã tá nĩ ễn tỹ tỹ ễg pã'i nĩnh ke to.

⁶ Kĩ tóg ti tỹ iso jykrén kónãn tũ nĩn kỹ há' he mũ. Kỹ Topễ tóg ti ve há han mũ. Tag tómnĩ, João mỷ,” he tóg, Jesus ti.

⁷ Kỹ ag tóg sir mũ mũ, João mỷ tóg jé, ti mré mũ tĩ ag.

Ag mũn kỹ Jesus tóg vễnh e ag mỷ João kãmén mũ. “Ảjag tỹ ễmã tũg ja ra mũn kỹ, ti ve jé, kỹ ti jykre hỹn ne ri ke nĩ, ảjag mỷ?” he tóg. “Kejẽn kãka tóg goj jagma krã tỹ man man ke tĩ. João jykre mỷ ảjag mỷ tag ri ke tũ nĩ? Hỹ, ri ke tũ ti nĩ.

⁸ Kỹ ti jykre hỹn ne ri ke nĩ, ảjag mỷ? Ti mỷ ảjag mỷ ừn kur sĩnvĩ ag jykre ri ke nĩ? Vó, ừn kur sĩnvĩ ag vĩ cidada mág tá nỹtĩ, pã'i mág ỉn krêm.

⁹ Kỹ ti jykre hỹn ne ri ke nĩ, ảjag mỷ? Ti jykre mỷ ảjag mỷ Topễ vĩ tó tĩ jykre ri ke nĩ? Hỹ, Topễ vĩ tó tĩ vễ mỷr. Hã ra tóg Topễ vĩ tó tĩ ag kãfór kar nĩ, João ti.

¹⁰ Topễ vĩ João jễnễ, ti tỹ ijo tĩg jé. Hã kỹ tag tóg ti to rãn kỹ nĩ, Topễ vĩ ki, ha mẽ. “Ha vé, ả jo sóg ừ jễnễnh mũ, ti tỹ vễnh kar jykre tỹ há' hen jé, ả tĩg ken jo,” he ja tóg nĩ, Topễ ti, João to, iso ke gé,” he tóg, Jesus ti. “Ag jyvẽn jé tóg ke mũ, kỹ tóg ễpry kure ri ke nĩ, ễmĩn kurynh ri ke,” he ja tóg nĩ, Topễ vĩ tỹ rãn kỹ nĩ ki, João to.

¹¹ Ki hã sóg tóg mũ, hã kỹ sóg ke mũ, ha mẽ. Ễprã ke ag kãfór kar ti nĩ, João ti, Topễ vĩ tón ki. Ừ tỹ ga kri mũ ag kãfór kar ti nĩ. Hã ra ừ

tỹ hễn ri ke ag tóg ừ tỹ kanhkã tá nĩ ễn tỹ tỹ ễg pã'i nĩnh ke ễn venh ke mũ. Ag tỹ venh ke mũ (hã) ra ag tóg kãsir nỹtĩnh mũ. Ừn kãsir ễn ag tỹ ễgno pẽ ễn tóg João kãfór nĩnh mũ, hã ra,” he tóg, Jesus ti.

¹² “João Batista kãtĩg kar kỹ ễg tóg vãsãn kỹ (ễg tóg) ừ tỹ kanhkã tá nĩ ễn tỹ tỹ ễg pã'i nĩ venh ke mũ. Ễg vãsãn kỹ ễg tóg venh ke mũ.

¹³ Topễ vĩ tó tĩ ag kar vĩ Topễ vĩ tó ja nĩgtĩ. Kỹ tóg rãn kỹ nĩ gé, Topễ tỹ ễg jyvẽn mũ ti. Kỹ João tóg tó ja nĩ, ag nón.

¹⁴ João vĩ Elias ri ke nĩ. Tag to jykrén. Rãn kỹ tóg nĩ, Topễ vĩ tỹ rãn kỹ nĩ ki, Elias kãtĩg mãn ke ti, Cristo kãtĩg ken jo. Ti hã vễ, João hã vễ, Elias kãtĩg mãn ễn ti.

¹⁵ Ừ nĩgrẻg nỹtĩ tỹ tỹ jễmẽ jé, to jykrén jé,” he tóg, Jesus ti.

¹⁶ “Ừri ke ag vĩ ge nỹtĩ gé, ha mẽ. Gĩr ag ri ke ag tóg nỹtĩ. Gĩr ag vĩ jagnẻ mré kanhinhir mũgtĩ. Kỹ ag tóg ảjag mré ke ag jé prẻr tĩgtĩ, “mũ nỹ, kanhinhir jé,” hen kỹ. Kỹ ag tóg kejẽn jũgũ tĩ.

¹⁷ “Ảjag mỷ ễg tóg vãkyn, kanhinhir kỹ, hã ra ảjag ne vễnh gringrẻn jãvãnh nỹtĩ,” he ag tóg tĩ, gĩr ag, jagnẻ mỷ. “Ảjag vễnh gringrẻn jãvãnh nỹtĩn kỹ ễg tóg vễsỹrẻnh mũ sir, ễg kanhinhir kỹ, hã ra ảjag tóg ễg mrẻ fỹ jãvãnh nỹtĩ gé,” he ag tóg tĩ gé, ón kỹ jagnẻ to jũ kỹ, gĩr ag.

¹⁸ Gĩr tag ag ri ke ảjag nỹtĩ, João to, iso ke gé. João vĩ vãkre ja nĩgtĩ, jẻn mág tũ, kron tũ. Kỹ ảjag tóg ti to: “jagrẻ kórẻg ti nĩ,” he ja nĩgtĩ, ti vãkre to.

¹⁹ Ti jãvo sóg vãkrẻg tũ nĩgtĩ, jẻg sóg nĩgtĩ, kron sóg nĩgtĩ, kỹ ảjag tóg iso: “ti hã ne jẻn mág nĩgtĩ', ti hã ne kronkron nĩgtĩ', ti hã ne governo mỷ jãnkamy mảg tĩ ag to há nĩgtĩ', ti hã ne Topễ vĩ mranh tĩ ag hã to há nĩgtĩ',” he ảjag tóg sir, iso, ễprã ke fi kósin to. Kỹ João jykre tóg ảjag mỷ kórẻg nỹ, ti vãkre to. Jãvo ỉnh jykre tóg ảjag mỷ kórẻg nỹ gé, ỉnh vãkrẻg tũ to. Hã ra ễg tỹ ừ jykre tugnỹm kỹ ễg tóg ti jykre há ễn ki kanhró nỹtĩ sir. Kỹ tóg tỹ Topễ krẻ nĩ sir, ừn jykre há ti, kỹ ễg tóg ti ki Topễ jykre ki kanhró nỹtĩ sir,” he tóg, Jesus ti. Ti tỹ ag mỷ João kãmén hã vễ.

Jesus tỹ cidada ừ tá ke ag mỷ vĩ kónãn (Lc 10.13-15)

20 Kÿ Jesus tóg cidade tá ke ag mÿ vÿ kónãñ mÿ sir. Cidade tÿ hën ri ke ki tóg ãg tÿ nén han vãnh hyn han ja nÿgtÿ, milagre ti, hã ra ag tóg ãjag jykre tovãñh sór ja tũ nÿgtÿ, ti ki ag tóg ge sór ja tũ nÿgtÿ. Hã kÿ tóg sir ag to vÿ kónãñ ja nÿ, ha mẽ.

21 “Sÿ cidade tÿ Corazim ki ke ag mÿ tag tó sór mÿ, ha mẽ,” he tóg. “Kórég ve jé ãjag tóg ke mÿ,” he tóg. “Sÿ cidade tÿ Betsaida ki ke ag mÿ tag tó sór mÿ, ha mẽ,” he tóg. “Kórég ve jé ãjag tóg ke mÿ gé,” he tóg. “Milagre tÿ hën ri ke hyn han isóg ãjag mÿ, hã ra ãjag tóg ãjag jykre tovãñh sór tũ nÿgtÿ,” he tóg. “Cidade tÿ Tiro tá, cidade tÿ Sidom tá sóg ãg tÿ nén han vãnh ãn hyn han ja tũ nÿ. Sÿ tá milagre ãn hyn han mÿ ra ag tóg ãjag jykre tovãñh mÿ vë, vãsÿ,” he tóg. “Kygÿ ag mÿ vë, ãjag mÿ e tÿn kÿ, ag jykre pãno ãn, sÿ ag mÿ tó (hã) ra. Ag jãvo ãjag tóg tovãñh sór tũ nÿ, to jykrén sór tũ nÿ,” he tóg.

22 “Tiro tá ke ag vÿ vësÿrénh ke mÿ, kurã tÿ ãgno ãn ki, Sidom tá ke ag ke gé, ag jykre pãno to. Hã ra ãjag tóg ag vësÿrénh kãfór han ke mÿ, ha vemñÿ, ãjag tÿ inh vég mÿ ra inh ki ge sór ja tũ nÿn kÿ. Ki hã sóg tó mÿ,” he tóg, Jesus ti.

23 “Sÿ cidade tÿ Cafarnaum ki ke ag mÿ tag tó sór mÿ, ha mẽ,” he tóg. “Ûri tóg ver ãjag mÿ sér tÿ,” he tóg. “Ãjag tÿ kanhkã jykre vég nÿtÿ ra ãjag tóg to jykrén tũ nÿ, hã kÿ ãjag tóg nÿgme ki vár ke kãn mÿ. Cidade tÿ Sodoma tá ke ag vÿ ãjag jykre pãno to kãgter. Ag tÿ sÿ ãjag mÿ nén han mÿ vég mÿ ra ag vãsÿ to jykrén mÿ vë, kÿ ag kãgter ke tũ nÿ vë. Kÿ ãg tÿ ùri ag jamã ve vë vë.

24 Kurã tÿ ãgno ki ag tóg vësÿrénh ke mÿ, Sodoma tá ke ag. Hã ra ãjag tóg ag vësÿrénh kãfór han ke mÿ, sÿ vëñh kar jykre tugñÿm ke kurã ãn kã, ãjag tÿ inh vég mÿ ra inh ki ge sór tũ nÿtÿn kÿ,” he tóg, Jesus ti.

Jesus tÿ ãg krÿ tÿ kãnhvy' henh ke (Lc 10.21-22)

25 Kÿ Jesus tóg tag tó mÿ gé, ha mẽ. “Jóg’,” he tóg. “Tÿ ã tóg kanhkã tãn ag kãfór kar nÿ, kar ã tóg tÿ ãprã ke ag kãfór kar nÿ gé,” he tóg. “Inh mÿ tóg há tÿ, ã tÿ nén han mÿ ti. Û tÿ: “ki kanhró mág inh nÿ,” he mÿ ag mÿ ã tóg ã jykre ven ja tũ nÿ. Ag mÿ ã tóg kãmén

ja tũ nÿ. Û tÿ gÿr ri ke ki kagtÿg ag hã mÿ ã tóg ven ja nÿ, ã jykre ti,” he tóg.

26 “Hÿ, hã vë. ã tÿ nén to jykrén mÿn hã vë, hã kÿ ã tóg ag hã mÿ ã jykre ti nÿm. Hã ra tóg há tãvÿ nÿ, jóg’,” he tóg, Jesus ti.

27 Kÿ tóg ag mÿ: “inh jóg tóg inh mÿ tovãñh kãn, ã tÿ nén han ja kar ti,” he mÿ. “Kÿ ù pi(jé) ti kósin ki kanhró nÿ'. Inh jóg hã ne inh ki kanhró nÿ'. Kÿ ù pi(jé) inh jóg ki kanhró nÿ gé'. Inh hã ne ti ki kanhró nÿ', isÿ tÿ ti kósin nÿn kÿ. Hã ra sóg ãjag mÿ ti kãmén jé kãtÿ mÿ, inh jóg ti. Isÿ tag to ùn kuprëg mÿ ag hã mÿ sóg ti kãmén tÿ, inh jóg ti,” he tóg.

28 “Ãjag jagãgtar nÿtÿn kÿ, ãjag tÿ Topë vÿ ki króm ki kagtÿg nÿtÿ tugrÿn jagtar nÿtÿn kÿ iso kãmÿ jëg. Nén ù tÿ ãjag mÿ jagy tÿn kÿ iso kãmÿ jëg. ãjag krÿ tÿ sóg kãnhvy' henh mÿ mÿr, ha mẽ,” he tóg.

29 “Inh mré kãmÿ jëg. ãjag kanhrãn jé sóg ke mÿ. Komër hã sóg vÿ tÿ. Inh pi(jé) vësÿ ùn mág han tÿ', vÿ tar han vãnh sóg nÿgtÿ. ãjag tÿ iso kãmÿ kÿ ãjag krÿ tóg há' henh mÿ, ha vemñÿ. Kuprã' he jé tóg ke mÿ, ãjag krÿ ti, ha vemñÿ,” he tóg.

30 “Inh jykre pi(jé) kufy nÿ', ãjag mÿ'. Isÿ ãjag mÿ nén tó mÿ pi(jé) han kórég nÿ’,” he tóg, Jesus ti.

12

Jesus tÿ vëñh kãn ke kurã to pã'i (Mc 2.23-28; Lc 6.1-5)

1 Kejën Jesus tóg trigo jo ãpÿ mÿ tÿ mÿ, ti mré mÿ tÿ ag tóg ti mré mÿ mÿ. Vëñh kãn ke kurã ki ke vë, hã ra ag tóg kókÿnkÿr mÿ, vëjën vég tũ nÿn kÿ. Hã kÿ ag tóg trigo mó ãn tÿ kam ke kÿ ko mÿ sir.

2 Kÿ Fariseu ag tóg ag vég mÿ. Kÿ ag tóg Jesus mÿ vÿ mÿ. “Ha vé,” he ag tóg mÿ ti mÿ. “ã mré mÿ tÿ ag ne tóg ãjag tÿ nén han ke tũ han mÿ ha', vëñh kãn ke kurã ki'. Vëñh rãñhrãj vë mÿr, ag tÿ trigo tÿ kam ke ti,” he ag tóg, Jesus, mÿ.

3 Hã ra Jesus tóg ag mÿ: “vó,” he mÿ. “Davi tÿ nén han mÿ to jykrén nÿ,” he tóg. “Ti kókÿr nÿn kÿ tóg ã tÿ nén han ke tũ han gé, ti mré mÿ tÿ ag mré, hã ra Topë pi(jé) ti to jũ mÿ', ti tÿ ã tÿ nén han ke tũ han mÿ ra.

4 Tag han ja ti nĩ, ha mẽ. Topẽ jo ãn kãra rã ky tóg tá Topẽ jamĩ ên kó, tỹ ã tỹ konh ke tũ ra. Ky tóg ã mré mũ tĩ ag mỹ vin gé, Topẽ jamĩ ên. Topẽ tũ ki rĩr tĩ ag tỹ konh ke ja vë vë, Topẽ jamĩ ên, hã ra tóg ko ja nĩ, ti tỹ tỹ Topẽ tũ ki rĩr tĩ tũ ra, Davi ti. Hã ky tóg rán ky nĩ, Topẽ vĩ tỹ rán ky nĩ ki,” he tóg, Jesus ti.

5 “Ky Topẽ tũ ki rĩr tĩ ag jykre to jykren nĩ gé. Tỹ vënhkán ke kurã ra ag tóg rãnrãj mũgtĩ, Topẽ jo ãn krêm, hã ra ag tóg Topẽ tũ ki rĩr tĩ. Hã ky ag tóg tỹ vënhkán ke kurã ra ki vënhkán tũ nĩgtĩ gé, ge ra ag jykre tóg há nĩ, Topẽ mỹ. Hã ky tóg rán ky nĩ gé, Topẽ vĩ tỹ rán ky nĩ ki.

6 Ha mẽ, Topẽ jo ãn vỹ tỹ Topẽ tũ nĩ. Ky ag tóg ti tũ ki rĩr tĩ, tỹ vënhkán ke kurã ra. Hã ra sóg Topẽ jo ãn kãfór nĩ, Topẽ mỹ. Hã ky inh mré mũ tĩ ag tóg Topẽ mỹ há nỹtĩ, ag tỹ vënhkán ke kurã ki vënhkán tũ ra,” he tóg, Jesus ti.

7 “Ky Topẽ vĩ tag to jykren nĩ gé, ha mẽ. “Ajag tỹ jagnë jagãgtãn ky tóg inh mỹ há tĩ,” he ja tóg nĩ. Topẽ ti. “Ky tag tóg inh mỹ ajag tỹ inh mỹ nén ù pũn kãfór nĩ, ajag tỹ jagnë jagãgtãn tag ti,” he ja tóg nĩ. Topẽ ti. Ajag tỹ tag to jykren mũ ra ajag tóg inh mré ke ag to jũnh ke tũ nĩ vë. Ag kókĩr vë mỹr. Nén ù kórég han ja tũ ag tóg nĩ,” he tóg, Jesus ti.

8 “Hã ra sóg tỹ vënhkán ke kurã to pã'i nĩ. Tỹ sóg êprã ke fi kósín nĩ” he tóg, Jesus ti, Fariseu ag mỹ.

*Jesus tỹ ãn nĩgé tóg tỹ há' he
(Mc 3.1-6; Lc 6.6-11)*

9 Ky tóg êmã ên tá kutë ky êmã ù ra tĩ mũ, ky tóg êg vënh kanhrãn jafã kãra rã mũ sir.

10 Tã ù tóg nĩ nĩ, ti nĩgé tóg tóg ja nĩ. Ky ag tóg Jesus mỹ: “mỹ há nỹ vỹ, êg tỹ vënhkán ke kurã ki ù kygtãg ke ti?” he mũ. Hã ra ag tóg pã'i ag mỹ: “vënhkán ke kurã ki tóg Topẽ vĩ mranh tĩ, ù kygtãg ky,” he sór mũ. Hã ky ag tóg ti ki jëmëg mũ. Ag mỹ tóg tỹ vënh rãnrãj nĩ, ù kygtãg ti. Vënhkán ke kurã ki êg nëji ù kygtãg ke tũ nĩ.

11 Hã ra Jesus tóg ag mỹ: “ajag mëg tỹ vënhkán ke kurã ki kãgnó ki kutë ky, ajag mỹ ti kunũnh ke tũ nĩ, tỹ vënhkán ke kurã nĩn ky?” he mũ. “Ti kunũnh jé ajag tóg ke mũ. Ky to jykren nĩ.

12 Êg mré ke vỹ êg mëg kãfór nĩ,” he tóg. “Ky tóg há nĩ, êg tỹ êg mré ke kygtãg ky, tỹ vënhkán ke kurã ra,” he tóg.

13 Ky tóg ãn nĩgé tóg ên mỹ: “ã nĩgé tỹ krỹg' hé,” he mũ. Ky tóg tỹ krỹg' he mũ sir. Hã ra tóg há' he mũ. Ti nĩgé há ên hã ri ke tóg nĩ, ti nĩgé kórég ja ti.

14 Ky Fariseu ag tóg jũgiũ ky pa mũ sir, ãn ên ki. “Êg hỹn hẽ ri kenh mũ, ti tén jé?” he ag tóg mũ, Jesus to.

15 Hã ra Jesus tóg ki kanhró nĩ, ag tỹ ti tén sór mũ ti. Ky tóg sir tá kãkutë mũ, êmã ù ra tĩg jé.

Isaiás tỹ Jesus kãmén ja

Ti tĩg ky ãn tỹ hën ri ke ag tóg ti nón mũ mũ sir, ãn kagyga ag ke gé, fag ke gé. Ky tóg ag tỹ há' he kãn mũ sir, fag tỹ ke gé, Jesus ti.

16 Ky tóg ag mỹ: “ker isỹ ajag tỹ há' he kãmén hẽ,” he mũ.

17 Hã ra tóg rán ky nĩ gé, ti tỹ ag tỹ há' he mũ tag ti. Isaiás ti, ù tỹ vãsỹ Topẽ vĩ rán tĩ ên hã vỹ Jesus to tag rán ja nĩ, ti tỹ Topẽ vĩ tóg ky.

18 Topẽ vĩ tag tó ja ti nĩ, ha mẽ: “ha vé, sỹ ãn kuprëg mũ ên,” he tóg, Topẽ ti,” he ja tóg nĩ, Isaiás ti. “Inh camarada ri ke ti nĩ, ti tỹ isỹ nén tó mũ ên ki króm há han ky. Inh fe pë vëgtĩ, sỹ ti ve ky tóg inh mỹ sér tĩ. Ti hã mỹ sóg inh kuprĩg jënënh mũ, ky tóg inh vĩ tónh mũ sir. Fóg ag mỹ tóg tónh mũ, kanhgág ag mỹ ke gé, isỹ ag jykre tugnyĩm ke ti,” he tóg, Topẽ ti,” he ja tóg nĩ, Isaiás ti.

19 “Vĩ jũ han ke tũ ti nĩ, jũ ky vĩ tar han ke tũ ti nĩ gé. Re tá ag tóg ti vĩ mẽnh ke tũ nĩ gé. Komër hã tóg vĩnh mũ,” he tóg, Topẽ ti.

20 “Êprã ke ag tỹ inh vĩ mranh ky ag tóg vãn tỹ ã tỹ tóg' he ky kam ke ên ri ke nỹtĩ. Hã ra ti pi(jé) ag tỹ kam ke kãn ke mũ', isỹ ù to: inh fe, he mũ ên ti. Néj gru tỹ nhyn ke sór ri ke ag nỹtĩ gé. Ti pi(jé) ag tỹ nhyn kenh ke mũ', hã ra'. Ag mỹ tóg vĩ há han ke mũ. Tag kar ky sóg kejën vënh kar jykre tugnyĩm ke mũ.

21 Ên kã ù tỹ ti ki ge ky nỹtĩ ag hã vỹ krenken ke mũ, fóg ag mré hã, kanhgág ag mré hã,” he tóg, Topẽ ti,” he ja tóg nĩ, Isaiás ti, Jesus to. Hã ra tóg ge nỹgtĩ.

*Jesus tỹ Japo jykre tó
(Mc 3.20-30; Lc 11.14-23)*

22 Kejĕn ag tóg Jesus to ũ pére kãmũ mũ, ũn kyvó. Vĩ vãnĥ tóg nĩ gé. Hã ra tóg jagrĕ kórég nĩ gé, hã kÿ tóg ge nĩgtĩ. Kÿ Jesus tóg ti tÿ há' he mũ sir. Kÿ tóg vĩ há' he mũ sir. Ve há' he tóg mũ gé sir.

23 Kÿ tóg vĕnh kar mũ e tãvĩ tĩ. Kÿ ag tóg jagnĕ mũ: “Davi kósin ĕn tũ mũ'?” he mũ sir, Jesus to. “Ũ tÿ vãsÿ rán kÿ nĩ ĕn tũ mũ'?” he ag tóg mũ. Ag mũ tóg ti hã nĩ ve nĩ.

24 Kÿ Fariseu ag tóg mĕg mũ sir, Jesus tÿ ti tÿ há' he mũ ti. Hã ra ag tóg Jesus to: “jagrĕ kórég ti nĩ,” he mũ. “Nén-Kórég ag pã'i tÿ ti jagrĕ nĩ, Belzebu ĕn tÿ,” he ag tóg mũ. “Hã kÿ tóg Nén-Kórég ag pan tĩ, hã kÿ tóg ag jagrĕ kórég ag pan tĩ. Nén-Kórég ag pã'i jykre tÿ tóg ag pan tĩ,” he ag tóg, Fariseu ag.

25 Hã ra Jesus tóg ki kanhró nĩ, ag tÿ nĕn to jykrĕn mũn ki. Kÿ tóg ag mũ: “pã'i pir krĕm ke ag tÿ jagnĕ kato tĕgtĕn kÿ ag tóg jagnĕ kãgtĕn kãn ke mũ,” he mũ. “Ĕmã pir ki ke ag tÿ jagnĕ kato tĕgtĕ kÿ, ĩn pir krĕm ke fag tÿ jagnĕ kato tĕgtĕ kÿ fag tóg vĕnh kãpãm kÿ nÿtĭnh mũ, kÿ fag tóg jagnĕ kãgtĕn kãn ke mũ.

26 Ge ti nĩ gé, Nén-Kórég ag. Nén-Kórég tÿ Nén-Kórég ũ kutĕm kÿ tóg Nén-Kórég ag tÿ jagnĕ kato tĕgtĕ han mũ sir. Kÿ ag tóg jagnĕ tÿ tũ' hĕnh ke mũ gé, Satanás ag.

27 “Belzebu tÿ tóg Nén-Kórég ag pan tĩ,” he ãjag tóg tĩ iso. Jãvo ãjag mré ke ag hÿn vĕnh jykre tÿ ne tÿ vĕnh jagrĕ kórég ag pan tĩ? Ag mũ Nén-Kórég ag jykre ki ag pan mũ gé', Topĕ jykre ki mũ vó? Topĕ jykre ki ag tóg ag pan tĩ. ãjag tÿ tag to jykrĕn kÿ ãjag tóg ĩnh jykre há ki kanhrãn ke mũ vĕ,” he tóg ag mũ, Jesus ti.

28 “Topĕ kuprĭg jykre tÿ sóg Japo ag pan tĩ mũr. Topĕ kuprĭg tÿ Japo ag pan kãn kÿ Topĕ tóg tÿ ĕg pã'i nĩ vĕ mũr. Tag to jykrĕn nĩ,” he tóg, Jesus ti.

29 mãn sór kÿ, ti ĩn tá, kÿ ĕg tóg ti se vĕn tĩ, ke tũ nĩ (mũ) ra tóg ã tũ ki rĭr ke mũ, kÿ ĕg tóg ti tũ mãn tÿ hĕ ri kĕnh ke tũ nĩgtĩ, ti tar nĩn kÿ. Ĕg tÿ ti se kar kÿ ĕg tóg ti tũ mãg mũ sir,” he tóg. “Ge ti nĩgtĩ, sÿ nĕn han mũ ti. Tar ti nĩ, Japo ti. Hã ra sóg hur ti sé, hã kÿ sóg ti tũ ag kygvãn ke mũ sir. Ag jagrĕ kórég pan sóg mũ sir,” he tóg, Jesus ti.

30 “ãjag tÿ tÿ ĩnh mré ke tũ nÿtĭn kÿ ãjag tóg ĩnh kato tĕgtĕ mũ. ãjag tÿ ĩnh mré ĕprã ke ag tÿ Topĕ to kãmũ han tũ nĩn kÿ ãjag tóg ag kãmũ kamĕg mũ,” he tóg.

31 “Hã kÿ sóg ãjag mũ tó mũ. ãjag tÿ Topĕ vĩ mranh mũ ra tóg ãjag mũ vĕnh pãte fón sór mũ, Topĕ ti. ãjag tÿ Topĕ to vĩ kónãn mũ ra tóg ãjag mũ vĕnh pãte fón sór mũ gé. ãjag tÿ hã ra Topĕ kuprĭg to: “Japo tÿ ĕg jagrĕ vĕ,” ĕn kÿ tóg ãjag mũ vĕnh pãte fón mãn ke tũ nĩ ha sir, Topĕ ti,” he tóg, Jesus ti.

32 “ãjag tÿ iso vĩ kónãn mũ. ãjag tÿ hã ra Topĕ kuprĭg to vĩ kónãn kÿ tóg ãjag mũ vĕnh pãte fón mãn ke tũ nĩ ha. ãjag tÿ ga kri mũn kÿ tóg ãjag mũ vĕnh pãte fón mãn ke tũ nĩ, Topĕ ti, ãjag ter kar kÿ tóg ãjag mũ vĕnh pãte fón mãn ke tũ nĩ gé,” he tóg, Jesus ti.

Ka to comparação (Lc 6.43-45)

33 “Ĕg tÿ ka kanĕ ko há krãn kÿ ti kanĕ vÿ ko há nĩ, ĕg tÿ ka kanĕ ko vãnĥ krãn kÿ ti kanĕ vÿ ko kórég nĩ gé. Ĕg tÿ ti kanĕ ve kÿ ĕg tóg: “ũn kanĕ ko vãnĥ ja vĕ,” ĕnh ke mũ. Ge ti nĩgtĩ, ĕg jykre ti. Ũn jykre há tóg há nĩ, ũn jykre kórég tóg kórég nĩ gé.

34 Pÿn ri ke ãjag nÿtĩ. Kórég tãvĩ ãjag nÿtĩ, hã ra ãjag tóg ón kÿ nĕn ũ há tó sór tĩ. Ĕg jĕnky ki tóg kutĕ tĩ, ĕg tÿ nĕn to jykrĕn mũ ti. Ĕg jykre kórég tãvĩ nĩn kÿ ĕg tóg nĕn ũ kórég tãvĩ tó tĩ. Hã kÿ ãjag pi(jé) tó há han tĩ'.

35 Ũn jykre há vÿ nĕn ũ há kar to jykrĕn tĩ, kÿ tóg ĕg mũ tó há han tĩ gé sir, Ũn jykre kórég vÿ nĕn ũ kórég kar to jykrĕn tĩ, kÿ tóg ĕg mũ tó kónãn tĩ gé sir,” he tóg, Jesus ti.

36 “Ki hã sóg tó mũ ãjag mũ, hã kÿ sóg ke mũ kurã tÿ ĕgno ki, sÿ vĕnh kar jykre tugnÿm ke kurã ĕn ki sóg ãjag vĩ tugnÿm ke mũ. Kÿ ãjag tÿ ón kÿ vĩ ja nĩn kÿ sóg ĕn vĕnh ke mũ gé. ãjag tÿ nĕn tó ja kar tugnÿm jé sóg ke mũ, ha vemnĩ,” he tóg, Jesus ti.

37 “ãjag tÿ vĩ há han ja nĩn kÿ ãjag tóg ĩnh mũ há nÿtĩ gé. ãjag tÿ vĩ kórég han ja nĩn kÿ ãjag tóg ĩnh mũ kórég nÿtĩ. Kÿ ã kato tĕ mũ ag mũ Topĕ jykre tón hã vĕ.

Ag tÿ milagre ve sór (Mc 8.11-12; Lc 11.29-32)

³⁸ Kÿ Topê vî to professor ù ag tóg Fariseu ù ag mré Jesus mÿ: “Senhor,” he mÿ. “Ëg tÿ ã tÿ milagre han venh há tóg tí,” he ag tóg mÿ, Jesus mÿ.

³⁹ Kÿ Jesus tóg ag mÿ: “kórég ãjag nÿtÿ,” he mÿ. “Topê ki ge sór vânh ãjag tóg nÿtÿ,” he tóg. “Ãjag tÿ milagre ve sór mÿ tag venh ke tÿ ãjag tóg nÿ. Nén pir hã ve jé ãjag tóg ke mÿ, hã vÿ: Jonas tÿ nén ve ja ên ri ke, he mÿ, vãsÿ Topê vî tó tí ên tÿ nén ve ja ên ri ke.

⁴⁰ Jonas ên vÿ goj tân nug kãkã nÿ ja nÿ, kurã tâgtÿ ki, kuty tâgtÿ ki ke gé. Tag ri ke ve jé sóg ke mÿ gé. Ga krêm sóg nÿnh mÿ, kurã tâgtÿ ki, kuty tâgtÿ ki ke gé. Tÿ sóg êprã ke fi kósín nÿ,” he tóg, Jesus tí.

⁴¹ “Kÿ Nínive tá ke ag vÿ ãjag kato vÿnh ke mÿ sir, kurã tÿ êgno ki, ha vemñi. Ag tÿ Jonas vî mẽ kÿ ag tóg ãjag jykre kórég tovãnh, Nínive tá ke ag. Tÿ sóg Jonas kãfór nÿ, hã ra ãjag tóg ãjag jykre kórég tovãnh sór tÿ nÿ, sÿ Nínive tá ke ag jãvo ãjag mÿ tó mÿ ra. Hã kÿ ag tóg ãjag jykre kórég tónh ke mÿ, kurã ên kã, ha vemñi.

⁴² Kÿ pã'i mág ên fi, pã'i tÿ rainha ên fi, ù tÿ kanhkã fyn ja tá kãtÿg ja ên fi vÿ nÿnh ke mÿ gé, kurã tÿ êgno kã. ãjag mré fi tóg jênh ke mÿ, kÿ fi tóg ãjag to vÿ kónãn ke mÿ gé. Kanhkã fyn ja tá fi tóg kãtÿg ja nÿ, vãsÿ, fi tÿ Salomão vî mẽ jé. Salomão kãfór vÿ tÿ inh nÿ, hã ra ãjag tóg inh vÿ jêmê jãvãnh nÿtÿ,” he tóg, Jesus tí.

Vênh jagrê kórég jykre (Mc 11.24-26)

⁴³ “Kejên sóg vênh jagrê kórég ù kutêm mÿ. Kÿ sóg ga kórég mÿ tí mÿ, ti jagrê ên tí. Goj venh ke tÿ tóg nÿ tá. Vênhkán ke tÿ tóg nÿ gé, ti tÿ hê ri ken kÿ vênhkán ke tÿ tÿn kÿ.

⁴⁴ Kÿ tóg vãhã to jykren mÿ sir. “Inh hÿn ên ra tÿg mãn ha, sÿ ù tá kãkutê ja ên ra. Inh mÿ tóg tÿ ïn ri ke ja nÿ. Kÿ inh hÿn tóg ti kãra rã mãn ha,” he tóg mÿ sir, ti jagrê ja ên tí. Kÿ tóg ti venh tí mÿ sir. Hã ra tóg sir krÿ há nÿ, kÿ tóg ti mÿ ïn há ri ke nÿ sir, in prur, ïn kuprã, ïn sÿnvÿ ri ke.

⁴⁵ Kÿ tóg Nén-Kórég tÿ 7 (ke) ag mÿ tónh tí mÿ sir. “Ha kãmÿ jêg he tóg mÿ sir. Hã ra ag jykre pãno tóg ti jykre pãno kãfór nÿ. Kÿ ag kar tóg ù ên kãge mÿ, tÿ ag ti jagrê nÿtÿ, isÿ ùn mÿ ti jagrê pir kutêm ja ên tí. Hã kÿ

to, kórég tãvÿ nÿ sir. Ti jagrê pir kutêm inh nÿ vê, hã ra tÿ 8 (ke) ag tóg sir tÿ ti jagrê nÿtÿ, ti tÿ inh ki rã tÿ nÿn kÿ. ãjag mÿ tóg ge nÿnh mÿ, kurã tÿ êgno ki. Ùri ãjag jykre vÿ pãno nÿ. Hã ra kurã ên ki tóg sir pãno kãfór nÿnh mÿ. Kÿ ãjag tóg sir to jagtar tãvÿ nÿtÿnh mÿ,” he tóg, Jesus tí.

Jesus mré ke pẽ fag (Mc 3.31-35; Lc 8.19-21)

⁴⁶ Ti tÿ ver tÿ vëmén kÿ ti mÿnh fi tóg tá jun mÿ sir, ti jãvy ag mré. Ti mÿ fag tóg vênh vÿ jêñg mÿ, fag tÿ ti mré vëmén jé.

⁴⁷ Kÿ ù tóg ti mÿ tónh kãtÿ mÿ. “Ã mÿnh fi vÿre tá jê, ã jãvy ag mré. Fag tÿ ã mré vëmén ke nêji,” he tóg, Jesus mÿ.

⁴⁸ Kÿ tóg ù tÿ ti mÿ tó mÿ ên mÿ: “inh mÿnh fi mÿ inh ve sór mÿ', inh jãvy ag mré?” he mÿ. “Inh mÿnh pẽ fi pijé', inh jãvy pẽ ag pijé',” he tóg.

⁴⁹ Kÿ tóg ti mÿ ã mré mÿ tí ag ven mÿ sir, ã nÿgé tÿ. Kÿ tóg ti mÿ: “inh mÿnh pẽ fi hã vê, inh jãvy pẽ ag hã vê,” he mÿ, ã mré mÿ tí ag to.

⁵⁰ “Û tÿ inh panh tÿ kanhkã tá nÿ ên vÿ ki króm mÿ vÿ tÿ inh jãvy pẽ ag nÿtÿnh mÿ, inh ve pẽ fag ke ge, inh mÿnh pẽ fi ke gé,” he tóg, Jesus tí.

13

Nén fy to comparação (Mc 4.1-9; Lc 8.4-8)

¹ Kurã ên kã Jesus tóg ïn tá kãkutê mÿ, kÿ tóg goj nig ra tí mÿ. Tá tóg nÿ nÿ sir.

² Kÿ ù tÿ hên ri ke ag vÿ tá vênh mãn mÿ sir, ti rã hã, kÿ tóg canoa kãkã nÿ mÿ sir, jo ùn e ên ag tóg nig fyr tá nÿtÿ.

³ Kÿ tóg ag kanhrãn mÿ sir. Ag mÿ tóg comparação tÿ hên ri ke hÿn han mÿ. Kÿ tóg ag mÿ: “Û tÿ Topê vî tó mÿ vÿ ge nÿtÿnh mÿ, ha mẽ,” he mÿ. “Kejên ù tóg nén ù fy vãvãm tí mÿ,” he tóg.

⁴ “Ti tÿ vãvãm kÿ ti fy ù tóg êpry kri, êmÿn kri kutê mÿ, kÿ sêsÿ tóg ti ko mÿ sir.

⁵ Ti fy ù tóg pãró kri kutê mÿ, ga e tÿ ki. Kÿ tóg kãnhmar mur mÿ vê, ga sí ên ki.

⁶ Hã ra rã tóg ã tÿ êg nÿno kã sa kÿ (tóg) ti pÿn mÿ. Ti jãre han tÿ nÿn kÿ tóg tóg mÿ.

⁷ Ti fy ù tóg sónh kãki kutẽ mũ, kÿ sónh tóg ti mré mur mũ, kÿ tóg ti kri rũm mũ. Kÿ tóg tũ' he mũ sir.

⁸ Ti fy ù tóg ga há kri kutẽ mũ, kÿ tóg mur há han mũ, mog há han tóg mũ, kanẽ há han tóg mũ gé. Û tóg kanẽ tỹ 100 (ke) han, jo ù vỹ tóg kanẽ tỹ 60 (ke) han, jo ù vỹ tóg kanẽ tỹ 30 (ke) han.

⁹ Ûn nĩgrẽg nỹtĩ tỹ tỹ jẽmẽ jé," he tóg, Jesus ti.

*Ëg tỹ comparação to vẽnhanhrãn ke
(Mc 4.10-12; Lc 8.9-10)*

¹⁰ Kÿ ti mré mũ tĩ ag tóg ti to kãmũ mũ, kÿ ag tóg ti mỹ: "ã tỹ ne tó nẽ?" he mũ.

¹¹ Kÿ Jesus tóg ag mỹ: "ãjag hã ne ù tỹ kanhkã tá nĩ ãn tỹ tỹ ãg pã'i nĩ ãn ki kanhró nỹtĩnh mũ'," he mũ, "ũ tỹ inh jo nén tó ja tũ ãn ti," he tóg mũ. "Hã ra ùn e ãn ag vỹ ki kanhrãn kãn ke tũ nĩ," he tóg.

¹² "Hã kÿ tóg ge nĩ. Û tỹ nén to jykrén há han kÿ tóg ù to jykrén mãn', ù to jykrén mãn' he mũ. Komẽr hã tóg to jykrén kãn ke mũ. Û tỹ nén to jykrén tũ nĩn kÿ tóg ti mỹ tũ' he mũ, ti tỹ to jykrén sĩ han kÿ.

¹³ Hã kÿ sóg ùn e ãn ag mỹ comparação han mũ, ag tỹ mẽ há han sór tũ nỹtĩn kÿ. Kÿ ag tóg ón kÿ mẽg mũ ra ki kagtĩg nỹtĩ, to jykrén tũ ag nỹtĩ sir.

¹⁴ Hã ra tóg rán kÿ nĩ gé. Isaías tỹ vãsỹ Topẽ vỹ tó kÿ tóg tag tó ja nĩ, ha mẽ. "Mẽ jé ãjag tóg ke mũ ón kÿ, hã ra ãjag tóg to jykrén tũ nĩnh mũ, kÿ ãjag tóg ki kagtĩg nỹtĩnh mũ.

¹⁵ Povo tag ag vỹ krĩ tũ nỹtĩ, nĩgrẽg kutu ag tóg nỹtĩ gé, kanẽ kyvó ag tóg nỹtĩ gé, ag tỹ nén ù ve sór tũ nỹtĩn kÿ, ag tỹ jẽmẽ sór tũ nỹtĩn kÿ, ag tỹ to jykrén sór tũ nỹtĩn kÿ ke gé. Hã kÿ ag tóg inh ki ge sór tũ nỹtĩ gé, kÿ sóg ag tỹ há' henh ke tũ nĩ gé," he ja tóg nĩ, Isaías ti, povo tag to," he tóg, Jesus ti.

¹⁶ "Ag jãvo ãjag hã vỹ nĩgrẽg há nỹtĩ, hã kÿ ãjag tóg ag jãvo jẽmẽ há han mũ.

¹⁷ Ha mẽ, ù tỹ hẽn ri ke ag vỹ inh ve sór e ja nĩgtĩ, vãsỹ, ãjag tỹ ùri vэг mũ tag ti. Hã ra ag tóg inh kãtĩg ke jo kãgter. Topẽ vỹ tó tĩ ag vẽ. Jykre kuryj ag nỹtĩ ja nĩ, hã kÿ ag tóg ãjag tỹ nén vэг mũ tag ve sór e ja nĩgtĩ. Hã ra ag tóg ve ja tũ nĩgtĩ, mẽ ja tũ ag nĩgtĩ, ãjag tỹ ùri nén mẽg mũ ti. Ag tỹ vэг tũ ra ag tóg

kãgter. ãjag hã ne mẽg mũ', inhhã'," he tóg, Jesus ti. Ti mré mũ tĩ ag mỹ tóg ke mũ.

*Jesus tỹ nén fy to comparação kãmén
(Mc 4.13-20; Lc 8.11-15)*

¹⁸ "Kÿ sóg ãjag mỹ kãmén mũ, nén fy kanẽ tag ti, ha mẽ.

¹⁹ Û tóg kejẽn ón kÿ Topẽ vỹ mẽg mũ, ti tỹ tỹ ãg pã'i nĩ ti. Hã ra tóg to jykrén tũ nĩ, ã tỹ ón kÿ mẽn kÿ. Kÿ Nén-Kórég vỹ ti mỹ tỹ tũ' he mũ sir, ti tỹ mẽ ja ti tỹ. Kã jatu tóg nĩ sir. Ëpry kri, ãmĩn kri kutẽ mũ ãn hã vẽ.

²⁰ Kÿ ti fy ù tóg pãró kri kutẽ mũ. Û vẽ gé. Topẽ vỹ mẽg tóg mũ gé. Kÿ tóg kãnhrãm: "hej," he mũ sir. Ti mỹ tóg sér tĩ.

²¹ Hã ra tóg tỹ nén kré jãre tũ ri ke nĩ mỹr. Kÿ tóg tĩg sĩ han mũ, Topẽ mré. Nén ù jagy kutẽ kÿ tóg Topẽ tovãnh mũ sir, ù tỹ Topẽ vỹ tũgrĩn ti kato tẽ kÿ. Kãnhrãm tóg tovãnh mũ.

²² Ti fy ù tóg sónh kãki kutẽ mũ. Û vẽ gé. Topẽ vỹ mẽg tóg mũ gé. Hã ra tóg ã rãnhrãj hã mĩ ãkrég mũ sir. Nén kar to éntóg mũ sir, ón kÿ rico nĩ sór jé. Hã kÿ Topẽ vỹ tóg ti mỹ katy tĩ sir. Kÿ tóg han tũ nĩ sir, kanẽ ti.

²³ Ti fy ù tóg ga há kri kutẽ mũ. Û vẽ gé. Topẽ vỹ mẽg tóg mũ gé. Mẽ kÿ tóg to jykrén mũ sir. Kÿ tóg kanẽ han mũ sir. Kÿ ù vỹ tóg kanẽ tỹ 100 (ke) han, jo ù vỹ tóg kanẽ tỹ 60 (ke) han, jo ù vỹ tóg kanẽ tỹ 30 (ke) han," he tóg, Jesus ti.

Vãnh to comparação

²⁴ Kÿ tóg comparação ù han kÿ: "Nén-Kórég tỹ inh rãnhrãj kókén sór mũ vỹ ge nỹnh mũ, ha mẽ," he mũ. Kÿ tóg: "ũ tỹ kanhkã tá nĩ ãn tỹ tỹ ãg pã'i nĩ vỹ ge nĩ, ha mẽ," he mũ. "Kejẽn ù tóg nén fy vãvãm mũ, ti japỹ tá, tỹ ti jakré nỹ jé.

²⁵ Kÿ tóg nũr tĩ mũ, ti camarada ag ke gé. Kÿ ti kato tẽ mũ ãn tóg kutyg kÿ ra tĩ mũ, ti japỹ ãn ra, kÿ tóg vãnh fy vãvãm mũ, trigo fy ãn kãmĩ. Kÿ tóg tĩ mũ sir, vãnh fy ãn vãvãm kar kÿ.

²⁶ Kÿ trigo tóg mur mũ, mog tóg mũ, kanẽ han tóg mũ sir. Hã ra vãnh tóg ti mré mur mũ gé.

²⁷ Kÿ ti camarada ag tóg ãjag patrão mỹ tónh mũ mũ. "Trigo fy vãvãm ãg tóg mũ vẽ, hã ra vãnh tóg ti mré mur mũ. Ne nẽ hỹn?" he ag tóg ti mỹ.

²⁸ Kĩ tóg ag mĩ: “ĕg kato tē mũ ĕn rãnrãj hã vĕ,” he mũ. “Ĕn hã ne isũ kókég’,” he tóg. Kĩ ag tóg ti mĩ: “kĩ ĕg mĩ vãnh ĕn kunũnh ke tũ nĩ?” he mũ.

²⁹ Kĩ tóg ag mĩ: “hĩ,” he mũ. “Ăjag tỹ vãnh ũ kunũnh kĩ tóg ajag tỹ ti pĕn ũ kunũnh ha mẽ tĩ, vãnh mré. Kĩ kunũnh tũg nĩ.

³⁰ Vãnh hỹn tóg trigo mré mog mũ gé. Kĩ ĕg tỹ kre kĩ sóg ũ tỹ krég mũ mĩ tónh ke mũ. “Vãnh kre vén nĩ,” he jé sóg ke mũ. “Ti kre kar kĩ ti tógfĩ, ĕg tỹ ti pũn jé. Kar kĩ ajag tóg trigo krenh ke mũ, sỹ pãjó krĕm vin han jé,” he jé sóg ke mũ,” he tóg, ag patrão ti,” he tóg, Jesus ti. Ti tỹ ũ tỹ ón kĩ Topĕ ki ge kĩ nỹtĩ ĕn ag tó jan hã vĕ.

Mostarda fy to comparação (Mc 4.30-32; Lc 13.18-19)

³¹ Kĩ tóg ag mĩ nĕn ũ tó mũ gé sir. “Ũ tỹ kanhkã tá nĩ tỹ tỹ ĕg pã'i nĩ vỹ ge nĩnh mũ, ha mẽ,” he tóg. “Ka tỹ mostarda fy ri ke tóg nĩ. Ti krãn ĕg tóg tĩ, ĕg japỹ ki, ka tỹ mostarda fy ti.

³² Kãsir ti nỹtĩ, ti fy ti. Ũ fy vỹ ti sĩ ri ke tũ nĩ. Ti krãn kar kĩ tóg mog mũ. Kĩ tóg ĕgóho ag kãfór nĩ. Pĕ mág ti nỹtĩ, hã kĩ sĕsĩ ag vỹ kri krĕg tĩ, ti pĕ kri,” he tóg, Jesus ti. Ti tỹ ĕg tỹ ti vĩ tó vén kar kĩ vĕnh kar kri rũm ke mũ kãmĕn hã vĕ.

Fermento to comparação (Lc 13.20-21)

³³ Kĩ tóg ag mĩ comparação ũ tó mũ gé sir, kĩ tóg: “Topĕ tỹ tỹ ĕg pã'i nĩ vỹ tag ri ke nĩnh mũ, ha mẽ,” he mũ. “Ũn tỹtã fag tóg pão han tĩ. Pão han jé fag tóg pão jĕgja jafã tỹ fermento ĕn tỹ farĩnh mré jĕgiãg tĩ. Fermento sĩ ĕn tỹ pão kar ĕn tóg són ke kãn tĩ,” he tóg, Jesus ti. Ti vỹ tỹ vĕnh kar kri rũm ke kãmĕn hã vĕ.

Jesus tỹ comparação tỹ ĕg kanhrãn (Mc 4.33-34)

³⁴ Comparação tỹ ge han tóg tĩ, Jesus ti, vĕnh kar mĩ. “Topĕ tỹ tỹ ĕg pã'i nĩnh ke mũ vỹ ge nĩnh mũ,” he tãvĩ han tóg tĩ ag mĩ.

³⁵ Hã ra tóg rán kĩ nĩ gé, Jesus tỹ comparação han ke mũ ti. Vãsỹ Topĕ vĩ tó tĩ ũ tóg Jesus kãmĕn kĩ tag tó ja nĩ ti to, ha mẽ. “Comparação han jé sóg ke mũ. Inh jo tó ja tũ ĕn tó jé sóg ke mũ. Ũ vỹ tag mẽ ja tũ nĩ

ver, sỹ tónh ke mũ tag,” he ja tóg nĩ, Topĕ vĩ tó tĩ ĕn, Jesus to. Hã ra tóg hã tó tĩ, Jesus ti.

Jesus tỹ vãnh to comparação kãmĕn

³⁶ Ag mĩ kãmĕn kãn kar Jesus tóg vĕnh e ĕn ré kĩ ĩn kãra rã mũ. Kĩ ti mré mũ tĩ ag tóg ti to kãmũ mũ, ti ki jĕmĕ jé. “Ĕg mĩ ã tỹ ag mĩ kãmĕn ja ĕn ti tó mãn nĩ, ã tỹ ag mĩ trigo mré vãnh tó ja ĕn ti. Ĕg tỹ ver to jykrĕn tũ tóg tĩ,” he ag tóg mũ, Jesus mĩ.

³⁷ Kĩ tóg ag mĩ kãmĕn mũ. “Ĕprã ke fi kósin vỹ trigo fy vãvãm mũ. Inh hã vĕ,” he tóg mũ.

³⁸ “Ga hã to sóg: ĕpỹ, he mũ. Kĩ trigo ĕn vỹ Topĕ krĕ ag ri ke nỹtĩ, kĩ vãnh vỹ Nĕn-Kórég krĕ ag ri ke nỹtĩ.

³⁹ Ũ tỹ ag han mũ vỹ tỹ Japo ti nĩ, Nĕn-Kórég ĕn krĕ ag. Ti colher ke kurã hã vỹ: kurã tỹ ĕgno, he mũ. Ũ tỹ trigo colher ke mũ ag vỹ tỹ Topĕ tỹ jĕgnĕ jafã ag nỹtĩ.

⁴⁰ Kurã tỹ ĕgno ki ag tóg ĕg tỹ vãnh pũn ĕn ri ke han ke mũ, Japo tũ ag tỹ.

⁴¹ Ĕprã ke fi kósin ĕn, inh hã vỹ isỹ jĕgnĕ jafã ĕn ag jĕgnĕnh ke mũ sir, kĩ ag tóg ũ tỹ vĕnh jykre pãno han mũ kar ag génh kãn ke mũ, ũ tỹ ũ ag mĩ: “ha jatun mĩ Topĕ vĩ mranh,” he mũ kar ag ke gé.

⁴² Ag génh kĩ ag tóg pĩ gru mág ĕn ki ag vãm ke mũ sir. Tá ag tóg vĕsỹrénh tãvĩ han tĩ. Ajag jã tỹ ag tóg gyngyn hĕnh ke mũ, gangan ke jé ag tóg ke mũ, jũ kĩ, vĕsỹrénh kĩ ke gé.

⁴³ Kĩ ũn jykre kuryj ag vỹ há pĕ nỹtĩnh mũ, sĩnvĩ, kókov, rã gru ri ke, ag tỹ ajag jóg tá nỹtĩnh ken kĩ sir, ag tỹ ũ tỹ kanhkã tá nĩ ĕn tỹ tỹ ĕg pã'i nĩ ven kĩ. Ũn nĩgrĕg nỹtĩ tỹ tỹ jĕmĕ jé,” he tóg, Jesus ti.

Ĕpỹ ki jãnkamy to comparação

⁴⁴ “Kĩ ĕg tỹ ũ tỹ kanhkã tá tỹ ĕg pã'i nĩ venh ke vỹ tag ri ke nĩ gé, ha mẽ. Ũ tỹ ã patrão japỹ tá jãnkamy ne kunũnh kĩ péju mãn kĩ nĩm ri ke tóg nĩ. Ti péju mãn kĩ tóg ã tỹ nĕn kar fón kãn mũ sir, ti kaja to ĕpỹ ĕn vyn jé sir. Ĕpỹ ĕn vyn kar kĩ jãnkamy ĕn vỹ tỹ ti tũ nĩ sir,” he tóg, Jesus ti. Ti tỹ ĕg mĩ ĕg tỹ ti ki rã sór kĩ ĕg tũ fón kãn tón hã vĕ.

Pérola to comparação

45 “Ēg tỹ ũ tỹ kanhkã tá nĩ ěn tỹ tỹ ěg pã'i nĩ venh ke vỹ tag ri ke nĩ gé, ha mẽ,” he tóg mũ gé. “Negociante ũ tóg jãnka han jafã tỹ negociar he tĩ, pérola tỹ. Hã kỹ tóg ũn há kuprêg tĩgtĩ.

46 Kejẽn tóg ũn há pẽ ũ vég mũ sir, ũn kaja e. Kỹ tóg ã tũ vãm kãn mũ sir, ã tỹ ũn sĩnvĩ pẽ ěn kajãm jé, ti tỹ tỹ tũ nĩ jé,” he tóg, Jesus ti. Ti tỹ ěg mũ ěg tỹ ti ki rã sór kỹ ěg tũ vãm kãn tó mãn hã vẽ gé.

Rede to comparação

47 “Ēg tỹ ũ tỹ kanhkã tá nĩ ěn tỹ tỹ ěg pã'i nĩ venh ke to comparação vẽ gé, ha mẽ,” he tóg mũ gé. “Rede ri ke tóg nĩ, ěg tỹ tỹ pirã kugmĩ jafã ěn. Ti fig ěg tóg tĩ, goj kãkã, ěg tỹ pirã kugmĩ jé, kãkofár ke gé.

48 Ki ti fón kar kỹ ěg tóg nỹgnỹn mũ sir, goj ki ěg tóg pirã mré kãkofár gég tĩ. Génh kỹ ěg tóg ũn mág ag hã kuprêg tĩ, ma mũ jé. ũn kãsir ěn togvãnh ěg tóg tĩ.

49 Ge ti nĩgtĩ, kurã tỹ ěgno ki. Topẽ tỹ jẽgnẽ jafã ag tóg ũn jykre kuryj ag kuprêg ke mũ, Topẽ mũ.

50 ũn jykre pãno ag vãvãm jé ag tóg ke mũ, pĩ gru mág ěn ki. Tá ag vësỹrénh vẽ sir. Ājag jã tỹ ag tóg gyngyn henh ke mũ, tỹ ag gangan kej ke mũ, jũ kỹ, vësỹrénh kỹ,” he tóg, Jesus ti. Ti tỹ ag mũ ěg tỹ ti ki rã sór jé kãmén hã vẽ.

Ēg panh to comparação

51 Kỹ tóg ã mré mũ tĩ ag mũ: “ãjag mũ tag to jykrén kãn mũ, sỹ ãjag mũ nén kãmén mũ tag ti?” he mũ. Kỹ ag tóg ti mũ: “hỹ,” he mũ sir.

52 Kỹ tóg ag mũ: “kỹ tóg há tĩ,” he mũ. “Ũ tỹ Topẽ vĩ to professor ěn, ti tỹ kanhkã tá nĩ ěn jykre ki rãn kỹ tóg ge nĩ, ha mẽ,” he tóg. “Ēg panh ri ke tóg nĩ, ti tỹ tỹ nén ũ mág nĩn kỹ. Ēg panh tóg kejẽn ěg mũ ã tỹ nén sĩnvĩ ven tĩ, ti tỹ ũri mág mũ ti, ti tỹ vãsỹ mãn ja ěn ke gé,” he tóg, Jesus ti. Ti tỹ ěg mũ ěg tỹ Topẽ vĩ ki kanhrãn ke tó vẽ. Ēg tỹ to estudo han kỹ ěg tóg vãsỹ rán kỹ nĩ ěn tónh ke mũ, kỹ ěg tóg ũ tỹ ũri tó mũ tag tónh ke mũ gé. Jesus tỹ tag to ěg mũ comparação han hã vẽ.

*Jesus tỹ Nazaré ra vỹn ke
(Mc 6.1-6; Lc 4.16-30)*

53 Ag mũ kãmén kãn kar kỹ tóg tá kãkutẽ mũ sir.

54 Kỹ tóg ã jamã ra tĩ mũ sir. Tá jun kỹ tóg ěg vẽn kanhrãn jafã ki ag kanhrãn mũ. Kỹ tóg ag mũ e tĩ, ti vĩ ti. Kỹ ag tóg ti to vĩ kónãn mũ. “Hẽn tán hỹn ki kanhrãn, vẽn jykre tag ki? Ũ nỹ hỹn ti kanhrãn, ti tỹ nén han vãn tag hyn han jé?” he ag tóg ti to.

55 “Ĩn han tĩ ěn kósin vẽ mỹr,” he ag tóg. “Ti mỹnh fi vỹ tỹ Maria fi nĩ, kỹ ti jãvy ag vỹ ki nỹtĩ, Tiago, José, Simão, Judas.

56 Kỹ ti ve fag vỹ tag ki nỹtĩ gé, ěg mré. Ti tỹ ne jé ěg kãfór nĩ sór nẽ hỹn?” he ag tóg mũ sir, Jesus to.

57 Kỹ tóg ag mũ tỹ ũ nỹ. Kỹ Jesus tóg ag mũ: “ẽmã ũ tá ke ag tóg Topẽ vĩ tó tĩ to é he tũ nĩgtĩ mỹr,” he mũ. “Tĩ jamã tá ke ag tóg ti to é he tĩ jãvo, ti mré ke ag, ti kanhkã ag,” he tóg.

58 Kỹ tóg tá milagre e hyn han tũ nĩ. ũn kaga nỹtĩ pir ag tỹ há' he tóg, ũn e tỹ há' he tũ ti nĩ, ag tỹ ti ki ge jãvãnh nỹtĩn kỹ.

14

João Batista ter

(Mc 6.14-29; Lc 9.7-9)

1 Kỹ kejẽn pã'i mág tỹ governador tỹ Herodes vỹ mẽg mũ, Jesus kãmé ti.

2 Kỹ tóg ã camarada ag mũ: “João Batista vẽ hỹn, ãjag tỹ inh mũ ũ tó mũ ti,” he mũ. “Tĩ hỹn tóg rĩr mãn, sỹ ti tén kar kỹ, hã kỹ tóg milagre tỹ hẽn ri ke hyn han tĩgtĩ,” he tóg, Herodes ti, ã camarada ag mũ, Jesus to.

3 Herodes vỹ João se ja nĩ, vëse ja kãki tóg ti fón ja nĩ, Herodias fi tugnĩn. Ti jãvy tỹ Filipe prũ fi ja vẽ, hã ra tóg fi kunũnh kỹ fi tỹ prũg mũ, Herodes ti. Kỹ João tóg ti mũ.

4 “ã hã ne tóg ã mré ke prũ fi tỹ prũg mũ,” he ja nĩ. “Fi ki ã tóg Topẽ vĩ mranh mũ,” he tóg, João ti, Herodes mũ.

5 Kỹ Herodes tóg ti tén sór mũ, hã ra tóg vẽn kar kamẽg mũ. Vẽn kar tóg João to: “Topẽ vĩ tó tĩ ũ vẽ,” he tĩ. Kỹ Herodes vỹ ag kamẽg mũ.

6 Hã ra tóg kejẽn Herodes mur ja kurã tá krỹg mũ. Kỹ festa ěn kã Herodias fi kósin fi vỹ ag jo vẽn grén mũ sir, ti mré jẽg mũ ag jo. Kỹ tóg Herodes mũ sĩnvĩ tĩ.

7 Kỹ tóg fi mũ: “ã tỹ nén to vĩ kar nĩm jé sóg ke mũ ã mũ, sỹ ke há vẽ,” he mũ, Herodes ti.

⁸ Kÿ fi tóg ã mÿnh fi mÿ ke mũ. Kÿ fi mÿnh fi tóg fi krĩn mũ, fi tÿ João krĩ to vĩ jé. Kÿ fi tóg to vĩ mũ sir. “Inh mÿ ùri João Batista krĩ tÿ pénky kākã nĩm,” he fi tóg mũ, Herodes mÿ.

⁹ Kÿ tóg ti mÿ e tĩ sir, ti tÿ ti tén jé. Hã ra tóg fi mÿ: “sÿ ke há vễ,” he ja nĩ, kÿ ti mré jęg mũ ag vÿ mẽ kãn ja nĩ. Kÿ tóg fi mÿ: “hej,” he mũ sir.

¹⁰ Kÿ tóg soldado jênęg mũ sir, ti tÿ João krĩ kym jé. Hã ra João tóg vễse ja kākã nĩ nĩ.

¹¹ Kÿ tóg ti krĩ kym mũ sir. Pénky kākã nĩm kÿ tóg fi mÿ nĩm mũ, tátäg fi mÿ, ti krĩ ti. Kÿ fi tóg fi mÿnh fi mÿ ma tĩ mũ.

¹² Kÿ ti mré mũ tĩ ag tóg mẽ kÿ ti vyn kãmũ mũ, vễnh kej tá ti fón jé. Ti fón kar kÿ ag tóg Jesus mÿ tónh kãmũ mũ.

Jesus tÿ ùn e jẽn

(Mc 6.30-44; Lc 9.10-17; Jo 6.1-14)

¹³ Jesus tÿ João ter mẽ kÿ tóg tá kākutẽ mũ, canoa kãmĩ. Kÿ tóg ẽmã tũg ja ra tĩ mũ sir, ã pir mÿ nĩ jé. Hã ra vễnh e ẽn tóg ti tĩg męg mũ. Kÿ ag tóg ti nón mũ mũ, ãjag pẽn kã, ẽmã kar tá kãmũ kÿ.

¹⁴ Kÿ Jesus tóg kafã ù tá vag ke mũ, kÿ tóg tá ùn e ẽn ag vég mũ sir, ti nón kãmũ mũ ag. Kÿ ag tóg ti mÿ jagãgtar nÿtĩ. Ag jagãgtãn kÿ tóg ùn kagyga ag tÿ há' he mũ sir.

¹⁵ Ti tÿ ùn e tÿ hághá' hen kÿ tóg rãké nÿ sir, ti tÿ ag kanhrãn ki. Kÿ ti mré mũ tĩ ag tóg ti mÿ tó jé kãmũ mũ. “Rãké ti nÿ ha,” he ag tóg mũ, ti mÿ. “Tag mĩ tóg ẽmã tũ tĩ. Kÿ tóg ã tÿ ag jęgñenh há tĩ, ag tÿ ẽmã ù ra mũ jé, vễjẽn comprar he jé,” he ag tóg mũ, Jesus mÿ.

¹⁶ Hã ra Jesus tóg ag mÿ: “ha inhhã ag jẽn, kÿ ag tóg hẽ ra mũnh ke tũ nĩ.” he mũ.

¹⁷ Kÿ ag tóg ti mÿ: “hã ra tóg tũ tĩ, vễjẽn tĩ,” he mũ. “Pão tÿ 5 (ke) vÿ ki nÿtĩ, pirã régre ke gé,” he ag tóg.

¹⁸ Kÿ tóg ag mÿ: “inh mÿ ma kãmũ jęg ge,” he mũ.

¹⁹ Kÿ tóg ùn e ẽn ag mÿ tó mũ, ag tÿ re tá nĩgnĩ kÿ nÿtĩ jé. Kÿ tóg pão tÿ 5 (ke) ẽn mãg mũ, pirã régre ẽn ke gé. Kÿ tóg kanhkã ki ẽvãnh mũ sir, vễjẽn ẽn to tóg Topẽ mré vĩ mũ sir. Kÿ tóg pão kénh kÿ ã mré mũ tĩ ag mÿ vin mũ sir, ag tÿ vễnh ken jé sir, ùn e ẽn ag mÿ.

²⁰ Kÿ vễnh kar tóg ko kãn kÿ funfór mũ sir. Hã ra tóg kén mũ. Kěj tÿ 12 (ke) fãn ag tóg mũ, ti ke tÿ.

²¹ Pão ko mũ ẽn ag tóg tÿ mil tÿ 5 (ke) nÿtĩ, ùn tÿtá mré tó tũ, fag krẽ mré tó tũ, hã ra fag tóg tá e nÿtĩ gé mÿr, ha mẽ.

Jesus tÿ goj kri tĩg

(Mc 6.45-52; Jo 6.15-21)

²² Kÿ tóg ã mré mũ tĩ ag mÿ tó mũ, ag tÿ canoa kãmĩ mũ jé, ag tÿ ti jo kafã ù ra mũ jé. “Isÿ ver ùn e tag ag mÿ: ha mũjęg, henh ke vễ,” he tóg ag mÿ.

²³ Kÿ tóg ùn e ag mÿ: “ha mũjęg,” he mũ sir. Kÿ tóg pãnónh to tãpny mũ, Topẽ mré vĩ jé. ã pir mÿ tóg tá nĩ nĩ. Kÿ tóg kutyg mũ sir. Hã ra Jesus tóg pãnónh tá nĩ nĩ.

²⁴ Kÿ canoa tóg nig kãmĩ tĩ mũ sir, kafã ù ra. Nig fyr tóg kór gy nĩ sir, kuvar gy ti nĩ ha. Kÿ goj tóg krêm krêm ke sa nĩ, kÿ tóg ag kutãn kÿ nĩ nĩ, goj ti. Kãka vÿ ag kato tẽ mũ, hã kÿ ag tóg mũ kónãn mũ.

²⁵ Kÿ kurã ke ra Jesus tóg ag to kãtĩ mũ, goj kri tĩg kÿ, ã pẽn kã.

²⁶ Kÿ ti mré mũ tĩ ag tóg ti vég mũ, ti tÿ goj kri tĩg kÿ, kÿ ag fe tóg jũrũn ke mũ. “Vễnh kuprĩg vễ,” he ag tóg mũ. Kamęg kÿ ag tóg vễkrẽnkřer mũ sir.

²⁷ Hã ra Jesus tóg ag mré vēmén mũ sir. “Kamęg tũg nĩ, inh hã vễ,” he tóg. “Jũrũn ke tũg nĩ,” he tóg.

²⁸ Kÿ Pedro tóg ti mÿ: “ã hã mÿ?” he mũ. “Kÿ inh mÿ tó, isÿ ã to tĩg jé, goj kri tĩg kÿ,” he tóg, Pedro ti, Jesus mÿ.

²⁹ Kÿ Jesus tóg ti mÿ: “kunĩg ge,” he mũ. Kÿ Pedro tóg canoa ki kutẽ kÿ goj kri tĩ mũ sir, Jesus to.

³⁰ Goj kri tĩg kÿ tóg vãhã kãka ki ẽvãnh mũ, kÿ tóg kamęg mũ sir. Kamęg kÿ tóg goj ki pun ke mũ. Kÿ tóg prẽr mũ. “Senhor, inh kren han nĩ,” he tóg mũ, prẽr kÿ.

³¹ Kÿ Jesus tóg vễsÿmér ti kãgnĩg mũ. Kÿ tóg ti mÿ: “inh ki rã há han tũ ã tóg nĩ, vÿ,” he mũ. “ã hã ne tóg: inh mÿ tá jun mũ vÿ? he mũ', hã kÿ ã tóg ki pun ke kren mũ,” he tóg, Jesus ti, Pedro mÿ.

³² Kÿ ag tóg canoa kãki ge mũ sir. Ag tÿ ki ge kÿ kãka tóg tũ' he mũ, kóho ẽn.

³³ Kÿ tóg ag mÿ há tĩ, canoa kãki nÿtĩ ag mÿ. Kÿ ag tóg Jesus ki ge há han kÿ ti mÿ vĩ

há han mũ sir. “Topě kósin vỹ tỹ ã nĩ, mỹr,” he ag tóg mũ sir ti mỹ.

Jesus tỹ Genesaré tá jun
(Mc 6.53-56)

³⁴ Kỹ ag tóg kafã ù tá junjun kỹ (ag tóg) vag ke mũ sir, êmã tỹ Genesaré tá.

³⁵ Tá ke ag tóg ãjag tỹ Jesus ve kỹ ti ki kanhrãn mũ. Kỹ ag tóg ti to vênh vĩ jẽnẽg mũ sir, vênh kar mỹ, ga kar ẽn mĩ hã. Kỹ ag tóg ùn kagyga ag tatĩ kãmũ mũ, Jesus to.

³⁶ Kỹ ag tóg Jesus mỹ to vĩ mũ, ag tỹ hẽn ri ke mũn ti kur mráj mẽ jé. Kỹ ag tóg há' há' he kãn mũ sir, ag tỹ ti kur mẽn kỹ.

15

Judeu ag jykre si
(Mc 7.1-13)

¹ Kỹ kejẽn Fariseu ù ag tóg Jerusalém tá junjun mũ, Jesus tá, Topě vĩ to professor ag mré hã. Jesus mỹ ag tóg vĩ mũ.

² “Ã mré mũ tĩ ag ne tóg ẽg jykre si mranh tĩ,” he ag tóg. “Ëg jykre si ki ẽg tóg nĩgpég tĩ, ẽg jẽn ke jo, hã ra ag tóg nĩgpég tũ ra jẽg tĩ,” he ag tóg.

³ Kỹ Jesus tóg ag mỹ: “ãjag hã vỹ Topě vĩ mranh tĩ, ãjag tỹ ãjag jykre si han kỹ,” he mũ.

⁴ “Topě tỹ ẽg mỹ tón hã vễ, ha mẽ: “ã mỹnh fi mré ã panh kamẽg nĩ, fag jagãgtãn nĩ,” he ja tóg nĩ. Kỹ tóg tag tó gé, ha mẽ: “ũ tỹ ã han mũ fag mỹ vĩ kónãn mũ ẽn tén jé ã tóg ke mũ,” he ja tóg nĩ gé, Topě ti.

⁵ Ti jãvo ãjag tóg tag tó tĩ, ha mẽ: “ã panh mỹ nén ù nĩm tũg nĩ, ã mỹnh fi mỹ nén ù nĩm tũg nĩ, ã tỹ fag mỹ: “sỹ ãjag mỹ nén ù nĩm ke vễ vễ, hã ra sóg Topě mỹ nĩm sór mũ,” hen kỹ. Û tỹ tag han kỹ tóg há tĩ,” he ãjag tóg tĩ.

⁶ Hã kỹ ãjag tóg Topě vĩ tỹ tũ' he tĩ, ãjag tỹ ãjag jykre si hã han kỹ,” he tóg, Jesus ti.

⁷ “Krĩ régre ãjag nỹtĩ, ha mẽ. Hã kỹ Isaías vỹ ãjag to vĩ ja nĩgtĩ, ti tỹ tag tó kỹ, ha mẽ.

⁸ “Povo tag vỹ ãjag nũnẽ hã tỹ inh mỹ vĩ há han tĩ, hã ra ag jykre pi(jé) tỹ inh jykre nỹ,” he ja tóg nĩ.

⁹ “Fagrĩnh mỹ ag tóg iso grĩnh ke tĩ, hã ra ag tóg ẽprã ke ag jykre to: Topě tỹ tón hã vễ, he tĩ,” he ja tóg nĩgtĩ, Isaías ti,” he tóg, Jesus ti. “Ki hã tó ja tóg nĩ, ãjag to, ãjag krĩ régre nỹtĩn kỹ,” he tóg, Jesus ti.

Ne tỹ ẽg kavénh
(Mc 7.14-23)

¹⁰ Kỹ tóg vênh kar jé prěr mũ sir, ag tỹ ti rã hã nỹtĩ jé, ti vĩ jẽnẽ há han jé. Kỹ tóg ag mỹ: “ha mẽ, sỹ nén tó mũ ti, kỹ to jykren nĩ gé,” he mũ.

¹¹ “Ëg jẽn pi(jé) ẽg kavénh tĩ,” he tóg. “Ëg jẽnky kã ra ẽg tóg rãg tĩ, vễjẽn ti. Nén ù tỹ ẽg ki kãpa hã vỹ ẽg kavénh tĩ, ha mẽ,” he tóg.

¹² Kỹ ti mré mũ tĩ ag ti to kãmũ kỹ ti mỹ: “ha mẽ,” he mũ. “Fariseu ag vỹ ã to jũ nỹtĩ, ã tỹ ag mỹ: vễjẽn pi(jé) ẽg kavénh tĩ', hen kỹ,” he ag tóg ti mỹ.

¹³ Kỹ tóg ag mỹ: “ẽg jóg mág tỹ nén krãn ja tũ vãm kỹ nĩ kãn ke vễ, ẽg jóg tỹ kanhkã tá nĩ tỹ nén krãn ja tũ ẽn ti,” he mũ. “Ag pi(jé) tỹ Topě krẽ nỹtĩ', Fariseu ẽn ag, hã kỹ tóg ag vãm ke mũ,” he tóg.

¹⁴ “Hã kỹ ag to jykren tũg nĩ. Ûn kyvó ag mỹ ag tóg: “sỹ ã jãmĩ tĩg ke vễ,” he tĩ, hã ra ag tóg ti kóm kyvó nỹtĩ gé, kỹ ùn kyvó tỹ ùn kyvó jãmĩ tĩg kỹ ag tóg kãgnó ki vár ke mũ, ha vemnĩ,” he tóg, Jesus ti. Ag tỹ nũgme ki vár to ken hã vễ, hã vỹ: kãgnó ki vár ke mũ, he mũ.

¹⁵ Kỹ Pedro tóg ti mỹ: “ẽg mỹ kãmén há han nĩ, ã vĩ tag,” he mũ.

¹⁶ Kỹ Jesus tóg ti mỹ: “kỹ ãjag mỹ ver ki kanhrãn tũ nỹtĩ?” he mũ.

¹⁷ “Mỹ ãjag tỹ to jykren tũ tĩ?” he tóg. “Ha vé, ẽg tỹ ẽg jẽn tỹ ẽg jẽnky kãra rãg kỹ tóg ẽg nug kãra rã mũ, kar ẽg tóg gón mũ sir.

¹⁸ Nén ù tỹ ẽg ki kãpa vỹ tỹ ẽg jykre nĩ, hã kỹ tóg ẽg kavénh tĩ.

¹⁹ Nén ù tỹ ẽg ki kãpa hã vễ, ha mẽ: jykren kónãn, ù tén, ã prũ tũ fi mré nỹ, ã mén tũ mré nỹ, ùn mén tũ fag to én, nén ù péju, ù to ón, ù to vĩ kónãn.

²⁰ Nén ù tỹ ẽg ki kãpa hã vễ, ẽg kavénh tĩn hã vễ. Ëg tỹ nĩgpég tũ ra jẽn kỹ ti pi(jé) ẽg kavénh tĩ,” he tóg, Jesus ti.

Canaã tá ke fi tỹ Jesus mré vẽnén
(Mc 7.24-30)

²¹ Kỹ Jesus tóg tá kutẽ kỹ (tóg) ga ù ra tĩ mũ, cidade tỹ Tiro ra, cidade tỹ Sidom ra.

²² Ti tỹ tá jun kỹ ù fi tóg ti venh kãtĩ mũ. Ga tỹ Canaã tá ke fi vễ. Kỹ fi tóg Jesus tá jun mũ, kỹ fi tóg prěr mũ. “!..Senhor, Davi kósin..!” he fi tóg. “!..Inh jagãgtãn ra..!” he fi tóg. “!..Inh kósin fi vỹ jagrẽ kórég tãvĩ nĩ, ã

tỹ inh mỹ ti kutēm há tóg te..!” he fi tóg, prēr kỹ.

²³ Hã ra Jesus tóg fi mỹ vĩ tũ nĩ. Kỹ ti mré mũ tĩ ag tóg ti to kãmũ kỹ ti mỹ: “ã mỹ fi ve sór tũ nĩ, fi tỹ kar kỹ ã ãn ra tĩg jé?” he mũ. “Ëg nón fi tóg ãg jé prēr mũ, kỹ tóg ãg mỹ e tĩ,” he ag tóg, Jesus mỹ.

²⁴ Hã ra tóg ag mỹ: “vó,” he mũ. “Topẽ vỹ inh jẽnẽ, sỹ Israel ag tỹ há’ he jé inhhã, ã tỹ Israel kãmĩ Topẽ vĩ mranh mũ ag tỹ,” he tóg, Jesus ti. Hã ra fi tóg tỹ fóg nĩ, hã kỹ tóg fi ve sór tũ nĩ.

²⁵ Kỹ fi tóg ti tá jun mũ sir. Ti krēm fi tóg grĩnh ke mũ. Kỹ fi tóg ti mỹ: “Senhor,” he mũ. “Ã mỹ inh jagãgtãn ke tũ?” he fi tóg.

²⁶ Hã ra Jesus tóg fi mỹ: “há tũ tóg nĩ, ã tỹ nén to vĩ mũ ti,” he mũ. “Ëg krẽ jamĩ vỹ tỹ ãg krẽ tũ nĩ, kỹ ãg tóg cachorro mỹ fón vãn nĩgtĩ, ãg krẽ jamĩ ti,” he tóg, Jesus ti.

²⁷ Kỹ fi tóg ti mỹ: “hỹ,” he mũ. “Hã ra cachorro sĩ ag tóg ãmĩ mru ãn ko tĩ, mesa krēm,” he fi tóg, Jesus mỹ. “Hã kỹ inh kósin fi tỹ há’ hemnĩ, ãg tỹ tỹ cachorro ãn ri ke nỹtĩ kỹ,” he fi tóg, Jesus mỹ.

²⁸ Kỹ tóg ãn tỹtã ãn fi mỹ: “inh ki rã tãvĩ han ja ã tóg nĩ,” he mũ. “Hã kỹ sóg ã mỹ han mũ, ã tỹ inh mỹ nén to vĩ mũ tag,” he tóg fi mỹ. Ti tỹ tag tó kỹ fi kósin fi tóg há’ he mũ, hora ãn kã.

Jesus tỹ ãn e ag tỹ há’ he

²⁹ Kỹ Jesus tóg cidade tá kãkutẽ kỹ (tóg) goj nig fyr jagma tĩ mũ, nig tỹ Galiléia ãn fyr jagma. Kỹ tóg pãnónh to tãpny mũ, kỹ tóg nĩ mũ.

³⁰ Kỹ ãn tỹ hẽn ri ke ag vỹ junjun mũ, ãn kagyga ag ke gé, ãn kãnhgrĩ ag ke gé, ãn tĩg vãn ag ke gé, ãn kaga ãn ag ke gé. Ti ki ag tóg junjun mũ, kỹ tóg ag tỹ hághá’ he kãn mũ.

³¹ Kỹ tóg vãn kar ãn mỹ e tĩ, ag tỹ tag ven kỹ. ãn vĩ vãn ag tóg vĩ há nỹtĩ, ãn kónhgrĩ ag tóg mũ há nỹtĩ, ãn kyvó ag tóg ãvãn há nỹtĩ. Kỹ ag tóg Topẽ mỹ vĩ há han mũ sir, Israel ag.

Jesus tỹ ãn e ã jẽn mãn

(Mc 8.1-10)

³² Kỹ Jesus tóg ã mré mũ tĩ ag jé prēr mũ. Kỹ tóg ag mỹ: “inh mỹ ag tóg jagãgtar nỹtĩ, ãn e tag ag,” he mũ. “Kurã tãgtũ han ag tóg mũ ãg mré. Hã ra ag tóg vẽn ve ja tũ nĩgtĩ.

Kỹ tóg sỹ ag jẽg tũ ra ag jẽnẽ jãvãn tĩ, ag jamã ra. Ag mũn kỹ ãn ag hỹn kãgter ke mũ, kókĩnkĩr kỹ,” he tóg.

³³ Kỹ ti mré mũ tĩ ag tóg ti mỹ: “ki ti ãmã tũ nĩ, ki ti ga kórég nĩ,” he mũ. “Ëg hỹn hẽ tá vẽn venh mũ, ãg tỹ ãn e tag ag jẽn jé?” he ag tóg ti mỹ.

³⁴ Kỹ Jesus tóg ag mỹ: “ãmĩ tỹ hẽn ri ke nỹ ki nỹtĩ ge?” he mũ. Kỹ ag tóg: “ã tỹ 7 (ke) vẽn, kãkufãr pipir ke gé,” he mũ.

³⁵ Kỹ tóg ãn e ag mỹ tóg, ag tỹ nĩgnĩ kỹ nỹtĩ jé, ga kri.

³⁶ Kỹ tóg ãmĩ tỹ 7 (ke) mãg mũ, pirã mré, kỹ tóg to Topẽ mré vĩ mũ. Kỹ tóg vãn kãkénh mũ, ãmĩ ti. Kỹ tóg ã mré mũ tĩ ag mỹ vin mũ, ag tỹ vãn kar mỹ kã vãn ken jé. Kỹ ag tóg kã vãn ken mũ mũ.

³⁷ Kỹ ag tóg ko kãn mũ, funfór ag tóg mũ, hã ra tóg kén mũ. Kre tỹ 7 (ke) ãn fãn tóg mũ sir, ãmĩ kén ti, Jesus mré mũ tĩ ag tỹ gẽn kỹ.

³⁸ ã tỹ ko mũ ag vỹ ã tỹ 4 mil (ke) nỹtĩ, ag tãvĩ, ãn tỹtã mré tó tũ, ag krẽ mré tó tũ. Hã ra fag tóg tá e nỹtĩ gé.

³⁹ Kỹ Jesus tóg ag jẽnẽg mũ sir, ag jamã ra. Kỹ tóg canoa ki rã mũ sir, ãmã tỹ Magadã tá ga ra tĩg jé, ã mré mũ tĩ ag mré.

16

Ag tỹ Jesus mỹ milagre to vĩ *(Mc 8.11-13; Lc 12.54-56)*

¹ Kỹ Fariseu ãn ag tóg Jesus tá junjun mũ, Saduceu ag mré hã. Ag tỹ ón kỹ ti ki jẽmẽ sór vẽn, ag tỹ kar ti kato vĩ jé. Kỹ ag tóg ti mỹ milagre to vĩ mũ. Ag tỹ ti jykre to: “Topẽ jykre mỹ vỹ?” he sór vẽn.

² Hã ra Jesus tóg ag mỹ: “ta to jykrén há ãgag nỹtĩ, ãmẽ to ke gé,” he mũ. “Rãkãn kỹ ãgag tóg kãnhkã ki ãvãn tĩ. Rãren kỹ ãgag tóg: “ãmãn ke vẽn,” he tĩ.

³ Kỹ kusã ki ãgag tóg kãnhkã ki ãvãn tĩ gé. Kãnhkã pũr kỹ ãgag tóg sir: “ta vỹ kutẽn mũ, kãnhkã vỹ pũr mũ,” he tĩ. Tó há han ãgag tóg tĩ, rãre ve kỹ, kãnhkã pũr ven kỹ ke gé. Hã ra ãgag tóg inh ki kãgtĩg nỹtĩ, ãgag tỹ sỹ nén han mũ vэг mũ ra. Hã kỹ ãgag tóg: “Topẽ jykre mỹ vỹ?” he tĩ.

⁴ Kórég ãgag nỹtĩ, ãgag tỹ Topẽ ki ge jãvãn nỹtĩn kỹ. ãri ke kar vỹ ãgag ri ke kórég nỹtĩ. Milagre venh ke tũ ãgag tóg nĩ. Vã sỹ Topẽ vĩ

tó tĩ ù tóg nĩgtĩ, hã vỹ: Jonas, he mũ. Jonas tỹ nén ve ja ri ke hã ve jé ãjag tóg ke mũ, ùri,” he tóg, Jesus ti. Kĩ tóg ag ré kĩ tĩ mũ sir.

*Fermento to comparação ù
(Mc 8.14-21)*

⁵ Kĩ tóg ã mré mũ tĩ ag mré tĩ mũ, goj nig kafã ù ra. Ag tỹ kafã ù tá junjun kĩ ag tóg ãmĩ to jykrén mũ sir, Jesus mré mũ tĩ ag. Kã jatun kĩ ag tóg nỹtĩ ja nĩ, kĩ tóg tũ tĩ sir, ãmĩ ti.

⁶ Kĩ Jesus tóg ag kanhrãn mũ. “Fariseu ag tỹ fermento há(r) kamẽg nĩ, Saduceu ag tỹ fermento há(r) ke gé,” he tóg mũ, Jesus ti.

⁷ Kĩ ag tóg jagnẽ mré vĩ mũ sir, Jesus vĩ tag to. “Ti tỹ ãg tỹ pão mãg tũ ãn tó hỹn,” he ag tóg mũ, jagnẽ mỹ.

⁸ Hã ra Jesus tóg ki kanhró nĩ, ag tỹ nén tó mũn ki. Kĩ tóg ag mỹ tó mãn mũ. “Inh ki ge há han tũ ãjag tóg nĩ ver,” he tóg. “Hã kĩ ãjag tóg jagnẽ mỹ: pão tũ, he mũ.

⁹ Ver tóg ãjag tỹ to jykrén tũ tĩ'. Pão tỹ 5 (ke) ãn mĩ ãkrén nĩ. Û tỹ mil tỹ 5 (ke) ag tóg ko kãn, hã ra tóg kén, ag kar tỹ ko mũ ra. Ti ke hỹn kěj tỹ hẽ ri ke fãn?” he tóg. Kĩ ag tóg ti mỹ tó mũ sir.

¹⁰ Kĩ tóg ag mỹ: “jo pão tỹ 7 (ke) ãn ti. Û tỹ mil tỹ 4 (ke) ag vỹ kó, hã ra tóg kén, ag kar tỹ ko mũ ra. Ti ke hỹn kěj tỹ hẽ ri ke fãn?” he tóg. Kĩ ag tóg ti mỹ tó mũ gé sir.

¹¹ Kĩ tóg ag mỹ: “kĩ inh vĩ to jykrén nĩ,” he mũ. “Pão tó tũ sóg nĩ. Fermento pẽ tó tũ sóg nĩ. To jykrén há han nĩ, ha mẽ. Fariseu ag tỹ fermento há(r) kamẽg nĩ, Saduceu ag tỹ fermento há(r) kamẽg nĩ gé, he sóg mũ ãjag mỹ,” he tóg, Jesus ti.

¹² Kĩ ag tóg to jykrén há han mũ sir vãhã. Ti tỹ fermento pẽ tó pijé'. Ti tỹ Fariseu ag jykre tó ja vẽ, Saduceu ag jykre ke gé. Ag jykre hã to tóg: “ãn kamẽg nĩ,” he ja nĩ, Jesus ti.

*Pedro tỹ Jesus kãmén
(Mc 8.27-30; Lc 9.18-21)*

¹³ Kĩ Jesus tóg cidade tỹ Cesaréia Filipe tá ga ra tĩ mũ, ti mré mũ tĩ ag mré. Kĩ tóg ag mỹ: “tỹ sóg ãprã ke fi kósin nĩ,” he mũ. “Kĩ ag iso hẽ ri ke tĩ?” he tóg mũ, ag mỹ.

¹⁴ Kĩ ag tóg ti mỹ. “ũ ag tóg ã to: João Batista vẽ, he tĩ,” he mũ. “Jãvo ù ag tóg: Elias vẽ, he tĩ, ã to. Jãvo ù ag tóg: Jeremias vẽ, he

tĩ gé, jãvo ù ag tóg: Topẽ vĩ tó tĩ ù vẽ, he tĩ gé, ã to,” he ag tóg, Jesus mỹ.

¹⁵ Kĩ tóg ag mỹ: “ag jãvo ãjag hẽ ri ke tĩ, iso?” he mũ.

¹⁶ Kĩ Simão Pedro tóg ti mỹ: “tỹ ã Cristo nĩ,” he mũ. “Topẽ kósin vỹ tỹ ã nĩ. Topẽ vỹ rĩr nĩ, kĩ ã hã vỹ tỹ ti kósin nĩ,” he tóg, Pedro ti, Jesus mỹ.

¹⁷ Kĩ Jesus tóg ti mỹ: “Simão!,” he mũ, “João kósin!,” he tóg. “Ëprã ke tỹ ã mỹ tó pijé!,” he tóg. “Inh jóg tỹ kanhkã tá nĩ ãn tỹ ã mỹ tó vẽ, isỹ tỹ ti kósin nĩ ti. Hã kĩ tóg ã ve há han mũ, Topẽ ti,” he tóg, Pedro mỹ.

¹⁸ “Ha mẽ, tỹ ã Pedro nĩ, hã vỹ: pó, he mũ. Pãró tag kri sóg isũ han mũ, tỹ ãn ri ke ãn, hã vỹ: ã tỹ ag mỹ inh vĩ tó tũgrĩn ag tóg inh ki genh ke mũ, he mũ. Kĩ ù tỹ inh ki ge kĩ nỹtĩ ag vỹ tỹ igreja ri ke nỹtĩ. Ag fár tỹ tũ' he mũ ra ag tóg rĩnrĩr mãn ke mũ. Tũ' henh ke tũ ag nĩ.

¹⁹ Ëprã ke ag vỹ kanhkã ra mũnh mũ, ã vĩ ki. Jãnkã ri ke ti nĩ, kanhkã ra ge jafã ti, kĩ sóg ã hã mỹ ti nón jafã ti fig mũ sir, ti chave ti. Kĩ ã tỹ ù mỹ: “kanhkã ra tĩg ke tũ ã tóg nĩ,” hen kĩ tóg ra tĩg ke tũ nĩ. Kĩ ã tỹ ù mỹ: “kanhkã ra ã tóg tĩg ke mũ,” hen kĩ tóg ra tĩg ke mũ,” he tóg, Jesus ti, Pedro mỹ.

²⁰ Kĩ tóg ã mré mũ tĩ ag mỹ tó mũ, ag tỹ ti kãmén tũ nĩ jé ver. “Ker ù mỹ sỹ tỹ Cristo nĩ tó hẽ!” he tóg mũ ag mỹ.

*Jesus tỹ ã ter ke tó vén
(Mc 8.31-9.1; Lc 9.22-27)*

²¹ Kĩ tóg ag mỹ ã jagtar ke kãmén nĩ nĩ. ã mré mũ tĩ ag mỹ tóg komẽr hã tó mũ. “Kãnhmar sóg Jerusalém ra tĩg mũ ha,” he tóg mũ. “Tá sóg hã ra jagtar ke mũ. Kófa ag vỹ iso kórég nỹtĩnh mũ, ha vemnĩ, Topẽ tũ ki rĩr tĩ to pã'i ag, Topẽ vĩ to professor ag ke gé. Ag tỹ isén ke vẽ, kĩ sỹ kurã tãgtũ ki rĩr mãn ke vẽ,” he tóg, Jesus ti.

²² Kĩ Pedro tóg ti pin kĩ ti mré vĩ mũ, ti tỹ tag to jykrén tũ nĩ jé. “Senhor,” he tóg, “Topẽ jé ã jy nĩgãn, ã tỹ ã jagtar ke tag vэг tũ nĩ jé,” he tóg, Pedro ti, Jesus mỹ.

²³ Hã ra Jesus tóg vësỹjãm ãvãnh kĩ ti mỹ vĩ tar han mũ sir, ti to jũ kĩ. “Kutĩg, Satanás,” he tóg, Pedro mỹ. “Isỹ Topẽ vĩ mranh han sór ã tóg mũ,” he tóg. “ã pi(jé) Topẽ jykre tó mũ'. Ëprã ke jykre vẽ, ã tỹ inh

mỹ nén tó mũ tag ti,” he tóg, Jesus ti, Pedro mỹ.

²⁴ Kĩ tóg ã mré mũ tĩ ag mỹ vĩ măn mũ. “Ăjag tỹ inh mré kãmũ kĩ tóg há tĩnh mũ,” he tóg. “Kỹ ăjag jykre tovãnh nĩ, ăjag tỹ isũ tãvĩ hã han jé. Ha vé, ag tỹ inh cruz tỹ inh kri fi kĩ sóg tũg ke mũ, ag tỹ to isa kĩ isén jé, ha vemnĩ. Vẽnh nenh ke tũ sóg nĩ. Isỹ tag han ri ke han nĩ, ăjag tỹ inh mré mũ sór nỹtĩn kĩ,” he tóg.

²⁵ “Ăjag tỹ ăjag jykre hã han kĩ ăjag tỹ nũgme ki vár ke vễ. Jãvo ăjag tỹ isugrĩn ăjag jykre tovãnh kĩ ăjag krenkren ke vễ, ăjag kãgter ke mũ (hã) ra.

²⁶ Hẽn ri ke mũn ăjag hỹn mundo ki nén ù kar ganhar henh ke mũ, hã ra ăjag kuprĩg vỹ vãfor ke mũ. Kĩ tóg kórég nỹ. Ęg tỹ ne tỹ ěg kuprĩg kajãm ke tóg tũ tĩ, ěg tỹ ti ve măn jé,” he tóg.

²⁷ “Tỹ sóg ěprã ke fi kósin nĩ. Kãtĩg măn jé sóg ke mũ, kanhkã tá, isỹ jẽgnẽ jafã ag mré, inh jóg tỹ isỹ ùn mág han ti kĩ. Kĩ sóg vẽn kar mỹ ăjag tỹ nén han ja kaja ěn ven ke mũ.

²⁸ Ha vé, ki hã sóg tó mũ. Ăjag kãmĩ ù ag tóg Topẽ tỹ tỹ ěg pã'i nĩ venh ke mũ, ăjag ter ke to hã, tag ki ěg mré nỹtĩ ù ag. Ęprã ke fi kósin ěn ve jé ag tóg ke mũ, ti tỹ tỹ pã'i nĩ ti. Inh hã vễ,” he tóg, Jesus ti.

17

Jesus tỹ Moisés mré Elias mré vẽnén (Mc 9.2-13; Lc 9.28-36)

¹ Kar kurã tỹ 6 (ke) tũg kĩ Jesus tóg ag mỹ: “mũ nỹ, vyr mỹ,” he mũ. Pedro mỹ tóg ke mũ. Tiago mỹ ke gé, ti jãvy tỹ João mỹ ke gé. Ag hã mré tóg tĩ mũ, pãnónh ra.

² Kĩ tóg ag jo vẽn ve ù han mũ sir, kĩ ti kakã tóg kókov nĩ. Rã ri ke tóg nĩ, ti kakã ti. Ti kur vỹ kópréj nĩ gé, jẽngrẽ ri ke.

³ Kĩ vãhã Moisés tóg ag mỹ vẽn ven mũ sir, Elias ti ke gé. Jesus mré ag tóg vẽnén mũ.

⁴ Kĩ Pedro tóg Jesus mỹ: “Senhor,” he mũ. “Tag ki tóg sér tĩ,” he tóg. “Ęg mỹ pãjó tãgtũ han mũ', ã mỹ', Moisés mỹ', Elias mỹ ke gé?” he tóg, Pedro ti, Jesus mỹ.

⁵ Pedro tỹ ver vẽnén mũ ra kanhkã góg kókov tóg ag kri rũm ke mũ. Kĩ vẽn vĩ tóg mẽ há' he mũ, kanhkã góg kãtã, kĩ tóg: “inh

kósin pir hã vễ,” he mũ. “Ti vĩ jẽmẽ ra,” he tóg, Topẽ ti.

⁶ Kĩ Jesus mré mũ tĩ ag tóg mẽg mũ, kĩ tóg ag mỹ e tĩ. Ag mỹ e tĩn kĩ ag tóg mũg ke mũ sir.

⁷ Kĩ Jesus tóg ag to kãtĩg kĩ ag mẽg mũ sir, ã nĩgé tỹ, kĩ tóg ag mỹ: “nĩgnĩ ra,” he mũ. “Mũmẽg tũg nĩ,” he tóg mũ.

⁸ Kĩ ag tóg mũ ěvãnh mũ, hã ra ag tóg Jesus hã vэг mũ. Ti mré vẽnén mũ ag ve măn tũ ag tóg nĩ, kanhkã tá kãmũ ěn ag.

⁹ Kĩ ag tóg pãnónh tá kãre mũ sir. Ag mũn kĩ Jesus tóg ag mỹ: “ker ù mỹ tó hẽ,” he mũ. “Ăjag tỹ ùri nén vэг mũ tag tó tũg nĩ ver,” he tóg. “Sỹ iser ja tá vỹn ke kar hã kãmén nĩ,” he tóg, Jesus ti.

¹⁰ Kĩ ti mré mũ tĩ ag tóg ti mỹ: “hã ra Topẽ vĩ to professor ag tóg Elias tó tĩ,” he mũ. “Kãtĩg jé tóg ke mũ nẽji, Cristo kãtĩg ke to hã, Elias ti. Hã mỹ'?” he ag tóg mũ, Jesus mỹ.

¹¹ Kĩ tóg ag mỹ: “hỹ,” he mũ. “Kãtĩg jé tóg ke mũ mỹr, nén kar han măn jé, Elias ti.

¹² Ha mẽ, kãtĩg ti huri. Hã ra ag tóg ti ki kagtũg ja nỹtĩgtĩ. Hã kĩ ag tóg ti vóg kónãn ja nĩgtĩ, ag tỹ ti vóg kónãn sór kĩ. Hã kĩ ěprã ke fi kósin ěn tóg, inh hã tóg ag tugrĩn jagtar ke mũ gé, ag tỹ inh vóg kónãn ken kĩ,” he tóg, Jesus ti.

¹³ Kĩ ag tóg vãhã ti tỹ nén tó mũ to jykren mũ, ti mré mũ tĩ ag. “João Batista to ke ja vễ, ěg kygpég tĩ ěn to ke ja vễ, hã vỹ: Elias, he mũ, ti tỹ Elias ěn ri ke ja nĩn kĩ,” he ag tóg mũ sir, Jesus mré mũ tĩ ag.

Jesus tỹ kyrũ tỹ há' he (Mc 9.14-29; Lc 9.37-43a)

¹⁴ Kĩ ag tóg vẽn e ěn tá junjun mũ sir. Kĩ ù tóg Jesus to kãtĩ mũ, ag kãmĩ ù. Ti krẽm tóg grĩnh ke mũ, ã jakrĩ tỹ, kĩ tóg ti mỹ:

¹⁵ “Senhor,” he mũ. “Inh kósin jagãgtãn nĩ,” he tóg. “Ter tĩ tóg nĩgtĩ, to tóg jagtar tãvĩn tĩ. Kejẽn tóg pĩ ki kutẽ tĩ, ter tĩ ěn han kĩ, kejẽn tóg goj ki kutẽ tĩ,” he tóg.

¹⁶ “Kĩ sóg ã mré mũ tĩ ag mỹ ti ven ja nĩgtĩ, ag tỹ ti tỹ há' he jé, hã ra ag tóg ti tỹ hẽ ri ke tũ nĩ,” he tóg, Jesus mỹ.

¹⁷ Kĩ Jesus tóg ti mỹ: “ăjag ne tóg inh ki rã há han tũ nĩgtĩ,” he mũ. “Jykre pãnõ ăjag tóg nỹtĩ,” he tóg. “Kysã tỹ hẽn ri ke ki inh hỹn ăjag mré tĩnh ke mũ'? Kysã tỹ hẽn ri ke ki

inh hÿn ãjag to fe tÿnh mÿ?" he tóg. "Inh mÿ ti pére kãtÿg," he tóg, Jesus ti, ti panh mÿ.

¹⁸ Ag tÿ ti mré kãmÿ ký Jesus tóg ti jagrê mÿ vÿ jÿ han mÿ sir, ti tÿ ti tovãnh jé. Ký tóg vêsÿmér ti ki kãkutê mÿ sir, ký tóg há' he mÿ vãhã, kyrÿ ti.

¹⁹ Ký Jesus mré mÿ tÿ ag tóg ti ki jêmê sór mÿ. Vyr mÿ ag tóg Jesus mÿ: "êg ne tóg ti tÿ há' he ja tÿ nÿ," he mÿ. "Hê ri ken ký hÿn?" he ag tóg mÿ, Jesus mÿ.

²⁰ Ký tóg ag mÿ: "ãjag tÿ inh ki ge tÿ nÿtÿ tugnÿn ke vê, ãjag tÿ inh vÿ kri fig tÿ tugrÿn ke vê," he mÿ. "Ha mê, ãjag tÿ inh ki ge sÿ han ký nÿtÿ ra ãjag tóg pãnónh tag mÿ: "ha tag ra tÿg," he há nÿtÿnh mÿ vê. ãjag tÿ pãnónh mré vÿ ký tóg tÿg ke mÿ vê, ha mê, ãjag tÿ inh ki ge sÿ nÿtÿ ra. Ka tÿ mostarda fy vÿ sÿ tãvÿ nÿ. ãjag tÿ inh ki ge sÿ nÿtÿ ra, ka tÿ mostarda fy sÿ ên ri ke nÿtÿ ra tóg há tÿnh mÿ vê. Ký ãjag tóg pãnónh tÿn há nÿtÿnh mÿ vê. Nén kar han há ãjag nÿtÿnh mÿ vê, ãjag tÿ inh ki ge ký nÿtÿ ra.

²¹ Hã ra vênh jagrê kórég tÿ ge kutêm tóg jagy nÿ. Topê mré êg tóg vÿnh ke mÿ, ký êg tóg ti mré vÿ ký vãkrenh ke mÿ gé, nén ù ko tÿ jé êg tóg ke mÿ, ký tóg vãhã kutênh mÿ, vênh jagrê kórég tÿ ge ti," he tóg, Jesus ti.

*Jesus tÿ ã ter ke tó mãn
(Mc 9.30-32; Lc 9.43b-45)*

²² Tag kar ký ag tóg ga tÿ Galiléia tá nÿtÿ. Ký Jesus tóg ag mÿ: "êprã ke fi kósin vÿ jagtar nÿnh mÿ. Inh hã vê," he mãn mÿ. "Êprã ke ag vÿ ãjag tÿ isÿ nén han sór mÿ ên han ke mÿ.

²³ Ag tÿ isén ke vê. Ag tÿ isén kar ký sóg hã ra rÿr mãn mÿ, kurã tágtÿ tÿg ký," he tóg, Jesus ti. Ag tÿ ti vÿ tag mê ký tóg ag mÿ e tãvÿ tÿ sir. Fe kaj ag tóg mÿ sir, ti mré mÿ tÿ ag.

Jesus tÿ imposto kajãm

²⁴ Ký ag tóg mÿ mãn ký (ag tóg) cidade tÿ Cafarnaum tá junjun mÿ sir. Ký imposto kaja mãg tÿ ag tóg Pedro mÿ vÿ mÿ, Topê jo ïn jé imposto mãg tÿ ag. Imposto ên kaja hã vÿ: jãnkamy régre, he mÿ. Pedro mÿ ag tóg: "ãjag Senhor mÿ kajãm tÿ nÿgtÿ?" he mÿ.

²⁵ Ký tóg ag mÿ: "vó, kajãm ti tÿ," he mÿ. Ký tóg ã ïn tá jun mÿ sir, Pedro ti. Ký Jesus tóg ti mÿ vÿ mÿ, imposto to, hã ra Pedro tóg ti mÿ nén ù tó ja tÿ nÿ ver. Ký Jesus tóg ti

mÿ: "Simão!," he mÿ. "Pã'i ag mÿ ã mÿ: "ha imposto kajãm," he ja tÿ nÿ?" he tóg, Jesus ti. "Tag to jykrén, ha mê. Ag mÿ ãjag krê mÿ: "kajãm nÿ," henh ke mÿ', ãjag mré ke tÿ ag mÿ, vó?" he tóg, Jesus ti, Pedro mÿ.

²⁶ Ký Pedro tóg ti mÿ: "ãjag mré ke tÿ ag mÿ ag tóg: "kajãm nÿ," he tÿ," he mÿ. Ký Jesus tóg ti mÿ: "hÿ, hã vê," he mÿ. "Kÿ ag krê hÿn kajãm ke tÿ nÿ vê.

²⁷ Hã ra ag tóg êg to jykrén kónãn sór mÿ, êg tÿ kajãm tÿ to, êg tÿ tÿ Topê mré ke nÿtÿ ra. Ag tÿ êg to jykrén kónãn sór ký êg hÿn tóg kajãm ke mÿ, Topê jo ïn jé imposto ên, êg tÿ tÿ Topê krê nÿtÿ ra, Israel krê ke gé. Hã ký pirã sygsam tÿg, nig ên tá. Sygsam ký jê ký ã tóg pirã kãgmÿnh mÿ. ã tÿ ùn kãgmÿ vén mÿ ên jênky tugnÿm nÿ. Jãnkamy vÿ kãkã nÿ, ti jênky kãkã, ã tÿ êg jo kajãm jé, ã jo, ijo ke gé," he tóg, Jesus ti. Ký Pedro tóg tÿ mÿ sir. Jãnkamy vэг tóg mÿ sir. Ký tóg tÿ imposto kajãm tÿ mÿ, Pedro ti.

18

*Û tÿ êg kãfór nÿ
(Mc 9.33-37; Lc 9.46-48)*

¹ Kejên Jesus mré mÿ tÿ ag tóg ti mÿ vÿ mÿ, ký ag tóg: "kejên êg tóg Topê tÿ tÿ êg pã'i nÿ venh ke mÿ," he mÿ. "Êg tÿ ti ve ký ù tÿ hê nÿ hÿn êg kãfór kar nÿ?" he ag tóg, Jesus mÿ.

² Ký Jesus tóg gÿr ù jé prêr mÿ, ký tóg ag kaju kã ti fêg mÿ, gÿr ti.

³ Ký tóg ag mÿ tag tó mÿ, ha mê. "Gÿr ri ke han nÿ, ãjag tÿ Topê tÿ tÿ êg pã'i nÿ ve sór ký, ke tÿ nÿ (mÿ) ra ãjag tóg venh ke tÿ nÿ. Hã ký ãjag jykre tovãnh nÿ, gÿr jykre han jé," he tóg.

⁴ "Gÿr pi(jé) ùn sanh kãfór sór nÿ'. Ký ti ri ke han nÿ. Jagnê kãfór nÿ sór tÿg nÿ. "Ûn sÿ vÿ tÿ inh nÿ, gÿr ri ke vÿ tÿ inh nÿ," hemnÿ, ãjag tÿ kar ký tÿ ùn mãg kãfór kar nÿtÿ jé, Topê tÿ tÿ êg pã'i nÿn ký," he tóg.

⁵ "ãjag hã vÿ tÿ inh mré ke nÿtÿ. ãjag tÿ inh mré ke nÿtÿn tugnÿn gÿr tÿ ge jê'ÿn nÿ, to há nÿtÿmnÿ, isugrÿn. ãjag tÿ isugrÿn ù tÿ ge to há nÿtÿn ký ãjag tóg iso há nÿtÿ gé," he tóg, Jesus ti.

*Inferno ki kutê mÿ vÿ jagy pẽ nÿ
(Mc 9.42-48; Lc 17.1-2)*

6 “Ûn sĩ tag tóg inh ki rã ky jê. Kejên ù tóg ùn sĩ tỹ inh vĩ mranh han sór mũ. Ên jykre vĩ kórég távĩ nĩ. Ên hã mỹ tóg há nỹnh mũ vễ, ù tỹ pó mág tỹ ti nunh to sa ky goj nig ki ti fón jé, ti tỹ goj ki ter jé. Jagy távĩ tóg tí, ù tỹ gĩr tỹ isovãnh han ky,” he tóg, Jesus ti.

7 “Topê vĩ ag ve kónãn pẽ han ke mũ, ag tỹ ù tỹ iso há nỹtĩ ag krĩn kónãn ky. Ag tỹ ag krĩn kónãn ky tóg ag tỹ inh vĩ mranh ha mẽ tí. Û tỹ hên ri ke ag tóg ag krĩn kónãn tí. Hã ra ag tóg to jagãgtar távĩ han ke mũ gé. Topê vĩ ag ve kónãn pẽ han ke mũ, ag tỹ ù krĩn kónãn ky,” he tóg, Jesus ti.

8 “Ã tỹ nén ù vóg ky Topê vĩ mranh ky ã nĩgnó kym nĩ, ã tỹ ke mãn tũg jé. Ã tỹ hẽ kã tá tĩg ky Topê vĩ mranh ky ã pẽn kym nĩ, ã tỹ ke mãn tũg jé. Jagy ti nỹ, ã nĩgnó pir ti, ã tĩg vãnh ti ke gé. Ã tỹ nĩgnó régre ra nũgme ki kutẽ ky tóg jagy kãfór nĩ, ã tỹ pẽn régre ra inferno ki kutẽn ky, pĩ nhyr vãnh ên ki kutẽn ky mỹr. Ã tỹ rĩr krỹg ja tũ venh ke tóg hã ra há tí,” he tóg.

9 “Ã tỹ nén ù ki vễĩ ky Topê vĩ mranh ky ã kanẽ ù nám nĩ, ã tỹ ke mãn tũg jé. Jagy ti nỹ, ã kyvó ti. Ã tỹ kanẽ régre ra nũgme ki kutẽ ky tóg jagy kãfór nĩ, ã tỹ inferno ki kutẽn ky, ã tỹ pĩ nhyr vãnh ên ki kutẽn ky. Ã tỹ rĩr krỹg ja tũ ên ve ky tóg hã ra há tí,” he tóg, Jesus ti.

Carneiro vãfor to comparação (Lc 15.3-7)

10 “Hã ky gĩr to é he tũg nĩ. Û tỹ ag ki rĩr mũ ag vĩ kanhkã tá nỹtĩ, mỹr, ha mẽ. Topê tỹ jẽnẽ jafã ù ag vễ, ù tỹ gĩr ag ki rĩr mũ ag. Inh jóg mré ag tóg nỹtĩ, ti vég ag tóg nỹtĩ, ù tỹ gĩr ag ki rĩr mũ ag. Hã ky gĩr ag to é he tũg nĩ.

11 Tỹ sóg êprã ke fi kósin nĩ. Ûn vãgfor mũ ên ag krenkren han hã jé sóg jun ja nĩ, mỹr, ha mẽ,” he tóg, Jesus ti.

12 “Tag to jykren nĩ. Û tóg carneiro tỹ 100 (ke) tỹ mễg nĩ. Kejên ti mễg pir tóg vãfor ja nĩ. Ky tóg ùn pir ên kanẽnh tí mũ sir, ti jãvãnh tí tóg mũ sir. Ti mễg e ên tóg pãnónh tá nỹtĩ. Ag ré ky tóg tí mũ sir, ùn vãfor mũ ên jãvãnh jé, ùn pir ên ti.

13 Ky tóg ti vég mũ sir. Ky tóg ti mỹ sér pẽ tí sir, ha mẽ. Ti mễg e ên tóg ti mỹ há nỹtĩ, ù tỹ 99 (ke) ên. Hã ra ti tỹ ùn pir ên ve mãn

ky tóg ti mỹ há távĩ nĩ sir, ùn e ên tỹ ti mỹ há nỹtĩ kãfór. Ky ti fe tóg mrin ke mũ.

14 Hã ky tóg Topê mỹ kórég nĩ, ùn sĩ pir vãfor ky, ti kren tũ nĩn ky, gĩr sĩ pir mỹr. Topê pi(jé) tag to há nĩ', inh jóg tỹ kanhkã tá nĩ ti,” he tóg, Jesus ti.

Êg mré ke ù tỹ Topê vĩ mranh

15 “Kejên ã régre vĩ Topê vĩ mranh mũ. Ky ti venh tĩg nĩ, ã tỹ ti mré vēmén jé, to. Vyrmy ti mré vēmén vén nĩ. Hên ri ke mũn tóg ã vĩ jēmẽnh mũ, ky ã tóg ti kren han mũ sir, ã régre ti.

16 Ti tỹ ã vĩ jēmẽ sór tũ nĩn ky ù mỹ: inh mré ti jyvẽn tĩg, hemnĩ, ùn pir mỹ, ke tũ nĩ ky ùn régre ag mỹ. Ky ti mré vēmén mãn nĩ, ag rĩnve, ag tỹ ã tỹ ti mré vĩ mẽ jé.

17 Ti tỹ ãjag vĩ mẽ sór tũ nĩn ky vẽn kar mỹ tómnĩ sir, inh mré ke kar ag mỹ. Ti tỹ vẽn kar vĩ mẽ sór tũ nĩn ky ti mré vĩ mãn tũg nĩ sir. “Topê vĩ ki kagtĩg ti nĩ, fóg kórég ag ri ke ti nĩ,” hemnĩ ti to. “Topê vĩ mranh sór ti mũ, governo mỹ jãnkamy mãg tí ag ri ke,” hemnĩ ti to.

18 Ki hã sóg tó mũ, hã ky sóg ãjag mỹ ke mũ, ha mẽ. ãjag tỹ tag ki ù mỹ: “kanhkã venh ke tũ ã tóg nĩ,” hen ky tóg venh ke tũ nĩ. ãjag tỹ ù mỹ: “kanhkã ve jé ã tóg ke mũ,” hen ky tóg venh ke mũ,” he tóg, Jesus ti.

19 “Ha mẽ, sỹ ãjag mỹ nén tónh ke mũ ti. Kejên ãjag kãmĩ ùn régre ag tóg nén ù to jykren, ag tỹ Topê mỹ nén to vĩ jé. Ky ag tóg ti mỹ nén to vĩ mũ sir. Tỹ ag êprã ke nỹtĩ, hã ra ag tóg Topê mỹ nén ù to vĩ mũ. Ky inh jóg tỹ kanhkã tá nĩ tóg ag mỹ han ke mũ, ag tỹ nén to vĩ mũ ên ti,” he tóg.

20 “Kejên ãjag kãmĩ ùn régre ag vĩ iso vēmén tí, kejên ùn tãgtũ ag. Inh jiji tó jé ag tóg vẽnhmãn ky nỹtĩ. Ky sóg ag mré nĩ nĩ sir, ag tỹ inh vég tũ ra. Hã ky Topê tóg ag mỹ han ke mũ, ag tỹ ti mỹ nén to vĩ mũ ti,” he tóg, Jesus ti.

Û camarada kórég to comparação

21 Ky Pedro tóg ti to kãtĩg ky ti mỹ: “Senhor,” he mũ. “Kejên inh régre tóg vẽn jykre pãno han ja nĩ. Ky inh mỹ ti mỹ vẽn pãte fón e han mũ? Vẽn pãte fón tỹ hẽ ri ke nỹ hỹn há nĩnh mũ? Ke tỹ 7 (ke) mỹ há nĩ?” he tóg, Pedro ti, Jesus mỹ.

²² Kÿ Jesus tóg ti mÿ: “vó,” he mÿ. “Vènh pãte fón tÿ 7 (ke) vÿ pir nÿ,” he tóg. “Vènh pãte fón tÿ 70 tÿ 7 (ke) vÿ pãgsÿ nÿ,” he tóg.

²³ “Ha vé, ù tÿ kanhkã tá nÿ ên tÿ tÿ ãg pã'i nÿ to comparação ù vè, sÿ tónh ke tag, ha mẽ. Pã'i mág ri ke ti nÿ. Camarada e ti nÿ, pã'i mág ên ti. Kÿ tóg kejèn ag tũ ve sór mÿ, ag tÿ ti mÿ név(e) ti.

²⁴ Kÿ tóg vég mÿ. Hã ra ti camarada ù tóg ti mÿ név(e) mág jẽ, hã vÿ: 10 mil (ke), he mÿ.

²⁵ Hã ra ti tÿ ne tÿ kajãm ke tóg tũ tÿ, kÿ ti patrão vÿ ti fón sór mÿ, jãnkamy to, ti prũ fi ke gé, ti krẽ ke gé, ti tũ kar mÿr, ti tÿ ã kaja to ã név(e) kajãm jẽ.

²⁶ Hã ra tóg ti mÿ jagy tÿ, kÿ tóg ti krêm grÿnh ke kÿ ã jakrÿ tÿ jẽ mÿ. Ti krêm grÿnh ke kÿ tóg ti mÿ: “Senhor,” he mÿ. “Ver isovãnh sÿ han, kajãm jẽ sóg (ke) mÿ vãhã,” he tóg.

²⁷ Kÿ ti patrão tóg ti jagãgtãn mÿ sir, ã camarada ti, kÿ tóg ti tovãnh mÿ. Ti mÿ tóg ti név(e) tÿ tũ' he mÿ. “Ha tÿg, jatun mÿ,” he tóg mÿ sir.

²⁸ Kÿ ti camarada ên tóg tÿ mÿ sir. Kÿ tóg ã mré camarada ù vég mÿ sir. Ti ki tóg név(e) sÿ jẽ, cruzeiro pir mÿr. Kÿ tóg ti mäg mÿ sir. Ti nunh kã tóg ti kãgũg mÿ, kÿ tóg ti mÿ: “inh mÿ kajãm, ã név(e) ti,” he mÿ, ùn név(e) mág ja ên ti, ù tÿ ã mÿ név(e) sÿ ên mÿ.

²⁹ Kÿ tóg ti krêm grÿnh ke kÿ ã jakrÿ tÿ jẽ mÿ. Kÿ tóg ti mÿ: “ver isovãnh, vãhã sóg kajãm kãn ke mÿ ha,” he mÿ.

³⁰ Hã ra tóg mẽ jãvãnh nÿ. Kÿ tóg vèse jafã kãtã ti fón mÿ sir, ti tÿ ti mÿ kajãm jẽ, ti név(e) ti.

³¹ Hã ra ti mré camarada ù ag vÿ vég mÿ, kÿ tóg ag mÿ e tÿ. Kÿ ag tóg ãjag patrão mÿ tó kãn mÿ sir, ti tÿ nén han mÿ ti.

³² Kÿ ti patrão tóg ti jẽ prër mÿ sir. Kÿ tóg ti to jũ mÿ. “Jykre kórég pè han ã,” he tóg. “Ã név(e) mág tÿ sóg tũ' he vè, ã tÿ inh mÿ to vÿnh kÿ.

³³ Kÿ ã tÿ ã mré camarada ên jagãgtãn ke vè vè, isÿ ã jagãgtãn ri ke,” he tóg.

³⁴ Kÿ tóg ti to jũ mág han mÿ sir, ti patrão ti. Kÿ tóg ti ség mÿ. Ag mÿ tóg: “ha ti vóg kónãn,” he mÿ gé, ti tÿ ã patrão mÿ kajãm kãn jẽ, ti név(e) mág ên ti,” he tóg, Jesus ti.

³⁵ “Hã han jẽ tóg ke mÿ, inh jóg tÿ kanhkã tá nÿ ti, ãjag tÿ ãjag régre ag mÿ vènh pãte fón

pè han sór tũ nÿn kÿ, ag tÿ kygnè ja ti,” he tóg, Jesus ti.

19

Ëg tÿ ãg prũ fón ke tũ (Mc 10.1-12)

¹ Kÿ Jesus tóg tó kãn ja nÿ, ti tÿ ag mÿ nén tó sór mÿ ti. Kÿ tóg Galiléia tá kãkutè kÿ goj tÿ Jordão mãra tÿ mÿ sir. Israel ag jamã ù vè gé.

² Kÿ ùn e ag tóg ti nón mÿ mÿ. Kÿ tóg tá ag kygtãg kãn mÿ sir.

³ Kÿ Fariseu ag tóg ti tá junjun mÿ gé sir. Ag tÿ ón kÿ ti vème mẽ sór vè, vènh prũ ke fón to. Kÿ ag tóg ti mÿ: “mÿ ãg tÿ nén ù ù to ãg prũ fag fón jẽ há nÿ'?” he mÿ.

⁴⁻⁵ Kÿ tóg ag mÿ kãmén mÿ. “Topè vÿ rá ki vemnÿ,” he tóg. “Tã tóg rán kÿ nÿ, Topè tÿ nén han mÿ ti. Ti tÿ nén kar han ve ki tóg ti mré fi han. Hã kÿ tóg tag tó mÿ, ha mẽ. “Hã kÿ ùn gré tóg ã prũ fi to ã panh ré kÿ tÿnh mÿ, ã mÿnh fi ré kÿ ke gé. ã prũ fi mré tóg tÿnh mÿ. Fi mré tóg tÿ ùn pir nÿ sir, ã prũ fi mré,” he tóg, Topè ti.

⁶ Hã kÿ fag tóg tÿ ùn pir nÿtÿ. Fag pi(jé) tÿ ùn régre nÿtÿ'. Hã kÿ fag tÿ vènh kãpãm tÿg nÿ. Topè tÿ fag tÿ ùn pir han vè mÿr,” he tóg, Jesus ti.

⁷ Kÿ ag tóg ti mÿ ke mãn mÿ. “Hã ra Moisés tóg ãg mÿ: “fi mÿ vènh rá nÿm kar kÿ fi fón nÿ,” he ja nÿ. Ti tÿ ne jẽ ãg mÿ tag tó ja nÿ?” he ag tóg mÿ, Jesus mÿ.

⁸ Kÿ tóg ag mÿ: “hÿ,” he mÿ. “Tag tó ja ti nÿ, ãjag mÿ, ãjag tÿ vènh kanhrãn sór tũ nÿtÿn kÿ, hã kÿ tóg ãjag mÿ: ha fi fón ge, he ja nÿ. Hã ra Topè tóg tag han ja tũ nÿ, ti tÿ nén kar han ve ki.

⁹ Hã kÿ sóg ãjag mÿ ke mÿ. ãjag tÿ ãjag prũ fi fón kÿ ù fi tÿ prũg mãn kÿ ãjag prũ tũ fi vè sir, ha mẽ. ãjag tÿ fi tÿ ù mré nÿ tigrÿn fi fón kÿ tag hã ne pãgsÿ nÿ,” he tóg, Jesus ti.

¹⁰ Kÿ ti mré mÿ tÿ ag mÿ tóg e tÿ, ti vÿ tag, hã kÿ ag tóg ti mÿ: “ge nÿn kÿ tóg tÿ ù nÿ, ãg prũg kÿ,” he mÿ. “Ëg tÿ ãg prũ fi fón sór mÿ ra fi fón tũ nÿn kÿ tóg vènhmÿ nÿ, kÿ ãg hÿn prũg sór tũ nÿ,” he ag tóg.

¹¹ Kÿ tóg ag mÿ: “ùn pipir ag tóg tag han ke mÿ,” he mÿ. “Topè tóg ù ag mÿ: ha prũg

tũg, henh ke mũ, ên ag hã vỹ prũg ke tũ nĩ,” he tóg.

12 “Û ag tóg kurĩ nỹtĩ, ag mur mũ kã. Kỹ ù ag tóg kurĩ nỹtĩ gé, ag tỹ ag grãfy kym kỹ. Kỹ ù ag tóg kurĩ ri ke nỹtĩ gé, ag tỹ Topẽ to jykrén kỹ, ag tỹ ù tỹ kanhkã tá nĩ ên tigrĩn prũg sór tũ nỹtĩn kỹ. Û tỹ to jykrén mũ ên jé to jykrén,” he tóg, Jesus ti.

Jesus tỹ gĩr ag to há nĩ

(Mc 10.13-16; Lc 18.15-17)

13 Kỹ fag tóg gĩr tatĩ kãmũ mũ, ti tỹ ã nĩgé tỹ ag mẽ jé, ti tỹ ag to Topẽ mré vỹ jé. Hã ra Jesus mré mũ tĩ ag tóg fag to jũ mũ, ù tỹ ag tatĩ kãmũ mũ fag to.

14 Hã ra Jesus tóg ag mỹ: “vỹ tũg nĩ, gĩr ag mỹ,” he mũ, “gĩr ag tỹ iso kãmũ kamẽg tũg nĩ,” he tóg. “Û tỹ ge hã vỹ ù tỹ kanhkã tá nĩ ên tỹ tỹ pã'i nĩ ên krẽm nỹtĩ nĩ,” he tóg.

15 Kỹ tóg ag mẽgmẽ kãn mũ sir, ã nĩgé tỹ. Ag mẽgmẽ kãn kỹ tóg tá kãkutẽ mũ sir.

Kyrũ rico kãmẽ

(Mc 10.17-31; Lc 18.18-30)

16 Kỹ vãhã ù tóg ti tá jun mũ sir. Kỹ tóg ti mỹ: “Senhor,” he mũ. “Hã ã tóg jẽ,” he tóg. “Sỹ inh rĩr krỹg ja tũ venh há tóg tĩ. Ti ve jé inh hỹn vẽn jykre há tỹ hẽ ri ke han ke mũ?” he tóg.

17 Kỹ Jesus tóg ti mỹ: “ã tỹ ne jé inh ki vẽn jykre há jẽmẽ sór nẽ?” he mũ. “Ûn pir tóg há nĩ, ha mẽ. Ti tỹ ẽg jyvẽn ên ki króm nĩ, ã tỹ rĩr krỹg ja tũ ve sór kỹ,” he tóg.

18 Kỹ tóg ti mỹ: “ti tỹ ẽg jyvẽn tỹ hẽ ri ke nẽ?” he mũ. Kỹ Jesus tóg ti mỹ: “ti tỹ ẽg jyvẽn tag hã vẽ, ha mẽ: ù tén tũg nĩ, ã prũ tũ fi mré nỹ tũg nĩ, nén ù péju(g) tũg nĩ, ù to ón tũg nĩ,

19 ã nỹ mré ã jóg kamẽg nĩ, ã régre ki rĩr há han nĩ, ã tỹ vẽn ki rĩr há ri ke han nĩ, ã régre ki,” he tóg, Jesus ti.

20 Kỹ kyrũ tóg ti mỹ: “tag kar ki sóg króm tũ,” he mũ. “Kỹ ne nỹ hỹn ver inh mỹ tũ tĩ?” he tóg.

21 Kỹ Jesus tóg ti mỹ: “ã tỹ vẽn jykre há han sór kỹ tag han nĩ, ha mẽ,” he mũ. “Ã tũ kar vãm tũg. Kỹ ùn jagãgtar ag mỹ vin, jãnkamy ti, kỹ ã tóg kanhkã tá tũ mág nĩ sir. Kar kãtũg nĩ, ã tỹ inh mré tũg jé,” he tóg, Jesus ti.

22 Kyrũ ên tỹ ti vỹ tag mẽ kỹ tóg fe kaj han kỹ tĩ mũ sir. Ti tũ vỹ e nỹtĩ, hã kỹ tóg ti mỹ vẽnhmỹ tĩ.

23 Kỹ Jesus tóg ã mré mũ tĩ ag mỹ kãmén mũ sir. “Sỹ ke há vẽ, hã kỹ sóg ke mũ. Jagy ti nỹ, ùn rico tỹ ù tỹ kanhkã tá nĩ ên tỹ tỹ ẽg pã'i nĩ venh ke ti,” he tóg.

24 “Hã kỹ sóg ãjag mỹ ke mãn mũ. Cavallo pãnĩ sór vỹ prẽj nor fĩn kutẽ tũ nĩ mỹr,” he tóg. “Ti tỹ fĩn kutẽ há nĩ ra tóg ver jagy tĩ vẽ, ùn rico tỹ ù tỹ kanhkã tá nĩ ên tỹ tỹ ẽg pã'i nĩ venh ke ti,” he tóg, Jesus ti.

25 Kỹ tóg ti mré mũ tĩ ag mỹ e tĩ, ti vỹ tag. Kỹ ag kanẽ tóg jur mũ. “Kỹ ù hỹn kren ke tũ nĩ,” he ag tóg.

26 Kỹ Jesus tóg ag ki ẽvãnh mũ, kỹ tóg ag mỹ: “ẽprã ke ag vỹ vêsóg ki tá jun ke tũ nĩ,” he mũ. “Topẽ hã tóg ãjag tỹ tá jun han ki kanhró nĩ, ti tỹ nén ù kar tỹ hẽ ri ken há nĩn kỹ,” he tóg, Jesus ti.

27 Kỹ Pedro tóg ti mỹ: “ha vé,” he mũ. “Nén kar ré kỹ ẽg mũ mũ, ã mré. Tag to ẽg hỹn ne venh ke mũ?” he tóg.

28 Kỹ Jesus tóg ag mỹ: “sỹ ke há vẽ, hã kỹ sóg tó mũ,” he mũ. “Inh mré ãjag tóg mũ mũ. Tỹ sóg ẽprã ke fi kósĩn nĩ. Kejẽn sóg inh nĩgia kri nĩnh mũ, isỹ vẽn kar jykre tũgnỹm jé. Sĩnvĩ inh nĩnh mũ, kurã ên kã. Nén kar han mãn jé sóg ke mũ, kurã ên kã. Kỹ ãjag tóg ãjag nĩgia kri nĩgnĩg kỹ nỹtĩnh mũ gé, nĩgia tỹ 12 (ke) kri, ãjag tỹ povo tỹ Israel kar jykre tũgnỹm jé, povo tỹ 12 (ke) tag ag jykre,” he tóg.

29 “Jó ù tóg isugrĩn ã jamã ré kỹ tĩ mũ, ã kãke, ã jãvy, ã ve, ã panh, ã mỹnh, ã japỹ ré kỹ tóg tĩ mũ, inh jykre tũgrĩn. Ên vỹ tóg vẽn kato ã tỹ ẽprã ré kỹ tũg ja ên e ri ke venh ke mũ, tag ki, ẽprã. Kỹ tóg rĩr krỹg ja tũ ên venh ke mũ gé,” he tóg.

30 “Jãvo tag ki ùn mág ù ag kãsir nỹtĩnh ke vẽ, tá tere kỹ, kỹ tag ki ùn kãsir ù ag tỹ tỹ ùn mág nỹtĩnh ke vẽ, tá tỹ pã'i nĩnh ke vẽ,” he tóg, Jesus ti. Ti tỹ ag mỹ kanhkã jykre tó vẽ.

20

Uva ki rãnrãj tĩ ag to comparação

1 Kỹ Jesus tóg ag mỹ: “ù tỹ kanhkã tá nĩ ên tỹ tỹ ẽg pã'i nĩ vỹ ge nĩ, ha mẽ,” he mũ, to comparação han kỹ. “Patrão ri ke tóg nĩ.

Kusã ki tóg tĩ mũ, 6 horas ki, camarada ag jãvãnh jé, ag tỹ ti jakré ki rĩr jé.

² Kĩ tóg ù ag vég mũ sir. Ag mré tóg vènh rãnrãj kaja to jykrén mũ, hã vỹ: jãnkamy pir, he mũ, por dia kaja ti. Kĩ tóg ag mỹ: “ha ki rĩr mũjêg,” he mũ sir.

³ Kĩ ag tóg mũ mũ. Hora tãgtũ tũg kũ, 9 horas ki tóg tũg mãn mũ, ù ag jãvãnh jé gé. Kĩ tóg ù ag vég mũ gé sir. Véké ag tóg êmã kujũ tá nỹtĩ, rãnrãj tũ kũ.

⁴ Kĩ tóg ag mỹ: “inh mỹ inh jakré ki rĩr mũjêg,” he mũ gé. “Kajãm jé sóg ke mũ, ti kaja tỹ,” he tóg.

⁵ Kĩ ag tóg mũ mũ.

Hora tãgtũ ù tũg kũ, meio dia ki tóg ù ag jãvãnh tũg mãn mũ, 3 horas ki tóg tũg mãn mũ gé. Ag ve kũ tóg ag mỹ ke mũ gé, kũ ag tóg mũ mũ gé, ti jakré ki rĩr jé.

⁶ Vãhã tóg rãkãnh mũ sir. 5 horas ki tũg mãn kũ tóg ù ag vég mũ gé, véké jêgĩ kũ nỹtĩ ag. Kĩ tóg ag mỹ: “ãjag tỹ ne jé rãnrãj tũ nĩ nê?” he mũ. “Kurã kar ki ãjag tóg ki nỹtĩ, rãnrãj tũ nỹtĩ ra,” he tóg ag mỹ.

⁷ Kĩ ag tóg ti mỹ: “hã ra ù tóg êg mỹ: ha inh rãnrãj han, he ja tũ nĩ,” he mũ. Kĩ tóg ag mỹ: “ha inh jakré ki rĩr mũjêg ge,” he mũ sir. Kĩ ag tóg mũ mũ gé.

⁸ Kutỹ kũ ag patrão tóg ã tũ ki rĩr tĩ ên mỹ: “ha ag jé prêr,” he mũ, 6 horas da tarde ki. “Ag mỹ ti kaja ti nĩm,” he tóg. “Ûn tỹ rãkãnh kũ kãmũ mũ ag mỹ nĩm vén, kar kũ ù tỹ kusã ki kãmũ mũ ag mỹ nĩm rén,” he tóg ti mỹ. Kĩ tóg ke mũ, ti tũ ki rĩr tĩ ti.

⁹ Kĩ ù tỹ rãkãnh kũ junjun mũ ag vỹ ãjag kaja ti mãn mũ, hã vỹ: jãnkamy pir, he mũ. Ag rãnrãj sĩ ra ag tóg por dia kaja vég mũ sir.

¹⁰ Kĩ ù tỹ kusã ki rãnrãj mũ ag tóg to jykrén mũ. “Ti hỹn êg mỹ ti kaja kãfór han ke mũ, êg tỹ kurã kar ki rãnrãj kũ,” he ag tóg mũ, to jykrén kũ. Hã ra tóg ag mỹ jãnkamy pir ên nĩm mũ gé sir, por dia kaja ên.

¹¹ Ag tỹ jãnkamy ên mãn kũ ag tóg ti to jũ mũ, ãjag patrão to.

¹² Kĩ ag tóg ti mỹ vĩ mũ. “Tag ag vỹ hora pir ki rãnrãj, jãvo ã tóg ag mỹ êg kaja ri ke han. Kurã kar ki êg tóg rãnrãj mỹr, to êg ron, ti rỹ jagy ra êg tóg to krónh ke ja tũ nĩ,” he ag tóg, ãjag patrão mỹ.

¹³ Kĩ tóg ag kãmĩ ù mỹ ke mũ, ag patrão ti. “Sỹ ã ki kygnê pijé!” he tóg. “Inh mré ã tóg jãnkamy pir to jykrén ja nĩ, hã kũ sóg ã mỹ nĩm mũ, jãnkamy pir ti.

¹⁴ Kĩ ã tũ mãn kũ tũg. Hã ra sóg ag mỹ nĩm sór mũ gé, sỹ ã mỹ nĩm ja ên ri ke.

¹⁵ Isũ vè mỹr, jãnkamy ti, kũ sóg sỹ tỹ nén han sór mũ ên han mũ. “Ã mỹ jũ’, isỹ ag mỹ vĩ há han to?” he tóg ti mỹ, patrão ti.

¹⁶ Hã kũ êgno tá kãmũ ag vỹ ùn kãmũ vén mũ ag ri ke nỹtĩnh mũ, tãpry kũ, jãvo ùn kãmũ vén mũ ag vỹ êgno tá kãmũ mũ ag ri ke nỹtĩnh mũ gé,” he tóg, Jesus ti.

Jesus tỹ ã ter ke tó mãn

(Mc 10.32-34; Lc 18.31-34)

¹⁷ Kĩ Jesus tóg Jerusalém ra tũg sór mũ. Kĩ tóg vyrmỹ ù tỹ 12 (ke) ên ag mré vèmén mũ. Ag tỹ ã mré êpry jagma mũn kũ tóg ag mré vèmén mũ, ag tỹ êmĩn jagma mũn kũ.

¹⁸ “Ha vé,” he tóg. “Jerusalém ra êg tóg mũ mũ,” he tóg. “Êprã ke fi kósĩn ên vỹ jagtar ke mũ. Inh hã vè. Topê tũ ki rĩr tĩ to pã’i ag tóg ãjag tỹ isỹ nén han sór mũ ên han ke mũ, Topê vỹ to professor ag ke gé. Ag tỹ iso: “ter jé tóg ke mũ,” henh ke vè.

¹⁹ Kĩ ag tóg fóg ag mỹ inh fêg ke mũ sir, ên ag tỹ iso é he jé, ag tỹ inh mrãnrãn jé, ag tỹ ka to isa jé. Kurã tãgtũ ki sóg hã ra rĩr mãn ke mũ,” he tóg, Jesus ti.

Ûn régre ag tỹ tỹ ùn mág nỹtĩ sór

(Mc 10.35-45)

²⁰ Kĩ Zebedeu krê ag mỹnh fi tóg Jesus venh kãtĩ mũ, fi krê ag mré. Ti krêm fi tóg mũg ke mũ, fi tỹ ti mỹ nén (ũ) to vỹ sór kũ.

²¹ Kĩ tóg fi mỹ: “ã tỹ ne to vỹ sór nê?” he mũ. Kĩ fi tóg ti mỹ: “kejên ã tóg tỹ pã’i nĩnh mũ,” he mũ. “Kỹ inh krê tag ag tỹ ã rã hã nỹtĩnh há tóg tũ, ù tỹ ã pêgja tá nĩ jé, kũ ù tỹ ã jakãnh tá nĩ jé,” he fi tóg, ti mỹ.

²² Kĩ Jesus tóg ag mỹ: “ãjag tỹ nén to vỹ mũ ki kagtũg ãjag tóg nỹtĩ,” he mũ. “Jagy ti nỹ. ãjag mỹ inh ri kén jagtar sór mũ’? ãjag mỹ tovãnh ke tũ nĩ’?” he tóg. Kĩ ag tóg ti mỹ: “hỹ,” he mũ. “Tovãnh ke tũ êg nĩ,” he ag tóg, ti mỹ.

²³ Kĩ tóg ag mỹ: “hỹ, jagãgtar jé ãjag tóg ke mũ, inh ri kén,” he mũ. “Hã ra isũ tũ vè, sỹ ãjag mỹ: hej, he ti,” he tóg. “Ha inh pêgja tá nĩ, henh ke tũ sóg nĩ. Ha inh jakãnh tá nĩ,

henh ke tũ sóg nĩ gé, isũ tũ vễ. Topẽ tỹ ùn mỹ: ha ti rã hã nỹtĩ, henh ke mũ ên ag hã tỹ inh rã hã nỹtĩnh ke vễ,” he tóg, Jesus ti.

²⁴ Hã ra ù tỹ 10 (ke) ag tóg mễg mũ, ùn régre ag tỹ Jesus mỹ tag to vĩ ja ti. Kỹ ag tóg ag to jũ mũ.

²⁵ Hã ra Jesus tóg ag jé prěr kãn mũ, kỹ tóg ag mỹ: “fóg ag pã'i ag jykre ki kanhró ãjag tóg nỹtĩ,” he mũ. “Vẻnh kar jẻgnẻg ag tóg tĩ mỹr, kỹ ag mág ag tóg vẻnh kar mỹ: gemnĩ, ge tũg nĩ, he tĩ, vĩ tar han kỹ,” he tóg.

²⁶ “Ag ri ke han tũg nĩ. ãjag mỹ tỹ ùn mág nỹtĩ sór mũ?” Kỹ tỹ jagnẻ camarada ri ke nỹtĩmnĩ, jagnẻ tũ ki rĩr kỹ.

²⁷ ãjag mỹ tỹ pã'i nỹtĩ sór mũ? Kỹ tỹ jagnẻ krẻm ke nỹtĩmnĩ, tỹ ùn kãsir nỹtĩmnĩ.

²⁸ Hã kỹ sóg camarada tũ nĩ gé. Sỹ tỹ camarada nĩ jẻ sóg kãtĩg, sỹ ãjag ki rĩr jẻ. Tỹ sóg ẻprã ke fi kósin nĩ. Hã kỹ sóg vẻnh kar jagfy ter ke mũ, sỹ ag krenkren han jẻ,” he tóg, Jesus ti.

*Jesus tỹ ùn kyvó ag tỹ há' he
(Mc 10.46-52; Lc 18.35-43)*

²⁹ Hã ki ag tóg Jerusalẻm ra mũ mũ. Kejẻn ag tóg cidade tỹ Jericó fĩn rãm kỹ ag tóg tá pa mũ, hã ra ù tỹ hẻn ri ke ag tóg Jesus nón mũ mũ.

³⁰ ẻpry ẻn tá, ẻmĩn ẻn tá ùn kyvó ag tóg nĩgnĩ kỹ nỹtĩ nĩ, ùn régre ag. Vãhã ag tóg Jesus tỹ jagma tĩg mễg mũ. Kỹ ag tóg ti jẻ prẻr mũ. “!..Senhor..!” he ag tóg. “!..Davi kósin!, ẻg jagãgtãn ra..!” he ag tóg.

³¹ Kỹ ag tóg ag to jũgũ mũ, ti nón mũ ù ag. “Mẻ kã nỹtĩ,” he ag tóg mũ. Hã ra ag tóg prẻr mãn', prẻr mãn' he mũ, jamã hár(a). “!..Senhor, Davi kósin!, ẻg jagãgtãn ra..!” he ag tóg mũ.

³² Kỹ Jesus tóg krẻg he mũ, kỹ tóg ag jẻ prẻr mũ. Kỹ tóg ag mỹ: “ne to ãjag vĩ, sỹ ãjag mỹ han jẻ?” he mũ.

³³ Kỹ ag tóg ti mỹ: “ẻg tỹ ẻvãnh há tóg tĩ,” he mũ.

³⁴ Kỹ Jesus tóg ag jagãgtãn mũ sir. Ag kanẻ mễgmễg tóg mũ sir. Kỹ ag tóg ẻvãnh há han mũ sir. Ti nón ag tóg mũ mũ sir.

21

*Jesus tỹ Jerusalẻm tá jun
(Mc 11.1-11; Lc 19.28-40; Jo 12.12-19)*

¹ Ag mũn kỹ ag tóg Jerusalẻm kakó tá junjun mũ, ẻmã tỹ Betfagẻ tá, krẻ tỹ Oliveiras tá. Kỹ Jesus tóg ã mrẻ mũ tĩ régre ag jẻgnẻg mũ, ẻmã ẻn ra.

² Kỹ tóg ag mỹ: “ẻmã ẻn ra mũjẻg, ẻg jo ẻmã nĩ ẻn ra,” he mũ. “Tá ãjag tóg burrica fi venh mũ. Se kỹ fi jẻ. Fi kósin vĩ fi mrẻ jẻ nĩ. ẻn fi kavãn kỹ fi pẻre kãmũmnĩ.

³ Hẻn ri ke mũn ag tóg ãjag mỹ vĩ sór mũ, fi to. Kỹ ag mỹ: “ẻg Senhor vĩ fi ve sĩ han sór mũ. Kãnhrmar tóg fi jẻnẻ mãn mũ,” hemnĩ,” he tóg, Jesus ti.

⁴ Hã ra tóg rãn kỹ nĩ gé, tag. Topẻ vĩ tó tĩ tóg tag rãn ja nĩ, ha mẽ.

⁵ “Sião tá ke fag mỹ tag tómnĩ, ha mẽ. Hã vé, ã pã'i tỹ rei tóg ã ki jun ke mũ, hemnĩ. Vẻnh kar to tóg fe há nĩ, jũ vãnھ nĩn kỹ, ã Senhor ti. Burrica kri tóg nĩ nĩ, fi kósin kri, ẻg tu tĩ ẻn fi kósin kri mỹr,” he tóg, Topẻ vĩ tỹ rãn kỹ nĩ ki. Hã ra tóg ge nĩ.

⁶ Kỹ ti mrẻ mũ tĩ ag tóg mũ mũ, burrica fi mãn jẻ.

⁷ Fi pẻre ag tóg kãmũ mũ, fi kósin mrẻ. Kỹ ag tóg ãjag kur tỹ kri vãm mũ, kỹ tóg kri nĩ mũ.

⁸ Kỹ vẻnh e ẻn ag tóg ãjag kur tỹ ẻpry kri kugjẻn mũ, ẻmĩn kri. Kỹ ù ag tóg ka fẻj kre kỹ ẻpry kri vãm mũ sir. Ag tỹ ti jamĩn sĩnvĩ han sór vễ.

⁹ Kỹ ù ag tóg ti jãmĩ mũ mũ, jo ù ag ti nón mũ mũ. ẻn ag tóg prẻnprẻr mũ sir. “!..Viva, Davi kósin..!” he ag tóg mũ. “!..Sẻr tóg tĩ, pã'i vĩ ẻg tá jun, ẻg Senhor mág tỹ ti jẻnẻn kỹ..! !..Topẻ tá tóg kãtĩg, ù tỹ kynhmỹ nĩ ẻn tá, viva..!” he ag tóg, prẻnprẻr kỹ.

¹⁰ Hã ki ag tóg Jerusalẻm tá junjun mũ. Kỹ tá ke kar ag vĩ ti venh kãmũ mũ. Ag mỹ tóg e tĩ, kỹ ag tóg ti to: “ủ nẻ?” he mũ.

¹¹ Kỹ ti mrẻ kãmũ mũ ag vĩ ag mỹ: “Topẻ vĩ tó tĩ ẻn vễ,” he mũ. “Jesus vễ, Nazarẻ tá ke ẻn vễ, Galilẻia tá ke ẻn,” he ag tóg mũ sir.

*Jesus tỹ Topẻ jo ẻn krẻm ag pan
(Mc 11.15-19; Lc 19.45-48; Jo 2.13-22)*

¹² Kỹ Jesus tóg Topẻ jo ẻn kãra rã mũ. Kỹ tóg tá ke ag pan kãn mũ sir, nẻn vender he tĩ ag, nẻn comprar he tĩ ag ke gé. Topẻ jo ẻn krẻm ag tóg negociar he tĩ, jãnky trocар he ag tóg tĩ gé. Ag tỹ nẻn kri vin jafã tỹ tóg vyryn ke mũ sir. Sẻrãg vender he tĩ ag nĩgnĩ jafã tỹ tóg vyryn ke mũ gé sir.

13 Ag mý tóg: “Topě ví rá to jykrén nĩ,” he mũ. “Tag vỹ rán ký nĩ, ha mẽ. “Inh ãn jiji vỹ tỹ Topě mré ví jafã nĩ,” he tóg, Topě ví rá ki. Hã ra ãjag tóg Topě mré ví jafã tag krêm nén kar pigju(g) mũgtĩ, ký tóg bandido ag jamã ri ke nĩ sir,” he tóg, Jesus ti. Ag pan ký tóg ke mũ, Jesus ti.

14 Ký ãn kyvó ag tóg ti to junjun mũ sir, ãn kónhgrĩ ag ke gé, ti tỹ Topě jo ãn krêm jên ký. Ký tóg ag tỹ há' he kãn mũ sir.

15 Hã ra Topě tũ ki rĩr tĩ ag tóg tá nỹtĩ, Topě vĩ to professor ag ke gé. Ti tỹ ag tỹ há' he vэг ag tóg mũ. Gĩr ag vĩ mэг ag tóg mũ gé. Topě jo ãn krêm ag tóg nỹtĩ, gĩr ag, ký ag tóg Jesus mỹ prênprêr mũ. “!..Viva, Davi kósin..!” he ag tóg mũ, prênprêr ký. Ký pã'i ag tóg jũgũ mũ, Jesus to.

16 Hã ký ag tóg ti mỹ vĩ mũ. “Ã mỹ ag prênprêr mэг tũ?” he ag tóg. Ký Jesus tóg ag mỹ: “vó,” he mũ. “Hã ra Topě ví rá to jykrén nĩ,” he tóg. “Ûn kãsir ag vỹ iso vĩ há han tĩ,” he tóg, Topě vĩ ki. “Ûn pafa mũ ag vỹ inh mỹ vĩ há pẽ han tĩ. Ã hã ne tag han', ãn kãsir ag tỹ inh mỹ vĩ há han jé,” he tóg, Topě mỹ, Topě vĩ tỹ rán ký nĩ ki,” he tóg, Jesus ti.

17 Tag tó ký tóg ag ré ký tĩ mũ sir. Cidade tá tóg kãkutẽ mũ, êmã tỹ Betfagé ra tĩg jé. Tá tóg sir nũr mũ.

Ka tỹ figueira tóg (Mc 11.12-14, 20-24)

18 Tỹ vaj ký kusã ki tóg cidade ra tĩg mãn mũ. Ã tĩg ký tóg kókĩr mũ.

19 Ký tóg ka tỹ figueira vэг mũ sir, ký tóg ra tĩ mũ, tĩ kanẽ ko jé. Hã ra tóg kanẽ tũ nĩ. Féj távĩ tóg jé, ký tóg ti mỹ vĩ mũ. “Kanẽ han mãn ke tũ ã nĩ ha,” he tóg mũ. Ký tóg tóg mũ sir vêsỹmér, ka tĩ.

20 Ký ti mré mũ tĩ ag tóg vэг mũ sir, ti tóg mũ ti. Ký tóg ag mỹ e tĩ. “Vêsỹmér tóg tóg ja nĩ,” he ag tóg. “Ti hẽ ri ké?” he ag tóg.

21 Ký Jesus tóg ag mỹ kãmén mũ sir. “Ki hã sóg tó mũ, hã ký sóg ke mũ,” he tóg. “Inh ri ke han jé ãjag tóg ke mũ. Isỹ ka tỹ figueira mỹ: “tóg ra,” hen ký tóg tóg ja nĩ. Inh vĩ tag ri ke han jé ãjag tóg ke mũ, ãjag tỹ inh ki ge há han ký. Hã ra to: “Topě mỹ inh vĩ mэг mũ vỹ?” he tũg nĩ. “Hỹ mỹ vỹ?” he tũg nĩ. Ký ãjag tỹ kejên pãnónh mỹ: ha kutẽ, goj nig

ki, hen ký tóg kutẽ mũ, ãjag tỹ ti kutẽnh ke to: “hỹ mỹ vỹ?” he tũ nĩn ký.

22 Ký ãjag tỹ Topě mỹ nén ã to vĩn ký to: “han jé tóg ke mũ,” hemnĩ. Ký tóg ãjag mỹ han mũ, ãjag tỹ ti mỹ nén to vĩ mũ ên ti,” he tóg, Jesus ti.

Jesus tỹ ã tỹ ã jênэг mũ tó tũg (Mc 11.27-33; Lc 20.1-8)

23 Ký tóg cidade tá jun ký (tóg) Topě jo ãn kãra rã mãn mũ sir. Ký Topě tũ ki rĩr tĩ to pã'i ag vỹ ti to kãmũ mũ, kófa ag mré hã. Ag tỹ ti ki jêmẽ sór vè, hã ký ag tóg ti mỹ: “ũ nỹ ã mỹ: tag han nĩ, hé?” he mũ. “Û nỹ ã jênэг?” he ag tóg mũ, Jesus mỹ.

24 Ký Jesus tóg ag mỹ: “ãjag ki sóg jêmẽnh ke mũ gé, vènh kato,” he mũ. “Ãjag tỹ inh mỹ tó há han ký sóg ãjag mỹ ã tỹ inh jênэг mũ tónh ke mũ gé,” he tóg.

25 “João vỹ ag kygpég tĩ ja nĩgtĩ. Ký ti mỹ kanhkã tá vènh jykre han ja nĩgtĩ, êprã vènh jykre vó? Û nỹ ti jênэг?” he tóg, Jesus ti.

Ký ag tóg ti vĩ to jykrén mũ jagnẽ mré. “Ëg tỹ ti mỹ: Topě tỹ ti jênэг ja vè, hen ký tóg êg mỹ: ký ãjag tỹ ne jé ti vĩ kri fig tũ nĩ nẽ? henh ke mũ.

26 Ëg tỹ hã ra ti mỹ: êprã ke jykre ja vè, hen ký êg tóg vènh kar kato tẽ mũ sir. Ag kar vỹ João to: Topě vĩ tó tĩ pẽ ja vè, he tĩ. Ký êg tóg ag kamэг mũ, vènh e ên,” he ag tóg mũ, jagnẽ mỹ, pã'i ag.

27 To jykrén ký ag tóg Jesus mỹ: “êg pi(jé) João jykre ki kanhró nỹtĩ,” he mũ. Õn ký ag tóg ke mũ. Ký tóg ag mỹ: “kỹ sóg ãjag mỹ tónh ke tũ nĩ gé, ã tỹ inh jênэг mũ ti,” he mũ. Ã kato tẽ mũ ag mỹ tóg ke mũ, Jesus ti.

Ûn krẽ régre to comparação

28 Ký tóg ag kanhrãn ký ag mỹ: “tag to jykrén nĩ, ha mẽ,” he mũ sir. “Û tóg kósin régre nĩ. Kejên tóg ãn sanh to tĩg ký ti mỹ: “inh kósin,” he mũ. “Ûri inh jakré tũgnỹgnỹm tĩg,” he tóg.

29 Ký tóg ã panh ti mỹ: “vó,” he mũ. Kar ký tóg to jykrén mãn ký (tóg) tĩ mũ sir, êpỹ ra.

30 Ký ti panh tóg ti jãvy mỹ ke mũ gé sir. “Ûri inh jakré tũgnỹgnỹm tĩg,” he tóg mũ gé. Ký ti jãvy tóg: “hej,” he mũ, ã panh ti mỹ. Hã ra tóg tĩ tũ nĩ.

³¹ Kĩ ù tỹ hẽ nỹ ti panh vĩ ki króm hỹn?" he tóg, Jesus ti. Kĩ ag tóg ti mỹ: "ũn sanh ti," he mũ. Kĩ Jesus tóg ag mỹ: "hỹ, hã vễ," he mũ. "Hã kĩ sóg ãjag mỹ ke mũ. Ủ tỹ governo mỹ jãnkamy mãng tĩ ù ag vĩ Topẽ vĩ mranh, hã ra ag tóg to jykrén mãn kĩ (ag tóg) ãjag jykre tovãnh. Kĩ ùn mén e ù fag vĩ ãjag jykre kórég tovãnh gé. Hã kĩ ag tóg Topẽ tỹ tỹ ẽg pã'i nĩ venh ke mũ, fag ke gé. Ti kósin sanh ri ke ag hã vễ. Ag jãvo ãjag tóg kanhkã venh ke tũ nĩ, ãjag tỹ ón kĩ Topẽ mỹ: "hej," he mũ ra.

³² João vĩ ãjag mỹ Topẽ vĩ tó ja nĩgtĩ, ãjag tỹ ti jykre kuryj jagma mũ jé. Hã ra ãjag tóg ti vĩ kri nĩm ja tũ nĩ. ãjag jãvo ù tỹ governo mỹ jãnkamy mãng tĩ ag vĩ ti vĩ kri fi ja nĩ, ùn mén e fag ke gé. Tag ve ãjag mỹr. Ge ra ãjag tóg ãjag jykre tovãnh tũ nĩ, João vĩ kri nĩm tũ ãjag nĩ," he tóg, Jesus ti.

Ủn camarada kórég ag to comparação (Mc 12.1-12; Lc 20.9-19)

³³ Kĩ Jesus tóg ag mỹ: "sỹ ãjag mỹ ãjag tỹ Topẽ tovãnh to comparação han mãn ke vễ, ha mẽ," he mũ. "Kejẽn ù tóg nĩgtĩ. Uva krãn tóg nĩgtĩ, nén kanẽ tỹ vinho han jafã ẽn. ã jakré tag to tóg rón mũ. Kĩ tóg kũm kĩ uva jẽgmĩ jafã han mũ. Kĩ tóg ki pãjó han mũ gé. Kĩ tóg ù tỹ ki rĩr tĩ ag mỹ tovãnh mũ, ag tỹ ti mré ti kanẽ vễnh kãpãm jé. Kĩ tóg tĩ mũ, ga ù ra.

³⁴ Ti kanẽn kĩ tóg ã camarada ag jẽgnẽg mũ, ag tỹ ag mỹ ti tũ vin jé, uva kanẽ ti.

³⁵ Hã ra ag tóg ag vóg kónãn mũ sir, ti camarada ag. Ủ mrãnmrãn ag tóg mũ, ù tén ag tóg mũ, ù pin ag tóg mũ, pó tỹ.

³⁶ Kĩ tóg ag mỹ ã camarada ù ag jẽgnẽ mãn mũ gé sir, ùn e ag sir, hã ra ag tóg ag vóg kónãn kãn mũ.

³⁷ Vãhã tóg ag mỹ ã kósin jẽnẽg mũ. "Ag hỹn ti kamẽg mũ, inh kósin ti," he tóg, hã kĩ tóg ti jẽnẽg mũ.

³⁸ Kĩ ag tóg ti vэг mũ, ti kósin ti. Kĩ ag tóg jagnẽ mỹ: "kejẽn ẽkré tag vĩ tỹ ti tũ nĩnh ke mũ," he mũ. "Mũ nỹ, ti tén jé, ti tũ tag tỹ tỹ ẽg tũ nỹnh jé," he ag tóg mũ, patrão kósin to.

³⁹ Kĩ ag tóg ti kãgmĩg mũ sir. Ró pãte ag tóg ti kutẽm kĩ (ag tóg) ti tén mũ sir.

⁴⁰ Kejẽn ag patrão vĩ kãtĩg ke mũ, ù tỹ nén krãn ja ẽn. Kỹn hỹn hẽ ri kenh mũ, ã camarada ag tỹ?" he tóg, Jesus ti.

⁴¹ Kĩ ù tỹ ti vĩ mẽg mũ ag tóg ti mỹ: "vễnh jykre pãno han ag tóg mũ mỹr, uva ki rĩr tĩ ag," he mũ. "Ag kãgtén jé tóg ke mũ, jũ kĩ, ag patrão ti, kĩ tóg uva kré ẽn tỹ ù mỹ tovãnh ke mũ, ag tỹ ti mré vễnh kãpãm jé, ti kanẽ ti," he ag tóg ti mỹ. Ủ tỹ ti vĩ mẽg mũ ag tóg ke mũ, Jesus mỹ.

⁴² Kĩ tóg ag mỹ: "hỹ," he mũ. "Kĩ Topẽ vĩ rá tag to jykrén nĩ gé, ha mẽ: pó tỹ ìn han jafã fón ag tóg, pó tỹ ìn han tĩ ag. Ag mỹ tóg kórég ja nĩ, pó ẽn ti. Hã ra Topẽ tóg pó ẽn hã tỹ ìn nũna han mũ. Ẽg Senhor mág tỹ há vễ mỹr, hã kĩ tóg ẽg mỹ e tĩ, ẽg tỹ ve kĩ," he ja tóg nĩ, Topẽ vĩ rá ki," he tóg, Jesus ti, vễso pó tỹ comparação ù han kĩ.

⁴³ "Hã kĩ sóg ãjag mỹ ke mũ. ãjag tỹ Topẽ tỹ tỹ ẽg pã'i nĩ venh ke vễ vễ, hã ra ãjag tóg venh ke tũ nĩ. Ủ ag vĩ venh ke mũ, povo ù ag, ag tỹ inh vĩ kri fi kĩ," he tóg.

⁴⁴ "Ủ tỹ hẽn ri ke ag vĩ pó tag kri vár ke mũ, kĩ ag tóg kri vár kĩ tũ' henh ke mũ. Kĩ pó tag vĩ ù tỹ hẽn ri ke ag kri kutẽnh ke mũ gé, kĩ tóg ag tỹ námnam ke kãn mũ, ag kri kutẽ kĩ," he tóg, Jesus ti. Ti tỹ ag tỹ ti ki rá tũ tugrĩn nũgme ki vár ke tón hã vễ.

⁴⁵ Kĩ ag tóg mẽg mũ sir, Jesus vĩ ti. Topẽ tũ ki rĩr tĩ to pã'i ag vĩ mẽg mũ, Fariseu ag ke gé. Mẽ kĩ ag tóg vãhã to jykrén mũ sir. "Ẽg hã to tóg uva ki rĩr tĩ kórég ag to comparação tag han ja nĩ," he ag tóg mũ sir, ki kanhrãn kĩ.

⁴⁶ Hã kĩ ag tóg ti se sór mũ. Hã ra ag tóg vễnh e ẽn kamẽg mũ. "Topẽ vĩ tó tĩ pẽ vễ," he ag tóg, Jesus to, vễnh e ẽn, hã kĩ pã'i ag tóg povo ẽn ag kamẽg kĩ ti ség tũ nĩ ver.

22

Vễnh prũg to comparação (Lc 14.15-24)

¹ Kĩ Jesus tóg ag mỹ comparación ù han mãn mũ sir.

² "Ủ tỹ kanhkã tá nĩ ẽn tỹ tỹ ẽg pã'i nĩ vĩ ge nĩ, ha mẽ," he tóg. "Tỹ tóg pã'i mág ri ke nĩ. Ti kósin prũg ken kĩ tóg to festa mág han sór mũ, pã'i mág ti.

³ Hã kÿ tóg ã camarada ag jëgnëg mû, ag tÿ ti tÿ ùn mÿ tó ja ag mÿ: “ha kãmũ jëg, festa kon jé,” he jé. Hã ra ag tóg kãmũ jãvãnh nÿtĩ.

⁴ Kÿ tóg ag mÿ ã camarada ù ag jëgnë mãn mû. “Ag mÿ: “kãn inh huri, vëjën ti, he ti, ëg patrão ti,” hemnĩ,” he tóg. “Boi kãgtén inh huri, boi tãgy ën mré hã. Nén kar vÿ kynkar kÿ nÿtĩ. Kãmũ jëg ra, inh festa to, he ti, ëg patrão ti,” hemnĩ ag mÿ,” he tóg, pã'i mág ti, ã camarada ag mÿ. Kÿ ag tóg mû mû.

⁵ Hã ra ag tóg kãmũ sór tũ nĩ, kÿ ag tóg ti camarada ag to é he mû. Û tóg ã japÿ ra tĩ mû, ù tóg ã negócio nón tĩ mû.

⁶ Û ag tóg hã ra ti camarada ag kugmĩ kÿ (ag tóg) ag vóg kónãn mû gé sir, ag kãtén ag tóg mû sir.

⁷ Kÿ pã'i mág tóg ag to jũ mû. Kÿ tóg ã krëm pã'i ag jëgnë kÿ ag kãgtén mû gé sir, ù tÿ ti camarada kãgtén ja ën ag. Ag ïn kugprüg ag tóg mû sir.

⁸ Kÿ tóg ã camrada ag mÿ: “inh festa vÿ kar kÿ nĩ ha,” he mû. “Hã ra ag tóg kãmũ jãvãnh nÿtĩ, isÿ ùn mÿ vënh vĩ jënë ja ag, ag kórég nÿtĩn kÿ.

⁹ Ha mÿjëg, ëpÿ ra, ëmĩn vënh kãpóv (ja) ra ke gé. Æjag tÿ ù ve kÿ ti mÿ: “ha festa venh kãtíg,” hemnĩ,” he tóg, pã'i mág ti, ã camarada ag mÿ.

¹⁰ Kÿ ag tóg mû mû. Æjag tÿ ëpÿ tá ù ve kÿ ag tóg ag mÿ ke mû. Vënh kar mÿ ag tóg tó mû sir, ùn jykre há ag mÿ, ùn jykre kórég ag mÿ ke gé. Hã kÿ tóg fór mû sir, clube ti.

¹¹ Kÿ pã'i mág tóg kãrã mû sir, ag vigve jé, ù tÿ festa to kãmũ ag. Kÿ ù tóg tá jë nĩ, hã ra tóg festa to kur tu tũ nĩ.

¹² Kÿ tóg ti mÿ: “festa to kur tu tũ ã tóg nĩ, vÿ,” he mû. “Ã hã ne tóg kur kórég tu sór mû', inh festa ki',” he tóg, ti mÿ. Hã ra tóg vĩ tũ nĩ sir.

¹³ Kÿ pã'i mág tóg ã camarada ag mÿ: “ha ti mrĩnh, ti pën, ti nĩgé, ha ti fón, re tá,” he mû. Re tán kuty nĩ. Tá ag tóg jagtar tĩ. Æjag jã tÿ ag tóg gyngyn ke tĩ sir, gangan ke ag tóg tĩ sir, vëso jügjũ kÿ.

¹⁴ Ge ti nĩ. Û tÿ hën ri ke jé sóg prër tĩ, hã ra ti pipir nÿtĩ, ùn kuprëg kÿ nÿtĩ ag,” he tóg, Jesus tĩ. Ti tÿ ëg tÿ kanhkã tá festa venh ke tón hã vë.

*Ag tÿ imposto to ti ki jëmë
(Mc 12.13-17; Lc 20.20-26)*

¹⁵ Kÿ Fariseu ag tóg jagnë mré Jesus to jykren mû sir. Ag tÿ ti vĩ to ti se sór vë. Hã kÿ ag tóg: “ti vĩ tÿ hë to ëg hÿn ti senh mû?” he mû.

¹⁶ Tag to jykren kÿ ag tóg sir Jesus mÿ Æjag mré ke ù ag jëgnëg mû, Herodes mré ke ù ag mré hã, ag tÿ òn kÿ ti ki jëmë jé, ag tÿ ti vĩ to ti se jé. Æn ag tÿ Jesus tá junjun kÿ ag tóg ti mÿ: “Senhor,” he mû. “Ã jykre kuryj nĩn ki kanhró ëg tóg nÿtĩ,” he ag tóg. “Hã kÿ ã tóg Topë to ëmĩn ki ëg kanhrãn há han tĩ. Vënh jykre pir hã han ã tóg tĩ. Û tÿ vënh jykre há hã han ve nĩ mû ra ã tóg ti jykre ki kanhró kar nĩ,” he ag tóg mû, òn kÿ, Jesus mÿ.

¹⁷ “Hã kÿ, ëg mÿ ã tÿ nén to jykren mû tómnĩ. Mÿ ha nÿ', ëg tÿ pã'i mág tÿ imperador mÿ jãnkamy ën nĩm ti', imposto kajãm jé'? Æg mÿ hÿn nĩm mû', vó mÿ vó?” he ag tóg mû, òn kÿ ti ki jëmën kÿ.

¹⁸ Hã ra Jesus tóg ag jykre pãno ki kanhró nĩ. Hã kÿ tóg ag mÿ: “Æjag ne tóg òn kÿ inh ki jëmë sór mû'.” he mû. “Jykre régre Æjag nÿtĩ mÿr,” he tóg.

¹⁹ “Inh mÿ jãnkamy jun, imposto kajãm jafã ën ti,” he tóg. Kÿ ag tóg ti mÿ ù jun mû sir, jãnkamy ti.

²⁰ Kÿ tóg ag mÿ: “ũ jiji nÿ kã nĩ, ù kãggrá nÿ kã nĩ?” he mû.

²¹ Kÿ ag tóg ti mÿ: “pã'i mág tÿ imperador kãggrá vë,” he mû. Kÿ tóg ag mÿ: “kÿ pã'i mág mÿ ti tũ nĩm nĩ, hã ra Topë mÿ ti tũ nĩm nĩ gé,” he mû sir.

²² Ag tÿ ti vĩ mÿ kÿ ti jykre tóg ag mÿ e tĩ sir. Kÿ ag tóg ti tovãnh kÿ mû mû sir.

*Ëg tÿ ëg ter ja tá vÿn kenh ke
(Mc 12.28-34; Lc 10.25-28)*

²³ Kÿ kejën Saduceu ag tóg Jesus tá junjun mû gé, kurã ën kã. Ag tÿ òn kÿ ti ki jëmë sór vë gé. Hã ra Saduceu ag tóg: “ëg ter ja tá ëg vÿnvÿn kenh ke tũ nĩ,” he tĩ. “Rĩr mãn ke tũ ëg tóg nĩ,” he ag tóg tĩ. Æn ag vÿ òn kÿ Jesus ki jëmë sór mû gé.

²⁴ “Senhor,” he ag tóg mû gé. “Moisés tÿ ëg mÿ vënh jykre nĩm kÿ tóg ëg mÿ: “ã régre tÿ ã krë tũ ra ter kÿ ã tÿ ti prũ fi tÿ prüg ke vë,” he mû. “Ã tÿ ã régre mÿ ã krë han ke

vê, fi ki,” he ja tóg nĩgtĩ, Moisés ti,” he ag tóg mũ, Saduceu ag, Jesus m̃y.

²⁵ “Kỹ ù tỹ jagnê mré pafa ja tỹ 7 (ke) vỹ nỹtĩgtĩ. Ag kâke tóg prũg mũ, hã ra tóg ã kósín tũ ra ter mũ. Kỹ ti jãvy tóg fi tỹ prũg mũ sir. Hã ra tóg ã kósín tũ ra ter mũ gé. Kỹ ti jãvy ù tóg fi tỹ prũg mũ gé sir.

²⁶ Hã ra tóg ã kósín tũ ra ter mũ gé, ti jãvy ù ke gé, hã ki ag kar vỹ kósín tũ ra kãgter kãn mũ sir.

²⁷ Kỹ vãhã ag kar prũ fi tóg ter mũ gé sir.

²⁸ Kỹ fag kãgter ja tá rĩnrĩr mãn kỹ fi hỹn mén tỹ 7 (ke) nĩnh mũ vê. Ag kar vỹ fi tỹ prũg ja nĩ m̃y. Hã kỹ tóg vẽnhmỹ nỹ, ag tỹ: rĩr mãn jé ãg tóg ke mũ, hen kỹ,” he ag tóg, Saduceu ag, Jesus m̃y.

²⁹ Hã ra Jesus tóg ag m̃y: “kygnê ãjag huri,” he mũ. “Ãjag pi(jé) Topê vĩ tỹ rán kỹ nĩ ki kanhró nỹtĩ”, ãjag pi(jé) Topê jykre ki kanhró nỹtĩ,” he tóg.

³⁰ “Ëg rĩnrĩr mãn kỹ ãg tóg prũg mãn ke tũ nĩ sir, kỹ ãg mén mãn ke tũ nĩ gé. Topê tỹ jẽgnê jafã ri ke ãg nỹtĩ, kanhkã tá,” he tóg.

³¹ “Kỹ Topê vĩ rá ù to jykren nĩ, ti tỹ ãg ter ja tá vỹn ke tó ti. Topê hã ne tỹ vémén ja nĩ m̃y, hã kỹ tóg tag tó ja nĩ, ha mẽ.

³² “Abraão vỹ iso: Topê, he tĩ, Isaque ke gé, Jacó ke gé,” he ja tóg nĩ, Topê ti. Kãgter ag huri, Abraão, Isaque, Jacó. Hã ra Topê tóg: “tỹ inh ag Topê nĩ,” he ja nĩgtĩ, ag ter kar kỹ. Hã kỹ ag tóg rĩnrĩr nỹtĩ, Topê tỹ ùn rĩnrĩr nỹtĩ ag hã kri ke nĩnh kỹ,” he tóg, Jesus ti.

³³ Kỹ ag tóg ti vĩ mẽg mũ sir, kỹ ti jykre tóg ag m̃y e pẽ tĩ, ti vĩ ti.

*Topê tỹ ãg jyvẽn kãfór
(Mc 12.28-34; Lc 10.25-28)*

³⁴ Kỹ Fariseu ag tóg mẽg mũ, Jesus tỹ Saduceu ag m̃y vĩ há han ja ti. Ti tỹ ag m̃y vĩ há han kỹ ag tỹ ti m̃y hẽ ri ken kỹ kafãn ke tóg tũ tĩ sir. Hã mẽg ag tóg mũ, Fariseu ag. Kỹ ag tóg Jesus to vẽnhmãn mũ sir.

³⁵ Kỹ ag kã ù tóg ti mré vĩ mũ. Topê vĩ to professor vê, ù tỹ Jesus mré vĩ mũ ti. Kỹ tóg Jesus m̃y:

³⁶ “Senhor,” he mũ. “Topê tỹ ãg jyvẽn tỹ hẽ nỹ hỹn ti tỹ ãg jyvẽn kar kãfór nỹnh mũ?” he tóg mũ sir.

³⁷ Kỹ Jesus tóg ti m̃y: “Topê to, ãg jóg mág to há távĩ nỹtĩmnĩ, ti ki ge há han nĩ, ti to jykre pir nỹtĩmnĩ,” he mũ.

³⁸ “Topê tỹ ãg jyvẽn kãfór kar hã vê.

³⁹ Kỹ ti tỹ ãg jyvẽn ù tóg hã ri ke nĩ gé, hã vỹ: ãjag régre ki rĩr nỹtĩmnĩ, ãjag tỹ vẽn ki rĩr há han ri ke, he mũ,” he tóg.

⁴⁰ “Vẽn jyvẽn tag vỹ vẽn jyvẽn kar kãfór nỹtĩ. Régre ti nỹtĩ, Topê tỹ ãg jyvẽn kãfór nỹtĩ ti. Ëg tỹ tag ki króm kỹ ãg tóg Topê jykre ki króm kãn mũ. Ti tỹ ãg jyvẽn mũ han kãn ãg tóg mũ, Topê vĩ tó tĩ tỹ ãg jyvẽn mũ mré hã, ãg tỹ tag ki króm kỹ,” he tóg, Jesus ti.

*Cristo tỹ tỹ Davi kósín nĩ
(Mc 12.35-37; Lc 20.41-44)*

⁴¹ Hã ra Fariseu ag vỹ vẽn mãn kỹ nỹtĩ, kỹ Jesus tóg ag ki jẽmẽ sór mũ gé sir.

⁴² Kỹ tóg ag m̃y: “Cristo to ãjag hẽ ri ke tĩ?” he mũ. “Ù kósín nẽ hỹn, Cristo ti?” he tóg, Jesus ti. Kỹ ag tóg ti m̃y: “Davi kósín vê,” he mũ.

⁴³ Kỹ tóg ag m̃y: “hã ra Davi tóg ti to: inh Senhor, he ja nĩ,” he mũ. “Topê kuprĩg tỹ ti krĩn kỹ tóg tag tó ja nĩ, ha mẽ:

⁴⁴ “ãg jóg tỹ Topê vỹ inh Senhor m̃y: “nĩ ra ver, inh pẽgja tá,” he mũ, “sỹ ã kato vãsãnsãn mũ ag tỹ ã krẽm vin ke vê, kỹ ag sigse vê sir. Tag jãvãnh nĩ ver,” he tóg mũ, Topê ti, inh Senhor m̃y,” he ja tóg nĩgtĩ, Davi ti,” he tóg mũ, Jesus ti.

⁴⁵ “Hã kỹ Davi tóg Cristo to: “inh Senhor,” he ja nĩ. Ti tỹ tỹ ti kósín nĩ ra ti kósín m̃y tỹ ti kri ke nĩnh mũ vê?” he tóg, Jesus ti. Ti tỹ Fariseu ag ki jẽmẽg mũn hã vê.

⁴⁶ Hã ra ag tỹ ti m̃y ne tónh ke tóg tũ tĩ, ag tỹ ti vĩ kafãn sór mũ ra. Vãhã ag tóg ti ki jẽmẽ sór mãn tũ nĩ. Ti kamẽg ag tóg mũ, hã kỹ ag tóg ti ki jẽmẽ sór mãn tũ nĩ.

23

*Ón kỹ Topê vĩ to professor ag jykre
(Mc 12.38-39; Lc 11.43-46; 20.45-46)*

¹ Kỹ Jesus tóg vẽn kar kanhrãn mũ sir, ti mré mũ tĩ ag mré hã. Kỹ tóg ag m̃y:

² “Moisés vỹ ãg jóg ag kanhrãn ja nĩgtĩ,” he mũ. “Ti nón Topê vĩ to professor ag tóg ãg kanhrãn sór mũ, Fariseu ag ke gé,” he tóg.

³ “Ag tỹ ãjag m̃y nén tó mũ ãn ki króm nĩ. Ag vĩ kri fimnĩ. Ag tỹ nén han mũ ri ke han

tũg nĩ jãvo, ag jykre kórég ěn han tũg nĩ. Ājag kanhrãn há han ag tóg tĩ, hã ra ag tóg ki króm sór tũ nĩgtĩ, ājag vĩ há ěn ki.

⁴ Ājag mĩ ag tóg vĕnh jykre kufy vin tĩ, hã ra ag hã tóg han sór tũ nĩgtĩ, vĕnh jykre kufy ěn tĩ.

⁵ Ag tỹ nĕn ũ há han kỹ ag tóg tỹ ũn mág nỹtĩ sór mũ sir, vĕnh kar tỹ ag vigve jé. Ag tỹ Topĕ mré vĩ jé ag tóg ti vĩ rá tỹ ājag nĩgĕ tógfĩg tĩ, ājag kakã ke gé. Vĕsógfĩn ja tãpĕr tỹ ag tóg vĕsógfĩg tĩ. Topĕ jykre han jé ag tóg kur tów mág tu tĩ gé.

⁶ Festa ki ag tóg jĕn vĕn sór tĩ. Vĕnh kanhrãn jafã krĕm ag tóg vĕnh kãpov kỹ nỹtĩ.

⁷ Cidade kuju ki vĕnh kar tóg ag mỹ: “ã mỹ há?” he tĩ, kỹ tóg ag mỹ sér tĩ. Kỹ ag tóg ag to: “Senhor,” he tĩ gé, kỹ tóg ag mỹ sér tĩ.

⁸ Ag jãvo jagnĕ mỹ: “Senhor,” he sór tũg nĩ, kỹ ag tỹ ājag mỹ: “Senhor,” he mũ ra ag mỹ: “inh pi(jé) tỹ ũn mág nĩ,” hemnĩ. Ũn pir vỹ tỹ ājag kri ke nĩ, hã vỹ: Topĕ, he mũ, jó ājag tóg tỹ jagnĕ mré ke nỹtĩ.

⁹ Kỹ ũ mỹ: “ĕg jóg,” he tũg nĩ gé, ĕprã. Ũn pir vỹ tỹ ājag jóg nĩ, hã vỹ: Topĕ, he mũ, kanhkã tá nĩ ěn tĩ.

¹⁰ Kỹ ũ tỹ ājag mỹ: “ĕg kri tỹ ũn mág nĩmnĩ,” he kỹ ag mỹ: “vó, kenh ke tũ inh nĩ,” hemnĩ gé. Ũn pir vỹ ājag kri tỹ ũn mág nĩ, hã vỹ: Cristo, he mũ.

¹¹ Ājag kãmĩ ũn mág ag jé ājag ki rĩr há han, ājag camarada tỹ ājag ki rĩr há han tĩ ěn ri ke.

¹² Ājag tỹ tag ki vĕsỹ tỹ ũn mág han sór nỹtĩn kỹ ājag tóg tá térenh ke mũ, ha vemnĩ. Ājag tỹ hã ra: “tỹ inh ũn sĩ nĩ,” hen kỹ ājag tóg tá jãprynh ke mũ, tỹ ũn mág ājag nỹtĩnh mũ, ha vemnĩ,” he tóg, Jesus ti.

*Topĕ vĩ to professor ag jagtar ke
(Mc 12.40; Lc 11.39-42, 52; 20.47)*

¹³ “Ón kỹ Topĕ vĩ to professor,” he tóg. “Fariseu,” he tóg. “Jykre régre ājag nỹtĩ,” he tóg. “Topĕ vỹ ājag ve kónãn,” he tóg. “Ũ ag tóg ũ tỹ kanhkã tá nĩ ěn tỹ tỹ ĕg pã'i nĩ ve sór nỹtĩ, hã ra ājag tóg ag mỹ kanhkã ti nenh tĩ. Ag jãvo ājag tóg ve sór tũ nĩgtĩ. Ājag tỹ kanhkã ve sór tũ nĩn kỹ ājag tóg ũ ag mỹ nenh tĩ gé, ag tỹ vég tũ nĩ jé, ājag ri ke,” he tóg, Jesus ti.

¹⁴ “Ón kỹ Topĕ vĩ to professor,” he tóg. “Fariseu,” he tóg. “Jykre régre ājag nỹtĩ,” he tóg. “Topĕ vỹ ājag ve kónãn,” he tóg. “Ājag ne tóg ũn mén ter ja fag tũ mãn kãn tĩ'. Kar kỹ ājag tóg ón kỹ Topĕ mré vĩ téj han mũgtĩ, ĕg tỹ ājag to: “há ag nỹtĩ,” he jé. Hã kỹ Topĕ vỹ ājag vóg kónãn kãfór han ke mũ,” he tóg, Jesus ti.

¹⁵ “Ón kỹ Topĕ vĩ to professor,” he tóg. “Fariseu,” he tóg. “Jykre régre ājag nỹtĩ,” he tóg. “Topĕ vỹ ājag ve kónãn,” he tóg. “Ājag ne tóg kuvar há ra mũ tĩ', ga mũ, goj mũ ke gé, ājag tỹ ũ tỹ Israel ag jykre han sór mũ ũ jãvãnh jé. Hã jé ājag tóg mũ mág han tĩ. Kỹ ājag tỹ ũ ven kỹ ājag tóg ti tỹ Japo krĕ han mũ sir, ti tỹ ón kỹ Topĕ vĩ mĕ jé, ājag ri kĕn, ti tỹ nũgme ki kutĕ jé, inferno ěn ki. Kỹ ti jykre pãno vỹ ājag jykre pãno kãfór nỹ sir,” he tóg, Jesus ti.

¹⁶ “Topĕ vỹ ājag ve kónãn mỹr,” he tóg. “Kyvó ājag nỹtĩ, hã ra ājag tóg ũ tỹ ki kagtũg ag tatĩn mũ sór mũ. Hã kỹ ājag tóg kygnĕg tĩ. Kỹ ājag tóg ag kanhrãn kónãn tĩ. “ĕg tỹ ón kỹ: tag han jé sóg ke mũ, he sór kỹ ĕg tóg: “Topĕ jo ĩn krĕm nĩ ěn vỹ ki kanhró nĩ,” henh ke mũ,” he ājag tóg tĩ. “ĕg tỹ hã ra: Topĕ jo ĩn krĕm ouro tân ěn vỹ ki kanhró nĩ, hen kỹ ĕg tóg ón ke tũ nĩ,” he ājag tóg tĩ gé.

¹⁷ Vĕnhmỹ ti nĩ, ājag vĩ tag. Krĩ tũ ājag tóg nỹtĩ, kyvó ājag tóg nỹtĩ. Ouro mỹ Topĕ jo ĩn kãfór nĩ? Vó!. Ouro vỹ tỹ Topĕ tũ nĩ, ti tỹ Topĕ jo ĩn krĕm nĩn kỹ. Hã kỹ tóg tỹ Topĕ tũ kar nĩ sir, ouro ti, ti jo ĩn ti ke gé. Ón kỹ: “Topĕ hã vỹ ki kanhró nĩ,” he tũg nĩ,” he tóg, Jesus ti.

¹⁸ “Ājag vĩ vĕnhmỹ ũ vỹ nĩ gé. “Ón kỹ ĕg tóg: ĕg tỹ mesa kri ũn mỹ nĕn ũ pũn mũ ěn vỹ ki kanhró nĩ, henh ke mũ,” he ājag tóg tĩ gé. “ĕg tỹ hã ra: ĕg tỹ ũn mỹ ĕg mĕg pũn tĩ ěn vỹ ki kanhró nĩ, hen kỹ ĕg ón ke tũ nĩ,” he ājag tóg tĩ gé.

¹⁹ Vĕnhmỹ ti nĩ gé, ājag vĩ tag ti. Kyvó ājag nỹtĩ mỹr. ĕg tỹ Topĕ mỹ ĕg mĕg pũn mũ mỹ mesa kãfór nĩ? Vó!. Topĕ jo ĩn krĕm mesa kri ĕg tóg ĕg mĕg ti pũn tĩ, hã kỹ tóg Topĕ mỹ há tĩ, ĕg mĕg ti, ĕg tỹ ti jo ĩn tá ti mỹ mesa kri ti pũn tugrĩn.

²⁰ Ājag tỹ Topĕ jo ĩn krĕm mesa tón kỹ, kỹ ājag tóg ĕg tỹ ĕg mĕg tỹ mesa ěn kri pũn mũ

ën tó tĩ gé.

²¹ Ājag tỹ Topě jo ĩn tón kỹ, kỹ ājag tóg Topě ti tó tĩ gé.

²² Ājag tỹ kanhkā tón kỹ, kỹ ājag tóg Topě nĩgja tó tĩ gé, kỹ ājag tóg Topě ti tó tĩ gé sir. Nén ũ pir vē, ti kar ti. Hã kỹ ón kỹ: Topě hã vỹ ki kanhró nĩ,” he tũg nĩ,” he tóg, Jesus ti.

²³ “Ón kỹ Topě vĩ to professor’,” he tóg. “Fariseu’,” he tóg. “Krĩ régre ājag nỹtĩ, kỹ Topě vỹ ājag ve kónãn,” he tóg. “Ón kỹ ājag tóg Topě mỹ ājag jakré ki dízimo vin tĩ. Ājag jakré tỹ hortelã tỹ 10 (ke) nỹtĩn kỹ ājag tóg Topě mỹ ũn pir nĩm tĩ, ājag jakré tỹ erva doce tỹ ke gé, ājag jakré tỹ cominho tỹ ke gé. Há ti nĩnh mũ vē. Hã ra ājag tóg ti tỹ ěg jyvěn mũ ěn han tũ nĩgtĩ. Věnh jykre kuryj han tũ ājag tóg nĩgtĩ. Ũn jagãgtar ag jagãgtãn tũ ājag tóg nĩgtĩ. Topě vỹ kri fig tũ ājag tóg nĩgtĩ. Ājag tỹ ti vỹ ki króm tag tóg inh mỹ há nĩnh mũ vē, ha mẽ. Ājag tỹ ti tỹ ěg jyvěn ki króm mré hã ājag jakré ki dízimo vin (hã) ra tóg inh mỹ há nĩnh mũ vē, ha mẽ. Hã ra ājag tóg ki króm sór tũ nĩgtĩ.

²⁴ Kyvó ājag nỹtĩ, hã ra ājag tóg ag tatĩn mũ sór nỹtĩ. Topě vỹ ũ ki króm sór ājag tóg tĩ, ti tỹ Topě mỹ tỹ nén ũ sĩ (hã) ra, kỹ ājag tóg ti vỹ ũ mrynhmranh tĩ, ti tỹ Topě mỹ kórég pě (hã) ra. Kỹ tóg goj ki ka ri ke nĩ. Ājag tỹ ka gón tũ nĩ jé ājag tóg kur ki kujěg tĩ, kỹ tóg pan tĩ, goj ti. Hã ra ājag tóg cavalo tỹ goj ki ter mũ ra (ājag tóg) goj kórég ěn kron tĩ,” he tóg, Jesus ti.

²⁵ “Ón kỹ Topě vỹ to professor’,” he tóg. “Fariseu’,” he tóg. “Krĩ régre ājag nỹtĩ, kỹ Topě vỹ ājag ve kónãn,” he tóg. “Copo venja kupég ājag tóg tĩ, pénky venja, hã ra ti kátá tóg kavėj nĩ. Kỹ ājag vỹ ge nỹgtĩ gé. Jykre há nĩ ve ājag tóg nỹgtĩ gé, hã ra ājag tóg věnh jykre pãno han tĩ, hã vỹ: jãnkamy to ag lograr he tĩ, he mũ, ājag prũ tũ fag mré nỹ tĩ, he mũ gé.

²⁶ Kyvó ājag nỹtĩ, ājag tỹ tỹ Fariseu nỹtĩ ra. Ājag jykre pãno tovãnh nĩ, ājag jãnhkri nỹtĩ jé. Kỹ vãhã věnh kar vỹ ājag jykre há vég mũ,” he tóg, Jesus ti.

²⁷ “Ón kỹ Topě vỹ to professor’,” he tóg. “Fariseu’,” he tóg. “Krĩ régre ājag nỹtĩ, kỹ Topě vỹ ājag ve kónãn,” he tóg. “Věnh kej sĩnvĩ ri ke ājag nỹtĩ. Sĩnvĩ nĩ ve ti nĩ, věnh

kej ti, ěg tỹ pó tỹ kri tam kỹ, kar tinta tỹ pó to tĩn kỹ. Tĩ sĩnvĩ nĩ ve nĩ ra ti kátá tóg kórég nĩ. Věser vỹ krēm nỹ nĩ, věser vag mũ ti, ti kuka.

²⁸ Tag ri ke ājag nỹtĩ. Há nĩ ve ājag nỹtĩ. Jykre kuryj nĩ ve ājag nỹtĩ, hã ra ājag kátá tóg kórég nĩ, ājag jykre régre nỹtĩn kỹ, ājag tỹ Topě vỹ ki króm sór tũ nỹtĩn kỹ mỹr, ha mẽ,” he tóg, Jesus ti.

Ũn jykre régre ag jagãgtar ke (Lc 11.47-51)

²⁹ “Ón kỹ Topě vỹ to professor’,” he tóg. “Fariseu’,” he tóg. “Krĩ régre ājag nỹtĩ, kỹ Topě vỹ ājag ve kónãn,” he tóg. “Ājag jóg'jóg ag vỹ Topě vỹ tó tĩ ag kãgtén ja nĩgtĩ. Jãvo ājag tóg ag kej sĩnvĩ han tĩ, ũn jykre kuryj han ja ag kej ti.

³⁰ Kỹ ājag tóg ag to: “ěg tỹ ěg jóg'jóg ag mré ga kri mũ hã ra ěg tóg ag kãgtén ke tũ nĩ vē,” he ti. “Ag mré ěg ag vóg ke tũ nĩ vē,” he ājag tóg tĩ, ón kỹ.

³¹ Hã ki ājag tóg ājag jóg'jóg ag tó tĩ. “Ěg jóg'jóg ag vỹ ag kãgtén, Topě vỹ tó tĩ ag,” he ājag tóg tĩ. “Ũ tỹ ag kãgtén mũ ag krě'krě vỹ tỹ ěg nỹtĩ,” he ājag tóg tĩ.

³² Kuri ājag jóg'jóg ag ri ke han nĩ, kuri ājag jóg'jóg ag tỹ ũn kãgtén ja tũ ěn ag kãgtén nĩ, ājag tỹ tỹ ājag jóg'jóg ag krě'krě nỹtĩn kỹ,” he tóg, Jesus ti.

³³ “Pỹn ri ke ājag nỹtĩ, mĩg ri ke ājag nỹtĩ. Ājag pi(jé) nũgme ki vár ke tũ nĩnh ke mũ', inferno ki',” he tóg.

³⁴ “Hã kỹ sóg ājag mỹ Topě vỹ tó tĩ ag jěgněnh ke mũ, věnh vỹ há tó mũ ag, Topě vỹ rán tĩ ag. Ag jěgně jé sóg ke mũ, ag tỹ ājag jyvěn jé. Kỹ ājag tóg ag kãgtén ke mũ gé, ha vemnĩ. Ka to ājag tóg ag sanh ke mũ. Ag mrãnmrãn jé ājag tóg ke mũ, ājag tỹ věnh kanhrãn jafã krēm. Cidade kar ki ājag tóg ag nón mũnh mũ, ājag tỹ ag vóg kónãn jé.

³⁵ Hã kỹ tóg ājag tỹ ũn jykre kuryj kar kãgtén mũ ri ke nĩ. Ũn tỹ hěn ri ke ag kãgtén ag tóg huri, ěprã ke ag, hã ra tóg ājag tỹ ag kãgtén kãn ri ke nĩ sir, Abel, Abel nón ke ag mré hã, Zacarias ěn mré hã, Baraquias kósín ěn. Ěn tỹ ājag tóg Topě jo ĩn jo ti tén ja nĩ, Topě mỹ nén ũ pũn jafã ěn tá ājag tóg ti tén ja nĩ, Zacarias ěn.

³⁶ Ājag mǝ sóg tó mũ, ha mẽ. Ājag hã to ti jũnh ke mũ, Topẽ ti, Ājag jóg'jóg ag tǝ ag kãgtén tigrĩn, Ājag tǝ ag kãgtén tigrĩn ke gé," he tóg, Jesus ti.

Jesus tǝ Jerusalém tá ke ag to há nĩ
(Lc 13.34-35)

³⁷ Kǝ tóg Jerusalém ki ke ag to vēmén mũ. Fe kaj han tóg, ag to, kǝ tóg: "Jerusalém tá ke ag mǝ sóg tag tó sór mũ, ha mẽ," he mũ. "Topẽ vĩ tó tĩ ag kãgtén ag tóg tĩ. Topẽ tǝ ag mǝ ùn jěgněg tĩ ag pin ag tóg tĩ, pó tǝ, ag tǝ ag kãgtén jé. Isǝ ag vėnh mǎn há tóg tĩ vė, isǝ ag ki rĩr jé, Jerusalém tá ke ag, hã kǝ sóg ag jé prěr tǝ hėn ri ke han mũ. Garĩnh fi jykre ri ke han sór isóg mũ vė, ag mǝ. Garĩnh fi vǝ ã krė kri jě nĩ, fi tǝ ag vėsǝrėnh tũ nĩ jé ke vė. Ēn ri ke han sór sóg mũ vė, hã ra ag tóg ke jãvãnh nǝtĩ.

³⁸ Hã kǝ ag tóg ag jamã pũn kãn ke mũ, kǝ vãpũr vė sir. Û vǝ kãnhmar tá nĩg mǎn ke tũ nĩ ha, ag tǝ cidade kókén ja tá.

³⁹ Hã kǝ sóg ag mǝ ke mũ. Inh ve mǎn ke tũ ag nĩ ha (mǝr). Kejėn ag tóg iso: "Topẽ tǝ ti jėnė ja vė," hėnh ke mũ. "Topẽ vǝ ti ve há han, ti tǝ ti jiji tó kãtĩg kǝ," he jé ag tóg ke mũ iso, kejėn. Ēn kã ag tóg inh ve mǎn ke mũ," he tóg, Jesus ti.

24

Topẽ jo ãn kókén kǝ nĩnh ke
(Mc 13.1-2; Lc 21.5-6)

¹ Kǝ Jesus tóg Topẽ jo ãn tá kãkutė kǝ tĩ mũ sir. Kǝ ti mré mũ tĩ ag tóg ti tá junjun mũ, kǝ ag tóg ti mǝ Topẽ jo ãn ěn ag venven mũ sir.

² Kǝ Jesus tóg ag mǝ: "Ājag mǝ pó tǝ ãn mág tag ag vigvėg mũ?" he mũ. "Kejėn pó tóg jagnė kri nǝtĩ mǎn ke tũ nĩ ha. Ag tǝ gũm ke kãn ke vė. Ki hã sóg tó mũ," he tóg, Jesus ti.

Ēg jagtar ke
(Mc 13.3-13; Lc 21.7-19)

³ Kar kǝ tóg krĩ tǝ Oliveiras ra tĩ mũ sir. Ti tǝ tá nĩ kǝ ti mré mũ tĩ ag tóg vyr mǝ ti ki jēmėnh kãmũ mũ. Kǝ ag tóg ti mǝ: "Ēg mǝ ti kurã ti tó," he mũ. "Ēg tǝ ne ve kǝ ěg ti kurã ki kanhró nǝtĩnh mũ, ã kãtĩg mǎn ke kurã ěn ti, nén kar tũg ke kurã ěn ti?" he ag tóg ti mǝ.

⁴ Kǝ tóg ag mǝ: "ker ù Ājag lograr hé hė," he mũ.

⁵ "Cristo vǝ tǝ inh nĩ," he jé ag tóg ke mũ, inh jyjy tó kǝ. Û tǝ hėn ri ke ag tóg tag tónh ke mũ, kǝ ù tǝ hėn ri ke ag tóg ag vĩ kri nĩm ke mũ.

⁶ Vėnh gėnh to vėme mẽ jé Ājag tóg ke mũ, tag ki vėnh gėnh to, kuvar há tá vėnh gėnh to ke gé. To jũrũn ke tũg nĩ, hã ra. Vėnh gėnh enh ke vė. Hã ra kurã tǝ ěgno to hã ke vė ver.

⁷ Nação ag tǝ jagnė kato tēgtėnh ke vė, pã'i krēm ke ag tǝ pã'i ù krēm ke ag to jũnh ke vė. Kǝ ga tǝ ragra ke tǝ hėn ri ke han ke vė, ěmã tǝ hėn ri ke ki. Vějėn tǝ tũ' hėnh ke vė gé.

⁸ Hã ra Ājag jagãgtar ke vėnh ven vén vė ver," he tóg, Jesus ti.

⁹ "Kar kǝ Ājag jagtar ke mũ, Ājag tǝ inh ki ge kǝ nǝtĩ tigrĩn. Ājag vóg kónãn jé ag tóg ke mũ, Ājag kãgtén jé ag tóg ke mũ gé. Nação kar vǝ Ājag to vĩ kónãn ke mũ gé, Ājag tǝ inh jiji tó tigrĩn.

¹⁰ Kǝ ù tǝ hėn ri ke ag vǝ isogvãnh ke mũ sir, ěn kã. Ājag mré ke fag tó jé ag tóg ke mũ, inh kato vãsãnsãn mũ ag mǝ, kǝ ag tóg jagnė to vĩ kónãn tãvĩ han ke mũ gé.

¹¹ Ón kǝ inh vĩ tó tĩ ag vǝ junjun ke mũ gé, kǝ ag tóg ùn e krĩnkrĩn ke mũ sir, ag tǝ isogvãnh jé.

¹² Kǝ vėnh kar vǝ vėnh jykre pãno to há nǝtĩnh mũ, hã kǝ ù tǝ ón kǝ iso há sĩ nǝtĩ ěn ag tóg isogvãnh ke mũ gé, ùn e ag.

¹³ Hã ra ù tǝ isovãnh tũ pė ěn ag tóg krenkren ke mũ.

¹⁴ Kǝ nação kar vǝ vėnh vĩ sér mėnh mũ, ga kar mĩ hã, kǝ ag tóg Topẽ tǝ tǝ ěg pã'i nĩnh ke ěn mėnh mũ ha. Ag tǝ mẽ kãn kǝ kurã tǝ ěgno vė sir," he tóg, Jesus ti.

Ēg jagãgtar mág pė ti
(Mc 13.14-23; Lc 21.20-24)

¹⁵ "Kejėn Ājag tóg vãhã sir Ājag tǝ nén (ũ) kamėg tĩ ěn venh ke mũ, ěg kavėnh mũ ěn ti," he tóg. "Topẽ vĩ tó tĩ tǝ Daniel vǝ ti tó ja nĩgtĩ. Topẽ jo ãn tá tóg jėnh mũ, ěg kavėnh mũ ěn ti," he tóg, Jesus ti. (Û tǝ vėnh rá tag to ke mũ ěn jé ki kanhró nĩ.)

¹⁶ Ājag tǝ ti ve kǝ ga tǝ Judėia ki ke kar ag jé vėnh pigjunh mũjėg, pãnónh ra, fag mré hã.

17 Û tÿ re tá nĩ ên jé kãra rã tũg nĩ, ti ãn ki, ti tũ mãn jé.

18 Kÿ ù tÿ ã japÿ tá jẽ ên jé vÿn ke tũg nĩ gé, ti kur mãn jé.

19 Ûn kufy fag jagtar mág ke vë, kurã ên kã, ù tÿ gÿr pygfãm mũ fag ke gé.

20 Topë mré vïmnĩ, ti tÿ kusa kã vënh ven tũ nĩ jé, ti tÿ vënhkãn ke kurã kã vënh ven tũ nĩ jé.

21 Jagtar mág tÿ ge han ja tũ êg tóg nÿtĩ, Topë tÿ mundo han jãn ki. Kÿ êg ge han mãn ke tũ nĩ gé, kar kÿ.

22 Êg tÿ kurã ki jagtar ke mũ ên vÿ e nÿtĩnh mũ vë, hã ra tóg térem kÿ nÿtĩ nĩ, Topë tÿ ùn kuprëg ja ên ag tigrĩn. Ti tÿ térem tũ nĩ (mũ) ra ù vÿ kren ke tũ nĩ vë, ag jagtar mág ên to,” he tóg, Jesus ti.

23 “Ên kã ù tÿ ãjag mÿ: Cristo vÿ tag kã jẽ nĩ, he mũ ra kri nĩm tũg nĩ, ag tÿ: tátã ti jẽ nĩ, he mũ ra.

24 Ón kÿ Cristo ag vÿ vënh venven ke mũ, ón kÿ Topë vĩ tó tĩ ag ke gé. Êg tÿ nén han vãnh hyn han jé ag tóg ke mũ, milagre tÿ hën ri ke ti, ón kÿ Cristo ên ag. Ag tÿ vënh kar krĩn kónãn sór vë, ag tÿ kygnë jé, Topë tÿ ùn kuprëg ja ên ag mré hã, hën ri ke mũn.

25 ãjag mÿ sóg tó kãn mũ, ti kutënh ke to hã,” he tóg, Jesus ti.

26 “Kejën ag tóg ãjag mÿ: êmã kórég tá tóg jẽ, Cristo ti, henh ke mũ. Ra ti venh mũ tũg. Ag tÿ ãjag mÿ: ãn kãtã tóg nĩ nĩ, he mũ ra kri fi tũg nĩ.

27 Ình kãtĩg mãn ke vÿ ta tÿ kóm kóm ke ri ke nĩ. Ti tÿ kóm kóm ke kÿ êg tóg nén kar vëg tĩ, rã jur ja tá, rã pur ja tá ke gé. Ình kãtĩg mãn ke vÿ ri ke nĩnh mũ. Tÿ sóg êprã ke fi kósĩn nĩ,” he tóg, Jesus ti.

28 “Nén ù ter nÿgja ri ke ti nĩ gé. Hã tá tóg vënh mãn tĩ, jãtã ti. Tag ri ke ti nĩnh mũ, ãnh kãtĩg mãn ke ti,” he tóg, Jesus ti.

Topë kósĩn kãtĩg mãn ke

(Mc 13.24-27; Lc 21.25-28)

29 “Jagtar ên kar kÿ rã vÿ nhyr ke mũ, kÿ kysã vÿ jëngrë he mãn ke tũ nĩ gé. Krĩg vÿ vár ke mũ gé, kanhkã krëm. Êg tÿ kanhkã tá nén vëg tũ kar ên vÿ ragra ke kãn mũ gé.

30 Kÿ vãhã êprã ke fi kósĩn vÿ vënh ven ke mũ, kanhkã tá. Kÿ ga kri mũ kar ag vÿ kygfÿ kãn ke mũ sir, povo kar ti, ag tÿ ãnh

kãtĩg ven kÿ. Kanhkã góg kãmĩ sóg térenh ke mũ. Kÿ sóg tar pë nĩnh mũ, ha vemnĩ, kÿ ãnh ve vÿ kókov pë nĩnh mũ gé.

31 Kÿ sóg isÿ jëgnë jafã ag jëgnënh mũ, ag tÿ ténéntén kynkyn jé, kÿ ag tóg isÿ ùn kuprëg mũ ag jé prënrënr kãn ke mũ sir, ga kar mĩ hã, kanhkã fyr mĩ hã,” he tóg, Jesus ti.

Ka tÿ figueira to comparaçã *(Mc 13.28-31; Lc 21.29-33)*

32 “Ka tÿ figueira to ki kanhrãn nĩ, to comparaçã han kÿ. Ka tÿ figueira pë tánh kÿ, ti féj tãg han kÿ tóg kakó tĩ sir, êkré tygtãnh kurã ti.

33 Ri ke ti nĩ, ãjag tÿ ãnh kãtĩg mãn ke kurã ki kanhró nÿtĩnh ke mũ ti. ãjag tÿ isÿ ãjag mÿ nén tó mũ tag ve kÿ tóg sir kakó tĩnh ha, kakó tãvĩ tóg tĩnh ha, ãnh kãtĩg mãn ke ti, ên kã.

34 Sÿ ke há vë, hã kÿ sóg tag tó mũ, ha mẽ: ùri ùn rĩnrĩr mũ ag tÿ nén kar ên venh ke vë, ag kãgter ke to hã.

35 Kanhkã vÿ tũ' henh ke mũ, ga ti ke gé. Jãvo ãnh vÿ tũ' henh ke tũ nĩ,” he tóg, Jesus ti.

Jesus kãtĩg mãn ke kurã

(Mc 13.32-37; Lc 17.26-30, 34-36)

36 “Hã ra ù pi(jé) isÿ kurã ki kãtĩg mãn ke mũ ki kanhró nĩ', hora ki ke gé. Topë tÿ jëgnë jafã ag pi(jé) ki kanhró nÿtĩ'. Ình pi(jé) ki kanhró nĩ gé. Êg jóg mág hã vÿ ã pin kÿ ki kanhró nĩ, kurã kã nén kutënh ke mũ ên ki.

37 Ình kãtĩg mãn ke kurã vÿ Noé tÿ ga mĩ tĩg ja ên ri ke nĩnh mũ.

38 Ta kutë to hã ag tóg jën ja nĩgtĩ, kron ja nĩgtĩ, jagnë tÿ prũg ja nĩgtĩ, jagnë tÿ mén ja nĩgtĩ, Noé mré ke ag. Ên kã kejën Noé tóg barco tÿ ãn kãra rã mũ.

39 Hã ra tóg ag mÿ tÿ nén ù tũ tĩ, ti tÿ barco kãra rã mũ ti. Kejën ta tóg kutë mũ, kÿ goj tóg var mũ sir. Kÿ ag tóg kãgter kãn mũ sir vãhã. Ge ti nĩnh mũ, êprã ke fi kósĩn kãtĩg mãn kÿ, ãnh kãtĩg mãn kÿ mÿr.

40 Ên kã ùn régre ag vÿ ãjag japy ki rãnrãj ke mũ. Ình kãtĩg mãn kÿ sóg ùn pir jé prër ke mũ, jãvo ti régre vÿ tá jënh mũ sir.

41 Ûn régre fag vÿ êgtynyn nÿtĩnh mũ, jagnë mré, kurã ên kã. Kÿ sóg ùn pir fi jé

prēr ke mũ, jãvo fi régre fi vỹ tá jẽnh mũ gé sir.

⁴² Vẽnh ki ẽmẽmnĩ, nũr tũ ri ke han nĩ. Inh kãtĩg ke hora ki kagtĩg ãjag tóg nỹtĩ. ãjag Senhor vỹ tỹ inh nĩ,” he tóg.

⁴³ “Kỹ tag to jykrén nĩ, ha mẽ. Ëg pi(jé) ù tỹ ẽg tỹ nén péju sór mũ kãtĩg ke ki kanhró nỹtĩ!. Ëg tỹ ti kãtĩg ke tỹ hora ki kanhró nỹtĩ ra ẽg tóg to ẽg tỹ nén ki rĩr mũ vễ, kỹ ù pi(jé) ẽg ìn kãra rãnh ke mũ vễ!. Hã ra ẽg tóg ki kagtĩg nỹtĩ.

⁴⁴ Ge ti nĩ, inh kãtĩg mãn ke ti. Ha vẽnħ kãn, ha vẽnħ ki ẽmẽ. Ëprã ke fi kósin vỹ kãtĩg ke mũ, ãjag tỹ inh kãtĩg ke to jykrén tũ ra,” he tóg, Jesus ti.

Ûn camarada ag to comparaçãu (Lc 12.41-48)

⁴⁵ Kỹ tóg ag mỹ ã kãtĩg mãn ke tó mãn mũ. “Kejẽn patrãu ù tóg hẽ ra tĩg sór mũ,” he tóg. “Kỹ tóg ã camarada ag kã ù tỹ pã'i han mũ, ti tỹ ti jo ã mré camarada ag ki rĩr jé. Û tỹ ã rãnrãj ki rĩr há han tĩ ẽn kuprẽg tóg mũ, ti tỹ ag mỹ vễjẽn ven jé, vễjẽn ke horan ki.

⁴⁶ Ti tỹ ag ki rĩr há han kỹ ti patrãu vỹ ti mỹ vĩ há han ke mũ, ti kãtĩg mãn ken kã.

⁴⁷ Ti tỹ pã'i han jé tóg ke mũ, ti tỹ ti tũ ki rĩr kãn jé sir. Ki hã sóg tó mũ, ha mẽ.

⁴⁸ Kejẽn ti camarada ù tóg hã ra jykre pãno nĩ. Kỹ tóg tag to jykrén mũ. “Ëg patrãu vỹ kãtĩg vãnħ han mũ,” he tóg mũ sir, ùn jykre pãno ẽn.

⁴⁹ Kỹ tóg ã mré camarada ag vóg kónãn mũ sir, ag mrãnmrãn kỹ. Kỹ tóg ùn kronkron tĩ ag mré kron mũ gé sir, jẽn mág han tóg mũ gé sir.

⁵⁰ Kỹ ti patrãu vỹ ti kãnhmỹ kãtĩg ke mũ sir, ti tỹ ti kãtĩg ke kurã ki kagtĩg nĩn kỹ, ti horan ke gé, ùn jykre kórég ẽn ti.

⁵¹ ã kãtĩg kỹ tóg ti kapãn ri ke han ke mũ sir, kỹ tóg ti fón ke mũ gé sir, ùn jykre régre ag mré. Tá ag tóg jagtar ke mũ, ãjag jã tỹ ag tóg gyngyn ke mũ, tỹ ag tóg gangan ke mũ, jũ kỹ, ùn jykre kórég ẽn ag,” he tóg, Jesus ti. Ti tỹ ù tỹ ti rãnrãj han kónãn mũ kãmén hã vễ.

25

Tátãg tỹ 10 (ke) fag to comparaçãu

¹ Kỹ Jesus tóg ag mỹ ã kãtĩg mãn ke ẽn kãmén mãn mũ, kỹ tóg ag mỹ: “ẽn kã ù tỹ kãnhkã tá nĩ ẽn tỹ tỹ ẽg pã'i nĩnh ke vỹ ge nĩnh mũ, ha mẽ,” he mũ. “Tátãg fag ri ke ti nĩnh mũ. Û tỹ 10 (ke) fag vỹ nỹtĩ, tátãg fag. Vẽnħ kyprũg ve jé fag tóg lampiãu vyn kỹ mũ mũ, ùn prũg mũ ẽn kato.

² Fag tỹ 5 (ke) fag vỹ jykre kórég nỹtĩ, jãvo ù fag vỹ jykre há nỹtĩ, ù tỹ 5 (ke) ù fag.

³ Kỹ ùn jykre kórég fag vỹ vyrmỹ azeite ma mũ ja tũ nĩ, hã ra tóg sĩn kỹ lampiãu kãkã nĩ nĩ.

⁴ Fag jãvo ùn jykre há fag vỹ azeite ma mũ mũ, vyrmỹ.

⁵ Hã ra tóg kãtĩg vãnħ han mũ, ùn prũg mũ ti. Kỹ tóg kejẽn fag nũgnũr há tĩ sir, ti jun tũg ki, kỹ fag tóg nũgnũr kãn mũ sir.

⁶ Meia noite ki vẽnħ vĩ tóg mẽ há tĩ, kỹ tóg: “!..nĩgnĩ ra..!” he mũ. “!..Ûn prũg mũ vỹ kãteg..!” he tóg. “!..Ha ti venħ kãmũ jeg..!” he tóg.

⁷ Kỹ tátãg ẽn fag vỹ nĩgnĩg kỹ fag lampiãu gruggrug mũ sir.

⁸ Kỹ ùn jykre kórég fag vỹ ùn jykre há fag mỹ azeite to vĩ mũ. “Ëg mỹ ãjag azeite vẽnħ kãpãm. Nhyn ke ti nỹtĩ ha, ẽg lampiãu ti,” he fag tóg mũ.

⁹ Hã ra ùn jykre há fag tóg fag mỹ: “vó!,” he mũ. “Ëg tỹ ãjag mỹ vẽnħ kãpãm kỹ tóg ẽg mỹ kã kyn ke mũ gé, ãjag ri kén. Negócio ra mũjẽg, ãjag tỹ azeite ven jé,” he fag tóg mũ.

¹⁰ Kỹ fag tóg mũ mũ. Fag gunja tá tóg jun mũ sir, ùn prũg mũ ti. Kỹ fag tóg ti mré mũ mũ sir, ùn lampiãu gru nỹtĩ fag. Vẽnħ kyprũg ve jé fag tóg mũ mũ, kỹ ag tóg jãnkã ti nĩfénħ mũ sir, ùn jykre kórég fag jy.

¹¹ Kỹ vãnħ tátãg ù fag vỹ tá junjun mũ gé sir, kỹ fag tóg ti mỹ: “Senhor', Senhor',” he mũ sir. “Ëg mỹ nón,” he fag tóg.

¹² Hã ra tóg fag mỹ: “ãjag ki kagtĩg sóg nĩ, mỹr, ha mẽ,” he mũ,” he tóg, Jesus ti.

¹³ “Hã kỹ sóg ãjag mỹ: vẽnħ ki rĩr, nũr tũ ri ke han kỹ, he mũ. Kãtĩg jé sóg ke mũ. Hã ra ãjag tóg inh kãtĩg ke kurã ki kagtĩg nỹtĩ, inh hora ki ke gé. Hã kỹ inh jãvãnħ to krónħ ke tũg nĩ,” he tóg, Jesus ti.

Ûn camarada ag to comparaçãu (Lc 19.11-27)

14 Kÿ Jesus tóg: “inh kãtĭg mãn ke vÿ tag ri ke nĭnh mÿ gé, ha mẽ,” he mÿ. “Kejĕn ù tóg ga ù venh tĭg sór mÿ, kÿ tóg ã camarada ag jé prĕr mÿ, ti tÿ ag mÿ ã tÿ nĕn kar vĕnh kãpãm jé, ã jãnkamy kar.

15 Û mÿ tóg jãnkamy kãmur tÿ 5 (ke) vin mÿ, ù mÿ tóg ti kãmur régre vin mÿ, ù mÿ tóg ti kãmur pir nĭm mÿ. Ûn krĭ há ĕn mÿ tóg ti kãmur e vin mÿ, ùn krĭ pãgsĩ ĕn mÿ tóg ti kãmur pir nĭm mÿ.

16 Kÿ ù tÿ ti kãmur tÿ 5 (ke) mäg mÿ ĕn vÿ tĩ mÿ. Jãnkamy ĕn tÿ rãnrãj mág han kÿ tóg kejĕn ù tÿ 5 (ke) ù mäg mÿ, kÿ ti tũ vÿ tÿ ti kãmur tÿ 10 (ke) nÿtĩ sir.

17 Kÿ ù tÿ ti kãmur régre mäg mÿ ĕn vÿ tÿ rãnrãj mÿ gé. Ti kãmur régre ù mäg tóg mÿ sir, ã rãnrãj to, kÿ tóg tÿ 4 (ke) nÿtĩ.

18 Ag jãvo ù tÿ ti kãmur pir mäg mÿ ĕn vÿ ã tũ nĕg tĩ mÿ sir. Æ patrão tÿ ti mÿ jãnkamy nĭm ĕn nĕg tóg mÿ, mÿr, ha mẽ.

19 Kejĕn ag patrão vÿ vÿn ke mÿ sir, si há tĩ kÿ.

20 Kÿ ti camarada tóg ti venh kãtĩ mÿ, ù tÿ ti kãmur tÿ 5 (ke) mãn ja ĕn ti. Kÿ tóg ti mÿ ù tÿ 5 (ke) ù ĕn ven mÿ sir, ti ganho ti, kÿ tóg ã patrão mÿ: “ù tÿ 5 (ke) vin ã tóg inh mÿ,” he mÿ, “hã ra sóg tÿ rãnrãj kÿ ù tÿ 5 (ke) ù mãn ja nĩ,” he tóg.

21 Kÿ ti patrão tóg ti mÿ: “jykre há ã tóg nĩ,” he mÿ. “Æ tũ ki rĭr há han ã tóg nĩ mÿr. Nĕn sĩ ki rĭr há han ja ã tóg nĭgtĩ, kÿ sóg ã mÿ nĕn ù e vin sór mÿ, ã tÿ ki rĭr jé. Æ patrão fe tÿ mrin ke ã mÿr. Hã inh mré kãtĭg,” he tóg, ti patrão ti.

22 Kÿ ti camarada ù tóg jun mÿ gé, ù tÿ ti kãmur régre mãn ja ĕn ti. Kÿ tóg ti mÿ: “inh mÿ ã tóg ti kãmur régre vin ja nĩ,” he mÿ. “Tÿ rãnrãj kÿ sóg ùn régre ù mã. Hã vĕ ha,” he tóg.

23 Kÿ ti patrão tóg ti mÿ: “jykre há ã tóg nĩ,” he mÿ gé. “Æ tũ ki rĭr há han ã tóg nĩ mÿr. Nĕn sĩ ki rĭr há han ja ã tóg nĭgtĩ, kÿ sóg ã mÿ nĕn ù e vin sór mÿ, ã tÿ ki rĭr jé. Æ patrão fe tÿ mrin ke ã mÿr. Ha inh mré kãtĭg,” he tóg, ti patrão ti.

24 Kÿ ti camarada ù tóg jun mÿ gé sir, ù tÿ ti kãmur pir mãn ja ĕn ti. Kÿ tóg ti mÿ: “Senhor!,” he mÿ. “Vĩ tar han ã tóg tĭgtĩ, ki kanhró sóg nĩ. Æ tÿ nĕn krãn ja tũ ĕn mäg ã

tóg tĭgtĩ, ã tÿ ti fy vãm tũ ra ã tóg ti kanĕ ve sór tĭgtĩ.

25 Hã kÿ sóg mÿmĕg kÿ ti kãmur né. Æ tũ ti hã vĕ ha,” he tóg, ti patrão mÿ.

26 Kÿ ti patrão tóg ti mÿ: “jykre kórég ã tóg nĩ,” he mÿ. “Æ tũ ki rĭr kónãn ã tóg nĩ mÿr. Inh mÿ isÿ nĕn krãn ja tũ mäg tĭgtĩ? Inh mÿ isÿ nĕn ù fy vãm tũ ra ti kanĕ ve sór tĭgtĩ? Hã ki kanhró ã mÿ nĩ’?”

27 Æ tÿ ne jé inh jãnkamy tÿ banco ki rãnrãj tĩ ag mÿ vin ja tũ nĩ nĕ? Kÿ sÿ ti juro ven kÿ sóg isÿ kãfór mãn ke vĕ vĕ.

28 Ti tũ ma ra,” he tóg mÿ sir, polícia ag mÿ. “Inh camarada ù mÿ nĭm, sÿ ti mÿ nĭm ja ĕn ti. Û tÿ ti kãmur tÿ 10 (ke) mäg mÿ ĕn mÿ nĭm, ti kãmur pir tÿ, sÿ ùn jykre kórég tag mÿ nĕn nĭm ja ĕn ti,” he tóg, ag patrão ti, polícia ag mÿ,” he tóg, Jesus ti.

29 “Ge ti nĩ. Ûn tũ mág vÿ mãn mãn mÿ, kÿ tóg ti mÿ tũ’ henh ke tũ pĕ nĩ. Ûn tũ tũ ĕn tũ sĩ mãn jé ag tóg ke mÿ, kÿ tóg tÿ tũ tũ nĩ sir,” he tóg, patrão ti.

30 “Kÿ inh camarada kórég tag fón, kutyg ja ĕn kãkã. Tá ag tóg jagtar tĩ, ãjag jã tÿ ag gyngyn ke tĩ, vĕso jũ kÿ,” he tóg, patrão ti,” he tóg, Jesus ti, ã tÿ ã kãtĭg mãn ke kãmĕn kÿ.

Jesus tÿ vĕnh kar jykre tugnÿm ke

31 Kÿ Jesus tóg ag mÿ: “ĕprã ke fi kósĭn ĕn kãtĭg mãn kÿn ge nĭnh mÿ, ha mẽ,” he mÿ. “Inh kãtĭg mãn kÿ sóg tar pĕ kãtĩ mÿ, sĭnvĩ. Isÿ jĕgnĕ jafã ag vÿ inh mré kãmũnh ke mÿ. Kÿ sóg inh nĭgja kri nĭnh ke mÿ sir, kÿ inh jykre tar vÿ vĕnh ven ke mÿ.

32 Kÿ ĕprã ke kar vÿ inh jo vĕnh mãn kãn ke mÿ sir. Kÿ sóg vĕnh kar vĕnh kãpãm ke mÿ sir, ha mẽ. Carneiro mré cabrito ki rĭr tĩ ĕn vÿ kejĕn ã mĕg vĕnh kãpãm tĩ. Carneiro ag tÿ tóg vyrmÿ vin tĩ, cabrito ag tÿ ke gé.

33 Kÿ tóg carneiro ag tÿ ã pĕgja tá vin tĩ, jó tóg cabrito ag tÿ ã jakãnh tá vin tĩ. Tag ri ke han jé sóg ke mÿ.

34 Tÿ sóg vĕnh kar kri pã’i mág nĭnh mÿ, kurã ĕn kã. Kÿ sóg inh pĕgja tá nÿtĭnh ke mÿ ag mÿ: “ha inh mré kãmũ jĕg,” henh ke mÿ. “Inh panh vÿ ãjag to vĩ há han mÿ mÿr. Topĕ tÿ ga tãg mré kanhkã tãg venh kãmũ jĕg. Topĕ tÿ ga han kurã ĕn kã tóg ãjag hã kuprĕg ja nĩ, ãjag tÿ ti tÿ ga tãg mré kanhkã tãg tag ve jé.

³⁵ Kejĕn sóg kókĭr nĭ ja nĭgtĭ, kĭ ħag tóg inh jĕn. Isĭ kron há nĭn kĭ ħag tóg inh mĭ goj jun. Isĭ ħag ĩn tá jun kĭ ħag tóg inh mĭ: “ha kārā, ĕg mré nĭ,” he ja nĭgtĭ gé.

³⁶ Inh kur tũ nĭn kĭ ħag tóg inh mĭ kur vin. Inh kaga nĭn kĭ ħag tóg inh venh kāmũ ja nĭgtĭ. Ise kĭ jĕ kĭ ħag tóg inh venh kāmũ ja nĭgtĭ gé,” he jé sóg ke mũ ag mĭ,” he tóg.

³⁷ “Kĭ ũn jykre kuryj tag ag vĭ inh mĭ: “Senhor’,” henh ke mũ. “Ĕg ħē kã ħ kókĭr vé, ĕg tĭ ħ mĭ vĕjĕn ven jé? Ĕg ħē kã ħ kron há tĭ vé, ĕg tĭ ħ mĭ goj ven jé?”

³⁸ Ĥ ħē kã ĕg ĩn tá jun, ĕg tĭ ħ mĭ: “ha kārā,” he jé? Ĕg ħē kã ħ kur tũ vé, ĕg tĭ ħ mĭ kur vin jé?”

³⁹ Ĕg ħē kã ħ kaga vé, ĕg ħē kã ħ se vé, ĕg tĭ ħ venh kāmũ jé? Ki kagtĭg ĕg nĭtĭ,” he jé ag tóg ke mũ, inh mĭ.

⁴⁰ Kĭ sóg ag mĭ: “ũn jagãgtar ag jagãgtãn ja ħag tóg nĭgtĭ, inh mré ke ag, ħã ra tóg ħag tĭ inh jagãgtãn ri ke nĭ, ħag tĭ ag jagãgtãn ja ti, ki ħã sóg tó mũ,” he jé sóg ke mũ, isĭ tĭ pã'i mág nĭn kĭ,” he tóg, Jesus ti.

⁴¹ “Kĭ sóg inh jakãnh tá nĭtĭ ag mĭ: “ha mũjĕg, tãra,” henh ke mũ gé. “Inh panh vĭ ħag mĭ vĭ kónãn. Pĭ nhyr vãnh ra mũjĕg. Nĕn-Kórég mĭ tóg kar kĭ nĭ, pĭ nhyr vãnh ĕn ti, Nĕn-Kórég tĭ jĕgnĕ jafã ag mĭ tóg kar kĭ nĭ gé. Ĕn ra mũjĕg.

⁴² Inh kókĭr ra ħag pi(jé) inh mĭ vĕjĕn ven'. Isĭ kron há ra ħag pi(jé) inh mĭ goj jun'.

⁴³ Isĭ ħag ĩn tá jun mũ ra ħag pi(jé) inh mĭ: “ha kārā,” he ja nĭgtĭ'. Isĭ kur tũ ra ħag pi(jé) inh mĭ ũ vin'. Inh kaga nĭ ra, ise kĭ jĕ ra ħag pi(jé) inh venh kāmũ ja nĭgtĭ',” he jé sóg ke mũ,” he tóg.

⁴⁴ “Kĭ ag tóg inh mĭ kenh ke mũ gé. “Senhor’,” he jé ag tóg ke mũ gé. “Ĕg ħē kã ħ kókĭr vé, ħ kron ha ti? Ĥ ħē kã ĕg ĩn tá jun'? Ĕg ħē kã ħ kur tũ vé', ħ kaga ti', ħ se ti', ĕg tĭ ħ ki rĭr jé? Ki kagtĭg ĕg nĭtĭ,” he jé ag tóg ke mũ gé.

⁴⁵ Kĭ sóg ag mĭ: “ũn jagãgtar ag jagãgtãn ja tũ ħag tóg nĭgtĭ,” henh ke mũ, “ħã kĭ tóg ħag tĭ inh jagãgtãn tũ ri ke nĭ, ki ħã sóg tó mũ, mĭr, ha mẽ,” he jé sóg ke mũ.

⁴⁶ Kĭ ag tóg jagãgtar kenh ke mũ, ħã ra tóg tũ' henh ke tũ nĭ, ag jagtar ke ti. Ag jãvo ũn

jykre há ag vĭ rĭr krĭg ja tũ venh ke mũ,” he tóg, Jesus ti.

26

Ag tĭ Jesus tén sór

(Mc 14.1-2; Lc 22.1-2; Jo 11.45-53)

¹ Vãħã tóg tó kãn ja nĭgtĭ, ti tĭ nĕn tónh ke ja ti, Jesus ti. Kĭ tóg ħ mré mũ tĭ ag mĭ:

² “kurã régre tũg kĭ tóg ĕg festa mág tĭ Páscoa nĭ,” he mũ. “Ĕn kã ag tóg ĕprã ke fi kósĭn ti senh ke mũ, kĭ ag tóg ti fĕg ke mũ, ka to ti sa jé. Inh ħã vĕ,” he tóg, Jesus ti.

³ Ĥã ra Topĕ tũ ki rĭr tĭ to pã'i mág ag vĭ vĕnh mãn mũ sir, Topĕ vĭ to professor ag mré ħã, kófa ag mré ke gé. Pã'i mág ĩn tá ag tóg vĕnh mãn mũ sir, pã'i ĕn jĭĭn ħã vĭ: Caifás, he mũ.

⁴ Kĭ ag tóg Jesus se to jykrĕn mũ sir. Ag tĭ ti vatãnh tá ti kãgmĭ sór vĕ, ti se jé, ti tén jé.

⁵ Kĭ ag tóg to jykrĕn kĭ: “festa tag to mẽ jé ĕg tóg ke mũ ver,” he mũ. “Ĕg tĭ festa kã ti se kĭ vĕnh génh mág ħĭn tóg kutĕnh mũ, ħã vemnĭ,” he ag tóg mũ sir jagnĕ mĭ.

Jesus tĭ Betânia tá nĭ

(Mc 14.3-9; Jo 12.1-8)

⁶ Ĕn kã Jesus tóg kejĕn ĕmã tĭ Betânia tá nĭ nĭ, Simão ĩn krĕm, vĕnh kaga kren vãnh ħã ja ĕn ĩn krĕm.

⁷ Ti jĕg nĭ ra ũ fi tóg tá jun mũ, garrafa mãn kĭ. Pó kupri tãnãj tĭ tóg há nĭ, garrafa ti. Ti ki nĭ vĭ tĭ nĕn kar tãg nĭ, ger há ĕn, ũn kaja e ĕn. Ti gãnh tãg fi tóg mũ, ger há ĕn tĭ.

⁸ Kĭ ti mré mũ tĭ ag tóg fi vĕg mũ, ħã ra tóg ag mĭ kórég nĭ. Fi to jũ kĭ ag tóg: “fi tĭ ne jé nĕn kaja e kókĕn nĕ?” he mũ.

⁹ “Ĕg tĭ ger há tag fón ke vĕ vĕ, kaja há to, ĕg tĭ ũn jagãgtar ag mĭ vin jé,” he ag tóg mũ.

¹⁰ Kĭ Jesus tóg mẽg mũ, ag vĭ ti, kĭ tóg ag mĭ: “ħag tĭ ne jé fi mĭ kaga ħã nĕ?” he mũ. “Inh jykre ki króm fi tóg.

¹¹ Inh ħã tóg ver nĭ sĭ ħã mũ, ħag mré, jãvo ũn jagãgtar ag vĭ kurã kar ki ħag mré nĭtĭ nĭ.

¹² Fi tĭ inh kãn vĕ, ag tĭ vĕnh kej tá inh fón jé ħã jé fi tóg ger há tag tĭ inh kri kujĕg.

¹³ Ag tĭ vĕnh vĭ sér tugtón kĭ ag tóg fi tĭ nĕn ħã mũ tag tónh ke mũ gé, ga kar mĭ ħã, kĭ vĕnh kar vĭ fi tĭ nĕn ħã mũ mẽnh

ke mũ, ha vemni. Ki hã sóg tó mũ,” he tóg, Jesus ti.

*Judas tỹ pã'i ag mỹ Jesus ven ke
(Mc 14.10-11; Lc 22.3-6)*

¹⁴ Kar kỹ ù tỹ 12 (ke) ag kã ù tóg Topẽ tũ ki rĩr tĩ to pã'i ag venh tĩ mũ. Ûn tĩg mũ jyjyn hã vỹ: Judas Iscariotes, he mũ.

¹⁵ Tá jun kỹ tóg ag mỹ: “sỹ ãjag mỹ Jesus ven ke vễ, ãjag tỹ ti se jé,” he mũ. “Ãjag mỹ inh mỹ kajãm ke tũ, sỹ ãjag mỹ ti ven ke ti?” he tóg. Kỹ ag tóg ti mỹ: “vó,” he kỹ jãnkamỹ tỹ 30 (ke) tỹ kajãm mũ sir.

¹⁶ Ti tỹ jãnkamỹ ên mãn kar kỹ tóg to jykrén mũ. “Inh hỹn hẽ ri kenh mũ, isỹ vễnh kar vatánh tá ag mỹ Jesus ven jé?” he tóg mũ sir, Judas ti, ón kỹ Jesus mré tĩ mũ ên ti.

*Jesus tỹ Páscoa ko
(Mc 14.12-21; Lc 22.7-14, 21-23; Jo 13.21-30)*

¹⁷ Kejẽn tóg pão jẽgja tũ konh ke kurã tá krỹg mũ, kỹ Jesus mré mũ tĩ ag tóg ti mỹ: “ẽg hỹn hẽ tá ã mỹ carneiro sỹ tãnh mũ, ẽg tỹ kon jé?” he mũ.

¹⁸ Kỹ tóg ag mỹ: “ẽmã mág tag ra mũjẽg,” he mũ. “Tá ù tóg nĩ nĩ. Ti mỹ: “ẽg Senhor vỹ ã mỹ vễnh vĩ jẽnẽg mũ,” hemni. “Inh kurã vỹ kakó tĩ ha, kỹ sỹ ã ãn krẽm Páscoa konh há tóg tĩ, inh mré mũ tĩ ag mré,” he tóg mũ,” hemni ti mỹ,” he tóg, Jesus ti.

¹⁹ Kỹ ag tóg mũ mũ sir, ti mré mũ tĩ ag. Ti tỹ ag mỹ tó mũ han ag tóg mũ sir. Cordeiro tãnh ag tóg mũ sir, ag tỹ Páscoa kã ko tĩ ên.

²⁰ Rã pur kar kỹ tóg tá jun kỹ ù tỹ 12 (ke) ag mré nĩ mũ sir, jẽn jé.

²¹ Ag jẽn kã tóg ag mỹ: “ãjag kãmĩ ù tóg pã'i ag mỹ inh ven ke mũ, ag tỹ ise jé, ki hã sóg tó mũ,” he mũ.

²² Kỹ tóg ag fe kaj tĩ sir, kỹ ag tóg ti mỹ: “inh mỹ vó'? Inh mỹ vó'?” he kãn mũ sir.

²³ Kỹ tóg ag mỹ: “ũ tỹ inh mré pão tỹ kã punpun mũ ên hã vễ,” he mũ. “Û tỹ ã nĩgẽ tỹ pẽnky kãki pão tỹ kã punpun mũ ên hã vễ. Ên hã vỹ ag mỹ inh ven ke mũ,” he tóg.

²⁴ “Tĩg jé sóg ke mũ, isỹ tỹ ẽprã ke fi kósin nĩn kỹ. Hã kỹ tóg rãn kỹ nĩ, isĩg ke ti. Hã ra ù tỹ ag mỹ inh ven ke mũ ên mỹ tóg vĩ kónãn tãvĩ han ke mũ, Topẽ ti. Ti tỹ mur ja tũ nĩ ra tóg ti mỹ há tĩ vễ,” he tóg, Jesus ti.

²⁵ Kỹ Judas tóg ti mỹ ke mũ gé sir, ù tỹ pã'i ag mỹ ti ven ke mũ ên ti. Ên tóg ti mỹ: “Senhor', inh hã mỹ'?” he mũ gé. Kỹ tóg ti mỹ: “ki hã ã tóg tó mũ,” he mũ, Jesus ti.

*Santa Ceia
(Mc 14.22-26; Lc 22.15-20; 1Co 11.23-25)*

²⁶ Kỹ ag tóg jẽg mũ. Ag jẽn nỹtĩ ra Jesus tóg ẽmĩ mäg mũ sir. Topẽ mré tóg vĩ mũ sir, ẽmĩ to, kỹ tóg vễnh kã kugpãn kỹ ag mỹ vễnh kãpãm mũ sir, ti mré mũ tĩ ag mỹ. Kỹ tóg: “té, ha kó,” he mũ. “Inh hã vễ,” he tóg, ẽmĩ to.

²⁷ Kar kỹ tóg copo vãg mũ gé sir, vinho tỹ ki jẽn kỹ. To tóg Topẽ mré vĩ mũ gé. Ag mỹ copo jun kỹ tóg: “ha kronkron,” he mũ.

²⁸ “Inh kyvénh hã vễ,” he tóg, vinho to. “Inh kyvénh tỹ vễnh kar jagfy kutên hã vễ. Sỹ vễnh e mré vễnh jykre tãg han to ke hã vễ, hã vỹ tỹ inh kyvénh ti nĩ. Inh kyvénh tag to Topẽ vỹ ãjag mỹ vễnh pãte fón ke mũ, ãjag tỹ ti vĩ mranh ja ti,” he tóg.

²⁹ “Ha mẽ, uva me kron mãn ke tũ inh nĩ ha. Kejẽn sóg kron mãn ke mũ, inh panh tỹ tỹ ẽg pã'i nĩnh ke kurã ên kã. Kỹ sóg ãjag mré kron mãn ke mũ, ha vemni,” he tóg, Jesus ti.

³⁰ Kỹ ag tóg jãn mũ gé sir, ag jẽn kar kỹ. Ag tỹ Topẽ jé tó kar kỹ ag tóg krĩ tỹ Oliveiras ra mũ mũ sir.

*Jesus tỹ Pedro mỹ tó
(Mc 14.27-31; Lc 22.31-34; Jo 13.36-38)*

³¹ Ag tỹ ra mũn kỹ Jesus tóg ag mỹ kãmén mũ. “Kuty tag kã ãjag tóg inh fón kỹ mũ kãn ke mũ,” he tóg mũ, ã mré mũ tĩ ag mỹ. “Hã kỹ tóg rãn kỹ nĩ. “Û tỹ carneiro ki rĩr tĩ ên tãnh jé sóg ke mũ, kỹ ti mẽg ag vỹ krig ke kãn ke mũ,” he tóg, Topẽ vĩ tỹ rãn kỹ nĩ ki,” he tóg, Jesus ti. “Hã ve jé ãjag tóg ke mũ.

³² Hã ra sóg iser kar kỹ rĩr mãn ke mũ. Ên kã sóg ãjag jo tĩg ke mũ, ga tỹ Galiléia ra,” he tóg, Jesus ti.

³³ Kỹ Pedro tóg ti mỹ: “inh pi(jé) ã fón kỹ tĩg ke mũ', ag kar tỹ ã ré kỹ mũ mũ ra,” he mũ.

³⁴ Hã ra Jesus tóg ti mỹ: “ha vé,” he mũ. “Ûri, kuty tag kã ã tóg iso: ti ki kagtĩg sóg nĩ, he tãgtũ han ke mũ, galo kyr to hã. Ki hã sóg tó mũ,” he tóg, Jesus ti.

³⁵ Hã ra Pedro tóg ti mỹ: “sỹ ã mré ter ke mũ ra sóg ã to: ti ki kagtĩg sóg nĩ, henh ke tũ

pě nĩ,” he mũ. Kĩ ti mré mũ tĩ ag tóg hã tó kãn mũ gé sir.

*Getsêmani tá
(Mc 14.32-42; Lc 22.39-46)*

³⁶ Kĩ Jesus tóg ka krãn ja tá jun mũ sir, ag mré, ka krãn ja ên jijin hã vỹ: Getsêmani, he mũ. Kĩ tóg ã mré mũ tĩ ag mỹ: “ha ver nĩgnĩ, tag ki,” he mũ. “Sỹ ver Topê mré vĩnh ke vê, tãtã,” he tóg.

³⁷ Kĩ tóg Pedro mré Zebedeu krê ag mỹ: “inh mré kãmũ jêg,” he mũ. Kĩ tóg fe kaj nĩ sir. Mũmêg tóg mũ sir.

³⁸ Kĩ tóg ag mỹ: “inh fe kaj mág tóg tĩ,” he mũ, “kỹ inh fe kaj tóg inh mỹ iser ri ke nĩ,” he tóg. “Tag ki nỹtĩmĩ, nũgnũr tũg nĩ, inh ri kén,” he tóg, Jesus ti.

³⁹ Kĩ tóg tĩg sĩ han mãn kỹ mũg ke mũ sir, Jesus ti, kỹ tóg ga kri nỹ mũ. Topê mré tóg vĩ mũ. “Panh’,” he tóg mũ. “Mỹ ã tỹ inh jagtar ke tag tỹ tũ’ he jãvãnh?” he tóg. “Hã ra isỹ ã mỹ nén to vĩ mũ tag han tũg nĩ. ã tỹ nén han ke mũ ên hã han nĩ,” he tóg, Jesus ti.

⁴⁰ Kar kỹ tóg ã mré mũ tĩ ag venh tĩ mũ sir, hã ra ag kar tóg nũgnũr ja nĩ. Kĩ tóg Pedro mỹ: “mỹ ãjag mỹ hora pir ki nũr tũ kórég?” he mũ.

⁴¹ “Nũr tũg nĩ, Topê mré vĩmĩ, ãjag tỹ ti vĩ mranh tũ nĩ jé, ù tỹ ãjag kutãn mũ ra. ãjag tỹ mranh sór tũ vê vê, hã ra ãjag tóg to krój nỹtĩ, hã kỹ ãjag tóg mranh ke mũ,” he tóg, Jesus ti.

⁴² Kĩ tóg tĩg mãn mũ sir, kỹ tóg Topê mré vĩ mãn mũ. Kĩ tóg: “panh’,” he mãn mũ. “ã tỹ inh jagtar ke tag tỹ tũ’ henh jãvãnh nĩn kỹ sóg jagtar ke mũ. ã tỹ isỹ nén han ke mũ ên han nĩ,” he tóg.

⁴³ Kĩ tóg ag venh tĩg mãn mũ gé sir, hã ra ag tóg nũgnũr mãn nỹtĩ, ag nũr há pě tĩn kỹ.

⁴⁴ Kĩ tóg ag mỹ vĩ tũ ra tĩ mũ sir, Topê mré vĩ mãn jé. Tĩ mỹ tóg ã tỹ tó ja ên tó mãn mũ.

⁴⁵ Kĩ tóg ã mré mũ tĩ ag venh tĩg mãn mũ gé sir, kỹ tóg ag mỹ: “ãjag ne tóg nũgnũr ja nĩ” he mũ, “vẽnhkãn ja ãjag tóg nĩ,” he tóg mũ. “Pétêm ti huri, hora ti. Tĩ tỹ ag mỹ inh fêg ke nê ha, Topê vĩ mranh tĩ ag mỹ, isỹ tỹ êprã ke fi kósin nĩn kỹ,” he tóg.

⁴⁶ “Nĩgnĩ ra, mũ jé ha. ù tỹ ag mỹ inh ven mũ vỹ jun ke mũ ha,” he tóg, Jesus ti.

*Ag tỹ Jesus se
(Mc 14.43-50; Lc 22.47-53; Jo 18.3-12)*

⁴⁷ Tĩ tỹ ver tỹ vēmén jê ra Judas tóg jun mũ sir. ù tỹ 12 (ke) ag kã ù ên vê, Judas ti. Tĩ mré polícia ag tóg kãmũ mũ. Rógro génh kỹ ag tóg kãmũ mũ, ka kykyv génh kỹ ke gé. Topê tũ ki rĩr tĩ to pã’i ag tỹ ag jêgnê vê, kófa ag tỹ ke gé.

⁴⁸ Hã ra ù tỹ ag mỹ Jesus ven ke mũ ên tóg ag mỹ: “tĩ ki sóg nhun kenh mũ,” he ja nĩ. “Sỹ ùn ki nhun ke mũ ên hã semnĩ,” he ja tóg nĩ ag mỹ.

⁴⁹ Hã kỹ tóg vêsỹmêr Jesus to grên ke kỹ ti mỹ: “ã mỹ há, Senhor’?” he mũ. Kĩ tóg tĩ ki nhun ke mũ, Judas ti.

⁵⁰ Hã ra Jesus tóg ti mỹ: “régre’,” he mũ. “ã tỹ nén han ke mũ ên han nĩ,” he tóg.

Kỹ polícia ag tóg vêsỹmêr ti to ge kỹ ti ség mũ sir, Jesus ti.

⁵¹ Kĩ Jesus mré tĩ tĩ ù tóg rógro kunũnh kỹ polícia ù nĩgrêg kym mũ sir. Topê tũ ki rĩr tĩ to pã’i mág camarada vê, ti tỹ ùn nĩgrêg kym mũ ên ti.

⁵² Hã ra Jesus tóg ti mỹ: “ã rógro fêg han ra,” he mũ. “Êg tỹ rógro tỹ ke kỹ ag tóg rógro tỹ êg tén ke mũ gé, ha vemnĩ,” he tóg.

⁵³ “Isỹ inh panh mỹ to vĩ mũ ra tóg inh mỹ ã tỹ jêgnê jafã ag jêgnênh ke mũ vê, ùn e ên, 12 mil (ke) kãfór, ag tỹ iijy nĩgãn jé.

⁵⁴ Hã ra sóg ve sór mũ, nén tỹ iso rán kỹ nĩ ên ti, hã kỹ sóg ti mỹ tag to vĩ tũ nĩ. Ve jé sóg ke mũ ha, inh jagtar ke ti,” he tóg, Jesus ti.

⁵⁵ Ên kã tóg polícia ag mỹ: “ãjag ne tóg rógro génh kỹ kãmũ mũ’, ka kykyv mré’, ãjag tỹ ise jé’,” he mũ. “Inh pi(jé) tỹ bandido nĩ’. Kurã kar ki sóg ãjag mré jê ja nĩgtĩ, Topê jo ãn krêm. Vẽnh kar kanhrãn kỹ sóg tá nĩ ja nĩgtĩ, hã ra ãjag tóg tá iség tũ nĩ vê mỹr,” he tóg.

⁵⁶ “Hã ra sóg nén tỹ iso rán kỹ nĩ ên vэг mũ, Topê vĩ tó tĩ ag tỹ iso nén rán ja ên ti, hã kỹ ãjag tóg ke mũ,” he tóg, Jesus ti.

Kỹ ti mré mũ tĩ ag tóg ti ré kỹ pétê kãn mũ sir, vẽnh pigju jé, mỹr, ha mẽ.

*Pã’i ag tỹ Jesus ki jêmê
(Mc 14.53-65; Lc 22.54-55, 63-71; Jo 18.12-14, 19-24)*

⁵⁷ Kĩ ù tỹ ti ség mũ ag tóg ti pére mũ mũ, Topê tũ ki rĩr tĩ to pã’i mág ra, hã vỹ: Caifás,

he mũ. Tá ag tóg vènh mǎn kǎ nǎtĩ, Topẽ vĩ to professor ag, kófa ag ke gé.

⁵⁸ Hã ra Pedro tóg Jesus nón kǎtĩ mũ, kuvar há tá, kǎ tóg Topẽ tũ ki rĩr tĩ to pǎ'i mág ĩn kǎra rǎ mũ sir. Polícia ag mré tóg tá nĩ nĩ. Tĩ tỹ ag tỹ Jesus tỹ hẽn ri kenh ke mũ ěn ve sór vè.

⁵⁹ Kǎ Topẽ tũ ki rĩr tĩ to pǎ'i ag tóg ũ ag jǎvǎnhvǎnh mũ, ag tỹ Jesus jykre kórég tó jé. Tĩ vĩ to ag tóg ti tén sór mũ, kófa ag, vènh jyvènh tĩ kar ag.

⁶⁰ Hã ra ag tóg ũ tỹ ki hã tó mũ vég tũ nĩ. Ũ tỹ hẽn ri ke ag tóg ón kǎ ti jykre kórég tó mũ, hã ra tóg ag mỹ ki krov tũ nĩ. Kǎ vǎhã ĩn régre ag tóg tá junjun kǎ ón kǎ ti to vĩ mũ.

⁶¹ ěn ag vỹ tóg sir: “tĩ vĩ vènhmỹ mẽ ěg,” he mũ. “Topẽ jo ĩn kókén há inh nĩgtĩ, he ja tóg nĩ. Kókén kar sóg ũ han mǎn ke mũ. Kurǎ tǎgtũ ki tóg kar kǎ nĩ, ĩn ti, ha vemnĩ, he ja tóg nĩ, Jesus ti,” he ag tóg mũ, ón kǎ ti to vĩ kǎ.

⁶² Kǎ Topẽ tũ ki rĩr tĩ to pǎ'i mág vỹ jègnè mũ sir, kǎ tóg ti mỹ: “ã tỹ nén tónh ke mỹ tũ'?” he mũ. “Ag hã ne ã vĩ kónǎn tag tó ja nĩ gé’” he tóg.

⁶³ Hã ra Jesus tóg hun ke mũ, nén ũ tó mẽ kǎ. Kǎ pǎ'i mág tóg ti mỹ: “Topẽ vỹ rĩr nĩ,” he mũ. “Ũn rĩr nĩ vỹ ěg vég mũ. Tĩ rĩnve sóg ã ki jèmèg mũ. Ā mỹ tỹ Cristo nĩ', ã mỹ tỹ Topẽ kósín nĩ'? Ha ěg mỹ tó,” he tóg, pǎ'i mág ti.

⁶⁴ Kǎ Jesus tóg ti mỹ: “ki hã ã tóg tó mũ,” he mũ. “Kǎ sóg ãjag mỹ tag tó mũ gé, ha mẽ. ěprǎ ke fi kósín ěn vỹ tỹ inh nĩ,” he tóg. “Kǎ ãjag tóg ũ tỹ nén (ũ) kar han mũ ěn pègja tá inh venh ke mũ. Kǎ sóg kǎnhkǎ góg kǎmĩ kǎtèrenh ke mũ gé,” he tóg, Jesus ti.

⁶⁵ Kǎ pǎ'i mág ěn tóg ã kur tỹ jaran' ke mũ sir, jũ kǎ. Kǎ tóg: “Topẽ kato vĩ kónǎn ti huri,” he mũ. “Mẽ kǎn ěg mỹr, kǎ ěg tóg ũ tỹ ti jykre kórég tónh ke ũ jǎvǎnh mǎn ke tũ nĩ ha,” he tóg.

⁶⁶ “ěg hỹn ti tỹ hẽ ri kenh mũ ha?” he tóg. Kǎ ag tóg ti mỹ: “ter jé tóg ke mũ, ti vĩ tag to,” he kǎn mũ sir.

⁶⁷ Kǎ ag tóg ti kǎkǎ to sugrug mũ sir, ti kǎkǎ ki tǎnh ag tóg mũ gé sir. Ag kǎ ũ tóg ti vatǎnh tá ti tǎnh kǎ ti mỹ:

⁶⁸ “Cristo nèji tỹ ã jè, kǎ ã nèji nén kar ki kǎnhró nĩ,” he mũ. “Ũ nỹ ã tǎnh?” he tóg mũ

gé. Tĩ tǎnh kǎ tóg ke mũ. Gen kǎ ag tóg ti to é he mũ.

Pedro tỹ Jesus to ón

(Mc 14.66-72; Lc 22.56-62; Jo 18.15-18, 25-27)

⁶⁹ Hã ra Pedro vỹ re tá nĩ nĩ, ĩn vǎso kǎ. Kǎ pǎ'i camarada ũ fi tóg ti ve jé kǎkutè mũ, kǎ fi tóg ti mỹ: “Jesus mré ã tóg tĩg mũ gé, Galiléia tá ke ěn mré,” he mũ.

⁷⁰ Hã ra tóg: “vó,” he mũ. “Ā tỹ ne tó nè hỹn'?” he tóg mũ, Pedro ti. Kǎ ag kar vỹ ti vĩ mẽg mũ.

⁷¹ Kǎ tóg jǎnkǎ fĩn rǎm sór mũ. Hã ra ũ fi tóg ti vég mũ gé, kǎ fi tóg tá ke ag mỹ: “Jesus mré ke ũ vè, Nazaré tá ke ěn mré ke ũ vè,” he mũ gé.

⁷² Hã ra tóg: “vó,” he mǎn mũ. “Tĩ ki kǎgtĩg sóg nĩ, Topẽ vỹ ki kǎnhró nĩ,” he tóg, Pedro ti.

⁷³ Si há ke tũ ra ũ tỹ tá nỹtĩ ag kǎ ũ ag tóg ti venh kǎmũ kǎ ti mỹ hã tó mǎn mũ gé. Kǎ ag tóg Pedro mỹ: “ha mẽ, ag kǎ ũ vỹ tỹ ã nĩ,” he mũ. “Ā vĩ ki ěg tóg ã ki kǎnhrǎn mũ,” he ag tóg mũ.

⁷⁴ Hã ra tóg: “vó,” he mǎn mũ. “Inh pi(jé) ti ki kǎnhró nĩ'. Inh ón mũ ra Topẽ vỹ inh vóg kónǎn mũ vè,” he tóg, Pedro ti. Hã ra vèsýmér galo tóg kyr mũ.

⁷⁵ Kǎ Pedro tóg Jesus vĩ to jykren mũ, ti tỹ ti mỹ: “iso ã tóg: ti ki kǎgtĩg sóg nĩ, he tǎgtũ han ke mũ, galo kyr ke to hã,” he ja ěn mũ. Tag mĩ ěkren kǎ tóg tá kǎkutè mũ sir, hã ra tóg fỹ jagy han mũ sir, Pedro ti.

27

Ag tỹ Pilatos mỹ Jesus ven

(Mc 15.1; Lc 23.1-2; Jo 18.28-32)

¹ Tỹ vaj kǎ kusǎ ki ag tóg Jesus to jykren mũ sir, Topẽ tũ ki rĩr tĩ to pǎ'i ag, kófa ag mré hã. Ag tỹ ti tén sór vè.

² Kǎ ag tóg ti mrĩnh mũ sir. Tĩ pére mũn kǎ ag tóg pǎ'i mág tỹ governador mỹ ti fèg mũ sir, Pilatos ěn mỹ.

Judas ter

(Hk 1.16-19)

³ Hã ra Judas tóg vég mũ. Pǎ'i ag mỹ tóg Jesus ti ven ja nĩ, ag tỹ ti se jé. Kǎ tóg ag tỹ ti tén sór mũ tag vég mũ, Judas ti. Kǎ tóg to jykren mǎn mũ sir. Vǎhã tóg ti mỹ e tĩ. Kǎ

tóg jänkamy tỹ prata ên ma kãtĩ mũ sir, ù tỹ 30 (ke) ên. Ma kãtĩg kỹ tóg Topê tũ ki rĩr tĩ to pã'i ag mỹ ven mũ, kófa ag mỹ.

⁴ Kỹ tóg ag mỹ: “ti kórég han inh,” he mũ. “Ti pí(jé) nén ù kórég han ja nĩgtĩ', hã kỹ tóg vènhmỹ nĩ, ti tỹ inh vĩ to ter kỹ,” he tóg.

⁵ Hã ra ag tóg ti mỹ: “êg tũ pijé',” he mũ. “Ã tũ hã nê',” he ag tóg mũ. Kỹ tóg jänkamy ên vãm mũ sir, Topê jo ìn krêm, kỹ tóg hên ra tĩ mũ sir. Tá tóg ã nunh kã vènh jãján mũ sir, kỹ tóg ter mũ sir.

⁶ Kỹ Topê tũ ki rĩr tĩ to pã'i ag vỹ jänkamy ên mãn kỹ to jykrén mũ. “Êg tỹ Topê mỹ jänkamy tag vin kỹ tóg vènhmỹ tĩ. Vènh kyvènh kajãm ja ti nĩ, hã kỹ êg tóg Topê mỹ vin sór tũ nĩ,” he ag tóg mũ sir, jänkamy ên to.

⁷ Kỹ ag tóg to vènh mãn kỹ to jykrén mũ. To jykrén kỹ ag tóg tỹ êpỹ kajãm mũ, ag tỹ tá go'or vég tĩ ên. Tá ag tóg fóg ag kej han sór mũ, fóg tỹ Jerusalém ra pasa tĩ ag mỹ.

⁸ Hã kỹ êg tóg êpỹ ên to: “êpỹ kyvènh,” he tĩ.

⁹ Hã ra Topê vĩ to tĩ tỹ Jeremias vỹ Judas to tag rán ja nĩ, ha mẽ: “jänkamy tỹ 30 (ke) tỹ ag tóg êpỹ kajãm ke mũ. Jänkamy ên tỹ ag tóg êprã ke ù kajãm vén ke mũ, Israel ag, ti kaja tag tỹ ag mỹ há nỹn kỹ.

¹⁰ Êprã ke ên tỹ kajãm kar kỹ ag tóg tỹ êpỹ kajãm mũ sir, ag tỹ tá go'or vég tĩ ên. Hã to ja tóg nĩ, inh mỹ, êg jóg tỹ Topê ti,” he ja tóg nĩgtĩ, Jeremias ti. Hã ra tóg ge nĩ.

*Pilatos tỹ Jesus ve
(Mc 15.2-5; Lc 23.3-5; Jo 18.33-38)*

¹¹ Hã ra Jesus tóg fóg tỹ pã'i mág rã jê nĩ. Kỹ pã'i mág tóg ti ki jêmẽ sór mũ, kỹ tóg: “ã mỹ tỹ Judeu ag pã'i nĩ?” he mũ. Kỹ Jesus tóg ti mỹ: “ki hã ã tóg tó mũ,” he mũ.

¹² Kỹ Topê tũ ki rĩr tĩ to pã'i ag tóg ti kato vĩ mág han mũ, kófa ag ke gé, hã ra tóg hun ke kỹ jê nĩ.

¹³ Kỹ Pilatos tóg ti mỹ: “mỹ ã mỹ tỹ nén ù tũ nĩ, ag tỹ ã kato vĩ mág han mũ tag ti?” he mũ.

¹⁴ Hã ra Jesus tóg vĩ mãn tũ nĩ, kỹ tóg Pilatos mỹ e tĩ sir.

*Ag tỹ Jesus to: ter jé tóg ke mũ, he
(Mc 15.6-15; Lc 23.13-25; Jo 18.39-19.16)*

¹⁵ Hã ra Pilatos tóg ag mỹ vése ag kar kã ùn pir kavãg tĩ, festar tỹ Páscoa kar ki. Ti jykre vè. Ag tỹ ùn to vĩ mũ ên kyvãg tóg tĩ.

¹⁶ Kỹ ù tóg se kỹ jê nĩ, ên kã. Ùn vènhmỹ vè, ù tỹ ag rĩ ke tũ, ti jijin hã vỹ: Barrabás, he mũ.

¹⁷ Jãvo ag tóg tá vènhmãn kỹ nỹtĩ, Judeu kar ag. Kỹ Pilatos tóg ag mỹ: “inh hỹn ù kavãn ha?” he mũ. “Û nỹ ãjag mỹ há nĩ? Barrabás mỹ, Jesus mỹ vó, ag tỹ ù to: “Cristo vỹ tỹ ti nĩ,” he tĩ ên?” he tóg, Pilatos ti.

¹⁸ Pã'i ag tỹ véké Jesus to jũ nỹtĩn ki kanhró tóg nĩ, Pilatos ti. Ti há nĩn hã kỹ ag tóg ti to jũ mũ, hã kỹ tóg ti kavãn sór mũ, Pilatos ti.

¹⁹ Fóg tỹ pã'i ên tỹ vènh jyvèn jafã tá nĩn kỹ ti prũ fi tóg ti mỹ vènh vĩ jènèg mũ, kỹ fi tóg ti mỹ: “vènh jykre kuryj han ti tĩ,” he mũ, Jesus to. “Hã kỹ ti vóg sór tũg nĩ. Kuty tag kã sóg ti to vènh péti kónãn, êg jagtar ke ti ve inh, inh vènh péti ki,” he fi tóg, Pilatos mỹ vènh vĩ jènèn kỹ, hã kỹ tóg ti kavãn sór tãvĩ han mũ, Pilatos ti.

²⁰ Hã ra Topê tũ ki rĩr tĩ to pã'i ag tóg vènh kar krĩn mũ sir, kófa ag mré, vènh kar ag tỹ Barrabás kavar kỹ jê ve sór jé, ag tỹ Jesus ter ve sór jé.

²¹ Kỹ fóg tỹ pã'i tóg ag ki jêmẽ mãn mũ. “Inh hỹn ùn régre tag ag kã ù tỹ hê kavãn mũ ha?” he tóg. Kỹ ag tóg ti mỹ: “Barrabás ti,” he mũ.

²² Kỹ Pilatos tóg ag mỹ: “kỹ inh Jesus tỹ hê rĩ kenh mũ?” he mũ. “Ag tỹ ù to: “Cristo vỹ tỹ ti nĩ,” he tĩ ên tỹ inh hê rĩ kenh mũ?” he tóg. Kỹ ag tóg ti mỹ: “cruz to ti sã,” he kãn mũ sir.

²³ Kỹ fóg tỹ pã'i tóg ag mỹ: “ti kórég tỹ ne han ti?” he mũ. Hã ra ag tóg prènprèr mũ sir. “!..Cruz to ti sã..!” he ag tóg mũ sir, prènprèr kỹ.

²⁴ Ag tỹ hê rĩ ke tũ tóg nĩ, Pilatos ti, hã kỹ tóg ag mỹ hã han sór mũ. Vènh génh kutê nĩ ve tóg nĩ, hã kỹ tóg goj jé prèr mũ. Kỹ tóg kã nĩgpég mũ sir, vènh kar rĩnve, Pilatos ti, kỹ tóg ag mỹ: “inh jykre pijé',” he mũ. “Inh nĩgé kavènh ke tũ ti nĩ, ti kyvènh ti. Ùn jykre kuryj vè, kỹ sóg ti tén jãvãnh nĩ. ãjag jykre vè,” he tóg, Pilatos ti.

²⁵ Kỹ vènh kar ag tóg ti mỹ: “êg jykre vè,” he kãn mũ. “Êg hã ne ti tén sór mũ'. Kỹ Topê

ĕg hã vóg kónãñ ke mũ, ĕg krĕ ag ke gé, ti tỹ ti ter to ũ vóg kónãñ ken kỹ,” he ag tóg, vĕnh kar ĕn ag.

²⁶ Kỹ Pilatos tóg Barrabás kavãn mũ sir. Jesus to tóg soldado ag mỹ: “ha ti mrãnmrãn,” he mũ sir. Ag tỹ ti mrãnmrãn kar kỹ Pilatos tóg ag mỹ ti fĕg, soldado ag tỹ ka to ti sa jé.

*Soldado ag tỹ Jesus vóg kónãñ
(Mc 15.16-20; Jo 19.2-3)*

²⁷ Kỹ fóg tỹ pã'i krĕm soldado ag tóg Jesus pére mũ mũ, pã'i ĩn ra, ĩn tỹ Palácio do Governador ĕn ra. Kỹ ag tóg soldado ũ ag jé prĕr kãn mũ.

²⁸ Ti kur kunũg ag tóg mũ, kỹ ag tóg kur kusũg tỹ ti kri fón mũ.

²⁹ Sónh pirĩn kỹ ag tóg tỹ ti krĩ tógfĩg mũ sir, krĩ tógfĩn ja rĕr tỹ. Vãn tỹ ag tóg ti nĩgĕ kã fĕg mũ, ti pĕgja tá. Kỹ ag tóg ti krĕm grĩnhgrĩnh ke mũ sir, ón kỹ. Ti to é he ag tóg mũ, hã kỹ ag tóg: “viva, Judeu ag pã'i,” he mũ.

³⁰ Kỹ ag tóg ti to sugrug mũ gé. Vãn ĕn tỹ ag tóg ti krĩ mũ mrãnmrãn mũ sir.

³¹ Ag tỹ ti nyr kar kỹ ag tóg ti ki kunũg mũ, kur ĕn ti. Kỹ ag tóg ti tũ pĕ tỹ ti kãra rãg mãn mũ sir. Kỹ ag tóg ti pére mũ mũ, ag tỹ cruz to ti san jé sir.

Jesus tỹ cruz to sa

(Mc 15.21-32; Lc 23.26-43; Jo 19.17-27)

³² Ag mũn kã ag tóg ũ kato tĕ mũ, Cirene tá ke ũ, ti jijin hã vỹ: Simão, he mũ. ĕn mỹ ag tóg vĩ tar han mũ, ti tỹ Jesus cruz vyn jé ti jo, hã kỹ tóg vyn kỹ tĩ mũ.

³³ Gen kỹ ag tóg Gólgota tá junjun mũ sir. Gólgota to ĕg tóg: vĕnh krĩ kuka, he tĩ, ĕg vĩ ki.

³⁴ Tá junjun kỹ ag tóg ti mỹ vinagre ven mũ, nĕn ũ tỹmĕ jynh mré ha. Kỹ tóg kron sĩ han mũ, hã ra tóg kron sór tũ nĩ, vĕnhkagta tag.

³⁵ Kỹ ag tóg cruz to ti sãg mũ sir. Ti kur tỹ ag tóg jagnĕ mỹ vĕnh kãpãm mũ sir, to ag tóg jogar he mũ gé, ti kur to, soldado ag.

³⁶ Kỹ ag tóg nĩgnĩg kỹ nỹtĩ, ti ki rĩr jé, soldado ag.

³⁷ Ag tỹ nĕn tỹ ti kato vĩ mũ vỹ rán kỹ nĩ, hã vỹ: “Jesus, Judeu ag pã'i tỹ rei vĕ,” he mũ. Ti kri tóg sa, vĕnh rán ti. Ti tỹ nĕji vĕsỹ pã'i tỹ rei han mũ to ag tóg ti tén mũ.

³⁸ Ti kóm ag tóg ũn régre ag tỹ cruz to sãg mũ gé, bandido ag. Kỹ ũ tóg ti pĕgja tá sa, jó ũ tóg ti jakãnh tá sa.

³⁹ Kỹ ũ tỹ mũ mũ mũ ag tóg ti nyr' he mũ gé, vỹn vỹn hen kỹ.

⁴⁰ “Ã mỹ Topĕ jo ĩn kókĕn sór mũ?” he ag tóg mũ. “Ã mỹ kurã tãgtũ ki ũ han mãn sór mũ? Vĕnh kren han ra kema', cruz to kãtĕre kema', ã tỹ tỹ Topĕ kósĩn nĩn kỹ,” he ag tóg ti mỹ.

⁴¹ Ge ag tóg mũ gé. Topĕ tũ ki rĩr tĩ to pã'i ag, Topĕ vĩ to professor ag mré hã, kófa ag mré hã. Ti nyr ag tóg mũ gé, kỹ ag tóg jagnĕ mỹ:

⁴² “ũ ag krenkren han tóg, hã ra tóg vĕnh hã kren han ki kagtĩg nĩ,” he mũ. “Israel pã'i tỹ rei jé cruz to kãtĕre kema', ĕg tỹ ve jé, ĕg tỹ ti ki ge jé,” he ag tóg.

⁴³ “Topĕ ki ti nĕji rã kỹ jĕ, kỹ Topĕ jé ti kren han, ti tỹ ti to há nĩn kỹ. “Topĕ kósĩn vỹ tỹ inh nĩ,” he ti mỹr,” he ag tóg ti to, ti nyr kỹ, Judeu pã'i ag.

⁴⁴ Kỹ bandido ag, ũ tỹ ti kóm cruz to nỹtĩ ĕn ag tóg ti nyr mũ gé.

Jesus ter

(Mc 15.33-41; Lc 23.44-49; Jo 19.28-30)

⁴⁵ Rã tỹ ĕg nĩno kã sa ra tóg kuty' he mũ sir, ga kar mũ hã. Kuty ĕn tóg hora tãgtũ tũg mũ.

⁴⁶ 3 hora ki Jesus tóg prĕr mũ sir, kỹ tóg: “Eli, Eli, lemá sabactani?” he mũ. ĕg vĩ ki ĕg tóg tag to: “Topĕ, Topĕ, ã tỹ ne jé isovãnh nĕ?” he mũ.

⁴⁷ Kỹ ũ tỹ tá nỹtĩ ag tóg mĕg kỹ (ag tóg) jagnĕ mỹ: “Elias jé tóg prĕr mũ,” he mũ.

⁴⁸ Kỹ ũ tóg vĕnhvãg mũ sir, kỹ tóg esponja tỹ vinho prãg mũ, vinho kaja pir tỹ. Ka jurỹn kỹ tóg tỹ kusón kỹ vinho kãra rãg kỹ ti mỹ ven mũ sir, ti tỹ ki ũnh' ũnh' ke jé.

⁴⁹ Hã ra ũ ag tóg: “toreg',” he mũ. “Hĕn ri ke mũn Elias kãtĩg mũ, ti kren han jé,” he ag tóg.

⁵⁰ Hã ra Jesus tóg prĕr mág han mãn kỹ hun ke mũ sir.

⁵¹ Hã ra Topĕ jo ĩn krĕm kur tỹ jãnkã nĩfe tóg jaran ke mũ, ha mĕ, ti jar tóg vĕnh kãkym ke kãn mũ sir, ha mĕ.

⁵² Kỹ ga tóg ragra ke mũ gé sir, pãró vỹ gỹm ke mũ, vĕnh kej tỹ hĕn ri ke vỹ nugnor mũ, kỹ ũ tỹ Topĕ ki ge kỹ nỹtĩ tỹ hĕn ri ke ag

tóg rĩnrĩr mǎn mũ gé, ùn kǎgter ja ag. Ǻjag kej tá ag kǎpa mũ.

⁵³ Ẽn ag vỹ Jesus rĩr mǎn kar kỹ tá kǎpa kỹ cidade tỹ Jerusalém kǎra ge mũ, kỹ ag tóg ùn mỹ vėnh venven mũ sir, kỹ ù tỹ hėn ri ke ag tóg ag vigvėg mũ, Jerusalém tá ke ag.

⁵⁴ Hǎ ra capitǎo tóg soldado ag mré Jesus ki rĩr jė nĩ. Ga tỹ ragra ke ẽn vėg ag tóg mũ, nén kar ti, Jesus ter ẽn kǎ. Kỹ tóg ag mỹ e tĩ. Kỹ ag tóg: “hǎ ja vė,” he mũ. “Topė kósin ja vė mỹr,” he ag tóg mũ, capitǎo ag.

⁵⁵ Kỹ ùn tỹtǎ fag vỹ tá nỹtĩ gé, ù tỹ hėn ri ke fag. Kuvar há tá nỹtĩ kỹ fag tóg ti vėg nỹtĩ nĩ. Ti mré fag tóg kǎmũ ja nĩ, ga tỹ Galilėia tá. Ti ki fag rĩr ja nĩgtĩ.

⁵⁶ Fag kǎ ù fi vỹ tóg tỹ Maria Madalena fi nĩ, kỹ ù fi tóg tỹ Maria fi nĩ gé, José mré Tiago mỹnh tag fi. Kỹ ù fi vỹ tỹ Zebedeu krė ag mỹnh fi nĩ gé. Fag mré ke ù fag vỹ tá nỹtĩ gé.

*Ag tỹ vėnh kej kǎkǎ Jesus fi
(Mc 15.42-47; Lc 23.50-56; Jo 19.38-42)*

⁵⁷ Rǎké tóg nỹ ha, kỹ ùn há tóg tá jun mũ. Arimatėia tá tóg kǎtĩg ja nĩ. Ti jijin hǎ vỹ: José, he mũ. Jesus mré ke ù vė gé.

⁵⁸ Ẽn vỹ tóg Pilatos venh tĩ mũ, kỹ tóg ti mỹ Jesus to vĩ mũ, ti ter kar kỹ. Kỹ Pilatos tóg soldado ag mỹ: “ha ti mỹ ti fi,” he mũ.

⁵⁹ Kỹ José tóg Jesus va tĩg kỹ ti pǎg mũ sir, kur jǎnhkri tỹ.

⁶⁰ Kỹ tóg ǎ kej kǎkǎ ti fig mũ sir. Pó kǎkǎ tóg han ja nĩgtĩ, vėnh kej ti, hǎ ra tóg tǎg nĩ. José tũ vė, vėnh kej ẽn ti. Ẽn kǎkǎ tóg ti fig mũ sir, kỹ tóg pó tǎpér tĩn mũ, vėnh kej jǎnkǎ to, pó ẽn tỹ tóg ti kej nĩfėnh mũ sir, José ti. Kỹ tóg tĩ mũ.

⁶¹ Hǎ ra Maria Madalena fi vỹ tá nĩ nĩ, Maria ù ẽn fi ke gé. Ti kej rǎ fag tóg nĩgnĩ kỹ nỹtĩ nĩ.

Ag tỹ ti kej ki rĩr

⁶² Tỹ vaj kỹ, festa kurǎ kǎ Topė tũ ki rĩr tĩ to pǎ'i ag tóg vėnh mǎn mǎn mũ sir, Fariseu ag mré hǎ. Kỹ ag tóg Pilatos venh mũjėg.

⁶³ Ti mỹ ag tóg: “governador,” he mũ. “Vėnh kar krĩn kónǎn tĩ ẽn tóg tag tó ja nĩ, ha mẽ: “kurǎ tǎgtũ ki sóg rĩr mǎn ke mũ,” he ja ti nĩ. Ẽg tỹ tag to jykrén kỹ ẽg tóg ǎ mỹ nén ù to vĩ sór mũ gé ver.

⁶⁴ Soldado ag tỹ ti kej ki rĩr há tóg tĩ, kurǎ tǎgtũ ki. Ẽg mỹ tóg ti mré mũ tĩ ag tỹ ti to nón kỹ ti péjunh ha mẽ tĩ. Ẽg mỹ tóg ag tỹ ti péju kar vėnh kar mỹ: “rĩr mǎn ti, ǎ ter kar kỹ,” hėnh ha mẽ tĩ gé. Kỹ vėnh ó tǎg tag vỹ ti ón ja ẽn kǎfór pė nỹnh ke mũ. Hǎ kỹ soldado ag jėgnė, ag tỹ ti kej ki rĩr jé,” he ag tóg, Pilatos mỹ.

⁶⁵ Kỹ Pilatos tóg ag mỹ: “hej,” he mũ. “Vỹ nỹtĩ, ti kej ki rĩr ke mũ ag,” he tóg, soldado ù ag to. “Ti kej ki rĩr há han nĩ, ge kỹ,” he tóg.

⁶⁶ Kỹ ag tóg mũ kỹ ti kej to ag vin mũ, ti kej ki rĩr ti ẽn ag. Ti kej nĩfėnh mũ ẽn ség ag tóg mũ gé, vǎfe tỹ, pǎró to. Kỹ ag tóg go'or tỹ vǎfe ẽn kri tỹ tam ke mũ, ù tỹ ti kej nĩfe kunũg tũ nĩ jé.

28

Jesus rĩr mǎn

(Mc 16.1-10; Lc 24.1-12; Jo 20.1-10)

¹ Vėnhkǎn ke kurǎ tỹ vaj kỹ, semana tỹ kurǎ ve tag ki Maria Madalena fi tóg ti kej venh tĩ mũ, kusǎ ki, Maria ù ẽn fi mré hǎ.

² Hǎ ra ga tóg ragra ke tar han mũ sir. Kỹ Topė tỹ jėnė jafǎ tóg kǎnhkǎ tá kǎtėre mũ. Ti kej tá jun kỹ tóg pó tỹ jǎnkǎ nĩfe ẽn tĩn mũ, kỹ tóg kri nĩ mũ sir, pó ẽn kri.

³ Hǎ ra tóg tỹ ta tỹ kóm kóm ke ve nĩ, anjo ẽn ti. Ti kur vỹ kóprėj nĩ, kukryr kó kupri ri ke.

⁴ Kỹ soldado ag tóg jũrũn ke mũ, kamėg kỹ ag tóg kǎgter nỹtĩ ve nĩ.

⁵ Kỹ Topė tỹ jėnė jafǎ tóg ùn tỹtǎ fag mỹ vĩ mũ, kỹ tóg: “kamėg tũg nĩ,” he mũ. “Jesus jǎvǎnh ǎjag nỹtĩ, ag tỹ cruz to ùn sǎg mũ ẽn ti.

⁶ Ki ti tũ nĩ, rĩr ti huri, hǎ kỹ tóg ǎjag mỹ tó ja nĩgtĩ. Ki ti nỹ ja nĩgtĩ, ha kǎge jėg, ǎjag tỹ ti nỹgja ve jé,” he tóg mũ, fag mỹ, anjo ti.

⁷ “Kuri, ti mré mũ tĩ ag mỹ tónh mũjėg, ti rĩr mǎn ti, ti ter kar kỹ. Ha vé, ǎjag jo tóg tĩg mũ, Galilėia ra. Tá ǎjag tóg ti venh mũ, ha vemnĩ. Inh vĩ kǎ jatu' he tũg nĩ,” he tóg, Topė tỹ jėnė jafǎ ti.

⁸ Kỹ fag tóg ti kej tá kǎpa mũ sir, to fũrũrũn kỹ. Fag mỹ tóg e tĩ. Fag mỹ tóg sér pė tĩ, hǎ kỹ fag tóg pétė mũ sir, fag tỹ Jesus mré mũ tĩ ag mỹ tó jé.

⁹ Fag mũ ra Jesus hǎ ne fag kato jun ke mũ!, kỹ tóg fag mỹ: “mỹ sér nỹtĩmĩ,” he mũ.

Kỹ fag tóg ti to grën ke mũ, ti pën kãgmĩg fag tóg mũ sir. Ti krëm fag tóg mũg ke mũ gé.

¹⁰ Kĩ Jesus tóg fag mũ: “kamëg tũg nĩ,” he mũ. “Ha mũjëg, inh régre ag mũ tónh mũjëg, ag tỹ ga tỹ Galiléia ra mũ jé. Tá ag tóg inh venh ke mũ,” he tóg, Jesus ti. Kĩ fag tóg mũ mũ.

Soldado ag ón

¹¹ Fag mũn kĩa soldado ën ag tóg cidade ra mũ mũ, soldado tỹ Jesus kej ki rĩr mũ ën ag. Tá junjun kĩa ag tóg Topë tũ ki rĩr tĩ to pã'i ag mũ tó kãn mũ, ag tỹ nén vég mũ ën ti. Kĩ tóg ag mũ e tĩ.

¹² Kĩ ag tóg kófa ag mré vënh mãn mũ sir, ag tỹ to jykrén jé. “Ëg hỹn hẽ ri kenh mũ, vënh kar tỹ ti rĩr mãn tag to: ag ón vë, he jé?” he ag tóg mũ jagnë mũ. Ag tỹ to jykrén kar kĩa ag tóg soldado ag mũ jãnkamy e ven mũ sir.

¹³ “Jãnkamy tag to vënh kar mũ un'ón,” he ag tóg mũ, pã'i ag, soldado ag mũ. “Un'ón kĩa vënh kar mũ: ëg nũgnũr mũ jãvo Jesus mré mũ tĩ ag tóg ti péju ja nĩ, kuty si há tá, hã kĩa tóg ki tũ nĩ ha, hemnĩ,” he ag tóg, pã'i ag, soldado ag mũ.

¹⁴ “Hën ri ke mũn ãjag pã'i tỹ governador tóg mën h mũ, ãjag nũgnũr ja ti. Kĩ ëg tóg ti mré vëmén ke mũ, ti tỹ ãjag vóg kónãn tũ nĩ jé,” he ag tóg, Topë tũ ki rĩr tĩ to pã'i ag, soldado ag mũ.

¹⁵ Kĩa soldado ag tóg jãnkamy ën mãn kĩa mũ mũ sir. Vënh kar mũ ag tóg un'ón mũ mũ sir, Jesus mré mũ tĩ ag to. Hã kĩa Judeu ag tóg ver tag tó tĩ, ũnri.

Jesus tỹ ã mré mũ tĩ ag mũ vënh ven

(Mc 16.14-18; Lc 24.36-49; Jo 20.19-23;

Hk 1.6-8)

¹⁶ Hã ra ti mré mũ tĩ ag tóg ga tỹ Galiléia ra mũ mũ, pãnónh ũ ra, Jesus tỹ ag mũ: “ën ra mũjëg,” he ja ën ra.

¹⁷ Kĩa ag tóg tá ti vég mũ sir, kĩa ag tóg ti krëm mũgmũg ke mũ sir. Hã ra ag kãmĩ ũ ag mũ tóg vënhmỹ tĩ, ag tỹ ti vég mũ ra, kĩa tóg ag mũ ki hã ke tũ nĩ.

¹⁸ Kĩa Jesus tóg ag rã hã jun mũ, kĩa tóg ag mré vëmén mũ sir. “Nén kar vỹ tỹ inh krëm ke nĩ ha, kanhkã tá ke kar, ga tá ke kar ke gé,” he tóg, Jesus ti.

¹⁹ “Hã kĩa mũjëg, povo kar kanhrãn jé, ag tỹ inh ki ge jé. Ag tỹ inh ki ge kĩa nỹtĩn kĩa ag

kypemnĩ gé. Inh panh jiji tómnĩ, ag kygpe kĩa, kĩa ti kósin jyjy tómnĩ gé, kĩa Topë kuprĩg jiji tómnĩ gé, ãjag tỹ ag kygpe kĩa.

²⁰ Kĩa isỹ ãjag mũ nén tó mũ kãmén kãn nĩ gé, ag tỹ ki króm jé. Ha mẽ, ãjag mré sóg jë nĩ, kurã kar ki, ga tũg ke kurã ki ke gé. ãjag tovãnh ke tũ sóg nĩ ha,” he tóg, Jesus ti. Tĩ tỹ ã mré mũ tĩ ag jëgnëg mũn hã vë.

MARCOS TÛ RÁ

João Batista tÛ Jesus tó

(Mt 3.1-12; Lc 3.1-18; Jo 1.19-28)

¹ Sÿ Jesus Cristo kãme sér tónh ke vē, Topē kósin ti.

² Vāsÿ Jesus tóg rán kÿ nÿ, João ke gé, Jesus jo tÿnh ke ti. Topē vÿ tó tÿ tÿ Isaías vÿ Jesus rán ja nÿ, kÿ tóg: “ha vé, ã jo sóg ũ jēñēnh mÿ, ti tÿ vēnh kar kãn jé, ã tÿg ken jo,” he ja nÿ. “Ag jyvēnh jé tóg ke mÿ, kÿ tóg ēpry prun ri ke nÿ, ěmÿn kurynh ri ke.

³ Ěmã tÿg ja tá tóg jēnh ke mÿ, ga kórég tá. Tá tóg ag mÿ kãmén ke mÿ. “Ěg Senhor kãtÿg ke jo vēnh jãnhkrigkrig nÿ,” he tóg mÿ. “Ěpry kurég ājag tóg tÿ, ěmÿn kurynh ājag tóg tÿ, ājag chefe jun ken kÿ. Kÿ tag ri ke han nÿ, ājag jykre pãno togvãnh kÿ, ěg Senhor kãtÿg ken jo,” he tóg, ã jo tÿnh ke ti,” he ja tóg nÿ, Isaías ti, João to.

⁴ Kÿ João tóg jē mÿ, ěmã tÿg ja ki, ag kygpég tÿ ti. Ag jyvēnh tóg jēgtÿ, kÿ tóg: “ã kype jé sóg ke mÿ, ã tÿ ã jykre kórég tovãnh kÿ, Topē tÿ ã tÿ ti vÿ mranh tÿ ã mÿ vēnh pãte fón jé,” he tóg mÿ sir, vēnh kar mÿ.

⁵ Kÿ ag tóg ti to kãmÿ kãn mÿ sir, ga tÿ Judéia tá, cidade tÿ Jerusalém tá ke gé. Kÿ tóg ag kygpég mÿ sir, goj tÿ Jordão ki, ag tÿ: “Topē vÿ mranh sóg nÿgtÿ, tag han kÿ,” hen kÿ.

⁶ Jó João kur tóg cavalo pãñ sór kyki tÿ há nÿ. Nēn ũ fár tÿ tóg vēsógfÿn ja han tÿ gé. Ópã hã ko ti tÿ, mÿg mré, João ti.

⁷ Kÿ tóg Jesus kãmén kÿ (tóg) ag mÿ: “ũ tóg inh nón kãtÿ mÿ, ha mē,” he mÿ. “Inh kãfór ti nÿ. Sÿ tÿ ti camrada nÿnh ke vē vē, sÿ ti pēn né kunÿnh ke vē vē, ti pēn to ró ti, hã ra sóg tÿ ti krēm ke pē jē.

⁸ Goj hã tÿ sóg ājag kygpenh ke mÿ. Ũ tÿ inh nón kãtÿg ke ěn tóg sir Topē kuprÿg tÿ ājag jagrē han ke mÿ. Ti tÿ ājag kygpenh ken hã vē,” he tóg, João ti, vēnh kar mÿ.

João tÿ Jesus kype

(Mt 3.13-17; Lc 3.21-22)

⁹ Kÿ kejēn Jesus tóg João tá jun mÿ gé. Cidade tÿ Nazaré tá tóg kãtÿ mÿ, ga tÿ

Galiléia tá. Tá jun kÿ João tóg ti kypég mÿ sir, goj tÿ Jordão ki.

¹⁰ Ti tÿ goj kãtã kãkutē kÿ kanhkã vÿ nor mÿ sir vēsÿmér. Hã ra Jesus tóg vég jē nÿ. Kÿ tóg Topē kuprÿg vég mÿ. Sórãg ri ke ti nÿ, ti kãtére ti. Kãtére kÿ tóg Jesus kri nÿ nÿ sir.

¹¹ Kÿ tóg kanhkã tá vēnh vÿ mēg mÿ gé sir, kÿ tóg: “tÿ ã inh kósin pir jē, tÿ ã inh fe pē jēgtÿ,” he mÿ, vēnh vÿ tÿ mē há ěn ki.

Satanás tÿ Jesus krÿn kónãn sór

(Mt 4.1-11; Lc 4.1-13)

¹² Kÿ vēsÿmér Topē kuprÿg tóg Jesus krÿn mÿ, ti tÿ ěmã tÿg ja ra tÿg jé.

¹³ Kurã tÿ 40 (ke) tÿg tóg mÿ, ěmã tÿg ja ki, Jesus ti. Tá nÿnh kÿ Satanás tóg ti tÿ ã jóg vÿ mranh han sór mÿ, hã ra tóg ke tÿ nÿ. Nēn kãmÿ bicho ag vÿ tá mÿgtÿ gé, ěmã tÿg ja ki. Hã ra Topē tÿ jēñē jafã ag tóg ti ki rÿr mÿ sir, tá.

Jesus tÿ Galiléia ra vÿnh ke

(Mt 4.12-22; Lc 4.14-15; 5.1-11)

¹⁴ Kejēn ag tóg João ség mÿ. Ag tÿ ti se kar kÿ Jesus tóg ga tÿ Galiléia ra tÿ mÿ. Tá tóg ag mÿ Topē tÿ tÿ ěg pã'i nÿnh ke kãmén mÿ, vēnh kãme sér ěn ti.

¹⁵ Kÿ tóg: “Topē vÿ tÿ pã'i nÿ,” he mÿ. “Pētēm ti huri, ti kurã ti, ěg tÿ ti tÿ tÿ ěg pã'i nÿ ěn ve jé. Kÿ ājag jykre kórég tovãnh nÿ. Ti vÿ kri fimnÿ, ājag tÿ ti tÿ tÿ ěg pã'i nÿ ěn ve jé,” he tóg ag mÿ, Jesus ti.

¹⁶ Kejēn Jesus tóg nig fyr tÿ Galiléia he mÿ ěn jagma tÿ mÿ. Ā tÿ ti fyr mÿ tÿ ra tóg Simão Pedro vég mÿ, ti jãvy tÿ André ke gé. Kur tÿ pirã kugmÿ jafã tÿ ag tóg goj kãki fón mÿ, rede tÿ, pirã kugmÿ jé. Ag rãnhraj hã vē.

¹⁷ Kÿ Jesus tóg ag ve kÿ ag mÿ: “inh mré kãmÿmñÿ,” he mÿ. “Pirã kugmÿ há ājag nÿtÿ,” he tóg. “Ājag kanhrãn jé sóg ke mÿ, ājag tÿ ēprã ke ag tÿ inh ki ge han jé,” he tóg ag mÿ, Jesus ti.

¹⁸ Vēsÿmér ag tóg ti mré mÿ mÿ, ājag rede tovãnh kÿ, Pedro ti, André ti ke gé.

¹⁹ Kÿ ag tóg mÿ mÿ, goj fyr jagma. Ag mÿ sÿ han mÿ ra ag tóg ũn régre ũ ag vég mÿ gé. Ũ vÿ tÿ Tiago nÿ, kÿ ũ vÿ tÿ João nÿ, ti jãvy. Zebedeu krē ag vē. Canoa kãki ag nÿtÿ, pirã kugmÿ jafã ki han kÿ.

²⁰ Ag ve kÿ tóg vēsÿmér ag jé prēr mÿ, Jesus ti. Kÿ ag tóg ājag panh ré kÿ mÿ mÿ,

Zebedeu ti. Ag camarada ag vỹ ag panh mré canoa kãki nỹtĩ nĩ. Ag ré kỹ ag Jesus mré mũ mũ sir, Tiago ti, João ti ke gé.

*Jesus tỹ vẽnħ jagrẽ kórég kutẽm
(Lc 4.31-37)*

²¹ Kỹ ag tóg cidade tỹ Cafarnaum ki ge mũ sir. Vẽnħkán ke kurã ki tóg vêsỹmér Judeu ag vẽnħ kanhrãn jafã kãra rã mũ, ag kanhrãn jé, Jesus ti.

²² Ti tỹ ag kanhrãn kỹ tóg ag mỹ e tĩ, ti vỹ ti. Vẽnħ kar vỹ kãfór ti nĩ. Topẽ vỹ to professor ag vỹ kãfór ti nĩ gé. Hã kỹ tóg ki hã tó mũ. Kỹ tóg ag mỹ e tĩ.

²³ Hã ra ù tóg tá nĩ nĩ, Judeu ag vẽnħ kanhrãn jafã tá. Jagrẽ kórég ti nĩ.

²⁴ Æ tỹ Jesus ve kỹ tóg prẽr mũ. “Æ tỹ ẽg tỹ hẽ ri ke nẽ, Nazaré tá Jesus'?” he tóg. “Æ mỹ ẽg kókén sór tũ'? Æ ki kanhró sóg nĩ. Tỹ ã tóg ã pir mỹ Topẽ mré ke nĩ, ti tũ pẽ vỹ tỹ ã nĩ,” he tóg, ùn jagrẽ kórég ti.

²⁵ Hã ra Jesus tóg ti mỹ vỹ tar han mũ, kỹ tóg: “vỹ tũg ra,” he mũ. “Ti tovãnh ra,” he tóg.

²⁶ Kỹ ti jagrẽ kórég ẽn tóg ti ter tĩ han mũ sir, prẽr tóg mũ sir. Kỹ tóg ti tovãnh mũ.

²⁷ Kỹ tóg vẽnħ kar mỹ e tĩ mỹr sir. Jagnẽ mỹ ag tóg: “ne nẽ vé'?” he mũ. “Vẽnħ vỹ tãg mỹ vó?” he ag tóg mũ. “Vẽnħ jagrẽ kórég ag mỹ tóg vỹ tĩ, kỹ ag tóg ki ke tĩ, ti kamẽg kỹ. Ag kri ke hỹn,” he ag tóg mũ, Jesus to.

²⁸ Kỹ ti vẽme tóg vẽnħ kar kri rũm mũ, Galiléia tá ke kar kri.

*Jesus tỹ Pedro má fi tỹ há' he
(Mt 8.14-15; Lc 4.38-39)*

²⁹ Kar tóg Judeu ag vẽnħ kanhrãn jafã ki kutẽ mũ, Jesus ti, kỹ tóg Simão Pedro ãn ra rã mũ sir. André mré ti ãn vẽ. Tiago vỹ João mré ra rã mũ gé.

³⁰ Hã ra Pedro prũ fi mỹnh fi vỹ kaga nỹ nĩ, rỹg nỹ fi nĩ. Kỹ ag tóg Jesus mỹ fi tó mũ.

³¹ Kỹ tóg fi venh tĩ mũ. Fi nĩgé kãgmĩ kỹ tóg fi nĩm mũ. Kỹ fi rỹg ẽn tóg tũ' he mũ sir. Ag ki rĩr fi tóg mũ sir, Pedro má fi.

*Jesus tỹ ùn kagyga ag tỹ há' he
(Mt 8.16-17; Lc 4.40-41)*

³² Kurã ẽn kã kuty tá ag tóg ùn kagyga ag tatĩ kãmũ mũ, ùn jagrẽ kórég ag mré hã.

³³ Cidade ẽn ki ke kar ag vỹ ti ãn jãnkã tá nỹtĩ mũ.

³⁴ Kỹ Jesus tóg ag tỹ há' he kãn mũ sir, fag tỹ ke gé. Vẽnħ jagrẽ kórég pan kãn tóg mũ gé. Kỹ ag tóg ti tó sór mũ, ag tỹ ti ki kanhró nỹtĩ kỹ. Hã ra tóg ag mỹ: “vỹ tũg nĩ,” he mũ.

*Jesus tỹ ã jóg mré vỹ
(Lc 4.42-44)*

³⁵ Tỹ vaj kỹ tóg kurã ke ra (tóg) rĩr mũ, Jesus ti. Kỹ tóg ẽmã tũ ra tĩ mũ sir, Topẽ mré vỹ jé.

³⁶ Kỹ Simão tóg ti kanẽg tĩ mũ, ti jãvãnh kỹ. Ti mré ke ag mré tóg tĩ mũ.

³⁷ Kỹ ag ti vég mũ sir. Kỹ ag tóg ti mỹ: “vẽnħ kar vỹ ã kanẽgnẽg mũ, ã jãvãnhvãnh kỹ,” he mũ.

³⁸ Kỹ Jesus tóg ag mỹ: “mũ nỹ, cidade ù ra,” he mũ, “sỹ ag mỹ Topẽ vỹ tó jé gé. Hã jé sóg kãtĩg,” he tóg mũ ag mỹ, Jesus ti.

³⁹ Kỹ tóg ga tỹ Galiléia kar mĩ tĩ mũ. Vẽnħ kanhrãn jafã krẽm tóg ag mỹ Topẽ vỹ tó mũ sir. Ag jagrẽ kórég pan tóg mũ gé sir.

*Jesus tỹ ùn kaga kren vãnh tỹ há' he
(Mt 8.1-4; Lc 5.12-16)*

⁴⁰ Kỹ kejẽn ùn kaga kren vãnh vỹ ti to kãtĩ mũ, vẽnħ kaga tỹ lepra he mũ ẽn han mũ ẽn. Kỹ tóg ti krẽm grĩnh ke mũ, ti mỹ nẽn ù to vỹ jé. Kỹ tóg: “ã mỹ isỹ há' he sór tũ nĩ'?” he mũ. “Æ hã tóg isỹ há' henh mũ, ã tỹ isỹ há' he sór kỹ,” he tóg ti mỹ.

⁴¹ Kỹ tóg Jesus mỹ jagtar tĩ. Kỹ tóg ã nĩgé tỹ ti mẽg kỹ ti mỹ: “hej,” he mũ. “To sóg há nĩ. Há' he ja há ã tóg nĩ,” he tóg ti mỹ.

⁴² Kỹ tóg ti kaga kren vãnh ẽn kren han mũ sir vêsỹmér. Kỹ tóg jãnhkri nĩ sir, ti fãr ti.

⁴³ Kỹ Jesus tóg ti mỹ vỹ tar han mũ, ti tĩg jé.

⁴⁴ Kỹ tóg ti mỹ: “ker ù mỹ tó hẽ,” he mũ. “Ha tĩg, Topẽ tũ ki rĩr tĩ to. Ti hã mỹ tómnĩ, kỹ Topẽ mỹ nĩm nĩ, Moisés tỹ vãsỹ ẽg mỹ nẽn tó ja tĩ, ã jãnhkri to. Hã tũgrĩn vẽnħ kar vỹ ã tỹ há' he mũ tag ki kanhrãn mũ,” he tóg ti mỹ, Jesus ti.

⁴⁵ Hã ra tóg vẽnħ kar mỹ tó mũ sir. Kỹ vẽme ẽn vỹ vẽnħ kar kri rũm mũ. Hã kỹ Jesus tóg ẽmã ù ki rã tũ nĩgtĩ, vẽnħ ven jé. Ẽmã tũ mĩ tóg tĩgtĩ, hã ra ag tóg ẽmã kar tá ti to kãmũ tĩ.

2

*Jesus tỹ ùn grĩngrĩn kỹ nỹ tỹ há' he
(Mt 9.1-8; Lc 5.17-26)*

¹ Kãnhmar Jesus tóg kejẽn cidade tỹ Cafarnaum tá jun mãn, kỹ ag tóg mễg mũ sir, ti tỹ tá nĩn ki, ti tỹ hẽ tá nĩ ên tá.

² Kỹ ùn e ag vỹ ti to vẽn h mãn, kỹ tóg fór nĩ, jãnkãn mĩ hã. Kỹ Jesus tóg ag mỹ Topẽ vĩ tó jẽ nĩ.

³ Hã ra ù ag tóg tá junjun mũ gé sir, ùn grĩngrĩn kỹ nỹ vyn kỹ, ù tỹ 4 (ke) ag vẽ.

⁴ Hã ra ag tóg ti pětẽm tũ nĩ sir, ti tỹ ag jy fór tĩn kỹ. Kỹ ag tóg ãn kunũg mũ, ti kri. Nor ên ki ag tóg ùn grĩngrĩn kỹ nỹ ên ti térem mũ, kur kãkã nỹ ti.

⁵ Kỹ Jesus tóg ag jykre vég mũ sir, ag tỹ ti ki ge kỹ nỹti ti. Kỹ tóg ùn grĩngrĩn kỹ nỹ ên mỹ: “inh kósin,” he mũ. “Ã tỹ Topẽ vĩ mranh ja tỹ tũ' he vẽ ha,” he tóg ti mỹ, Jesus ti.

⁶ Hã ra Topẽ vĩ to professor ù ag vỹ tá nỹti gé. Ti vĩ to ag tóg jykren mũ sir.

⁷ “Ne nẽ hỹn', ti tỹ tó tag ti?” he ag tóg mũ, komẽr hã. “Topẽ to vĩ kónãn vẽ,” he ag tóg. “Topẽ hã ne ã pin kỹ ẽg tỹ Topẽ vĩ mranh ên tỹ tũ' he há nĩnh mũ. Ti hỹn vẽnỹ Topẽ han mũ,” he ag tóg mũ, ti to jykren kỹ.

⁸ Hã ra Jesus tóg ki kanhró nĩ, ã fe tỹ, ag jykren ki. Kỹ tóg ag mỹ: “ãjag tỹ ne to jykren kónãn nẽ?” he mũ.

⁹ “Ne nỹ ãjag mỹ vẽnhmỹ nỹ?” he tóg. “Ùn grĩngrĩn kỹ nỹ tag mỹ sóg: ã tỹ Topẽ vĩ mranh ja ên tỹ tũ' he vẽ ha, hé,” he tóg. “Kỹn mỹ ãjag mỹ vẽnhmỹ?” he tóg. “Sỹ ti mỹ: nĩ ra, ã kur gé(g) tĩg, henh ke nẽ ha,” he tóg. “Kỹn mỹ ãjag mỹ vẽnhmỹ ke gé?” he tóg.

¹⁰ “Hã ra isỹ ãjag mỹ inh jykre ven sór vẽ ha. Tỹ sóg ẽprã ke fi kósin nĩ. Tá sóg krỹg ke mũ, Topẽ vĩ mranh tỹ vẽn h pãte fón ke tá. Sỹ tá krỹg mũ ven jẽ sóg ke mũ, ãjag mỹ,” he tóg. Hã kỹ tóg ùn grĩngrĩn kỹ nỹ ên mỹ:

¹¹ “nĩ ra, ã kur gé(g) tĩg,” he mũ, Jesus ti.

¹² Kỹ tóg jẽgnẽ mũ sir, ã kur gég tóg mũ sir vãhã, kỹ tóg ag rĩnve tĩ mũ sir, ùn grĩngrĩn kỹ nỹ ja ên ti.

Vẽn h kar mỹ tóg e tĩ, kỹ ag tóg Topẽ to: “ẽg jykre kãfór ti nĩ,” he mũ. “Ge ve ja tũ ẽg nỹti,” he ag tóg mũ sir.

*Jesus tỹ Levi jẽ prẽr
(Mt 9.9-13; Lc 5.27-32)*

¹³ Kỹ Jesus tóg tĩg mãn mũ, goj nig tỹ Galiléia ra. Kỹ vẽn h kar ag tóg ti pẽnĩn vẽn h mãn mãn mũ sir. Kỹ tóg ag kanhrãn mũ gé.

¹⁴ ã tĩg mãn kỹ tóg Levi vég mũ, Alfeu kósin. Governo mỹ imposto kaja mãg ti tĩ, hã ra tóg ã rãnrãj han nĩ nĩ. Kỹ Jesus tóg ti mỹ: “inh mré kãtĩg,” he mũ. Kỹ tóg jẽgnẽ kỹ ti mré tĩ mũ sir.

¹⁵ Kỹ tóg kejẽn ti ãn krẽm jẽg mũ, Jesus ti, Levi ãn krẽm. Hã ra ti mré ag e nỹti, governo mỹ jãnkamy mãg tĩ ag, Topẽ vĩ mranh tĩ ag ke gé. Jesus mré ag nĩgnĩg kỹ nỹti, ti mré mũ tĩ ag mré ke gé. E tãvĩ ag nỹti, ti nón mũ ag.

¹⁶ Hã ra Topẽ vĩ to professor ù ag vỹ tỹ Fariseu nỹti gé. Jesus vég ag tóg mũ, ti tỹ Topẽ vĩ mranh tĩ ag mré jẽn kỹ. Kỹ ag tóg Jesus mré mũ tĩ ag mỹ vĩ mũ. “Ti hã ne tóg ag mré jẽg mũ” he ag tóg. “Governo mỹ jãnkamy mãg tĩ ag mré tóg jẽg mũ,” he ag tóg, “Topẽ vĩ mranh tĩ ag mré ke gé,” he ag tóg.

¹⁷ Hã ra Jesus tóg mễg mũ, ag vẽn e ên ti. Kỹ tóg ag mỹ: “ùn kagyga tũ ag vỹ médoco venh mũ tũ nĩgtĩ,” he mũ. “Hã ra ùn kagyga ag hã vỹ ti venh mũ tĩ,” he tóg ag mỹ, Jesus ti. “Inh pi(jé) ù tỹ vẽn h jykre kuryj han mũ ag mỹ: “ãjag jykre tovãnh nĩ,” he sór tĩ'. ù tỹ Topẽ vĩ mranh ja nĩ ên ag hã mỹ sóg: “ãjag jykre kórég tovãnh nĩ,” he sór tĩ. Hã jẽ sóg ãjag mỹ vẽn h ven,” he tóg ag mỹ, Jesus ti.

*Vãkre
(Mt 9.14-17; Lc 5.33-39)*

¹⁸ Hã ra João mré mũ tĩ ag tóg kejẽn vãkrég mũ, jẽg tũ ag nĩ, ag tỹ Topẽ mỹ há nỹti jẽ. Kỹ Fariseu ag vãkrég mũ gé. Kỹ ag tóg Jesus mỹ: “João mré mũ tĩ ag vỹ tóg vãkrég mũ, Fariseu mré mũ tĩ ag ke gé,” he mũ. “Jo ã mré mũ tĩ ag ne tóg vãkrég tũ nĩ'. Vãkre kurã vẽn mỹr,” he ag tóg ti mỹ, tá nỹti ù ag.

¹⁹ Kỹ Jesus tóg ag mỹ comparação han mũ. “Vẽn h kyprũg to kãmũ ên ag pi(jé) vãkrég tĩ,” he tóg. “Festa vẽn mỹr, vẽn h prũgprũg ti, kỹ ti mré ke ag tóg ùn prũg mũ ên venh kãmũ tĩ,” he tóg. “Ge ti nĩ, inh mré mũ ag mỹ. Isỹ ag mré nĩn kỹ tóg ver ag mỹ sér tĩ,” he tóg ag mỹ, Jesus ti.

²⁰ “Vãhã tóg jun mũ, inh kurã ti, kỹ ag tóg inh pére mũnh mũ, ên kã hã ag tóg ãjag

vākrenh ke venh mũ, kurã ãn kã, inh mré mũ tĩ ag,” he tóg.

²¹ “Ti si fag pi(jé) vãfe kygnej tũ tỹ kur si jar ki hyn han tĩ ja nýtĩgtĩ'. Ûn kygnej tũ tỹ ki hyn han mũ ra tóg jaran kenh mũ. Kĩ kur si jar ãn tóg mág mũ. Ûn kygnej hã tỹ fag tóg ki han han tĩ, kỹ tóg jaran ke tũ nĩ,” he tóg, Jesus ti. Ti tỹ ã jykre tãg tón hã vë, hã ra tóg kur kygnej tũ ri ke nĩ.

²² Kỹ tóg ag mỹ: “Kỹ vinho vỹ ge nĩgtĩ gé,” he mũ gé. “Ëg pi(jé) vinho kajãg mũ tỹ ti fãr si tỹ sacco ki kujëg tĩ mỹr',” he tóg. “Ke tũ nĩ (mũ) ra tóg kugnãj kỹ jar mũ, kógnãj kỹ. Kỹ vinho tóg tũ' he mũ, sacco ti ke gé mỹr. Vinho kajã tỹ ti fãr tãg tỹ ki kujën ke vë mỹr,” he tóg. Jesus tỹ ã jykre tãg tón hã vë.

*Vënhkán ke kurã
(Mt 12.1-8; Lc 6.1-5)*

²³ Kejën Jesus tóg êpỹ mĩ tĩ mũ, trigo kré mĩ. Tĩ mré mũ tĩ ag tóg ti mré mũ mũ. Vënhkán ke kurã vë. Ag mũ kỹ ti mré mũ tĩ ag vỹ trigo mugmó tỹ kam ke mũ, ko jé.

²⁴ Kỹ Fariseu ag tóg Jesus mỹ: “ha vé,” he mũ. “Ag tỹ ne jé ãjag tỹ nén han ke tũ han në, vënhkán ke kurã ki?” he ag tóg mũ. “Vënh rãnrãj vë mỹr, ag tỹ trigo tỹ kam ke ti,” he ag tóg, Jesus mỹ.

²⁵ Kỹ tóg ag mỹ: “vó,” he mũ. “Davi tỹ nén han mũ to jykrén nĩ,” he tóg. “Ti kókĩr nĩn kỹ tóg ã tỹ nén han ke tũ han gé, ã mré mũ tĩ ag mré, hã ra Topë pi(jé) ti to jũ mũ', tag han tigrĩn, ha mẽ.

²⁶ Topë jo ãn kãra tóg rã, Davi ti, Abiatar tỹ Topë tũ ki rĩr tĩ to pã'i nĩn kỹ. Tá tóg Topë jamĩ ãn kó, tỹ ti tỹ konh ke tũ ra, Topë tũ ki rĩr tĩ ag hã tỹ konh ke vë vë. Hã ra tóg kó, ti mré mũ ag mỹ tóg vënh ken gé, Davi ti,” he tóg, Jesus ti. “Rãn kỹ tóg nĩ nĩ,” he tóg.

²⁷ Kỹ Jesus tóg ag mỹ: “Topë vỹ ãg mỹ vënhkán ke kurã nĩm, ãg tỹ ki vënhkán jé,” he mũ. “Hã ra tóg tỹ kurã kórég han tũ nĩ, vënhkán ke kurã tỹ,” he tóg.

²⁸ “Hã kỹ sóg tỹ vënhkán ke kurã to pã'i nĩ gé. Tỹ sóg êprã ke fi kósin nĩ mỹr,” he tóg ag mỹ, Jesus ti.

3

*Jesus tỹ ãn nĩgé tóg tỹ há' he
(Mt 12.9-14; Lc 6.6-11)*

¹ Kejën Jesus tóg vënh kanhrãn jafã ra rã mãn mũ. Tá ã tóg jë nĩ, ti nĩgé tóg tóg ja nĩ.

² Kỹ ag tóg ti tugnỹm mũ sir, “kema ãg tỹ ti tỹ vënhkán ke kurã kã ti tỹ há' he ve jé,” he ag tóg mũ sir. Hã ra ag tóg pã'i ag mỹ ti tóg sór mũ, ti tỹ vënhkán ke kurã to Topë vỹ mranh kỹ.

³ Hã ra Jesus tóg ãn nĩgé kórég ãn mỹ: “kunĩg,” he mũ.

⁴ Kỹ tóg ag mỹ: “vënhkán ke kurã ki ãg hỹn ne han mũ?” he mũ, “ãg tỹ Topë vỹ ki króm jé,” he tóg. “Ëg mỹ hỹn nén ã há han mũ?” he tóg. “Ëg tỹ ã tũ kókén kỹn mỹ kórég tũ nĩnh mũ?” he tóg ag mỹ. “Ëg mỹ ã kren han mũ hỹn?” he tóg. “Ëg tỹ ã tén kỹn mỹ há nĩnh mũ hỹn?” he tóg. Hã ra ag tóg ti mỹ katy tĩ sir.

⁵ Kỹ tóg ag ki êvãnh kỹ jũ mũ sir, fe kaj tóg nĩ sir, ag krĩ tũ nýtĩn kỹ. “Á nĩgé tỹ krỹg' hé,” he tóg ti mỹ, ãn nĩgé tóg ãn mỹ. Kỹ tóg tỹ krỹg' he mũ sir, há' he tóg mũ sir, vãhã, ãn nĩgé tóg ja ãn ti.

⁶ Kỹ vãhã Fariseu ag mũ mũ sir, jagnë mré ti to jykrén jé, pã'i mág tỹ Herodes mré ke ag mré ke gé. “Ëg hỹn hë ri ken kỹ ti tũg mũ?” he ag tóg mũ, Jesus ti to.

Jesus tỹ goj nig fyr tá ag kanhrãn

⁷ Hã ra Jesus tóg ti mré mũ tĩ ag mré goj nig tỹ Galiléia ra tĩ mũ, vënh e tũg ja ra. Hã ra vënh e ag tóg ti nón mũ mũ. Ga tỹ Galiléia tá ag tóg kãmũ mũ, ga tỹ Judéia tá ke gé,

⁸ cidade tỹ Jerusalém tá, ga tỹ Iduméia tá, goj tỹ Jordão mã tá, cidade tỹ Tiro tá, cidade tỹ Sidom tá ke gé. E tãvĩ ag nýtĩ, e pë. Ti tỹ nén hyn han kar mẽ kỹ ag tóg ti to kãmũ mũ.

⁹ Kỹ Jesus tóg ti mré mũ tĩ ag mỹ tóg mũ, ag tỹ ti mỹ canoa jãján jé. Ti kutãn ag tóg, vënh kar ãn ti, hã kỹ tóg canoa to vỹ mũ.

¹⁰ Û tỹ hën ri ke tỹ há' he ja tóg nĩ, ãn kagyga ag tỹ, fag tỹ ke gé. Hã kỹ ag tóg ti kutãn mũ. Ag tỹ ti mẽ sór vë, ãjag nĩgé tỹ.

¹¹ Kỹ ãn jagrë kórég ag vỹ tá nýtĩ gé. Ag tỹ Jesus ve kỹ ag tóg prënrënr mũ sir. “!..Tỹ ã Topë kósin ne..!” he ag tóg mũ, prënrënr kỹ.

¹² Kỹ Jesus tóg ag mỹ vỹ tar han tĩ. “Ker inh kãmén hë',” he tóg tĩ, ag mỹ.

*Jesus tỹ ã tỹ 12 (ke) ag vin
(Mt 10.1-4; Lc 6.12-16)*

13 Kejën tóg pãnonh ra tĩ mũ, Jesus ti. Kĩ tóg ag jé prër mũ, ag kuprëg kũ. Kĩ ag tóg ti to mũ mũ.

14 Kĩ tóg ù tỹ 12 (ke) ag vin mũ sir, ag tỹ tỹ ti mré mũ tĩ nỹtĩ jé, ti tỹ ag jëgnë jé ke gé, “Topë vĩ tó jé,” he tóg.

15 Ag mỹ tóg vënh jykre nĩm mũ, ag tỹ vënh jagrë kórëg pan jé.

16 Û tỹ 12 (ke) ag hã vë, ha mẽ: Simão, Jesus tỹ ti jyy ù hã vỹ: Pedro, he mũ,

17 Tiago ke gé, ti jãvy tỹ João mré, Zebedeu krë tag ag. Jesus tỹ ag jiji ù hã vỹ: Boanerges, he mũ, ãg vĩ ki ke hã vỹ: ta tỹ tỹrỹrỹ he ri ke ag, he mũ,

18 André ke gé, Filipe ke gé, Bartolomeu ke gé, Mateus ke gé, Tomé ke gé, Tiago ke gé, Alfeu kósin tag ti, Tadeu ke gé, Simão ke gé, ag tỹ ù to: Zelote, he mũ tag ti,

19 Judas Iscariotes ke gé, ù tỹ pã'i ag mỹ Jesus ven ke ti.

Topë vĩ to professor ag tỹ Jesus to vĩ kónãn

(Mt 12.22-32; Lc 11.14-23; 12.10)

20 Kĩ Jesus tóg ag mré ã jamã tá jun mũ. Kĩ vënh kar tóg sir tá vënh mãn mũ, kũ tóg ag jën ke mũ ra vënhmỹ tĩ, Jesus mré mũ ag.

21 Kĩ Jesus kanhkã fag vỹ ti vëme mẽ kũ ti kãgmĩnh kãmũ mũ. “Krĩ vënhmỹ nĩ ve ti nĩ,” he fag tóg, hã kũ fag tóg ti kãgmĩ sór mũ. Hã ra tóg fag mré tĩ tũ nĩ.

22 Kĩ Topë vĩ to professor ag tóg tá junjun mũ gé. Jerusalém tá ag tóg kãmũ jëg, ti ve jé. Kĩ ag tóg ti to: “jagrë kórëg ti hỹn nĩ,” he mũ. “Hã kũ tóg vënh jagrë kórëg ag pã'i ãn jykre han mũ, vënh jagrë kórëg ag pan jé,” he ag tóg. “Belzebu jykre tỹ tóg ag pan mũ, Nénkórëg jykre tỹ,” he ag tóg, Jesus to, Topë vĩ to professor ag.

23 Kĩ Jesus tóg ag jé prër kũ ag mỹ comparação han mũ, kũ tóg: “Satanás vỹ vënh jagrë kórëg pan tũ nĩgtĩ mỹr,” he mũ, Jesus ti.

24 “Pã'i pir krëm ke ag tỹ jagnë kato tëgtën kũ ag tóg jagnë kãgtén kãn ke mũ,” he tóg.

25 “Ïn pir kã ki ke ãn fag tỹ jagnë kato tẽ kũ fag tóg jagnë kãgtén kãn ke mũ gé,” he tóg.

26 “Satanás krëm ke ag tỹ jagnë kato tẽ kũ ag tóg jagnë tỹ tũ' henh ke mũ gé, kũ tóg tũ' he mũ sir, Satanás ti,” he tóg.

27 “Ëg tỹ ù tỹ nén ù mãn sór kũ, ti ïn tá, kũ ãg tóg ti se vén tĩ, ke tũ nĩ (mũ) ra tóg ã tũ ki rĩr ke mũ, kũ ãg tóg ti tũ mãn tỹ hë ri kenh ke tũ nĩgtĩ, ti tar nĩn kũ. Ëg tỹ ti se kar kũ ãg tóg ti tũ mãm mũ sir,” he tóg. “Ge ti nĩgtĩ, sỹ nén han mũ ti. Tar ti nĩ, Japo ti, hã ra sóg hur ti sé, hã kũ sóg ti tũ ag kygvãg mũ sir, ag jagrë kórëg pan sóg mũ sir,” he tóg, Jesus ti.

28 “Sỹ ke há vë, hã kũ sóg tó mũ,” he tóg. “Topë vỹ ãjag mỹ vënh pãte fón kãn mũ, ãjag tỹ ti vỹ mranh kar ãn tỹ, ãjag tỹ ti kato vỹ kónãn mré hã,” he tóg.

29 “Jãvo ãjag tỹ Topë kuprĩg kato vỹ kónãn kũ tóg ãjag mỹ vënh pãte fón mãn ke tũ nĩ ha, Topë ti,” he tóg. “Ëjag tỹ Topë vỹ mranh ãn vỹ ãjag hã kã nĩ nĩ, kurã tũ ti nĩ,” he tóg, Jesus ti.

30 Ag mỹ tóg ke mũ, Jesus ti, ag tỹ ti to: “jagrë kórëg ti hỹn nĩ,” hen kũ.

Jesus mré ke pë fag

(Mt 12.46-50; Lc 8.19-21)

31 Kũ ti mỹnh fi tóg ti jãvy ag mré ti venh kãtĩ mũ. Re kã fi jë ag mré, kũ ag tóg ù jëñëg mũ, ti jé prër jé.

32 Jesus pënĩn vënh e vỹ tóg nỹtĩ, nĩgnĩg kũ, kũ ag tóg: “ha mẽ, ã mỹnh fi vỹ re kã jë, ã jãvy ag mré,” he mũ. “Fag tỹ ã mré vëmén sór vë. ã jé prër fag tóg mũ,” he ag tóg ti mỹ.

33 Hã ra Jesus tóg: “inh mỹnh fi mỹ inh ve sór mũ!, inh jãvy ag mré?” he mũ. “Inh mỹnh fi vë vë, inh jãvy ag vë vë, hã ra ag tóg tỹ inh mré ke pë tũ nỹtĩ,” he tóg.

34 Kũ tóg ùn nĩgnĩg kũ nỹtĩ ag ki ãvãnh kũ tóg: “inh mỹnh fi hã vë, inh jãvy ag hã vë gé,” he mũ.

35 “Û tỹ Topë vỹ han mũ ãn ag vỹ tỹ inh jãvy nỹtĩ, inh ve fag ke gé, inh mỹnh ke gé,” he tóg ag mỹ, Jesus ti.

4

Nén fy to comparação

(Mt 13.1-9; Lc 8.4-8)

1 Kejën Jesus tóg goj nig tỹ Galiléia fyr tá ag kanhrãn mãn mũ. Hã ra vënh e vỹ ti pënĩn nỹtĩ, vënh e tävĩ, hã kũ tóg canoa kãra rã mũ, goj kãki, kũ tóg canoa kãkã nĩ mũ, hã ra ag kar vỹ tar tá vënh mãn kũ nỹtĩ, nig fyr tá.

² Ag mý tóg vënh ví e tó mũ, comparação han kÿ.

³ Kÿ tóg kejën ag mý: “ha mẽ,” he mũ. “Û tóg nén ù fy krigkrig tĩ mũ,” he tóg.

⁴ “Ti tÿ krigkrig kÿ ti fy ù tóg ãmĩn kri kutë mũ, ãpÿ kri. Kÿ sēsĩ tóg ti ko mũ sir.

⁵ Ti fy ù tóg pãró kri kutë mũ, ga e tũ ki, kÿ tóg kãnhmar mur mũ vë, ga sĩ ãn ki.

⁶ Hã ra rã tóg ã tÿ ãg nĩno kã sa kÿ (tóg) ti pũn mũ. Ti jãre han tũ nĩn kÿ tóg tóg mũ.

⁷ Ti fy ù tóg sỏnh kãki kutë mũ, kÿ sỏnh tóg ti mré mur mũ, ti kri rũm tóg mũ sir kÿ tóg kanë han tũ nĩ.

⁸ Ti fy ù tóg ga há kri kutë mũ kÿ tóg mur há han mũ, mog há han tóg mũ, kanëh ha han tóg mũ gé, ù tóg kanë tÿ 30 (ke) han, jo ù vÿ kanë tÿ 60 (ke) han, jo ù vÿ kanë tÿ 100 (ke) han.

⁹ Û nĩgrëg nÿtĩ tÿ tÿ jëmë jé,” he tóg, Jesus ti.

*Jesus tÿ nén fy to comparação kãmén
(Mt 13.10-23; Lc 8.9-15)*

¹⁰ Ûn e ãn ag mũn kar kÿ ti mré nÿtĩ ag tóg ti ki jëmënh kãmũ mũ, nén fy kãmén ti. Kÿ ag tóg ti mÿ: “ã tÿ ãg mÿ ne tó nẽ?” he mũ.

¹¹ Kÿ tóg ag mÿ: “ãjag hã tóg Topë tÿ tÿ ãg pa'i nĩ ki kanhró nÿtĩnh mũ, ijo tó ja tũ ãn ki,” he mũ. “Hã ra sỏg ãn ag mÿ comparación tãvĩ han mũ.

¹² Ag mÿ sỏg tó há han ke tũ nĩ, ón kÿ męg mũ ag mÿ, kÿ ag tóg ãjag tÿ vэг mũ ra ki kagtĩg nÿtĩ, ãjag tÿ męg mũ ra ag tóg to jykrén tũ nÿtĩ, kÿ ag tóg Topë ki ge tũ nÿtĩ gé, kÿ Topë tóg ag mÿ vënh pãte fón ke tũ nĩ gé,” he tóg, Jesus ti, ù ag to.

¹³ Kÿ tóg ag mÿ: “ãjag tÿ to jykrén tũ tóg tĩ,” he mũ, “sÿ ãjag mÿ nén fy kãmén kÿ,” he tóg. “Kÿ ti mÿ ãjag tÿ ù to jykrén há nĩnh mũ', sÿ ãjag mÿ comparación ù han kÿ?” he tóg.

¹⁴ Kÿ tóg jamã hár(a) ag mÿ kãmén mũ. “Û tóg nén fy vãvãm tĩ, kÿ ti tÿ Topë vĩ tó vë, hã vÿ: vãvãm, he mũ, nén fy ri ke vë,” he tóg.

¹⁵ “Ti fy ù vÿ ãmĩn kri kutë mũ. Kÿ Topë vĩ męg mũ ù ag vÿ ãpÿ ri ke nÿtĩ,” he tóg. “Ag tÿ Topë vĩ męg mũ ra tóg ag mÿ tÿ tũ' he mũ, Satanás ti, Topë vĩ tÿ. Vësÿmér tóg ag mÿ tÿ tũ' he mũ, ag mÿ Topë vĩ tó tÿ. Kÿ ãmĩn ri ke vë sir.

¹⁶ Hã ri ken hã vë gé, ti tÿ pãró kri vãvãm ãn ti. Ag tÿ Topë vĩ mẽ kÿ ag tóg vësÿmér: hej, he mũ sir. Ag mÿ tóg sér tĩ.

¹⁷ Hã ra ag tóg nén kré jãre tũ ri ke nÿtĩ, kÿ ag tóg mũ sĩ han mũ, Topë mré. Nén ù jagy kutë kÿ ag tóg sir Topë tovãnh mũ vësÿmér, ù tÿ Topë tugrĩn ag kato tẽ kÿ.

¹⁸ Ti tÿ sỏnh kãki vãm ãn hã vë gé, hã vÿ tÿ Topë vĩ męg mũ ag nÿtĩ gé.

¹⁹ Hã ra ag tóg ãjag rãnhràj hã mĩ ãkrég mũ, ón kÿ rico nĩ sỏr jé. Nén ù kar to ag ãn, hã kÿ Topë vĩ tóg ag mÿ katy' he mũ sir. Kÿ ag tóg kanë há han tũ nĩ.

²⁰ Hã ra ti tÿ ga há kri vãvãm mũ ãn vÿ tÿ Topë vĩ męg mũ ag nÿtĩ gé. Hej, he ag tóg mũ sir, kanë há han ag tóg mũ, ù tóg kanë tÿ 30 (ke) han mũ, ù tóg kanë tÿ 60 (ke) han mũ, ù tóg kanë tÿ 100 (ke) han mũ,” he tóg, Jesus ti, ag mÿ.

*Jëngrë to comparação
(Lc 8.16-18)*

²¹ Kÿ Jesus tóg ag mÿ: “ãg pi(jé) néj gru ma kãmũ kÿ kěj krêm fęg tĩ', ãg pi(jé) cama krêm fęg tĩ',” he mũ. “Ti fęg jafã kri ãg tóg fęg tĩ.

²² Hã kÿ ãg tÿ nén vэг tũ ãn vënh ven kãn ke vë, hã jé tóg ver pèju kÿ nĩ. ãg tÿ nén ki kagtĩg ãn vënh ven kãn ke vë,” he tóg.

²³ “Ûn nĩgrëg nÿtĩ tÿ tÿ jëmë jé,” he tóg.

²⁴ “Hã kÿ jëmë há han,” he tóg. “ãjag mré ke ag jykre tugnÿm ãjag tóg tĩ, kÿ ãjag tóg ag mÿ vĩ tar han tĩ. Kÿ Topë vÿ ãjag mÿ vĩ tar han ke mũ gé, ãjag tÿ ãjag mré ke ag jykre ri ke nÿtĩn kÿ. Hã ra tóg ãjag mÿ vĩ tar kãfór han ke mũ, ha vemnĩ,” he tóg.

²⁵ “Û tÿ nén ù to jykrén há han kÿ tóg ù to jykrén mãn', ù to jykrén mãn', he mũ sir. Û tÿ nén ù to jykrén há han tũ nĩn kÿ tóg ti mÿ tũ' he mũ sir, ti tÿ nén to jykrén sĩ han mũ ra,” he tóg, Jesus ti.

Nén kré to comparación

²⁶ Kÿ Jesus tóg ag mÿ: “Topë tÿ tÿ ãg pã'i nĩ vÿ ge nÿnh mũ, ha mẽ,” he mũ. “Û vÿ nén ù fy vãvãm tĩg mũ, ãpÿ ki,” he tóg.

²⁷ “Û tÿ vãvãm mũ vÿ nũr mũ sir, kutyg kÿ, tÿ vaj kÿ tóg rĩr mãn mũ sir. Hã ra ti fy ãn vÿ mur mũ, mog tóg mũ, jo ù tÿ vãvãm mũ tóg ki kagtĩg nĩ. “Ti hẽ ri ken kÿ mur'?” he tóg.

²⁸ Jãvo tóg vėsóg ki mog, kar tóg mó han, kÿ vãhã ti kanë vë sir, ti mó kãki.

²⁹ Ti kanën kar kÿ tóg ag mÿ: “ha kre jafã va kãmũ jëg,” he mũ sir. Kÿ ti krenh ke kurã vë sir. Topë tÿ tÿ ëg pã'i nĩ ri ken hã vë,” he tóg, Jesus ti, ã kãtÿg mãn ke tón kÿ.

Ka tÿ mostarda fy to comparação
(Mt 13.31-32, 35; Lc 13.18-19)

³⁰ Kÿ Jesus tóg: “inh hÿn tóg tag tónh mũ ha, sÿ Topë tÿ tÿ ëg pã'i nĩ kãmén jé,” he mũ.

³¹ “Ka tÿ mostarda fy ri ke ti nĩ, Topë tÿ tÿ ëg pã'i nĩ ti,” he tóg. “Ti krãn ëg tóg tĩ, ëg japÿ ki. Kãsir ti nĩ, ti fy ti. Û fy vÿ ti sĩ ri ke tũ nÿtĩ.

³² Ti krãn kar kÿ tóg mog mũ, kÿ tóg ëgóho kar kãfór nĩ. Pë mág ti nÿtĩ, hã kÿ sësĩ ag vÿ kãki krëg tĩ, ti fënja ki,” he tóg, Jesus ti.

³³ Comparação tÿ hën ri ke hyn han tóg, ag mÿ Topë vĩ tón ki, ag tÿ to jykrén sór kÿ.

³⁴ “Tag vÿ ge nÿnh mũ,” he hã han tóg ag mÿ, Jesus ti. Ag mÿ tóg jamã hár(a) nén ù tó tũ nĩ, ùn e ag mÿ. Hã ra tóg ã mré mũ tĩ ag mÿ kãmén há han mũ, ag pin kÿ.

Jesus tÿ kóho tÿ tũ' he
(Mt 8.23-27; Lc 8.22-25)

³⁵ Hã tÿ kuty tá tóg ag mÿ: “mũ nÿ, goj nig kafã ù ra,” he mũ.

³⁶ Hã kÿ ag tóg vënh e ën ré kÿ mũ mũ sir, canoa kãmĩ, Jesus tÿ kãkã nĩn kÿ. Hã ra ù ag tóg ti mré mũ mũ gé, canoa ù kãmĩ.

³⁷ Hã ra kãka tar tävĩ vÿ tóg vãhã krog he mũ, kóho ti. Kÿ goj tóg canoa kãki krém krém ke mũ. Ti fãn sór tóg mũ sir.

³⁸ Hã ra Jesus tóg nÿr nÿ, fakrĩnh kÿ, canoa nér tá. Kÿ ag tóg ti rĩn kÿ ti mÿ: “Senhor,” he mũ. “Ëg mÿ ëg kãgter ha mẽ tóg tĩ. Mÿ ã mÿ tÿ nén ù tũ?” he ag tóg ti mÿ.

³⁹ Kÿ tóg rĩr mũ sir, kÿ tóg kóho mÿ vĩ tar han mũ, ti mÿ: “krÿg he ra,” hen kÿ. Kÿ kóho tóg tũ' he mũ, katy' he tóg mũ.

⁴⁰ Kÿ tóg ag mÿ: “ãjag tÿ ne jé kanë jur nē?” he mũ. “ãjag mÿ inh ki rã há han tũ?” he tóg ag mÿ.

⁴¹ Kÿ tóg ag mÿ e (pë) tävĩ tĩ sir. Jagnë mÿ ag tóg: “ti jykre tóg ëg mÿ e tĩ,” he mũ. “Kóho vÿ ti vĩ han, goj ti ke gé,” he ag tóg.

5

Jesus tÿ vënh jagrë kórég tÿ mil ag pan
(Mt 8.28-34; Lc 8.26-39)

¹ Kÿ ag tóg goj nig kafã ù tá junjun mũ sir, Gerasa tá ke ag tá.

² Jesus tÿ canoa ki vag ke mũ ra ù tóg ti kato tẽ mũ. Jagrë kórég ti nĩ. Vënh kej tá tóg kãkutẽ mũ.

³ Tá tóg ëmã nĩ, vënh kej tá. Ag tÿ ti ség mũ ra tóg vënh mÿ nĩ, ferro mré hã.

⁴ Ti se tÿ hën ri ke han ja ag tóg nĩgtĩ vë, ti nĩgé, ti pën ke gé, ferro tÿ. Hã ra tóg ferro tÿ kam ke ja nĩgtĩ, ã pën se ja ti mrynhmranh kãn ja tóg nĩgtĩ. Ag tÿ ti kanhrãn ke mũ ra ag tóg ti tÿ hë ri ke ja tũ nĩgtĩ.

⁵ Kuty ki kurã mré tóg prër tĩgtĩ, vënh kej ki. Pãró ën ki pó génh kÿ tóg vësãnh tĩgtĩ.

⁶ Ti tÿ kuvar há tá Jesus ve kÿ tóg ti to vënhvãg tĩ mũ, kÿ tóg ti krëm grĩnh ke mũ.

⁷ Jamã hár(a) tóg prër mũ, kÿ tóg: “!..ã isÿ hë ri kenh mũ, Jesus'..!” he mũ, “!..kynhmÿ Topë kósin'..!” he tóg. “!..ã mÿ sóg to vĩnh mũ, ã tÿ inh vóg kónãn tũ nĩn jé, kÿ Topë vÿ inh vĩ mẽg mo..!” he tóg.

⁸ Hã ra Jesus tóg ti mÿ: “ti tovãnh ra, Nén-Kórég’,” he ja nĩ.

⁹ Kÿ Jesus tóg ti mÿ: “ã jyjy hë ri ke tĩ,” he mũ. Kÿ tóg: “Mil,” he mũ. “E tävĩ ëg nÿtĩ,” he tóg, Nén-Kórég ti.

¹⁰ Kÿ tóg to vĩ', to vĩ', he mũ, Jesus tÿ ëmã ën ki ti kutëm tũ nĩ jé.

¹¹ Hã ra ag mẽg tÿ porco ag tóg jëg nÿtĩ, pãnónh ën kri.

¹² Kÿ Nén-Kórég ag tóg Jesus mÿ: “ag mẽg to ëg jëgnë, ëg tÿ ag kãki ge jé,” he mũ.

¹³ Kÿ tóg ag mÿ: “hej,” he mũ. Kÿ Nén-Kórég ag tóg ën ti tovãnh mũ sir, porco ag ki ge ag tóg mũ sir. Kÿ ag tóg re mũ sir, porco ag. Rãn ki ag tóg re mũ, kÿ ag tóg nÿgnÿr kãn mũ sir, goj nig ki. Kãgter kãn ag tóg mũ. Porco tÿ mil régre ag vë, hÿn.

¹⁴ Kÿ porco ki rĩr tĩ ag tóg sir pétẽ mũ, cidade ra. Tá ag tóg kãmén kãn mũ, Nén-Kórég tÿ jagrë ja ën ti. Kÿ ag tóg Jesus to mũ kãn mũ sir, nén ën ve jé.

¹⁵ Jesus tá ag tóg junjun mũ sir, kÿ ag tóg ùn jagrë kórég ja ën vëg mũ, kur tu kÿ. Krĩ há' he tóg mũ, ù tÿ mil tÿ jagrë kórég ja ën ti. Kÿ ag fe tóg jÿrũn ke mũ.

16 Kĩ ù tỹ vég mũ ag tóg kãmén mũ sir ag mỹ Ûn jagrê kórég ja ti, porco ag.

17 Hã kỹ ag tóg Jesus mỹ to vĩ mũ, ti tỹ tá kutê jé, ag rã hã nĩ tũ nĩ jé.

18 Ti tỹ canoa kãki rã kỹ ùn jagrê kórég ja tóg: “nhỹ ã mré tĩg mũ,” he mũ, Jesus mỹ.

19 Hã ra tóg ti mỹ nenh. “Ha tĩg, ã ãn ra, ã tỹ ã mré ke ag mré nĩ jé,” he tóg ti mỹ. “Ag mỹ kãmén nĩ, êg jóg mág tỹ ã tỹ há' he mũ ti, ti tỹ ã jagãgtãn mũ ti,” he tóg ti mỹ.

20 Kỹ tóg tĩ mũ. Êmã tỹ 10 (ke) ki ga tá tóg kãmén mũ, Jesus tỹ ã tỹ há' he ti. Kỹ tóg ag kar mỹ e tĩ.

Jairo tỹ Jesus mỹ ã kósín fi to vĩ
(Mt 9.18-19; Lc 8.40-42)

21 Kỹ Jesus tóg kafã ra tĩg mãn mũ, canoa kãmĩ. Kỹ vênh e tóg ti jo vênh mãn mũ. Hã ra tóg goj nig fyr tá jẽ nĩ.

22 Kỹ ù tóg kãtĩ mũ, ti jiji hã vỹ: Jairo, he mũ. Judeu ag vênh kanhrãn jafã to tóg tỹ pã'i nĩ. Ti tỹ Jesus ve kỹ tóg ti krêm mũg ke mũ.

23 Ti mỹ tóg: “inh kósín sĩ fi vỹ tũg sór mũ,” he mũ. “Kunĩg, ã tỹ ã nĩgẽ tỹ fi mẽ jé, fi tỹ há' he jé, fi kren jé,” he tóg.

24 Kỹ tóg ti mré tĩ mũ. Hã ra ùn e ag tóg ti nón mũ kỹ ti kutãn mũ.

Ûn tỹtã kaga fi
(Mt 9.20-22; Lc 8.43-48)

25 Jo ùn tỹtã ù fi tóg tá nĩgtĩ. Kyvênh krỹg tũ han kỹ fi tóg nĩ, prỹg tỹ 12 (ke) ki.

26 Médico ag tỹ fi vêsýrénh mág han, to fi tóg ã tỹ nén vãm kãn, hã ra fi tóg há' he tũ nĩ, ke han han fi tóg.

27 Hã ra fi tóg Jesus kãme mẽ ja nĩgtĩ, kỹ fi tóg vênh e kãmĩ tĩg kỹ ti nón ti kur mẽg mũ sir.

28 “Sỹ hên ri ke mũn ti kur mẽ kỹ inh hỹn han mũ,” he fi tóg.

29 Fi tỹ ti kur mẽ kỹ fi kyvênh tóg gym ke mũ sir vãhã, kỹ fi tóg ki kanhró nĩ, fi kaga tỹ há' he ên ki.

30 Hã ra Jesus tóg ã fe tỹ ki kanhró nĩ, ã jykre kutê ên ki. Kỹ tóg vênh e kãki vĩrĩn ke mũ sir. “Û nỹ inh kur mẽ?” he tóg.

31 Kỹ ti mré mũ tĩ ag tóg ti mỹ: “vênh kar tỹ ã kutãn vê,” he mũ. “Jo ã tóg: ù nỹ inh kur mẽ? he mũ,” he ag tóg ti mỹ.

32 Kỹ tóg tãmĩ êvãnh mũ, ù tỹ ã mẽg mũ fi ve jé.

33 Hã ra ùn tỹtã fi tóg ki kanhró nĩ, fi han mũn ki. Kỹ fi tóg kamêg kỹ, jũrũn ke kỹ mũg ke mũ, ti krêm. Kỹ fi tóg ti mỹ kãmén kãn mũ sir.

34 Hã ra tóg fi mỹ: “inh kósín,” he mũ. “Ã tỹ inh ki rã kỹ ã tóg há' hé,” he tóg. “Ha tĩg, jatun mỹ, ã han vê ha,” he tóg, fi mỹ.

Jairo kósín fi rĩr mãn
(Mt 9.23-26; Lc 8.49-56)

35 Ti tỹ ver fi mré vêmén jẽ ra ù ag tóg tá junjun mũ, pã'i tỹ Jairo ên ãn tá. “Ã kósín fi vỹ hur ter,” he ag tóg. “Tũg ja fi tóg nĩ ha,” he ag tóg. “Hã kỹ ti mỹ: kunĩg, he mãn tũg nĩ, ti kutãn mãn tũg nĩ,” he ag tóg, Jairon mỹ.

36 Hã ra Jesus tóg mẽg mũ, kỹ tóg: “kamêg tũg nĩ, inh vĩ hã kri nĩmĩnĩ,” he mũ, pã'i ên mỹ.

37 Kỹ tóg ùn e ag tỹ ti ãn ra mũ kamêg. “Pedro vỹ tĩg mũ inh mré, Tiago ke gé,” he tóg, “Tiago jãvy tỹ João ke gé,” he tóg.

38 Ag tỹ Jairo ãn tá junjun mũ ra Jesus tóg vênh e vég mũ sir, kygfỹ mũ fag, vêsýrénh jagy han mũ fag.

39 Kỹ tóg kã rã kỹ fag mỹ: “ãjag tỹ ne jé kygfỹ nê, ãjag tỹ ne jé vêsýrénh nê?” he mũ. “Ter tũ fi nĩ, nũr fi nỹ nĩ,” he tóg.

40 Hã ra fag tóg ti nyg mũ. Hã ra tóg fag pan mũ sir, kỹ tóg fi panh mré, fi mỹnh fi mré fi vênh tĩ mũ, ti mré kãmũ mũ ag mré.

41 Fi nĩgẽ kãgmĩ kỹ tóg fi mỹ: “talitã cumi,” he mũ. Êg vĩ ki ke vê, hã vỹ: nĩ ra, jỹ, he mũ.

42 Kỹ vãhã gĩr fi tóg nĩ mũ sir, kãnẽ tĩ fi nĩ sir. Kri prỹg tỹ 12 (ke) fi nĩ. Kỹ tóg ag mỹ e tãvĩ tĩ.

43 Hã ra tóg ag mỹ vĩ tar han, ag tỹ ù mỹ tóg tũg jé. “Ha fi mỹ vễjên ven,” he tóg. Hã ra tóg fi ter kỹ nỹ ra fi rĩn mãn.

6

Jesus jamã tá ke ag tỹ ti to é he
(Mt 13.53-58; Lc 4.16-30)

1 Kỹ Jesus tóg tá kãkutê kỹ ã jamã tá jun mũ sir. Ti mré mũ tĩ ag tóg ti mré mũ mũ gé.

2 Vênhkãn ke kurã ki tóg ag vênh kanhrãn jafã ki ag kanhrãn mũ. Ag tỹ ti vĩ mẽ kỹ tóg ag mỹ e tĩ. “Hẽ tán hỹn ki kanhrãn, vênh

jykre tag ti ki? Û nỹ hỹn ti kanhrãn?" he ag tóg, ti jamã tá ke ag. "Ëg tỹ nén han vãnh hyn han tóg tĩgtĩ," he ag tóg.

³ "Ïn han tĩ ên vễ mỹr," he ag tóg. "Maria fi kósin vễ mỹr, Tiago kãke, José, Judas, Simão kãke, kỹ ti ve fag vỹ ãg mré nỹtĩ gé mỹr. Ti tỹ ne jé tỹ ãg kãfór nĩ sór nẽ?" he ag tóg. Kỹ tóg ag mỹ tỹ ù nỹ.

⁴ Kỹ Jesus tóg ag mỹ: "êmã ù tá ke ag tóg Topẽ vĩ tó tĩ to é he tũ nĩgtĩ mỹr," he mũ. "Ti jamã tá ke ag tóg ti to é he tĩ jãvo, ti mré ke ag, ti kanhkã ag," he tóg.

⁵ Kỹ Jesus tóg tá nén ù han tũ nĩ sir. Ûn kaga pipir ag hã tỹ há' he tóg, ã nĩgé tỹ ag mẽ kỹ.

⁶ Ag tỹ ti ki ge tũ tóg ti mỹ e tĩ, ti jamãn ki. Kỹ tóg êmã kãsir mĩ tũg kỹ ag kanhrãn tĩ nĩ sir.

*Jesus tỹ ù tỹ 12 (ke) ag jẽgnẽ
(Mt 10.5-15; Lc 9.1-6)*

⁷ Kỹ Jesus tóg ù tỹ 12 (ke) ag jé prẽr mũ. Kỹ tóg ag mũn mũ, ùn régre tĩn', ùn régre tĩn' he tóg. Ag mỹ tóg vãnh jykre nĩm mũ, ag tỹ vãnh jagrẽ kórég pan mũ jé.

⁸ Kỹ tóg ag mỹ: "ãjag mũn kỹ pão ma mũ tũg nĩ," he mũ, "bolsa ke gé, jãnkamy ke gé," he tóg.

⁹ "Vãtó hã va mũmnĩ, kãtó ti, pẽ né ke gé, pẽn to ró ti," he tóg.

¹⁰ Kỹ tóg ag mỹ: "ãjag tỹ êmã ù tá jun kỹ, ãjag tỹ ïn ra rã mũ hã ki nũgnũr hemnĩ," he mũ, "hã ki ãjag tỹ kurã ki panh ke mũ ên tá krỹgkrỹg nĩ," he tóg.

¹¹ "Êmã ù tá ke ag tóg kejẽn ãjag mỹ: kãgemnĩ, henh ke tũ nĩ, ag tỹ ãjag vĩ mẽ jãvãnh nỹtĩn kỹ. Kỹ ãjag pẽn hã kũkũn nĩ, ãjag tỹ tá pa kỹ," he tóg, "ag tỹ ve kỹ to ki kanhró nỹtĩ jé, Topẽ tỹ ag mỹ: vó', he ti," he tóg ag mỹ. "Ha mẽ, ki hã sóg tó mũ. Kurã tỹ ãgno ki, isỹ vãnh kar jykre tugnỹm ke kurã ên ki ag tóg jagãgtar nỹtĩnh mũ, ag tỹ ãjag vĩ jẽmẽ jãvãnh nỹtĩn kỹ," he tóg, Jesus ti.

¹² Kỹ ag tóg mũ mũ sir, ù tỹ 12 (ke) ag. "Ãjag jykre tovãnh nĩ," he ag tóg mũ, vãnh kar mỹ.

¹³ Vãnh jagrẽ kórég pan ag tóg mũ, ha mẽ. Ûn kagyga ag to tĩn ag tóg mũ, azeite tỹ, kỹ ag tóg tỹ há' he kãn mũ sir.

*João Batista ter
(Mt 14.1-12; Lc 9.7-9)*

¹⁴ Kỹ pã'i mág tỹ rei tóg Jesus kãme mẽg mũ sir. Vãnh kar vỹ ti kãmén tĩ, hã kỹ tóg mẽg mũ. Pã'i mág tỹ rei ên jijin hã vỹ: Herodes, he mũ. Kỹ tóg: "João hỹn (tóg)," he mũ, "ù tỹ ag kygpég tĩ ên ti," he tóg. "Ã ter jan tán hỹn vỹn ké," he tóg. "Hã kỹ tóg ãg tỹ nén han vãnh kar ên hyn han tĩ," he tóg, Jesus to, Herodes ti.

¹⁵ Hã ra ù tóg Jesus to: "Elias vễ," he mũ. Kỹ ù tóg: "Topẽ vĩ tó tĩ vễ, vãsỹ Topẽ vĩ tó tĩ ag ri ke vễ," he mũ gé.

¹⁶ Hã ra Herodes tóg ti kãme mẽ kỹ: "João hỹn ã ter ja tá vỹn ké, sỹ ùn krĩ kym ja ên ti," he mũ.

¹⁷ Herodes vỹ João se ja nĩ, vễse jafã kãki tóg ti fón ja nĩ, Herodias fi tugrĩn. Tỹ fi Filipe prũ fi nĩ, ti jãvy, hã ra tóg fi tỹ prũg mũ, Herodes ti.

¹⁸ Kỹ João tóg Herodes mỹ: "ã hã ne tóg ã mré ke prũ fi tỹ prũg mũ'," he ja nĩ. "Fi ki ã tóg Topẽ vĩ mranh mũ," he ja tóg nĩ, João ti, Herodes mỹ.

¹⁹ Tag to Herodias fi tóg ti to kórég nĩ, ti tén ke to fi tóg jykren nĩgtĩ, hã ra fi tóg ti tỹ hẽ ri ke tũ nĩ,

²⁰ Herodes tỹ ti kamẽg kỹ. João vỹ tóg tỹ ùn jykre kuryj nĩ. Topẽ jykre hã han tóg tĩ. Hã kỹ Herodes tóg ti jy nĩgãn tĩ, ti tỹ ti jykre há ki kanhró nĩn kỹ. João vĩ tóg ti mỹ vãnhmỹ tĩ, ge ra tóg ti mỹ mẽ há tĩ, Herodes mỹ.

²¹ Kejẽn tóg fi mỹ ti tén ke ki króm ke mũ. Herodes tóg ã mur ja kurã ên ki festa mág han mũ, tenente ag mỹ, soldado ag pã'i ag mỹ ke gé, ùn rico ag mỹ ke gé, Galiléia tá ke ag mỹ.

²² Kỹ Herodias fi kósin fi tóg ag jo vãnh gringrén mũ, hã ra tóg ag mỹ sĩ tãvĩ tĩ, Herodes mỹ, ti mré nỹtĩ ag mỹ ke gé, ti mré jẽg mũ ag mỹ. Kỹ tóg fi mỹ: "ã tỹ nén to vĩ mũ tỹ sóg ã mỹ nĩm mũ," he mũ.

²³ Fi mỹ tóg: "sỹ ke há vễ," he mũ. "Ã tỹ nén to vĩ mũ kar nĩm jé sóg ke mũ, isỹ nén kar kuju mré hã," he tóg, tátãg fi mỹ.

²⁴ Hã ra fi tóg ã mỹnh fi to tĩ mũ sir. "Inh hỹn ne to vãnh mũ?" he fi tóg mũ, ã mỹnh fi mỹ. Kỹ fi tóg: "João krĩ to vĩmnĩ," he mũ, "ù

tỹ ag kygpég tí ên krĩ to,” he fi tóg, ã kósin fi mỹ, Herodias fi.

²⁵ Kĩ fi tóg vêsýmér pã'i mág ên to vênhvãg tí mũ. “Inh mỹ ùri João Batista krĩ nĩm, pénky kãkã,” he fi tóg mũ.

²⁶ Kĩ Herodes tóg fe kaj mág han mũ sir. Hã ra tóg fi mỹ: “sỹ ke há vê,” he ja nĩ, hã kũ tóg fi mỹ han sór mũ, ti mré nỹtĩ ag tỹ mē kãn ja nĩn kũ.

²⁷ Hã kũ tóg polícia ù jēnēg mũ, ti tỹ ti krĩ ma kãtĩg jé. Kĩ tóg ti krĩ kym mũ sir, vese ja kãtã.

²⁸ Kĩ tóg ti krĩ ma kãtĩ mũ sir, pénky kãkã nĩm kũ. Kĩ tóg fi mỹ nĩm mũ, tátãg fi mỹ. Kĩ fi tóg ã mỹnh fi mỹ ma kãtĩ mũ, Herodias fi mỹ.

²⁹ Kĩ João mré mũ tí ag tóg ti venh mũ mũ, ti ter mē kũ. Kĩ ag tóg ti há va mũ mũ, vênh kej ra. Tá ag tóg ti péju mũ sir.

*Jesus tỹ ù tỹ 5 mil (ke) ag jēn
(Mt 14.13-21; Lc 9.10-17; Jo 6.1-14)*

³⁰ Kejēn Jesus tỹ ùn vin mũ ag tóg Jesus to vỹnvỹn ke mũ, ti mỹ kãmén jé, ag tỹ vênh kar mỹ nén tó ja ên tí, ag tỹ nén ù han mũ kar ên ke gé.

³¹ Kĩ tóg ag mỹ: “mũ nỹ, ěg pir mỹ ěmã tũg ja ra mũ jé, ěg vênhkãn sĩ han jé,” he mũ. Kãmũ ag tóg nỹ nĩ, e ag tóg tí ha, kũ tóg ag jēn ke mũ ra vênhmỹ tí sir.

³² Kĩ ag tóg canoa kãmĩ mũ mũ sir, ěmã tũg ja ra, ãjag pir mỹ.

³³ Hã ra ùn e ag tóg ag mũ ve kũ ag ki kanhrãn mũ, kũ ag tóg ãjag pēn kã ag jy pétē mũ, ěmã kar tá kãmũ kũ. Ag jo ag tóg tá junjun mũ sir, vênh e ên tí.

³⁴ Jesus tỹ tá jun kũ tóg sir ùn e ag vэг mũ, kũ ag tóg ti mỹ jagtar nỹtĩ. Ti mỹ ag tóg tỹ ěg mēg tỹ mé, ěg mēg tỹ carneiro ri ke nỹtĩ. Ù tỹ ěg mēg ki rĩr tũ nĩn kũ tóg jagãgtar nỹtĩgtĩ, ěg mēg tí. Tag ri ke ag nỹtĩ, ùn e ên ag, Jesus mỹ, ag tỹ Topē ví ki kagtĩg nỹtĩn kũ.

³⁵ Hã ra tóg rãké nỹ sir, kũ ti mré mũ tí ag tóg ti mỹ: “ki tí ěmã tũ nĩ, rãké tí nỹ ha,” he mũ.

³⁶ “Ã tỹ ag mũn kũ tóg há tí vê. Kĩ ag tóg ěmã kar mĩ mũnh mũ, vējēn jãvãnh jé,” he ag tóg ti mỹ.

³⁷ Hã ra tóg ag mỹ: “ha inhhã ag jēn ge,” he mũ. Hã ra ag tóg: “kũ ěg mỹ jãnkamy tỹ

hēn ri ke tỹ pão kajãm mũ?” he mũ, “ěg tỹ ag jēn jé?” he ag tóg ti mỹ.

³⁸ Kĩ tóg ag mỹ: “pão tỹ hē ri ke nỹ ki nỹtĩ?” he mũ. “Ha venh mũ jēg,” he tóg. Ag tỹ ve kũ ag tóg: “ù tỹ 5 (ke) vê,” he mũ, “pirã régre ke gé,” he ag tóg.

³⁹ Kĩ tóg ag mỹ: “nĩgnĩ ra, re gỹnh tánh kri, mrugmru kri,” he mũ, “vênhmãn kũ,” he tóg, vênh kar ên mỹ.

⁴⁰ Kĩ ag tóg vênhmãn kũ nĩ', vênhmãn kũ nĩ' he mũ, ù vỹ tóg 100 (ke) nĩ' he mũ, jo ù tóg 50 (ke) nĩ' he mũ, ag vênhmãn ù.

⁴¹ Kĩ tóg pão tỹ 5 (ke) génh kũ, pirã régre génh kũ kanhkã ki ěvãnh mũ, kũ tóg Topē mré ví mũ sir, kũ tóg pão kénh mũ sir, ã mré mũ tí ag mỹ tóg vin mũ, ag tỹ ùn e ên mỹ vênh kãpãpãm jé. Pirã régre tỹ tóg vênh kãpópãm mũ gé sir.

⁴² Kĩ vênh kar vỹ ko kãn kũ funfór mũ sir.

⁴³ Kēj tỹ 12 (ke) fãn ag tóg mũ sir, pão ke tỹ, pirã ke tỹ.

⁴⁴ Pão ên ko mũ ag tóg tỹ 5 mil (ke) nỹtĩ, ùn tỹtã fag tó tũ.

*Jesus tỹ goj kri tĩg
(Mt 14.22-33; Jo 6.15-21)*

⁴⁵ Kĩ Jesus tóg vêsýmér ã mré mũ tí ag mỹ tó mũ, ag tỹ canoa kãmĩ mũ jé, ag tỹ tí jo kafã ù ra mũ jé, ěmã tỹ Betsaida ra. “Isỹ ùn e tag ag mỹ: ha mũjēg, henh ke vê ver,” he tóg ag mỹ.

⁴⁶ Kĩ tóg ag mỹ: “ha mũjēg,” he mũ sir. Ag mũn kar tóg pãnónh to tãpyr mũ, Topē mré ví jé.

⁴⁷ Kutỹ ên kũ canoa tóg ver tí nĩ, goj kãmĩ. Jo Jesus tóg tar tá jē nĩ ver, ã pir mỹ.

⁴⁸ Hã ra ag tóg canoa vóg kũ ronron mũ sir, mũ kónãn ag tóg mũ sir, kãka tỹ ag kato tēn kũ. Hã ra tóg ag ronron vэг mũ sir, Jesus tí. Kũ tóg kurã ke ra ag to kãtĩ mũ, goj kri tĩg kũ, ã pēn kã mỹr. Hã ra tóg ag tá jun mũ sir, kũ tóg ag pãtén sór nĩ ve nĩ.

⁴⁹ Ag tỹ goj kri tí tĩg ve kũ ag tóg: “vênh kuprĩg vê,” he mũ. Kĩ ag tóg vėkrėnrėr mũ,

⁵⁰ ag tỹ jũrũn ken kũ, ag kar tỹ tí ve kũ. Hã ra tóg vêsýmér ag mré ví mũ, kũ tóg ag mỹ: “kamēg tũg nĩ,” he mũ. “Inh hã vê, jũrũn ke tũg nĩ,” he tóg.

⁵¹ Kÿ tóg canoa kãki rã mũ sir ag mré, Jesus ti. Kÿ kãka tóg tũ' he mũ sir. Kÿ tóg ag mÿ e (pê) tâvĩ tĩ.

⁵² Hã kÿ tóg ag tÿ to jykrén tũ tĩ. Ver ag tóg krĩ tũ nÿtĩ, hã kÿ ag tóg Jesus jykre ki kagtĩg nÿtĩ ver, ti tÿ pão pir tÿ ùn e jën ja ra.

Jesus tÿ Genesaré mĩ tĩg
(Mt 14.34-36)

⁵³ Ag tÿ canoa kãmĩ pa kÿ ag tóg ga tÿ Genesaré tá junjun ja nĩ. Kÿ ag tóg canoa nÿgnÿn mũ sir.

⁵⁴ Ag tÿ canoa kãmĩ pa kar kÿ tá ke ag tóg vësÿmér ti ki kanhrãn mũ, Jesus ki.

⁵⁵ Kÿ ag tóg ãn kar mĩ pétẽ mũ sir, kÿ ag tóg ùn kagyga ag gé kãmũ mũ ti to. Kur kã ag tóg ag gé kãmũ mũ. Ti jëg jan ra ag tóg ti nón mũ mũ, ag tÿ ti jëg ja mẽ kÿ.

⁵⁶ Ti tÿ ãmã ù tá jun kÿ ag tóg vënh kaga gé kãmũ tĩ, kÿ ag tóg ãn prur ki ag vin tĩ, ãmã kãsir ki, ãmã mág ki ke gé, vãnh kãmĩ ke gé. “Mÿ ã mÿ há, ãg tÿ hën ri ke mũn ã kur mráj mẽ jé?” he ag tóg ti mÿ. Kÿ ag tóg há' há' he kãn mũ sir, ag tÿ ti kur mën kÿ.

7

Ti si ag jykre ti
(Mt 15.1-9)

¹ Kejën Fariseu ag tóg Jesus to vënhmãn mũ, Topẽ vĩ to professor ag mré. Jerusalém tá ag kãmũ ja nĩ.

² Hã ra ag tóg Jesus mré mũ tĩ ù ag jën vëg mũ. Nĩgpég tũ ja ag tóg nĩ, hã kÿ tóg Fariseu ag mÿ jëggryg tĩ.

³ Fariseu ag tóg nĩgpe kar kÿ tÿ jëg tĩ, Israel kar ag ke gé, ag tÿ ti si ag jykre han kÿ.

⁴ Ag tÿ negocio tá kãmũ kÿ ag tóg vëso tÿ kó he tĩ, goj tÿ, vëso tÿ kó he kar hã ag tóg ko tĩ. Vënh jykre si tÿ hën ri ke hyn han ag tóg tĩ, caneca kupég tĩ, kukrũ kupég tĩ, lata kupég tĩ ke gé.

⁵ Kÿ Fariseu ag tóg Jesus mÿ ke mũ, Topẽ vĩ to professor ag mré hã. “Ã mré mũ tĩ ag tÿ hë ri ke jé ti si ag jykre han tũ nĩ nẽ?” he ag tóg mũ. “Ag tÿ ne jé ãjag nĩgé jëggry ra jën nẽ?” he ag tóg mũ.

⁶ Hã ra tóg ag mÿ: “Isaías vÿ ãjag to vĩ ja nĩ, vãsÿ,” he mũ, “kÿ tóg rán kÿ nĩ,” he tóg. “Ti vÿn hã vë, ha mẽ: povo tag vÿ ãjag nũnẽ hã

tÿ inh mÿ vĩ há han tĩ, hã ra ag jykre pi(jé) tÿ inh jykre nÿ'.

⁷ Fagrĩnh mÿ ag tóg iso grĩnh ke tĩ, hã ra ag tóg êprã ke ag jykre to: Topẽ tÿ tón hã vë, he tĩ, he ja tóg nĩgtĩ, Isaías ti,” he tóg, Jesus ti. “Hã kÿ tóg ãjag to ki hã tó ja nĩ, ãjag jykre régre nÿtĩn kÿ,” he tóg, Jesus ti.

⁸ “Topẽ vĩ tovãnh ãjag tóg mũ,” he tóg. “Hã ra ãjag tóg êprã ke jykre han tĩ,” he tóg, Jesus ti.

⁹ Kÿ tóg ag mÿ: “ãjag hã ne tóg Topẽ vĩ mranh tĩ,” he mũ, “ãjag tÿ ãjag jykre si hã han jé,” he tóg. “Hã ra tóg ãjag mÿ há nÿ, ãjag jykre si ãn ti,” he tóg, ag mÿ.

¹⁰ “Moisés tÿ ãjag mÿ Topẽ vĩ tó kÿ tóg ãjag mÿ: “ã mÿnh fi mré ã panh kamëg nĩ, fag jagãgtãn nĩ,” he ja nĩgtĩ. “Û tÿ ã han mũ fag mÿ vĩ kónãn mũ ãn tén jé ã tóg ke mũ,” he ja tóg nĩgtĩ, Moisés ti,” he tóg, Jesus ti.

¹¹⁻¹² “Moisés jãvo ãjag jykre vÿ ge nĩ, ha mẽ. Û tóg kejën ã han mũ fag jagãgtãn sór tũ nĩ. Kÿ tóg fag mÿ ón kÿ: “Topẽ tũ vë,” he tĩ, ti tÿ fag mÿ nĩm jafã ãn to. Kÿ tóg fag ki rĩr ke tũ nĩ, kÿ tóg fag to é he mũ sir. ãjag jykre kórég hã vë,” he tóg, Jesus ti.

¹³ Kÿ Jesus tóg ag mÿ: “Topẽ vĩ mranh ãjag tóg tĩ, ti jëgja kã ãjag tóg êprã ke ag jykre hã ki króm sór tĩ. Ge tÿ hën ri ke han ãjag tóg tĩ,” he tóg ag mÿ, Jesus ti.

Nén tÿ ãg kavénh mũ
(Mt 15.10-20)

¹⁴ Kÿ tóg vënh kar jé prër mãn kÿ ag mÿ: “inh vĩ jëmẽ ra,” he mũ, “ãjag kar tÿ ki kanhrãn jé,” he tóg.

¹⁵ “Vëjën pi(jé) ãg kavénh tĩ,” he tóg, “ãg tÿn ko kÿ,” he tóg. “Nén tÿ ãg ki kãpa vÿ ãg kavénh tĩ, ãg tÿ nén ù vënhmÿ han ãn vÿ ãg kavénh tĩ,” he tóg.

¹⁶ “Û nĩgrëg nÿtĩ tÿ tÿ jëmẽ jé,” he tóg, Jesus ti.

¹⁷ Ti tÿ ã pir mÿ ãn kãra rã kÿ ti mré mũ tĩ ag tóg ti ki jëmëg mũ. “ãg mÿ kãmén há han nĩ, ã vĩ tag,” he ag tóg ti mÿ.

¹⁸ Kÿ tóg ag mÿ: “kÿ ãjag mÿ ki kanhró tũ nÿtĩ ver?” he mũ. “ãg jën tÿ ãg jënky kãra rã kÿ tóg ãg kavénh tũ nĩgtĩ mÿ,” he tóg.

¹⁹ “ãg nug kãra tóg rã mũ, kar ãg fón mũ. ãg krĩ kãra tóg rã tũ nĩgtĩ,” he tóg. Hã kÿ Jesus tóg vëjën kar to: “há ti nĩ,” he mũ.

²⁰ Kÿ tóg: “nén tÿ ãg ki kãpa vÿ ãg kavénh tÿ,” he mÿ.

²¹ “Nén tÿ ãg ki kãpan hã vë, hã vÿ: jykren kónãn, he mÿ, ùn mén tÿ fag to én, he mÿ, nén ù péju, he mÿ, ù tén, he mÿ, ã prÿ tÿ fi mré nÿ, he mÿ, ã mén tÿ mré nÿ, he mÿ.

²² nén kar to én, he mÿ, vënh jykre pãno han, he mÿ, ã tÿ nén ù nenh (ka)më, he mÿ, ù kato vÿ kónãn, he mÿ, vënhmÿ inh ag kãfór kar nÿ, he tÿ, he mÿ, krÿ tÿ, he mÿ.

²³ Nén kar kórég ên tóg ãg ki kãpa tÿ, hã kÿ tóg ãg kavénh tÿ,” he tóg, Jesus ti.

Jesus tÿ tátãg sÿ fi jagrë kórég kutëm (Mt 15.21-28)

²⁴ Kÿ Jesus tóg tá kãkutë mÿ sir, ga ù ra tÿg jé, cidade tÿ Tiro ra, cidade tÿ Sidom ra ke gé. Tá tóg ìn ù krëm nÿ mÿ, hã ra tóg: “ker ù inh nÿgja ki kanhrãn hë’,” he mÿ. Ge ra ag tóg ki kanhrãn mÿ.

²⁵ Kÿ vësÿmér ùn tÿtã ù fi tóg kãtÿ mÿ. Fi kósìn fi vÿ jagrë kórég nÿ. Fi tÿ ti kãme më kÿ fi tóg kãtÿ mÿ. Kÿ fi tóg ti krëm mÿg ke mÿ sir, ùn tÿtã fi.

²⁶ Hã ra fi vÿ vÿ tÿ Grego nÿ, ù tÿ Siro-Fenício krë vÿ tÿ fi nÿ. Kÿ fi tóg to vÿ mãn', to vÿ mãn', he mÿ, ti tÿ fi kósìn fi jagrë kórég ên kutëm jé.

²⁷ Kÿ Jesus tóg fi mÿ: “ãg jën vÿ tÿ ãg krë tÿ ko jafã nÿ,” he mÿ. “Vënhmÿ ti nÿ, ãg tÿ ãg krë pão tÿ cachorro mÿ fón kÿ,” he tóg, fi mÿ.

²⁸ Hã ra fi tóg Jesus ti mÿ: “hÿ,” he mÿ. “Hã ra cachorro sÿ ag tóg ãg krë pão vár ên ko tÿ, mesa krëm,” he fi tóg ti mÿ.

²⁹ Kÿ Jesus tóg fi mÿ: “tó há han ã tóg,” he mÿ. “Ha tÿg, fi jagrë kórég tóg hur kutë, ã kósìn fi ki,” he tóg mÿ.

³⁰ Kÿ fi tóg ã ìn ra tÿ mÿ sir. Fi tÿ tá jun kÿ fi kósìn fi tóg nÿ mÿ, cama kri, hã ra fi jagrë kórég ên vÿ kutë ja nÿ.

Jesus tÿ ùn vÿ vãnh vÿn

³¹ Kÿ Jesus tóg cidade tÿ Tiro ki ga ki kutë mÿ, kÿ tóg cidade tÿ Sidom fÿn rãm mÿ gé sir, kÿ tóg ga tÿ Galiléia ki goj nig ra tÿ mÿ sir, cidade tÿ 10 (ke) fÿn rãm kÿ.

³² Kÿ ag tóg ù pére kãmÿ mÿ, ti to, ùn kutu, ùn vÿ kar vãnh. Kÿ ag tóg ti mÿ ti tóg mÿ, ti tÿ ã nÿgë tÿ ti më jé.

³³ Hã ra Jesus tóg ti pére tÿ mÿ, ti pin kÿ, kÿ tóg ã nÿgë juféj tÿ ti nÿgrëg nor nÿgfénh mÿ, kÿ tóg ti nÿnë to sug mÿ sir.

³⁴ Kÿ tóg kanhkã ki êvãnh kÿ ÿnh' ÿnh' he mÿ sir, kÿ tóg ti mÿ: “efatã,” he mÿ. ãg vÿ ki ke hã vÿ: “ti nÿgrëg jé nor hé,” he mÿ.

³⁵ Kÿ ti nÿgrëg tóg nor' he mÿ sir, ti nÿnë tóg kavar mÿ sir. Vÿ tóg mÿ sir, há' he tóg mÿ sir.

³⁶ Kÿ Jesus tóg ag tÿ tóg kamëg, hã ra ag tóg tugtó kãn mÿ, ti tÿ: “ker tóg hë', ker tóg hë',” he mÿ ra.

³⁷ Kÿ ag fe tóg hën ri ke mÿ. “Ti tÿ nén kar há vÿ tóg há tãvÿ nÿtÿ,” he ag tóg, Jesus to. “Ûn kutu ag êmë hÿn han tóg, ùn vÿ vãnh ag vÿ hÿn han tóg ke gé,” he ag tóg, Jesus to.

8

Jesus tÿ ù tÿ 4 mil (ke) ag jën (Mt 15.32-39)

¹ Kejën ùn e ag tóg vënhmãnmãnmÿ, hã ra ag tÿ nén ù konh ke tóg tÿ tÿ. Kÿ Jesus tóg ã mré mÿ tÿ ag jé prër mÿ sir, kÿ tóg ag mÿ:

² “inh mÿ ag tóg jagtar nÿtÿ, ùn e tag ag,” he mÿ. “Kurã tãgtÿ han ag tóg huri, ãg mré, hã ra ag tóg vëjën ve ja tÿ nÿgtÿ,” he tóg.

³ “Sÿ ag kókÿr ra ag mÿ: ha mÿjëg, hen kÿ inh mÿ ù ag kãgter ha më tóg tÿ, êmÿn kri, êprÿ kri, ag tÿ ãjag jamã ra vÿnvÿn ke jé,” he tóg. “Kuvar gy tóg nÿ, ù ag jamã ti,” he tóg, Jesus ti.

⁴ Kÿ ti mré mÿ tÿ ag tóg ti mÿ: “ãg hë ri ken kÿ pão venh mÿ, êmã tÿg ja tag ti ki, ãg tÿ ag jën jé?” he mÿ.

⁵ Hã ra tóg ag mÿ: “pão tÿ hë ri ke nÿ ki nÿtÿ ge?” he mÿ. Kÿ ag tóg ti mÿ: “ù tÿ 7 (ke) vÿ nÿ,” he mÿ.

⁶ Kÿ tóg vënh kar mÿ: “nÿgnÿ ra, ga kri,” he mÿ. Kÿ tóg pão tÿ 7 (ke) ên mãn kÿ (tóg) Topë mré vÿ mÿ. “Inh mÿ tóg há tÿ,” he tóg. Kÿ tóg kupãg' he mÿ sir, pão ti, ã mré mÿ tÿ ag mÿ tóg vÿn mÿ sir, ag tÿ vënh kar ken jé. Kÿ ag tóg vënh kar ken mÿ sir.

⁷ Kãkufár pipir vÿ ki nÿtÿ gé. Kÿ tóg to Topë mré vÿ mÿ gé, kÿ tóg ag mÿ: “ha vënh ken,” he mÿ gé, ã mré mÿ tÿ ag mÿ.

⁸ Kÿ ag tóg ko kãn mÿ sir, funfór ag tóg mÿ, hã ra tóg kén mÿ sir. Kre tÿ 7 (ke) ên fãn tóg mÿ, ti kén ti, Jesus mré mÿ tÿ ag tÿ génh kÿ.

⁹ Û tỹ 4 (ke) ag vē, hēn ri ke mūn, pāo ko mū ag.

¹⁰ Kar kỹ Jesus tóg ag mỹ: “ha mũjēg,” he mū. Kỹ tóg vēsỹmēr canoa kākī rā mū, ti mré mū tĩ ag mré, kỹ ag tóg Dalmanuta tá ga ra mū mū.

*Fariseu ag tỹ milagre ve sór
(Mt 16.1-4)*

¹¹ Kỹ Fariseu ag tóg ti tá junjun mū. Ag tỹ ón kỹ ti ki jēmē sór vē, ag tỹ kar ti kato vĩ jé. Kỹ ag tóg ti mỹ to vĩ mū, ti tỹ ag mỹ kanhkā tá vēnh jykre ven jé, ti tỹ ag mỹ ēg tỹ nén han vānh han jé. Ag tỹ ti jykre to: “Topē jykre mỹ vỹ?” he sór vē.

¹² Kỹ Jesus tóg jēnger jagy han, ã fe tỹ, kỹ tóg ag mỹ: “ãjag ne tóg ēg tỹ nén han vānh hā ve sór mū,” he mū. “Sỹ ke há vē, hā kỹ sóg ke mū: venh ke tũ ãjag nĩ. Ûri ke ag vỹ ēg tỹ nén han vānh venh ke tũ pē nĩ,” he tóg, ag mỹ, Jesus ti.

¹³ Kỹ tóg ag ré kỹ tĩ mū sir, canoa kākī tóg rā mān mū, kỹ tóg kafā ù ra tĩ mū sir.

*Fermento to comparação
(Mt 16.5-12)*

¹⁴ Hā ra ti mré mū tĩ ag tóg pāo mĩ ěkrén ja tũ nĩ. Pāo pir hā vỹ kã nĩ nĩ, canoa kākā.

¹⁵ Hā ra Jesus tóg ag kanhrān kỹ ag mỹ: “ha mē,” he mū. “Fariseu tỹ fermento há(r) kamēg nĩ,” he tóg, “Herodes tỹ fermento há(r) kamēg nĩ gé,” he tóg.

¹⁶ Kỹ ag tóg jagnē mỹ: “pāo kã ēg jatun,” he mū, “hā kỹ tóg tag tó mū,” he ag tóg mū.

¹⁷ Hā ra Jesus tóg ki kanhró nĩ, kỹ tóg ag mỹ: “pāo tũ ti tĩ, he tũg nĩ,” he mū. “Inh vĩ ki kagtĩg nỹtĩ ve ãjag tóg nỹtĩ, sỹ nén han mū to jykren tũ nỹtĩ ve ãjag tóg nỹtĩ,” he tóg. “Krĩ tũ nỹtĩ ve ãjag tóg nỹtĩ,” he tóg.

¹⁸ “Ãjag kanē ra ãjag kyvó nỹtĩ ve nỹtĩ,” he tóg. “Ãjag nĩgrēg ra ãjag tóg kutu nỹtĩ ve nỹtĩ,” he tóg. “Mĩ ěkrén nĩ,

¹⁹ sỹ pāo tỹ 5 (ke) tỹ ùn e jēn ja ěn mĩ. Û tỹ 5 mil (ke) ag vỹ kó, mỹr, hā ra tóg kén,” he tóg. “Ãjag kěj tỹ hēn ri ke fān ti, pāo ke ti?” he tóg ag mỹ. Kỹ ag tóg: “kěj tỹ 12 (ke),” he mū.

²⁰ Kỹ tóg: “kỹ pāo tỹ 7 (ke) to jykren nĩ gé,” he mū. “Û tỹ 4 mil (ke) ag vỹ kó,” he tóg, “hā ra kre tỹ hē ri ke nỹ fór, ti ke tỹ?” he tóg. Kỹ ag tóg: “kre tỹ 7 (ke),” he mū.

²¹ Kỹ tóg ag mỹ: “ge ra ãjag tóg ki kagtĩg nỹtĩ,” he mū. Ti tỹ ag mỹ Fariseu ag jykre tó jan hā vē, Herodes jykre ti. Ag jykre hā to tóg: ag tỹ fermento há(r), he ja nĩ.

Jesus tỹ ùn kyvó tỹ há' he

²² Kỹ tóg kafā ù tá jun mū sir, ěmā tỹ Betsaida tá, ti mré mū tĩ ag mré. Kỹ tá ke ag tóg ùn kyvó pére kãmū mū. Jesus mỹ ag tóg to vĩ mū, ti tỹ ti mē jé, ã nĩgé tỹ.

²³ Kỹ tóg ùn kyvó nĩgé kãgmĩ kỹ ti pére kuté mū, ěmā ki. Kỹ tóg ti mỹ: “ã mỹ nén ù vég mū?” he mū.

²⁴ Kỹ tóg ěvānh kỹ ti mỹ: “ag ve inh,” he mū, “hā ra ag tóg inh mỹ tỹ ka mū ěn ve nỹtĩ,” he tóg.

²⁵ Kỹ tóg ã nĩgé tỹ ti kanē mē mān mū, kỹ tóg ěvānh há han mū sir. Há' he tóg mū. Tãmĩ tóg ve há han kãn mū, ùn kyvó ja ti.

²⁶ Kỹ Jesus tóg ti mỹ: “ha vēsỹmēr ã jamā ra tĩg,” he mū. “Ěmā tag ki rā tũg nĩ,” he tóg ti mỹ, Jesus ti. Kỹ tóg tĩ mū sir.

*Pedro tỹ Jesus tó
(Mt 16.13-20; Lc 9.18-21)*

²⁷ Kỹ Jesus tóg ã mré mū tĩ ag mré tĩg mān mū gé sir, ěmā tỹ Cesaréia Filipe tá ga ra. Ěmĩn jagma tĩg kỹ, ěpry jagma tĩg kỹ tóg ã mré mū tĩ ag ki jēmēg mū, Jesus ti. “Ag iso hē ri ke tĩ?” he tóg.

²⁸ Kỹ ag tóg ti mỹ ke mū. “João Batista vē, he ag tóg tĩ ã to,” he ag tóg mū sir. “Jāvo ù ag tóg: Elias vē, he tĩ. Jāvo ù ag tóg: Topē vĩ tó tĩ ù vē, he tĩ, ã to,” he ag tóg ti mỹ.

²⁹ Kỹ tóg ag mỹ: “ag jāvo ãjag iso hē ri ke tĩ?” he mū. Kỹ Pedro tóg ti mỹ: “tỹ ã Cristo nĩ,” he mū.

³⁰ Kỹ tóg ag jyvēn mū, ag tỹ ù mỹ kãmén tũ nĩ jé.

*Jesus tỹ ã jagtar ke tó
(Mt 16.21-28; Lc 9.22-27)*

³¹ Kỹ tóg ag kanhrān mū sir. “Tỹ sóg ěprā ke fi kósin nĩ,” he tóg. “Ijagtar jagy han ke vē,” he tóg. “Kófa ag tỹ iso: kórég ti nĩ, hēnh ke vē, Topē tũ ki rĩr tĩ ag ke gé, Topē vĩ to professor ag ke gé,” he tóg. “Ag tỹ isén ke vē, kurā tāgtũ tũg mū ra sóg rĩr mān mū hā ra,” he tóg mū, ã mré mū tĩ ag mỹ.

³² Kỹ ag tóg ki kanhrān kãn mū, ti tỹ ag mỹ nén tó mūn ki.

Hã ra Pedro tóg ti pin kÿ ti mré vÿ mũ, kÿ tóg: “vÿ tÿ ge han tũg nÿ,” he mũ.

³³ Hã ra Jesus tóg vësÿjãm êvãnh kÿ ti mré mũ tÿ ag ki êvãnh mũ. Kÿ tóg Pedro to jũ mũ. “Kutÿg, Satanás!,” he tóg. “Ã pi(jé) Topê jykre tó mũ!,” he tóg. “Ëprã ke jykre vë, ã tÿ inh mÿ nén tó mũ tag ti,” he tóg, Pedro mÿ.

³⁴ Kÿ Jesus tóg ã mré mũ tÿ ag mré vënh kar jé prër mũ, kÿ tóg ag mÿ kãmén mũ. “Ãjag tÿ inh mré kãmũ kÿ tóg há tÿnh mũ,” he tóg. “Kÿ ãjag jykre tovãnh nÿ, ãjag tÿ isũ tãvÿ han jé. Ha vé, ag tÿ inh cruz tÿ inh kri fi kÿ sóg tÿg ke mũ, ag tÿ to isa kÿ isén jé, ha vemnÿ. Vënh nenh ke tũ sóg nÿ. Isÿ tag han ri ke han nÿ, kurã kar ki, ãjag tÿ inh mré mũ sór nÿtÿn kÿ,” he tóg.

³⁵ “Ãjag tÿ ãjag jykre hã han sór kÿ ãjag tÿ nũgme ki vár ke vë,” he tóg. “Jãvo ãjag tÿ isugrÿn ãjag jykre toyãnh kÿ ãjag krenkren ke vë,” he tóg, “ãjag tÿ vënh vÿ sér tugrÿn kãgter ke mũ (hã) ra,” he tóg.

³⁶ “Hën ri ke mũn ãjag hÿn mundo ki nén ù kar ganhar henh ke mũ, hã ra ãjag kuprÿg tóg vãfor ke mũ. Kÿ tóg kórég nÿ.

³⁷ Ëg tÿ ne tÿ Ëg kuprÿg kajãm ke tóg tũ tÿ, Ëg tÿ ti ve mãn jé,” he tóg, Jesus ti.

³⁸ “Ûri ke ag tóg vyr mÿ Topê ù hÿn han tÿ, kÿ ag tóg Topê vÿ mranh tÿ gé,” he tóg. “Ag kãmÿ iso mÿ'ãg tũg nÿ, inh vÿ to. ãjag tÿ ùri iso mÿ'ãg kÿ sóg ãjag to mÿ'ãg ke mũ gé, inh kãtÿg mãn kÿ,” he tóg. “Ãjag to sóg mÿ'ãg ke mũ, sÿ Topê tÿ jënê mág ag mré kãtÿg ken kÿ. Ijóg vÿ tóg isÿ ùn mág han ke mũ, inh kãtÿg mãn ti kÿ,” he tóg. “Tÿ sóg Ëprã ke fi kósin nÿ,” he tóg, Jesus ti.

9

¹ Kÿ tóg ag mÿ: “ha vé, ki hã sóg tó mũ,” he mũ. “Ãjag kãmÿ ù ag vÿ Topê tÿ tÿ Ëg pã'i nÿ venh ke mũ, ãjag ter ke to hã, tag ki Ëg mré nÿtÿ ù ag. Topê vÿ tar nÿ. Ti tar nÿ ve jé ag tóg ke mũ, ãjag ter ke to hã,” he tóg, Jesus ti.

Jesus tÿ vënh ve ù han
(Mt 17.1-13; Lc 9.28-36)

² Kar kurã tÿ 6 (ke) tũg kÿ Jesus tóg ag mÿ: “mũ nÿ, vyr mÿ,” he mũ. Pedro mÿ tóg ke mũ, Tiago mÿ ke gé, João mÿ ke gé. Ag hã mré tóg pãnónh ra tÿ mũ. Kÿ tóg ag jo vënh ve ù han mũ.

³ Ti kur vÿ tóg kókov tãvÿ nÿ sir, kópréj tãvÿ, fag tÿ kur kupri fãg mũ Ën kupri kãfór tóg nÿ, ga kar mÿ hã.

⁴ Kÿ Elias tóg sir vënh ven mũ, Moisés ke gé. Jesus mré ag tóg vëmén mũ.

⁵ Kÿ Pedro tóg Jesus mÿ: “Senhor,” he mũ. “Tag ki tóg ha nÿ,” he tóg. “Ëg tÿ tag ki pãjó tãgtũ han kÿn hÿn ha nÿnh mũ, ã mÿ, Moisés mÿ, Elias mÿ ke gé,” he tóg, Pedro ti.

⁶ Hã ra ag fe tÿ jürün ke kÿ tóg ti tÿ nén tónh ke ki kagtÿg nÿ, Pedro ti.

⁷ Kÿ kanhkã góg vÿ sir ag kri rùm ke mũ, kÿ, vënh vÿ tóg mē há' he mũ, kanhkã góg kãtã, kÿ tóg: “inh kósin hã vë,” he mũ. “Inh fe pē vë,” he tóg. “Ti vÿ jēmē ra,” he tóg, vënh vÿ ti, Topê ti.

⁸ Kÿ vãhã ti mré mũ tÿ ag tóg ki êvãnh mãn mũ sir, kÿ ag tóg Jesus hã vëg mũ sir, ti mré nÿtÿ ag ve mãn tũ ag tóg nÿ.

⁹ Kÿ ag tóg pãnónh tá kãre mũ sir. Kÿ Jesus tóg: “ker ù mÿ ãjag tÿ ùri nén vëg mũ tó hē!,” he mũ. “Ëprã ke fi kósin tÿ ã ter ja tã vÿn ke kar hã inh kãmén nÿ,” he tóg, Jesus ti.

¹⁰ Hã kÿ ag tóg ti vÿ han mũ sir. “Ne nē hÿn, ti tÿ: iser ja tá vÿn ke, he mũ tag ti?” he ag tóg mũ, jagnē mÿ.

¹¹ Kÿ ag tóg Jesus mÿ: “hã ra Topê vÿ to professor ag tóg Elias kãtÿg mãn ke tó tÿ. “Kãtÿg jé tóg ke mũ, Cristo kãtÿg ke to hã,” he ag tóg tÿ, Elias to. Hã mÿ'?” he ag tóg mũ, Jesus mÿ.

¹² Kÿ tóg ag mÿ: “hÿ,” he mũ, “kãtÿg jé tóg ke mũ, Elias ti, nén kar han mãn jé,” he tóg. “Hã ra sóg rán kÿ nÿ gé. Tÿ sóg Ëprã ke fi kósin nÿ mÿr,” he tóg. “Jagtar jagy mē jé sóg ke mũ. Ag tÿ iso é henh ke,” he tóg.

¹³ “Kÿ Elias vÿ hur kãtÿg gé, kÿ ag tóg ti tÿ han, ag tÿ nén han sór mũ Ën ti,” he tóg. “Hã kÿ tóg rán kÿ nÿ,” he tóg, Jesus ti.

Jesus tÿ kyrũ jagrē kórég kutēm
(Mt 17.14-21; Lc 9.37-43a)

¹⁴ Kÿ ag tóg mũ mũ sir. Kÿ ag tóg vãhã Jesus mré mũ tÿ ù ag tá junjun mũ sir. Kÿ ag tóg vënh e vëg mũ, ag pënÿn, kÿ Topê vÿ to professor ag tóg ag vÿ kato vÿ ù han mũ, Jesus mré mũ tÿ ag mÿ.

¹⁵ Kÿ tóg vãhã vënh e Ën ag mÿ e tÿ, ag tÿ ti ven kÿ. Kÿ ag tóg ti to pētē kãmũ mũ sir, ti mÿ: “ã mÿ há?” he jē.

16 Kÿ Jesus tóg ag mÿ: “ãjag tÿ ne tÿ vēmén nē?” he mÿ.

17 Kÿ ag kã ù tóg ti mÿ: “Senhor,” he mÿ. “Inh kósín pére sóg kãtĩ, ã to,” he tóg. “Jagrē kórég ti nĩ, hã kÿ tóg vĩ vãnĥ (pē) nĩ,” he tóg.

18 “Ti jagrē kórég tÿ ti kã vyryn ke kÿ tóg kutē tĩ, kÿ tóg jãrãn tĩ, ã jã tÿ tóg gyngyn ke tĩ, tar’ he tóg,” he tóg. “Ã mré mÿ tĩ ag mÿ sóg to vĩ vē, ag tÿ ti jagrē kórég kutēm jé, hã ra ag tóg tÿ hē ri ke tũ nĩ,” he tóg, Jesus mÿ.

19 Kÿ Jesus tóg ag mÿ: “ãjag ne tóg inh ki rã há han tũ nĩgtĩ,” he mÿ. “Jykre pãno ãjag nÿtĩ,” he tóg. “Kysã tÿ hēn ri ke ki inh hÿn ãjag mré tĩ nĩ? Kysã tÿ hēn ri ke ki inh hÿn ãjag to fe tĩg nĩ?” he tóg. “Inh mÿ ti pére kãmÿjēg,” he tóg.

20 Kÿ ag tóg ti mÿ ti pére kãmÿ mÿ sir. Jesus tÿ ti jagrē kórég vég mÿ ra tóg kyrÿ kã vyryn ke mãn mÿ gé, kÿ tóg kutē mãn mÿ gé sir, vĩrĩn’, vĩrĩn’ ke tóg mÿ gé sir, jãrãn tóg mÿ gé sir.

21 Kÿ Jesus tóg ti panh ti mÿ: “mÿ si há tĩ ha?” he mÿ. Kÿ tóg: “ã sĩ kã tóg ge nĩ,” he mÿ, ti panh ti.

22 “Kejēn ti jagrē kórég tóg pĩ ki ti fón mÿ, goj ki ke gé, ti tÿ ti tén jé,” he tóg. “Ã tÿ hē ri ken há nĩn kÿ ěg jagãgtãn nĩ, ti tÿ há’ hemnĩ,” he tóg.

23 Kÿ Jesus tóg ti mÿ: “ã tÿ hē ri ken há nĩn kÿ, he tũg nĩ, inh mÿ,” he mÿ. “Û tÿ Topē ki rã mÿ ěn tÿ hē ri ken há han mÿ, nén kar tÿ,” he tóg, Jesus ti.

24 Kÿ vēsÿmér kyrÿ panh tóg: “ti ki sóg rãnh mÿ,” he mÿ, jamã hár(a). “Isÿ ti ki rã tũ ěn ti tÿ inh ki tÿ tũ’ hemnĩ,” he tóg.

25 Hã ra Jesus tóg ù tÿ hēn ri ke vēnhmãn vég mÿ, kÿ tóg ti jagrē kórég to jũ mÿ. “Vēnh jagrē vĩ vãnĥ,” he tóg, “vēnh jagrē kutu’,” he tóg, “ha kãkutē, ti ki rã mãn tũg,” he tóg, Jesus ti.

26 Kÿ tóg prēr mÿ sir, ti tÿ jÿrũn ke han tóg mÿ sir. Kÿ tóg kyrÿ ki kãkutē mÿ sir. Kÿ kyrÿ tóg ter ve nĩ, kÿ ag tóg ti to: “tũg ja ti nĩ,” he mÿ.

27 Hã ra Jesus tóg ti nĩgē kãgmĩ kÿ ti nĩm mÿ sir, kÿ tóg jēgnē mÿ sir.

28 Kÿ Jesus tóg tĩ mÿ. Ti tÿ ĩn kãra rã kÿ ti mré mÿ tĩ ag tóg ti pin kÿ ti mÿ vĩ mÿ. “Ĕg ne tóg ti tÿ há’ he ja tũ nĩ’. Hē ri ken kÿ, hÿn?” he ag tóg, Jesus mÿ.

29 Kÿ tóg ag mÿ: “vēnh jagrē kórég tÿ ge kutēm tóg jagy nÿ ěg mÿ,” he mÿ. “Topē mré ěg vĩ tĩ, kÿ ěg tóg mré vãkrég tĩ gé sir. Kÿ tóg vãhã kãkutē tĩ,” he tóg, Jesus ti.

Jesus tÿ ã ter ke tó mãn

(Mt 17.22-23; Lc 9.43b-45)

30 Kÿ ag tóg tá kãpa kÿ Galiléia mĩ mÿ mÿ. Hã ra tóg: “ker ù ěg tÿ mĩ mÿ ki kanhrãn hē’,” he mÿ.

31 Ti tÿ ti mré mÿ tĩ ag kanhrãn sór vē, hã kÿ tóg ke mÿ. Kÿ tóg ag mÿ: “ěprã ke fi kósín ěn vÿ jagtar nĩnh mÿ,” he mÿ. “Inh hã vē. Ĕprã ke ag vÿ ag tÿ isÿ nén han sór mÿ ěn han ke mÿ,” he tóg. “Ag tÿ isén ke vē. Ag tÿ isén kar kÿ sóg hã ra rĩr mãn mÿ, kurã tãgtũ tũg kÿ,” he tóg, Jesus ti.

32 Kÿ tóg ag tÿ ti tÿ nén tó mÿ tag to jykrén tũ tĩ, hã ra tóg ag tÿ ti ki jēmēg tũ nÿtĩ, ag tÿ ti kamēg kÿ.

Û tÿ tÿ ùn mág nĩ

(Mt 18.1-5; Lc 9.46-48)

33 Kÿ ag tóg mÿ mãn kÿ cidade tÿ Cafarnaum tá junjun mÿ sir. Tá ag tóg ĩn ù krēm nÿtĩ. ĩn ěn tá junjun kÿ Jesus tóg ag mÿ: “ãjag tÿ ne tó mÿ nē, ěpry jagma?” he mÿ.

34 Hã ra ag tóg ti mÿ tó tũ nĩ. Ĕmĩn jagma mÿ kÿ ag tóg jagnē mÿ: “ũ nÿ hÿn ěg kãfór kar jē?” he ja nÿtĩ.

35 Kÿ Jesus tóg nĩ mÿ, kÿ tóg ù tÿ 12 (ke) ag jé prēr mÿ sir, kÿ tóg ag mÿ: “ãjag mÿ tÿ ùn mág nÿtĩ sór mÿ?” he mÿ. “Kÿ vēsÿ ùn sĩ ri ke nÿtĩmnĩ,” he tóg.

36 Kÿ tóg gĩr sĩ mÿ: “kunĩg,” he mÿ. Ag kuju kã tóg ti fēg mÿ, kÿ tóg ti jagma ã pē fón mÿ sir, kÿ tóg ù tÿ 12 (ke) ag mÿ: “ãjag hã vÿ tÿ inh mré ke nÿtĩ,” he mÿ.

37 “ãjag tÿ tÿ inh mré ke nÿtĩ kÿ gĩr tÿ ge jē’ÿn nĩ, ti to há nÿtĩmnĩ, isugrĩn. ãjag tÿ isugrĩn ti to há nÿtĩn kÿ ãjag tóg iso há nÿtĩ gé,” he tóg. “ãjag tÿ iso há nÿtĩ kÿ ãjag tóg ù tÿ ijēnēg mÿ ěn to há nÿtĩ gé sir,” he tóg, Jesus ti.

Û tÿ Jesus kato tē tũ nĩ kÿ ti mré ke

(Lc 9.49-50)

38 Kÿ João tóg Jesus mÿ: “Senhor,” he mÿ. “Û ve ěg tóg, kÿ ěn tóg ã jyjy tó kÿ vēnh jagrē kórég pan tĩ, ěg tÿ ùn vég mÿ ěn ti,” he tóg mÿ, Jesus mÿ. “Hã ra tóg ěg mré tĩ tũ nĩgtĩ,

kỹ ãg tóg ti mý: “vẽnh jagrẽ kórég pan sór tũg nĩ,” hé,” he tóg, João ti, Jesus mý.

³⁹ Hã ra Jesus tóg ti mý: “ti tỹ vẽn h jagrẽ kórég pan kamẽg tũg nĩ,” he mũ. “Ủ tỹ inh jiji tó kỹ nén han vãn h han kỹ tóg kar kỹ iso vĩ kónãn ke tũ nĩ,” he tóg.

⁴⁰ “Ủ tỹ ãg kato tẽ nĩ tũ nĩn kỹ ãg mré ke vẽn sir,” he tóg.

⁴¹ “Sỹ ke há vẽn, hã kỹ sóg tó mũ: kejẽn ù tóg ãjag mý goj fẽg mũ, isugrĩn, ãjag tỹ tỹ inh mré ke nỹtĩ tigrĩn. Ën tóg vẽn h kato nén ù há venh ke mũ ge,” he tóg, Jesus ti.

Ëg tỹ Topẽ vĩ mranh (Mt 18.6-9; Lc 17.1-2)

⁴² Kỹ tóg ag mý ke mãn mũ. “Ủn sĩ tag vĩ inh ki rã kỹ jẽ. Kejẽn ù tóg ti tỹ inh vĩ mranh han sór mũ. Ën jykre vĩ kórég tãvĩ nỹ,” he tóg. “Ën hã mý tóg há nỹnh mũ vẽn, ù tỹ pó mág tỹ ti nunh to sa kỹ goj nig ki ti fón jé, ti tỹ goj ki ter jé. Jagy tãvĩ tóg tĩ, ù tỹ gĩr tỹ isovãn h han kỹ,” he tóg.

⁴³ “Ã tỹ nén ù vóg kỹ Topẽ vĩ mranh kỹ ã nĩgnó kym nĩ, ã tỹ ke mãn tũ nĩ jé. Jagy tóg nỹ, ã nĩgnó pir ti. Jãvo tóg há nĩ, ã tỹ rĩr krỹg ja tũ venh ke mũ ti. ã tỹ ã nĩgnó régre ra nũgme ki kutẽn kỹ tóg jagy kãfór tĩnh mũ, inferno ki kutẽn kỹ, pĩ nhyr vãn h ki kutẽn kỹ.

⁴⁴ Tá ga ga tóg ã konh mũ gé, hã ra tóg tỹ tũ' henh ke tũ nĩ. Tá pĩ ãn nhyr ke tũ nĩ gé.

⁴⁵ ã tỹ hẽ kãtã tĩg kỹ Topẽ vĩ mranh kỹ ã pẽn kym nĩ, ã tỹ ke mãn tũ nĩ jé. Jagy ti nỹ, ã tĩg vãn h ti. Hã ra tóg há nĩ, ã tỹ rĩr krỹg ja tũ venh ke mũ ti. ã tỹ ã pẽn régre ra nũgme ki kutẽn kỹ tóg jagy kãfór tĩnh mũ, inferno ki kutẽn kỹ.

⁴⁶ Tá ga (ga) tóg ã konh mũ gé, hã ra tóg tỹ tũ' henh ke tũ nĩ. Tá pĩ ãn nhyr ke tũ nĩ gé.

⁴⁷ ã tỹ nén ù ki vẽn'ĩ kỹ Topẽ vĩ mranh kỹ ã kanẽ tỹ nám kemnĩ, ã tỹ ke mãn tũ nĩn jé. Jagy ti nĩ, ã kyvó ti. Jãvo tóg há nĩ, ã tỹ Topẽ tỹ tỹ ãg pã'i nĩ ven kỹ. ã tỹ ã kanẽ régre ra nũgme ki kutẽn kỹ tóg jagy kãfór tĩnh mũ, inferno ki kutẽn.

⁴⁸ Tá ga (ga) tóg ã konh mũ, hã ra tóg tỹ tũ' henh ke tũ nĩ. Tá pĩ ãn nhyr ke tũ nĩ gé,” he tóg, Jesus ti.

Sa to comparação (Mt 5.13-16; Lc 14.34-35)

⁴⁹ “Pĩ tỹ ãg pũn ri ke ti nĩ, ãg jagãgtar ti. Kỹ ãjag jagãgtar nỹtĩn kỹ isugrĩn, kỹ ãjag jagãgtar ãn ki ãjag jykre tóg kuryj nỹ sir. Kỹ tóg sa ri ke nĩ,” he tóg.

⁵⁰ “Sa vĩ há nĩ. Hã ra sa kãhór nĩn kỹ tóg hã ra kórég nĩ, kỹ ãg tỹ ne tỹ ti tỹ kajã' henh ke tóg tũ tĩ, tỹ sa' he mãn ke tóg tũ tĩ,” he tóg. “Kỹ sa há ri ke nỹtĩmnĩ. Jagnẽ to krĩ kusa nỹtĩmnĩ,” he tóg, Jesus ti.

10

Ëg tỹ ãg prũ fi fón ke tũ (Mt 19.1-12; Lc 16.18)

¹ Kỹ Jesus tóg tá kutẽ mũ, kỹ tóg ga tỹ Judéia ra tĩ mũ sir, goj tỹ Jordão mãra. Kỹ vẽn h e ag tóg ti to vẽn h mãn mãn mũ sir, kỹ tóg ag kanhrãn mãn mũ gé. Ti tỹ nén han tĩ ãn han mãn tóg mũ.

² Kỹ Fariseu ag tóg ti tá junjun mũ gé sir. Ag tỹ ón kỹ ti ki jẽmẽ sór vẽn, vẽn h prũ fón ke to. Kỹ ag tóg ti mý: “ãg tỹ ãg prũ fi mý: ha tĩg, he tag mý kuryj nỹ?” he mũ. Ag tỹ ón kỹ ti vĩ mẽ sór vẽn hã ra.

³ Kỹ tóg ag mý: “Moisés ãjag mý hẽ ri ké?” he mũ.

⁴ Kỹ ag tóg ti mý: “Moisés hã tóg ãg mý: ã tỹ ã prũ fi fón sór kỹ fi mý vẽn h rãn kỹ nĩm, fi tỹ kar kỹ tĩg jé, he ja nĩ, Moisés ti,” he ag tóg.

⁵ Hã ra Jesus tóg ag mý: “ãjag fe kórég nỹtĩn kỹ, hã kỹ tóg ãjag mý tag tó ja nĩ, vẽn h rãn ki, Moisés ti,” he mũ.

⁶ “Topẽ tỹ nén kar han ve ki tóg ti mré fi han,” he tóg.

⁷ “Hã kỹ ùn gré tóg ã prũ fi to ã panh re kỹ tĩnh mũ, ã mỹnh fi ré kỹ ke gé. ã prũ fi mré tóg tĩnh mũ.

⁸ Fi mré tóg tỹ ùn pir nĩ sir, ã prũ fi mré, he tóg. Topẽ ti. Hã kỹ fag tóg tỹ ùn pir nỹtĩ. Fag pi(jé) tỹ ùn régre nỹtĩ'.

⁹ Hã kỹ fag tỹ vẽn h kãpãm tũg nĩ. Topẽ tỹ fag tỹ ùn pir há(r) vẽn h mýr,” he tóg, Jesus ti.

¹⁰ Ag tỹ ãn kãtã nỹtĩn kỹ ti mré mũ tĩ ag tóg ti ki jẽmẽ mãn mũ, vẽn h prũ fón to.

¹¹ Kỹ Jesus tóg ag mý: “ãjag tỹ ãjag prũ fi fón kar kỹ ù fi tỹ prũg mãn kỹ ãjag prũ tũ fi vẽn, ha mẽ,” he mũ.

12 “Kỹ fi tỹ ã mén fón kar ù tỹ mén mǎn kỹ fi mén tũ vễ gé,” he tóg, Jesus ti.

*Jesus tỹ gĩr mỹ vĩ há han
(Mt 19.13-15; Lc 18.15-17)*

13 Jo fag tóg gĩr tatĩ kǎmũ mũ, Jesus tỹ ã nĩgẽ tỹ ag mẽ jé. Hã ra ti mré mũ tĩ ag tóg fag to jũ mũ, ù tỹ ag tatĩ kǎmũ mũ fag to.

14 Hã ra Jesus tóg vég mũ, kỹ tóg ã mré mũ tĩ ag to jũ mũ. Kỹ tóg ag mỹ: “vĩ tũg nĩ, gĩr ag mỹ,” he mũ, “gĩr ag tỹ iso kǎmũ kǎmẽg tũg nĩ,” he tóg. “Ủ tỹ ge hã vỹ ẽg Senhor tỹ Topẽ krẽm nỹtĩ nĩ,” he tóg.

15 “Sỹ ke há vễ, hã kỹ sóg tó mũ: gĩr ag vỹ iso há pẽ nỹtĩ. Ủn kǎsir tag ag ri ke nỹtĩmnĩ, ke tũ nĩ (mũ) ra ãjag tóg venh ke tũ (pẽ) nĩ, Topẽ tỹ tỹ ẽg pǎ'i nĩ ti,” he tóg.

16 Kỹ tóg gĩr jagma ã pẽ fón mũ sir, ã nĩgẽ tỹ tóg ag mẽ kǎn mũ sir, ag to tóg Topẽ mré vĩ mũ sir.

*Ủn rico kǎme
(Mt 19.16-30; Lc 18.18-30)*

17 Kỹ Jesus tóg tĩg mǎn mũ gé sir. Ti tỹ tĩg ke jẽ ra ù tóg ti to vễnhvǎg kǎtĩ mũ, kỹ tóg ã jakrĩ tỹ jẽ mũ, kỹ tóg ti mỹ: “Senhor,” he mũ. “Há pẽ ã tóg nĩ,” he tóg. “Sỹ inh rĩr krỹg ja tũ venh há tóg tĩ. Sỹ ti ve jé inh hỹn vễnh jykre há tỹ hẽ ri ke han mũ?” he tóg.

18 Kỹ Jesus tóg ti mỹ: “ã tỹ ne jé iso: há ã nĩ, he nẽ?” he mũ. “Ẽg pi(jé) há nỹtĩ” he tóg. “Topẽ hã ne ã pir mỹ há nĩ,” he tóg.

19 “Topẽ tỹ nén to ẽg jyvẽn ki kanhró ã tóg nĩ, hã vỹ: ù tén tũg nĩ, he mũ, ã prũ tũ fi mré nỹ tũg nĩ, he mũ, nén ù péju(g) tũg nĩ, he mũ, ù to ón tũg nĩ, he mũ, vễnh mỹ mẽ nĩ tũg nĩ, he mũ, ã nỹ mré ã jóg kǎmẽg nĩ, he mũ,” he tóg ti mỹ, Jesus ti.

20 Hã ra tóg Jesus ti mỹ: “tag kar ki sóg króm kǎn, isĩn kǎ,” he mũ, kyrũ ti.

21 Kỹ Jesus tóg ti ki ẽvǎnh mũ, kỹ tóg tỹ ti fe jẽ. Kỹ tóg ti mỹ: “nén ù pir vỹ tũ nĩ ver,” he mũ. “Ã tũ kar vǎm tĩg, ã tỹ ùn jagǎgtar ag mỹ vin jé, jǎnkamy ti. Kỹ ã tóg kǎnhkǎ tá tũ mág nĩ sir. Kar kǎtĩg nĩ, ã tỹ inh mré tĩg jé,” he tóg, Jesus ti.

22 Kỹ tóg ti mỹ vễnhmỹ tĩ, Jesus vĩ ti. Kỹ tóg fe kaj tĩ mũ sir, ti tũ e nĩn kỹ.

23 Kỹ Jesus tóg vễnh pẽnĩn ẽvǎnh kỹ ã mré mũ tĩ ag mỹ ke mũ sir. “Jagy ti nỹ, ùn rico tỹ Topẽ tỹ tỹ ẽg pǎ'i nĩ venh ke ti,” he tóg.

24 Kỹ ti vĩ tóg ti mré mũ tĩ ag mỹ e tĩ. Hã ra Jesus tóg ag mỹ ke mǎn mũ. “Inh krẽ,” he tóg. “Jagy tǎvĩ ti nỹ mỹr, Topẽ tỹ tỹ ẽg pǎ'i nĩ venh ke ti,” he tóg.

25 “Cavalo pǎnĩ sór vỹ préj nor fĩn kutẽ tũ nĩ,” he tóg. “Ti tỹ fĩn kutẽ há nĩn ra tóg ver jagy tĩ vễ, ùn rico tỹ Topẽ tỹ tỹ ẽg pǎ'i nĩ venh ke ti,” he tóg.

26 Kỹ tóg ag mỹ e (pẽ) tǎvĩ tĩ. “Kỹ ù hỹn kren ke tũ pẽ nĩ,” he ag tóg, jagnẽ mỹ.

27 Kỹ Jesus tóg ag ki ẽvǎnh kỹ ag mỹ: “ẽprǎ ke ag vỹ vễnh krenkren han ki kagtĩg nỹtĩ,” he mũ. “Ag jǎvo Topẽ tóg ẽg krenkren han ki kanhró nĩ,” he tóg. “Topẽ hã tóg nén kar han ke ki kanhró nĩ inhhã,” he tóg, Jesus ti.

28 Kỹ Pedro tóg ti mỹ: “há vé,” he mũ. “Ẽg tỹ nén ù kar ré kỹ ẽg tóg ã mré mũ mũ,” he tóg ti mỹ.

29 Kỹ Jesus tóg ag mỹ ke mǎn mũ. “Sỹ ke há vễ, hã kỹ sóg tó mũ,” he tóg mũ. “Ủ tóg kejẽn isugrĩn ã jamǎ ré kỹ tĩ mũ, ã jǎvy ré kỹ tĩ mũ, ti kǎke, ti ve, ti mỹnh, ti panh, ti krẽ, ti japỹ ré kỹ tĩ mũ gé, isugrĩn, vễnh vĩ sér tugrĩn,” he tóg.

30 “Ẽn vỹ tóg sir vễnh kato ù tỹ 100 (ke) venh ke mũ, ùri hã ra, hã vỹ: ẽmǎ kar, he mũ, jǎvy kar, kǎke kar, ve kar, mỹnh kar, ẽpỹ kar ve jé tóg ke mũ. Hã ra ag tóg ti vóg kónǎn ke mũ gé. Kar kỹ tóg vǎhã sir rĩr krỹg ja tũ venh ke mũ gé,” he tóg.

31 “Jǎvo tag ki ùn mág ù tỹ tá tỹ ùn kǎsir nỹtĩnh ke vễ, tére kỹ, kỹ tag ki ùn kǎsir ù tỹ tá tỹ ùn mág nỹtĩnh ke vễ,” he tóg, Jesus ti.

*Jesus tỹ ã jagtar ke tó mǎn
(Mt 20.17-19; Lc 18.31-34)*

32 Kar kỹ ag tóg mũ nĩ sir, Jerusalém ra, Jesus mré mũ tĩ ag, kỹ Jesus tóg ag jǎmĩ tĩ nĩ. Hã ra tóg ag mỹ e tĩ, ti nón mũ ag tóg mũmẽg mũ sir, ag tỹ Jerusalém ra mũn kỹ. Kỹ Jesus tóg ù tỹ 12 (ke) ag mỹ vễnh kǎmẽn mǎn mũ, vyr mỹ. Ti tỹ ag mỹ ã tỹ nén venh ke ẽn tó mǎn sór vễ.

33 Kỹ tóg ag mỹ: “há vé, Jerusalém ra ẽg tóg mũ mũ,” he mũ. “Ẽprǎ ke fi kósĩn ẽn vỹ jagtar ke mũ. Inh hã vễ. Ón kỹ Topẽ tũ ki rĩr tĩ to pǎ'i ag tóg ag tỹ isỹ nén han sór mũ ẽn han ke mũ, Topẽ vĩ to professor ag ke gé,” he tóg. “Ag tỹ iso: ter jé tóg ke mũ, henh ke

vě,” he tóg. “Kar kÿ ag tóg fóg ag mÿ inh fêg ke mÿ,” he tóg.

³⁴ “Kÿ ên ag tÿ iso é henh ke vě, iso sug ke vě, inh mrânmrân ke vě gé, isén ke vě gé. Kar kurâ tâgtÿ ki sóg hã ra rÿr mãn mÿ sir,” he tóg, Jesus ti.

Tiago mré João tÿ tÿ pã'i jê sór
(Mt 20.20-28)

³⁵ Kÿ Tiago mré João ag tóg ti kukâm mÿ mÿ, Zebedeu krê ag. “Senhor,” he ag tóg ti mÿ. “Êg mÿ êg tÿ nén to vÿ tag ti han,” he ag tóg, Jesus mÿ.

³⁶ Kÿ tóg ag mÿ: “ne nê, sÿ ãjag mÿ han ke ti?” he mÿ.

³⁷ Kÿ ag tóg ti mÿ: “kejên ã tóg tÿ pã'i nÿnh mÿ,” he mÿ. “Kÿ sÿ ã pêgja tá nÿnh há tóg tÿ vě,” he tóg, jo ù tóg: “sÿ ã jakãnh tá nÿnh há tóg tÿ vě,” he mÿ gé. “Êg tÿ ã rã hã nÿtÿnh há tóg tÿ vě, ã tÿ tÿ pã'i nÿnh kÿ,” he ag tóg ti mÿ.

³⁸ Hã ra Jesus tóg ag mÿ: “ãjag tÿ nén to vÿ mÿ ki kagtÿg ãjag tóg nÿtÿ,” he mÿ. “Ãjag mÿ inh ri kén jagtar sór mÿ?” he tóg. “Ãjag mÿ ãjag jagtar jagy tag to krónh kenh ke tÿ nÿ vÿ?” he tóg.

³⁹ Kÿ ag tóg ti mÿ: “hÿ, ke jé êg tóg ke mÿ,” he mÿ. Hã ra Jesus tóg ag mÿ: “hÿ, jagtar jé ãjag tóg ke mÿ, inh ri kén,” he mÿ. “Vêsÿrênh jé ãjag tóg ke mÿ, inh ri kén,” he tóg.

⁴⁰ “Hã ra isÿ tÿ vě, sÿ ãjag mÿ: hej, he ti,” he tóg. “Ha inh pêgja tá nÿ, henh ke tÿ sóg nÿ,” he tóg. “Ha inh jakãnh tá nÿ, henh ke tÿ sóg nÿ gé,” he tóg. “Isÿ tÿ vě. Û tÿ inh rã nÿtÿnh ke ên ag tÿ inh rã nÿtÿnh ke vě,” he tóg.

⁴¹ Hã ra ù tÿ 10 (ke) ag tóg mêg mÿ, kÿ ag tóg ag to jÿ mÿ, João mré Tiago to.

⁴² Kÿ Jesus tóg ag jé prêr kãn mÿ, kÿ tóg ag mÿ kãmén mÿ. “Fóg ag pã'i ag jykre ki kanhró ãjag tóg nÿtÿ,” he tóg. “Vênh kar jêgnêg ag tóg tÿ, kÿ ag mág ag tóg vênh kar mÿ: kemnÿ, ke tÿg nÿ, he tÿ, vÿ tar han kÿ,” he tóg.

⁴³ “Ag ri ke han tÿg nÿ. ãjag mÿ tÿ ùn mág nÿtÿ sór mÿ? Kÿ tÿ jagnê camarada ri ke nÿtÿmnÿ, jagnê tÿ ki rÿr kÿ.

⁴⁴ ãjag mÿ tÿ pã'i nÿtÿ sór mÿ? Kÿ jagnê krêm ke nÿtÿmnÿ, tÿ ùn kãsir nÿtÿmnÿ.

⁴⁵ Hã kÿ sóg camarada tÿ nÿ gé,” he tóg. “Sÿ tÿ camarada nÿ jé sóg kãtÿg, sÿ ãjag ki rÿr

jé. Tÿ sóg êprã ke fi kósin nÿ. Hã kÿ sóg vênh kar jagfy ter ke mÿ, sÿ ag krenkren han jé,” he tóg, Jesus ti.

Ûn kyvó tÿ há' he

(Mt 20.29-34; Lc 18.35-43)

⁴⁶ Kejên ag tóg êmã tÿ Jericó tá junjun mÿ. Ag tÿ Jerusalém ra mÿ vě. Kar kÿ tóg Jericó ki kutê mÿ gé, Jesus ti. Ti mré mÿ tÿ ag tóg ti mré mÿ mÿ, vênh e kar ag ke gé. Hã ra Bartimeu tóg êpry kri nÿ nÿ. Kyvó ti nÿ, hã kÿ tóg êmÿn fyr kri nÿ kÿ: “inh mÿ nén ù nÿm,” he nÿgtÿ, Timeu kósin tag ti.

⁴⁷ Ên tóg Jesus tÿ êpry jagma tÿg mêg mÿ sir, Nazaré tá Jesus ti. Kÿ tóg prêr mÿ sir. “!..Jesus'..!” he tóg. “!..Davi kósin'..!” he tóg. “!..Ijagãgtãn ra..!” he tóg.

⁴⁸ Hã ra ag tóg ti to jÿgÿ mÿ. “Mê kã nÿ nÿ,” he ag tóg ti mÿ. Hã ra tóg prêr mãn', prêr mãn', he mÿ. “!..Davi kósin'..!” he tóg. “!..Ijagãgtãn ra..!” he tóg.

⁴⁹ Kÿ Jesus tóg ti to krÿg he mÿ. Kÿ tóg ti jé prêr' he mÿ sir. Kÿ ag tóg ùn kyvó ên jé prêr mÿ sir. “Ã fe tÿ há' hé, jêg ra, ã jé prêr tóg mÿ,” he ag tóg ti mÿ.

⁵⁰ Kÿ tóg ã palitó fón kÿ jêgnê mÿ sir, Jesus to tóg tÿ mÿ sir.

⁵¹ Kÿ Jesus tóg ti mÿ: “inh ã tÿ hê ri kenh ke?” he mÿ. Kÿ ùn kyvó tóg: “Senhor,” he mÿ. “Sÿ venh há tóg tÿ,” he tóg.

⁵² Kÿ Jesus tóg ti mÿ: “hej,” he mÿ. “Ã tÿ há' henh ke nê ha,” he tóg. “Ã tÿ inh ki rã kÿ ã há' henh ke mÿ,” he tóg. Kÿ tóg vêsÿmér êvãnh há' he mÿ sir, kÿ tóg ti nón tÿ mÿ sir, êpry jagma.

11

Jesus tÿ Jerusalém tá jun

(Mt 21.1-11; Lc 19.28-40; Jo 12.12-19)

¹ Vãhã ag tóg cidade tÿ Jerusalém kakó tá nÿtÿ. Kÿ ag tóg êmã tÿ Betânia tá junjun vén mÿ, êmã tÿ Betfagé tá, krÿ tÿ Oliveiras tá ke gé. Kÿ Jesus tóg ã mré mÿ tÿ régre ag jêgnêg mÿ, ag tÿ êmã ên ra mÿ jé.

² “Ha êmã ên ra mÿjêg,” he tóg, “êg jo êmã nÿ ên ra. ãjag tÿ tá jun kÿ ãjag tóg burrica fi krê venh ke mÿ. Se kÿ tóg jê,” he tóg. “Û vÿ ver ti kri nÿ ja tÿ nÿ,” he tóg. “Ti kavãn kÿ ti pére kãmÿmnÿ,” he tóg.

³ “Hēn ri ke mūn ag tóg ājag mý: ājag tỹ ne jé ti kyvān nē? henh mū. Kỹ ag mý: ěg Senhor tóg ti ve sī han sór mū, hemnī. Kānhmar tóg ti jēnē mǎn mū, hemnī,” he tóg ag mý, Jesus ti.

⁴ Kỹ ag tóg mū mū sir. Burrica krē vég ag tóg mū, jānkā rǎ tóg se kỹ jē, ěmīn kri. Kỹ ag tóg ti kavāg mū sir.

⁵ Kỹ ag tóg ag mý ke mū. “Ājag tỹ ne jé burrica sī kyvān nē?” he ag tóg ag mý.

⁶ Kỹ ag tóg Jesus tỹ ājag mý nén tó ja ěn ti tó mū, kỹ ag tóg: “ha ma mǔjěg ge,” he mū.

⁷ Kỹ ag tóg burrica krē ma mū mū sir, Jesus to. Ājag kur tỹ ag tóg ti kri kugjén mū sir, jumento sī ěn kri, kỹ tóg kri nī mū sir, Jesus ti.

⁸ Kỹ vēnh kar tóg ājag kur kugjén mū sir, ěpry kri, jo ũ ag tóg ka féj krég mū gé, ěpỹ tá, ti jo vāvām jé.

⁹ Kỹ ũ ag tóg ti jāmī mū mū, jo ũ ag tóg ti nón mū mū. ěn ag tóg prēnprēr mū sir. “!.Viva..!” he ag tóg, “!.pā'i vỹ ěg tá jun, ěg Senhor mág tỹ ti jēnēn kỹ..!”

¹⁰ !..Sér tāvī tóg tĩ..! !..Ěg pā'i vē mýr, ěg jóg'jóg tỹ Davi ri kén..! !..Topē tá tóg kǎtīg, ũ tỹ kynhmỹ nī ěn tá, viva..!” he ag tóg mū, prēnprēr kỹ.

¹¹ Kỹ tóg Jerusalém ra rǎ mū sir, Jesus ti. Topē jo ĩn ra tóg rǎ mū sir. Nén kar ki ěvānh kar tóg Betânia ra tīg mǎn mū, ũ tỹ 12 (ke) ag mré, rǎké ra.

Ka tỹ figueira (Mt 21.18-19)

¹² Tỹ vaj kỹ, ag tỹ Betânia tá kāmū kỹ tóg kókīr mū, Jesus ti.

¹³ Hǎ ra tóg ka tỹ figueira féj vég mū sir, tātá. Kỹ tóg to tĩ mū sir, ti kanē ko jé. Tá jun kỹ tóg vég mū, hǎ ra tóg féj tāvī jé. Ti kanēn ke pētēm tũ tóg nī ver.

¹⁴ Kỹ tóg ka tỹ figueira mý: “ũ tóg ā kanē ko mǎn ke tũ nī ha,” he mū. Hǎ ra ti mré mū tĩ ag tóg ti vī měg mū.

Jesus tỹ Topē jo ĩn krēm ag pan (Mt 21.12-17; Lc 19.45-48; Jo 2.13-22)

¹⁵ Kỹ ag tóg mū mǎn kỹ Jerusalém tá junjun mū sir. Topē jo ĩn ra tóg rǎ mū sir, Jesus ti, kỹ tóg tá ag pan kǎn mū sir, nén ũ vender he tĩ ag, nén ũ comprar he tĩ ag ke gé. Topē jo ĩn krēm ag tóg negociar he tĩ,

jānkamy trocar he tĩ ag ke gé. Ag mesa tỹ tóg vyryn ke mū, Jesus ti. Sórāg vender he tĩ ag nīgnī jafā tỹ tóg vyryn ke mū gé sir.

¹⁶ Kỹ tóg ag tỹ Topē jo ĩn ĩn nén gé mū kaměg mū gé sir.

¹⁷ Kỹ tóg ag kanhrǎn kỹ ag mý: “Topē vī rá to jykrén nī,” he mū. “Īnh ĩn jiji vỹ: nação kar mý Topē mré vī jafā, he mū, he tóg, Topē vī rá ki,” he tóg, Jesus ti. “Hǎ ra ājag tóg Topē mré vī jafā tag krēm nén kar pigju(g) mǔgtĩ, kỹ tóg bandido ag jamā ri ke nī,” he tóg. Ag pan kỹ tóg ke mū, Jesus ti.

¹⁸ Hǎ ra Topē tũ ki rĩr tĩ to pā'i ag vỹ Jesus vī měg mū, Topē vī to professor ag ke gé. Kỹ ag tóg: “ěg hỹn ti tỹ hēn ri kenh ke mū?” he mū, “ěg tỹ ti tỹ tũ' he jé?” he ag tóg mū. Hǎ ra ag tóg ti kaměg mū. Vēnh kar mý tóg há tĩ, ti tỹ ag kanhrǎn kỹ. Hǎ kỹ ag tóg ti vóg tũ nī.

¹⁹ Kutyg kỹ ag tóg cidade mág ki pa mǎn mū sir, Jesus ti, ti mré mū tĩ ag ke gé.

Ka tỹ figueira tóg (Mt 21.20-22)

²⁰ Tỹ vaj kỹ ag tóg cidade ra mū mǎn mū sir. Mū kỹ ag tóg sir ka tỹ figueira ěn vég mū, hǎ ra tóg tóg ja nī, ti jāre mré hǎ.

²¹ Kỹ Pedro tóg Jesus vī ki jykrén kỹ ti mý: “ha vé, Senhor,” he mū. “Ā vī ja ěn hǎ vē,” he tóg. “Ā tỹ ka to vī kónān ěn vỹ tóg ja nī, ka tỹ figueira ěn ti,” he tóg.

²² Kỹ Jesus tóg ag mý: “Topē ki ge pě han nī,” he mū.

²³ “Sỹ ke há vē, hǎ kỹ sóg tó mū: kejěn ājag tóg krī tag ti mý: ha goj nig ki kutě, henh ke mū. Kỹ tóg ki kutěnh mū, pānónh ti, ājag tỹ ājag fe tỹ: ti mý ki kutěnh mū vỹ? he tũ nīn kỹ,” he tóg. “Īnh vī han jé tóg ke mū, pānónh ti, hemnī, kỹ tóg kutěnh ke mū, ha vemnī,” he tóg, Jesus ti.

²⁴ “Hǎ kỹ sóg ājag mý ke mū,” he tóg. “Ājag tỹ Topē mý nén ũ to vī kỹ to: han jé tóg ke mū, Topē ti, hemnī, kỹ ājag tóg venh ke mū sir, ājag tỹ ti mý nén ũ to vī mū ti,” he tóg.

²⁵ “Ājag tỹ kejěn Topē mré vī jē ra ũ tỹ ājag to jũ mū ěn tỹ ti mý vēnh pāte fón nī,” he tóg. “Ājag tỹ gen kỹ tóg ājag mý vēnh pāte fón ke mū gé, ěg jóg mág ti,” he tóg. “Ājag tỹ ti vī mranh mū ra tóg vēnh kato ājag mý vēnh

pâte fón ke mũ, ù tỹ kanhkã tá nĩ ti, ãjag tỹ ãjag mré ke ag mỹ vãnh pâte fón kỹ,” he tóg.

²⁶ “Ãjag tỹ hã ra ag mỹ vãnh pâte fón tũ nĩn kỹ ãg jóg mág vỹ vãnh kato ãjag mỹ vãnh pâte fón ke tũ nĩ gé, ù tỹ kanhkã tá nĩ ti,” he tóg, Jesus ti.

*Jesus tỹ ù tỹ ã jẽnẽg mũ tó tũg
(Mt 21.23-27; Lc 20.1-8)*

²⁷ Kỹ ag tóg mũ mãn kỹ Jerusalém tá junjun mãn mũ sir. Topẽ jo ãn tá tóg ãvãnh tĩ mũ, Jesus ti. Kỹ Topẽ tũ ki rĩr tĩ to pã'i ag tóg ti venh kãmũ mũ, Topẽ vĩ to professor ag ke gé, kófa ag ke gé.

²⁸ “Ủ nỹ ã mỹ: tag han nĩ, hé?” he ag tóg, ti mỹ. “Ủ nỹ ã jẽnẽ?” he ag tóg.

²⁹ Kỹ Jesus tóg ag mỹ: “ãjag ki sóg jẽnẽnh ke mũ gé, vãnh kato,” he mũ. “Ãjag tỹ ãnh mỹ tó há han kỹ sóg ãjag mỹ ù tỹ ãnh jẽnẽg mũ tónh ke mũ gé,” he tóg.

³⁰ “João vỹ ag kygpég tĩ ja nĩgtĩ. Ti mỹ kanhkã tá vãnh jykre han, ãjag mỹ, ãprã ke jykre vó? Ủ nỹ ti jẽnẽ?” he tóg ag mỹ, Jesus ti. “Inh mỹ tó,” he tóg.

³¹ Kỹ ag tóg jagnẽ mré to jykrén mũ. “Ëg tỹ ti mỹ: Topẽ tỹ ti jẽnẽ ja vẽ, hen kỹ tóg ãg mỹ: ãjag tỹ ne jé ti vĩ kri fig tũ ja nĩ nẽ? henh ke mũ,” he ag tóg jagnẽ mỹ.

³² “Ëg tỹ hã ra ti mỹ: ãprã ke jykre ja vẽ, hen kỹ tóg vẽnhmỹ nỹ gé,” he ag tóg, ag tỹ vãnh kar kamẽg kỹ. Vãnh kar tóg João to: “Topẽ vĩ tó tĩ pẽ vẽ,” he tĩ.

³³ Hã kỹ ag tóg Jesus mỹ: “ãg pi(jé) ki kanhró nỹtĩ,” he mũ. Ón kỹ ag tóg ke mũ. Kỹ Jesus tóg ag mỹ: “kỹ sóg ãjag mỹ tónh ke tũ nĩ gé, ù tỹ ãnh jẽnẽg mũ ti,” he mũ. ã kato tẽ mũ ag mỹ tóg ke mũ.

12

*Ủn camarada kórég ag to comparação
(Mt 21.33-46; Lc 20.9-19)*

¹ Kỹ Jesus tóg ag kanhrãnh kỹ (tóg) ag mỹ comparação ù han mũ sir, kỹ tóg: “kejẽn ù tóg nĩgtĩ,” he mũ. “Nén kanẽ tỹ uva krãnh ja tóg nĩgtĩ,” he tóg. “Pẽnĩn tóg rón ja nĩ, kãki tóg kũm ja nĩgtĩ, uva jẽgmĩ jafã han jé. Ki tóg pãjó han ja nĩ gé, kỹ tóg ù tỹ ki rĩr tĩ ag mỹ ré kỹ tĩg ja nĩ, ga ù ra. Ag mré tóg jykrén ja

nĩ, ag tỹ ti mré ãkré ãn kanẽ vãnh kãpãm jé,” he tóg, Jesus ti.

² “Ti tỹ kejẽn kanẽnh kỹ tóg ag mỹ ã camarada ù jẽnẽg mũ, ti tũ ki rĩr tĩ ag mỹ, ag tỹ ti mỹ vãnh kãpãm jé, uva ti.

³ Hã ra ag tóg ti kãgmĩg mũ sir, ti mrãnmrãnh ag tóg mũ sir, kỹ ag tóg ti mỹ: “ha tĩg,” he mũ sir, ti mỹ nén ù nĩm mẽ kã.

⁴ Kỹ tóg ag mỹ ã camarada ù jẽnẽ mãn mũ gé sir, kỹ ag tóg ti krĩ ki tãnh mũ sir, ti to é he ag tóg mũ sir.

⁵ Kỹ tóg ag mỹ ù jẽnẽ mãn mũ gé sir, hã ra ag tóg ti tén mũ gé sir. Ti camarada kar to ag tóg jũ mũ, ù mrãnmrãnh ag tóg, ù tén ag tóg.

⁶ Kỹ hã ra ù tóg kén mũ, hã ra ti kósin vẽ, ti fe pẽ vẽ hã ra. Kỹ tóg vãhã ag mỹ ti jẽnẽg mũ sir. “Hẽn ri ke mũn ag ãnh kósin kamẽg mũ,” he tóg, hã kỹ tóg ti jẽnẽg mũ.

⁷ Ti tỹ tá jun kỹ ag tóg ti to jykrén mũ, jagnẽ mré. “Kejẽn ãkré kar vỹ tỹ ti tũ nĩnh mũ, ha vemnĩ,” he ag tóg ti to. “Mũ nỹ, ti tén jé, ti tũ tag tỹ tỹ ãg tũ nỹnh jé,” he ag tóg, jagnẽ mỹ.

⁸ Kỹ ag tóg ti kãgmĩ kỹ ti tén mũ sir, ró mãtã ag tóg ti fón mũ sir,” he tóg, Jesus ti.

⁹ “Kỹ ãkré tỹ tũn mũ ãn hẽ ri kenh ke mũ?” he tóg. “Jun jé tóg ke mũ, ã camarada ag kãgtén jé. Kỹ tóg ãkré ki rĩr tĩ ù ag mỹ finh ke mũ, ti tũ ti,” he tóg. Jesus ti, ag mỹ comparação han kỹ.

¹⁰ Kỹ tóg ag mỹ: “Topẽ vĩ rá tag to jykrén nĩ, ha mẽ,” he mũ. “Pó tỹ ãn han jafã fón ag tóg, pó tỹ ãn han tĩ ag. Ag mỹ tóg kórég ja nĩ, pó ãn ti. Hã ra Topẽ tóg po ãn hã tỹ ãn nũna han mũ.

¹¹ Ëg Senhor mág tỹ há vẽ, hã kỹ tóg ãg mỹ e tĩ, ãg tỹ ven kỹ, he tóg, Topẽ vĩ tỹ rán kỹ nĩ ki,” he tóg ag mỹ, Jesus ti. Ti tỹ ã kato vãsãnsãnh mũ ag mỹ vãnh kãmén hã vẽ.

¹² Kỹ ag tóg ki kanhró nỹtĩ, ti tỹ ag kato vĩ mũ ti. Hã kỹ ag tóg ti se sór mũ, hã ra ag tóg vãnh e ãn kamẽg mũ, kỹ ag tóg ti ség tũ nĩ ha. Kỹ ag tóg sir mũ mũ, ti ré kỹ.

*Ëg tỹ imposto kajãm ke
(Mt 22.15-22; Lc 20.20-26)*

¹³ Hã ra ag tóg ti to ù ag jẽgnẽg mũ sir, Fariseu ù ag, Herodes mré ke ù ag ke gé, ag tỹ ti vĩ to ti se jé, Jesus ti.

14 Ag tỹ ti tá junjun kỹ ag tóg ti mỹ: “Senhor,” he mũ. “Ã jykre kuryj nĩn ki kanhró ãg tóg nỹtĩ,” he ag tóg, ón kỹ. “Vẽnh jykre pir hã han ã tóg tĩ, vẽn kar mỹ. Kỹ ag ve tóg ã mỹ tỹ nén ù tũ nĩ. Hã kỹ ã tóg Topẽ jamĩn to, Topẽ japry to ã tóg ãg kanhrãn há han tũ,” he ag tóg, ón kỹ, Jesus mỹ. “Mỹ há nỹ', ãg tỹ governo mỹ jãnkamy nĩm ke ti', imposto kajãm ke ti'?”

15 Æg mỹ hỹn nĩm mũ', vó mỹ vó?” he ag tóg.

Hã ra Jesus tóg ki kanhró nĩ, ag jykre régre nỹtĩn ki. Kỹ tóg ag mỹ: “ãjag ne tóg ón kỹ inh ki jẽmẽ sór mũ',” he mũ. “Inh mỹ jãnkamy jun, sỹ ve jé,” he tóg.

16 Kỹ ag tóg ti mỹ ù jun mũ sir. Kỹ tóg: “ũ jiji nỹ kã nĩ?” he mũ. “Û kãggrá nỹ kã nĩ?” he tóg. Kỹ ag tóg ti mỹ: “pã'i mág tỹ imperador kãggrá vẽ,” he mũ.

17 Kỹ Jesus tóg ag mỹ: “kỹ pã'i mág mỹ ti tũ nĩmĩ, hã ra Topẽ mỹ ti tũ nĩmĩ gé,” he mũ. Kỹ ti vỹ tóg ag mỹ e tĩ. Ag tỹ nén ù to ti se sór mũ vэг tũ ag tóg nĩ.

*Æg tỹ ãg ter ja tá vỹn kenh ke
(Mt 22.23-33; Lc 20.27-40)*

18 Kỹ Saduceu ag tóg ti tá junjun mũ gé, ti ki jẽmẽ jé. Hã ra Saduceu ag tóg: ãg ter ja tá ãg vỹn kenh ke tũ nĩ,” he tĩ. Kỹ ag tóg Jesus tá jun kỹ ti mỹ:

19 “Senhor,” he mũ gé. “Moisés tóg ãg mỹ tag tó ja nĩ, ãg tỹ tỹ jykre nỹtĩ jé,” he ag tóg. “Æg mỹ tóg: ã régre tỹ ã krẽ tũ ra ter kỹ, ã tỹ ti prũ fi tỹ prũg ke vẽ, he mũ. Æ tỹ ã régre mỹ ã krẽ han ke vẽ, fi ki, he ja tóg nĩ, Moisés ti,” he ag tóg, Jesus mỹ, Saduceu ag.

20 “Kỹ ù tỹ jagnẽ mré pafa ja tỹ 7 (ke) ag vỹ nỹtĩ ja nĩgtĩ,” he ag tóg. “Ag kãke tóg prũg mũ, hã ra tóg ã kósin tũ ra ter mũ sir,” he ag tóg.

21 “Kỹ ti jãvy tóg fi tỹ prũg mũ, hã ra tóg ã kósin tũ ra ter mũ gé sir. Kỹ ti jãvy ù vỹ fi tỹ prũg mũ gé,” he ag tóg.

22 “Hã ra ag kar tóg fi kósin tũ ra kãgter kãn mũ sir, ag kãke ti nón, ù tỹ 7 (ke) ãn ag. Kejẽn fi tóg vãhã ter mũ gé sir,” he ag tóg.

23 “Kỹ fag kãgter ja tá vỹnvỹn ke kỹ fi hỹn mén tỹ 7 (ke) nĩnh mũ vẽ. Ag kar vỹ fi tỹ prũg ja nỹtĩgtĩ. Hã kỹ tóg vẽnhmỹ nỹ, ag tỹ:

rĩr mãn jé ãg tóg ke mũ, hen kỹ,” he ag tóg, Jesus ti mỹ, Saduceu ag.

24 Hã ra Jesus tóg ag mỹ: “ãjag pi(jé) Topẽ vỹ tỹ rán kỹ nĩ ki kanhró nỹtĩ’,” he mũ, “Topẽ jykre ki kagtĩg ãjag nỹtĩ,” he tóg. “Hã kỹ ãjag tóg kygnẽ ja nĩ,” he tóg ag mỹ.

25 “Æg tỹ ãg ter ja tá vỹn ke kỹ ãg prũg ke tũ nĩ, kỹ ãg mén ke tũ nĩ gé,” he tóg. “Topẽ tỹ jẽgnẽ jafã ri ke ãg nỹtĩ, kanhkã tá,” he tóg.

26 “Topẽ vỹ ù to jykren nĩ, ti tỹ ãg tỹ ãg ter ja tá vỹn ke kãmén kỹ. Moisés tỹ rán ki tag tóg rán kỹ nĩ, Topẽ tỹ Moisés mỹ nén tó ja tag ti, vãn pũr kãmén jan ki,” he tóg. “Topẽ tóg ti mỹ: Abraão vỹ iso: Topẽ, he tĩ, he ja nĩ, Isaque ke gé, Jacó ke gé, he ja tóg nĩ, Topẽ ti. Kãgter ag huri, Abraão, Isaque, Jacó. Hã ra Topẽ tóg: tỹ inh ag Topẽ nĩ, he ja nĩ, ag ter kar kỹ.

27 Hã kỹ ag tóg rĩnrĩr nỹtĩ mỹr, Topẽ tỹ ùn rĩnrĩr nỹtĩ ag hã kri ke nĩn kỹ,” he tóg, Jesus ti. “Hã kỹ ãjag tóg kygnẽ tãvĩn mũ,” he tóg, Jesus ti, Saduceu ag mỹ.

*Topẽ tỹ ãg jyvẽn kãfór
(Mt 22.34-40; Lc 10.25-28)*

28 Hã ra Topẽ vỹ to professor ù tóg tá jun mũ gé sir. Kỹ tóg ag tỹ jagnẽ mré vỹ mẽg mũ, Jesus tỹ Saduceu ag mỹ tó há han ja ãn ti. Hã kỹ tóg: “Topẽ tỹ ãg jyvẽn tỹ hẽ nỹ hỹn ti tỹ ãg jyvẽn kar kãfór nỹnh mũ'?” he mũ, Jesus mỹ.

29 Kỹ Jesus tóg ti mỹ: “ũ tỹ kãfór nỹn hã vẽ, hã mẽ,” he mũ. “Ha mẽ, povo tỹ Israel,” he tóg mũ. “Æg pã'i vỹ tỹ Topẽ nĩ, ãg pã'i vỹ tỹ ùn pir nĩ,” he tóg.

30 “Topẽ to, ãg jóg mág to há tãvĩ nỹtĩmĩ,” he tóg, “ti ki ge há han nĩ, ti to jykre pir nỹtĩmĩ, krĩ pir, ti to tar nỹtĩmĩ,” he tóg.

31 “Kỹ ti tỹ ãg jyvẽn ù tóg hã ri ke nĩ gé, hã vỹ: ãjag régre ki rĩr nỹtĩmĩ, ãjag tỹ vẽn ki rĩr há han ri ke, he mũ,” he tóg. “Ti tỹ ãg jyvẽn ù pi(jé) tag kãfór nĩ,” he tóg, Jesus ti, Topẽ vỹ to professor ãn mỹ.

32 Kỹ Topẽ vỹ to professor ãn tóg ti mỹ: “ke tóg tĩ,” he mũ. “Æ tỹ ke há vẽ. Pir ti nĩ, Topẽ ti, ù pi(jé) ti ri ke nĩ,” he tóg.

33 “Æg jé ti to fe há nỹtĩgtĩ, ãg jé ti to krĩ há nỹtĩgtĩ gé, jykre pir ke gé. Æg jé ti to tar nỹtĩ gé. Æg jé ãg régre ki rĩr nỹtĩ gé, ãg tỹ vẽn ki rĩr há han ri ke. Hã vỹ tóg nén kar kãfór

nĩ,” he tóg. “Ëg tỹ Topẽ mỹ nén ù pũn kãfór tóg nĩ, Ëg tỹ ti to há nỹtĩ ãn ti, Ëg tỹ ti mỹ nén ù tãnh kãfór tóg nĩ gé,” he tóg, Topẽ vĩ to professor ãn ti.

³⁴ Kĩ Jesus tóg ti tỹ tó há nĩ ve kũ (tóg) ti mỹ: “nén ù sĩ tóg tũ nĩ ver,” he mũ, “ã tỹ Topẽ tỹ tỹ Ëg pã'i nĩ venh ke jé,” he tóg. Kar kũ ù tóg Jesus ki jẽmẽ mãn tũ nĩ sir. Ti kamẽg ag tóg mũ sir, hã kũ ag tóg ti ki jẽmẽ mãn tũ nĩ sir.

Cristo tỹ tỹ Davi kósin nĩ
(Mt 22.41-46; Lc 20.41-44)

³⁵ Kĩ Jesus tóg Topẽ jo ãn krẽm ag kanhrãn jé ag ki jẽmẽg mũ. “Topẽ vĩ to professor ag tỹ ne jé: Cristo vỹ tỹ Davi kósin nĩ, he nẽ?” he tóg ag mỹ.

³⁶ “Davi vỹ Cristo tó ja nĩ, Topẽ kuprĩg tỹ ti krĩn kũ, kũ tóg: Ëg jóg mág tỹ Topẽ vỹ inh Senhor mỹ tag tó ja nĩ, hã kũ tóg: “nĩ ra ver, inh pẽgja tá,” he ja nĩ. “Sỹ ã kato vãsãnsãn mũ ag tỹ ã krẽm vin ke vẽ, kũ ag sigse vẽ sir. Tag jãvãnh nĩ ver,” he ja ti nĩ, Topẽ ti, inh Senhor mỹ, he ja tóg nĩ, Davi ti,” he tóg ag mỹ, Jesus ti.

³⁷ “Hã kũ Davi tóg Cristo to: inh Senhor vẽ, he tĩ. Ti tỹ tỹ ti kósin nĩ ra ti kósin mỹ tỹ ti kri ke nĩnh mũ vẽ?” he tóg, Jesus ti. Hã ra ag tóg ti mỹ tó tũg. Ag tỹ ne tónh ke tóg tũ tĩ, ti kato vãsãnsãn mũ ag mỹ. Hã ra vẽn kar mỹ ti vỹ tag tóg há nỹ.

Ón kũ Topẽ vỹ to professor ag tỹ jagtar ke
(Mt 23.1-36; Lc 20.45-47)

³⁸ Kĩ Jesus tóg ag kanhrãn kũ: “ón kũ Topẽ vỹ to professor ag kamẽg nĩ,” he mũ. “Kur téj rĩnh ka(mẽ) ag nỹtĩ,” he tóg. “Kũ vẽn kar tỹ ag mỹ: ã mỹ há? he kũ tóg ag mỹ sér tĩ, ag tỹ cidade kũju kãmĩ mũn kũ,” he tóg.

³⁹ “Ëg tỹ vẽn kanhrãn jafã krẽm ag tóg vẽn kãpãm kũ nỹtĩgtĩ, festa ki ag tóg jẽn vén tĩ, ag tỹ tỹ pã'i nỹtĩn kũ,” he tóg.

⁴⁰ “Hã ra ag tóg ùn mèn ter ja fag tũ mãn kãn tĩ. Fag tũ mãn kãn kũ ag tóg ón kũ Topẽ mré vỹ mág han mũgtĩ, Ëg tỹ ag to: ùn há vỹ tỹ ag nỹtĩ, he jé,” he tóg. “Hã to ag vẽnỹrénh mág tãvĩ han ke mũ,” he tóg, Jesus ti.

Ûn jagtar fi tỹ ã tũ vin kãn
(Lc 21.1-4)

⁴¹ Kĩ Jesus tóg kejẽn Topẽ mỹ jãnkamy vin jafã kato nĩ mũ. Kũ tóg ag tỹ kãki nén vin

mũ vég mũ sir. Ûn rico ag tóg jãnkamy mág tỹ kãki vin mũ.

⁴² Kũ ùn jagtar fi tá jun mũ gé, ùn mèn ter ja fi. Hã ra fi tóg jãnkamy kãsir régre hã vin mũ sir, hã vỹ: 1 centavo, he mũ.

⁴³ Kũ Jesus tóg ã mré mũ tĩ ag jé prër mũ sir, kũ tóg ag mỹ: “ve ra ha,” he mũ. “Ûn rico tỹ vin kãfór han fi tóg, fi tũ sĩ (hã) ra. Tỹ nén ù tũ fi tóg nĩ, fi mèn vỹ hur ter.

⁴⁴ Kũ fi tóg ã tũ vin kãn ja nĩ, fi jẽn mré hã. Jãvo ùn rico ag vỹ ãjag tũ ke hã tỹ Topẽ mỹ vin mág tĩ. Hã ki fi tóg ag tỹ nĩm kãfór han, fi tỹ nĩm sĩ pẽ han mũ ra. Ki hã sóg tó mũ mỹr,” he tóg, Jesus ti.

13

Ag tỹ Topẽ jo ãn kókén ke
(Mt 24.1-2; Lc 21.5-6)

¹ Kũ Jesus tóg Topẽ jo ãn tá kãkutẽ mũ sir. Re tá ti mré tĩ ù tóg ti mỹ: “ve ra ha, Senhor,” he mũ. “Pó sĩnvĩ tỹ tóg há nỹtĩ, kũ tóg sĩ(nvĩ) tãvĩ nỹtĩ, ãn ti,” he tóg, Topẽ jo ãn to.

² Hã ra Jesus tóg ti mỹ: “ã mỹ ãn mág tag ti vigvég mũ?” he mũ. “Kejẽn ù pó tỹ jagnẽ kafãn mãn ke tũ nĩ,” he tóg. “Ag ránhraj kãn ke vẽ,” he tóg Jesus ti.

Vẽn jagãgtar to rã
(Mt 24.3-14; Lc 21.7-19)

³ Kar kũ Jesus tóg krĩ tỹ Oliveiras ra tĩg kũ tá nĩ nĩ sir, Topẽ jo ãn kakãm. Kũ ag tóg ag pin kũ ti mỹ ke mũ, Pedro, Tiago, João, André ke gé.

⁴ “Ëg mỹ ti kurã ti tó,” he ag tóg ti mỹ. “Ëg ne ve kũ ti kurã ki kanhró nỹtĩnh mũ? Kurã tỹ hẽ ki Ëg hỹn nén kar tag venh ke mũ?” he ag tóg ti mỹ.

⁵ Kũ Jesus tóg ag mỹ kãmén mũ sir. “Ker ù ãjag lograr hé hẽ!,” he tóg.

⁶ “Cristo vỹ tỹ inh nĩ,” he jé ag tóg ke mũ, ijiji tó kũ. Û tỹ hẽn ri ke ag tóg tag tónh mũ, kũ ù tỹ hẽn ri ke ag tóg ag vỹ kri nĩm ke mũ,” he tóg.

⁷ “Vẽn génh to vẽnẽ mẽ jé ãjag tóg ke mũ, tag ki vẽn génh ke to, kuvar há tá vẽn génh to ke gé. To jũrũn ke tũg nĩ hã ra. Vẽn génh enh ke vẽ. Hã ra kurã tỹ Ëgno to hã ke vẽ ver,” he tóg.

⁸ “Nação ag tỹ jagnẽ kato tẽgtẽnh ke vẽ. Pã'i krẽm ke ag tỹ pã'i ù krẽm ke ag to jũnh

ke vë gé. Kÿ ga tÿ ragrag ke tÿ hën ri ke han ke vë gé, ãmã tÿ hën ri ke ki. Vëjën tÿ tÿ' henh ke vë gé. Hã ra ãjag jagãgtar ke vënh ven ven vë ver," he tóg, Jesus ti.

⁹ "Ãjag kanë nÿm nÿ," he tóg. "Ãjag jyvën tar han jé ag tóg ke mÿ, pã'i ag, vënh kanhrãn jafã krëm. ãjag mrãnmrãn jé ag tóg ke mÿ. ãjag jé prër jé ag tóg ke mÿ, pã'i mág tÿ ãjag ve jé, pã'i mág kar ti, isugrÿn, ãjag tÿ pã'i ag mÿ inh vÿ tugtó jé," he tóg.

¹⁰ "Kÿ inh kãtÿg ke to hã povo kar vÿ inh vÿ sér mën h ke mÿ," he tóg.

¹¹ "Ag tÿ vãhã sir ãjag sigse kÿ, ãjag gé kãmÿ jé, kÿ ãjag tÿ nén tónh ke mÿ to jykrën tÿg nÿ, kã jatu' hemnÿ. Ag tÿ ãjag ki jëmën kÿ ãjag tóg tónh ke mÿ, Topë kuprÿg tÿ ãjag nÿgrëg ki vÿ mÿ ãn ti," he tóg. "Ãjag tÿ tó tÿ vë sir, ti tÿ tó vë sir," he tóg.

¹² "Û vÿ tóg ã régre senh ke mÿ, ti ter jé, ãn kã," he tóg. "Kÿ ù panh tóg ã kósin senh ke mÿ gé, ti ter jé," he tóg. "Kÿ ù krë ãn tóg ã han mÿ fag sigsenh ke mÿ gé, fag kãgtén jé," he tóg.

¹³ "Vënh kar vÿ tóg ãjag to vÿ kónãn ke mÿ gé, inh jiji tugrÿn," he tóg. "Hã ra ù tÿ isovãnh ke tÿ (pë) ãn kren ke vë," he tóg.

Vësÿrénh mág ke

(Mt 24.15-28; Lc 21.20-24)

¹⁴ Kÿ Jesus tóg ag mÿ: "kejën ãjag tóg vãhã ãjag tÿ nén ù kamëg tÿ ãn venh ke mÿ," he mÿ, "ëg kavénh mÿ ãn ti," he tóg. "Topë vÿ tó tÿ tÿ Daniel vÿ ti tó ja nÿgtÿ. Ti jënh ke tÿ tá tóg jënh mÿ," he tóg. "Û tÿ to ke mÿ ãn jé ki kanhró nÿ. "Kÿ Judéia ki ke kar ag jé vënh pigjunh mÿjëg, pãnónh ra, fag mré hã," he tóg.

¹⁵ "Û tÿ re tá nÿ ãn jé kãra rã tÿg nÿ, ti ãn ki, ti tÿ mãn jé.

¹⁶ Kÿ ù tÿ ã japÿ tá jé ãn jé vÿn ke tÿg nÿ gé, ti kur mãn jé," he tóg.

¹⁷ "Ûn kufy fag tÿ vësÿrénh ke vë, kurã ãn kã, ù tÿ gÿr pygfãm mÿ fag ke gé," he tóg.

¹⁸ "Topë mré vÿmnÿ, ti tÿ kusa kã vënh ven tÿ nÿ jé.

¹⁹ Vësÿrénh tÿ ge ve ja tÿ ãn jé nÿtÿ, Topë tÿ ãn mundo han jan ki. Kÿ ãn jé ge venh ke tÿ nÿ gé, kar kÿ," he tóg.

²⁰ "Ëg tÿ kurã ki vësÿrénh ke mÿ ãn vÿ e nÿtÿnh mÿ vë, hã ra tóg térem kÿ nÿtÿ nÿ,

Topë tÿ ùn kuprëg ja ãn ag tugrÿn. Ti tÿ térem tÿ nÿ (mÿ) ra ù vÿ kren ke tÿ nÿ vë, ag vësÿrénh ãn to," he tóg.

²¹ "Kÿ ù tÿ ãjag mÿ: ha vé, Cristo vÿ tag kã jé nÿ, he mÿ ra kri fig tÿg nÿ, ti tÿ: tátã ti jé nÿ, he mÿ ra," he tóg.

²² "Ón kÿ Cristo vÿ vënh venven ke mÿ, ón kÿ Topë vÿ tó tÿ ag ke gé. Ón kÿ milagre hyn han jé ag tóg ke mÿ, milagre tÿ hën ri ke ti, ón kÿ Cristo ãn ag. Ag tÿ vënh kar krÿn kónãn sór vë, ag tÿ kygnë jé, Topë tÿ ùn kuprëg ja ãn ag mré hã, hën ri ke mÿn.

²³ Ha vé, sÿ ãjag mÿ tó kãn vë, ti kutënh ke to hã," he tóg, Jesus ti.

Topë kósin kãtÿg mãn ke

(Mt 24.29-31; Lc 21.25-28)

²⁴ "Hã ra kurã ãn kã, vësÿrénh ãn kar kÿ rã vÿ nhyr ke mÿ, kÿ kysã vÿ jëngrë' he mãn ke tÿ nÿ gé.

²⁵ Kÿ krÿg vÿ vár ke mÿ gé, kanhkã krëm. Ëg tÿ kanhkã tá nén vég tÿ kar ãn vÿ ragrag ke kãn mÿ gé.

²⁶ Kÿ vãhã vënh kar vÿ inh kãtére venh ke mÿ sir, kanhkã góg jagma, inh jykre tar (pë) nÿn kÿ," he tóg. "Tÿ sóg ëprã ke fi kósin nÿ mÿr," he tóg. "Inh ve vÿ kókov (pë) kãtÿ mÿ," he tóg.

²⁷ "Kÿ sóg sÿ jëgnë jafã ag mÿ: ha mÿjëg, henh ke mÿ, ag tÿ sÿ ùn kuprëg ja ag vënhmãn jé, ga kar tá, kanhkã fyr mÿ hã," he tóg, Jesus ti.

Ka tÿ figueira to comparação

(Mt 24.32-35; Lc 21.29-33)

²⁸ "Ka tÿ figueira to ki kanhrãn nÿ, to comparación han kÿ," he tóg. "Ti pë tánh kÿ, ti féj tãg han kÿ tóg kakó tÿ sir, ëkré tygtãnh kurã ti.

²⁹ Ri ke ti nÿ, ãjag tÿ inh kãtÿg mãn ke kurã ki kanhró nÿtÿnh ke mÿ ti. ãjag tÿ sÿ ãjag mÿ nén tó mÿ tag ve kÿ tóg kakó tãvÿ tÿ ha, inh kãtÿg mãn ke ti," he tóg.

³⁰ "Sÿ ke há vë, hã kÿ sóg tag tó mÿ, ha mÿ. Ûri ùn rÿnrÿr mÿ ag tÿ nén kar ãn venh ke vë, ag kãgter ke to hã," he tóg.

³¹ "Kanhkã vÿ tÿ' henh ke mÿ, ga ti ke gé. Jãvo inh vÿ vÿ tÿ' henh ke tÿ nÿ," he tóg, Jesus ti.

Jesus kãtĩg mãn ke kurã
(Mt 24.36-44)

³² “Hã ra ù pi(jé) isỹ kurã ki kãtĩg mãn ke ki kanhró nĩ, hora ên ki ke gé,” he tóg. “Topê tỹ jëgnê jafã ag pi(jé) ki kanhró nỹtĩ. Inh pi(jé) ki kanhró nĩ gé, isỹ tỹ Topê kósin ra,” he tóg. “Ëg jóg mág hã vỹ ã pin ký ki kanhró nĩ, kurã kã nén kutênh ke mũ ên ki,” he tóg.

³³ “Ajag kanê vin han nĩ, vënh rinfig nĩ,” he tóg. “Topê mré vỹ, ajag tỹ ti kurã ki kagtĩg nỹtĩn ký,” he tóg.

³⁴ “Û pasa ri ke vë,” he tóg. “Ã tỹ ã ãn ki kutê ký tóg ã camarada ag mỹ: “ijo ki rĩr,” he mũ, “inh rãnrãj ki,” he tóg. Ký tóg ù tỹ jãnkã ki rĩr tĩ ên mỹ: “ã kanê nĩm han nĩ,” he mũ gé.

³⁵ Hã ký sóg ajag mỹ: “ajag kanê nĩm han nĩ,” he mũ gé,” he tóg. “Ajag pi(jé) ti jun ke ki kanhró nỹtĩ, ãn tãn ti,” he tóg. “Hên ri ke mũn tóg kutyg ke ra jun mũ, hên ri ke mũn tóg kuty kuju ki jun mũ, hên ri ke mũn tóg galo kyr mũ ra jun mũ, hên ri ke mũn tóg kusã ki jun mũ,” he tóg.

³⁶ “Vënh ki êmẽmnĩ, nũr tũg nĩ. Ajag tỹ ijãvãnh tũ ra sóg jun mũ, vësỹmér,” he tóg, Jesus ti.

³⁷ “Vënh kar mỹ sóg tó mũ, sỹ ajag mỹ tó mũ tag, hã vỹ: vënh ki êmẽmnĩ, he mũ,” he tóg, Jesus ti.

14

Ag tỹ Jesus tén sór
(Mt 26.1-5; Lc 22.1-2; Jo 11.45-53)

¹ Hã ra festa tỹ Páscoa kurã kãtã kurã tãgtũ vë sir, pão jëgja tũ konh ke kãtã. Ký Topê tũ ki rĩr tĩ ag tóg Jesus vatánh tá ti se sór mũ, vënh kar tỹ ti se vég tũ nĩ jé. Topê vỹ to professor mré ag tóg ti se sór mũ gé, ti tén jé.

² Hã ra ag tóg: “festa tag to mẽ jé ãg tóg ke mũ ver,” he mũ. “Ëg tỹ festa kã ti se ký vënh génh mág hỹn tóg kutênh mũ, ha vemnĩ,” he ag tóg.

Maria fi tỹ Jesus gãnh tãg
(Mt 26.6-13; Jo 12.1-8)

³ Ên kã Jesus tóg kejên êmã tỹ Betânia tá nĩ nĩ, Simão ãn krêm, vënh kaga tỹ lepra han ja ên ãn krêm. Ti jëg nĩ ra ù fi tóg tá jun mũ,

garrafa vyn ký. Pó tỹ alabastro tỹ tóg há(r) nĩ, garrafa ti. Ti ki jë vỹ tóg tỹ nén kar tãg nĩ, hã vỹ: nardo, he mũ. Nardo pë vë, kaja e pë ti nĩ, ger há ên ti. Garrafa ên mranh fi tóg mũ, ký fi tóg ti ki jë ên tỹ Jesus gãnh kri kugjëg mũ sir.

⁴ Hã ra ù tỹ tá nỹtĩ ag kã ù ag tóg jagnê mỹ: “fi tỹ ne jé nén kaja e tag kókén nê?” he mũ.

⁵ “Ëg tỹ nén ger há tag fón ke vë vë, kaja há to, jãnkamy tỹ hên ri ke to,” he ag tóg. “Ëg tỹ ùn jagãgtar ag mỹ vin ke vë vë,” he ag tóg. Ký ag tóg fi mỹ vỹ tar han mũ sir.

⁶ Hã ra Jesus tóg ag mỹ: “fi mỹ vỹ tũg,” he mũ. “Ajag tỹ ne jé fi fe kaj han nê?” he tóg. “Inh ki fi krov nĩ, inh jykre ki,” he tóg.

⁷ “Ajag mré sóg nĩg sĩ han mũ, jãvo ùn jagãgtar mũ ag vỹ ajag mré nỹtĩg mág han tĩ,” he tóg. “Isĩg kar ký ag mỹ nĩmnĩ, ajag tỹ ag mỹ nén nĩm ke ti,” he tóg.

⁸ “Ã tỹ nén han ke mũn han fi tóg huri,” he tóg. “Inh kãn fi tóg huri, vënh kej tá inh fón ke to,” he tóg.

⁹ “Ag tỹ vënh vỹ sér tugtó ký ag tóg fi tỹ nén han mũ tag ti tónh ke mũ gé, ký vënh kar vỹ fi tỹ nén han mũ tag mẽgmẽnh mũ sir, ha vemnĩ. Ki hã sóg tó mũ,” he tóg, Jesus ti.

Ag tỹ Jesus vatánh tá ti kãgmĩnh ke to jykrén

(Mt 26.14-16; Lc 22.3-6)

¹⁰ Kar ký Judas Iscariotes tóg tĩ mũ, Topê tũ ki rĩr tĩ ag ra, ag mré Jesus jënjen ke to jykrén jé. Hã ra ù tỹ 12 (ke) ag kã ù vë, Judas ti.

¹¹ Ag tỹ ti vỹ mẽ ký tóg ag mỹ sér tĩ sir. “Ã mỹ ãg to jãnkamy vin mũ,” he ag tóg ti mỹ. Hã ký tóg: “inh hỹn hẽ ri kenh mũ, ag tỹ ti kãgmĩ jé?” he mũ, Judas ti.

Ag tỹ Páscoa ko mũ

(Mt 26.17-25; Lc 22.7-14, 21-23; Jo 13.21-30)

¹² Pão jëgja tũ konh ke kurã ve vë sir, cordeiro tãnh ke kurã vë sir, Páscoa kã. Ký ti mré mũ tĩ ag tóg Jesus mỹ: “ãg hỹn hẽ tá ã mỹ carneiro sĩ tãnh mũ, ãg tỹ kon jé?” he mũ.

¹³ Ký tóg ùn régre ag jëgnêg mũ, ti mré mũ tĩ ag. Ký tóg ag mỹ: “ha êmã mág ra mũjëg,” he mũ. “Tã ajag tóg ù venh ke mũ, goj vyn ký jë ù. Ên nón mũmnĩ,” he tóg.

14 “Ti tỹ ãn kãra rã kỹ ãn tãn ãn mré vĩmnĩ,” he tóg. “Ti mỹ tag tómnĩ,” he tóg. “Ëg Senhor vỹ ã mỹ vãnh vỹ jẽnẽg mũ, hemnĩ. Ti tỹ ã ãn krẽm Páscoa konh há tóg tĩ, ti mré mũ tĩ ag mré, hemnĩ ti mỹ,” he tóg, Jesus ti.

15 “Kỹ tóg ãjag mỹ ven ke mũ, kroggrog tỹ kynhmỹ nỹ ãn ti,” he tóg. “Éhé ti nĩ. Tá nén kar vỹ kynkar kỹ nỹtĩ. Ëg nĩgja vỹ tá nỹtĩ gé. Tá ãg mỹ han nĩ,” he tóg, ti mré mũ tĩ régre ag mỹ.

16 Kỹ ag tóg mũ mũ sir, ãmã mág ra, kỹ ag tóg sir vég mũ, Jesus tỹ ag mỹ nén tó ja ti. Kỹ ag tóg vỹjẽn kãn mũ sir, ag tỹ cordeiro ãn ko jé.

17 Rã pur kar kỹ Jesus tóg ã tỹ 12 (ke) ag mré tá jun mũ sir.

18 Ag jẽg mũ jãvo Jesus tóg ag mỹ: “ãjag kãki ã tóg ãn vatánh tá ãn kato vãsãnsãn mũ ag mỹ ãn ven ke mũ,” he mũ. “Inh mré jẽg mũ ã vỹ, ki ãn sóg tó mũ,” he tóg.

19 Kỹ ag tóg fe kaj' he mũ sir. Ti mỹ ag tóg: “ãn mỹ vó'? ãn mỹ vó'?” he kãn mũ sir.

20 Hã ra tóg ag mỹ: “ãjag kã ã vỹ,” he mũ. “Inh mré pão tỹ kã punpun mũ vỹ, pẽnky kãki,” he tóg. “Ën vỹ mỹr,” he tóg.

21 “Ter jé sóg ke mũ, isỹ tỹ ãprã ke fi kósin nĩn kỹ. Hã kỹ ãn ke vỹ rãn kỹ nĩ,” he tóg. “Vãsỹ sóg to rãn kỹ nĩ,” he tóg. “Hã ra ã tỹ pã'i ag mỹ ãn ven ke ãn mỹ tóg vỹ kónãn tãvĩ han ke mũ. Ti mur tũ nĩn rãn há tĩ vỹ,” he tóg, Jesus ti.

Santa Ceia

(Mt 26.26-30; Lc 22.15-20; 1Co 11.23-25)

22 Ag jẽg nỹtĩ ra Jesus tóg ãmĩ mãg mũ sir, kỹ tóg Topẽ mré vỹ mũ sir, ãmĩ to. Kỹ tóg vãnh kã kugpãn kỹ ag mỹ vãnh kãpãm mũ sir, ti mré mũ tĩ ag mỹ. “Inh ãn vỹ,” he tóg, ãmĩ to.

23 Kar kỹ tóg copo vãg mũ gé sir, vinho tỹ ki jẽn kỹ. To tóg Topẽ mré vỹ mũ gé sir, kỹ tóg ãn pĩr mỹ ven', ven', he mũ sir. Kỹ ag tóg kãmẽ kãn mũ sir.

24 Kỹ tóg ag mỹ: “ãn kyvãnh ã vỹ,” he mũ. “Vãnh kar jagfy tóg ãn ki kãkutẽn ke mũ, ãn kyvãnh ti,” he tóg. “Topẽ vỹ vãnh kar to há nĩ sór mũ, ãn kyvãnh tugrĩn,” he tóg.

25 “Hã mẽ,” he tóg. “Inh pi(jé) vinho kron mãn ha'. Kejẽn sóg kron mãn ke mũ, Topẽ

tỹ tỹ ãg pã'i nĩ ãn kã sóg kron mãn mũ,” he tóg.

26 Ag jẽn kar kỹ ag tóg Topẽ mỹ jãn mũ sir. Jãn kar kỹ ag tóg sir krĩ tỹ Oliveiras ra mũ mũ.

Jesus tỹ Pedro mỹ tó

(Mt 26.31-35; Lc 22.31-34; Jo 13.36-38)

27 Kỹ Jesus tóg ag mỹ: “ãjag kar vỹ ãn ré kỹ mũ kãn ke mũ,” he mũ. “Hã kỹ tóg rãn kỹ nĩ, ãn mẽ. “Û tỹ carneiro ki rĩr tĩ ãn tãn jé sóg ke mũ, kỹ ti mẽg vỹ krig ke kãn ke mũ,” he tóg, iso, Topẽ ti, ti vỹ rá ki,” he tóg, Jesus ti. “Hã ve jé ãjag tóg ke mũ.

28 Hã ra sóg ãn kar kỹ rĩr mãn ke mũ. Ën kã sóg ãjag jo tĩn ke mũ, ga tỹ Galiléia ra,” he tóg, Jesus ti.

29 Kỹ Pedro tóg ti mỹ: “ãn kar tỹ ã ré kỹ mũ mũ ra isóg ã ré kỹ tĩg ke tũ nĩ,” he mũ, Pedro ti.

30 Hã ra Jesus tóg ti mỹ: “hã vé,” he mũ. “Ûri, kuty tag kã ã tóg iso: ti ki kagtĩg sóg nĩ, he tãgtũ han ke mũ, galo kyr régre han ke to ãn. Ki ãn sóg tó mũ,” he tóg.

31 Hã ra Pedro tóg vỹ tar han. “Sỹ ã mré ter ke mũ ra sóg ã to: ti ki kagtĩg sóg nĩ, henh ke tũ pẽ nĩ,” he tóg, Pedro ti. Kỹ ti mré mũ tĩ ag tóg ãn kãn mũ gé sir.

Getsêmani tá

(Mt 26.36-46; Lc 22.39-46)

32 Kỹ ag tóg ka kré ra mũ mũ sir. Ka kré ãn jĩn ãn vỹ: Getsêmani, he mũ. Kỹ tóg ã mré mũ tĩ ag mỹ: “nĩgnĩ ra ver, tag ki,” he mũ. “Sỹ ver Topẽ mré vãmẽn ke vỹ,” he tóg, Jesus ti.

33 Kỹ tóg Pedro, Tiago, João ag mỹ: “ãn mré kãmũ jẽg,” he mũ. Kỹ tóg ti mỹ e tĩ sir, jũrũn ke tóg mũ sir, Jesus ti.

34 Kỹ tóg ag mỹ: “ãn fe kaj mág tóg tĩ,” he mũ, “kỹ ãn fe kaj tóg ãn mỹ tỹ ãn ãn ke nĩ,” he tóg. “Tag ki nỹtĩmnĩ, nũgnũr tũg nĩ,” he tóg.

35 Kỹ tóg tĩg sĩ ãn mãn kỹ mũg ke mũ, ga kri nỹ tóg mũ sir. ã jóg mré tóg vỹ mũ sir, “ãn hẽn ri ke mũn nén venh ke mũ ãn vég tũ nĩ jé, hora ãn ki,” he tóg.

36 Kỹ tóg: “Aba', panh',” he mũ. “Nén kar ãn ki kanhró ã tóg nĩ,” he tóg. “Inh jagtar ke tag tỹ tũg' hemnĩ,” he tóg. “Hã ra isỹ ã mỹ

nén to vĩ mũ tag han tũg nĩ, ã tỹ nén han ke mũ ên hã han nĩ,” he tóg.

³⁷ Kĩ tóg ã mré mũ tĩ ag venh tĩ mũ, hã ra ag tóg nũgnũr ja nĩ, kĩ tóg Pedro mỹ: “Simão, ã mỹ nũr’?” he mũ, “ã mỹ hora pir hã ki nũr tũ kórég?” he tóg ti mỹ.

³⁸ “Nũr tũg nĩ,” he tóg. “Topê mré vĩmnĩ, ãjag tỹ ti vĩ mranh tũ nĩ jé, ù tỹ ãjag kutãn mũ ra. ãjag tỹ mranh sór tũ vễ vễ, hã ra ãjag tóg krój nỹtĩ, hã kĩ ãjag tóg mranh ke mũ,” he tóg.

³⁹ Kĩ tóg tĩg mãn mũ sir, Topê mỹ tó mãn jé. Ti vĩ ên hã tó mãn tóg mũ.

⁴⁰ Kĩ tóg ag tá jun mãn mũ gé sir, hã ra ag tóg nũgnũr mãn nỹtĩ, ag kanê krój nỹtĩn kĩ. Hã kĩ ag tỹ ti mỹ vĩnh ke ên tóg tũ tĩ.

⁴¹ Kĩ tóg tá jun tãgtũ han mãn mũ. Kĩ tóg ag mỹ: “ãjag ne tóg nũgnũr ja nĩ’, vễnhkãn ja ãjag tóg nĩ,” he mũ. “Gen kĩ,” he tóg. “Pétẽm ti huri, hora ti,” he tóg. “Ủ tỹ Topê vĩ mranh tĩ ag tỹ isenh ke nê ha,” he tóg. “Tỹ sóg êprã ke fi kósin nĩ mỹr,” he tóg.

⁴² “Nĩgnĩ ra, mũ jé ha. Ủ tỹ ag mỹ inh ven mũ tóg jun ke kãtĩg ha,” he tóg.

Ag tỹ Jesus se

(Mt 26.47-56; Lc 22.47-53; Jo 18.3-12)

⁴³ Jesus tỹ ver tỹ vễmẻn jẻ ra Judas tóg vễsỹmẻr jun mũ sir. Ủ tỹ 12 (ke) ag kã ù vễ, Judas ti. Ti mré polícia ag tóg kãmũ mũ gé. Rógro génh kĩ ag kãmũ mũ, ka kykyv génh kĩ ke gé. Topê tũ ki rĩr tĩ ag pã'i ag vĩ ag jẻgnẻ, Topê vĩ to professor ag ke gé, kófa ag ke gé.

⁴⁴ Judas ên, ù tỹ ag mỹ Jesus ven mũ ên vĩ ag mỹ vễnh jykre nĩm ja nĩ. “Sỹ ùn ki nhun ke mũ ên hã semnĩ. Ên hã pẻre mũmnĩ,” he ja tóg nĩ, Judas ti.

⁴⁵ ã tỹ tá jun kĩ tóg vễsỹmẻr Jesus to grẻn ke kĩ ti mỹ: “Senhor,” he mũ. Kĩ tóg ti ki nhun ke mũ sir, Judas ti, ón kĩ.

⁴⁶ Kĩ ag tóg ti kãgmĩ kĩ ti sẻg mũ sir.

⁴⁷ Jesus mrẻ tĩ tĩ ù tóg rógro kunũnh kĩ polícia ù nĩgrẻg kym mũ sir. Topê tũ ki rĩr tĩ to pã'i mág camarada vễ, ti tỹ ùn nĩgrẻg kym mũ ên ti.

⁴⁸ Kĩ Jesus tóg ag mỹ: “ãjag ne tóg rógro génh kãmũ mũ!,” he mũ, “ka kykyv génh kĩ ke gé!” he tóg. “Inh pi(jẻ) tỹ bandido nĩ!” he tóg.

⁴⁹ “Kurã kar ki sóg ãjag mrẻ jẻ ja nĩgtĩ, mỹr, Topẻ jo ìn krẻm,” he tóg. “Vẻnh kanhrãn kĩ isóg tá nĩ ja nĩgtĩ, hã ra ãjag tóg tá isẻg tũ nĩ vễ mỹr,” he tóg. “Hã ra vẫsỹ iso nẻn rãn kĩ nĩ ên ki kenh ke hỹn,” he tóg.

⁵⁰ Kĩ ti mrẻ mũ tĩ ag tóg ti rẻ kĩ pẻtẻ kãn mũ, vẻnh pigju jẻ, mỹr, ha mẽ.

⁵¹ Hã ra kyrũ ù tóg ti nẻn tĩ mũ. Vẻnh kãtor tãvĩ ti nĩ. Ti kãgmẻg ag tóg mũ gé.

⁵² Hã ra tóg kamẻg kĩ ã kur rẻ kĩ vẻnhvãg mũ, ti kator ra.

Pã'i tỹ Jesus mrẻ vĩ

(Mt 26.57-68; Lc 22.54-55, 63-71; Jo 18.13-14, 19-24)

⁵³ Kĩ ag tóg Jesus pẻre mũ mũ, Topẻ tũ ki rĩr tĩ to pã'i mỹ. Ti ìn tá ag tóg vẻnhmãn kãn kĩ nỹtĩ, Topẻ tũ ki rĩr tĩ to pã'i ag, kófa ag mrẻ hã, Topẻ vĩ to professor ag mrẻ hã.

⁵⁴ Hã ra Pedro tóg Jesus nẻn kãtĩ mũ, kuvar há tá. Kĩ tóg Topẻ tũ ki rĩr tĩ to pã'i ìn vẫso ra rã mũ gé. Kĩ tóg polícia ag mrẻ pĩ to tẻn nĩ nĩ, Pedro ti.

⁵⁵ Kĩ Topẻ tũ ki rĩr tĩ to pã'i ag tóg ù jãvãnhvãnh mũ, ù tỹ ón kĩ Jesus jykre kórẻg tó mũ ên. Ti vĩ tũgrẻn ag tóg Jesus ti tẻn sẻr mũ. Hã ra tóg ag mỹ ki krov tũ nĩ. Vẻnh jyvẻn tĩ kar ag tóg ù jãvãnhvãnh mũ, hã ra tóg ag mỹ ki krov tũ nĩ gé.

⁵⁶ Ủ tỹ hẻn ri ke ag tóg ón kĩ Jesus jykre kórẻg tó mũ, hã ra tóg ag mỹ ki krov tũ pẻ nĩ sir, ag tỹ vẻnh jykre ù tẻ', vẻnh jykre ù tẻ' he mũ ra.

⁵⁷ Kĩ ù ag tóg vẫhã jẻgẻg kĩ nỹtĩn kĩ (ag tóg) ón kĩ ti jykre kórẻg ù kãmẻn mũ sir.

⁵⁸ “Ti tỹ tẻ mẽẻg,” he ag tóg. “Topẻ jo ìn tag kẻkẻn jẻ sóg ke mũ, he ja tóg nĩ, vẻnh nẻgẻ tỹ há tag ti, he ja tóg nĩ, hã ra sóg kurã tãgtũ ki ù han mãn ke mũ,ẻg tỹẻg nẻgẻ tỹ han vẫnhẻn han jẻ sóg ke mũ, he ja tóg nĩ,” he ag tóg, Jesus to.

⁵⁹ Ge ra tóg ag mỹ ki krov tũ nĩ, ti jykre kórẻgẻn vẻg tũ ag tóg nĩ.

⁶⁰ Kĩ Topẻ tũ ki rĩr tĩ to pã'i mág tóg jẻgnẻ kĩ (tóg) ag kujũ kã jẻ mũ sir. “ã tỹ nẻn ù tẻnh ke mũ mỹ ã mỹ tũ?” he tóg mũ. “Ag hã ne tóg ã vĩ kẻnãn tag tẻ ja nẻ gẻ!,” he tóg, Jesus mỹ.

⁶¹ Hã ra tóg hun ke mũ, nẻn ù tẻ tũ tóg nĩ. Kĩ pã'i mágẻn tóg ti mỹ ke mãn mũ. “ã mỹ tỹ Cristo nẻ!” he tóg, “ẻg tỹ ù to: há ti nĩ, he

mũ ãn kósin mý tỹ ã nĩ? Æ mý tỹ Topẽ kósin nĩ?" he tóg.

⁶² Kĩ Jesus tóg ti mý: "hỹ, inh hã vë," he mũ. "Ëprã ke fi kósin ãn vỹ tỹ inh nĩ. Inh ve jé ãjag tóg ke mũ ha. Æ tỹ nén kar han mũ ãn pëgja tá sóg nĩnh ke mũ. Kanhkã góg kãmĩ sóg kãtérenh ke mũ gé," he tóg.

⁶³ Kĩ pã'i mág ãn tóg ã kur tỹ jaran' ke mũ sir, jũ kỹ. Kỹ tóg: "ũ tỹ ti jykre kórég tónh ke ù jãvãnh mãn ke tũ ãg nĩ ha," he mũ.

⁶⁴ "Ti tỹ Topẽ kato vỹ kónãn ja ãn mẽ ãg huri," he tóg. "Ëg hỹn ti tỹ hẽ ri kenh mũ ha?" he tóg.

"Ter jé tóg ke mũ, ti vỹ tag tugrĩn," he ag tóg, ag kar ãn.

⁶⁵ Kĩ ù ag tóg ti to sugrug mũ sir. Ti kanẽ pãg ag tóg mũ gé sir, kỹ ag tóg ti tãnh kỹ ti mý: "ũ nỹ ã tãnh?" he mũ. Kar kỹ polícia ag tóg ti tãnh mũ gé sir, ti kakã ki.

Pedro tỹ Jesus to ón

(Mt 26.69-75; Lc 22.56-62; Jo 18.15-18, 25-27)

⁶⁶ Hã ra Pedro tóg ãn vãso kã nĩ nĩ, Topẽ tũ ki rĩr tĩ to pã'i ãn ãn tá. Hã ra pã'i ãn camarada fag vỹ tá nỹtĩ gé, kỹ fag kã ùn pir fi tóg Pedro to kãtĩ mũ.

⁶⁷ Kĩ fi tóg ti vëg mũ sir, ti tỹ pĩ to tón nĩ ra. Kỹ fi tóg ti tugnỹm kỹ ti mý: "Jesus mré ã tóg tĩg mũ gé," he mũ, "Nazaré tá ke ãn mré," he fi tóg ti mý.

⁶⁸ Hã ra Pedro tóg: "vó," he mũ. "Inh pi(jé) ti ki kanhró nĩ," he tóg. "Æ tỹ ne tó nẽ?" he tóg. Kỹ tóg ãn jãnkã ra tĩ mũ sir, ãn kãra rã jé. Hã ra galo tóg kyr mũ.

⁶⁹ Hã ra fi tóg tá ti vëg mũ gé. Kỹ fi tóg tá nỹtĩ ag mý ke mãn mũ sir. "Tá jẽ ãn tóg tỹ ag kã ù jẽ gé," he fi tóg, Pedro to.

⁷⁰ Hã ra tóg: "vó," he mãn mũ. Kar kỹ tá nỹtĩ ag tóg Pedro mý ke mãn mũ. "Æ hỹn tỹ ag kã ù nĩ," he ag tóg ti mý. "Tỹ ã Galiléia tá ke nĩ mýr," he ag tóg. "Æ vỹ vỹ tá ke ag vỹ ri ke nĩ," he ag tóg.

⁷¹ Hã ra Pedro tóg ag mý: "ãjag tỹ nén tó mũ ãn ki kagtĩg sóg nĩ mýr," he mũ. "Inh ón mũ ra Topẽ tóg inh vóg kónãn ke mũ vë, hã kỹ sóg ón ke tũ pé nĩ," he tóg.

⁷² Hã ra vësýmér galo tóg kyr mãn mũ. Kỹ Pedro tóg Jesus vỹ to jykren mũ sir, Jesus tỹ ti mý nén tó ja ãn to, hã vỹ: "iso ã tóg: ti ki

kagtĩg sóg nĩ, he tãgtũ han ke mũ, galo kyr régre han to hã," he mũ. Tag mĩ ãkren kỹ tóg vënh péju kỹ nĩ kỹ fỹ nĩ nĩ sir, Pedro ti. Vãhã tóg ti mý e tĩ.

15

Pilatos tỹ Jesus mré vỹ

(Mt 27.1-2, 11-14; Lc 23.1-5; Jo 18.28-38)

¹ Tỹ vaj kỹ ag tóg kusã ki Jesus ti jykren mũ jagnẽ mré, Topẽ tũ ki rĩr tĩ to pã'i ag, kófa ag mré hã, Topẽ vỹ to professor ag mré hã ke gé, vënh jyvën tĩ kar ãn ag. Kỹ ag tóg Jesus mrĩnh kỹ ti pére mũ mũ, Pilatos mý ti fëg jé.

² Kỹ Pilatos tóg ti mý: "ã mý tỹ Judeu ag pã'i nĩ?" he mũ. Kỹ tóg: "ki hã ã tóg tó mũ," he mũ, Jesus ti.

³ Hã ra Topẽ tũ ki rĩr tĩ to pã'i ag tóg ti kato vỹ tỹ hën ri ke han mũ sir.

⁴ Kỹ Pilatos tóg ti mý ke mãn mũ. "Mý ã tỹ ag mý nén ù tó jãvãnh," he tóg. "Ha mẽ, ã to ag tóg vỹ kónãn mág kỹ nỹtĩ," he tóg, Pilatos ti.

⁵ Hã ra Jesus tóg vỹ mãn tũ nĩ, kỹ tóg Pilatos mý e tĩ sir.

Ag tỹ Jesus to: ter jé tóg ke mũ, he

(Mt 27.15-26; Lc 23.13-25; Jo 18.39-19.16)

⁶ Hã ra Pilatos tóg ag mý Vëse ag kar kã ùn pir kavãg tĩ, festa tỹ Páscoa kar ki. Ti jykre vë. Ag tỹ ù to vỹ mũ ãn kavãg tóg tĩ.

⁷ Hã ra ù tóg se kỹ nĩ, ti jijin hã vỹ: Barrabás, he mũ. Vënh génh kutëm ti ag mré tóg se kỹ jẽ nĩ, vënh génh kỹ ag tóg ù tén ja nĩ, hã kỹ ag tóg nĩgfhénh kỹ nỹtĩ.

⁸ Kỹ vënh kar ãn ag tóg Pilatos to mũ mũ sir, ti mý: "ãg mý ã tỹ nén han tĩ ãn han nĩ," he jé.

⁹ Kỹ Pilatos tóg ag mý: "mý ãjag mý sỹ Judeu ag pã'i kyvãn há?" he mũ.

¹⁰ Topẽ tũ ki rĩr tĩ to pã'i ag tóg vëké Jesus to jũ nỹtĩ, hã kỹ ag tóg nén (ũ) tũ to ti se ja nĩ. Hã ra Pilatos tóg ki kanhró nĩ, hã kỹ tóg ti kavãn sór mũ.

¹¹ Hã ra Topẽ tũ ki rĩr tĩ to pã'i ag tóg vënh kar ag krĩn ja nĩ, ag tỹ Pilatos mý: "Barrabás hã kava ra," he jé.

¹² Kỹ Pilatos tóg ag mý ke mãn mũ. "Kỹ sóg ti tỹ hẽ ri kenh mũ, ãjag tỹ ù to: Judeu ag pã'i, he mũ ãn tỹ?" he tóg.

13 Kÿ ag tóg prēnprēr mũ sir. “!..Cruz to ti sã..!” he ag tóg mũ sir, prēnprēr kÿ.

14 Kÿ Pilatos tóg ag mÿ: “e ri ken kÿ?” he mũ. “Ti kórég tÿ ne han ti?” he tóg ag mÿ. Hã ra ag tóg prēr mãn', prēr mãn' he mũ sir. “!..Cruz to ti sã..!” he ag tóg, prēnprēr kÿ.

15 Kÿ Pilatos tóg ag mÿ hã han sór mũ sir, kÿ tóg ag mÿ Barrabás kyvãg mũ sir. Jesus mrãnmrãn tóg mũ sir, mrãn ke jafã tÿ, kÿ tóg ag mÿ ti fēg mũ sir, ag tÿ ka to ti sa jé.

Soldado ag tÿ Jesus vóg kónãn
(Mt 27.27-31; Jo 19.2-3)

16 Kÿ soldado ag tóg pã'i mág ãn kãra Jesus pére mũ mũ sir, ag vēnh jyvēn jafã ãn kãra. Kÿ ag tóg soldado kar ag jé prēr mũ sir.

17 Ti kri ag tóg kur fón mũ, kur kusũg tÿ. Sónh pirĩn kÿ ag tóg ti krĩ tógfīg mũ sir.

18 Kÿ ag tóg ti mÿ: “viva, Judeu ag pã'i,” he mũ sir, ti nyg kÿ.

19 Kÿ ag tóg vãn tÿ ti krĩ mĩ mrãnmrãn mũ sir, ti to ag tóg sugsg mũ sir, kÿ ag tóg ti jo grĩnhgrĩnh ke mũ sir, ag tÿ ón kÿ ti to: “Senhor,” hen kÿ.

20 Ag tÿ ti nyg kar ag tóg ti ki kunũg mũ, kur kusũg ãn ti. Kÿ ag tóg ti kur pē tÿ ti kãra rãg mũ sir. Kÿ ag tóg ti pére mũ mũ, ag tÿ cruz to ti san jé.

Jesus tÿ cruz to sa
(Mt 27.32-34; Lc 23.26-43; Jo 19.17-27)

21 Hã ra ù tóg vãnãh kãtã kãtĩ mũ, hã vÿ: Cirene tá Simão, he mũ. Alexandre panh vē, Rufo panh vē gé. Ti tÿ mĩ mũ ra ag tóg ti mÿ vĩ tar han mũ, ti tÿ Jesus cruz vyn jé.

22 Kÿ ag tóg Gólgota tá junjun mũ sir ti mré. Gólgota to ken hã vē, hã vÿ: vēnh krĩ kuka, he mũ ěg vĩ ki.

23 Kÿ ag tóg ti mÿ vinho ven mũ, Jesus mÿ, ka tÿ mirra jēnjo grór mré hã, hã ra tóg kron jãvãnh nĩ, vēnh kagta ti.

24 Kÿ ag tóg cruz to ti sãg mũ sir. Ti kur tÿ ag tóg jagnē mÿ vēnh kãpãm mũ sir, to ag tóg jogar he mũ gé, ti kur to, soldado ag.

25 Kusã ki 9 hora vē sir, kÿ tóg cruz to ti sãg mũ.

26 Ag tÿ nén tÿ kato vĩ tóg rán kÿ nĩ, hã vÿ: “Judeu ag pã'i tÿ rei vē,” he mũ. Ti kri tóg sa, vēnh rán ti. Ti tÿ nēji vēsÿ pã'i tÿ rei han mũ to ag tóg ti tén mũ.

27 Ti kóm ag tóg ãn régre ag tÿ cruz to sãg mũ gé, bandido ag. Û vÿ ti pēgja tá sa, jó ù vÿ ti jakãnh tá sa.

28 Hã kÿ tóg nén tÿ ã to rán kÿ nĩ ěn vē, hã vÿ: “ag mÿ tóg tÿ ãn jykre pãno ag mré ke nĩ,” he mũ, Topē vĩ rán ki. Hã ra tóg ge nĩ.

29 Kÿ ù tÿ mĩ mũ mũ ag tóg ti nyg' he mũ gé, vÿn vÿn he kÿ. “Ó,” he ag tóg mÿ. “ã hã ne tóg: Topē jo ãn kókén jé sóg ke mũ, he gé,” he ag tóg. “Kurã tãgtũ ki sóg ù han mũ, he ã tóg mũ gé,” he ag tóg.

30 “Vēnh kren han ra kema'. Cruz to kãtére kema',” he ag tóg ti mÿ.

31 Ge ag tóg mũ gé, Topē tũ ki rĩr tĩ to pã'i ag, Topē vĩ to professor ag mré. Ti nyg ag tóg mũ gé, kÿ ag tóg jagnē mÿ: “ũ krenkren han tóg, hã ra tóg vēnh hã kren han ki kagtīg nĩ,” he mũ.

32 “Cristo jé cruz to kãtére kema', Judeu ag pã'i ti', ěg tÿ ve jé, ěg tÿ ti vĩ kri nĩm jé,” he ag tóg. Kÿ bandido ag, ù tÿ ti kóm cruz to nÿtĩ ěn ag tóg ti nyg mũ gé.

Jesus ter
(Mt 27.45-56; Lc 23.44-49; Jo 19.28-30)

33 Rã tÿ ěg nĩno kã sa ra tóg kuty' he mũ sir, ga kar mĩ hã. Kÿ kuty ěn tóg hora tãgtũ tũg mũ.

34 3 hora ki Jesus tóg prēr mũ sir, jamã hár(a), kÿ tóg: “Eloí, Eloí, lemã sabactani?” he mũ. ěg vĩ ki ěg tóg tag to: “Topē, Topē, ã tÿ ne jé isovãnh nē?” he mũ.

35 Kÿ tá nÿtĩ ù ag tóg jēmē kÿ (ag tóg) jagnē mÿ: “ha vé, Elias jé tóg prēr mũ,” he mũ.

36 Kÿ ù tóg vēnhvãg mũ sir, kÿ tóg esponja tÿ vinho prãg mũ, vinho kaja pir tÿ. Ka jurÿn kÿ tóg tÿ kusón kÿ vinho kãra rãg kÿ ti mÿ ven mũ sir, ti tÿ ki ùnh' ùnh' ke jé. “Toreg',” he tóg. “Hēn ri ke mũn Elias kãtĩ mũ, ti kãtérem jé,” he tóg.

37 Hã ra Jesus tóg prēr mág (pē) han kÿ hun ke mũ sir.

38 Hã ra Topē jo ãn krēm kur tÿ jãnkã nĩfe tóg jaran ke mũ, ti jar tóg vēnh kãkym ke kãn mũ sir.

39 Hã ra capitão tóg ti vég jē nĩ. Ti prēr mēg tóg mũ, ti tÿ hun ke ěn mēg tóg mũ, kÿ tóg: “vēnh vĩ há ja vē,” he mũ. “Topē kósin ja vē” he tóg.

40 Kÿ ùn tÿtã fag tóg tá nÿtĩ gé. Kuvar há tá nÿtĩ kÿ fag tóg ti vég nÿtĩ nĩ. Fag kã ù fi

vỹ tóg tỹ Maria Madalena fi nĩ, kỹ ù fi tóg tỹ Salomé fi nĩ gé, kỹ ù fi tóg tỹ Maria fi nĩ gé, José mré Tiago sĩ m̃nh tag fi.

⁴¹ Ûn týtá ên fag tóg ti nón mũ ja nĩgtĩ, ti tỹ Galiléia mĩ tĩ mũn kỹ. Tá fag tóg ti ki rĩr ja nĩgtĩ gé. Kỹ ùn týtá tỹ hên ri ke fag tóg ti ve kỹ nýtĩ gé, ti tỹ cruz to sa kỹ, ti mré Jerusalém ra mũ ja ên fag.

Ag tỹ vênh kej tá ti fi
(Mt 27.57-61; Lc 23.50-56; Jo 19.38-42)

⁴² Râké tóg nỹ ha, nén kar han jé kurã vê sir, hã vỹ: vênhkán ke jo kurã ên, he mũ.

⁴³ Hã ki Arimatéia tá José tóg Pilatos m̃ ke mũ, ti tỹ ti m̃ Jesus fár fi jé. Arimatéia tá José tóg tỹ vênh jyvên tĩ ag kã ù nĩ. Jykre kuryj tóg nĩ. Topê tỹ tỹ êg pã'i nĩ ve sór tóg tĩ gé. Ên hã vỹ tóg mũmêg vánh kỹ Pilatos m̃ Jesus fár to vĩ mũ.

⁴⁴ Kỹ Pilatos tóg: “kỹ ti m̃ ter huri?” he mũ. Kỹ tóg capitão jé prêr kỹ ti m̃: “ti m̃ ter huri?” he mũ, “m̃ vãsỹ?” he tóg.

⁴⁵ Kỹ capitão tóg: “hỹ,” he mũ. “Ter ti huri,” he tóg. Kỹ Pilatos tóg José m̃ Jesus fár ti fig mũ sir.

⁴⁶ Kỹ tóg sir kur kupri kym mũ, ùn há tâvĩ. Kỹ tóg Jesus kátérem mũ. Kur ên tỹ tóg ti pãg mũ. Kỹ tóg vênh kej kátá ti finh tĩ mũ sir, pãró nor kãkã. ag tỹ pãró nor han ja kãkã. Kỹ tóg pó tỹ nĩfêh mũ sir, ti jy.

⁴⁷ Hã ra Maria Madalena fi tóg vég mũ sir, ag tỹ ti fi ti, Maria fi mré hã, José m̃nh fi.

16

Jesus rĩr mãn
(Mt 28.1-8; Lc 24.1-12; Jo 20.1-10)

¹ Vênhkán ke kurã tũg kỹ Maria Madalena fi tóg nén ger há mäg mũ, Salomé fi ke gé, Maria fi ke gé, Tiago m̃nh ên fi. Fag tỹ ti fár ger há han sór vê.

² Kỹ semana kurã ve ki fag tóg kusã (pê) ki ti kej ra mũ mũ, rã tỹ jun ke kỹ sa ra.

³ Mũn kỹ fag tóg jagnê m̃: “ũ nỹ h̃n êg m̃ ti kej ti nón mũ', tá', pó tỹ nĩfe ên ti'?” he mũ.

⁴ Hã ra fag tóg vênh jo vég mũ, ti kej tá, hã ra tóg nor nỹ nĩ, pó mág ên tóg tĩn kỹ nĩ nĩ sir.

⁵ Tá junjun kỹ fag tóg ti kej kãra ge mũ sir, kỹ fag tóg kátá kyrũ vég mũ, hã ra tóg

ti nỹgia pêgja tá nĩ nĩ, kur kupri tu kỹ. Kỹ tóg fag m̃ e tĩ, m̃r, ha m̃.

⁶ Kỹ kyrũ ên tóg fag m̃: “vênhm̃' he tũg,” he mũ. “Ăjag h̃n Jesus jãvánh mũ, Nazaré tá ke ti,” he tóg, “ag tỹ cruz to ùn sãg mũ ên ti,” he tóg. “Rĩr ti jê nĩ, tag ki ti tũ nĩ ha,” he tóg. “Ag tỹ ti fi ja hã vê ha,” he tóg.

⁷ “Kur Pedro m̃ tónh mũ jêg, ti mré mũ tĩ kar ag m̃ ke gé,” he tóg. “Ag m̃: Ăjag jãmĩ tóg tĩg mũ nêji, hemnĩ, Galiléia ra, hemnĩ. Tá Ăjag ti venh mũ, hã kỹ tóg Ăjag m̃ to ja nĩ, hemnĩ,” he tóg, fag m̃, kyrũ ti.

⁸ Kỹ fag tóg ti kej tá fũrũrũn kỹ pa mũ. Pétê fag tóg sir mũ mũ, fag m̃ e tĩn kỹ, fag tỹ jũrũn ke kỹ. Kỹ fag pi(jé) ù m̃ nén ù tó mũ m̃r', fag kanê jur kỹ.

Maria Madalena fi tỹ ti ve
(Mt 28.9-10; Jo 20.11-18)

⁹ Jesus tỹ kusã ki rĩr mãn kỹ, ti tỹ semana ki kurã ve ên ki rĩr mãn kỹ tóg Maria Madalena fi m̃ vênh ven vén mũ, ti tỹ ùn ki vėjagrê kórêg tỹ 7 (ke) pan ja ên fi m̃.

¹⁰ Kỹ fi tóg tĩ mũ, ti mré nýtĩ ag m̃ tó jé, ag fe kaj nýtĩn kỹ, ag kygfỹ' hen kỹ.

¹¹ Hã ra ag tóg kri nĩm tũ nĩ, fi tỹ ag m̃ kãmén mũ ra, ti tỹ rĩr nĩ ên ti, fi tỹ ã tỹ ti ve ja ên kãmén mũ ra.

Ûn régre ag tỹ ti ve
(Lc 24.13-35)

¹² Kar kỹ tóg ùn régre ag m̃ vênh ven mũ gé sir. Ag m̃ tóg vêsỹ ùn kỹ tĩ nĩ. Ag mũ ra ag tóg êp̃ry kri ti vég mũ.

¹³ Kỹ ag tóg vỹnṽyn ke kỹ (ag tóg) ù tỹ tá nýtĩ ag m̃ tó mũ gé sir, Jesus mré mũ tĩ ù ag m̃, hã ra ag tóg ag vĩ kri fig tũ nĩ gé.

Jesus tỹ ã mré mũ tĩ ag m̃ vênh ven
(Mt 28.16-20; Lc 24.36-49; Jo 20.19-23; Hk 1.6-8)

¹⁴ Vãhã tóg ù tỹ 11 (ke) ag m̃ vênh ven mũ gé, ag pin kỹ, ag jêg nýtĩ ra. Kỹ tóg ag m̃ vĩ tar han mũ, ag tỹ kri nĩm jãvánh nýtĩn kỹ, ag tỹ to jykrén tũ nýtĩn kỹ. “Ăjag hã ne tóg ù tỹ inh vég mũ ên fi vĩ kri fi ja tũ nĩ', ù tỹ inh vég mũ ên ag vĩ kri nĩm ja tũ Ăjag nĩ gé,” he tóg. “Ag tỹ inh rĩr mãn vég mũ ra Ăjag tóg kri fi ja tũ nĩ,” he tóg.

¹⁵ Kĩ tóg ag mĩ: “ga kri mũ kĩ ãmã kar mũ vãnh vĩ sér kãmén nĩ, Topẽ tỹ há(r) ag kar mĩ,” he mũ.

¹⁶ “Ủ tỹ ãjag vĩ kri fig mũ ẽn ag vĩ krenkren ke mũ, ủ tỹ inh ki ge kĩ kygpe kĩ nỹtĩ ẽn ag vĩ krenkren ke mũ,” he tóg. “Hã ra ủ tỹ kri fig tũ ẽn vĩ kren ke tũ nĩ, ủ tỹ inh ki rã tũ ẽn vĩ kren ke tũ nĩ,” he tóg, Jesus ti.

¹⁷ “Ủ tỹ inh ki ge mũ ẽn ag vĩ milagre venh ke mũ inhhã,” he tóg. “Tag ve jé ag tóg ke mũ, ha mẽ. Vãnh jagrẽ kórég pan jé ag tóg ke mũ, ijkre tỹ,” he tóg. “Ủn vĩ ủ ag vĩ tó jé ag tóg ke mũ,” he tóg.

¹⁸ “Ag tỹ kejẽn pỹn kãgmĩg mũ ra, ag tỹ kejẽn veneno kron mũ ra tóg ag tỹ hẽ ri kenh ke tũ nĩ,” he tóg. “Ủn kaga ag mẽgmẽ jé ag tóg ke mũ gé, ag nĩgé tỹ, kĩ ag tóg sir ag tỹ há' henh ke mũ,” he tóg, Jesus ti.

Jesus tỹ ã jóg ra tĩg

(Lc 24.50-53; Hk 1.9-11)

¹⁹ Jesus tỹ ã mré mũ tĩ ag mỹ tag tó kar kĩ tóg kanhkã ra tãpry mũ sir, kĩ tóg tá jun kĩ (tóg) Topẽ pẽgja tá nĩ mũ.

²⁰ Kĩ ag tóg mũ mũ sir, ãmã kar mũ hã, ti mré mũ tĩ ag. Kĩ ag tóg tugtó mũ, vãnh vĩ sér ẽn ti, kĩ ẽg Senhor tóg ag mré han tĩ nĩ, ag vĩ kóm tóg vãnh kar tỹ nẽn han vãnh ẽn hyn han mũ. Hã vễ.

LUCAS TÏ RÁ

¹ Lucas tÏ rá vë. SÏ ã mÏ rán vë, Teófilo'. Û tÏ hën ri ke ag vÏ to jykrén, ag tÏ kãmén jé, ãg tÏ Jesus to nén ki kanhró nÏtÏ ên ti, Topë tÏ ti jënë ja ên ti, kÏ ag tóg rán huri.

² Û tÏ ti vég mÏ ag tóg ãg mÏ kãmén ja nÏgtÏ, ù tÏ ti vÏ tó tÏ ag, ù tÏ ti mré mÏ ja ên ag. Ên ag tÏ nén tó rán ag tóg huri, ù ag.

³ KÏ sóg vãhã rán to jykrén mÏ gé sir, ha mē. Jesus kãme mē kãn ja inh nÏ ha, ti mur mré hã, kÏ sóg ti tÏ nén han mÏ mē kãn gé. Hã kÏ sóg ã mÏ Jesus kãme rán mÏ sir. Komēr hã sóg rán kãn sór mÏ.

TÏ ã tóg pã'i mág nÏ, Teófilo'.

⁴ Mē ã huri, Jesus kãme ti. SÏ ã mÏ rán vë, ã tÏ ti tÏ ki hã tó ja mēn jé sir.

João Batista mur ke tó

⁵ Kejën Herodes tóg tÏ Israel ag pã'i mág tÏ rei nÏ, ga tÏ Judéia tá. KÏ Topë tÏ ki rÏr tÏ ù tóg nÏ nÏ, ti jiji hã vÏ: Zacarias, he mÏ. Ti jóg'jóg ve jyjn hã vÏ: Abias, he mÏ. Arão krē'krē ù vë, Abias ti. Semana pir ki tóg Topë tÏ ki rÏr tÏgtÏ, Abias ti. Ti semana ki ti krē'krē tÏ Zacarias ên tÏ ki rÏr vë, ti tÏ tÏ Abias krē'krē nÏn kÏ.

PrÏ ti nÏ, Zacarias ti, kÏ ti prÏ fi jiji hã vÏ: Isabel, he mÏ. Arão krē'krē fi vë gé, Isabel fi.

⁶ Ên fag vÏ vënh jykre kuryj han tÏ, kÏ fag jykre vÏ kuryj nÏtÏ, Topë mÏ. Ti vÏ ki króm fag tóg tÏ, ãg Senhor vÏn ki. Ti tÏ ãg jyvën han fag tóg tÏ, kygnë sór tÏ fag tóg nÏgtÏ.

⁷ Hã ra fag krē tóg tÏ tÏ. KurÏ fi tóg nÏ, Isabel fi, hã kÏ fag tóg krē tÏ nÏtÏ. Krē tÏ nÏtÏ ki fag tóg kófa nÏtÏ ha.

⁸ Kejën Zacarias tóg ã semana pétēm mÏ sir, ti tÏ Topë tÏ ki rÏr jé. KÏ tóg cidade tÏ Jerusalém ra tÏ mÏ, Topë tÏ ki rÏr jé. Tá jun kÏ ag tóg jogar he mÏ, ag tÏ ù tÏ Topë mÏ ger há pÏn ke mÏ ên ve jé, incenso ên ti.

⁹ Ag jykre vë, ag tÏ to jogar he sór ti. Ag tÏ to jogar hen kÏ tóg tÏ Zacarias nÏ sir, kÏ tóg Topë jo ãn kãra rã mÏ sir, ti mÏ pÏn jé, ger há ên ti.

¹⁰ Ti tÏ Topë jo ãn krēm pÏn kÏ vënh kar tóg re tá nÏtÏ nÏ, Topë mré vÏn kÏ. Zacarias

tÏ Topë mÏ pÏn kÏ ag tóg Topë mré vÏ nÏtÏ nÏ, re ki, ùn e ên ag.

¹¹ KÏ tóg ti mÏ pÏn mÏ sir. KÏ Topë tÏ jënë jafã vÏ ti mÏ vënh ven mÏ. Topë mÏ ger há pÏn jafã vÏ tá jé nÏ, ãn kãtã. Mesa ên pëgja tá tóg jé nÏ, Topë tÏ jënë jafã ti.

¹² Zacarias tÏ ti ve kÏ tóg jÏrÏn ke mÏ. Ti mÏ tóg e tÏ, ti tÏ ti ven kÏ.

¹³ Hã ra tóg ti mré vÏ mÏ, Topë tÏ jënë jafã ti. KÏ tóg ti mÏ: "Zacarias," he mÏ. "Kamëg tÏg nÏ," he tóg. "Topë vÏ ã tÏ ti mÏ nén to vÏ mÏ ên mē, kÏ tóg ã mÏ han ke mÏ ha. Fi kufyg jé ã tóg ke mÏ, ã prÏ fi, Isabel fi. Fi tÏ ti ve kÏ tóg gré nÏnh mÏ, ã kósin ti, ha vemnÏ," he tóg, Topë tÏ jënë jafã ti. "KÏ ã tÏ ti jyjn han kÏ: João, hemnÏ," he tóg mÏ.

¹⁴ "KÏ tóg ã mÏ sér tÏnh mÏ. ã fe tóg mrin kenh mÏ. Û tÏ hën ri ke ag mÏ tóg há tÏnh mÏ, fi tÏ ti ven kÏ.

¹⁵ Topë vÏ ti tÏ ùn mág han ke mÏ. Vinho vóg ke tÏ tóg nÏ, goj fa vóg ke tÏ tóg nÏ gé. Ti vãkre vë. Topë kuprÏg vÏ tÏ ti jagrë nÏnh mÏ, fi tÏ ver ti vég tÏ ki.

¹⁶ Israel ag mÏ tóg Topë vÏ tónh mÏ, kÏ ù tÏ hën ri ke ag vÏ ti vÏ mē kÏ kri fi kÏ ãjag jykre tovãnh ke mÏ. Topë jykre hã han jé.

¹⁷ ãg Senhor jo tóg tÏg ke mÏ gé. VãsÏ Topë vÏ tó tÏ tÏ Elias jykre han jé tóg ke mÏ. Elias vÏ Topë kuprÏg tÏ jagrë ja nÏgtÏ, kÏ tóg jykre tar han ja nÏgtÏ. Ên jykre han jé tóg ke mÏ. ã kósin tag tÏ ag jyvën kÏ ag panh tóg ãjag krē mré vënh jykre pir han ke mÏ. Û tÏ Topë vÏ mranh tÏ ên tóg vënh jykre kuryj han sór ke mÏ gé, ù tÏ Topë vÏ ki króm tÏ ên ri ke. Hã ki tóg vënh kar jykre tÏ há' henh ke mÏ, ag kugrynh kÏ, ã kósin tag ti. Topë mÏ tóg ag jykre tÏ há' henh mÏ, Cristo tÏ kãtÏg ken jo, ag tÏ ti jãvãnh jé," he tóg mÏ, Topë tÏ jënë jafã ti, Zacarias mÏ.

¹⁸ KÏ Zacarias tóg ti mÏ: "hã ra sóg kófa nÏ ha," he mÏ. "Kar inh prÏ fi vÏ kófa nÏ gé, inh mré. KÏ inh hÏn hē ri kenh mÏ? Inh mÏ tá krÏg mÏ vÏ?" he tóg.

¹⁹ KÏ Topë tÏ jënë jafã tóg ti mÏ: "tÏ sóg Gabriel nÏ," he mÏ. "Topë nÏgja tá inh jëgtÏ. Hã ra tóg inh jënë, sÏ ã mré vÏ jé, sÏ ã mÏ vënh vÏ sér tag tó jé," he tóg.

²⁰ "Ha vé, vÏ vãnh nÏ jé ã tóg ke mÏ ha, ha vemnÏ. VÏ vãnh nÏ ki ã tóg isÏ ã mÏ nén tó

mũ kurã ên pétêm ke mũ. ã hã ne tóg sỹ ã mỹ vĩ kri nĩm tũ nĩ'. Ti kurã ki ã tóg venh mũ, sỹ ã mỹ nén tó ja ti. ã tỹ inh vĩ kri fig tũ nĩn kỹ ã tóg vĩ vãnh nĩnh mũ ha," he tóg, Topẽ tỹ jẽnẽ jafã ti.

²¹ Hã ra vãnh kar ên tóg re tá nỹtĩ nĩ, Zacarias jãvãnh kỹ. Ag mỹ tóg e tĩ, ti kãkutẽ vãnh han kỹ, Topẽ jo ãn kãtã.

²² Vãhã tóg kãkutẽ mũ, hã ra tóg sir vĩ vãnh jẽ. Kỹ tóg ag mỹ ven mũ, ã nĩgẽ tỹ. Hã ki ag tóg ki kanhrãn mũ sir, ti tỹ nén nẽ ve ja ên ti, Topẽ jo ãn kãtã.

²³ Ti vĩ vãnh nĩn ki ti rãnrãj tóg kejẽn tũ' he mũ sir, ti tỹ Topẽ tũ ki rĩr ên ti. Kỹ tóg ã ãn ra tĩ mũ sir.

²⁴ Ti tỹ ã ãn tá jun kar kỹ ti prũ fi tóg kejẽn kufyg mũ sir, Isabel fi. Kỹ fi tóg vãnh péju kỹ nĩ nĩ sir, fi mỹ sér tĩn kỹ. Kysã tỹ 5 (ke) han fi tóg, vãnh péju kỹ nĩ ki.

²⁵ "Topẽ hã ne inh jagãgtãn'," he fi tóg mũ. "Inh ve tóg, kỹ tóg inh mỹ'ãg tỹ tũg' hé. Inh kurĩ to fag tóg: "Topẽ hỹn fi to kórég nĩ," he ja nĩgtĩ. Hã ra tóg fag vĩ tỹ tũg' hé, Topẽ ti," he fi tóg mũ. Hã kỹ fi tóg kufyg mũ sir, ã kósin vãnh (hã) ra.

Jesus mur ke tó

²⁶ Fi kufy nĩ ki kysã tỹ 6 vẽ sir, kỹ Topẽ vĩ ã tỹ jẽnẽ jafã jẽnẽg mũ, ti tỹ Jesus mur ke tónh tĩg jé, Gabriel ên ti. Kỹ tóg ga tỹ Galiléia ra tĩ mũ, cidade tỹ Nazaré ra.

²⁷ Tá tátãg ã fi tóg nĩ nĩ. ãn mén ja tũ fi vẽ. Fi jĩjin hã vĩ: Maria, he mũ. Fi mén ken hã vĩ: José, he mũ. Davi krẽ'krẽ ã vẽ, José ti, fi mén ke ên ti.

²⁸ Fi hã mỹ tóg vãnh ven mũ sir, Gabriel ti, kỹ tóg fi mỹ: "ã mỹ há?" he mũ. "Topẽ vĩ ã jagãgtãn, kỹ tóg ã vãng mũ," he tóg mũ.

²⁹ Fi tỹ ti ve kỹ fi tóg jũrũn ke mũ. Ti vĩ tóg fi mỹ e tĩ, kỹ fi tóg to jykrén mũ sir, ti vĩ to. "Ti tỹ ne tó nẽ, hỹn?" he fi tóg mũ, to jykrén kỹ.

³⁰ Kỹ Topẽ tỹ jẽnẽ jafã tóg fi mỹ: "kamẽg tũg ra," he mũ. "Topẽ vĩ ã jagãgtãn mỹr," he tóg.

³¹ "Ha vé, kufyg jé ã tóg ke mũ," he tóg. "Kỹ ã tóg kósin ke mũ. ã tỹ ti jyjyn kỹ ti mỹ: Jesus, hemnĩ," he tóg, Topẽ tỹ jẽnẽ jafã ti, fi mỹ.

³² "Tỹn ãn mág jẽnẽ ke mũ, ã kósin tag ti, kỹ ag tóg ti to: ã tỹ kynhmỹ nĩ ên kósin, henh ke mũ. Kỹ ãg jóg tỹ Topẽ vĩ ti tỹ pã'i mág han ke mũ, vãsỹ ti jóg'jóg ve tỹ Davi jẽgja kã.

³³ Kỹ tóg tỹ pã'i nĩ sir, Jacó krẽ kar to pã'i. Ti tỹ tỹ pã'i nĩ tag vĩ tũ' henh ke tũ nĩ. Tỹ pã'i han kỹ tóg nĩ nĩ," he tóg, Gabriel ti.

³⁴ Kỹ fi tóg ti mỹ: "hã ra sóg ã mré nỹ ja tũ nĩ ver," he mũ. "Kỹ inh hẽ ri kenh mũ?" he fi tóg ti mỹ.

³⁵ Kỹ tóg fi mỹ: "Topẽ kuprĩg vĩ ã kri tĩnh mũ," he mũ, "kỹ ti kãnhvãng vĩ ã kri tĩnh mũ gé, kỹ tóg ã jykre tỹ ã kósin ti han ke mũ, Topẽ ti. Hã kỹ ag tóg ti to: Topẽ tũ, henh ke mũ, ã tỹ ãn venh ke ên to. Topẽ kósin, he jé ag tóg ke mũ, ti to.

³⁶ Ha vé, ã mré ke fi vĩ kufy nĩ, Isabel fi. ãn gré ve jé fi tóg ke mũ. ã kófa (hã) ra fi tog kufy nĩ. Kysã tỹ 6 (ke) han fi tóg huri, kufy nĩ ki. Fi to ãjag tóg: kurĩ fi tóg nĩ, he tĩ vẽ, hã ra fi tóg kufy nĩ ha.

³⁷ Topẽ hã ne nén kar han há nĩ', hã kỹ tóg fi mỹ han. Kỹ tóg ã mỹ han ke mũ gé, sỹ ã mỹ tó mũ tag ti," he tóg, Gabriel ti.

³⁸ Kỹ fi tóg ti mỹ: "há ti nĩ," he mũ. "Tỹ sóg Topẽ camarada nĩ mỹr, ti tũ pẽ. Kỹ tóg inh mỹ há tĩ, ã tỹ inh mỹ tó mũ tag ti," he fi tóg ti mỹ. Kỹ tóg tĩ mũ sir, Topẽ tỹ jẽnẽ jafã ti.

Maria fi tỹ Isabel fi venh tĩ

³⁹ Ti tĩg kar kỹ Maria fi tóg tĩ mũ gé sir, Isabel fi jamã ra. Pãnónh e tá tóg nĩ, fi jamã ti, ga tỹ Judéia tá. Fi tỹ ra tĩg kỹ fi tóg fũrũn tĩ mũ.

⁴⁰ Fi tỹ Zacarias ãn tá jun kỹ fi tóg Isabel fi mỹ: "ã mỹ há?" he mũ.

⁴¹ Kỹ Isabel fi tóg fi vĩ mẽg mũ, kỹ fi kósin tóg vo mũ, fi kãki. Kỹ Topẽ kuprĩg vĩ fi krĩn mũ.

⁴² Kỹ fi tóg prẽr mũ. "Topẽ tóg ã ve há han, fag kar kãmĩ tóg ã kuprẽg," he fi tóg fi mỹ. "Kỹ Topẽ vĩ ã kósin ve há han mũ gé, ã tỹ ãn venh ke ti.

⁴³ Inh Senhor mỹnh fi hã ne tóg inh venh kãtĩ mũ', kỹ tóg inh mỹ e tĩ'," he fi tóg fi mỹ.

⁴⁴ "Ha vé, isỹ ã vĩ mẽ kỹ inh kósin tóg vo ja nĩ, inh kãki. Ti mỹ tóg sér tĩ, ã vĩ ti.

⁴⁵ ã hã ne tóg Topẽ vĩ kri fi', ti tỹ ã mỹ vãnh vĩ jẽnẽn kỹ. Hã kỹ tóg ã ve há han, Topẽ ti. ã tỹ ti vĩ kri nĩm kỹ ã tóg venh ke mũ, ti tỹ ã

mỹ nén tó ja ti,” he fi tóg, Isabel fi, Maria fi mỹ.

Maria fi jã

⁴⁶ Kĩ Maria fi tóg ke mũ gé. “Topẽ mỹ sóg vĩ há han sór mũ,” he fi tóg. “Inh mỹ tóg tỹ ùn mág nĩ, ãg Senhor ti.

⁴⁷ Kĩ inh fe tóg mrin ke mũ, isỹ tỹ Topẽ tũ nĩn kỹ, isỹ tỹ ãg kren han tĩ ãn tũ nĩn kỹ.

⁴⁸ Inh ki tóg ãvãnh mỹr. Tỹ sóg ti camarada nĩ. Tỹ sóg ùn sĩ nĩ, há ra tóg inh ki ãvãnh. Kĩ vãnh kar tóg iso: “Topẽ vĩ fi ve há han,” henh ke mũ, inh krẽ'krẽ kar ke gé, ãprã ke krẽ kar ke gé.

⁴⁹ Topẽ há ne inh mỹ ãg tỹ nén han vãnh han'. Tar ti nĩ, Topẽ ti, há kỹ tóg han, inh mỹ. Jykre kuryj ti nĩ, Topẽ ti, kỹ ti jiji tóg ãg mỹ mẽ há tĩ.

⁵⁰ ãg jagãgtãn tóg nĩgtĩ, ãg jóg'jóg ve ag ke gé, ãg panh ag ke gé, ãg ke gé, ãg krẽ kar ke gé. Û tỹ ti kamẽg mũ kar jagãgtãn tóg nĩgtĩ mỹr, ha mẽ.

⁵¹ Jykre (ka)mẽ tóg nĩ, kỹ tóg ãg tỹ nén han vãnh hyn han tĩ. Û tỹ: “vẽsóg ki inh nén kar han tĩ,” he mũ ãn ag jykre tỹ tóg tũg' henh ke mũ,” he fi tóg.

⁵² “Pã'i mág ag tỹ tóg ùn kãsir han, Topẽ ti. Kỹ tóg ùn kãsir ag tỹ ùn mág han.

⁵³ Ûn jagãgtar ag fónfan tóg mũ, nén ù há tỹ, ù tỹ ti vĩ mẽ sór mũ ag. Ûn rico ag mỹ tóg: “ha mũ jẽg,” hé, kỹ tóg ag mỹ nén ù nĩm tũ nĩ, kỹ ag tóg jagãgtar nỹtĩ ha, ù tỹ ti vĩ mẽ jãvãnh ãn ag.

⁵⁴ Israel ag jagãgtãn tóg mũ, ã camarada ag, ã tỹ vãsỹ ag jagãgtãn tĩ ãn to jykrén kỹ. ãg há vẽ, ãg jagãgtãn tóg.

⁵⁵ ãg jóg'jóg ve ag mỹ tóg tó ja nĩ, Abraão mỹ, ti krẽ ag mỹ ke gé, ti tỹ ãg jagãgtãn ke ti. Kỹ tóg ã vĩ ãn to jykrén kỹ han, ti tỹ vãsỹ nén tó ja ti. Ti tỹ ãg jagãgtãn ke ãn tóg tũg' he jãvãnh nĩ,” he fi tóg, Maria fi. Fi tỹ Topẽ mỹ vĩ há han há vẽ.

⁵⁶ Kar fi tóg kysã tãgtũ han mũ sir, Isabel fi mré, kỹ fi tóg ã jamã ra vỹn ke mũ sir.

João Batista mur

⁵⁷ Fi tĩg kar Isabel fi vĩ fi kósin venh ke kurã pêtẽm mũ sir, kỹ fi tóg vég mũ. Há ra tóg gré nỹ, fi kósin ti.

⁵⁸ Kỹ fi rã nỹtĩ fag vĩ vég mũ, fi kanhkã fag ke gé. Topẽ tỹ fi jagãgtãn mẽg fag tóg mũ. Kỹ tóg fag mỹ sér tĩ sir, fi mré, fi kósin to.

⁵⁹ Kurã tỹ 8 (ke) ki ag tóg fi tá junjun mũ, ag tỹ ti gré junun fár kym jé. Kỹ ag tóg ti jyjy to jykrén mũ gé, há vĩ: Zacarias, he mũ. Ti panh jiji tó sór ag tóg mũ, ti mỹ.

⁶⁰ Há ra ti mỹnh fi tóg: “vó,” he mũ. “João, he jé tóg ke mũ, ti jyjy ti,” he fi tóg mũ.

⁶¹ Kỹ ag tóg fi mỹ: “ã kanhkã jiji tũ vẽ há ra,” he mũ.

⁶² Kỹ ag tóg ti panh ki jẽmẽ sór mũ. ãgag nĩgé tỹ ag tóg ti mỹ: “ti jyjy hỹn hẽ ri kenh mũ?” he mũ, ti panh mỹ, ag nĩgé tỹ.

⁶³ Kỹ tóg ki rán jafã to vĩ mũ, Zacarias ti, kỹ tóg rán mũ. “Ti jijin há vĩ: João, he mũ,” he tóg, vãnh rán ki. Kỹ tóg ag mỹ e tĩ sir.

⁶⁴ Kỹ vãhã ti vĩ tóg punh ke mũ. Ti nũnẽ tóg krónh ke mũ, kỹ tóg vĩ mũ sir, Topẽ mỹ vĩ há han tóg mũ, ti mỹ sér tĩn kỹ.

⁶⁵ Kỹ fag rã nỹtĩ kar vĩ kamẽg mũ. Kỹ vãnh vĩ ãn tóg vãnh kar kri rũm mũ, ga tỹ Judéia kar mũ há. Vãnh kar tóg tỹ vãmẽn kãn mũ.

⁶⁶ Kỹ ù tỹ mẽg mũ fag vĩ to jykrén mũ. “Gĩr tag hỹn hẽ ri kenh mũ,” he fag tóg mũ. Topẽ vĩ ti ki rĩr há han, há kỹ tóg fag mỹ e tĩ.

Zacarias tỹ Topẽ mỹ vĩ há han

⁶⁷ Kỹ Topẽ kuprĩg vĩ ti panh tỹ Zacarias krĩn mũ, kỹ tóg tag tó mũ, ha mẽ.

⁶⁸ “Tỹ ti ùn mág jẽ, ãg povo tỹ Israel kri, ãg Senhor ti, há vĩ: Topẽ, he mũ. ãg ki tóg ãvãnh nĩgtĩ, Topẽ ti, ti tỹ ti tũ ag krenkren han jé. ãg há vĩ tỹ ti tũ nỹtĩ,” he tóg.

⁶⁹ “Ti camarada tỹ Davi krẽ'krẽ ãn vĩ ãg krenkren han ke mũ, ãg tỹ ti vĩ jẽmẽn kỹ. Ûn mág pẽ vẽ, Davi krẽ'krẽ ãn ti. Topẽ tỹ ãg mỹ nén han há vẽ.

⁷⁰ Há kỹ tóg tó ja nĩ, vãsỹ. Ti vĩ tó tĩ ag vĩ tugtó ja nĩ, vãsỹ, ãg si ag, ti tũ ag.

⁷¹ Û tỹ hẽn ri ke ag vĩ ãg kato tẽgtẽ mũgtĩ, há ra tóg ãg krenkren han mũ, ag to, ù tỹ ãg to kórég tãvĩ nỹtĩ ag to.

⁷² Ti tỹ ãg jóg'jóg ve ag mỹ tó ja ãn han ja tóg nĩ, ãg jagãgtãn kỹ, Topẽ ti. Ag mré jykrén ja tóg nĩ, Topẽ ti. ãn to jykrén ja tóg nĩ, kỹ tóg ki króm ja nĩ sir, Topẽ ti.

⁷³ Ëg jóg'jóg ve tỹ Abraão mỹ tóg vènh vỹ mág han ja nĩ, Topẽ ti.

⁷⁴ Kỹ tóg ti mỹ: “ag krenkren han jé sóg ke mũ, ã krẽ ag, ag kato tẽgtẽ mũ ag to, ha vemnĩ,” he ja nĩ. “Sỹ ke há vè. Sỹ ag krenkren han kỹ ag tóg sir jatun mỹ isũ han ke mũ, mũmẽg tũ nĩn kỹ,” he ja tóg nĩgtĩ, Topẽ ti.

⁷⁵ “Nén ù vènhmỹ han ke tũ ag tóg nĩgtĩ, kurã kãtĩg ke mũ ãn kã. Vènh jykre kuryj tãvĩ han jé ag tóg ke mũ, isũ han kỹ. Ag tỹ ga kri mũn kỹ ag tóg han ke mũ, isũ ti. Kurã kar ki ag tóg sir inh jykre hã han ke mũ,” he ja tóg nĩgtĩ, Topẽ ti, Abraão mỹ,” he tóg, Zacarias ti.

⁷⁶ Kỹ tóg ã kósin mỹ: “ha vé, vỹ,” he mũ. “Sĩ ã tóg nĩ ver. Û tỹ kynhmỹ nĩ ãn vỹ tó jé ã tóg ke mũ, kỹ ag tóg ã to: “Topẽ vỹ tó ti tĩ,” henh ke mũ. “Ëg Senhor jo ã tóg tĩnh mũ, ã tỹ ti japry kure ri ke han jé, ã tỹ ti jamĩn kuryinh ri ke han jé, ã tỹ vènh kar mỹ Topẽ vỹ tón kỹ,” he tóg.

⁷⁷ “Ag kanhrãn jé ã tóg ke mũ, Topẽ tỹ ãg krenkren han sór ãn to. Ëg tỹ ti vỹ mranh tỹ tóg ãg mỹ vènh pãte fón ke mũ, hã ki tóg ãg krenkren han ke mũ, Topẽ ti,” he tóg, Zacarias ti.

⁷⁸ “Topẽ tỹ ãg jagãgtãn hã vè, ti tỹ ãg to há tãvĩ nĩn kỹ. Ëg ve jé tóg kãtĩg ke mũ, kỹ tóg rã tỹ jun ke ri ke nĩ, Cristo mur ke ti.

⁷⁹ Kuty ri ke ti nĩ, ãg mỹ, ãg tỹ ti ki kagtĩg nỹtĩn kỹ. Ti kãtĩg kỹ tóg ãg mỹ kurã ri ke nĩ sir. Kãgter jé ãg tóg ke mũ, kỹ tóg ãg mỹ kuty ri ke nỹ sir. Hã ra tóg ãg mỹ ã japry ven ke mũ, ã jamĩn ti. Jagma mũn kỹ ãg tóg ti jykre kusa venh ke mũ,” he tóg, Zacarias ti. Ti tỹ ã kósin mỹ tón hã vè.

⁸⁰ Hã kỹ fi tóg João ve ja nĩ, ti han mũ fag tỹ kófa (hã) ra. Kỹ tóg mog mũ sir, kỹ tóg tar jẽ sir. Krĩ há tóg nĩ gé. Êmã tũ mĩ tóg tĩ mũ ver, ã kurã tỹ tá krỹg ki. ã kurã ki tóg Israel ag mỹ vènh ven mũ, ag mỹ Topẽ vỹ kãmén jé.

2

Jesus Mur (Mt 1.18-25)

¹ João mur kar kỹ ga kri pã'i mág tỹ imperador tỹ Augusto vỹ kejẽn vènh vỹ jẽnẽg mũ, vènh kar ag tỹ ãgag jyjy rán mũ jé. Ga

kri mũ kar ag mỹ tóg vènh vỹ ãn jẽgnẽg mũ, pã'i mág tỹ Augusto ti.

² Vènh jiji rá ve vè, ge han ja tũ ag nỹtĩ. Cirênio vỹ tỹ ga tỹ Síria kri pã'i tỹ governador nĩ, Augusto tỹ vènh vỹ ãn jẽnẽg mũn kã. Tỹ tóg Augusto krẽm ke nĩ, Cirênio ti. Tĩ tỹ tỹ pã'i nĩn kỹ ag tóg sir ãgag jyjy ránrán vén mũ.

³ Kỹ ag tóg mũ kãn mũ, ãgag jóg'jóg ve ag jamã ja ra. Tá ag tóg ãgag jiji rá vin mũ sir.

⁴⁻⁵ Kỹ José tóg tĩ mũ gé, ã prũnh ke fi mré, hã vỹ: Maria, he mũ. Cidade tỹ Nazaré tá fag tóg pa mũ, ga tỹ Galiléia tá. Kỹ fag tóg ga tỹ Judéia ra mũ mũ, cidade tỹ Belém ra. Davi krẽ'krẽ vè, José ti, hã kỹ tóg Belém ra tĩ mũ, ã jyjy rá nĩm jé. Davi jamã ja vè, Belém ti. Hã kỹ tóg ra tĩ mũ. Kỹ ti prũnh ke fi vỹ ti mré tĩ mũ, hã ra fi tóg kufy jagy nĩ.

⁶ Fag tỹ tá nỹtĩ ki fi tóg ã kurã pètẽm mũ.

⁷ Kỹ fi tóg ã kósin vèg mũ sir. Gré ti nỹ, fi kósin ve tag ti. Kỹ fi tóg ti pãg kỹ koso kãkã ti fig mũ. Ìn vỹ funfór nỹtĩ, hã kỹ fag tóg vènh mẽg jo ãn krẽm nỹtĩ ja nĩgtĩ.

Mé ki rĩr tĩ ag

⁸ Kỹ ù tỹ mé ki rĩr tĩ ag vỹ tá nỹtĩ gé, carneiro ki rĩr tĩ ag. Ag japỹ ja tá ag nỹtĩ, ãgag mẽg ki rĩr jé, kuty ãn kã.

⁹ Kỹ vãhã Topẽ tỹ jẽnẽ jafã vỹ ag mỹ vènh ven mũ, kanhkã tá. Topẽ tỹ jẽngrẽ vỹ ag kri rũm ke mũ. Kỹ ag tóg kamẽg kỹ jũrũn ke mũ sir.

¹⁰ Kỹ Topẽ tỹ jẽnẽ jafã tóg ag mỹ: “kamẽg tũg ra,” he mũ. “Sỹ ãgag mỹ nèn ù tónh ke vè. Vènh vỹ há tó jé sóg ke mũ, kỹ tóg ãgag mỹ sér tĩnh mũ. Vènh kar vỹ mẽnh mũ, inh vỹ ti, povo kar, kỹ ag fe tóg mrin ke mũ sir.

¹¹ ãgag krenkren han tĩ vỹ ùri mur, hã vỹ: Cristo, he mũ. Ëg Senhor vè ha mỹr. Davi jamã ja tá tóg mur mũ.

¹² Ha mũ jẽg, ãgag tỹ gĩr ãn ve jé. Koso kãkã tóg pãg kỹ nỹ nĩ. Hã ki ãgag tóg ti ki kanhró nỹtĩnh mũ,” he tóg ag mỹ, Topẽ tỹ jẽnẽ jafã ti.

¹³ Kỹ vãhã ù tỹ hèn ri ke ag tóg vènh ven mũ sir. Topẽ tỹ jẽnẽ jafã ag, kanhkã tãn ag. Ën ag vỹ Topẽ mỹ vỹ há han mũ.

¹⁴ “Topẽ vỹ tỹ ùn mág pẽ nĩ,” he ag tóg mũ. “Kynhmỹ ti nĩ, vènh kar kãfór ti nĩ, kỹ ãprã ke ag vỹ jatun mỹ nỹtĩ, ãgag krĩ kusa tĩn kỹ, Topẽ tỹ ù tó há ag,” he ag tóg mũ.

15 Kar ag tóg tũg' he mũ sir, ag tỹ kanhkã ra mũn kỹ.

Ag tỹ tũg' hen kỹ ù tỹ carneiro ki rĩr tĩ ag vỹ jagnẽ mỹ: “mũ nỹ, Belém ra, ãg tỹ ve jé, Topẽ tỹ nén han ja ti, ãg Senhor tỹ ãg mỹ vẽnũh vỹ jẽnẽ ja ãn ti,” he mũ.

16 Kỹ ag tóg fũrũnrũn mũ mũ sir. Tá ag tóg junjun mũ. Kỹ ag tóg vég mũ, Maria fi, José ti ke gé, gĩr ti ke gé. Koso kãkã tóg nỹ nĩ, Maria fi kósin ãn ti.

17 Hã kỹ ag tóg vég mũ. Hã kỹ ag tóg kãmén mũ, vẽnũh kar mỹ. Topẽ tỹ ag mỹ vẽnũh vỹ jẽnẽ ja ãn kãmén ag tóg mũ, gĩr ãn to.

18 Kỹ tóg ù tỹ mẽg mũ ag mỹ e tĩ sir. Û tỹ mé ki rĩr tĩ ag vỹ mẽg ag tóg mũ, kỹ tóg ag mỹ sér tĩ.

19 Kỹ Maria fi tóg vẽnũh vỹ tag to jykrén mũ gé sir. Fi pi(jé) kã jatun mũ', ag tỹ nén tó ja ãn ti. To jykrén kỹ fi tóg nỹ nĩ, Maria fi.

20 Kỹ carneiro ki rĩr tĩ ag tóg sir ãjag mẽg to vỹnvỹn ke mũ gé. Topẽ mỹ ag tóg vỹ há han mũ. “Ti hã ne tóg ãg mỹ vẽnũh vỹ jẽnẽ ja nĩ', ã tỹ jẽgnẽ jafã ag tỹ', kỹ ãg tóg vé,” he ag tóg mũ sir, Topẽ to.

Fag tỹ Jesus jijin

21 Kar kurã tỹ 8 (ke) vỹ tũg mũ. Kỹ tóg ti gré junun fár kym ke kurã pětẽm mũ sir, gĩr sĩ ãn ti. Kỹ fag tóg ti jijin kỹ ti mỹ: “Jesus,” he mũ. Topẽ tỹ jẽnẽ jafã vỹ ti jyjy tag tó ja nĩ, ti mỹnh fi tỹ ver ti tỹ kufyg tũ ra. Hã kỹ fag tóg sir tỹ ti jijin mũ.

Fag tỹ Topẽ mỹ Jesus ven

22 Kejẽn fag vãkre tóg tá krỹg mũ, kỹ fag tóg vẽnũh kykũnh sór mũ. Moisés vỹ tag rán ja nĩ, gĩr mur kar kỹ fag tỹ vẽnũh kykũnh ke ti. Judeu ag jykre hã vẽ. Fag tỹ vẽnũh kykũnh jé fag tóg cidade tỹ Jerusalém ra mũ mũ, fi tỹ Topẽ mỹ ã kósin ven jé, tá. “Ã tũ vẽ,” he sór fag tóg mũ, Topẽ mỹ, fi kósin ãn to.

23 Topẽ vỹ ki tag vỹ rán kỹ nĩ, hã vỹ: “fi kósin ve tỹ gré nỹn kỹ tóg tỹ ãg jóg mág tỹ Topẽ tũ nỹ,” he mũ, Topẽ vỹ tỹ rán kỹ nĩ ki.

24 Hã kỹ fag tóg Topẽ jo ãn ra mũ mũ, Topẽ mỹ nén ù pũn jé. Rán kỹ tóg nỹ nĩ, ãg jóg mág vĩn ki, fag tỹ ne tỹ ti mỹ pũn ke ti, hã vỹ: sórãg régre, ke tũ nĩ kỹ ton régre, he mũ gé. ãn ma fag tóg mũ mũ, fag tỹ Topẽ mỹ pũn

jé. Topẽ tũ ki rĩr tĩ ag mỹ fag tóg vin tĩ, sórãg ti, kỹ ag tóg tãnh kỹ Topẽ mỹ pũn tĩ.

25 Kỹ Jerusalém tá ù tóg nỹ nĩ, ti jyjy hã vỹ: Simeão, he mũ. Ûn jykre kuryj vỹ, Simeão ti. Topẽ kamẽg tóg tĩgtĩ, Topẽ kuprĩg tỹ tóg jagrẽ nĩ. Topẽ tỹ Israel ag krenkren han mũ ãn jãvãnh tóg nĩgtĩ, Simeão ti.

26 Kỹ Topẽ kuprĩg vỹ ti mỹ: “Cristo ve jé ã tóg ke mũ, ã ter ke to hã, ãg Senhor tỹ ti jẽnẽn kỹ,” he ja nĩgtĩ ti mỹ.

27 Topẽ kuprĩg tỹ ti krĩn kỹ tóg kejẽn Topẽ jo ãn kãra tĩ mũ. Kỹ tóg tá jẽ nĩ, hã ra fag tóg Jesus ma kãmũ mũ, fag tỹ Topẽ mỹ sórãg pũn jé, Moisés tỹ Judeu ag mỹ nén tó ja ti.

28 ã tỹ Jesus ve kỹ tóg ti vãg mũ sir, kỹ tóg ti to Topẽ mỹ vỹ há han mũ, Simeão ti.

29 “Ëg jóg mág,” he tóg, Topẽ mỹ. “Vãhã ã tóg inh jé prẽr ke mũ, kỹ sóg jatun mỹ tĩg mũ ha,” he tóg. “ã tỹ inh mỹ nén tó jan han ã tóg huri,” he tóg.

30 “Ve inh huri, ã tỹ ãg krenkren han ke mũ ti. Cristo ve inh huri,” he tóg, Simeão ti.

31 “Vẽnũh kar rĩnve ã tóg han, ã tỹ ãg krenkren han ke mũ ti.

32 Kỹ tóg ãg mỹ jẽngrẽ ri ke nĩ, Cristo mur ti. Kỹ povo kar vỹ vég mũ, fóg ag kar, kanhgág ag kar ke gé, ã tỹ ag krenkren han ke mũ ti. Ëg povo tỹ Israel tỹ ã tóg ãn mág han huri, vẽnũh kar rĩnve, Cristo tỹ ãg mré ke nĩn kỹ,” he tóg, Simeão ti, Topẽ mỹ.

33 Kỹ Jesus jóg vỹ ti vỹ mẽg mũ, Jesus mỹnh fi ke gé, kỹ tóg fag mỹ e tĩ, ti tỹ Jesus to nén tó mũ ãn ti.

34 Kỹ Simeão vỹ fag mỹ vẽnũh vỹ há tó mũ gé. “Topẽ vỹ ãjag ve há han mũ,” he tóg mũ fag mỹ, Simeão ti. Kỹ tóg Maria fi mỹ: “ha vé,” he mũ. “Israel tỹ hẽn ri ke ag vỹ ti tũgrĩn mũ há han ke mũ, jãvo ù tỹ hẽn ri ke ag vỹ ti tũgnĩn mũ kónãn ke mũ gé. Kỹ ag tóg ti kato vĩnh ke mũ gé, Topẽ tỹ ti jẽnẽ ja ra.

35 Kỹ ã tóg ti tũgrĩn vỹsyrénh kenh ke mũ, jỹ, kỹ tóg rógro tỹ ã fe tỹ gynh ke ri ke nĩnh ke mũ, ã vỹsyrénh ke ti. Kỹ ãg tóg venh ke mũ, ag tỹ nén to ti to jykrén mũ ti,” he tóg, Maria fi mỹ, Simeão ti.

36 Kỹ ù fi tóg tá nĩ gé, Topẽ jo ãn krẽm, fi jiji hã vỹ: Ana, he mũ. Topẽ vỹ tó tĩ fi vỹ gé. Fanuel kósin fi vỹ. Kỹ fi jóg/jóg ve vỹ tỹ Aser nĩ. Kófa fi nĩ ha, kófa tãvĩ. ã mén kỹ fi tóg

7 anos han, fi mén mré, kar tóg ter ja nĩ, fi mén ti, fi mré 7 anos han kar.

³⁷ Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ēn fi vỹ Topẽ jo ĩn krēm nĩ nĩ, kurã kar ki fi tóg tá nĩ nĩ sir. Tá fi tóg Topẽ tũ han nĩgtĩ, ti mré vỹ kỹ. Jẽg tũ fi nĩgtĩ, fi tỹ Topẽ mré vỹ jé. Kutu tá fi tóg ke tĩ, kurã tá ke gé.

³⁸ Ēn fi vỹ hora ěn kã Topẽ jo ĩn krēm jẽ mũ, Simeão tỹ Jesus ven kỹ. Kỹ fi tóg Jesus vég mũ gé sir, Ana fi. Ti ve kỹ fi tóg Topẽ mỹ vỹ há han mũ. “Inh mỹ tóg há tĩ, sỹ ti ven kỹ,” he fi tóg mũ, Topẽ mỹ. Vẽnh kar mỹ fi tóg tó mũ, ùn krenkren sór mũ ag mỹ, Jerusalém tá.

Fag tỹ Nazaré ra vỹn ke

³⁹ Kỹ fag tóg sir Moisés tỹ vẽn kũnh to nén rán ja ěn han kãn mũ sir, Jesus mỹnh fi, Topẽ tỹ Judeu fag mỹ vẽn jykre nĩm ja ěn ti. Kar kỹ fag tóg sir cidade tỹ Nazaré ra vỹnvỹn ke mũ, ga tỹ Galiléia ra, fag jamã ra ke vỹ sir.

⁴⁰ Kỹ gĩr sĩ ěn tóg mog mũ sir, komër hã tóg tar jẽ sir. Kỹ tóg vẽn kanhrãn há han mũ, kỹ Topẽ vỹ ti ve há han mũ gé, hã kỹ tóg vẽn kanhrãn mág mũ sir, ùn sĩ ěn ti.

Jesus tỹ ã pir mỹ Topẽ jo ĩn tá nĩ

⁴¹ Jesus mỹnh fag tóg prỹg kar ki Jerusalém ra mũ tĩ, fag tỹ festa tỹ Páscoa venh mũ jé. Fag jykre hã vỹ.

⁴² Jesus tỹ 12 anos han kỹ tóg fag mré tĩ mũ gé, fag tỹ festa ěn venh mũn kỹ, Jerusalém ra.

⁴³ Festa tỹ tũ ken kỹ fag tóg vỹnvỹn ke mũ, hã ra Jesus tóg Jerusalém tá nĩ nĩ. Hã ra fag tóg ki kagtũg nỹtĩ, ti tỹ Jerusalém tá nĩ ěn ki.

⁴⁴ Kỹ fag tóg: “ti hỹn ù tỹ ěg mré kãmũ mũ fag mré vyr, ěg jo,” he mũ. Kỹ fag tóg kurã pir ki mũ mũ, fag jamã ra vỹnvỹn ke kỹ. Fag tỹ ãjag mré ke fag tá junjun kỹ fag tóg ti jãvãnh mũ, ãjag to há kar fag kãmĩ.

⁴⁵ Hã ra fag tóg tá Jesus vég tũ nĩ. Kỹ fag tóg Jerusalém ra vỹnvỹn ke mãn mũ gé, ti jãvãnh jé.

⁴⁶ Vãhã fag tóg ti vég mũ, kurã tãgtũ tũ kỹ. Topẽ jo ĩn krēm tóg nĩ nĩ, professor ag mré. Ag vỹ mẽg tóg nĩ nĩ, kỹ tóg ag ki jẽmẽg mũ gé, “ne nẽ?” hen kỹ.

⁴⁷ Û tỹ ti vỹ mẽg mũ ag mỹ tóg e tĩ. To jykren há han tóg, Jesus ti, kỹ tóg ag mỹ tó há han mũ. Ag tỹ ti vỹ mẽ kỹ tóg ag mỹ e tĩ, professor ag mỹ.

⁴⁸ Ti mỹnh fag tỹ ti ve kỹ tóg fag mỹ e tĩ gé sir. Kỹ ti mỹnh fi tóg ti mỹ: “inh kósin’,” he mũ. “Ā tỹ tag kã ne han nĩ nẽ’? Ā jóg mré sóg ã jãvãnh jagy han. Ā jãvãnh to ěg tóg kanẽ jur, ěg tỹ ã vég tũ nĩn kỹ,” he fi tóg ti mỹ.

⁴⁹ Hã ra tóg fi mỹ: “ã tỹ ne jé inh jãvãnh ja nẽ?” he mũ. “Hẽ ri ken kỹ hỹn’?” he tóg. “Inh panh pẽ ĩn krēm sóg nĩ nĩ mỹr, kỹn mỹ ãjag mỹ vẽn mỹ?” he tóg, ã mỹnh fag mỹ.

⁵⁰ Hã ra tóg fag tỹ to jykren tũ tĩ, fag kósin vỹ to.

⁵¹ Kỹ tóg fag mré tĩ mũ, cidade tỹ Nazaré ra. Tá tóg fag mré nĩ nĩ sir, ti tỹ fag vỹ jẽmẽn kỹ. Kỹ ti mỹnh fi pi(jé) vẽn vỹ kar tag kã jatun nĩ’.

⁵² Kỹ Jesus tóg mog mũ sir. Krĩ há tãvĩ tóg nĩ. Topẽ vỹ ti ve há han mũ gé. Kỹ tóg vẽn kar mỹ há tĩ sir, ag tỹ ti jykre ven kỹ.

3

João Batista ti

(Mt 3.1-12; Mc 1.1-8; Jo 1.19-28)

¹ Kejẽn tóg Tibério tỹ pã’i mág tỹ imperador nĩ kri 15 anos han mũ. Ti tỹ Roma tá tỹ pã’i mág nĩ ěn kã Põncio Pilatos vỹ tỹ ga tỹ Judéia kri pã’i tỹ governador nĩ, Tibério krēm. Ēn kã Herodes vỹ tỹ Galiléia kri pã’i tỹ governador nĩ gé, Tibério krēm. Herodes jãvy tỹ Filipe vỹ tỹ ga tỹ Ituréia tá pã’i tỹ governador nĩ gé, ga tỹ Traconites tá ke gé, Tibério krēm. Jãvo Lisãnias vỹ tỹ ga tỹ Abilene tá pã’i tỹ governador nĩ, Tibério krēm.

² Ēn kã Caifás vỹ tỹ Topẽ tũ ki rĩr tĩ ag pã’i mág nĩ, Anás mré hã. Kỹ vãhã Topẽ vỹ João mré vỹ mũ sir, Zacarias kósin ěn mré. Ēmã tũg ja mĩ tóg tĩ mũ, João ti. Kỹ Topẽ tóg ti mỹ: “ha Israel ag mỹ vẽn ven tũg,” he mũ.

³ Kỹ tóg sir tĩ mũ. Goj tỹ Jordão jagma tóg tĩ mũ. Tũg kỹ tóg vẽn kar jyvẽn mũ, kỹ tóg ag mỹ: “ã kype jé sóg ke mũ, ã tỹ ã jykre kórég tovãnh sór kỹ, Topẽ tỹ ã tỹ ti vỹ mranh tỹ ã mỹ vẽn pãte fón jé,” he tóg mũ sir, vẽn kar mỹ.

⁴ João tóg rán kỹ nĩ, vãsỹ. Topẽ vỹ tó tĩ tỹ Isaías vỹ João to tag rán ja nĩ, ha mẽ: “ẽmã

tũg ja tá tóg jēnh ke mũ, ga kórég tá,” he ja tóg nĩ, Isaías ti. “Tá tóg ag mĩ tónh ke mũ. “Ēg Senhor kătĩg ke jo vēnh jānhkrigkrig nĩ,” he jé tóg ke mũ. “Ēpry kurég ājag tóg tĩ, ěmĩn kurynh ājag tóg tĩ, ājag chefe jun ken kũ. Kĩ tag ri ke han nĩ, ājag jykre pāno togvānh kũ, ěg Senhor kătĩg ken jo.

⁵ Ti kāgnó tỹ ājag tóg kyjer' he tĩ, kar ājag tóg ěpry sór kar kũm ke tĩ gé, ěmĩn sór ti. Ti jonjor kugrynh kãn ājag tóg tĩ, ti sunsór vāvām kãn ājag tóg tĩ gé, ājag tỹ ěpry han kũ, ěmĩn han kũ. Kĩ tag ri ke han nĩ, ājag jykre kórég to.

⁶ Hã kũ ěprā ke kar vỹ venh ke mũ, Topē tỹ ěg krenkren han ke ti,” he jé tóg ke mũ, kũ vēnh kar vỹ ti vĩ mēnh mũ,” he ja tóg nĩ, Isaías ti, João to.

⁷ Hã kũ João tóg sir ag jyvēn mũ sir, ag tỹ ti venh kāmũn kũ, ti tỹ ag kygpe jé. E tãvĩ ag nỹtĩ, ũ tỹ ti venh kāmũ mũ ag. Ag jyvēn kũ tóg ag mĩ: “pỹn ri ke ājag tóg nỹtĩ, ājag jykre pāno tãvĩ nĩn kũ,” he mũ. “Ũ nỹ ājag mĩ: “Topē jũ venh ke tũ ājag nĩ,” he tĩ’?

⁸ Ājag jykre si togvānh ra, ājag tỹ ti jũ ve jāvānh tĩn kũ. Vēnh jykre há han ra, ěg tỹ ājag jykre tãg ve jé. Hã ra ājag tóg jagnē mỹ: “Abraão vỹ tỹ ěg jóg'jóg ve nĩ,” he mũ, “kũ Topē hỹn ěg to jũnh ke tũ nĩ, ěg tỹ tỹ Abraão krē'krē nỹtĩn tugrĩn,” he ājag tóg tĩ. Hã tũ vē hã ra. Ājag jykre kórég ěn to ājag tóg jagtar ke mũ, ha vemnĩ. Topē vỹ Abraão krē'krē hyn han ki kanhró nĩ, pó tag tỹ mỹr, ti tỹ Abraão krē'krē ve sór kũ, Topē ti.

⁹ Hã ra tóg ājag tỹ tũ' henh ke mũ, ājag tỹ ājag jykre kórég togvānh tũ nĩn kũ,” he tóg, João ti.

“Ēg tỹ ka gỹn ri ke tóg nĩ. Ti kanēn vānh nĩn kũ ěg tóg ti gỹn tĩ, tỹ pĩ han jé. Tag ri ke han jé tóg ke mũ, Topē ti, ājag mỹ, ājag tỹ vēnh jykre há han tũ nĩn kũ. Kĩ tóg pĩ ki ājag vām ke mũ, Topē ti,” he tóg ag mỹ, João ti.

¹⁰ Kũ ũn e ag tóg ti ki jēmēnh kāmũ mũ sir, João ki. Kũ ag tóg ti mỹ: “kũ ěg hỹn hē ri kenh mũ ha, Topē jykre han jé?” he mũ.

¹¹ Kũ tóg ag mỹ: “ã kur régre nĩn kũ ã kur pir nĩmnĩ, ũn kur tũ ěn mỹ,” he mũ. “Ā jēn tỹ ũn kókĩnkĩr ag mỹ vēnh kápópām nĩ gé,” he tóg.

¹² Kũ ũ tỹ governo mỹ imposto kaja mǎg tĩ ag vỹ João to kāmũ mũ gé, ti tỹ ag kygpe jé. Kũ ag tóg ti mỹ: “professor’,” he mũ. “Ēg hỹn hē ri kenh mũ?” he ag tóg mũ gé.

¹³ Kũ João tóg ag mỹ: “pã'i mǎg tỹ ājag mỹ nén tó mũ ěn hã ri ke mǎn nĩ, jānkamy ti,” he mũ. “Ker ti kǎfór mǎn sór hē’,” he tóg ag mỹ.

¹⁴ Kũ soldado ag vỹ tá junjun mũ gé. “Kũ ěg hỹn hē ri kenh mũ?” he ag tóg mũ gé sir, soldado ag. Kũ tóg ag mỹ: “ag tũ mǎn sór tũg nĩ,” he mũ. “Ag to vāsān ājag tóg tĩ, ũ to ón ājag tóg tĩ gé, ājag tỹ ag jānkamy ve jé. Ke tũg nĩ. Ājag rānhraj to ājag tóg jānkamy vég tĩ. Ti kǎfór mǎn sór tũg nĩ,” he tóg, João ti, soldado ag mỹ.

¹⁵ Kũ vēnh kar ag tóg ti to jykrén mũ, João to. “Ti mỹ tỹ Cristo tũ nĩ vỹ?” he ag tóg mũ sir ti to. João to ag tóg ke mũ, ag tỹ Cristo kătĩg jāvānh kũ.

¹⁶ Kũ João tóg ag mỹ: “inh pi(jé) tỹ Cristo nĩ,” he mũ. “Goj hã tỹ sóg ājag kygpég tĩ. Inh nón tóg kătĩg mũ, Cristo ti, ha mē. Inh kǎfór ti nĩ. Sỹ tỹ ti camarada nĩnh ke vē vē, sỹ ti pēn né kunũ jé, ti pēn to ró ti. Hã ra sóg tỹ ti krēm pē jē. ěn vỹ tóg Topē kuprĩg jēnēnh ke mũ, ti tỹ tỹ ājag jagrē nĩ jé, kũ tóg pĩ jēngrē ri ke nĩ. Ti tỹ ājag kygpenh ken hã vē,” he tóg, João ti. mũ, ti tỹ tỹ ājag jagrē nĩ jé, kũ tóg pĩ jēngrē ri ke nĩ. Ti tỹ ājag kygpenh ken hã vē,” he tóg, João ti.

¹⁷ “Ti kătĩg vỹ tỹ ěg tỹ rǎgró rēn ri ke nĩ. Ti rēn kar kũ ěg tóg ti fár vām tĩ, ěg tỹ pājó kuprǎg jé. Ti kanē há vin han ěg tóg tĩ. Ti fár pũn ěg tóg tĩ. Cristo kătĩg kũ tóg ri ke nỹ. ũ tỹ ã to há ag mỹ tóg: “ha kāmũ jēg,” henh ke mũ. ũ tỹ ã to kórég ag vām jé tóg ke mũ, pĩ ki, hã ra tóg nhyn kenh ke tũ pē nĩ,” he tóg, João ti.

¹⁸ Hã kũ tóg vēnh kar mỹ Topē vĩ sér tó mũ, ag jyvēn kũ, João ti.

¹⁹ Kũ tóg pã'i mǎg tỹ Herodes jyvēn mũ gé, ti prũ fi to, hã vỹ: Herodias fi, he mũ. Tỹ fi ti jāvỹ prũ ja nĩ, hã ra tóg fi péju kũ fi tỹ prũg mũ, Herodes ti. Nén ũ vēnhmỹ e han tóg tĩ, hã kũ João tóg ti jyvēn mũ.

²⁰ Kar tóg sir nén ũ vēnhmỹ ũ han mǎn mũ gé, Herodes ti. João ség tóg mũ, ti tỹ ti jyvēn to.

*João tỹ Jesus kype
(Mt 3.13-17; Mc 1.9-11)*

²¹ Hã ra tóg kãgmĩ kỹ jẽ tũ nĩ ver, João ti. Kỹ tóg ag kygpe kãn mũ. Kỹ tóg kejẽn Jesus kypég mũ gé. Kỹ Jesus tóg jẽ nĩ, ti tỹ Topẽ mré vĩn kỹ, João tỹ ti kype kar kỹ. Kỹ vãhã kanhkã tóg nor' he mũ.

²² Kỹ Topẽ kuprĩg vỹ kanhkã tá kãtére mũ, ti kri. Tỹ sórãg ve ti nĩ, Topẽ kuprĩg ti. Kỹ kanhkã tá vẽn vĩ tóg mẽ há tĩ, kỹ tóg: “tỹ ã inh kósin pir jẽ, tỹ ã tóg inh fe pẽ jẽgtĩ,” he mũ, vẽn vĩ ti, Topẽ ti.

*Jesus jóg'jóg ve ag
(Mt 1.1-17)*

²³ Jesus vỹ 30 anos han mũ, ti tỹ vẽn kar mỹ Topẽ kãmén ve ki. “José kósin vẽ,” he ag tóg tĩ ti to, hã ra tóg tỹ ti kósin tũ nĩgtĩ. Eli kósin vẽ, Jesus ti, kỹ Eli ẽn vỹ tỹ ti vovô nĩ.

²⁴ Eli vỹ tỹ Matate kósin nĩ. Matate vỹ tỹ Levi kósin nĩ. Levi vỹ tỹ Malqui kósin nĩ. Malqui vỹ tỹ Janai kósin nĩ. Janai vỹ tỹ José kósin nĩ.

²⁵ José vỹ tỹ Matatias kósin nĩ. Matatias vỹ tỹ Amós kósin nĩ. Amós vỹ tỹ Naum kósin nĩ. Naum vỹ tỹ Esli kósin nĩ. Esli vỹ tỹ Nagai kósin nĩ.

²⁶ Nagai vỹ tỹ Maate kósin nĩ. Maate vỹ tỹ Matatias kósin nĩ. Matatias vỹ tỹ Semei kósin nĩ. Semei vỹ tỹ José kósin nĩ. José vỹ tỹ Joda kósin nĩ.

²⁷ Joda vỹ tỹ Joanã kósin nĩ. Joanã vỹ tỹ Resa kósin nĩ. Resa vỹ tỹ Zorobabel kósin nĩ. Zorobabel vỹ tỹ Salatiel kósin nĩ. Salatiel vỹ tỹ Neri kósin nĩ.

²⁸ Neri vỹ tỹ Melqui kósin nĩ. Melqui vỹ tỹ Adi kósin nĩ. Adi vỹ tỹ Cosã kósin nĩ. Cosã vỹ tỹ Elmadão kósin nĩ. Elmadão vỹ tỹ Er kósin nĩ.

²⁹ Er vỹ tỹ Josué kósin nĩ. Josué vỹ tỹ Eliézer kósin nĩ. Eliézer vỹ tỹ Jorim kósin nĩ. Jorim vỹ tỹ Matate kósin nĩ. Matate vỹ tỹ Levi kósin nĩ.

³⁰ Levi vỹ tỹ Simeão kósin nĩ. Simeão vỹ tỹ Judá kósin nĩ. Judá vỹ tỹ José kósin nĩ. José vỹ tỹ Jonã kósin nĩ. Jonã vỹ tỹ Eliaquim kósin nĩ.

³¹ Eliaquim vỹ tỹ Meleá kósin nĩ. Meleá vỹ tỹ Mena kósin nĩ. Mena vỹ tỹ Matata kósin nĩ. Matata vỹ tỹ Natã kósin nĩ. Natã vỹ tỹ Davi kósin nĩ.

³² Davi vỹ tỹ Jessé kósin nĩ. Jessé vỹ tỹ Obede kósin nĩ. Obede vỹ tỹ Boaz kósin nĩ. Boaz vỹ tỹ Sala kósin nĩ. Sala vỹ tỹ Nassom kósin nĩ.

³³ Nassom vỹ tỹ Aminadabe kósin nĩ. Aminadabe vỹ tỹ Admim kósin nĩ. Admim vỹ tỹ Arni kósin nĩ. Arni vỹ tỹ Esrom kósin nĩ. Esrom vỹ tỹ Peres kósin nĩ. Peres vỹ tỹ Judá kósin nĩ.

³⁴ Judá vỹ tỹ Jacó kósin nĩ. Jacó vỹ tỹ Isaque kósin nĩ. Isaque vỹ tỹ Abraão kósin nĩ. Abraão vỹ tỹ Tera kósin nĩ. Tera vỹ tỹ Nacor kósin nĩ.

³⁵ Nacor vỹ tỹ Seruque kósin nĩ. Seruque vỹ tỹ Ragaú kósin nĩ. Ragaú vỹ tỹ Faleque kósin nĩ. Faleque vỹ tỹ Éber kósin nĩ. Éber vỹ tỹ Sala kósin nĩ.

³⁶ Sala vỹ tỹ Cainã kósin nĩ. Cainã vỹ tỹ Arfaxade kósin nĩ. Arfaxade vỹ tỹ Sem kósin nĩ. Sem vỹ tỹ Noé kósin nĩ. Noé vỹ tỹ Lameque kósin nĩ.

³⁷ Lameque vỹ tỹ Metusalém kósin nĩ. Metusalém vỹ tỹ Enoque kósin nĩ. Enoque vỹ tỹ Jarete kósin nĩ. Jarete vỹ tỹ Maleleel kósin nĩ. Maleleel vỹ tỹ Cainã kósin nĩ.

³⁸ Cainã vỹ tỹ Enos kósin nĩ. Enos vỹ tỹ Sete kósin nĩ. Sete vỹ tỹ Adão kósin nĩ. Adão vỹ tỹ Topẽ tỹ há nĩ. Jesus jóg'jóg ve ag hã vẽ.

4

*Jesus tỹ Topẽ vĩ mranh tũ
(Mt 4.1-11; Mc 1.12-13)*

¹ Kỹ Topẽ kuprĩg vỹ tỹ Jesus jagrẽ nĩ. Kỹ Jesus vỹ goj tỹ Jordão tá vỹn ke mũ, ã kype kỹ jẽn kỹ. Ti tĩg kỹ Topẽ kuprĩg vỹ ti krĩn mũ.

² Kỹ tóg ti tỹ ti krĩn kỹ ẽmã tũg ja ra tĩ mũ sir, ga kórég ra. Tá tóg kurã tỹ 40 (ke) han mũ, ẽmã tũg ja ki. Kỹ Japo vỹ ti tỹ ã jóg vĩ mranh han sór mũ, tá, hã ra Jesus tóg ke tũ nĩ. Ẽmã tũg ja tá nĩn kỹ tóg jẽg tũ nĩ, kurã tỹ 40 ẽn ki. Kar kỹ tóg sir kókĩr mũ.

³ Ti kókĩr nĩn kỹ Japo vỹ ti mỹ vĩ mũ. “Tỹ ã Topẽ kósin nĩ mỹr,” he tóg. “Ẽ tỹ tỹ Topẽ kósin nĩn kỹ pó tag tỹ ẽmĩ han nĩ, ã tỹ kon jé,” he tóg ti mỹ, Nén-Kórég ẽn ti, Jesus mỹ.

⁴ Kỹ Jesus tóg ti mỹ: “hã ra tag tóg rán kỹ nĩ, ha mẽ,” he mũ. “Ẽmĩ tãvĩ jamẽn kỹ ẽg rĩnrĩr tũ nỹtĩ, Topẽ vĩ jamẽn kỹ ẽg rĩnrĩr nỹtĩ.

Hã kÿ tóg sÿ ti vĩ mranh jãvãnh tĩ, ẽmĩ to,” he tóg, Jesus ti, Nén-Kórég ẽn mÿ.

⁵ Kÿ Japo vĩ ti mré tãpÿr mũ. Kÿ tóg ti mÿ mundo ven kãn mũ, ù tÿ kri ke kar ag ke gé. Ven pir ki tóg ti mÿ ven kãn mũ.

⁶ Kÿ tóg ti mÿ: “isũ vễ mÿr,” he mũ, Japo ti. “Ã mÿ sóg tovãnh kãn sór mũ, ã tÿ tÿ vễnh kar tag ag pã'i jẽ jé. Kÿ ti sĩnvĩ tag kar vĩ tÿ ã tũ nĩnh mũ. Isũ vễ mÿr, ù tÿn han ja ẽn tÿ inh mÿ: “té,” hen kÿ. Kÿ sóg sÿ ùn kuprẽg mũ ẽn mÿ vin tĩ sir.

⁷ Ã hã mÿ sóg tovãnh sór mũ ha, ã tÿ inh krẽm grĩnh ken kÿ, ã tÿ iso: “Topẽ vĩ tÿ ã nĩ,” hen kÿ,” he tóg, Nén-Kórég ti, Jesus mÿ.

⁸ Kÿ Jesus tóg ti mÿ: “tag vĩ rán kÿ nĩ, ha mẽ,” he mũ. “Èg pã'i tÿ Topẽ hã krẽm ẽg tóg ẽg jakrĩ tÿ krÿ' he tĩ, ti hã to ẽg tóg: Topẽ vễ, he tĩ,” he tóg, Topẽ vĩ tÿ rán kÿ nĩn ki. Hã kÿ sóg mranh jãvãnh nĩ,” he tóg, Jesus ti, Nén-Kórég mÿ.

⁹ Kÿ Japo tóg ti mré tĩg mãn mũ, cidade tÿ Jerusalém ra. Tá tóg ti mÿ: “Topẽ jo ãn kri jẽmnĩ, ti krĩ kri,” he mũ. Kÿ tóg ke mũ. Hã ra kãgnó tóg tá nĩ, Topẽ jo ãn jo. Japo tóg Jesus mÿ: “Topẽ kósin vĩ tÿ ã nĩ,” he mũ. “Kÿ hũm hemnĩ.

¹⁰ Tag vĩ rán kÿ nĩ, ha mẽ: “ã tÿ jẽnẽ jafã ag mÿ tóg tónh mũ, Topẽ ti, kÿ ag tóg ã ki rĩr ke mũ.

¹¹ Ajag nĩgẽ tÿ ag tóg ã vyn ke mũ, kÿ ã tóg rÿj ke tũ nĩ. ã pẽn vĩ rÿj ke tũ nĩ gé, hã jé ag tóg ã ki rĩr ke mũ,” he tóg, Topẽ vĩ tÿ rán kÿ nĩ ẽn ki. Kÿ jatun mÿ hũm nĩ,” he tóg, Nén-Kórég ti, Jesus mÿ.

¹² Kÿ Jesus vĩ ti mÿ ke mũ gé. “Kÿ tag vĩ rán kÿ nĩ gé, ha mẽ,” he tóg. “Topẽ mÿ: ã mÿ ã tÿ nén tó ja ẽn han mũ vĩ? he tũg nĩ,” he tóg mũ gé, Topẽ vĩ tÿ rán kÿ nĩ ẽn ki. Hã kÿ sóg Topẽ hã tÿ inh mÿ nén tó mũ ẽn han ke mũ, kÿ sóg hũm ke tũ nĩ, ti tÿ inh mÿ tó tũ nĩn kÿ,” he tóg, Jesus ti, Nén-Kórég mÿ.

¹³ Kÿ Japo vĩ ã tÿ nén tónh ke ẽn tó kãn ja nĩ, hã kÿ tóg Jesus tovãnh mũ ver, ti tÿ kurã ù kã ti mré vĩ mãn jé, kejẽn, ti tÿ ti mÿ há tĩ ve nĩn kÿ, Japo mÿ.

Jesus tÿ Galiléia tá ag kanhrãn

(Mt 4.12-17; Mc 1.14-15)

¹⁴ Kÿ Jesus tóg tĩ mũ sir, Topẽ kuprẽg tÿ ti krĩn kÿ. Ga tÿ Galiléia ra tóg tĩ mũ. Kÿ vễnh

kar ti kãme mẽ kãn mũ sir, ga ẽn tá ke kar ag.

¹⁵ Kÿ tóg ag kanhrãn mũ sir, Jesus ti, ag vễnh kanhrãn jafã krẽm. Krẽm ag tóg Topẽ vĩ tó tĩ, Judeu ag. Jesus tÿ ag kanhrãn kÿ tóg ag mÿ e tĩ, ti vĩ ti. Hã kÿ ag tóg ti to vĩ há han mũ sir.

Jesus tÿ Nazaré ra vĩn ke

(Mt 13.53-58; Mc 6.1-6)

¹⁶ Kÿ Jesus tóg Nazaré tá jun mũ gé, ã jamã tá. Tá tóg mog ja nĩ, cidade tÿ Nazaré tá. Kÿ tóg ã tÿ nén han tĩ ẽn han mũ. Ag vễnh kanhrãn jafã ra tóg tĩ mũ, vễnh kãn ke kurã ki. Tá tóg sir jẽgnẽ mũ, culto ki, ag vễnh mãn kÿ nÿtĩ ẽn ki. Tĩ tÿ Topẽ vĩ to ke sór vễ, hã kÿ tóg jẽgnẽ mũ, Jesus ti.

¹⁷ Tĩ jẽ kÿ ag tóg ti mÿ livro nĩm mũ, Isaías tÿ rán ja ẽn ti, vãsÿ Topẽ vĩ tó tĩ tÿ rán ja ẽn ti. Kÿ tóg livro tÿ vym ke mũ. Kÿ tóg ã tÿ to ke sór mũ ẽn vэг mũ, Isaías tÿ tó ja ti, ha mẽ.

¹⁸ “Topẽ kuprẽg vĩ inh krĩn mũ,” he tóg. “Inh jagrẽ vễ mÿr, hã kÿ tóg inh krĩn mũ. “Ùn jagãgtar ag mÿ inh vĩ tómnĩ,” he tóg inh mÿ. Inh jẽnẽg tóg mũ, isÿ ùn sigse kÿ nÿtĩ ag kygvãn jé, isÿ ùn kyvó ag tÿ ẽvãnh (há) han jé, isÿ ag tÿ ùn vóg kónãn mũ ag ki rĩr há han jé, ag jatu nÿtĩ jé,

¹⁹ isÿ vễnh kar mÿ: “ùri ẽg jóg mág vĩ ẽg kren han sór mũ,” he jé,” he tóg, Isaías ti, vễnh rá ki. Hã to ke tóg mũ, Jesus ti.

²⁰ Tag to ke kar kÿ tóg livro ẽn kri tÿ tam ke mãn mũ. Livro ki rĩr tĩ ẽn mÿ tóg jun mũ, livro ti. Kÿ tóg nĩ mũ sir.

Hã ra vễnh kar ag tóg ti ki ẽvãnh mũ.

²¹ Kÿ tóg ag mÿ kãmén mũ, kÿ tóg: “vãsÿ rán kÿ nĩ ja tag mẽ ajag tóg,” he mũ. “Ùri ke vễ, ùri ajag tóg vэг mũ, vãsÿ rán kÿ nĩ ja ẽn ti,” he tóg. “Inh hã to tóg tag tó ja nĩ, Isaías ti,” he tóg, Jesus ti.

²² Ag tÿ ti vĩ mẽ kÿ tóg ag mÿ e tĩ sir. “Kĩ hã tóg tó mũ, hã kÿ tóg ẽg mÿ e tĩ,” he ag tóg mũ. Kÿ ag tóg ti to vĩ mũ gé. “José kósin vễ mÿr, ẽg mré ke ẽn, hã ra tóg ẽg vĩ kãfór han sór mũ,” he ag tóg mũ ti to.

²³ Kÿ Jesus tóg ag mÿ: “ajag hÿn iso jykrén sór mũ,” he mũ. “Médico mÿ ẽg tóg: “kur vễsÿ há' hé, ã tÿ tÿ médico nĩ sór nĩn kÿ,” he tĩ. Ajag hÿn tag tó sór mũ inh mÿ. Ajag hÿn inh mÿ: “cidade tÿ Cafarnaum tá ã tóg ag tÿ há' hé, ùn kagyga ag tÿ, kÿ kur tag ki ẽg tÿ

há' hemní gé, ã jamã tag ki, ã tỹ vënh kar tỹ há' he sór nĩn kỹ," he sór ãjag hỹn mũ inh mũ," he tóg, Jesus ti.

²⁴ Kỹ tóg ag mũ: "ti jamã tá ke ag ne tóg Topẽ vĩ tó tĩ ên to é he tĩ'," he mũ. "Ti tỹ ke há vë. Hã kỹ ãjag tóg iso é he tĩ," he tóg ag mũ, Jesus ti.

²⁵⁻²⁶ "Ha mẽ, sỹ nén tó mũ ti. Elias to jykrén nĩ. Ti tỹ ga kri tĩ mũ kỹ tóg ta kutẽ vãnh han ja nĩgtĩ, prỹg tãgtũ kri kysã tỹ 6 (ke) ki. Kỹ tóg prỹg tĩ sir, ga ên mũ, vëjën tóg tũ' he mũ sir. Kỹ Topẽ tóg Elias mũ tó, ti tỹ cidade tỹ Sarepta ra tĩg jé, cidade tỹ Sidom kakó ra. Tá fóg fi tóg nĩ nĩ, ùn mén ter ja fi. Fi mré tóg jëg tĩ sir, Elias ti, fi tỹ ti mũ vëjën tỹ vënh kãpãm kỹ, prỹg ra. Topẽ pi(jé) Israel fi to ti jënẽ ja nĩgtĩ'. Ti pi(jé) ti jamã ra ti jënẽ ja nĩgtĩ'. Tá fag tóg e nỹtĩ ja nĩgtĩ gé, ùn mén ter ja fag. Hã ra Topẽ tóg fóg ên fi to ti jënẽ ja nĩgtĩ, fi tỹ ti ki rĩr jé," he tóg, Jesus ti.

²⁷ "Kỹ Eliseu to jykrén nĩ gé, vãsỹ Topẽ vĩ tó tĩ ên to. Ti tỹ ga kri tĩ nĩn kỹ ùn kagyga ag tóg e ja nỹtĩgtĩ gé, êg povo tỹ Israel kãmĩ, vënh kaga kren vãnh han mũ ag, vënh kaga tỹ lepra han mũ ag. Hã ra ag tóg ti mũ to vĩ ja tũ nĩgtĩ, ti tỹ ag tỹ há' hen jé. Kuvar há tá tóg kãtĩg ja nĩgtĩ, fóg ti, Naamã ti, ga tỹ Síria tá ke ên ti. Kỹ ti hã ne tóg Eliseu mũ to vĩn kỹ há' he mũ sir inhhã. Ti kaga kren vãnh ên tóg tũ' he mũ sir. Ge ãjag tóg nĩgtĩ iso. Kuvar há tá ke fag vĩ inh ki ge tĩ, jãvo ãjag tóg inh ki ge jãvãnh nỹtĩ, ãjag tỹ tỹ inh jamã tá ke nỹtĩ ra," he tóg ag mũ, Jesus ti.

²⁸ Kỹ ù tỹ ti vĩ mẽg mũ ag fe tóg gỹm ke mũ sir, Jesus to, ù tỹ vënh kanhrãn jafã ên krëm nỹtĩ ag.

²⁹ Jëgjëg nëgnë ag tóg mũ sir. Kãpa ag tóg mũ sir. Ti vóg ag tóg mũ sir, pãnónh ra. Nazaré vĩ pãnónh tá nĩ, ag jamã ti. Pãnónh ên to jãpry kỹ ag tóg tá ti kutẽm sór mũ, kãgnó ki ti ter jé.

³⁰ Hã ra Jesus tóg ag ré kỹ tĩ mũ, ag jãmĩ. Ti tỹ hë ri ke tũ ag tóg nĩ sir, kỹ tóg ag fĩn rãm kỹ ag ré kỹ tĩ mũ.

Hã ra ag tóg ti vĩ kri fi jãvãnh nỹtĩ, ti jamã tá ke ag.

*Jesus tỹ vënh jagrẽ kórég kutẽm
(Mc 1.21-28)*

³¹ Kỹ Jesus tóg cidade tỹ Cafarnaum ra tĩ mũ. Ga tỹ Galiléia tá ti nĩ, Cafarnaum ti. Tá

jun kỹ tóg ag kanhrãn mũ, vënh kán ke kurã ki.

³² Kỹ tóg ag mũ e tĩ, ag tỹ ti vĩ mẽn kỹ. Ti vĩ vĩ vënh kar vĩ kãfór nĩ, hã kỹ tóg ag mũ e tĩ.

³³ Kỹ vënh kanhrãn jafã ên krëm ù tóg nĩ nĩ. Jagrẽ kórég ti nĩ. Kỹ tóg prër mũ, kỹ tóg:

³⁴ "ha mẽ, ã tỹ êg tỹ hë ri kenh ke nẽ, Nazaré tá Jesus?" he mũ. "Ã mũ êg tũg sór mũ?" he tóg. "Ã ki kanhró sóg nĩ. Tỹ ã tóg ã pir mũ Topẽ mré ke nĩ, ti tũ pë vĩ tỹ ã nĩ," he tóg, ùn jagrẽ kórég ti.

³⁵ Hã ra Jesus tóg ti mũ vĩ tar han mũ, kỹ tóg: "vĩ tũg ra," he mũ. "Ti tovãnh ra," he tóg. Kỹ ti jagrẽ kórég ên tóg ti ter tĩ han mũ, vënh kar rĩnve, kỹ tóg ti ki kutẽ mũ sir. Ti kókég tũ tóg nĩ, ti jagrẽ kórég ti.

³⁶ Kỹ tóg vënh kar mũ e pë tãvĩ tĩ sir. Jagnë mũ ag tóg: "ne nẽ hỹn vé?" he mũ. "Vënh jagrẽ kórég ag mũ tóg vĩ tĩ, Jesus ti, kỹ ag tóg sir ki króm tĩ, ti vĩ ki, ti kamëg kỹ, ti tỹ ag pan kỹ. Ti hỹn tỹ ag kri ke nĩ," he ag tóg mũ sir, Jesus to.

³⁷ Kỹ ti kãme tóg vënh kar kri rũm ke kãn mũ sir, ga ên tá.

*Jesus tỹ ùn kagyga e ag tỹ há' he
(Mt 8.14-17; Mc 1.29-34)*

³⁸ Kỹ Jesus tóg vënh kanhrãn jafã ên ki kutẽ kỹ Simão ãn ra tĩ mũ. Hã ra Simão prũ fi mỹnh fi tóg kaga nỹ nĩ. Rỹ jagy fi nỹ nĩ. Kỹ ag tóg Jesus mũ fi tó mũ.

³⁹ Kỹ tóg fi vënh tĩ mũ. Fi krĩ tá jë kỹ tóg fi mũ: "rỹg mãn tũg nĩ," he mũ. Kỹ fi rỹ ên tóg tũ' he mũ sir. Kỹ fi tóg vësỹmër nĩ nĩ. Ag ki rĩr fi tóg mũ sir, Simão má fi.

⁴⁰ Kỹ tóg sir kutyg mũ, rã tỹ pun ke kỹ. Kỹ ag tóg ùn kagyga ag tatĩn kãmũ kãn mũ. Kỹ tóg ã nĩgé tỹ ag mẽ kãn mũ, Jesus ti, kỹ ag tóg hághá' he kãn mũ.

⁴¹ Vënh jagrẽ kórég pan kãn tóg mũ gé, ag to jũ kỹ. Ag panh ke to hã ag tóg prër mũ, kỹ ag tóg: "Topẽ kósin vĩ tỹ ã nĩ," he tĩ. Hã ra tóg ag mũ: "vĩ tũg ra," he mũ. Ti ki kanhró ag tóg nỹtĩ, ti tỹ tỹ Cristo nĩ ti. Hã kỹ tóg ag mũ: "vĩ tũg ra," he mũ, Jesus ti.

*Jesus tỹ Topẽ vĩ tó
(Mc 1.35-39)*

⁴² Tỹ vaj kỹ Jesus tóg tá kutẽ kỹ êmã tũg ja ra tĩ mũ. Kỹ vënh kar ag tóg ti jãvãnh kãn

mũ. Hã ra ag tóg ti vég mũ. Ti ve kÿ ag tóg ti mÿ: “êg ré kÿ tĩ tũg nĩ,” he mũ.

⁴³ Hã ra tóg ag mÿ: “vó,” he mũ. “Cidade ù ra sóg tũg mũ, sÿ ag mÿ Topê vĩ tó jé gé, Topê tÿ tÿ êg pã'i nĩnh ke ti. Hã jé Topê tóg inh mÿ: “ha ag mÿ vãnh ven,” he ja nĩ,” he tóg ag mÿ, Jesus ti.

⁴⁴ Kÿ tóg tĩ mũ sir. Ga tÿ Judéia mĩ tóg tĩ mũ. Vãnh kanhrãn jafã krêm tóg ag mÿ Topê vĩ tó tĩ mũ sir, Jesus ti.

5

Jesus tÿ Pedro kanhrãn (Mt 4.18-22; Mc 1.16-20)

¹ Kejẽn Jesus tóg goj nig tÿ Genesaré fyr tá jẽ nĩ, Topê vĩ kãmén kÿ. Kÿ vãnh kar vÿ ti pênĩn nÿtĩ nĩ, kÿ ag tóg ti kutãn mũ sir, ag e tãvĩ nÿtĩn kÿ, ag tÿ Topê vĩ mẽ sór kÿ.

² Ag tÿ ti kutãn kÿ tóg canoa régre vigvég mũ, nig fyr tá. Pirã kugmĩg tĩ ag vÿ tá kãpa kÿ nÿtĩ nĩ. Goj kãki jêgĩg kÿ ag tóg pirã kugmĩ jafã kunũnh kÿ kupég nÿtĩ nĩ.

³ Kÿ Jesus tóg canoa kãra rã mũ. Simão tũ vễ, canoa ên ti. Kÿ tóg Simão mÿ: “tũg sĩ han ra, canoa kãmĩ, goj kuju ra,” he mũ. Kÿ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kÿ tóg ag kanhrãn mũ sir, vãnh kar ên ag, ù tÿ ti kutãn ja ên ag. Goj fyr tá ag tóg nÿtĩ.

⁴ Ti tÿ ag kanhrãn kãn kÿ tóg Simão mÿ: “goj kuju ra tũg, ti nig ja ra,” he mũ. “Tá ã rede tÿ goj kãki fón, ã tÿ pirã kugmĩ jé,” he tóg.

⁵ Kÿ Simão tóg êg Senhor mÿ: “hã ra êg tóg kuty tag kã goj ki ti fón', fón' he ja nĩgĩ, fagrĩnh mÿ,” he mũ. “Nén ù kãgmĩg tũ êg tóg nĩ mÿr,” he tóg. “Hã ra sóg ã vĩ tigrĩn ki fón sór mũ ha,” he tóg, Simão ti.

⁶ Kÿ tóg ke mũ sir. Kÿ tóg kugmĩ mág mũ. Fór tóg nĩ, rede ti, kÿ tóg jaran ke mũ, ti kufy jagy tãvĩ nĩn kÿ, pirã e tugnĩn.

⁷ Kÿ ag tóg ãjag régre ag mÿ ven mũ, ag tÿ canoa ù kãki kãmũ jé. Ag tÿ tá junjun kÿ ag tóg canoa régre ên fãn mũ, pirã tÿ. Funfór ti nÿtĩ, hã kÿ tóg ki punpun ke kren mũ sir, canoa régre ên ti.

⁸ Kÿ Simão tóg Jesus krêm grĩnh ke mũ. Ti mÿ tóg e tĩ, pirã e ên to, kÿ tóg Jesus krêm grĩnh ke mũ. Kÿ tóg ti mÿ: “Senhor',” he mũ. “Ã hÿn inh ré kÿ tũg mũ ha. Topê vĩ mranh

ja inh nĩgĩ, kÿ inh hÿn ã mÿ kórég nĩ ha,” he tóg, Simão ti, Jesus mÿ.

⁹ Ti mÿ tóg e pẽ tãvĩ tĩ, ti tÿ pirã e ên ven kÿ, ti tÿ Jesus jÿkre ven kÿ. Ti mré ke ag mÿ tóg e tĩ gé,

¹⁰ Tiago mÿ ke gé, João mÿ ke gé, Zebedeu krẽ tag ag mÿ. Simão régre ag vễ, Zebedeu krẽ tag ag, ti companheiro ag vễ.

Kÿ Simão tóg Jesus mÿ: “ã hÿn inh ré kÿ tũg mũ ha,” he mũ. Hã ra Jesus tóg ti mÿ: “kamêg tũg nĩ,” he mũ. “Pirã kugmĩ há ã tóg jẽ. ã kanhrãn jé sóg ke mũ, ã tÿ êprã ke ag tÿ inh ki ge han jé,” he tóg, Simão mÿ, Jesus ti.

¹¹ Kÿ ag tóg ãjag canoa vóg mũ, goj fyr ra. Tá junjun kÿ ag tóg ãjag tũ kar ré kÿ mũ mũ sir, Jesus mré.

Jesus tÿ ùn kaga kren vãnh tÿ há' he (Mt 8.1-4; Mc 1.40-45)

¹² Kÿ tóg kejẽn cidade ù tá nĩ nĩ. Kÿ ù tóg ti tá jun mũ, ù tÿ vãnh kaga kren vãnh han kÿ nĩ ti, vãnh kaga tÿ lepra he mũ ên. Ti kri tóg rũm ke kãn ja nĩ, vãnh kaga ti. Ên tóg Jesus tá jun kÿ ti krêm mũg ke mũ, kÿ tóg ti mÿ: “Senhor',” he mũ. “Ã mÿ isÿ há' he sór tũ nĩ'?” he tóg. “Ã hã tóg isÿ há' henh mũ, ã tÿ isÿ há' he sór kÿ,” he tóg ti mÿ.

¹³ Kÿ Jesus tóg ã nĩgê tÿ ti mẽg mũ, kÿ tóg ti mÿ: “hej,” he mũ. “To sóg há nĩ, há' he ja há ã tóg nĩ,” he tóg ti mÿ. Kÿ tóg ti kaga kren vãnh tÿ há' he mũ sir vễsÿmêr. Jãnhkri' he tóg mũ, ti fár ti.

¹⁴ Kÿ Jesus tóg ti mÿ ke mũ, ti tÿ ù mÿ tó tũg jé, ti tÿ há' he tag ti. “Ha tũg,” he tóg. “Topê tũ ki rĩr tĩ to tũg. Ti hã mÿ tómnĩ, kÿ ti mÿ nén ù nĩm nĩ, ti tÿ Topê mÿ pũn jé, Moisés tÿ vãsÿ êg mÿ nén tó ja ên ti, ã jãnhkri to. Hã tigrĩn vãnh kar vÿ ã tÿ há' he mũ tag ki kanhrãn mũ,” he tóg ti mÿ, Jesus ti.

¹⁵ Ge ra ti kãme tóg vãnh kar kri rũm ke mũ, kÿ ù tÿ hẽn ri ke ag tóg vãnh mãn mũ sir. Ag tÿ ti vĩ mẽ sór vễ, ag tÿ ãjag tÿ há' he ên ve sór vễ gé. Hã jé ag tóg sir vãnh mãn mũ.

¹⁶ Hã ra Jesus tóg êmã tũg ja ra tĩ mũ, Topê mré vễmên jé.

Jesus tÿ ùn tũg vãnh tÿ há' he (Mt 9.1-8; Mc 2.1-12)

17 Kejĕn tóg ag kanhrãnrãn mãn mũ. Kÿ Fariseu ù ag tóg ti vĩ mẽgmẽg mũ gé sir, Topẽ vĩ to professor ag mré hã. Kór há tá ag tóg kãmũ ja nĩ, ga tÿ Galiléia tá, ga tÿ Judéia tá ke gé, cidade tÿ Jerusalém tá ke gé. Jesus pẽnĩn ag tóg nĩgnĩ kÿ nÿtĩ nĩ. Hã ra Topẽ tóg ti tar han ja nĩ, hã kÿ tóg ù tÿ hẽn ri ke ag tÿ há' he mũ, ùn kagyga ag tÿ, Jesus ti.

18 Kÿ vãhã ù ag tóg tá junjun mũ gé. Û va ag tóg kãmũ jẽg, kur kã, ùn kãnhgrĩ, ùn kónhgrĩ. Ag tÿ Jesus mÿ ti ven sór vẽ, ag tÿ ti krẽm ti fi sór vẽ.

19 Hã ra tóg fór tãvĩ nĩ, tá, kÿ ag tóg ti tá junjun tũ nĩ sir, Jesus tá. Kÿ ag tóg ãn to jãpry kÿ ti kri ãn kunũg mũ. Ti nor ěn ki ag tóg ti tẽrem mũ, Jesus jẽ ěn kukãm.

20 Kÿ Jesus tóg ag tÿ ti ki ge kÿ nÿtĩ tag vég mũ. Hã kÿ tóg ùn kãnhgrĩ mÿ: “ã tÿ Topẽ vĩ mranh ja ěn tÿ tũ' he vẽ ha, vÿ,” he mũ.

21 Hã ra ti vĩ tag tóg Topẽ vĩ to professor ag mÿ e tĩ, Fariseu ag mÿ ke gé. Kÿ ag tóg ti vĩ tag to jykrén kónãn mũ. “Ti tÿ ne tó nẽ hÿn?” he ag tóg mũ. “Topẽ to vĩ kónãn vẽ mÿr, ti vĩ tag to,” he ag tóg. “Topẽ hã ne ã pin kÿ Topẽ vĩ mranh ěn tÿ tũg' he há nĩnh mũ', kÿ ti tÿ vẽsÿ tÿ Topẽ han vẽ sir, ti mÿ vẽn pãte fón sór kÿ,” he ag tóg mũ, to jykrén kónãn kÿ.

22 Hã ra Jesus tóg ag tÿ nén to jykrén mũ vég mũ. Kÿ tóg ag mÿ: “ãjag tÿ ne jé to jykrén kónãn nẽ?” he mũ.

23 “Ne nÿ ãjag mÿ vẽnhmÿ nÿ?” he tóg. “Ûn tÿg vãn mÿ sóg: “ã tÿ Topẽ vĩ mranh ja ěn tÿ tũ' he vẽ ha,” hé. Kÿn mÿ ãjag mÿ vẽnhmÿ?” he tóg. “Sÿ ti mÿ: “nĩ ra, tÿg ra,” henh ke vẽ gé. Kÿn mÿ ãjag mÿ vẽnhmÿ ke gé?” he tóg, tag to.

24 “Hã ra sÿ ãjag mÿ ãnh jykre ven sór vẽ ha. Tÿ sóg ěprã ke fi kósĩn nĩ. Tá sóg krÿg ke mũ, Topẽ vĩ mranh tÿ vẽn pãte fón ke tá. Sÿ tá krÿg mũ ven jé sóg ke mũ ãjag mÿ,” he tóg. Hã kÿ tóg ùn kónhgrĩ mÿ: “nĩ ra, ã kur gég tÿg, ã ãn ra,” he mũ, Jesus ti.

25 Kÿ tóg vẽnÿmér jẽgnẽ mũ sir. ã kur gég tóg mũ vãhã, ag rĩnve. ã ãn ra tóg tĩ mũ, Topẽ mÿ vĩ há han kÿ, ùn kãnhgrĩ ja ěn ti.

26 Kÿ tóg vẽn kar mÿ e tãvĩ tĩ. Topẽ mÿ ag tóg vĩ há han mũ gé, ti to: “ẽg kãfór ti nĩ,” hen kÿ. “Ge ve ja tũ ěg nÿtĩ, kÿ ěg tÿ ne to

jykrén ke tóg tũ tĩ,” he ag tóg mũ sir, Jesus tÿ ùn kãnhgrĩ ja ěn tÿ há' hen kÿ.

Jesus tÿ Levi jé prẽr
(Mt 9.9-13; Mc 2.13-17)

27 Kar kÿ Jesus tóg tÿg mãn mũ. Kÿ tóg ù tÿ governo mÿ jãnkamy mãg tĩ ù vég mũ, imposto mãg tĩ ěn ti. Ti jijin hã vÿ: Levi, he mũ. ã rãnhraj han kÿ tóg nĩ nĩ, ti rãnhraj jafã krẽm, Jesus tÿ ti ve kÿ. Kÿ tóg ti mÿ: “inh mré kãtÿg,” he mũ.

28 Kÿ tóg jẽgnẽ mũ sir. Ti mré tóg tĩ mũ sir, ã tũ kar ré kÿ.

29 Kÿ Levi tóg ti mÿ festa mãg han mũ, ti ãn tá. Kÿ ti tÿ festa to ùn jé prẽr mũ ag vÿ tÿ ù tÿ hẽn ri ke nÿtĩ, festa venh kãmũ mũ ěn ag. Governo mÿ jãnkamy mãg tĩ ù ag vẽ, ag mré ke ù ag mré hã. Jesus mré ag tóg jẽg mũ.

30 Kÿ Fariseu ag tóg vég mũ, Topẽ vĩ to professor ag ke gé, kÿ tóg ag mÿ kórég tĩ. Kÿ ag tóg ù tÿ Jesus mré mũ tĩ ag to vĩ mũ gé. Ag mÿ ag tóg: “ãjag hã ne tóg governo mÿ jãnkamy mãg tĩ ag mré jẽg mũ',” he mũ. “Topẽ vĩ mranh tĩ ag mré ãjag tóg jẽg mũ',” he ag tóg, ù tÿ Jesus mré mũ tĩ ag mÿ.

31 Hã ra Jesus tóg ag mÿ kãmén mũ. “Hÿ, ag mré sóg jẽg mũ,” he tóg. “Hã ra ùn kagyga tũ ag vÿ médico venh mũ tũ nĩgtĩ,” he tóg mũ. “Ûn kagyga ag hã vÿ ti venh mũ tĩ,” he tóg.

32 “Inh pi(jé) ù tÿ vẽn jykre kuryj han mũ ag mÿ: “ãjag jykre tovãn ra,” he sór tĩ'. Û tÿ Topẽ vĩ mranh ja ěn ag hã mÿ sóg: “ãjag jykre kórég tovãn ra,” he sór tĩ. Hã jé sóg ãjag mÿ vẽn ven,” he tóg, Jesus ti.

Vãkre
(Mt 9.14-17; Mc 2.18-22)

33 Kÿ Fariseu ag tóg ti mÿ ke mãn mũ. “João mré mũ tĩ ag vÿ vãkre (ka)mẽ nÿtĩgtĩ, vẽn ěn ki, kÿ ag tóg Topẽ mré vĩ (ka)mẽ han tĩ gé, ag vãkre kÿ. Kÿ Fariseu mré ke ag tóg ge nÿtĩgtĩ gé. Hã ra ã mré mũ tĩ ag tóg ge tũ nÿtĩ. Jẽg ag tóg mÿgtĩ, kurã kar ki. Vãkre vãn ag nÿtĩ, ěg vãkre kurã ki,” he ag tóg mũ sir, Jesus mÿ.

34 Kÿ tóg ag mÿ: “hÿ,” he mũ. “Hã ra vẽn prÿg tÿ festa to kãmũ ag pi(jé) vãkrég tĩ’,” he tóg. “Festa vẽn mÿr, vẽn prÿg ti, kÿ ti mré ke ag tóg ùn prÿg mũ ěn venh kãmũ tĩ. Hã ra

sóg tỹ ùn prũg mũ ên ri ke nĩ, hã kỹ tóg inh mré mũ tĩ ag mỹ sér tĩ,” he tóg.

³⁵ “Vãhã tóg jun mũ, inh kurã ti. Ên kã ag tóg inh pére mũnh mũ. Ên kã hã ag tóg ãjag vãkrenh ke venh mũ, kurã ên kã, inh mré mũ tĩ ag,” he tóg, Jesus ti.

³⁶ Kỹ tóg ag mỹ comparação han mũ, kỹ tóg: “inh jykre tãg vỹ ge nỹnh mũ,” he mũ. “Êg pi(jé) êg kur tãg kókég tĩ', êg tỹ êg kur si jar kã nĩm jé,” he tóg. “Ke tũ nĩ mũ ra êg tóg êg kur há ên kókég mũ, hã ra tóg êg kur si ên ki par tũ nĩgtĩ gé, ùn há ti. Kỹ êg kur tóg kórég kar nỹtĩ nĩ sir,” he tóg. Ti tỹ ã jykre tãg tó vễ, hã ra tóg kur tãg ri ke nĩ.

³⁷ Kỹ tóg ag mỹ: “vinho vỹ ge nĩgtĩ gé,” he mũ gé. “Êg pi(jé) vinho kajãg mũ tỹ ti fãr si tỹ saco ki kujêg tĩ', vinho tãg ên ti'. Ke tũ nĩ mũ ra tóg kunãnh kỹ jar mũ. Kỹ vinho ên tóg tũ' he mũ, bolsa ke gé sir.

³⁸ Vinho kajãg mũ tỹ ti fãr tãg tỹ bolsa ki kujên ke vễ mỹr,” he tóg. Ti tỹ ã jykre tãg tó vễ, hã ra tóg vinho kajãg mũ ri ke nĩ.

³⁹ Kỹ tóg ag mỹ: “êg pi(jé) vinho si kron kỹ ùn kajãg kron sór tĩ', ùn tãg ên ti',” he mũ gé. “Ti si hã tóg êg mỹ há nĩ,” he êg tóg tĩ,” he tóg, Jesus ti. Ti tỹ ã jykre tãg tó vễ, hã ra ag jykre si tóg ag mỹ há tĩ, ù tỹ ti vỹ mễg mũ ag mỹ.

6

Vẽnhkán ke kurã ki vễnh jykre (Mt 12.1-8; Mc 2.23-28)

¹ Kejên tóg vễnhkán ke kurã tá krỹg mũ. Kỹ Jesus tóg êpỹ mĩ tĩ mũ, trigo jo êpỹ mĩ. Ti mré mũ tĩ ag tóg ti mré mũ mũ. Hã ra ag tóg sir trigo mó ên tỹ kam ke mũ sir. ãjag nĩgé tỹ ag tóg rynhranh mũ, ag tỹ ti kanẽ ko jé.

² Hã ra Fariseu ù ag tóg ag vэг mũ. Ag mỹ vễnh rãnrãj vễ, ag tỹ trigo rynhranh mũ ti. Hã ki ag tóg ag mỹ Topê vĩ mranh mũ, ag tỹ vễnhkán ke kurã ki rãnrãj kỹ. Hã kỹ ag tóg ag mỹ: “ãjag ne tóg nén han ke tũ han mũ nĩ', vễnhkán ke kurã ki',” he mũ. “Vễnh rãnrãj vễ mỹr', ãjag tỹ nén han mũ ti,” he ag tóg, Jesus mré mũ tĩ ag mỹ.

³ Hã ra Jesus tóg ag mỹ: “vó,” he mũ. “Ag kókĩnkĩr vễ mỹr,” he tóg. “Davi to jykrén nĩ, ti mré mũ tĩ ag to ke gé. Ti kókĩr kỹ tóg ã tỹ

nén han ke tũ han gé, hã ra Topê pi(jé) ti to jũ mũ',” he tóg.

⁴ “Topê jo ìn kã ra tóg rã, Davi ti. Tá tóg Topê jamĩ ên kó. Ti tỹ konh ke tũ vễ vễ, Topê tũ ki rĩr tĩ ag hã tỹ konh ke vễ vễ. Hã ra tóg kó, ã mré mũ tĩ ag mỹ tóg vễnh kãpópãm gé, Davi ti. Rán kỹ tóg nĩ nĩ mỹr,” he tóg, Jesus ti.

⁵ Kỹ tóg ag mỹ: “tỹ sóg vễnhkán ke kurã to pã'i nĩ mỹr,” he mũ. “Tỹ sóg êprã ke fi kósin nĩ,” he tóg ag mỹ, Jesus ti.

Jesus tỹ vễnhkán ke kurã kã ù tỹ há' he (Mt 12.9-14; Mc 3.1-6)

⁶ Vễnhkán ke kurã ù kã Jesus tóg Israel ag tỹ vễnh kanhrãn jafã kãra rã mũ, ag kanhrãn jé. Tá ù tóg jẻ nĩ. Ti nĩgé vỹ tóg ja nĩ.

⁷ Kỹ Topê vĩ to professor ag tóg Jesus tugnỹm mũ, Fariseu ag ke gé, ag tỹ ti tỹ há' he mũ ên ven jé. “Ti mỹ ti tỹ há' he sór tũ, tỹ êg vễnhkán ke kurã (hã) ra'?” he ag tóg. “Ti tỹ ti tỹ há' he kỹ êg tóg ti kãmén mũ, pã'i ag mỹ, ti tỹ vễnhkán ke kurã kã rãnrãj mũ ti,” he ag tóg. Hã kỹ ag tóg ti tugnỹm mũ.

⁸ Hã ra Jesus tóg ag tỹ nén to jykrén vэг jẻ nĩ. Kỹ tóg ùn nĩgé tóg ên mỹ: “kunĩg,” he mũ. “Tag kã jẻnh nĩ,” he tóg ti mỹ. Kỹ tóg kãtĩg kỹ kã jẻ mũ sir.

⁹ Kỹ tóg ag mỹ: “sỹ ãjag ki jẻmẻnh há tóg tĩ,” he mũ. “Vễnhkán ke kurã ki êg hỹn ne han mũ'?” he tóg, “êg tỹ Topê vĩ ki króm jé?” he tóg. “Êg mỹ nén ù há han mũ'? Êg tỹ ù tũ kókén kỹn mỹ kórég tũ nỹnh mũ hỹn'?” he tóg. “Êg mỹ ù kren han mũ hỹn'? Êg tỹ ù tén kỹn mỹ kórég tũ nĩnh mũ hỹn'?” he tóg. Hã ra ag tóg ti mỹ nén ù tó tũ nĩ.

¹⁰ Kỹ tóg ag ki êvãnh kãn kỹ ùn nĩgé tóg ên mỹ: “ã nĩgé tỹ krỹg hé,” he mũ. Kỹ tóg tỹ krỹg he mũ sir. Ti tỹ tỹ krỹg he kỹ tóg há' he mũ, ti nĩgé tóg ên ti.

¹¹ Kỹ tóg vễnh kar mỹ e tĩ. Ag fe tóg gỹm ke mũ, kỹ ag tóg jagnẻ mré vẻmẻn mũ. “Êg hỹn ti tỹ hẻ ri kenh mũ hỹn', ti kãgmĩnh mũ vó?” he ag tóg, Jesus to. Hã ra tóg ùn nĩgé tóg ên tỹ há' he ja nĩ sir.

Jesus tỹ apóstolo ag kuprẻg (Mt 10.1-4; Mc 3.13-19)

12 Ěn kã Jesus tóg kejěn pãnónh ra tĩ mũ, ti tỹ Topě mré věmén jé. Kutý ěn kã tóg Topě mré vĩ nĩ ki kurãg mũ.

13 Tỹ vaj ký tóg ã mré mũ tĩ ag jé prěr kãn mũ, ký tóg ag kãmĩ ũ tỹ 12 (ke) ěn ag kuprěg mũ. Ag to tóg: “sỹ ũn vin mũ ěn ag,” he mũ, hã vỹ: apóstolo, he mũ.

14 Ag hã vě, ha mẽ: Simão, Jesus tỹ ti jyyj ũ hã vỹ: Pedro, he mũ, ti jãvy tỹ André ke gé, Tiago ke gé, ti jãvy tỹ João mré, Filipe ke gé, Bartolomeu ke gé,

15 Mateus ke gé, Tomé ke gé, Tiago ke gé, Alfeu kósin tag ti, Simão ke gé, ag tỹ ũ to: Zelote, he mũ tag ti,

16 Judas ke gé, Tiago kósin tag ti, Judas Iscariotes ke gé, ũ tỹ Jesus vatánh tá pã'i ag mỹ ti kãmén ke tag ti.

Jesus tỹ ũn e ag ki rĩ (Mt 4.23-25)

17 Ký Jesus tóg ag mré pãnónh ěn to tére mũ sir, ký tóg kyjer tá jě nĩ. Ký ti mré mũ tỹ hěn ri ke ag vỹ tá nỹtĩ gé. ũ tỹ hěn ri ke ag vỹ ti ki junjun ja nĩgtĩ, ga tỹ Judéia tá kãmũ ký, cidade tỹ Jerusalém tá ke gé, goj kafã tũ fyr tá ke gé, hã vỹ: cidade tỹ Tiro, he mũ, cidade tỹ Sidom, he mũ gé. Ěn kar vỹ ti ki junjun ja nĩgtĩ, ti tỹ ag tỹ há' he jé. Ký tóg fór pě nĩ, tá, ag tỹ e pě tãvĩ nỹtĩn ký.

18 ũn jagrě kórég ag tỹ tóg há' he mũ gé, ag jagrě pan tóg mũ, Jesus ti, fag mré hã.

19 Ký věnh kar vỹ ti kã krỹ' he sór mũ sir, hã jé ag tóg ti ki junjun mũ. Ký ũ tỹ ti kã krỹ' he mũ ěn ag vỹ há' he kãn mũ, ti tỹ ã jykre tar tỹ ag tỹ hághá' hen ký. Hã jé ag tóg věnh mãn ja nĩ. Hã ký ag tóg ti pěnĩn e tĩ sir.

Jesus tỹ ag kanhrãn (Mt 5.1-12)

20 Ký tóg ã mré mũ tĩ ag ki ěvãnh mũ, ký tóg ag mỹ kãmén mũ, Jesus ti, ký tóg: “Topě vỹ ãjag ve há han mũ, ãjag tỹ: “kórég eg tóg nỹtĩ,” hen ký,” he mũ. “Kỹ ãjag tóg Topě tỹ tỹ ěg pã'i nĩ venh ke mũ,” he tóg.

21 “Topě vỹ ãjag ve há han mũ, ãjag tỹ: “inh kókĩr ri ke tóg tĩ, sỹ věnh jykre kuryj ve sór tĩ ěn ti,” hen ký. Ký ãjag tóg venh ke mũ,” he tóg. “Topě vỹ ãjag ve há han mũ, ãjag věsýrěnh mũn ký, ěprã. Ājag mỹ sér nĩ jé tóg ke mũ, tá,” he tóg.

22 “Topě vỹ ãjag ve há han mũ, ag tỹ ãjag to kórég nỹtĩn ký isugnĩn, ag tỹ ãjag mỹ: “ha mũ jěg,” hen ký, isugrĩn. Ag tỹ isugnĩn ãjag mỹ vĩ kónãn ký tóg há tĩ, ag tỹ ón ký ãjag jykre kórég tóg ký. Tỹ sóg ěprã ke fi kósin nĩ mỹr,” he tóg, Jesus ti.

23 “Mỹ sér nỹtĩmnĩ, ãjag fe tỹ mrin kemnĩ, ag tỹ isugrĩn ãjag vóg kónãn mũ ra. Ký ãjag tóg kanhkã tá něn ũ há kar venh ke mũ, věnh kaja jé, isugnĩn. Ge ja ag tóg nỹtĩ ja nĩgtĩ, ũ tỹ ãjag vóg mũ ag jóg'jóg ag, vãsỹ Topě vĩ tóg tĩ ag mỹ. Ag vóg kónãn ja ag tóg nĩ gé. Vãsỹ Topě vĩ tóg tĩ ěn ag ri ke ãjag tóg nỹtĩ, ag krě'krě tỹ ãjag vóg kónãn ký,” he tóg, Jesus ti.

24 “Hã ra Topě vỹ ãjag ve kónãn mũ, ãjag tỹ: “há ěg tóg nỹtĩ,” hen ký. Ga kri mũn ký ãjag tóg něn ũ há vég tĩ, ký ãjag tóg kanhkã tá jun ke tũ nĩ,” he tóg.

25 “Topě vỹ ãjag ve kónãn mũ, ãjag tỹ věnh jykre kuryj ve sór tũ nỹtĩn ký, ti tỹ ãjag mỹ ãjag kókĩnkĩr ri ke tũ nĩn ký, ěprã. Ký ãjag tóg venh ke tũ nĩ. Ký tóg ãjag kókĩnkĩr ri ke tĩnh mũ, tá,” he tóg. “Topě vỹ ãjag ve kónãn mũ, ti tỹ ãjag mỹ sér tĩn ký, ěprã. Věsýrěnh jé ãjag tóg ke mũ, kygfỹ jé ãjag tóg ke mũ, tá,” he tóg.

26 “Topě vỹ ãjag ve kónãn mũ, věnh kar tỹ ãjag to vĩ há han mũn ký. Ājag mỹ ti há tĩ, věnh kar tỹ ãjag to vĩ há han mũn ký, hã ra tóg Topě mỹ kórég nĩ. Ge ja ag tóg nỹtĩgtĩ, ũ tỹ ãjag mỹ vĩ há han mũ ěn jóg'jóg ag, ón ký Topě vĩ tóg (ka)mě ěn ag mỹ, vãsỹ. Ag mỹ ag tóg vĩ há han ja nĩ gé. Ag ri ke ãjag tóg nỹtĩ, ón ký Topě vĩ tóg (ka)mě ěn ri ke ãjag tóg nỹtĩ, věnh kar tỹ ãjag mỹ vĩ há han ký. Hã ký tóg ãjag ve kónãn mũ, Topě ti,” he tóg, Jesus ti, ag mỹ.

Ěg tỹ ěg kato tě mũ ag to há nỹtĩnh ke (Mt 5.38-48)

27 “Ājag jyvěn sóg mũ, ãjag tỹ inh vĩ jěměn ký, ha mẽ. ũ tỹ ãjag kato vãsãnsãn mũ ěn ag to fe nỹtĩmnĩ jãvo. ũ tỹ ãjag to jũ mũ ag mỹ něn ũ há han nĩ jãvo.

28 ũ tỹ ãjag mỹ vĩ kónãn mũ ag mỹ vĩ há han nĩ gé. ũ tỹ ãjag mỹ fěfěn mũ ag to Topě mré vĩmnĩ gé.

29 ũ ag tỹ ãjag jamě ki tãnh ký ag mỹ ãjag jamě ũ ti ven nĩ gé, ag tỹ ãjag mỹ ki tãnh jé

gé. Û ag tỹ ãjag capa mǎn sór mũ ên ag mỹ ãjag camisa nĩm nĩ gé.

³⁰ Û ag tỹ ãjag mỹ nén ù to: “inh mỹ nĩm,” he kỹ ag mỹ nĩm nĩ. Û ag tỹ ãjag tỹ nén ù mǎn kỹ ag mỹ: “inh mỹ isũ nĩm,” he tũg nĩ.

³¹ ãjag tỹ ãjag mré ke ù to: “ti tỹ êg mỹ tag han há tóg tĩ vễ,” he mũ ra êg hã tóg ti mỹ han ke mũ,” he tóg.

³² “Û ag tóg ãjag to há nỹtĩ. ãjag tỹ tag ag hã to há nỹtĩn kỹ tóg tỹ nén ù tũ tĩ ver. Vễnh kar ag vỹ ge nỹtĩ gé. Û tỹ ãjag to há nỹtĩ ên ag to ag tóg há nỹtĩ gé, vễnh kato, ù tỹ Topê vỹ mranh mũ ag vỹ tag han tĩ. Tag vỹ há nĩ, hã ra tóg tỹ nén ù tũ nĩ ver.

³³ Û ag tóg ãjag mỹ vỹ há han tĩ. ãjag tỹ ên ag hã mỹ vỹ há han kỹ tóg tỹ nén ù tũ nĩ ver. Ge ag tóg nỹtĩ gé, Topê vỹ mranh tĩ ag. ãjag tỹ ag mỹ vỹ há han kỹ ag tóg ãjag mỹ vỹ há han mũ gé, vễnh kato. Há ti nĩ, hã ra tóg tỹ nén ù tũ nĩ ver.

³⁴ Û ag vỹ, ãjag tỹ ag mỹ prestar hen kỹ ag tóg ãjag mỹ nĩm mǎn mũ, ãjag tũ ti. ãjag tỹ ag hã mỹ prestar he mǎn kỹ tóg tỹ nén ù tũ nĩ ver. Topê vỹ mranh tĩ ag vỹ ge nỹtĩ gé. ãjag tỹ ag mỹ nĩm mǎn kỹ ag tóg ãjag mỹ prestar he mǎn mũ sir, ãjag tũ ti. Há ti nĩ, hã ra tóg tỹ nén ù tũ nĩ ver.

³⁵ Ag jãvo ù tỹ ãjag kato vāsãnsãn mũ ag to há nỹtĩm nĩ, ha mẽ. Vễnh kar mỹ vỹ há han kãn nĩ. Vễnh kar mỹ prestar he kãn nĩ, ag tỹ ãjag mỹ ãjag tũ nĩm tũ (hã) ra. Kỹ ãjag tóg kanhkã tá venh ke mũ, ãjag tỹ ùri nén han mũ tag ri ke ti. Hã ki ãjag tóg tỹ ù tỹ kynhmỹ nĩ ên krẽ nỹtĩ, ãjag tỹ ti ri ke han kỹ. Ti hã ne vễnh kar mỹ vỹ há han kãn tĩ ver', ùn jykre kórég kar ag mré hã, ag tỹ ti mỹ: “Êg mỹ tóg há tĩ,” he tũ (hã) ra, ag tỹ vễnh hã ki rĩr há han mũ (hã) ra tóg ag mỹ vỹ há han tĩ ver, Topê ti.

³⁶ Vễnh kar jagãgtãn kãn nĩ, êg jóg ri ke. Êg jóg tỹ vễnh kar jagãgtãn kóm vễnh kar jagãgtãn nĩ gé,” he tóg, Jesus ti.

*Êg tỹ kãnhmar ù to vỹ kónãn ke tũ
(Mt 7.1-5)*

³⁷ “Kãnhmar ù to vỹ kónãn tũg nĩ, kỹ Topê vỹ ãjag to vỹ kónãn ke tũ nĩ gé. Kãnhmar ù to: “kórég ti nĩ,” he tũg nĩ, kỹ Topê vỹ ãjag to: “kórég ti nĩ,” henh ke tũ nĩ gé. Vễnh kar

mỹ vễnh pãte fón nĩ, ke tũ nĩ mũ ra Topê vỹ ãjag mỹ vễnh pãte fón ke tũ nĩ gé.

³⁸ Ag mỹ nén ù há kar nĩm nĩ, kỹ Topê vỹ ãjag mỹ nén ù há kar nĩm ke mũ gé sir, hã ra tóg ãjag mỹ ên kãfór nĩm ke mũ. ãjag mỹ nĩm mág han jé tóg ke mũ, Topê ti. Nĩm mág pẽ han jé tóg ke mũ, nén ù há kar tỹ. Hỹ, ge ti nĩ. ãjag tỹ ag mỹ nén ù há han kỹ Topê vỹ ãjag mỹ nén ù há han ke mũ gé. ãjag tỹ ag mỹ nén ù kórég han kỹ tóg ãjag mỹ hã ri ke han ke mũ gé,” he tóg, Jesus ti.

³⁹ Kỹ tóg ag mỹ: “ù tỹ ki kagtĩg ra tỹ ãjag pã'i nỹtĩ sór mũ tag vỹ ge nỹnh mũ, ha mẽ,” he mũ gé. Kỹ tóg: “ùn kyvó tỹ ùn kyvó ù mỹ: “sỹ ã pẽre tĩg ke vễ,” hen kỹ ag tóg ag mũn kỹ kãgnó ki vár kãn ke mũ. Ge ag tóg tĩ, ãjag pã'i ag. ãjag tỹ ùn ki kagtĩg ag mré mũn kỹ ãjag tóg mũ kónãn kãn ke mũ.

⁴⁰ Aluno pi(jé) ã professor kãfór nĩnh mũ'. Ti tỹ kanhrãn há han kỹ tóg kejẽn ã professor ri ke nĩnh mũ, hã ra ti pi(jé) ti kãfór nĩnh mũ'.

⁴¹ Jykre kórég mág ãjag tóg nỹtĩ, hã ra ãjag régre jykre pãno sĩ ên ãjag mỹ kórég nỹ'.

⁴² Kỹ ãjag hã ne tóg ãjag régre ag mỹ: “sỹ ã mỹ ã jykre kórég kurynh há tóg tĩ,” he tĩ', ãjag tỹ ãjag jykre pãno tãvĩ ên kurynh jãvãnh (hã) ra. Ke tũg ra mỹr, ke tũ nĩ mũ ra ãjag tóg jykre régre nỹtĩ. ãjag jykre kurynh vén nĩ, kar ãjag tóg ãjag régre ag jykre kurynh há han mũ,” he tóg, Jesus ti.

Ka to comparação

(Mt 7.16-20; 12.33-35)

⁴³ “Ha vé, ka há pi(jé) kanẽ kórég han tĩ'. Kỹ ka kórég pi(jé) kanẽ há han tĩ gé'.

⁴⁴ Êg tỹ ti kanẽ ve kỹ êg tóg: “ùn kanẽ ko há ja vễ,” henh ke mũ, ke tũ nĩn kỹ êg tóg: “ùn kanẽ ko vãnh ja vễ,” henh ke mũ. Sónh to êg tóg pẽnva vég tũ nĩgtĩ mỹr', kar êg tóg vãnh tỹ jóhó to uva vég tũ nĩgtĩ gé, ha mẽ.

⁴⁵ Ge tóg nỹgtĩ, êprã ke ag jykre ti. Ûn jykre há vỹ nén ù há kar to jykren tĩ, ti jykre kuryj nĩn kỹ. Kỹ tóg êg mỹ tó há han tĩ gé sir. Kỹ ùn jykre kórég vỹ ù kórég kar to jykren tĩ, ti jykre pãno nĩn kỹ. Kỹ tóg êg mỹ tó kónãn tĩ gé sir. Hỹ, ge ti nỹgtĩ. Êg tỹ nén to jykren tĩ ên kãmén êg tóg tĩ mỹr,” he tóg, Jesus ti.

Īn to comparaçāo (Mt 7.24-27)

⁴⁶ “Ājag ne tóg inh mý: “Senhor', Senhor',” he tí'. Hã ra ājag tóg isý ājag mý nén tó mũ ěn han vānh nýtĩgtĩ. Ký tóg vėnhmý ný.

⁴⁷ Inh ki ge ký ājag nýtĩ. Inh ví ki kanhró ājag tóg nýtĩ. Ājag tý ki króm ký ājag tóg sir tag ri ke nýtĩnh mũ, ha mẽ.

⁴⁸ Īn han mũ ri ke vē. Ũ tóg, ti tý ĩn han jé tóg kũm tí, kã há tá. Kũm ký tóg pãró kri ĩn han mũ sir, pãró kri tóg ti nũna gunhgunh mũ sir. Ký vāhã goj tóg var mũ, ký tóg ĩn kri rũm ke mũ, goj var ti. Hã ra ĩn tóg jē nĩ. Ti kókég tũ tóg nĩ, goj var ti. Ti tý pãró kri jē hã ký tóg tar jē. Ge ti nĩ, ājag tý inh ví ki króm ký.

⁴⁹ Ājag tý inh ví ki króm tũ nĩn ký ājag tóg sir tag ri ke nýtĩnh mũ, ha mẽ. Ũ tóg ĩn han mũ gé, hã ra tóg jo kũm tũ nĩ, ti nũna vỹ jãvo krĩgmý nýtĩ. Ký vāhã goj var vỹ ĩn kri rũm ke mũ sir, ký tóg kutē mũ sir, ĩn ti. Ký tóg mráj mũ sir, ha mẽ, ti nũna tý krĩgmý nýtĩn ký. Ge ti nĩ, ũ tý inh ví jēmē jãvānh ěn ti,” he tóg, Jesus ti.

7

Fóg tý capitāo tý Jesus ki rã (Mt 8.5-13)

¹ Jesus tý ag kar kanhrān kãn kar tóg cidade tý Cafarnaum ra tí mũ.

² Tá fóg tý capitāo tóg nĩ nĩ. Ti camarada tóg kaga ný nĩ. Vėnhmý tóg ný, ký capitāo tóg: “ti hýn ter mũ ha,” he mũ. Hã ra tóg ti mý ti fe ri ke nĩ, ti camarada ti, capitāo ěn mý.

³ Hã ký tóg Jesus kãme mẽ ký Israel kófa ag jėgnėg mũ, Jesus to, ag tý ti mý: “ti venh kãtĩg,” he jé. Jesus tý ti camarada tý há' he jé tóg ti mý vėnh ví jėnėg mũ, fóg tý capitāo ěn ti.

⁴ Ký ag tóg Jesus tá junjun mũ, Israel kófa ěn ag. Ký ag tóg Jesus mý tó mũ. “Ā mý ti venh tĩg ke tũ nĩ?” he ag tóg mũ, Jesus mý. “Ũn há vē.

⁵ ěg povo to tóg há tãví nĩ, ti tý tý fóg (hã) ra. ěg mý tóg ĩn han ja nĩ, ěg tý krēm Topē ví tó jafã ti, ti tý tý fóg (hã) ra,” he ag tóg mũ, Jesus mý, fóg tý capitāo ěn to.

⁶ Ký Jesus tóg: “hej,” he mũ. Ký tóg ag mré tí mũ. Ký tóg ti ĩn kakó ki jun mũ. Ký capitāo tóg ti mý vėnh ví jėnė mãn mũ gé. Ā mré ke ag jėgnėg tóg mũ, Jesus to. Ký ag tóg ti mý: “Senhor',” he mũ. “Ti venh kãrānh ke tũ Ā nēji nĩ, ti tý tý fóg nĩn ký,” he ag tóg. “Ā mýn hýn jagy ný, Ā tý fóg ĩn kãki sãn ken ký, Judeu ag tý fóg ĩn sãn jãvānh nýtĩn ký,” he ag tóg.

⁷ “Hã ký ti nēji Ā venh kãtĩg tũ nĩ gé, hã ra tóg Ā mý vėnh ví jėnėg mũ. Ā ví pir ki ti camarada nēji há' henh mũ, Ā tý Ā ví tý ti tý há' henh há nĩn ký,” he ag tóg.

⁸ “Ha vé, týn ji pã'i krēm ke nĩ gé, ký soldado ag nēji tý ti krēm ke nýtĩ gé. Hã kýn ji tóg pã'i jykre ki kanhró nĩ. Ti tý soldado ũ mý: “kutĩg,” hen kýn ji tí mũ, ti tý ti mý: “kunĩg,” hen kýn ji kãtĩ mũ gé. Ti tý Ā camarada mý: “tag han ra,” hen kýn ji han mũ. Ti ví týn ji ag jėgnėg tí. Hã kýn ji ki kanhró nĩ. Ā ví tý Ā nēji ti camarada tý há' he há nĩ,” he ag tóg mũ, Jesus mý, capitāo mré ke ag.

⁹ Ký tóg Jesus mý e tí, ti ví tag ti. Ký tóg Ā mré mũ tí ag mý ke mũ, ũn a ag mý, ti nón kãmũ ěn ag mý. Ký tóg ag mý: “Israel ũ pi(jé) ti ri ke nĩ', ti tý tý fóg (hã) ra',” he mũ. “Ki kanhró tóg nĩ mýr, ký tóg inh ki rã ký jē. Ge ve ja tũ sóg nĩ. Há' he ký ti nĩ ha, ti camarada ti,” he tóg, Jesus ti.

¹⁰ Ký ag tóg vỹnvỹn ke mũ, capitāo ĩn ra, capitāo tý ũn jėgnėg mũ ag. Hã ra ti camarada ěn tóg há' he ja nĩ sir, ag tý tá junjun mũ ra.

Jesus tý ũn ter mũ rĩn mãn

¹¹ Kãnmar Jesus tóg tí mũ gé sir, ěn ki. Ký tóg cidade tý Naim ra tí mũ. Ti mré mũ tí ag tóg ti mré mũ mũ, ũn e a g ke gé. Ti nón ag tóg mũ mũ.

¹² Ký tóg cidade ěn fyr ki jun mũ, cidade to ró jãnkã ki. Ký ag tóg vēser va kãmũ nĩ, ha mẽ. Ti mýnh fi kósin pir vē mýr. TI panh tóg ter ja nĩ. Ký ũ tý hēn ri ke fag vỹ fi mré mũ nĩ, cidade tá kãmũn ký. ag tý ti péjunh mũ vē, vėnh kej tá.

¹³ Ký Jesus tóg fi vėg mũ, ký fi tóg ti mý jagtar nĩ. Ký tóg fi mý: “fý tũg nĩ,” he mũ.

¹⁴ Ký tóg vēser venh tí mũ, ký tóg tá jun ký ti mẽg mũ. Ký ũ tý ti va mũ ěn ag vỹ

krÿg'krÿg' he mÿ. Kÿ Jesus tóg vÿser mÿ: “kyrÿ,” he mÿ. “Nÿ ra, he sóg mÿ ã mÿ,” he tóg mÿ, vÿser mÿ, Jesus ti.

¹⁵ Kÿ tóg nÿ mÿ (mÿr) sir, ha mÿ, vÿser ãn ti, kÿ tóg vÿ mÿ sir, ãn ter ja ãn ti. Kÿ Jesus tóg ti mÿnh fi mÿ ti fÿg mÿ.

¹⁶ Kÿ tóg vÿnh kar mÿ e tÿ, kÿ ag tóg Topÿ to vÿ há han mÿ sir. “Topÿ vÿ tó tÿ kãfór vÿ ãg ki jun,” he ag tóg mÿ, “Topÿ vÿ ãg ve há han, hã kÿ tóg ti jÿnÿ,” he ag tóg mÿ, Jesus to.

¹⁷ Kÿ ti vÿme tóg vÿnh kar kri rÿm ke mÿ sir, ga tÿ Judÿia kar tá, ga kar ãn kãmÿ ke gé, Jesus tÿ ãn ter ja ãn rÿn mãn ja ti.

*João Batista tÿ Jesus mÿ vÿnh vÿ jÿnÿ
(Mt 11.2-19)*

¹⁸ ãn kã João vÿ se kÿ jÿ nÿ, João Batista ti, ã tÿ ag kygpÿg tÿ ti. Kÿ João mrÿ mÿ tÿ ag tóg ti mÿ tó kãn mÿ sir, Jesus tÿ nÿn han mÿ ti.

¹⁹ Kÿ tóg ti mÿ e tÿ. Kÿ tóg Jesus to: “Topÿ tÿ ãn jÿnÿg mÿ hã mÿ vÿ?” he mÿ. Hã kÿ tóg ã mrÿ mÿ tÿ rÿgre ag jÿgnÿg mÿ, ag tÿ Jesus venh mÿ jé, ag tÿ ti ki jÿmÿ jé, ti mÿ: “ã hã mÿ?” he jé. “ãg tÿ ãn jãvãnh mÿ mÿ tÿ ã nÿ? Topÿ tÿ ãn jÿnÿg mÿ hã mÿ tÿ ã nÿ? ãg mÿ ã jãvãnh mãn ke tÿ nÿ ha', ã pãte?” he sór ag tóg mÿ, Jesus mÿ.

²⁰ Kÿ ag tóg Jesus tá junjun mÿ. Kÿ ag tóg ti mÿ: “João Batista vÿ ãg jÿgnÿ, ãg tÿ ã ki jÿmÿ jé,” he mÿ. “ã hã mÿ? he tóg. ãg tÿ ãn jãvãnh mÿ ãn hã mÿ tÿ ã nÿ? ãg mÿ ã jãvãnh mãn ke tÿ nÿ ha', ã pãte? he tóg, João ti, ã mÿ,” he ag tóg mÿ, Jesus mÿ.

²¹ Hã ra Jesus tóg ãn kaga ag tÿ há' he mÿ, ag tÿ ti mrÿ vÿnh kãmÿ kÿ. Vÿnh jagrÿ kórÿg pan tóg mÿ gé, kurã ãn kã. ãn kyvó ag tÿ há' he tóg mÿ gé, ag kanÿ tÿ.

²² Kÿ tóg João mrÿ mÿ ti ag mÿ: “Ha João mÿ tag tómnÿ, ha mÿ,” he mÿ. “ãg tÿ nÿn vÿg mÿ ta g tómnÿ, ãg tÿ nÿn mÿg mÿ ti ke gé,” he tóg. “Tag han ãn tÿ, ha mÿ: ãn kyvó ag vÿ isugrÿn ãvãnh há nÿtÿ ha. ãn kãnhgrÿ ag vÿ mÿ há han mÿ ha, ãn kónhgrÿ ãn ag. ã tÿ vÿnh kaga kren vãnh han mÿ ag krenkren han ãn tÿ, ã tÿ lepra han mÿ ag. ãn kutu ag vÿ ãmÿ há nÿtÿ ha. ãn kãgter mÿ ag vÿ rÿnrÿr mãn gé. ãn jagãgtar e ag vÿ Topÿ vÿ sér mÿg mÿ ha ke gé, Topÿ tÿ tÿ ãg pã'i nÿnh ke to.

²³ Kÿ tóg ti tÿ iso jykren kónãn tÿ nÿn kÿ há' he mÿ. Kÿ Topÿ tóg ti ve há han mÿ sir. Tag tómnÿ, João mÿ,” he tóg, Jesus ti.

²⁴ Kÿ João tÿ ãn jÿgnÿg mÿ ag tóg mÿ mÿ sir, João mÿ tó jé, mÿr, ha mÿ.

João tÿ ãn jÿgnÿg mÿ ãn ag mÿ kar kÿ Jesus tóg ãn e ãn ag kanhrãn mÿ sir, kÿ tóg ag mÿ João kãmÿn mÿ. “ãmã tÿ ja ra ãg tóg mÿ ja nÿgtÿ, João ve jé,” he tóg. “Kÿ ti jykre hÿn ne ri ke nÿ, ãg tÿ mÿ? Kejÿn kãka tóg goj jagma krã tÿ man man ke tÿ. João jykre mÿ ãg tÿ tag ri ke tÿ nÿ? Hÿ, ri ke tÿ ti nÿ.

²⁵ Kÿ ti jykre hÿn ne ri ke nÿ ãg tÿ mÿ? Ti mÿ ãg tÿ ãn kur sÿnvÿ ag jykre ri ke nÿ? Vó. ãn kur sÿnvÿ ag vÿ cidade mág tá nÿtÿ, pã'i mág ãn krÿm, ãn jÿn mág mÿ ag. Ag pi(jé) ãmã tÿg ja mÿ mÿ tÿ'.

²⁶ Kÿ ti jykre hÿn ne ri ke nÿ ãg tÿ mÿ? Ti jykre mÿ ãg tÿ Topÿ vÿ tó tÿ ag jykre ri ke nÿ? Hÿ, ri ke ti nÿ. Topÿ vÿ tó tÿ vÿ mÿr, hã ra tóg Topÿ vÿ tó tÿ ag kãfór kar nÿ, João ti.

²⁷ Topÿ vÿ João jÿnÿ, ti tÿ ijo tÿg jé. Hã kÿ tag tóg ti to rán kÿ nÿ, Topÿ vÿ ki, ha mÿ. “Ha vé, ã jo sóg ã jÿnÿnh mÿ, ti tÿ vÿnh kar tÿ há' he jé, ã tÿg ken jo. Ag jyvÿn jé tóg ke mÿ, kÿ tóg ãpÿry kure ri ke nÿ, ãmÿn kurÿnh ri ke,” he tóg, Topÿ vÿ tÿ rán kÿ nÿ ki, João to, ti tÿ ijo tÿg ke tag to,” he tóg, Jesus ti, ag mÿ.

²⁸ “Ki hã sóg tó mÿ, hã kÿ sóg ke mÿ, ha mÿ. ãpÿra ke ag kãfór kar ti nÿ, João ti, Topÿ vÿ tón ki. ã tÿ ga kri mÿ kãfór kar ti nÿ. Hã ra ã tÿ hÿn ri ke ag tóg Topÿ tÿ tÿ ãg pã'i nÿ venh ke mÿ mÿr. Ag tÿ venh ke mÿ (hã) ra ag tóg kãsir nÿtÿ. Kÿ ãn kãsir ãn ag tÿ ãgno pÿ ãn tóg João mág kãfór nÿnh mÿ hã ra,” he tóg, Jesus ti, João to.

²⁹ “Jo João vÿ mÿg mÿ e ãn ag tóg João vÿ mÿ há han ja nÿgtÿ, hã kÿ ag tóg Topÿ vÿ tag ti to: “ki hã ã tóg tó mÿ,” he ja nÿgtÿ, João tÿ ag mÿ nÿn tó ja to. Hã kÿ tóg ag kygpe ja nÿgtÿ, João ti, ã tÿ governo mÿ imposto tÿ jãnkamy mág tÿ ag mrÿ hã.

³⁰ Hã ra Fariseu ag tóg João vÿ jÿmÿ jãvãnh ja nÿtÿgtÿ, Topÿ vÿ to professor ag ke gé. Hã kÿ ag tóg Topÿ tÿ ag mÿ nÿn han sór mÿ ãn tÿ ti mÿ nenh ja nÿgtÿ gé. Hã kÿ João tóg ag kygpe ja tÿ nÿgtÿ gé,” he tóg, Jesus ti.

³¹ “Ûri ke ag vÿ ge nÿtÿ gé, ha mÿ.

³² Gĩr ag ri ke ag tóg nýtĩ. Gĩr ag vỹ jagně mré kanhinnhir mũgtĩ. Kĩ ag tóg ãjag mré ke ag jé prěr tĩgtĩ, ag mré kanhinnhir jé. Kĩ ag tóg kejěn jũ tĩ. “Ájag mỹ ěg tóg vākyn, kanhinnhir kỹ, hã ra ãjag ne tóg vėnh gringrén jãvãnh nýtĩ!” he ag tóg tĩ, gĩr ag, jagně mỹ. “Ájag tỹ vėnh gringrén jãvãnh nýtĩn kỹ ěg tóg ón kỹ vėsýrénh mũ sir, ěg kanhinnhir kỹ, hã ra ãjag ne tóg ěg mré fỹ jãvãnh nýtĩgtĩ gé!” he ag tóg tĩ gé, ón kỹ jagně to jũ kỹ, gĩr ag.

³³ Gĩr tag ag ri ke ãjag tóg nýtĩ, João to, iso ke gé,” he tóg, Jesus ti. “João vỹ vākre ja nĩgtĩ, jěn mág tũ, kron tũ. Kỹ ãjag tóg ti to: “jagrě kórég tóg nĩ,” he ja nĩgtĩ, ti vākre to.

³⁴ Ti jãvo sóg vākreg tũ nĩgtĩ. Jėg sóg nĩgtĩ, kron sóg nĩgtĩ. Kỹ ãjag tóg iso: “ti hã ne jěn mág tĩ,” he tĩ. “Ti hã ne kronkron tĩ, ti hã ne governo mỹ imposto tỹ jãnkamy mág tĩ ag to há nĩ, ti hã ne Topě vĩ mranh tĩ ag to há nĩ,” he ãjag tóg tĩ iso, ěprã ke fi kósın to. Kỹ João jykre tóg ãjag mỹ kórég nĩ, ti vākre to, jãvo inh jykre tóg ãjag mỹ kórég nĩ gé, inh vākreg tũ to.

³⁵ Hã ra ěg tỹ ù jykre tugnỹm kỹ ěg tóg ti jykre há ěn ki kanhró nýtĩ sir. Kỹ tóg tỹ Topě krě nĩ sir, kỹ ěg tóg ti ki Topě jykre ki kanhró nýtĩ sir, ti jykre há ěn tugrĩn,” he tóg, Jesus ti. Ti tỹ ag mỹ João kãmén hã vė.

Jesus tỹ Simão ĩn krēm jėg

³⁶ Kejěn Fariseu ù tóg Jesus mỹ tó mũ, ti tỹ ti mré jěn jé. Kỹ tóg tĩ mũ, Fariseu ěn ĩn ra. Tá tóg ti mré jėg mũ sir.

³⁷ Ti tỹ mré jėg nĩ ra ù fi tóg ti ki jun mũ, cidade tá ke ù fi. Hã ra fi tóg mén ja e nĩ, Topě vĩ mranh kỹ. Jesus tỹ Fariseu ěn ĩn krēm jė męg fi tóg mũ, hã kỹ fi tóg garrafa va kãtĩ mũ. Garrafa kãki tóg ěg tãg jafã nĩ, nén ger há tỹ. Pó kupri tỹ tóg han kỹ nĩ nĩ, garrafa ěn, pó tãnjã tỹ.

³⁸ ěn va kãtĩg kỹ fi tóg ti pěn to jě nĩ sir. Hã ra Jesus tóg cama kri nỹ kỹ jėg mũ. Ag jykre vė, ag tỹ nỹ kỹ jěn ke mũ ěn ti. Kỹ fi tóg ti pěn to jě kỹ fỹ mũ. Fi tỹ Topě vĩ mranh ja ěn tugrĩn fi tóg fỹ mũ. Kỹ fi tóg ã kaně var tỹ ti pěn kupég mũ, kỹ fi tóg ã gãnh tỹ ti pěn kykũg mũ gé. Ti pěn ki nhun ke fi tóg mũ gé. Kỹ fi tóg ti pěn tãg mũ sir, garrafa ki jě ěn tỹ.

³⁹ Kỹ Fariseu ěn tóg vėg mũ, ù tỹ Jesus mỹ: “inh mré jěn kãtĩg,” he ja ěn ti. Kỹ tóg to jykrén mũ, ùn týtã fi to, Jesus to ke gé. “Ti tỹ tỹ Topě vĩ tó tĩ nĩ ra tóg fi ki kanhró nĩnh mũ vė,” he tóg. “Hã ra tóg ki kãtĩg nĩ ve nĩ. Ûn mén ja e fi vė mỹr, Topě vĩ mranh fi tóg tĩgtĩ mỹr, hã ra tóg fi tỹ ã pěn mē ěn kamėg tũ nĩ, Jesus i,” he tóg, to jykrén kỹ, Fariseu ěn ti.

⁴⁰ Hã ra Jesus tóg ki kanhró nĩ. Kỹ tóg ti mỹ: “Simão!” he mũ. “Sỹ ã mré vēmén ke vė,” he tóg. Kỹ tóg ti mỹ: “há tóg,” he mũ sir, Jesus mỹ.

⁴¹ Kỹ tóg: “kejěn patrão ù tóg nĩgtĩ,” he mũ. “Ti camarada régre ag tóg ti mỹ név(e) nýtĩ. Ûn név(e) ěn vỹ tỹ 500 (ke) nĩ, kar ùn név(e) vỹ tỹ 50 (ke) nĩ gé.

⁴² Hã ra ag tỹ ne tỹ kajãm ke tóg tũ tĩ, kỹ tóg ag mỹ tỹ tũg' he mũ, ag név(e) tỹ, ag patrão ti. Kỹ ti camarada tỹ hě nỹ hỹn ti to há kãfór nĩ?” he tóg, Jesus ti, ti tỹ Simão ki jēmén kỹ.

⁴³ Kỹ Simão tóg ti mỹ: “ùn név(e) mág ja ěn hỹn tóg ti to há kãfór nĩ,” he mũ. Kỹ Jesus tóg ti mỹ: “ki hã ã tóg tó mũ,” he mũ.

⁴⁴ Kỹ tóg fi jé vĩrĩn ke mũ sir, ùn týtã kórég ěn fi jé, kỹ tóg Simão mỹ: “ã mỹ fi vėg mũ?” he mũ. “Á kaně var tỹ fi tóg inh pěn kugpég mũ, kar fi tóg ã gãnh tỹ inh pěn kykũg mũ gé,” he tóg. “Fi jãvó ã tóg inh mỹ goj ven tũ nĩ, isỹ inh pěn kugpe jé, sỹ ã ĩn kãra rã kỹ,” he tóg.

⁴⁵ “Inh ki nhun ke ja tũ ã tóg nĩ, ã jãvo fi tóg inh pěn ki nhun ke mũ, to fi krónh ke tũ nĩ jãvo,” he tóg.

⁴⁶ “Á pi(jé) inh gãnh tãg ja nĩ, ã jãvo fi tóg inh pěn tãg,” he tóg.

⁴⁷ “Hã kỹ sóg ã mỹ tó mũ. Topě vĩ mranh tỹ hěn ri ke han fi tóg. Hã ra tóg fi mỹ vėnh pãte fón kãn mũ sir, Topě ti, fi tỹ iso há tãvĩ nĩn kỹ, sỹ tỹ fi fe nĩn kỹ. Û mỹ tóg kejěn vėnh pãte fón pir han tĩ, Topě ti, ù tỹ patrão ki név(e) sĩ ěn ri ke mỹ. Kỹ ěn tóg ti to há sĩ nĩ gé sir, fi tỹ iso há tãvĩ jãvo,” he tóg.

⁴⁸ Kỹ tóg fi mỹ: “ã tỹ Topě vĩ mranh ja ěn tỹ sóg vėnh pãte fón mũ,” he mũ, Jesus ti.

⁴⁹ Kỹ ti mré jėg mũ ag tóg to jykrén mũ sir, ti vĩ to. Kỹ ag tóg jagně mỹ ke mũ. “Ti hã mỹ ěg tỹ Topě vĩ mranh kỹ vėnh pãte fón ke mũ

vỹ?" he ag tóg mũ. "Topê hã ne vênh pãte fón há nĩ', hã kỹ tóg êg mỹ vênhmỹ tĩ," he ag tóg.

⁵⁰ Hã ra Jesus tóg fi mỹ ke mãn mũ. "Ã tỹ inh ki rã kỹ sóg ã kren han mũ," he tóg. "Ha jatun mỹ tĩg," he tóg, Jesus ti, ùn tỹtá kórég ja ên fi mỹ.

8

Ùn tỹtá fag tỹ Jesus ki rĩr

¹ Tag pãte Jesus vỹ cidade kar mĩ tĩg kãn mũ, êmã kãsir mĩ ke gé. Topê vĩ tó tóg tĩ mũ. Ag mỹ tóg: "Topê tỹ tỹ ãjag pã'i nĩ sór vễ," he mũ. Kỹ ù tỹ 12 (ke) ag tóg ti mré mũ mũ.

² Kỹ ùn tỹtá fag tóg ti mré mũ mũ gé sir. Jesus tóg fag tỹ há' he ja nĩ. Û fag tóg kaga ja nỹtĩgĩ, kỹ ù fag tóg jagrê kórég ja nỹtĩgĩ gé. Hã ra Jesus tóg fag tỹ hághá' he kãn ja nĩ. Û fi vỹ tỹ Maria fi nĩ, Madalena he mũ tag fi. Jesus vỹ fi jagrê kórég pan ja nĩ, ù tỹ 7 (ke) vễ, ha mẽ, fi jagrê kórég ag.

³ Kar ù fi vỹ tỹ Joana fi nĩ gé, Cuza prũ fi vễ, pã'i mág tỹ Herodes tũ vэг nĩ ên prũ fi vễ. Kar ù fi vỹ tỹ Suzana fi nĩ gé. Kar ù fag vỹ ti mré mũ mũ gé, ti mỹ vễjên han jé. ãjag tũ tỹ fag tóg ti mỹ vễjên han tĩ, kar ti mré mũ tĩ ag mré hã.

Nén fy to comparação (Mt 13.1-9; Mc 4.1-9)

⁴ Kejên ùn e ag vỹ vênh mãn mũ sir, êmã tỹ hên ri ke tá kãmũ kỹ. Jesus to ag tóg vênh mãn mũ. Kỹ tóg ag kanhrãnrãn kỹ ag mỹ: "ù tỹ Topê vĩ tó tĩ vỹ ge nỹnh mũ, ha mẽ," he mũ.

⁵ "Kejên ù tóg trigo fy vãvãm tĩ mũ. Ti tỹ vãvãm kỹ ti fy ù tóg êpry kri, êmĩn kri vár mũ, kỹ ag tóg ti sãn mũ, kỹ sêsĩ ag vỹ ko mũ gé sir, jêsĩ tóg tỹ tũg' ke mũ sir.

⁶ Ti fy ù tóg pãró kri vár mũ. Kỹ tóg mur mũ vễ, hã ra tóg tóg mũ sir. Ga tỹ sĩ nĩn kỹ tóg goj ve ja tũ nĩ, hã kỹ tóg tóg mũ sir.

⁷ Ti fy ù tóg sỏnh kãki vár mũ. Kỹ sỏnh tóg ti mré mur mũ, ti kri tóg rũm ke mũ sir. Kỹ tóg ter mũ sir, sỏnh kãki.

⁸ Ti fy ù tóg ga há kri vár mũ. Kỹ tóg mur há han mũ, kanẽ há ke gé. Kanẽ tỹ 100 (ke) han tóg mũ sir, ga há kri," he tóg, Jesus ti. Kỹ tóg tag tó kar kỹ prêr mũ. "!. Û nĩgrêg

nỹtĩ ag tỹ ki êmên jé..!" he tóg, prêr kỹ, Jesus ti.

Jesus tỹ nén fy to comparação kãmén (Mt 13.10-23; Mc 4.10-20)

⁹ Kỹ ti mré mũ tĩ ag tóg ti ki jêmêg mũ. "Ne to ke nễ, trigo fy kãme tag ti?" he ag tóg mũ, Jesus mỹ.

¹⁰ Kỹ tóg ag mỹ: "ãjag hã mỹ sóg Topê tỹ tỹ êg pã'i nĩ ên kãmén há han ke mũ, ijo tó ja tũ ên ti," he mũ. "Hã ra sóg ù ag mỹ comparação tãvĩ han mũ. Ag mỹ sóg tó há han ke tũ nĩ, ù tỹ ón kỹ mềg mũ ag mỹ, kỹ ag tóg ãjag tỹ vэг mũ ra ki kagtĩg nỹtĩ, ãjag tỹ mềg mũ ra ag tóg to jykrén tũ nỹtĩ, kỹ tóg ag tỹ to jykrén ke tũ tĩ," he tóg.

¹¹ Kỹ tóg ag mỹ kãmén mũ. "Nén fy kãme vỹ ge nỹnh mũ, ha mẽ," he tóg. "Topê vĩ vỹ trigo fy ri ke nĩ.

¹² Û ag tóg Topê vĩ jêmêg tĩ. Jêmê kar kỹ Japo tóg ag mỹ tỹ tũg' he tĩ, Topê vĩ tỹ. Kỹ ag tóg sir ti ki ge tũ nĩgtĩ, krenkren ke tũ ag nĩgtĩ sir. Kỹ tóg êpry ên, êmĩn kri vár mũ ên ri ke nĩ, ên ti.

¹³ Kar ù ag tóg pãró kri vár mũ ên ri ke nỹtĩ gé. Mềg ag tóg tĩ vễ, Topê vĩ ti. Kỹ ag tóg: "hej," he mũ. Ag mỹ tóg sér tĩ sir. Hã ra ag tóg tỹ nén kré jãre tũ ri ke nỹtĩ mỹr, ha mẽ. Mũ sĩ han ag tóg mũ, Topê mré. Nén ù jagy kutẽ kỹ ag tóg Topê tovãnh mũ sir, ag tỹ Topê vĩ mranh sỏr kỹ.

¹⁴ Kar ti tỹ sỏnh kãki vár mũ vỹ ge nỹtĩgtĩ gé. Topê vĩ mềg ag tóg tĩ gé. Hã ra ag tóg mũ mũ sir, ãjag rãnrãj nỏn. Ón kỹ ag tóg rico nỹtĩ sỏr mũ, ãjag rãnrãj to. Hã to ag tóg krĩ kufy nỹtĩ. Nén kar to ên ag tóg tĩ, kỹ tag hã ne ag mỹ há tĩ'. Hã kỹ ag tóg Topê vĩ to jykrén mãn tũ nĩgtĩ sir. Hã kỹ ag tóg kanẽ há han tũ nĩ gé sir.

¹⁵ Kar ga há kri vár mũ vỹ ge nĩ gé. Jêmêg ag tóg tĩ gé, Topê vĩ ti. Kỹ ag tóg ãjag fe tỹ ti ki rãg mũ sir, ag tỹ ti vĩ ki króm jé. Kỹ ag tóg kanẽ há han mũ sir. Komêr hã ag tóg kanẽ há han', han', he mũ, ag tỹ nén ù jagy vэг mũ ra," he tóg. Ti tỹ ag mỹ êg tỹ Topê tovãnh ke tũ kãmén hã vễ, Jesus ti.

Lampião to comparação (Mc 4.21-25)

¹⁶ Kỹ tóg ag mỹ: êg tỹ lampião grug kỹ êg pi(jé) kễj krêm fêg tĩ," he mũ. "Êg pi(jé)

cama krēm fēg tĩ gé', néj gru ti. Ti fēg jafã kri ěg tóg ti fēg tĩ. Kĩ vėnh kar tóg vėg mũ sir, ag tỹ ěg ĩn kãra kãgen kỹ.

¹⁷ Ge ti nỹ, sỹ ajag mũ nén tó mũ kar ti. Ver ajag tóg to jykrén tũ nĩgtĩ. Ajag tỹ vãhã to jykrén kãn ke vė. Ver ajag tóg ki kagtũg nỹtĩ. Ajag tỹ vãhã ki kanhrãn kãn ke vė," he tóg.

¹⁸ "Hã kỹ jēmė há han nĩ. Ũ tỹ to jykrén há han kỹ tóg ũ to jykrén mãn', ũ to jykrén mãn', henh ke mũ. Ũ tỹ inh vĩ to jykrén há han tũ nĩn kỹ tóg ti mũ tũg' he kãn mũ, ti tỹ nén ũ to jykrén mũ kar ěn mré hã," he tóg. Ti tỹ ag mũ ěg tỹ ti vĩ to jykrén há han ke kãmén hã vė, Jesus ti.

Jesus mré ke pė fag
(Mt 12.46-50; Mc 3.31-35)

¹⁹ Kejėn Jesus mỹnh fi vỹ ti venh kãtĩ mũ, ti jãvy ag mré. Hã ra fag tóg ti ki junjun tũ nĩ. Ti pėnĩn tóg fór tãvĩ tĩ, hã kỹ ag tóg ti ki junjun tũ nĩ, ti mỹnh fi mré hã.

²⁰ Kỹ ũ tóg ti mũ: "ã mỹnh fi vỹ re tá jė, ã jãvy ag mré," he mũ. "Fag tỹ ã venh kãmũ vė," he tóg, Jesus mũ.

²¹ Hã ra Jesus tóg ti mũ: "mė'," he mũ. "Hã ra ũ tỹ Topė vĩ jēmėg mũ fag vỹ inh mỹnh pė ri ke nỹtĩ, inh jãvy pė ri ke ke gé, ũ tỹ Topė vĩ ki króm mũ ag," he tóg, Jesus ti.

Jesus tỹ kóho tỹ tũg' he
(Mt 8.23-27; Mc 4.35-41)

²² Kejėn tóg canoa kãra rã mũ, ti mré mũ tĩ ag mré. Kỹ tóg ag mũ: "mũ nỹ, goj nig kafã ũ ra," he mũ. Kỹ ag tóg mũ mũ, canoa kãmĩ.

²³ Ag mũn ki Jesus tóg nũr mũ sir. Kỹ vãhã kóho jũ tóg kraug he mũ sir. Króg ke tóg mũ sir, kóho ti. Kỹ goj tóg canoa kãki krém ke mũ. Ti fãn sór tóg mũ sir. Kỹ tóg ag mũ ag kãgter ha mẽ tĩ.

²⁴ Kỹ ag tóg ti rĩn mũ mũ. Ti mũ ag tóg: "Senhor', Senhor'," he mũ. "Ěg mũ ěg kãgter ha mẽ tóg tĩ," he ag tóg ti mũ. Kỹ tóg rĩr mũ sir. Kỹ tóg kóho mũ vĩ mũ, goj mũ ke gé, goj vóg nén ěn mũ. Kỹ tóg krỹg' he mũ sir, kóho ti. Katy' he tóg mũ sir.

²⁵ Kỹ tóg ag mũ ke mũ. "Ajag tỹ ne jė inh ki ge há han tũ nĩ nė?" he tóg. Kỹ ag tóg kanė jur nỹtĩ nĩ. Ag mũ tóg e tĩ, kỹ ag tóg jagnė mũ: "ti jykre tóg ěg mũ e tĩ," he mũ. "Kóho

mỹ tóg vĩ mũ, Kỹ tóg ki hã ke mũ, kóho ti, goj ti ke gé," he ag tóg mũ, jagnė mũ.

Jesus tỹ ũn jagrė kórég tỹ há' he
(Mt 8.28-34; Mc 5.1-20)

²⁶ Kóho tỹ tũg' hen kỹ ag tóg Gerasa ag jamã tá junjun mũ sir. Goj nig kafã ũ tá tóg nĩ, ga tỹ Galilėia to hã.

²⁷ Kỹ tóg canoa kãki kãkutė mũ, Jesus ti. Kỹ ũ tóg ti kato tẽ mũ, cidade tá ke ũ, hã ra tóg jagrė kórég tỹ hėn ri ke nĩ. Si há tóg tĩ ha, ti jagrė e nĩ ti. Kỹ tóg kur tũ nĩ. Kato r tóg nĩ. ĩn tũ ti nĩ gé. Vėnh kej tá tóg jėgtĩ, pãró tỹ vėnh kej tá.

²⁸ Ěn tóg Jesus kato tẽ mũ. Kỹ tóg ti krēm mũg ke mũ. Prėr kỹ tóg: "!.ã isỹ hė ri kenh mũ, Jesus'!.!" he mũ. "!.Kynhmỹ Topė kósin'!.!" he tóg. "!.ã mũ sóg to vĩnh mũ, ã tỹ inh vóg kónãn tũ nĩ jė..!" he tóg, prėr kỹ, ũn jagrė kórég ěn ti.

²⁹ Hã ra Jesus tóg Nén-Kórég mũ: "ti ki pa jėg," he ja nĩ, hã kỹ tóg prėr mũ. Ti ki vĩrĩn ke', ti ki vĩrĩn ke' tỹ hėn ri ke han ja ag tóg nĩgtĩ, Nén-Kórég ag. Kỹ ti mré ke ag tóg ti se ja nĩgtĩ gé, ti mrĩnh kỹ, ferro tỹ, ti nĩgé, ti pėn ke gé. Hã ra tóg ã se ja kykym kãn ja nĩgtĩ. Kỹ Nén-Kórég ag tóg ěmã tũg ja ra ti tĩn ja nĩgtĩ. Hã kỹ tóg vėnh kej mũ tũgtĩ, ũn jagrė kórég ěn ti.

³⁰ Kỹ Jesus tóg ti mũ: "ã jiji hė ri ke tĩ?" he mũ. Kỹ tóg: "Mil," he mũ. Nén-Kórég tỹ hėn ri ke ag tỹ tóg jagrė nĩ, hã kỹ tóg: "Mil," he mũ.

³¹ Kỹ ag tóg Jesus mũ to vĩ mũ, Nén-Kórég ag, ti tỹ nũgme ra ag jėgnėg tũ nĩ jė, inferno ra.

³² Hã ra porco tỹ hėn ri ke tóg tá jėg nỹtĩ nĩ, pãnónh tá. Kỹ Nén-Kórég ag tóg Jesus mũ to vĩ e han, ti tỹ ag mũ: "ha porco ki ge jėg, ge kỹ," he jė. Kỹ tóg ag mũ ke mũ.

³³ Kỹ ag tóg ěn ki kãpa mũ sir, Nén-Kórég ag. Porco ag ki ag tóg ge mũ sir. Kỹ porco ag tóg mer ki re mũ, rán ki, goj nig ra. Goj ki ag tóg vár mũ sir. Nãgnãr kỹ ag tóg tũ' he kãn mũ sir.

³⁴ Kỹ ũ tỹ porco ki rĩr tĩ ag tóg vėg mũ. Kỹ ag tóg pėtė mũ, cidade ra. Tá ag tóg kãmén mũ, ěmã kãsir mũ hã ke gé.

³⁵ Kỹ tá ke ag tóg ra mũ kãn mũ, ag vĩ mėg mũ ag. Ag tỹ nén ěn ve sór vė. Ra mũ kỹ ag tóg Jesus tá junjun mũ. Kỹ ag tóg ti vėg mũ

sir, ùn jagrê kórég ja ti. Nĩ tóg mũ ha, Jesus rã hã. Kur tóg nĩ ha, krĩ há tóg nĩ ha. Kĩ ag fe tóg jürũn ke mũ sir.

³⁶ Û tỹ Jesus tỹ ti tỹ há' he mũ vég mũ ãn ag tóg kãmén kãn mũ sir, ù tỹ ùri ti venh kãmũ mũ ãn ag mũ. Ûn jagrê kórég tó ag tóg mũ, ag mũ, Jesus tỹ ti han ja ti, porco kãgter ja ti ke gé.

³⁷ Kĩ tá ke ag tóg ti mũ to vĩ mũ, Jesus mũ, ti tỹ tá kãkutê jé. Gerasa tá ke kar ag tóg kanê jur nỹtĩ, hã kũ ag tóg ti mũ: “ã tĩg kũ tóg ãg mũ há tĩnh mũ,” he mũ. Kĩ tóg canoa kãra rã kũ tĩg sór mũ, ti mré mũ tĩ ag mré.

³⁸ Kĩ ùn jagrê kórég ja tóg ti mũ to vĩ e han mũ, “nhỹ ã mré tĩg mũ,” hen kũ, Jesus mũ. Hã ra Jesus tóg ti pẽre tĩg jãvãnh nĩ.

³⁹ “Ã jamã ra vỹn ké,” he tóg ti mũ. “Tá ag mũ kãmén nĩ, Topẽ tỹ ã tỹ há' he ja tag ti,” he tóg, Jesus ti. Kĩ tóg tĩ mũ sir, ùn jagrê kórég ja ti. Cidade kar mũ tóg tĩ mũ. Ag mũ tóg kãmén mũ sir, Jesus tỹ ti tỹ há' he ja ãn ti.

*Jesus tỹ Jairo kósin fi rĩn mãn
(Mt 9.18-26; Mc 5.21-43)*

⁴⁰ Kĩ Jesus tóg vỹn ke mũ, nig kafã ù ra. Kĩ tóg venh e ãn mũ sér tĩ, ag tỹ ti ven kũ. Ti jãvãnh ja ag tóg nĩ, hã kũ tóg ag mũ sér tĩ, ag tỹ ti ven kũ.

⁴¹ Kĩ vãhã ù tóg ti ki jun mũ, Jesus ki. Israel ag venh kanhrãn jafã to pã'i vẽ, ti jyjyn hã vỹ: Jairo, he mũ. ãn tóg Jesus krẽm mũg ke mũ, ã jakrĩ tỹ tóg jẽ mũ, kũ tóg ti mũ vĩ mũ, ti tỹ ti ãn ra tĩg jé, Jesus ti.

⁴² Ti kósin pir fi vỹ kaga tãvĩ nỹ, kũ fi kaga tãvĩ ãn vỹ fi tén sór mũ. Kri prỹg tỹ 12 (ke) fi nĩ, Jairo kósin pir ãn fi. Kĩ tóg ti mré tĩ mũ, Jesus ti.

Ti tĩg kũ ùn e ag tóg ti nón mũ mũ.

⁴³ Kĩ ag kã ù fi tóg ag pêtẽm mũ. Kyvénh krỹg tũ han kũ fi tóg nĩ, prỹg tỹ 12 (ke) ki. Hã ra ag tóg fi kaga tỹ hẽ ri ke ja tũ nĩ, ag tỹ fi kygtãg mũ ra, médico ag.

⁴⁴ ãn fi tóg ti nón ti kur mráj vóg mũ. Kĩ vêsỹmér fi kyvénh tóg tũ' he mũ.

⁴⁵ Kĩ Jesus tóg: “ũ nỹ inh kur vóg?” he mũ. Hã ra venh kar tóg: “inh hã tũ vẽ, inh hã tũ vẽ,” he mũ. Kĩ Pedro tóg ti mũ vĩ mũ, Jesus mré mũ tĩ ag kar ke gé. Ti mũ ag tóg:

“ã kur mẽ kãn ãg tóg, hã ra ã tóg: “ũ nỹ inh kur vóg?” he mũ,” he tóg, Pedro ti, Jesus mũ.

⁴⁶ Hã ra Jesus tóg: “vó,” he mũ. “Û tóg inh kur vóg,” he tóg. “Inh kuprĩg tóg inh ki kãtére, hã kũ sóg ki kanhrãn mũ,” he tóg.

⁴⁷ Kĩ ùn tỹtã ãn fi tóg to jykrén mũ sir. “Ti hỹn tóg inh vé,” he fi tóg. Hã kũ fi tóg jürũn ke kũ kãtĩ mũ. Jesus krẽm fi tóg mũg ke mũ. Kĩ fi tóg ti mũ tó kãn mũ, venh kar rĩnve. Ti mũ fi tóg ã kaga ja ãn kãmén kãn mũ, fi tỹ ti kur vóg ja ãn ti ke gé, fi tỹ há' he ja ti ke gé. “Isỹ ã kur vóg kũ sóg vêsỹmér há' hé,” he fi tóg, Jesus mũ.

⁴⁸ Kĩ tóg fi mũ vĩ há han mũ, Jesus ti. “Inh kósin’,” he tóg. “Ã tỹ inh ki rã kũ ã tóg há' hé. Ha tĩg, jatun mũ. Há ã tóg nĩ ha,” he tóg fi mũ, fi han kar kũ, Jesus ti.

⁴⁹ Ti tỹ ver fi mré vēmén jẽ ra ù tóg jun mũ, pã'i tỹ Jairo ãn ãn tá. “Ã kósin fi hur ter,” he tóg, pã'i mũ. “Tũg ja fi tóg nĩ ha,” he tóg, Jairon mũ. “Hã kũ ti mũ: kunĩg, he mãn tũg nĩ, ti kutãn mãn tũg nĩ,” he tóg.

⁵⁰ Hã ra Jesus tóg mẽg mũ, kũ tóg ti mũ: “mũmẽg tũg nĩ,” he mũ. “Inh vĩ hã kri fimnĩ, kũ ã kósin fi tóg há' henh mũ,” he tóg.

⁵¹ Kĩ ag tóg mũ kũ ti ãn tá junjun mũ sir, Jairo ãn tá. Kĩ Jesus tóg ag tỹ ãn kãra ge kamẽg mũ. “Pedro vỹ ãn ra rãnh mũ, inh mré, João ke gé, João kãke tỹ Tiago ke gé, gĩr fi panh ke gé, fi mỹnh fi ke gé,” he tóg, Jesus ti.

⁵² Hã ra ùn e fag vỹ tá nỹtĩ nĩ gé, kygfỹ fag nỹtĩ nĩ, vêsỹrénh kũ, Kĩ Jesus tóg fag mũ: “kygfỹ tũg ra,” he mũ. “Fi pi(jé) ter mũ'. Fi nũr vẽ,” he tóg.

⁵³ Hã ra fag tóg ti nyg mũ. Fi ter ki kanhró fag tóg nỹtĩ, hã kũ fag tóg ti nyg mũ. Hã ra Jesus tóg fag mũ: “ha mũjẽg,” he mũ.

⁵⁴ Fag mũn kar kũ Jesus tóg fi nĩgẽ kãgmĩg mũ, kũ tóg prẽr mũ sir. “!..Nĩ ra, já..!” he tóg, jamã hár(a).

⁵⁵ Kĩ fi kuprĩg tóg fi to vỹn ke mũ. Nĩ fi tóg mũ sir, mũr, ha mẽ, ùn ter mũ ãn fi. Kĩ Jesus tóg fag mũ tó mũ, fag tỹ fi mũ vỹjẽn ven jé.

⁵⁶ Kĩ tóg fi han mũ fag mũ e tãvĩ tĩ sir. Hã ra Jesus tóg fag mũ tó mũ, fag tỹ ù mũ tó tũg jé, fi rĩr mãn ja tag ti. Hã ra tóg fi ter mũ ra fi rĩn, Jesus ti.

9

*Jesus tỹ ã mré mũ tĩ ag jěgně
(Mt 10.5-15; Mc 6.7-13)*

¹ Kĩ Jesus tóg ù tỹ 12 (ke) ag jé prěr mũ, ti tỹ ùn vin mũ ãn ag, ag vėnh mũn jé. Ag vėnh mũn kỹ tóg ag tar han mũ sir, ag tỹ vėnh jagrě kórég pan jé, ag tỹ ùn kagyga ag tỹ há' he jé gé.

² Kĩ tóg ag jěgněg mũ sir, ag tỹ Topě tỹ tỹ ěg pã'i nĩ ěn kãmén jé, vėnh kar mũ, ag tỹ ùn kagyga ag tỹ há' he kãn jé gé.

³ Hã kỹ tóg ag mũ ke mũ sir. “Ăjag mũn kỹ nén ù ma mũ tũg nĩ, vátó va mũ tũg nĩ, sacon ke gé, bolsa ěn, pão ke gé, jãnkamy ke gé. Kur régre rĩnh tũg nĩ gé,” he tóg.

⁴ “Ăjag tỹ ĩn ra ge mũ hã ki nũgnũr' hemnĩ, hã ki ģjag tỹ kurã ki kãpanh ke tá krỹg nĩ,” he tóg.

⁵ “Ag tỹ ģjag mũ: “kãge jěg ra,” he jãvãnh nĩn kỹ tá kãpamnĩ. Tá kãpa kỹ ģjag pěn hã kykũnhkũnh nĩ, ag tỹ to ki kanhró nỹtĩ jé sir, Topě tỹ ag tovãnh ken ki,” he tóg, Jesus ti.

⁶ Ti tỹ ag jěgněnh kỹ ag tóg mũ sir, ù tỹ 12 (ke) ag. Ęmã kar mũ ag tóg mũ sir. Topě kãmén ag tóg mũ mũ sir. Ùn kagyga ag tỹ há' he kãn ag tóg mũ gé sir, fag ke gé.

*Jesus kãmé tỹ pã'i tỹ Herodes mũ e
(Mt 14.1-12; Mc 6.14-29)*

⁷ Kỹ pã'i mág tỹ governador tỹ Herodes vỹ męg mũ sir, Jesus tỹ nén han mũ ti. Kỹ tóg ti mũ e tĩ. Kỹ ti tỹ ne to jykrén ke tóg tũ tĩ. Hã ra ù ag tóg Jesus to: “João Batista vė,” he tĩ. “João hỹn tóg ã ter kỹ rĩr mũn,” he ag tóg tĩ, Jesus to.

⁸ Jo ù ag tóg ti to: “Elias vė,” he tĩ gé. “Ti hỹn vėnh ven mũn, vãsỹ Topě vĩ tó tĩ ěn, Elias ti,” he ag tóg tĩ gé, Jesus to. Kỹ ù ag tóg ti to: “vãsỹ Topě vĩ tó tĩ ù hỹn rĩr mũn,” he tĩ gé.

⁹ Hã jěmě tóg, Herodes ti, kỹ tóg to jykrén kỹ: “João mũ vó?” he mũ, Jesus to. “Hã ra sóg João krĩ kym, kỹ tóg tũ' he mũ. Kỹ ù nē, hỹn'?” he tóg. “Nén han vãnh tỹ hěn ri ke hyn han tóg huri. Ù nē, hỹn'?” he tóg. Herodes ti. Kỹ tóg kejěn ti ve sór mũ, ti tỹ ti mũ e tĩn kỹ, hã ra Jesus vỹ ti venh tĩ tũ nĩ.

*Jesus tỹ ù tỹ 5 mil (ke) ag jěn
(Mt 14.13-21; Mc 6.30-44; Jo 6.1-14)*

¹⁰ Kejěn Jesus tỹ ùn vin mũ ag vỹ Jesus to vỹnvỹn ke mũ, ti tỹ ag jěgně ja ěn tá. Ti mũ ag tóg kãmén mũ sir, ag tỹ nén han ja ěn kar ti. Kỹ tóg ag mré vėnh pėju kỹ tĩ mũ, ěmã tỹ Betsaida ra, vyr mũ ag mré vėmén jé.

¹¹ Hã ra ùn e ěn ag tóg męg mũ, Jesus tĩg ti, kỹ ag tóg ti nón mũ mũ. Ag tỹ ti pětēm kỹ tóg ag mũ vĩ há han mũ, Jesus ti. Ag mũ tóg kãmén mũ, Topě tỹ tỹ ěg pã'i nĩ sór ti. Ag kãmĩ ùn kagyga tỹ há' he tóg mũ gé, fag mré hã.

¹² Ti tỹ ag mũ tó jě ki tóg rãké nỹ sir, kỹ ù tỹ 12 (ke) ag tóg Jesus to kãmũ mũ. Ti mũ ag tóg: “ã tỹ ag jěgněnh há tóg tĩ,” he mũ, “ag tỹ ěmã kar mũ mũ jé, pão comprar he jé, tá nũgnũr jé ke gé. Tag ki tóg ěmã tũ nĩ,” he ag tóg, Jesus mũ.

¹³ Hã ra Jesus tóg ag mũ: “vó,” he mũ. “Ha ĩnhã ag jěn,” he tóg. Kỹ ag tóg ti mũ: “hã ra vějěn tóg ěg mũ tũ tĩ,” he mũ. “Pão tỹ 5 (ke) hã vỹ ki nỹtĩ, pirã régre mré ke gé. Ęg mũ ag jo comprar henh mũ vỹ, vějěn ti?” he ag tóg, Jesus mũ.

¹⁴ Ù tỹ mil tỹ 5 (ke) ag vė, ag tãvĩ, fag mré tó tũ ra. Hã ra fag tóg tá e nỹtĩ gé, gĩr mré ke gé.

Ag tỹ ti mũ ke kỹ Jesus tóg ã mré mũ tĩ ag mũ: “ag mũ tugtó, ag nĩgnĩ jé,” he mũ, “ag tỹ vėnh nĩkrén jé, ù tỹ 50 (ke) pãte ù tỹ 50 (ke) ù pãte nĩgnĩ jé,” he tóg, Jesus ti, ã mré mũ tĩ ag mũ.

¹⁵ Kỹ ag tóg ke mũ sir. Kỹ vėnh kar tóg nĩgnĩ mũ sir.

¹⁶ Kỹ tóg pão tỹ 5 (ke) in gég mũ, pirã régre ěn mré. Kỹ tóg kanhkã ki ěvãnh mũ, kỹ tóg Topě mré vĩ mũ sir. Kỹ tóg pão vėnh kãpópãm mũ sir. Kỹ tóg ã mré mũ tĩ ag mũ vin mũ, ag tỹ ùn e ěn mũ vėnh kãpópãm jé, pirã ěn mré hã.

¹⁷ Kỹ vėnh kar tóg ko kãn kỹ funfór mũ sir. Kỹ ag tóg ti ke ěn gég mũ. Kěj tỹ 12 (ke) fãn tóg, vějěn mru ěn ti. Hã kỹ Jesus tóg pão tỹ 5 (ke) tỹ ùn e ag fónfãn ja nĩgtĩ.

*Pedro tỹ Jesus tó
(Mt 16.13-19; Mc 8.27-29)*

¹⁸ Kejěn Jesus tóg Topě mré vĩ mũ, ã pin kỹ. Hã ra ti mré mũ tĩ ag tóg ti mré nỹtĩ nĩ. Kỹ tóg ag mũ ke mũ. “Ag iso hě ri ke tĩ?” he tóg ag mũ, Jesus ti.

19 Kÿ ag tóg ti mÿ: “Û ag vÿ: João Batista vë, he tÿ, jãvo ù ag vÿ: Elias vë, he tÿ gé, jãvo ù ag vÿ: vãsÿ Topë vÿ tó tÿ ù vÿ rÿr mãn, he tÿ gé, ã to,” he ag tóg, Jesus mÿ.

20 Kÿ tóg ag mÿ: “ag jãvo ãjag hë ri ke tÿ, iso?” he mÿ. Kÿ Pedro vÿ ti mÿ kãmén mÿ. “Tÿ ã Cristo nÿ, Topë tÿ ãg mÿ ùn jënëg mÿ ãn vÿ tÿ ã nÿ,” he tóg, Pedro ti, Jesus mÿ.

21 Kÿ tóg ti mÿ vÿ tar han mÿ, Jesus ti, ag tÿ ù mÿ tó tÿ nÿ jé ver, ti tÿ tÿ Cristo nÿ ãn.

*Jesus tÿ ã jagtar ke tó vén
(Mt 16.20-28; Mc 8.30-9.1)*

22 Kÿ tóg ag mÿ kãmén mÿ. “Tÿ sóg ëprã ke fi kósin ãn nÿ,” he tóg. “Ijagtar jagy han ke vë,” he tóg. “Kófa ag tÿ iso: kórég ti nÿ, henh ke vë, Topë tÿ ki rÿr tÿ to pã'i ag ke gé, Topë vÿ to professor ag ke gé. Ag tÿ isén ke vë. Kurã tâgtÿ tÿg mÿ ra sóg rÿr mãn mÿ hã ra,” he tóg, Jesus ti.

23 Kÿ Jesus tóg vënh kar mÿ tó mÿ. “Ãjag tÿ inh mré kãmÿ kÿ tóg há tÿnh mÿ,” he tóg. “Kÿ ãjag jykre tovãnh nÿ, ãjag tÿ isÿ tãvÿ han jé. Ha vé, ag tÿ inh cruz tÿ inh kri fi kÿ sóg tÿg ke mÿ, ag tÿ to isa kÿ isén jé, ha vemni. Vënh nenh ke tÿ sóg nÿ. Isÿ tag han ri ke han nÿ, kurã kar ki, ãjag tÿ inh mré mÿ sór nÿtÿn kÿ,” he tóg.

24 “Ãjag tÿ ãjag jykre hã han sór kÿ ãjag tÿ nÿgme ki vár ke vë. Jãvo ãjag tÿ isugrÿn ãjag jykre tovãnh kÿ ãjag krenkren ke vë, ãjag kãgter ke mÿ (hã) ra.

25 ãjag tÿ ga kri mÿn kÿ ãjag tóg nén kar ganhar he sór mÿ. Kÿ ãjag kuprÿg vÿ vãfor ke mÿ. Kÿ tóg kórég nÿ sir, ãjag rico tãvÿ nÿtÿ ra. Ganho há venh ke tÿ ãjag tóg ke mÿ, gen kÿ.

26 Iso mÿ'ãg tÿg nÿ, inh vÿ to. ãjag tÿ ùri iso mÿ'ãg kÿ sóg ãjag to mÿ'ãg ke mÿ gé, inh kãtÿg mãn ken kÿ. Tÿ sóg ëprã ke fi kósin ãn nÿ. Sÿnvÿ ti nÿnh mÿ, inh kãtÿg mãn kÿ, inh jóg tÿ inh jënënh kÿ, ti tÿ isÿ ùn mág han kÿ. Kÿ ti tÿ jëgnë jafã ag vÿ inh mré kãmÿnh mÿ gé, Topë tÿ ag. ãn kã sóg ãjag to mÿ'ãg ke mÿ, ãjag tÿ ùri iso mÿ'ãg kÿ,” he tóg.

27 “Ki hã sóg tó mÿ, ha mÿ. ãjag kãmÿ ù ag vÿ Topë tÿ tÿ ãg pã'i nÿ venh ke mÿ, ag ter ke to hã, tag ki ãg mré nÿtÿ ù ag,” he tóg, Jesus ti.

*Jesus tÿ vënh ven ù han
(Mt 17.1-13; Mc 9.2-8)*

28 Jesus tÿ tag tó kar kÿ kurã tÿ 8 (ke) vÿ tÿg mÿ. Kÿ tóg kejën ag mÿ: “mÿ nÿ, vÿrmÿ,” he mÿ. Pedro mÿ tóg ke mÿ, João mÿ ke gé, Tiago mÿ ke gé. Ag hã mré tóg tÿ mÿ, pãnónh ra, Topë mré vëmén jé.

29 Tá jun kÿ tóg Topë mré vÿ mÿ sir. Kÿ tóg vãhã vënh ven ù han mÿ, vënh ven kuprÿ han tóg mÿ. Ti kur tóg kópréj nÿ, kókov tóg nÿ, ti kur ãn ti.

30 Kÿ ùn régre ag tóg vãhã tá vënh ven mÿ sir. Kÿ ag tóg Jesus mré vëmén mÿ sir. Moisés vë, Elias mré hã, ùn régre ãn ag.

31 Ag ve vÿ ti ve ri ke nÿ gé, Moisés mré Elias ti. Jesus mré ag tóg vëmén mÿ, ti ter ken kãmén ag tóg mÿ sir, ti tÿ Jerusalém tá ter ke mÿ ãn ti.

32 Pedro ag mÿ tóg nÿr há tãvÿ tÿ, ge ra ag tóg ag vég mÿ sir, ag mÿ nÿgnÿr há (hã) ra. Hã kÿ ag tóg Jesus tÿ ag mÿ vënh ven ù han mÿ ãn vég mÿ sir, ti kókov ãn ti, ti mré vëmén mÿ ag ke gé.

33 Kÿ ù tÿ Jesus mré vëmén kÿ nÿtÿ ag tóg mÿ sór mÿ sir. Kÿ Pedro tóg Jesus mÿ: “Senhor’,” he mÿ. “Tag ki tóg há nÿ,” he tóg. “ãg tÿ tag ki pãjó tâgtÿ han kÿn hÿn há nÿnh mÿ, ã mÿ, Moisés mÿ, Elias mÿ ke gé,” he tóg, Pedro ti. Hã ra tóg krÿ tÿ nÿ, hã kÿ tóg pãjó tó mÿ.

34 Pedro tÿ ver ti mÿ vëmén kÿ kanhkã góg vÿ ag kri rÿm ke mÿ sir. Kÿ ag tóg kamëgmëg mÿ, kanhkã góg ãn ti.

35 Kÿ vënh vÿ tóg mÿ há' he mÿ, kanhkã góg ãn kãtã, kÿ tóg: “inh kósin hã vë,” he mÿ. “Inh fe pë hã vë,” he tóg. “Ti vÿ jëmë ra,” he tóg, vënh vÿ ti, Topë ti.

36 Ag tÿ tag mÿ kar kÿ Jesus tóg ã pir mÿ tá jë nÿ sir. Ti mré vëmén ja ãn ag ve mãn tÿ ag tóg nÿ sir, Pedro ag. Kÿ ag tóg mÿ mÿ. Hã ra ag tóg ù mÿ tó tÿ nÿ ver, ag tÿ nén ve ja ti. Tÿ vëmén tÿ ag tóg nÿ ver, ag tÿ kanhkã tá vënh jykre ve ja ãn ti.

*Jesus tÿ kyrÿ jagrë kórég kutëm
(Mt 17.14-21; Mc 9.14-29)*

37 Tÿ vaj kÿ ag tóg pãnónh ãn tá kãre mÿ, Jesus mré. Kÿ ag tóg ù tÿ hën ri ke ag vigvëg mÿ sir. Jesus kato ag tóg kãmÿ mÿ.

³⁸ Kÿ vâhã ù tóg ag kãmĩ prêr mũ, ha mẽ. “!..Senhor..!” he tóg. “!..Inh kósín ve ra..! Inh kósín pírvê.

³⁹ Jagrê kórég tí nĩ, ha mẽ. Kÿ tóg kejên tí kã vyryn ke tí, kÿ tóg prêr tí, kÿ tóg tí ter tí han tí gé, kÿ tóg jãrãn mũ. Jãrãn kÿ tóg jũrũn' jũrũn' ke tí gé, kÿ tóg kejên tí tovãnh mũ sir, komêr hã, tí rÿj kar kÿ.

⁴⁰ Æ mré mũ tí ag mÿ sóg to vĩ mũ vê, ag tÿ tí jagrê kórég tag kutêm jé, hã ra ag tóg tí tÿ hê rí ke tú nĩ,” he tóg, tí panh tí, Jesus mÿ.

⁴¹ Kÿ Jesus tóg tí mÿ: “ãjag ne tóg inh kí ge há han tú nĩgtĩ,” he mũ. “Jykre pãno ãjag nÿtĩ,” he tóg. “Kysã tÿ hên rí ke kí inh hÿn ãjag mré tí nĩ? Kysã tÿ hên rí ke kí inh hÿn ãjag to fe tÿg nĩ?” he tóg. “Inh mÿ tí pére kãtÿg nĩ,” he tóg, Jesus tí, tí panh mÿ.

⁴² Kÿ ag tóg tí pére kãmũ mũ. Tí jun kÿ tí jagrê tóg tí kã vyryn ke mũ. Tí tÿ jũrũn', jũrũn' ke han tóg mũ sir. Kÿ Jesus tóg tí jagrê mÿ vĩ jũ han mũ, tí tÿ tí kí kãkutê jé. Hã kí tóg kyrũ ên tÿ há' he mũ sir. Kÿ tóg tí panh mÿ: “té,” he mũ sir.

⁴³ Kÿ tóg vênh kar mÿ e tãvĩ tí. “Topê ne tóg tÿ ùn mág tãvĩ nĩ, tí jykre tóg há tãvĩ nĩ,” he ag tóg mũ sir, ag tÿ Jesus tÿ nén han mũ to jykrén kÿ.

Jesus tÿ ã jagtar ke tó mãn

(Mt 17.22-23; Mc 9.30-32)

Kÿ Jesus tóg ã mré mũ tí ag mÿ:

⁴⁴ “ha mẽ há han,” he mũ. “Ëprã ke fí kósín ên vÿ jagtar nÿnh ke mũ. Inh hã vê,” he tóg. “Ëprã ke ag vÿ ãjag tÿ inh kí nén han sór mũ ên han ke mũ,” he tóg, Jesus tí.

⁴⁵ Hã ra tóg ag tÿ tí tÿ ã ter ke kãmén tag to jykrén tú nĩgtĩ. Ag tÿ to jykrén mũ ra ag tóg kí kagtÿg nÿtĩ. Kÿ ag tóg ãjag tÿ tí kí jêmê sór mũ ra tí kamêg mũ gé, hã kÿ ag tóg tí mÿ: “ã tÿ ne tó nê?” he tú nĩ, Jesus mÿ.

Ûn mág

(Mt 18.1-5; Mc 9.33-37)

⁴⁶ Kejên Jesus mré mũ ag vÿ jagnê mÿ vĩ jũ han mũ. “Ëg kã ù tÿ hê nÿ jagnê kãfór nĩ?” he ag tóg jagnê mÿ. Tag to ag tóg jagnê mÿ vĩ jũ han mũ.

⁴⁷ Hã ra Jesus tóg vэг mũ, ag tÿ nén to jykrén mũ tí. Kÿ tóg gÿr jé prêr mũ, tí tÿ tí mré jê jé.

⁴⁸ Kÿ tóg ag mÿ tag tó mũ, ha mẽ. “Gÿr tÿ ge jê ÿn nĩ, tí to há nÿtĩmnĩ, isugnĩn,” he tóg. “ãjag tÿ isugrÿn tí to há nÿtĩn kÿ ãjag tóg iso há nÿtĩ gé sir. Æjag tÿ iso há nÿtĩn kÿ ãjag tóg ù tÿ inh jênêg mũ to há nÿtĩ gé sir. Kÿ ãjag tÿ êgno kar vÿ tÿ ãjag mág kãfór kar nÿnh mũ, ha mẽ, ãjag tÿ tÿ ùn mág nÿtĩ sór kÿ. Tag to jykrén nĩ,” he tóg, Jesus tí, ag mÿ.

Û tÿ êg kato tê tú ag

(Mc 9.38-40)

⁴⁹ Kÿ João tóg Jesus mÿ: “Senhor',” he mũ. “Û ve êg tóg vênh jagrê pan tí, ã jiji tó kÿ, êg tÿ ùn vэг mũ ên tí,” he tóg, Jesus mÿ. “Hã ra tóg êg mré tí tú nĩgtĩ, hã kÿ êg tóg tí mÿ: “vênh jagrê kórég pan sór tũg nĩ,” hé,” he tóg, João tí, Jesus mÿ.

⁵⁰ Kÿ Jesus tóg tí mÿ: “ũ mÿ: “vênh jagrê kórég pan tũg nĩ,” he tũg nĩ,” he mũ. “Û tÿ êg kato tê tú nÿn kÿ êg mré ke vê sir,” he tóg, Jesus tí, João mÿ.

Samaria tá ke ag tÿ Jesus mÿ: “kãrã ra,” he sór tú

⁵¹ Kejên Jesus ter ke kurã tóg kakó nĩ sir. Kÿ tóg to jykrén kÿ Jerusalém ra tÿg sór mũ, ag tÿ tá tí tén jé. Kÿ tóg tÿg kÿ ù ag jêgnêg mũ, vênh jo, ag tÿ tí jun ke tó jé, cidade kãsir tá.

⁵² Kÿ ag tóg mũ mũ, ag tÿ tón jé. Kÿ ag tóg cidade sÿ ù kí jun mũ. Samaria tá ke ag jamã ù vê. Tá ag tóg tí nÿr ke ve sór mũ.

⁵³ Hã ra tá ke ag tóg ag mÿ nenh mũ. Ag mÿ ag tóg: “ãjag tÿ hê ra mũ nê?” he mũ. Kÿ ag tóg: “Jerusalém ra,” he mũ. Kÿ tóg ag mÿ kórég nĩ, hã kÿ ag tóg ag mÿ cama ven sór tú nĩ.

⁵⁴ Kÿ Tiago tóg jũ mũ, João ke gé, Jesus mré mũ tí ag. Kÿ ag tóg Jesus mÿ: “Senhor',” he mũ. “Ëg mÿ tóg há nÿnh mũ, êg tÿ Topê mÿ: “kanhkã tá pÿ tÿ ag pÿn nĩ,” hen kÿ. Mÿ ã mÿ há nÿnh mũ?” he ag tóg. “Ëg tÿ Elias tÿ nén han ja ên han há tóg tí,” he ag tóg, Jesus mÿ.

⁵⁵ Hã ra Jesus tóg ag jé vÿrÿn ke kÿ ag mÿ: “vÿ tũg ra,” he mũ. “Topê jykre pijé', ãjag tÿ nén han sór mũ tag tí. Inh pí(jé) ag tũg sór mũ'. Isÿ ag kren han sór vê jãvo, hã jé sóg kãtĩ mũ, inh, hã vÿ: tÿ sóg êprã ke fí kósín ên nĩ, he mũ,” he tóg, Jesus tí, ag mÿ.

⁵⁶ Kÿ ag tóg cidade ù ra mũ mũ, tá nũgnÿr jé sir.

*Ĕg tỹ Jesus mré mũnh ke
(Mt 8.18-22)*

⁵⁷ Ag mũn kỹ ù tóg Jesus mỹ: “sỹ ã mré tĩg há tóg tĩ,” he mũ. “Á tỹ hên ra tĩg kỹ sóg ã mré tĩg ke mũ,” he tóg.

⁵⁸ Kỹ Jesus tóg ti mỹ: “hã ra tóg jagy tĩ,” he mũ. “Īn tũ sóg nĩ. Mĩg vỹ kré nỹtĩgtĩ, jẽsĩ vỹ jagfe nỹtĩgtĩ gé, ag jãvo isỹ hẽ tá nũr ke tóg tũ tĩ. Tỹ sóg ẽprã ke fi kósin ẽn nĩ,” he tóg, Jesus ti.

⁵⁹ Kỹ Jesus tóg kejẽn ù mỹ: “mũ nỹ, inh mré,” he mũ. Hã ra tóg ti mỹ: “inh hỹn ver tĩg mũ ha, sỹ inh panh ter kỹ ga ki ti fón jé ver,” he mũ.

⁶⁰ Hã ra Jesus tóg ti mỹ: “vó,” he mũ. “Inh ki ge tũ ag vỹ ã panh kej han mũnh mũ. Á tỹ inhhã inh mré tĩg há tóg tĩ, ã tỹ Topẽ tỹ tỹ ẽg pã'i nĩnh ke ẽn kãmén jé,” he tóg ti mỹ, Jesus ti.

⁶¹ Kỹ ù tóg ti mỹ ke mũ gé sir, Jesus mỹ. “Sỹ ã mré tĩg há tóg tĩ,” he tóg. “Hã ra sóg inh jamã ra tĩg sór mũ ver, sỹ inh mré ke fag mỹ isĩg ke tó jé,” he tóg, Jesus mỹ.

⁶² Kỹ Jesus tóg ti mỹ: “vó,” he mũ gé. “Ĕg tỹ arado tỹ ga kũm kỹ ẽg pi(jé) vỹsyjãm ẽvãnh tĩ,” he tóg. “Ge ti nĩ, ã tỹ inh mré tĩg sór kỹ. Inh mré ã tóg tĩg mũ. Á tỹ ã tũ han sór tĩn kỹ ã tóg Topẽ tỹ tỹ ẽg pã'i nĩ tá krỹg ke tũ nĩ,” he tóg, Jesus ti, ù tỹ ti mré tĩg sór mũ mỹ.

10

Ū tỹ 70 (ke) ag tỹ Jesus vĩ kãmén mũ

¹ Kỹ Jesus tóg ù ag vin mũ gé sir, ù tỹ 70 (ke) ag. Kỹ tóg ag jẽgnẽg mũ sir, ag tỹ ti jo mũ jé. Ūn régre tĩn', ūn régre tĩn' he tóg. Ag mỹ tóg ke mũ, ag tỹ ẽmã kar mĩ Topẽ kãmén mũn jé, cidade kar mĩ ke gé. Ag nón tóg ra tĩg sór mũ gé, Jesus ti.

² Kỹ tóg ag mỹ: “inh mỹ ag tóg ẽkré ri ke nỹtĩ, ãjag tỹ ūn mỹ tónh ke mũ ag,” he mũ. “Kejẽn ẽg jakré tóg ẽhé nỹgtĩ, hã ra ag pipir nỹtĩ, ù tỹ krenh ke mũ ag. Kỹ ag tóg ãjag tỹ krég mũ (hã) ra kre kãn tũ nĩgtĩ sir. Ge ti nĩgtĩ, inh vĩ ti. Ūn e ag tóg inh ki ge sór mũ nĩ, hã ra ù tỹ ag mỹ tónh ke tóg tũ tĩ,” he tóg. “Hã kỹ Topẽ mré vĩmnĩ, ti tỹ ù ag jẽgnẽn jé, ag tỹ ag mỹ tugtón jé, ti vĩ ti,” he tóg, Jesus ti, ã mré mũ tĩ ag mỹ.

³ “Ha mũjẽg. Ha vé, carneiro krẽ vỹ vẽnh jy nĩgãn ki kagtĩg nỹtĩ, mĩg tỹ ag mãn sór kỹ. Mé krẽ ẽn ri ke ãjag nỹtĩ, hã ra sóg ãjag jẽgnẽg mũ, kỹ Topẽ vỹ ãjag jy nĩgãn mũ,” he tóg.

⁴ “Kỹ ãjag mũn kỹ saco ma mũ tũg nĩ, bolso ẽn, jãnkamy tũ ke gé, pẽn né vẽnh kafã gé(g) mũ tũg nĩ gé, pẽn to ró ẽn. Kỹ ãjag tỹ ù ven kỹ ti mỹ: “ã mỹ há?” he tũg nĩ gé. Jatun mỹ mũmnĩ,” he tóg.

⁵ “Kejẽn ãjag tóg ẽmã ù tá junjun ke mũ. Kỹ ãjag tỹ ĩn ù ra ge kỹ tá ke fag mỹ: “Topẽ jé ãjag ki rĩr, kỹ ãjag jé jatun mỹ nỹtĩ nĩ,” hemnĩ fag mỹ,” he tóg, Jesus ti, ag mỹ.

⁶ “Kỹ tá ke ù tỹ inh ki rã kỹ tóg jatun' he mũ sir, ti tỹ tỹ Topẽ kósin nĩn kỹ. Tá ke ù tỹ inh ki rã jãvãnh nĩn kỹ tóg jatun' he tũ nĩ sir. Ti jãvo ãjag tóg jatun' he mũ sir inhhã.

⁷ Īn ẽn krẽm nũgnũrmnĩ, ãjag tỹ kãra ge ja ẽn krẽm. Fag tỹ ãjag mỹ nén nĩm mũ ẽn komnĩ gé. Ūn rãnhraj han mũ ẽn tóg ti kaja venh ke mũ, ti rãnhraj kaja ti, hã kỹ ag tóg ãjag jẽn ke mũ sir, vẽnh kaja jé. Īn ù kãra ge tũg nĩ, ẽmã ẽn tá.

⁸ Ājag tỹ ẽmã ù tá junjun kỹ ĩn pir krẽm nỹtĩmnĩ, tá ke ag tỹ ãjag mỹ: “kãge ra,” hen kỹ. Ag vỹjẽn hã komnĩ.

⁹ Ūn kagyga ag tỹ há' hemnĩ. Ag mỹ: “Topẽ vỹ tỹ ãjag pã'i nĩnh mũ, ūn ri,” hemnĩ.

¹⁰ Kejẽn ẽmã ù tá ke ag tóg ãjag mỹ: “kãge ra,” he jãvãnh nỹtĩnh mũ. Kỹ ẽmã ẽn fĩn rãm kỹ ag mỹ tag tómnĩ, ha mẽ:

¹¹ “ha vé, ẽg pẽn nug hã kykũnh ẽg tóg mũ, ãjag tỹ ẽg kavénh tũ nĩ jé,” hemnĩ. “Ge ra ẽg tóg ãjag mỹ tó mũ, ẽg tỹ ãjag mỹ nén tónh kãmũ jan ki, hã vỹ: “Topẽ vỹ tỹ ẽg pã'i nĩnh mũ, ūn ri,” he mũ,” hemnĩ ag mỹ,” he tóg, Jesus ti.

¹² “Ha mẽ, kurã tỹ ẽgno ki ag tóg vỹsyrénh ke mũ, ag tỹ ãjag vĩ mẽ jãvãnh kỹ. Cidade tỹ Sodoma tá ke ag vỹsyrénh kãfór han jé ag tóg ke mũ, kurã ẽn kã, ha vemnĩ,” he tóg, Jesus ti, ag mỹ.

*Jesus tỹ ù ag mỹ vĩ kónãn
(Mt 11.20-24)*

¹³ Kỹ tóg: “sỹ cidade tỹ Corazim ki ke ag mỹ tag tó sór mũ, ha mẽ,” he mũ. “Kórég ve jé ãjag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ gé,

ha mẽ. Kórég ve jé ãjag tóg ke mũ gé,” he tóg. “Ëg tỹ nén han vãnh tỹ hên ri ke hyn han isóg ãjag mẽ, milagre tỹ hên ri ke, hã ra ãjag tóg ãjag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg ãg tỹ nén han vãnh ãn hyn han tũ nĩ. Sỹ tá milagre hyn han mũ ra ag tóg ãjag jykre kórég tovãnh mũ vễ, vãsỹ,” he tóg. “Ãjag jykre pãno to ag jykren ke mũ vễ, kygfỹ ag mũ vễ, ag mẽ ti e tĩnh mũ vễ, sỹ ag mẽ tó mũ ra. Ag jãvo ãjag tóg tovãnh sór tũ nĩ, to jykren sór tũ pẽ nĩ,” he tóg, Jesus ti.

¹⁴ “Tiro tá ke ag vỹ vễsỹrénh kãn ke mũ, kurã tỹ ãgno ãn ki, Sidom tá ke ag ke gé, ag jykre pãno to. Ag vễsỹrénh kãfór han jé ãjag tóg ke mũ jãvo, ha mẽ,” he tóg, Corazim tá ke ag to, Betsaida tá ke ag to ke gé.

¹⁵ Kỹ tóg: “sỹ cidade tỹ Cafarnaum ki ke ag mẽ tag tó sór vễ, ha mẽ,” he mũ. “Ûri tóg ver ãjag mẽ sér tĩ,” he tóg. “Kanhkã ve jé ãg tóg ke mũ,” he ãjag tóg tĩ, ón kỹ. Hã ra ãjag tóg nũgme ki vár ke mũ jãvo, inferno ki,” he tóg, Jesus ti. Ti tỹ ã vỹ jẽmẽ jãvãnh mũ ag mẽ vi kónãn hã vễ.

¹⁶ Kỹ tóg ã mré ke ag mẽ tag tó mũ. “Û tóg ãjag vỹ mẽ sór mũ, ha vemnĩ,” he tóg. “Kỹ tóg sir inh vỹ mẽg mũ gé, ti tỹ ãjag vỹ mẽn kỹ. Û tóg ãjag vỹ mẽ sór tũ nĩ, ha vemnĩ. Kỹ tóg inh vỹ mẽnh ke tũ nĩ gé. Ti tỹ inh vỹ mẽnh ke tũ nĩn kỹ tóg ã tỹ inh jẽnẽg mũ ãn vỹ mẽnh ke tũ nĩ gé sir, Topẽ vỹ ti,” he tóg, Jesus ti. Ti tỹ ã mré mũ tĩ ag mẽ tón hã vễ, ag tỹ ti vỹ kãmén mũ jé, kór há mĩ, kuvar há mĩ.

Kỹ ag tóg sir mũ mũ, ã tỹ 70 (ke) ãn ag.

Û tỹ 70 (ke) ag tỹ Jesus to vỹnvỹn ke

¹⁷ Kejẽn ag tóg ti to vỹnvỹn ke mũ, kỹ ag tóg ti mẽ vỹ sér han mũ sir. “Senhor’,” he ag tóg mũ. “Vãnh jagrẽ kórég ag vỹ ãg vỹ ki han tĩ. ã jiji tó kỹ ãg tóg ag mẽ vỹ tĩ, kỹ ag tóg ki hã han tĩ,” he ag tóg mũ, Jesus mẽ.

¹⁸ Kỹ tóg ag mẽ: “vãsỹ inh Japo vé, ti tỹ kanhkã tá kãtẽre kỹ,” he mũ. “Ti fĩn rãm sóg, hã kỹ sóg ti fón. Ta tỹ kómkóm ke ri ke nĩ ja ti nĩ, ti kutẽ ja ãn ti.

¹⁹ Ti kri ke vỹ tỹ inh nĩ. Ha vé, ãjag to sóg vãsãn mũ, pỹn tỹ ãjag kókén tũ nĩ jé, ãjag tỹ ti sãn mũ ra, pỹn kakrã ke gé, Nén-Kórég kar ag ke gé. Û vỹ ãjag kókén ke tũ pẽ nĩ gé.

²⁰ Hã ra tag to mẽ há nỹtĩ tũg nĩ ver. Tag vỹ tỹ nén ã tũ nĩ ver. Vãnh jagrẽ kórég vỹ ãjag vỹ han, vãnh kuprĩg ke gé. Hã ra tag to mẽ sér nỹtĩ tũg nĩ. Nén ã vỹ há pẽ nĩ, kỹ tag hã to mẽ sér nỹtĩmĩ. ãjag jyjy vỹ ránrán kỹ nỹtĩ, Topẽ livron ki, kanhkã tá, ãjag tỹ kanhkã tá junjun jé. Kỹ tag hã to mẽ sér nỹtĩmĩ,” he tóg, Jesus ti.

Jesus tỹ ãn kãsir ag to há (Mt 11.25-27; 13.16-17)

²¹ Kỹ tóg Jesus mẽ sér tĩ, hora ãn kã. Topẽ kuprĩg tỹ ti krĩn kỹ tóg ti mẽ sér tĩ: “jóg’,” he mũ. “Tỹ ã tóg kanhkã tãn ag kãfór kar nĩ, kar ã tóg tỹ ãprã ke ag kãfór nĩ gé,” he tóg. “Inh mẽ tóg há tĩ, ã tỹ nén han mũ ti. Û tỹ: “ki kanhró mág inh nĩ,” he mũ ag mẽ ã tóg ã jykre ven ja tũ nĩ. Ag mẽ ã tóg kãmén ja tũ nĩ. Û tỹ gĩr ri ke ki kagtĩg ag hã mẽ ã tóg ven ja nĩ, ã jykre ti,” he tóg. “Hỹ, hã vễ. ã tỹ nén to jykren mũn hã vễ, hã kỹ ã tóg ag hã mẽ ã jykre ti nĩm. Hã ra tóg há tãvĩ nĩ, jóg’,” he tóg, Jesus ti.

²² Kỹ tóg ã mré mũ tĩ ag mẽ: “inh jóg tóg inh mẽ tovãnh kãn, ã tỹ nén han ja kar ti,” he mũ. “Kỹ ã pi(jé) ti kósin ki kanhró nĩ. Inh jóg ne inh ki kanhró nĩ. Kỹ ã pi(jé) inh jóg ki kanhró nĩ gé. Inh hã ne ti ki kanhró nĩ, isỹ tỹ ti kósin nĩn kỹ. Hã ra sóg ãjag mẽ ti kãmén jé kãtĩ mũ, inh jóg ti. Isỹ tag to ãn kuprẽg mũ ag hã mẽ sóg ti kãmén tĩ, inh jóg ti,” he tóg, Jesus ti.

²³ Kỹ tóg ã mré mũ tĩ ag mẽ nén ã kãmén mũ gé. Vyrmỹ tóg ag mẽ ke mũ, kỹ tóg: “ãjag hã ne vэг mũ’, Topẽ jykre ti, hã kỹ Topẽ tóg ãjag ve há han mũ,” he mũ. “Sér pẽ ti tĩ, ã tỹ ti jykre vэг mũ ag mẽ,” he tóg, Jesus ti.

²⁴ “Ki hã sóg tó mũ, ha mẽ. Û tỹ hên ri ke ag vỹ inh ve sór tãvĩ ja nỹtĩgtĩ, vãsỹ, ãjag tỹ ãri nén vэг mũ tag ti. Hã ra ag tóg inh mur ken jo kãgter kãn. Topẽ vỹ tó tĩ ag ja vễ, pã’i mág ag ja vễ, hã kỹ ag tóg ãjag tỹ nén vэг mũ ve sór tãvĩ ja nỹtĩgtĩ. Hã ra ag tóg ve ja tũ nĩ, mẽ ja tũ ag tóg nĩ gé, ãjag tỹ ãri nén mẽg mũ ti. ãjag hã ne mẽg mũ inhhã’,” he tóg, Jesus ti, ti mré mũ tĩ ag mẽ.

Samaria tá ke to comparação

²⁵ Kỹ vãhã Topẽ vỹ to professor ã vỹ ag kãmĩ jẽgnẽ mũ, kỹ tóg Jesus ki jẽmẽ sór mũ. Ti tỹ ón kỹ ti vỹ mẽ sór vễ, hã kỹ tóg ti mẽ:

“Senhor’,” he mũ. “Inh h̄n h̄ ri kenh mũ, is̄y r̄r kr̄ȳg ja tũ ve jé?” he tóg, Jesus m̄y.

²⁶ K̄y Jesus tóg ti m̄y: “ne n̄y h̄n rán k̄y n̄i, Topẽ v̄i ki?” he mũ. “Topẽ jykre t̄y ne han jé ã ke mũ h̄n’?” he tóg. “To ke há ã tóg n̄i, ha inh m̄y tó,” he tóg.

²⁷ K̄y tóg ti m̄y: “Topẽ v̄y t̄y ã kri ke n̄i, k̄y ti h̄a to há n̄imn̄i, ti ki r̄a há han n̄i, ti to jykre pir n̄imn̄i, ti to tar n̄imn̄i, ti m̄y ã t̄y n̄én han mũ kar ãn han n̄i, ha mẽ. K̄y ã régre kar ki r̄r n̄imn̄i gé, ã t̄y v̄énh ki r̄r há han ri ke. Topẽ t̄y n̄én tón h̄a v̄e,” he tóg, Topẽ v̄i to professor ti.

²⁸ K̄y Jesus tóg: “h̄y,” he mũ. “Ki h̄a ã tóg tó mũ,” he tóg. “Tag han ra, k̄y ã tóg r̄r kr̄ȳg ja tũ venh ke mũ,” he tóg.

²⁹ H̄a ra tóg ti m̄y há tũ n̄i, Jesus v̄i tag ti, h̄a k̄y tóg ti m̄y: “k̄y ã n̄y t̄y inh régre n̄i?” he mũ.

³⁰ K̄y Jesus tóg ti m̄y tag tó mũ, ha mẽ. “Kej̄n ã tóg n̄igt̄i. H̄a ra tóg Jerusalém tá k̄at̄ig k̄y Jericó ra t̄i mũ. Ēpry jagma, ěm̄n jagma ãn jykre kórég ag tóg ti jo v̄ajig mũ, bandido ag. K̄y ag tóg ti k̄agm̄i k̄y ti kur kunũg mũ. Ti mr̄anmr̄an ag tóg mũ. Ti tén kren ag tóg mũ, k̄y ag tóg h̄a ki ti tov̄anh kar mũ mũ sir, ti tũ m̄an k̄an k̄y. K̄y tóg tá n̄y n̄i sir.

³¹ Ti t̄y tá n̄y ra ã tóg ěpry ěn jagma k̄at̄i mũ gé. Topẽ tũ ki r̄r t̄i ã v̄e. Ti vég tóg mũ, ãn v̄es̄yr̄énh k̄y n̄y ěn ti, h̄a ra tóg ti venh r̄a tũ n̄i. ěm̄n jagma tóg t̄i mũ.

³² K̄y v̄ah̄a Levi kr̄e ã tóg ěpry jagma k̄at̄i mũ gé. Tá jun k̄y tóg ti vég mũ gé, h̄a ra tóg ti venh r̄a tũ n̄i gé. ěm̄n jagma tóg t̄i mũ gé sir.

³³ K̄y v̄ah̄a Samaria tá ke ã tóg ěpry jagma k̄at̄i mũ gé. K̄y tóg tá jun mũ, k̄y tóg ti vég mũ.

³⁴ K̄y tóg ti venh r̄a mũ inhh̄a. Ti kygt̄ag tóg mũ sir, azeite t̄y, vinho t̄y ke gé, ti m̄y to t̄in k̄y. Ā kur t̄y tóg ti p̄ag mũ sir. K̄y tóg ã m̄eg kri ti n̄im mũ, ã t̄y ti ma t̄ig jé. H̄a k̄y tóg ag t̄y ĩn kr̄em n̄ur jaf̄a tá jun mũ sir. K̄y tóg tá ti ki r̄r mũ.

³⁵ T̄y vaj k̄y tóg t̄ig m̄an sór mũ, h̄a k̄y tóg ã t̄y ĩn ki r̄r mũ ěn m̄y j̄ankamy régre vin mũ, k̄y tóg ti m̄y: “ti ki r̄r há han,” he mũ. “J̄ankamy tag t̄y ã m̄y tá kr̄ȳg t̄un k̄y sóg ã m̄y kaj̄am m̄an mũ, s̄y v̄yn ken k̄y,” he tóg.

“Kaj̄am k̄an jé sóg ke mũ, s̄y v̄yn ken k̄y,” he tóg, Samaria tá ke ěn ti. Ti t̄y ãn kaga ki r̄r mũn h̄a v̄e,” he tóg, Jesus ti.

³⁶ K̄y tóg: “k̄y ãn t̄agtũ ag v̄y ti ve ja n̄i. Ag k̄a ã t̄y h̄e n̄y t̄y ti régre ja n̄i, ag t̄y ãn vóg kón̄an ja ěn régre? Ha to jykr̄én (ke)ma’,” he tóg, Jesus ti, Topẽ v̄i to professor ěn m̄y.

³⁷ K̄y ã t̄y ti ki j̄em̄eg mũ ěn tóg ti m̄y: “ũ t̄y ti jaḡagt̄an mũ ěn v̄y t̄y ti régre ja n̄i,” he mũ.

K̄y Jesus tóg ti m̄y: “h̄y, tó há han ã,” he mũ. “K̄y ěn ri ke han n̄i. Ān v̄es̄yr̄énh mũ ag jaḡagt̄an k̄an n̄i, ti ri k̄én,” he tóg, Jesus ti. Ti t̄y ã t̄y ón k̄y ti ki j̄em̄eg mũ m̄y tón h̄a v̄e.

Jesus t̄y Maria mr̄e Marta fag venh t̄ig

³⁸ Kej̄n ag tóg mũ mũ, Jesus ag, k̄y ag tóg ěm̄a s̄i ã ki junjun mũ. Tá ã fi tóg n̄i n̄i, fi j̄ijin h̄a v̄y: Marta, he mũ. ěn fi v̄y Jesus m̄y: “inh ĩn k̄ara ge j̄eg, ãjag t̄y ěg mr̄e n̄yt̄i jé,” he mũ.

³⁹ K̄y fi j̄avy fi v̄y n̄i gé, h̄a v̄y: Maria, he mũ. K̄y Maria fi v̄y Jesus mr̄e n̄i n̄i, ti v̄i j̄em̄e jé.

⁴⁰ H̄a ra Marta fi v̄y r̄anhr̄aj (ka)m̄e n̄i, Jesus ag m̄y v̄ej̄en han jé. J̄avo Maria fi tóg n̄i n̄i.

K̄y Marta fi tóg Jesus m̄y: “Senhor’,” he mũ. “R̄anhr̄aj m̄ag han t̄i sóg n̄i, h̄a ra fi tóg n̄i n̄i. Fi m̄y ké, fi t̄y inh mr̄e v̄ej̄en ki r̄r jé,” he fi tóg mũ.

⁴¹ H̄a ra Jesus tóg fi m̄y: “kr̄i kufy ã tóg n̄i, n̄én ã tũ to, h̄a ra fi tóg inh v̄i j̄em̄eg n̄i n̄i,” he mũ, Marta fi m̄y. “V̄ej̄en to v̄énh kut̄an t̄ug n̄i.

⁴² N̄én ã pir h̄a ne há n̄i’, h̄a v̄y: inh v̄i, he mũ. Maria fi v̄y inh v̄i h̄a j̄em̄e sór mũ, k̄y sóg fi m̄y: “ha n̄én ã han,” he j̄av̄anh n̄i. N̄én ã há kupr̄eg fi tóg, fi t̄y inh v̄i m̄e sór k̄y,” he tóg, Jesus ti, Marta fi m̄y.

11

Ēg t̄y Topẽ mr̄e v̄em̄én (Mt 6.9-15; 7.7-11)

¹ Kej̄n tóg Topẽ mr̄e v̄i mũ, Jesus ti, ěm̄a ã tá n̄i k̄y. Ti t̄y Topẽ mr̄e v̄em̄én kar k̄y ti mr̄e mũ t̄i ag tóg ti mr̄e v̄inh k̄amũ mũ. K̄y ag tóg ti m̄y: “Senhor’,” he mũ. “Ēg kanhr̄an n̄i, ěg t̄y Topẽ mr̄e v̄i há han jé. João v̄y ã mr̄e mũ t̄i ag kanhr̄an. Ge ki ěg kanhr̄an n̄i gé,” he ag tóg, Jesus m̄y.

² Kÿ tóg ag kanhrân kÿ ag mÿ:
 “Topê mré vÿ kÿ tag tómnÿ, ha mẽ,” he mũ.
 “Ëg jóg mág, ã jyjy tó ãg tóg tÿ.
 Kÿ vênh kar jé ã tÿ tÿ ùn mág nÿ vé.
 Ëg jé kânmar ã tÿ tÿ ãg pã'i nÿ vé.
³ Ëg mÿ ãg jên ti nÿm, kurã kar ki, ãg tÿ kurã
 kar ki ko tÿ ên.
⁴ Kÿ ãg mÿ vênh pãte fón nÿ, ãg tÿ ã vÿ mranh
 ja ti, hã jé ãg tóg ãg tÿ jagnê to jÿ tÿ
 jagnê mÿ vênh pãte fón ke mũ gé.
 Kÿ ãg tÿ ã vÿ mranh sór kÿ ãg kren han nÿ,
 ãg tÿ mranh tÿ nÿ jé,” hemnÿ,” he tóg,
 Jesus ti.

⁵ Kÿ tóg ag mÿ ãg tÿ Topê mré vémén tÿ ên
 kãmén măn mũ. Kÿ tóg ag mÿ: “kejên ù tóg
 nÿgtÿ,” he mũ. “Kuty si há tá tóg ã régre ãn ki
 jun mũ. Kÿ tóg ti mÿ: “régre’,” he mũ. “Inh
 mÿ êmÿ tâgtÿ nÿm, sÿ kar ã mÿ ti ri kén kÿ
 nÿm jé,” he tóg.

⁶ “Inh mré ke ù vÿ jun. Kór há tá tóg kãtÿg,
 kuvar há tá. Hã ra sÿ ti mÿ ne han ke tóg tÿ
 tÿ,” he tóg, ã régre mÿ.

⁷ Kÿ ti régre tóg ti mÿ: “hã ra sóg nÿr nÿ
 nÿ,” he mũ. “Kar inh krê tóg inh mré nÿgnÿr
 nÿtÿ gé. Jãnkã vÿ nÿfénh kÿ jê nÿ. Hã kÿ tóg
 inh mÿ vênhmÿ tÿ, inh nÿnh ke mũ ra, sÿ ã
 mÿ êmÿ nÿm jé. Û ki jãvãnh,” he tóg ti mÿ.

⁸ Hã ra tóg sir to vÿ măn', to vÿ măn' he mũ.
 Hã kÿ tóg nÿ kÿ ti mÿ nÿm mũ sir, ti tÿ ti mÿ
 êmÿ to vÿ mũ ti. Ti régre vê, ù tÿ ti mÿ to vÿnh
 kãtÿ mũ ti. Ge ra tóg ti mÿ nÿm ke tÿ nÿ vê, ti
 tÿ tÿ ti régre ra. Ti tÿ ti mÿ to vÿ măn', to vÿ
 măn' he tugrÿn tóg sir ti mÿ nÿm mũ jãvo. Ëg
 tÿ Topê mré vÿ ri ken hã vê,” he tóg, Jesus ti.

⁹ “Ha mẽ, sÿ ãgag mÿ nén tó mũ tag ti. Topê
 mÿ nén kar to vÿmÿnÿ, kÿ tóg ãgag mÿ han mũ
 sir. ãgag tÿ ti mÿ nén ù to vÿ mũ ên jãvãnh nÿ,
 kÿ ãgag tóg venh ke mũ sir. Ti mré vÿ kÿ ãg
 tÿ ti jãnkã tÿ tórón tórón ke ri ke han nÿ, kÿ
 tóg ãgag mÿ ti róm ri ke han mũ, ti tÿ ãgag mÿ
 ãgag tÿ nén to vÿ mũ ên han kÿ.

¹⁰ Hÿ, hã vê. ãgag tÿ ti mÿ nén to vÿnh kÿ
 tóg ãgag mÿ han mũ. ãgag tÿ ti jãvãnh kÿ ãgag
 tóg venh ke mũ. ãgag tÿ ãg tÿ jãnkã tÿ tórón
 tórón ke ri ke han kÿ tóg ãgag mÿ ti róm ri ke
 han mũ.

¹¹ Kejên ãgag kósin tóg ãgag mÿ pirã to vÿ
 mũ. Kÿ ãgag pi(jé) ti mÿ pÿn nÿm ke mũ'. Pirã
 hã nÿm jé ãgag tóg ke mũ.

¹² Kejên tóg ãgag mÿ garÿnh ovo to vÿ mũ,
 ãgag kósin ti. Kÿ ãgag pi(jé) ti mÿ pÿn kakrã
 nÿm ke mũ'. Garÿnh ovo hã nÿm jé ãgag tóg ke
 mũ.

¹³ Jykre pãno ãgag nÿtÿ. ãgag jykre pãno
 (hã) ra ãgag tóg ãgag krê mÿ nén ù há nÿm tÿ.
 Ge ti nÿ gé, ãgag tÿ Topê mÿ nén ù to vÿnh kÿ.
 Nén ù há hã nÿm jé tóg ke mũ. Hã ra tóg ãgag
 kãfór han tÿ, ãg jóg tÿ kanhkã tá nÿ ti. ãgag tÿ
 ti mÿ to vÿnh kÿ tóg ãg kuprÿg tÿ ãgag jagrê han
 ke mũ mÿr, Topê ti,” he tóg, Jesus ti.

*Jesus tÿ Topê jykre hã han kÿ tar nÿ
 (Mt 12.22-30; Mc 3.20-27)*

¹⁴ Kejên tóg ùn jagrê kórég mÿ ti jagrê
 kutêm mũ. Ti vÿ vãnhan ja tóg nÿ, ti jagrê
 ti. Jesus tÿ ti kutêm kar tóg vÿ há nÿ sir. Kÿ
 tóg vênh kar mÿ e tÿ sir, ag mÿ tóg sér tÿ sir.

¹⁵ Hã ra ù ag tóg ti to: “jagrê kórég ti nÿ,”
 he mũ. “Nén-Kórég ag pã'i vÿ tÿ ti jagrê nÿ,
 Satanás ên, Belzebu he mũ ên,” he ag tóg
 mũ, ón kÿ. “Hã kÿ tóg Nén-Kórég ag pan tÿ,
 ag jagrê kórég ag. Nén-Kórég ag pã'i jykre tÿ
 tóg ag pan tÿ,” he ag tóg ón kÿ, Jesus to.

¹⁶ Hã ra ù ag tóg ón kÿ ti jykre ve sór mũ
 gé, kÿ ag tóg ti tÿ ãg tÿ nén han vãnhan mũ
 ve sór mũ sir, ti tÿ ag mÿ kanhkã jykre ven
 jé.

¹⁷ Hã ra Jesus tóg ki kanhró nÿ, ag tÿ nén
 to jykren mÿn ki. Hã kÿ tóg ag mÿ: “pã'i pir
 krêm ke ag tÿ jagnê kato tên kÿ ag tóg jagnê
 kãgtén kãn ke mũ,” he mũ. “In pir krêm ke
 fag tÿ jagnê kato tên kÿ fag tóg jagnê kãgtén
 kãn ke mũ gé sir.

¹⁸ Ge ti nÿ, Nén-Kórég ag jykre ti. Nén-
 Kórég ag tÿ jagnê kato tên kÿ ag tóg jagnê
 tÿ tÿ' henh mũ gé vê, Satanás ag. Hã kÿ tóg
 vênhmÿ nÿ, ãgag vÿ ti, ãgag tÿ iso: “Satanás
 jykre tÿ, Belzebu ên jykre tÿ tóg Nén-Kórég
 ag pan tÿ,” he mũ ti. Ag tÿ jagnê kato tãgtê
 to ken hã vê sir, ha mẽ,” he tóg, Jesus ti.

¹⁹ “Belzebu jykre tÿ tóg ag pan mũ, Nén-
 Kórég ag,” he ãgag tóg tÿ iso. ãgag mré ke ag
 to jykren nÿ. Nén-Kórég ag pan ag tóg tÿ gé,
 ãgag mré ke ag. Ag pi(jé) Satanás jykre ki ag
 pan tÿ'. Topê jykre ki ag tóg ag pan tÿ (mÿr')
 ãgag tÿ tag to jykren kÿ ãgag tóg inh jykre há
 ki kanhrân ke mũ vê,” he tóg ag mÿ, Jesus ti.

²⁰ “Topê kuprÿg jykre tÿ sóg Japo ag pan
 tÿ mÿr, ha mẽ. Topê kuprÿg tÿ Japo ag pan

kãn kÿ Topẽ tóg tÿ êg pã'i nĩ vễ, mÿr. Tag to jykren nĩ," he tóg, Jesus ti.

21 "Ủ tÿ é he (ka)mẽ ag tóg ãjag tũ ki rĩr há han ti. Ag rógro vÿ jêgtĩ, kÿ ag tóg ãjag ãn ki rĩr tĩ sir, ù tÿ ag tũ mæg tũ nĩn jé. Kÿ ù tóg ag tũ vóg ke tũ nĩ gé, ag tÿ ki rĩr há han kÿ.

22 Kejẽn ù tóg ù tóg ù tÿ é he (ka)mẽ ên in tá jun mũ, ù tÿ ti tar kãfór nĩ ti. Ti rará kãfór nĩn kÿ tóg ti tÿ hẽn ri kenh mũ sir. Kÿ tóg ti rógro væg mũ. Ti tÿ ùn kãgtén jafã væg tóg mũ, kÿ tóg ti tũ mãn kãn mũ gé sir. Ge ti nĩ, isÿ nẽn han mũ ên ti. Ủ tÿ é he (ka)mẽ ri ke ti nĩ, Japo ti, hã ra sóg ùn tar ên ri ke nĩ," he tóg.

23 "Ãjag tÿ tÿ inh mré ke tũ nÿtĩn hã kÿ ãjag tóg inh kato tẽgtẽ mũ. ãjag tÿ inh mré êprã ke ag tÿ Topẽ to kãmũ han tũ nĩn kÿ ãjag tóg ag kãmũ kamẽg mũ," he tóg.

*Vẽn h jagrẽ kórég vÿn kenh ke
(Mt 12.43-45)*

24 "Kejẽn sóg vẽn h jagrẽ kórég ù kutẽm mũ. Kÿ tóg ga kórég mĩ tĩ mũ, ti jagrẽ ên ti. Goj venh ke tũ tóg nĩ, tá. Vẽn h kãn ke tũ tóg nĩ gé, ti tÿ hẽ ri ken kÿ vẽn h kãn ke tũ tĩn kÿ. Kÿ tóg vãhã to jykren mũ sir. "Inh hÿn ên ra tĩg mãn ha, sÿ ù tá kãkutẽ ja ên ra. Inh mÿ tóg tÿ ãn ri ke ja nĩ, kÿ inh jé hÿn ti kãra rã mãn ha," he tóg mũ, ti jagrẽ ên ti.

25 Kÿ tóg ti venh kãtĩ mũ. Hã ra tóg sir krĩ há nĩ. Kÿ tóg ti mÿ ãn há ri ke nĩ sir, ãn prur, ãn sĩnvĩ ri ke.

26 Kÿ tóg Nẽn-Kórég tÿ 7 (ke) ag mÿ tónh tĩ mũ sir. "Ha kãmũ jêg," he jé tóg ke mũ. Hã ra ag jykre pãno tóg ti jykre pãno kãfór nĩ. Kÿ ag tóg sir ù ên kãge ge mũ, tÿ ag tóg ti jagrẽ nÿtĩ sir, isÿ ùn mÿ ti jagrẽ pir kutẽm ja ên ti. Hã kÿ tóg kórég tãvĩ nĩ sir. Ti jagrẽ kórég pir kutẽm inh nĩ vễ, hã ra ù tÿ 8 (ke) ag tóg tÿ ti jagrẽ nÿtĩ, ti tÿ inh ki rã tũ nĩn kÿ," he tóg, Jesus ti. Ti tÿ ag mÿ vẽn h jagrẽ jykre tón hã vễ.

Topẽ tÿ êg ve há han ke

27 Kÿ ù tÿ ti vĩ mæg mũ ù fi tóg prẽr mũ sir, fi tÿ ti vĩ tag mẽ kÿ. ùn e ên kãmĩ fi tóg jẽ nĩ, kÿ fi tóg ti mÿ ke mũ. "!.Topẽ vÿ ã mÿnh fi ve há han, fi tÿ ã han tugrĩn, fi tÿ ã pafãm tugnen..!" he fi tóg, prẽr kÿ.

28 Kÿ Jesus tóg fi mÿ: "hÿ," he mũ. "Hã ra Topẽ vÿ ã ve há han ke mũ gé, ã tÿ ti vĩ jẽmẽn

kÿ. Hã kÿ ã tÿ ti vĩ mẽ kÿ ke króm nĩ, kÿ tóg ã ve há tãvĩ han ke mũ," he tóg, Jesus ti, ù tÿ prẽr mũ ên fi mÿ.

*Jesus tÿ ón kÿ milagre han ke tũ
(Mt 12.38-42)*

29 Hã ra ù tÿ hẽn ri ke ag tóg sir tá junjun mũ, ti vĩ mẽ jé. Kÿ tóg fór tãvĩ tĩ. Kÿ Jesus tóg ag mÿ: "kórég ãjag nÿtĩ," he mũ. "Ón kÿ ãjag tóg nẽn han vãn h ve sór mũ. Venh ke tũ ãjag tóg nĩ. Nẽn ù pir hã ve jé ãjag tóg ke mũ, hã vÿ: Jonas tÿ nẽn ve ja ên ri ke, he mũ," he tóg.

30 "Jonas vÿ cidade tÿ Nínive tá ke ag mÿ Topẽ vĩ tó ja nĩ, kÿ ag tóg ti vĩ mẽ há han ja nĩ. Ên ri ke han jé sóg ke mũ, ãjag mÿ. Tÿ sóg êprã ke fi kósĩn ên nĩ," he tóg.

31 "Kÿ pã'i mág ên fi, kãnhkã tãpér tÿ sul tá kãtĩg ja ên fi, tá tá kãtĩg ja ên fi vÿ nĩnh ke mũ gé, kurã tÿ êgno ki, sÿ vẽn h kar jykre venh ke kurã ên ki. ãjag mré fi tóg jẽn h mũ, kÿ Topẽ tóg ãjag mÿ vĩ kónãn ke mũ, fi ve kÿ. Kãnhkã fyr ja tá fi tóg kãtĩg ja nĩ, vãsÿ, fi tÿ pã'i mág tÿ Salomão vĩ mẽ jé. Salomão kãfór vÿ tÿ inh nĩ, hã ra ãjag tóg inh vĩ mẽ jãvãn nÿtĩ fi jãvo," he tóg.

32 "Kÿ Topẽ vÿ Nínive tá ke ag ve kÿ ãjag mÿ vĩ kónãn ke mũ gé, kurã tÿ êgno ên ki, ha vemnĩ. Nínive tá ke ag tÿ Jonas vĩ mẽ kÿ ag tóg ãjag jykre togvãn h ja nĩ. Tÿ sóg Jonas kãfór nĩ, hã ra ãjag tóg ãjag jykre togvãn h jãvãn h nÿtĩ, sÿ ãjag mÿ tó tĩ (hã) ra," he tóg, Jesus ti.

*Jẽngrẽ ri ke êg nÿtĩ
(Mt 5.15; 6.22-23)*

33 "Êg tÿ lampião grug kÿ êg pi(jé) ãn krẽm péju kÿn fẽg tĩ', êg pi(jé) kěj krẽm fẽg tĩ'. Tĩ fẽg jafã kri êg tóg fẽg tĩ, lampião gru ti. Kÿ êg tóg ti gru tÿ ve há jêgtĩ, êg tÿ ãn kãtã kãmũ kÿ," he tóg, Jesus ti.

34 "Êg kanẽ hã tóg tÿ êg tÿ ve jafã nĩ. Kÿ tóg êg jo kurã han tĩ, êg kanẽ ti, ti há nĩn kÿ. Kÿ tóg êg jo kurã kar nĩ sir, êg kanẽ há nĩn kÿ. Êg kanẽ kórég nĩn kÿ tóg êg jo kuty ke kãn mũ sir. Kÿ tóg ge nĩ, êg jykre kórég ti. Êg kanẽ kórég ri ke ti nĩ, êg jo kuty han tóg tĩ.

35 Kÿ vẽn h kãnrãn nĩ. Ke tũ nĩ mũ ra tóg ãjag jo kuty ri ke nĩ. Vẽn h jykre kórég hã vễ. Kÿ vẽn h jykre kórég han sór tũg nĩ.

³⁶ Ājag jo kurā nīn kŷ tóg há tãvĩ nĩ, ājag jo kuty tũ nīn kŷ, ājag jo kuty sĩ tũ nīn kŷ ke gé. Ājag jykre há tãvĩ nīn kŷ tóg ājag jo kurā ri ke nĩ. Kŷ ājag tóg sir lampião gru ri ke nŷtĩ gé. Lampião gru mág nīn kŷ tóg kómkóm ke tĩ, ěg kanē jo, kŷ tóg ěg mŷ jēngrē há han tĩ. Ge ěg nŷtĩ, ěg jykre há tãvĩ nīn kŷ, ti kórég sĩ tũ nīn kŷ,” he tóg, Jesus ti. Ti tŷ ag mŷ Topē jykre há tón hã vē.

*Jesus tŷ ũn jykre régre ag mŷ vĩ kónãn
(Mt 23.1-36; Mc 12.38-40)*

³⁷ Ti tŷ ag mré vēmén kar Fariseu ũ tóg ti mŷ: “inh mré jēn kãtīg,” he mũ. Kŷ tóg ti mré tĩ mũ, ti mré jēn jé, Jesus ti.

³⁸ Hã ra Jesus tóg Judeu ag jykre han ja tũ nĩ, ag jēn jé ag tóg vēnh nīgpég tĩ. Kŷ tóg Fariseu ěn mŷ e tĩ. Kŷ tóg to jykren kónãn mũ sir.

³⁹ Kŷ Jesus tóg ki kanhró nĩ, kŷ tóg ti mŷ kãmén mũ. “Fariseu vŷ tŷ ājag nŷtĩ,” he tóg. “Kŷ ājag tóg copo ven ja kugpég tĩ, pénky ven ja ke gé, hã ra ti kãtã ke tóg kavéj nĩ. Kŷ ājag jykre vŷ ge nŷtĩ gé. Jykre há nĩ ve ājag tóg nŷtĩ, hã ra ājag tóg vēnh jykre pãno han tĩ, hã vŷ: jãnkamy to ag lograr he tĩ, he mũ, ājag prũ tũ fag mré nŷ, he mũ gé.

⁴⁰ Krĩ tũ pē ājag nŷtĩ. Ũ tŷ ěg ven ja han mũ vŷ ěg jykre han mũ gé mŷr. ěg jykre há nīn kŷ ěg ven ja vŷ há nĩ gé.

⁴¹ Ũ jagãgtãn ra, ājag tŷ nén ũ tŷ. Vēnh jykre há kar han ra, kŷ tóg ājag tŷ nén ũ kar jãnhkri nĩ ri ke nĩ sir,” he tóg.

⁴² “Fariseu’, Topē vŷ ājag ve kónãn. Ón kŷ ājag tóg Topē mŷ ājag jakré tŷ dízimo han kãn tĩ. Ājag jakré tŷ hortelã tŷ 10 (ke) nīn kŷ ājag tóg Topē mŷ ũn pir nīm tĩ, dízimo han kŷ. Ājag jakré tŷ arruda tŷ ājag tóg dízimo nīm tĩ gé, ājag jakré tŷ vēnh kagta kar tŷ mŷr, ājag tŷ nén ũ kar mré hã. Nén ũ kar tŷ ājag tóg dízimo vin tĩ, Topē mŷ. Hã ra ājag tóg vēnh jykre kuryj han tũ nĩ jãvo. Topē to há tũ ājag tóg nŷtĩ, ti vŷ jēmē jãvãnh ājag tóg nŷtĩ. Ājag tŷ ti tŷ ěg jyvēn ki króm mré hã ājag jakré tŷ dízimo vin ra tóg há tãvĩ nīnh mũ vē, ha mē. Hã ra ājag tóg ki króm sór tũ nīgtĩ,” he tóg.

⁴³ “Fariseu’, Topē vŷ ājag ve kónãn. Vēnh kanhrãn jafã krēm ājag tóg vēnh kãpãm kŷ nŷtĩ, vēnh kar tŷ ājag ve jé. Cidade kuju

tã ājag tóg mũgtĩ, kŷ vēnh kar tŷ ājag mŷ: “Senhor, ã mŷ há?” hen kŷ tóg ājag mŷ sér tĩ.

⁴⁴ Topē vŷ ājag ve kónãn mŷr. Vēnh kej si ri ke ājag nŷtĩ, vēnh kej to ró tũ ri ke. Kri mũ ag tóg tĩ, vēnh kar, kŷ ag tóg ki kagtīg nŷtĩ, ti tŷ tŷ vēnh kej nĩ ti. Kŷ ag tóg vēnh vatãnh tá vēnh kavénh tĩ. Tag ri ke ājag tóg nŷtĩ. Kŷ ājag krēm ke ag vŷ Topē vŷ mranh tĩ, ājag ven kŷ,” he tóg, Jesus ti, Fariseu ag mŷ.

⁴⁵ Kŷ Topē vŷ to professor ũ tóg Jesus mŷ: “ã tŷ Fariseu ag mŷ tag tó kŷ ã tóg ěg to vŷ kónãn tĩ nĩ gé, ag mré,” he mũ, ěg Senhor mŷ.

⁴⁶ Kŷ tóg: “ón kŷ Topē vŷ to professor’,” he mũ. “Hŷ, Topē vŷ ājag ve kónãn gé,” he tóg. “Vēnh kar mŷ ājag tóg vēnh jykre kufy nīm tĩ. Kufy jagy ti nŷ, vēnh jykre ěn ti, kŷ ājag tóg han sór tũ nīgtĩ. Ge ra ājag tóg ag mŷ: “ha ki króm,” he tĩ.

⁴⁷ Topē vŷ ājag ve kónãn mŷr. Ājag jóg’jóg ve ag vŷ Topē vŷ tó tĩ ag kãgtén. Jãvo ājag tóg ag kej ki rĩr há han tĩ.

⁴⁸ Hã ki ājag tóg ājag jóg’jóg ve ag tŷ ag kãgtén to: “há ti nĩ,” he tĩ. Hã ki tóg ājag mŷ há nĩ mŷr, ag tŷ ag kãgtén ja tugrĩn. Ag hã vŷ ag kãgtén ja nĩ, kŷ ājag hã nŷ ag kej ki rĩr há han tĩ,” he tóg.

⁴⁹ “Hã kŷ Topē vŷ ājag to vŷ ja nĩ. Ki kanhró ti nĩ, Topē ti, hã kŷ tóg ājag to vŷ kónãn ja nĩ, ha mē. “Inh vŷ tó tĩ ag jēgnē jé sóg ke mũ ag mŷ, isŷ ũn vin mũ ag ke gé, ag tŷ ag mŷ inh vŷ tó jé. Hã ra ag tóg ag vóg kónãn ke mũ, ag kãgtén jé ag tóg ke mũ,” he ja tóg nĩ, Topē ti.

⁵⁰ Ājag jóg’jóg ve ag vŷ ag kygrēn kãn, hã ra tóg ājag mŷ há tĩ, hã kŷ Topē vŷ to ājag vóg kónãn ke mũ. Ũ tŷ hēn ri ke ag kygrēn ag tóg, ājag jóg’jóg ve ag, Topē tŷ ēprã ke ag han kar kŷ.

⁵¹ Ti kãke tóg Abel tén. Ti nón ke ag kãgtén ja ag tóg nĩ gé, ājag jóg’jóg ve ag, Zacarias mré hã. Topē ĩn jãnkã krēm ag tóg ti tãnh, Topē mŷ nén ũ pũn jafã ěn ki, Zacarias ti. Topē tŷ jēgnēg mũ ag kãgtén tovãnh tũ pē ag nŷtĩ, ājag jóg’jóg ve ag. Hã ra tóg ājag mŷ há tĩ. Ājag tŷ ag kygrēn kãn ri ke ti nĩ. Ũn kãgter mũ tag jagfy kajãm kãn jé ājag tóg ke mũ, ha vemnĩ. Ājag mŷ sóg tó mũ mŷr,” he tóg, Jesus ti.

⁵² “Ón ký Topê ví to professor', Topê vỹ ãjag ve kónãn. Topê ví tỹ ãg kanhrãn mũ ên ki ge jãvãnh ãjag tóg nýtĩ mýr'. Ký ù tỹ ki rã sór mũn ký ãjag tóg ti mý tó kónãn tĩ, ti tỹ ki vãnh fón tũ nĩn jé. Ký tóg ãg tỹ ù jo ãn nĩfenh ên ri ke nĩ, ãjag tỹ ag tỹ Topê ki ge kamẽg ti,” he tóg, Jesus ti. Ti tỹ ù tỹ ón ký Topê ví to professor ag mý ví kónãn hã vê.

⁵³ Ti tỹ tag tó kar ký tóg hên ra tĩ mũ sir. Tag pãte Topê ví to professor ag tóg ti mré mũ ký ti tugnyĩm tĩ, Fariseu ag ke gé. Ag tỹ ti ví to ti se sór vê. Hã ký ag tóg ón ký ti ki jẽmẽgmẽg mũ.

⁵⁴ Ón ký ag tóg ti ví jẽmẽg tĩ gé sir, ag tỹ ti ví to ti kãgmĩn jé.

12

Ũn jykre régre ag (Mt 10.26-27)

¹ Hã ra ù tỹ hên ri ke ag vỹ vãnh mãn ký nýtĩ nĩ. E tãví ag tóg tĩ ha, mil tỹ hên ri ke ag. Ký ag tóg jagnẽ sãnsãn mũ sir, ag e nýtĩn ký. Ký Jesus tóg ag kanhrãnãn mũ. ã mré mũ tĩ ag kanhrãn vén tóg mũ, ký tóg ag mý: “Fariseu ag jykre han sór tũg nĩ,” he mũ. “Pão jẽgja jafã ri ke ti nĩ, ag jykre ti, hã ký tóg Topê mý kórég nĩ. Ag jykre hã vê, ha mẽ: jykre régre ag nýtĩ. Ký tag tóg Topê mý kórég tãví nĩ,” he tóg.

² “Ëg tỹ péju ký nén han mũ vỹ vãnh ven kãn ke mũ, ãg tỹ vãnh kar vatánh tá nén to jykren mũ vỹ vãnh ven kãn ke mũ, kurã tỹ ãgno ki,” he tóg.

³ “Ãjag tỹ vãnh kar vatánh tá vëmén ja ên mẽ kãn jé ag tóg ke mũ, vãnh kar. ãjag tỹ kékén ký nén tó ja ên tó kãn jé ag tóg ke mũ, jamã hár(a), ãjag tỹ ãn kãtá nén tó ja ên. Hã ký vãnh jykre régre han tũg nĩ,” he tóg.

Ëg tỹ ãprã pã'i ag kamẽg ke tũ (Mt 10.28-31)

⁴ “Ha mẽ, iso há ãjag nýtĩ. Ag kamẽg tũg nĩ, ù tỹ ãg tén tĩ ag, pã'i ag. Ag tỹ ãg tén kar ký ag tóg ãg tỹ hẽ ri kenh ke tũ nĩ sir. Hã ký ag kamẽg tũg nĩ.

⁵ ãjag mý sóg tónh mũ ha, ãjag tỹ ùn kamẽg ke ti, hã vỹ: Topê, he mũ. Ti hã ne ãg tén kar nũgme ki ãg vãm ki kanhró nĩ', mýr ha mẽ'. Ký ti hã kamẽg nĩ.

⁶ Sêsĩ vãm ag tóg tĩ, jãnkamy kato, ãg tỹ ko jé. Jêsĩ tỹ 5 (ke) kato ãg tóg jãnkamy pir mãg tĩ. Hã ra Topê pi(jé) ag kã jatun mũ'. Ag ki rĩr nĩ tóg nĩ, sêsĩ ên ag ki.

⁷ Ëg ki rĩr tóg nĩ gé, Topê ti. Ëg tỹ nén vэг mũ kar ki kanhró tóg nĩ. Hã ký tóg ãg gãnh ki kanhró nĩ gé. Nĩkren kãn ja tóg nĩ, Topê ti, ãg gãnh ti. Jêsĩ kãfór ãjag tóg nýtĩ, Topê mý. ãjag kãmĩ ùn pir tóg sêsĩ e kãfór nĩ, ti mý. Hã ký ag kamẽg tũg nĩ, ù tỹ ãg tén sór mũ ag,” he tóg.

Ëg tỹ Jesus kãmén ke (Mt 10.32-33; 12.32; 10.19-20)

⁸ “Hã ký sóg ãjag mý tag tó mũ. Ëprã ke ag mý: “tỹ sóg ti mré ke nĩ,” hemnĩ, iso. Ag kamẽg tũg nĩ. Ký sóg ãjag tónh ke mũ gé, Topê tỹ jẽnẽ jafã ag mý, kurã ên kã, ãjag tỹ tỹ ãn mré ke nýtĩ ti. Tỹ sóg ãprã ke fi kósin ên nĩ, ha mẽ.

⁹ ãjag tỹ ãprã ke ag mý ãn kãmén tũ nĩn ký sóg ãjag tónh ke tũ nĩ gé, Topê tỹ jẽnẽ jafã ag mý, ãjag tỹ iso: “ti ki kagtĩg sóg nĩ,” hen ký,” he tóg.

¹⁰ “Tỹ sóg ãprã ke fi kósin ên nĩ. Ag tỹ iso vême jũ han ký sóg ag mý vãnh pãte fón sór mũ. Ag tỹ hã ra Topê kuprĩg to vême jũ han ký Topê tóg ag mý vãnh pãte fón mãn ke tũ nĩ ha,” he tóg.

¹¹ “Ãjag vin jé ag tóg ke mũ, pã'i ag mý, governador ag mý ke gé, ag tỹ ãjag sigse jé. Ëg vãnh kanhrãn jafã krêm ag tóg ãjag ki jẽmẽ sór ke mũ, ãjag tỹ ãn ki ge ký nýtĩ ti, ha vemnĩ. Hã ra to krĩ kufy han tũg nĩ, ãjag tỹ ag mý ãn kãmén ke ên to.

¹² Topê kuprĩg hã ne ãjag kanhrãn ke mũ', kurã ên kã. Hã ký ãjag tóg tónh ke mũ sir,” he tóg, Jesus ti, ã mré mũ tĩ ag mý.

Ëg tỹ nén ù to én ke tũ

¹³ Ký ùn e ag kãmĩ ù tóg Jesus mý: “Senhor’,” he mũ. “Ãn jo ãn kãke mré vĩmĩ, ãg tỹ ãg panh ter ja tỹ nén kar vãnh kãpãm jé, ti kuge ti,” he tóg, Jesus mý.

¹⁴ Hã ra Jesus tóg ti mý: “vó,” he mũ. “Isũ pijé’,” he tóg. “Ãn pi(jé) ã mý ã kuge ve sór mũ'. ãn pi(jé) ã tũ tỹ vãnh kãpãm sór mũ',” he tóg.

¹⁵ Ký tóg ag kar mý: “ker nén ù to én hẽ’,” he mũ. “Ëg tỹ nén kar pi(jé) ãg rĩr han ke

mũ'. Ëg tũ mág nĩ ra Ëg pi(jé) mũ há han ke mũ' he tóg.

16 Kĩ tóg ag mĩ: “vėnh jykre há vỹ ge nỹnh mũ, ha mẽ,” he mũ. “Ûn rico tóg nĩ ja nĩgtĩ mỹr,” he tóg. “Ti japỹ vỹ nén kar kanē e han ja nĩgtĩ.

17 Kĩ tóg to jykrén mũ sir, ùn rico ti. “Inh hỹn ne han mũ ha?” he tóg. “Inh pājó mág vó, inh pājó kāsá vó, sỹ krēm isũ kar rāg jé?” he tóg.

18 “Inh pājó kókén jé sóg ke mũ, sỹ ti jėgja ki ùn mág han jé, kỹ sóg krēm isũ kar vin mũ, inh jakré kanē kar ti,” he tóg mũ, to jykrén kỹ.

19 “Kỹ sóg jatu nĩ sir. Isũ vỹ prỹg tỹ hėn ri ke pétēm mũ, kỹ sóg rānhrāj mǎn ke tũ nĩ ha. Jatun mỹ sóg jėg nĩnh ke mũ, kron nĩ jé inh ke mũ gé. Inh mỹn sér tĩ sir, sỹ jatu nĩn kỹ,” he tóg, to jykrén kỹ, ùn rico ti.

20 Hã ra Topē tóg ti mỹ vĩ mũ. “Krĩ tũ ã nĩ,” he tóg ti mỹ. “Kuty tag kã ã tóg ter ke mũ ha, kỹ ã tũ mág tag tỹ tỹ ù tũ nĩnh ke mũ ha ke gé. Ma tĩg ke tũ ã tóg nĩ. ã ter ke vė,” he tóg ti mỹ, Topē ti,” he tóg, Jesus ti, ù tỹ ã panh tũ mǎn sór mũ ěn mỹ.

21 “Ge tóg tĩ, ěg tỹ ga kri nén ù há ve sór kỹ, ěg tỹ kanhkã tá tỹ nén ù tũ nĩn kỹ, Topē mré. Ëg pi(jé) ga kri ěg tũ mág ěn ma mũnh mũ'. ěg tỹ kanhkã tá tũ mág nỹtĩn kỹ tag hã tóg há nĩ,” he tóg, Jesus ti.

Ëg tỹ nén ù to krĩ kufy han ke tũ (Mt 6.25-34)

22 Kĩ tóg ã mré mũ tĩ ag mỹ: “ha vé,” he mũ. “Vėjėn to jykrén kỹ krĩ kufyg tũg nĩ,” he tóg. “Inh hỹn ùri ne konh mũ'? Inh hỹn ne tunh mũ'?” he tũg nĩ.

23 Topē tỹ ěg han ja vė, ěg tỹ ga kri mũ jé. Hã kỹ tóg ěg jėn ki rĩr ke mũ gé, ěg kur ki ke gé.

24 Sėsĩ to jykrén nĩ. Ag mỹ ěkrǎn tĩ'? Vó. Ag mỹ ājag jakré kunũg tĩ'? Vó. Ag mỹ pājó han tĩ'? Vó, ke tũ ag tóg nĩgtĩ, ge ra Topē tóg ag jėn tĩ. Jėsĩ kǎfór ājag tóg nỹtĩ, Topē mỹ, hã kỹ tóg ājag jėn ke mũ gé.

25 Kỹ, Topē tỹ ěg jé prěr kỹ ěg tóg mũnh mũ gé. Ëg pi(jé) mũnh ke tũ nĩ', ti tỹ ěg jé prěr kỹ'. ěg tỹ to krĩ kufy han mũ ra ěg tóg tũg mũ.

26 Ëg pi(jé) ěg krĩ kufy tugrĩn, ěg krĩ há tugnĩn mũnh ke tũ nĩ'. Mũ jé ěg tóg ke mũ, ti tỹ ěg jé prěr kỹ. Hã kỹ nén ù ù to krĩ kufy han tũg nĩ.

27 Ka fej to jykrén nĩ gé. Jatun mỹ tóg mog tĩ. Rānhrāj tũ tóg nĩgtĩ, kur han tũ tóg nĩgtĩ. Hã ra tóg sĩnvĩ nỹtĩgtĩ, ka fej ti, kỹ pã'i mág tỹ Salomão ěn kur tóg ri ke tũ nỹtĩ ja nĩgtĩ, ti sĩnvĩ ja ra, vėnh kar kur sĩnvĩ kǎfór ti nĩ, Salomão kur ti. Ki hã sóg tó mũ mỹr.

28 Topē hã ne ka fej sĩnvĩ han tĩ'. Hã ra tóg kǎnhmar kǎgter tĩ, ka fej ti, ti sĩnvĩ ra. Ûri tóg há nỹtĩ, tỹ vaj kỹ tóg kógungun tĩ. Topē tỹ ka fej sĩnvĩ han kỹ tóg ājag kur ki rĩr ke mũ gé, ha vemnĩ. Kỹ ti to: “ti mỹ ěg mỹ kur nĩm mũ vỹ?” he tũg nĩ.

29 “Inh hỹn ne konh mũ', ùri?” he tũg nĩ gé. To krĩ kufy han tũg nĩ.

30 Topē ki ge tũ ag vỹ tag to jykrén mág tĩ. Hã ra ěg jóg tỹ Topē vỹ ěg ki kanhró nĩ, ěg tỹ nén konh ke mũ ti, ěg kur ti ke gé. Kỹ to krĩ kufy han tũg nĩ.

31 Topē tỹ tỹ ěg pã'i nĩ ěn hã ve jé vāsǎnsǎn nĩ. Kỹ tag hã to jykrén nĩ. Kỹ Topē vỹ ājag mỹ ājag tỹ nén ve sór mág ěn vin ke mũ sir,” he tóg, Jesus ti.

Kanhkã tá ěg tũ (Mt 6.19-21)

32 “Kamėg tũg nĩ, ājag pipir nỹtĩ ra. ěg jóg tỹ Topē vỹ ājag to há nĩ, hã kỹ tóg ājag mỹ kanhkã ti ven sór mũ, ha mẽ.

33 Ājag tỹ nén kar vin nĩ, ùn vėsỹrėnh mũ ag mỹ. Hã kỹ ājag tóg kanhkã tá tỹ nén ù mág nỹtĩnh mũ. Tá ājag kuge tóg tũ' henh ke tũ nĩ. Tag ki ěg tóg ěg jǎnkamy fón tĩ, nén ù kar to. Tá tóg tũ' he jǎvǎnh nĩ, ěg kuge ti. Tá ù tóg péjunh kǎtĩg ke tũ nĩ gé, tá ti ga tóg kaggranh ke tũ nĩ gé. Kanhkã tá ěg tũ vỹ ge nĩ. Tũg jǎvǎnh ti nĩ.

34 Ājag tỹ ga kri tỹ nén ù mág nỹtĩn kỹ ājag tóg ga kri mũ mág sór mũ. Ājag tỹ hã ra kanhkã tá tỹ nén ù mág nỹtĩn kỹ ājag tóg kanhkã ra mũ sór mũ, kỹ tag hã ne há nĩ',” he tóg, Jesus ti.

Ëg tỹ Jesus kǎtĩg mǎn jǎvǎnh ke

35 “Ěg kur tỹ ěg tóg vėsógfĩg tĩ, ěg tỹ rānhrāj há han jé. Ěg lampião grug ěg tóg tĩ, kuty kã,

ĕg tỹ ve há han jé. Ēn ri ke han nĩ, ājag tỹ inh kātĩg mǎn ke jǎvǎnh kỹ.

³⁶ Kỹ ājag tóg ũn camarada ri ke nỹtĩ. Kejĕn ag patrǎo vỹ hĕn ra tĩg mũ, ā prũ ke festa mág han jé. Kỹ ti camarada ag vỹ ti tỹ tá vỹn ke jǎvǎnh nỹtĩ. Ag tỹ ti jǎvǎnh há han kỹ tóg há tĩ, ag nũgnũr tũ nĩn kỹ. Kỹ ag tóg kǎnhmar ti tỹ jǎnkā tỹ tórón tórón ke kỹ mĕnh mũ, kỹ ag tóg ti mỹ róm ke mũ sir, ti jun kỹ.

³⁷ Kỹ tóg kejĕn jun mũ sir, ag patrǎo ti. Kỹ tóg sér tĩ, ti camarada ag tỹ ti jǎvǎnh nỹtĩn kỹ. Kỹ tóg ag mỹ vĩ há han ke mũ sir. Kỹ tóg vĕsóg fĩn kỹ ag mỹ: “nĩgnĩ ra ver, mesa to,” hĕnh ke mũ sir. Kỹ tóg ag mỹ vĕjĕn ven ke mũ. Ag patrǎo hǎ ne ā camarada ag mỹ vĕjĕn ven ke mũ, ha vemnĩ. Ki hǎ sóg tó mũ,” he tóg, Jesus ti.

³⁸ “Hĕn ri ke mũn tóg meia noite ki jun ke mũ, hĕn ri ke mũn tóg galo kyr mũ ra jun ke mũ. Ti camarada ag tỹ ti jǎvǎnh kỹ nỹtĩn kỹ tóg ag mỹ vĩ há tǎvĩ han ke mũ sir, ha vemnĩ,” he tóg, Jesus ti.

³⁹ “Kỹ tag to jykrén nĩ, ha mĕ. Inh kātĩg mǎn ke vỹ ũ tỹ nĕn ũ pigju(g) tĩ kātĩg ri ke nĩnh mũ. Ũ tỹ ti ĩn krĕm nĩ ĕn pi(jé) ki kanhró nĩ, hora kǎ ti kātĩg ke mũ ti. Ũ tỹ ti tỹ nĕn ũ péju sór mũ tóg ĕn ge nĩ, ha mĕ. Ti tỹ ti kātĩg ke hora ki kanhró nĩ (hǎ) ra tóg ā kanĕ fǎn mũ vĕ, ti tỹ ti ĩn kǎra rǎ tũ nĩ jé. Hǎ ra tóg ki kagtĩg nĩ.

⁴⁰ Ge ti nĩ, inh kātĩg mǎn ke ti. Vĕnh ki rĩr, vĕnh ki ĕmĕ. Ēprǎ ke fi kósın vỹ kātĩg ke mũ, ājag tỹ ti kātĩg ke to jykrén tũ (hǎ) ra,” he tóg, Jesus ti.

Ũn camarada to comparaçǎo (Mt 24.45-51)

⁴¹ Kỹ Pedro vỹ ti mỹ: “Senhor’,” he mũ. “Ā tỹ ũ mỹ ke nĕ, ā tỹ tó ja tag ti? Ā tỹ ũ tỹ ā ki ge tũ ag mỹ ke mỹ, ĕg mỹ ke mỹ vó?” he tóg, Pedro ti, Jesus mỹ.

⁴² Kỹ ĕg Senhor tóg ti mỹ: “hỹ,” he mũ. “Kejĕn patrǎo tóg hĕn ra tĩg sór mũ, kỹ tóg ā camarada ag kǎ ũ tỹ pǎ'i han mũ, ti tỹ ti jo ā mré camarada ag ki rĩr jé. Ũ tỹ ā rǎnhraj ki rĩr há han tĩ ĕn kuprĕg tóg mũ, ti tỹ ag mỹ vĕjĕn ven jé, vĕjĕn ke horan ki.

⁴³ Ti tỹ ag ki rĩr há han kỹ ti patrǎo vỹ ti mỹ vĩ há han ke mũ, ti kātĩg mǎn kỹ, ũ tỹ ag ki rĩr há han mũ ĕn mỹ.

⁴⁴ Tỹ pǎ'i mág han jé tóg ke mũ, ti tỹ ti tũ ki rĩr kǎn jé sir. Ki hǎ sóg ke mũ, ha mĕ.

⁴⁵ Ti camarada ĕn jykre kórég nĩn kỹ tóg vĕnhmỹ nĩ jǎvo, ha mĕ. To jykrén kỹ tóg: “ĕg patrǎo vỹ kātĩg vǎnh han mũ,” he mũ. Kỹ tóg ā mré camarada ag vóg kónǎn kỹ ag mrǎnmrǎn mũ sir, fag ke gé. Kỹ tóg jatun mỹ jĕn mág han mũ, ũn kronkron tĩ ag mré tóg kronkron kỹ pépév tĩ nĩ gé sir.

⁴⁶ Kỹ ti patrǎo vỹ ti kǎnhmỹ jun ke mũ, ha vemnĩ, ti tỹ ti jun ke kurǎ ki kagtĩg nĩn kỹ, ti hora ti ke gé, kỹ tóg ti vóg kónǎn ke mũ gé sir, ti patrǎo ti, kỹ tóg ti fón ke mũ, Topĕ vĩ mranh tĩ ag mré hǎ,” he tóg.

⁴⁷ “Topĕ camarada ũ vỹ ā patrǎo kātĩg ken jo ki rĩr há han tũ nĩgtĩ, ti patrǎo tỹ ti mỹ tó mũ ra. Ā patrǎo vĩ ki króm tũ ti nĩgtĩ. Ti mrǎnmrǎn mág jé tóg ke mũ, ti patrǎo ti, Topĕ ti.

⁴⁸ Ũ tóg ā tỹ nĕn han ke mĕ ja tũ nĩ, ti patrǎo vĩ ti, ti camarada ũ ti. Hǎ ra tóg kórég han mũ gé. Kỹ ti patrǎo tóg ti mrǎnmrǎn ke mũ gé. Ti mrǎnmrǎn sĩ han jé tóg ke mũ jǎvo. Ũ tóg vĕnh kanhrǎn mág han tĩ. Kỹ Topĕ tóg vĕnh jykre há tǎvĩ ve sór mũ sir, ti tỹ ki kanhrǎn mág han mũ ĕn to. Ũ mỹ ti vĩ mág tĩ, Topĕ ti, kỹ tóg ti tỹ ki króm há han ve sór mũ gé sir,” he tóg, Jesus ti.

Ũ tỹ Jesus tugrĩn ĕg kato tĕnh ke (Mt 10.34-36)

⁴⁹ “Ga kri inh mur, isỹ re pũr tĩg ri ke han jé, hǎ vỹ: ũn e tỹ inh ki ge mũ, he mũ. Sỹ re pũr tĩg ri ke ĕn venh há tóg tĩ, hǎ ra tóg ver gru tũ nĩ.

⁵⁰ Ti grug to hǎ sóg vĕsỹrénh ke mũ. Iser ke vĕ, kỹ tóg inh mỹ e tĩ. Sỹ ve jǎvǎnh tóg tĩ, inh vĕsỹrénh ke ti,” he tóg, Jesus ti.

⁵¹ “Ājag hỹn iso: “vĕnh kar tỹ jagnĕ to há han jé tóg ke mũ,” he tĩ. Hǎ tũ vĕ. Ũ tỹ hĕn ri ke tỹ jagnĕ kato tĕ han jé sóg ke mũ, ha vemnĩ.

⁵² Ha vé, ĩn pir krĕm ke fag vỹ jagnĕ kato tĕnh ke mũ. Ũn tǎgtũ fag vỹ ũn régre fag kato tĕgtĕnh mũ ha. Kar ũn régre ĕn fag vỹ ũn tǎgtũ fag kato tĕgtĕnh mũ gé sir.

⁵³ Jagnē kato fag jagnē to jūgjūnh mū. Ū tóg ã kósin kato tēnh ke mū, kŷ ū tóg kejēn ã panh kato tēnh ke mū gé. Ū fi vŷ ã kósin fi kato tēnh ke mū, kŷ fi vŷ ã mŷnh fi kato tēnh ke mū gé. Kŷ ū tóg ã má fi kato tēnh ke mū, kŷ fi tóg ã jamré kato tēnh ke mū gé sir. Ge ti nŷgtī,” he tóg, Jesus ti.

*Jesus jykre ki kanhrān
(Mt 16.2-3)*

⁵⁴ Kŷ tóg vēnh kar mŷ tó mǎn mū gé, kŷ tóg ag mŷ: “kanhkā ve kŷ ājag tóg ta ki kanhró nŷtī,” he mū. “Kanhkā góg tŷ tātá kātīn kŷ ājag tóg: “ta vŷ kutēnh mū,” he tī. Ki kanhró ājag tóg nŷtīgtī.

⁵⁵ Kar ājag tóg kākā ki kanhró nŷtī gé. “Tag tán kātī mū, kākā ti, kŷn hŷn jū jagy nŷnh mū, ha vemnī,” he ājag tóg tī gé.

⁵⁶ Ki kanhró ājag tóg nŷtī, ta jykre ti, kākā jykre ti, ga jykre ti ke gé. Hā ra ājag tóg inh jykre ki kanhrānrān sór tū nī, sŷ ūri ājag mŷ tó mū tag ti. Kutu ājag nŷtī, ha mē, hā kŷ ājag tóg ki kanhrānrān sór tū nī,” he tóg, Jesus ti.

*Ēg tŷ jagnē mŷ vēnh pāte fón
(Mt 5.25-26)*

⁵⁷ “Kŷ ājag tóg vēnh jykre kuryj to jykrén tū nī gé, ājag tŷ jagnē mŷ vēnh pāte fón jé, ājag tŷ ver ga kri mūn kŷ.

⁵⁸ Kejēn ājag tóg jagnē mŷ vēnh jykre vēnhmŷ tó tī. Kŷ ājag tóg pā'i mŷ tónh mū sir. Ā tŷ ū to jū mū ěn vŷ ã tónh tŷg sór mū. Ti tŷ pā'i tá jun ke to hā ti mré vīmnī. Ti mŷ: “inh mŷ vēnh pāte fón,” hemnī. Ke tū nī mū ra pā'i vŷ ã jykre pāno venh ke mū, kŷ tóg polícia mŷ: “ti se ra,” henh ke mū. Kŷ tóg ã senh ke mū sir.

⁵⁹ Ha mē, tá ã kǎnhmar kākutē mǎn ke tū nī. Ā tŷ kajām kǎn kar kŷ ã hēn ri ke mūn tá kākutē mǎn ke mū sir,” he tóg. Jesus tŷ ěg tŷ jagnē mŷ vēnh pāte fón kāmén hā vē.

13

Ēg tŷ ěg jykre tovānh ke

¹ Kejēn ū ag tóg Jesus tá junjun mū, hā ra ag tóg ti vī mē kŷ nŷtī. Kurā ěn kā ū ag tóg ti mŷ Galiléia tá ke ag tó ja nī, fóg tŷ pā'i tŷ Pilatos tŷ ūn kǎgtén ja ěn ag. Topē mŷ ag tóg ājag mēg tānh ja nī, ti mŷ pūn jé, hā ki Pilatos tóg ag kygrēn ja nī, hā kŷ ag kyvénh tóg ājag mēg kyvénh mré kutē ja nī. Hā kāmén ag

tóg, Jesus mŷ, ti tŷ ag mŷ e tŷn kŷ, ag tŷ ūn kǎgter mū ag to: “ag hŷn Topē vī mranh mág,” hen kŷ.

² Kŷ Jesus tóg ag mŷ: “ājag hŷn Galiléia tá ke ěn to jykrén sór mū, ūn kǎgter mū ěn ag to,” he mū. “Topē vī mranh mág tī ag vē,” he ājag tóg mū ag to. “Ag hŷn vēnh jykre pāno han mū nī, ag hŷn Galiléia tá ke ag jykre pāno kǎfór han mū nī, hā kŷ Topē hŷn tóg ag vóg kónān mág,” he ājag tóg tī ag to.

³ Ke tū vē hā ra. Ājag ri ke ag tóg nŷtī, mŷr, ha mē. Ājag tŷ ājag jykre tovānh tū nŷn kŷ ājag tóg nŷgme ki vár ke mū, ha vemnī,” he tóg.

⁴ “Ū tŷ 18 (ke) ěn ag to jykrén nī, ū tŷ goj tŷ Siloé tá kǎgter mū ěn ag. Īn téj ěn tóg ag kri kutē, Īn vag jē ěn ti, hā kŷ ag kǎgter mū. Jerusalém tá ke kar ag jykre ri ke ja ag tóg nŷtī. Ag pi(jé) ag jykre pāno ěn kǎfór ja nŷtī'. Ag ri ke han ja ag nŷtī, ha mē.

⁵ Kŷ sóg ājag mŷ ke mū. Ājag tŷ ājag jykre pāno tovānh tūn kŷ ājag tóg nŷgme ki vár ke mū,” he tóg, Jesus ti.

Ka tŷ figueira to comparação

⁶ Kŷ tóg ag mŷ: “ū tŷ Topē jykre han sór tū ag vŷ ge nŷtŷnh mū, ha mē,” he mū. “Kejēn ū tóg nŷgtī. Ka há krān ja tóg nŷgtī, ka tŷ figueira. Ka kanē ū vē, ko há ti jē. ěn krān ja tóg nī. Uva kāmī tóg ti krān ja nī. Kŷ tóg kejēn ti kanē ko sór mū, kŷ tóg venh kātī mū. Hā ra tóg kanēn ja tū nī.

⁷ Kŷ tóg uva ki rŷr tŷ mŷ: “ti gŷn ra,” he mū. “Prŷg tāgtū tóg nī ha, sŷ ti kanē vég tū ki. Kanēn vānh ti hŷn jē. Ti gŷn ra, ti tŷ ga kókég tū nŷn jé,” he tóg.

⁸ Hā ra tóg ã patrão mŷ: “ti tovānh ra ver,” he mū, uva ki rŷr tŷ ti. “Ti pénŷn sóg kŷm mū ver, sŷ ti krēm ga jēgja han jé ver.

⁹ Hēn ri ke mūn tóg kanē há hŷn han ke mū ha. Ke tū nŷn kŷ sóg ã mŷ ti gŷn ke mū vāhā,” he tóg mū, uva ki rŷr tŷ ti,” he tóg, Jesus ti. Ti tŷ ū tŷ ã jykre kórég tovānh sór tū tón hā vē.

Jesus tŷ vēnhkán ke kurā ki ūn kaga tŷ há' he

¹⁰ Kejēn tóg ag vēnh kanhrān jafā krēm ag kanhrān mū, Jesus ti, vēnhkán ke kurā ki.

¹¹ Kŷ ū fi tóg tá jē nī. Jagrē kórég fi nī, hā kŷ fi tóg pānh ke kŷ jē nī. Vēnh ra hā jē kórég

fi tóg nĩ, fi jagrẽ tugnĩn. Prÿg tÿ 18 (ke) han fi tóg, fi jagrẽ tÿ fi kagãg tĩ ki.

¹² Kÿ Jesus tóg fi vég mũ, kÿ tóg fi jé prẽr mũ. “Kunĩg, jÿ,” he tóg. “Ã kaga tÿ sóg tũ' henh mũ,” he tóg fi mÿ.

¹³ Kÿ tóg ã nĩgé tÿ fi kri fig mũ. Kÿ fi tóg vẽn ra há jẽg há han mũ, ha mẽ. Kÿ fi tóg Topẽ to vĩ há han mũ sir.

¹⁴ Hã ra vẽn kanhrãn jafã to pã'i tóg Jesus to jũ mũ, ti tÿ vẽnkhán ke kurã ki fi tÿ há' hen kÿ. Ti mÿ tóg tÿ vẽn rãnhrãj nĩ, fi tÿ há' he mũ tag ti, há kÿ tóg Jesus to jũ mũ. Kÿ tóg vĩ mũ sir. Vẽn kar jyvẽn kÿ tóg ag mÿ: “kurã tÿ 6 (ke) há ki ãg tóg rãnhrãj ke mũ ha,” he mũ. “Hã kÿ kurã tÿ 6 (ke) ãn ki kãmũmnĩ, ti tÿ ãjag tÿ há' hen jé. Vẽnkhán ke kurã ki vẽn kygtãg kãmũ tũg nĩ,” he tóg mũ, pã'i ti.

¹⁵ Hã ra Jesus tóg ti vĩ kãfãn mũ, kÿ tóg: “jykre régre ã nĩ (mÿr),” he mũ. “Vẽnkhán ke kurã kã ãjag tóg ãjag mẽg ki rĩr tĩ gé, monh ki, cavalo ki ke gé, ha mẽ. ãjag mẽg kygvãn ãjag tóg tĩ, ãjag tÿ ti kron mũn jé, ti tÿ ãn kãkã se kÿ jẽ kÿ, cocho to.

¹⁶ Kÿ tag fi vÿ se kÿ jẽ ãn ri ke jẽ ja nĩ gé, ha mẽ. Satanás há vÿ fi sé', prÿg tÿ 18 (ke) ki. ãg jóg'jóg ve tÿ Abraão kósin ãn fi vẽ, ãg mẽg kãfór fi tóg jẽ, há ra ã tóg jũ sór mũ, isÿ vẽn kãn ke kurã ki fi tÿ há' hen kÿ, isÿ fi kavãn ri ke han kÿ. Vẽn jykre vẽnhmÿ han sór ã tóg nĩ,” he tóg, Jesus ti, pã'i ti mÿ.

¹⁷ Ti vĩ tag to ag tóg mÿ'ãg'ãg mũ sir, ti kato tẽ mũ ag. Hã ra tóg vẽn e ãn mÿ sér tĩ sir. Ag mÿ tóg nén ãn kar há han tĩ, há kÿ tóg ag mÿ sér tĩ sir.

Mostarda fy to comparação

(Mt 13.31-32; Mc 4.30-32)

¹⁸ Kÿ Jesus tóg ag mÿ: “Topẽ tÿ tÿ ãg pã'i nĩnh ke vÿ ge nĩ, ha mẽ,” he mũ.

¹⁹ “Vãn tÿ mostarda fy ri ke ti nĩ. Sĩ ti nĩ, ti fy ti. ãg japÿ ki ãg tóg krãn tĩ, kÿ tóg mog tĩ. Kÿ tóg ka ri ke nĩ, ti tÿ pẽ tẽj nĩn kÿ. Hã kÿ sēsĩ tóg kri jagfẽn ke mũ, ti pẽ kri, ti pẽ mág nĩn kÿ. Topẽ tÿ tÿ ãg pã'i nĩ kãmẽ tÿ vẽn kar kri rũm ke to ken há vẽ,” he tóg, Jesus ti.

Fermento to comparação

(Mt 13.33)

²⁰ Kÿ tóg ag mÿ: “Topẽ tÿ tÿ ãg pã'i nĩn kÿ tóg tag ri ke nĩnh mũ, ha mẽ,” he mũn mũ.

²¹ “Ûn tÿtã fag vÿ pão han tĩ, farĩnh tÿ. Pão han jé fag tóg pão jẽgja jafã tÿ fermento ãn tÿ farĩnh mré jẽgãg tĩ. Kejẽn ãn fi tóg farĩnh e kãki ti jãgja jafã pir tÿ kãki vãm ja nĩ, há ra tóg tÿ són ke kãn,” he tóg, Jesus ti. Ti vĩ tÿ vẽn kar kri rũm ke kãmẽn há vẽ.

Jãnkã sĩ to comparação

(Mt 7.13-14, 21-23)

²² Kÿ Jesus tóg tĩ mũ. Cidade e fĩn rãm tóg mũ, ãmã kãsir fĩn ke gé. Tĩg kÿ tóg ag kanhrãn rãn mũ sir. Ge kÿ tóg komẽr há cidade tÿ Jerusalém kukãm tĩ mũ.

²³ Kÿ ãn tóg ti mÿ: “Senhor’,” he mũ. “Ûn krenkren mũ ag mÿ pipir nÿtĩ, e nÿtĩ vó?” he tóg ti mÿ. Kÿ tóg ti mÿ:

²⁴ “hÿ,” he mũ. “Inh ki rã vÿ jãnkã sĩ ra rã ri ke nĩ,” he tóg. “Vãsãn nĩ, ã tÿ ra rã jé. Kejẽn ãn tóg ra rã mãn ke tũ nĩ ha. ãn kã ãn tÿ hẽn ri ke ag vÿ ra ge sór mũ, há ra ag tóg tÿ hẽn ri kenh ke tũ nĩ ha sir.

²⁵ ãn ki rĩr tĩ ãn tÿ nĩfẽn ja vẽ mÿr, há kÿ ag tóg ãn kãra genh ke tũ nĩ ha. Kanhkã to ken há vẽ, ãn ti. ãn ki rĩr tĩ ãn há ne nĩfẽn ke mũ', kÿ ãjag tóg sir re tá nÿtĩnh kÿ tÿ tórón' tórón' kenh ke mũ. “Senhor’, ãg mÿ róm, ãg mÿ nón, jãnkã ti,” he jé ãjag tóg ke mũ. Hã ra tóg sir ãjag mÿ: “ãjag ki kagtĩg sóg nĩ,” henh ke mũ, ãn ki rĩr tĩ ti. “ãjag tÿ ãn nÿtĩ?” he jé tóg ke mũ.

²⁶ Kÿ ãjag tóg ti mÿ: “ã mÿ ãg ki kagtĩg?” henh ke mũ. “ãg há vÿ ã mré jẽn ja nĩ, ãg há vÿ ã mré kron ja nĩ, ãg kanhrãn ja ã tóg nĩ, ãg jamã tá. ãg há vẽ,” he jé ãjag tóg ke mũ, ãjag tÿ re tá nÿtĩnh kÿ.

²⁷ Hã ra tóg ãjag mÿ: “inh pi(jé) ãjag ki kanhró nĩ’,” henh ke mũ. “ãjag pi(jé) tÿ inh mré ke nÿtĩ'. Ha mũjẽg. Vẽn jykre pãno han ãjag tóg mũgtĩ,” he jé tóg ke mũ, ãn ki rĩr tĩ ti, ãjag mÿ.

²⁸ ãjag tÿ ra mũnh ke tá ãjag tóg vêsÿrẽn ke mũ, tá ãjag jã tóg gyngyn ke mũ, gangan ke jé ãjag tóg ke mũ, tá. Kór há tá ãjag tóg Abraão venh ke mũ, tá, Isaque ke gé, Jacó ke gé, Topẽ vĩ tó tĩ ag kar ke gé. ãn ag kar vÿ Topẽ tÿ tÿ ãg pã'i nĩ venh mũ sir, ãjag jãvo.

²⁹ ãn kã Topẽ ki ge kÿ nÿtĩ kar ag tóg kãmũnh mũ, rã jur ja tá, rã pur ja tá, kanhkã fyr tá, rã krẽm tũg ja tá. Kãmũ kÿ ag tóg Topẽ

tỹ tỹ ẽg pã'i nĩ venh ke mũ, ti tỹ ag ki rĩr nĩ ti, kỹ ag tóg tá jẽg nỹtĩnh mũ ãjag jãvo.

³⁰ Kỹ tag ki ùn kãsir ù ag tóg mág nỹtĩnh mũ, tá pã'i nỹtĩnh mũ. Kỹ tag ki ùn mág ù ag tóg kãsir nỹtĩnh mũ gé, tá, tere kỹ," he tóg, Jesus ti.

Jesus tỹ Jerusalém tá ke ag to há nĩ (Mt 23.37-39)

³¹ Kurã ẽn kã Fariseu ù ag tóg tá junjun mũ, Jesus mré vēmén jé. Ti mỹ ag tóg: "ha mẽ," he mũ. "Pã'i mág tỹ Herodes vỹ ã tén sór mũ. Hã kỹ vènh péju tĩg, ẽmã ù ra," he ag tóg mũ sir, Jesus mỹ.

³² Kỹ tóg ag mỹ: "mĩg sĩ ri ke ti nĩ, Herodes ti," he mũ. "Hã kỹ tóg ke mũ. Ver sóg vènh jagrẽ kórég pan mũ, ùn kagyga ag tỹ há' he jé sóg ke mũ, ùri, vaj kỹ ke gé, kurã tỹ hèn ri ke ki. Kãnhmar sóg ter ke mũ, inh kurã ki, ha vemnĩ.

³³ Ûri sóg ver tĩg mũ, vaj kỹ ke gé, vaj ùn kỹ ke gé. Iser ken kỹ sóg Jerusalém tá ter ke mũ. Tag ki ke pijé'. Topẽ vỹ tó tĩ vỹ tỹ inh nĩ, jo Jerusalém tá ke ag tóg ag kãgtén tĩ, Topẽ vỹ tó tĩ ag. Hã kỹ sóg Jerusalém tá ter tĩg ke mũ gé. Tag tómnĩ, Herodes mỹ," he tóg, Jesus ti.

³⁴ Kỹ tóg Jerusalém ki ke ag to vēmén mũ. Fe kaj han tóg, ag to, kỹ tóg: "Jerusalém tá ke ag mỹ sóg tag tó sór mũ, ha mẽ," he mũ. "Topẽ vỹ tó tĩ ag kãgtén ag tóg tĩ. Topẽ tỹ ag mỹ ùn jẽgnẽg tĩ ag pin ag tóg tĩ, pó tỹ, ag tỹ ag kãgtén jé. Isỹ ag vènh mãn há tóg tĩ vỹ, isỹ ag ki rĩr jé, Jerusalém tá ke ag, hã kỹ sóg ag jé prẽr tỹ hèn ri ke han mũ. Garĩnh fi jykre ri ke han sór isóg mũ vỹ, ag mỹ. Garĩnh fi vỹ ã krẽ kri jẽ nĩ, fi tỹ ag vèsỹrénh tũ nĩ jé ke vỹ. Ẽn ri ke han sór sóg mũ vỹ, hã ra ag tóg ke jãvãnh nỹtĩ.

³⁵ Hã kỹ ag tóg ag jamã pũn kãn ke mũ, kỹ vãpũr vỹ sir. Û vỹ kãnhmar tá nĩg mãn ke tũ nĩ ha, ag tỹ cidade kókén ja tá. Hã kỹ sóg ag mỹ ke mũ. Inh ve mãn ke tũ ag nĩ ha (mỹr). Kejẽn ag tóg iso: "Topẽ tỹ ti jẽnẽ ja vỹ," henh ke mũ. "Topẽ vỹ ti ve há han, ti tỹ ti jiji tó kãtĩg kỹ," he jé ag tóg ke mũ iso. Ẽn hã kã ag tóg inh ve mãn ke mũ," he tóg, Jesus ti.

14

Jesus tỹ vènhkãn ke kurã ki ù tỹ há' he

¹ Kejẽn tóg vènhkãn ke kurã tá krỹg mũ. Kỹ tóg pã'i ù ìn krẽm nĩ nĩ. Fariseu ag pã'i vỹ. Ti tỹ ti ìn krẽm jẽn ke vỹ. Hã ra ag tóg tá ti tỹ rĩr mũ, "ti mỹ vènhkãn ke kurã ki rãnhraj ke tũ?" he ag tóg mũ.

² Hã ra ù tóg tá nĩ gé, ùn kaga ù. Kãnhpar kãn kỹ tóg jẽ. Jesus rĩn ja tá tóg jẽ nĩ.

³ Kỹ Jesus tóg Topẽ vỹ to professor ag mỹ ke mũ, Fariseu ag mỹ ke gé. Ag mỹ tóg: "ẽg tỹ vènhkãn ke kurã kã ù tỹ há' hen mỹ há nĩ, mỹ kórég nĩ vó?" he mũ.

⁴ Hã ra ag tóg ti mỹ nén ù tó tũ nĩ. Kỹ Jesus tóg ùn kaga ẽn kri ã nĩgé fi kỹ ti tỹ há' he mũ sir. Kỹ tóg ti mỹ: "ha tĩg ge," he mũ.

⁵ Kỹ tóg ag mỹ: "kejẽn ãjag kósin ù tóg goj ki kutènh mũ," he mũ, "goj nig ki, ke tũ nĩn kỹ ãjag mẽg tỹ monh. Vènhkãn ke kurã ki tóg goj ki kutènh mũ, hèn ri ke mũn. Kỹ ãjag tóg ti kunũg tĩ gé, ti tỹ vènhkãn ke kurã kã ki kutèn kỹ. Kỹ ãjag tỹ ne jé iso jũ sór nẽ?" he tóg.

⁶ Kỹ tóg ag tỹ ti mỹ nén tónh ke tóg tũ tĩ sir.

Festa to comparação

⁷ Kỹ Jesus tóg vènh kar kanhrãn jé tag tó mũ sir, ha mẽ. Ti mré jẽg jẽn kỹ nỹtĩ ag mỹ tóg kãmén mũ. Ag jẽn vén sór vỹ, ag tỹ tỹ ùn mág nỹtĩ jé. Hã vég tóg mũ, hã kỹ tóg ag kanhrãn rãn sór mũ, Jesus ti.

⁸ Kỹ tóg ag mỹ: "kejẽn ù tóg ãjag mỹ: "kurã ẽn kã sóg vènh prũg ke to festa han ke mũ. Ha inh mré jẽn kãtĩg," henh ke mũ. Kỹ ti festa kã jẽn vén sór tũg nĩ. Hèn ri ke mũn ã kãfór nĩ ù tóg ki jun mũ.

⁹ Kỹ festa ki rĩr mũ tóg ã mỹ: "toreg ver'," henh ke mũ. "Ti jẽn kar kỹ ã tóg jẽn ke mũ. Mẽ kỹ jẽ nĩ ver," he jé tóg ke mũ ã mỹ, ù tỹ festa ki rĩr tĩ ti. Kỹ tóg ã mỹ'a tĩnh mũ sir, ha mẽ.

¹⁰ Kỹ ã tỹ festa venh tĩg kỹ mẽ kỹ nĩmnĩ ver, vỹ jẽn jãvãnh kỹ. Kỹ festa ki rĩr mũ vỹ ã mỹ: "ha jẽn vén, fag mré," henh ke mũ. Kỹ ã pi(jé) mỹ'ãg ke mũ'," he tóg ag mỹ, Jesus ti.

¹¹ "Hã kỹ tóg ù tỹ ag kãfór nĩ sór mũ térem ke mũ, vèsỹkã, Topẽ ti, ha vemnĩ. Jãvo tóg ù tỹ: "tỹ inh ùn sĩ nĩ," he mũ ẽn jãnfyn ke mũ, ha vemnĩ," he tóg, Jesus ti.

Ẽg tỹ ùn jagtar ag jagãgtãn

¹² Kỹ tóg ù tỹ ã kógfyn mũ ẽn mỹ kãmén mũ gé. Ti mỹ tóg: "ã tỹ festa han sór kỹ ùn

rico ag mÿ tó sór tÿg nÿ, ã mré ke fag mÿ, ã kãke ag mÿ, ã jãvy ag mÿ, ã rã nÿtÿ ag mÿ tó tÿg nÿ gé,” he mÿ. “Ã tÿ ùn rico ag mÿ tó mÿ ra ag tóg vënh kaja jé ã mÿ festa han sór mÿ gé. Kÿ ã tóg ã festa kaja ti vég mÿ sir, ëprã.

13 Æ tÿ festa han sór kÿ ùn kaga kÿ rãnrãj vãnh ag mÿ tómnÿ, ùn kãnhgrÿ ag mÿ, ùn kyvó ag mÿ.

14 Æ tÿ tag han kÿ Topë vÿ ã ve há han ke mÿ, ha vemnÿ. Æ mÿ ag tóg festa han ke tÿ nÿ, ag tÿ nén ù tÿ nÿn kÿ. Kÿ ã tóg ã rÿr mãn ken kÿ ti kaja venh ke mÿ, Topë tÿ ùn jykre kuryj kar rÿnrÿr mãn ke kurã ên kã,” he tóg, Jesus ti.

Festa mág to comparação

(Mt 22.1-10)

15 Kÿ tóg tá nÿ ù mÿ mẽ há tÿ, Jesus vÿ tag ti. Tá nÿg kÿ tóg ag mré jëg mÿ gé, há kÿ tóg Jesus vÿ mëg mÿ. Kÿ tóg ti mÿ: “Û tÿ Topë tÿ tÿ ëg pã'i nÿ vég mÿ mÿn hÿn sér pë tÿnh mÿ, ù tÿ tá festa vég mÿ ên mÿ,” he mÿ.

16 Kÿ Jesus tóg ti kanhrãn kÿ ti mÿ: “kanhkã tá festa vÿ ge nÿnh mÿ, ha mẽ,” he mÿ. “Kejën ù tóg nÿgtÿ. Festa mág han sór tóg mÿ, kÿ tóg ù tÿ hën ri ke ag mÿ tó ja nÿ, ti tÿ festa han ke to há.

17 Ti festa kurãn kã tóg ã camarada jënëg mÿ, ti tÿ ùn kógfyn kÿ nÿtÿ ag mÿ: “ha kãmÿjëg,” he jé. “Kar kÿ tóg nÿ ha, inh festa ti,” hemnÿ,” he tóg, ã camarada mÿ. Kÿ tóg ag mÿ tónh tÿ mÿ sir.

18 Há ra ag tóg ve sór tÿ nÿ, ag kar ti, há kÿ ag tóg ti mÿ vÿ mÿ. Û tóg ti mÿ: “ga kajãm inh,” he mÿ. “Hã kÿ sóg ijapÿ venh tÿ mÿ ver. Ûri tóg inh mÿ vënhmÿ tÿ. Sÿ festa venh tÿg ke vë vë, há ra tóg vënhmÿ tÿ,” he tóg mÿ.

19 Kÿ ù tóg ti mÿ: “monh génh sóg, monh tÿ 5 (ke) régre,” he mÿ gé. “Kÿ sóg ag venh tÿ mÿ ver. Sÿ festa venh tÿg ke vë vë, há ra tóg vënhmÿ tÿ,” he tóg mÿ gé sir, ù ti.

20 Kÿ ù tóg ti mÿ: “Ûri sóg prÿg mÿ ha, há kÿ tóg vënhmÿ tÿ,” he mÿ gé.

21 Kÿ ti camarada tóg ti mÿ tónh kãtÿ mÿ, ã patrão mÿ. Kÿ tóg jÿ mÿ. Ti mÿ tóg: “ëpry ra tÿg, êmÿn mág ra, ëpry kãsir ra ke gé, êmã kar ki,” he mÿ. “Kÿ ùn jagtar ag tatÿ kãtÿg, ùn kónhgrÿ ag, ùn kyvó ag, ùn tÿg vãnh ag ke gé,” he tóg. Æ camarada mÿ tóg ke mÿ.

22 Kÿ tóg tÿg mãn mÿ, ti camarada ti. Kÿ tóg tá vÿn ke kÿ ã patrão mÿ: “ke kãn inh huri,” he mÿ. “Ag tatÿ kãtÿg inh huri, há ra tóg fór tÿ nÿ ver, festa jo ìn ti,” he tóg mÿ, ti camarada ti, ti patrão mÿ.

23 Kÿ ti patrão tóg ti mÿ: “vësÿkã tÿg mãn ge,” he mÿ. “Vãnh kãmÿ tÿg, êmã kãsir pë kãmÿ ke gé, ëpry ra, êmÿn jagma,” he tóg. “Tá ag mÿ tugtónh tÿg. Ag kutãn nÿ, ag kãmÿ jé, festa jo ìn fór jé,” he tóg, patrão ti, ã camarada mÿ,” he tóg, Jesus ti.

24 “Hã kÿ sóg ãjag mÿ ke mÿ,” he tóg. “Û mÿ sóg tó vén ja nÿ, há ra ag tóg inh festa venh ke tÿ pë nÿ, sÿ ù mÿ tó vén ja ag,” he tóg. Jesus tÿ Fariseu ag mré jën kÿ ag mÿ kãmén há vë.

Ëg tÿ ëg jykre tovãnh

(Mt 10.37-38)

25 Kejën ùn e ag tóg Jesus nón mÿ mÿ. Kÿ tóg ag jé vÿrÿn ke kÿ ag mÿ:

26 “ha mẽ,” he mÿ. “Û tÿ inh mré tÿg pë han sór mÿ jé inh há to há kãfór nÿ, ã han mÿ fag kri, ti prÿ fi kri, ti krë kri, ti kãke ag kri, ti jãvy ag kri, ti ve fag kri, vënh kri ke gé, mÿr, ha mẽ,” he tóg. “Ke tÿ nÿ mÿ ra tóg inh mré kãtÿg ke tÿ nÿ, kÿ tóg tÿ inh mré ke nÿnh ke tÿ nÿ gé.

27 Ha vé, ag tÿ inh cruz tÿ inh kri fi kÿ sóg tÿg ke mÿ, ag tÿ to isa kÿ isén jé, ha vemnÿ. Vënh nenh ke tÿ sóg nÿ. Û tÿ inh ri ke han sór tÿ nÿn kÿ tóg inh mré kãtÿg ke tÿ nÿ, kÿ tóg tÿ inh mré ke nÿnh ke tÿ nÿ gé,” he tóg, Jesus ti,

28 “To jykren, ù tÿ ìn téj han sór mÿ ên to. Ti tÿ ìn téj han sór kÿ tóg ã jãnkamy nÿkrén vén ke mÿ. Kÿ tóg ìn kaja to jykren ke mÿ gé sir. Kar kÿ tóg ìn han sór ke mÿ vãhã.

29 Ti tÿ to há to jykren há han tÿ ra tóg vënhmÿ tÿ. Kÿ tóg ìn jëg ken ki kÿm kÿ ti króggróg han ke mÿ sir. Ti króggróg han kÿ ti jãnkamy tóg tÿ' henh ke mÿ, kÿ tóg tovãnh ke mÿ sir, ti tÿ ìn han ti. Kÿ ti mré ke ag tóg ti to vÿ kÿ ti nynh mÿ sir.

30 Ti to ag tóg: “ha mẽ, ìn téj han sór tóg mÿ vë, há ra tóg to jykren há han ja tÿ nÿ, há kÿ tóg kar tÿ nÿ,” henh ke mÿ, ti régre ag,” he tóg.

31 “Kar pã'i mág to jykren nÿ gé. Pã'i ù tÿ ti mré vënh génh sór kÿ tóg ã krëm ke ag

nĩkrén ke mũ gé sir, vènh génh ke to hã. “10 mil (ke) ãg nỹtĩ,” he jé tóg ke mũ. “Ëg mỹ ag tỹ hèn ri kenh mũ vỹ?” he jé tóg ke mũ. “20 mil (ke) ag nỹtĩ. Ag mỹ ãg tỹ tũ' he kãn ke tũ nĩ vỹ? Ëg kãfór ag tóg nỹtĩ. Ëg hỹn hẽ ri kenh mũ, ag tỹ ãg tovãnh jé?” he jé tóg ke mũ, pã'i ti.

³² Ti tỹ tag to jykrén kỹ tóg pã'i ù ãn mỹ vènh vỹ jẽnẽnh mũ, ti tỹ kór há tá nĩ (hã) ra, kuvar há tá. Ti mỹ vènh vỹ jẽnẽnh kỹ tóg ti mỹ: “ã mỹ ãg tovãnh ke tũ nĩ?” he mũ. “Inh ã mỹ ne nĩm mũ, ã tỹ isovãnh jé?” he jé tóg ke mũ, pã'i ãn mỹ,” he tóg, Jesus ti.

³³ “Hã kỹ to jykrén nĩ, ãjag tỹ inh mré mũ pẽ han ke to. Iso há kãfór nỹtĩmĩ, ãjag tũ kar kri. Ke tũ nĩ mũ ra ãjag pi(jé) inh mré mũ pẽ han mũ,” he tóg, Jesus ti.

Sa to comparação

(Mt 5.13; Mc 9.50)

³⁴ “Sa vỹ há nĩ. Hã ra sa kãhór tĩn kỹ ãg tỹ ne tỹ ti tỹ kajã' henh ke tóg tũ tĩ, tỹ sa' he mãn ke tũ tóg tĩ,” he tóg.

³⁵ “Ti kãhór tĩn kỹ tóg kórég nĩ, kỹ ãg tóg fón tĩ. Ëg pi(jé) ãg japỹ ki ti fón tĩ', ti tỹ ãg jakré tỹ há' he tũ nĩn kỹ, sa kãhór ti. Ti fón pẽ han jé ãg tóg ke mũ. Ri ke ãjag nỹtĩ, ãjag tỹ inh mré mũ pẽ han tũ nĩn kỹ. Jẽmẽ há han nĩ, sỹ ãjag mỹ nén tó mũ tag ti,” he tóg, Jesus ti.

15

Ovelha vãfor to comparação

(Mt 18.12-14)

¹ Kejẽn ù tỹ imposto mãg tĩ ag tóg ti to kãmũ mũ, Topẽ vỹ mranh tĩ ag ke gé. Ag tỹ ti vỹ mẽ sór vè.

² Kỹ tóg Fariseu ag mỹ kórég nỹ, Topẽ vỹ to professor ag mỹ ke gé. Kỹ ag tóg ti to vỹ he mũ sir. “Topẽ vỹ mranh tĩ ag to tóg há nĩgtĩ, tag ti,” he ag tóg mũ. “Ag mré tóg jẽg tĩ mỹr,” he ag tóg mũ, Jesus to.

³ Kỹ tóg ag kanhrãn jé ag mỹ: “ũ tỹ Topẽ vỹ mranh mũ tỹ ã jykre kórég tovãnh kỹ tóg ge nỹnh mũ, ha mẽ,” he mũ.

⁴ “Û tóg nĩ ja nĩgtĩ,” he tóg. “Ti mẽg tỹ mé vỹ tỹ 100 (ke) nỹtĩ, ti mẽg tỹ ovelha ti. Kỹ ti mẽg pir tóg vãfor mũ. Hã ra tóg ti kanẽg tĩ mũ, ti jãvãnh tĩ tóg mũ, ha mẽ. Ûn e ãn tovãnh kỹ tóg ùn pir ãn nón tĩ mũ. Ga kórég

tá ag nỹtĩ, ti mẽg kar ãn ag. Ag togvãnh kỹ tóg ùn pir ãn nón tĩ mũ, ha mẽ.

⁵ Kỹ tóg ti vég mũ sir, ti mẽg vãfor ja ãn ti. Kỹ tóg ã nunh kri ti fi kỹ ma tĩ mũ. Ti fe tóg mrin ke mũ sir.

⁶ Kỹ tóg ã ãn tá jun mũ. Tá tóg ã kanhkã fag jé prẽr mũ, ti rã hã nỹtĩ fag kar. Kỹ tóg fag mỹ tó mũ. “Inh mré ti to mỹ sér,” he tóg. “Inh mẽg vỹ vãfor ja nĩ, hã ra sóg ti ve mãn mũ ha,” he tóg mũ, ã mẽg to,” he tóg, Jesus ti.

⁷ “Hã ra tóg ge nĩ, ha mẽ. Û tỹ 99 (ke) ag tỹ vènh jykre kuryj han kỹ tóg há tĩ sir, kỹ tóg mỹ sér tĩ sir, kanhkã tá ke ag mỹ. Hã ra tóg mỹ sér kãfór tĩ, ùn pir tỹ ã jykre kórég tovãnh kỹ, ti tỹ ã tỹ Topẽ vỹ mranh mũ ãn tovãnh kỹ, ha mẽ. Kỹ isũ ag vỹ e nỹtĩ,” he tóg, Jesus ti.

Jãnkamy vãfor to comparação

⁸ “Kỹ ùn tỹtã to vẽme vỹ ge nĩ, ha mẽ,” he tóg. “Jãnkamy tỹ 10 (ke) tỹ fi tũ nĩ, jãnkamy tỹ por dia kaja tỹ 10 (ke) tỹ. Kejẽn ùn pir tóg fi mỹ vãfor mũ, kỹ fi tóg lampião grug mũ sir. Fi ãn kãmĩ fi tóg prun kãn mũ. Ve há han fi tóg mũ, jãnkamy ãn kanẽg jé, ãn péno kar mĩ hã.

⁹ Vãhã fi tóg kejẽn ve mãn mũ sir. Kỹ fi tóg ã mré ke kar fag jé prẽr mũ, fi rã hã nỹtĩ fag kar ke gé. Kỹ fi tóg fag mỹ: “inh mré to mỹ sér,” he mũ. “Inh jãnkamy vỹ vãfor ja nĩ, hã ra sóg ve mãn mũ ha,” he fi tóg mũ.

¹⁰ Hã ra tóg ge nĩ, kanhkã tá, ha mẽ. Topẽ tỹ jẽnẽ jafã ag mỹ tóg sér tãvĩ tĩ, ù tỹ ã jykre kórég to jũn kỹ, ti tỹ ã tỹ Topẽ vỹ mranh ãn tovãnh kỹ, ha mẽ,” he tóg, Jesus ti.

Ûn kósín vãfor to comparação

¹¹ Kỹ tóg ag mỹ tag tó mũ gé sir, ha mẽ. “Û vỹ tóg kósín régre ja nĩgtĩ,” he tóg.

¹² “Kỹ ti kósín tỹ ãgno tóg ã panh mỹ: “panh’,” he mũ. “Inh mỹ ùri isũ nĩm, ã tỹ inh mỹ nén nĩm ke mũ ãn ti,” he tóg, ã panh mỹ. Ti tỹ to vĩnh ke tũ vè vè, hã ra tóg to vỹ mũ. Ge ra ti panh tóg ã krẽ mỹ ã tũ vènh kãpãm mũ sir.

¹³ Kãnhmar ti kósín kyrũ tóg ã tũ mãn kỹ kór há ra, kuvar há ra tĩ mũ, ga ù ra. Tá tóg ã tũ vãm kãn mũ, nén ù kórég kar to.

¹⁴ Vãm kãn ja tóg nĩgtĩ, ti jãnkamy ti. Kỹ tóg kejẽn tá prỹg han mũ sir, ga ãn tá. Kỹ kyrũ ãn tóg kókĩr mũ gé.

15 Kĩ tóg tá ke ù mré vēmén tĩ mũ, ti tỹ ti mỹ vênh rãnrãj nĩm jé. Kĩ tóg ti jēnēg mũ, ti tỹ ti porco ki rĩr jé sir, ti safra tá.

16 Kĩ tóg porco jēn ko sór mũ, ti kókĩr nĩn kỹ. Hã ra ag tóg ti mỹ nén ù nĩm tũg mũ, ti tỹ ko jé. Hã kỹ tóg kókĩr tãvĩ nĩ sir.

17 Kĩ tóg kejēn krĩ há han mũ. To jykrén tóg mũ sir. “Inh panh mỹ rãnrãj tĩ ag vỹ pão mág ko tĩ. Ag mỹ tóg kén tĩ, ag jén tĩ. Jo sóg kókĩr kỹ ter ke mũ,” he tóg, kyrũ ti, ã pir mỹ nĩn kỹ.

18 “Inh jé hỹn inh panh kukãm tĩg ha,” he tóg. “Kỹ sóg ti mỹ: ‘panh’,” henh ke mũ. “Kanhkã tá nĩ ěn vĩ mranh inh, ã vĩ ti ke gé.

19 Kĩ sóg vēnhmỹ tỹ ã kósin tũ nĩ. Sỹ tỹ ã camarada nĩnh há tóg tĩ,” he jé sóg ke mũ, inh panh mỹ,” he tóg mũ, kyrũ ti.

20 Kĩ tóg tĩ mũ sir, ã panh kukãm.

Hã ra ti panh tóg kór há tá, kuvar há tá ti vég mũ, kỹ tóg ti kato tē mũ. Ti kato tē kỹ tóg ti ki póm ke mũ sir, ti ki nhun ke tóg mũ gé sir.

21 Kĩ ti kósin tóg ti mỹ: “panh’,” he mũ. “Kanhkã tá nĩ ěn vĩ mranh inh, ã vĩ ke gé. Hã kỹ sóg vēnhmỹ tỹ ã kósin tũ nĩ ha,” he tóg, ti panh mỹ.

22 Hã ra ti panh tóg ti mỹ: “vó, vēnh pãte fón kỹ tóg nĩ,” he mũ. Kĩ tóg ã camarada ag mỹ: “kur há tãvĩ ěn ma kãmũjēg,” he mũ, “ti tỹ kur tãg ra rã jé. Ti mỹ nĩgē kãnĩm ja nĩm gé. Pēn né ěn tỹ, pēn to ró ěn tỹ ti mỹ jun gé.

23 Monh tãgy ěn venh mũjēg. Ti tãnh ra, ěg tỹ ko jé, ěg fe tỹ mrin ke jé.

24 Inh kósin vỹ inh mỹ ter ja ri ke han, hã ra tóg rĩr mãn ri ke han. Vãfor ti vē vē, hã ra tóg kãtĩg mãn huri,” he tóg, ti panh ti. Kỹ tóg ag mỹ sér tĩ sir, ag tỹ festa han kỹ.

25 Hã ra ti kósin sanh tóg ti japỹ tá rãnrãj jē. Kỹ tóg vãhã tá kãtĩg kỹ ã ĩn tá jun mũ. Tá jun kỹ tóg vãkyr mēg mũ, fag vēnh gringrén ěn ti.

26 Kĩ tóg ã camarada jé prēr mũ. Ti mỹ tóg: “festa tỹ ne nē?” he mũ.

27 Kĩ tóg ti mỹ: “ã jãvy vỹ jun, kỹ ã panh vỹ monh tãgy ěn tãnh,” he mũ. “Ti mỹ tóg sér tĩ, ti tỹ ti ve mãn kỹ. Kaga tũ tóg jē, há tóg jē, hã kỹ tóg ã panh mỹ sér tĩ,” he tóg, ti camarada ti.

28 Kĩ tóg jũ mũ sir. Kỹ tóg ĩn kãra rã tũg mũ, jũ kỹ.

Kỹ ti panh tóg ti mré vēmén tĩ mũ. Ti mỹ tóg: “ěg mré festa venh kãrã,” he mũ.

29 Hã ra tóg ti mỹ: “vó,” he mũ. “Prỹg tỹ hēn ri ke ki sóg ã rãnrãj ti han, ha mē. Inh pi(jé) ã vỹ mranh ja nĩgtĩ’. Ge ra ã tóg inh mỹ nén ù nĩm ja tũ nĩ. ã pi(jé) inh mỹ cabrito fēg tĩ’, sỹ inh mré ke ag mỹ festa han jé.

30 Hã ra ã kósin ěn tóg jun mũ sir, jo ã tóg ti mỹ monh tãgy ěn tãnh. Kórég ti nĩ, ã kósin ěn ti. ã tũ fón kãn tóg mỹr, ùn tỹtã kórég fag to, hã ra ã tóg festa mág han mũ, ti kãtĩg kỹ,” he tóg, ti kósin sanh ti, ã panh mỹ.

31 Hã ra ti panh tóg ti mỹ: “vó,” he mũ. “Inh mré ã tóg jē nĩ, kỹ tóg inh mỹ sér tĩ. Kỹ isũ kar vỹ tỹ ã tũ nỹtĩ, mỹr, ha mē.

32 Hã ra festa tag vỹ há nĩ, ha mē. ěg mỹ tóg sér tãvĩ tĩ. ã jãvy vỹ inh mỹ ter ja ri ke han, hã ra tóg rĩr mãn ri ke han. Vãfor ti vē vē, hã ra tóg kãtĩg mãn huri,” he tóg, ti panh ti, ã kósin sanh mỹ,” he tóg, Jesus ti. Ti tỹ Topē kãmén hã vē.

16

Ěg tỹ ěg tũ vēnh kãpãm ke

1 Kĩ Jesus tóg ã mré mũ tĩ ag mỹ tag tó mũ, ha mē. “Kejēn ěprã ke ù tóg nĩgtĩ, ùn rico. Kỹ ti tũ ki rĩr tĩ tóg nĩgtĩ gé. Ti patrão mỹ név(e) nỹtĩ ag vég ti tĩ, ti mỹ, ti tũ ki rĩr tĩ ti. Kejēn ag tóg ti camarada ěn to vỹ mũ, ti tũ ki rĩr tĩ ěn to. Ti lograr ke (ka) mē ti nēji nĩ, ti tũ to, ti camarada ti.

2 Kĩ tóg ti jé prēr mũ, kỹ tóg ti mỹ: “ã tỹ han mũ mē inh,” he mũ. “Sỹ ã rãnrãj tugnỹm ke vē. Ki rĩr mãn ke tũ ã tóg nĩ ha,” he tóg mũ ti mỹ.

3 Kĩ tóg to jykrén mũ sir, ti camarada ti. “Inh hỹn hē ri kenh mũ ha?” he tóg mũ. “Inh patrão vỹ inh kutēm, inh rãnrãj ki. Kỹ inh hỹn ne konh ke mũ ha? Inh ěpỹ jé sóg krój nĩ. Kỹ sóg vēnh kar mỹ: “inh mỹ nén ù nĩm, inh mỹ jãnkamy nĩm,” he sór tũ nĩ gé. Inh mỹ a tóg tĩ, sỹ ag mỹ tónh ke ti,” he tóg.

4 Kejēn tóg: “ũri hã sóg ki kanhró nĩ ha, sỹ nén han ke ti,” he mũ. “Sỹ tag han kỹ ag tóg iso há nỹtĩnh mũ, kỹ ag tóg inh mỹ: “inh mré nĩnh kãtĩg,” henh ke mũ, inh patrão tỹ inh fón kar kỹ,” he tóg mũ, ti camarada kórég ti.

⁵ Kÿ tóg ù tÿ ã patrão mÿ név(e) nÿtĩ ên ag jé prêr kân mũ sir. Kÿ tóg ù mÿ: “ã név(e) hê ri ke nĩ?” he mũ.

⁶ Kÿ tóg ti mÿ: “azeite tÿ lata tÿ 100 (ke) ki inh név(e) jê,” he mũ. Kÿ tóg ti mÿ: “hÿn, ã vênh rán ti, sÿ ã mÿ ã név(e) térem kÿ 50 (ke) rán jé,” he mũ. Kÿ tóg rán mũ sir.

⁷ Kÿ tóg ù ù mÿ: “jo ã?” he mũ gé. “Ã név(e) hê ri ke nĩ?” he tóg mũ gé. Kÿ tóg ti mÿ: “trigo tÿ saco tÿ 100 (ke) ki inh név(e) jê,” he mũ. Kÿ tóg ti mÿ: “hÿn, ã vênh rán ti, sÿ ã mÿ ã név(e) térem kÿ 80 (ke) rán jé,” he mũ gé. Kÿ tóg rán mũ gé sir.

⁸ Kÿ ti patrão tóg mêng mũ, ti camarada tÿ nén han mũ ti. Kÿ tóg ti mÿ: “jÿkre (ka)mê ã tóg nĩ, kÿ ã tóg ù tÿ hên ri ke tÿ ã to há nĩ han, ã tÿ ag mÿ ag név(e) rem kÿ,” he mũ, ti patrão ti,” he tóg, Jesus ti.

“Kÿ hã vê. Û tÿ inh ki ge tũ ag vÿ ãjag tũ to jÿkrén há han tĩ, inhhã, ha mẽ. ãjag krĩ há kãfór han ag tóg tĩ ag tũ to jÿkrén ki. ãjag tÿ inh ki ge mũ ra ag tóg ãjag krĩ há kãfór han tĩ. Tÿ ag êprã ke nÿtĩ, hã kÿ ag tóg tag ki nén to jÿkrén há han tĩ,” he tóg.

⁹ “Hã kÿ sóg ãjag mÿ tó mũ. Ti camarada ên ri ke han nĩ, ãjag tũ tÿ ùn mÿ vênh kãpãm nĩ, ãjag tÿ ga kri mũn kÿ. Kÿ ag tóg ãjag to há nÿtĩnh mũ. Kejên ãjag tóg ãjag tũ ré kÿ mũnh mũ. Ên kã ãjag tóg mũ há han ke mũ gé. Kÿ ãjag tóg kanhkã tá junjun ke mũ sir, ãjag tÿ ag mÿ ãjag tũ tÿ vênh kãpãm kÿ.

¹⁰ Û tÿ nén ù sĩ ki rĩr há han kÿ tóg nén ù ki rĩr há han kân ke mũ gé. Jãvo ù tÿ nén ù sĩ ki rĩr kónãn kÿ tóg nén ù ki rĩr kónãn kân ke mũ gé sir.

¹¹ Êg tÿ ga kri nén vég mũ vÿ kãnhmar tũ' he mũ. ãjag tÿ hã ra ga kri ãjag tũ ki rĩr há han tũ kÿ ãjag tóg kanhkã tá tÿ nén ùn tũ nÿtĩnh mũ gé.

¹² ãjag tÿ êprã nén vég mũ vÿ tÿ Topê tũ nĩ. Ti hã mÿ ãjag tóg ki rĩr ke mũ. ãjag tÿ ti tũ ki rĩr há han tũ kÿ tóg sir ãjag mÿ ãjag tũ pê ên nĩm ke tũ nĩ gé, kanhkã tá,” he tóg.

¹³ “Ã jagrê régre nĩn kÿ tóg vênhmÿ tĩ. ã tÿ Topê hã tÿ jagrê nĩn kÿ jãnkamy tân ên tÿ jagrê nĩ sór tũg nĩ. ã tÿ jãnkamy e ve sór kÿ ti hã mĩ êkrén kÿ ti hã vÿ tÿ ã jagrê nĩnh mũ. Kÿ êg tóg Topê tÿ êg mÿ nén tó mũ ên to jÿkrén há han ke tũ nĩgtĩ. ã tÿ Topê to há

nĩn kÿ ã tóg sir ga kri rico to vãsãn sór ke tũ nĩ. ã tÿ ga kri rico nĩ sór kÿ ã tóg Topê mĩ êkrég tũ nĩ, ha vemnĩ,” he tóg, Jesus ti. Ti tÿ êg tÿ ti tũ hã to jÿkrén há to jÿkrén há han ke tón hã vê.

Topê jÿkre

(Mt 11.12-13; 5.31-32; Mc 10.11-12)

¹⁴ Hã ra Fariseu ag tóg mêng mũ, ti tÿ nén tó mũ ti. Jãnkamy mág hã to ag tóg há nÿtĩ, rico ke sór ag nÿtĩ, Fariseu ag. Kÿ ag tóg Jesus vĩ tag mẽ kÿ ag tóg ti to é he mũ.

¹⁵ Hã ra Jesus tóg ag mÿ: “êprã ke ag mÿ ãjag tóg há nÿtĩ ve nÿtĩ,” he mũ. “Hã ra Topê vÿ ãjag tÿ nén to jÿkrén mũ ên vég nĩ. Ón kÿ ãjag tóg há nÿtĩ. Êprã ke kãmĩ ãjag tóg tÿ ùn mág nÿtĩ. Topê mÿ ãjag tóg kórég nÿtĩ jãvo, ti mÿ kavéj ãjag tóg nÿtĩ,” he tóg.

¹⁶ “Moisés tÿ êg mÿ Topê vĩ tó ja ên vÿ João tá krÿg, vãsÿ Topê vĩ tó tĩ ag tÿ êg mÿ nén tó ja kar ên ti. João tá ti krÿg, êg kygpég tĩ ên tá. João tá jun kÿ vênh ù tÿ hên ri ke ag tóg vãsãnsãn tĩ, ag tÿ ve jé.

¹⁷ Hã ra Topê jÿkre si ên tóg tũ' henh ke tũ nĩ gé, Moisés tÿ êg mÿ nén tó mũ ên ti. Ga vÿ tũ' henh ke tũ nĩ. Ki króm kân kÿ tóg nĩnh mũ,” he tóg.

¹⁸ “Êg prÿg kÿ tóg ge nĩ, ha mẽ. ã tÿ ã prÿ fi fón kar kÿ ù fi tÿ prÿg mãn kÿ ã prÿ tũ fi vê sir. Kÿ fi mén tÿ fi fón kÿ ù tÿ fi tÿ prÿg mãn kÿ fi mén tũ vê gé sir,” he tóg, Jesus ti. Ti tÿ Topê jÿkre kãmén hã vê.

Û tÿ Topê vĩ mẽ jãvãnh ag tÿ nũgme ki vár

¹⁹ Kÿ Jesus tóg ag mÿ: “kejên ù tóg nĩgtĩ, ùn rico pê,” he mũ. “Kur kaja e tu ti tĩgtĩ, ùn tánh sá, kur ha pê. Kurã kar ki tóg vêjên há ko tĩ. Festa ri ke han tóg tĩ, kurã kar ki.

²⁰ Kÿ ùn jagtar tóg nĩgtĩ gé. Ti jiji hã vÿ: Lázaro, he mũ. Vênh kaga fugfo han vãnhan tóg tĩ, kÿ tóg nÿ nĩ, ùn rico jãnkã ki.

²¹ Ên vÿ kókĩr tĩgtĩ, ã kaga to. Kÿ tóg ùn rico jên vár ko sór tĩgtĩ, ti jên mru, hã ra tóg ti mÿ nĩm tũg tĩ. Cachorro hã ne ti pênĩn e nÿtĩ. Vênh fugfo han vãnhan ên tugmãn ag tóg tĩ.

²² Kejên tóg ter mũ, ùn jagtar ên ti. Kÿ Topê tÿ jênê jafã ag vÿ ti va mũ mũ, ti kuprĩg ti, kanhkã ra. Tá Abraão tóg nĩ nĩ, êg jóg' jóg ve ti, kÿ tóg ti mré nĩ nĩ sir, ti tÿ tÿ ti krê'krê nĩn kÿ.

Kar ùn rico tóg ter mũ gé sir. Kĩ ag tóg ga kátá ti péju(g) mũ.

²³ Hã ra tóg nũgme ki kutẽ mũ, ti kuprĩg ti. Inferno tá ti vèsyrehn jagy han mũ sir. Kejèn tóg kanhkã ki êvãnh mũ, kĩ tóg tá Abraão vég mũ, Lázaro ke gé, ti tỹ Abraão mré nĩn kĩ, kuvar há tá.

²⁴ Kĩ tóg ag mũ prẽr mũ. Kĩ tóg Abraão mũ: “!..Ijóg!..!” he mũ. “!..Abraão..!” he tóg “!..Ijagãgtãn ra..!” he tóg. “Lázaro jẽnẽ ra, ti tỹ ã nĩ(gé) juja junun mrãn kĩ inh nũnẽ mrãn sĩ han jé. Inh mũ tóg rỹjgy tãvĩ tĩ, pĩ kãki,” he tóg, Abraão mũ, ùn rico ja ên ti.

²⁵ Kĩ Abraão tóg ti mũ: “inh kósin,” he mũ. “Ã tỹ ga kri tĩg ja ên ki êkré. Tá ã tóg há tĩ ja nĩgtĩ, jãvo Lázaro tóg jagtar ja nĩgtĩ. Kĩ tóg tag ki há han tĩ nĩ, jo ã tóg vèsyrehn jẽ nĩ, ã tỹ ti jagãgtãn ja tũ nĩn kĩ.

²⁶ Kĩ êg kujú ki tóg tỹ kãgnó nĩ, kĩ ù tóg pãte rãnh ke tũ nĩ. Tag ki ke pi(jé) ên ra tĩg mũ', ên tá ke pi(jé) tag ra kãtĩg mũ gé', kãgnó tag tugrĩn',” he tóg, Abraão ti, ùn rico ja ên mũ.

²⁷ Kĩ ùn rico ja tóg ã jóg tỹ Abraão mũ: “kỹ sóg ã mũ nèn ù tó sór mũ, ha mẽ,” he mũ. “Ã mũ inh jóg ãn ra ti jẽnẽnh ke tũ? Tá inh mré ke ag vỹ nỹtĩ.

²⁸ 5(ke) ag nỹtĩ, inh mré pafa ja ag. Ti tỹ ag mũ tónh tĩg jé, ag tỹ tag ki junjun tũ nĩ jé, ag tỹ inh mré vèsyrehn tũ nĩn jé,” he tóg, ùn rico ja ti, Abraão mũ.

²⁹ Kĩ Abraão tóg ti mũ: “tá ag tóg Moisés tỹ êg mũ nèn tó ja ên mẽnh mũ, Topẽ vĩ tó tĩ kar ag vĩ ke gé. Hã kĩ ag tóg Topẽ vĩ jẽmẽnh mũ, ag tỹ mẽ sór kĩ,” he tóg.

³⁰ Hã ra tóg ã jóg tỹ Abraão ti mũ: “vó” he mũ. “Vẽser tỹ ag tá jun mũ ra ag jẽmẽ há han ke mũ vễ, kĩ ag tóg ãjag jykre pãno ên tovãnh ke mũ vễ, vễser tỹ ag mũ tó mũ ên ti,” he tóg.

³¹ Hã ra tóg: “vó,” he mũ gé. “Ag tỹ Moisés vĩ jẽmẽ sór tũ nĩn kĩ ag tóg vễser vĩ mẽnh ke tũ nĩ gé, ag tỹ Topẽ vĩ tó tĩ ag vĩ mẽ jãvãnh nỹtĩn kĩ,” he tóg, Abraão ti, ùn rico ja ên mũ,” he tóg, Jesus ti. Ti tỹ ag mũ êg tỹ Topẽ vĩ jẽmẽ jãvãnh nỹtĩn kĩ vèsyrehn ke ên tón hã vễ.

Topẽ vĩ mranh tỹ jagy nĩ (Mt 18.6-7, 21-22; Mc 9.42)

¹ Kĩ Jesus tóg ã mré mũ tĩ ag mũ: “ũ tỹ hẽn ri ke ag vỹ ù tỹ iso há ên tỹ isovãnh han sór mũ, ha mẽ,” he mũ. “Vèsyrehn tãvĩn mũ jé ag tóg ke mũ, tag to. Topẽ vỹ ag ve kónãn tãvĩn mũ, ag tỹ ùn krĩn kónãn mũ tag to.

² ù tỹ ag krĩn kónãn mũ mũ tóg há nỹnh mũ vễ, êg tỹ pó tỹ kra mág tỹ ag nunh to sa kĩ goj nig kujú ki ag vãm jé. Tag vỹ ag mũ jagy tĩ vễ. Hã ra ag tóg ti jagy tag kãfór venh ke mũ, ag tỹ ùn sĩ tỹ inh ki rã kĩ nĩ (hã) ra ti tỹ inh vĩ mranh han sór kĩ.

³ To jykrén, vẽnhi ki rĩr kĩ.

Kejèn ã régre vỹ Topẽ vĩ mranh mũ. Kĩ ti mũ tómnĩ, ti tỹ kygnẽ ti. Ti tỹ tovãnh sór kĩ ti mũ vẽnhi pãte fón nĩ.

⁴ Hẽn ri ke mũn tóg ã tỹ Topẽ vĩ mranh han sór mũ han mãn', han mãn' he mũ, kejèn. Kurã pir ki tóg ã jũ tỹ hẽn ri ke han sór mũ, hẽn ri ke mũn. Hã ra tóg ã jũ han kar kĩ: “inh pi(jé) ke mãn mũ ha',” henh ke mũ gé. ã jũn kĩ tóg tónh kãtĩg mãn', tónh kãtĩg mãn' he mũ gé. Kĩ ti mũ vẽnhi pãte fón to krónh ke tũg nĩ,” he tóg, Jesus ti.

Êg tỹ Topẽ ki rã há han ke

⁵ Kĩ Jesus tỹ ùn vin mũ ag tóg ti mũ: “êg tỹ Topẽ ki rã há pẽ han há tóg tĩ,” he mũ. “Kỹ to êg tar han nĩ,” he ag tóg, Jesus mũ.

⁶ Kĩ tóg ag mũ: “ãjag tỹ Topẽ ki rã kĩ tóg há tĩ,” he mũ. “Ka tỹ mostarda fy mũ êkrén nĩ,” he tóg. “Sĩ ti nĩ, hã ra tóg mog tĩ. Tag ri ke han nĩ, Topẽ ki rã kĩ. Ti ki rã kĩ ãjag tóg nèn ù kar to tar nỹtĩnh mũ. Ka tag ve ra, ka krén tag ti. ãjag tỹ ti mũ: “ã jãre tỹ ga tá kãkutẽ, kĩ goj nig ki vẽnhi krãn,” hen kĩ tóg kenh mũ, ãjag tỹ Topẽ ki rãn kĩ,” he tóg, Jesus ti.

Tỹ êg Topẽ camarada nỹtĩ

⁷ “ãjag camarada jykre to jykrén nĩ,” he tóg. “ãjag japỹ ki tóg rĩr tĩ, ga tỹ vĩrĩn ken kĩ, ke tũ nĩn kĩ tóg ãjag mẽg ki rĩr tĩ gé. Rãkãnh kĩ tóg ã rãnrãj ja tá kãtĩ tĩ. Kĩ ãjag pi(jé) ti mũ: “kunĩg, jẽn jé,” he tĩ'.

⁸ Ti mũ ãjag tóg: “inh mũ vễjẽn han, ijẽn jé,” he tĩ. “Kuri ã kur tãnfyn kĩ tógfĩn, ã tỹ inh mũ vễjẽn jun jé, ijẽn jé, kron jé, kar kĩ ã tóg jẽn ke mũ gé sir, kron ke mũ gé sir, ijẽn kar kĩ,” he ãjag tóg tĩ, ãjag camarada mũ.

⁹ Kÿ ãjag tóg ti mÿ vÿ há han tũ nÿ gé, ti tÿ ãjag vÿ ki króm mũ ra. ãjag camarada vÿ mÿr, ti rãnrãj vÿ, hã kÿ tóg ãjag vÿ ãn han ke mũ.

¹⁰ Kÿ ãjag camarada ag ri ke han nÿ, Topê mÿ, ha mẽ. ãjag tÿ Topê vÿ ki króm kãn kÿ jagnê mÿ: “ti camarada vÿ tÿ ãg nÿtÿ,” hemnÿ. “Ti tÿ ãg mÿ nén tó mũn hã han ãg tóg, kÿ tóg tÿ nén ù tũ nÿ,” hemnÿ jagnê mÿ. “Ti vÿ han kãn tugrÿn ãg tóg há nÿtÿ,” he tũg nÿ,” he tóg, Jesus ti.

Jesus tÿ ãn kaga tÿ 10 (ke) ag tÿ há' he

¹¹ Kÿ Jesus tóg Jerusalém ra tũg sór mũ. Hã kÿ tóg ga tÿ Samaria fyr mÿ tÿ mũ. Ga tÿ Galiléia mré ti fyr vÿ.

¹² Tá tóg ãmã ù ki rã mũ, kÿ ù tÿ 10 (ke) ag tóg ti kato tãgtê mũ sir. Vÿnh kaga kren vãn hyn han ag tóg mũ, lepra han kÿ. Hã kÿ ag tóg kór há tá nÿtÿ, kuvar há tá.

¹³ Jamã hár(a) ag tóg prÿnprÿr mũ, kÿ ag tóg: “!..Jesus'..!” he mũ. “!..Senhor'..!” he ag tóg mũ. “!..Ëg jagãgtãn ra..!” he ag tóg mũ.

¹⁴ Kÿ tóg ag ki ãvãn mũ, kÿ tóg ag mÿ: “Topê tũ ki rÿr tÿ ag mÿ vÿnh ven mũjãg,” he mũ. Kÿ ag tóg mũ mũ.

Ag mũn kã ag tóg jãnhkri' he mũ sir, ag fãr ti, tá junjun to hã. Hághã' he ag tóg mũ sir.

¹⁵ Kÿ ag kãmÿ ãn pir tóg kyrã mũ, Jesus to. Topê mÿ tóg vÿ há han mũ, ã tÿ há' hen kÿ. Kÿ vÿnh kar vÿ ti vÿ mẽg mũ.

¹⁶ Ti tÿ Jesus tá jun kÿ tóg ti krêm mũg ke mũ. Ti mÿ tóg: “inh mÿ tóg há tÿ, ã tÿ isÿ há' hen kÿ,” he mũ. Samaria tá fóg ù vÿ, Jesus to ãn kyrã mũ ãn ti.

¹⁷ Kÿ Jesus tóg: “ũ tÿ 10 (ke) tũ mÿ', hã vÿ: há', he mũ?” he mũ. “Hã ra ãn pir ne kãtÿg ja nÿ'. Hÿn, ù ag, ù tÿ 9 (ke) ãn ag?” he tóg.

¹⁸ “Fóg tag hã vÿ ã pir mÿ kyrã, Topê to: “ũn mág vÿ tÿ ti nÿ,” he jé,” he tóg, Jesus ti.

¹⁹ Kÿ tóg fóg ãn mÿ: “jãgnê ra,” he mũ. “Ha tÿg,” he tóg. “Á tÿ inh ki rã kÿ, hã kÿ ã tóg há' he mũ,” he tóg, Jesus ti.

Topê tÿ tÿ ãg pã'i nÿ to vÿnh jykre (Mt 24.23-28, 37-41)

²⁰ Kejÿn Fariseu ag tóg ti ki jëmÿnh kãmũ mũ. “Topê tÿ tÿ ãg pã'i nÿ ãn mÿ ver kór gy nÿ, mÿ kuvar gy?” he ag tóg ti mÿ. Kÿ tóg ag mÿ kãmén mũ sir. “Ti vég tũ ãg tóg nÿ, ãg kanê tÿ, Topê tÿ tÿ ãg pã'i nÿ ti,” he tóg.

²¹ “Hã kÿ ãg tóg to: “tag kã ti nÿ, tãtã ti nÿ,” henh ke tũ nÿ gé. Ha mẽ, ãjag kãmÿ ti huri vÿnh ven, ti tÿ tÿ ãg pã'i nÿ ti, ãjag tÿ ti vég tũ (hã) ra,” he tóg.

²² Kÿ tóg ã mré mũ tÿ ag mÿ: “tÿ sóg ãprã ke fi kósin nÿ,” he mũ. “Kejÿn tóg ãjag tÿ Topê tÿ tÿ ãg pã'i nÿ venh ha pÿ tÿnh mũ. Ti tÿ kurã pir ki vÿnh ven mũ vÿ ãjag mÿ há tÿnh mũ vÿ, hã ra ãjag tóg venh ke tũ nÿ ver,” he tóg.

²³ “Kÿ ag tóg ãjag mÿ: “tag ki ti jun ja nÿ,” henh ke mũ. “Ën tá tóg jÿ nÿ,” he jé ag tóg ke mũ gé. Kÿ venh mũ tũg nÿ hã ra. Ag vÿ jëmê sór tũg nÿ.

²⁴ Inh kãtÿg mãn ke vÿ ta tÿ kóm kóm ke ri ke nÿ. Ti tÿ kóm kóm ke kÿ ãg tóg nén kar vég tÿ, kanhkã krêm. Kÿ vÿnh kar vÿ ti tÿ kóm kóm ke ãn vég tÿ gé. Inh kãtÿg mãn ke vÿ ri ke nÿnh mũ, inh kurã ãn kã. Vÿnh kar vÿ inh ve kãn mũ. Tÿ sóg ãprã ke fi kósin nÿ,” he tóg.

²⁵ “Inh kãtÿg mãn ke to hã sóg hã ra vÿsÿrÿnh mág han ke mũ ver. Ûri ke ag vÿ iso é henh ke mũ ver,” he tóg.

²⁶ “Kÿ inh kãtÿg mãn ke kurã ãn kã ãprã ke ag tóg han kãn ke mũ, ag tÿ Noé tÿ ga mÿ tÿ mũ kã nén han ja ãn ti.

²⁷ Ta kutê to hã ag tóg jÿn ja nÿgtÿ, jÿn kar kÿ ag tóg kron ja nÿgtÿ gé, vÿnh prÿ kutÿm ja ag nÿgtÿ gé. Ën kã Noé tóg kejÿn barco tÿ ãn kãra rã ja nÿ. Ti tÿ kãra rã kar kÿ ta tóg sir kutê ja nÿ, kÿ ag tóg goj var ki kãgter kãn ja nÿ.

²⁸ Kÿ tóg ri ke pÿ ja nÿ gé, Ló tÿ ga mÿ tÿg ki. Ën kã ag tóg jÿn ja nÿgtÿ gé, jÿn kar kÿ ag tóg kronkron ja nÿgtÿ gé. Vender ke mũ ja ag nÿgtÿ gé, kygÿm ke mũ ja ag nÿgtÿ gé. Ëkrãn ja ag nÿgtÿ gé, ãn hyn han ja ag nÿgtÿ gé.

²⁹ Ën kã Ló tóg kejÿn cidade tÿ Sodoma tá kãkutê ja nÿ, kÿ pÿ tóg kanhkã tá kãtêre ja nÿ, cidade kri, pó tÿ enxofre nÿja ãn ke gé. Kÿ ãn tóg ag kãgtén kãn ja nÿ. Topê tÿ ag vóg kónãn ke to jykrén sór tũ ja ag nÿtÿgtÿ.

³⁰ Ge ti nÿnh mũ gé, ãprã ke fi kósin tÿ vÿnh ven mãn ke kurã ãn kã. Mÿ ãkrén ke tũ ag nÿgtÿ gé, ti to há tũ ag.

³¹ Û tÿ kurã ãn kã ã ãn rã hã tÿn kÿn jé ã tũ mãn rã sór tũg, ti tũ tÿ ti ãn krêm nÿtÿ ti. Û tÿ ãpÿ tá tÿ ãn jé ã tũ to vÿn ke tũg.

³² Ló prÿ fi to jykrén.

³³ Ājag tỹ ājag jykre hã han sór kỹ ājag nũgme ki vár ke mũ, ha vemnĩ. Ājag tỹ isugrĩn ājag jykre fi mãn kỹ ājag krenkren ke vễ, ha vemnĩ,” he tóg.

³⁴ “Hã kỹ sóg tag tó mũ, ha mẽ. Kuty ên kã, inh kãtĩg mãn ke kuty ên kã ùn régre ag vỹ jagnê mré nũgnũr nỹtĩnh mũ. Ag kãmĩ ùn pir jé prêr sóg ke mũ, kỹ tóg inh mré tĩnh mũ, jãvo ti régre vỹ kã nỹnh mũ, ha vemnĩ.

³⁵ ùn régre fag vỹ êgtynyn nỹtĩnh mũ, jagnê mré, ên kã. Kỹ sóg ùn pir fi jé prêr ke mũ, kỹ fi tóg inh mré tĩnh mũ, jãvo fi régre fi vỹ kã jẽnh mũ, ha vemnĩ.

³⁶ ùn régre ag vỹ êpỹ ki rãnhrãj mũnh mũ, ên kã. Kỹ sóg ùn pir jé prêr ke mũ, kỹ tóg inh mré tĩnh mũ. Jãvo ti régre vỹ tá tĩnh mũ gé, ha vemnĩ,” he tóg, Jesus ti.

³⁷ Kỹ ti mré mũ tĩ ag tóg êg Senhor mỹ: “tag hẽ tá ke nĩnh mũ hỹn'?” he mũ. Kỹ tóg ag mỹ: “kurã ên kã ājag ki kanhró nỹtĩnh mũ,” he mũ. “Nén ù ter nỹg ja ri ke ti nĩ. Hã tá tóg vẽn hãn tĩ, jãtã ti, he êg tóg tĩ. Tag ri ke ti nĩnh mũ, ha vemnĩ,” he tóg, Jesus ti. Ti tỹ ã kãtĩg mãn ke tón hã vễ.

18

Êg tỹ Topê mré vỹ to krónh ke tũ

¹ Kỹ Jesus tóg ag mỹ: “ājag tỹ Topê mré vēmén ke vỹ ge nỹnh mũ, ha mẽ,” he mũ. Êg tỹ kurã kar ki Topê mré vēmén kỹ tóg há tĩnh mũ, êg tỹ to krónh ke tũ nĩn kỹ. Tag tỹ tóg ag kanhrãnrãn sór mũ, ã mré mũ tĩ ag, hã kỹ tóg tag tó mũ, ha mẽ.

² “Kejẽn pã'i tóg nĩgtĩ, êmã ù tá,” he tóg. “Ag tỹ jagnê to jũ vэг ti tĩ. Ti rãnhrãj hã vễ. Hã ra tóg Topê kamêg vãn hãn, ti jykre pãno nĩn kỹ. Kỹ tóg ã mré ke ag kamêg vãn hãn pẽ nĩgtĩ gé. Kórég pẽ ti nĩgtĩ.

³ Ti jamã tá ù fi tóg nĩgtĩ gé, ùn mên ter ja fi. Ên fi vỹ kejẽn ti to kãtĩg kỹ ti mré vēmén mũ. Kỹ fi tóg ti mỹ: “inh lograr ke sór mũ ên ag jo inh vemnĩ,” he mũ.

⁴ Hã ra tóg mẽ jãvãn hãn. Jatu tóg nĩ nĩ, kysã tỹ hẽn ri ke ki. Kỹ fi tóg ti tá jun tỹ hẽn ri ke han mũ, to krónh ke tũ fi nĩ. Kỹ tóg kejẽn to jykren mũ. “Topê kamêg vãn hãn inh nĩgtĩ,” he tóg. “Ủ kamêg vãn hãn inh nĩgtĩ gé.

⁵ Hã ra fi tóg isovãn hãn tũ pẽ nĩ, ùn mên ter ja ên fi. Kurã kar ki fi tóg inh mỹ to vĩnh kãtĩ

tĩ. Kỹ inh hỹn fi jy rãnh mũ ha, ke tũ nĩ mũ ra fi tóg ijũ han ke mũ, fi tỹ inh venh kãtĩ to krónh ke tũ nĩn kỹ, ha vemnĩ,” he tóg, pã'i kórég ti,” he tóg, êg Senhor tỹ Jesus ti.

⁶ Kỹ tóg ag mỹ: “ti vỹ jẽmẽ ra,” he mũ. “Jykre pãno ti nĩ, pã'i kórég ên ti, hã ra tóg fi tỹ ti mỹ vỹ e ên to fi kren han sór mũ,” he tóg.

⁷ “Hã kỹ Topê vỹ ājag krenkren han ke mũ gé. Ājag kuprêg ja tóg nĩ mỹr, kỹ ti mré vēmén nĩ. Kurã ki ti mỹ vĩmnĩ, kuty tá ke gé. Ājag kren han vãn hãn ve ti nĩ, kejẽn.

⁸ Hã ra tóg ājag krenkren han ke mũ, kãnhmar, ha vemnĩ. Ki hã sóg tó mũ,” he tóg. “Hã ra êprã ke fi kósin ên tỹ kãtĩg mãn kỹ ag mỹ ti ki ge sór mũ vỹ?” he tóg, Jesus ti.

Êg tỹ: “tỹ inh ùn há nĩ,” henh ke tũ

⁹ Kỹ Jesus tóg ag kanhrãn mãn mũ gé. Ủ tóg ù tỹ ti vỹ mẽg mũ ên ag kãmĩ nỹtĩ, hã ra ag tóg vêsô: “tỹ êg tóg ùn há nỹtĩ,” he tĩ. “Kórég tũ êg nỹtĩ, jo ù ag ne kórég nỹtĩ,” he ag tóg tĩ, vêsô, Jesus vỹ mẽg mũ ù ag. Ên ag kanhrãnrãn sór tóg mũ, Jesus ti. Kỹ tóg ag mỹ: “ājag jykre vỹ ge nỹnh mũ, ha mẽ,” he mũ.

¹⁰ “Kejẽn Fariseu ù tóg nĩgtĩ. Topê jo ìn ra tóg tĩ mũ, tá Topê mré vỹ jé. Ti mré ù tóg ra tĩ mũ gé, ù tỹ governo mỹ jãnkamy mäg tĩ ti. Topê mré vỹ sór tóg mũ gé.

¹¹ Kỹ Fariseu tóg Topê mré vēmén jẽ nĩ. “Topê,” he tóg. “Inh mỹ tóg há tĩ, isỹ jykre kórég tũ nĩn kỹ, ag jãvo. Ủ ag tóg nén ù pēju(g) tĩ, hã ra sóg han tũ nĩgtĩ. Ủ ag tóg nén ù vẽn hãmỹ han tĩ inhhã, jãvo inh pi(jé) han tĩ'. Ājag prũ tũ fag mré ag tóg nỹgtĩ inhhã. Kỹ governo mỹ jãnkamy mäg tĩ tag ti vỹ kórég nĩ gé inhhã.

¹² Ag jãvo sóg vẽn hãn jykre há han tĩ. Semana kar ki sóg vãkre régre han tĩ, jêg mẽ tĩ ki. Hã ki sóg ã jykre ki króm tĩ. Isũ tỹ sóg dízimo kajãm tĩ, ã mỹ. Sỹ nén ù tỹ 10 (ke) ki sóg ùn pir nĩm tĩ, ã mỹ dízimo han kỹ,” he tóg, Fariseu ti, Topé mỹ.

¹³ Hã ra governo mỹ jãnkamy mäg tĩ ên tóg kór há tá jẽ nĩ, kuvar há tá, mỹ'ãg kỹ. Kỹ tóg kanhkã ki êvãn hãn tũ nĩ gé. Ā fe kri tóg kãgmĩg mũ, ti tỹ mỹ'ãg mäg kỹ. Kỹ tóg Topê mré vỹ mũ. “Topê,” he tóg mũ gé. “Ā vỹ mranh inh

mÿr,” he tóg. “Ă mÿ inh jagăgtăn ke tũ hă ra,” he tóg, Topě vĭ mranh tĭ ěn ti,” he tóg, Jesus ti.

14 “Ha mẽ, Topě vĭ ti mÿ vĕnh păte fón, hă kÿ tóg jatun mÿ vyr. Jăvo tóg Fariseu ěn mÿ vĕnh păte fón tũ nĭ. Ge ti nĭgtĭ. Ěg tÿ vĕso: “há inh nĭ,” hen kÿ Topě tóg ěg to kórég nĭ. Kÿ tóg ěg térem mũ sir. Ěg tÿ hă ra vĕso: “kórég inh nĭ,” hen kÿ Topě vĭ ěg to há nĭ, kÿ tóg ěg tÿ ũn mág han ke mũ gé sir,” he tóg, Jesus ti.

*Jesus tÿ ũn kăsir ag to há
(Mt 19.13-15; Mc 10.13-16)*

15 Kÿ fag tóg gĭr tatĭ kămű mũ ti to, ti tÿ gĭr kri ģ nĭgé fi jé. Hă ra ti mré mũ tĭ ag tóg vĕg mũ, kÿ ag tóg fag to jũ mũ, ũ tÿ ag tatĭ kămű mũ fag to.

16 Hă ra Jesus tóg fag jé prĕr kÿ ag mÿ: “vĭ tũg nĭ, gĭr ag mÿ,” he mũ. “Gĭr ag tÿ iso kămű kamĕg tũg nĭ,” he tóg. “Ũ tÿ ge hă vĭ ěg Senhor tÿ Topě krĕm nÿtĭnh mũ,” he tóg.

17 “Sÿ ke há vĕ, hă kÿ sóg tó mũ. Gĭr ag vĭ iso há pĕ nÿtĭ. ũn kăsir tag ag ri ke nÿtĭmĭ, ke tũ nĭ mũ ra ģjag tóg Topě tÿ tÿ ěg pă'i nĭ venh ke tũ nĭ mÿr,” he tóg, Jesus ti.

*Ũn rico ag
(Mt 19.16-30; Mc 10.17-31)*

18 Kÿ kejĕn ũ tóg Jesus ki jĕmĕnh kătĭ mũ, pă'i ũ. Kÿ tóg ti mÿ: “Senhor’,” he mũ. “Hă ģ tóg nĭ,” he tóg. “Sÿ rĭr krÿg ja tũ venh há tóg tĭ. Sÿ ti ve jé inh hÿn vĕnh jykre há tÿ ne han ke mũ?” he tóg.

19 Kÿ Jesus tóg ti mÿ: “iso: “há ģ nĭ,” he sór tũg nĭ,” he mũ. “Ěg pi(jé) há nÿtĭ,” he tóg. “Topě hă ne ģ pir mÿ há nĭ,” he tóg.

20 “Topě tÿ nĕn ũ to ěg jyvĕn ja ěn ki kanhró ģ tóg nĭ, hă vÿ: ģ prũ tũ fi mré nÿ tũg nĭ, he mũ, ũ tĕn tũg nĭ, he mũ, nĕn ũ péju(g) tũg nĭ, he mũ, ũ to ón tũg nĭ, he mũ, ģ nÿ mré ģ jóg kamĕg nĭ, he mũ,” he tóg ti mÿ, Jesus ti.

21 Hă ra tóg: “ki króm kăn sóg, isĭn kă,” he mũ.

22 Kÿ Jesus tóg ti mÿ: “nĕn ũ pir vĭ tũ nĭ ver,” he mũ. “Ă tũ văm kăn nĭ, ģ tÿ ũn vĕsÿrénh mũ ag mÿ vin jé, jănkamy ti. Kÿ ģ tóg kanhkă tá tũ mág nĭ sir. Kar kătĭg nĭ, ģ tÿ inh mré tĭg jé,” he tóg ti mÿ, Jesus ti.

23 Kÿ tóg ti mÿ vĕnhmÿ tĭ, Jesus vĭ ti, ti rico pĕ nĭn kÿ.

24 Hă ra Jesus tóg ti mÿ vĕnhmÿ ěn ki kanhrăn mũ. Kÿ tóg ģ mré mũ tĭ ag mÿ: “jagy ti nÿ, ũn rico tÿ Topě tÿ tÿ ěg pă'i nĭ venh ke ti,” he mũ.

25 “Cavalo pănĭ sór vĭ prĕj nor fĭn răm ke tũ nĭ,” he tóg. “Ti tÿ fĭn răm ke ra tóg jagy tĭ vĕ, ũn rico tÿ Topě tÿ tÿ ěg pă'i nĭ venh ke ti,” he tóg.

26 Kÿ ti vĭ mĕg mũ ag tóg to vĕmĕn mũ. “Kÿ ũ hÿn kren ke tũ pĕ nĭ,” he ag tóg.

27 Kÿ Jesus tóg ag mÿ: “ĕpră ke ag vĭ tá junjun ke tũ nĭ vĕ,” he mũ. “Hă ra Topě hă tóg ěg tÿ tá junjun han ke mũ,” he tóg.

28 Kÿ Pedro vÿ: “ha vé,” he mũ. “Ěg tÿ nĕn ũ kar ré jé ěg tóg mũ mũ, ěg tÿ ģ mré mũ jé,” he tóg.

29 Kÿ Jesus tóg ag mÿ: “sÿ ke há vĕ, hă kÿ sóg tó mũ,” he mũ. “Ũ tóg kejĕn ģ jamă ré kÿ tĭ mũ, ti prũ fi, ti kăke, ti jăvy, ti han mũ fag, ti krĕ ré kÿ tóg tĭ mũ, Topě tÿ tÿ ěg pă'i nĭ tugrĭn, ti tÿ ti vĭ ki króm jé,” he tóg.

30 “Ěn vĭ tóg sir vĕnh kaja jé nĕn kar ěn tÿ ũn e venh ke mũ, ag jĕgja kă, ga kri, kar kÿ tóg văhă sir ěg rĭr krÿg ja tũ venh ke mũ gé sir, kanhkă tá,” he tóg, Jesus ti.

*Jesus tÿ ģ ter ke tó măn
(Mt 20.17-19; Mc 10.32-34)*

31 Kÿ tóg ũ tÿ 12 (ke) ag jé prĕr mũ, vyrmÿ, ag mÿ kămĕn jé. “Ha vé,” he tóg. “Jerusalém ra ěg mũ mũ, kÿ sóg tá ve kăn ke mũ, văsÿ Topě vĭ tó tĭ ag tÿ iso nĕn rán ja ěn ti,” he tóg. “Tÿ sóg ĕpră ke fi kósĭn ěn nĭ, hă kÿ ag tóg inh kămĕn ja nĭ, Topě vĭ ki.

32 Fóg ag mÿ ag tóg inh fĕg ke mũ, pă'i ag, Jerusalém tá, ha vemnĭ, ag tÿ iso é he jé, ag tÿ inh vóg kónăn jé, ag tÿ iso sug ke jé gé,

33 ag tÿ inh mrănmrăn jé. Ag tÿ isĕn ke vĕ. Hă ra sóg kură tăgtũ tũg kÿ rĭr măn ke mũ, ha vemnĭ,” he tóg, ti mré mũ tĭ ag mÿ, Jesus ti.

34 Hă ra ag tóg ti vĭ tag to jykrĕn tũ nĭ, ũ tÿ 12 (ke) ěn ag. Ti vĭ tóg ag mÿ vĕnhmÿ tĭ. Kÿ ag tóg ki kagtĭg nÿtĭ. “Ti tÿ ne tó nĕ hÿn’?” he ag tóg mũ sir.

*Jesus tÿ ũn kyvó tÿ há' he
(Mt 20.29-34; Mc 10.46-52)*

35 Ag mũn kÿ ag tóg Jericó to hă mũ mũ. Tá ũn kyvó vĭ ĕpÿr kri nĭ nĭ, ĕmĭn kri. “Inh

mỹ jänkamy nĩm,” he tóg tĩ, vènh kar mỹ, ti kyvó nĩn kỹ.

³⁶ Ën vỹ vènh kar tỹ ãpřy jagma mũ mẽg tĩ. Kĩ tóg ag mỹ: “ũ nẽ?” he mũ.

³⁷ Kĩ ag tóg ti mỹ: “Jesus vè, Nazaré tá ke ãn vè,” he mũ.

³⁸ Kĩ tóg prër mũ sir. “!..Jesus!..., Davi kósin!..., ijagãgtãn ra..!” he tóg mũ, prër kỹ.

³⁹ Kĩ Jesus jo mũ ag vỹ ti mỹ vĩ jũ han mũ. “Ëmẽ kã nĩ nĩ,” he ag tóg ti mỹ. Hã ra tóg prër mãn', prër mãn' he mũ. “!..Davi kósin!..., ijagãgtãn ra..!” he tóg.

⁴⁰ Kĩ Jesus tóg krỹg he mũ, kỹ tóg: “ti je prër,” he mũ. Kĩ ag tóg ti pére kãmũ mũ. Ti ki jun kỹ tóg ti mỹ:

⁴¹ “inh ã tỹ hẽ ri kenh ke?” he mũ. Kĩ tóg ãg Senhor mỹ: “sỹ venh há tóg tĩ,” he mũ.

⁴² Kĩ Jesus tóg ti mỹ: “kỹ tỹ vé,” he mũ. “Ã tỹ inh ki rã kỹ ã há' henh ke mũ,” he tóg.

⁴³ Kĩ tóg vèsỹmér ãvãnh há' he mũ sir. Kĩ tóg ti mré tĩ mũ. Topẽ mỹ tóg vĩ há han mũ. Kĩ tóg vènh kar mỹ há tĩ, ag tỹ ti tỹ há' he mũ ãn ven kỹ. Kĩ ag tóg Topẽ mỹ vĩ há han mũ gé sir.

19

Jesus tỹ Zaqueu venh tĩg

¹ Kĩ Jesus tóg cidade tỹ Jericó ki rã mũ sir, kỹ tóg fĩn rãm kỹ tĩg sór mũ.

² Hã ra ù tóg tá nĩ nĩ, ti jyjy hã vỹ: Zaqueu, he mũ. Governo mỹ jänkamy mǎg tĩ ag pã'i vè. Rico pẽ ti nĩ, rico tãvĩ.

³ Ën tóg Jesus ve sór mũ, ti tỹ Jericó fĩn rãm kỹ. Hã ra tóg rur jẽ, hã kỹ tóg ti vég tũ nĩ, vènh e ag tỹ ti pénĩn mũn kỹ.

⁴ Hã kỹ tóg ti jo vènhvãg tĩ mũ, kỹ tóg ka tỹ krén to tãpřy mũ, ti tỹ Jesus ve je, ti tỹ jagma tĩg kỹ.

⁵ Kĩ Jesus tóg ka ãn tá jun mũ. Hã ra tóg krĩg mỹ ãvãnh kỹ ka kri ti vég mũ. Kĩ tóg ti mỹ: “Zaqueu,” he mũ. “Kur kãtére to fũrũn ké. Isỹ ã ãn krêm nũr ke vè,” he tóg, Jesus ti.

⁶ Kĩ tóg tére tỹ mrãnh ke mũ sir. Jesus mỹ tóg: “mũ je ha,” he mũ. Ti mỹ tóg sér tĩ, Jesus tỹ ti ãn krêm nũr sór kỹ.

⁷ Hã ra vènh e ãn tóg Jesus to vĩ mũ sir, ti to jũ kỹ. “Topẽ vĩ mranh tĩ vè, ãn ti, hã ra tóg ti ãn krêm nũr sór mũ, vènh jykre pãno han tĩ ãn mré,” he ag tóg mũ.

⁸ Kĩ Jesus tóg ti ãn krêm nĩ nĩ. Kĩ Zaqueu vỹ ti mỹ vènh kãmén kãtĩ mũ, ã jykre to jykrén kỹ. Kĩ tóg ãg Senhor mỹ: “ha vé,” he mũ. “Isũ kuju vin je sóg ke mũ, ãn jagtar ag mỹ. Û ag lograr he ja sóg nĩgtĩ, ag tũ ki, hã ra sóg ag mỹ ti kãfór nĩm sór mũ ha. Sỹ jänkamy pĩr ki ù lograr he jan ki sóg ti mỹ ù tỹ 4 (ke) vin sór mũ,” he tóg, Zaqueu ti.

⁹ Kĩ Jesus tóg ti mỹ: “há ti nĩ,” he mũ. “Ûri ã tóg kren mũ, ã mré ke fag mré há,” he tóg. “Abraão kósin vỹ tỹ ã nĩ gé,” he tóg.

¹⁰ “Tỹ sóg ãprã ke fi kósin nĩ. Ûn vãfor mũ ãn jãvãnh je sóg kãtĩg, sỹ ag krenkren han je, ãn jykre pãno han mũ ãn,” he tóg, Jesus ti.

Jänkamy to comparação

(Mt 25.14-30)

¹¹ Hã ra ag tóg ti vĩ mẽ há han mũ, kỹ tóg ag mỹ Topẽ tỹ tỹ ãg pã'i nĩnh ke ti kãmén sór mũ. Jerusalém to hã tóg nĩ, hã kỹ ag tóg ti to: “Topẽ tỹ tỹ ãg pã'i nĩ hỹn vènh ven ke mũ, ti tỹ tá jun kỹ,” he mũ.

¹² Kĩ Jesus tóg ag mỹ kãmén mũ, Topẽ tỹ tỹ ãg pã'i nĩnh ke tỹ ver vènh ven ke tũ nĩ. Kĩ tóg tag tó mũ, ha mẽ. “Kejẽn pã'i tóg nĩgtĩ,” he tóg. “Ën tóg ga ù ra tĩg sór mũ, tá ã tũ ve je, ga ãn tá ã tũ han je. Tag han kar tóg tá vỹn ke sór mũ.

¹³ Pã'i ãn vỹ ã camarada tỹ 10 (ke) ag je prër mũ, kỹ tóg ag mỹ jänkamy prestar he mũ sir. Ag kar mỹ tóg ti kãmur pĩr nĩm mũ, jänkamy tỹ, ù tỹ 10 (ke) ag mỹ. Kĩ tóg ag mỹ: “ha ãn mỹ tỹ rãnrãj,” he mũ. “Kejẽn sóg vỹn kenh ke mũ, kỹ sóg tugnỹm ke mũ, ãjag rãnrãj ti,” he tóg. Kar tóg tĩ mũ sir.

¹⁴ Hã ra ti krêm ke ù ag vỹ ti to há tũ nỹtĩ, kỹ ag tóg ti nón vènh vĩ jẽnẽg mũ. Kĩ ag tóg: “ã tỹ ãg kri tỹ pã'i nĩn kỹ tóg vènhmỹ nĩ,” he mũ, “ãg tỹ tag ve jãvãnh tóg tĩ,” he ja ag tóg nĩgtĩ, ag tỹ ti mỹ vènh vĩ jẽnẽg mũn kã.

¹⁵ Hã ra tóg tỹ pã'i nĩn kỹ kějẽn vỹn ke mũ, ga ãn ve kar kỹ, tá ti rãnrãj han kãn kar. Kĩ tóg tỹ pã'i mág jẽ. Vỹn ke kỹ tóg ã camarada ag je prër mũ sir, ti tỹ ãn mỹ jänkamy vin ja ãn ag. Ti tỹ ag rãnrãj tugnỹm sór vè, ag ganho ve sór vè gé.

¹⁶ Kĩ ù tóg ti tá jun kỹ ti mỹ: “pã'i,” he mũ. “Ti kãmur pĩr nĩm ã tóg mỹr. Hã ra sóg kri ù tỹ 10 (ke) ganhar ké,” he tóg.

17 Kÿ ti patrão tóg ã camarada mÿ: “jykre há tâvĩ ã tóg nĩ,” he mÿ. “Nén sĩ ki rĩr há han ã tóg, hã kÿ ã tóg cidade tÿ 10 (ke) ki rĩr mÿ ha,” he tóg, pã'i ti, ã camarada mÿ.

18 Kÿ ù tóg ti tá jun mÿ gé. Kÿ tóg ti mÿ: “pã'i!,” he mÿ gé. “Ti kãmur pir nĩm ã tóg mÿr. Hã ra sóg kri ù tÿ 5 (ke) ganhar ké,” he tóg.

19 Kÿ ti patrão tóg ti mÿ: “cidade tÿ 5 (ke) ki rĩr jé ã tóg ke mÿ ha,” he mÿ gé.

20 Kÿ ù tóg tá jun mÿ gé. Kÿ tóg ti mÿ: “pã'i!,” he mÿ gé. “Ha vé, ã tũ ti,” he tóg. “Inh krĩ pãgia ki sóg tógfĩn kÿ nĩm han.

21 ã kamêg ja inh nĩ, ã vĩ tar to. ã tÿ nén vin ja tũ ên mãn sór ã tóg tĩ, ã tÿ nén krãn ja tũ kunũnh sór ã tóg tĩ,” he tóg, ti camarada ti, pã'i ti mÿ.

22 Kÿ ti patrão tóg ti mÿ: “ã vĩ tóg ã jykre pãno han mÿ, ha mē,” he mÿ. “Inh mÿ vĩ tar han tí? Inh mÿ sÿ nén vin ja tũ mãn sór tí? Inh mÿ sÿ nén krãn ja tũ kunũnh sór tí? Hã ki kanhró ã mÿ nĩ?”

23 Kÿ ã tÿ ne jé inh jãnkamy tÿ banco ki rãnrãj tĩ ag mÿ vin ja tũ nĩ nē? ã tÿ ag mÿ vin mÿ ra sóg ti juro venh mÿ vē, kÿ sóg isũ kãfór mãn ke mÿ vē,” he tóg, ti patrão ti, ã camarada mÿ.

24 Kÿ tóg tá nÿtĩ ag mÿ: “ti nĩgã ti tũ mã,” he mÿ. “Û tÿ ti kãmur tÿ 10 (ke) mãn ja ên mÿ nĩm, ti tũ pir ti,” he tóg mÿ sir.

25 Kÿ ag tóg ti mÿ: “pã'i!,” he mÿ. “Ti kãmur tÿ 10 (ke) vÿ tÿ ti tũ nÿtĩ. Tũ mág ve ti huri,” he ag tóg, pã'i mÿ.

26 Kÿ tóg: “hÿ,” he mÿ. “Hã kÿ sóg tó mÿ. Ûn tũ mág vÿ mãn mãn ke mÿ. Û tÿ tũ sĩ nĩ ên tũ kunũnh kãn jé ag tóg ke mÿ gé,” he tóg.

27 “Kÿ inh kato tē mÿ ag pére kãmũmnĩ, ù tÿ iso: “ti tÿ êg kri tÿ pã'i jēn kÿ tóg êg mÿ kórég nĩ,” he mÿ ên ag. Ag kãgtén ra, inh rĩnve,” he tóg, pã'i ti,” he tóg, Jesus ti. Ti tÿ êg tÿ ti rãnrãj ki rĩr há han ke kãmén hã vē.

28 Tag tó kãn kÿ tóg tá kãkutē mÿ sir, kÿ tóg cidade tÿ Jerusalém ra tĩ mÿ.

Jesus tÿ Jerusalém tá jun

(Mt 21.1-11; Mc 11.1-11; Jo 12.12-19)

29 Ti tÿ Jerusalém ra tĩg kÿ tóg êmã tÿ Betfagé to hã jun mÿ, êmã tÿ Betânia tá, pãnónh tÿ Oliveiras he mÿ ên tá. Tá jun kÿ

tóg ã mré mÿ tĩ régre ag jēnēg mÿ, ag tÿ ti mÿ ag mēg tÿ burrica ve jé.

30 Hã kÿ tóg ag mÿ: “êmã ên ra mÿmnĩ, êg jo êmã ên ra,” he mÿ. “Tá junjun kÿ ãjag tóg burrica fi kósin venh mÿ. Kri nĩ ja tũ ja tóg jé ver. Ên kavãn kÿ ti pére kãmũmnĩ, ti kyvãn kÿ,” he tóg.

31 “Hēn ri ke mÿn ag tóg ãjag mÿ: “ãjag tÿ ne jé ti kavãn nē?” henh mÿ. Kÿ ag mÿ: “êg Senhor vÿ ti ve sór mÿ,” hemnĩ,” he tóg, Jesus ti.

32 Kÿ ag tóg mÿ mÿ, Jesus tÿ ag jēgnēn kÿ. Ti tÿ ag mÿ tó mÿ ve kãn ag tóg mÿ sir.

33 Kÿ ag tóg ti kyvãg mÿ. Kÿ ti tÿ tÿ ùn mēg mÿ ag tóg ag mÿ vĩ mÿ. “ãjag tÿ ne jé burrica kósin tag kavãn nē?” he ag tóg.

34 Kÿ ag tóg: “êg Senhor vÿ ti ve sór mÿ,” he mÿ.

35 Kÿ ag tóg Jesus mÿ ti pére kãmũ mÿ. ãjag kur kugjén ag tóg mÿ sir ti kri. Kÿ Jesus tóg kri nĩ mÿ sir.

36 Kÿ tóg tĩ mÿ. Kÿ ag tóg ãjag kur kugjén mÿ sir, êpry jagma, êmĩn jagma.

37 Ge kÿ ag tóg Jerusalém to hã junjun mÿ sir, pãnónh tÿ Oliveiras to re kÿ.

Ag tÿ pãnónh ên to re kÿ vãhã ag kar ên tóg Topē mÿ vĩ há han mÿ sir, Jesus mré mÿ kar ên ag. Ag mÿ tóg sér tĩ. Jesus tÿ nén han mÿ ve ja ag tóg nĩgtĩ, ti tÿ nén han vãnh hyn han mÿ ti. Ên mĩ êkrén kÿ ag tóg Topē mÿ vĩ há han mÿ, jamã hár(a).

38 Kÿ ag tóg: “!..sér tóg tĩ êg mÿ..!” he mÿ. “!..Êg Senhor vÿ êg ki jun..., êg jóg mág tÿ ti jēnēn kÿ..!” he ag tóg. “!..Kanhkã tá ke ag tóg jatu nÿtĩ..! Topē mÿ êg tóg vĩ há han sór mÿ, kynhmÿ nĩ ên mÿ..!” he ag tóg, prēnprēr kÿ.

39 Hã ra Fariseu ù ag tóg tá nÿtĩ gé, venh e ên kãmĩ. Kÿ ag tóg Jesus mÿ: “Senhor,” he mÿ. “ã mré mÿ tĩ ag mÿ: “prēnprēr tũg ra,” hé,” he ag tóg, Jesus mÿ.

40 Hã ra Jesus tóg ag mÿ: “vó,” he mÿ. “Ha mē, ag prēnprēr tũ nĩ ra pó hÿn prēnprēr mÿ vē, ag mÿ sinsér mÿ vē,” he tóg ag mÿ.

Jesus tÿ Jerusalém to fÿ

41 Ge kÿ ag tóg cidade tá junjun mÿ sir. Cidade ên ve kÿ tóg to fÿ mÿ, Jesus ti.

42 “Jerusalém tá ke ag vÿ ki kanhrãnrãn sór tũ nÿtĩ,” he tóg. “Ag tÿ ùri ki kanhrãnrãn há tóg tĩ vē, hã ra ag tóg ke jãvãnh nÿtĩ.

Ājag tỹ ki kanhrãnrãn' he mũ ra ājag tóg jatu kenh ke mũ vễ, mỹr, ha mẽ, hã ra ājag tóg jẽmẽ sór tũ nĩ. Kutu ājag tóg nỹtĩ.

⁴³ Hã kỹ ājag tóg vãhã kurã kórég pẽ venh ke mũ. Ājag kato tẽgtẽ mũ ag vỹ ājag to ráránh ke mũ. Kũm'kũm ke jé ag tóg ke mũ, ājag cidade jy ró pẽnĩn. Komẽr hã ag tóg ājag to grẽngrẽn kenh ke mũ, kỹ ag tóg ājag mãn vỹrỹn kenh ke mũ sir.

⁴⁴ Ājag tỹ tũg' he kãn jé ag tóg ke mũ, ājag krẽ ke gé. Ājag ãn kókén kãn jé ag tóg ke mũ gé. Kỹ ãn tỹ pó pi(jé) jagnẽ kri nỹtĩnh mũ'. Kurã há ki ājag tóg Topẽ vỹ mẽ jãvãnh nỹtĩ, ùri. Topẽ vỹ ùri ājag mỹ vỹ há han mũ ver, hã ra ājag tóg mẽ jãvãnh nỹtĩ. Hã kỹ ājag tóg ti kórég venh ke mũ," he tóg, Jesus ti. Fỹ pẽ han kỹ tóg tó mũ, cidade mũ tũg kỹ.

Jesus tỹ Topẽ jo ãn tá jun

(Mt 21.12-17; Mc 11.15-19; Jo 2.13-22)

⁴⁵ Kỹ tóg Topẽ jo ãn tá jun kỹ kãra rã mũ sir. Kỹ tóg ù tỹ tá nén ù vender he tĩ ag pan mũ sir.

⁴⁶ Ag mỹ tóg tag tó mũ, ha mẽ. "Topẽ vỹ rá to jykrẽn nĩ," he tóg. "Tag vỹ rán kỹ nĩ, ha mẽ. ãnh ãn jiji vỹ tỹ Topẽ mré vỹ jafã nĩ, he tóg, Topẽ vỹ tỹ rán kỹ nĩ ki. Hã ra ājag tóg Topẽ mré vỹ jafã tag krẽm nén kar pigju mũgtĩ, kỹ tóg bandido ag jamã ri ke nĩ sir," he tóg, Jesus ti. Ag pan kỹ tóg ag mỹ tó mũ.

⁴⁷ Hã ki tóg kurã kar ki ag kanhrãnrãn mũ, Topẽ jo ãn krẽm. Hã ra Topẽ tũ ki rĩr tĩ to pã'i ag mỹ tóg kórég nĩ, Topẽ vỹ rán tĩ ag mỹ ke gé, pã'i kar ag mỹ. Hã kỹ ag tóg ti tén ke to jykrẽn mũ sir.

⁴⁸ Hã ra tóg ag mỹ ki króm sór tũ nĩ. Vẽnũ kar mỹ tóg mẽ sér tĩ, ti vỹ ti, hã kỹ pã'i ag tỹ ti tén sór mũ ra tóg vẽnũmỹ tĩ sir ag mỹ.

20

Ûn nỹ hỹn Jesus jẽnẽ

(Mt 21.23-27; Mc 11.27-33)

¹ Kurã kar ki Jesus tóg Topẽ vỹ tó jẽ nĩ, vẽnũ vỹ sér ãn, Topẽ jo ãn krẽm. Kỹ tóg kejẽn tá jẽ nĩ. Kỹ Topẽ tũ ki rĩr tĩ to pã'i ag tóg ti to kãmũ mũ, Topẽ vỹ to professor ag ke gé, kófa ag ke gé.

² Ti mỹ ag tóg: "ẽg tỹ ã ki jẽmẽnũ há tóg tĩ," he mũ. Kỹ tóg ag mỹ: "hej," he mũ. Kỹ ag

tóg: "ã vẽnũ jykre tỹ ne tỹ tag han mũ?" he mũ. "Û nỹ ã jẽnẽ?" he ag tóg.

³ Kỹ tóg ag mỹ: "ājag ki sóg jẽmẽnũ ke mũ gé, vẽnũ kato," he mũ. "Ha mẽ.

⁴ João vỹ ag kygpég tĩ ja nĩgtĩ. Kỹ ti mỹ kanhkã tá vẽnũ jykre han mũ', ẽprã jykre vó?" he tóg. "Û nỹ ti jẽnẽ?" he tóg. "ãnh mỹ tó," he tóg, Jesus ti, ag mỹ.

⁵ Kỹ ag tóg jagnẽ mré to jykrẽn mũ sir. "Ëg tỹ ti mỹ: "Topẽ tỹ ti jẽnẽ vễ," hen kỹ tóg ẽg mỹ: "ājag tỹ ne jé ti vỹ kri fig tũ ja nĩ nẽ?" henh ke mũ," he ag tóg jagnẽ mỹ.

⁶ "Ëg tỹ hã ra ti mỹ: "ẽprã ke jykre ja vễ," hen kỹ vẽnũ kar vỹ ẽg pin sór ke mũ, pó tỹ, ha vemnĩ. João to ag tóg: "Topẽ vỹ tó tĩ pẽ ja vễ," he tĩ, hã kỹ ag tóg ẽg to jũnh ke mũ, ẽg tỹ: "hã tũ vễ," hen kỹ," he ag tóg mũ jagnẽ mỹ.

⁷ "Topẽ jykre han ja ti nĩ," he sór tũ ag nỹtĩ, kỹ ag tóg: "ẽprã ke jykre han ja ti nĩ," he sór tũ nỹtĩ gé. Hã kỹ ag tóg Jesus mỹ: "ẽg pi(jé) ki kanhró nỹtĩ," he mũ, João jykre to.

⁸ Kỹ Jesus tóg ag mỹ: "kỹ sóg ājag mỹ ù tỹ ãnh jẽnẽg mũ ẽn tónh ke tũ nĩ gé," he mũ. Ā kato tẽ mũ ag mỹ tóg ke mũ.

Ûn camarada kórég ag to comparação

(Mt 21.33-46; Mc 12.1-12)

⁹ Kỹ tóg vẽnũ kar kanhrãnrãn kỹ ag mỹ: "ẽg tỹ Topẽ kato tẽ kỹ tóg ge nỹnh mũ, ha mẽ," he mũ. "Kejẽn ù tóg nĩgtĩ. Uva krãn ja tóg nĩ, nén kanẽ tỹ vinho han jafã ẽn. Kỹ tóg ù tỹ ki rĩr tĩ ag mré to jykrẽn kỹ ag mỹ tovãnh mũ sir. Ag mỹ tovãnh kỹ tóg ga ù ra tĩ mũ. Hã ra tóg kãtĩg vãnh han mũ.

¹⁰ Ti uva kanẽn kỹ tóg ag mỹ ã camarada jẽnẽg mũ, ù tỹ ki rĩr tĩ ag mỹ, ag tỹ ti mỹ ti tũ nĩm jé, ẽkré kanẽ ẽn ti. Hã ra ag tóg ti mỹ vin tũg mũ. Ti mrãnmrãn ag tóg mũ. Kỹ ag tóg ti mỹ: "ha tĩg," he mũ. Nén ù tũ ra tóg tĩ mũ sir.

¹¹ Kỹ tóg ã camarada ù jẽnẽg mũ gé sir. Hã ra ag tóg ti mrãnmrãn mũ gé. Ti mỹ féfén kar kỹ ag tóg ti mỹ: "ha tĩg," he mũ gé sir. Nén ù tũ ra tóg tĩg mũ gé.

¹² Kỹ tóg ag mỹ ù jẽnẽ mãn mũ gé sir, hã ra ag tóg ti mrãnmrãn kỹ ti rãnh kỹ ti tĩn mũ sir.

¹³ Kỹ uva kré tỹ ùn tũn mũ tóg to jykrẽn mũ. "ãnh hỹn hẽn ri kenh ha," he tóg, to

jykren kÿ. “Inh kósin jÿnÿ jé sóg ke mÿ, inh fe pÿ ãn, hÿn ri ke mÿn ag ti kamÿg mÿ,” he tóg.

14 Ti kósin tÿ ag tá jun kÿ nÿn kré ki rÿr tÿ ag tóg ti vég mÿ. Kÿ ag tóg ti to jykren mÿ, jagnÿ mré. “Kejÿn ãkré tag vÿ tÿ ti tÿ nÿnh mÿ,” he ag tóg. “Mÿ nÿ, ti tén jé, ti tÿ tag tÿ tÿ ãg tÿ nÿnh jé,” he ag tóg.

15 Kÿ ag tóg ró mã ra ti pére mÿ kÿ tá ti tén mÿ sir. Kÿn hÿn hÿ ri kenh ke mÿ', ãkré tÿ ùn tÿn mÿ ãn ti?” he tóg, Jesus ti.

16 “Kãtÿg jé tóg ke mÿ, ãkré ki rÿr tÿ ag kãgtén jé. Kÿ tóg camarada ù ag mÿ finh mÿ sir, ã jakré ti,” he tóg, Jesus ti.

Kÿ ag tóg mÿg mÿ, ti vÿ ti, ti pÿnÿn nÿtÿ ãn ag. Kÿ tóg ag mÿ e tÿ. “Ëg jé tag venh ke tÿ nÿ,” he ag tóg mÿ, ù tÿ Jesus vÿ mÿg mÿ ag.

17 Hã ra Jesus tóg ag ki ãvãnh kÿ ag mÿ: “Topÿ vÿ rá tag to jykren nÿ, ha mÿ,” he mÿ. “Pó tÿ ãn han jafã fón ag tóg, pó tÿ ãn han tÿ ag. Ag mÿ tóg kórég ja nÿ, pó ãn ti. Hã ra Topÿ tóg pó ãn hã tÿ ãn nÿna han mÿ,” he tóg, Topÿ vÿ tÿ rán kÿ nÿ ki,” he tóg, Jesus ti. Ti tÿ ã kato vããnsãn mÿ ag mÿ vÿnh kãmén hã vÿ.

18 Kÿ tóg ag mÿ: “ù tÿ hÿn ri ke ag vÿ pó tag kri vár ke mÿ, kÿ ag tóg kri vár kÿ tÿ hÿnh ke mÿ,” he mÿ. “Kÿ pó tag vÿ ù tÿ hÿn ri ke ag kri kutÿnh ke mÿ gé, kÿ tóg ag tÿ nám nám ke kãn mÿ sir, ag kri kutÿ kÿ,” he tóg, Topÿ vÿ tÿ rán kÿ nÿ ki,” he tóg, Jesus ti. Ti tÿ ag tÿ ti ki rã tÿ tugrÿn nÿgme ki vár ke tón hã vÿ.

Ëg tÿ imposto kajã

(Mt 22.15-22; Mc 12.13-17)

19 Kÿ Topÿ vÿ to professor ag vÿ ti vÿ mÿg mÿ, Topÿ tÿ ki rÿr tÿ to pã'i ag ke gé. Ag hã to tóg kãmén ja nÿ, “ãg tÿ Topÿ kato vããn tag vÿ ge nÿnh mÿ,” he mÿ ãn ti. Kÿ ag tóg ki kanhró nÿtÿ sir, hã kÿ ag tóg ti se sór mÿ. Hã ra ag tóg ùn e ãn kamÿg mÿ. Ti vÿ vÿ vÿnh kar mÿ mÿ há tÿ, hã kÿ pã'i ag tóg ti ség tÿ nÿ ver, ag tÿ ti se sór mÿ (hã) ra.

20 Kÿ ag tóg hã ra ti tugnÿm mÿ. Ti vÿ to ag tóg vãjig mÿ, ag tÿ ti vÿ to fóg tÿ pã'i mÿ ti fÿg jé. Ag tÿ ti vÿ tugnÿn fóg tÿ pã'i mág mÿ: “ha ti vóg kónãn,” he sór vÿ. Hã je ag tóg ùn jykre kuryj nÿ ve ag jÿgnÿg mÿ, ag tÿ ón kÿ Jesus ki jÿmÿ jé.

21 Kÿ ãn ag tóg sir Jesus mÿ: “Senhor,” he mÿ. “Vÿnh jykre kuryj hã tóg ã tóg tÿ, hã kãmén ã tóg tÿ. Hã kÿ ãkré ke ag ve tóg ã mÿ tÿ nÿn ù tÿ nÿ. Hã kÿ ã tóg Topÿ japry to, Topÿ jamÿn to ãg kanhrãn há han tÿ,” he ag tóg mÿ.

22 “Kÿn mÿ há nÿ, ãg tÿ fóg tÿ pã'i mág tÿ imperador mÿ jãnkamy ãn nÿm ti, imposto kajãm jé? Ëg mÿ hÿn nÿm mÿ', nÿm ke tÿ nÿ vó?” he ag tóg.

23 Hã ra Jesus tóg ki kanhró nÿ, ag jykre régre ti. Hã kÿ tóg ag mÿ: “ãjag ne tóg ón kÿ ãn ki jÿmÿ sór mÿ’,” he mÿ.

24 “Inh mÿ jãnkamy ven. ù jÿji nÿ kã nÿ? ù kãggrã nÿ kã nÿ?” he tóg. Kÿ ag tóg ti mÿ: “pã'i mág kãggrã vÿ,” he mÿ.

25 Kÿ tóg ag mÿ: “kÿ pã'i mág mÿ ti tÿ nÿm, jo Topÿ mÿ ti tÿ nÿm gé,” he mÿ, Jesus ti.

26 Hã kÿ tóg ag tÿ ti vÿ to ti senh ke tóg tÿ tÿ, ti vÿ há han kÿ. Kÿ tóg ag mÿ e tÿ, ti vÿ há tãvÿ ãn ti. Kÿ ag tóg ti mÿ vÿ mãn tÿ nÿ sir. Hã ra vÿnh kar vÿ ti vÿ mÿg nÿtÿ nÿ.

Ûn kãgter mÿ ag tÿ rÿnrÿr mãn ke *(Mt 22.23-33; Mc 12.18-27)*

27 Kÿ Saduceu ag tóg ti tá junjun mÿ gé, ti ki jÿmÿ jé. Hã ra Saduceu ag tóg: “ãg ter ja tá ãg tóg vÿn ke mãn ke tÿ nÿ, rÿr mãn ke tÿ ãg tóg nÿ,” he tÿ.

28 ãn ag vÿ Jesus ki jÿmÿ sór mÿ gé, ón kÿ. Kÿ ag tóg ti mÿ: “Senhor,” he mÿ gé. “Moisés vÿ ãg mÿ vÿnh jykre tag nÿm, hã vÿ: ã régre tÿ ã krÿ tÿ ra ter kÿ ã tÿ ti prÿ fi tÿ prÿg ke vÿ, he mÿ. ã tÿ ã régre mÿ ã krÿ han ke vÿ, fi ki, he tóg mÿ gé. Moisés tÿ ãg mÿ tóg jan hã vÿ,” he ag tóg mÿ, Saduceu ag.

29 “Kÿ ù tÿ jagnÿ mré pafa ja tÿ 7 (ke) ag vÿ nÿgtÿ. Ag kãke vÿ prÿg mÿ, hã ra tóg ã kósin tÿ ra ter mÿ.

30 Kÿ ti jãvy vÿ fi tÿ prÿg mÿ sir, hã ra tóg ã kósin tÿ ra ter mÿ gé.

31 Kÿ ti jãvy ù tóg fi tÿ prÿg mÿ gé, hã ra tóg ter mÿ gé, ti kósin tÿ ra. Gen kÿ ag tóg kãgter kãn mÿ kejÿn, ù tÿ 7 (ke) ãn ag.

32 Kÿ vãhã ag prÿ fi vÿ ter mÿ gé sir.

33 Kÿ fag kãgter ja tá rÿnrÿr mãn kÿ fi hÿn mÿn tÿ 7 (ke) nÿnh mÿ vÿ. Ag kar vÿ fi tÿ prÿg ja nÿtÿgtÿ. Hã kÿ tóg vÿnhmÿ nÿ, ag tÿ: “rÿnrÿr mãn jé ãg tóg ke mÿ,” hen kÿ,” he ag tóg. Saduceu ag tÿ Jesus mÿ ken hã vÿ.

³⁴ Kĩ Jesus tóg ag mĩ kãmén mũ. “Èprã ke ag vỹ prũgprũg tĩ, kĩ fag vỹ ag tỹ mén tĩ gé.

³⁵ Ag kãmĩ ù ag tóg ãjag kãgter ja tá rĩnrĩr mãn ke mũ, ti kurã tá krỹg kũ. Èn ag vỹ prũg mãn ke tũ nĩ sir, mén mãn ke tũ fag tóg nĩ gé sir, ãjag rĩnrĩr mãn kũ.

³⁶ Ter mãn ke tũ ag tóg nĩ gé, mỹr, ha mẽ, hã kĩ ag prũg mãn ke tũ nĩ, kĩ fag mén mãn ke tũ nĩ gé. Kanhkã tân ri ke ag nỹtĩ, Topẽ tỹ jẽgnẽ jafã ag ri ke mỹr, ùn rĩnrĩr mãn mũ ag. Topẽ krẽ vỹ tỹ ag nỹtĩ sir, ag tỹ ãjag kãgter tá rĩnrĩr mãn ken kũ.

³⁷ Rĩnrĩr mãn jé ag tóg ke mũ, ùn kãgter mũ ag, ha vemnĩ. Hã kĩ Moisés tóg Topẽ to tag tó ja nĩ, ha mẽ. Ti tỹ vãn pũr nĩ ãn tá ti mré vémén kar kĩ tóg Topẽ to: “Abraão tỹ ùn to: Topẽ, he mũ ãn vè, Isaque tỹ ùn to: Topẽ, he mũ ãn, Jacó tỹ ùn to: Topẽ, he mũ ãn,” he ja nĩ, Moisés ti.

³⁸ Kãgter ag huri, Abraão, Isaque, Jacó, hã ra Moisés tóg Topẽ to: “Abraão tỹ ùn to: Topẽ, he mũ ãn vè,” he ja nĩ. Ti tỹ tỹ ag Topẽ nĩn kĩ ag tóg rĩnrĩr nỹtĩ, ha mẽ, ag kãgter mũ ra. Ùn kãgter kar ag vỹ Topẽ mỹ rĩnrĩr nỹtĩ,” he tóg, Jesus ti.

³⁹ Kũ ù tỹ Topẽ vĩ rán tĩ ù ag tóg ãg Senhor tỹ Jesus mỹ: “vĩ há han ã, ãg ter ja tá vỹn kenh ke mũ tag to,” he mũ, ti mỹ.

⁴⁰ Kũ ù tóg ti ki jẽmẽ mãn sór tũ nĩ sir. Ti kamẽgmẽg ag tóg mũ, hã kĩ ag tóg ti ki jẽmẽ mãn sór tũ nĩ ha.

Cristo mỹ tỹ Davi kósin nĩ, Topẽ kósin mỹ vó

(Mt 22.41-46; Mc 12.35-37)

⁴¹ Kũ Jesus tóg ag ki jẽmẽg mũ gé sir. Kũ tóg ag mỹ: “Topẽ vĩ rán tĩ ag ne tóg: “Cristo vỹ tỹ Davi kósin nĩ,” he tĩ,” he mũ.

⁴² “Hã ra Davi tóg Cristo tó ja nĩ, ti tỹ Topẽ jé rán kũ. Kũ tóg: “ãg jóg mág tỹ Topẽ vỹ inh Senhor mỹ tag tó ja nĩ, ha mẽ: “nĩ ra ver, inh pẽgja tá,” he ja ti nĩ.

⁴³ “Isỹ ã kato vãsãnsãn mũ ag tỹ ã krẽm vin ke vè, kĩ ag sigse ri ke vè sir. Tag jãvãn nĩ ver,” he ja ti nĩ, Topẽ ti,” he ja tóg nĩgĩ, Davi ti,” he tóg, Jesus ti.

⁴⁴ “Hã kĩ Davi tóg Cristo to: “inh Senhor,” he ja nĩ. Kũ ti kósin mỹ tỹ ti kri ke nĩ?” he tóg mũ, Jesus ti.

Hã ra ag tóg ti mỹ tó tũg mũ. Ag tỹ ne tónh ke tóg tũ tĩ, ti kato tẽgẽ mũ ag mỹ.

Ón kĩ Topẽ vĩ to professor ag kamẽg jé ãg ke mũ

(Mt 23.1-36; Mc 12.38-40)

⁴⁵ Vẽnh kar tóg mẽg mũ, Jesus vĩ ti. Kũ tóg ã mré mũ tĩ ag mỹ:

⁴⁶ “ón kĩ Topẽ vĩ to professor ag kamẽg nĩ,” he mũ. “Kur téj rĩnh ka(mẽ) ag nỹtĩ,” he tóg. “Kũ vẽn kar tỹ ag mỹ: “ã mỹ há?” hen kĩ tóg ag mỹ sér tĩ, ag tỹ cidade kaju kãmĩ mũn kũ. Vẽn kanhrãn jafã krẽm ag tóg vẽn kãpãm kĩ nỹtĩgĩ. Festa ki ag tóg jẽn vén tĩ, ag tỹ tỹ pã'i nỹtĩn kũ,” he tóg.

⁴⁷ “Hã ra ag tóg ùn mén ter ja fag tũ mãn kãn tĩ. Fag tũ mãn kãn kĩ ag tóg ón kĩ Topẽ mré vĩ mág han mũgtĩ, ãg tỹ ag to: “ùn há vỹ tỹ ag nỹtĩ,” he jé. Hã to ag vèsýrẽnh mág távĩ han ke mũ,” he tóg, Jesus ti. Ti tỹ ù tỹ ón kĩ Topẽ to há nỹtĩ ag kãmén hã vè.

21

Ûn mén ter ja fi tỹ ã tũ vin kãn

(Mc 12.41-44)

¹ Kũ Jesus tóg Topẽ jo ãn tá jẽ kĩ tãmĩ ãvãn kũ ùn rico ag vigvẽg mũ. Jãnkamy vin jafã ki ag tóg ãjag tũ vin tĩ, Topẽ mỹ, jãnkamy ti. Vin mág ag tóg mũ.

² Kũ ùn mén ter ja fi vỹ tá jun mũ gé sir. Tỹ nén ù tũ fi tóg nĩ, hã ra fi tóg jãnkamy kãsir régre vin mũ, Topẽ mỹ.

³ Kũ Jesus tóg fi to: “ve ra ha,” he mũ. “Ûn rico tỹ vin kãfór han fi tóg, fi tũ sĩ (hã) ra. Tỹ nén ù tũ fi tóg nĩ, fi mén vỹ hur ter.

⁴ Kũ fi tóg ã tũ vin kãn ja nĩ, fi jẽn mré hã. Jãvo ùn rico ag vỹ ãjag tũ ke hã tỹ Topẽ mỹ vin mág tĩ. Hã ki fi tóg ag tỹ nĩm kãfór han, fi tỹ nĩm sĩ pẽ han mũ ra. Ki hã sóg tó mũ mỹr,” he tóg, Jesus ti.

Topẽ jo ãn kókén kĩ nĩnh ke

(Mt 24.1-2; Mc 13.1-2)

⁵ ãn kã ù ag tóg Topẽ jo ãn to vĩ há han mũ. “Sĩnvĩ pẽ ti jẽ,” he ag tóg mũ. “Ti pó ve ra ha, mág ti nỹtĩ. Ti sĩnvĩ han jafã vỹ e nỹtĩ gé,” he ag tóg.

⁶ Kũ Jesus tóg ke mũ. “Mỹ ãjag mỹ sĩ?” he tóg. “Kejẽn tóg kókén kãn kĩ nỹnh mũ, ha vemnĩ, kĩ pó vỹ jagnẽ kri nỹtĩ mãn ke tũ nĩ ha. Gũm ke kãn jé tóg ke mũ, tag ti,” he tóg, Jesus ti.

*Věnh jagãgtar to rã
(Mt 24.3-14; Mc 13.3-13)*

⁷ Kÿ ag tóg êg Senhor ti mÿ: “kurã tÿ ne kã ke nê hÿn’?” he mÿ. “Êg hÿn hên ri ken kÿ ti kurã ki kanhró nÿtÿnh mÿ hÿn’? Topê hÿn ne han ke mÿ, êg tÿ kurã ên ki kanhró nÿtÿ jé?” he ag tóg.

⁸ Kÿ tóg ag mÿ: “ker ù vÿ jêmê hê’,” he mÿ. “Û tÿ hên ri ke ag vÿ inh jiji tó kãmũnh mÿ. “Cristo vÿ tÿ inh nÿ,” he jé ag tóg ke mÿ. “Inh kurã vÿ hur jun,” he jé ag tóg ke mÿ. Ag nón mÿ tÿg nÿ.

⁹ Věnh génh mēgmē jé ājag tóg ke mÿ, jagnē kato vāsānsān mÿ ag. Kamēg tÿg nÿ hã ra. Věnh génh tÿ hên ri ke han jé ag tóg ke mÿ, kurã tÿ êgno to hã. Ti kurã kã ke pijé’,” he tóg.

¹⁰ Kÿ tóg ag mÿ: “povo ag tÿ jagnē kato vāsānsān ke vē, pã'i krēm ke ag tÿ pã'i ù krēm ke ag to jÿnh ke vē,” he mÿ.

¹¹ “Ga tÿ ragrag ke jagy tÿ hên ri ke han ke vē gé, ên kã. Kÿ vėjēn tóg tÿ' henh ke mÿ gé. Věnh kaga kórég (ka)mē vÿ vėnh vinven ke mÿ, ên kã sir. Nén ù vėnhmÿ vÿ vėnh vinven ke mÿ gé, kanhkã tá, kÿ vėnh kar vÿ kanē junjur ke mÿ,” he tóg, Jesus ti.

¹² “Tag to hã ag tóg ājag sigsenh ke mÿ gé, ājag vóg kónān jé ag tóg ke mÿ gé, vėnh kanhrān jafã krēm ag tóg ājag jykre vigvenh ke mÿ gé, vėnh se ja kãki ag tóg ājag vin ke mÿ gé. Pã'i mág tÿ rei ag mÿ ag tóg ājag venven ke mÿ, pã'i tÿ governador ag mÿ ke gé, ājag tÿ inh jyjy tó ja tugnĭn.

¹³ Ājag tÿ inh vÿ tó jé, hã jé ag tóg ājag tÿ genh ke mÿ.

¹⁴ Ēn kã ājag tÿ nén ù tónh ke to jykren tÿg nÿ, to krĭ kufy han tÿg nÿ gé.

¹⁵ Inh hã vÿ ājag vÿ han ke mÿ, inh jykre nĭm jé sóg ke mÿ ājag mÿ, ājag tÿ ag mÿ tón jé,” he tóg. “Kÿ ag tÿ ājag vÿ kafān sór mÿ ra tóg ag mÿ vėnhmÿ tĭnh mÿ, ha vemnĭ, ājag kato tēgtē mÿ ag mÿ. Ag tÿ ne tónh ke tóg tÿ tĭnh mÿ, ha vemnĭ,” he tóg, Jesus ti.

¹⁶ “Ēn kã ājag han mÿ ên vÿ ājag senh mÿ, ājag mré pafa mÿ ag ke gé, ājag mré ke ag ke gé, ājag to há kar ag mÿr,” he tóg. “Ājag kãmĭ ù ag kãgtén jé ag tóg ke mÿ gé, ha vemnĭ.

¹⁷ Věnh kar vÿ ājag to kórég tãvĭ nÿtĭnh mÿ, inh jiji tugrĭn.

¹⁸ Hã ra ājag véké vėsÿrénh ke tÿ nÿ, ājag gãnh pir vÿ fagrĭnh mÿ kutėnh ke tÿ nÿ, ha vemnĭ.

¹⁹ To tar nÿtĭmnĭ, ājag vėsÿrénh ke to, kÿ ājag tóg rĭr krÿg ja tÿ ên venh ke mÿ,” he tóg, Jesus ti.

*Jerusalém kókén kÿ nÿnh ke
(Mt 24.15-21; Mc 13.14-19)*

²⁰ “Kejēn ag tóg Jerusalém jy nÿtĭnh mÿ, soldado ag, ag tÿ cidade ên kókén jé. Ājag tÿ tag ve kÿ ājag tóg ki kanhró nÿtĭnh mÿ. Ag tÿ ti kókén kãn ke kurã vÿ jun ke mÿ, kurã ên kã.

²¹ Kÿ vėnh pigju mÿmnĭ, pãnónh ra, ājag tÿ Judéia ki nÿtĭn kÿ. Ājag tÿ cidade mág tá nÿtĭn kÿ pétigtēmnĭ, vãnh kãra. Ājag tÿ vãnh kãmĭ êmã kãsir ki nÿtĭn kÿ cidade ra mÿ tÿg nÿ.

²² Topê tÿ ag vóg kónān ke kurã vē sir, ag jykre kórég to, hã kÿ tóg vāsÿ rán kÿ nÿ. Věnh rá ên ve jé ājag tóg ke mÿ, kurã ên kã.

²³ Kÿ ùn kufy fag vÿ vėsÿrénh mág ke mÿ, kurã ên kã, gĭr pygfãm mÿ fag ke gé. Ēprã ke ag vėsÿrénh mág tãvĭ han ke vē, Topê tÿ povo tag to jÿ jagy han ke vē, kurã ên kã.

²⁴ Ājag kãmĭ ùn e tãvĭ kãgter ke vē, rógro tÿ. Kÿ ājag kãmĭ ù ag vÿ sigse kÿ mÿnh mÿ, povo kar kãmĭ. Kÿ Jerusalém vÿ kókén kãn kÿ nĭnh ke mÿ. Fóg ag vÿ sãnsān ke mÿ, ājag cidade mág ti. Kejēn fóg ag tÿ tÿ' henh ke kurã vÿ jun ke mÿ gé hã ra,” he tóg, Jesus ti.

*Topê kósin kãtĭg mãn ke
(Mt 24.29-31; Mc 13.24-27)*

²⁵ “Kurã ên kã rã vėnhmÿn ke vē, kysã ti ke gé, krĭg ti ke gé. Kÿ ga kri mÿ ag vÿ kamēgmēg kãn ke mÿ. Kanē junjur mág jé ag tóg ke mÿ, povo kar ên ag. Kÿ goj vÿ krēm ke mÿ, goj kafã tÿ vÿ jÿnh ke mÿ, ti kurã jun kÿ.

²⁶ Kÿ ěprã ke ag fe vÿ vo kónān ke mÿ, ag tÿ jÿrÿn ke vÿ ag kãgtén ke mÿ, ag tÿ ājag tÿ nén venh ke to jÿrÿn ken kÿ. Ēg tÿ kanhkã tá nén vėg tÿ kar ên vÿ ragrag ke kãn mÿ mÿr, ha mē.

²⁷ Kÿ vãhã vėnh kar vÿ ti kãtĭg ên venh ke mÿ, ěprã ke fi kósin ên ti. Kanhkã góg kãmĭ sóg kãtĭg ke mÿ vãhã sir. Inh ve vÿ tar nĭnh mÿ, inh kãtĭg mãn kÿ. Kókov kãtĭg jé sóg ke mÿ vãhã sir,” he tóg, Jesus ti.

Ka tỹ figueira to comparaçaõ
(Mt 24.32-35; Mc 13.28-31)

²⁸ “Ājag tỹ isỹ ājag mỹ nén tó mũ ãn ve sĩ han kỹ ājag kanẽ nĩm nĩ, ājag krĩ ti ke gé, ti tỹ ājag mỹ sér gy tĩn kỹ. Isỹ ājag krenkren han ken vẽ ha, isỹ kurã ãn hã kã jun kỹ,” he tóg.

²⁹ Kỹ tóg ag mỹ: “inh kãtĩg mãn ke vỹ ge nỹnh mũ, ha mẽ,” he mũ. “Ka tỹ figueira to ki kanhrãn nĩ, ka ù to ke gé, to comparaçaõ han kỹ,” he tóg.

³⁰ “Ti pẽ tánh kỹ, ti féj tãg han kỹ tóg kakó tĩ sir, êkré tygtãnh kurã ti.

³¹ Ēn ri ke ti nĩ, ājag tỹ inh kãtĩg mãn ke kurã ki kanhró nỹtĩ ti. Ājag tỹ sỹ ājag mỹ nén tó ja ãn ve kỹ tóg kakó tãvĩ tĩ ha, inh kãtĩg ke ti,” he tóg. “Ēn kã Topẽ tỹ tỹ ěg pã'i nĩ kenh ke vẽ sir.

³² Sỹ ke há vẽ, hã kỹ sóg tag tó mũ, ha mẽ. Ũ tỹ nén kar ãn vég mũ ag vỹ inh kãtĩg mãn ke tag venh ke mũ, ũri, ag kãgter ke to hã,” he tóg.

³³ “Kanhkã vỹ tũ' he mũ, ga ti ke gé. Jãvo inh vỹ vỹ tũ' henh ke tũ nĩ,” he tóg, Jesus ti.

Ēg tỹ vẽn ki ěmẽn ke

³⁴ “Vẽn ki ěmẽn, ājag tỹ vẽnẽn e to nug kaga tũ nĩ jé, tógá nĩnh to, ājag tỹ kronkron to krĩ vẽnhmỹ tũ nĩ jé gé. Kỹ vẽnẽn to krĩ kufy han tũg nĩ gé, kur to, tag ki nén ũ kar to. Ke tũ nĩ mũ ra kurã ãn vỹ ājag vatãnh tá jun ke mũ, inh kãtĩg mãn ke kurã ãn ti.

³⁵ Ājag tỹ to vẽn kãn kỹ nỹtĩ tũ nĩn kỹ tóg ājag mỹ sēsĩ tỹ ěgie ki kutẽ ri ke nĩ. Vẽn vatãnh tá tóg ki kutẽ tĩ, jēsĩ ti. Ge ti nĩnh mũ, inh kãtĩg mãn ke ti, ga kri mũ ag kar mỹ. Ag vatãnh tá sóg jun ke mũ.

³⁶ Hã kỹ ājag kanẽ nĩm nĩ, nũr sór tũg nĩ. Inh kãtĩg kã jatu to ken hã vẽ, hã vỹ: nũr, he mũ. Topẽ mrẽ vỹ tovãnh tũg nĩ, ājag tar nỹtĩ jé, nén ũ jagy ãn ve kỹ. Kỹ ājag tóg ěprã ke fi kósĩn rĩnja tá jẽnẽh ke mũ sir, mỹ'ãg tũ nĩn kỹ, isỹ vẽnẽh kar jykre tugnỹm kurã ãn kã,” he tóg, Jesus ti. Tĩ tỹ ag mỹ kurã tỹ ěgno kãmén hã vẽ.

³⁷ Hã ki tóg kurã kar ki Topẽ jo ĩn krẽm ag kanhrãnran tĩ, Jesus ti. Kutyg kỹ tóg cidade tá kãkutẽ kỹ pãnónh ra tĩ tĩ, tá nũr jé. To ag tóg: Oliveiras, he tĩ, pãnónh ãn to.

³⁸ Ti tỹ kusã ki Topẽ jo ĩn tá jun kỹ ag tóg tá ti vỹ jẽnẽn kãmũ tĩ, ũ tỹ hẽn ri ke ag.

22

Ag tỹ Jesus se sór

(Mt 26.1-5; Mc 14.1-2; Jo 11.45-53)

¹ Ēn kã festa tóg kakó tĩ sir. Festa ãn ki ag tóg pão ũ ko tĩ, hã ra tóg jãgja tũ ja nĩgtĩ. Festa ãn jijin hã vỹ: Páscoa, he mũ.

² Kỹ Topẽ tũ ki rĩr tĩ to pã'i ag vỹ Jesus to jykrén mũ. Ag tỹ ti tén sór vẽ. Topẽ vỹ to professor ag vỹ ti tén sór mũ gé. Hã ra ag tóg povo kamẽg mũ, kỹ ag tóg to jykrén kỹ nỹtĩ nĩ.

Judas tỹ pã'i ag mỹ Jesus ven sór

(Mt 26.14-16; Mc 14.10-11)

³ Ēn kã Judas ãn, ũ tỹ Iscariotes he mũ ãn vỹ jagrẽ vég mũ sir, Satanás tỹ. Hã ra tóg tỹ ũ tỹ 12 (ke) ag kã ũ nĩ, Jesus tỹ ũn vin mũ ag kã ũ vỹ tỹ ti nĩ.

⁴ Ti tỹ Satanás tỹ jagrẽ nĩn kỹ tóg Topẽ tũ ki rĩr tĩ to pã'i ag venh tĩ mũ sir, soldado to pã'i ag ke gé. Ti tỹ ag mỹ Jesus ven sór vẽ, ag tỹ ti se jé.

Kỹ tóg tá jun kỹ ag mỹ tó mũ.

⁵ Kỹ tóg ag mỹ sér pẽ tĩ sir. Kỹ ag tóg ti mỹ jãnkamy tó mũ. Ag tỹ ti mỹ vin sór vẽ, ti tỹ ag mỹ Jesus ven kar kỹ.

⁶ Kỹ tóg ag mỹ: “hej,” he mũ sir. Kỹ tóg to jykrén mũ, ti tỹ ã mỹ ki króm ke to, ag mỹ: “ha ti kãgmĩ ha,” he jé, Judas ti. Ag tỹ vẽnẽh kar vatãnh tá ti se sór vẽ. Hã kỹ Judas tóg ti tó sór mũ.

Pedro tỹ João mrẽ festa tỹ Páscoa han

(Mt 26.17-25; Mc 14.12-21; Jo 13.21-30)

⁷ Kỹ tóg pão jãgja tũ ãn konh ke kurã tá krỹg mũ sir. Kurã ãn ki ag tóg mé tãg tãnh tĩ, ovelha tãg ãn, ag tỹ kurã tỹ Páscoa kã ko tĩ ãn.

⁸ Kỹ Jesus tóg Pedro jẽnẽg mũ sir, João mrẽ. Kỹ tóg ag mỹ: “ha mũjẽg, mé tãnh jé, ovelha ãn, ěg tỹ kon jé,” he mũ.

⁹ Kỹ ag tóg ti mỹ: “ěg hẽ tá ti tãnh mũ hỹn'?” he mũ.

¹⁰ Kỹ tóg ag mỹ: “ha vé,” he mũ. “Ēmã mág tag ra mũjẽg. Tá ājag tóg ũ venh mũ. Goj vyn kỹ tóg tĩ mũ. Ēn nón mũmnĩ. Kỹ ti ĩn tá junjun kỹ ti nón gemnĩ.

¹¹ Kỹ ĩn ki rĩr tĩ mỹ: “ěg Senhor vỹ ã mỹ vẽnẽh vỹ jẽnẽg mũ,” hemnĩ. “Inh hỹn hẽ tá ovelha konh ke mũ, inh mrẽ mũ tĩ ag mrẽ?”

he ti, ěg Senhor ti,” hemnĩ. “Mỹ ki vĕnh kánkán jafã tũ?” hemnĩ.

¹² Kĩ tóg ãjag mỹ ven ke mũ sir, krogrog tỹ kynhmỹ nỹ ěn ti, assoalho tỹ kynhmỹ nỹ ěn ti. Éhé ti nĩ, kỹ mesa to nỹtĩ jafã vỹ tá nỹtĩ gé. ěn tá ti kãn nĩ ěg mỹ,” he tóg, Jesus ti.

¹³ Kĩ ag tóg mũ mũ sir. Jesus tỹ ag mỹ tó ja ěn ve kãn ag tóg mũ, kỹ ag tóg mé tãnh mũ sir, tá.

Santa Ceia

(Mt 26.26-30; Mc 14.22-26; 1Co 11.23-25)

¹⁴ Kĩ tóg ag tỹ konh ke hora tá krỹg mũ sir. Kĩ Jesus tóg tá nĩ nĩ, ti tỹ ùn vin ja ag mré hã, apóstolo ěn ag.

¹⁵ Kĩ tóg ag mỹ vĕmén mũ sir. “Sỹ ovelha tag konh ha pĕ tóg tĩ vĕ ãjag mré,” he tóg. “Sỹ inh vĕsỹrĕnh ke to hã ãjag mré ko sór ja vĕ,” he tóg, Jesus ti, ã mré mũ tĩ ag mỹ.

¹⁶ “Ti ko mãn ke tũ inh nĩ ha, ha vemnĩ. Topĕ tỹ tỹ ěg pã'i nĩ vỹ vĕnh ven ke mũ. Ti tỹ vĕnh ven ja ěn kã sóg ko mãn ke mũ, kejĕn,” he tóg.

¹⁷ Kĩ tóg copa mãg mũ sir. To tóg Topĕ mré vĩ mũ, kỹ tóg ag mỹ: “ha kron,” he mũ. “Ha vĕnh kãpãm,” he tóg.

¹⁸ “Tag kron mãn ke tũ inh nĩ ha, ke gé, ha vemnĩ. Topĕ tỹ tỹ ěg pã'i nĩnh ken kỹ sóg kejĕn kron mãn ke mũ, ha vemnĩ,” he tóg.

¹⁹ Kĩ tóg ěmĩ mãg mũ sir. To tóg Topĕ mré vĩ mũ. Kupãn kỹ tóg ag mỹ vĕnh pipin mũ. Kĩ tóg ag mỹ: “inh hã vĕ,” he mũ. “Ãjag jagfy sóg vĕnh fĕg ke mũ. Kỹ inh mĩ ěkren nĩ, ãjag tỹ pão tag konh ken kỹ,” he tóg, Jesus ti.

²⁰ Ag tỹ ko kar kỹ tóg copa mãg mũ gé. Kỹ tóg ag mỹ: “copa ki jĕ tag vỹ inh kyvĕnh ri ke nĩ,” he mũ. “Ãjag jagfy tóg inh ki kãkutĕnh mũ, inh kyvĕnh ti. Inh jykre tãg to ken hã vĕ, isỹ inh kyvĕnh tugrĩn ãjag mỹ vĕnh pãte fón jé,” he tóg.

²¹ “Hã ra ãjag kãmĩ ù tóg inh vatánh tá isónh ke mũ, inh kato tĕ ag mỹ. Inh mré tóg mesa tag to nĩ nĩ.

²² Tĩg jé sóg ke mũ, sỹ tỹ ěprã ke fi kósín nĩn kỹ. Vãsỹ Topĕ tóg to jykrén ja nĩ, hã kỹ sóg tĩ mũ. Hã ra ù tỹ isónh ke ěn mỹ tóg vĩ kónãn tãvĩ han ke mũ, Topĕ ti,” he tóg.

²³ Kĩ ag tóg jagnĕ mỹ ke mũ. “Ěg kãmĩ ù tỹ hĕ nĕ hỹn?” he ag tóg mũ sir jagnĕ mỹ, ù tỹ ti tónh ke ěn to.

Ũ tỹ hĕ nĕ tỹ ùn mág nĩ

²⁴ Ěn kã ag tóg jagnĕ kãfór nĩ sór mũ. Hã kỹ ag tóg jagnĕ to jũ mũ.

²⁵ Kỹ Jesus tóg ag mỹ ke mũ. “Fóg ag pã'i ag vỹ ãjag krĕm ke ag mỹ vỹ tar han tĩ, kỹ ag tóg ag kri ke ag mỹ: “ěg jóg,” he tĩ, ag tỹ ag mỹ vỹ tar han mũ ra.

²⁶ Ag ri ke han tũg nĩ. ãjag mỹ tỹ ùn mág nỹtĩ sór mũ? Kỹ tỹ ùn kãsir ri ke nỹtĩmnĩ jagnĕ mré,” he tóg, Jesus ti. “Ũ tỹ inh jykre ki tỹ pã'i nĩn kỹ tóg ã krĕm ke ag camarada ri ke nĩnh ke mũ, ag ki rĩr kỹ.

²⁷ Kejĕn ěg tóg mesa to nỹtĩ, kỹ ù tóg mesa ki rĩr tĩgtĩ. Ũ tỹ hĕ nỹ hỹn mesa ki rĩr tĩ? Ag patrão mỹ', ti camarada mỹ vó? Ti camarada vỹ ki rĩr tĩgtĩ. Jo sóg ãjag ki rĩr tĩgtĩ, ãjag camarada ri ke.

²⁸ ãjag hã ne inh mré mũgtĩ'. Isovãnh ja tũ pĕ ãjag tóg nỹtĩ. Isỹ nén ù jagy vég mũ ěn ve kãn ãjag tóg tĩ, inh mré.

²⁹ Inh panh vỹ isỹ pã'i han ke mũ, kỹ sóg ãjag tỹ pã'i han ke mũ gé, ti tỹ isỹ pã'i han kóm,

³⁰ ãjag tỹ inh mré jĕn jé tá, inh mré kron jé tá, isỹ tỹ pã'i nĩn kỹ. Kỹ ãjag tóg ãjag nĩgia kri nĩgnĩ kỹ nỹtĩnh mũ, ãjag tỹ povo tỹ Israel ag jykre vigve jé, povo tỹ 12 (ke) ěn ag,” he tóg, Jesus ti.

Jesus tỹ Pedro mỹ tó

(Mt 26.31-35; Mc 14.27-31; Jo 13.36-38)

³¹ Kỹ ěg Senhor vỹ Pedro mỹ: “Simão', Simão',” he mũ. “Ha vé, Satanás vỹ ãjag to vĩ, Topĕ mỹ. Ti tỹ ãjag jykre ve sór vĕ. Trigo tỹ ěg tóg gren ki kãkag tĩ, ěg tỹ ti fár pan jé. Ěn ri ke han jé tóg ke mũ, ãjag tỹ, Satanás ti.

³² Hã ra sóg hur ã jagfy vỹ, ã tỹ inh ki rã tovãnh pĕ han tũ nĩ jé. Kỹ ã tóg kejĕn ã jykre to jykrén mãn ke mũ, ã tỹ inh jykre hã han jé. Ěn kã ã tóg ã mré ke ag jyvĕn kỹ ag tỹ tar' he mũ.

³³ Hã ra Pedro tóg ti mỹ: “Senhor',” he mũ. “Ã mré sóg se kỹ jĕnh mũ, ã mré sóg ter ke mũ gé,” he tóg.

³⁴ Hã ra Jesus tóg Pedro mỹ: “vó,” he mũ. “Ha vé, ùri ã tóg iso: “ti ki kagtĩg sóg nĩ,” he tãgtũ han ke mũ, galo kyr to hã, ha vemnĩ,” he tóg mũ, Jesus ti.

Jesus tỹ ã mré mũ tĩ ag mỹ tó

³⁵ Kÿ tóg ag kar mÿ: “ãjag jëgnë ja inh nÿ, vãsÿ,” he mÿ. “Kÿ ãjag tóg nén ù ma mÿ ja tũ nÿgtÿ, sacco tũ, bolsa tũ, pën né tũ, pën to ró ën. Ën kã ãjag mÿ jagãgtar ja nÿtÿgtÿ?” he tóg. Kÿ ag tóg ti mÿ: “vó,” he mÿ.

³⁶ Kÿ tóg ag mÿ: “hã ra tóg ùri ke tũ nÿgtÿ,” he mÿ. “Hã kÿ ãjag jãnkamy ma mÿjëg, ãjag sacon ma mÿjëg, ãjag bolsa ma mÿjëg. Æjag tÿ nén ù tũ nÿtÿn kÿ ãjag kur vender hemnÿ, rógro kajãm jé sir.

³⁷ Nén ù tóg iso rán kÿ nÿ, hã vÿ: ag mÿ tóg tÿ ùn jykre pãno nÿ, he mÿ. Sÿ vãhã tag venh ke vë ha. Isÿ iso nén rán kÿ nÿ ën ve kãn ke vë ha, vãhã,” he tóg, Jesus ti.

³⁸ Kÿ ag tóg ti mÿ: “Senhor,” he mÿ. “Rógro régre vÿ ki nÿtÿ,” he ag tóg mÿ. Hã ra tóg ag mÿ: “gen kÿ,” he mÿ.

Jesus tÿ ã panh mré vÿ
(Mt 26.36-46; Mc 14.32-42)

³⁹ Kÿ tóg ã tÿ tÿ jafã ra tÿ mÿ sir, hã vÿ: pãnónh tÿ Oliveira, he mÿ ën ra. Ti mré mÿ tÿ ag vÿ ti nón mÿ mÿ sir.

⁴⁰ Tá jun kÿ tóg ag mÿ: “Topë mré vÿ, ãjag tÿ ti vÿ mranh tũ nÿ jé, ãjag tÿ nén ù jagy ve kÿ,” he mÿ, Jesus ti, ã mré mÿ tÿ ag mÿ.

⁴¹ Kÿ tóg tÿg sÿ han mÿ, kÿ tóg ã jakrÿ tÿ jëg mÿ. Kÿ tóg Topë mré vÿ mÿ sir.

⁴² Kÿ tóg: “panh,” he mÿ. “Mÿ ã tÿ inh vësÿrenh ke tag tÿ tũ' he mÿ jãvãnh? Hã ra isÿ ã mÿ nén to vÿ mÿ tag han tÿg nÿ. Æ tÿ nén han ke mÿ ën hã han nÿ,” he tóg, Jesus ti, Topë mÿ.

⁴³ Kÿ Topë tÿ jëgnë jafã ù vÿ ti mÿ vënh ven mÿ sir, kanhkã tá, kÿ tóg ti tar han mÿ.

⁴⁴ Hã ra tóg ã ter ke to kanë jur mÿ, kÿ tóg Topë mré vÿ mân', vÿ mân', he mÿ. Kÿ ti kãrãn vÿ kyvënh nÿ sir, kÿ tóg ga kri vënh kugjëg mÿ.

⁴⁵ Kÿ tóg Topë mré vÿ kar ã mré mÿ tÿ ag to kãtÿ mÿ. Hã ra ag tóg nÿgnÿr nÿtÿ nÿ. Krónh' krónh' he ja ag tóg nÿ, ag fe kaj tigrÿn.

⁴⁶ Kÿ tóg ag mÿ: “ãjag ne tóg nÿgnÿr nÿtÿ nÿ,” he mÿ. “Nÿgnÿ ra, Topë mré vÿ, ãjag tÿ ti vÿ mranh tũ nÿ jé, ãjag tÿ nén ù jagy ve kÿ,” he tóg, ti mré mÿ tÿ ag mÿ.

Ag tÿ Jesus se
(Mt 26.47-56; Mc 14.43-50; Jo 18.3-11)

⁴⁷ Ti tÿ ver tÿ vëmén jë ra ag tóg junjun mÿ sir, Judas mré hã, ù tÿ 12 (ke) ag kã ù

ën ti. Ti tÿ ag tatÿn kãtÿg hã vë, ù tÿ ti senh ke mÿ ag. Æ tÿ ag jo tÿ mÿ ën tóg sir Jesus to grën ke kÿ ti ki nhun ke mÿ.

⁴⁸ Kÿ Jesus tóg ti mÿ: “Judas,” he mÿ. “Æ ne tóg inh ki nhun ke kÿ iso: “ti hã vë,” he mÿ', inh kato tã ag mÿ, inh, hã vÿ: ëprã ke fi kósin, he mÿ,” he tóg, Jesus ti.

⁴⁹ Kÿ ti mré mÿ ag tóg ag tÿ ti senh ke vëg mÿ. Kÿ ag tóg ti mÿ: “Senhor,” he mÿ. “Ëg mÿ rógro tÿ ag fynh ke tũ'?” he ag tóg.

⁵⁰ Kÿ ag kã ù tóg polícia ù fynh mÿ, ti nÿgrëg tÿ rãm ke tóg mÿ, ti pëgja tá. Topë tũ ki rÿr tÿ to pã'i krëm ke ù vë, polícia ën ti.

⁵¹ Hã ra Jesus tóg ag mÿ: “ag vóg tÿg ra, há ti nÿ,” he mÿ. Kÿ tóg ti nÿgrëg mân kÿ to tÿ grën ke mÿ sir.

⁵² Kÿ Jesus vÿ pã'i ag mré vëmén mÿ, Topë tũ ki rÿr tÿ to pã'i ag mré, Topë jo ïn ki rÿr tÿ to pã'i ag mré ke gé, kófa ag mré ke gé. Ag kar vÿ ti se kãmÿ mÿ. Kÿ tóg ag mÿ: “ãjag ne tóg rógro génh kÿ iso kãmÿ mÿ', ka kyv génh kÿ ke gé,” he mÿ. “Inh pi(jé) tÿ bandido nÿ,” he tóg.

⁵³ “Kurã kar ki sóg Topë jo ïn krëm ãjag mré nÿ ja nÿgtÿ, hã ra ãjag tóg tá ise sór ja tũ nÿ, ãjag tÿ ag kamëg kÿ,” he tóg. “Hã ra tóg ùri jun, ãjag kurã ti, Japo tÿ ã tÿ nén han sór tÿ ën han jé, ãjag tÿ. Jykre ki kuty ti nÿ, Japo ti,” he tóg, Jesus ti.

Pedro tÿ Jesus to ón
(Mt 26.57-58, 69-75; Mc 14.53-54, 66-72; Jo 18.12-18, 25-27)

⁵⁴ Kÿ ag tóg ti ség mÿ sir. Ag tÿ ti pére mÿ kÿ ag tóg Topë tũ ki rÿr tÿ to pã'i mág ïn tá junjun mÿ sir.

Hã ra Pedro vÿ kuvar há tá ag nón tÿ mÿ.

⁵⁵ Æn vãso tá ag tóg pÿ grug mÿ, soldado ag, kÿ ag tóg tugtón nÿtÿ nÿ. Kÿ Pedro vÿ ag mré tón nÿ nÿ sir.

⁵⁶ Kÿ pã'i camarada ù fi vÿ tá ti vëg mÿ, pÿ grun ki. Kÿ fi tóg ti tugnÿm mÿ. Kÿ fi tóg ag mÿ: “ti mré tÿ ù vë inh mÿ',” he mÿ.

⁵⁷ Hã ra Pedro tóg: “vó,” he mÿ. “Ti ki kagtÿg sóg nÿ, jÿ,” he tóg.

⁵⁸ Kar kÿ ù tóg ti tugnÿm mÿ gé, kÿ tóg ti mÿ: “ag kã ù vÿ tÿ ã nÿ,” he mÿ. Hã ra Pedro tóg ti mÿ: “inh hã tũ vë, vÿ,” he mÿ gé.

⁵⁹ Tag kar kÿ, hora pir tÿg kÿ hën ri ke mÿn ù tóg ti tugnÿm mÿ gé. Kÿ tóg tá nÿtÿ

ag mý: “ha vé, Galiléia tá ke vỹ tỹ ti nĩ,” he mũ. “Inh mý tóg tỹ ti mré ke nĩ,” he tóg mũ gé sir.

⁶⁰ Hã ra Pedro tóg ti mý: “inh pi(jé) ti ki kanhró nĩ, vỹ,” he mũ. “Ã tỹ ne tó nẽ?” he tóg mũ sir. Ti tỹ ver tó nĩ ra galo vỹ kyr mũ.

⁶¹ Kỹ ãg Senhor vỹ vēsỹjãm ãvãnh kỹ Pedro tugnỹm mũ. Kỹ Pedro vỹ to jykrén mũ sir, ãg Senhor tỹ ti mý nén tó ja to, hã vỹ: “iso ã tóg: “ti ki kagtĩg sóg nĩ,” he tãgtũ han ke mũ, galo kyr to hã,” he ja ãn mĩ.

⁶² Kỹ Pedro vỹ tá kãkutẽ mũ, kỹ tóg fỹ mág han mũ sir.

Ag tỹ Jesus vóg kónãn
(Mt 26.67-68; Mc 14.65)

⁶³ Kỹ ã tỹ Jesus ség mũ ag vỹ ti to é he mũ sir. Ti tãnh ag tóg mũ gé sir.

⁶⁴ Ti kanẽ pãg kỹ ag tóg ti kakã ki tãnh kỹ ti mý: “ũ nỹ ã tãnh?” he mũ. “Ã tỹ nén kar ki kanhró nĩn kỹ ã hỹn ki kanhró nĩ,” he ag tóg ti mý.

⁶⁵ Gen kỹ ag tóg ti mý vỹ kónãn tỹ hẽn ri ke han mũ, ti to é he kỹ.

Pã'i ag tỹ Jesus ki jẽmẽ
(Mt 26.59-66; Mc 14.55-64; Jo 18.19-24)

⁶⁶ Tỹ vaj kỹ kófa kar ag tóg vãnh mãn mũ, Topẽ tũ ki rĩr tĩ to pã'i ag mré hã, Topẽ vỹ to professor ag mré hã. Ag vãnh mãn kỹ ag tóg ti jé prẽr kỹ ag rĩnja tá ti fẽg mũ sir, ag tỹ ón kỹ ti jykre ve jé. Ag tỹ ti tén sór vẽ, hã ra ag tóg ón kỹ ti jykre ve vén sór mũ.

⁶⁷ Hã kỹ ag tóg ti mý: “ã mý tỹ Cristo nĩ?” he mũ. “Ha ãg mý tó,” he ag tóg. Kỹ tóg ag mý: “ãjag pi(jé) inh vỹ kri fig tĩ', isỹ ãjag mý tó tĩ (hã) ra',” he mũ.

⁶⁸ “Isỹ ãjag ki jẽmẽ sór mũ ra ãjag tóg inh mý tó tũ nĩ gé. Kỹ ãjag tóg isovãnh tũ nĩ gé,” he tóg.

⁶⁹ “Hã kỹ ãprã ke fi kósın vỹ Topẽ pẽgja tá nĩnh ke mũ ha. Topẽ vỹ tar nĩ. Sỹ ti pẽgja tá nĩnh ken vẽ ha,” he tóg.

⁷⁰ Kỹ ag tóg ti mý ke kãn mũ. “Kỹ ã mý tỹ Topẽ kósın nĩ?” he ag tóg mũ ti mý. Kỹ tóg ag mý: “ki hã ãjag tóg tó mũ,” he mũ. “Inh hã vẽ,” he tóg ag mý, Jesus ti.

⁷¹ Kỹ ag tóg: “ti kato vỹ ã jẽmẽ mãn ke tũ ãg nĩ ha,” he mũ, jagnẽ mý. “Ti jẽnky ki kutẽ mẽ ãg tóg huri. Topẽ to vỹ kónãn ti huri. Ti ter ke vẽ,” he ag tóg mũ sir, pã'i ag, Jesus to.

23

Pilatos tỹ Jesus ki jẽmẽ
(Mt 27.1-2, 11-14; Mc 15.1-5; Jo 18.28-38)

¹ Hã ra tá ke kar ag vỹ Jesus pére mũ mũ, fóg tỹ pã'i tỹ Pilatos mý.

² Tá ag tóg ti kato vỹ mũ sir, kỹ ag tóg Pilatos mý: “vãnh kar krĩn kónãn han tóg tĩ, ag tỹ vãnh jykre há tovãnh jé,” he mũ. “Kỹ tóg ag mý: “pã'i mág tỹ imperador mý imposto nĩm tũg nĩ,” he tĩ gé. Kỹ tóg vẽso: “tỹ inh Cristo nĩ, pã'i mág tỹ rei ti,” he tĩ gé,” he ag tóg mũ, Jesus to.

³ Kỹ Pilatos tóg ti mý: “ã mý tỹ Judeu ag pã'i tỹ rei nĩ?” he mũ. Kỹ tóg ti mý: “ki hã ã tóg tó mũ,” he mũ, Jesus ti.

⁴ Kỹ Pilatos vỹ ag mý kãmén mũ, Topẽ tũ ki rĩr tĩ to pã'i ag mý, povo kar mý ke gé, kỹ tóg: “ti tỹ nén ã kórég han ja vэг tũ sóg nĩ, ti ki,” he mũ.

⁵ Hã ra ag tóg ti tovãnh jãvãnh pẽ nỹtĩ. Kỹ ag tóg ti mý: “hã ra tóg vãnh kar krĩ rỹg tĩgtĩ,” he mũ. “Ga tỹ Judéia kar mĩ tóg tĩg ja nĩ, ga tỹ Galiléia mĩ ke gé, tag mĩ ke gé. Tĩg kỹ tóg vãnh kar krĩn kónãn tĩ,” he ag tóg ti mý, pã'i ag.

Herodes tỹ Jesus ki jẽmẽ

⁶ Kỹ Pilatos vỹ ga tỹ Galiléia tag to jykrén mũ, kỹ tóg: “ti mý tỹ Galiléia tá ke nĩ?” he mũ.

⁷ Kỹ ag tóg ti mý: “hỹ,” he mũ. Hã ra Herodes vỹ tỹ ga tỹ Galiléia tá pã'i mág nĩ. Hã kỹ Pilatos tóg ti hã mý ti jẽnẽg mũ. ãn kã tóg Jerusalém tá nĩ gé, Herodes ti.

⁸ Kỹ tóg Herodes tá jun mũ sir. Ti tỹ ti ve kỹ tóg ti mý sér tĩ. Ti tỹ ti ve sór ja vẽ. Ti kãmẽ mẽ ja tóg nĩ, hã kỹ tóg ti ve sór ja nĩgtĩ, Herodes ti. “Hẽn ri ke mũn tóg nén ã han vãnh han ke mũ, sỹ ve jé,” he tóg.

⁹ Jesus tỹ ti ki jun kỹ Herodes tóg ti ki jẽmẽ sór mũ, nén tỹ hẽn ri ke ki, hã ra tóg ti mý vỹ tũg mũ.

¹⁰ Hã ra pã'i ag vỹ tá nỹtĩ nĩ, kỹ ag tóg ti kato vỹ mág han mũ sir, Topẽ vỹ to professor ag ke gé. Hã ra Jesus tóg ag mý vỹ tũg mũ gé.

¹¹ Kỹ Herodes vỹ ti to é he mũ gé, ti mré ke kar ag ke gé, kỹ ag tóg ti nyg mũ sir. Kur kupri pẽ tỹ tóg ti kri fón mũ, ón kỹ. Kỹ tóg Pilatos mý ti jẽnẽ mãn mũ sir.

¹² Kurã ên kã Pilatos vỹ Herodes mỹ vĩ há han mũ. Jagnê to há' he mãn ag tóg mũ ha. Ag tỹ Jesus ve jo ag tóg jagnê kato tê ja nĩgtĩ.

Ag tỹ Jesus tén sór

(Mt 27.15-26; Mc 15.6-15; Jo 18.39-19.6)

¹³ Kỹ Pilatos vỹ Topê tũ ki rĩr tĩ to pã'i ag jé prêr mũ sir, pã'i kar ag ke gé.

¹⁴ Kar tóg ag mỹ: “ãjag ne inh mỹ ti fêg',” he mũ, “kỹ ãjag ne ti to: “vênh kar krĩn kónãn tóg tĩ,” he mũ'. ãjag rĩnve sóg ti ki jêmê huri, hã ra sóg ve ja tũ nĩ, ãjag tỹ ti to nén tó ja ti. Nén ù kórég han ja tũ tóg nĩ.

¹⁵ Kỹ Herodes vỹ vég tũ nĩ gé. Sỹ ti mỹ ti jênê ja vê, ãjag ke gé. Hã ra tóg inh mỹ ti jênê mãn mũ gé. Êg hê ri ken kỹ ti tén mũ hỹn'? Sỹ ki kagtĩg tóg tĩ.

¹⁶ Hã kỹ sóg ti mrãnmrãn kar ti tovãnh ke mũ,” he tóg, Pilatos ti.

¹⁷ Festa tỹ Páscoa ki tóg ag mỹ vêse pir tovãnh tĩ, prỹg kar ki. Ti jykren hã vê. Hã kỹ tóg: “Jesus tovãnh jé sóg ke mũ,” he mũ.

¹⁸ Hã ra vênh kar ag tóg vãhã prênprêr mũ sir. “!..Ti tén ra..!” he ag tóg mũ. “!..Barrabás tovãnh ra..!” he ag tóg.

¹⁹ Barrabás vỹ vênh génh to se kỹ jê nĩ. Cidade tá tóg vênh génh han ja nĩgtĩ, ên kã tóg ù tén ja nĩgtĩ, hã to tóg se kỹ jê nĩ.

²⁰ Kỹ Pilatos vỹ ag mỹ vĩ mãn mũ. Ti tỹ Jesus tovãnh sór vê, hã kỹ tóg ag mỹ vĩ mãn mũ.

²¹ Hã ra ag tóg prênprêr kỹ: “!..cruz to ti sã, cruz to ti sã..!” he mũ.

²² Kỹ tóg ag mỹ vĩ tãgtũ han mũ gé, Pilatos ti. “Ti kórég tỹ ne han ti? Sỹ vég tũ tóg tĩ. Ti tỹ ne to ter ke nê? Sỹ ki kagtĩg tóg tĩ. Hã kỹ sóg ti mrãnmrãn kar kỹ ti tovãnh ke mũ,” he tóg.

²³ Hã ra ag tóg prênprêr tãvĩ han mũ sir, hã kỹ ag tóg ti kutãn mũ. Ti mỹ ag tóg: “!..cruz to ti sã..!” he tãvĩ han mũ. Kỹ tóg ag prênprêr to ag mỹ han sór mũ sir.

²⁴ To tóg jykren mũ, kỹ tóg ag mỹ: “hej,” he mũ, ag tỹ ti kutãn to.

²⁵ Kỹ tóg ù ên tovãnh mũ sir, ù tỹ vênh génh to se kỹ jê ên ti, ù tỹ ù tén ja ên ti. Ag tỹ ù to vĩ mũ ên tovãnh tóg mũ sir. Kỹ tóg ag mỹ Jesus ti fêg mũ sir, ag tỹ ti ki han sór mũ ên han jé.

²⁶ Kỹ ag tóg ti pére mũ mũ, cruz to ti sa jé.

Jesus tỹ cruz to sa

(Mt 27.32-44; Mc 15.21-32; Jo 19.17-27)

Ag mũn kỹ ag tóg ù kãtĩg vég mũ. Êpỹ tá tóg kãtĩ mũ, ti jijin hã vỹ: Cirene tá Simão, he mũ. Ti kri ag tóg Jesus cruz ti fig mũ, ti tỹ ti jo va tĩg jé, ti nón.

²⁷ Kỹ ù tỹ hên ri ke ag vỹ Jesus nón mũ mũ, ùn tỹtã fag ke gé. Ên fag vỹ vêsyrénh mũ, kygfỹ mág han fag tóg mũ sir.

²⁸ Hã ra Jesus tóg vêsỹjãm êvãnh kỹ fag mỹ vĩ mũ. “Jerusalém tá ke',” he tóg. “!jé kygfỹ tũg nĩ,” he tóg. “Vênh jé kygfỹmnĩ, ãjag krê jé kygfỹmnĩ,” he tóg fag mỹ.

²⁹ “Ha vé, kurã kórég pê vỹ jun ke mũ ãjag mỹ. Ên kã ag tóg tag tónh ke mũ, ha mê: “ũn kurĩ fag mỹn pãgsĩ nĩnh mũ, fag tỹ ãjag krê ter vég tũ nĩnh kỹ. Ûn krê tũ fag mỹn pãgsĩ nĩnh mũ, ù tỹ gĩr pafãm tũ fag mỹ ke gé,” he jé ag tóg ke mũ.

³⁰ Ên kã ag tóg pãnónh mỹ: “inh kri tỹ tam ké,” henh ke mũ gé, kỹ ag tóg sór mỹ: “inh péju ra, vênh krêm,” henh ke mũ gé.

³¹ Êg kato tê ag tỹ ka tánh gỹn kỹ ag hỹn ka tóg tovãnh ke tũ pê nĩ. Ka tánh ên ri ke sóg nĩ, jo ãjag vỹ ka tóg ri ke nỹtĩ. Hã kỹ ãjag tóg inh vêsyrénh kãfór venh ke mũ, ha vemnĩ,” he tóg, Jesus ti. Jerusalém fĩn rãm kỹ tóg ke mũ.

³² Ag tỹ Jesus pére mũn kỹ ag tóg ùn régre ag pére mũ mũ gé, ùn jykre pãno ag. Ag tỹ ka to ag sanh ke vê gé.

³³ Kỹ ag tóg pãnónh tá junjun mũ sir, ti jyjyn hã vỹ: Krĩ Kuka, he mũ. Tá ag tóg cruz to ti sãg mũ sir. Ûn jykre pãno tỹ ag tóg cruz to sãg mũ gé, ti kóm, kỹ ù vỹ ti pêgja tá sa, jo ù vỹ ti jakãnh tá sa.

³⁴ Kỹ Jesus vỹ: “panh',” he mũ. “Ag mỹ vênh pãte fón nĩ,” he tóg. “Ag pí(jé) ki kanhró nỹtĩ', ag tỹ nén han mũ tag ti',” he tóg.

Kỹ soldado ag tóg ti kur tỹ jagnê mỹ tỹ vênh ken jé to jogar he mũ sir.

³⁵ Kỹ vênh e ag vỹ tá vég nỹtĩ. Hã ra pã'i ag tóg ti nyg mũ. Kỹ ag tóg jagnê mỹ: “ũ ag krenkren han ja tóg nĩgtĩ,” he mũ. “Cristo jé vênh kren han, Topê tỹ ti fêg ja nĩnh kỹ, ti tỹ ti kuprêg ja nĩnh kỹ, hã ra tóg vênh kren han ki kagtĩg nĩ,” he ag tóg mũ, Jesus to é he kỹ.

³⁶ Kÿ soldado ag vÿ ti nyg mũ gé. Ti rã hã nÿtĩn kÿ ag tóg ti mÿ vinagre ven mũ sir.

³⁷ Kÿ ag tóg: “ã mÿ tÿ Judeu ag pã'i mág nĩ?” he mũ. “Vẽnh kren han ra, ã tÿ tÿ pã'i nĩn kÿ,” he ag tóg mũ ti mÿ, ti to é he kÿ.

³⁸ Hã ra ag tóg rán ja nĩ gé, ti tÿ cruz to sa kÿ jẽ ên ti. Ti to rán hã vễ, hã vÿ: “Judeu ag pã'i mág tÿ rei hã vễ,” he mũ. Ti kri tóg cruz to sa gé, ên rá ti.

³⁹ Kÿ ti kóm cruz to sa ù tóg ti mÿ vĩ mũ gé, ùn jykre pãno ên. Ti to tóg é he mũ gé. Kÿ tóg ti mÿ: “ã mÿ tÿ Cristo nĩ?” he mũ. “Vẽnh kren han ra, kÿ ã krenkren han gé,” he tóg mũ gé.

⁴⁰ Hã ra ti kóm cruz to sa ù ù tóg ti mÿ vĩ jũ han mũ, ù tÿ Jesus mÿ vĩ kónãn mũ ên mÿ. Kÿ tóg ti mÿ: “kÿ ã mÿ Topẽ kamẽg tũ?” he mũ. “Vẽsÿrénh ã tóg mũ gé, ti kóm.

⁴¹ Ëg tÿ ã tÿ nén han ja kajãm vễ jãvo, ãg jykre pãno to ãg vễsÿrénh nÿtĩn. Ëg jãvo tóg jykre kuryj nĩ. Ti pi(jé) nén ù kórég han ja nĩ,” he tóg.

⁴² Kÿ tóg Jesus mÿ: “Senhor’,” he mũ. “Inh ki êkrén nĩ, ã tÿ tÿ pã'i ki rãn kÿ,” he tóg mũ, Jesus mÿ.

⁴³ Kÿ Jesus tóg ti mÿ: “ha mẽ, ùri ã tóg inh mré nĩnh mũ, êmã há ên tá, Paraíso he mũ ên tá, kanhkã tá. Ki hã sóg tó mũ,” he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

⁴⁴ Kejẽn rã tóg ãg nĩno kã sa mũ sir. Hã ra tóg kuty' he mũ sir, ga kar mĩ hã. Kuty ên tóg hora tãgtũ han mũ.

⁴⁵ Kÿ rã vÿ nhyn ke mũ sir. Topẽ jo ãn krẽm kur tÿ jãnkã mág pẽ vÿ kã sa nĩ. Ên vÿ jaran ke mũ. Kuju mĩ tóg jaran ke kãtère mũ sir, fĩn rãm kãn tóg mũ.

⁴⁶ Kÿ Jesus vÿ prẽr mág pẽ han mũ. Kÿ tóg: “!..panh'!” he mũ. “!..Sÿ ã mÿ vễnh fẽg vễ, inh kuprĩg ti..!” he tóg. Tag tó kar tóg hun ke mũ sir.

⁴⁷ Hã ra fóg tÿ capitão tóg ti ter vэг mũ. Kÿ tóg Topẽ mÿ vĩ há han mũ. “Vẽnh vĩ há ja vễ, ùn há ja vễ,” he tóg mũ.

⁴⁸ Kÿ vễnh e ên vÿ ti ter vэг mũ gé. Kÿ ag tóg ãgag tÿ nén han ja to jykren mũ sir. Vãhã tóg ag mÿ e tĩ. “Topẽ hÿn ãg tÿ hẽ ri kenh

mũ, ãg tÿ ti tén kÿ?” he ag tóg mũ sir. Tag tó kÿ ag tóg ãgag ãn ra vÿnvÿn ke mũ.

⁴⁹ Hã ra ti to há kar ag vÿ ti vэг nÿtĩ nĩ, kakó ki, ùn tãtã fag ke gé. Galiléia tá ke fag tóg ti mré kãmũ ja nĩgtĩ gé. Ti ter ve kãn fag tóg mũ sir.

Ag tÿ vễnh kej tá Jesus fi

(Mt 27.57-61; Mc 15.42-47; Jo 19.38-42)

⁵⁰ Kÿ ù tóg tá nĩ gé, vễnh jyvẽn tĩ ù, ha mẽ, ti jijin hã vÿ: José, he mũ. Judeu ag tÿ cidade tÿ Arimatéia tá ke ti nĩ. Jykre kuryj tóg nĩ, jykre há.

⁵¹ Ti pi(jé) ag tÿ Jesus tén ke to: “hej,” he ja nĩgtĩ', ag tÿ Jesus to jykren kÿ. Topẽ tÿ tÿ ãg pã'i nĩnh ke ve sór tóg mũ gé.

⁵² Ên vÿ Pilatos venh tĩ mũ. Kÿ tóg ti mÿ Jesus to vĩ mũ, ti ter kar kÿ.

⁵³ Kÿ tóg cruz to ti kãtèrem mũ, kÿ tóg kur há tÿ ti pãg mũ sir. Kÿ tóg pãró nor kãki vễnh kej kãkã ti fig mũ. Vễnh kej tãg vễ, ag pi(jé) kãkã ù fi ja nĩgtĩ ver'.

⁵⁴ Hã ra sexta-feira vễ sir, vễnhkãn ke kurã ki rã tóg nÿ ha, sãbado ki.

⁵⁵ Kÿ ùn tÿtã fag vÿ ag nón mũ mũ, ti kej ve jé, ag tÿ ti finh mũ ja tá. Ti mré Galiléia tá kãmũ ja ên fag vễ, ù tÿ ti fi han vэг mũ fag.

⁵⁶ Ve kar kÿ fag tóg kyrãgrã kÿ nén ger há han mũ sir, ti tãg jafã ti, ti to tĩn jé. Hã ra fag tóg vễnhkãn mũ ver, vễnhkãn ke kurã kã, Topẽ vĩ ki króm jé.

24

Jesus rĩr mãn

(Mt 28.1-10; Mc 16.1-8; Jo 20.1-10)

¹ Kÿ semana kurã ve tóg tá krÿg mũ sir. Kÿ fag tóg kusã pẽ ki ti kej tá venh mũ mũ. Vẽser ger há han jafã ên ma fag tóg mũ mũ, fag tÿ han ja ên ti, ti kej ra mũn kÿ.

² Hã ra pó ên tÿ ti kej nĩfénh kã nĩ ên vÿ kunũnh kÿ nĩ nĩ. Hã vэг fag tóg mũ.

³ Kÿ fag tóg ti kej tá junjun kÿ ra ge mũ, hã ra fag tóg vэг tũ nĩ, vẽser ti, Jesus ti, ãg Senhor ti.

⁴ Kÿ tóg fag fe kaj tĩ sir, fag tÿ ti vэг tũ nĩn kÿ. Kÿ vãhã ùn rẻgre ag vÿ kãge mũ, kur kupri rĩnh kÿ, kur kókov, Topẽ tÿ jẽnẽ jafã ag.

⁵ Kÿ fag tóg kanẽ junjur mũ sir, kÿ fag tóg ãgag ãvãnh mũ. Hã ra ag tóg fag mÿ: “ãgag

ne tóg vēser jāvānh mū', ti rīr ja (hā) ra',” he mū.

⁶ “Ki ti tū nī, rīr ti jē ha. Hā kǵ tóg ājag mǵ tó ja nīgtī, ājag tǵ Galilėia tá nǵtī ěn kā.

⁷ Kǵ tóg ājag mǵ: “ěprā ke fi kósin ěn fĕg jé ag tóg ke mū, ũ tǵ Topĕ vī mranh tī ag mǵ,” he ja nī. “Ka to ag ti sanh ke mū, hā ra tóg kurā tāgtū ki rīr mǎn ke mū,” he ja tóg nīgtī, Jesus ti, vēso,” he ag tóg mū, Topĕ tǵ jĕnĕ jafā ag.

⁸ Kǵ fag tóg Jesus tǵ nĕn tó ja ěn mī ěkrĕn mǎn mū sir.

⁹ Kǵ fag vǵ ti kej tá kāpa kǵ mū mū sir, ũ tǵ 11 (ke) ag mǵ tó jé, ti mré mū tī kar ag mǵ ke gé.

¹⁰ Maria Madalena fi vē, kar kǵ Joana fi ke gé, Maria ũ fi ke gé, Tiago mǵnh tag fi, ũ fag ke gé, fag mré. Fag hā ne Jesus tǵ ũn vin mū ag mǵ kāmĕn mū, apóstolo ag mǵ.

¹¹ Hā ra tóg ag mǵ tǵ vēnh ó nǵ ve nī, hā kǵ ag tóg kri fi ja tū nīgtī, fag vīn kri.

¹² Kǵ Pedro vǵ jē kǵ ti kej ra vēnh vāg tī mū. Pānh ke tóg, kǵ tóg ki ěvānh mū, kǵ tóg ti kur tāvī vég mū sir, ti pāg ja ti. Kǵ tóg ti mǵ e tī. Ti tǵ to jykrĕn tū tóg tī sir. Kǵ tóg tǵ mǎn mū.

*Ag tǵ Emaús ra mū
(Mc 16.12-13)*

¹³ Kǵ vāhā ag kā ũ ag tóg mū mū, kurā ěn kā, ũn régre ag. ěmā sī ra ag tóg mū mū. Jerusalĕm tán kakó nī, 10 (ke) quilōmetros hǵn. ěmā ěn jyjyn hā vǵ: Emaús, he mū.

¹⁴ Ag mūn kǵ ag tóg jagnĕ mré vēmĕn mū sir, ājag tǵ nĕn ve ja kar ěn to.

¹⁵ Ag tǵ vēmĕn nǵtī ra, ag tǵ jagnĕ mré tǵ vēmĕn mág han nǵtī ra Jesus tóg ag tá jun kǵ ag mré tī mū.

¹⁶ Hā ra ag tóg ti ki kagtǵ mū, ag tǵ ti vég mū (hā) ra.

¹⁷ Kǵ Jesus tóg ag mǵ: “ājag tǵ ne tó nĕ?” he mū. “Vĕmĕn mág ājag tóg mū nī,” he tóg. Kǵ ag tóg krǵg he mū sir, ve ũ han ag tóg mū, ājag fe kaj tugnĕn.

¹⁸ Kǵ ũ tóg ti mǵ tó mū. Cleopas he mū ěn tóg ti mǵ: “kǵ ā mǵ mĕg tū?” he mū. “Ū tǵ festa venh kāmū ja ag vǵ mĕ kǎn. Ā hā mǵ ā pir mǵ mĕg tū, ěg tǵ nĕn ve ja ti, ā tǵ Jerusalĕm kā nī (hā) ra?” he tóg ti mǵ.

¹⁹ Kǵ tóg ag mǵ: “ne nĕ?” he mū. Kǵ ag tóg ti mǵ: “Jesus ti,” he mū. “Nazaré tá ke vē.

Topĕ vī tó tī vē. ěg tǵ nĕn han vānh hyn han ja tóg nīgtī. Topĕ vī tó há han ja tóg nīgtī, kǵ Topĕ vǵ ti mré han tī, milagre kar ti. Kǵ povo kar ag vǵ vég tī, kǵ tóg ěg kar mǵ e tī.

²⁰ Kǵ Topĕ tū ki rīr tī ag vǵ ti fĕg, ěg pǎ'i kar ag, fóg tǵ pǎ'i tǵ ti tĕn jé, cruz to ti sa jé, hā kǵ tóg tǵg mū.

²¹ ěg tǵ ti ve kǵ ěg tóg ti to: “ti hǵn ěg povo tǵ Israel ag krenkren han ke mū,” he mū vē. Hā ra tóg ter ja nī. Ūri tóg kurā tāgtū han, ti ter kri,” he ag tóg, Jesus mǵ.

²² “Kǵ ěg kā ũ fag vǵ ěg mǵ nĕn ũ tó gé, kǵ tóg ěg mǵ e tī gé. Kusā pĕ ki fag tóg ti kej ra mūjĕg.

²³ Hā ra fag ti vég tū nī, ti tǵ tá nǵ tū nīn kǵ. Kǵ fag tóg: “nĕn nĕ ve ěg,” he mū gé. Topĕ tǵ jĕnĕ jafā nĕji, kǵ tóg nĕji fag mǵ: “rīr ti jē nī,” hé.

²⁴ Kǵ ěg kā ũ ag vǵ ra mū mū, ti kej ra, kǵ ag tóg vég mū gé, fag tǵ nĕn tó ja ti. Hā ra ag tóg ti vég tū pĕ nī,” he ag tóg, Jesus mǵ, ag tǵ ti ki kagtǵ nǵtĕn kǵ.

²⁵ Kǵ ũ tǵ ag mré tī mū ěn tóg ag mǵ: “ājag tǵ ne jé vāsǵ Topĕ vī tó tī ag vī kri fi ja tū nī nĕ?” he mū. “Krī tū ājag nǵtī, to jykrĕn há han tū ājag tóg nǵtī,” he tóg.

²⁶ “Cristo vēsǵrĕnh ke vē, vēsǵrĕnh kar kǵ tóg tǵ ũn mág nīnh mū vāhā,” he tóg.

²⁷ Kǵ tóg ag mǵ vēnh rá kāmĕn kǎn mū sir, Moisés tǵ rá ti, Topĕ vī tó tī ag kar tǵ rá ti, ag tǵ Jesus to rán ja ti.

²⁸ Ag mǵ kāmĕn tī ki tóg ěmā ěn tá jun mū sir. Ag mré tá jun kǵ tóg mā ra tǵg mū ve nī.

²⁹ Kǵ ag tóg ti kógfyn mū sir, kǵ ag tóg: “ěg mré nī,” he mū. “Rāké tóg nǵ ha, kutyg ke rá tóg nǵ ha,” he ag tóg mū sir. Kǵ tóg ag mré kǎra rá mū, ag mré nī jé.

³⁰ Kǵ tóg ag mré jĕn ke mū gé sir. Ag mré jĕn ke kǵ tóg pǎo mág mū, ěmī ti. Kǵ tóg Topĕ mré vī mū, kar tóg kupān kǵ tǵ vēnh ken mū.

³¹ Kǵ ag tóg ti ki kanhrān mū sir vāhā. Ti ve há han ag tóg mū sir. Hā ra tóg ki tū nī ha, ti ve mǎn tū ag tóg nī sir.

³² Kǵ ag tóg jagnĕ mǵ: “ti tǵ ěg mré vēmĕn kǵ tóg ěg fe ki rá,” he mū. “ěg mǵ tóg ā to rán ja ěn kāmĕn kǎn, ěg mūn kǵ. Hā ja vē,” he ag tóg mū jagnĕ mǵ.

³³ Kÿ ag tóg vêsýmér Jerusalém ra vÿnvÿn ke mÿ sir. Tá ag tóg ù tÿ 11 (ke) ag vég mÿ, ag mré ke ù ag mré há.

³⁴ Hã ra ên ag tóg ag mÿ: “êg Senhor vÿ rÿr mãn,” he vén mÿ. “Simão Pedro mÿ tóg vênh ven, mÿr, ha mẽ,” he ag tóg mÿ sir.

³⁵ Kÿ ag tóg ag mÿ: “hÿ, ti ve êg ke gé,” he mÿ gé. Kÿ ag tóg ag mÿ ãjag tÿ nén ve ja ên tó mÿ sir, ag tÿ ãjag mÿ ki ti ve ja ti, ti tÿ ag mÿ êmÿ kupãn ja ti ke gé. “Hã ki êg tóg ti ki kanhró nÿtÿ, êmÿ kupãn ja ki,” he ag tóg mÿ.

Jesus tÿ vênh kar ên mÿ vênh ven

(Mt 28.16-20; Mc 16.14-18; Jo 20.19-23; Hk 1.6-8)

³⁶ Ag tÿ ver tÿ vémén nÿtÿ ra Jesus tóg ag mré jê mÿ vãhã, ti tÿ hê tá kãrãnh ke tÿ nÿ ra. Kÿ tóg ag mÿ: “mÿ sér nÿtÿmÿnÿ,” he mÿ.

³⁷ Hã ra ag tóg jÿrÿnrÿn ke mÿ sir. Ti kamêg ag tóg mÿ. “Vênh kuprÿg hÿn,” he ag tóg mÿ, Jesus to.

³⁸ Kÿ tóg ag mÿ: “ãjag ne tóg jÿrÿnrÿn ke mÿ,” he mÿ. ãjag tÿ ne jé: “vênh kuprÿg hÿn,” he nê?” he tóg.

³⁹ “Inh nÿgé ve ra, inh pên ve ra, inh hã vê,” he tóg. “Inh mẽgmê ra, ve há han ra. Vênh kuprÿg pi(jé) fár nÿ, ti pi(jé) kuka nÿ. Inh fár ve ra, inh kuka ti,” he tóg.

⁴⁰ Vÿ kÿ tóg ag mÿ ã nÿgé ven mÿ, ã pên ke gé.

⁴¹ Hã ra tóg ver ag mÿ e tÿ, ag fe tÿ mrin ke pê han kÿ, kÿ tóg ver ag tÿ ki kagtÿg tÿ. Hã kÿ tóg ag mÿ: “mÿ ki vêjên tÿ?” he mÿ.

⁴² Kÿ ag tóg ti mÿ pirã nÿm mÿ, mÿg mré.

⁴³ Kÿ tóg mãn kÿ ko mÿ, ag rÿnve.

⁴⁴ Kÿ tóg ag mÿ: “hã tó ja inh nÿ, ãjag mÿ, iser to hã, isÿ ãjag mré nÿgnÿn kã,” he mÿ. “Vãhã sóg ve kãn ja nÿgtÿ, ag tÿ iso nén rán ja ti, Moisés ti, ti tÿ ãjag mÿ vênh jykre nÿm jan ki, kar kÿ Topê vÿ tó tÿ ag kar tÿ nén rán ja ki ke gé, Topê to jãn ki ke gé. Sÿ nén ven jan hã vê,” he tóg, ã mré mÿ tÿ ag mÿ.

⁴⁵ Kÿ tóg ag mÿ kãmén há han mÿ sir, hã kÿ ag tóg ti to nén rán ja ki kanhrãn kãn mÿ sir, to jykren há han ag tóg mÿ sir, ti tÿ ag nÿgrêg róm kÿ.

⁴⁶ Kÿ tóg ag mÿ: “tag vÿ rán kÿ nÿ, ha mẽ,” he mÿ. “Hã kÿ Cristo vÿ vêsÿrénh, kÿ tóg rÿr mãn gé, ã ter kar kÿ, kurã tãgtÿ tÿg kÿ. Tag ve kãn sóg huri,” he tóg.

⁴⁷ “Kÿ tóg rán kÿ nÿ gé, ù ag tÿ vênh kar mÿ inh kãmén ke ti. Inh jÿjin tó jé ag tóg ke mÿ, ag tÿ vênh kar mÿ: “ãjag jykre si tovãnh ra,” henh ken kÿ, ù tÿ inh vÿ tó tÿ ag. “Tovãnh kÿ Topê tóg ãjag mÿ vênh pãte fón ke mÿ, ãjag tÿ ti vÿ mranh ja ti,” he jé ag tóg ke gé. Povo kar mÿ ag tóg tónh ke mÿ, hã ra ag tóg tag ki tó vén ke mÿ, Jerusalém ki. ãjag to ken hã vê. Inh kãmén jé ãjag tóg ke mÿ.

⁴⁸ Ve kãn ãjag tóg mÿr, hã kÿ ãjag tóg tónh ke mÿ.

⁴⁹ Ha mẽ, inh panh vÿ ãjag mÿ nén ù tó ja nÿ, ãjag tÿ venh ken jé. Ên jênê jé sóg ke mÿ ãjag mÿ. Hã kÿ tag ki nÿtÿmÿnÿ ver, cidade tÿ Jerusalém tag ki. Hên ra mÿ tÿg nÿ. Vãhã ãjag tóg venh ke mÿ, inh panh tÿ ãjag mÿ ùn tó ja ti, hã vÿ: ti kuprÿg, he mÿ. Kanhkã tá tóg kãtÿg ke mÿ, ù tÿ ãjag tar han ke ti,” he tóg, Jesus ti.

Jesus tÿ kanhkã ra tÿg

(Mc 16.19-20; Hk 1.9-11)

⁵⁰ Kÿ tóg ag jãmÿ tÿ mÿ, êmã tÿ Betânia ra. Tá tóg ã nÿgé tÿ ag kri ven mÿ. Kÿ tóg ag mÿ vÿ há han mÿ sir.

⁵¹ Ag mÿ vÿ há han kÿ tóg ag ré kÿ tÿ mÿ, kanhkã ra tãpÿr tóg mÿ.

⁵² Kÿ ag tóg ti to: “Topê vÿ tÿ ti nÿ,” he mÿ sir. Kÿ ag tóg Jerusalém ra kãmÿ mãn mÿ, vêsÿkã. Ag mÿ tóg sér pê tÿ vãhã.

⁵³ Kurã kar ki ag tóg Topê jo ïn ra mÿ tÿ, tá Topê to vÿ há han jé, ti mÿ nén ù há kar tó jé, ti tÿ ag mÿ sér tÿn kÿ.

Hã vê.

JOÃO TỸ RÁ

Topě tỹ ã vỹ tỹ nén ũ kar han

¹ Topě tỹ nén ũ kar han ja tũg ki tóg nĩ ja nĩ, ěg tỹ ũ to: “Topě vỹ,” he mũ ěn ti, hã to ěg: Jesus, he mũ. Topě mré tóg nĩ. Topě vỹ tỹ ti nĩ gé.

² Topě tỹ nén (ũ) kar han tũg ki tóg Topě mrě nĩ nĩ.

³ Ti hã tũgrĩn tóg nén ũ kar han, Topě ti, ěg tỹ ũ to: “Topě vỹ,” he mũ ěn tũgnĩn. Ā pir mỹ Topě tóg nén ũ han tũ nĩ, ti hã mrě tóg nén kar han kãn.

⁴ ěg tỹ ũ to: “Topě vỹ,” he mu ěn vỹ rĩr nĩ, hã kỹ tóg ěg rĩnrĩr han mũ gé. Jẽngrě ri ke ti nĩ, ũ tỹ ěg rĩnrĩr han mũ ěn ti. Ti tỹ ěg kanhrãn to ken hã vỹ.

⁵ Ũn jykre pãno ag vỹ ũ tỹ kuty mũ mũ ěn ag ri ke nỹtĩ. Hã ra tóg ěg mỹ jẽngrě ri ke nĩ, ěg tỹ ũ to: “Topě vỹ,” he mũ ěn ti. Kỹ Nén-Kórég vỹ ti tỹ tũ' he han sór ja nĩ, hã ra tóg ti tỹ hẽ ri ke ja tũ nĩ.

⁶ Kỹ kejẽn Topě tóg ěprã ke ũ jẽně, ti jiji hã vỹ: João, he mũ.

⁷ Ti mỹ tóg: “ag mỹ ũ tỹ ag mỹ jẽngrě hen mũ ěn kãmén” he ja nĩ, hã kỹ tóg ke mỹ, ag kar tỹ ti vỹ mẽ jě, ag tỹ ti vỹ kri fi jě.

⁸ João pi(jé) ěg mỹ jẽngrě han ja nĩ!. Ti tỹ ěg mỹ: “ẽn hã vỹ,” henh kãtĩg ja vỹ, ũ tỹ ěg mỹ jẽngrě han mũ ěn to, hã vỹ: Jesus, he mũ.

⁹ Jẽngrě pẽ ěn hã vỹ. ěprã tóg jun, ti tỹ ěg kanhrãn jě, ěprã ke kar, ũ tỹ ěg ki jẽngrěg pẽ han mũ ěn ti.

¹⁰ Ga han tóg, ũ tỹ ěg mỹ jẽngrě han mũ ěn ti, kỹ tóg ěg mré ga kri tĩnh kãtĩg gé, ga han kar kỹ. Hã ra ag tóg ti ki kanhrãn ja tũ nĩ, ěprã ke ag.

¹¹ Ā povo kar mũ tóg tĩg ja nĩ, hã ra ti mrě ke ag pi(jě) ti ki ge sór ja nĩgtĩ'.

¹² Ũ ag tóg hã ra ti ki ge mũ. En ag to tóg: “Topě krě,” he mũ, ũ tỹ ti ki ge kỹ nỹtĩ tãvĩ ag tó.

¹³ Ti ki ge kỹ nỹtĩ tũgrĩn ěg hã vỹ tỹ ti krě nỹtĩ. ěg mur tũgrĩn ěg tóg ver tỹ ti krě tũ nỹtĩ. ěg panh tỹ ěg mỹnh fi mrě nỹ tũgrĩn ěg tóg mur mũ gé. Topě tỹ ěg han mũn tũgrĩn ěg tóg tỹ ti krě nỹtĩ jãvo.

¹⁴ ěg tỹ ũ to: “Topě vỹ,” he mũ ěn vỹ ěg ri ke mur, kỹ tóg tỹ ěprã ke jě sir. ěg mrě tóg tĩg ja nĩgtĩ. Há kỹ sóg ti vỹ. Pã'i mág vỹ tỹ ti nĩ, ũn tar, tag ve inh. ěg to há pẽ tãvĩ ti nĩ, kỹ tóg ki hã tó ti gé. Topě kósin pir vỹ, kỹ Topě vỹ ti mỹ: “ũn mág vỹ tỹ ã nĩ,” hé, ti jóg ti.

¹⁵ João vỹ ti kãmén ja nĩ gé. Ti kãmén há han tóg, kỹ tóg: “inh nón kãtĩ mũ ěn vỹ inh kãfór nĩ,” he ja nĩ. “Inh nón kãtĩg jě tóg ke mũ, hã ra tóg tỹ ijo ke nĩ. ěn tó inh huri ãjag mỹ. Ti hã vỹ,” he ja tóg nĩ, João ti, Jesus to.

¹⁶ ěg to hã tãvĩ tóg nĩ, hã kỹ tóg mỹ nén ũ ha kar han, ěg jagãgtãn kỹ. ěg jagãgtãn tag tovãnh ke tũ pẽ tóg nĩ.

¹⁷ Moisés vỹ ěg mỹ Topě tỹ ěg jyvẽn mũ ěn tó ja nĩgtĩ, ěg tỹ ti vỹ ki króm jě, kỹ Jesus tóg ěg mỹ: “Topě vỹ ãjag mỹ vẽn pãte fón sór mũ, ti tỹ ãjag to há nĩn kỹ,” he mũ. Ti hã ne ěg mỹ vẽn vỹ sér ěn to mũ'.

¹⁸ ěg pi(jě) Topě vég tĩ'. Kỹ ěg kãmĩ ũ vỹ ti ve ja tũ nĩ gé. Ti kósin pir hã vỹ ěg mỹ ti kãmén tĩ, ti hã vỹ ã jóg mrě nĩ nĩ, Topě mrě. Ti hã vỹ Topě ri ke nĩ. Kỹ tóg ěg mỹ ã panh ti kãmén tĩ, Topě kósin ti, Jesus ti.

João Batista tỹ Jesus kãmén.

(Mt 3.1-12; Mc 1.1-8; Lc 3.1-18)

¹⁹ Kejẽn Judeu ag pã'i ag vỹ João mỹ vẽn vỹ jẽněg mũ. Jerusalém tá ag nỹtĩ, pã'i ag, Topě tũ ki rĩr tĩ, Levi krě'krě ag ke gé. Ag João mỹ vẽn vỹ jẽně kỹ ag tóg mỹ: “ũ nỹ tỹ nĩ?” he mũ.

²⁰ Kỹ tóg ag mỹ: “inh pi(jé) tỹ Cristo nĩ,” he mũ. Tó há han tóg, ag mỹ.

²¹ Kỹ ag tóg ti mỹ: “kỹ ã hỹn tỹ ũ nĩ?” he mũ. “Ā mỹ tỹ Elias nĩ?” he ag tóg ti mỹ. Hã ra tóg ag mỹ: “vó” he mũ gé.

Kỹ ag tóg ti mỹ: “Topě vỹ tó tĩ ũ něji kãtĩg ke mũ gé. Ti hã mỹ tỹ ã nĩ?” he mũ. Hã ra tóg: “vó,” he mũ gé.

²² Kỹ ag tóg ti mỹ: “ũ nỹ tỹ ã nĩ, ge kỹ?” he mũ. “Pã'i ag vỹ ěg jẽně, ěg tỹ ã ki jẽně jě. ěg hỹn ne tónh ke mũ, ag mỹ?” he ag tóg mũ. “Věso ã hěri ke ti?” he ag tóg mũ, João mỹ.

²³ Kỹ João vỹ ag mỹ vẽn kãmén mũ. Ā to nén rán kỹ nĩ ěn tó tóg mũ, hã vỹ: “ũ tỹ ěmã tũg ja tá jě kỹ vẽn kar mỹ Topě jykre kãmén mũ ěn vỹ tỹ inh nĩ,” he mũ. “Ũ tỹ vẽn kar mỹ: “ěg Senhor japry kure ra, ti

jamñn kuryñh ra, ti tỹ jagma tĩg há han jé, he tĩ êñ vỹ tỹ inh nĩ. Isaías tỹ inh kãmén há vễ,” he tóg, João ti.

²⁴ Jãvo ù tỹ ti ki jẽmẽg mũ ag vỹ tỹ Fariseu ag mrẽ ke nỹtĩ.

²⁵ Kỹ ag tóg ti mỹ: “ã tỹ hẽ ri ken kỹ ag kygpe sór nẽ, ã tỹ tỹ Cristo tũ há ra?” he mũ. “Inh pi(jẽ) tỹ Elias nĩ, he ã tóg tĩ. Inh pi(jẽ) tỹ Topẽ vĩ tó tĩ êñ nĩ, ãg tỹ ùn kãtĩg jãvãnh mũ êñ, he ã tóg tĩ, há ra ã tóg ag kygpég tĩ,” he ag tóg mũ, João mỹ.

²⁶ Kỹ tóg ag mỹ: “goj tỹ sóg ag kygpég tĩ,” he mũ. “Hã ra ù tóg ãjag kãmĩ tĩ mũ ha, ãjag tỹ ùn ki kagtĩg ù.

²⁷ Êñ vỹ inh nón kãtĩg ke mũ, há ra tóg inh kãfór nĩ. Sỹ ti camarada nĩnh ke vễ vễ, sỹ ti pẽn né kunũnh ke vễ vễ, ti pẽn to ró ti. Há ra sóg tỹ ti krẽm ke pẽ jẽ,” he tóg, João ti

²⁸ Kỹ ag tóg mũ mũ, ti vĩ mẽ kar kỹ. Cidade tỹ Betânia tá ag tóg ti venh kãmũ ja nĩgtĩ, Fariseu ag, João ti, Jordão mã tá. Tá tóg ag kygpég jẽ nĩ, João ti.

Jesus tỹ tỹ ãg tỹ Topẽ mỹ ãg mẽg tãnh êñ ri ke

²⁹ Tỹ vaj kỹ João vỹ Jesus vég mũ sir. João tá tóg jun mũ, Jesus ti. Kỹ João tóg ti to: “ti há vễ,” he mũ. “Ëg tỹ Topẽ mỹ ãg mẽg tỹ carneiro krẽ tãnh êñ ri ke ti nĩ, cordeiro êñ ti. Ti há vỹ ãg kar tỹ Topẽ vĩ mranh jagfy ter ke mũ,” he tóg.

³⁰ “Sỹ ùn kãmén mũ êñ há vễ. ù tỹ ijo jẽ mũ vỹ inh nón kãtĩg ke mũ, he ja inh nĩ ti to. Inh kãfór ti nĩ, ti tỹ inh jo ke nĩn kỹ, he ja inh nĩ.

³¹ Inh pi(jé) ti ki kanhró ja nĩ, há ra sóg goj tỹ vẽn kar ag kygpé, ag tỹ ti ki kanhrãn kãn jé, povo tỹ Israel ag kar,” he tóg, João ti

³² Kỹ tóg: “Topẽ kuprĩg ve inh,” he mũ gé. “Kanhkã tá kãkutẽ kỹ tóg ti krĩ kri nĩ nĩ. Tỹ sórãg ve ti nĩ, Topẽ kuprĩg ti, ti tỹ ti krĩ kri nĩn kỹ.

³³ Inh pi(jé) Jesus ki kanhró nĩ vễ. Há ra Topẽ tóg inh mỹ: ha ag kygpenh tĩg,” he ja nĩgtĩ, kỹ tóg inh mỹ: “ã tỹ inh kuprĩg ve kỹ ã tóg ti ki kanhró nĩnh mũ,” he ja nĩ gé. “Kanhkã tá kãkutẽ kỹ tóg ag kã ùn pir kri nĩnh mũ. Ti tỹ ùn kri nĩ mũ êñ vỹ inh kuprĩg tỹ ag kygpenh ke mũ,” he ja tóg nĩ inh mỹ, Topẽ ti.

³⁴ Tag ve inh, há kỹ sóg ãjag mỹ: ti há vỹ tỹ Topẽ kósin nĩ, he mũ” he tóg, João ti. Ti tỹ Jesus kãmén há vễ.

Jesus tỹ ã mrẽ mũ tĩ ag jé prẽr

³⁵ Tỹ vaj kỹ João vỹ ã mrẽ mũ tĩ régre ag mrẽ vẽnén jẽ nĩ.

³⁶ Kỹ tóg Jesus tỹ mĩ tĩg vég mũ, kỹ tóg ag mỹ: “Topẽ tũ vỹ tỹ ti nĩ,” he mũ. “Ëg tỹ Topẽ mỹ ãg mẽg tỹ cordeiro tãnh tĩ êñ ri ke ti nĩ,” he tóg, João ti.

³⁷ Ag tỹ ti vĩ tag mẽ kỹ ag tóg Jesus nón mũ mũ.

³⁸ Kỹ Jesus vỹ ag vég mũ, ag tỹ ti nón mũ ti. Kỹ tóg ag mỹ: “ne nẽ?” he mũ. Kỹ ag tóg ti mỹ: “ã hẽ tá êmã nĩ?” he mũ.

³⁹ Kỹ tóg ag mỹ: “mũ jé ha, inh mrẽ, ãjag tỹ inh jamã ven jé,” he mũ. Kỹ ag tóg ti mrẽ mũ mũ sir. Ti mrẽ ag kurã êñ tũg mũ. Rã ké ti nỹ ha, ag tỹ ti mrẽ mũ kri, 4 horas hỹn hẽn ri ke mũn.

⁴⁰ Ti mrẽ mũ ag kã ù vỹ tỹ André nĩ, ù tỹ João tỹ Jesus tó ja êñ mẽg mũ ag kã ù, há vỹ: Simão Pedro jãvy, he mũ, André ti, Jesus mrẽ vẽnén tĩ êñ ag kã ù ti.

⁴¹ Êñ tóg tá kãtĩg, kỹ tóg vẽnỹmér ã kãke tỹ Simão Pedro venh tĩ mũ, kỹ tóg ti mỹ: “Messias ve inh,” he mũ. “Messias,” he ag tóg tĩ, Topẽ tỹ ùn jẽnẽnh ke êñ to, Cristo to.

⁴² André tỹ ti mỹ Jesus tó kỹ tóg ti mrẽ ti venh tĩ mũ. Kỹ Jesus vỹ ti ki êvãnh mũ, kỹ tóg ti mỹ: “Simão vỹ tỹ ã nĩ, João kósin,” he mũ. “Sỹ ã jyjyn mãn ke vễ, há vỹ: Cefas, he mũ,” he tóg, Jesus ti. Cefas to ken há vễ, há vỹ: Pedro, he mũ, há vỹ: pãró, he mũ, ãg vĩ ki.

Jesus tỹ Filipe mrẽ Natanael jé prẽr

⁴³ Tỹ vaj kỹ Jesus vỹ ga tỹ Galiléia ra tĩg sór mũ. ã tĩg ke jo tóg Filipe kato tẽ mũ. Kỹ tóg ti mỹ: “inh mrẽ kãtĩg,” he mũ. Kỹ tóg tĩ mũ.

⁴⁴ Há ra Filipe vỹ tỹ Betsaida tá ke nĩ, André mrẽ Pedro jamã êñ tá ke.

⁴⁵ Kỹ Filipe vỹ Natanael venh tĩ mũ, ti mỹ Jesus kãmén jé. Kỹ tóg ti mỹ: “Cristo ve inh huri,” he mũ. “Moisés vỹ ti kãtĩg ke rãn ja nĩ, Topẽ vĩ tó tĩ ag ke gé. Jesus to ken há vễ, Nazaré tá ke êñ to ken há vễ, José kósin êñ ti. Ti há vỹ tỹ Cristo nĩ,” he tóg, Filipe ti, Natanael mỹ.

⁴⁶ Kÿ tóg ti mÿ: “hã ra sóg Nazaré tá ùn há ve ja tũ nĩ ver,” he mũ. Hã ra Filipe tóg ti mÿ: “ge ra ti venh kãtĩg,” he mũ. Kÿ tóg ti mré tĩ mũ.

⁴⁷ Ag tÿ Jesus tá junjun mũ ra Jesus tóg Natanael kãmén mũ, ù tÿ tá nÿtĩ ag mÿ. “Û tÿ tá kãtĩ mũ ãn ve ra,” he tóg. “Israel krẽ'krẽ pẽ vễ,” he tóg. “ùn há vÿ tÿ ti nĩ, ón vãnħ ti nĩ,” he tóg.

⁴⁸ Hã ra Natanael vÿ Jesus tÿ ã to vĩ tag mễg mũ. Kÿ tóg ti mÿ: “kÿ ã mÿ inh ki kanhró nĩ?” he mũ. Kÿ Jesus tóg ti mÿ: “Filipe tÿ ã jé prěr to hã sóg ã vé,” he mũ. “Ã tÿ ka krēm jẽ kÿ sóg ã vé, ka tÿ figueira ãn krēm,” he tóg,” he tóg. Jesus ti.

⁴⁹ Kÿ Natanael tóg Jesus mÿ: “mẽ,” he mũ. “Topẽ kósın vÿ tÿ ã nĩ,” he tóg. “Ëg povo tÿ Israel kri pã'i vÿ tÿ ã nĩ,” he tóg.

⁵⁰ Kÿ Jesus tóg: “isÿ ã mÿ: ã ve ja inh nĩ, ã tÿ ka krēm jẽ ra, hen kÿ tóg ã mÿ e tĩ, kÿ ã tóg inh vĩ kri fi sór mũ,” he mũ. “Hã ra tóg ver tÿ nén ù tũ nĩ, sÿ ã ve ja tag ti. Isÿ kar kÿ nén han ke vÿ ã mÿ e pẽ tãvĩ tĩnh mũ, ha vemnĩ,” he tóg, Jesus ti.

⁵¹ “Ha vé, ki hã sóg tónħ ke mũ, ha mẽ. Kanhkã nor kÿ nĩ ve jé ãjag tóg ke mũ. Tá ãjag tóg Topẽ tÿ jěgnẽ jafã ag venh ke mũ gé. Kanhkã tá ag kãrenħ ke mũ, iso, kÿ ag ra mũ mãn ke mũ gé. Tÿ sóg ãprã ke fi kósın nĩ mÿr,” he tóg, Jesus ti.

2

Jesus tÿ vẽnħ prũg venh tĩ

¹ Kurã tãgtũ tũg kÿ ù tóg vẽnħ prũg han mũ ãmã tÿ Caná tá, ga tÿ Galiléia tá. Jesus mÿnh fi vÿ venh tĩg ja nĩ.

² Kÿ ag tóg Jesus mÿ tó mũ gé, ti tÿ festa venh kãtĩg jé, ti mré mũ tĩ ag mré.

³ Ag tÿ tá nÿtĩ ra vãnħ vinho tóg tũ' he mũ. Kÿ Jesus mÿnh fi tóg ti mÿ: “vinho hur tũg,” he mũ.

⁴ Hã ra Jesus tóg fi mÿ: “toreg', mÿnh',” he mũ. “Inh mré ke tũ vễ, ã tÿ inh mÿ nén tó mũ tag ti,” he tóg, Jesus ti, ã mÿnh fi mÿ.

⁵ Hã ra fi tóg ù tÿ festa ki rĩr tĩ ag mÿ: “ti tÿ ãjag mÿ nén ù tó kÿ han nĩ,” he mũ.

⁶ Hã ra goj né mág tÿ 6 (ke) vÿ tá nÿtĩ, pó tÿ goj hé mág. Éhé ti nÿtĩ, balde fór tÿ 10 (ke) tÿ ãg tóg ùn pir fãn tĩ. Judeu ag vÿ vẽnħ kÿgpe e han tĩ, ag tÿ Topẽ mÿ há nÿtĩ jé. Ag jÿkre

hã vễ. Ag tÿ vẽnħ kÿgpe hã jé tóg tá nÿtĩ, goj nén ti.

⁷ Kÿ Jesus tóg festa ki rĩr tĩ ag mÿ: “goj né ãn fónfãn, goj run kÿ,” he mũ. Kÿ ag tóg ke mũ. Fónfãn kãn ag tóg mũ.

⁸ Kÿ tóg ag mÿ: “goj tag tÿ festa to pã'i mÿ ven,” he mũ. Kÿ ag tóg ke mũ.

⁹ Kÿ tóg kron mũ, festa to pã'i ãn ti. Hã ra tóg tÿ vinho nĩ sir, ag tÿ run ja ti. Hã ra tóg ki kagtĩg nĩ, festa to pã'i ti. Û tÿ festa ki rĩr tĩ ag hã vÿ ki kanhró nÿtĩ, pã'i ãn krēm ke ag.

Pã'i tÿ vinho hã ãn kron kÿ tóg ùn prũg mũ ãn jé prěr mũ. Kÿ tóg ti mÿ:

¹⁰ “vẽnħ jÿkre vẽnħmÿ han ã,” he mũ. “Ag tÿ kronkron vén kÿ ã tóg ag mÿ vinho há tãvĩ nĩm ke mũ vễ, kar kÿ vinho pãgsĩ vÿ há nĩ vễ. Jãvo ã tóg ag mÿ vinho pãgsĩ ãn nĩm vén, kÿ ã tóg vinho há pẽ tag nĩm sór mũ ha vãnħ,” he tóg, festa to pã'i ti, ùn prũg mũ ãn mÿ. Hã ra tóg ki kagtĩg nĩ, Jesus tÿ goj tÿ vinho há ãn han mũ ti, há kÿ tóg ti mÿ e tĩ, ti tÿ festa kÿju ki vinho há ven sór kÿ.

¹¹ Jesus tÿ ãmã tÿ Caná tá nén han mũn hã vễ, Galiléia tá. Ëg tÿ nén han ki kagtĩg hÿn han tóg tĩ, kÿ tóg tag han vén. Ti tÿ nén han mũ ki ãg tóg ti jÿkre tar ki kanhró nÿtĩ sir. Hã kÿ ag tóg ti ki ge mũ sir, ti mré mũ tĩ ag, ag tÿ ti jÿkre tar ãn ven kÿ.

¹² Kar kÿ Jesus vÿ cidade tÿ Cafarnaum ra tĩ mũ, ti mÿnh fi mré, ti jãvy ag mré hã, ti mré mũ tĩ ag mré ke gé. Tá ag tóg nÿtĩg mág sĩ han.

Jesus tÿ Topẽ jo ãn ra tĩ

(Mt 21.12-13; Mc 11.15-17; Lc 19.45-46)

¹³ ãn kã Judeu ag festa tÿ Páscoa vÿ kakó nĩ ha Kÿ Jesus vÿ cidade tÿ Jerusalém ra tĩ mũ, ti mré mũ ti ag mré.

¹⁴ Ti tÿ Topẽ jo ãn tá jun kÿ tóg ù tÿ boi vender he tĩ ag vэг mũ, carneiro vender he tĩ ag ke gé sórãg vender he tĩ ag ke gé. Topẽ jo ãn krēm ag tóg ãjag negócio hÿn han tĩ. Kar kÿ ù ag tóg tá nÿtĩ gé jãnkamy trocar he tĩ ag.

¹⁵ Jesus tÿ ag ve kÿ tóg ti mÿ e tĩ, ag tÿ Topẽ jo ãn kavẽnħ mũn kÿ. Hã kÿ tóg mrãn ke jafã fy tÿ ag mrãnmrãn jafã han mũ. ãn vÿn kÿ tóg ag pan mũ, Topẽ jo ãn kãtã, carneiro ti ke gé, boi ti ke gé. Û tÿ jãnkamy trocar he tĩ ag jãnkamy ãn vãm tóg mũ gé, ãprã, kÿ tóg ag mesa tÿ kréj ke mũ gé.

16 Û tỹ sórãg vender he tĩ ag mỹ tóg: “ãjag tũ ma mũjẽg,” he mũ. “Inh panh jo ãn krẽm negócio han sór tũg nĩ. Bodega pijẽ', inh panh jo ãn ti,” he tóg, Jesus ti.

17 Ti mré mũ tĩ ag tỹ tag ve kỹ ag tóg ti to rán kỹ nĩ ãn mĩ êkrég mũ, ha mẽ: “ã ãn tóg inh mỹ sĩnvĩ jẽ, kỹ tóg inh mỹ e tĩ, ag tỹn kavénh kỹ. Tag tigrĩn ag tóg inh krĩ rỹ han mũ, kỹ tóg kejẽn isén ke mũ sir, inh kri rỹ ti, ha vemnĩ,” he tóg, Topẽ vĩ tỹ rán kỹ nĩ ki, Jesus to.

18 Kỹ Judeu ag pã'i ag vỹ Jesus tỹ ag pan mũ vég mũ gé. Kỹ ag tóg ti mỹ: “ã tỹ hẽ ri ke nẽ?” he mũ. “Û nỹ hỹn ã mỹ: tag han nĩ, hé? Milagre ù han nĩ, ãg tỹ ù tỹ ã jẽnẽg mũ ki kanhrãn jé,” he ag tóg mũ, pã'i ag, Jesus mỹ.

19 Hã ra Jesus tóg ag mỹ: “ãjag tỹ Topẽ jo ãn tag kókén kỹ sóg ti jẽgja ki ù han mãn ke mũ, kurã tãgtũ ki, ha vemnĩ,” he mũ.

20 Kỹ tóg ag mỹ e tĩ. “Û tỹ Topẽ jo ãn tag han mũ ag vỹ ano tỹ 46 (ke) ki rãnrãj kỹ ti han. Jãvo ã mỹ kurã tãgtũ ki ti han sór mũ', in ti'?” he ag tóg mũ, Jesus mỹ, pã'i ag.

21 Hã ra Jesus tóg ag mỹ ã ter ke tó ja nĩgtĩ, vẽn hãmén ja ti nĩgtĩ, ti tỹ veso: “Topẽ jo ãn ri ke inh nĩ,” hen kỹ.

22 Ti tỹ kejẽn ã ter kar kỹ rĩr mãn kỹ ti mré mũ tĩ ag tóg ti vỹ tag ki êkrén kỹ ki kanhrãn mũ, kỹ ag tóg Topẽ vĩ ki rán kỹ nĩ ãn to jykrén há han mũ vãhã, Jesus vĩ to ke gé, kỹ ag tóg ti ki ge há han mũ ha.

Jesus tỹ vẽn hãmén kar ki kanhró

23 Kỹ ù tỹ hẽn ri ke ag vỹ Jesus ki ge mũ, ti tỹ Jerusalém tá nĩn kỹ, festa tỹ Páscoa ãn kã. Ag tỹ ti tỹ nén han mũ ve kỹ ag tóg ti ki ge mũ. Milagre hyn han tóg tĩ.

24 Hã ra tóg ag jykre ki kanhró nĩ, ù tỹ ón kỹ ti ki ge mũ ag jykre ki. Ón kỹ ag tóg ti ki ge mũ, hã kỹ ag tóg ti ki fe tũ nỹtĩ sir.

25 Kỹ ù tỹ ti mỹ: “ù ãn jykre vỹ ge nĩ,” hen kỹ tóg: “hỹ, ki kanhró inh nĩ,” he tĩ. Vèsóg ki tóg ag jykre ki kanhró nĩgtĩ.

3

Nicodemos tỹ Jesus mré vẽn hãmén

1 Ën kã ù tóg nĩgtĩ, ti jijin hã vỹ: Nicodemos, he mũ. Judeu ag pã'i ù vẽ, Fariseu ù vẽ.

2 Ën vỹ Jesus ve sór mũ, kỹ tóg kuty ra ti venh tĩ mũ, ti mré vẽn hãmén jé. Kỹ tóg ti mỹ: “Topẽ vỹ ã jẽnẽ, tag ki kanhró ãg tóg nỹtĩ,” he mũ. “Topẽ tỹ ãg mỹ ùn jẽnẽ vỹ tỹ ã nĩ, hã kỹ ã tóg ãg tỹ nén han vãn hãn hyn han tĩ. Topẽ tỹ ã mré han tũ nĩ ra ã tóg ã tỹ han mũ tag ki kãgtĩg nĩn hãmén vỹ,” he tóg, Nicodemos ti, Jesus mỹ.

3 Kỹ Jesus tóg ti mỹ: “sỹ ã mỹ tag kãmén ke vỹ, ha mẽ,” he mũ. “Ûn mur mãn kỹ nỹtĩ ag hã vỹ Topẽ tỹ tỹ ãg pã'i nĩ venh ke mũ, ag tãvĩ. Ki hã sóg tó mũ mỹr,” he tóg, Jesus ti, Nicodemos mỹ.

4 Kỹ Nicodemos tóg ti mỹ: “kỹ ùn sanh hỹn hẽ ri kenh mũ, ti mur mãn jé?” he mũ. “Ti mỹ vèsĩ han ki kanhró nĩ, kỹn mỹ ã mỹnh fi nug ki rã mãn kỹ mur mãn ke mũ?” he tóg, Nicodemos ti.

5-6 Hã ra Jesus tóg ti mỹ: “vó,” he mũ. “Ëprã ke ag krẽ vỹ tỹ ãg pã'i nĩ venh ke mũ, ag mỹnh fag ri ke, Jãvo Topẽ kuprĩg tỹ ù han kỹ tóg Topẽ kuprĩg tỹ jagrẽ nĩ. Mur mãn to ken hã vỹ, hã vỹ: inh ki rã, he mũ, hã vỹ: mur mãn, he mũ. Goj tỹ ke vỹ, Topẽ kuprĩg tỹ ke vỹ gé. Û tỹ gen kỹ mur mãn ja tũ nĩn kỹ tóg Topẽ tỹ tỹ ãg pã'i nĩ venh ke tũ pẽ nĩ.

7 Hã ra tóg ã mỹ e tĩ, sỹ ã mỹ: “mur mãn jé ã tóg ke mũ,” hen kỹ.

8 Kãka to jykrén nĩ. Ti tỹ mĩ tĩg sór mũ ãn mĩ tóg tĩ tĩ kãka ti. Ti tỹ krog he mũ ãn hã mẽg ãg tóg tĩ, hã ra ãg tóg ti vég tũ nĩ, kỹ ãg ti tỹ hẽ ra tĩg ke mũ ki kãgtĩg nỹtĩ, ti tỹ hẽ tá kãgtĩg ãn ti ke gé. Ge ti nĩgtĩ, Topẽ kuprĩg tỹ ùn han mãn mũ ag mré,” he tóg, Jesus ti, Nicodemos mỹ. (Topẽ kuprĩg vég tũ ãg tóg nĩgtĩ. Ha ra tóg ãg mỹ ã jykre tãg nĩm, ti tỹ ãg han mãn kỹ. Hã kỹ Jesus tóg Nicodemos mỹ: “kãka ri ke nĩ,” he mũ)

9 Kỹ Nicodemos tóg: “tag hỹn hẽ ri ke tĩ?” he mũ.

10 Kỹ Jesus tóg ti mỹ: “Israel ag kanhrãn ã tóg tĩ, hã ra ã tóg sỹ ã mỹ nén tó mũ tag ki kãgtĩg nĩ,” he mũ.

11 “Ki hã sóg tó mũ, hã kỹ sóg ã mỹ kãmén mũ. Sỹ nén ù ki kanhrãn mũ ãn hã tó sóg tĩ. Isỹ nén ù ve ja ãn hã kãmén sóg tĩ, hã ra ãjag tóg mẽ jãvãn hãn nỹtĩ.

12 Isỹ ãjag mỹ ga kri vẽn hãmén mũ ra ãjag tóg jẽmẽ sór tũ nĩgtĩ. Kỹ ãjag hỹn hẽ

ri kenh ke mũ', sỹ ãjag mỹ kanhkã tá vènh jykre kãmén kỹ?" he tóg.

13 "Ha vé, ãjag kãmĩ ù vỹ kanhkã ra tãpny tũ nĩ, tá vènh jykre ên ve jé. ãjag jãvo isóg tá kãkutẽ ja nĩ, hã kỹ sóg tó tĩ. Inh jamãn hã vè. Tỹ sóg êprã ke fi kósín nĩ," he tóg, Jesus ti.

14 "Moisés vỹ pỹn tỹ ka to sa ja nĩgtĩ, ga kórég ên tá. Pỹn tỹ ferro kusũg tỹ há ên tỹ tóg ka to sa ja nĩgtĩ. Tag ri ke han jé ag tóg ke mũ, isỹ, isỹ tỹ êprã ke fi kósín nĩn kỹ.

15 Kỹ ù tỹ inh ki rãnh ke mũ ên vỹ kren ke mũ. Rĩr krỹg ja tũ ve jé tóg ke mũ. Hã jé ag tóg ka to isanh ke mũ.

16 Topẽ vỹ ga kri mũ ag to há nĩ, hã kỹ tóg ã kósín pir fẽg, vènh kar tỹ ti ki ge jé, ag tỹ tũ' he tũ nĩ jé, ag tỹ ãg rĩr krỹg ja tũ ên ven jẽ.

17 Topẽ vỹ ã kósín jẽnẽ, ti tỹ êprã ke ag krenkren han jé. Ti pi(jé) sỹ ãjag vóg kónãn jé inh jẽnẽ'," he tóg, Jesus ti, Nicodemos mỹ.

18 "Ủ tỹ inh ki rãnh ke mũ to tóg jũnh ke tũ nĩ, Topẽ ti. Jãvo tóg ù tỹ inh ki ge tũ ên ag hã to jũ nĩ isỹ tỹ ti kósín pir nĩn kỹ," he tóg.

19 "Topẽ tỹ ù tỹ inh ki ge tũ ag to jũ vỹ ge nĩ, ha mẽ. Ga kri mũ ag kanhrãn sóg tĩ, hã ki sóg ag mỹ jẽngrẽ ri ke nĩ. Hã ra ag tóg mẽ sór tũ nĩgtĩ. Kutỹ mĩ ag tóg mũ sór mũ, jẽngrẽ tóg ag mỹ kórég nĩ, ag jykre pãno nĩn kỹ.

20 Ủ tỹ vènh jykre pãno han mũ kar vỹ kurã to kórég nỹtĩ, kỹ ag tóg kurã ki vènh ven sór tũ nĩ, vènh kar tỹ ag jykre pãno venh ha mẽ tĩn kỹ.

21 Ủ tỹ Topẽ vỹ ki króm mũ ag vỹ kurã ki vènh ven sór tĩ. Kurã tóg ag mỹ sér tĩ, vènh kar tỹ ag jykre hã ven jé. Topẽ vỹ ag tar han tĩ, ag tỹ nén ù há han jé. Hã ve jé ag tóg ke mũ, vènh kar ag," he tóg, Jesus ti, Nicodemos mỹ. Ti tỹ ti mỹ Topẽ jykre kãmén ja hã vè.

João Batista tỹ Jesus kãmén mãn

22 Ên kã kejẽn Jesus tóg ã mré mũ tĩ ag mré ga tỹ Judéia ra tĩ mũ, kỹ ag tóg tá nỹtĩ, vènh kar kygpe kỹ.

23 Hã ra João vỹ ag kygpég mũ gé, ên kã, vãnũ tỹ Enom tá, Salim tóg tá kakó nĩ. Tá goj vỹ éhé nĩ, hã kỹ tóg ag tỹ tá vènhmãn kỹ ag kygpég mũ, João ti.

24 Ên kã tóg ver se kỹ jẽ tũ nĩ, João ti.

25 Kejẽn Judeu ù tóg tá nĩ gé, hã ra tóg João mré mũ tĩ ag vỹ kafãn mũ. "Goj tỹ ãg tóg Topẽ mỹ jãnhkri kỹ nĩgtĩ'," he tóg mũ, ag mỹ, Judeu ên ti. Hã to ag tóg jagnẽ vỹ kafãn mũ.

26 Kỹ João mré mũ ag tóg João mỹ tag tó mũ, ha mẽ. "Ủ tỹ Jordão mãtã ã mré nĩ ja ên vỹ ag kygpég jẽ nĩ, ã tỹ ãg mỹ ùn kãmén ja ên ti. Hã ra vènh kar vỹ ti mré mũ mũ ha, hã kỹ ag tóg ã venh kãmũ mãn tũ nĩ ha," he ag tóg mũ, João mỹ, Jesus to.

27 Hã ra tóg ag mỹ: "há ti nĩ," he mũ. "Topẽ tỹ ãg mỹ ùn nĩm mũ ên hã vég ãg tóg tĩ," he tóg.

28 "Mĩ êkrén nĩ, sỹ ãjag mỹ nén tó ja ti, hã vỹ: inh pi (jé) tỹ Cristo nĩ', he mũ. Sỹ ti jãmĩ tĩg ke hã jé tóg inh jẽnẽ, Topẽ ti, he ja sóg nĩ ãjag mỹ," he tóg, João ti.

29 "Vènh prũg to jykren nĩ. Ûn prũg mũ hã vỹ ã prũ ke fi mré nĩ nĩ. Ti régre tóg hã ra ti rã hã jẽ, ùn prũg mũ ên rã hã, kỹ tóg ti vỹ mẽg mũ, hã ra tóg ti mỹ mẽ sér pẽ tĩ, ti, vỹ ti. Ge ti nĩ, inh mré. Inh mỹ tóg sér tĩ, vènh kar tỹ ti mré mũn kỹ, ti tỹ ùn prũg mũ ri ke nĩn kỹ, Jesus ti.

30 Ûn e tỹ ti mré mũn kỹ tóg há tĩ, kỹ tóg tỹ ùn mág nĩnh mũ ha. Hã ra sóg tỹ nén ù tũ nĩnh ha," he tóg, João ti.

Jesus tỹ kynhmỹ kãtĩ

31 "Ủn tỹ kynhmỹ kãtĩ mũ ên vỹ vènh kar kafór nĩ. Êprã ke ag vỹ tỹ êprã ke nỹtĩ, kỹ ag tóg êprã ke jykre tỹ vèmén tĩ. Ủ tỹ kanhkã tá kãtĩ mũ ên vỹ tỹ vènh kar kri ke jẽ.

32 Kỹ tóg ã tỹ tá nén ve ja ên hã tó mũ, ã tỹ tá nén mẽ ja ên, hã ra ag tóg ti vỹ mẽ sór tũ nĩ.

33 Ủ tỹ ti vỹ mẽg mũ ag hã ra Topẽ to: "ki hã tóg tó tĩ," he mũ.

34 Topẽ tỹ ùn jẽnẽg mũ ên vỹ ti vỹ kãmén mũ. Topẽ kuprĩg vỹ Jesus tar han mũ, ti tỹ tỹ ti jagrẽ pẽ nĩn kỹ, ti tỹ ti ve mág han kỹ.

35 Topẽ vỹ ã kósín to há tãvĩ nĩ, kỹ tóg ti mỹ nén (ũ) kar tovãnh, ti hã tỹ ki rĩr jé.

36 Hã kỹ ù tỹ ti kósín ki rã mũ vỹ ter mãn ke tũ nĩ. Rĩr krỹg ja tũ ve jé tóg ke mũ. Ủ tỹ ti vỹ han sór tũ ên vỹ tag venh ke tũ pẽ nĩ, rĩr krỹg ja tũ tag ti. Topẽ vỹ ti vóg kónãn ke mũ, kỹ tóg tũg' henh ke tũ nĩ, Topẽ tỹ ti vóg kónãn ke ti," he tóg, João ti. Ti tỹ ã mré mũ tĩ ag mỹ Jesus kãmén jan hã vè.

4

Jesus tỹ Samaria tá fi mré vēmén mũ

¹ Kĩ Fariseu ag vỹ mēg mũ, ùn tỹ hēn ri ke ag tỹ Jesus mré mũ ěn ti. Ûn e ag kygpég tóg mũ gé, Jesus ti, João tỹ ùn kygpe ja ag káfór.

² Hã ra Jesus vỹ ag kygpe ja tũ nĩ. Ti mré mũ tĩ ag hã vỹ ag kygpe ja nĩgtĩ.

³ Kĩ Jesus tóg mēg mũ, Fariseu ag tỹ ti tỹ tỹ ùn mág nĩ mē ja ti, hã kũ tóg ga tỹ Judéia tá kãkutē kũ ga tỹ Galiléia ra tĩ mũ, ti mré mũ tĩ ag mré.

⁴ Galiléia ra tĩg jé tóg ver ga tỹ Samaria fĩn rãm mũ.

⁵ Fĩn rãm kũ tóg Samaria tá cidade ù tá jun mũ, hã vỹ: Sicar, he mũ. Tán kakó nĩ, Israel jóg'jóg ve tỹ Jacó japỹ ja ti. Ěpỹ ěn fi ja tóg nĩ, ã kósin tỹ José mỹ, Jacó ti.

⁶ Kĩ Jacó tỹ poço vỹ tá nĩ gé. Jesus tỹ poço ěn tá jun kũ tóg tá vēnhkán kũ nĩ nĩ, poço ěn rã hã. Rã tỹ ěg nĩno kã sa ra ke ja vē.

⁷ Jesus tỹ tá nĩn kũ ùn tỹtá fi vỹ tá jun mũ, Samaria tá ke ù fi. Goj run jé fi tóg kãtĩ mũ. Kĩ Jesus vỹ fi mỹ: “inh mỹ goj jun, sỹ kron jé,” he mũ.

⁸ Ti mré mũ tĩ ag vỹ tá tũgtũ nỹtĩ, ã pir mỹ tóg tá nĩ nĩ, Jesus ti. Cidade ra ag kagáv, vējēn comprar he jé.

⁹ Jesus tỹ fi mỹ goj to vĩn kũ fi tóg ti mỹ: “Judeu vỹ tỹ ã nĩ, hã ra ã tóg inh mỹ goj to vĩ mũ!,” he mũ, “isỹ tỹ Samaria tá ke nĩ ra!,” he fi tóg mũ, Jesus mỹ. Judeu ag vỹ Samaria tá ke ag to é he tĩ, hã kũ fi tóg ti mỹ ke mũ.

¹⁰ Kĩ Jesus tóg fi mỹ: “Topē tỹ ã mỹ nén han sór mũ tag ki kagtĩg ã nĩ ver,” he mũ. “Kỹ ã tóg inh ki kagtĩg nĩ gé. Ke tũ nĩ mũ ra ã tóg inh mỹ: “inh mỹ goj nĩm,” hēnh ke mũ vē, kũ sóg ã mỹ goj ror tỹ goj nĩm ke mũ vē,” he tóg fi mỹ, Jesus ti.

¹¹ Kĩ fi tóg Jesus mỹ: “runja tũ ã nĩ,” he mũ, “kỹ ã hỹn hē ri kēnh mũ, ã tỹ goj ror tỹ goj ěn run jé? Tėj jagy ti nĩ, poço ti,” he fi tóg ti mỹ.

¹² “Ěg jóg'jóg ve tỹ Jacó vỹ poço tag han, kũ ag tóg ti goj kron, ti krē ke gé, ti mēg ke gé. Ą mỹ ti káfór nĩ, hã kũ ã mỹ goj ror tỹ goj run sór mũ?” he fi tóg mũ, Jesus mỹ.

¹³ Kĩ Jesus tóg fi mỹ: “ã tỹ goj tag kron kũ ã tóg kãnhmar kron mãn sór mũ,” he mũ.

¹⁴ “Isỹ ã mỹ goj nĩm kũ ã tóg kron pir han kar kũ há nĩ ha, kron mãn sór ke tũ ã nĩ sir. Ą kãki tóg goj ror han ke mũ, sỹ ã mỹ goj nĩm ke ti. Kỹ goj tag vỹ ã ter ke tũ han ke mũ, ha vemnĩ,” he tóg, Jesus ti.

¹⁵ Kĩ fi tóg ti mỹ: “inh mỹ nĩm gé, goj tag ti,” he mũ. “Kỹ sóg tag ki run mãn ke tũ nĩ ha, kũ sóg kron sór mãn ke tũ nĩ ha,” he fi tóg.

¹⁶ Hã ra Jesus tóg fi mỹ: “kỹ ã mén jé prērmnĩ ge, ti mré inh venh kãtĩg nĩ,” he mũ fi mỹ.

¹⁷ “Hã ra sóg mén tũ nĩ,” he fi tóg. “Hỹ,” he tóg, Jesus ti. “Mēn tũ ã nĩ, ki hã ã tóg tó mũ.

¹⁸ Ą mén ag vỹ ù tỹ 5 (ke) ja nĩgtĩ, kũ ã tỹ ùri ùn mré nĩ ěn pi(jé) tỹ ã mén nĩ!. Ki hã ã tóg tó mũ,” he tóg, Jesus ti.

¹⁹ Kĩ fi tóg Jesus mỹ: “Topē vĩ tó jafã vỹ tỹ ã nĩ, vég isóg nĩ nĩ,” he mũ. “Kỹ inh mỹ tag tó, ha mē. Ěg jóg'jóg ve ag vỹ tag ki Topē mré vēmén tĩ ja nĩgtĩ, pãnónh tag kri, kũ ěg tóg ùri ke tĩ gé.

²⁰ Hã ra tóg ãjag mỹ há tũ nĩ, tag, ãjag tỹ tỹ Judeu nỹtĩn kũ. “Jerusalém tá ěg Topē mré vēmén ke mũ, Jerusalém tá ěg tóg ti mỹ: ùn mág vỹ tỹ ã nĩ, hēnh ke mũ,” he ãjag tóg tĩ. Ti hỹn hē tá há nĩ, ěg tỹ Topē mré vēmén ke ti?” he fi tóg, Jesus mỹ

²¹ Hã ra Jesus tóg fi mỹ: “ha mē, sỹ ã mỹ nén kãmén ke ti,” he mũ. “Kãnhmar ãjag tóg pãnónh tag kri ěg jóg tỹ Topē mré vēmén mãn ke tũ nĩ, kũ ěg Jerusalém tá ti mré vēmén mãn ke tũ nĩ gé.

²² Topē mré ãjag tóg vēmén sór ti, hã ra ãjag tóg ãjag tỹ ùn mré vēmén mũ ki kagtĩg nỹtĩ. Ąjag jãvo ěg tóg ti ki kanhró nỹtĩ, ù tỹ vēnh kar krenkren han ke ěn tỹ tỹ Judeu krē'krē ag kã ù nĩn kũ.

²³ Kãnhmar vēnh kar vỹ Topē mré vēmén há han ke mũ. Kakó ti nĩ ha, kurã tag. Kỹ ù tỹ ti mré vēmén mũ ag vỹ Topē kuprĩg tỹ jagrē nỹtĩ, hã kũ ag tóg ti mré vēmén há han ke mũ, ěg jóg mág mré. Û tỹ ge hã jãvãnh ti mũ, ěg jóg mág ti, ag tỹ ti mré vēmén jé, ti mỹ: “ùn mág vỹ tỹ ã nĩ,” he jé,” he tóg.

²⁴ “Ěg pi(jé) Topē vég tĩ, hã ra tóg ěg mré nĩ nĩ. Kỹ, ěg tỹ ti mré vēmén sór kũ ěg tóg ti kuprĩg tỹ jagrē nỹtĩnh mũ, ěg tỹ ti mré vēmén há han jé, ěg tỹ ti vég tũ ra. Ěg tỹ ti

mỹ: “ũn mág vỹ tỹ ã nĩ,” hen kỹ ãg tóg ti mỹ ón ke tũ nĩ, vẽn hĩ há hã tó jé ãg tóg ke mũ,” he tóg mũ, Jesus ti, fi mỹ.

25 Kỹ fi tóg ti mỹ: “hỹ,” he mũ. “Messias ãn vỹ kãtĩg ke mũ, ãg tỹ ù to: Cristo, he mũ ãn. ãn vỹ ãg mỹ kãmén kãn ke mũ, tag kar ti,” he fi tóg ti mỹ.

26 Kỹ Jesus tóg fi mỹ: “inh hã vễ,” he mũ. “Ủ tỹ ã mré vēmén jẽn hã vễ,” he tóg.

27 Ti tỹ fi mỹ tag tó kỹ ti mré mũ tĩ ag tóg ti tá junjun mũ. Kỹ ag tóg ti tỹ fi mré vēmén vég mũ, kỹ tóg ag mỹ e tãvĩ tĩ. Hã ra ag tóg ti mỹ nén ù tó tũ nĩgtĩ. “Ã tỹ ne mẽ sór nẽ, fi ki?” he tũ ag tóg nĩgtĩ. “Ã tỹ ne tó nẽ, fi mỹ?” he tũ ag tóg nĩgtĩ gẽ.

28 Hã ra fi tóg ã runja ré kỹ ti mũ, ã jamã ra. Kỹ fi tóg ã nĩgja tá ke ag mỹ:

29 “mũ nỹ, ù ve jé,” he mũ. “Inh mỹ tóg sỹ nén han ja tó kãn. Ti mỹ tỹ Cristo tũ nĩ vỹ?” he fi tóg ag mỹ.

30 Kỹ ag tóg fi mré kãmũ mũ sir, ti ve jé.

31 Fi tĩg kar kỹ ti mré mũ tĩ ag tóg Jesus mỹ “vějẽn ti ko ra,” he mũ.

32 Hã ra tóg ag mỹ: “ijẽn vỹ nĩ nĩ, hã ra tóg ãjag jẽn ri ke tũ nĩ,” he mũ.

33 Kỹ ag tóg jagnẽ mỹ: “ũ nỹ ti mỹ vějẽn nĩm hỹn?” he mũ.

34 Hã ra Jesus tóg: “ijẽn to ken hã vễ, hã vỹ: tỹ isỹ Topẽ rãnrãj han kãn ke, he mũ, isỹ ù tỹ inh jẽnẽg mũ ãn vĩ han ke, he mũ gẽ,” he tóg, Jesus ti.

35 “Ãjag mỹ ti kysã tỹ 4 (ke) nĩ ver, ãg tỹ ãg jakré kanẽ venh ke ti. Ha Sicar tá kãmũ mũ ag vigvé. Ủri ag tóg inh ke ge sór mũ, kỹ ag tóg inh mỹ ãg jakré tóg nỹ ãn ri ke nỹtĩ.

36-38 Fi mỹ sóg Topẽ vĩ tó, kỹ fi tóg ã mré ke ag mỹ tó. Hã ra sóg ãjag mỹ: “ha ag mỹ tó mãn, ag tỹ inh ki ge jé,” he mũ. Kỹ ãjag tóg ù jakré kym ri ke han mũ, ãjag tỹ Sicar tá ke ag tỹ inh ki ge mũ ven kỹ. “Ủ vỹ krãn tĩ, kar kỹ ù vỹ ti kanẽ mäg tĩ,” he ãg tóg tĩ. Ki hã tó vễ, tag, ãg tỹ ãprã ke ag tỹ inh ki genh ke to jykrén kỹ. Kỹ ù tỹ ag mỹ tó mãn mũ mỹ tóg sér tĩ, ti tỹ ag tỹ inh ki ge mũ ven kỹ. ã rãnrãj kaja vég tóg mũ sir. Hã ra ù tỹ ag mỹ tó vén ja ãn mỹ tóg sér tĩ gẽ, ag tỹ inh ki ge mũ ti. ã rãnrãj kaja vég ti tĩ gẽ,” he tóg, Jesus ti, ã mré mũ tĩ ag mỹ.

39 Hã ra ùn tỹtã ãn fi tóg ã mré ke kar ag mỹ: “inh mỹ tóg sỹ nén han ja tó kãn,” he ja nĩ, Jesus to. Kỹ ag tóg Jesus ki ge mũ, fi vĩ to.

40 Kỹ ag tóg Jesus tá junjun mũ sir. Kỹ ag tóg ti mỹ: “tĩg tũg nĩ. ãg mré nĩmnĩ,” he mũ. Kỹ tóg ag mré kurã régre tũg mũ.

41 Kỹ ù tỹ hẽn ri ke ag tóg ti ki ge mũ sir, ti vĩ to.

42 Ủn tỹtã ãn fi mỹ ag tóg: “ã vĩ tugrĩn ãg tóg ti ki ge mũ,” he mũ, “hã kỹ ãg tóg ùri ti vĩ mæg mũ, kỹ ãg tóg ti vĩ tugnĩn ti ki ge pẽ han kỹ nỹtĩ, ùri. Ti ki kanhró ãg tóg nỹtĩ ha. Vẽn kar kren han tĩ ãn vễ mỹr,” he ag tóg mũ, ùn tỹtã ãn fi mỹ. Hã kỹ Samaria tá ke tỹ hẽn ri ke ag vỹ Jesus ki ge kỹ nỹtĩ.

Jesus tỹ pã'i kósin tỹ há' he

43 Jesus tỹ Samaria tá ke ag mré kurã régre tũg kar tóg ga tỹ Galiléia ra tĩ mũ sir.

44 “Ủ tỹ Topẽ vĩ tó ti ãn jamã tá ke ag ne tóg Topẽ vĩ tó tĩ ãn to é he tĩ,” he ja tóg nĩ, Jesus ti, hã kỹ tóg kór há ra tĩ mũ, Galiléia ra.

45 Hã ra ag tóg, ti tỹ tá jun kỹ (ag tóg) ti mỹ vĩ há han mũ. Ti ve ja ag tóg nĩ, Jerusalém tá, festa tỹ Páscoa ãn tá, kỹ ag tóg ti tỹ tá nén hyn han ja ãn ve kãn. Hã kỹ ag tóg ti mỹ vĩ há han mũ.

46 Kỹ Jesus tóg ãmã tỹ Caná ra tĩg mãn mũ, ga tỹ Galiléia tá ãmã tỹ Caná ãn ra. Tá tóg goj tỹ vinho han ja nĩgtĩ. ãn tá cidade tỹ Cafarnaum vỹ kakó nĩ.

Cafarnaum tá pã'i mág tóg nĩgtĩ. Ti kosin vỹ kaga nỹ nĩ.

47 Kỹ tóg mæg mũ, Jesus tỹ Judéia tá kãtĩg ja ti, ti tỹ Galiléia tá jun ja ti, pã'i mág ãn ti. Kỹ tóg ti venh kãtĩ mũ. “Inh mré inh kósin venh kãtĩg,” he tóg mũ, Jesus mỹ. “Kaga jagy tóg nỹ, kỹ tóg inh mỹ ti ter ha mẽ tĩ. ã mỹ ti tỹ há' henh ke tũ?” he tóg, pã'i mág ti Jesus mỹ.

48 Hã ra Jesus tóg ti mỹ: “isỹ ãg tỹ nén han vãnhan mũ ve sór ãjag tóg mũ, ãjag tỹ hẽn ri ke mũn inh ki ge jé,” he tóg, Jesus ti.

49 Hã ra pã'i ãn tóg Jesus ti mỹ: “vó,” he mũ. “Kuri inh mré tĩg, ti ter tũ nĩ jé,” he tóg.

50 Kỹ Jesus tóg ti mỹ: “ha ã hã tĩg,” he mũ. “Há tóg nĩ ha, ã kósin ti,” he tóg. Kỹ tóg Jesus vĩ tag kri fi kỹ tĩ mũ sir, pã'i ãn ti.

51 Ti tĩg kỹ tóg ã camarada ag kato tẽ mũ. Tỹ vaj kỹ ke vễ. Ti ãn tá ag tóg kãmũ mũ, kỹ

ag tóg ti mý: “ã kósin tóg há' hé huri,” he mû sir.

⁵² Kÿ tóg ag mý: “ti rã tÿ hẽ kã sa ra há' hé?” he mû. Kÿ ag tóg ti mý: “rãké tá, meio dia pãte ke sÿ,” he mû. “Ën kã ti rÿg tóg tũ' he mû,” he ag tóg ti mý.

⁵³ Hora ãn kã Jesus tóg ti mý: “ã kósin vÿ há nÿ,” he ja nÿ. Kÿ tóg to jykrén há han mû sir, pã'i ãn ti, kÿ tóg Jesus ki rã mû, ti prÿ fi ke gé, ti krẽ kar ag ke gé, ti camarada kar ag ke gé.

⁵⁴ Jesus vÿ ga tÿ Judéia tá kãtÿg kÿ ga tÿ Galiléia ra tÿg ja nÿ. Ën kã tóg milagre ãn han, kÿ tóg tÿ régre nÿtÿ, ti tÿ ãg tÿ nén ù han vãn hyn han mû ti.

5

Jesus tÿ ùn grÿn grÿn kÿ nÿ tÿ há' he

¹ Tag pãte Judeu ag tÿ festa há ù tóg kejẽn kutẽ mû, kÿ Jesus vÿ Jerusalém ra tÿ mû.

² Tá goj nig tóg nÿgtÿ, cidade jy ró jãnkã rã hã, jãnkã ãn jÿjin hã vÿ: carneiro jo jãnkã, he mû. Goj pãnÿn tóg ãn tÿ 5 (ke) nÿtÿ, vãn hã kaga jo ãn. Goj ãn jyjy hã vÿ: Betesda, he mû.

³ Ën tá vãn hã kaga tÿ hãn ri ke ag vÿ nÿtÿgtÿ, ùn kyvó ag, ùn tÿg vãn hã ag, ùn grÿn grÿn kÿ nÿtÿ ag ke gé.

⁴ Goj vãn vãn he mû jãvãn hã kÿ ag tóg nÿtÿ. Kejẽn Topẽ tÿ jãnẽ jafã vÿ goj ki rã kÿ tÿ vãn vãn he han mû. Ën kã ù tÿ kãrãn vén mû ãn tóg há' he tÿ. Vãn hã kaga kar tÿ há' he ti tÿ, goj vãnvor mû ãn, ù tÿ ki ge vén mû ag kar tÿ.

⁵ Ën tá ù tóg nÿgtÿ, ùn kaga ù. Kaga nÿ ki tóg 38 (ke) anos han mû.

⁶ Kÿ Jesus tóg tá jun kÿ ti vég mû, ti tÿ tá nÿn kÿ. Hã ra tóg ki kanhró nÿ, ti tÿ vãsÿ tá kaga nÿ ki. Kÿ tóg ti mý: “ã mÿ há' he sór tũ?” he mû.

⁷ Hã ra tóg ti mý: “vó,” he mû. “Hã ra tóg tũ tÿ, ù tÿ goj kãkã ãn hã fãg ke ti,” he tóg, ùn kaga ti. “Goj tÿ vãn vãn he kÿ ag tóg ãn hã jo kã ra ge tÿ, ijo tá jun kÿ,” he tóg, ùn kaga si ãn ti.

⁸ Kÿ Jesus tóg ti mý: “jãg ra,” he mû. “ã cama va tÿg,” he tóg, Jesus ti, ùn kaga si ãn mÿ.

⁹ Vãsÿmér tóg há' he mû, kÿ tóg ã cama va tÿ mû sir. Vãn hã kaga ke kurã ki ke vãn, Jesus tÿ ti han mû ti.

¹⁰ Ti tÿ vãn hã kaga ke kurã ki ã cama va tÿg kÿ pã'i ag tóg ti mý: “vãn hã kaga ke kurã ki ãg tóg nén ù va tÿg ke tũ nÿ vãn,” he mû. “ã tÿ nén han ke tũ han ã tóg mû,” he ag tóg ti mý.

¹¹ Kÿ tóg ag mý: “ù tÿ isÿ há' he mû ãn vÿ ãn hã mÿ: “ã cama va tÿg,” he ja nÿ, hã kÿ sóg va tÿ mû,” he tóg.

¹² Kÿ ag tóg ti mý: “ù nÿ ã mÿ: “ã cama va tÿg,” hé?” he mû.

¹³ Hã ra tóg ki kagtÿg nÿ, ù tÿ ti tÿ há' he mû ãn ti. Jesus vÿ ti tÿ há' he kar tÿg ja nÿ, vãsÿmér. E ag nÿtÿ, goj ãn tá, vãn hã kaga ag, hã kÿ Jesus tóg ag ré kÿ tÿg ja nÿ. Kÿ ùn kaga ja ãn tóg ti jÿji mẽ ja tũ nÿ.

¹⁴ Kar kÿ Jesus tóg ti ve mãn mû, Topẽ jo ãn tá. Kÿ tóg ti mý: “ha vé,” he mû. “ã tÿ ãn hã' hé. Topẽ vÿ mranh mãn sór tÿg nÿ, ã tÿ ti vÿ mranh mãn mû ra ã tóg ã kaga kãfór venh ke mû, ha vemnÿ,” he tóg ti mý, Jesus ti, ã tÿ ù tÿ há' he ja ãn mÿ.

¹⁵ Hã ra tóg tÿ mû, pã'i ag mÿ Jesus ti tóg jé.

¹⁶ Kÿ ag tóg ti tén sór mû sir, ti tÿ vãn hã kaga ke kurã ki ùn kaga ãn tÿ há' hen kÿ.

¹⁷ Hã ra Jesus tóg pã'i ag mÿ: “ãn hã panh vÿ rãnhrãj kÿ nÿ nÿ, ãg jóg mág ti,” he mû. “Kÿ sóg ver ti kóm isÿ han ke mû gé,” he tóg, Jesus ti, pã'i ag mÿ.

¹⁸ Kÿ ag tóg ti to jũ jagy han mû. “Ti tén jé ãg tóg ke mû,” he ag tóg mû sir jagnẽ mÿ. Vãn hã kaga ke kurã ãn ki tóg ã tÿ nén han ke tũ ãn han ja nÿ, Jesus ti, Judeu ag jykre tovãn hã kÿ. Hã ra tóg Topẽ to: “ãn hã panh vÿ tÿ ti nÿ,” he mû gé. Ti tÿ vãn hã kaga: “Topẽ ri ke ãn hã,” he vãn. Hã kÿ ag tóg ti to jũ mû, pã'i ag.

Jesus tÿ ã tÿ tÿ Topẽ kósin nÿ kãmén

¹⁹ Kÿ Jesus tóg ag mÿ vãn hã kãmén mû. “Ki hã sóg tóg mû, ha mẽ,” he tóg. “ãg jóg mág kósin vÿ ã pÿr mÿ nén ù han ki kagtÿg nÿ. ã panh végtÿ tÿ, ãg jóg mág kósin ti, kÿ tóg ã tÿ ã panh ki nén végtÿ mû ãn hã han tÿ. ãg jóg mág tÿ nén han mû ãn hã han tóg tÿ gé, ti kósin ti.

²⁰ ãg jóg mág vÿ ã kósin to há tãvÿ nÿgtÿ, hã kÿ tóg ti mÿ ã tÿ nén han mû ãn ven kãn mû. Ti tÿ nén han mû ù ve ã jag huri, hã ra ã jag tóg ti kãfór venh ke mû ver, ha vemnÿ, kÿ tóg ã jag mÿ e tÿn hã mû.

²¹ Tag ve jé ã jag tóg ke mû, ha mẽ. ãg jóg mág tóg ùn kãgter mû ag rÿnrÿn mãn tÿ, ag rÿnrÿn nÿtÿ jé. ãn ri ke han jé tóg ke mû gé,

ti kósin ti. Æ tỹ ùn rĩn mǎn mũ ěn rĩn mǎn jé tóg ke mũ.

²² Kỹ ěg jóg mág vỹ vĕnh kar jykre tugnỹm ke mũ, hǎ ra tóg ã kósin mỹ tag tovǎnh.

²³ Ti mỹ tóg tag tovǎnh, vĕnh kar tỹ ti to: “ùn mág vỹ tỹ ti nĩ,” he jé, ag tỹ ěg jóg mág to: “ùn mág vỹ tỹ ti nĩ,” he mũ tag ri ke. Û tỹ ti kósin mỹ: “ùn mág vỹ tỹ ã nĩ,” he jǎvǎnh kỹ tóg ěg jóg mág mỹ tag tónh ke tũ nĩ gé. Ti hǎ vỹ ã kósin jĕnĕ ja nĩgtĩ. Inh hǎ vĕ, ti kósin ti,” he tóg, Jesus ti.

²⁴ “Ăjag mỹ sóg tag tó mũ, ha mẽ. Ki hǎ sóg tó mũ, ha mẽ. Û tỹ inh vỹ jĕmĕg mũ ěn vỹ ter ke tũ nĩ, rĩr krỹg ja tũ ve jé tóg ke mũ, ti tỹ ù tỹ inh jĕnĕg mũ ěn ki rǎ kỹ jĕn kỹ. ěn to tóg jũnh ke tũ nĩ, Topĕ ti. Ti ter ke vĕ vĕ, hǎ ra tóg ter ke tũ nĩ.

²⁵ Ki hǎ sóg tó mũ, ha mẽ. Kǎnhmar ùn kǎgter kỹ nỹtĩ ag vỹ Topĕ kósin vỹ mĕnh ke mũ, kỹ ùn tỹ ti vỹ mĕg mũ ag vỹ rĩnrĩr mǎn ke mũ. Kakó tǎvĩ ti nĩ ha, ag rĩnrĩr mǎn ke kurǎ ti.

²⁶ Inh panh vỹ ã pir mỹ vĕnh kar rĩnrĩr han ki kanhró nĩ, hǎ ra tóg inh mỹ ã jykre tag nĩm gé, sỹ vĕnh kar rĩnrĩr han mǎn jé gé, isỹ tỹ ti kósin nĩn kỹ.

²⁷ Kỹ tóg inh mỹ: “ĕprǎ ke kar jykre tugnỹm nĩ,” he ja nĩgtĩ, isỹ tỹ ĕprǎ ke fi kósin nĩn kỹ.

²⁸ Tag hỹn tóg ģjag mỹ e tĩ, sỹ ģjag mỹ: “vĕnh kar rĩnrĩr han jé sóg ke mũ,” hen kỹ. Sỹ ke há vĕ, hǎ ra. Kejĕn ùn kǎgter mũ kar ag vỹ inh vỹ mĕnh ke mũ, kỹ ag tóg ģjag kej tá kǎpa kǎn ke mũ.

²⁹ Kỹ ùn tỹ vĕnh jykre há han mũ ag vỹ rĩnrĩr mǎn kỹ rĩr krỹg ja tũ ěn venh ke mũ, jǎvo ùn tỹ vĕnh jykre pǎno han mũ ag rĩnrĩr mǎn sĩ han kỹ nũgme ki vǎr kǎn ke mũ,” he tóg, Jesus ti.

Jesus tỹ vĕnh kǎmĕn mũ

³⁰ Kỹ tóg ag mỹ: “inh pi(jé) isỹ vĕsóg ki nĕn to jykrĕn mũ ěn han tĩ,” he mũ, Jesus ti. “Inh panh tỹ inh mỹ nĕn tó mũ ěn hǎ tó sóg tĩ, isỹ vĕnh kar jykre tugnỹm ken kỹ. Hǎ kỹ sóg ki hǎ tó tĩ, isỹ vĕsóg ki to jykrĕn tũ nĩn kỹ. Û tỹ inh jĕnĕg mũ ěn tỹ inh mỹ nĕn tó mũ ěn hǎ tó sóg tĩ, hǎ kỹ tóg há kar nĩ,” he tóg.

³¹ “Kỹ isỹ vĕso: “ĕg jóg mág vỹ inh jĕnĕ, inh panh ti,” henh mũ ra ģjag tóg inh mỹ: “ã ón nĕ,” henh ke mũ vĕ.

³² Û vỹ iso: “Topĕ vỹ ti jĕnĕ,” he mũ. Hǎ ra tóg ki hǎ tó mũ, ù tỹ iso tag tó mũ ti.

³³ Kỹ ģjag tóg João ki jĕmĕ sór ja nĩ gé, hǎ kỹ ģjag tóg ti mỹ vĕnh vỹ jĕnĕ ja nĩgtĩ. Kỹ tóg ģjag mỹ inh kǎmĕn há han ja nĩgtĩ gé.

³⁴ Hǎ ra tóg inh mỹ tỹ nĕn ù tũ nĩ, ĕprǎ ke tỹ iso: “Topĕ vỹ ti jĕnĕ,” hen kỹ. Hǎ ra sóg ģjag mỹ João vỹ tó mũ, ģjag tỹ ti vỹ kri fi jé, ģjag tỹ inh ki ge jé, ģjag krenkren jé,” he tóg, Jesus ti.

³⁵ “João vỹ ģjag mỹ lampiǎo gru ri ke ja nĩ, ģjag mỹ kurǎ sĩ han kỹ, ti tỹ ģjag mỹ Topĕ vỹ kǎmĕn ja nĩn kỹ. Kỹ tóg ģjag mỹ sér tĩ ja nĩ, hǎ ra tóg kurǎ e han tũ nĩ.

³⁶ João vỹ ģjag mỹ inh kǎmĕn ja nĩ, hǎ ra nĕn ù vỹ inh kǎmĕn tĩ gé, kỹ tóg João vỹ kǎfór nĩ. Inh panh vỹ inh mỹ: “ĕprǎ ke ag tỹ nĕn han vǎnh hyn han nĩ, milagre ti,” he ja nĩ, hǎ kỹ sóg hyn han tĩ. Isỹ milagre hyn han mũ tag vỹ inh kǎmĕn há han tĩ gé. ģjag tỹ milagre tag vigven kỹ ģjag tóg ki kanhrǎn ke mũ vĕ, ĕg jóg mág tỹ inh jĕnĕ jan ki, inh panh ti.

³⁷ Kar kỹ ěg jóg mág vỹ, ù tỹ inh jĕnĕg mũ ěn vỹ inh kǎmĕn tĩ gé. Ti vỹ jĕmĕg tũ ģjag nỹtĩ, kỹ ģjag tóg ti vég tũ nĩ gé.

³⁸ Kỹ ģjag tóg ti vỹ to jykrĕn há han tũ nĩ gé, ģjag tỹ inh ki ge sór tũ nỹtĩn kỹ. Ti hǎ vỹ inh jĕnĕ.

³⁹ Topĕ vỹ to ke ģjag tóg tĩ. Há ti nĩ, tag ti. “ĕg tỹ Topĕ vỹ rá to ken kỹ ěg hỹn rĩr krỹg ja tũ venh ke mũ,” he ģjag tóg tĩ. Inh hǎ vỹ ki rán kỹ nĩ, ha mẽ, hǎ kỹ ki ve há han nĩ, vĕnh rán ki,” he tóg.

⁴⁰ “Hǎ ra ģjag tóg inh ki ge sór tũ nĩ. ģjag tỹ inh ki ge kỹ nỹtĩ ra ģjag rĩnrĩr kỹ nỹtĩnh mũ vĕ,” he tóg, Jesus ti.

⁴¹ “ĕprǎ ke ag tỹ inh mỹ vỹ há han tũ ra tóg inh mỹ tỹ nĕn ù tũ nĩ.

⁴² Hǎ ra sóg ģjag jykre ki kanhró nĩ. ģjag pi(jé) Topĕ to há nỹtĩ’.

⁴³ ģjag mỹ sóg: “ĕg jóg mág vỹ inh jĕnĕ,” henh kǎtĩg ja nĩ, hǎ ra ģjag tóg inh vỹ mĕ sór tũ nỹtĩ. Û tóg kejĕn ģjag mré vĕmĕn kǎtĩg ke mũ, Topĕ tỹ ti jĕnĕg tũ (hǎ) ra. ěn vỹ jĕmĕ jé ģjag ke mũ, ha vemnĩ.

⁴⁴ Inh ki ge sór tũ ãjag nýtĩ, ãjag tỹ ěprã ke ag vĩ jēmēn kỹ. ěprã ke ag tỹ ãjag mỹ vĩ há han kỹ tóg ãjag mỹ sér tĩ. Kỹ ãjag tóg Topě tỹ ãjag mỹ nén tónh ke mũ mũ ěkrég tũ nĩgtĩ. “Inh jykre mỹ ti mỹ há nĩ vỹ?” he sór tũ ãjag nĩ.

⁴⁵ Ājag hỹn iso: “ti hỹn ěg to vĩ kónãn sór mũ, ěg jóg mág mỹ,” he tĩ. Hã tũ vē. Ũ tỹ ãjag to vĩ kónãn ke mũ hã vỹ tỹ Moisés nĩ, ãjag tỹ ũ to: “ti hỹn ěg to há tãvĩ nĩ,” he mũ ěn ti.

⁴⁶ Ājag tỹ Moisés vĩ kri fi (hã) ra ãjag tóg inh vĩ kri nĩm ke mũ gé vē vē. Moisés vỹ iso livro han ja nĩ, ha mẽ.

⁴⁷ Hã ra ãjag tóg ti vĩ rá kri fi sór tũ nĩ, hã kỹ ãjag tóg inh vĩ kri nĩm sór tũ nĩ gé,” he tóg, Jesus ti. Ti tỹ pã'i ag mỹ vēnh kãmén hã vē.

6

Jesus tỹ ũn e jĕn

(Mt 14.13-21; Mc 6.30-44; Lc 9.10-17)

¹ Tag pãte Jesus tóg kejĕn ga tỹ Galilėia tá goj nig fĩn rãm mũ. Goj ěn jiji hã vỹ: Tiberiades, he mũ.

² Kỹ ũ tỹ hĕn ri ke ag vỹ ti venh kãmũ mũ, ti nón, ũn e tãvĩ ag. Ti tỹ nén han vãnh hyn han mũ ěn ve ja ag tóg nĩ, ti tỹ ũn kagyga ag tỹ há' he mũ ti.

³ Kỹ Jesus tóg pãnónh tá ã mré mũ tĩ ag mré nĩ nĩ.

⁴ Festa tỹ Páscoa ěn vỹ kakó nĩ ha, Judeu ag tỹ festa han tĩ ěn ti.

⁵ Kỹ Jesus vỹ ũn e ěn ki ěvãnh mũ, ũ tỹ ti vĩ mẽnh kãmũ mũ ag ki. Kỹ tóg Filipe mỹ: “ěg hỹn hĕ tá vējĕn venh ke mũ, ěg tỹ ũn e tag ag mỹ ven jé?” he mũ, Jesus ti.

⁶ Filipe mỹ tóg ke mũ, ti tỹ to ti jykre ve jé. Jãvo Jesus vỹ to jykrén há han huri, ti tỹ nén han ke mũ ěn to.

⁷ Kỹ Filipe tóg ti mỹ: “ěg tỹ ũn e tag ag mỹ nén ũ sĩ ven jé ěg hỹn jãnkamy tỹ hĕn ri ke to comprar henh ke mũ, hã ran kãkyn kenh ke mũ, ha vemnĩ,” he tóg, Filipe ti.

⁸ Kỹ ag mré tĩ ũ tóg, André he mũ ěn tóg, Simão Pedro jãvy ěn tóg Jesus mỹ:

⁹ “kyrũ ũ tóg cevada tỹ ěmĩ tỹ 5 (ke) ma kãtĩg ja nĩ, kãkufár régre mré,” he mũ. “Hã ra tóg tỹ nén ũ tũ pĕ nĩ, vējĕn sĩ tag. E tãvĩ ag nýtĩ,” he tóg mũ, André ti.

¹⁰ Hã ra Jesus tóg: “ag mỹ: “nĩgnĩ ra,” hé,” he mũ. Kỹ ag tóg nĩgnĩ mũ. Tá tóg re gỹnh

nĩ, hã kỹ ag tóg tá nĩgnĩ kỹ nýtĩ. Ũn tỹ 5 mil (ke) ag hỹn tá nýtĩ, ěg tỹ ag tãvĩ tón kỹ, hã ra fag tóg tá nýtĩ gé, gĩr tỹ hĕn ri ke ke gé.

¹¹ Ag nĩgnĩ kỹ Jesus tóg ěmĩ ěn mág mũ, kỹ tóg Topě mỹ: “há ti nĩ,” he mũ. Kỹ tóg ag mỹ vēnh kãpópãm mũ sir, kãkufár ěn ke gé. Kỹ vēnh kar vỹ ag tỹ nén ko sór mũ ěn ko mũ sir. Sĩ tũ tóg nĩ, vējĕn ti.

¹² Ag funfór nýtĩn kỹ Jesus tóg ã mré mũ tĩ ag mỹ: “ag tỹ ko ja tũ ěn génh mũjĕg, ti vãgfor tũ nĩ jé,” he mũ.

¹³ Kỹ ag tóg kĕj tỹ 12 (ke) fãn mũ, cevada tỹ ěmĩ tỹ 5 (ke) ěn ke tỹ, vēnh e ěn tỹ ko kar kỹ.

¹⁴ Kỹ tóg ag mỹ e tĩ, ag tỹ Jesus tỹ milagre tag han mũ ven kỹ. Kỹ ag tóg ti to: “Topě vĩ tó tĩ ěn hã vē,” he mũ. “ěg tỹ ũn jãvãnh mũ ěn hỹn tóg,” he ag tóg, Jesus to.

¹⁵ Hã ra Jesus vỹ ki kanhró nĩ, ag tỹ nén han sór mũ ti. Ag tỹ Jesus tỹ pã'i mág tỹ rei han sór vē. Tag ki kanhró tóg nĩ, Jesus ti. Hã kỹ tóg ã pir mỹ tĩ mũ, pãnónh ra, vēnh péju jé.

Jesus tỹ goj nig kri tĩ (Mt 14:22-33; Mc 6:45-52)

¹⁶ Kutyg ke mũ ra ti mré mũ tĩ ag tóg goj nig ra mũ mũ.

¹⁷ Barco kãra ge kỹ ag tóg goj fĩn rãm sór kỹ Cafarnaum ra mũ sór mũ. Kejĕn tóg kuty pĕ nỹ ha, hã ra Jesus tóg ag to vỹn ke ja tũ nĩ ver.

¹⁸ Kỹ vãhã kóho jũ vỹ kãtĩ mũ, kỹ goj vỹ krém ke mũ.

¹⁹ Mũ sĩ han ja ag nĩ, 5 (ke) quilômetros, hỹn, ke tũ nĩ kỹ 6 (ke) quilômetros, goj kri. Vãhã ag tóg Jesus vég mũ sir, ti tỹ goj kri tĩg kỹ. Ag barco ki tóg jun mũ. Kỹ ag kanĕ tóg jũrũn ke mũ.

²⁰ Hã ra Jesus tóg ag mỹ: “inh hã vē, mũmĕg tũg nĩ,” he mũ.

²¹ Kỹ tóg ag mỹ sér tĩ, kỹ tóg barco kãra rã mũ sir, ag mré. Ti tỹ ag mré nĩn kỹ ag tóg kãnhmar junjun mũ, kafã ũ tá.

Vĕnh kar tỹ Jesus ve sór

²² Hã ra vēnh e ěn vỹ kafã ũ tá nýtĩ ver. Tỹ vaj kỹ ag tóg Jesus jãvãnh mũ, tá. Ti jãvãnh kỹ ag tóg: “barco pir vỹ kã nỹ ja nĩ, kuty kỹ,” he mũ. “Kỹ ti mré mũ tĩ ag vỹ barco ěn kãra ge kỹ mũ ja nĩ, hã ra tóg ag mré tĩg ja tũ nĩ,”

he ag tóg mũ sir jagně mý, ùn e ãn ag. Tag tó mũ ra ag tóg Jesus vég tũ nĩ gé.

²³ Kĩ barco ù tóg ki junjun mũ, cidade tỹ Tiberíades tá kãmũ ù. Vẽnh e ãn tá ag tóg junjun mũ. Tá Jesus vỹ ãmĩ to Topẽ mré vĩ ja nĩ, kar kĩ tóg vẽn e ãn mỹ vẽn kãpópãm ja nĩ.

²⁴ Barco tỹ tá junjun mũ ra ag tóg kãra ge kĩ mũ mũ sir, Cafarnaum ra, ti ve jé. “Ki ti tũ nĩ, ti mré mũ tĩ ag vỹ ki tũgtũ nĩ gé. Mũ nỹ, ti nón,” he ag tóg mũ sir, ùn e ag, hã kĩ ag tóg ti nón mũ mũ.

Kanhkã tá pão

²⁵ Ag tỹ Cafarnaum tá junjun kĩ ag tóg tá ti vég mũ sir, goj nig kafã ù tá, ùn e ãn ag. Kĩ ag tóg ti mỹ: “hẽ ri ken kĩ ã ki jun?” he mũ.

²⁶ Kĩ Jesus tóg ag mỹ: “ha mẽ, ki hã sóg tó mũ,” he mũ. “Ájag tỹ ãmĩ ko ja tugrĩn ájag tóg inh ve sór mũ,” he tóg. “Sỹ milagre hyn han tĩ ãn vég ájag tóg tĩ, hã ra ájag tóg to jykrén há han tũ nĩgtĩ,” he tóg. “Ájag tógá nỹtĩ tag hã ve sór ájag tóg mũ.

²⁷ Ęg tỹ tag ki vẽn ãn vég mũ ãn vỹ kãnhmar tũ' henh ke mũ, kĩ tag tãvĩ to vãsãn sór tũg nĩ. Vẽn ù jé vãsãn nĩ, ãmĩ tỹ ájag rĩnrĩr pẽ han mũ ãn jé, ãmĩ kórég vãn ãn jé. Sỹ ájag mỹ ãmĩ ãn nĩm sór vẽ. Ęg jóg tỹ Topẽ tỹ inh mỹ vẽn rãnrãj nĩm ja hã vẽ. Ti tỹ inh mỹ tag tó hã kĩ sóg ájag mỹ nĩm sór mũ, ãmĩ ti. Tỹ sóg ãprã ke fi kósin nĩ mỹr,” he tóg ag mỹ, Jesus ti.

²⁸ Kĩ ag tóg ti mỹ: “kỹ Ęg hỹn hẽ ri kenh ke mũ, Ęg tỹ Topẽ jykre han jé?” he mũ.

²⁹ Kĩ Jesus tóg ag mỹ: “Topẽ tỹ ùn jẽnẽg mũ ãn ki gemnĩ,” he mũ.

³⁰ Kĩ ag tóg ti mỹ: “kỹ ã hỹn ne han ke mũ, Ęg tỹ ve kỹ ã ki gen jé?” he mũ. “Á hỹn ne han há nĩgtĩ?”

³¹ Ęg jóg'jóg ve ag vỹ kanhkã tá pão ãn kó, maná he mũ ãn, ag tỹ ga kórég ãn mũ mũn kĩ. Ag to tag vỹ rán kĩ nĩ, ha mẽ: “kanhkã tá tóg ag mỹ pão jẽnẽ, ag tỹ ko jé,” he ja tóg nĩ, Topẽ vỹ rán kĩ nĩ ki. Jãvo ã hỹn Ęg mỹ ne han ke mũ?” he ag tóg, Jesus mỹ, ti vỹ kãfãn kĩ.

³² Kĩ Jesus tóg ag mỹ: “Moisés pi(jé) ájag mỹ kanhkã tá pão pẽ nĩm ja nĩ,” he mũ. “Ki hã sóg tó mũ, ha mẽ,” he tóg. “Ù tỹ ájag mỹ

kanhkã tá pão pẽ nĩm mũ ãn vỹ tỹ inh panh nĩ.

³³ Topẽ jamĩ vỹ kanhkã tá kãtére mũ. Ęn vỹ ãprã ke kar rĩnrĩr han mũ,” he tóg, Jesus ti.

³⁴ Kĩ ag tóg ti mỹ: “Ęg mỹ ãmĩ ãn nĩm, kurã kar ki,” he mũ.

³⁵ Kĩ Jesus tóg ag mỹ vẽn kãmén mũ sir. “Inh hã vỹ tỹ ãmĩ ãn ri ke nĩ, inh hã vỹ ájag rĩnrĩr han ke mũ,” he tóg. “Ęg tỹ vẽn ko mũ ra Ęg tóg kãnhmar kókĩr mãn' he tũ, goj kron mãn sór Ęg tĩ gé. Û tỹ iso kãtig mũ ãn mỹ tóg hã ra sér tĩnh mũ, ti tỹ inh ki rã kĩ. Ti mỹ sér tĩ ãn vỹ tũg' henh ke tũ pẽ nĩ. Isỹ ti mỹ vẽn jykre nĩm ke mũ ãn vỹ vẽn kãfór nĩ,” he tóg, Jesus ti.

³⁶ “Hã ra ájag tóg ájag tỹ inh vég mũ ra inh ki ge sór tũ nĩ.

³⁷ Inh panh vỹ ù ag kuprẽg mũ, ag tỹ tỹ isũ nỹtĩ jé. Ęn ag vỹ iso kãmũ tĩ. Û tỹ iso kãmũ tĩ kar ag vỹ inh mỹ há nỹtĩ. Inh pi(jé) ù mỹ: “inh mré kãtĩ tũg,” henh ke mũ'.

³⁸ Kanhkã tá sóg kãtére ja nĩ. Inh pi(jé) isỹ vêsóg ki nén to jykrén mũ ãn han sór mũ'. Û tỹ inh jẽnẽg mũ tỹ inh mỹ nén tó mũ ãn hã han sóg tĩ, hã jé sóg tá kãtére ja nĩ.

³⁹ Ti tỹ inh mỹ nén tó mũn hã vẽ, ha mẽ. “Isỹ ã mỹ ùn jẽnẽnh ke mũ ãn ki rĩr há han nĩ, ag vãgfor tũ nĩ jé,” he ja tóg nĩ, inh mỹ, inh panh ti. Hã kĩ sóg ke mũ. Kĩ sóg ag rĩnrĩn mãn ke mũ, kurã tỹ Ęgno ki.

⁴⁰ Hỹ, tag vỹ inh panh mỹ há nĩ. Û tỹ ti kósin to kãmũ mũ ãn mỹ tóg rĩr krỹg ja tũ ven ke mũ, inh panh ti, ù tỹ inh ki ge kỹ nỹtĩ ag kar mỹ. Kĩ sóg kurã tỹ Ęgno ki ag rĩnrĩn mãn kãn ke mũ, ha vemnĩ,” he tóg, Jesus ti. Ti tỹ Judeu ag mỹ vẽn kãmén hã vẽ.

Ęg tỹ Jesus nĩ konh ke

⁴¹ Kĩ Judeu ag tóg Jesus kato vĩ mũ, ti vỹ to, ti tỹ ag mỹ: “ãmĩ tỹ kanhkã tá kãtére mũ ãn ri ke inh nĩ,” hen kĩ.

⁴² “Ti ki kanhró Ęg nỹtĩ,” he ag tóg mũ. “José kósin vẽ, Jesus tag ti. Ti han mũ fag ki kanhró Ęg nỹtĩ. Hã ra tóg veso: “kanhkã tá sóg kãtére,” he sór mũ',” he ag tóg mũ, Jesus to.

⁴³ Hã ra tóg ag mỹ: “iso vĩ kónãn tũg nĩ, jagně mỹ,” he mũ.

44 “Inh panh tỹ ùn krĩn mũ ag hã vỹ iso kãmũnh mũ. Ủ tỹ iso kãmũ mũ ag rĩnrĩn mãn jé sóg ke mũ, kurã tỹ ẽgno ki.

45 Topẽ vĩ tó tĩ ù vỹ tag rán ja nĩ, ha mẽ: “Topẽ vỹ vẽn kar kanhrãn ke mũ,” he ja ti nĩ. Hã kỹ ù tỹ inh panh vĩ mẽg mũ ag hã tóg iso kãmũnh ke mũ, inh panh tỹ ùn kanhrãn mũ ag.

46 Ẽprã ke ù pi(jé) inh panh ve ja nĩ'. Ủ tỹ Topẽ tá kãtĩ mũ ẽn hã vỹ ti ve ja nĩ, inh,” he tóg, Jesus ti.

47 “Sỹ ãjag mẽ ki hã tó mũn hã vẽ. Ủ tỹ inh ki rã mũ ẽn vỹ rĩr krỹg ja tũ ẽn venh ke mũ.

48 Inh hã vỹ ẽmĩ pẽ ri ke nĩ, inh hã vỹ ãjag rĩnrĩr han ke mũ.

49 Ẽjag jóg'jóg ve ag vỹ, ag tỹ ga kórég mĩ mũn kỹ ag tóg kanhkã tá ẽmĩ ẽn ko ja nĩgtĩ, maná he mũ ẽn, ag tỹ ko mũ (hã) ra ag tóg kãgter kãn.

50 Ủ tỹ ẽmĩ tỹ ẽg rĩnrĩr han mũ ẽn ko kỹ, ù tỹ kanhkã tá kãtére ja ẽn ki rã kỹ tóg ter ke tũ pẽ nĩ.

51 Ẽmĩ ẽn hã vỹ tỹ inh nĩ, inh hã vỹ kanhkã tá kãtére, inh hã vỹ ãjag rĩnrĩr han ke mũ. Ẽjag tỹ ẽmĩ tag ko kỹ ãjag ter ke tũ pẽ nĩ. Isỹ vẽn kar mẽ vễjẽn nĩm ke hã vẽ, hã vỹ: inh nĩ, he mũ. Ẽjag tỹ inh nĩ kon kỹ ãjag rĩnrĩr nỹtĩnh mũ,” he tóg, Jesus ti.

52 Kỹ Judeu ag vỹ jagnẽ mẽ: “ti mẽ ẽg mẽ ã nĩ nĩm ke mũ, ẽg tỹ ti nĩ ko jé?” he mũ. “Vẽnhmỹ ti nĩ, tag,” he ag tóg mũ.

53 Kỹ Jesus tóg ag mẽ: “isỹ ãjag mẽ ke há vẽ,” he mũ. “Ẽjag tỹ inh nĩ ko sór tũ nĩn kỹ, ãjag tỹ inh kyvẻnh kron sór tũ nĩn kỹ, ãjag rĩnrĩr ke tũ pẽ nĩ. Tỹ sóg ẽprã ke fi kósin nĩ,” he tóg, Jesus ti.

54 “Ủ tỹ inh nĩ ko kỹ, ù tỹ inh kyvẻnh kron kỹ tóg rĩr krỹg ja tũ venh ke mũ, kỹ sóg ti rĩn mãn ke mũ, kurã tỹ ẽgno ki.

55 Inh nĩ vỹ tỹ vễjẽn pẽ nĩ, inh kyvẻnh vỹ tỹ ẽg tỹ kron jafã pẽ nĩ gé.

56 Ủ tỹ inh nĩ kon kỹ, ti tỹ inh kyvẻnh kron kỹ tóg inh ki rã kỹ jẽ nĩ, kỹ sóg ti kãki nĩ gé. Jagnẽ mré ke vỹ tỹ ẽg nỹtĩ.

57 Inh panh vĩ rĩr nĩ. Ti hã vỹ inh jẽnẽ, ti tũgrĩn sóg rĩr jẽ. Kỹ ù tỹ inh ki rã mũ ẽn vỹ isugnĩn rĩr ke mũ gé.

58 Ẽmĩ tỹ kanhkã tá kãtére jan hã vẽ. Ẽjag jóg'jóg ve ag tỹ ẽmĩ ko ja ẽn ri ke tũ ti nĩ. Ag

hã vỹ ãjag tỹ ko mũ ra kãgter kãn ja nĩgtĩ. Ủ tỹ ẽmĩ pẽ tag ko kỹ tóg ter mãn ke tũ nĩ. Inh ki rã to ken hã vẽ,” he tóg, Jesus ti.

59 Cafarnaum tá tóg ag kanhrãn mũ, kỹ tóg ag mẽ vẽn kãmẻn kãn mũ, Jesus ti, ag tỹ vẽn kanhrãn jafã ẽn krẻm.

Ủ tỹ ón kỹ Jesus mrẻ mũ tĩ ag tỹ ti tovẻnh

60 Kỹ tóg ti mrẻ mũ tĩ ù ag mẽ e tĩ, ti vĩ ti. Kỹ ag tóg: “ti vĩ vỹ ẽg mẽ mẽ jagy tĩ,” he mũ. “Mẽ jẻvẻnh ẽg tóg nỹtĩ, ti tỹ ùri ẽg mẽ nẻn tó mũ tag ti,” he ag tóg mũ.

61 Hã ra Jesus tóg ki kanhró nĩ, ag tỹ ti vĩ tag to vĩ kónẻn mũ ti. Hã kỹ tóg ag mẽ: “tag mẽ ãjag mẽ há tũ nĩ'?” he mũ.

62 “Kỹ ãjag hỹn hẻ ri kẻnh ke mũ, ãjag tỹ hẻn ri ke mũn isỹ kanhkã ra tĩg mãn ven kỹ, isỹ hẻ tá kãtére ja ẽn ra tĩg mãn kỹ, isỹ tỹ ẽprã ke fi kósin nĩn kỹ?” he tóg.

63 “Ủ tỹ ẽg rĩnrĩr han mũ vỹ tỹ Topẽ kuprĩg ti nĩ. Isỹ ãjag mẽ inh nĩ ko mũ tag to ken hã vẽ, hã vỹ: inh ki rã, he mũ. Inh vĩ tag ki krẻm tũgrĩn ãjag rĩnrĩr nỹtĩnh ke mũ.

64 Hã ra ãjag tóg inh vĩ kri fi sór tũ nỹtĩ,” he tóg, Jesus ti. Ag jykẻ ki kanhró tóg nĩ, vẻsóg ki, Jesus ti, hã kỹ tóg ke mũ. Ủ tỹ ón kỹ ã ki ge mũ ẽn ki kanhró tóg nĩ. Kỹ tóg ù tỹ pẻ'i ag mẽ ti tónh ke mũ ẽn ki kanhró nĩ gé.

65 Kỹ tóg ag mẽ: “hã kỹ sóg ãjag mẽ: “inh panh tỹ ùn krĩn mũ ag hã vỹ iso kãmũnh ke mũ,” he ja nĩ,” he mũ, Jesus ti.

66 Jesus vĩ tag tũgrĩn ti mrẻ mũ tĩ ù ag tóg ti tovẻnh mũ sir, ti mrẻ ag mũ mãn tũ nĩ.

67 Kỹ Jesus tóg ù tỹ 12 (ke) ag mẽ: “ãjag hỹn isovẻnh sór mũ gé,” he mũ.

68 Kỹ Simão Pedro tóg ti mẽ: “ẽg tỹ ã tovẻnh mũ ra ẽg hỹn ù mrẻ mũnh ke mũ'?” he mũ. “Ẽ hã vỹ ẽg mẽ Topẽ vĩ tó tĩ, kỹ ẽg tóg rĩr krỹg ja tũ vẻnh ke mũ, ẽg tỹ ã vĩ kri fi kỹ.

69 Ẽ ki ẽg ge kỹ nỹtĩ, kỹ ẽg tóg ã ki kanhró nỹtĩ. Cristo vỹ tỹ ã nĩ, Topẽ vỹ ẽg mẽ ã jẻnẽ,” he tóg, Pedro ti, Jesus mẽ.

70 Kỹ Jesus tóg ù tỹ 12 (ke) ag mẽ: “ãjag kuprẻg inh,” he mũ, “hã kỹ ãjag tóg tỹ ù tỹ 12 (ke) nỹtĩ,” he tóg. “Hã ra ãjag kãmĩ ùn pir vỹ tỹ Japo tũ nĩ jẻvo,” he tóg, Jesus ti.

71 Ti tỹ Judas ẽn tó vẻ, Simão Iscariotes kósin ẽn. Ẽn vỹ kejẻn Jesus tovẻnh kỹ pẻ'i ag mẽ ti ven, ag tỹ ti se jẻ. Ủ tỹ 12 (ke) ag kã ù

ja vē, Judas ti. Hã ra Jesus tóg ti tỹ nén han ke mũ ãn ki kanhró ja nĩ.

7

¹ Tag pãte Jesus tóg ga tỹ Galiléia mũ tĩ mũ. Ga tỹ Judéia ra tĩg sór tũ ti nĩ ver, ag tỹ Judéia tá ti tén sór nỹtĩn kỹ, Judeu ag pã'i ag.

² Kejẽn tóg Judeu ag tỹ festa há ù tá krỹg mũ. Festa ãn kurã ki ag tóg pãjó krẽm nỹtĩ, Jerusalém tá.

³ Kỹ Jesus jãvy ag tóg ti mỹ: “ga tỹ Judéia ra tĩg nĩ, Jerusalém ra,” he mũ. “Ã tỹ tag há ki milagre hyn han kỹ tá ã mré ke ag tóg vég tũ nĩgtĩ, há kỹ cidade mág ra tĩg nĩ.

⁴ Vẽnh kar tỹ ãg jykre ve jé ãg tóg vẽn kar rĩnve ãg tỹ nén han ke mũ ãn han tĩ. Hã ra ã tóg ag vatánh tá milagre ti hyn han tĩ. Ag rĩnve han nĩ, ã tỹ nén han ke ti,” he ag tóg mũ, Jesus mỹ, ti jãvy ag.

⁵ Ag pi(jé) ti ki ge kỹ nỹtĩ', ti jãvy ag, há kỹ ag tóg ti to é he mũ.

⁶ Hã ra Jesus tóg ag mỹ: “inh kurã vỹ jun ja tũ nĩ ver, há kỹ sóg tĩg sór tũ nĩ ver,” he mũ. “Ãjag hỹn kurã tũ nỹtĩ, kurã kar hỹn ãjag mỹ há nỹtĩ, há ra sóg kurã nĩ.

⁷ Û tỹ iso jũ mũ ag pi(jé) ãjag to kórég nỹtĩ', há ra ag tóg iso kórég nỹtĩ, isỹ ag mỹ: “ãjag jykre vỹ kórég pẽ nĩ,” hen kỹ.

⁸ Ha festa venh mũjẽg inhhã. Inh pi(jé) tĩg sór mũ', ver'. Inh kurã vỹ jun ja tũ nĩ ver,” he tóg, Jesus ti, ã jãvy ag mỹ.

⁹ Tag tó kar kỹ tóg ver ga tỹ Galiléia mũ tĩ mũ.

Jesus tỹ festa venh tĩ

¹⁰ Ti jãvy ag mũ kar kỹ kejẽn Jesus tóg tĩ mũ gé, Jerusalém ra, festa ãn ve jé. Hã ra tóg vẽn kar vatánh tá tĩ mũ, vẽnh péju kỹ.

¹¹ Kỹ Judeu ag tóg festa ki ti jãvãnh mũ. Jagnẽ mỹ ag tóg: “ti hẽ kã nĩ?” he mũ.

¹² Vẽnh kar vỹ ti to vỹ mũ. Û ag tóg ti to: “ũn há vỹ tỹ ti nĩ,” he mũ. Jãvo ù ag tóg: “vó, ãg mỹ tóg ón tĩ,” he mũ gé.

¹³ Hã ra ag tóg jamã hár(a) ti to vẽnén tũ nĩgtĩ, pã'i ag kamẽg kỹ.

¹⁴ Festa kaju ki Jesus kejẽn Topẽ jo ãn ra tĩ mũ, ag kanhrãn jé.

¹⁵ Kỹ ti vỹ tóg vẽnh kar mỹ e tĩ. “Estudo mág han ja tũ ti nĩ, há ra tóg ki kanhró pẽ nĩ,” he ag tóg mũ ti to, pã'i ag.

¹⁶ Kỹ Jesus tóg ag mỹ: “isỹ ãjag mỹ Topẽ vỹ tó vỹ,” he mũ. “Inh jykre pijé'. Û tỹ inh jẽnẽg mũ ãn jykre há vỹ,” he tóg.

¹⁷ “Û tỹ Topẽ vỹ ki króm sór mũ ag vỹ ki kanhró nỹtĩnh mũ, sỹ ãjag mỹ ti jykre tó mũ tag ti ki. Isỹ vêsóg ki sỹ nén tónh ke to jykren mũ pijé',” he tóg.

¹⁸ “Û tỹ ã tỹ vêsóg ki nén to jykren mũ ãn tó kỹ tóg tỹ ùn mág nĩ sór mũ. Hã ra sóg ù tỹ inh jẽnẽg mũ ãn to: “ũn mág vỹ tỹ ti nĩ,” he mũ. Hã kỹ ãjag tóg ki kanhró nỹtĩ, isỹ ki há tó mũn ki. Inh pi(jé) vẽnh jykre vẽnhmỹ tó tĩ'.

¹⁹ Moisés vỹ ãjag jyvẽn ja nĩgtĩ. Topẽ jykre to. ãjag tỹ ne jé ti vỹ han tũ nĩ nẽ? Isỹ ti vỹ ki króm mũ ra ãjag tóg isén sór mũ',” he tóg, Jesus ti.

²⁰ Kỹ ùn e ãn ag tóg ti mỹ: “krĩ vẽnhmỹ ã tóg nĩ.” he mũ. “Ã tén sór tũ ãg nỹtĩ,” he ag tóg mũ, Jesus mỹ.

²¹ Hã ra Jesus tóg ag mỹ: “milagre pir han ja inh nĩ, vẽnhkán ke kurã ãn ki, kỹ tóg ãjag mỹ e tĩ,” he mũ.

²² “Vẽnhkán ke kurã ki ãjag tóg gĩr ag gré junun fár kym tĩ gé, Moisés tỹ ãjag mỹ: “ti mur pãte kurã tỹ 8 (ke) ki ti kym nĩ,” he ja nĩ ãn kỹ. Hã ra ù tỹ ã krẽ fár kym vén pi(jé) tỹ Moisés nĩ ja nĩ'. Ti jo ke ù ja vē, ù tỹ kym vén ja ti.

²³ ãjag tỹ Moisés vỹ ki króm jé ãjag tóg vẽnhkán ke kurã ki gĩr fár kym tĩ. Hã ra ãjag tóg iso jũ sór mũ, isỹ vẽnhkán ke kurã ki ùn kaga pir tỹ há' hen kỹ.

²⁴ Òn kỹ ãjag tóg iso jũ sór mũ. Inh jykre vỹ ãjag mỹ kórég nĩ ve nĩ. ãjag tỹ to jykren há han mũ ra ãjag tóg inh jykre há nĩ venh mũ vē,” he tóg, Jesus ti.

Ag tỹ Jesus to: “ti mỹ tỹ Cristo nĩ vỹ?” he

²⁵ Kỹ Jerusalém tá ke ag tóg Jesus to: “ti tén sór ja ag tóg nĩ,” he mũ.

²⁶ “Hã ra tóg jatun mỹ vẽnh kar mré vẽnén jẽ nĩ. Ti mỹ ag tóg vỹ tũ nĩ, pã'i ag. Ag mỹ hẽn ri ke mũn ti to: “Cristo vỹ tỹ ti nĩ, Topẽ tỹ ùn jẽnẽg mũ vỹ tỹ ti nĩ,” he mũ vỹ, ãg pã'i ag?” he ag tóg mũ, Jesus to.

²⁷ “Hã ra ãg tóg ti tỹ hẽn tá kãtĩ mũ ki kanhró nỹtĩ. Cristo ãn kãtĩg kỹ ãg tóg ti tỹ hẽn tá kãtĩg mũ ki kãtĩg nỹtĩnh mũ, kỹ ti hỹn tỹ Cristo tũ nĩ,” he ag tóg mũ, Jesus to.

28 Hã ra Jesus tóg Topê jo ãn tá jê nĩ, vênh kar kanhrãn kÿ. Kÿ tóg jamã hár(a) ag kanhrãn mũ. “Ti ki kanhró ãg nÿtĩ, he ãjag tóg tĩ iso, ón kÿ,” he tóg. “Ti tÿ hên tá kãtĩ mũ ki kanhró ãg tóg nÿtĩ gé, he ãjag tóg tĩ, ón kÿ. Inh pi(jé) vêsóg ki: inh hÿn tĩg mũ, hé'. Û tÿ inh jênêg mũ ên vÿ ki hã tó tĩ. Hã ra ãjag tóg ti ki kagtĩg nÿtĩ, ù tÿ inh jênêg mũ ên ti ki.

29 Inh hã vÿ ti ki kanhró nĩ. Ti hã tá sóg kãtére, ãjag ve jé, ti tÿ inh mÿ: “ha ag venh tĩg,” hen kÿ,” he tóg, Jesus ti.

30 Kÿ ag tóg ti se sór mũ, hã ra ag tóg ti vóg tũ pẽ nĩ ver. Ti ter ke kurã vÿ jun ja tũ nĩ ver, hã kÿ ag tóg ag tÿ ti se sór mũ ra ti ség tũ nĩ.

31 Ag jãvo ùn e ag tóg Jesus ki ge mũ. Ti to ag tóg: “ãg mÿ tóg tÿ Cristo nĩ ve nĩ,” he mũ. “Cristo kãtĩg kÿ ti nãji milagre hyn han ke mũ. Jesus tÿ milagre hyn han vÿ e nÿtĩ. ãg mÿ tóg tÿ Cristo nĩ,” he ag tóg, Jesus to. Tag tó kÿ ag tóg ti ki ge mũ.

Pã'i ag tÿ Jesus se sór

32 Kÿ Fariseu ag tóg mæg mũ, ùn e ag tÿ Jesus to nén (ũ) tó mũ ti. Kÿ ag tóg Topê tũ ki rĩr tĩ to pã'i ag mré vémén mũ, ag tÿ Jesus senh ke to. Kÿ ag tóg polícia ag jênêg mũ, ag tÿ ti se jé.

33 Hã ra Jesus tóg: “ãjag mré sóg nĩ sĩ han ke mũ ver,” he mũ. “Tag pãte sóg tĩg ke mũ, isÿ ù tÿ inh jênêg mũ ên ve jé.

34 Ên kã tóg ãjag tÿ inh venh há tĩnh mũ, hã ra ãjag tóg inh venh ke tũ nĩ. Ên tá junjun ke tũ ãjag tóg nĩ, isÿ hên ra tĩg ke ên tá,” he tóg.

35 Kÿ Judeu ag tóg jagnê mÿ: “ti hÿn hẽ ra tĩg sór mũ?” he mũ. “ãg hÿn hẽ tá ti venh ke tũ nĩ? Ti hÿn hên ri ke mũn ga tÿ Grécia ra tĩg sór mũ, tá ãg mré ke ag kanhrãn jé.

36 Ne to ke nẽ, hÿn, hã vÿ: “ãjag tÿ inh venh há tóg tĩnh mũ, hã ra ãjag tóg inh venh ke tũ nĩ, he mũ tag ti?” he ag tóg, Judeu ag. Jesus vÿ vÿ ag mÿ e tĩ, hã kÿ ag tóg ki kagtĩg nÿtĩ, ti tÿ nén tó mũn ki.

Topê kuprĩg tÿ goj ri ke nĩ

37 Vãhã tóg festa tÿ kurã tÿ ãgno tá krÿg mũ. Festa to kurã mágpẽ vẽ, kurã tÿ ãgno ên ti, hã kÿ ag e tãvĩ nÿtĩ, Jerusalém tá. Kurã ên kã Jesus tóg jê kÿ vênh kar mÿ prẽr mũ sir. “!..ãjag tÿ goj kron sór kÿ inh mÿ to vÿ, isÿ ãjag mÿ goj há ven jé..!” he tóg, prẽr kÿ.

38 “!..Topê vÿ ki tag vÿ rán kÿ nĩ, ha mẽ: !..ãjag tÿ inh ki ge kÿ tóg ãjag kãki goj ror han ke mũ, isÿ ãjag mÿ goj nĩm ke ti..!” he tóg. “!..Kÿ goj tag vÿ ãjag rĩnrĩr pẽ han ke mo..!” he tóg, Jesus ti. Ti tÿ ag mÿ prẽr jan hã vẽ.

39 Jesus tÿ ag mÿ Topê kuprĩg tón hã vẽ, hã to tóg: goj, he mũ. Topê kuprĩg tÿ tóg ag jagrên ke mũ, ù tÿ ti ki ge mũ ag. Festa ên kã tóg ag mÿ ti jênê ja tũ nĩ ver, Topê kuprĩg ti, ti tÿ ver ã ter kar kÿ rĩr mãn ja tũ nĩn kÿ, ti tÿ ã panh ra tĩg mãn ja tũ nĩn kÿ ver.

Ag tÿ Jesus ki kagtĩg

40 Kÿ Jesus vÿ mæg mũ ù ag tóg ti to: “Topê vÿ tó tĩ pẽ ên vẽ,” he mũ.

41 Kÿ ù ag tóg ti to: “Cristo vÿ tÿ ti nĩ, Topê tÿ ãg mÿ ùn jênêg mũ ên vÿ tÿ ti nĩ,” he tĩ gé. Hã ra ù ag tóg: “Cristo mÿ hÿn ga tÿ Galiléia tá kãtĩ mũ vÿ?” he mũ.

42 “Topê vÿ rá ki tóg: “Davi kósin vÿ tÿ ti nĩ, Cristo ti,” he mũ, “êmã tÿ Belém tá ke vÿ tÿ ti nĩ, Davi jamã ên tá ke,” he tóg, Topê vÿ tÿ rán kÿ nĩ ki. Hã kÿ tóg ãg mÿ tÿ Cristo tũ nĩ, Jesus ti, ti tÿ tÿ Galiléia tá ke nĩn kÿ,” he ag tóg.

43 Hã kÿ ag tóg vênh kãpãm kÿ nÿtĩ, ti tugnĩn.

44 Kÿ ag kãmĩ ù ag vÿ ti se sór mũ, hã ra ag tóg ti kãgmĩg tũ nĩgtĩ, ti kamæg kÿ.

Pã'i ag tÿ Jesus ki ge sór tũ

45 Kÿ polícia ag tóg Topê tũ ki rĩr tĩ to pã'i ag to vÿnvÿn ke mũ, Fariseu ag to ke gé, ù tÿ ag jêgnê ja ag to. Kÿ ag tóg ag mÿ: “hÿn, ti?” he mũ.

46 Kÿ ag tóg: “hã ra tóg vÿ há tãvĩ han mũ,” he mũ. “Vênh vÿ tÿ ge mẽ ja tũ ãg nÿtĩ, hã kÿ ãg tóg ti kãgmĩ ja tũ nĩ,” he ag tóg mũ, polícia ag.

47 Kÿ Fariseu ag tóg ag mÿ: “kÿ ãjag mÿ ti vÿ kri nĩm sór mũ', ti ón mũ ra?” he mũ.

48 “Pã'i ù mÿ ti vÿ kri fig mũ? Vó, ke tũ ãg nÿtĩ. Fariseu ù tÿ ti vÿ kri nĩm tũ nĩ gé.

49 Hã ra ag tóg ki kagtĩg nÿtĩ, ù tÿ ti vÿ kri fig mũ ag. Topê vÿ rán ki kagtĩg ag nÿtĩ, kÿ Topê vÿ ag mÿ vÿ kónãn ke mũ, ha vemnĩ,” he ag tóg mũ, Fariseu ag.

50 Hã ra Nicodemos vÿ ag mré nĩ gé, ù tÿ kuty tá Jesus mré vémén ja ên ti. Ên tóg ag mÿ:

51 “Ēg tỹ ti vóg kónãñ sór kỹ ěg tóg ti ki jẽmẽ vén ke mũ,” he mũ. “Ti tỹ nẽn han ja to jykrén há han jé ěg tóg ke mũ, ěg tỹ kar kỹ ti vóg kónãñ jé. Topẽ tỹ ěg mũ vẽnħ jykre nĩm jan hã vễ,” he tóg, Nicodemos ti.

52-53 Hã ra ag tóg ti mũ: “ã hỹn tỹ Galiléia tá ke nĩ gé!, hã kỹ ã tóg ti jy nĩgãñ sór mũ!,” he mũ. “Topẽ vĩ ki ve há han nĩ, kỹ ã tóg venħ ke mũ. Galiléia tá ke ù vĩ Topẽ vĩ tónħ ke tũ pẽ nĩ, Topẽ vĩ tá ke ù jẽnẽnħ ke tũ pẽ nĩ,” he ag tóg, Nicodemos mũ. Kỹ ag tóg ãjag jamã ra mũ mũ sir, pã'i kar ag.

8

Jesus tỹ ùn tỹtã kórég fi mũ vẽnħ pãte fón

1 Hã ra Jesus tóg pãnónħ tỹ Oliveiras ra tĩ mũ, tá nũr jé.

2 Kurã ke ra tóg Jerusalém ra tĩg mãn kỹ (tóg) Topẽ jo ãn tá nĩ mãn mũ sir, kỹ vẽnħ kar ag tóg ti vĩ mẽnh kãmũ mũ. Tá nĩ kỹ tóg ag kanhrãn mũ.

3 Kỹ Topẽ vĩ to professor ag vĩ ùn tỹtã fi pére kãmũ mũ, Fariseu ag ke gé. Ûn tỹtã ěn fi ve ja ag tóg nĩ, fi tỹ fi mén tũ mré nỹn kỹ. Vẽnħ kujũ kã ag tóg fi fẽg mũ.

4 Kỹ ag tóg Jesus mũ: “Senhor,” he mũ. “Fi ve ěg tóg, fi tỹ fi mén tũ mré nỹn kỹ,” he ag tóg, Jesus mũ.

5 “Moisés vĩ ěg mũ: “ãjag kãmĩ ù fi tỹ fi mén tũ mré nỹn kỹ fi tén nĩ, pó tỹ fi pin kỹ,” he ja nĩ. Jo ã hỹn hẽ ri ke tĩ?” he ag tóg, Jesus mũ.

6 Ag tỹ ón kỹ ti vĩ mẽ sór vễ, ag tỹ ti vĩ to ti se jé. Hã ra Jesus tóg pãnħ ke kỹ nĩ kỹ ga kri rán mũ, ã nĩgẽ tỹ. Vĩ tũ tóg nĩ.

7 Hã ra ag tóg ti tovãñh sór tũ nĩ. Kỹ tóg vãhã ag ki ěvãñh kỹ ag mũ: “ãjag kãmĩ ù hỹn Topẽ vĩ mranħ ja tũ nĩ ver,” he mũ. “Ěn hỹn fi pin vén ke mũ, pó tỹ,” he tóg mũ.

8 Kỹ tóg pãnħ ke mãn kỹ ga kri rán mãn mũ.

9 Kỹ ti vĩ tóg ag mũ e tĩ. Ag kar vĩ ãjag tỹ Topẽ vĩ mranħ ja ěn mũ ěkrég mũ sir, hã kỹ ag tóg mũ mũ sir. Ûn si há ag vĩ mũ vén mũ, kar kỹ vẽnħ kar ag. Komẽr hã ag tóg mũ kãn mũ. Vãhã Jesus vĩ ã pir mũ nĩ, fi mré. Fi hã vĩ tá jẽ nĩ, ti mré.

10 Kỹ tóg fi ki ěvãñh kỹ fi mũ: “ag hẽ ra kagáv, ù tỹ ã kato vĩ mũ ag?” he mũ. “Ag

mỹ ã vóg kónãñ tũ?” he tóg. Ag mũ kar kỹ tóg fi mũ ke mũ.

11 Hã ra fi tóg ti mũ: “hỹ,” he mũ. Kỹ tóg fi mũ: “kỹ inh hỹn ã vóg kónãñ ke tũ nĩ gé,” he mũ. “Ha tĩg, jatun mũ. Hã ra Topẽ vĩ mranħ mãn sór tũg nĩ,” he tóg, Jesus ti. Ûn tỹtã kórég ěn fi vóg kónãñ sór ja tũ ti nĩ, Jesus ti.

Jesus tỹ jẽngrẽ ri ke nĩ

12 Kỹ Jesus tóg Topẽ jo ãn krẽm nĩ kỹ vẽnħ kar kanhrãn mãn mũ. “Jẽngrẽ ri ke inh nĩ,” he tóg. “ãjag tỹ inh mré mũn kỹ ãjag tóg kuty mũ mũ tũ nĩgtĩ. Jẽngrẽ mũ ãjag tóg mũgtĩ, kurã mũ. ãjag tỹ vẽnħ jykre tãg han ke to ken hã vễ,” he tóg.

13 Hã ra Fariseu ag tóg ti vĩ kafãn mũ, kỹ ag tóg ti mũ: “vẽnħ kãmén ã tóg mũ ha,” he mũ. “Ěg tỹ vẽnħ kãmén kỹ ěg tóg ón kỹ vĩ tĩ,” he ag tóg mũ sir.

14 Hã ra Jesus tóg ag mũ: “hỹ,” he mũ. “Vẽnħ kãmén inh tĩ, hã ra sóg ki hã tó tĩ,” he tóg mũ. “Isỹ hẽ tá kãtĩg mũ ěn ki kanhró inh nĩ, isỹ hẽ ra tĩg ke mũ ti ke gé,” he tóg. “Hã ra ãjag tóg inh ki kãtĩg nỹtĩ, isỹ hẽ tá kãtĩg mũn ki, isỹ hẽ ra tĩg ken ki ke gé. Ěprã ke ãjag nỹtĩ.

15 Kãnħmar ãjag tóg ù to: “jykre kórég ti nĩ,” henħ ke mũ. ãjag jãvo sóg vẽnħ kar jykre to nẽn ù tó tũ nĩ ver.

16 Isỹ hã ra ù jykre to nẽn ù tó sór mũ ra sóg tó há han ke mũ vễ. Inh pi(jé) inh pir mũ nẽn ù to jykrén tĩ. Û tỹ inh jẽnẽg mũ vĩ inh mré nẽn ù kar to jykrén tĩ.

17 Kỹ ùn régre ag tỹ vẽnħ vĩ pir han kỹ tóg ãjag mũ tỹ ki hã ke nĩ. Hã kỹ tóg rán kỹ nĩ, Topẽ vĩ tỹ rán kỹ nĩ ki.

18 Hã kỹ sóg vẽnħ kãmén mũ, hã ra inh panħ tóg, ù tỹ inh jẽnẽg mũ tóg inh kãmén mũ gé. Régre ěg nỹtĩ, ù tỹ inh kãmén mũ ti,” he tóg, Jesus ti.

19 Kỹ ag tóg ti mũ: “hỹn, ã panħ ti?” he mũ. Kỹ Jesus tóg ag mũ: “ãjag pi(jé) inh ki kanhró nỹtĩ,” he mũ. “Hã kỹ ãjag tóg inh panħ ki kãtĩg nỹtĩ gé,” he tóg. “ãjag tỹ inh ki kanhró nỹtĩ ra ãjag tóg inh panħ ki kanhró nỹtĩnh mũ vễ gé,” he tóg, Jesus ti.

20 Ti tỹ ag mũ vẽnħ kãmén hã vễ. Topẽ jo ãn krẽm nĩ kỹ tóg ag mũ vẽnħ kãmén mũ, ti tỹ jãnħamy vin jafã rã hã nĩn kỹ. Kỹ pã'i ag tóg

ti se sór mũ, hã ra ag tóg ti kãgmĩg tũ nĩgtĩ, ag tỹ ti kamẽg kỹ. Ti ter ke kurã vỹ jun ja tũ nĩ ver, hã kỹ ag tóg ti tỹ hẽ ri ke tũ nĩ ver.

Jesus tỹ hẽn ra tĩg ke

²¹ Kỹ tóg ag mũ kãmén mãn mũ. “Tĩg jé sóg ke mũ, kỹ ãjag tóg inh ve sór ke mũ, hã ra ãjag tóg inh venh ke tũ nĩ. Inh vég tũ ki ãjag tóg kãgter ke mũ, kỹ ãjag tỹ Topẽ vỹ mranh ja ên vỹ ãjag kãkã nĩ nĩ. ãjag pi(jé) isỹ hẽn ra tĩg ke mũ ên ki kanhró nỹtĩ. Isỹ hẽn ra tĩg ke mũ ên ki kagtĩg ãjag nỹtĩ,” he tóg, Jesus ti.

²² Kỹ ag tóg jagnẽ mũ: “ti mũ hẽn ri ke mũn vėsén sór mũ, hã kỹn mũ: “ãjag pi(jé) isỹ hẽn ra tĩg ke mũ ên ki kanhró nỹtĩ,” he mũ?” he ag tóg, Jesus to.

²³ Hã ra Jesus tóg ag mũ: “ẽprã ke vỹ tỹ ãjag nỹtĩ,” he mũ. “Jãvo sóg tỹ kanhkã tá ke nĩ. Ga tag ki ke tỹ ãjag nỹtĩ, jãvo inh pi(jé) tỹ ga tag ki ke nĩ’.

²⁴ Hã kỹ sóg ãjag mũ: “kãgter jé ãjag tóg ke mũ, kỹ ãjag tỹ Topẽ vỹ mranh ja ên vỹ ãjag kãkã nĩ nĩ,” he ja nĩ. Ha vé, ãjag tỹ inh ki ge sór tũ nĩn kỹ tóg ãjag kãkã nĩnh ke mũ, ãjag tỹ Topẽ vỹ mranh ja ên ti. “Û ên vỹ tỹ inh nĩ,” he ja inh nĩ ãjag mũ. Tag to: hỹ, hemnĩ,” he tóg, Jesus ti.

²⁵ Kỹ ag tóg ti mũ: “tỹ ã ù nĩ?” he mũ. Kỹ Jesus tóg: “vãsỹ sóg ãjag mũ tó huri, isỹ ãjag mré vēmén vén kỹ,” he mũ. “Ãjag mũ sóg vẽn kãmén tĩgtĩ.

²⁶ Hã ra sóg ãjag mũ tó kãn ja tũ nĩ ver, sỹ ãjag mũ vỹ kónãn ke vỹ kã nĩ gé ver. Hã ra sóg ù tỹ inh jẽnẽg mũ ên vỹ hã tó tĩ, ti tỹ inh mũ tó ja kar ên ti. Ki hã tóg tó tĩ, ù tỹ inh jẽnẽg mũ ti,” he tóg, Jesus ti.

²⁷ Hã ra tóg ag tỹ to jykrén tũ nĩgtĩ, ti tỹ ag mũ ã panh tó mũ ra.

²⁸ Kỹ Jesus tóg ag mũ ke mãn mũ. “Ãjag tỹ ka to isa kỹ, kỹ ãjag tóg inh ki kanhrãn ke mũ,” he tóg. “Tỹ sóg ẽprã ke fi kósin nĩ. Kurã ên kã ãjag tóg ki kanhró nỹtĩnh ke mũ, isỹ tỹ ùn ên nĩ ti. Inh pi(jé) vėsóg ki nén ù to jykrén tĩ. Inh panh tỹ inh mũ nén tó mũ ên hã tó sóg tĩ. Hã ki kanhró ãjag nỹtĩnh ke mũ, kurã ên kã, ãjag tỹ ka to isa kỹ.

²⁹ Kỹ ù tỹ inh jẽnẽg mũ vỹ inh mré nĩ nĩ. Ti mũ nén há nĩ ên hã han sóg tĩ, hã kỹ tóg inh mré nĩ nĩ,” he tóg, Jesus ti.

³⁰ Ag tỹ ti vỹ tag mẽ kỹ ùn e ag vỹ ti ki ge mũ, kurã ên kã.

Jesus tỹ ẽg tar han ke

³¹ Kỹ Jesus tóg ù tỹ ti ki ge kỹ nỹtĩ ag kanhrãn mũ. “Inh vỹ tovãnh tũg nĩ,” he tóg. “Kỹ ãjag tóg tỹ inh mré ke pẽ nỹtĩ.

³² Kỹ ãjag tóg Topẽ vỹ pẽ ki kanhró nỹtĩnh mũ. Topẽ vỹ pẽ ki kanhró tugrĩn ãjag tóg patrão kórég ve mãn ke tũ nĩ,” he tóg.

³³ Kỹ ag tóg ti mũ: “Abraão krẽ'krẽ vỹ tỹ ẽg nỹtĩ,” he mũ. “Ëg pi(jé) tỹ ù camarada nỹtĩ, ùri, vãsỹ ke gé. Ne to ke nẽ, hã vỹ: patrão kórég ve mãn ke tũ ãjag nĩ, he mũ tag ti?” he ag tóg mũ, Jesus mũ.

³⁴ Hã ra Jesus tóg ag mũ: “ki hã sóg ke mũ, hã kỹ sóg tó mũ,” he mũ. “Ãjag tỹ Topẽ vỹ mranh kỹ ãjag tóg tỹ ti vỹ mranh jafã nỹtĩ, kỹ tóg ẽg tỹ ùn kórég tỹ patrão vég mũ ri ke nĩ.

³⁵ Ti camarada ag pi(jé) ti ìn krẽm ẽmã nỹtĩgtĩ. Ti kósin hã vỹ ti ìn krẽm nĩgtĩ jãvo.

³⁶ Kỹ, Topẽ kósin tỹ ãjag tỹ Topẽ krẽ han kỹ ãjag tóg patrão kórég ve mãn ke tũ nĩ ha.

³⁷ Abraão krẽ vỹ tỹ ãjag nỹtĩ. Ki kanhró inh nĩ. Hã ra ãjag tóg isén sór mũ, ãjag tỹ inh vỹ to há tũ nỹtĩn kỹ.

³⁸ Inh panh tỹ inh mũ nén tó mũ ên hã tó sóg tĩ. Inh jãvo ãjag tóg ãjag panh tỹ ãjag mũ nén tó mũ ên hã tó tĩ,” he tóg, Jesus ti.

³⁹ Kỹ ag tóg ti mũ: “hỹ, Abraão vỹ tỹ ẽg panh nĩ,” he mũ.

Kỹ Jesus tóg ag mũ: “ãjag tỹ tỹ Abraão krẽ nỹtĩn kỹ ti jykre han nĩ ge,” he mũ.

⁴⁰ “Hã ra ãjag tóg isén sór mũ. ãjag mũ sóg Topẽ vỹ pẽ tó ja nĩ, Topẽ tỹ inh mũ nén tó mũ ên ti, hã ra ãjag tóg isén sór mũ. Abraão vỹ tag han ja tũ nĩ.

⁴¹ Vyrmỹ ãjag panh ù tũ hã han ãjag tóg tĩ,” he tóg.

Kỹ ag tóg Jesus mũ: “panh ẽg nỹtĩ, hã vỹ: Topẽ, he mũ. Ëg pi(jé) panh tũ nỹtĩ,” he ag tóg mũ.

⁴² Hã ra Jesus tóg ag mũ: “Topẽ tỹ tỹ ãjag panh nĩ ra ãjag tóg iso há nỹtĩnh mũ vỹ,” he mũ. “Inh panh tá sóg kãtére, hã kỹ sóg ãjag mré nĩ nĩ. Inh pi(jé) vėsóg ki nén to jykrén kỹ kãtére mũ. Ti hã vỹ inh jẽnẽ.

⁴³ Hã ra ãjag tóg inh vỹ ki kagtĩg nỹtĩ. Mẽ sór tũ ãjag nỹtĩ, hã kỹ ãjag tóg ki kagtĩg nỹtĩ.

44 Japo krê vỹ tỹ ãjag nỹtĩ, kỹ ãjag tóg ti tỹ nén to jykrén mũ ên han tĩ. Topẽ tỹ êprã ke ag han ên kã tóg ag kãgtén sór tĩgtĩ, Japo ti. Vãsỹ ti jykre vễ, kỹ tóg ùri tỹ ti jykre nĩ gé ver. Ti pi(jé) ki hã tó tĩ'. Ki hã tó to ti kórég pẽ nĩ, Japo ti. Vẻnh ó vỹ tỹ ti tũ pẽ nĩ. Ón mẽ ti nĩgtĩ, vẻnh ón né vễ. Ti hã vỹ tỹ ùn ón mũ ag panh kar nĩ.

45 Ti jãvo sóg ki hã tó tĩ. Hã ra ãjag tóg inh vỹ kri nĩm sór tũ nĩgtĩ.

46 Inh hỹ ne ki Topẽ vỹ mranh? Ha inh mỹ tó. Mranh ja tũ sóg nĩ. Hã ra sóg ãjag mỹ Topẽ vỹ pẽ tó tĩ. ãjag hẽ ri ken kỹ inh vỹ kri fi sór tũ nĩ?

47 Topẽ krê ag vỹ Topẽ vỹ mễg tĩ. ãjag pi(jé) inh vỹ jẻmẻ sór tĩ', ãjag tỹ tỹ Topẽ krẻ tũ nỹtĩn kỹ," he tóg, Jesus ti, ag mỹ.

Jesus tỹ Abraão kãfór nĩ

48 Kỹ Judeu ag tóg ti mỹ: "Samaria tá ke ri ke ã tóg nĩ, ã tỹ ki kagtĩg nĩn kỹ, kỹ ã jagrẻ kórég nĩ gé," he mũ.

49 Hã ra Jesus tóg ag mỹ: "inh pi(jé) jagrẻ kórég nĩ'," he mũ. "Inh panh to sóg: ùn mág vỹ tỹ ti nĩ, he tĩ. Hã ra ãjag tóg iso é he tĩ.

50 Inh pi(jé) vẻsỹ ùn mág han sór mũ'. ù tỹ isỹ ùn mág han ke mũ vỹ nĩ nĩ, ên vỹ vẻnh kar jykre tugnỹm ke mũ.

51 Ki hã sóg ke mũ, hã kỹ sóg tó mũ, ha mẽ. ãjag tỹ inh vỹ kri fi kỹ ãjag ter ke tũ pẽ nĩ," he tóg, Jesus ti.

52 Kỹ Judeu ag tóg ti mỹ: "jagrẻ kórég ã tóg nĩ," he mũ. "Vãhã tóg ve há tĩ, ã jagrẻ kórég ti," he ag tóg mũ ti mỹ. "Abraão vỹ ter, kỹ Topẽ vỹ tó tĩ ag kar vỹ kãgter. Hã ra ã tóg ón kỹ: "ãjag tỹ inh vỹ kri nĩm kỹ ãjag kãgter ke tũ pẽ nĩ," he mũ.

53 ã mỹ vẻsỹ ẻg jóg'jóg ve tỹ Abraão kãfór han sór mũ', ã tỹ ẻg mỹ: kãgter ke tũ ãjag nĩ, hen kỹ? Ter ja ti nĩ, Abraão ti, kỹ Topẽ vỹ tó tĩ ag kar vỹ kãgter kãn gé. Vẻsỹ ùn mág han kỹ nĩ ve ã tóg nĩ," he ag tóg, Jesus mỹ, Judeu ag.

54 Kỹ Jesus tóg ag mỹ: "isỹ vẻsỹ ùn mág han kỹ sóg ón kỹ ke mũ ve nĩ," he mũ. "Hã ra inh panh hã vỹ isỹ ùn mág han ke mũ, ãjag tỹ ù to: ẻg jóg mág, he mũ ên ti.

55 Hã ra ãjag tóg ti ki kagtĩg nỹtĩ, ãjag jãvo sóg ti ki kanhró nĩ. Isỹ ãjag mỹ: "ti ki kagtĩg inh nĩ," he mũ ra sóg ãjag ón tag ri ke han

mũ vễ, hã ra sóg ti ki kanhró nĩ, kỹ sóg ti vỹ ki króm tĩ gé.

56 ãjag jóg'jóg ve tỹ Abraão vỹ inh kurã ve sór ja nĩ, kỹ tóg kejẻn vé, kỹ tóg ti mỹ sér pẽ tĩ, ti tỹ inh kurã ve kỹ," he tóg, Jesus ti.

57 Kỹ Judeu ag tóg ti mỹ: "50 (ke) anos han tũ ã nĩ ver, hã ra ã tóg: "Abraão ve inh," he mũ. Vỹ vẻnhmỹ han ã tóg," he ag tóg mũ, Jesus mỹ.

58 Hã ra Jesus tóg ag mỹ: "ki hã sóg ke mũ, hã kỹ sóg tó mũ, ha mẽ," he mũ. "Abraão mur tũ ra sóg nĩ nĩ," he tóg, Jesus ti.

59 Kỹ ag tóg jũgũ mũ, ti tỹ vẻso: "Topẽ ri ke inh nĩ," hen kỹ. Hã kỹ ag tóg pó mãn kỹ ti pin sór mũ. Hã ra Jesus tóg Topẽ jo ãn kãtã kãkutẻ mũ sir, kỹ tóg tĩ mũ, vẻnh pẻju jẻ.

9

Jesus tỹ ùn kyvó tỹ há' he

1 Kejẻn Jesus tóg tĩg kỹ ùn kyvó vẻg mũ. ã mur mũn kã tóg kyvó nĩ sir.

2 Kỹ ti mrẻ mũ tĩ ag tóg ti mrẻ ti vẻg mũ gé. Kỹ ag tóg Jesus mỹ: "ti han mũ fag hỹn Topẽ vỹ mranh'," he mũ, "ha kỹ tóg kyvó nĩ'," he ag tóg. "Ti tỹ vẻsóg ki Topẽ vỹ mranh kỹn mỹ kyvó nĩ vó?" he ag tóg mũ.

3 Kỹ Jesus tóg ag mỹ: "ti tỹ Topẽ vỹ mranh to ke pijẻ'," he mũ. "Ti han mũ fag tỹ Topẽ vỹ mranh to ke pijẻ'," he tóg. "Topẽ tỹ vẻnh kar mỹ ã tỹ nén han sór mũ ên ven sór vễ, ti ki.

4 Isỹ ù tỹ inh jẻnẻg mũ ên tỹ inh mỹ nén tó mũ ên han sór vễ. Ver tóg inh mỹ kurã nĩ, sỹ rãnrãj jẻ. Kãnhmar tóg kuty nỹnh mũ, kỹ ù tóg rãnrãj mãn ke tũ nĩ, iser ke kurã ên kã," he tóg.

5 "Ver sóg ãjag mrẻ tĩg mũ, kỹ sóg ãjag mỹ jẻngrẻ ri ke nĩ ver," he tóg, Jesus ti.

6 Tag tó kar kỹ tóg sug mũ, ga kri, kỹ tóg órẻ sĩ han mũ. Órẻ ên tỹ tóg ùn kyvó kanẻ to tĩn mũ.

7 Kỹ tóg ti mỹ: "ha tĩg, goj tỹ Siloẻ ki vẻnh kype jẻ," he mũ. Goj tỹ Siloẻ to ke hã vỹ: "ũ tỹ inh jẻnẻ ja," he mũ, ẻg vỹ ki. Kỹ tóg tĩ mũ, ùn kyvó ti. Kỹ tóg tá kãtĩg kỹ ẻvãnh há han tĩ nĩ sir.

8 Ti tỹ ẻvãnh há han kỹ tóg ti rã hã nỹtĩ kar ag mỹ e tĩ. Vẻnh kar vỹ ti ki kanhró nỹtĩ, vẻnh kar mỹ tóg: "inh mỹ nén ù nĩm," he tĩ ja nĩgtĩ. Kỹ ag tóg, ag tỹ ti ẻvãnh há tag ve kỹ

(ag tóg) ti to: “ũ tỹ ẽg mỹ: inh mỹ nén ũ nĩm, he tĩ ẽn hã tũ mỹ?” he mũ.

⁹ Kĩ ag kãmĩ ũ tóg: “ti hã vễ,” he mũ. Hã ra ũ ag tóg: “ẽn ri ke nĩ ve ti nĩ, hã ra tóg ẽg mỹ tỹ hã tũ nĩ,” he mũ gé. Hã ra tóg vễso: “inh hã vễ,” he mũ.

¹⁰ Kĩ ag tóg ti mỹ: “kỹ ã hẽ ri ké, ã tỹ ẽvãnh há' he jé?” he mũ.

¹¹ Kĩ tóg ag mỹ: “ag tỹ ũ to: Jesus, he mũ ẽn vỹ óré han, kỹ tóg inh kanẽ to tĩn, kỹ tóg inh mỹ: “goj tỹ Siloé ra tĩg nĩ, tá vễnh kupemni,” hé. Kĩ sóg vyr. Vễnh kupe sóg, kỹ sóg ẽvãnh há' he mũ sir,” he tóg, ũn kyvó ja ti.

¹² Kĩ ag tóg ti mỹ: “ti hẽ kã jẽ?” he mũ. Hã ra tóg ag mỹ: “ha'?” he mũ.

Fariseu ag tỹ ũn kyvó ja ki jẽmẽ

¹³ Kĩ ag tóg Fariseu ag mỹ ti pére mũ mũ, ũn kyvó ja ẽn ti.

¹⁴ Hã ra tóg tỹ vễnhkán ke kurã nĩ. Ẽn kã Jesus tóg óré han kỹ ti tỹ há' hé.

¹⁵ Kĩ Fariseu ag tóg ti ki jẽmẽ sór mũ gé. “Ã hẽ ri ké, ã tỹ ẽvãnh há' he jé?” he ag tóg mũ gé. Kĩ tóg ag mỹ: “óré tỹ tóg inh kanẽ to tĩn, kỹ sóg vễnh kupenh vyr, kỹ sóg ẽvãnh há' he mũ sir,” he mũ, ag mỹ, ũn kyvó ja ti.

¹⁶ Kĩ Fariseu ũ ag tóg Jesus to: “Topẽ pi(jé) ti jẽnẽ,” he mũ. “Vễnhkán ke kurã ki tóg vễnhkán vãnh nĩgtĩ, kỹ tóg kórég nĩ,” he ag tóg mũ, Jesus to, Fariseu ũ ag. Hã ra ũ ag tóg ti to: “hã ra tóg nén ũ há távĩ han,” he mũ gé. “Ti kórég nĩ ran hỹn tag han ki kagtĩg nĩnh mũ vễ,” he ag tóg, Fariseu ũ ag. Hã kỹ ag vễnh kãpãm kỹ nỹtĩ.

¹⁷ Kĩ ag tóg ũn kyvó ja ẽn ki jẽmẽ mãn mũ. “Ti mỹ tỹ ũn há nĩ!, ũn kórég mỹ vó?” he ag tóg mũ. “Ã tỹ tóg há' hé mỹr,” he ag tóg.

Kỹ tóg ag mỹ: “inh mỹ tóg tỹ Topẽ vĩ tó jafã nĩ,” he mũ, ũn kyvó ja ti.

¹⁸ Hã ra ag tóg ti vĩ kri nĩm sór tũ nĩ. “Ti mỹ kyvó ja nĩ vỹ?” he ag tóg mũ. Kĩ ag tóg ti han mũ fag jé prẽr mũ.

¹⁹ Kĩ ag tóg fag mỹ: “ãjag kósin hã mỹ?” he mũ. “Ti mỹ ã mur mũn hã kã kyvó ja nĩ? Kỹn hỹn hẽ ri ké, ti tỹ ũri ẽvãnh há nĩn jé?” he ag tóg mũ, ti han mũ fag mỹ.

²⁰ Kĩ fag tóg: “hỹ, ẽg kósin hã vễ,” he mũ. “Ã mur mũn hã kã tóg kyvó ja nĩ.

²¹ Hã ra tóg ũri ẽvãnh há nĩ. Hẽ ri ken kỹ'? Ha'? ũ nỹ ti han'? Ha ti ki jẽmẽmni. Sanh há ti nĩ ha. ãjag mỹ ti tónh mũ,” he fag tóg, ti han mũ fag.

²² Hã ra fag tóg pã'i ag kamẽg mũ, hã kỹ fag tóg: “ha ti ki jẽmẽmni,” he mũ. Pã'i ag vĩ tag tó ja nĩ, Jesus to: “ãjag kãmĩ ũ tỹ ti to: “Cristo vĩ tỹ ti nĩ,” hen kỹ ẽg ti kutẽm ke mũ,” he mũ, “ti tỹ tỹ ẽg mré ke tũ nĩ jé, ti tỹ ẽg mré vễnhmãn tũ nĩ jé, ẽg vễnh kanhrãn jafã krẽm,” he ja ag tóg nĩgtĩ.

²³ Hã kỹ ũn kyvó ja ẽn han mũ fag vĩ Jesus to nén ũ tó sór tũ nĩ, hã kỹ fag tóg pã'i ag mỹ: “sanh há ti nĩ ha, ãjag mỹ ti tónh mũ,” he mũ, fag kósin kyvó ja ẽn to.

²⁴ Kĩ ag tóg ũn kyvó ja ẽn jé prẽr mãn mũ. Kĩ ag tóg ti mỹ: “ker ón hẽ', Topẽ vĩ ã vĩ mẽg mũ,” he mũ. “Ũ tỹ ã tỹ há' he mũ ẽn vĩ kórég nĩ, Topẽ vĩ mranh ti tĩ,” he ag tóg mũ ti mỹ.

²⁵ Kĩ tóg: “mẽ',” he mũ. “Ti mỹ Topẽ vĩ mranh tĩ'? Sỹ ki kagtĩg tóg tĩ. Nén ũ pir hã ki kanhró sóg nĩ. Kyvó inh vễ vễ, hã ra sóg ẽvãnh há nĩ ha,” he tóg, ũn kyvó ja ẽn ti.

²⁶ Kĩ ag tóg ti mỹ: “ti hẽ ri ké, ã tỹ há' he jé?” he mãn mũ.

²⁷ Hã ra tóg ag mỹ: “ãjag mỹ inh hur tó, hã ra ãjag tóg mẽ sór tũ nĩ,” he mũ. “ãjag tỹ ne jé mẽ mãn sór nẽ? ãjag mỹ ti mré mũ sór mũ gé?” he tóg.

²⁸ Kĩ ag tóg ti nyg mũ. “Ã hã vĩ tỹ ti mré ke nĩ,” he ag tóg mũ. “Jãvo ẽg tóg tỹ Moisés mré ke nỹtĩ,” he ag tóg, pã'i ag, ũn kyvó ja ẽn mỹ.

²⁹ “Topẽ vĩ Moisés mré vễmẽn ja nĩ, tag ki kanhró ẽg tóg nỹtĩ. Hã ra ẽg pi(jé) ẽn ki kanhró nỹtĩ'. Ti hỹn tỹ hẽ tá ke nĩ'?” he ag tóg, pã'i ag.

³⁰ Kĩ ũn kyvó ja ẽn tóg ag mỹ: “mẽ',” he mãn mũ. “ãjag mỹ ti ki kagtĩg nỹtĩ, ti tỹ tỹ hẽ tá ke nĩn ki? Isỹ tóg há' hé mỹr, inh kanẽ tỹ.

³¹ Hã ra Topẽ tóg ẽg vĩ mẽg tũ nĩgtĩ, ẽg tỹ tỹ ti vĩ mranh jafã nỹtĩn kỹ. ũ tỹ Topẽ kamẽg mũ ẽn vĩ hã mẽg ti tĩ. ũ tỹ ti vĩ ki króm mũ ẽn vĩ hã mẽg ti tĩ, Topẽ ti.

³² Inh mur mũ kã inh kyvó nĩ ja nĩ. ũ tỹ ge tỹ há' he mũ tag ve ja tũ inh nĩ ver. Hã ra tóg isỹ há' hé.

³³ Ti tỹ Topẽ tá kãtĩg tũ ra tóg nén ù há han ki kagtĩg nĩ vễ,” he tóg, ùn kyvó ja ti, pã'i ag mỹ.

³⁴ Hã ra ag tóg ti mỹ: “Topẽ vĩ mranh kỹ ã tóg mur, hã ra ã tóg ẽg kanhrãn sór mũ,” he mũ. Kỹ ag tóg ti kutêm mũ, vễnh kanhrãn jafã krêm.

Ủn kyvó to comparação

³⁵ Hã ra Jesus tóg mễg mũ, ag tỹ ti kutêm ja ti. Kỹ tóg ti venh tĩ mũ. Kỹ tóg ti mỹ: “ã mỹ ẽprã ke fi kósin ẽn ki rã sór tũ?” he mũ.

³⁶ Kỹ tóg Jesus mỹ: “kỹ ùn nễ ge?” he mũ. “Sỹ ti ki rã sór vễ,” he tóg.

³⁷ Kỹ Jesus tóg ti mỹ: “ti ve ã huri,” he mũ. “Ủ tỹ ã mré vễmén jễ mũ hã vỹ tỹ ti nĩ, inh hã vỹ tỹ ti nĩ,” he tóg.

³⁸ Kỹ ùn kyvó ja tóg ti mỹ: “Senhor,” he mũ. “Ã ki rã kỹ inh jễ nĩ,” he tóg. Kỹ tóg ti krêm mũg ke mũ, Jesus krêm, ti mỹ: “Topẽ kósin vỹ tỹ ã nĩ,” he jé.

³⁹ Kỹ Jesus tóg ti mỹ: “ga tag ki sóg jun, sỹ vễnh kar jykre tugnỹm jé,” he mũ. “Ủn kyvó ag tỹ ẽvãnh há han jé sóg ke mũ. Ag tỹ iso jykrén há han ke to ken hã vễ. Kỹ sóg ù tỹ ve há han mũ ag kyvó han ke mũ gé. Ag tỹ iso jykrén há han ki kagtĩg to ken hã vễ,” he tóg, Jesus ti, ùn kyvó ja ẽn mỹ.

⁴⁰ Hã ra Fariseu ù ag tóg ti vĩ mễg mũ. Kỹ ag tóg ti mỹ: “kỹ ẽg mỹ kyvó nỹtĩ gé?” he mũ.

⁴¹ Kỹ Jesus tóg ag mỹ: “ãjag tỹ: kyvó ẽg nỹtĩ, ki kagtĩg ẽg nỹtĩ,” he mũ hã ra Topẽ tóg ãjag to jũ tũ nĩ ver. Hã ra ãjag tóg vễso: “ẽvãnh há ẽg nỹtĩ, ki kanhró ẽg nỹtĩ,” he tĩ. Hã kỹ ãjag tỹ Topẽ vĩ mranh ja vỹ ãjag kãkã nĩ nĩ,” he tóg, Jesus ti, Fariseu ag mỹ.

10

Vễnh mễg tỹ carneiro to comparação

¹ Kỹ Jesus tóg ag mỹ vễnh kãmén mãn mũ. “Ki hã sóg ke mũ, hã kỹ sóg tó mũ,” he tóg. “Ẽg tỹ ẽg mễg tỹ carneiro jy ró han kỹ ẽg tóg ti jãnkã ra rã tĩ. Jãvo ù tóg kejẽn ró to tãpry kỹ pãte rã sór tĩ. Ti tỹ carneiro pēju sór vễ, hã kỹ tóg ró to tãpry kỹ pãte rã sór mũ.

² Ti jãvo ù tỹ carneiro ki rĩr tĩ vỹ jãnkã ra rã mũ.

³ Jãnkã ki rĩr tĩ ẽn vỹ ti mỹ ró nón tĩ, jãnkã ti. Kỹ tóg carneiro jygi tó kãn mũ sir. Ti vĩ ki kanhró fag nỹtĩ, ti mễg tỹ carneiro fag.

⁴ Kỹ tóg fag jo tĩ mũ, re ra. Kỹ tóg ã mễg fag jé prěr kãn mũ sir, kỹ fag tóg pa kãn mũ, ù tỹ carneiro ki rĩr tĩ ẽn mễg fag. Kỹ tóg fag jo tĩ mũ, kỹ fag tóg ti nón mũ mũ sir, ti mễg fag, fag tỹ ti vĩ ki kanhró nỹtĩn kỹ.

⁵ Fag pi(jé) ù nón mũnh ke mũ', fag tỹ ùn ki kagtĩg nón. Ủ jo fag vễnh pigjunh ke mũ, fag tỹ ùn ki kagtĩg ẽn jo. Fag pi(jé) ti vĩ ki kanhró nỹtĩ', hã kỹ fag tóg ti jo vễnh pigjunh ke mũ,” he tóg, Jesus ti.

⁶ Jesus tỹ ag mỹ comparação han vễ. Ti mỹ ẽg tóg vễnh mễg tỹ carneiro ri ke nỹtĩ, ẽg tỹ ti nón mũnh kỹ. Hã ra Fariseu ag tóg ti vĩ to jykrén tũ nỹtĩ.

Vễnh mễg to comparación ù

⁷ Hã ra Jesus tóg ag mỹ kãmén mãn mũ. “Ki hã sóg tó mũ, hã kỹ sóg ke mũ,” he tóg. “Carneiro jy ró jãnkã ri ke inh nĩ,” he tóg.

⁸ “Ủ tỹ inh jo kãmũ ag vỹ tỹ carneiro pigju(g) tĩ ag nỹtĩ ja nĩgtĩ, ùn jũ (ka)mễ ag nỹtĩ ja nĩgtĩ. Hã ra carneiro fag vỹ ag vĩ mễ ja tũ nỹtĩ.

⁹ Inh hã vỹ fag mỹ jãnkã ri ke nĩ. Ủ tỹ inh ki rã mũ vỹ kren ke mũ, kỹ tóg ti tỹ jãnkã ra rã ri ke nĩ. Kỹ tóg kãra rã tĩ, kar kỹ tóg kãkutẽ tĩ gé, ti tỹ vễjẽn ve kỹ.

¹⁰ Vễnh mễg tỹ carneiro pigju(g) tĩ ẽn vỹ carneiro pigju hã jé kãtĩ tĩ, fag kãgtén jé, fag kókén jé. Ti jãvo sóg fag ki rĩnrĩr há han hã jé kãtĩg, fag tỹ jagtar tũ nỹtĩ jé, fag mỹ sér tĩ jé,” he tóg, Jesus ti.

¹¹ “Ủ tỹ carneiro ki rĩr tĩ ri ke inh nĩ gé, ùn tỹ ki rĩr há ri ke inh nĩ. Ủ tỹ carneiro ki rĩr há han mũ vỹ ã mễg jagfy ter ke mũ, fag krenkren jé.

¹² Kỹ ù camarada vỹ tag ri ke tũ nĩgtĩ. Mĩg kamễg jé tóg ke mũ, kỹ tóg mĩg ve kỹ vễnhvãg tĩnh ke mũ, ã patrão mễg tovãnh kỹ, ti camarada ti. Kỹ mĩg vỹ fag kugmĩnh ke mũ, kỹ fag tóg vễnh kãpugpóv ke mũ gé, mĩg tugrĩn, carneiro fag. Ti camarada mễg pi(jé)', ti patrão mễg vễ, hã kỹ tóg fag jy nĩgãn há han tũ nĩ.

¹³ Mĩg ve kỹ tóg vễnh vãg tĩ mũ. Jãnkamy hã to tóg rãnrãj jễ nĩ, hã kỹ tóg mĩg kamễg mũ.

14 Ti jãvo sóg carneiro ki rĩr há han tĩ. Inh mễg ki kanhró sóg nĩ, kỹ fag tóg inh ki kanhró nỹtĩ gé.

15 Ri ke ti nĩ gé, inh panh mré. Inh ki kanhró tóg nĩ, kỹ sóg ti ki kanhró nĩ gé. Kỹ sóg inh mễg jagfỹ ter ke mũ.

16 Inh mễg ỹ vỹ nỹtĩgtĩ gé ver, inh mễg tỹ hẽ tá ke fag. Ājag povo kãmĩ ke pijé'. Ēn jé prẽr jé sóg ke mũ gé, kỹ fag tóg inh mré kãmũnh ke mũ gé. Inh vỹ mễ jé fag ke mũ gé. Inh mễg tỹ tag ki fag mré ke vỹ tỹ fag nỹtĩnh mũ. Fag kar jy sóg ró pir han ke mũ, inh mễg kar jy, kỹ sóg inh pir mỹ fag ki rĩr ke mũ," he tóg, Jesus ti.

17 "Inh panh vỹ iso há nĩ, isỹ inh mễg jagfỹ ter ken kỹ, kar kỹ sóg rĩr mãn ke mũ.

18 Iser sór tũ ra ỹ pi(jé) isén ke mũ vễ'. Hã ra sóg fag jagfỹ ter sór mũ. Iser sór kỹ sóg ter ke mũ. Inh rĩr mãn sór kỹ sóg rĩr mãn ke mũ gé, iser kar kỹ. Inh panh tỹ inh mỹ nén tó mũnh hã vễ," he tóg, Jesus ti.

19 Judeu ag tỹ ti vỹ tag mễ kỹ ag tóg vễnh kãpãm kỹ nỹtĩ mãn mũ gé.

20 Ỗn e tóg ti to: "jagrẽ kórég ti nĩ, krĩ vễnhmỹ ti nĩ, ti vỹ mễ sór tũg nĩ," he mũ.

21 Hã ra ỹ ag tóg: "ũn pi(jé) ã jagrẽ kórég hã ra vễnh vỹ há tó tĩ," he mũ. "Ỗn kyvó tỹ há' he ki kagfĩg tóg nĩ gé, ỹn jagrẽ kórég ti," he ag tóg mũ, Judeu ỹ ag, ỹ tỹ Jesus to há nỹtĩ ag.

Judeu ag tỹ Jesus tén mãn sór

22 Kejẽn tóg Judeu ag tỹ festa há' ỹ tá krỹg mũ. Vãsỹ ỹ tỹ Judeu ag kato vãsãnsãn mũ ag vỹ Topẽ jo ĩn kókén ja nĩgtĩ, hã ra Judeu ag tóg kejẽn ti ĩn han mãn. Ag tỹ ĩn han mãn to festa hã vễ sir. Prỹg kar ki ag tóg festa ĩn han tĩ. Kusãg mũ ĩn kã ke ja vễ, festa ĩn ti.

23 Hã ra Jesus tóg venh tũg ja nĩ, kỹ tóg Topẽ jo ĩn mĩ pasa ke tĩ nĩ, Salomão tỹ jãnkã ĩn tá.

24 Kỹ Judeu ag tóg ti venh kãmũ mũ, ag tỹ ón kỹ ti ki jẽmẽ jé. "Á hẽ ri ke kã ĩg mỹ vễnh kãmén há han ke mũ'?" he ag tóg mũ. "Á mỹ tỹ Cristo nĩ? Topẽ tỹ ĩg mỹ ỹn jẽnẽnh ke mũ ĩn mỹ tỹ ã nĩ'? Ha ĩg mỹ tó há han," he ag tóg mũ, ón kỹ.

25 Hã ra Jesus tóg ag mỹ: "ãjag mỹ sóg hur tó, hã ra ãjag tóg kri nĩm sór tũ nĩ," he mũ. "Milagre hyn han sóg tĩ gé, inh panh tỹ inh

mỹ nén tó ja ĩn. Ēn ve kỹ ãjag tóg inh ki kanhró nỹtĩnh mũ vễ.

26 Hã ra ãjag tóg kri fi sór tũ nỹtĩ. Ājag pi(jé) inh mễg tỹ carneiro ri ke nỹtĩ', hã kỹ ãjag tóg kri nĩm sór tũ nỹtĩ.

27 Inh mễg fag vỹ inh vỹ mễg tĩ, fag ki kanhró sóg nĩ, hã kỹ fag tóg inh mré mũgtĩ.

28 Fag jagfỹ sóg ter ke mũ, kỹ fag tóg kãgter ke tũ nĩ. Mĩg vỹ fag kugmĩnh ke tũ pẽ nĩ gé, isỹ fag jy nĩgãn kỹ.

29 Inh panh tỹ inh mỹ fag vin mũnh hã vễ, inh mễg fag. Hã ra tóg vễnh kar kãfór nĩ, inh panh ti. Kỹ ỹ pi(jé) inh panh tũ ag péju(g) tĩ', ti tỹ tỹ vễnh kar kri ke nĩn kỹ.

30 Inh panh mré sóg tỹ ỹn pir nĩ," he tóg, Jesus ti.

31 Ag tỹ ti vỹ tag mễ kỹ ag tóg pó tỹ hẽn ri ke mãng mũ sir, Judeu ag, ag tỹ tỹ ti pin kỹ ti tén jé.

32 Hã ra Jesus tóg ag mỹ: "nén ỹ há hã hyn han ja inh nĩ," he mũ. "Inh panh tỹ inh mỹ: "tag han ra," he ja ĩn hã han inh tĩ. Sỹ nén han ja tỹ hẽ nỹ hỹn ãjag mỹ kórég nĩ', hã kỹ ãjag tóg isén sór mũ?" he tóg.

33 Hã ra ag tóg ti mỹ: "ẽg pi(jé) nén ỹ há to ã tén sór mũ'," he mũ. "Ēprã ke vỹ tỹ ã nĩ, ĩg mré ke vỹ tỹ ã nĩ, hã ra ã tóg vễso: "Topẽ kósĩn vỹ tỹ inh nĩ," he mũ. Á tỹ Topẽ to vỹ kónãn hã vễ. Tag to ĩg tóg ã tén ke mũ, pó tỹ ã pin kỹ," he ag tóg mũ, Judeu ag.

34 Kỹ Jesus tóg ag mỹ: "Topẽ vỹ tỹ rán kỹ nĩ ki tag vỹ rán kỹ nĩ, ha mễ," he mũ. "Topẽ vỹ ĩprã ke ag to: "Topẽ ri ke ãjag nỹtĩ," he tĩ," he tóg, Topẽ vỹ rá ki.

35 Kỹ tóg ỹ tỹ ti vỹ mễg mũ ĩn ag mỹ: "Topẽ ri ke ãjag nỹtĩ," he ja nĩ, Topẽ ti. Hã ra tóg ón tũ nĩgtĩ, Topẽ ti.

36 Hã kỹ tóg vễnhmỹ tũ nĩ gé, sỹ ãjag mỹ: Topẽ kósĩn vỹ tỹ inh nĩ, hen kỹ. Inh panh vỹ inh kuprẽg, kỹ tóg inh jẽnẽ gé, isỹ ãjag tá jun jé. Topẽ to vỹ kónãn pijé', sỹ nén tó mũ tag ti.

37 Isỹ inh panh vỹ ki króm tũ nĩ ra tóg há nĩnh mũ vễ, ãjag tỹ inh vỹ kri nĩm sór tũ nỹtĩ ti.

38 Hã ra sóg ti vỹ ki króm tĩ. Kỹ inh vỹ tỹ ãjag mỹ kórég nĩn kỹ isỹ milagre hyn han mũ ĩn vemnĩ. Isỹ milagre hyn han mũ ki tóg ve há tĩ, isỹ inh panh ri ke nĩ ti, kỹ inh panh vỹ inh ri ke nĩ gé," he tóg, Jesus ti.

³⁹ Kÿ ag tóg ti vî to ti se sór mǎn mǔ sir, hǎ ra tóg kren mǎn mǔ gé.

⁴⁰ Kÿ tóg vĕnh péju kÿ tĩ mǔ, goj tÿ Jordão mǎra, Jesus ti. João vÿ ěn tá vĕnh kar kygpég jĕ ja nĩgtĩ, ti tÿ ag kygpe vén kÿ. Ěn ra tóg tĩ mǔ sir, Jesus ti, kÿ tóg tá nĩ nĩ, ǎ mré mǔ tĩ ag mré.

⁴¹ Kÿ ũ tÿ hĕn ri ke ag vÿ tá ti venh kǎmǔ mǔ. Jesus to ag tóg jagnĕ mÿ: “ha vé, João vÿ milagre han ja tũ nĩ,” he mǔ. “Hǎ ra tóg Jesus kǎmén. Tó há han ja tóg nĩ, João ti. Ki hǎ tóg tó ja nĩ, ti tÿ ěg mÿ Jesus to nĕn tó mǔ ti,” he ag tóg.

⁴² Kÿ tá ũ tÿ hĕn ri ke ag tóg ti ki ge mǔ sir.

11

Lázaro ter

¹ Kejĕn ũ tÿ Jesus to há ũ tóg kaga nÿ nĩ, cidade tÿ Betânia tá. Ũn kaga ěn jÿjÿn hǎ vÿ: Lázaro, he mǔ. Ti ve fi vÿ tÿ Maria fi nĩ, Marta fi ke gé. Betânia tá fag ěmǎ nÿtĩ gé.

² Maria ěn fi vÿ kar kÿ kejĕn Jesus pĕn kri nĕn ger há kujĕ, kÿ fi tóg fi gǎnh tÿ ti pĕn kykũg mǔ gé. Ěn fi mré pafa mǔ vÿ kaga nÿ.

³ Kÿ ti ve fag vÿ Jesus mÿ vĕnh vĩ jĕnĕg mǔ. Ti mÿ fag tóg: “ǎ tÿ ũ to há nĩ ěn vÿ kaga nÿ,” he mǔ.

⁴ Kÿ Jesus tóg mĕg mǔ. Hǎ ra tóg ǎ mré mǔ tĩ ag mÿ: “ti pi(jé) vĕnh kaga tag to ter ke mǔ!,” he mǔ. “Topĕ vÿ tÿ ũn mág nĩ. Tag vÿ vĕnh ven ke mǔ, ti kaga tugrĭn. Kÿ Topĕ kósin vÿ tÿ ũn mág nĩ gé. Tag vÿ vĕnh ven ke mǔ gé, ti kaga tugnĭn,” he tóg, Jesus ti.

⁵ Jesus vÿ Marta fi to há tǎvĩ nĩ, fi jǎvy fi to ke gé, Lázaro to ke gé.

⁶ Hǎ ra Jesus tóg, ti tÿ Lázaro kaga mĕg mǔ ra (tóg ver) ti venh tĩ tũ nĩ. ǎ tÿ hĕ tá nĩ ěn tá tóg ver kurǎ régre han.

⁷ Tag pǎte tóg ǎ mré mǔ tĩ ag mÿ: “mǔ nÿ, ga tÿ Judéia ra,” he mǔ.

⁸ Kÿ ag tóg ti mÿ: “Senhor,” he mǔ. “Ěg tÿ Judéia tá nÿtĭn kÿ Judeu ag tóg ǎ pin sór ja nĩ, pó tÿ. Ra tĩ tũg nĩ,” he ag tóg ti mÿ.

⁹ Hǎ ra Jesus tóg ag mÿ comparação han mǔ, ti ter ke kurǎ jun ja tũ to. “Kurǎ pir vÿ tÿ 12 (ke) hora ke nĩ,” he tóg. “Ěg tÿ kurǎ ěn ki hĕn ra mǔn kÿ ěg tóg krĭm kenh ke tũ nĩ, ěg tÿ kurǎ ve há han kÿ.

¹⁰ Ěg tÿ hǎ ra kuty ra hĕn ra mǔn kÿ ěg tóg krĭm ke tĩ, ěg tÿ kuty ki nĕn ũ vég tũ nĩn kÿ,” he tóg, Jesus ti.

¹¹ Kÿ tóg ag mÿ: “ũ tÿ ěg to há nĩ ěn, Lázaro ěn vÿ nÿr nÿ,” he mǔ. “Isÿ ti tÿ mrin ke han tĭg ke nĕ ha,” he tóg.

¹² Kÿ ag tóg ti mÿ: “ti nÿr nÿn kÿn kren ke mǔ,” he mǔ.

¹³ Hǎ ra Jesus tóg ti ter ja tó ja nĩ. Jó ag tóg: “ti nÿr vĕ, ti vĕnhkán vĕ,” he mǔ, ag tÿ ti vÿ mĕn kÿ.

¹⁴ Kÿ Jesus tóg jamǎ hár(a) ag mÿ kǎmén mǔ. “Lázaro vÿ ter huri,” he tóg.

¹⁵ “ǎjag tugrĭn tóg inh mÿ sér tĩ, isÿ ti ter ve ja tũ nĩn kÿ. ǎjag tÿ isÿ nĕn han mǔ ven kÿ ǎjag tóg inh ki ge há han ke mǔ. Mǔ jé ha, ti ve jé,” he tóg.

¹⁶ Kÿ Tomé he mǔ ěn, ag tÿ ũ to: “ũn vĕgnig mǔ,” he tĩ ěn vÿ ti mré mǔ tĩ ag mÿ: “mǔ jé ha, ti mré, ěg tÿ ti mré kǎgter jé,” he mǔ. Kÿ ag tóg mǔ mǔ sir.

Jesus tÿ vĕnh kar rĭnrĭr han ke

¹⁷ Kÿ ag tóg Betânia tá junjun mǔ. Hǎ ra Lázaro vÿ vĕnh kej tá nÿ nĩ. Kurǎ tÿ 4 (ke) vĕ sir, ag tÿ vĕnh kej tá ti fón ja kri.

¹⁸ Hǎ ra ag tóg Jerusalém kakó ki nÿtĩ, 3 quilômetros hÿn, ěmǎ tÿ Betânia ki.

¹⁹ Kÿ Judeu tÿ hĕn ri ke fag vÿ Marta fi venh kǎmǔ ja nĩ, Maria fi ke gé, fag mré vĕser kri fÿ jé.

²⁰ Kÿ Marta fi tóg mĕg mǔ, Jesus kǎtĭg ti. Kÿ fi tóg tim ke kÿ ti venh tĩ mǔ. Hǎ ra Maria fi tóg ǎ ĩn krĕm nĩ nĩ.

²¹ Kÿ Marta fi tóg Jesus kato tĕ mǔ. “Senhor,” he fi tóg. “ǎ tÿ kǎnĩ ra ti ter ke tũ nĩ vĕ,” he fi tóg.

²² “Hǎ ra sóg ǎ ki kanhró nĩ. ǎ tÿ Topĕ mÿ nĕn ũ to vĭn kÿ tóg ǎ mÿ nĭm ke mǔ, Topĕ ti,” he fi tóg, Marta fi, Jesus mÿ.

²³ Kÿ tóg fi mÿ: “ǎ mré ke vÿ rĭr mǎn ke mǔ,” he mǔ.

²⁴ “Hÿ,” he fi tóg. “Vĕnh kar rĭnrĭr mǎn ken kÿ tóg rĭr mǎn ke mǔ gé, ki kanhró sóg nĩ. Kurǎ tÿ ěgno ki ke vĕ,” he fi tóg.

²⁵ Hǎ ra Jesus tóg fi mÿ: “inh hǎ vÿ vĕnh kar rĭnrĭr mǎn han tĩ,” he mǔ. “Vĕnh kar rĭnrĭr mǔ vÿ tÿ inh nĩ,” he tóg. “Ũ tÿ inh ki rǎ mǔ ěn vÿ rĭr ke mǔ, ti ter kÿ nÿ (hǎ) ra.

26 Kÿ ùn rĩr jẽ tóg, ti tỹ inh ki rã kÿ (tóg) ter mãn ke tũ pẽ nĩ. ã mÿ inh vĩ tag kri fig mũ'?" he tóg, Jesus ti.

27 "Hÿ," he fi tóg. "Cristo vỹ tỹ ã nĩ, Topẽ kósın ti, ù tỹ ga kri jun ke mũ ěn ti. Tag vỹ inh mÿ tỹ hã nĩ," he fi tóg, Jesus ti mÿ.

28 Kÿ fi tóg tĩ mũ, fi jãvy fi jé prěr jé, Maria fi.

Jesus fÿ

Kÿ Marta fi tóg Maria fi tá jun kÿ fi mÿ: "ěg Senhor vỹ jun, kÿ tóg ã ve sór mũ," he mũ.

29 Fi tỹ tag mẽ kÿ fi tóg tim ke kÿ tĩ mũ, Jesus ve jé.

30 Hã ra tóg ěmã ěn ra rã ja tũ nĩ ver. Ver tóg tá nĩ nĩ, Marta fi tỹ hẽ tá ti mré vēmén ja ěn tá.

31 Kÿ Judeu fag vỹ vég mũ, Maria fi tỹ tim ke kÿ tĩg mũ ti. Fi mré kygfÿ jé fag kãmũ ja nĩ, Judeu fag. Fag tỹ fi tĩg ve kÿ fag tóg fi nón kãmũ mũ gé. "Fi hÿn ti kej ra tĩg sór mũ, tá fÿ jé," he fag tóg mũ, hã kÿ fag tóg fi nón kãmũ mũ.

32 Kÿ Maria fi tóg Jesus tá jun mũ. Fi tỹ ti ve kÿ fi tóg ti pẽn krēm mũg ke mũ. Ti mÿ fi tóg: "Senhor," he mũ. "ã tỹ kãnĩ ra ti ter ke tũ nĩ vẽ," he fi tóg mũ gé.

33 Kÿ Jesus tóg fi fÿ mũ vég mũ, kÿ tóg Judeu tỹ hẽn ri ke fag vég mũ gé, fi nón kãmũ mũ fag. Kÿ tóg ti mÿ e tãvĩ tĩ.

34 "Ti hẽ kã nÿ?" he tóg mũ sir. Kÿ ag tóg ti mÿ: "mũ nÿ, ti ve jé," he mũ.

35 Kÿ Jesus tóg fÿ mũ.

36 Kÿ Judeu ag tóg: "ha vé," he mũ. "Ti to há tãvĩ tóg nĩ, hã kÿ tóg fÿ mũ," he ag tóg.

37 Hã ra ag kãmĩ ù tóg: "ti tỹ há' he ja tũ tóg nĩ," he mũ. "Ûn kyvó kanẽ tỹ há' he ja tóg nĩ, ti tỹ hẽ ri ken kÿ ti tỹ há' he ja tũ nĩ nẽ, ti ter tũ nĩ jé? Ti mÿ tỹ hẽ ri ke tũ nĩ vỹ, ti kaga tỹ'?" he ag tóg, Jesus to.

Jesus tỹ Lázaro rĩn mãn

38 Kÿ tóg Jesus mÿ e tãvĩ tĩ. Kÿ tóg ti tỹ vẽn kej kÿ nÿ ěn ra tĩ mũ. Hã ra ti kej vỹ tỹ pãró nor nĩ, kÿ tóg pó mág tỹ nífénh kÿ nĩ, ti kej nor ti.

39 Kÿ Jesus tóg ag mÿ: "ha pó tag kunũ," he mũ. Kÿ Marta fi, ùn ter kÿ nÿ ěn ve fi vỹ ti mÿ: "Senhor," he mũ. "Ti hÿn ger nÿ ha.

Kurã tỹ 4 (ke) vẽ ha, ěg tỹ ti fón ja kri," he fi tóg mũ.

40 Hã ra Jesus tóg fi mÿ: "ã mÿ sóg: ã tỹ inh ki rã há han kÿ ã tóg venh ke mũ, Topẽ tỹ tỹ ùn mág nĩ ti, he ja nĩ," he mũ.

41 Kÿ ag tóg pó ěn kunũg mũ.

Kÿ Jesus tóg kanhkã ki ěvãnh mũ. Kÿ tóg: "panh'," he mũ. "Inh mÿ tóg há tĩ. Inh vĩ tag jēmẽg ã tóg mũ.

42 Jēmẽg ã tóg tĩ, inh vĩ ti, hã kÿ ã tóg sÿ ã mÿ vĩ tag jēmẽg mũ gé. Hã ra sóg jamã hár(a) ã mré vĩ mũ, ù tỹ ki nÿtĩ kar fag tỹ inh vĩ mẽ jé, fag tỹ inh ki ge jé, fag tỹ iso: "Topẽ tỹ ti jẽnẽ vẽ," he jé," he tóg, Jesus ti.

43 Tag tó kar kÿ tóg jamã hár(a) prěr mũ. "!.Lázaro, kuneg..!" he tóg.

44 Kÿ ùn ter ja ěn tóg kãtĩg mũ sir, ã kej kãki tóg kãkutẽ mũ sir, mÿr, ha mẽ. Ti pẽn vỹ sigse kÿ nÿtĩ, ti nĩgé ke gé, kÿ ti kakã vỹ pãg kÿ nĩ gé. Kÿ Jesus tóg ag mÿ: "ha ti kava," he mũ, "ti tĩg jé," he tóg. Kÿ ag tóg ti kyvãn kãn mũ sir.

45 Kÿ ù tỹ Maria fi mré kygfÿ jé kãmũ tỹ hẽn ri ke fag vỹ Jesus ki ge mũ sir, fag tỹ Jesus tỹ ti rĩn mãn mũ ěn ven kÿ.

46 Hã ra ù ag tóg Fariseu ag mÿ tónh mũ mũ, Jesus tỹ ti rĩn mãn ja ti.

Ag tỹ Jesus tén ke to jykrén

(Mt 26.1-5; Mc 14.1-2; Lc 22.1-2)

47 Kÿ Fariseu ag tóg mẽg mũ, Jesus tỹ Lázaro rĩn mãn ja ti. Topẽ tũ ki rĩr tĩ to pã'i ag vỹ mẽ kãn mũ gé. Kÿ ag tóg vẽnh jyvẽn tĩ kar ag jé prěr mũ. "ěg hÿn ti tỹ hẽ ri kenh ke mũ?" he ag tóg mũ, Jesus to. "Milagre tỹ hẽn ri ke hÿn han tóg tĩ.

48 ěg tỹ ti kato vãsãn tũ nĩn kÿ tóg ěg mÿ vẽnh kar tỹ ti ki genh ha mẽ tĩ. Kÿ ěg fóg tỹ Romano ag vỹ ěg kato vãsãnsãn ke mũ. Topẽ jo ĩn kókén jé ag tóg ke mũ, kÿ ag tóg ěg kãgtén kãn ke mũ gé, ěg fóg tỹ Romano ag, ha vemnĩ," he ag tóg, vẽnh jyvẽn tĩ ag.

49 Kÿ pã'i ag kãmĩ ù vỹ tỹ Caifás nĩ. Prÿg ěn kã tóg tỹ Topẽ tũ ki rĩr tĩ to pã'i mág nĩ, Caifás ti. ěn vỹ tóg ag mÿ: "to jykrén há han tũ ãjag nÿtĩ," he mũ.

50 "Tag to jykrén nĩ, ha mẽ. Ûn pir ter ke tóg kórég nĩ, hã ra tóg povo kãgter kãn kórég jakrēm nĩ. Kÿ ti hÿn ěg povo jagfÿ ter ke mũ, Jesus ti," he tóg, Caifás ti.

⁵¹ Hã ra tóg vėsóg ki tag to jykrén ja tũ nĩ. Prÿg ên ki tóg tÿ Topê tũ ki rĩr tĩ to pã'i mág nĩ, hã kÿ Topê kuprĩg vÿ ti krĩn ja nĩ, ti tÿ Jesus to: “êg povo jagfÿ tóg ter ke mũ,” he jé, Caifás ti.

⁵² Hã ra Judeu ag tãvĩ jagfÿ ke pijé'. Topê krê kar jagfÿ ke ja vê. Ti tÿ vênh kar tÿ ùn pir han sór ja vê, Jesus ti, hã jé tóg êg jagfÿ ter ja nĩ, ù tÿ povo kar kãmĩ ti ki genh ke mũ ag kar jagfÿ.

⁵³ Pã'i ag tÿ tÿ vémén kar kÿ ag tóg ti tén ke to jykrén mũ sir.

⁵⁴ Hã kÿ Jesus tóg vênh péju kÿ tĩ mũ, ga kórég ra, êmã tÿ Efraim ra. Judeu ag mũ tóg tÿg mǎn tũ nĩ sir. Efraim hã tá tóg nĩ nĩ ver, kÿ ti mré mũ tĩ ag vÿ ti mré tá nÿtĩ gé.

⁵⁵ Hã ra Judeu ag tÿ festa tÿ Páscoa há ù vÿ kakó tĩ ha. Kÿ ù tÿ hên ri ke ag tóg Jerusalém ra mũ mũ, Páscoa ên ve jé. To hã ag tóg ra mũ mũ, vênh jãnhkrigkrig jé, Judeu ag jykre ki.

⁵⁶ Tá ag tóg Jesus jãvãnh mũ, Topê jo ìn tá nÿtĩ kÿ. Kÿ ag tóg jagnê mÿ: “ti ã mÿ hÿn hê ri ke mũ?” he mũ. “Ti mÿ hÿn festa to kãtÿg ke mũ vÿ?” he ag tóg mũ, jagnê mÿ.

⁵⁷ Hã ra Topê tũ ki rĩr tĩ to pã'i ag vÿ vênh kar mÿ vênh vĩ jênê ja nĩgtĩ, Fariseu ag mré hã. “Ájag tÿ ti ve kÿ êg mÿ tónh kãmũmĩ,” he ja ag tóg nĩ, vênh kar mÿ. Ag tÿ ti se sór vê, hã kÿ ag tóg ke mũ.

12

Betânia tá (Mt 26.6-13; Mc 14.3-9)

¹ Festa tÿ Páscoa to hã ke vê sir, kurã tÿ 6 (ke) vÿ jun nÿ ha. Kÿ Jesus tóg Betânia ra tÿg mǎn mũ, Lázaro jamã ra, ùn rĩr mǎn mũ ên jamã ra.

² Tá fag tóg Jesus mÿ festa han mũ. Kÿ Marta fi tóg vėjên ki rĩr mũ. Lázaro vÿ Jesus mré nĩ nĩ, mesa to.

³ Kÿ Maria fi tóg nén ger há ma kãtĩ mũ, garrafa fór, ùn kaja e. Ên tÿ fi tóg Jesus pên kri kujêg mũ, kÿ fi tóg ã gãnh tÿ kykũg mũ, ti pên ti. Kÿ ger há ên tóg ìn kar ên kri rũm ke mũ.

⁴ Kÿ tóg Judas Iscariotes mÿ e tĩ, ù tÿ Jesus mré mũ ên ag kã ù tag mÿ, ù tÿ pã'i ag mÿ Jesus ven ke mũ tag mÿ. Fi tÿ ger há tÿ ti pên to tĩn kÿ tóg ti mÿ e tĩ, kÿ tóg fi to:

⁵ “fi tÿ ger há ên fón ke vê vê, jãnkamy tÿ hên ri ke to,” he mũ. “Fi tÿ ùn jagãgtar ag mÿ jãnkamy ên kã vênh kãpópãm jé vê vê,” he tóg mũ, Judas ti.

⁶ Hã ra tóg tag tó, ti tÿ Jesus mÿ jãnkamy ki rĩr kÿ. Hã ra tóg ti jãnkamy péju(g) tĩ. Hã kÿ tóg fi to tag tó ja nĩ, Judas ti. Ti tÿ ùn jagãgtar ag to jykrén ja pijé'. Ti tÿ jãnkamy ên mǎn sór ja vê.

⁷ Hã ra Jesus tóg ti mÿ: “fi to vĩ tũg,” he mũ. “Fi tÿ nén ger há ên nĩm han ja vê, fi tÿ iser jé ình kri kujên jé, isÿ ình kej kãkã nÿ jé. Ki hã fi tóg han ja nĩ.

⁸ Ùn jagãgtar ag vÿ ájag mré nÿtĩ, tũ' henh ke tũ ag tóg nÿtĩ. Ag jãvo sóg kãnhmar ájag mré nĩ mǎn ke tũ nĩ,” he tóg, Jesus ti.

Ag tÿ Lázaro tén sór

⁹ Kÿ Judeu tÿ hên ri ke ag vÿ mēg mũ, Jesus tÿ Betânia tá nĩ ti, kÿ ag tóg ti venh kãmũ mũ. Hã ra ag tóg Lázaro ve sór mũ gé, ùn rĩr mǎn mũ ên ti.

¹⁰ Pã'i ag tóg Lázaro tén sór mũ gé sir.

¹¹ Judeu tÿ hên ri ke ag vÿ Jesus ki ge kÿ nÿtĩ, ti tÿ Lázaro rĩn mǎn ja tugrĩn, hã kÿ ag tóg Lázaro tén sór mũ.

Jesus tÿ Jerusalém ra tÿg

(Mt 21.1-11; Mc 11.1-11; Lc 19.28-40)

¹² Tÿ vaj kÿ Jesus tóg Jerusalém ra tĩ mũ. Kÿ ùn e ag tóg Jesus tÿ Jerusalém ra tĩ mēg mũ sir, ù tÿ festa venh kãmũ mũ ên ag.

¹³ Kÿ ag tóg ti ve jé kãpa mũ, Jerusalém tá. Tãnh féj génh kÿ ag tóg ti venh kãmũ mũ. Kÿ ag tóg: “!..Viva..!” he mũ. “!..Sér tóg tĩ êg mÿ..! !..Êg jóg mág vÿ ti jênê..! !..Israel kri pã'i mág pē vê..!” he ag tóg, prênprêr kÿ.

¹⁴ Hã ra Jesus vÿ burrico sĩ ve ja nĩ, kÿ tóg kri nĩ kÿ Jerusalém ra tĩ mũ. Hã ra tóg rán kÿ nĩ, Topê vĩ tÿ rán kÿ nĩ ki, ti tÿ burrico sĩ kri tÿg ke ti, ha mē:

¹⁵ “kamēg tũg nĩ, Sião tá ke kar',” he tóg. “Ájag pã'i mág vÿ ùri jun ke mũ ha. Burrico sĩ kri tóg jun ke mũ ha,” he ja tóg nĩ, Topê vĩ rán ki, Jesus to.

¹⁶ Kurã ên kã ag tóg ti rá tag to jykrén ja tũ nĩ ver, Jesus mré mũ tĩ ag. Jesus tÿ kanhkã ra vÿn ke kar kÿ ag tóg kejên to jykrén mũ ha, ti to rán kÿ nĩ ên to, hã ra tóg ge ja nĩ.

¹⁷ Û tÿ Jesus mÿ prênprêr mũ ag kãmĩ ù ag tóg Lázaro ve ja nĩ, Jesus tÿ ti rĩn mǎn kÿ.

Lázaro tỹ vėnh kej kākā nỹ ra Jesus tóg ti jé prěr kỹ ti rĩn mǎn ja nĩ. Ũ tỹ tag vég mũ ěn ag vỹ jagně mỹ kāmén mũ sir.

¹⁸ Hǎ kỹ ũn e ěn ag tóg Jesus kato pétě mũ, ti tỹ jun ke kỹ. Ũ ter kỹ nỹ rĩn mǎn ěn ve ja tũ ag tóg nỹtĩ, kỹ tóg ag mỹ e tĩ.

¹⁹ Kỹ Fariseu ag tóg jagně mỹ: “ha vé, ag pi(jé) ěg vỹ jěmě sór mũ!,” he mũ. “Ti hǎ mré ag tóg mũ mũ,” he ag tóg, ti to jũgũ kỹ, pǎ'i ag.

Fóg tỹ Grego ag tỹ Jesus ve sór

²⁰ Festa venh kāmũ mũ ag vỹ e nỹtĩ. Ag kāmĩ ũ vỹ tỹ ga tỹ Grécia tá ke nỹtĩ gé.

²¹ ěn ag vỹ Jesus ve sór mũ. Hǎ kỹ ag tóg Filipe mré vỹ mũ. Ga tỹ Galiléia tá ěmǎ tỹ Betsaida tá ke vỹ tỹ ti nĩ, Filipe ti. Kỹ fóg tỹ Grego ěn ag tóg Filipe mỹ: “ěg tỹ Jesus venh há tóg tĩ,” he mũ.

²² Kỹ Filipe tóg André mỹ tónh tĩ mũ, kỹ ag tóg Jesus mỹ tónh mũ mũ, Filipe ti, André ti ke gé.

²³ Hǎ ra Jesus tóg ag mỹ: “inh kurǎ vỹ hur jun,” he mũ. “Topě vỹ isỹ ũn mág han ke mũ ha. Tỹ sóg ěprǎ ke fi kósin nĩ,” he tóg.

²⁴ “Ki hǎ sóg ājag mỹ tó mũ, hǎ kỹ sóg tó mũ. Isén jé ag tóg ke mũ, ũn e ag tỹ isugrĩn rĩnrĩr nỹtĩ jé. ěg tỹ nén ũ fy krǎn ri ke ti nĩ. Ti péju(g) ěg tóg tĩ, ga ki, kỹ tóg vag tĩ, nén ũ fy fǎr ti. Hǎ ra ti fy ěn tóg rĩr mǎn kỹ mur mũ, kỹ tóg mog kỹ kaně e han mũ. ěg tỹ ti krǎn tũ nĩ ra tóg kaněn ke tũ nĩ vė.

²⁵ ěn ri ke tóg nĩ, ěg mré hǎ. ěg hǎ vỹ tỹ nén ũ fy ri ke nỹtĩ gé. ěg tỹ ěg jykre si tovǎnh kỹ ěg tóg ěg rĩr krỹg ja tũ ěn venh ke mũ. Jǎvo ěg tỹ ěg jykre si tovǎnh pě han tũ nĩn kỹ ěg rĩnrĩr ke ěn tóg krỹ' he mũ sir. Kỹ ěg kanhkǎ tá vég tũ nĩ sir.

²⁶ Ājag tỹ inh rǎnrǎj han sór kỹ inh ri ke han nĩ, kỹ ājag tóg tỹ inh mré ke nỹtĩnh mũ, kỹ ājag tóg inh mré kanhkǎ tá nỹtĩnh ke mũ gé, ājag tỹ inh rǎnrǎj han kỹ. Kỹ inh panh vỹ ājag tỹ ũn mág han ke mũ gé, inh ri ke han jé tóg ke mũ, ājag tỹ,” he tóg, Jesus ti.

Jesus tỹ ā ter ke tó

²⁷ “Ũri tóg inh mỹ e tĩ,” he tóg. “Krĩ kufy jagy isóg nĩ. Ge ra sóg inh panh mỹ: “inh kren han nĩ, inh jagtar tũ nĩ jé,” he sór tũ

nĩ. Inh vėsỹrénh hǎ jé sóg kǎtĩg, ti tỹ inh mỹ jagy pě (hǎ) ra.

²⁸ Tag tó jé sóg ke mũ, inh panh mỹ, hǎ vỹ: “vėnh kar mỹ ven nĩ, ā tỹ tỹ ũn mág nĩ tag ti,” he mũ,” he tóg, Jesus ti.

Ti tỹ tag tó kỹ vǎhǎ Topě tóg ti mỹ vỹ mũ, kanhkǎ tá nĩ kỹ. Kỹ tóg jamǎ hár(a) ti mỹ: “ag mỹ sóg ven huri,” he mũ. “Hǎ ra sóg ag mỹ ven mǎn ke mũ gé, isỹ tỹ ũn mág nĩ ti,” he tóg, Topě ti. Kanhkǎ tá nĩg kỹ tóg ti mỹ tó mũ.

²⁹ Kỹ ũn e ag tóg męg mũ, Topě vỹ ti, ag tỹ ěprǎ nỹtĩ ra. Kỹ ag tóg ti vỹ to: “ta tỹ tỹrỹrỹ he hỹn,” he mũ. Ag tỹ ki kagtĩg nỹtĩn kỹ ag tóg Topě vỹ to: “ta hỹn,” he mũ. Hǎ ra ũ ag tóg: “Topě tỹ jěně jafǎ ũ hỹn ti mré vémén,” he mũ gé, ag tỹ ki kagtĩg nỹtĩn kỹ.

³⁰ Hǎ ra Jesus tóg ag mỹ: “Topě pi(jé) isugrĩn vỹ ja nĩ,” he mũ. “Ājag tugnĩn ke ja vė,” he tóg.

³¹⁻³² “Hǎ kỹ ājag tóg ka to isanh ke mũ, kynhmỹ. Topě tỹ ěprǎ ke ag jykre to: “kórég ti nĩ,” he vė, ti tỹ tag ki ũn mág tỹ Japo he mũ ěn to: ti kutě jé, he vė, hǎ kỹ ag tóg cruz to isǎg mũ. ěn kǎ vėnh kar ag vỹ inh ki genh ke mũ, isỹ ag krĩn kỹ, ha vemnĩ,” he tóg, Jesus ti.

³³ Tag tó tóg, ā mré mũ tĩ ag mỹ, ā ter ke kāmén kỹ, ag tỹ cruz to ti sanh ke ti.

³⁴ Kỹ vėnh kar ag tóg ti mỹ: “hǎ ra ag tóg ěg mỹ: “Cristo vỹ ter ke tũ nĩ,” he tĩ. Topě vỹ ki ti něji rán kỹ nĩ,” he ag tóg mũ. “Jǎvo ā tóg ěg mỹ: ěprǎ ke fi kósin ěn tỹ ag tóg cruz to ti sanh ke mũ, kynhmỹ, he mũ. Ũ to ke ně, hỹn, ěprǎ ke fi kósin ěn?” he ag tóg, Jesus mỹ.

³⁵ Kỹ tóg ag mỹ: “ver sóg ājag mré nĩ nĩ, sỹ ājag mỹ kurǎ han jé,” he mũ. “Kurǎ ki inh japry jagma mũmnĩ. Kǎnhmar ti kuty nĩnh mũ. Ājag tỹ kuty ra inh jamĩn jagma mũ sór mũ ra ājag tóg vǎgfor mũnh ke mũ.

³⁶ Isỹ ver ājag mré nĩn kỹ inh ki ge sórmnĩ, ājag tỹ tỹ inh mré ke nỹtĩ jé. Kỹ ājag tóg kurǎ ki nỹtĩ, isỹ tỹ jěngrě ri ke nĩn kỹ,” he tóg, Jesus ti. Ā tỹ tag tó kar kỹ tóg tĩ mũ, ag ré kỹ. Vėnh péju kỹ tóg tĩ mũ.

Judeu ag tỹ Jesus ki ge sór tũ

³⁷ Jesus vỹ ag rĩnve nén tỹ hěn ri ke hyn han ja nĩgtĩ, ěg tỹ nén han vǎnh tỹ hěn ri ke,

milagre tỹ hên ri ke, hã ra ag tóg ti ki ge sór tũ nĩgtĩ.

³⁸ Hã ra Isaías vỹ tag rán ja nĩ gé. “Ëg jóg mág,” he ja tóg nĩ. “Isỹ ag mỹ ã kãmén mũ ra ag tóg inh vỹ kri nĩm sór tũ nỹtĩ,” he ja tóg nĩ. “Ag tỹ ã tỹ nén han mũ ên vég mũ ra ag tóg: “Topê jykre vỹ tar nĩ,” he ja tũ nĩ,” he ja tóg nĩ, Isaías ti. Hã ra tóg ge nĩgtĩ, Jesus tỹ ag mỹ Topê vỹ tón ký, ti tỹ ag mỹ milagre hyn han ký.

³⁹⁻⁴⁰ Ký Isaías vỹ ag to tag tóg gé, ha mẽ. “Topê vỹ ag kyvó han, nĩgrêg kutu, hã ký ag tóg mēg tũ nĩgtĩ, ký ag tóg to jykrén sór tũ nĩgtĩ gé, ký ag tóg inh ki ge sór tũ nĩgtĩ gé, ký sóg ag tỹ há' henh ke tũ nĩ gé,” he ja tóg nĩ gé, Isaías ti, ti tỹ Topê vỹ tóg ký. Jesus to tóg ke mũ. Hã ký ag tóg Jesus ki ge sór tũ nĩgtĩ.

⁴¹ Isaías vỹ Jesus ve ja nĩ, ti tỹ tỹ ùn mág nĩ ti, ùn tar ti. Jesus mur to hã ke ja vỹ, vãsỹ. Tĩ tỹ ti ve hã ký tóg tag tóg ja nĩ, ti to, Isaías ti.

⁴² Hã ra ù ag tóg ti ki ge ký nỹtĩ gé, pã'i ù ag mré hã. Hã ra ag tóg tóg sór tũ nĩgtĩ. Fariseu ag kamēg ag tóg tĩ, hã ký ag tóg tóg sór tũ nĩ. “Fariseu ag vỹ êg pan ke mũ, êg tỹ êg vênh kanhrân jafã ra mũ tũ nĩ jé, êg tỹ êg mré ke ag mré tá vênh măn ký nỹtĩ tũ nĩn jé,” he ag tóg mũ, hã ký ag tóg Jesus tóg tũ nĩgtĩ.

⁴³ Êprã ke ag tỹ ag to vỹ há han mũ tag vỹ ag mỹ sér tĩ, ký Topê tỹ ag mỹ vỹ há han mũ vỹ ag mỹ pãgsĩ tĩ. Há ti nĩ gé vỹ vỹ, hã ra ag tóg êprã pã'i ag hã kamēg mũ.

Ag jykre kórég vênh ven ke

⁴⁴ Ký Jesus vỹ jamã hár(a) ke mũ, vênh kar tỹ ti vỹ mẽ jé. Ký tóg: “ãjag tỹ inh ki ge ký ãjag tóg ù tỹ inh jênēg mũ ên ki ge mũ gé,” he mũ.

⁴⁵ “ãjag tỹ inh ve ký ãjag tóg ti vég mũ gé, ù tỹ inh jênēg mũ ên ti.

⁴⁶ Sỹ ãjag mỹ kurã han hã jé sóg kãtĩg. ãjag tỹ inh ki ge ký sóg ãjag mỹ kutu ên tỹ tũ' he mũ.

⁴⁷ ãjag tỹ ón ký inh vỹ mẽg mũ ra sóg ãjag to: “kórég ãjag nỹtĩ,” henh ke tũ nĩ. Inh pi(jé) ãjag mỹ: “kórég ãjag nỹtĩ,” he jé kãtĩg'. Sỹ ãjag krenkren han hã jé sóg kãtĩg.

⁴⁸ ãjag tỹ iso é he ký, ãjag tỹ inh vỹ to é he ký tóg vênh ven mũ, ãjag jykre kórég ên ti, ha vemnĩ. Isỹ ãjag mỹ inh vỹ tóg mũ ra ãjag tóg inh vỹ kri nĩm jãvãnh nỹtĩ. Hã tugrĩn tóg

vênh ven ke mũ, ãjag jykre kórég ti, kurã tỹ êgno tá hã.

⁴⁹ Inh pi(jé) isỹ vēsóg ki nén to jykrén ja ên tóg tĩ'. Inh panh vỹ hã tóg ja inh nĩgtĩ, ù tỹ inh jênēg mũ ên vỹ ti. Ên vỹ inh mỹ: “tag tómnĩ, tag tóg tũg nĩ,” he tĩ.

⁵⁰ Tĩ tỹ inh mỹ nén tóg mũ vỹ ãjag rĩnrĩr han ke mũ, ki kanhró sóg nĩ. Hã ký sóg inh panh tỹ inh mỹ nén tóg mũ ên hã tóg tĩ, tag tãvĩ,” he tóg, Jesus ti.

13

Jesus tỹ ã mré mũ tĩ ag pên kugpe

¹ Hã ra festa tỹ Páscoa vỹ kakó tãvĩ tĩ sir, hã ra tóg tá krỹg tũ nĩ ver. Ký Jesus vỹ ki kanhró nĩ, ti tỹ ùri ter ke ên ti. Ti kurã vỹ jun ja nĩ, ti tỹ ã panh ra tĩg jé. ã mré mũ tĩ ag to tóg há tãvĩ ja nĩgtĩ, ag tỹ tỹ ti tũ nỹtĩn ký. Ký tóg ã ter ke kurã ên kã ag to há tãvĩ nĩ gé, tag ki, êprã, ti mré mũ tĩ ag to.

² Ký tóg rãkãnh ký ag mré jēg mũ. Hã ra Japo vỹ Judas krĩn huri, ti tỹ pã'i ag mỹ Jesus ven tĩg jé, ag tỹ ti se jé. Judas Iscariotes ên vỹ, Simão kósĩn ên.

³ Hã ra Jesus tóg ki kanhró nĩ, ã tỹ Topê tá kãtĩg ja ên ki, ký tóg ki kanhró nĩ gé, ã tỹ ra tĩg măn ken ki. Ký Topê tóg ti tar han mũ gé, ti tỹ nén ù kar ki ag mỹ tỹ ùn mág jē jé. Ên ki kanhró tóg nĩ gé, Jesus ti.

⁴ Tag kar to jykrén ký tóg vãhã jēgnē mũ sir, jēn kar ký. Jēgnē ký tóg ã capa kunũnh ký vênh pēfĩ jafã tỹ vênh pēfĩg mũ.

⁵ Goj tỹ tóg pēnky kãki kujēg mũ, ký tóg ã mré mũ tĩ ag pên kugpég mũ. Vênh pēfĩ jafã ên tỹ tóg ag pên kykũg mũ.

⁶ Ký tóg Simão Pedro tá jun mũ gé, ti pên kugpe jé. Hã ra Pedro tóg ti mỹ: ã pi(jé) inh pên kugpenh ke mũ,” he mũ.

⁷ Hã ra Jesus tóg ti mỹ: “ã pi(jé) ki kanhró nĩ', sỹ ã mỹ nén han mũ ti',” he mũ. “Kar ký ã tóg kejēn to jykrén ke mũ,” he tóg.

⁸ Hã ra Pedro tóg ti mỹ: “vó,” he măn mũ. “Inh pên kugpenh ke tũ ã tóg nĩ,” he tóg. Ký Jesus tóg ti mỹ: “isỹ ã pên kupég tũ nĩn ký ã tóg tỹ isũ tũ nĩnh ke mũ,” he mũ.

⁹ Ký Pedro tóg ti mỹ: “inh kupe kãn nĩ, ge ký, inh pên, inh krĩ, inh nĩgé ke gé,” he mũ.

¹⁰ Hã ra Jesus tóg ti mỹ: “mro ã huri,” he mũ. “ã mro kar ký sóg ã pên hã kugpenh ke

mũ. Jãnhkri ã nĩ, ã mro kar kÿ. Jãnhkri ãjag nÿtĩ, hã ra ãjag kãmĩ ùn pir vÿ jãnhkri tũ nĩ,” he tóg, Jesus ti.

11 Û tÿ pã'i ag mÿ ã ven ke mũ ên ki kanhró tóg nĩ, Jesus ti, hã kÿ tóg ag mÿ: “ãjag kãmĩ ùn pir vÿ jãnhkri tũ nĩ,” he mũ.

12 Kÿ tóg ag pên kugpe kãn mũ. Ag pên kugpe kar kÿ tóg ã kur rĩnh mãn mũ, kÿ tóg nĩ mãn mũ. Kÿ tóg ag mÿ: “ãjag mÿ sÿ nén han ja ki kanhró nÿtĩ?” he mũ.

13 “Iso ãjag tóg: Senhor, he tĩ. Tó há han ãjag tĩ. Tÿ sóg ãjag Senhor nĩ.

14 Kÿ sóg tÿ ãjag professor nĩ gé. Hã ra sóg ãjag pên kugpé. Hã kÿ tóg há tĩ, ãjag tÿ jagnê mÿ jagnê pên kugpe kÿ, inh ri ke han kÿ.

15 Sÿ ãjag kanhrãn sór vê, hã kÿ sóg ãjag mÿ ãjag pên kugpé. Inh ri ke han nĩ.

16 Ki hã sóg tó mũ, hã kÿ sóg ke mũ. Êg camarada pi(jé) ãjag patrão kãfór nÿtĩ'. Kÿ êg tÿ ù jênên kÿ tóg ù tÿ ti jênêg mũ ên kãfór tũ nĩ gé.

17 Tag ki kanhró ãjag nÿtĩ, kÿ tóg há tĩ, ãjag tÿ inh ri ke han kÿ.

18 ãjag kãmĩ ù tóg tag han ke tũ nĩ, ki kanhró sóg nĩ. ãjag kuprêg inh, kÿ sóg ãjag ki kanhró nĩ. Tag vÿ ãjag kãmĩ ù to rán kÿ nĩ, ha mē: “ù tÿ inh mré inh jamĩ ko mũ ên vÿ isovãnh ke mũ ha,” he ti nĩ, Topê vÿ tÿ rán kÿ nĩ ki. Isÿ tag ve jé sóg ãjag kuprêg.

19 Ûri sóg ãjag mÿ tó mũ, ti tÿ isovãnh ke to hã, ãjag tÿ ên ve kÿ inh ki êkrén' he jé. Ên ve kÿ inh ki ge kÿ nÿtĩmnĩ jãvo.

20 Ki hã sóg tó mũ, hã kÿ sóg ke mũ. Isÿ ãjag jêgnênh ke vê. Kÿ ù tÿ ãjag mÿ vĩ há han kÿ tóg inh mÿ vĩ há han ke mũ gé, hã ra tóg ù tÿ inh jênêg mũ ên mÿ vĩ há han ke mũ gé, ãjag mÿ vĩ há han kÿ,” he tóg, Jesus ti, ti mré mũ tĩ ag mÿ.

Û tÿ pã'i ag mÿ Jesus ven ke

(Mt 26.20-25; Mc 14.17-21; Lc 22.21-23)

21 Jesus tÿ tag tó kar kÿ tóg ti mÿ e tĩ. Krĩ kufy jagy ti nĩ, kÿ tóg ã mré mũ tĩ ag mÿ: “ki hã sóg tó mũ, hã kÿ sóg ke mũ,” he mũ. “ãjag kãmĩ ù vÿ pã'i ag mÿ inh ven ke mũ,” he tóg.

22 Kÿ tóg ag mÿ e tĩ. Ki kagtĩg ag nÿtĩ, kÿ ag tóg véké jagnê ki êvãnh mũ.

23 Hã ra ù tóg Jesus rã hã nĩ nĩ, ên kã, ti tÿ ti to há nĩn kÿ.

24 Kÿ Pedro tóg ti mÿ ã nĩgé ven mũ, kÿ tóg ti mÿ: “ti ki jêmê há han,” he mũ, ù tÿ Jesus rã hã nĩ ên mÿ.

25 Kÿ tóg ti to grên ke kÿ ti mÿ: “Senhor,” he mũ. “Û tÿ hê nê?” he tóg ti mÿ.

26 Kÿ Jesus tóg ti mÿ: “êmĩ tÿ sóg ti kume kã tÿ pun ke mũ,” he mũ, “kÿ sóg ti mÿ nĩm ke mũ sir. Ên hã vê,” he tóg mũ, Jesus ti. Tag tó kÿ tóg êmĩ mäg mũ, kÿ tóg ti kume kã tÿ pun ke mũ sir, kÿ tóg Judas mÿ nĩm mũ, Simão Iscariotes kósin ên mÿ.

27 Kÿ Judas tóg ko mũ. Ti tÿ ko kar mũ ra vêsÿmér Satanás tóg ti kãra rã ja nĩ sir. Kÿ Jesus tóg ti mÿ: “ã tÿ nén han sór mũ ên han tĩg nĩ, to fÿrũn nĩ,” he mũ.

28 Hã ra ù ag tóg ki kagtĩg nÿtĩ, Jesus tÿ ti mÿ nén tó mũ ên ki.

29 Judas vÿ ag jãnkamy ki rĩr tĩ. Hã kÿ ag kãmĩ ù tóg: “ti hÿn ti mÿ: “êg mÿ festa to compra ù han tĩg,” he sór mũ, ke tũ nĩ kÿ ti tÿ ùn jagãgtar ag mÿ nén ù nĩm ke hÿn,” he ag tóg mũ.

30 Hã ra Judas tóg êmĩ ên ko kar kÿ (tóg) króm ke kãkutê mũ, re ra. Hã ra tóg kuty nÿ.

Vênh jykre tãg

31 Judas tĩg kar kÿ Jesus tóg ã mré mũ tĩ ag mÿ: “vãhã tóg vênh ven ke mũ, isÿ tÿ ùn mág nĩ ti,” he mũ. “Tÿ sóg êprã ke fi kósin nĩ. Hã ra sóg vênh kar mÿ Topê tÿ tÿ ùn mág nĩ tag ven ke mũ gé.

32 Isÿ vênh kar mÿ Topê tÿ tÿ ùn mág nĩ ven kÿ Topê tóg vênh kar mÿ ven ke mũ gé, isÿ tÿ ùn mág nĩ ti. Vêsÿmér tóg tag han ke mũ, Topê ti, ha vemnĩ,” he tóg, Jesus ti.

33 “Inh jãvy', ãjag mré sóg nĩ sÿ pē han mũ ver,” he tóg. “Inh jãvãnh jé ãjag tóg ke mũ, hã ra ãjag tóg inh venh ke tũ nĩ. Tag tó inh, Judeu ag mÿ, hã ra sóg ãjag mÿ tag hã tó mũ gé, hã vÿ: ãjag pi(jé) isÿ hên ra tĩg ke mũ ên ki kanhró nÿtĩ', he mũ.

34 Kÿ sóg ãjag mÿ vênh jykre tãg nĩm sór mũ, hã vÿ: jagnê to há tãvĩ nÿtĩmnĩ, he mũ. ãjag to há tãvĩ sóg nĩ gé. Tag ri ke han nĩ, jagnê mÿ. Vênh jykre tãg hã vê.

35 ãjag tÿ jagnê to há nÿtĩn kÿ vênh kar vÿ ãjag jykre ki kanhrãn ke mũ. “Ti mré ke vÿ tÿ ag nÿtĩ,” he jé ag tóg ke mũ ãjag to, ag tÿ ãjag jykre há ve kÿ,” he tóg, Jesus ti.

Jesus tỹ Pedro mỹ nén tó mũ
(Mt 26.31-35; Mc 14.27-31; Lc 22.31-34)

³⁶ Kĩ Simão Pedro tóg Jesus mỹ: “Senhor,” he mũ. “Ă tỹ hê ra tĩg sór nê?” he tóg. Kĩ Jesus tóg: “ĕn ra ĩ tĩg ke tũ nĩ ver, inh mré,” he mũ. “Kar kĩ ĩ tóg kejĕn ĕn ra tĩg ke mũ gé, inh nón,” he tóg.

³⁷ Kĩ Pedro tóg ti mỹ: “isỹ ĩ mré tĩg há tóg tĩ,” he mũ. “Isỹ ĩ tugrĩn ter ken kĩ tóg inh mỹ tỹ nén ũ tũ tĩnh mũ,” he tóg.

³⁸ Hã ra Jesus tóg ti mỹ: “vó,” he mũ. “Ūri ĩ tóg ón kĩ iso: “ti ki kagtĩg sóg nĩ,” henh ke mũ. “Ti ki kagtĩg sóg nĩ,” he tãgtũ han jé ĩ tóg ke mũ, galo kynkyr to hã. Ki hã sóg tó mũ, ha vemnĩ,” he tóg, Jesus ti. Ti tỹ Pedro mỹ tón hã vĕ.

14

Kanhkã to ĕmĩn

¹ Kĩ Jesus tóg ĩ mré mũ tĩ ag mỹ: “krĩ kufy han tũg nĩ,” he mũ. “Inh ki rã há han nĩ, kĩ Topĕ ki rã há han nĩ gé.

² Inh panh jamã tá ĩ jag ĩn vỹ e nỹtĩ, ki hã sóg tó mũ. Ti tỹ tá tũ nỹtĩ ra sóg tónh ke tũ nĩ vĕ. Ra tĩg jé sóg ke mũ, isỹ ĩ jag mỹ ĩ jag ĩn kãnkã jé.

³ Isỹ kãnkã kar kĩ sóg tá kãtĩg mãn ke mũ gé, sỹ ĩ jag tatĩn tĩg jé, kĩ ĩ jag tóg inh mré tá nỹtĩnh mũ.

⁴ Ti to ĕpry ki kanhró ĩ jag nỹtĩ, sỹ hê ra tĩg ke to ĕmĩn ti,” he tóg.

⁵ Kĩ Tomé tóg ti mỹ: “ĕg pi(jé) ki kanhró nỹtĩ, ĩ tỹ hê ra tĩg ke ti,” he mũ. “Hã kĩ ĕg tóg ti to ĕpry ki kagtĩg nỹtĩ gé,” he tóg.

⁶ Kĩ Jesus tóg ag mỹ: “ti to ĕmĩn vỹ tỹ inh nĩ,” he mũ. “Vĕnh vĩ há hã tó sóg tĩ. Inh hã vỹ ĩ jag rĩnrĩr han ke mũ. Ū tỹ inh ki ge mũ ag vỹ inh panh venh ke mũ.

⁷ ĩ jag tỹ inh ki kanhró nỹtĩn kĩ ĩ jag tóg inh panh ki kanhró nỹtĩ gé. Inh ki kanhrãn ĩ jag tóg huri, inh ve ĩ jag tóg huri,” he tóg, Jesus ti.

⁸ Kĩ Filipe tóg ti mỹ: “ĕg mỹ ĕg jóg mág ti ven nĩ,” he mũ. “Ĕg tỹ ti venh há tóg tĩ,” he tóg.

⁹ Kĩ Jesus tóg Filipe mỹ: “ă mỹ inh ki kagtĩg nĩ ver, isỹ ĩ jag mré tĩg mág ja ra?” he mũ. “Ă tỹ inh ve kĩ ĩ tóg inh panh ti vég mũ

gé. Hã ra ĩ tóg inh mỹ: ĕg mỹ ti ven nĩ, he mũ.

¹⁰ Inh panh mré sóg tỹ ũn pir nĩ, kĩ tóg inh mré tỹ ũn pir nĩ gé. Ă mỹ tag kri fig tũ? Inh pi(jé) isỹ vĕsóg ki nén to jykrĕn mũ tó tĩ. Inh panh tũ hã tó sóg tĩ, ti tũ hã han sóg tĩ, inh mré tỹ ũn pir nĩ ĕn tũ ti. Kĩ tóg inh mré nén kar han mũ, inh panh ti.

¹¹ Inh vĩ kri nĩmnĩ, isỹ ĩ mỹ: “inh panh mré sóg tỹ ũn pir nĩ,” henh kĩ. Ă tỹ hã ra inh vĩ kri fi sór tũ nĩn kĩ isỹ nén han mũ ĕn ki ĕvãnh nĩ, ĩ tỹ to jykrĕn há han jé.

¹² Ki hã sóg tó mũ, hã kĩ sóg ke mũ. Ū tỹ inh ki rã há han mũ ĕn vỹ isỹ nén han mũ ri ke han ke mũ gé, hã ra tóg isỹ nén han mũ kãfór han ke mũ, ha vemnĩ, isỹ ũri inh panh venh tĩg ken kĩ.

¹³ Kĩ sóg ĩ jag tỹ inh mỹ nén ũ to vĩ mũ ĕn hyn han kãn ke mũ, isỹ tỹ ĩ jag kãke nĩn kĩ. Isỹ vĕnh kar mỹ inh panh tỹ tỹ ũn mág nĩ ven ke vĕ, hã jé sóg ĩ jag mỹ ĩ jag tỹ nén to vĩ mũ ĕn hyn han ke mũ.

¹⁴ Kĩ, ĩ jag tỹ inh mỹ nén ũ to vĩnh ken kĩ sóg ĕn hyn han kãn ke mũ, isỹ tỹ ĩ jag kãke nĩn kĩ, ha vemnĩ,” he tóg, Jesus ti.

Jesus tỹ Topĕ kuprĩg jĕnĕnh ke

¹⁵ “ĩ jag tỹ iso há nỹtĩn kĩ han nĩ, isỹ ĩ jag mỹ nén tó mũ ti.

¹⁶ Kĩ isóg inh panh mỹ ti kuprĩg to vĩnh ke mũ, ti tỹ ĩ jag mỹ ti jĕnĕ jé, ti tỹ tỹ ĩ jag jagrĕ nĩ jé, ti tỹ ĩ jag tar han jé, kĩ tóg ĩ jag tovãnh mãn ke tũ nĩ. ĩ jag mỹ tóg ki hã tónh ke mũ.

¹⁷ Hã ra tóg ũ tỹ inh ki ge jãvãnh ĕn ag mỹ nén ũ tónh ke tũ nĩ, ag tỹ ti ki kagtĩg nỹtĩn kĩ. Ag jãvo ĩ jag tóg ti ki kanhró nỹtĩ. ĩ jag kãtã tóg ĩ jag mré nĩ nĩ, Topĕ kuprĩg ti,” he tóg, Jesus ti.

¹⁸ “Inh pi(jé) ĩ jag tovãnh ke mũ. Isĩg mũ ra sóg vỹn kenh ke mũ, ĩ jag to.

¹⁹ Kãnhmar ũ tỹ inh ki ge jãvãnh ĕn ag tóg inh ve mãn ke tũ nĩ. Ag jãvo ĩ jag tóg inh ve mãn ke mũ. Rĩr inh nĩ nĩ, kĩ ĩ jag tóg inh ri kĕn rĩr mãn ke mũ gé.

²⁰ ĩ jag tỹ Topĕ kuprĩg tỹ ĩ jag jagrĕ venh ke kurã ĕn ki ĩ jag tóg inh ki kanhrãn há han ke mũ, isỹ inh panh mré tỹ ũn pir nĩ ĕn ti. Kĩ ĩ jag tóg inh mré tỹ ũn pir nỹtĩnh mũ gé, ha mĕ,” he tóg, Jesus ti.

21 “Ũ tỹ inh vĩ hã ki kanhrãn mũ ẽn, ũ tỹ inh vĩ hã ki króm mũ ẽn hã vĩ iso há nĩ. Kỹ ũ tỹ iso há nĩ ẽn to inh panh tóg há tãvĩ nĩ. Ẽn to sóg há tãvĩ nĩ gé. Ẽn vĩ inh venh ke mũ,” he tóg, Jesus ti.

22 Kỹ Judas tóg ti ki jẽmẽg mũ. Judas Iscariotes pijé', Judas ũ vễ. Ẽn vĩ Jesus mỹ: “ẽg mỹ ã tóg vẽn ven sór mũ,” he mũ, “hã ra ã tóg ũ tỹ ã ki ge sór tũ ag mỹ vẽn ven sór tũ nĩ. Ẽ hẽ ri kenh ke mũ?” he tóg mũ.

23 Kỹ Jesus tóg ti mỹ: “ũ tỹ iso há nỹtĩ kar ag vĩ inh vĩ ki króm ke mũ,” he mũ. “Ũ tỹ inh vĩ ki króm mũ to inh panh tóg há nĩ, kỹ tóg ti mré ẽmãn ke mũ. Kỹ sóg ti mré ẽmãn ke mũ gé.

24 Ũ tỹ iso há tũ ẽn vĩ inh vĩ han sór ke tũ nĩ gé. Inh pi(jé) inh vĩ hã tó tĩ'. Ũ tỹ inh jẽnẽg mũ ẽn vĩ hã tó sóg tĩ, inh panh vĩ ti,” he tóg.

25 “Ăjag mré sóg nĩ nĩ ver, kỹ sóg ăjag mỹ tag kãmén mũ.

26 Isĩg kar kỹ sóg ăjag mỹ vễsỹmér ũ tỹ ăjag tar han ke mũ ẽn jẽnẽnẽh ke mũ, hã vĩ: Topẽ kuprĩg, he mũ. Inh panh vĩ ăjag mỹ ti jẽnẽnẽh ke mũ. Ẽn vĩ nén ũ kar to ăjag kanhrãn há han ke mũ. Kỹ tóg ăjag mỹ tó mãn ke mũ gé, sỹ ăjag mỹ nén tó mũ kar ti, ăjag tỹ kã jatun tũ nĩ jé,” he tóg, Jesus ti.

27 “Ăjag krĩ kãnhvy han jé sóg ke mũ. Sỹ ăjag mỹ nén nĩm ke mũ hã vĩ: krĩ kãnhvy, he mũ. Hã ra tóg ũ tỹ inh ki ge jãvãnh ag krĩ kãnhvy sĩ ẽn ri ke tũ nĩ, sỹ ăjag mỹ ăjag krĩ kãnhvy han mũ ti. Krĩ kãnhvy pẽ ăjag nỹtĩnh ha. Hã kỹ krĩ kufy han tũg nĩ. Kanẽ jur han tũg nĩ gé.

28 Inh vĩ tag mẽ ăjag tóg huri, isỹ ăjag mỹ: “tũg jé sóg ke mũ, kar kỹ sóg ăjag to vĩn kenh ke mũ gé,” he mũ ti. Ăjag tỹ iso há nỹtĩ ra tóg ăjag mỹ sér tĩnh mũ vễ, isỹ inh panh venh tũg ke ti. Inh panh vĩ inh kãfór nĩ.

29 Ũri sóg ăjag mỹ tag kãmén mũ, ăjag tỹ ẽn venh ke to hã. Kỹ inh mũ ẽkrén nĩ, ăjag tỹ ẽn venh ken kỹ. Ẽn kã inh ki ge kỹ nỹtĩmĩ.

30 Isỹ ăjag mré vẽnén tag vĩ rur nĩ ha. Ẽprã pã'i mág jun ke nẽ ha. Hã ra ti pi(jé) tỹ inh krĩg mỹ ke nĩ'.

31 Hã ra sóg sỹ nén han ke mũ ẽn han sór mũ, ẽprã ke kar ag tỹ inh jykre ve jé, isỹ inh panh to há tãvĩ nĩ ti. Kỹ sóg inh panh tỹ inh

mỹ nén tó mũ ẽn han kãn tĩ. Hã ven sór inh mũ, ẽprã ke kar ag mỹ. Mũ jé ha, re ra,” he tóg, Jesus ti. Ti tỹ ã mré mũ tĩ ag mỹ ag tỹ nén venh ke kãmén hã vễ.

15

Jesus tỹ uva fa ri ke nĩ

1 Ag mũn kỹ Jesus tóg ag mỹ: “uva fa ri ke inh nĩ,” he mũ. “Inh panh vĩ ũ tỹ uva ki rĩr mũ ẽn ri ke nĩ.

2 Kỹ ăjag uva pẽ ri ke nỹtĩ,” he tóg. “Ũ tỹ inh vĩ han sór tũ ẽn ag hã vĩ uva pẽ kanẽn vãnẽh ẽn ri ke nỹtĩ. Ẽn kym kỹ tóg fón tĩ, inh panh ti, uva pẽ kanẽn vãnẽh ẽn ti. Ũn kanẽ há han mũ ẽn ki rĩr há han tóg tĩ, ẽn fėj rógrãm tóg tĩ, ti pẽ kãsir nẽgnẽm tóg tĩ gé, ti tỹ kanẽ e han jé.

3 Tag ri ke han ti tĩ, inh panh ti, ăjag tỹ. Ăjag tỹ há' he tóg huri, inh panh ti, ăjag tỹ inh vĩ kri nĩm tugrĩn.

4 Isovãnh tũg nĩ, kỹ sóg ăjag tovãnh ke tũ pẽ nĩ gé. Uva pẽ ẽn ri ke ti nĩ. Ti tỹ ti pẽ rógrãm kỹ tóg tóg mũ. Jãvo ti pẽ tỹ uva fa ẽn to nỹgtĩn kỹ tóg kanẽ há han tĩ. Ẽn ri ke ti nĩ, ăjag tỹ inh ki ge kỹ nỹtĩ tag ti. Ăjag tỹ inh ki ge kỹ nỹtĩn kỹ ăjag tóg vẽnẽh jykre há hã han kỹ nỹtĩ nĩ, jãvo ăjag tỹ isovãnh kỹ ăjag tóg vẽnẽh jykre há tovãnh ke mũ gé,” he tóg, Jesus ti.

5 “Uva fa ri ke inh nĩ, kỹ ăjag tóg uva pẽ ri ke nỹtĩ gé. Ăjag tỹ inh ki ge kỹ nỹtĩn kỹ ăjag tóg kanẽ e han ke mũ, ăjag tỹ isovãnh tũ nĩn kỹ. Ăjag pi(jé) ăjag pir mỹ nén ũ há han ki kanhró nỹtĩ'. Inh hã ne ăjag tar han tĩ'.

6 Ũ tỹ isovãnh ke mũ ẽn fón jé tóg ke mũ, inh panh ti. Ẽg tỹ uva pẽ kórég kym kỹ vãm ẽn ri ke tóg nĩ. Ẽg tỹ ti pẽ kym kỹ fón kỹ tóg tóg mũ, kỹ ẽg tóg ti pũn tĩ sir. Ẽn ri ke han jé tóg ke mũ, inh panh ti, ũ tỹ isovãnh mũ ẽn tỹ.

7 Ăjag tỹ isovãnh tũ nĩn kỹ, ăjag tỹ isỹ ăjag mỹ nén tó mũ ẽn to jykren kỹ nỹtĩn kỹ, kỹ inh mỹ nén kar to vĩmĩ. Han jé sóg ke mũ, ăjag mỹ, ăjag tỹ inh mỹ nén to vĩ mũ ẽn ti, ha vemĩ.

8 Ăjag tỹ vẽnẽh jykre há han kỹ tóg uva pẽ tỹ kanẽ e han ri ke nĩ. Kỹ vẽnẽh kar ag tóg ăjag jykre ve kỹ Topẽ to: “ũn há vĩ tỹ ti nĩ,”

henh ke mũ. Hã ki ag tóg ki kanhró nýtĩnh mũ, ãjag tỹ tỹ inh mré ke nýtĩ ti.

⁹ Inh panh vỹ iso há tãvĩ nĩ. Ge inh nĩgtĩ gé, ãjag to. Æjag to ha pẽ sóg nĩ gé. Inh ki ge kỹ nýtĩmnĩ, sỹ ãjag to há tãvĩ nĩ jé.

¹⁰ Æjag tỹ isỹ ãjag mỹ nén tó mũ ki króm kỹ ãjag tóg inh ki ge kỹ nýtĩnh mũ, kỹ sóg ãjag to há nĩ gé. Hã kỹ sóg inh panh vỹ hã ki króm kãn mũ, kỹ tóg iso há tãvĩ nĩ.

¹¹ Inh mỹ tóg sér tĩ. Kỹ sóg ãjag mỹ tag tó mũ, ti tỹ ãjag mỹ sér tĩn jé gé, ti tỹ inh mỹ sér ěn ri ke tĩn jé gé, ãjag mỹ. Ti tỹ ãjag mỹ sér tĩ hã jé sóg ãjag mỹ inh jykre kãmén mũ.

¹² Sỹ ãjag mỹ věnh jykre nĩm mũn hã vě, ha mě. Jagně to há pẽ nýtĩmnĩ, sỹ ãjag to há nĩ ěn ri ke han nĩ, he sóg mũ.

¹³ Ũ tỹ ã mré ke ũ ag jagfy ter sór mũ ěn vỹ ag to há ja nĩgtĩ. Ũ tỹ ěg to há kãfór pẽ ěn venh ke tũ ěg tóg nĩ, ěprã.

¹⁴ Inh mré ke pẽ vỹ tỹ ãjag nýtĩ, ãjag tỹ inh vỹ ki króm kỹ.

¹⁵ Hã kỹ sóg ãjag to: “inh camarada ag,” he tũ nĩgtĩ gé. ěg pi(jé) ěg camarada ěn ag mỹ ěg tỹ nén to jykrén mũ ěn kãmén tĩ'. ěg mré ke ag hã mỹ ěg tóg kãmén tĩ. Æjag mỹ sóg inh panh tỹ inh mỹ nén tó mũ ěn kãmén kãn huri, hã kỹ sóg ãjag to: “inh mré ke ag,” he mũ.

¹⁶ Æjag pi(jé) inh kuprěg'. Inh hã ne ãjag kuprěg'. Kỹ sóg ãjag mỹ: “kaně e han nĩ,” he mũ ha, hã vỹ: věnh jykre há, he mũ. Věnh jykre há hã vỹ tũ' henh ke tũ nĩ. Æjag tỹ ěn han kỹ jatun mỹ Topě mỹ nén kar to vĩmnĩ, inh jygy tóg kỹ. Æjag tỹ ti mỹ nén ũ to vỹ mũ ěn han jé tóg ke mũ, Topě ti, ãjag tỹ věnh jykre há han kỹ nýtĩn kỹ.

¹⁷ Sỹ ãjag mỹ nén tó mũn hã vě, hã vỹ: jagně to há nýtĩmnĩ, sỹ ãjag to há nĩ ěn ri ke, he mũ,” he tóg, Jesus ti.

Ũ tỹ ěg to jũnh ke ag

¹⁸ Ũ tỹ inh ki ge tũ ag vỹ iso jũ vén ja nĩgtĩ, kỹ ag tóg ãjag to jũ nýtĩ gé. Tag mĩ ěkrén nĩ, ag tỹ ãjag to jũnh ken kỹ.

¹⁹ Æjag pi(jé) tỹ ag mré ke nýtĩ'. Æjag tỹ tỹ ag mré ke nýtĩ ra ag tóg ãjag to há nýtĩnh ke mũ vě, hã ra ãjag tóg tỹ ag mré ke tũ nýtĩ. Æjag kuprěg inh, ag kãmĩ, ãjag tỹ tỹ inh mré ke nýtĩ jé, hã kỹ ag tóg ãjag to jũ nýtĩ.

²⁰ Vãsỹ sóg ãjag mỹ: “ãjag pi(jé) inh kãfór nýtĩ',” he ja nĩgtĩ. Tag mĩ ěkrén nĩ. Inh camarada ri ke ãjag nýtĩ, jãvo sóg tỹ ãjag patrão ri ke nĩ. Ag kãmĩ ũ tóg inh vóg kónãn ke mũ. ěn vỹ ãjag vóg kónãn ke mũ gé. Ag kãmĩ ũ tóg inh vỹ ki króm tĩ. ěn ag vỹ ãjag vỹ ki króm ke mũ gé.

²¹ Hã ra ag tóg ãjag vóg kónãn ke mũ gé, ãjag tỹ tỹ inh mré ke nýtĩn kỹ. Ag pi(jé) ũ tỹ inh jěněg mũ ěn ki kanhró nýtĩ'.

²² Inh kãtĩ tũ ra, isỹ ag mỹ inh vỹ tó tũ ra ag tóg: “hã ra ěg tóg ki kagtĩg nýtĩ,” henh ke mũ vě. Hã ra sóg ag mỹ tó, hã kỹ ag tóg ki kanhró nýtĩ.

²³ Ũ tỹ iso jũ nýtĩ ěn ag vỹ inh panh to jũ nýtĩ gé.

²⁴ Nén ũ han vãnh hyn han sóg tĩ, ag rĩnve, kỹ ũ vỹ tag han ja tũ pẽ nĩ ijo. Isỹ tag han tũ nĩ ra ag tóg: “věg tũ ěg nĩ,” henh ke mũ vě. Hã ra ag tóg vé, ag tỹ věg mũ ra ag tóg ge ra iso jũ nýtĩ, kỹ ag tóg inh panh to jũ nýtĩ gé.

²⁵ Hã ra ag tóg rán kỹ nýtĩ, Topě vỹ tỹ rán kỹ nĩ ki. “Nén ũ tũ to ag tóg iso jũ sór mũ,” he tóg, Topě vỹ rá ki. Hã kỹ ag tóg ke tĩ,” he tóg, Jesus ti.

²⁶ “Hã ra tóg kãtĩg ke mũ, ũ tỹ ãjag tar han ke ti. Topě kuprĩg to ken hã vě. Ti hã vỹ ki hã tónh ke mũ, inh panh kuprĩg ti. ěn hã vỹ ãjag mỹ inh kãmén ke mũ.

²⁷ Kỹ ãjag tóg věnh kar mỹ inh kãmén ke mũ gé, ěn kã. Inh mré ãjag tóg mũ ja nĩ, isỹ ãjag mỹ tó vén mũn kã,” he tóg.

16

¹ “Æjag mỹ sóg tag kãmén kãn mũ, ãjag tỹ ki kanhró nýtĩ jé, ãjag tỹ isovãnh sór tũ pẽ nĩ jé, ãjag jagtar ke kurã ěn kã.

² Æjag pan jé ag tóg ke mũ, pã'i ag, ãjag tỹ věnh kanhrãn jafã ra mũ mãn tũ nĩ jé. Kỹ ag tóg ãjag kãgtén ke mũ gé. Æjag kãgtén kỹ ag tóg ón kỹ: “Topě vỹ ěg mỹ tó, hã kỹ ěg tóg ag kãgtén,” henh ke mũ.

³ Ag tỹ ěg jóg mág ki kagtĩg nýtĩ hã kỹ ag tóg tag han ke mũ. Inh ki kagtĩg ag tóg nýtĩ gé.

⁴ Ũri sóg ãjag mỹ tó mũ. Kỹ ãjag tóg, ãjag tỹ tag ve kỹ (ãjag tóg): “ěg mỹ tóg tó ja nĩ, ěg tỹ ũri nén věg mũ tag ti,” henh ke mũ,” he tóg, Jesus ti.

Topê kuprīg kâtīg ke

Vās̄y sóg ājag m̄y tag tó ja tũ nĩ ver. Vās̄y sóg ājag mré tīg nĩ vē, hã ra sóg ājag m̄y tag tó ja tũ nĩ, s̄y ũri ājag m̄y nén tó mũ tag ti.

⁵ Ũri sóg tīg ke mũ, is̄y ũ t̄y inh jēnēg mũ ěn ve jé. K̄y ājag pi(jé) inh m̄y: “ã t̄y hē ra tīg ke nē?” henh ke mũ'.

⁶ Ājag m̄y tóg e tĩ, s̄y ājag m̄y is̄g ke tag tó ja nĩn k̄y, k̄y ājag tóg fe kaj n̄ytĩ.

⁷ Há ti nĩ hã ra, is̄g ke ti, ha mē. Is̄g tũ nĩn k̄y ũ t̄y ājag tar han mũ ěn v̄y kâtīg ke tũ nĩ vē, Topê kuprīg ti. Is̄g k̄y sóg ājag m̄y ti jēnēn ke mũ.

⁸ Ěn v̄y, ã kâtīg k̄y (tóg) vēnh kar m̄y: “Topê v̄i mranh ã huri,” henh ke mũ, k̄y tóg ag m̄y vēnh jykre kuryj tónh ke mũ gé, k̄y tóg ag m̄y Topê t̄y ag vóg kónãn ke ěn tónh ke mũ gé.

⁹ “Jesus ki ã tóg rã tũ nĩ, hã k̄y ã tóg Topê v̄i mranh tĩ,” he jé tóg ke mũ, vēnh kar m̄y.

¹⁰ K̄y tóg ag m̄y vēnh jykre kuryj tónh ke mũ gé, Topê kuprīg ti. Jãvo sóg tīg ke mũ, inh panh kukãm, k̄y ag tóg inh venh ke tũ nĩ.

¹¹ K̄y Topê kuprīg tóg ag m̄y Topê t̄y ag vóg kónãn ke ěn tónh ke mũ gé. Tag ki ũn t̄y t̄y ũn mág pē t̄y Nén-Kórég ěn to tóg: “kórég ti nĩ,” hé huri, Topê ti. Hã to ěg tóg ti t̄y ũn vóg kónãn ke mũ ěn ag ki kanhró n̄ytĩ,” he tóg, Jesus ti.

¹² “S̄y ājag m̄y nén tónh ke mũ v̄y ver e n̄ytĩ, hã ra tóg ver ājag m̄y mē jagy tĩ, hã k̄y sóg tónh ke tũ nĩ.

¹³ Topê kuprīg t̄y ājag ki jun k̄y, ũ t̄y ki hã tó tĩ ěn kâtīg k̄y tóg komēr hã ājag m̄y tó kãn ke mũ, nén t̄y ki hã tó mũ ěn ti. Ti pi(jé) ã t̄y nén to jykrén mũ ěn tónh ke mũ', Topê kuprīg ti. Inh panh t̄y inh mré nén to jykrén mũ ěn hã tó jé tóg ke mũ. K̄y tóg ājag m̄y ājag t̄y kar k̄y nén venh ke ěn tónh ke mũ gé.

¹⁴ Ti hã v̄y iso: “ũn mág v̄y t̄y ti nĩ,” henh ke mũ gé. Inh v̄i hã tó jé tóg ke mũ ājag m̄y, hã k̄y tóg is̄y t̄y ũn mág nĩ tónh ke mũ.

¹⁵ Inh panh t̄y nén tó mũ ěn hã tó sóg tĩ gé. K̄y tóg ěn hã tónh ke mũ gé, ti kuprīg ti. Hã k̄y sóg ājag m̄y: inh v̄i hã tó jé tóg ke mũ,” he mũ,” he tóg, Jesus ti.

Jesus t̄y ter kar k̄y r̄ir mãn ke

¹⁶ “Kãnhmar ājag tóg inh ve mãn ke tũ nĩ ha, kejēn ājag tóg kurã ũ ki inh ve mãn ke mũ gé,” he tóg, Jesus ti.

¹⁷ K̄y ti mré mũ tĩ ag tóg jagnē m̄y: “ti h̄yn ne tó sór mũ, hã k̄y tóg: kãnhmar ājag tóg inh ve mãn ke tũ nĩ ha, he mũ, hã k̄y tóg: kejēn ājag tóg kurã ũ ki inh ve mãn ke mũ gé, he mũ?” he ag tóg. “Ti t̄y ne tónh ke nē h̄yn, hã k̄y tóg: inh panh kukãm sóg tīg mũ ha, he mũ?” he ag tóg.

¹⁸ “Ne to ke nē h̄yn, hã v̄y: kãnhmar, he mũ? Ěg pi(jé) ti t̄y nén tó mũ ěn ki kanhró n̄ytĩ,” he ag tóg, jagnē m̄y.

¹⁹ Hã ra Jesus tóg ki kanhró nĩ, ag t̄y ti ki nén jēmē sór mũ ěn ki. Hã k̄y tóg ag m̄y: “inh v̄i m̄y ājag m̄y e?” he mũ. “Kãnhmar ājag tóg inh ve mãn ke tũ nĩ ha, kejēn hã ājag tóg kurã ũ ki inh ve mãn ke mũ.

²⁰ Ki hã sóg tó mũ, hã k̄y sóg ke mũ. Kygf̄y jé ājag tóg ke mũ. Vēs̄yrénh jé ājag tóg ke mũ. Hã ra tóg ũ t̄y inh ki ge tũ ag hã m̄y sér t̄inh mũ. Fe kaj han jé ājag tóg ke mũ, tag pãte tóg ājag m̄y sér t̄inh mãn ke mũ gé.

²¹ Ũn t̄ytá fi t̄y ḡir venh ken k̄y tóg fi m̄y jagy tĩ, fi kaga jagy ěn ti. Fi kósin t̄y fi ki mur kar k̄y tóg hã ra fi m̄y sér tĩ, k̄y fi tóg ã kaga ěn m̄i ěkrén mãn tũ n̄igtĩ. Fi t̄y ã kósin ve k̄y tóg fi m̄y sér tĩ.

²² Ge ve jé ājag tóg ke mũ. Ũri tóg ājag m̄y jagy tĩ, hã ra sóg ājag ve mãn ke mũ, k̄y ājag fe tóg m̄rin kenh ke mũ, ājag t̄y inh ven k̄y. K̄y ũ tóg ājag fe kaj han mãn ke tũ nĩ ha, inh kâtīg mãn k̄y.

²³ Ěn kã ājag tóg inh m̄y nén ũ to v̄i mãn ke tũ nĩ ha, is̄y ājag mré n̄in k̄y. Ki hã sóg tó mũ, hã k̄y sóg ke mũ. Ājag t̄y inh panh m̄y nén ũ to v̄in k̄y tóg ājag m̄y vin kãn ke mũ, ājag t̄y ti m̄y nén ũ to v̄i mũ ěn t̄y, ājag t̄y t̄y inh mré ke n̄yt̄in k̄y.

²⁴ Ver ājag tóg ti m̄y nén ũ to v̄i ja tũ nĩ, ājag t̄y ti m̄y: “ti mré ke v̄y t̄y ěg n̄ytĩ,” henh k̄y. Ti m̄y nén ũ to v̄imnĩ, k̄y tóg ājag m̄y h̄yn han kãn ke mũ, ājag t̄y nén to v̄i mũ ěn ti, k̄y tóg ājag m̄y sér tãv̄i t̄inh mũ,” he tóg, Jesus ti.

Jesus t̄y t̄y ěprã ke kar kri ke nĩ

²⁵ “Ājag m̄y sóg comparação han k̄y inh panh kãmén tĩ, kãnhmar sóg jamã hár(a) ājag m̄y inh panh kãmén ke mũ, k̄y sóg ājag m̄y comparação han mãn ke tũ nĩ sir.

²⁶ Kurã ên kã ãjag tóg vêsóg ki inh panh mÿ nén ù kar to vïnh ke mÿ, ãjag tÿ tÿ inh mré ke nÿtïn kÿ. Kÿ sóg ãjag jagfy vï mân ke tũ nÿ ha, ãjag tÿ vêsóg ki ti mré vëmén kÿ. ãjag hã vÿ ti mré vëmén ke mÿ ha.

²⁷ Inh panh vÿ ãjag to há tâvï nÿgtÿ, ãjag tÿ iso há nÿtïn kÿ, ãjag tÿ iso: “Topê vÿ ti jênê,” hen kÿ.

²⁸ Inh panh tÿ inh jênên hã kÿ sóg ga tag ki jun mÿ. Hã ra sóg ùri inh mur ja ré kÿ tÿg ke mÿ ha, inh panh kukãm,” he tóg, Jesus ti.

²⁹ Kÿ ti mré mÿ tÿ ag tóg ti mÿ: “vãhã ã tóg êg mÿ kãmén há han mÿ ha,” he mÿ. “Vãhã ã tóg êg mÿ comparação tó tũ nÿ ha.

³⁰ Nén ù kar ki kanhró ã tóg nÿ, vég êg tóg mÿ. Êg tÿ ã ki nén ù jëmê sór kÿ ã tóg ki kanhró nÿ. Êg tÿ ã mÿ nén ù tó tũ ra ã tóg ki kanhró nÿ. Hã ki êg tóg vég mÿ, ã tÿ Topê tá kãtÿg ja ti,” he ag tóg mÿ, Jesus mÿ.

³¹ Kÿ tóg ag mÿ: “vãhã ãjag tóg inh ki ge kÿ nÿtÿ ha,” he mÿ.

³² “Hã ra ãjag tóg kãnhmar inh ré kÿ mÿ kãn mÿ ha, ãjag ïn ra. Vênh kã pugpóv kãn jé ãjag tóg ke mÿ, ùri. Hã ra sóg pir pẽ tũ nÿ, ãjag tÿ inh ré kÿ mÿ kãn mÿ (hã) ra. Inh panh vÿ êgno kã inh mré jê nÿ.

³³ Tag kãmén sóg ãjag mÿ, ãjag tÿ krÿ kãnhvy nÿtÿ jé, ãjag tÿ inh ki ge kÿ nÿtÿ tugrÿn. Tag ki ãjag tóg nén ù jagy kar vég tÿ ver. Hã ra to krÿ kufy han tÿg nÿ. Êprã ke kar kri ke vÿ tÿ inh nÿ, êprã ke kri pã'i ên, Japo ên kutêm inh huri,” he tóg, Jesus ti.

17

Jesus tÿ Topê mré vëmén

¹ Jesus tÿ ã mré mÿ tÿ ag mÿ tag kãmén kãn kar kÿ tóg kanhkã ki êvãnh mÿ, kÿ tóg: “panh’,” he mÿ. “Inh hora tán krÿg huri,” he tóg. “Ag mÿ isÿ tÿ ùn mág nÿ ven nÿ, isÿ tÿ ã kósin nÿn kÿ. Kÿ sóg ag mÿ ã tÿ tÿ ùn mág nÿ ven ke mÿ gé.

² Êprã ke kar kri ã tóg inh fêg, isÿ ag mÿ rÿr krÿg ja tũ ven jé, ã tÿ inh mÿ ùn vin mÿ kar ên ag mÿ, fag mÿ ke gé.

³ Û tÿ ã ki kanhrãn mÿ ên vÿ rÿr krÿg ja tũ venh ke mÿ, ù tÿ ã to: “Topê vê,” he mÿ kar ag, ù tÿ ã to: “Topê ù vÿ tũ nÿ,” he mÿ kar ag, fag kar ke gé. Kÿ ag tóg inh ki kanhró nÿtÿ

gé, isÿ tÿ Jesus Cristo nÿn ki, ã hã tÿ inh jênê ên ki.

⁴ Ag hã mÿ sóg ã tÿ tÿ ùn mág nÿ tag ven, êprã ke ag mÿ, fag mÿ ke gé. ã tÿ inh mÿ nén tó mÿ ên han kãn inh.

⁵ Vãsÿ, êg tÿ ga tag han tÿg ki sóg ã mré nÿ ja nÿgtÿ, ên kã sóg tÿ ùn mág pẽ nÿ ja nÿgtÿ, ã mré. Ên han mân nÿ, inh mÿ. Isÿ tÿ ùn mág pẽ nÿ han mân nÿ, panh’.

⁶ Û ag kuprêg ja ã nÿ, ag tÿ inh ki ge jé, fag ke gé. Ên ag mÿ sóg ã kãmén ja nÿgtÿ. ã tũ ag vê, hã ra ã tóg inh mÿ ag vin, fag ke gé. ã vÿ ki króm ag tóg tÿ, fag ke gé.

⁷ Ûri ag tóg ki kanhró nÿtÿ, isÿ ã tũ hã han mÿ ên ki, fag ke gé. ã hã ne inh mÿ nén kar ên tó tÿ! Tag vég ag tóg tÿ.

⁸ Ag mÿ sóg ã vÿ ti tó tÿ, kÿ tóg ag mÿ sér tÿ, fag mÿ ke gé. Kÿ ag tóg vég mÿ, ã tÿ inh jênê ên ti. Kÿ ag tóg iso: “Topê tÿ ùn jênêg mÿ ên vê,” he mÿ, fag ke gé.

⁹ ã tÿ inh mÿ ùn vin mÿ ên ag hã jagfy sóg vÿ tÿ, fag ke gé. Û tÿ inh ki ge tũ ên ag jagfy sóg vïnh ke tũ nÿ. ã tũ ag hã jagfy sóg vÿ tÿ.

¹⁰ Ha vé, isÿ kar vÿ tÿ ã tũ nÿtÿ, kÿ ã tũ kar vÿ tÿ isÿ nÿtÿ gé. Ag hã tugrÿn sóg tÿ ùn mág nÿ, ù tÿ inh ki ge kÿ nÿtÿ ên ag hã tugrÿn, fag ke gé.

¹¹ Inh mur ja ré kÿ sóg tÿg mÿ, ijãvo ag tóg êgno mÿ mÿ nÿ sir, isÿ mré ã tũ ag. Ag jãvo sóg ã venh kãtÿg mÿ ha. Inh panh mág, há tâvï ã tóg nÿ. Ag jy nÿgãn nÿ, ã jykre ki. ã hã ne inh mÿ ag vin’. ã mré sóg tÿ ùn pir nÿ. Ag tÿ jagnê mré tÿ ùn pir nÿtÿ han nÿ, isÿ ã mré tÿ ùn pir nÿ tag ri ke han nÿ, ag tÿ, fag tÿ ke gé.

¹² Isÿ ag mré nÿn kÿ sóg ag jy nÿgãn tÿ, ã jykre ki, ã tÿ inh mÿ ùn vin mÿ ên ag kar jy, fag jy ke gé. Ag ki rÿr há han inh, kÿ ag kã ù tóg vãfor ja tũ nÿ. Ûn pir tóg hã ra vãfor kÿ nÿ inhhã, hã ra tóg ti to rán kÿ nÿ, ti tÿ nÿgme ki kutênh ke ti, hã kÿ ti tÿ ki kutênh ke nê ha.

¹³ Ûri sóg ã kukãm kãtÿg mÿ, hã ra sóg ver tag ki ag mÿ kãmén mÿ, ti tÿ ag mÿ sér tÿ jé, ti tÿ inh mÿ sér tÿ tag ri ke tÿ jé, ag mÿ.

¹⁴ Ag mÿ sóg hur ã vÿ kãmén. Kÿ ù tÿ inh ki ge tũ ag vÿ ag to jũ mÿ, ag tÿ tÿ ag mré ke tũ nÿtÿn kÿ. Inh pi(jé) tÿ ag mré ke nÿ gé’, ù tÿ ag to jũ mÿ ên mré.

¹⁵ Hã ra sóg ã mÿ: “ha ag jé prêr,” he tũ nĩ, “ag tÿ ga tovãnh jé,” he tũ sóg nĩ. “Nén-Kórég jo ag jy nĩgãn nĩ,” he sóg mũ ã mÿ.

¹⁶ Ag pi(jé) tÿ inh ki ge tũ ag mré ke nÿtĩ'. Tÿ sóg ag mré ke tũ nĩ gé, ù tÿ inh ki ge jãvãnh ên ag mré.

¹⁷ ã ví há ki ag kanhrãn nĩ, ã tÿ ùn kuprêg mũ ên ag, ag tÿ komêr hã ã ri ke nÿtĩ jé. ã ví ên vÿ tÿ vênh ví há tãví nĩ.

¹⁸ Inh jênê ã tóg, sÿ ga kri mur jé. Kÿ sóg ã kóm ag jêgnênh mũ, ag tÿ êprã ke kar ên ag mÿ inh kãmén jé.

¹⁹ Ag jagfÿ sóg ã mÿ vênh fêg ke mũ, ag tÿ inh mré ã mÿ vênh vin kÿ nÿtĩ jé.

²⁰ Hã ra sóg nén ù to ví sór mũ gé, sÿ ã mÿ ag kãmén kar kÿ. Û ag tóg ag ví mẽ kÿ inh ki genh ke mũ. Ên ag to sóg ví sór mũ gé.

²¹ Ag kar tÿ tÿ ùn pir nÿtĩnh ken kÿ tóg há tí, ã tÿ inh mré tÿ ùn pir nĩ ên ri ke, isÿ ã mré tÿ ùn pir nĩ ên ri ke. Ag tÿ êg mré tÿ ùn pir nÿtĩn kÿ tóg há tí. Kÿ vênh kar vÿ venh ke mũ, ã tÿ nén to inh jênêg mũ ti.

²² Isÿ ã tóg ùn mág han. Kÿ sóg ag tÿ ùn mág han ke mũ gé, ag tÿ jagnê mré tÿ ùn pir nÿtĩ jé, ã tÿ inh mré tÿ ùn pir nĩ tag ri ke.

²³ Inh mré ke vÿ tÿ ag nÿtĩ, kÿ sóg tÿ ag mré ke nĩ gé, kÿ êg kar vÿ tÿ ùn pir ri ke nÿtĩ. Êg tÿ tÿ ùn pir nÿtĩ tugrĩn vênh kar tóg venh ke mũ, ã tÿ inh jênê ên ti. Ûn tÿ inh ki ge kÿ nÿtĩ ên ag to há tãví ã tóg nĩ, ã tÿ iso há nĩ tag ri ke. Tag ve jé ag tóg ke mũ, êprã ke ag, ag tÿ êg tÿ tÿ ùn pir nÿtĩ tag ven kÿ.

²⁴ Panh', vãsÿ ã tóg iso há nĩgtĩ vê, êg tÿ ga tag han tũg ki. Hã kÿ ã tóg isÿ ùn mág pê han. Kÿ tóg inh mÿ há tĩnh mũ, ag tÿ inh mré nÿtĩn kÿ, ã tÿ inh mÿ ùn vin mũ ên ag. Ag tÿ inh mré nÿtĩn kÿ ag tóg venh ke mũ, ã tÿ isÿ ùn mág han ja ti.

²⁵ Panh', jykre kuryj ã tóg nĩ. Û tÿ inh ki ge tũ ag vÿ ã ki kagtĩg nÿtĩ, ag jãvo sóg ã ki kanhró nĩ. Kÿ tag ki inh mré nÿtĩ ag vÿ ki kanhró nÿtĩ gé, ã tÿ nén to inh jênêg mũ ti.

²⁶ Ag mÿ sóg ã kãmén huri, kÿ sóg ag mÿ ã kãmén mãn ke mũ gé, ag tÿ jagnê to há nÿtĩ jé, ag tÿ ã tÿ iso há tag ri ke nÿtĩ jé. Kÿ sóg ag mré êmãn ke mũ gé,” he tóg, Jesus ti, ã panh mré vémén kÿ.

Ag tÿ Jesus se

(Mt 26.47-56; Mc 14.43-50; Lc 22.47-53)

¹ Jesus tÿ tag tóg kar kÿ tóg ã mré mũ tí ag mré tí mũ sir. Goj tÿ Cedrom kafã ù ra ag tóg pa mũ sir. Tá ka tóg krãnkãn kÿ nÿtĩ. Ka kré ên krêm ag tóg nĩgnĩ mũ sir.

² Hã ra Judas tóg ti tũg ên ki kanhró nĩ gé. Tã tóg ã mré mũ tí ag mré vémén tÿ hên ri ke han huri, Jesus ti, hã kÿ Judas tóg ag tÿ ra mũnh ke ki kanhró nĩ, ù tÿ pã'i ag mÿ Jesus ve ke mũ ên ti.

³ Kÿ tóg ag nón tá jun mũ sir, Judas ti, soldado ag mré, polícia ag mré hã ke gé, pã'i ag tÿ ag jêgnênh kÿ. Fariseu ag vÿ pã'i ag mré polícia ag jêgnê ja nĩ gé. Lampião e gég ag tóg kãmũ mũ, pĩ jónhkó ke gé, ka kykyv mré hã.

⁴ Hã ra Jesus tóg ki kanhró nĩ, ã jagtar ken ki, kÿ tóg ag kato tẽ mũ sir. Kÿ tóg ag mÿ: “ãjag tÿ ù tÿ hê ve sór nê?” he mũ.

⁵ Kÿ ag tóg ti mÿ: “Nazaré tá ke ên ve sór êg tóg mũ,” he mũ. “Jesus vê mÿr,” he ag tóg mũ. Kÿ Jesus tóg ag mÿ: “inh hã vê,” he mũ. Hã ra Judas tóg ag mré kãtĩg ja nĩ gé, ù tÿ pã'i ag mÿ Jesus ven mũ ên ti.

⁶ Jesus tÿ ag mÿ: “inh hã vê,” hen kÿ ag tóg ti jo ranh ke mũ. Rom ke ag tóg mũ sir, êprã.

⁷ Kÿ Jesus tóg ag mÿ ví mãn mũ. “ãjag tÿ ù ve sór nê?” he tóg. Kÿ ag tóg ti mÿ: “Jesus, Nazaré tá ke ên,” he mãn mũ.

⁸ Kÿ Jesus tóg ag mÿ: “ãjag mÿ sóg: inh hã vê, hé huri. Kÿ ãjag tÿ ise sór kÿ inh mré ke tag ag togvãnh nĩ sir,” he tóg.

⁹ Hã ra tóg tag tóg, ã tÿ to hã ã panh mÿ: “ã tÿ inh mÿ ùn vin ja ên ag vÿ ki nÿtĩ, ag kãki ù vÿ vãfor ja tũ nĩ,” he jan kÿ. ã tÿ ag jy nĩgãn jé tóg polícia ag mÿ: “ag togvãnh ra,” he mũ, ã mré mũ tí ag to.

¹⁰ Hã ra Simão Pedro tóg ã rógro ên vyn kÿ tóg polícia ag kãki ù nĩgrêg kym ke mũ. Ti pêgja tá ti nĩgrêg jê ên tÿ tóg kym ke mũ. Topê tũ ki rĩr tí to pã'i mág camarada ja vê, ti tÿ ù nĩgrêg kym mũ ên ti, ti jijin hã vÿ: Malco, he mũ.

¹¹ Kÿ Jesus tóg Pedro mÿ: “ã rógro tÿ ti pãg ja tá fêg,” he mũ. “Inh panh tÿ inh mÿ: “vêsÿrénh jé ã tóg ke mũ,” he ja vê, hã kÿ sóg ag mÿ vênh fêg ke mũ ha. Vênh nenh ke tũ sóg nĩ,” he tóg, Jesus ti.

¹² Kÿ soldado ag tóg, ãjag pã'i mré (ag tóg) Jesus mrĩnh mũ sir, vãfê tÿ. Polícia ag vÿ ag mré ti mrĩnh mũ gé.

¹³ Kÿ ag tóg ti pére mũ mũ, Anás ãn ra. Caifás kakrã vë, Anás ti, hã ra Caifás vÿ tÿ Topê tũ ki rĩr tĩ ag to pã'i mág nĩ, prÿg ãn kã.

¹⁴ Hã ra Caifás ãn vÿ pã'i ag mÿ: “ũn pir tÿ ãg povo jagfy ter kÿ tóg pãgsĩ nĩ,” he ja nĩ. ãn kakrã ãn ra ag tóg Jesus pére mũ mũ.

Pedro tÿ Jesus to: “ti ki kagtĩg sóg nĩ,” he vén

(Mt 26.57-58, 69-70; Mc 14.53-54, 66-80; Lc 22.54-57)

¹⁵ Kÿ Simão Pedro tóg Jesus nón tĩ mũ, Jesus mré ke ã mré. Hã ra Jesus mré ke ã ãn tóg Topê tũ ki rĩr tĩ ag to pã'i mág ãn ki kanhró nĩ, hã kÿ tóg Jesus nón Anás ãn kãra rã mũ, ãn vãso ra.

¹⁶ Hã ra Pedro tóg re tá jẽ nĩ, ãn jãnkã rã hã. Kÿ Jesus mré ke ã ãn tóg ver ã tÿ jãnkã ki rĩr mũ ãn fi mré vãmén mũ, kÿ fi tóg Pedro ti mÿ: “hã kãrã,” he mũ, ti mré ke ã ãn tÿ pã'i mág ki kanhró nĩn kÿ.

¹⁷ Kÿ fi tóg ti mÿ: “ã hÿn tÿ Jesus mré ke nĩ,” he mũ, Pedro ti mÿ, ã tÿ jãnkã ki rĩr jẽ ãn fi. Hã ra tóg fi mÿ ón kÿ: “vó,” he mũ.

¹⁸ Hã ra Anás camarada ã ag vÿ tá nÿtĩ gé, polícia ag mré. ãn vãso ki ag tóg pĩ han kÿ nÿtĩ, ti tÿ kusa jagy tĩn kÿ. Pĩ to ag tóg tugtón nÿtĩ. Kÿ Pedro tóg ag mré tón nĩ gé, pĩ ãn ti to.

Anás tÿ Jesus ki jẽmẽ sór

(Mt 26.59-66; Mc 14.55-64; Lc 22.66-71)

¹⁹ Kÿ pã'i mág tóg Jesus mÿ: “inh mÿ ã mré mũ tĩ ag kãmén,” he mũ. “ã tÿ nén kãmén tĩ ãn ti kãmén nĩ gé, inh mÿ,” he tóg, Anás ti.

²⁰ Kÿ Jesus tóg ti mÿ: “vẽnh kar mÿ sóg jamã hár(a) tó tĩ,” he mũ. “Vẽnh kanhrãn jafã krẽm sóg tó tĩ, Topê jo ãn krẽm ke gé. Judeu kar tÿ vẽnhmãn kÿ nÿtĩn kÿ sóg ag mÿ kãmén tĩ. Inh pí(jé) vẽn pẽju kÿ tó tĩ, kÿ vẽn kar vÿ ki kanhró nÿtĩ.

²¹ Hã ra ã tóg inh ki jẽmẽ sór mũ'. Inh vĩ jẽmẽg mũ ãn ag ki jẽmẽmũ. Ki kanhró ag tóg nÿtĩ, isÿ ag mÿ nén tó ja ãn ki,” he tóg, Jesus ti.

²² Jesus tÿ tag tó kÿ polícia ã tóg Jesus tânũ mũ, kÿ tóg ti mÿ: “pã'i mág vë mÿr,” he mũ. “Hã ra ã tóg ti mÿ vĩ mũ,” he tóg mũ.

²³ Kÿ Jesus tóg ti mÿ: “kÿ inh hÿn vẽn vĩ kórég tÿ ne tóg?” he mũ. “Ha inh mÿ sÿ vẽn vĩ kórég tó mũ ãn tóg,” he tóg. “Vĩ há han inh, ã tÿ hã ra ne tugnĩn isãnh nẽ?” he tóg.

²⁴ Tag pãte Anás tóg Jesus jẽnẽg mũ sir, ti tÿ Caifás vẽn tĩg jé, Topê tũ ki rĩr tĩ ag to pã'i mág ãn mÿ. Ti mrĩnh kÿ jẽ kÿ tóg ti jẽnẽg mũ.

Pedro tÿ Jesus to: “ti ki kagtĩg sóg nĩ,” he mãn

(Mt 26.71-75; Mc 14.69-72; Lc 22.58-62)

²⁵ Hã ra Simão Pedro tóg tón nĩ nĩ, pĩ to. Kÿ tá nÿtĩ ag tóg ti mÿ: “ã hÿn tÿ ti mré ke nĩ gé,” he mũ. Hã ra tóg ón kÿ: “vó,” he mãn mũ.

²⁶ Kÿ pã'i mág mÿ rãnrãj tĩ ã vÿ tá nĩ gé. Pedro tÿ ã nĩgrẽg kym ja ãn kanhkã ã vë. ãn vÿ Pedro mÿ: “ã ve inh, ka kré krẽm,” he mũ. Tá ã tóg ti mré jẽ ja nĩ,” he tóg mũ.

²⁷ Hã ra Pedro tóg ón kÿ ti mÿ: “vó,” he mãn mũ. ãn kã galo vÿ kynkyr mũ ha.

Pilatos tÿ Jesus ki jẽmẽ

(Mt 27.1-2, 11-14; Mc 15.1-5; Lc 23.1-5)

²⁸ Kusã pẽ ki ag tóg Jesus pére mũ mũ, pã'i tÿ governador ãn ra, ti vãmén jafã ra, palácio ãn ra. Caifás ãn tá ag tóg ti pére kãpa mũ. Hã ra ag tóg pã'i tÿ governador ãn kã ra ge sór tũ nĩ. Ag tÿ festa tÿ Páscoa han ke vÿ kakó tĩ ha, kÿ ã tÿ pã'i tÿ governador ãn kã ra ge mũ vÿ festa tÿ Páscoa ãn ki jẽn ke tũ nĩ. Ag jykre vë. Hã ra ag tóg ko sór mũ, hã kÿ ag tóg kã ra ge ja tũ nĩ sir.

²⁹ Kÿ Pilatos tóg re ra kãkutẽ mũ, ag mré vãmén jé. Kÿ tóg ag mÿ: “ti hẽ ri ké?” he mũ. “Ti vẽn jykre kórég tÿ ne han'?” he tóg, Pilatos ti, Jesus to.

³⁰ Kÿ ag tóg ti mÿ: “vẽn jykre kórég han ti tĩ,” he mũ. “Ti há nĩ ra ãg tóg ã mÿ ti ven ke tũ nĩ vë,” he ag tóg, Pilatos mÿ.

³¹ Kÿ Pilatos tóg ag mÿ: “hã mÿjẽg,” he mũ. “ãjag jykre ki ãjag tóg ti jykre kórég ãn to jykren kÿ tónh ke mũ, ti jykre ti,” he tóg. Hã ra ag tóg ti mÿ: “ti ter ke vë,” he mũ. “Kÿ ã hã vÿ ãg mÿ: “hã ti tén,” henh ke mũ,” he ag tóg, pã'i ag, Pilatos mÿ.

³² Hã ra Jesus tóg ag tÿ fóg tÿ pã'i mÿ ã fẽg ke tag tó ja nĩ, fóg ag tÿ cruz to ti sa kÿ ti tén jé. Hã kÿ ag tóg Pilatos mÿ ti ven mũ.

³³ Kÿ Pilatos tóg ã ãn kãra rã mãn mũ, Jesus mré vēmén jé. Kÿ tóg ti mÿ: “ã mÿ tÿ Judeu ag pã'i mág nĩ?” he mũ.

³⁴ Kÿ Jesus tóg ti mÿ: “ũ nÿ ã mÿ tag tóg?” he mũ. “Ã tÿ vēsóg ki to jykren mÿ vó, pã'i ag tÿ ã mÿ tó mÿ vó?” he tóg.

³⁵ Kÿ Pilatos tóg: “inh pi(jé) tÿ Judeu nĩ,” he mũ. “Ã kanhkã ag vÿ inh mÿ ã fêg, ã povo to pã'i ag. ã hẽ ri ké?” he tóg.

³⁶ Kÿ Jesus tóg ti mÿ: “inh pi(jé) tÿ ga tag kri pã'i mág nĩ,” he mũ. “Isÿ tÿ tag ki ãn mág nĩ ra inh krēm ke ag tóg Judeu ag mré jagnẽ génh ke mũ vẽ, kÿ ag tóg isenh ke tũ nĩ vẽ. Hã ra sóg tag ki tÿ ãn mág tũ nĩ, hã kÿ ag tóg isé, Judeu ag,” he tóg, Jesus ti.

³⁷ Kÿ Pilatos tóg ti mÿ: “kÿ ã mÿ hã ra tÿ pã'i mág nĩ?” he mũ. Kÿ Jesus tóg: “ki hã ã tóg tó mũ,” he mũ. “Isÿ ki hã tó jé, hã jé sóg ga kri mur ja nĩ, hã jé sóg ga kri tĩ mũ gé. Kÿ ã tÿ ki hã tó to há nÿtĩ ên ag kar vÿ inh vÿ jēmẽg mũ,” he tóg, Jesus ti.

³⁸ Kÿ Pilatos tóg ti mÿ: “ne nÿ tÿ ki hã ke nĩ?” he mũ. “Sÿ ki kanhrãn jãvãnh mẽ tóg tũ,” he tóg, Pilatos ti.

Jesus ter ke

(Mt 27.15-31; Mc 15.6-20; Lc 23.13-25)

Kÿ tóg re ra tĩg mãn mũ, pã'i ag mré vēmén jé, kÿ tóg ag mÿ: “ti pi(jé) vẽnhan jykre kórég han tĩ,” he mũ.

³⁹ “Páscoa kar ki sóg ãjag mÿ vese ã kavãg tĩ. Kÿ inh hÿn ãjag mÿ ãjag tÿ ã to: “Judeu ag pã'i,” he mũ ên kyvãh ke mũ,” he tóg, Pilatos ti.

⁴⁰ Hã ra ag kar tóg prẽnrẽr mũ sir. “!..Jesus pijé!..! Barrabás kava ra..!” he ag tóg mũ sir, prẽnrẽr kÿ. Hã ra Barrabás ên vÿ tÿ ãn jykre kórég pẽ nĩ.

19

¹ Kÿ Pilatos tóg soldado ag mÿ: “ti mrãnmrãn ra, ge kÿ,” he mũ.

² Kÿ ag tóg ti mrãnmrãn mũ. Ti mrãnmrãn kar kÿ ag tóg sònhan pĩrĩn kÿ ti krĩ tógfĩg mũ sir. Kÿ ag tóg kur kusũg tÿ ti kri fón mũ gé sir.

³ Ti ki junjun kÿ ag tóg ti mÿ: “viva, Judeu ag pã'i,” he mũ, ti nyg kÿ. Kar ag tóg ti tânhan mũ gé sir.

⁴ Kÿ Pilatos tóg re ra kutẽ mãn mũ gé sir. Kÿ tóg vẽnhan kar mÿ: “ha vé ha,” he mũ. “Ti

jykre kórég mẽ ja tũ sóg nĩ vẽ. Kÿ sóg ãjag mÿ ti ven mũ. Nén ã vẽnhanmÿ han tũ ti nĩ vẽ,” he tóg, Pilatos ti, ag mÿ.

⁵ Kÿ Jesus tóg kãkutẽ mũ, hã ra tóg sònhan tÿ ã krĩ tógfĩn kÿ kãkutẽ mũ, kur kusũg ên tu kÿ ke gé. Kÿ Pilatos tóg vẽnhan kar mÿ: “ti ve ra,” he mũ, ag tÿ hẽn ri ke mũn ti tovãnh jé, ag tÿ ti jagtar ên ve kÿ.

⁶ Pã'i ag tÿ ti ve kÿ, polícia ag tÿ ti ve kÿ ag tóg prẽnrẽr mũ gé sir. “!..Ka to ti sã..! !..Ka to ti sã..!” he ag tóg mũ sir, prẽnrẽr kÿ. Kÿ Pilatos tóg ag mÿ: “kÿ ãjag hÿn inhhã ka to ti sa sór mũ,” he mũ. “Ti pi(jé) nén ã kórég han mũ,” he tóg.

⁷ Kÿ ag tóg ti mÿ: “hã ra tóg: “tÿ inh Topẽ kósĩn nĩ,” he tĩ êg mÿ,” he mũ. “Êg tÿ ã tÿ ge tén ke vẽ. Hã tó ja ti nĩ, êg mÿ, Topẽ ti, hã kÿ tóg rán kÿ nĩ,” he ag tóg mũ sir, Pilatos mÿ.

⁸ Kÿ Pilatos tÿ ti tÿ tÿ Topẽ kósĩn nĩ mẽ kÿ tóg ti mÿ e tãvĩ tĩ.

⁹ Kÿ tóg ã ãn kãra rã mãn kÿ Jesus mÿ: “tÿ ã hẽ tá ke nĩ?” he mũ. Hã ra Jesus tóg ti mré vēmén mãn sór tũ nĩ.

¹⁰ Kÿ Pilatos tóg ti mÿ: “ã mÿ inh mré vēmén ke tũ?” he mũ. “Isÿ ã kavãh sór nĩ kÿ sóg ã kyvãg mũ. Isÿ ka to ã sa sór kÿ sóg to ã sãg mũ gé. Tag to jykren,” he tóg, Pilatos ti, Jesus mÿ.

¹¹ Hã ra Jesus tóg ti mÿ: “Topẽ tÿ ã tÿ pã'i han tũ nĩ ra ã tóg tag han ki kagtĩg nĩnh mũ vẽ,” he mũ. “Hã kÿ ã tÿ ã mÿ inh fêg mũ ên vÿ ã tÿ Topẽ vÿ mranhan mũ tag kãfór nĩ ha,” he tóg, Jesus ti.

¹² Kÿ tóg Pilatos mÿ e pẽ tãvĩ tĩ, kÿ tóg ti kavãh sór mũ sir. Hã ra Judeu ag tóg ti mÿ: “ã tÿ tag kyvãh kÿ ã pi(jé) tÿ êg kar kri pã'i mág pẽ tÿ Imperador ên mré ke nĩ,” he mũ. “Û tÿ vêsÿ pã'i mág han mũ ên vÿ Imperador kato tẽ mũ,” he ag tóg.

¹³ Kÿ Pilatos tóg ag vÿ tag mẽ kÿ mũmẽg mũ, kÿ tóg Jesus jé prẽr mũ, ti tÿ ti mré re tá jẽnhan kutẽ jé. Kÿ tóg ã nĩgja ên kri nĩ nĩ, ã tÿ hẽ tá vẽnhan kar jykre vég tĩ ên ki. Tá ag tóg pó nẽ ja nĩgtĩ, hã kÿ ag tóg to: “Pó Nẽ,” he tĩ, hã vÿ: “Gabatá,” he mũ, Hebreu vÿ ki.

¹⁴ Meio dia ki ke vẽ. Tÿ vaj kÿ ag tóg festa tÿ Páscoa ên han sór mũ, hã kÿ ag tóg ãri vẽnhan tÿ hẽn ri ke kãn mũ. Ên kã meio dia ki Pilatos tóg ã nĩgja kri nĩ nĩ, ag mÿ ag tÿ

vênh jykre han ke mũ ên tó jé. Kĩ tóg Judeu ag mĩ: “ãjag pã'i mág hã vê ha,” he mũ.

¹⁵ Hã ra ag tóg prênprêr kĩ: “!..ti tén ra, ti tén ra, ka to ti sã..!” he mũ sir.

“Kĩ inh mĩ ãjag pã'i mág tỹ cruz to sanh mũ'?” he tóg, Pilatos ti. Kĩ pã'i ag tóg ti mĩ: “pã'i mág êg nỹtĩ, hã vỹ: Imperador, he mũ,” he mũ.

¹⁶ Kĩ Pilatos tóg ag mĩ: “ha cruz to ti sanh mũjêg gé,” he mũ sir.

Ag tỹ Jesus tỹ cruz to sanh ke

(Mt 27.32-44; Mc 15.21-32; Lc 23.26-43)

¹⁷ Kĩ ag tóg Jesus mĩ cruz fig mũ, ti tỹ vyn kĩ pãnónh tỹ Calvário ra tĩg jé, ag tỹ Hebreu vĩ ki to: Gólgota, he mũ ên ra.

¹⁸ Tá ag tóg cruz to ti sãg mũ sir. Ti mré ag tóg ãn régre ag tỹ cruz to ag sãg mũ gé, kĩ ù vỹ ti pẽgia tá cruz to sa, jãvo ù vỹ ti jakãnh tá cruz to sa gé. Jãvo Jesus vỹ ag kujú kã cruz ti to sa gé.

¹⁹ Hã ra Pilatos tóg Jesus to vênh rá han ja nĩ, kĩ ag tóg ti krĩg mĩ vênhrá ên sa ja nĩ, hã vỹ: “Nazaré tá Jesus vê, Judeu ag pã'i tỹ rei vê,” he mũ, vênh rán ki. Hebreu vĩ ki tóg rán kĩ nĩ, Latim vĩ ki ke gé, Grego vĩ ki ke gé.

²⁰ Kĩ Judeu tỹ hên ri ke ag tóg vég mũ sir, vênh rá ti. Jerusalém vỹ tá kakó nĩ, Jesus tỹ hê tá cruz to sa kĩ jê ên ti tá, hã kĩ ù tỹ hên ri ke ag tóg ti venh kãmũjêg sir.

²¹ Kĩ tóg pã'i ag mĩ há tũ nĩ. Hã kĩ ag tóg Pilatos mĩ: “Judeu ag pã'i tỹ rei vê, he ja ã nĩ, vênh rán ki,” he mũ. “Hã ra tóg ki krov ja tũ nĩ. Vêso tóg: “tỹ sóg Judeu ag pã'i tỹ rei nĩ,” he ja nĩ. Kĩ: Judeu ag pã'i mág vỹ tỹ inh nĩ, he rán nĩ,” he ag tóg, Pilatos mĩ.

²² Hã ra Pilatos tóg ag mĩ: “vó,” he mũ. “Rán inh huri, kĩ tóg rán kĩ nĩ ha,” he tóg mũ.

²³ Kĩ soldado ag tóg Jesus tỹ ka to sãg mũ. Kĩ ag tóg ti kur mãn kĩ vênh kãpãm mũ. Û tỹ 4 (ke) ag vê, soldado ag, hã kĩ ag tóg ti kur tỹ vênh kãpãm tỹ 4 (ke) han mũ. Hã ra ti vênh kri fêg ja vỹ kur pir tỹ há nĩ. Kurỹr tũ ti nĩ.

²⁴ Kĩ ag tóg ti capa há ve kĩ jagnê mĩ: “êg hỹn tag kym ke tũ nĩ,” he mũ. “Ti capa to jogar he jé êg tóg ke mũ. Û tỹ mãg mũ ên hã vỹ tóg tunh mũ,” he ag tóg mũ. Kĩ ag tóg to jogar he mũ sir. Hã ra ag tỹ ti kur to jogar he mũ ên tóg rán kĩ nĩ gé, Topê vĩ rá ki, ha

mê. “Inh kur tỹ vênh kãpãm ag tóg, hã ra ag tóg inh kur tỹ vênh kri fêg ja to jogar he mũ,” he ja tóg nĩ, Topê vĩ rá ki, hã kĩ ag tóg ke mũ.

²⁵ Hã ra Jesus mỹnh fi vỹ tá jê nĩ, cruz rã hã, fi jãvy fi mré. Kar kĩ Maria Madalena fi vỹ tá jê nĩ gé, kar kĩ Maria ù fi ke gé, Clopas prũ fi.

²⁶ Kĩ Jesus tóg ã mỹnh fi vég mũ sir. Ti mré tĩ mũ ù vỹ fi to grên ke kĩ jê nĩ, Jesus tỹ ù to há pẽ ên ti. Kĩ Jesus tóg ã mỹnh fi mĩ: “tag vỹ tỹ ã kósin nĩnh mũ ha,” he mũ, ã mré tĩ mũ ên to.

²⁷ Jãvo tóg ti mĩ: “fi hã vỹ tỹ ã mỹnh nĩnh mũ ha,” he mũ gé, fi to. Hã kĩ ti mré tĩ mũ ên tóg fi mĩ: “inh mré nĩnh kãtĩg,” he mũ, kĩ fi tóg ti ãn krêm nĩ nĩ, ti tỹ Jesus jêgia ki fi jê'ỹn jé.

Jesus ter

(Mt 27.45-56; Mc 15.33-41; Lc 23.44-49)

²⁸ Jesus tỹ ã mỹnh fi mĩ tag tó kar kĩ tóg sir ã tỹ nén hyn han ke mũ ên hyn han kãn ja nĩ. Hã to jykren kĩ tóg hã ra nén tỹ ã to rán kĩ nĩ ên hyn han kãn sór mũ, hã kĩ tóg: “inh og há tóg tĩ,” he mũ sir.

²⁹ Tá runja ù vỹ nĩ nĩ, hã ra vinho kaja pir vỹ ki nĩ, runja ên ki. Kĩ ag tóg esponja tỹ vinho ki tỹ pun ke mũ, kĩ ag tóg ka tỹ hissopo jurỹn kĩ (ag tóg) nén kugpe jafã ên kusón mũ, kusón kĩ ag tóg vinho kãra rãg kĩ ti mĩ jun mũ sir, vinho ti.

³⁰ Kĩ tóg ki ãnh ãnh ge mũ sir, vinho ên ki. Kĩ tóg: “ke kãn inh huri,” he mũ. Kĩ ti krĩ tóg héré' he mũ, kĩ tóg hun ke mũ. Kĩ tóg hur ter.

Soldado ù tỹ Jesus kusón

³¹ Kĩ Judeu ag tóg Pilatos mĩ to vĩ mũ, soldado ag tỹ ù tỹ ka to sa kĩ nỹtĩ ag fa mrynhmranh jé, ag tỹ kãnhmar kãgter jé. Tỹ vaj kĩ ag mĩ festa mág vê, kĩ ag tóg ùri festa ên to nén kar kãnkãn tĩ gé. Hã ra tóg ag mĩ kórég nĩ, ù tỹ ag festa kurã ki cruz to sa kĩ ter mũ ti. Hã kĩ ag tóg Pilatos mĩ ag kãgtén ke to vĩ mũ, ag tỹ ka to ag kãrem jé.

³² Kĩ soldado ag tóg ù tỹ Jesus mré cruz to vin kĩ nỹtĩ ag fa mrynhmranh mũ mũ.

³³ Kĩ ag tóg Jesus fa mrynhmranh sór mũ gé, hã ra tóg hur ter, hã kĩ ag tóg mrynhmranh tũ nĩ sir.

³⁴ Kĩ soldado ù tóg ã rógro tỹ ti jën'yr ki kusón mũ, kĩ ti kyvénh tóg ki kãkutẽ mũ, kyvénh jãpri mré.

³⁵ Tag ve inh, mÿr, ha mẽ, hã kĩ sóg ãjag mÿ tó mũ. Sÿ ki hã tó vë. Sÿ ãjag mÿ tag kãmén vë, ãjag tỹ inh vỹ tag kri fi jé, ãjag tỹ ti ki ge sór jé.

³⁶ Hã ra tóg rán kĩ nĩ gé, ag tỹ ti kusón ke tag ti. “Ag pi(jé) ti kuka mrynhmranh ke mũ,” he tóg, Topẽ vỹ rán kĩ nĩ ki.

³⁷ Kĩ tag tóg rán kĩ nĩ gé, hã mẽ. “Ag tỹ ùn kusón mũ ên ve jé ag tóg ke mũ,” he tóg mũ gé, Topẽ vỹ ki, Jesus to.

Ag tỹ vënh kej ra ti va mũ

(Mt 27.57-61; Mc 15.42-47; Lc 23.50-56)

³⁸ Kĩ Jesus to há ù tóg nĩgtĩ, Arimatéia tá José. Ên vỹ ti mré tĩg ja tũ nĩgtĩ, ti tỹ pã'i ag kamëg kĩ, hã ra tóg Jesus to há nĩ. Ên vỹ tóg sir Pilatos venh tĩ mũ, kĩ tóg ti mÿ: “sÿ Jesus tỹ ka to ti kãtérem há tóg tĩ,” he mũ. Kĩ Pilatos tóg ti mÿ: “há ti nĩ,” he mũ. Kĩ Arimatéia tá José ên tóg Jesus tỹ cruz to ti kãtérem tĩ mũ.

³⁹ Kĩ Nicodemos vỹ kãtĩ mũ gé, ù tỹ kuty tá Jesus mré vëmén mũ ên ti. Ên vỹ ger há ma kãtĩ mũ, 45 (ke) quilos vë mÿr. Ka tỹ mirra jënjo ger há vë, kar ka tỹ aloés jënjo ger há mré. Ên ma kãtĩg tóg mũ, Nicodemos ti.

⁴⁰ Kĩ ag tóg Jesus ti kãtérem mũ sir, cruz to, José mré Nicodemos ti. Ti pãg ag tóg mũ sir, kur tỹ, hã ra ag tóg nén ger há ên tỹ ti pãg ke ên kãkã nĩm mũ gé. Judeu ag jykre hã vë, ag tỹ vënh kej tá ù fi kĩ.

⁴¹ Ka kré ù vỹ Gólgota tá kakó nĩ, kĩ tóg tá vënh kej tãg nĩ, pãró nor ti, ka kré ên tá. Kuprã ti nÿ.

⁴² Ên kãkã ag tóg ti fig mũ, ti kakó nĩn kĩ. Hã ra tóg rãké nÿ ha, kĩ ag festa tóg kakó' he mũ ha, hã kĩ ag tóg vënh kej tãg ên kãkã Jesus fig mũ sir.

20

Jesus rĩr mãn

(Mt 28.1-8; Mc 16.1-8; Lc 24.1-12)

¹ Tỹ vaj ùn kĩ, semana ki kurã ve ki Maria Madalena fi tóg Jesus venh tĩg sór mũ, ti kej tá. Kusã pẽ ki fi tóg ra tĩ mũ, kurã sĩ hã ra. Hã ra fi tóg tá jun kĩ (fi tóg) pó ên vég mũ, ti

kej nĩfe ên ti. Kunũnh kĩ tóg jẽ nĩ, kĩ tóg sir nor kĩ nÿ nĩ, ti kej ti.

² Kĩ fi tóg Simão Pedro to vënhvãg tĩ mũ sir, Jesus mré tĩ tĩ ù to ke gé, ù tỹ Jesus to há tãvĩ ên to. Kĩ fi tóg ag mÿ: “êg Senhor va ag tóg mũ ja nĩ,” he mũ. “Ã kej kãki tóg tũ nĩ,” he fi tóg mũ. “Ag hÿn hẽ ra ti va kagáv,” he fi tóg mũ ag mÿ.

³ Kĩ ag tóg venh mũ mũ gé, Pedro ti, Jesus mré tĩ tĩ ù ên ke gé.

⁴ Pétẽ ag tóg mũ mũ, hã ra ù ên tóg Pedro kã raran ke mũ, kĩ tóg tá jun vén mũ.

⁵ Kĩ tóg pãró nor ên ki pãnh ke kĩ kãtã kur ên vég mũ, ti pãg ja ti, hã ra tóg kãra rã ja tũ nĩ.

⁶ Kĩ Simão Pedro tóg ti nón tá jun mũ gé, hã ra tóg inhhã kãra rã mũ, ti kej kãra, Pedro ti. Kĩ tóg kur ên vég mũ gé sir.

⁷ Ti krĩ pãg ja vỹ vyr mÿ nĩ nĩ, kónhpën kĩ.

⁸ Kĩ ù ên tóg ti nón kãra rã mũ gé sir, kĩ tóg ã tỹ ven kĩ: “hã ja vë,” he mũ.

⁹ Vãhã ag tóg ki kanhró nÿtĩ. Tag to hã ag tóg ti vỹ to jykrén há han ja tũ nĩ ver, ti to nén rán kĩ nĩ ên to, ti tỹ ã ter kar kĩ rĩr mãn ke ên to. Vãhã ag tóg ki kanhró nÿtĩ.

¹⁰ Ag tỹ ti kej tỹ kuprã nÿ ve kar kĩ ag tóg vÿnvÿn ke mũ, ãjag ãn ra.

Jesus tỹ Maria Madalena fi mÿ vënh ven

(Mt 28.9-10; Mc 16.9-11)

¹¹ Hã ra Maria Madalena fi tóg tá jẽ nĩ, ti kej nor nĩ ên tá. Fÿ fi tóg jẽ nĩ. Fi fÿ kĩ fi tóg ti kej to pãnh ke kĩ (fi tóg) kãtã êvãnh mũ sir.

¹² Kĩ fi tóg ùn régre ag vigvég mũ. Topẽ tỹ jëgnë jafã ag vë. Kur kupri rĩnh kĩ ag nĩgnĩg kĩ nÿtĩ, Jesus nÿgja tá, ti kej kãtã. Û tóg ti krĩ nÿgja tá nĩ, kĩ ù tóg ti pën nÿtĩgja tá nĩ gé.

¹³ Kĩ ag tóg fi mÿ: “ã tỹ ù jãvãnh kĩ fÿ nẽ, jÿ?” he mũ. Kĩ fi tóg ag mÿ: “inh Senhor va ag tóg mũ ja nĩ, hã ra sóg ag tỹ hẽ ra ti va mũ ja ên ki kagtĩg nĩ,” he mũ.

¹⁴ Kĩ fi tóg vësykã êvãnh mũ, hã ra Jesus tóg tá jẽ nĩ. Hã ra fi tóg ti ki kagtĩg nĩ.

¹⁵ Kĩ tóg fi mÿ: “ã tỹ ù jãvãnh kĩ fÿ nẽ, jÿ?” he mũ gé. Hã ra fi tóg ti to: “ti hÿn tỹ ka kré tag ki rĩr tĩ jẽ, he sóg mũ,” he mũ. Hã kĩ fi tóg ti mÿ: “ã mÿ ag tỹ hën ra ti va mũ vég tũ, vÿ?” he mũ.

¹⁶ Kĩ Jesus tóg fi mÿ: “Maria’,” he mũ, fi jiji tó kĩ. Kĩ fi tóg ti tỹ fi mÿ fi jyjy tó kĩ (fi

tóg) vâhã ti ki kanhrân mũ sir. Kĩ fi tóg ti mĩ: “Raboni’, ã hã mĩ?” he mũ. Hebreu vĩ ki fi tóg tó mũ, hã kĩ fi tóg: “Raboni’,” he mũ. Ëg vĩ ki ãg tóg tag to: “Senhor,” he ti. Fi tĩ vâhã Jesus ki kanhrân kĩ nĩn kĩ fi tóg ti mĩ ke mũ.

17 Hã ra Jesus tóg fi mĩ: “inh vóg tũg nĩ ver,” he mũ. “Isĩ ver inh panh ra tâprynh ke vê. Inh kanhkã ag mĩ tónh tĩg nĩ hã ra. Ag mĩ: “isĩ ver inh panh venh tĩg ke vê, hã ra tóg tĩ ãjag panh nĩ gé, he tóg,” hemnĩ. “Isĩ ver inh Topê to tâprynh ke vê, kĩ tóg tĩ ãjag Topê nĩ gé, he ti,” hemnĩ ag mĩ,” he tóg Jesus ti, Maria Madalena fi mĩ.

18 Kĩ fi tóg ti mũ, ti mré mũgtĩ ag mĩ tó jé. “Ëg Senhor ve inh,” he fi tóg mũ. Kĩ fi tóg ag mĩ tó kãn mũ sir, ti tĩ fi mĩ nén tó mũ ãn ti.

*Jesus tĩ ã mré mũ ti ag mĩ vênh ven
(Mt 28.16-20; Mc 16.14-18; Lc 24.36-49)*

19 Kurã ãn kã, semana tĩ kurã ve ãn tĩ rãkãnh kĩ ag tóg vênhmãn kĩ nĩtĩ, ãn ã krêm, ti mré mũ ti ag. Hã ra ag tóg jãnkã nĩfénh ja nĩ, chave tĩ, ag tĩ ãprã pã'i ag kamêg kĩ. Hã ra Jesus tóg vâhã vênh ven mũ, ag kãki, kĩ tóg ag mĩ: “mĩ sér nĩtĩmĩ,” he mũ.

20 Tag tó kĩ tóg ag mĩ ã nĩgé nug ven mũ, ã jên'yr ti ke gé. Kĩ tóg ag mĩ sér ti sir, ag tĩ ãg Senhor ven kĩ.

21 Kĩ tóg ag mĩ ke mãn mũ. “Mĩ sér nĩtĩmĩ,” he tóg. “Inh panh tĩ inh jênê vê. Kĩ sóg ãri ãjag jênêg mũ gé, ti tĩ inh jênê ri ke,” he tóg.

22 Tag tó kar tóg ag ki hu he mũ, ag kar ki, kĩ tóg ag mĩ: “Topê kuprĩg vĩ tĩ ãjag jagrê nĩtĩ ha,” he mũ.

23 “Ãjag tĩ ã mĩ: “ã tĩ Topê vĩ mranh ja ãn tĩ tóg vênh pãte fón mũ,” hen kĩ tóg vênh pãte fón kĩ nĩ nĩ. ãjag tĩ ã mĩ: “ã mĩ ti vênh pãte fón ke tũ nĩ,” hen kĩ tóg vênh pãte fón ke tũ nĩ,” he tóg, Jesus ti, ti tĩ ag mĩ vênh ven vên kĩ.

Tomé tĩ vâhã Jesus ve

24 Hã ra Tomé vĩ ag mré nĩ ja tũ nĩ, ag tĩ Jesus vэг mũ ãn kã. Tomé ãn vê, ag tĩ ã to: “ũn vègni,” he mũ ãn vê, Jesus mré ti tĩ ãn ti.

25 Ag tĩ Tomé ãn ve kĩ ag tóg ti mĩ: “ãg Senhor ve ãg,” he mũ. Hã ra tóg ag mĩ: “ti nĩgé nug ve sór inh mũ,” he mũ, “isĩ ag tĩ

prego tĩ ti nĩgé nugnón ja ãn mẽ jé, inh nĩgé tĩ,” he tóg mũ. “Kĩ sóg ti jên'yr ki mẽnh ke mũ gé, sĩ ki ti kusón ja ãn mẽ jé. Ke tũ nĩ (mũ) ra isóg kri nĩm ke tũ pẽ nĩ, ti rĩr mãn kri,” he tóg, Tomé ti.

26 Kurã tĩ 8 (ke) tũg kĩ ag tóg vênh mãn kĩ nĩtĩ gé, kĩ Tomé vĩ ag mré nĩ gé. ãn jãnkã vĩ ki chaven kĩ nĩtĩ. Kĩ Jesus tóg ag mĩ vênh ven mãn mũ, ag mré jên kĩ. Kĩ tóg ag mĩ: “mĩ sér nĩtĩmĩ,” he mũ.

27 Kĩ tóg vèsĩmér Tomé mĩ: “ã nĩgé tĩ inh nĩgé nugnor mẽ,” he mũ. “ã nĩgé tĩ inh jên'yr kusón ja ãn ti mẽ gé. Kri nĩmĩ, to: “vênh ó vê,” he mãn tũg nĩ,” he tóg, Jesus ti.

28 Kĩ Tomé tóg ti mĩ: “inh Senhor,” he mũ. “Topê’,” he tóg.

29 Kĩ Jesus tóg ti mĩ: “vâhã ã tóg kri nĩm sór mũ ha, ã tĩ inh ve kĩ,” he mũ. “ũ tĩ ã tĩ inh vэг tũ ra kri nĩm mũ ãn mĩ tóg vĩ há pẽ han ke mũ, Topê ti,” he tóg, Jesus ti, ti tĩ ag mĩ vênh ven mãn kĩ.

Ëg tĩ Jesus ki ge jé livro tag tóg rãn kĩ nĩ

30 Jesus vĩ ag rĩnve ãg tĩ nén han vãn hyn han kãn ja nĩgtĩ, nén tĩ hên ri ke, hã ra sóg rãn kãn ja tũ nĩ.

31 Sĩ livro tag rãn vê, ã tĩ vênh rá tag vэг mũ kar ãn ag tĩ Jesus ki ge sór jé, ag tĩ ti to: “Cristo vĩ tĩ ti nĩ, Topê kósĩn vĩ tĩ ti nĩ,” he jé. Kĩ ãjag tĩ ti ki ge kĩ ãjag tóg rĩr krĩg ja tũ ãn venh ke mũ, ti tugrĩn, mĩr, ha mẽ.

21

Jesus tĩ ã mré mũ ti ã ag mĩ vênh ven mãn

1 Tag pãte Jesus tóg kejên goj tĩ Tiberiades tá ag mĩ vênh ven mãn mũ, kĩ tóg ge ti, ha mẽ.

2 Simão Pedro vĩ tá nĩ, Tomé ti ke gé, ag tĩ ã to: “ũn vègni,” he mũ ãn ti, kar kĩ Natanael ti ke gé, ãmã tĩ Caná tá ke ãn, ga tĩ Galiléia tá ke ãn, kar kĩ Zebedeu krê ag vĩ tá nĩtĩ gé, ã tĩ Jesus mré mũ ti régre ã ag ke gé.

3 Kĩ Simão Pedro vĩ ag mĩ: isĩ pirã kugmĩnh tĩg vê,” he mũ. Kĩ ag tóg ti mĩ: “ã mré ãg mũnh mũ,” he mũ gé. Kĩ ag tóg barco ki ge mũ, goj kri mũ jé. Hã ra ag tóg nén ã kãgmĩg tũ pẽ nĩ, kuty ãn kã.

⁴ Tỹ vaj kỹ kusã pẽ ki, rã tỹ jun ke mũ ra Jesus vỹ ga fyr tá jẽ nĩ, hã ra ag tóg ti ki kagtĩg nỹtĩ ver.

⁵ Kỹ tóg ag mỹ: “ãjag mỹ pirã ù kãgmĩg tũ?” he mũ. Kỹ ag tóg ti mỹ: “hỹ,” he mũ.

⁶ Kỹ tóg ag mỹ: “rede tỹ barco pẽgia tá fón,” he mũ, “kỹ ãjag tóg kugmĩnh ke mũ, pirã ti,” he tóg mũ. Kỹ ag tóg ke mũ. Kỹ tóg fór mũ, rede ti, kỹ ag tóg kãtãnfyn kórég nỹtĩ, ti kufy tĩn kỹ, pirã e nỹtĩn kỹ.

⁷ Kỹ ù tóg Pedro mỹ: “ẽg Senhor hã vễ,” he mũ. Jesus tỹ ù to há pẽ ẽn vỹ Pedro mỹ ke mũ. Kỹ Pedro tóg ti vỹ tag to ã kur rĩnh mũn mũ. Kunũnh ja ti nĩ, ti kur ti. ã kur rĩnh kỹ tóg barco ki kãkutẽ kỹ (tóg) goj kãmĩ tĩ mũ sir, ti tỹ Jesus kukãm tĩg jé, goj kãmĩ.

⁸ Hã ra ag tóg ti nón barco kãmĩ mũ mũ gé, rede ẽn raran ag tóg mũ mũ. Kakó ti nĩ ha, goj fyr ti, 100 (ke) metros hỹn.

⁹ Ag tỹ vagvag ke pa kỹ ag tóg Jesus jãká vэг mũ sir. Pirã kugjin tóg nĩ nĩ, kỹ ẽmĩ tóg tá ti rã nĩ gé.

¹⁰ Kỹ Jesus tóg ag mỹ: “ãjag pirã gé kãmũjẽg,” he mũ.

¹¹ Kỹ Simão Pedro tóg barco kãra rã kỹ rede ẽn raran mũ. Goj fyr kukãm tóg ma tĩ mũ, kỹ tóg vag ke mũ sir, tar tá. Hã ra tóg fór nĩ, rede ti, pirã tỹ, 150 (ke) hỹn, pirã mág tãvĩ. Hã ra rede tóg jar ja tũ nĩ, ti e tãvĩ nỹtĩ ra.

¹² Kỹ Jesus tóg ag mỹ: “konh kãmũjẽg,” he mũ. Hã ra ag tóg ti mỹ: “tỹ ã ù nĩ?” he jãvãnh nỹtĩgĩ. Ti ki kanhró ag tóg nỹtĩ, ti tỹ tỹ ẽg Senhor nĩn ki.

¹³ Kỹ Jesus tóg ag mỹ ẽmĩ ẽn kã vễnh ken mũ sir, pirã ti ke gé.

¹⁴ Jesus tỹ ag mỹ vễnh ven tãgtũ vễ ha, ẽn kã, ti ter kar kỹ rĩr mũn kar kỹ.

Jesus tỹ Pedro mré vễmẽn

¹⁵ Ag jẽn kar kỹ Jesus tóg Simão Pedro mỹ: “Simão!,” he mũ. “João kósin!,” he tóg. “ã mỹ iso há tãvĩ nĩ, ã mré ke ag tỹ iso há nỹtĩ ẽn kãfór?” he tóg, Jesus ti, Pedro mỹ. Kỹ tóg ti mỹ: “hỹ, hã vễ,” he mũ. “Ki kanhró ã tóg nĩ, isỹ ã to há pẽ nĩn ki,” he tóg, Pedro ti, Jesus mỹ. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vỹ tómnĩ,” he mũ.

¹⁶ Kỹ tóg ti mỹ vỹ mũn mũ, Jesus ti, Pedro mỹ. “Simão!,” he mũn tóg. “João kósin!,” he tóg. “ã mỹ iso há nĩ?” he tóg. Kỹ tóg ti mỹ:

“hỹ, hã vễ,” he mũn mũ. “Ki kanhró ã tóg nĩ, isỹ ã to há nĩn ki,” he mũn tóg. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vỹ tómnĩ,” he mũn mũ gé.

¹⁷ Kỹ Jesus tóg ti mỹ vỹ mũn mũ gé, vỹ tãgtũ han kỹ. “Simão!,” he tóg. “João kósin!,” he tóg. “ã mỹ iso há nĩ?” he tóg. Kỹ tóg Pedro mỹ e tĩ, ti tỹ ti mỹ ke tãgtũ han kỹ. Ti ki jẽmẽ tãgtũ han tóg, hã kỹ tóg ti mỹ e tĩ. Kỹ tóg ti mỹ: “nén kar ki kanhró ã tóg nĩ,” he mũ. “Ki kanhró ã tóg nĩ, isỹ ã to há nĩn ki,” he tóg, Jesus mỹ, Pedro ti. Kỹ Jesus tóg ti mỹ: “kỹ ù tỹ inh ki ge kỹ nỹtĩ ag mỹ inh vỹ tómnĩ,” he mũn mũ.

¹⁸ “ã mỹ sóg ki hã tó mũ, ha mẽ,” he tóg mũ. “ã kyrũ kã ã tóg ã kur rĩnh kỹ ã tỹ hẽn ra tĩg sór mũ ẽn ra tĩg ja nĩgtĩ. Kejẽn ã kófa nĩnh ke vễ. ẽn kã ã tóg ag mỹ ã nĩgẽ tỹ vễnh kri tỹ tam kenh mũ, kỹ ag tóg ã senh mũ, ha vemnĩ, kỹ ag tóg ã pére mũnh mũ, ã tỹ hẽ ra tĩg sór tũ ẽn ra,” he tóg, Jesus ti, Pedro mỹ.

¹⁹ Ti tỹ ti mỹ ag tỹ ti tén ke tó vễ. Hã ra ag tóg Topẽ tỹ tỹ ùn mág nĩ venh ke mũ, ag tỹ Pedro tén ke tugrĩn. Tag tó ti, Jesus ti, Pedro mỹ. Tag pãte tóg ti mỹ: “mũ jé ha, inh mré,” he mũ gé sir, Jesus ti.

Jesus tỹ João to Pedro mỹ vỹ

²⁰ Ag mũn kỹ Pedro tóg vễsỹjãm ẽvãnh kỹ (tóg) ù tỹ Jesus nón kãtĩg mũ ẽn vэг mũ gé, Jesus tỹ ù to há tãvĩ ẽn. Ag jẽn rén ja ẽn tá tóg Jesus rã hã nĩ ja nĩ, ti mré tóg jagnẽ to grẽn ke kỹ nĩ ja nĩ, Jesus tỹ ù to há tãvĩ ẽn. ẽn kã tóg Jesus ti mỹ: “ũ nỹ hỹn ã ven ke mũ, pã'i ag mỹ?” he ja nĩ. ẽn hã vỹ Jesus nón tĩg mũ, Pedro tỹ ti mré tĩg kỹ.

²¹ Pedro tỹ ti tỹ ag nón kãtĩ mũ ve kỹ tóg Jesus mỹ: “jãvo ù tỹ ẽg nón kãtĩg mũ tag ti?” he mũ.

²² Kỹ Jesus tóg ti mỹ: “sỹ ti mỹ nén tó mũ vỹ vyr mỹ nĩ,” he mũ. “Kỹ sỹ ã mỹ nén tó mũ vỹ vyr mỹ nĩ gé,” he tóg mũ. “Sỹ ti mỹ: “ter ke tũ ã tóg nĩ, isỹ vỹn ke ve jé ã tóg ke mũ,” he sór mũ ra sóg ti mỹ tónh ke mũ vễ,” he tóg. “ã hã mỹ sóg ã tũ tónh ke mũ, hã kỹ sóg ã mỹ: mũ jé ha, inh mré, he mũ,” he tóg, Jesus ti, Pedro mỹ. Ti tỹ ù tỹ ag mré kãtĩ mũ ẽn to ken hã vễ.

²³ Jesus vỹ tag tugrĩn vễnh kar tóg ti to: “ter ke tũ ti nĩ,” he tĩ, Jesus ki ge kỹ nỹtĩ kar

ag. Hã ra Jesus pi(jé) ti to: “ter ke tũ ti nĩ,” he ja nĩgtĩ'. Ti to tóg: “sỹ ti mỹ: ter ke tũ ã tóg nĩ, isỹ vỹn ke ve jé ã tóg ke mũ, he sór mũ ra sóg ti mỹ tag tónh ke mũ vê,” he ja nĩ, Pedro mỹ, ù ẽn to. Hã kỹ ti to: “ter ke tũ ti nĩ,” he tũg nĩ.

João tỹ vẽnh kãmén

²⁴ João vỹ tỹ inh nĩ. Inh hã vỹ tag ve kãn ja nĩ, hã kỹ sóg rán. Ki hã tó sóg tĩ, vẽnh kar vỹ tag ki kanhró nỹtĩ.

²⁵ Hã ra sóg Jesus tỹ nén hyn han mũ ẽn rán kãn ja tũ nĩ. Ti tỹ nén hyn han mũ ẽn vỹ e tãvĩ nỹtĩ, e tãvĩ. Ęg tỹ tag rán kãn sór mũ ra Ęg tóg livro tỹ hẽn ri ke hyn han ke mũ vê. Kỹ Ęg hỹn hẽ tá livro kar tag vin han ke mũ'? Sĩ ti nĩ, Ęg ga ti, kỹ Ęg tỹ hẽ tá livro tag vin han ke tóg tũ tĩnh mũ, Ęg tỹ Jesus tỹ nén hyn han ja ẽn rán kãn sór mũ ra.

Hã vê.

APÓSTOLO AG TỸ NÉN HAN KĀME

¹ Teófilo, inh livro ve ki sóg ã mỹ Jesus tỹ nén han kar tó ja nĩ, ti tỹ nén han vén mũ ên ti, ti tỹ nén han rén ên ti ke gé. Ti tỹ êg kanhrân mũ ên rán sóg huri ke gé.

² Kĩ sóg ti tỹ kanhkã ra tãpřy mũ rán huri ke gé. ã tỹ kanhkã ra tãpřy to hã tóg apóstolo ag mré vémén ja nĩ ver, ã tỹ ùn kupřeg mũ ag mré. Topě kupřig tỹ ti mỹ nén tó mũ ên tó tóg mũ ag mỹ, ag tỹ ki hã han jé.

³ ã ter kar kũ Jesus tóg ag mỹ vènh ven tỹ hèn ri ke han ja nĩ, kurã tỹ 40 (ke) ki. Rĩr mǎn kũ tóg ag mỹ vènh ven ja nĩ, ti tỹ ùn kupřeg ja ên ag mỹ. Ag tỹ ti ve kũ, ag tỹ ti mré vémén kũ ag tóg ti rĩr jẽ ki kanhró nỹtĩ, apóstolo ag. Ag mỹ tóg Topě tỹ tỹ êg pã'i nĩ kãmén mũ, Jesus ti.

⁴ Kejèn tóg ag mré nĩ nĩ. Kũ tóg ag mỹ: “ver cidade tỹ Jerusalém tá kãpa tũg nĩ,” he mũ. “Tá nỹtĩ kũ Topě tỹ ãjag mỹ nén tó ja jãvǎnh nĩ,” he tóg, “isỹ ãjag mỹ nén tó ja ên ti,” he tóg.

⁵ “João vỹ goj tỹ êg kygpe ja nĩgtĩ,” he tóg. “Hã ra kãnhmar ãjag tóg Topě kupřig tỹ jagřè venh ke mũ. Sỹ ãjag kypenh ken hã vè,” he tóg, Jesus ti. Kũ tóg tĩ mũ sir.

Jesus tỹ kanhkã ra tĩg

⁶ Kejèn ag tóg vènh mǎn mǎn mũ sir, Jesus tỹ ùn vin mũ ag. Kũ tóg ag mré nĩ nĩ, Jesus ti. Kũ ag tóg ti mỹ: “Senhor,” he mũ. “ã mỹ ù ri êg pã'i mág fẽg mǎn mũ, êg povo tỹ Israel tỹ pã'i mág?” he ag tóg ti mỹ.

⁷ Hã ra tóg ag mỹ: “vó,” he mũ. “Topě hã ki kanhro nĩ,” he tóg. “ãjag tũ pijé,” he tóg. “Kurã ên ki kanhrân ke tũ ãjag tóg nĩ, Topě tỹ ãjag pã'i mág fẽg mǎn ke kurã ti. Topě hã ne kurã tag tónh ke mũ,” he tóg.

⁸ “Hã ra Topě kupřig vỹ tỹ ãjag jagřè nĩnh ke mũ. Kũ ti hã vỹ ãjag tar han ke mũ, ãjag tỹ inh kãmén jé. Cidade tỹ Jerusalém tá ãjag tóg inh kãmén ke mũ, ga tỹ Judéia tá ke gé, ga tỹ Samaria tá ke gé, ga fyn ja tá hã ke gé mỹr,” he tóg, Jesus ti.

⁹ ã tỹ tag tó kar kũ tóg vǎhã kynh mỹ tãpřy mũ sir ag rĩnve, kũ kanhkã góg vỹ ti kri rũm ke mũ sir, ti ve mǎn tũ ag tóg nĩ sir.

¹⁰ Hã ra ag tóg kanhkã tugnỹm mũ, ag tỹ ti tĩg ven kũ, ti tỹ ùn vin mũ ag.

Kũ vǎhã ùn régre ag tóg tá nỹtĩ, kur kupri rĩnh kũ. Topě tỹ jènẽ jafã ag vè, ùn régre ên ag.

¹¹ Kũ ag tóg ag mỹ: “ha vé, Galiléia tá ke,” he mũ. “ãjag hã ne tóg kanhkã tá êvǎnh nỹtĩ nĩ,” he ag tóg. “Jesus vỹ vỹn kenh mũ, ti tĩg ja ên ri ke han jé tóg ke mũ. Ti tỹ kanhkã ra tãpřy vè, hã ra tóg tá kãtère mǎn ke mũ gé,” he ag tóg, Topě tỹ jènẽ jafã ag, Jesus tỹ ùn vin mũ ag mỹ.

Ag tỹ Matias fẽg

¹² Kũ Jesus tỹ ùn vin mũ ag tóg vỹnvỹn ke mũ sir, Jerusalém ra, krĩ tỹ Oliveiras tá kãmũ kũ. Jerusalém kakó kã ti nĩ, 1 quilômetro tá ti nĩ hỹn, krĩ tỹ Oliveiras ti.

¹³ Ag tỹ Jerusalém tá junjun kũ ag tóg ãn to jãpřy jafã to jãpřy mũ, tá nỹtĩ jé, ãn kri. ù tỹ tá nỹtĩ ag hã vè: Pedro, João, Tiago, André, Filipe, Tomé, Bartolomeu, Mateus, Tiago ù hã vỹ: Alfeu kósin, he mũ, Simão ke gé, vỹ tar han tĩ tag ti, Judas ke gé, Tiago kósin tag ti.

¹⁴ Ag kar ên tóg Topě mré vỹ mũ, jagnẽ mré, ùn tỹtã fag mré hã, Maria fi mré hã, Jesus mỹnh ên fi, Jesus jãvy ag mré hã ke gé, ha mẽ.

¹⁵ Kejèn Jesus mré ke tỹ hèn ri ke ag vỹ tá nỹtĩ nĩ, ãn to jãpřy jafã ên tá, ù tỹ 100 kri 20 (ke) hỹn.

¹⁶ Kũ Pedro vỹ tóg jẽg nẽ mũ, kũ tóg: “ha vé, inh kanhkã,” he mũ. “Vǎsỹ tóg rán kũ nĩ, Judas to,” he tóg. “Topě kupřig tóg Davi krĩn ja nĩgtĩ, ti tỹ Judas to rán jé,” he tóg. “Hã ra tóg ki hã tó ja nĩ, vènh rán ki,” he tóg. “Ag jãmĩ tóg kãtĩg ja nĩ, Judas ti, ù tỹ Jesus kãgmĩnh ke mũ ag jãmĩ.

¹⁷ Hã ra tóg tỹ êg mré ke ja nĩ, kũ ti tỹ nén han mũ tóg êg tỹ nén han mũ ri ke ja nĩ gé,” he tóg, Pedro ti.

¹⁸ “Hã ra tóg Jesus kato jãnkamy mǎn ja nĩ, kũ tóg jãnkamy ên tỹ êpỹ kajãm ja nĩgtĩ. Hã ra tóg ã nunh kã vènh jãján ja nĩ, kũ tóg tam ke kũ kutẽ ja nĩ, kũ ti nug tóg jar ja nĩ, kũ ti nug tóg kãkutẽ ja nĩ, kũ tóg ter ja nĩ, Judas ti,” he tóg, Pedro ti.

19 “Kỹ Jerusalém tá ke kar ag tóg mēg mũ sir, hã kỹ ag tóg ti japỹ to: Aceldama, he mũ, hã vỹ: ẽpỹ kyvénh, he mũ, ẽg vĩ ki,” he tóg, Pedro ti.

20 “Ẽg tỹ Topẽ mỹ jãn jãn jafã ki tag tóg rán kỹ nĩ, hã mẽ: ẽn jamã vỹ vag ke mũ, ù pi(jé) ki ẽmãn mãn mũ', he tóg, vènh rán ki, Judas to,” he tóg, Pedro ti. “Kỹ ù vỹ ge nĩ gé, hã mẽ: ù ù tỹ ti jẽg ja kã jènh ke kỹ ti rãnrãj han ke vè, he tóg mũ gé, vènh rán ki,” he tóg, Pedro ti.

21 “Hã kỹ ẽg tỹ ẽg mré mũ tĩ ù jãvãnh ke vè. Jesus mré tóg tĩg ja nĩgtĩ, ẽg tỹ ùn jãvãnh ke mũ ti, kỹ tóg Jesus tỹ ga mĩ tĩ ẽn ve ja nĩgtĩ gé.

22 João tỹ Jesus kype ve ja tóg nĩ gé. Jesus tỹ kãnhkã ra tâpry ve ja tóg nĩ gé. Jesus tỹ nèn han mũ kar ve ja tóg nĩ, ẽg tỹ ùn jãvãnh ke mũ ti. Kỹ tóg sir Jesus rĩr mãn tónh ke mũ ẽg mré,” he tóg, Pedro ti.

23 Kỹ ag tóg ùn régre ag vin mũ, hã vỹ: José, he mũ, ti jyjy ù hã vỹ: Barsabás, he mũ. Fóg tỹ ti jiji hã vỹ: Justo, he mũ. Ti mré ag tóg Matias fẽg mũ gé.

24 Kỹ ag tóg Topẽ mré vĩ mũ, kỹ ag tóg tag tó mũ, ha mẽ. “Ẽg jóg!,” he ag tóg ti mỹ. “Ẽg tỹ nèn to jykrén mũ ki kãnró ã tóg nĩ,” he ag tóg mũ. “Ã hỹn ù tỹ hẽ kuprẽg, ùn régre tag ag kã,

25 ti tỹ ẽg mré ã rãnrãj tag han jé, ti tỹ tỹ ẽg mré apóstolo jẽ jé? Judas vỹ ã rãnrãj tovãnh, kỹ tóg ã tỹ ra tĩg ke ẽn ra vyr. Kỹ ù tỹ hẽ nỹ ti jẽg ja kã jènh mũ ha?” he ag tóg mũ, Topẽ mỹ.

26 Kỹ ag tóg to jogar he mũ sir, hã ra Matias tóg Judas jẽgja kã jẽ nĩ. Hã kỹ tóg tỹ ù tỹ 11 (ke) ag mré ke nĩ sir, tỹ tóg apóstolo jẽ sir.

2

Topẽ kuprĩg tỹ tỹ ẽg jagrẽ

1 Vãhã tóg festa tỹ Pentecostes kurã tá krỹg mũ. Kỹ vènh kar vỹ vènh mãn kỹ nỹtĩ nĩ, Jesus ki ge kỹ nỹtĩ kar ẽn ag.

2 Kỹ vãhã kãnhkã tá kóho ri ke tóg mẽ há tĩ, króg he mũ ẽn ti. Kỹ ãn tóg kóho ri ke ẽn tỹ fór mũ. Hã ra ag tóg ãn ẽn ki nỹtĩ, Jesus ki ge kỹ nỹtĩ ag.

3 Kỹ ag tóg nèn nẽ vég mũ, hã ra tóg tỹ pĩ gru hã pẽ nĩ, nèn nẽ ẽn ti. Vènh kãpópãm kỹ

tóg nĩ nĩ, pĩ gru hã pẽ ẽn ti. Kỹ tóg ag kri nĩ nĩ' he kãn mũ, pĩ gru hã pẽ ẽn ti.

4 Kỹ Topẽ kuprĩg tóg ag ki ge kãn mũ, kỹ ag tóg vènh vĩ ù tugtó mũ, Topẽ kuprĩg tỹ ag krĩn kỹ, ti tỹ tỹ ag jagrẽ nĩn kỹ.

5 Hã ra Jerusalém tá ke ù ag tóg Topẽ to há nỹtĩ gé. Israel ag vè gé, hã ra ag tóg povo tỹ hèn ri ke mĩ mogmog ja nĩ. Hã kỹ ag vĩ tóg tó tỹ hèn ri ke nĩ.

6 Ag tỹ kóho ri ke ẽn mẽ kỹ ag tóg vènh mãn mũ. Kỹ ag tóg ãjag vĩ e ẽn ki Pedro ag tỹ nèn tó mũ mēg mũ.

7 Kỹ tóg ag mỹ e tĩ. Ag fe tỹ hèn ri ke nĩn kỹ ag tóg: “ha vé, Galiléia tá ke ag vè mỹr,” he mũ. “Galiléia tá ke ag vỹ vyr mỹ vĩ nỹtĩ.

8 Hã ra ẽg tóg ẽg vĩ pẽ ki ag vĩ jẽmẽg mũ,” he ag tóg.

9 “Ẽg kã ù ag tóg Pártia tá kãmũ mũ, kỹ ù ag tóg Média tá kãmũ mũ gé, ù ag tóg ga tỹ Elão tá kãmũ mũ, ù ag tóg ga tỹ Mesopotâmia tá kãmũ mũ, ù ag tóg Judéia tá kãmũ mũ, ù ag tóg Capadócia tá kãmũ mũ, kar kỹ Ponto tá, Ásia tá,

10 Frigia tá, Panfília tá, Egito tá, ga tỹ Líbia tá, cidade tỹ Cirene ẽn mã tá. ù ag tóg cidade tỹ Roma tá kãmũ mũ gé.

11 ù ag tóg tỹ Israel nỹtĩ, kar kỹ ù ag tóg tỹ fóg tỹ Israel jykre han mũ nỹtĩ gé. ù ag tóg goj vãso tỹ Creta tá kãmũ mũ, ù ag tóg ga tỹ Arábia tá kãmũ mũ gé. Ẽg kar tóg ẽg vĩ pẽ ki ag tỹ Topẽ kãmén mũ mēg mũ, ag tỹ Topẽ tỹ nèn han ja kãmén mũ ti, Topẽ tỹ milagre hyn han ja ẽn ti,” he ag tóg.

12 ãjag mỹ e tĩn kỹ ag tóg jagnẽ mỹ: “ne nẽ hỹn?” he mũ. Ag fe tóg jũrũn ke mũ, ag tỹ ge ve ja tũ nỹtĩn kỹ.

13 ù ag tóg hã ra nyg mũ. “Kronkron kỹ ag kãgter mũ mỹr,” he ag tóg.

Pedro tỹ ag mỹ Topẽ vĩ tó

14 Kỹ Pedro tóg ù tỹ 11 (ke) ag mré jẽgnẽ mũ, kỹ tóg jamã hár(a) ag mỹ: “inh kãnhkã!,” he mũ. “Jerusalém tá ke!,” he tóg. “Jẽmẽ há han ra, sỹ ãjag mỹ nèn tó mũ ti,” he tóg.

15 “Ãjag hã tóg ẽg to: kronkron kỹ ag kãgter mũ, he mũ. Hã tũ vè hã ra. 9 horas vè ver, meio dia to hãn sa mỹr,” he tóg. “Ag kronkron kỹ ag tóg rãkãnh kỹ kronkron kỹ kãgter mũgtĩ, ùn kronkron mũ ẽn ag,” he

tóg. “Hã kȳ ãg tóg kron ja tũ nĩ,” he tóg, Pedro ti.

16 “Hã ra tóg vās̄y rán kȳ nĩ, ãg tỹ ũri nén vég mũ ti. Topẽ vĩ tó tĩ tỹ Joel tóg vās̄y tag tó ja nĩ, ha mẽ:

17 “kurã tỹ ãgno to hã sóg inh kuprĩg jẽnẽnh mũ, vẽn̄h kar mỹ, ti tỹ tỹ ãjag jagrẽ nĩ jé,” he ja tóg nĩ, Topẽ ti. “Kỹ ãjag krẽ ag tỹ fag mré Topẽ vĩ mẽ kȳ tónh ke vẽ. Kyrũ ag tỹ nén nẽ venh ke vẽ. Kófa ag tỹ vẽn̄h pétinh ke vẽ.

18 Sỹ inh camarada ag mỹ inh kuprĩg jẽnẽnh ke vẽ gé, fag mỹ ke gé. Kỹ fag tóg inh vĩ tónh ke mũ gé,” he tóg, Topẽ ti.

19 “Ãjag tỹ nén han vãn̄h han jé sóg ke mũ gé, ãjag mỹ, kanhkã tá, ga tá ke gé, ãprã, kyvẽn̄h mỹr, pĩ mỹr, nĩja mỹr.

20 Kỹ rã tỹ kutyg ke vẽ, kysã kyvẽn̄h ke vẽ gé. Kar kȳ Topẽ kurã vẽ sir, kurã mág ãn ti.

21 Kỹ ũ tỹ Topẽ mỹ nén kar to vĩ mũ ãn kren ke vẽ sir,” he tóg, Topẽ ti. Joel tỹ tón hã vẽ, vās̄y,” he tóg, Pedro ti.

22 “Inh kanhkã', inh vĩ jẽmẽ ra,” he tóg. “Nazaré tá Jesus vẽ mỹr,” he tóg. “Ti hã tóg nén han vãn̄h hyn han ja nĩgtĩ, Topẽ jykre hyn han ja tóg nĩgtĩ, Topẽ tỹ ti jẽnẽnh kȳ. Hã ra Topẽ tóg Jesus mỹ tó ja nĩ, ti tỹ milagre ãn hyn han jé. Kỹ tóg ãjag rĩnve hyn han, ãjag tỹ ve jé, Jesus to jykrén jé. Hã kȳ ãjag tóg vé,” he tóg, Pedro ti.

23 “Hã ra Topẽ tóg ãjag mỹ ti fẽg sór ja nĩ, Jesus ti. Kỹ tóg to jykrén kȳ ãjag mỹ ti fẽg ja nĩ. Jãvo ãjag tóg ka to ti sa ja nĩ, ti tén ja ãjag tóg nĩ. Kỹ ũ tỹ ka to ti sãg mũ ãn ag jykre vỹ pãno tãvĩ nĩ.

24 Hã ra Topẽ tóg ti rĩn mãn ja nĩ, hã kȳ tóg vẽser jagẽgtar ãn tỹ tũ' he ja nĩ ti mỹ. Hã kȳ tóg vẽser jamã tá nĩg mág ja tũ nĩ, Jesus ti,” he tóg, Pedro ti.

25 “Hã kȳ Davi tóg Jesus jo tag tó ja nĩ, kȳ tóg Jesus tỹ ã jóg mré vĩ ri ke nĩ. Ti to tóg: “ãg jóg',” he ja nĩ. “Ã vég isóg nĩ nĩ,” he ja tóg nĩ. “Inh pẽgja tá ã tóg nĩ nĩ, hã kȳ sóg krónh ke tũ nĩ,” he ja tóg nĩ, Davi ti.

26 “Hã kȳ inh fe tóg mrin ke mũ. Vĩ sér han isóg nĩ nĩ. Iser kȳ inh fár tóg nỹnh ke mũ, hã ra sóg to krĩ kufy tũ nĩ.

27 Inh kuprĩg vỹ vẽn̄h kuprĩg jamã tá nĩnh ke tũ nĩ. Inh fár vỹ vag ke tũ nĩ gé, sỹ tỹ ã tỹ

kuprẽg ja nĩn kȳ,” he ja tóg nĩ, Davi ti, Topẽ mỹ.

28 “Inh kanhrãn ã tóg nĩ nĩ, isỹ kanhkã to ãp̄ry ãn ve há han jé, kanhkã to ãmĩn ãn ti. Isỹ ã mré nĩn kȳ tóg inh mỹ sér tãvĩ tĩ,” he ja tóg nĩ. Davi tỹ Jesus tón hã vẽ,” he tóg, Pedro ti.

29 “Inh kanhkã',” he tóg. “ãg jóg'jóg tỹ Davi kãmén há han jé sóg ke mũ ãjag mỹ,” he tóg. “Vās̄y ti ter mỹr, kȳ ag tóg vẽn̄h kej tá ti pẽju, hã ra ãg tóg vég tĩ, ti kej ti, Davi kej ti,” he tóg.

30 “Ã tỹ ga mũ tĩg kȳ tóg hã ra Topẽ vĩ tó tĩ ja nĩgtĩ, Davi ti. Topẽ tóg ti mỹ: “ã krẽ'krẽ ag kã ũ vỹ tỹ pã'i tỹ rei nĩnh mũ,” he ja nĩgtĩ, Topẽ ti.

31 Topẽ vỹ tag kri fi kȳ tóg Cristo rĩr mãn ke tó ja nĩgtĩ gé, Davi ti. Hã kȳ tóg ã vĩ ãn tó ja nĩgtĩ. Cristo pi(jé) vẽser jamã tá nĩg mág han', kȳ ti fár vỹ vag ja tũ nĩ gé,” he tóg, Pedro ti.

32 “Cristo vẽ, hã vỹ: Jesus, he mũ. Topẽ vỹ ti rĩn mãn, kȳ ãg kar tóg ti ve ja nĩgtĩ,” he tóg.

33 “Topẽ tóg ti mỹ: “kunĩg, inh pẽgja tá nĩ,” he ja nĩ, Jesus ti mỹ. Kỹ ãg jóg tóg ti mỹ ã tỹ ãg mỹ nén tó ja fẽg, hã vỹ: Topẽ kuprĩg, he mũ. Hã kȳ tóg ãg mỹ tỹ jagrẽ han mũ, Topẽ kuprĩg tỹ, Jesus ti. Hã kȳ ãjag tóg ũri tag vég mũ, tag mẽg mũ,” he tóg, Pedro ti.

34 “Davi hã tóg rĩr mãn ja tũ nĩ ver, kanhkã ra tóg tãp̄ry ja tũ nĩ ver, ge ra tóg tag tó ja nĩ, ha mẽ: “ãg jóg mág vỹ inh Senhor mỹ tag tó ja nĩ, hã vỹ: “nĩ ra ver, inh pẽgja tá,” he ja tóg nĩ,

35 “sỹ ã kato vãsãnsãn mũ ag tỹ ã jakrẽm vin jé, ag sigse jé,” he ja tóg nĩ. Davi tỹ tón hã vẽ,” he tóg, Pedro ti.

36 “Jesus tag hã vỹ, ãjag tỹ ka to ãn sãg mũ tag hã vỹ: tỹ ãg Senhor nĩ, he mũ,” he tóg. “Topẽ vỹ ti to: “tỹ tóg Cristo nĩ,” he mũ. “Tỹ tóg vẽn̄h kar Senhor nĩ,” he tóg. ãg tỹ vẽn̄h vỹ tag kri finh ke vẽ. ãg povo tỹ Israel tỹ ti ki kanhrãn ke vẽ, ãg vỹ tag kri nĩm ke vẽ,” he tóg, Pedro ti, ũ tỹ vẽn̄h mãn kȳ nỹtĩ kar ag mỹ.

37 Ag tỹ ti vỹ jẽmẽ kȳ ti jykre tóg ag kãra rã mũ sir. Kỹ ag tóg ti mỹ: “kỹ ãg hỹn hẽ ri kenh mũ, vỹ?” he mũ, Jesus tỹ ãn vin mũ kar ag mỹ ke gé.

³⁸ Kĩ Pedro tóg ag mĩ: “ãjag jykre tovãnh ra,” he mũ. “Kĩ êg tóg ãjag kygpenh ke mũ, Jesus Cristo jiji tó kĩ,” he tóg. “Kĩ Topẽ tóg ãjag mĩ ãjag tĩ ti vĩ mranh ja ên tĩ vênh pãte fón ke mũ. Kĩ ãjag tóg Topẽ kuprĩg tĩ jagrẽ nỹtĩnh mũ gé, Topẽ tĩ ãjag mĩ ti jẽnẽn kĩ.

³⁹ Ti tĩ ãjag hã mĩ ti nĩm ke vễ inhhã, ãjag krẽ mré hã ke gé. Ti tĩ ãn mĩ vênh vĩ jẽnẽn mũ kar ag mĩ tóg nĩm tĩ, Topẽ ti, êg jóg mág ti, ag tĩ ver kuvar há tá mũ hã ra,” he tóg, Pedro ti.

⁴⁰ Vĩ tĩ hẽn ri ke han tóg, Jesus kãmén kĩ. Ag jyvẽn tóg mũ gé, kĩ tóg ag mĩ: “Jesus mĩ: “inh kren han nĩ,” hemnĩ,” he mũ. “Êg kar vĩ vênh jykre pãno han kãn, ã jykre han vãnh nỹtĩnh kĩ. Kĩ inh kren han nĩ, hemnĩ, Jesus mĩ,” he tóg, Pedro ti.

⁴¹ Û tĩ ti vĩ han mũ ag kygpég ag tóg mũ sir. Kurã ên kã ãn kygpe kĩ nỹtĩ ag vĩ tĩ ù tĩ 3 mil nỹtĩ hỹn, hẽn ri ke mũn.

⁴² Ên ag vĩ kurã kar ki Jesus tĩ ãn vin mũ ag vĩ jẽmẽ jé vênh mãn tĩ, jagnẽ ve jé ke gé. Kĩ ag tóg Jesus jamĩ ko mũ sir. Kĩ ag tóg ti mré vĩ mũ gé, kurã kar ki.

Jesus ki ge mũ ag jykre ti

⁴³ Kĩ Jesus tĩ ãn vin mũ ag tóg êg tĩ nén han vãnh tĩ hẽn ri ke han tĩ nỹtĩgtĩ. Hã kĩ vênh kar tóg Topẽ kamég tĩ.

⁴⁴ Jãvo ù tĩ Jesus ki ge kĩ nỹtĩ ag tóg jagnẽ mré vênh jykre pir han mũgtĩ. Kĩ ag kuge vĩ jagnẽ tú ri ke nỹtĩ.

⁴⁵ Û ag tóg ãjag kuge ù vãvãm mũ gé, jãnkamy kato, kĩ ag tóg ãn jãnkamy tú ag mĩ vênh kãpópãm mũ.

⁴⁶ Kurã kar ki ag kar tóg Topẽ jo ãn ra mũ tĩ, ag tĩ ti mré vĩ jé. ãjag ãn kãki ag tóg Jesus jamĩ ko mũgtĩ gé. Jatun mĩ ag tóg sir jẽgjẽg mũ. Kĩ tóg ag mĩ sér tĩ sir.

⁴⁷ Kĩ ag tóg Topẽ mĩ: “há ti nĩ,” he ti gé. Jó vênh kar tóg ag to há nỹtĩ gé. Kĩ Topẽ tóg kurã kar ki ù ag mĩ krĩ há nĩm tĩ gé, kĩ ag tóg ti ki ge mũ, ag krenkren jé. Hã kĩ ag tóg komẽr hã e nỹtĩ.

3

Ûn grĩ tĩ há' he

¹ Kejẽn Pedro tóg João mré Topẽ jo ãn ra mũ mũ, meio dia pãte 3 horas ki. Israel ag

tĩ Topẽ mré vĩ jafã vễ, hã vĩ: 3 horas, he mũ.

² Topẽ jo ãn tá ù tóg nĩ nĩ, ãn grĩ. ã mũr mũ kã tóg ge nĩ. Topẽ jo ãn jãnkã tá tóg nĩ nĩ, jãnkã sĩnvĩ he mũ ên tá. Tá tóg: “inh mĩ nén ù nĩm,” he nĩgtĩ, ù tĩ Topẽ jo ãn kãra ge mũ ag mĩ.

Ên va ag tóg kãmũ mũ, jãnkã tá ti nĩm jé. Kĩ João mré Pedro tóg Topẽ jo ãn tá junjun mũ.

³ Ûn grĩ tĩ Pedro ag ve kĩ tóg ag mĩ nén ù to vĩ mũ.

⁴ Kĩ Pedro ag tóg ti tugnỹm mũ. Kĩ Pedro tóg ti mĩ: “êg ki êvãnh ra,” he mũ.

⁵ Kĩ tóg ag ki êvãnh mũ. “Ag hỹn inh mĩ jãnkamy nĩm ke mũ,” he tóg.

⁶ Hã ra Pedro tóg ti mĩ: “jãnkamy tóg inh mĩ tú tĩ,” he mũ. “Sỹ nén ma tĩ hã tĩ sóg ã mĩ nĩm mũ, hã vĩ: Jesus Cristo jyjy hã tó kĩ, Nazaré tá ke ên jiji tó kĩ sóg ã mĩ: ha jẽg, he mũ, ha mĩ tĩg, he sóg ã mĩ,” he tóg, Pedro ti, ãn grĩ mĩ.

⁷ Kĩ tóg ti pẽgja tá ti kãgmĩ kĩ ti fẽg mũ.

Kĩ vãhã ti pẽn tóg tar' he mũ sir, ti pẽn nãgnãn ti.

⁸ Hũm hen kĩ tóg jẽ nĩ sir. Jẽg há' he tóg mũ sir. Mĩ tóg tĩ mũ sir. Ag mré tóg Topẽ jo ãn kãra rã mũ sir. Tá tóg mĩ tĩ kĩ hũm hũm he mũ. Topẽ mĩ tóg vĩ há han mũ sir.

⁹ Kĩ vênh kar tóg ti vэг mũ, ti tĩ mĩ tĩg kĩ, ti tĩ Topẽ mĩ vĩ há han kĩ.

¹⁰ Ag tĩ ti ve kĩ ag tóg ti ki kanhró nỹtĩ. “Topẽ jo ãn jãnkã tá nĩ ên hã vễ mỹr,” he ag tóg mũ. “Jãnkã sĩnvĩ he mũ ên tá nĩ mũn hã vễ mỹr,” he ag tóg mũ. “Vênh kar mĩ: inh mĩ nĩm, he tĩ ên hã vễ mỹr,” he ag tóg ti to. Kĩ tóg ag mĩ e tĩ sir. Ag fe tóg jũrũn ke mũ sir, ag tĩ ti ven kĩ.

Pedro tĩ Topẽ jykre kãmén mũ

¹¹ Hã ra tóg Pedro mré João mré tĩ mũ, ãn grĩ ja ên ti. Hã kĩ vênh kar tóg ag to vênh mãn mũ, Topẽ jo ãn krẽm, pã'i tĩ Salomão he mũ ên sala tá. Vênh kar ag mĩ tóg e tĩ, ãn grĩ ên tĩ há' hen kĩ.

¹² ã tĩ ãn e ên ag ve kĩ Pedro tóg ag mĩ: “inh kanhkã',” he mũ. “ãjag fe hã ne tóg jũrũn ke mũ',” he tóg. “Êg tĩ vêsóg ki ti tĩ há' he tú vễ. Topẽ tĩ tĩ tĩg há' he vễ mỹr. Êg tĩ vênh jykre kuryj han mũ ra êg tóg ge

han ki kagtīg nýtī vē,” he tóg, Pedro ti, ũn e ěn ag mý.

13 “Ĕg jóg'jóg ve ag vỹ Topě to há ja nýtīgťi, Abraão ti, Isaque ti, Jacó ti ke gé. Topě ěn vē mýr, ũ tỹ ti tỹ há' he mũ ti,” he tóg. “Topě ěn vỹ ě kósin tỹ ũn mág han. Ti kósin hã vē, hã vỹ: Jesus, he mũ. Hã ra ājag tóg fóg ag mý ti fěg ja nīgťi. Fóg tỹ pã'i tỹ Pilatos vỹ: “ti kavān jé sóg ke mũ,” he mũ vē. Hã ra ājag tóg ti mý: “nejé,” he ja nīgťi.

14 Ũ tỹ vēnh jykre kuryj han mũ to ājag tóg: “nejé,” he ja nīgťi, Topě tỹ ũn kuprěg mũ ěn to, Jesus ěn to. Hã ra ājag tóg ũ tỹ ũn tén mũ to: “ti kyvān ra,” he ja nīgťi.

15 Ũ tỹ ěg rĩnrĩr han tĩ ěn tén ja ājag tóg nīgťi mýr. Topě tóg hã ra ti rĩn mǎn ja nĩ, ti ter mũ hã ra, kỹ ěg tóg ti ve ja nīgťi,” he tóg, Pedro ti, ũn e ěn ag mý.

16 “Kỹ ěg tóg Jesus ki ge mũ. Hã kỹ Jesus tóg ũn grĩ ja tag tỹ tar' he mũ, ājag tỹ ũn vėg mũ tag ti, ājag tỹ ũn ki kanhrān mũ tag ti. Jesus vỹ ti tỹ ě ki rā han. Kỹ ti tỹ Jesus ki rā kỹ tóg há' he mũ sir, ājag rĩnve,” he tóg, Pedro ti.

17 “Inh kanhkā’,” he tóg. “Ājag tỹ ki kagtīg nýtĩn kỹ, hã kỹ ājag tóg Jesus tén ja nīgťi. Hã kỹ ājag pã'i ag tóg ti tén ja nīgťi,” he tóg.

18 “Hã kỹ Topě tóg vāsỹ rán kỹ nĩ ěn han. Topě vĩ tó tĩ ag kar tóg vāsỹ Jesus jagtar ke ti tó ja nīgťi, Topě tỹ ag mý: ha tó, hen kỹ. “Topě tỹ ũn jěněg mũ ěn tỹ jagtar ke vē, Cristo ti,” he ja ag tóg nīgťi, Topě vĩ tó tĩ ag,” he tóg, Pedro ti.

19 “Kỹ ājag jykre tovānh nĩ. Topě jykre ki gemnĩ, Topě tỹ ājag tỹ ti vĩ mranh tỹ tũ' he jé.

20 Hã kỹ ājag tóg tỹ Topě mré ke nýtĩ, kỹ tóg ājag krĩ tỹ kǎnhvy' henh ke mũ, Topě ti. Kar kỹ tóg ājag mý ti jěně mǎn mũ gé, ti tỹ ājag mý ũn jěněnh ke ěn ti, Cristo ti, hã vỹ: Jesus, he mũ,” he tóg, Pedro ti.

21 “Ti tỹ kanhkā tá nĩ vē ver. Ti tỹ ě kurā pétēm kỹ tóg vāhã tá vỹn kenh mũ, Topě tỹ nén kar han mǎn ke kurā ěn kǎ,” he tóg.

“Hã kỹ Topě tóg vāsỹ ě vĩ tó tĩ ag mý tó ja nīgťi, ag tỹ vēnh kar mý ti vĩ tó jé, ti tũ ag kar mý.

22 Hã kỹ Moisés vỹ tag tó ja nĩ, ha mē: “Topě vỹ ājag mý ě vĩ tó tĩ ũ jěněnh ke mũ, ājag mré ke ũ, ti tỹ ājag mý Topě vĩ tó jé,

inh ri kén. Ĕn ti vĩ jěmēmñĩ,” he ja tóg nīgťi, Moisés ti,” he tóg, Pedro ti.

23 “Ũ tỹ ti vĩ jěmē jāvānh ěn ter ke vē,” he ja tóg nīgťi, “ěn pi(jé) tỹ Topě tũ nĩ’,” he ja tóg nīgťi, Moisés ti,” he tóg, Pedro ti.

24 “Topě vĩ tó tĩ ag kar vỹ tó ja nīgťi, ěg tỹ ũri vėg mũ tag ti. Samuel vỹ tag tó vėn ja nīgťi, kar ti nón ke ag kar tóg tag tó ja nĩ gé vāhã,” he tóg, Pedro ti.

25 “Topě vĩ tó tĩ ěn krě vỹ tỹ ājag nýtĩ,” he tóg. “Ājag jóg'jóg ve ag hã mré tóg jykren ja nīgťi, Topě ti, Abraão hã mré. Hã kỹ tóg Abraão mý: “ě kósin ũ hã tigrĩn sóg vēnh kar to há nĩnh mũ,” he ja nīgťi, Topě ti,” he tóg, Pedro ti.

26 “Ājag hã mý tóg ě kósin jěně, ti rĩn mǎn kỹ, Topě ti. Ājag hã mý tóg tó vėn, ājag tỹ tỹ Israel nýtĩn kỹ. Ājag hã mý tóg tó, ājag tỹ ājag jykre pǎno tovānh jé. Ti tỹ ājag krĩn sór vē, ājag tỹ tovānh jé, ājag jykre pǎno ěn ti,” he tóg, Pedro ti, ũ tỹ Topě jo ĩn krēm vēnh mǎn kỹ nýtĩ ěn ag mý.

4

Pã'i ag tỹ Pedro mré João to jũ

1 Ag tỹ ver vėmén kỹ nýtĩ ra Topě tũ ki rĩr tĩ ag tóg tá junjun mũ. Topě jo ĩn to capitão vỹ ag mré tá jun mũ gé, Saduceu ag ke gé, ũ tỹ: “ěg hỹn rĩnrĩr mǎn ke tũ nĩ ha, ěg ter kar kỹ,” he mũ ěn ag.

2 Pedro ag to ag tóg jũgũ mũ, ag tỹ: “Jesus vỹ rĩr mǎn,” hen kỹ. “Kỹ ěg tóg ti ri kén rĩr mǎn mũ gé, ěg ter kỹ,” he ag tóg, Pedro ag. Hã kỹ pã'i ag tóg ag to jũgũ mũ.

3 Hã kỹ ag tóg Pedro ag sigség mũ, vēse jafã kǎtá ag tóg ag vām mũ, ag tỹ kǎtá nũgnũr pir han jé. Rǎké ti nỹ ha, hã kỹ ag tóg: “ha ver kǎtá nũgnũr,” he mũ.

4 Hã ra ũ tỹ hěn ri ke ag tóg Pedro ag vĩ mē ja nīgťi, kỹ ag tóg sir ti vĩ kri fig mũ. Ũ tỹ 5 mil (ke) ag vē, Jesus ki ge kỹ nýtĩ ag, ěg tỹ ũn týtá fag mré tó tũ hã ra.

5 Tỹ vaj kỹ pã'i ag tóg vēnh mǎn mũ, kófa ag mré hã, Topě vĩ to professor ag mré hã. Jerusalém tá ag tóg vēnh mǎn mũ.

6 Topě tũ ki rĩr tĩ to pã'i mág jyjy hã vỹ: Anás, he mũ. Ag pã'i mág ũ jijin hã vỹ: Caifás, he mũ. Pã'i mág kanhkā ũ jyjy hã vỹ: João, he mũ, kỹ ũ jijin hã vỹ: Alexandre, he

mũ. Pā'i mág mré ke kar ag vỹ tá vènh mǎn kỹ nỹtĩ.

⁷ Vènh kuju ki ag tóg Pedro ag vin mũ, kỹ ag tóg: “ũ nỹ ãjag mỹ vènh jykre tag nĩm, ãjag tỹ ùn grĩ ãn tỹ há' he jé?” he mũ. “Ủ jykre tỹ ãjag ti tỹ há' hé?” he ag tóg mũ, Pedro ag mỹ.

⁸ Kỹ vǎhã Topẽ kuprĩg tóg Pedro krĩn mũ. Kỹ tóg: “ha vé,” he mũ.

⁹ “Nén ù há to ãjag tóg ãg kugmĩg mũ, ãg tỹ ùn grĩ tỹ há' he mũ ãn to,” he tóg. “Kỹ ãjag tóg vǎhã ãg jykre jẽmẽ sór mũ ha,” he tóg.

¹⁰ “Ãjag mỹ sóg ãg jykre tónh mũ, Israel kar tỹ ki kanhró nỹtĩ jé,” he tóg. “Jesus tigrĩn tóg há' hé, Nazaré tá ke ãn tigrĩn tóg tar jẽ nĩ, ãjag tỹ ù tỹ ka to sãg mũ ãn hã tigrĩn. Topẽ tóg ti rĩn mǎn ja nĩ, ù tỹ cruz to ter mũ ãn ti. ãn vỹ ti tỹ há' hé, ùn grĩ ja ãn ti,” he tóg, Pedro ti.

¹¹ “Jesus ãn hã to tag tóg rán kỹ nĩ, Topẽ vỹ tỹ rán kỹ nĩ ãn ki, ha mẽ: ãjag tỹ pó tỹ ãn han kỹ ãjag tóg pó ù fón, ti tỹ ãjag mỹ kórég nĩn kỹ. Hã ra Topẽ tóg pó ãn hã tỹ ãn nũna han mũ,” he ja tóg nĩ, Topẽ vỹ ki, Jesus to,” he tóg, Pedro ti.

¹² “Ủ pi(jé) ãg kren han ke mũ'. Topẽ tóg Jesus fẽg inhhã, ti hã tỹ ãg kren han jé, ti hã tỹ ãprã ke ag krenkren han kǎn jé, kǎnhkã krẽm ke kar ãn ag. ãg kren han ke mũ ù venh ke tũ ãg nĩ mỹr,” he tóg, Pedro ti, pã'i ag mỹ.

¹³ Pã'i ag tỹ Pedro vỹ mẽ kỹ tóg ag mỹ e tĩ. “ãg kǎmẽg tũ ag tóg nĩgtĩ mỹr,” he ag tóg, Pedro to, João to ke gé. “Vènh rán sĩ ag nỹtĩ vỹ mỹr, escola ki ge mág ja tũ ag nỹtĩ vỹ,” he ag tóg. To jykren kỹ ag tóg ag ki kanhró nỹtĩ. “Jesus mré ke ag vỹ,” he ag tóg mũ, Pedro ag to. Kỹ tóg ag mỹ e tĩ.

¹⁴ Hã ra ùn grĩ ja tóg tá jẽ ag mré. Kỹ ag tỹ ne tỹ ag kato vĩnh ke tóg tũ tĩ sir.

¹⁵ Kỹ ag tóg Pedro ag mỹ: “ha ver kǎpa jẽg,” he mũ. Kỹ pã'i ãn ag tóg ver jagnẽ mré to jykren mũ.

¹⁶ Kỹ ag tóg: “ãg hỹn ag tỹ hẽ ri kenh mũ ha?” he mũ. “Jerusalém tá ke kar vỹ ag tỹ nén han mũ ki kanhró kar nỹtĩ. Kỹ ag jykre tóg vènh kar mỹ há nỹ. Kỹ ãg tỹ ag to: ag ón vỹ, hen kỹ tóg tỹ ùn nỹ sir,” he ag tóg jagnẽ mỹ.

¹⁷ “Ag tỹ hã ra vènh kar mỹ Jesus tóg kỹ tóg tỹ ù nỹ gé,” he ag tóg. “Kỹ ãg tỹ ag mỹ: ha to mǎn tũg, henh ke vỹ,” he ag tóg. “ãjag tỹ ti to mǎn kỹ ãg tóg ãjag vóg kónǎn ke mũ ha, he jé ãg tóg ke mũ ag mỹ,” he ag tóg jagnẽ mỹ.

¹⁸ Kỹ ag tóg Pedro ag jé prẽr mǎn mũ. Kỹ ag tóg: “Ker ù mỹ tóg mǎn hẽ’,” he mũ. “Ker Jesus tỹ vỹ mǎn hẽ’,” he ag tóg mũ ag mỹ.

¹⁹ Hã ra Pedro tóg João mré ag mỹ ke mũ. “Topẽ tóg ãg mỹ: “ha vènh kar mỹ tóg,” he ja nĩ. ãjag tóg hã ra: “ker tóg hẽ’,” he mũ. ãg hỹn ù tỹ hẽ vỹ han mũ', Topẽ vỹ vó, ãjag vỹ vó?” he tóg ag mỹ. “Ne nỹ hỹn Topẽ mỹ há nĩnh mũ?” he tóg. “ãg mỹ tóg,” he tóg.

²⁰ “ãg pi(jé) tóg tũg mũ', ãg tỹ nén vég mũ ti, Jesus tỹ ãg mỹ nén tóg ja ãn ti,” he tóg ag mỹ, Pedro ti.

²¹ Hã ra pã'i ag tóg: “ker tóg hẽ', ker tóg hẽ',” he mǎn mũ gé. Kỹ ag tóg ag kygvãg mũ sir. ãjag tỹ ag vóg kónǎn há ra ag tóg ag vóg kónǎn tũ nĩ, vènh kar tỹ ag to há nỹtĩn kỹ, vènh kar tỹ Topẽ to: “há ti nĩ, ti hã ne tóg ùn grĩ ãn tỹ há' he mũ’,” hen kỹ.

²² Hã ra ùn grĩ ja ãn tóg tĩ nĩ sir. 40 anos kǎfór han tóg, kỹ Topẽ tóg ti tỹ há' hé.

Jesus mré ke ag tỹ Topẽ mré vỹ

²³ Pedro ag tỹ kygvar kỹ mũ kỹ ag tóg ãjag mré ke ag to mũ mũ. Kỹ ag tóg pã'i tỹ ãjag mỹ nén tóg ãn kǎmẽn mũ, kófa ag tỹ: “ker Jesus tóg hẽ’,” he mũ ãn ti.

²⁴ Kỹ vènh kar ag tóg tag jẽmẽ kỹ Topẽ mỹ vỹ há han mũ, jagnẽ mré. Kỹ ag tóg: “ãg jóg mág’,” he mũ. “Tỹ ã tóg vènh kar kri ke nĩ,” he ag tóg mũ. “Kǎnhkã han ã mỹr, ga ti, goj ti ke gé, mĩ mũ ag kar ke gé,” he ag tóg.

²⁵ “ãg jóg'jóg tỹ Davi krĩn ja ã tóg nĩgtĩ, ã camarada ãn ti. ã kuprĩg tỹ ã tóg ti krĩn ja nĩ. Kỹ tóg Jesus tóg ja nĩgtĩ, kỹ tóg: “fóg kar ag ne tóg jũgũ mũ, kǎnhgág ag ke gé,” he ja nĩ. “Inh kǎnhkã tỹ Israel ag ne tóg nén ù tũ to jykren’,” he ja tóg nĩ.

²⁶ “Nação kar ag pã'i ag vỹ vènh génh kỹ nỹtĩ, ãg pã'i ag ke gé, Topẽ kato tẽgtẽ jé, Topẽ tỹ ùn kuprẽg mũ ãn ag kato,” he ja tóg nĩgtĩ, Davi ti,” he ag tóg, Topẽ mỹ.

²⁷ “Hã ra tóg ki hã tóg ja nĩ. ãmã tag ki ag tóg vènh génh kỹ nỹtĩ, ã kósin kato, ã tỹ ùn kuprẽg mũ ãn kato, ùn kuryj nĩ ãn kato, hã vỹ: Jesus, he mũ,” he ag tóg. “Pã'i mág tỹ

Herodes vỹ ti kato tẽ mũ gé, pã'i tỹ Pilatos ke gé, ag tỹ ù to: Pôncio, he mũ ên, fóg ag kar, Israel ag kar ke gé," he ag tóg. "Tag ag kar vỹ vênh génh kỹ nỹtĩ, ã kósin kato," he ag tóg.

²⁸ "Ã tỹ nén to jykrén mũ han ag tóg mũ sir, ã kato tẽgtẽ mũ tag ag. Vãsỹ ã tóg to: ge tĩ jé tóg ke mũ, he ja nĩgtĩ," he ag tóg, Topẽ mỹ.

²⁹ "Pã'i ag tỹ ã mỹ nén tó mẽ ã tóg, ag tỹ ã mỹ: ker tó hẽ', he mũ tag ti. Kỹ ã mỹ tỹ tar' hemnĩ, ã mỹ ag kamẽg tũ nĩn jé, ã mỹ tỹ ã vĩ tó jé, ã mỹ tỹ ã camarada nỹtĩn kỹ," he ag tóg, Topẽ mỹ.

³⁰ "Kỹ ã mỹ mré milagre hyn han nĩ gé. Ûn kagyga ag tỹ há' hemnĩ, ã mỹ tỹ nén han vãnh han nĩ, ã mỹ tỹ ã mỹ to vĩn kỹ, ã mỹ tỹ ã kósin tỹ Jesus jyjy tó kỹ, ã mỹ tỹ ùn kuryj nĩ ên tó kỹ," he ag tóg, Topẽ mỹ.

³¹ Ag tỹ ti mré vĩ kar kỹ ga tóg jũrũn ke mũ sir, ag tỹ tá nỹtĩ há ra. Kỹ Topẽ kuprĩg tóg ag krĩn mũ gé. Kỹ ag tóg mũmẽg vãnh kỹ Topẽ vĩ kãmén mũ sir.

Jesus ki ge kỹ nỹtĩ ag jykre pir

³² Û tỹ Jesus ki ge kỹ nỹtĩ ag tóg jykre pir han kỹ nỹtĩ. Û pi(jé) ã kuge to: "isũ vỹ," he tĩ. ã jag kuge kar to ag tóg: "ãg tũ vỹ," he tĩ.

³³ Jesus tỹ ùn vin mũ ag tóg ãg Senhor tỹ Jesus rĩr mãn tugtó mũ, to tar pẽ nỹtĩn kỹ. Kỹ Topẽ tóg ag ki rĩr há han mũ gé sir.

³⁴ Ag mré ke ù pi(jé) jagãgtar nỹtĩ! Ag kãmĩ ù tóg ãpỹ nỹtĩ, kar ù tóg ãn nỹtĩ gé. ã jag tũ ên funfón ag tóg mũ, kỹ ag tóg ti kaja ma kãmũ mũ.

³⁵ Jesus tỹ ùn vin mũ ag mỹ nĩm jé, jãnkamy ti. Kỹ ùn jagãgtar ag tóg jãnkamy ên to ã jag tỹ nén ve sór mũ ên mãn mũ sir.

³⁶ Kỹ ù tóg nĩ gé, ti jiji há vỹ: José, he mũ. Jesus tỹ ùn vin mũ ag tóg ti to: Barnabé, he tĩ, há vỹ: vênh jyvẽn krẽ, he mũ, há vỹ: Barnabé, he mũ. Levi kósin'kósin ù vỹ. Goj vãso tỹ Chipre tá ke vỹ.

³⁷ Ên há vỹ ãpỹ nĩ, kỹ tóg ã jagỹ fón mũ, kỹ tóg Jesus tỹ ùn vin mũ ag mỹ ti kaja ma kãtĩ mũ. Kỹ ag tóg jagnẽ mỹ kãnhkrég mũ sir.

5

Ananias fag tỹ Topẽ mỹ ón

¹ Kỹ ù tóg nĩ gé, ti jyjy há vỹ: Ananias, he mũ. Jãvo ti prũ fi jiji há vỹ: Safira, he mũ. Ên vỹ tóg ã jagỹ fón mũ gé.

² Kỹ tóg ã prũ fi mỹ: "ti kaja vênh kãpóv péju kỹ ãg tóg nĩm mũ," he mũ. Ti vênh kãpóv ù tỹ tóg Jesus tỹ ùn vin mũ ag mỹ nĩm mũ. "ãg jagỹ kaja kar há vỹ," he tóg mũ ag mỹ, ón kỹ.

³ Kỹ Pedro tóg ti mỹ: "Satanás há ne tóg ã krĩn ja nĩ'," he mũ. "Hã kỹ ã tóg Topẽ kuprĩg mỹ ón. Hã kỹ ã tóg ti kaja vênh kãpóv péju kỹ nĩm ja nĩ'," he tóg. "Hã ra ã tóg ti tỹ ã krĩn mũ ra: "nejé," he ja tũ nĩ, Satanás mỹ," he tóg.

⁴ "ã jagỹ vỹ (mỹr), há mẽ," he tóg. "Kỹ ti kaja vỹ tóg tỹ ã tũ nĩ gé sir," he tóg. "Kỹ ã tỹ ma kãtĩ tũ nĩ há ra tóg tỹ nén ù tũ nĩ vỹ," he tóg. "Hã ra ã tóg ã ón ke to jykrén ja nĩgtĩ, ã tỹ ti kaja to ón jé," he tóg. "Hã kỹ ã tóg ãg mỹ ón, há ra ã tóg Topẽ há mỹ ón mũ," he tóg, Pedro ti.

⁵ Ananias tỹ ti vỹ mẽ kỹ tóg kutẽ mũ, ti ter vỹ sir. Û tỹ mẽg mũ ag kar mỹ tóg e tĩ, kỹ ag fe tóg jũrũn ke mũ.

⁶ Kỹ kyrũ ag tóg jẽgĩgẽ nẽgnẽ kỹ ag tóg ti fi han mũ. Kỹ ag tóg ti va mũ mũ, kỹ ag tóg ti kénh mũ sir.

⁷ 3 horas tũg kỹ ti prũ fi tóg mĩ kãtĩ mũ gé. Há ra fi tóg ã mén ter mẽ ja tũ nĩ ver.

⁸ Kỹ Pedro tóg fi mỹ: "ã jag mỹ ti kaja tag to fón, ã jag jagỹ ti?" he mũ fi mỹ.

Kỹ fi tóg: "hỹ, ti kaja tag to ãg tóg fón," he mũ, ón kỹ.

⁹ Kỹ Pedro tóg fi mỹ: "ã jag ne tóg jagnẽ mré to jykrén ja nĩ gé'," he mũ. "Topẽ kuprĩg mỹ ã jag ón mỹr. Û tỹ ã mén kénh mũ ag vỹ mĩ kãmũ jẽg. ã va ag tóg mũnh mũ gé," he tóg fi mỹ, Pedro ti.

¹⁰ Kỹ fi tóg kutẽ kỹ hun ke mũ gé sir. Kyrũ ag tỹ junjun kỹ ag tóg fi ter vég mũ gé, kỹ ag tóg fi kénh mũ mũ gé, fi mén mré.

¹¹ Kỹ Jesus ki ge kỹ nỹtĩ kar ag fe tóg jũrũn ke mũ, ù tỹ mẽg mũ kar ag ke gé.

Hã kỹ Ananias fag tóg Topẽ mỹ ón tugrĩn kãgtar mũ. Kỹ tóg vênh kar mỹ e tĩ sir.

Ag tỹ Jesus tỹ ùn vin mũ ag vóg kónãn

¹² Jesus tỹ ùn vin mũ ag tóg nén ve vãnh tỹ hẽn ri ke hyn han mũgtĩ, vênh kar mỹ. Jesus ki ge kỹ nỹtĩ kar ag vỹ kurã kar ki vênh mãn

tĩ, pã'i tỹ Salomão he mũ ên sala tá, Topê jo ãn krēm.

¹³ Jesus ki ge tũ ag tóg venh kãmũ tũ nĩgtĩ, ag tỹ ag kamẽg kỹ. Hã ra tóg vẽn kar mỹ há tĩ sir, Jesus ki ge kỹ nỹtĩ ag jykre ti.

¹⁴ Kurã kar ki ù tóg to jykrén ke mũ, Jesus ki rã jé, ù tỹ hên ri ke ag, fag ke gé. Hã ki ag tóg e nỹtĩ sir, Jesus ki ge mũ ên ag.

¹⁵ Kejên ag tóg ùn kagyga gé kãmũ mũ gé vãhã, êpryn kri, êmĩn kri. Tá ag tóg cama kri nỹtĩ, nỹg jafãn ki. Kỹ ag tóg Pedro jãvãnh mũ. “Ti kãnhvég tỹ êg mũ tĩg kỹ ù tóg hên ri ke mũn tỹ há' henh ke,” he ag tóg.

¹⁶ Û tỹ hên ri ke ag tóg Jerusalém tá vẽnh mãn mũ, êmã kar tá kãmũ ên ag. Ûn kagyga ag gé(g) ag tóg kãmũ mũ, ùn jagrẽ kórég ag ke gé. Kỹ ag tóg há' he kãn mũ sir.

¹⁷ Kỹ Topê tũ ki rĩr tĩ to pã'i mág tóg jũ tãvĩ nĩ, ti mré ke kar ag ke gé, Saduceu he mũ ên ag kar.

¹⁸ Kỹ ag tóg Jesus tỹ ùn vin mũ ag sigség mũ, vese ja mág tá.

¹⁹ Hã ra kuty tá Topê tỹ jẽnê jafã tóg tere kỹ vese ja jãnkãn nugnón mũ, rugróm tóg mũ. Ag gé(g) tóg tĩ mũ, ag kygvãn kỹ, kỹ tóg ag mỹ:

²⁰ “ha mũ jẽg, Topê jo ãn ra, ãjag tỹ vẽnh kar mỹ Topê vĩ tó jé, Topê tỹ êg rĩnrĩn mãn ke ên ti,” he mũ, Topê tỹ jẽnê jafã ti, ag mỹ.

²¹ Ag tỹ ti vĩ mẽ kỹ ag tóg kusã pẽ ki Topê jo ãn ra mũ mũ, tá Topê vĩ tó jé. Hã ra Topê tũ ki rĩr tĩ to pã'i mág tóg ã mré ke ag jẽgnẽg mũ, ag tỹ kófa ag jé prẽr jé, vẽnh jyvẽn tĩ kar ên ag, povo tỹ Israel to pã'i ag ke gé. Kỹ ag tóg vese ja ra ù jẽgnẽg mũ, ag tỹ vêsigse ag tatĩ kãmũ jé.

²² Polícia ag tỹ tá junjun mũ ra ag tóg vese ja kãtã tũgtũ nỹtĩ. Kỹ ag tóg vỹnvỹn ke mũ.

²³ Kỹ ag tóg: “vese ja tóg nĩfênh kỹ jẽ nĩ, nĩfênh jãfa tỹ,” he mũ. “Kỹ ù tỹ ki rĩr mũ ag tóg tá nỹtĩ gé, ti jãnkãn tá. Êg tỹ nón mũ ra tóg kuprã jẽ nĩ,” he ag tóg mũ, pã'i ag mỹ.

²⁴ Topê jo ãn to capitão tỹ mẽ kỹ tóg ti mỹ e tĩ, Topê tũ ki rĩr tĩ to pã'i mág ag mỹ ke gé. Kỹ tóg ag krĩ tũ tĩ sir.

²⁵ Kỹ ù tóg tá jun kỹ: “Topê jo ãn krēm ag nỹtĩ, ãjag tỹ ùn sigség mũ ag,” he mũ. “Tá ag tóg vẽnh kar mỹ Topê vĩ tó nỹtĩ,” he tóg.

²⁶ Kỹ capitão tóg polícia ag mré tĩ mũ, ag tatĩ kãmũ jé. Komẽr hã ag tóg vĩ mũ, ag mré.

“Êg vãsãnsãn kỹ ù tỹ ag vĩ mẽg mũ ag tóg hên ri ke mũn êg pin ke mũ, pó tỹ,” he ag tóg, polícia ag.

²⁷ Apóstolo ag tỹ ag mré junjun kỹ ag tóg pã'i ag jo ag vin mũ. Kỹ Topê tũ ki rĩr tĩ to pã'i mág tóg ag mỹ.

²⁸ “ãjag mỹ êg tóg: ker ên jiji tó mãn hẽ', he ja nĩgtĩ,” he mũ. “Ge ra ãjag tóg Jerusalém tá ke kar ag mỹ tugtó ja nĩgtĩ, ên vĩ ti,” he ag tóg, Jesus vĩ to. “Ãjag hỹn ti ter to êg jagãgtar han sór mũ,” he ag tóg, pã'i ag.

²⁹ Kỹ Jesus tỹ ùn vin mũ ag kar tóg ag mỹ tag tó mũ, ha mẽ. Pedro tóg ag mỹ tag tó mũ, ha mẽ: “Topê tỹ êg mỹ nén tó mũ ên han jé êg tóg ke mũ (mỹr),” he tóg. “Êprã ke ag tỹ êg mỹ: “ke tũg nĩ,” he mũ hã ra êg tóg ti tỹ êg mỹ nén tó mũ ên han mũ,” he tóg.

³⁰ “Êg jóg'jóg ag vỹ Topê to há nỹtĩgtĩ. Ag tỹ ù to há nỹtĩ ên vỹ Jesus ti rĩn mãn ja nĩgtĩ, ãjag tỹ ùn tén mũ ên ti, ka to ùn sãg mũ ên ti,” he tóg.

³¹ “Kỹ Topê tóg ti tỹ pã'i mág han mũ, ti tỹ êg kren han tĩ han kỹ, ti tỹ ti mỹ: “kunĩg, inh pẽgia tá nĩ,” hen kỹ. Jesus tỹ tóg êg kar krĩn sór mũ, êg povo tỹ Israel kar tỹ vẽnh jykre pãno tovãnh jé, ti tỹ ag tỹ ã vĩ mranh tỹ vẽnh pãte fón jé,” he tóg.

³² “Nén kar ên ve ja êg tóg nĩgtĩ, hã kỹ êg tóg ti vĩ tó mũ sir. Kỹ Topê kuprĩg tóg êg kanhrãn mũ gé. Topê vỹ ù tỹ ti vĩ han mũ kar ag mỹ ã kuprĩg jẽnẽg mũ,” he tóg, Pedro ti.

³³ Pã'i ag tỹ ti vĩ mẽ kỹ ag fe tóg gỹm ke mũ, kỹ ag tóg ag kãgtén ke to jykrén mũ, Jesus tỹ ùn vin mũ ên ag.

³⁴ Kỹ vãhã ù tóg jẽg nẽ mũ, Fariseu ù, ti jygy hã vỹ: Gamaliel, he mũ. Topê vĩ to professor ù vẽ, kỹ vẽnh kar mỹ tóg há nỹ, ti jykre ti. Kỹ tóg: “ver ag kãpan nĩ,” he mũ.

³⁵ Ag mũ kar tóg ag mỹ: “inh kanhkã',” he mũ. “To jykrén nĩ ver, ãjag tỹ han tũ jé,” he tóg.

³⁶ “Pedro ag jo ke ù tóg jẽ ja nĩ gé, ti jiji hã vỹ: Teudas, he mũ. Ti hã ne tóg vêsỹ tỹ pã'i mág han ja nĩ, kỹ ù tỹ 100 tỹ 4 ag vỹ ti nón mũ ja nĩgtĩ sir. Ti tén ja ag tóg nĩ jãvo, pã'i ag, kỹ ù tỹ ti vĩ han mũ ag tóg tãmĩ mũ ja nĩ, kỹ tóg tũ' he mũ,” he tóg.

³⁷ “Kar kỹ ù vỹ jẽ ja nĩ gé, ti jygy hã vỹ: Judas, he mũ. Galiléia tá ke ên vẽ. Ag tỹ vẽnh

kar jyggi ránrán mū ra tóg tá jē ja nī, Judas ēn tí, ký ū tỹ hēn ri ke ag tóg tí nón mū ja nīgtī gé. Ēn tén ja ag tóg nī gé, pā'i ag, ký ū tỹ tí vī han mū ag tóg krig' ke ja nī, vēnh pipin ký," he tóg.

³⁸ "Isỹ nén to jykrén hā vē, ha mē: Pedro ag tovānh nī ver," he tóg. "Ag mỹ: ha mū jēg, hemnī ver," he tóg. "Ag tū tỹ tỹ ēprā ke ag jykre nīn ký tóg tū' henh ke mū (mỹr), vēsóg ki, ha mē," he tóg.

³⁹ "Tí tỹ hā ra tỹ Topē jykre nīn ký ājag tóg tỹ tū' henh ke tū nī," he tóg. "Ājag tỹ ge ra ag to jū nýtīn ký ājag tóg vāhā Topē kato tē mū," he tóg, Gamaliel tí.

⁴⁰ Ký ag tóg tí mỹ: "hej," he mū. Ký ag tóg Jesus tỹ ūn vin mū ag jé prēr mǎn mū. Ag mrānmrān ag tóg mū. Ký ag tóg: "ker Jesus tó mǎn hē," he mǎn mū ag mỹ. Ký ag tóg: "ha mū jēg ge," he mū.

⁴¹ Ký ag tóg mū mū, Jesus tỹ ūn vin mū ag. Ag mỹ tóg sér tí, ha mē. Ag tỹ Jesus ri ke jagēgtar mū ra tóg ag mỹ sér tí, ag tỹ Jesus ri kén jagāgtar ke ki krỹg ký.

⁴² Kurā kar ki ag tóg Topē jo ĩn tá Jesus tó tí, tí to: "Topē vỹ tí jēnē," hen ký. Vēnh kar ĩn tá ag tóg tí kāmén mū gé, ū tỹ ag kógfyn ký. To ag tóg krónh ke tū nīgtī sir.

6

Ag tỹ ū tỹ 7 (ke) ag vin

¹ Ký ū tỹ hēn ri ke ag tóg Jesus ki ge mū. Ū ag tóg Grego vī tó tí, Jesus mré mū ū ag. Ký ū ag tóg Hebreu vī tó tí gé, tí mré mū ū ag. Ag e nýtīn ký ū tỹ Grego vī tó mū ag tóg kejēn vī kónān mū, Hebreu vī tó tí ag kato. "Ū tỹ Hebreu vī tó mū ag vỹ ēg ki króm tū nýtī (mỹr)," he ag tóg. "Ag kā ūn mén ter ja fag vỹ kurā kar ki vējēn há vég tí, ag tỹ fag mỹ vin ký," he ag tóg. "Hā ra ēg kā ūn mén ter ja ēn fag kā ag tóg jatun nýtī, fag tỹ ag vī tó tū nīn ký. Hā ký fag tóg jagāgtar nýtī, ēg mré ke fag," he ag tóg.

² Ký ū tỹ 12 ag tóg mēg mū, Jesus tỹ ūn vin mū ag. Ký ag tóg Jesus mré mū kar ag jé prēr mū. Ký ag tóg: "Ēg tū hā vē, hā vỹ ēg tỹ tỹ Topē vī tó tí nỹ," he mū. "Ēg tỹ vējēn ki rīr ký ēg tóg kutar nýtī, ký ēg tóg ēg tỹ nén han ke ki rīr há han ke tū nī gé," he ag tóg.

³ "Ký ū tỹ 7 (ke) ag vin nī, ūn kāme kórég tū ag, ūn jykre há ag, ū tỹ Topē kuprīg tỹ jagrē nī ēn ag," he ag tóg. "Ēn mỹ ēg tóg vēnh rānrāj ēn nīm mū, ag tỹ vējēn ki rīr jé," he ag tóg.

⁴ "Ēg hā tóg hā ra Topē mré vī ký nýtī, tí vī tó ký nýtī. Ēg tỹ nén han ken hā vē," he ag tóg, Pedro ag.

⁵ Ag vī vỹ vēnh kar mỹ há nī ha, ký ag tóg Estêvão fēg mū sir, ū tỹ Jesus ki rā ký jē ēn tí, ký Topē kuprīg vỹ tỹ tí jagrē nī. Tí mré ag tóg Filipe fēg mū gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tỹ Antioquia tá ke tag tí, fóg tỹ Israel jykre han mū tag tí.

⁶ Ēn ag vin ag tóg mū, Jesus tỹ ūn vin mū ag jo. Ký ag tóg ag to Topē mré vī mū, ag nīgé tỹ ag mē ký. Hā ký ag tóg ag mỹ vēnh rānrāj ēn nīm mū, ag tỹ vējēn ki rīr jé.

⁷ Ký Topē vī tóg vēnh kar kri rūm ke mū sir. Ū tỹ Jesus mré mū ag vỹ tóg hēn ri ke nýtī, Jerusalém tá. Ký Topē tū ki rīr tí ū ag tóg Jesus vī kri fi ký tí ki ge mū gé sir.

Ag tỹ Estêvão se

⁸ Estêvão vỹ hā ra krī há nī, Topē tỹ tí mỹ vēnh jykre nīm ký. Ký tóg ēg tỹ nén han vānh tỹ hēn ri ke hyn han mū, vēnh kar mỹ.

⁹ Ký Israel ag vēnh kanhrān jafā ū tá ag tóg tí vī kafān mū, ūn kygvān ký nýtī he mū ēn ag, cidade tỹ Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Ásia tá ke ag ke gé. Ēn ag kar vỹ ājag tỹ Estêvão mré vīn ký tí vī kafān mū.

¹⁰ Hā ra ag tỹ tí vī kafān ke tóg tū tí, tí krī há nīn ký, tí tỹ Topē kuprīg tỹ jagrē nīn ký.

¹¹ Ký ag tóg ū ag krīn mū, ag tỹ tí kato vī jé, Estêvão kato. Ký ag tóg: "tí vī mē ēg (mỹr)," he mū. "Moisés kato vī kónān tóg (mỹr), Topē kato ke gé," he ag tóg ón ký, Estêvão to.

¹² Hā ký vēnh kar tóg tí to jūgiū mū, Estêvão to, kófa ag mré hā, Topē vī to professor ag mré hā. Ký ag tóg tí kāgmī ký tí ség mū. Ký ag tóg pā'i ag jo tí pére kāmū mū.

¹³ Ū tỹ ón ký tí kato vīnh ke mū ag jé ag tóg prēr mū gé, pā'i ag. Ký ag tóg tí kato: "Topē jo ĩn kato tóg vī kónān tí, Topē tỹ ēg mỹ nén tó ja tí kato ke gé," he mū ón ký. "Hā ra tóg

ã vī kónān to krónh ke tū nīgtī,” he ag tóg ón kŷ, Estêvão to.

¹⁴ “Ti vī mẽ ěg (mŷr),” he ag tóg. “Jesus kāmén tóg tīgtī, Nazaré tá ke ěn ti,” he ag tóg. “Topê jo ĩn kókén jé tóg ke mũ, Jesus ti,” he tóg nīgtī, Estêvão ti, kŷ tóg Moisés tŷ ěg mŷ vĕnh jykre nĭm mũ ěn tŷ tũ' he sór mũ gé, ěg mŷ vĕnh jykre ũ nĭm kŷ,” he ag tóg. Ag tŷ Estêvão to ón hã vĕ.

¹⁵ Kŷ pã'i kar ag tóg ti tugnŷm mũ, hã ra ti ve tóg sir Topê tŷ jĕnĕ jafã ve ri ke nĭ, Estêvão ti.

7

Estêvão tŷ vĕnh kāmén

¹ Kŷ Topê tũ ki rĭr tĩ to pã'i mág tóg ti mŷ: “Ki hã ke mŷ?” he mũ.

² Kŷ Estêvão tóg ag mŷ: “ijóg,” he mũ. “Inh kanhkã,” he tóg. “Ěg jóg tŷ Topê vŷ tóg vĕnh kar kãfór nĭ,” he tóg. “Ti hã ne ěg jóg'jóg tŷ Abraão mré vĭ ja nīgtī, ti tŷ ver ga tŷ Mesopotâmia tá nĭ ki, ti tŷ ver ěmã tŷ Harã ra tĩ tũ ki.

³ Kŷ tóg ti mŷ: “ã jamã tá kutĕ,” he ja nĭ. “ã kanhkã ag kar ré kŷ tĭg,” he ja tóg nĭ ti mŷ. “Ga ũ ra tĭg, isŷ tá ã mŷ: tag kã nĭmnĭ, he jé,” he ja tóg nĭ ti mŷ, Topê ti.

⁴ Hã kŷ tóg ga tŷ Caldéia tá kãkutĕ mũ, Hãra tá ěmãn jé, Abraão ti. Ti panh ter kar kŷ Topê tóg ti mŷ: “ga tag ra tĭg sir,” he mũ.

Ěg jamãn hã vĕ, Abraão jamã ja ti,” he tóg, Estêvão ti, pã'i ag mŷ.

⁵ “Ge ra Topê tóg Abraão mŷ ga ěn nĭm ja tũ nĭ, ěpŷ pir mré tó kŷ. Ti mŷ tóg hã ra: “ã tũnh ke vĕ, kar kŷ, ã krĕ tũnh ke vĕ gé,” he ja nĭ, Topê ti. Hã ra tóg ver kósin ja tũ nĭ, Topê tŷ ti mŷ: “ã krĕ tũnh ke vĕ,” he mũ ra.

⁶ Kŷ Topê tóg ti mŷ: “ã krĕ ag tŷ fóg ũ ag mré mũnh ke vĕ, fóg ěn jamã tá,” he mũ. “Fóg ěn ag tŷ camarada han ke vĕ, ag vóg kónān jé ag tóg ke mũ, prŷg tŷ 100 tŷ 4 ki,” he tóg, Abraão mŷ, Topê ti.

⁷ “Hã ra ũ tŷ ag vóg kónān mũ ěn ag vóg kónān jé sóg ke mũ gé, kar kŷ,” he tóg, Topê ti. “Isŷ ag vóg kónān kar kŷ ã krĕ ag tóg tá kãpanh mũ. Kŷ ag tóg ga tag ki isũ ti han mũ,” he tóg, Topê ti. Ti tŷ Abraão mŷ ken hã vĕ,” he tóg, Estêvão ti.

⁸ “Kŷ tóg ti mŷ vĕnh jykre nĭm mũ, ti tŷ ã krĕ ag gré junun fár kym jé. Kŷ ti sinal vĕ

sir. Kar kŷ Abraão tóg Isaque han mũ. Ti tŷ kurã tŷ 8 han kŷ tóg ti mŷ kym mũ. Isaque tŷ Jacó han kŷ tóg ge han mũ gé, kŷ Jacó tóg ge han mũ gé, ti tŷ ã krĕ tŷ 12 ěn ag han kŷ, ěg tŷ ũ to: ěg jóg'jóg kar, he mũ ěn ag,” he tóg.

⁹ “Hã ra ěg jóg'jóg ěn ag tóg ãjag jãvy tŷ José to jũgiũ nŷtĩ, ãjag tŷ ti tũ to ěn kŷ. Hã kŷ ag tóg ti vĕne he mũ, José ti, ũ tŷ ga tŷ Egito ra mũ mũ ag mŷ. Hã ra Topê tóg ti ki rĭr mũ.

¹⁰ Kŷ tóg ti jy nĭgãn mũ, ti tŷ vĕnh jagtar vég mũ ra. Ti jykre há nĭn kŷ tóg Egito tá ke ag pã'i mág mŷ há tĩ, ag tŷ ũ to: Faraó, he mũ ěn mŷ. Hã kŷ tóg ti tŷ pã'i mág han mũ, Faraó ti, José ti tŷ. Ti tŷ tóg pã'i mág han mũ, ti tŷ Egito tá ke kar ag ki rĭr jé, Faraó mré ke kar ag ki rĭr jé gé sir.

¹¹ Kejĕn tóg prŷg han mũ, ga tŷ Egito mĩ hã, ga tŷ Canaã mĩ hã ke gé. Kŷ vĕnh kar tóg kókĭnkĭr mũ, prŷg kã. Kŷ ěg jóg'jóg ěn ag tóg kókĭnkĭr mũ gé.

¹² Kŷ ũ tóg Jacó mŷ: “Egito tá ti vĕjĕn nĭ inhhã,” he mũ. Kŷ tóg ěg jóg'jóg ag jĕgnĕg mũ, Jacó ti, ag tŷ Egito ra mũ vĕn jé.

¹³ Ag tŷ ra mũ mãn kŷ José tóg vãhã ag mŷ: “inh hã vĕ,” he mũ, ã kãke ag mŷ. Hã kŷ Faraó tóg José kanhkã ki kanhró nĭ gé sir.

¹⁴ Kŷ José tóg ã panh tŷ Jacó jé prĕr mũ, ti tŷ vĕnh kar tatĭn kãtĭg jé. Ũ tŷ 70 kri 5 ag vĕ, ti kanhkã ag.

¹⁵ Kŷ Jacó tóg Egito ra tĩ mũ. Tá tóg ter mũ kejĕn. Kar kŷ ěg jóg'jóg ag vŷ tá kãgter kãn mũ gé.

¹⁶ Ěmã tŷ Siquém tá ag tóg kĕnh kŷ nŷtĩ, Abraão vŷ tóg vĕnh kej ěn to jãnkamy nĭm ja nĭ, Emor krĕ ag mŷ, ěmã tŷ Siquém tá,” he tóg, Estêvão ti.

¹⁷ “Vãhã tóg kurã pétĕm ke mũ sir, Topê tŷ Abraão mŷ: “ã krĕ mŷ sóg ga ěn nĭm mũ,” he mũ kurã ti. Kŷ ag tóg Egito tá vĕnh grun mũ.

¹⁸ Kejĕn ũ tá pã'i tóg tŷ pã'i jĕ, Egito tá. Hã ra tóg José mẽ ja tũ nĭ, pã'i tag ti.

¹⁹ Ěn tóg ěg kanhkã ag kã'ug mũ, ag lograr ke tóg mũ, ěg jóg ag vóg kónān tóg mũ gé. Kŷ tóg ag mŷ: “ãjag krĕ kãsir ag vãm ra, ag kãgter jé,” he mũ, pã'i ěn ti,” he tóg, Estêvão ti.

20 “Ti tỹ tag tó kar vāhā Moisés tóg mur mū, kỹ tóg Topē mỹ há tĩ. Hã ra ti han mū fag tóg kysā tãgtũ hã ki ti ki rĩr mū.

21 Kysā tãgtũ tũg kỹ fag tóg sir ti fón mū. Hã ra Faraó ẽn kósin fi tóg ti ve kỹ ti vãg mū, ti jẽ'ỹn jé. Kỹ tóg fi kósin ri ke nĩ, Moisés ti.

22 Kỹ tóg nén kar ki kanhrãn mū, Egito tá vãnh jykre kar ẽn ki. Kỹ ti jykre vỹ vãnh jykre tỹ hẽn ri ke nĩ, kỹ ti vĩ vỹ vãnh vỹ tỹ hẽn ri ke nỹ gé, Moisés ti,” he tóg, Estêvão ti.

23 “Vāhā tóg prỹg tỹ 40 han mū, Moisés ti. Kỹ tóg ã kanhkã pẽ ag to jykrén mū, povo tỹ Israel to, ag tỹ nén han mū venh tĩg jé.

24 Kỹ tóg ù vég mū. Egito tá ke ù vég tóg mū, Moisés ti. Ti tỹ Israel vóg kónãn vég tóg mū, nén ù tũ to. Kỹ tóg ti to jũ kỹ Israel ẽn kajãm mū, ti tén tóg mū, Egito tá ke ẽn ti.

25 “Inh kanhkã ag hỹn isỹ nén han mū to jykrén mū,” he tóg. “Hã kỹ ag tóg ki kanhró nỹtĩ, Topē tỹ inh tugrĩn ag kren han ke ti,” he tóg, Moisés ti. Hã ra ag tóg to jykrén tũ nỹtĩ, ti kanhkã ag,” he tóg, Estêvão ti.

26 “Tỹ vaj kỹ tóg ag to tĩg mãn mū, ã kanhkã ag to. Kỹ ùn régre ag tóg jagnẽ to jũ nỹtĩ, Israel ag. Kỹ Moisés tóg ag tỹ jagnẽ to há han sór mū. Hã jé tóg ag mỹ: “tỹ ãjag tóg jagnẽ kanhkã nỹtĩ vẽ,” he mū. “Ãjag tỹ ne jé jagnẽ vóg kónãn sór nẽ?” he tóg.

27 Û tỹ ã régre vóg kónãn mū ẽn tóg ti vóg kỹ ti mỹ: “ã pi(jé) tỹ ẽg pã'i nĩ,” he mū. “Ã pi(jé) ẽg jyvẽn mū,” he tóg.

28 “Ã hỹn isén sór mū, ã tỹ rãké tá Egito tá ke ẽn tén ri ke han sór ã hỹn mū,” he tóg ti mỹ,” he tóg, Estêvão ti.

29 “Kỹ Moisés tóg ã tỹ ti vĩ mẽ kỹ tóg vãnh péju kỹ tĩ mū. Kỹ tóg ga tỹ Midiã ra tĩ mū. Povo ù ag mĩ tóg tĩ mū gé. Tá tóg prũg kỹ kósin régre han mū.

30 Prỹg tỹ 40 tũg kỹ Topē tỹ jẽnẽ jafã vỹ ti mỹ vãnh ven mū, ti tỹ ẽmã tũ ja mĩ tĩ mū ra, krĩ tỹ Sinai tá. Vãnh grug ki tóg ti vég mū, Moisés ti, Topē tỹ jẽnẽ jafã ẽn ti.

31 Ti tỹ ti ve kỹ tóg ti mỹ e tĩ. Kỹ tóg ra tĩ mū, ti ve há han jé. Kỹ tóg vãnh vỹ mẽg mū. Topē vỹ vẽ.

32 Kỹ tóg ti mỹ: “tỹ sóg ã jóg'jóg ag Topē nĩ,” he mū, “Abraão Topē, Isaque Topē, Jacó Topē,” he tóg, vãnh vỹ ti.

Hã ra Moisés tóg jũrũn ke mū, ti kamẽg kỹ. Kỹ tóg tá ẽvãnh jãvãnh nĩ.

33 Hã ra Topē tóg ti mỹ: “ã pẽn né kunũ ra, ã pẽn to ró ti,” he mū. “Inh jo ã tóg jẽ nĩ (mỹr), hã ra sóg vãnh kar kãfór nĩ. Hã kỹ kunũ,” he tóg, Topē ti.

34 “Egito tá ke ag tỹ isũ ag vóg kónãn vég isóg nĩ nĩ. Ag vẽkrẽnkrẽr mẽg sóg nĩ nĩ. Kỹ sóg tere, sỹ ag kygvãn jé. Hã kỹ sóg ã jẽnẽg mū, ga tỹ Egito ra, ã tỹ ag kygvãn jé. Ha tĩg,” he tóg, Topē tỹ jẽnẽ jafã ti, Moisés mỹ,” he tóg, Estêvão ti.

35 “Moisés ẽn hã jẽnẽ ja tóg nĩ, Topē ti, ti tỹ ã kanhkã ag kren han jé, ti tỹ tỹ pã'i nĩ jé. Hã to Topē tỹ jẽnẽ jafã tóg ti mỹ vãnh ven, vãnh gru ki. Hã ra ti kanhkã ag tóg ti to é he ja nĩgtĩ, ti mỹ: “ã pi(jé) tỹ ẽg pã'i nĩ,” hen kỹ, “ã pi(jé) ẽg jyvẽn mū,” hen kỹ.

36 Moisés tóg sir ẽg tỹ nén han vãnh hyn han, ga tỹ Egito tá, goj kafã tũ tá ke gé, goj kusũg he mū ẽn tá ke gé. Kỹ ag tóg ẽmã tũ mĩ mū mū, prỹg tỹ 40 ki, ti kanhkã ag. Kỹ Moisés vỹ ag jo tĩ mū, ti tỹ ga tỹ Egito tá ag kãpan kỹ. Hã ra tóg ag mũn ki ẽg tỹ nén han vãnh hyn han mū gé,” he tóg, Estêvão ti.

37 “Moisés tóg ã kanhkã ag mỹ, povo tỹ Israel ag mỹ tóg tag tó ja nĩ: “Topē vỹ ãjag mỹ ã vĩ tó tĩ ù jẽnẽnh mū, ãjag mré ke ù, ti tỹ ãjag mỹ Topē vĩ tó jé inh ri kén,” he ja tóg nĩgtĩ, Moisés ti.

38 Moisés ẽn hã ne tóg povo tỹ Israel ag mré ẽmã tũ mĩ tĩ ja nĩgtĩ. Ag tỹ kejẽn pãnónh tỹ Sinai tá nỹtĩn kỹ tóg Topē tỹ jẽnẽ jafã mré vỹ mū, Moisés ti. Kỹ tóg ti mỹ vãnh vỹ nĩm mū, Topē ti, ẽg tỹ ti vỹ ẽn han kỹ ẽg tỹ ẽg rĩr krỹg ja tũ ve jé. Kỹ Moisés tóg ẽg jóg'jóg ag mỹ vãnh vỹ ẽn tugtó mū. Hã ra tóg ẽg mỹ tó mū gé,” he tóg, Estêvão ti.

39 “Moisés vỹ han vãnh ag nỹtĩ, ẽg jóg'jóg ag. Kỹ ag tóg ti tovãnh kỹ ga tỹ Egito ra mū mãn sór mū, kyrãgrã kỹ.

40 Kỹ ag tóg Moisés jãvy tỹ Arão mré vỹ mū. Kỹ ag tóg ti mỹ: “ẽg mỹ vãnh kãgrã tỹ topē han, retrato tỹ, ẽg tỹ vãnh jo ag gé(g) mū jé,” he ag tóg.

Hã ra Moisés vỹ ver pãnónh tỹ Sinai kri nĩ nĩ.

Kỹ ag tóg Arão mỹ: “Moisés tóg ẽg jo tĩg ja nĩ,” he mū. “Èg kãpan ja tóg nĩ, ga tỹ Egito tá,

hã ran hẽ ra vyr hỹn'?" he ag tóg ti mỹ. Kỹ tóg ag mỹ: "hej," he mũ.

⁴¹ Kỹ ag tóg monh sĩ kãggran mũ. Kỹ ag tóg ti kãggrá ẽn mỹ ag tóg ãjag mẽg kugprũn mũ, retrato ẽn mỹ. Ag tỹ han mũ tóg ag mỹ sĩnvĩ tĩ. Kỹ tóg ag mỹ sér tĩ sir.

⁴² Hã ra Topẽ tóg vẽn kaja jé ag tovãnh mũ gé, hã kỹ ag tóg rã to jãnjan mũ, kysã to (mỹr), krĩg kar to (mỹr). Hã kỹ Topẽ vĩ tó tĩ ù tóg ag to rãn mũ gé, kỹ tóg: "Israel'," he mũ. "Ãjag tỹ ẽmã tũ ja mĩ mũn kỹ ãjag tóg inh mỹ nẽn ù pũn ja tũ nĩgtĩ (mỹr)," he tóg. "Prỹg tỹ 40 ki ãjag tóg ẽmã tũ ja mĩ mũ ja nĩgtĩ," he tóg, "hã ra ãjag tóg topẽ ù ag mỹ kugprũn ja nĩgtĩ, inh mỹ pũn tũ nĩn kỹ," he tóg, Topẽ ti, ã vĩ tó tĩ tỹ.

⁴³ "Topẽ tỹ Moloque ãn sĩ va ãjag tóg mũ ja nĩgtĩ, krĩg kãggrá ke gé, hã vỹ: Renfã, he mũ, krĩg retrato ẽn ti," he tóg. "Vẽn kãggrá ẽn to ãjag tóg jãnjan ja nĩgtĩ," he tóg. "Hã kỹ sóg ãjag vóg kónãn kỹ Babilônia tá ke ag jẽgnẽnh mũ, ag tỹ ãjag tatĩn mũ jé, cidade tỹ Babilônia mã ra," he tóg, Topẽ ti, ã vĩ tó tĩ tỹ," he tóg, Estêvão ti.

⁴⁴ "Èg jóg ag tỹ ẽmã tũg ja mĩ mũn kỹ ag tóg kur tỹ Topẽ pẽ jo ãn han ja nĩ, ag tỹ tá Topẽ tũ han jé, ti ãn tá. Topẽ vỹ Moisés mỹ tó ja nĩ, ti tỹ kur tỹ Topẽ jo ãn han jé, kỹ tóg ti tỹ nẽn han ke ven ja nĩ ti mỹ.

⁴⁵ Ag krẽ tóg sir ag ri kén ãn tỹ kur ẽn ma mũ ja nĩgtĩ gé, ag tỹ Topẽ tỹ ãjag mỹ ẽmã tó mũ ẽn ra mũn kỹ. Moisés ter kar Josué tóg sir ag jo tĩ mũ, kỹ ag tóg ga ẽn ra mũ mũ. Hã ra Topẽ tóg ga ẽn tá ke ag kãpan mũ, ẽg jóg'jóg ag jo.

Kejẽn Davi tóg tỹ ag pã'i nĩ sir, prỹg tỹ hẽn ri ke kar kỹ. Hã ra ãn tỹ kur ẽn tóg ver jẽ nĩ.

⁴⁶ Topẽ vỹ Davi to há nĩ. Kỹ Davi tóg ti mỹ: "sỹ ã mỹ ãn há han há tóg tĩ vẽ," he mũ. "Ã hã ne tóg tỹ ijóg'jóg tỹ Jacó Topẽ nĩ," he tóg. "Kỹ tóg ã tỹ ãn tỹ kur krẽm nĩn kỹ inh mỹ há tũ nĩ," he tóg ti mỹ, Davi ti.

⁴⁷ Hã ra Davi tóg han tũ nĩ ver. Ti kósin tỹ Salomão tóg ãn ẽn han mũ," he tóg, Estêvão ti.

⁴⁸ Kỹ tóg ag mỹ: "hã ra vẽn kar kãfór ẽn tóg ẽg tỹ ti jo ãn han mũ ẽn krẽm nĩ tũ nĩgtĩ (mỹr)," he mũ. "Hã kỹ Topẽ vĩ tó tĩ ù tóg ti to tag tó ja nĩ, ha mẽ.

⁴⁹ "Kanhkã tãn vỹ tỹ inh nĩ," he tóg. "Inh nĩg ja ri ken hã vẽ," he tóg. "Kỹ ga vỹ tỹ isũ nĩ gé. Sỹ tá vẽnkhãn sór nĩn kỹ sóg kenh ke mũ. Isũ kar vẽ. Kỹ ãjag tỹ inh mỹ ãn han sór kỹ ãjag hỹn hẽ ri kenh mũ?" he tóg. "Pêtẽm ke tũ ãjag nĩnh mũ, ãjag tỹ inh mỹ vẽnkhãn jafã han ken ki," he tóg.

⁵⁰ "Inh hã ne tóg nẽn kar hyn han ja nĩ inhhã," he tóg, Topẽ ti, ã vĩ tó tĩ tỹ," he tóg, Estêvão ti.

⁵¹ Kỹ tóg ag mỹ: "krĩ tũ ãjag nỹtĩ (mỹr)," he mũ. "Ki kanhrãn jãvãnh ãjag tóg nỹtĩ (mỹr)," he tóg. "Kỹ ãjag nĩgrẽg tóg kutu nĩ gé (mỹr), Topẽ kuprĩg kato ãjag tóg vãsãnsãn nỹtĩ. ãjag jóg'jóg ag mré ãjag tóg ti kato vãsãnsãn nỹtĩ," he tóg.

⁵² "Ãjag jóg'jóg ag ne tóg Topẽ vĩ tó tĩ ag kar vóg kónãn ja nĩgtĩ', ag kãgtén ja ag tóg nĩgtĩ'. Hã ra ẽn ag tóg ù tỹ vẽn jykre kuryj han mũ ẽn kãmén ja nĩgtĩ, hã vỹ: Jesus, he mũ. Ti kãtĩg ke jo ag tóg ti tó ja nĩgtĩ, Topẽ vĩ tó tĩ ag. Jãvo ãjag tóg ẽn kato vĩ ja nĩgtĩ, fóg mỹ. Kỹ ãjag tóg ti tén ja nĩgtĩ, Cristo ti," he tóg, Estêvão ti.

⁵³ "Topẽ hã ne ãjag mỹ ã vĩ nĩm ja nĩ', ã tỹ jẽgnẽ jafã ag tỹ. Hã ra ãjag tóg ti vĩ mrynhmranh ja nĩgtĩ," he tóg. Estêvão tỹ pã'i ag mỹ tón hã vẽ.

Ag tỹ Estêvão tén

⁵⁴ Û tỹ tá nỹtĩ ag tỹ ti vĩ mẽ kỹ ag fe tóg gỹm ke mũ. Kỹ ag tóg ãjag jã tỹ gyngyn he mũ, tỹ ag tóg gangan ke mũ.

⁵⁵ Hã ra Topẽ kuprĩg tóg Estêvão krĩn mũ, kỹ Estêvão tóg kanhkã ki ẽvãnh mũ. Kỹ tóg Topẽ vэг mũ, ti kókov ti. Jesus vэг tóg mũ gé, Topẽ pẽgia tá tóg jẽ nĩ, Jesus ti.

⁵⁶ Kỹ tóg: "ha vé," he mũ. "Kanhkã tá sóg vэг mũ," he tóg. "Kỹ ẽprã ke fi kósin tóg Topẽ pẽgia tá jẽ nĩ," he tóg.

⁵⁷ Kỹ ag tóg prẽnprẽn mũ sir, ãjag nĩgrẽg nĩgfẻnh kỹ. Ti to ag tóg vẽn gẻnh mũ sir, ag kar ti.

⁵⁸ Kỹ ag tóg ti sэг mũ, cidade tỹ Jerusalém tá ag tóg ti kutẻm mũ gé. Kỹ ag tóg ti pin mũ, pó tỹ. ãjag kur vãvãm ag tóg mũ, kỹ kyrũ tóg ki rĩr mũ, ag kur ki. Kyrũ ẽn jiji hã vỹ: Saulo, he mũ.

⁵⁹ Kÿ ag tóg Estêvão pin mũ sir, pó tỹ. Hã ra Estêvão tóg jamã hár(a): “!..inh Senhor'..!” he mũ. “!..Jesus'..!” he tóg. “!..Inh kuprĩg jãvãnh ra..!” he tóg mũ.

⁶⁰ Kÿ tóg ã jakrĩ tỹ jẽ kÿ prěr mũ, jamã hár(a), kÿ tóg: “!..inh Senhor'..!” he mũ. “!..Ag tỹ inh pin tỹ vãnh pãte fón ne..!” he tóg mũ. Kar kÿ tóg hun ke mũ sir.

8

Saulo tỹ ag vóg kónãn

¹ Jãvo Saulo ẽn mÿ tóg há tĩ, ag tỹ ti tén kÿ. Kurã ẽn kã ag tóg Jesus ki ge mũ kar vóg kónãn jagy han mũ, Jerusalém tá. Ủ tỹ vãnh mãn tĩ ag vóg kónãn ag tóg mũ gé, ù tỹ Topẽ vĩ mẽ jé vãnh mãn tĩ ag. Kÿ ag tóg jagãgtar tãvĩ nÿtĩ. Kÿ ag tóg vãnh kãpugpóv kãn mũ sir. Ga tỹ Judéia kar mũ ag tóg mũ mũ, ga tỹ Samaria mũ ke gé. Hã ra Jesus tỹ ùn vin mũ ag hã tóg Jerusalém tá nÿtĩ nĩ.

² Ủ tỹ Topẽ to há tĩ ag tóg fe kaj nÿtĩ, Estêvão ter kÿ. Kÿ ag tóg kygfÿ mág kÿ ti kénh mũ.

³ Hã ra Saulo tóg Jesus ki ge kÿ nÿtĩ kar ag vóg kónãn jagy han mũ, ù tỹ Topẽ vĩ mẽ jé vãnh mãn tĩ ag. Ti tỹ ag tũg sór vễ, Saulo ti. Hã jé tóg ãn kar kãra rã tĩ. Ti tỹ Jesus ki rã kÿ jẽ ù ven kÿ tóg vễse jan kãtã ti fón ti, ùn gré ag, ùn tãtã fag ke gé.

Samaria tá Topẽ vĩ tó

⁴ Ủ tỹ vãnh kãpugpóv mũ ẽn ag vỹ vãnh kar mÿ vãnh vĩ sér tugtó mũgtĩ, Topẽ vĩ ti.

⁵ Kÿ Filipe tóg tĩ mũ gé. Ga tỹ Samaria ra tóg tĩ mũ, kÿ tóg cidade ù ki ra mũ, Cristo kãmén jẽ.

⁶ Kÿ vãnh kar tóg ti vĩ mẽgmẽg mũ. Jẽmẽ há han ag tóg mũ, Filipe vĩ ti. Hã ra Filipe tóg ẽg tỹ nén han vãnh hyn han mũ gé. Kÿ ag tóg vég mũ. Hã kÿ ag tóg jẽmẽ há han mũ.

⁷ Vãnh jagrẽ kórég tỹ hên ri ke pan tóg mũ, Filipe ti. Ti tỹ ag pan kÿ ag tóg jamã hár(a) prěr mũ, kÿ ag tóg kãpa mũ. Ủ grĩ ag tỹ há' he tóg mũ gé, ùn vagvá ag tỹ ke gé, ùn vygvã ag tỹ.

⁸ Kÿ tóg vãnh kar mÿ sér tĩ sir, cidade ẽn tá.

⁹ Kÿ Simão tóg nĩ nĩ, cidade ẽn tá ke ù. Kujã vễ, Simão ẽn ti. Kÿ tóg nén vẽnhmÿ hyn han tĩgtĩ. Kÿ tóg ga tỹ Samaria tá ke ag tỹ ti

tỹ nén han ve kÿ tóg ag mÿ e tĩ. Vễso tóg: “ag kãfór inh nĩ,” he tĩ, ag tỹ ti kamẽg jé.

¹⁰ Hã kÿ vãnh kar tóg ti kamẽg mũ sir, ùn sanh ag, gĩr ag ke gé. Ti to ag tóg: “Topẽ jykre han tóg tĩgtĩ, Topẽ jykre mág (pẽ) ẽn,” he tĩ, Simão ẽn to.

¹¹ Kysã tỹ hên ri ke ki tóg nén vẽnhmÿ hyn han ti, kÿ tóg vãnh kar mÿ e tĩ, hã kÿ ag tóg ti kamẽg tĩ sir.

¹² Vãhã ag tóg Filipe vĩ kri fig mũ, Samaria tá ke ag, ti tỹ Jesus Cristo tón kÿ. Topẽ tỹ tỹ ẽg pã'i nĩ kãmén tóg mũ, Filipe ti. Ủ tỹ ã vĩ kri fig mũ ag kygpég tóg mũ, ùn gré ag, ùn tãtã fag ke gé.

¹³ Kÿ Simão ẽn tóg ti vĩ kri fig mũ gé, kujã ẽn ti. Kÿ Filipe tóg ti kypég mũ gé. Kÿ tóg Filipe mré nĩ nĩ. Kÿ tóg Filipe tỹ ẽg tỹ nén han vãnh hyn han mũ vég mũ, Topẽ jykre tỹ. Kÿ tóg ti mÿ e (pẽ) tãvĩ tĩ sir, Simão mÿ.

¹⁴ Kÿ vãhã Jesus tỹ ùn vin mũ ag tóg kejẽn mẽg mũ, Samaria tá ke ag tỹ Topẽ vĩ kri fig mũ ẽn ti. Jerusalém tá ag tóg mẽg mũ, kÿ ag tóg João mré Pedro jẽnẽg mũ, ag tỹ ve jé.

¹⁵ Pedro ag tỹ tá junjun kÿ ag tóg ag to Topẽ mré vĩ mũ, Samaria tá ke ag to, Topẽ tỹ ã kuprĩg tỹ ag jagrẽn jé.

¹⁶ Tá ke ù tóg tỹ jagrẽ tũ ja nĩ ver. Kygpe kÿ ag nÿtĩ inhhã, Jesus jiji tó kÿ, ẽg Senhor jyjy tó kÿ.

¹⁷ Kÿ Pedro ag tóg ãjag nĩgẽ tỹ ag mẽgmẽg mũ, kÿ Topẽ kuprĩg tóg ag kãra rã mũ.

¹⁸ Hã ra Simão tóg vég mũ, Jesus tỹ ùn vin mũ ag tỹ nén han mũ ti. Ag tỹ ù mẽ kÿ Topẽ kuprĩg tóg ag kãra rã mũ. Ẽn vég tóg mũ, Simão ti. Kÿ tóg ag mÿ jãnkamy ven mũ, Pedro ag mÿ.

¹⁹ Kÿ tóg ag mÿ: “inh mÿ vãnh jykre tag nĩm nĩ, jãnkamy tag to,” he mũ. “Sÿ ù mẽ kÿ Topẽ kuprĩg tóg ag kãra rãnh ke mũ. Sÿ vãnh jykre ẽn ki kanhrãn há tóg tĩ,” he tóg.

²⁰ Hã ra Pedro tóg ti mÿ: “ã jãnkamy mré ã nũgme ki kutẽnh mũ,” he mũ. “Topẽ tỹ nĩm ja vễ (mÿr), hã ra ã tóg jãnkamy ti mãn sór mũ, vãnh jykre ti,” he tóg.

²¹ “Ã pi(jé) Topẽ jykre tag ki kanhró nĩnh mũ', kÿ Topẽ tóg ã mÿ nĩm ke tũ nĩ,” he tóg. “Ã jykre pijé kuryj nÿ', Topẽ mÿ,” he tóg.

²² “Ã jykre pãno tag tovãnh ra,” he tóg. “Topẽ mré vĩ. Hên ri ke mũn tóg ã mÿ vãnh

pāte fón mũ, ã tỹ vĕnh jykre pāno to jykren mũ tag ti,” he tóg. Pedro ti.

²³ “Fe kórég tãvĩ ã nĩ (mỹr), kỹ ã jykre vỹ pāno nỹ gé sir,” he tóg, Pedro ti.

²⁴ Kỹ Simão tóg ti mỹ: “iso Topê mré vĩ, inh jagtar jĕg tũ nĩ jé, ã tỹ inh mỹ tó mũ tag ti,” he mũ.

²⁵ Hã ra Pedro ag tóg mũ măn gé, ag tỹ ĕg Senhor tỹ Jesus vĩ tó kar kỹ. Ājag tỹ nĕn ve ja ĕn tó kãn ag tóg, Jesus tỹ nĕn han ja ti. Kỹ ag tóg Jerusalém to vỹnvỹn ke mũ sir. Ag mũ kỹ ag tóg ga tỹ Samaria mĩ Topê vĩ há tugtó mũ gé.

Filipe tỹ ùn kypég mũ

²⁶ Hã ra Topê tỹ jĕnĕ jafã tóg Filipe mỹ vĩ mũ, kỹ tóg: “kanhkã tãpér ra tĩg, ĕpřy jagma tĩg, ĕmĩn jagma,” he mũ. Jerusalém tán kãtĩ, Gaza mĩ, hã ra tóg ĕmã tũ fĩn kutĕ mũ. Ĕpřy ĕn jagma tĩg, ĕmĩn ĕn jagma,” he tóg mũ, Topê tỹ jĕnĕ jafã ti.

Kỹ tóg tĩ mũ sir, Filipe ti.

²⁷ Tá jun kỹ tóg ga tỹ Etiópia tá ke vĕg mũ, pã'i fi rãnrhãj han tĩ ti, pã'i tỹ rainha fi tỹ nĕn ù kar vĕg tĩ ti, ùn kurĩ ĕn ti. Pã'i fi jijin hã vỹ: Candace, he mũ. Fi krĕm pã'i ĕn tóg Jerusalém ra tĩg ja nĩ, ùn kurĩ ĕn ti. Tá tóg Topê kurã mág ve ja nĩ, festa mág ti, Jerusalém tá.

²⁸ Hã ra tóg ã jamã ra vỹn ke mũ sir, carroça kãmĩ. Tĩg kỹ tóg Topê vĩ to ke mũ, Isaías tỹ rá ĕn ti. Vãsỹ Topê vĩ tó tĩ vĕ, hã vỹ: Isaías, he mũ.

²⁹ Kỹ Topê kupřĩg tóg Filipe mỹ: “carroça kukãm tĩg,” he mũ.

³⁰ Kỹ Filipe tóg fũrũn tĩ mũ, kỹ tóg ti tỹ vĕnh rá to ke mĕg mũ, Isaías tỹ rá ĕn to, vãsỹ Topê vĩ tó tĩ tỹ rá ĕn to. Kỹ tóg ti mỹ: “ã mỹ ã tỹ nĕn to ke mũ tag ki kanhró nĩ?” he mũ.

³¹ Hã ra tóg: “vó,” he mũ. “Û tóg inh mỹ kãmĕn ja tũ nĩ ver,” he tóg. “Ā mỹ inh mỹ kãmĕn ke tũ nĩ?” he tóg. “Tãpřy ra, inh mré nĩ jé,” he tóg. Kỹ tóg ke mũ, Filipe ti.

³² Ti tỹ ken hã vĕ, ha mĕ: “ovelha ri ke han tóg, ù ĕn ti. Ovelha pére ĕg mũgtĩ, ti tânĥ jé, hã ra tóg vĩ tũ nĩgtĩ (mỹr). Cordeiro ri ke han tóg mũ gé. Ĕg tỹ ti kyki ronh mũ ra tóg jatun mỹ jé nĩ gé (mỹr).

³³ Û ĕn tỹ Topê vĩ mranh tũ hã ra ag tóg ti vóg kónãn, ag tỹ ti jyvĕn tũ ra. Ti mré ke ag

jykre pāno tó kãn ke tũ ĕg tóg nĩgtĩ (mỹr). Ti tĕn ja ag tóg (mỹr), kỹ tóg ter mũ sir,” he tóg, vĕnh rá ti.

³⁴ Kỹ ùn kurĩ ĕn tóg Filipe mỹ: “ũ to ke nĕ hỹn'? Topê vĩ tó tĩ tỹ ne tó nĕ hỹn'?” he mũ. “Inh mỹ tó,” he tóg. “Ti tỹ vĕso ke mỹ', ù to ke mỹ vó?” he tóg.

³⁵ Kỹ Filipe tóg ti mỹ vĕnh rá tag kãmĕn mũ sir. Jesus kãmĕn tóg mũ. Ti mỹ tóg vĕnh vĩ há ĕn tó mũ, Jesus to.

³⁶ Ge ag tóg mũ mũ, ĕpřy jagma, ĕmĩn jagma. Kỹ ag tóg goj tá junjun mũ. Kỹ ùn kurĩ ĕn tóg: “tag ki tóg goj nĩ,” he mũ. “Ā tỹ ki inh kype jé tóg há nĩ, he tóg.

³⁷ Kỹ Filipe tóg ti mỹ: “ã tỹ ã fe tỹ ti ki rã kỹ nĩ nĩn kỹ tóg há nĩ,” he mũ.

Kỹ tóg: “ti ki sóg rã kỹ nĩ,” he mũ. “Jesus tóg tỹ Topê kósĩn nĩ (mỹr), Jesus Cristo ti,” he tóg, ùn kurĩ ti.

³⁸ Kỹ tóg carroça tĩn ti mỹ: “ver krỹg hé,” he mũ. Kỹ tóg Filipe mré goj ra tĕre mũ, kỹ tóg kãra rã mũ, ùn kurĩ ti. Kỹ Filipe tóg ti kypég mũ sir.

³⁹ Ag tỹ goj kãtã kãjãpřy kỹ Filipe tóg tũ' he mũ, Topê kupřĩg tỹ ti ma tĩg kỹ. Kỹ ùn kurĩ tóg ti ve mãn tũ nĩ sir. Hã ra tóg tĩ mũ, ã jamãn ra. Ti mỹ tóg sér tĩ sir.

⁴⁰ Hã ra Filipe tóg cidade tỹ Azoto tá nĩ nĩ. Kỹ tóg tĩg kỹ Jesus vĩ tó tĩ mũ, ĕmã kar mĩ. Kỹ tóg ĕjĕn cidade tỹ Cesarĕia tá jun mũ, Jesus kãmĕ sér tó jé.

9

Saulo tỹ Jesus ki rã

(Hk 22.6-16; 26.12-18)

¹ Hã ra Saulo tóg ver ù tỹ ĕg Senhor tỹ Jesus mré mũ mũ ag vóg kónãn sór mũ. Ag to tóg krĩ rỹ nĩ ver. Ti tỹ ag kãgtĕn sór vĕ. Hã to tóg Topê tũ ki rĩr tĩ to pã'i mág to tĩ mũ.

² Kỹ tóg ti mỹ permissão to vĩ mũ, ti tỹ cidade tỹ Damasco ra tĩg jé. Tá tóg permissão ĕn tỹ pã'i ag mỹ ven sór mũ, ag tỹ ti mỹ: “ha ag venh tĩ gé,” he jé. Ti tỹ Jesus mré tĩ mũ ù ve kỹ tóg ti se sór tĩ. Jerusalém ra tóg ag taĩ tĩg sór tĩ, ti tỹ ùn ség mũ ag, ùn gré ag, ùn tãtã fag ke gé.

³ Hã jé tóg Damasco ra tĩ mũ. Ti tỹ kakó ke mỹr hã jĕngrĕ tar tóg vĕnh ven mũ, kanhkã tá. Rã kãfór tóg nĩ, hã ra tóg Saulo ki kómkóm ke mũ sir.

4 Kÿ Saulo tóg kutē mū, ga kri tóg tá' ke mū. Kÿ tóg vēnh vī mēg mū. Kÿ tóg: "Saulo', Saulo'," he mū. "Ā tÿ ne jé isū ag vóg kónān nē?" he tóg, vēnh vī ti.

5 Kÿ Saulo tóg ěg Senhor mÿ: "ā tÿ ũ nē?" he mū.

Kÿ tóg ti mÿ: "tÿ sóg Jesus nī, ā tÿ ũn vóg kónān sór tī ěn vÿ tÿ inh nī," he mū.

6 "Jēg nē ra, cidade tag ki rā, tá ũ tóg ā mÿ tónh mū, ā tÿ nén han ke ti," he tóg, vēnh vī ti.

7 Ti mré mū ag vÿ vēnh vī tag mēg mū gé, hā ra ag tóg nén ũ vég tū nī. Kÿ ag kāne tóg jūrūn ke mū.

8 Kÿ Saulo tóg jēg nē mū sir. Kÿ tóg tāmī ěvānh sór mū, hā ra tóg nén ũ vég tū nī. Kÿ ag tóg ti nīgē kāmī kÿ ti pére mū mū, cidade tÿ Damasco ra.

9 Kurā tāgtū ki tóg ěvānh tū nī, kÿ tóg jēg tū (pē) nī gé, kron tū (pē) ti nī gé, Saulo ti.

10 Damasco tá ke ũ tóg nī nī, ti jyjy hā vÿ: Ananias, he mū. Jesus mré tī ũ vē. Kÿ Jesus tóg ti mÿ vēnh ven mū. Kÿ tóg: "Ananias'," he mū.

Kÿ Ananias tóg ěg Senhor ti mÿ: "inh hā vē," he mū.

11 Kÿ Jesus tóg ti mÿ: "jēg nē ra," he mū. "Ěmīn kuryj he mū ěn ra tīg. Judas he mū ěn ĩn kāra rā. Tá ũ tóg nī nī, ti jiji hā vÿ: Saulo, he mū. Cidade tÿ Tarso tá ke vē. Ěn mré vīmī," he tóg. "Ha vé, inh mré tóg vī nī," he tóg.

12 "Kÿ tóg ũ vég nī nī, ti jyjy hā vÿ: Ananias, he mū. Ā hā vē. Ā tÿ ti ĩn kāra rānh ke vē. Ā tÿ ā nīgē tÿ ti mēnh ke vē. Kÿ tóg ve mān ke mū, ā tÿ ti mēn tÿ. Tag vég tóg nī nī, Saulo ti," he tóg, Jesus ti, Ananias mÿ.

13 Kÿ Ananias tóg ěg Senhor ti mÿ: "vēnh kar tóg ti kāmén tī hā ra, ā tÿ inh mÿ tó mū tag ti," he mū. "Jerusalém tá tóg ā tū ag vóg kónān," he tóg.

14 "Kÿ tóg permissāo ma kātī mū, Topē tū ki rīr tī to pā'i mág tÿ ti mÿ han kÿ. Kÿ tóg ũ tÿ ā mré vī mū kar sigse sór mū, cidade tag ki," he tóg, Ananias ti, Jesus mÿ.

15 Kÿ ěg Senhor tÿ Jesus tóg ti mÿ: "ti venh tīg," he mū. "Ti kuprēg isóg (mÿr), ti tÿ ijiji tó jé, fóg ag kar mÿ, kanhgág ag kar mÿ ke gé, povo tÿ Israel ag mÿ ke gé," he tóg.

16 "Ti mÿ sóg ven mū, ti tÿ isugrīn jagtar ke ti," he tóg, Jesus ti.

17 Kÿ Ananias tóg tī mū. Ti tÿ ĩn ěn tá jun kÿ tóg ā nīgē tÿ ti mēg mū, kÿ tóg ti mÿ: "Saulo'," he mū. "Régre'," he tóg mū. "Ěg Senhor vÿ inh jēnē, Jesus mÿr, sÿ ā ve jé," he tóg. "Ti ve ā (mÿr), ěpry kri, ā tÿ tag ki jun mūn kā," he tóg. "Hā kÿ sóg kātī mū, ā tÿ ve mān jé, Topē kuprīg tÿ tÿ ā jagrē nī jé," he tóg, Ananias ti.

18 Kÿ tóg vāhā ti kanē tá pa mū, pirā fār ri ke. Kÿ tóg ve há' he mān mū sir. Kÿ tóg jēg nē mū sir. Kÿ tóg ti kypég mū sir, Ananias ti.

19 Kÿ tóg jēg mū gé sir, hā kÿ tóg tar' he mū sir. Damasco tá tóg nī nī ver, Jesus mré mū tī ag mré.

20 Kÿ tóg vēsÿmér Jesus kāmén mū, Israel ag vēnh kanhrān jafā krēm. "Tÿ tóg Topē kósín nī," he tóg mū, Jesus to.

21 Ũ tÿ ti vī mēg mū kar ag mÿ tóg e tī. "Jerusalém tá tóg ag vóg kónān, ũ tÿ Jesus tó mū ag," he ag tóg. "Kÿ tóg tag ki jun mū gé, ag sigse jé, Topē tū ki rīr tī tÿ pā'i mág ag mÿ ag tatī tīg jé," he ag tóg, Saulo to. Kÿ tóg ag mÿ e tī, ti tÿ Jesus to: Topē kósín vē," hen kÿ.

22 Hā ra Saulo tóg fe tar nī. Kÿ tóg Israel ag kanhrān mū, cidade tÿ Damasco tá. Ag mÿ tóg Jesus kāmén mū. "Tÿ tóg Cristo nī, Jesus ti," he tóg, ag mÿ Topē vī kāmén kÿ. Kÿ tóg ag tÿ ti vī kafān sór mū hā ra ag mÿ vēnhmÿ tī sir.

Saulo tÿ cidade tÿ Jerusalém ra tīg

23 Kurā tÿ hēn ri ke tūg kÿ Israel ag tóg kejēn jagnē mré jykrén mū, Saulo tén ke to.

24 Hā ra Saulo tóg mēg mū, ag tÿ ti to jykrén ěn to. Cidade ěn to ró jānkā tá ag tóg vājig nÿtī, ti jo, kurā kar ki, kuty tá ke gé, ag tÿ hēn ri ke mūn tá ti tén jé. Kÿ tóg mēg mū sir, Saulo ti.

25 Kÿ ti mré ke ag vÿ kuty tá kēj kākā ti nīm kÿ ti térem mū, cidade ěn to ró to. Kÿ tóg Jerusalém ra tī mū.

26 Ti tÿ Jerusalém tá jun kÿ tóg Jesus mré mū ag mré nī sór mū, Jesus mré mū tī ag mré. Hā ra ag tóg ti kamēg mū. "Ti ón hÿn," he ag tóg ti to, ti tÿ ag vóg kónān jan kÿ.

27 Kÿ Barnabé tóg ti mré vī kÿ Jesus tÿ ũn vin mū ag to ti pére tī mū. Kÿ tóg ag mÿ ti

tỹ Jesus ve ja ěn kāmén mũ, ěpřy jagma. “Kỹ Jesus tóg ti mré vỹ ja nĩ gé,” he tóg. “Kar tóg Damasco tá ke ag mỹ Jesus kāmén ja nĩ gé, ti tỹ mũmĕg tũ nĩn kỹ,” he tóg, Barnabé ti.

²⁸ Kỹ Saulo tóg ag mré tĩ nĩ ver, Jerusalém tá. Tá tóg Jesus kāmén mũ gé, ti tỹ mũmĕg tũ nĩn kỹ.

²⁹ Kỹ tóg Israel ag mré vỹ mũ gé, ũ tỹ Grego vỹ tó mũ ag mré ke gé. Ag tỹ ti vỹ kafān kỹ tóg ag mré vỹ mũ. Hã ra ag tóg ti tén ke to jykrén mũ, Saulo tén ke to.

³⁰ Kỹ Jesus mré ke ag tóg mĕg mũ gé, ag tỹ Saulo tén ke to jykrén mũ ěn to. Kỹ ag tóg cidade tỹ Cesaréia ra ti pére mũ mũ. Tá junjun kỹ ag tóg cidade tỹ Tarso ra ti jĕnĕg mũ.

³¹ Jesus ki ge kỹ nỹtĩ ag kar vỹ jatun mỹ nỹtĩ nĩ sir, ũ tỹ Topĕ vỹ mĕ jé vĕnh mǎn tĩ ěn ag. Jatun mỹ ag tóg nỹtĩ sir, ga tỹ Judéia tá, ga tỹ Galiléia tá ke gé, ga tỹ Samaria tá ke gé. Kỹ ag tóg jatun mỹ vĕnh kanhrān mũ, Topĕ jykře tỹ. Topĕ vỹ ki ag tóg króm mũ, Topĕ kamĕg kỹ. Topĕ kupřig vỹ ag krĩn mũ. Kỹ ag krĩ vỹ kǎnhvy' he mũ. Kỹ ag tóg e nỹtĩ gé sir.

Enéias

³² Kejĕn Pedro tóg vĕnh kar ag vegvenh tĩ mũ. Kỹ tóg cidade tỹ Lida ra tĩ mũ gé, tá Topĕ tũ ag vegve jé.

³³ Tá ũ tóg nỹ nĩ, ti jijin hã vỹ: Enéias, he mũ. Grĩn kỹ tóg nỹ nĩ, ě cama kri. 8 anos han tóg, grĩ nỹ ki.

³⁴ Kỹ Pedro tóg ti mỹ: “Enéias’,” he mũ. “Jesus Cristo vỹ ě han,” he tóg. “Jĕg nĕ ra, ě cama fi han ra,” he tóg.

³⁵ Kỹ tóg vĕsýmĕr jĕg nĕ mũ. Kỹ cidade tỹ Lida tá ke kar ag vỹ ti vég mũ, cidade tỹ Saroná tá ke kar ag ke gé. Kỹ ag tóg ti ve kỹ Jesus ki ge mũ gé sir.

Dorcas fi

³⁶ Cidade tỹ Jope tá ũ fi tóg nĩ nĩ, Jesus mré tĩ mũ fi, fi jijin hã vỹ: Tabita, he mũ, hã vỹ: Dorcas, he mũ, fi jyjy ti, fóg tỹ Grego vĩn ki. ěn fi hã vỹ nĕn kar há han mũ. ũn jagāgtar fag mỹ fi tóg nĕn vin tĩ.

³⁷ Kejĕn fi tóg kaga nỹ nĩ, kỹ fi tóg ter mũ sir. Kỹ fag tóg fi kupe kỹ ěn to jǎpřy jafā tá fi fig mũ, kynh mỹ.

³⁸ Jo Jope tóg Lida kakó kǎ nĩ, hã ra Pedro tóg Lida tá nĩ nĩ. Kỹ Jope tá ke ag tóg ti ki kanhró nỹtĩ, Pedron ki, Jesus mré mũ ag.

Kỹ ag tóg ũn régre ag jĕgnĕg mũ, ag tỹ ti mỹ: “kur kǎtĭg mĕ han,” he jé.

³⁹ Kỹ Pedro tóg vĕsýmĕr tĩ mũ. Kỹ tóg tá jun mũ. Hã ra Dorcas fi tóg ěn to jǎpřy jafā tá nỹ nĩ, ter kỹ. Pedro jun kỹ ag tóg ěn to jǎpřy jafā to jǎpřy mũ, ti mré. Kỹ ũn mén ter ja ěn fag kar vỹ ti to kāmũ mũ. Kygfỹ fag tóg mũ. Ti mỹ fag tóg kur venven mũ, fi tỹ fag mỹ kugřyn ja ti, camisa, vestido ke gé, vĕnh kri fĕ ke gé. Dorcas fi tóg fag mỹ kugřyn mĕ han ja nĩgtĩ.

⁴⁰ Kỹ Pedro tóg vĕnh kar mỹ: “ha pa jĕg,” he mũ. Kỹ tóg ě jakřĩ tỹ jĕg kỹ Topĕ mré vỹ mũ. Kỹ tóg vĕser fi mỹ: “Tabita’, nĩ ra,” he mũ. Kỹ fi tóg mřin ke mũ. Kỹ fi tóg nĩ mũ, fi tỹ Pedro ven kỹ.

⁴¹ Kỹ tóg fi nĩgé kǎgmĩ kỹ fi fĕg mũ. Kỹ tóg vĕnh kar jé přĕr mũ, Topĕ tũ kar, ũn mén ter ja ěn fag mré hã. Kỹ tóg fag mỹ fi ven mũ.

⁴² Kỹ Jope tá ke kar ag vỹ mĕg mũ sir, fi řĩr mǎn ěn ti. Kỹ ũ tỹ hĕn ri ke ag vỹ Jesus ki ge mũ sir.

⁴³ Kỹ Pedro tóg cidade tỹ Jope tá nĩ nĩ ver, Simão he mũ ěn mré, ũ tỹ nĕn fár tỹ tǎnǎj ke tĩ ěn mré.

10

Capitão tỹ Cornélio

¹ Cidade tỹ Cesaréia tá ũ tóg nĩ nĩ, ti jijin hã vỹ: Cornélio, he mũ. Soldado tỹ 100 to pǎ'i vĕ, ag tỹ ũ to: ga tỹ Itália tá ke ag, he mũ ěn to capitão vĕ.

² ěn vỹ Topĕ to há nĩ, kỹ tóg Topĕ kamĕg tĩ. Ti mré ke kar vỹ ge nỹtĩ gé. Povo tỹ Israel ag kāmĩ ũn jagāgtar ag jagāgtǎn tóg tĩgtĩ, ti tỹ tỹ Israel ag mré ke tũ hã ra. Topĕ mré tóg vỹ tĩ gé.

³ ěn tóg nĕn nĕ vég mũ, 3 horas ki, ě nũr tũ ra. Kỹ tóg Topĕ tỹ jĕnĕ jafā jun vég mũ. Kỹ tóg ti mỹ: “Cornélio’,” he mũ, Topĕ tỹ jĕnĕ jafā ti.

⁴ Ti tỹ ti ve kỹ ti fe tóg jũrũn ke mũ, kỹ tóg: “ne nĕ?” he mũ.

Hã ra tóg ti mỹ: “Topĕ vỹ ě vỹ mĕg mũ (mỹr),” he mũ. “Ā tỹ ũn jagāgtar ag mỹ nĕn nĩm tĩ vég tóg mũ gé,” he tóg. “Hã kỹ tóg ě to jykrén mũ,” he tóg.

5 “Kỹ ù jěgněmnĩ, ag tỹ Jope ra mũ jé. Tá ù tóg nĩ nĩ, ti jiji hã vỹ: Simão, he mũ, kỹ ti jyjy ù hã vỹ: Pedro, he mũ. Ēn jé prěrmnĩ,” he tóg.

6 “Simão mré tóg nĩ nĩ, ù tỹ nén fár tỹ tãñaj ke tĩ ěn mré, kỹ ti ĩn vỹ goj kafã tũ fyr tá jé nĩ,” he tóg.

7 Kỹ Topě tỹ jěñě jafã tóg tĩ mũ, ti mỹ tó kar kỹ. Kỹ capitão ěn tóg ã camarada régre ag jé prěr mũ, soldado pir mré, ù tỹ Topě kaměg mũ ěn ti. Ũ tỹ ã rãnrãj han mũ ěn jé tóg prěr mũ.

8 Kỹ tóg ag mỹ ã tỹ nén ve ja tó mũ, kỹ tóg cidade tỹ Jope ra ag jěgněg mũ.

9 Tỹ vaj kỹ ag tóg cidade ěn to hã nỹtĩ, meio dia ki. Kỹ Pedro tóg ĩn kri kyjer ěn ra tãpry mũ, Topě mré vỹ jé.

10 Kỹ tóg kókĩr mũ. Kỹ tóg fag mỹ vějén to vỹ mũ. Fag tỹ ver ti mỹ han mũ ra tóg nén ně vég mũ, Pedro ti.

11 Kỹ tóg ag tỹ kanhkã nón mũ vég mũ. Tá nén ù tóg kătére mũ. Kỹ tóg tỹ kur mág ve nĩ. Tĩ péno kygje kỹ tóg ga kri kătére mũ, kur ti.

12 Hã ra bicho kar tóg kur ěn kãki nỹtĩ nĩ, fa tỹ 4 (ke) kar tóg nỹtĩ, ù tóg ã nug kri mũgtĩ gé, sěsĩ kar ke gé, jěsĩ kar.

13 Kỹ vėnh vỹ tóg mẽ há tĩ, kỹ tóg: “tág;” he mũ. “Tãnh kỹ kó, vỹ,” he tóg.

14 Kỹ Pedro tóg ěg Senhor ti mỹ: “nejé,” he mũ. “Nén ù jěggry ko ja tũ sóg nĩ (mỹr),” he tóg. “Ēg povo jykre tũ vė, ěg tỹ bicho ěn kon kỹ,” he tóg.

15 Kỹ tóg ti mỹ vỹ mãn mũ sir jãvo, vėnh vỹ ti, kỹ tóg: “Topě tóg hã ra to: há ti nĩ, he mũ. Kỹ jěggryg tũg nĩ,” he tóg.

16 Ge tãgtũ han tóg, kỹ nén ně ěn tóg vég tũ' he mũ sir, kanhkã tá.

17 Hã ra tóg Pedro mỹ e tĩ. Ti tỹ to jykrén tũ tóg tĩ, ti tỹ vég mũ to. Ti tỹ ver to jykrén mũ ra ag tóg junjun mũ, Cornélio tỹ ùn jěgněg mũ ag. Ũ tóg ag mỹ: “ĩn ěn vė,” he ja nĩ.

18 Kỹ ag tóg tá junjun mũ. Ró to jěgjě kỹ ag tóg jamã hár(a) ke mũ, kỹ ag tóg: “Simão Pedro ag mỹ ki nỹtĩ?” he mũ.

19 Hã ra Pedro tóg ver ã tỹ vég mũ ěn to jykrén nĩ nĩ. Kỹ Topě kuprĩg tóg ti mỹ ke mũ. “Ha vé, ùn régre ag vỹ ã jé prěr mũ,” he tóg.

20 “Jěg ně ra, kătére ra, tũg ra ag mré,” he tóg. “To jykrén tũg. Isỹ ag jěgně vė,” he tóg, Pedro mỹ, Topě kuprĩg ti.

21 Kỹ Pedro tóg ag to kătére mũ, kỹ tóg ag mỹ: “inh hã vė,” he mũ. “Inh jé prěr ja ãjag tóg nĩ,” he tóg. “Ājag tỹ ne to kãmũ ně?” he tóg ag mỹ.

22 Kỹ ag tóg ti mỹ: “Cornélio tỹ ěg jěgně vė,” he mũ. “Capitão vė, Cornélio ti. Ũn jykre kuryj vė, kỹ tóg Topě kaměg tĩ,” he ag tóg. “Israel kar ag tóg ti to há nỹtĩ, ti to ag tóg vỹ há han tĩ. Topě tỹ jěñě jafã vỹ ti mỹ ke ja nĩ, ti tỹ ã jé prěr jé, ã tỹ ti ĩn ra tũg jé, ã tỹ ti mỹ Topě kãmén jé,” he ag tóg, Pedro mỹ.

23 Kỹ Pedro tóg ag mỹ: “kãge jěg ra,” he mũ. Kỹ ag tóg tá nũgnũr mũ. Tỹ vaj kỹ tóg ag mré tĩ mũ. Kỹ Jope tá ke ù ag tóg ti mré mũ mũ gé, Jesus mré ke ù ag.

24 Tỹ vaj kỹ ag tóg Cesaréia tá junjun mũ. Tá Cornélio tóg ag jãvãnh mũ. Hã kỹ tóg ã kanhkã ag kar kógfyn ja nĩ, ag mỹ vėnh vỹ jěñě ja tóg nĩ, ã mré ke kar ag mỹ. Kỹ ag tóg kãmũ ja nĩ, kỹ ag tóg tá nỹtĩ sir.

25 Pedro tỹ tá jun kỹ Cornélio tóg ti kato tẽ mũ, kỹ tóg ti jo mũg ke mũ. “Tĩ hỹn tỹ Topě nĩ,” he tóg, hã kỹ tóg ti jo mũg ke mũ, Cornélio ti.

26 Hã ra Pedro tóg ti fěg mũ, kỹ tóg: “ke tũg ra,” he mũ. “Tỹ sóg ěprã ke nĩ gé,” he tóg ti mỹ.

27 Kỹ tóg ti mỹ vỹ há han mũ. Kỹ tóg kãra rã kỹ ùn e ag vég mũ, ùn vėnh mãn kỹ nỹtĩ ag, Pedro ti.

28 Kỹ tóg ag mỹ: “Israel ag vỹ fóg mré nĩ tũ nĩgtĩ (mỹr),” he mũ. “Ēg jykren hã vė,” he tóg. “Kỹ ěg tóg fóg ĩn kãra rã tũ nĩgtĩ gé (mỹr) sir. Tag ki kanhró ãjag tóg nỹtĩ,” he tóg. “Hã ra Topě tóg inh kanhrãñ, ã jykre tỹ. Kỹ sóg vėnh kar ĩn kãra rãnh mũ, jěggry tũ nĩn kỹ,” he tóg.

29 “Hã kỹ sóg jatun mỹ kătĩg, vėsỹmér, ãjag tỹ inh jé prěr kỹ. Kỹ sỹ ãjag ki jěmėnh há tóg tĩ. Ājag tỹ hě ri ke jé inh jé prěr ně?” he tóg ag mỹ, Pedro ti.

30 Kỹ Cornélio tóg ti mỹ: “4 dias vė ha ùri,” he mũ, “kỹ sóg Topě mré vĩnh ke nĩ nĩ, jěg tũ nĩn kỹ. 3 horas vė. Inh ĩn krēm sóg Topě mré vĩnh ke nĩ nĩ, kỹ sóg ù vég nĩ nĩ. Ti kur tóg kókov nĩ.

31 Kŷ tóg inh mŷ: “Cornélio,” he mŷ. “Topē vŷ ā vī mēg mŷ. Ā tŷ ūn jagēgtar mŷ nén vin ēn ve tóg. To tóg jykrén, Topē ti,” he tóg.

32 “Kŷ Jope ra ū jēnē. Tá Simão jé prēr, ū tŷ Pedro he mŷ ēn ti. Nén fár tŷ tănāj ke tī ēn ĩn krēm tóg nī nī, hā vŷ: Simão, he mŷ. Ti ĩn vŷ goj kafā tŷ fyr tá jē nī,” he tóg inh mŷ, Topē tŷ jēnē jafā ti,” he tóg, capitão ti.

33 “Kŷ sóg vēšymér ā to ū ag jēgnē. Kŷ ā tóg kātī mŷ. Kŷ tóg há tī, ā kātīg ti. Hā to ēg tóg vēnh măn, Topē jo. Topē tŷ ā mŷ nén tó ja kāmén ra ēg mŷ. Ēg tŷ mēnh há tóg tī vē,” he tóg, Cornélio ti, Pedro mŷ.

Pedro tŷ Cornélio mŷ Topē vī tó

34 Kŷ Pedro tóg ag mŷ kāmén mŷ, kŷ tóg: “vāhā tóg sŷ to jykrén mŷ,” he mŷ. “Topē mŷ nén ū tŷ vē, Israel he mŷ ēn ag, fóg he mŷ ēn ag ke gé, kanhgág ag ke gé, Israel jykre han tŷ kar ag,” he tóg.

35 “Ū tŷ ti kamēg mŷ vŷ ti mŷ há nŷtī, Topē mŷ, ū tŷ vēnh jykre kuryj han mŷ ag kar, povo kar kāmī,” he tóg.

36 “Povo tŷ Israel mŷ tóg ā vī ēn jēnē ja nī, Topē ti. Ēg mŷ tóg tó, ēg tŷ jatu nŷtī jé, ti tŷ Jesus Cristo tigrīn ēg to há nīn kŷ. Jesus ēn vŷ tŷ vēnh kar Senhor nī,” he tóg.

37 “Vēnh vī ēn mē kăn ājag tóg huri. Judéia kar mī tóg rūm ke ja nī. João tóg vēnh kar mŷ: “ājag jykre tovānh ra,” he ja nŷgtī. Kŷ tóg ag kygpe ja nī. Kar kŷ Jesus tóg Galiléia mī tŷg vén mŷ, Nazaré tá ke ēn ti.

38 Kŷ Topē tóg Jesus mŷ ā kuprīg jēnē ja nī. Kŷ tóg ti mŷ vēnh jykre nīm ja nī. Ga kar mī tóg tŷg ja nŷgtī. Nén kar há han ja tóg nŷgtī. Japo tŷ ūn vóg kónān mŷ ag tŷ há' he ja tóg nī gé. Topē hā ne ti mré han ja nŷgtī hā ra',” he tóg.

39 “Nén kar ēn ve ja ēg tóg nŷgtī, ti tŷ nén han mŷ kar, ga tŷ Judéia tá, Jerusalém tá ke gé. Ēn tŷ ag tóg cruz to ti sa ja nŷgtī, ti tén ja ag tóg nŷgtī.

40 Kurā tāgtŷ tŷg kŷ Topē tóg ēn rīn măn ja nŷgtī, kŷ tóg vēnh ven ja nŷgtī,” he tóg, Pedro ti.

41 “Hā ra vēnh kar vŷ ti ve ja tŷ nī. Ēg hā mŷ tóg vēnh ven ja nī. Hā to Topē tóg ēg kuprēg ja nŷgtī. Ti mré ēg tóg jēn ja nŷgtī,

kron ja nŷgtī gé, ti tŷ ā ter kar rīr măn kŷ,” he tóg, Pedro ti.

42 “Kŷ tóg ēg mŷ: “vēnh kar mŷ inh kāmén nī,” he ja nŷgtī. “Topē vŷ ti tŷ vēnh kar káfór han, hemnī,” he ja tóg nī ēg mŷ. “Kŷ tóg vēnh kar tŷ nén han mŷ venh ke mŷ sir. Ū tŷ ūri rīnrīr mŷ ag kar tŷ nén hyn han mŷ ve jé tóg ke mŷ, ūn ter mŷ ag kar tŷ nén hyn han mŷ kar ke gé, hemnī,” he ja tóg nŷgtī ēg mŷ, Jesus ti,” he tóg, Pedro ti.

43 “Vāsŷ Topē vī tó tī ag kar vŷ ti kāmén ja nŷgtī, kŷ ag tóg: “Ū tŷ ti ki rā mŷ mŷ tóg vēnh pāte fón ke mŷ, Topē ti, ti tŷ ti vī mranh mŷ ti,” he ja nŷgtī. “Cristo tigrīn tóg vēnh pāte fón ke mŷ,” he ja ag tóg nŷgtī, Topē vī tó tī ag,” he tóg, Pedro ti.

Topē kuprīg tŷ tŷ ag jagrē nī

44 Pedro tŷ ver tag tó kŷ vāhā Topē kuprīg tóg ag ki rā mŷ, ū tŷ ti vī mēg mŷ ag ki.

45 Kŷ Israel ag tŷ Jesus ki ge kŷ nŷtī ag mŷ tóg e tī, ū tŷ Pedro mré kāmŷ ag mŷ. “Topē kuprīg tóg tŷ ag jagrē nī,” he ag tóg. “Ag tŷ tŷ fóg nŷtī ra tóg ag ki rā mŷ,” he ag tóg.

46 “Vēnh vī ū tŷgtó ag mŷ (mŷr),” he ag tóg. “Vēnh vī ēn ki ag tóg Topē mŷ: há ā tóg nī, he mŷ,” he ag tóg.

47 Kŷ Pedro tóg: “Ū tóg ag to: ag kygpenh ke tŷ ēg nī, henh ke tŷ nī (mŷr),” he mŷ. “Topē kuprīg tŷ ag jagrē nŷtī. Ēg ki rā ri ke han tóg ag ki, Topē kuprīg ti. Kŷ ēg hŷn ag kygpenh mŷ ha,” he tóg, Pedro ti.

48 Kŷ tóg ū mŷ: “ag kygpe ra ge, Jesus Cristo jiji tó kŷ,” he mŷ sir.

Ājag kygpe kar kŷ ag tóg Pedro mŷ: “ver ēg mré nī,” he mŷ. Kŷ tóg ag mré nī sī han kar kŷ tī mŷ sir.

11

Pedro tŷ Jerusalém tá ā tŷ nén han mŷ tó

1 Kŷ Jesus tŷ ūn vin mŷ kar ag vŷ jēmēg mŷ, fóg ag tŷ Topē vī kri fig mŷ ti. Judéia kar mī ag tóg jēmēg mŷ, Jesus mré ke kar ag.

2 Kŷ Pedro tóg Jerusalém ra tī mŷ. Kŷ tá Jesus ki ge mŷ ag tóg ti mré vī mŷ. Ti mré vī mŷ ag tóg: “vēnh kar vŷ ājag gré junjun fár kym ke mŷ, ēg jykre han jé, ag tŷ Topē jykre han sór kŷ,” he ag tóg tī. Ēn ag vŷ Pedro mŷ vī mŷ,

³ kÿ ag tóg: “Ûn fár kym ja tũ ag mré ã tóg jĕg mũ (mÿr), ag ìn ki,” he mũ.

⁴ Kÿ Pedro tóg ag mÿ nĕn kar ĕn kāmĕn mũ,

⁵ kÿ tóg: “cidade tÿ Jope tá sóg nĩ ja nĩ, kÿ sóg Topĕ mré vĩ nĩ ja nĩgtĩ. Ti mré vĩ kÿ sóg nĕn nĕ vég mũ,” he tóg. “Nĕn gé(g) tĩg jafã vĕ, kur mág ri ke. Ti péno kygje tóg kanhkã tá kátĕre mũ. Kÿ tóg ình ki jun mũ.

⁶ Kÿ sóg kãki ĕvãnh mũ, kÿ sóg bicho kar vég mũ, fa tÿ 4 ke ti nÿtĩ, nĕn tãn ag mré hã, ag nug kri mũ tĩ ag mré hã, sĕsĩ kar mré hã, jĕsĩ kar.

⁷ Kÿ sóg vĕnh vĩ mĕg mũ, kÿ tóg: “tág', vÿ,” he mũ. “Tãnh kÿ kó,” he tóg.

⁸ Kÿ sóg ti mÿ: “nejĕ,” he mũ. “Nĕn ù jĕggry ko ja tũ sóg nĩ,” he sóg ti mÿ. “Ĕg jykre tũ vĕ, ĕg tÿ bicho ĕn kon kÿ,” he sóg ti mÿ.

⁹ Kÿ tóg ình mÿ tó mãn mũ gé, kanhkã tá vĕnh vĩ ti, kÿ tóg: “Topĕ tóg hã ra to: há tĩ nĩ, he mũ. Kÿ jĕggry tũg nĩ,” he tóg, kanhkã tá.

¹⁰ Ge tãgtũ han tóg, kÿ nĕn nĕ ĕn tóg vég tũ' he mũ sir, kanhkã tá.

¹¹ Kÿ vĕsÿmĕr ùn tãgtũ ag vÿ tá nÿtĩ, ình nĩ ĕn rã. Cidade tÿ Cesarĕia tá ag kãmũ ja nĩgtĩ, fóg tÿ iso ag jĕgnĕn kÿ.

¹² Kÿ Topĕ kuprĩg tóg ình mÿ: “ha jatun mÿ ag mré tĩg,” he mũ. Kÿ tag ag tóg ình mré mũ mũ, ù tÿ 6 (ke) tag ag, Jesus mré ke tag ag. Kÿ ĕg tóg ĕn ìn kãra ge mũ sir.

¹³ Kÿ tóg ĕg mÿ ã tÿ Topĕ tÿ jĕnĕ jafã ve ja tó mũ. Ti ìn kãtã tóg nĕji jĕ ja nĩ, Topĕ tÿ jĕnĕ jafã ti. Kÿ tóg nĕji ti mÿ: “Jope ra ù jĕgnĕ,” he mũ. “Tã Simão jĕ prĕr, ù tÿ Pedro he mũ ĕn,” he ja tóg nĕji ti mÿ.

¹⁴ “Ĕn vÿ ã mré vĩnh mũ. Ti vĩ tÿ ã tóg kren ke mũ, ã mré ke kar fag ke gé,” he ja tóg nĕji nĩ ti mÿ, Topĕ tÿ jĕnĕ jafã ti,” he tóg, Pedro ti.

¹⁵ “Kÿ sóg ag mÿ kãmĕn mũ. Isÿ tó sĩ han mũ ra Topĕ kuprĩg tóg ag ki rã mũ. Ti tÿ ĕg ki rã ri ke han tóg mũ, kurã ĕn kã.

¹⁶ Kÿ sóg Jesus vĩ to jykrĕn mũ, ti tÿ ĕg mÿ: João tóg goj tÿ ag kygpe ja nĩgtĩ, hã ra Topĕ kuprĩg tóg ag kãra rãnh mũ, tÿ vĕnh kype ri ke vĕ sir, he ĕn to,” he tóg, Pedro ti.

¹⁷ “Kÿ Topĕ vÿ ag jagrĕn mũ, ã kuprĩg tÿ, ti tÿ ĕg jagrĕn ri ke vĕ, ĕg tÿ Jesus Cristo ki ge kÿ. Hã kÿ sóg Topĕ kato tĕ jãvãnh ja nĩ,” he tóg, Pedro ti.

¹⁸ Ag tÿ tag mĕ kÿ ag krĩ tóg kusa' he mũ. Kÿ ag tóg: “Topĕ vÿ fóg ag krĩn mũ gé, ag tÿ ãjag jykre tovãnh jĕ, ag tÿ ĕg rĩr krÿg ja tũ ve jĕ,” he ag tóg mũ.

Antioquia tá ke ag tÿ Topĕ vĩ kri fi

¹⁹ Ag tÿ Estĕvão tĕn kar kÿ Jesus ki ge kÿ nÿtĩ ag tóg ĕn ra mũ mũ, ag tÿ ag vóg kónãh kÿ. Kÿ ag tóg ga tÿ Fenícia ra mũ mũ, goj vãso tÿ Chipre ra, cidade tÿ Antioquia ra ke gé. Ag mũn kÿ ag tóg Israel ag hã mÿ Topĕ vĩ tó mũ.

²⁰ Kejĕn Chipre tá ke ù ag tóg cidade tÿ Antioquia ra mũ mũ, Cirene tá ke ag ke gé. Ĕn ag tóg fóg tÿ Grego vĩ tó mũ ag mÿ Jesus Cristo kãmĕn mũ, vĕnh vĩ sér tag ti.

²¹ Kÿ Topĕ tóg ag mré ag krĩn mũ. Kÿ ù tÿ ĕn ri ke ag tóg Jesus ki ge mũ, Topĕ jykre han jĕ.

²² Kÿ Jerusalĕm tá ke ag tóg mĕg mũ, fóg ag tÿ Jesus vĩ kri fig mũ ti. Jerusalĕm tá Jesus ki ge kÿ nÿtĩ ag tóg mĕg mũ gé, ù tÿ tá Topĕ vĩ mĕ jĕ vĕnh mãn tĩ ag. Kÿ ag tóg Barnabĕ jĕnĕg mũ, ti tÿ Antioquia ra tĩg jĕ.

²³ Ti tÿ tá jun kÿ ti fe tóg mrin ke mũ, Topĕ tÿ ag jagãgtãh kÿ. Kÿ tóg ag jyvĕn mũ, ag tÿ Jesus ki rã to krónh ke tũ nĩn jĕ, ag tÿ fe tar nÿtĩn jĕ.

²⁴ Barnabĕ vÿ tÿ ùn vĩ há nĩ, Topĕ kuprĩg vÿ tÿ ti jagrĕ nĩ. Kÿ ti jykre kar tóg Jesus ki rã ja nĩ. Kÿ ù tÿ ĕn ri ke ag vÿ Jesus ki ge mũ gé sir, ti tÿ ag jyvĕn kÿ.

²⁵ Kÿ Barnabĕ tóg cidade tÿ Tarso ra tĩ mũ, Saulo jãvãnh jĕ, tá.

²⁶ Ti tÿ ti ve kÿ tóg ti pére tĩ mũ, Antioquia ra. Kÿ ag tóg prÿg pir han, Antioquia tá. Jesus ki ge kÿ nÿtĩ ag tÿ vĕnh mãn kÿ ag tóg ag kanhrãh tĩ, Barnabĕ ti, Saulo ti ke gé. Kÿ ùn e vÿ Barnabĕ ag vĩ jĕmĕg tĩ. Kÿ ag tóg Antioquia tá ag tóg ù tÿ Jesus mré mũ ag to: “Cristo mré ke ag,” he vĕn. Kÿ ag jiji vĕ sir, hã vÿ: Cristo mré ke ag, he mũ.

²⁷ Kejĕn Jerusalĕm tá ke ù ag tóg Antioquia tá junjun mũ, Topĕ vĩ tó tĩ ag.

²⁸ Ag kã ù jijin hã vÿ: Ágabo, he mũ. Ĕn vÿ kejĕn Topĕ kuprĩg tÿ ti krĩn kÿ: “kejĕn ĕg tóg prÿg venh mũ, kãnhmar,” he mũ, “ga kar mĩ hã,” he tóg. Kÿ tóg Clãudio tÿ pã'i tÿ imperador nĩn kÿ tóg ge nĩ.

²⁹ Kŷ ag tóg prŷg nŷnh ken kŷ Jesus mré mŷ ag tóg Judéia tá ke ag to jykrén mŷ sir. Kŷ ag tóg: “ĕg hŷn ag mŷ nén ũ jĕnĕnh mŷ, ag tŷ kon jé,” he mŷ. Kŷ vĕnh kar vŷ ag tŷ kju vin han mŷ, ag tŷ Judéia tá Jesus mré ke ag mŷ jĕnĕ jé.

³⁰ Kŷ ag tóg Barnabé jĕnĕg mŷ, Saulo ke gé, ag tŷ gé(g) mŷ jé, kófa ag mŷ vin jé, ũ tŷ Jesus ki ge kŷ nŷtŷ ag ki rŷr tŷ ag mŷ. Kŷ ag tóg ke mŷ sir.

12

Ag tŷ Pedro se

¹ Kejĕn pā'i tŷ rei tŷ Herodes vŷ Jesus ki ge kŷ nŷtŷ ũ ag sigség mŷ, ag vóg kónān jé.

² Kŷ tóg soldado jĕnĕg mŷ, ti tŷ Tiago tén jé, João kāke ĕn. Kyfé téj tŷ tóg ti tén mŷ, rógro téj tŷ, soldado ti, Herodes tŷ ti jĕnĕn kŷ.

³ Kŷ tóg Israel ag mŷ há tŷ, ti tŷ Tiago tén kŷ. Kŷ Herodes tóg Pedro kāgmŷg mŷ gé sir. Festa kāki tóg ti kāgmŷg mŷ. Festa ĕn ki ag tóg pāo jĕgiā tŷ ko tŷ, Israel ag. Ag jykre vĕ.

⁴ Soldado ag tŷ Pedro ve kŷ ag tóg vĕse ja kāki ti fón mŷ. Soldado tŷ 16 ag vŷ ti ki rŷr mŷ, ũ tŷ 4 tŷ ti ki rŷr nŷtŷn kŷ ũ tŷ 4 ũ ag nŷtŷg ja ki nŷtŷ ke tŷ, jagnĕ ri kĕn. “Festa tŷ Páscoa kar kŷ sóg ag mŷ ti ven mŷ, ag tŷ ti vóg kónān jé,” he tóg, Herodes ti.

⁵ Kŷ Pedro tóg se kŷ jĕ nŷ. Hā ra Jesus ki ge kŷ nŷtŷ ag tóg ti jo Topĕ mré vŷ kŷ nŷtŷ, ag tŷ to krónh ke tŷ nŷn kŷ.

Pedro tŷ kavār nŷ

⁶ Tŷ vaj kŷ Herodes vŷ ag mŷ ti ven sór mŷ. Tŷ kuty ĕn kā Pedro tóg soldado régre ag kju ki nŷr mŷ. Ferro régre tŷ tóg se kŷ nŷ ag mré. Soldado ũ ag tóg vĕse ja jānkā ki rŷr mŷ.

⁷ Kŷ vāhā Topĕ tŷ jĕnĕ jafā tóg ti mré jĕ nŷ, kŷ tóg ĩn ĕn krĕm jĕngrĕ nŷ, kuty hā ra. ĕn tóg Pedro ki pérĕn ke mŷ, ti kāvŷ ki. Ti rŷn tóg mŷ, kŷ tóg ti mŷ: “kur nŷ,” he mŷ. Kŷ ti nŷgé se ja tóg varan ke mŷ, ferro ĕn ti. Kŷ tóg kavār kŷ nŷ nŷ, kyvar kŷ, Pedro ti.

⁸ Kŷ Topĕ tŷ jĕnĕ jafā tóg ti mŷ: “vĕsóg fŷ ra,” he mŷ. “Ā pĕn né tu ra gé, ā pĕn to ró ti,” he tóg. Kŷ tóg ke mŷ sir. Kŷ tóg ti mŷ: “Ā kur rŷ tu kŷ ĩnh nón kātŷg,” he mŷ.

⁹ Kŷ tóg kākutĕ mŷ. Ti nón tóg tŷ mŷ, Pedro ti. Hā ra tóg ti mŷ tŷ nĕn ũ ve jĕ, ti tŷ vég mŷ ti. Ti mŷ tóg tŷ ti vĕnhpĕti ve tŷ, Topĕ tŷ jĕnĕ jafā tŷ nĕn han mŷ ti.

¹⁰ Jānkā ki rŷr vĕn mŷ ĕn pātĕn ag tóg mŷ, jānkā ki rŷr mŷ ũ ke gé. Kŷ ag tóg jānkā mág tá junjun mŷ, ferro tŷ han kŷ jĕ ĕn, kyfé tŷ han kŷ jĕ ĕn, ũn tŷ cidade to nón mŷ ĕn. Jānkā ĕn vŷ vĕsógki rām ke mŷ ag jo. Kŷ ag tóg kāpa mŷ sir. Ēpyr jagma ag tóg mŷ mŷ, ĕmŷn jagma. Kŷ vāhā Topĕ tŷ jĕnĕ jafā tóg ti mŷ sir.

¹¹ Kŷ vāhā Pedro tóg mrin ke mŷ, kŷ tóg: “vāhā sóg ki kanhró nŷ,” he mŷ. “Topĕ vŷ ā tŷ jĕnĕ jafā jĕnĕ ja nŷ, kŷ tóg ĩnh kren han mŷ, pā'i tŷ Herodes jo. Israel kar ag tóg ĩnh jagtar nŷnh ke jāvānh mŷ, hā ra sóg venh ke tŷ nŷ,” he tóg, Pedro ti.

¹² To jykrén kŷ tóg Maria fi ĩn ra tŷ mŷ, João mŷnh ĕn fi, ag tŷ ũ to: Marcos, he mŷ ĕn mŷnh fi. Fi ĩn krĕm ag tóg vĕnh mān kŷ nŷtŷ nŷ, Topĕ mré ag vŷ nŷtŷ nŷ, ũ tŷ hĕn ri ke ag.

¹³ Kŷ tóg ĩn to ró jānkā tŷ tórón' tórón' ke mŷ. Kŷ fi camarada fi tóg venh kātŷ mŷ. Fi jyjŷ hā vŷ: Rode, he mŷ.

¹⁴ Kŷ fi tóg Pedro vŷ ki kanhró nŷ, hā ra fi tóg ti mŷ nón tŷ nŷ, róm tŷ fi nŷ, jānkā ti, fi fe tŷ mrin ke mŷ ra. Fi tŷ ĩn kāra rān kŷ fi tóg vĕnh kar mŷ: “Pedro vŷ ró to jĕ,” he mŷ.

¹⁵ Kŷ ag tóg fi mŷ: “krŷ vĕnhmŷ ā nŷ,” he mŷ. Hā ra fi tóg: “ti hā vĕ,” he mŷ. Kŷ ag tóg fi mŷ: “ti ki rŷr tŷ ĕn vĕ hŷn,” he mŷ.

¹⁶ Kŷ Pedro tóg ver re tá jĕ nŷ, jānkā tŷ tórón' tórón' ke mān kŷ. Kŷ ag tóg ti mŷ róm mŷ, jānkā ti. Ti vég ag tóg mŷ sir, kŷ tóg ag mŷ e tŷ.

¹⁷ Kŷ Pedro tóg ag mŷ ā nŷgé tŷ ge mŷ, ag tŷ katŷ' he jé. Kŷ tóg ag mŷ Topĕ tŷ ti kavān tó mŷ sir, Topĕ tŷ ti kyvān kŷ. Topĕ tŷ vĕse ja kātá ā kutĕm kāmĕn tóg mŷ sir. Kŷ tóg ag mŷ: “Tiago mŷ kemnŷ, Jesus mré ke kar ag mŷ ke gé,” he mŷ. Kŷ tóg Jerusalĕm tá kutĕ kŷ ĕmā ũ ra tŷ mŷ sir.

¹⁸ Tŷ vaj kŷ soldado ag fe tóg jŷrŷn ke mŷ. “Pedro hŷn hĕ kātá vyr, ti hŷn ne kātá vyr?” he ag tóg mŷ, ti jāvānh kŷ.

¹⁹ Kŷ Herodes tóg ũ ag jĕgnĕg mŷ gé, ti kāgmŷ jé. Hā ra ag tóg ti vég tŷ nŷ gé. Kŷ Herodes tóg Pedro ki rŷr mŷ ag ki jĕmĕg

mãn mũ. Kar kÿ tóg soldado ù ag mÿ: “ag kãgtén ra, ti ki rÿr mũ ag,” he mũ. Kÿ ag tóg ag kãgtén mũ sir.

Kar kÿ Herodes tóg Judéia tá kutē kÿ cidade tÿ Cesaréia ra tÿ mũ sir; tá nÿ jé.

Herodes ter

²⁰ Herodes tóg cidade tÿ Tiro tá ke ag to jũ mũ, cidade tÿ Sidom tá ke ag to ke gé. Ēn ag tóg Herodes nÿgia tá junjun mũ. Kÿ ag tóg pã'i sÿ mré vÿ mũ, ti jiji hã vÿ: Blasto, he mũ. Herodes vÿ ti tÿ pã'i han ja nÿ. Ēn mÿ ag tóg to vÿ mũ, ti tÿ ag jagfy vÿ jé, pã'i tÿ Herodes mré, ti tÿ ti fe tÿ há' he jé. Herodes krēm ke ag tóg ag mÿ vĕjĕn vĕne he ja nÿgtÿ, Tiro tá ke ag mÿ, Sidom tá ke ag mÿ ke gé. Herodes tÿ ag to jũ nÿn kÿ ag tóg tá vĕjĕn ve mãn tũ nÿ sir. Hã kÿ ag tóg ti fe tÿ há' he sór mũ, ti tÿ ag mÿ vĕne he mãn jé.

²¹ Kÿ Herodes tóg ag mÿ kurã nÿm mũ. Kÿ tóg ã kur sÿnvÿ ěn tu mũ, pã'i kur ěn ti. Kÿ tóg ã nÿgia kri nÿ kÿ ag mÿ vÿ mág han mũ.

²² Kÿ vĕnh kar tóg ti to: “ĕprã vĕnh vÿ pijé,” he mũ. “Tÿ tóg Topĕ vÿ mĕ tÿ, ti vÿ ti,” he ag tóg mũ.

²³ Kÿ vĕsÿmĕr Topĕ tÿ jĕnĕ jafã tóg ti vóg kónãn mũ sir, ti tÿ ag mÿ: “vó,” he tũ nÿn kÿ. “Inh pi(jé) tÿ Topĕ nÿ,” he ja tũ tóg nÿ, hã kÿ tóg ti vóg kónãn mũ sir. Kÿ ti nug ga vÿ ti kagrãg mũ, hã kÿ tóg ter mũ.

Barnabé tÿ Saulo mré Topĕ vÿ tónh tÿg

²⁴ Jó ù tÿ hĕn ri ke ag vÿ Topĕ vÿ mĕg mũ, kÿ ag tóg Jesus ki ge mũ.

²⁵ Kÿ Barnabé vÿ Saulo mré ãjag tÿ nĕn gé(g) kãmũ mũ ěn vin mũ, Jerusalém tá ke ag mÿ. Prÿg nÿn kÿ Jesus ki ge kÿ nÿtÿ ag tóg Jerusalém tá ke ag mÿ vĕjĕn jĕgnĕ ja nÿgtÿ. Ag mÿ vĕjĕn ěn vin kÿ ag tóg vÿnvÿn ke mũ sir, Barnabé ti, Saulo ti ke gé. João pére ag tóg mũ mũ, Marcos he mũ ěn ti.

13

¹ Antioquia tá ù ag tóg nÿtÿ, Topĕ vÿ tó tÿ ù ag, Jesus jykre tÿ vĕnh kanhrãn nÿtÿ ag ke gé. Jesus ki ge kÿ nÿtÿ ag mré ag tóg nÿtÿ, ù tÿ vĕnh mãn tÿ ag mré, ag tÿ Topĕ vÿ mĕ jé. Kÿ ù jijin hã vÿ: Barnabé, he mũ, kar ù jyjyn hã vÿ: Simão Negro, he mũ. Û tóg tÿ Lúcio nÿ, Cirene tá ke tag ti. Kÿ ù tóg tÿ Manaém

nÿ, pã'i tÿ Herodes mré mog mũ tag ti. Kÿ ù tóg tÿ Saulo nÿ gé.

² Kejĕn ag tóg jagnĕ mÿ Topĕ jykre tó mũ, ag tÿ jĕg tũ nÿn kÿ. Kÿ Topĕ kuprÿg tóg ag mÿ: “Barnabé fĕg ra, Saulo mré,” he mũ, “ag tÿ inh rãnhrãj han jé, isÿ nĕn to jykrĕn mũ ěn ti, ag tÿ inh jykre tó jé, vĕnh kar mÿ,” he tóg, Topĕ kuprÿg ti.

³ Kÿ ag tóg jĕg tũ nÿn kÿ Topĕ mré vÿ mãn mũ. Ājag nÿgé tÿ ag tóg ag mĕg mũ, ag kymĕn ag tóg mũ, kÿ ag tóg: “ha mũ jĕg ge,” he mũ. Hã kÿ Topĕ kuprÿg tóg ag jĕgnĕg mũ sir.

Kujá tÿ Elimas

⁴ Topĕ kuprÿg tÿ ag jĕgnĕn kÿ ag tóg cidade tÿ Selêucia ra mũ mũ. Tá junjun kÿ ag tóg goj vãso tÿ Chipre ra mũ mũ, canoa mág kãmÿ.

⁵ Kÿ ag tóg cidade tÿ Salamina tá junjun mũ. Tá ag tóg Topĕ vÿ kãmĕn mũ, Israel ag tÿ vĕnh kanhrãn jafã kãtã. João Marcos vÿ ag mré tÿ mũ gé. Ag camarada vĕ, João Marcos ti.

⁶ Goj vãso mÿ ag tóg pa mũ. Kÿ ag tóg cidade tÿ Pafos tá junjun mũ, Topĕ vÿ kãmĕn kÿ. Tá ù tóg nÿ nÿ, kujá ù. Ón kÿ tóg Topĕ vÿ tó sór mũ. Israel ù vĕ, ti jiji hã vÿ: Bar Jesus, he mũ.

⁷ Governador mré tóg nÿ nÿ. Governador jyjy hã vÿ: Sérgio Paulo, he mũ. Krÿ há ti nÿ, Sérgio Paulo ti. Kÿ tóg Barnabé jé prĕr mũ, Saulo jé ke gé, ti tÿ Topĕ vÿ jĕmĕ sór kÿ.

⁸ Kÿ kujá ěn tóg ag vÿ kato tĕ mũ, governador tÿ Topĕ vÿ kri fig tũ nÿ jé. Kujá ěn jiji ù hã vÿ: Elimas, he mũ, hã vÿ: kujá, he mũ, ti jyjy ti.

⁹ Kÿ vãhã Topĕ kuprÿg tóg Saulo krÿn mũ. Saulo jiji ù hã vÿ: Paulo, he mũ.

Kÿ Topĕ kuprÿg tÿ ti krÿn kÿ Paulo tóg kujá ěn ki kanĕ jũ han kÿ ti ki ĕvãnh mũ,

¹⁰ kÿ tóg: “tÿ ã tóg ùn ón mé nÿ,” he mũ. “Jykre pãno ã nÿ (mÿr),” he tóg. “Japo kósĭn vÿ tÿ ã nÿ (mÿr), vĕnh jykre kuryj kato tĕ ã nÿ (mÿr),” he tóg. “Topĕ japry vÿ kugryj nÿtÿ, ti jamÿn ti, hã ra ã tóg tÿ pãno ke sór tÿ (mÿr), kÿ ã tóg vĕnh jykre pãno to krónh ke tũ nÿgtÿ (mÿr),” he tóg.

¹¹ “Ha vé, Topĕ vÿ ã vóg mũ, kÿ ã tóg kyvãh ha,” he tóg. “Rã venh ke tũ ã nÿnh mũ, kurã tÿ hĕn ri ke ki,” he tóg, Paulo ti.

Kỹ tóg vēs̄mēr ti m̄y kuty' he m̄. Kyvó tóg n̄i sir. K̄y tóg jēm̄ig m̄. Ū jé tóg pr̄er m̄, ti t̄y ti pére t̄ig jé.

¹² Governador t̄y tag ve k̄y tóg ti m̄y e t̄i. K̄y tóg Jesus ki r̄a m̄. Topē jykre tóg ti m̄y tar ja n̄i.

Paulo t̄y cidade t̄y Antioquia tá Topē v̄i tó

¹³ K̄y v̄ah̄a Paulo ag tóg Pafos tá pa m̄. Canoa mág k̄am̄i ag m̄ m̄. K̄y ag tóg ga t̄y Panfília tá junjun m̄, cidade t̄y Perge tá. H̄a ra João Marcos tóg kyr̄a m̄. Ag ré k̄y tóg Jerusalém ra v̄yn ke m̄, João Marcos ti.

¹⁴ Jó ag tóg Perge tá pa m̄, ga t̄y Pisídia ra m̄ jé, cidade t̄y Antioquia ra. Tá junjun k̄y ag tóg v̄enhkán ke kur̄a ki ag tóg Israel t̄y v̄enh kanhr̄an jaf̄a k̄ara ge m̄, tá ag n̄ign̄i m̄ gé.

¹⁵ Ū tóg tá Topē t̄y ěg m̄y v̄enh jykre n̄im ja ěn to ke m̄, rán k̄y n̄i ěn to. Ti t̄y ěg jyv̄en tó tóg m̄ gé, v̄as̄y Topē v̄i tó t̄i ag t̄y rán ja ěn ti. Kar k̄y p̄a'i ag tóg Paulo ag jé pr̄er m̄. K̄y ag tóg: “kanhk̄a',” he m̄. “Ājag t̄y ěg jyv̄en sór n̄yt̄in k̄y tóg há t̄i,” he ag tóg.

¹⁶ K̄y Paulo tóg jěg nē m̄. Ā n̄igé t̄y tóg ag m̄y ge m̄, ag t̄y katy' he jé. K̄y tóg ag m̄y: “ha mē, Israel kar',” he m̄. “Jēmē ra ha, ū t̄y Topē kamēg m̄ kar, ājag t̄y t̄y fóg n̄yt̄i ra,” he tóg.

¹⁷ “Israel ag v̄y Topē kamēg t̄i. Topē tag tóg ěg jóg'jóg ag kuprēg ja n̄i. Ag t̄y tóg povo mág han, ag t̄y ver Egito tá ke ag mré n̄yt̄in k̄y. Tá tóg ag k̄apan m̄, ā jykre tar ěn t̄y, Topē ti,” he tóg.

¹⁸ “Ag to tóg fen mág m̄, Topē tag ti, ag t̄y ěm̄a t̄ug ja m̄i m̄un k̄y, pr̄yg t̄y 40 ěn ki.

¹⁹ Povo t̄y 7 t̄y tóg t̄u' he m̄, ga t̄y Canaã tá. K̄y tóg ěg jóg'jóg ag m̄y ag ga fig m̄, t̄y ag t̄u n̄i jé.

²⁰ K̄y tóg ag m̄y p̄a'i ag vin m̄ gé, ag jyv̄en jaf̄a ag, 100 t̄y 4 kri 50 anos ki. Kar k̄y Samuel v̄y t̄y Topē v̄i tó t̄i n̄i gé.

²¹ K̄y ag tóg p̄a'i mág t̄y rei ve sór m̄. K̄y ag tóg Topē m̄y to v̄i m̄. H̄a k̄y Topē tóg Saulo fěg m̄, Quis kósin ěn. Benjamim krē'krē ū vē, Saulo ti. 40 anos ki tóg t̄y p̄a'i mág t̄y rei n̄i.

²² Ti t̄y ěn kutēm kar tóg Davi fěg m̄, Topē ti. Davi to tóg v̄i há han m̄, Topē ti, k̄y tóg: “Davi ve sóg, Jessé kósin,” he m̄. “Nén há

han tóg t̄igt̄i. K̄y sóg ti to há n̄i. ěn h̄a v̄y inh jykre kar han m̄,” he tóg, Topē ti, Davi to,” he tóg, Paulo ti.

²³ “Davi kósin ū vē, h̄a v̄y: Jesus, he m̄. Topē v̄y v̄as̄y ti k̄at̄ig ke tó ja n̄igt̄i. K̄y tóg v̄ah̄a Jesus jěnē ja n̄i, ěg povo t̄y Israel to, ti t̄y ěg kren han jé.

²⁴ João v̄y ti k̄at̄ig ke jo v̄enh kar m̄y: “ājag jykre tov̄anh ra,” he ja n̄igt̄i, “is̄y ājag kygpe jé,” he ja tóg n̄igt̄i, ěg povo t̄y Israel kar m̄.

²⁵ João r̄anhr̄aj t̄y t̄u' henh ken k̄y tóg ag m̄y: “iso ājag tóg Cristo he sór m̄,” he ja n̄igt̄i, João ti. “H̄a t̄u vē,” he ja tóg n̄igt̄i. “Inh pi(jé) t̄y Cristo n̄i,” he ja tóg n̄igt̄i. “Ha vé, inh nón tóg k̄at̄ig, inh Senhor ti, h̄a v̄y: Jesus, he m̄. S̄y t̄y ti camarada n̄inh ke vē vē, s̄y ti pěn né kun̄u jé, ti pěn to ró ti, h̄a ra sóg t̄y ti krēm ke pě jé,” he ja tóg n̄i, João ti,” he tóg, Paulo ti.

²⁶ “Inh kanhk̄a',” he tóg. “Abraão krē',” he tóg. “Ū t̄y Topē kamēg m̄', fóg k̄am̄i',” he tóg. “Topē v̄y ěg h̄a m̄y v̄enh v̄i tag jěnē, ěg krenkren jé,” he tóg.

²⁷ “Jerusalém tá ke ag v̄y Jesus ki kagt̄ig ja n̄yt̄igt̄i. Ti t̄y t̄y Topē kósin n̄in ki kagt̄ig ja ag tóg n̄yt̄igt̄i, ag p̄a'i ag ke gé. H̄a k̄y ag tóg v̄as̄y rán k̄y n̄i ěn han. V̄enhkán ke kur̄a ki ag tóg věg t̄i, Topē v̄i tó t̄i ag t̄y něn rán ja ti. H̄a ra ag tóg sir ag t̄y něn tó m̄ ěn ki króm, ājag t̄y Jesus to: ter jé tóg ke m̄, hen k̄y.

²⁸ Něn ū kórég han ja t̄u ti n̄i, k̄y ti ter ke t̄u vē vē, h̄a ra ag tóg Pilatos m̄y: “ěg t̄y ti tén há tóg t̄i vē,” he ja n̄igt̄i.

²⁹ Ag t̄y ti to rán ja ěn ki króm k̄an k̄y ag tóg cruz ěn to ti térem ja n̄igt̄i, v̄enh kej k̄at̄a ag tóg ti fón ja n̄igt̄i.

³⁰ H̄a ra Topē tóg ti r̄in m̄an ja n̄igt̄i, ti ter m̄ ra.

³¹ K̄y tóg ā mré ke ag m̄y v̄enh ven ja n̄igt̄i sir, Jesus ti, ū t̄y ti mré Jerusalém ra m̄ ja ag m̄y, Galiléia tá k̄am̄u k̄y. ěn ag tóg ti k̄aměn m̄ sir, v̄enh kar m̄y.

³² V̄enh v̄i tag tó ěg tóg m̄,” he tóg, Paulo ti.

³³ “Ěg jóg'jóg ag v̄y Topē v̄i ěn mē ja n̄igt̄i. H̄a ra tóg ūri han m̄, Topē ti, ā t̄y v̄as̄y něn tó ja ěn ti. Ěg jóg'jóg ag krē'krē ag m̄y tóg han m̄, ti t̄y v̄as̄y něn tó ja ěn ti, Topē ti. H̄a k̄y tóg Jesus r̄in m̄an, ti ter k̄y. K̄y tóg ti m̄y: “t̄y ā tóg inh kósin jě. Ūri sóg ā han,” he ja n̄igt̄i,

Topē ti, Jesus mǝ. Topē mǝ jān jafā ki tóg rán kǝ nǝ, jān tǝ 2 ki,” he tóg, Paulo ti.

³⁴ “Hā ra tóg ti tǝ ti rǝn mǎn ke tó ja nǝgtǝ gé, ti mur ke to hā. Ti vag ke tǝ ěn tó ja tóg nǝgtǝ gé, kǝ tóg: “sǝ Davi mǝ nén tó ja ěn ki króm jé sóg ke mǝ,” he ja nǝgtǝ. “Ājag mǝ sóg han mǝ, sǝ ti mǝ nén tó ja ěn ti,” he ja tóg nǝgtǝ, Topē ti,” he tóg, Paulo ti.

³⁵ “Kǝ tóg tag tó ja nǝgtǝ gé: “ā tǝ vǝ vag ke tǝ nǝ,” he ja tóg nǝgtǝ gé, Topē ti,” he tóg, Paulo ti.

³⁶ “Hā ra Davi vǝ ter ja nǝgtǝ, ā jóg!jóg ag nón. Kǝ tóg vag ja nǝ inhhā. Topē tǝ ti mǝ nén tó jan ki króm ja tóg nǝgtǝ, Davi ti. Ā mré ke ag mǝ tóg han, Topē tǝ ti mǝ nén tó ja ti. Hā ra tóg ter kǝ vag ja nǝgtǝ inhhā, Davi ti.

³⁷ Ti jāvo tóg vag ja tǝ nǝ inhhā, Jesus ti, Topē tǝ ti rǝn mǎn kǝ,” he tóg, Paulo ti.

³⁸ “Ha vé, inh kanhkā!,” he tóg. “Jesus tag tigrǝn Topē vǝ ājag mǝ vĕnh pāte fón sór mǝ, ājag tǝ ti vǝ mranh ja ti. Hā kǝ sóg ājag mǝ tó mǝ,” he tóg.

³⁹ “Ājag tǝ Moisés vǝ mĕg mǝ ra ājag jykre tóg kuryj ja tǝ nǝ ver. Ājag tǝ hā ra Jesus ki ge kǝ tóg ke mǝ sir, Topē ti. Ājag kugrynh tóg mǝ sir.

⁴⁰ Hā ra ti to é he tǝg nǝ. Ke tǝ nǝ mǝ ra ājag tóg venh ke mǝ, vāsǝ nén rán kǝ nǝ ěn ti, Topē vǝ tó tǝ tǝ nén tó ěn ti,

⁴¹ hā vǝ: “iso ājag tóg é he mǝ (mǝr),” he mǝ. “Sǝ nén han ke ve jé ājag tóg ke mǝ, kǝ ājag kanĕ jur ke mǝ, ājag fĕ tóg jǝrǝn kenh ke mǝ gé,” he ja tóg nǝgtǝ, Topē ti. “Ājag tǝ kri finh ke tǝ vĕ vĕ, ũ tǝ ājag mǝ tó mǝ ra. Hā ra ājag tóg venh ke mǝ,” he ja tóg nǝgtǝ, Topē vǝ tó tǝ ti,” he tóg, Paulo ti.

⁴² Ag tǝ Paulo vǝ mĕ kǎn kǝ ag tóg ĩn ěn kātá pa mǝ. ĩn kātá pa kǝ ag tóg ti mǝ: “vĕnh kán ke kurā ũ tá ěg mǝ kāmĕn mǎn nǝ,” he mǝ.

⁴³ Kǝ Israel tǝ hĕn ri ke ag tóg Paulo ag nón mǝ mǝ. Fóg ag tóg ag nón mǝ mǝ gé, fóg tǝ Israel jykre han mǝ ag, ũ tǝ Topē kamĕg mǝ ag. Kǝ Paulo ag tóg ag jyvĕn mǝ, ag tǝ Topē to jykren kǝ nǝtǝ jé, ag tǝ ti tǝ ěg jagāgtǎn to jykren kǝ nǝtǝ jé.

⁴⁴ Vĕnhkán ke kurā ũ tá cidade ěn tá ke kar ag vǝ vĕnh mǎn mǝ, Topē vǝ jĕmĕ jé.

⁴⁵ Kǝ Israel ag tóg ũn e ěn vĕg mǝ. Kǝ ag tóg jǝgǝ mǝ, vĕnh kar tǝ Paulo ag to há

nǝtǝn kǝ. Hā kǝ ag tóg Paulo vǝ kafān mǝ sir, ti tǝ ag mǝ Topē vǝ tón kǝ. Ti to ag tóg vǝ vǝ he mǝ gé.

⁴⁶ Hā ra Paulo ag tóg ag kamĕg tǝ nǝ. Ag mǝ ag tóg: “ājag hā mǝ ěg tóg tó vĕn, Topē vǝ ti,” he mǝ, “ti tǝ ěg mǝ: Israel ag mǝ tó vĕn, hen kǝ. Hā ra ājag tóg mĕ jāvānh nǝtǝ,” he ag tóg. “Ēg rǝr krǝg ja tǝ venh ke tǝ ājag nǝ, ājag tǝ mĕ jāvānh nǝtǝn kǝ,” he ag tóg. “Hā kǝ ěg tóg sir fóg ag hā mǝ tónh ke mǝ, Topē vǝ ti,” he ag tóg.

⁴⁷ “Topē vǝ ěg mǝ: “ājag tǝ sóg néj gru ri ke han mǝ,” he mǝ, “fóg kar ag tǝ ājag ki Topē ve jé, kanhgág ag ke gé. Ājag ki ag tóg mĕnh ke mǝ, Jesus tǝ ag krenkren han ke ti, ga fyn ja mǝ hā,” he ja tóg nǝ ěg mǝ, Topē ti,” he ag tóg, Paulo ag.

⁴⁸ Fóg ag tǝ tag mĕ kǝ tóg ag mǝ sér tǝ sir. Kǝ ag tóg Topē vǝ to há nǝtǝ, ti mǝ vǝ há han kǝ. Kǝ ag tóg Jesus ki ge mǝ, Topē tǝ ũn kuprĕg mǝ ag, ag tǝ ěg rǝr krǝg ja tǝ ve jé.

⁴⁹ Kǝ ga ěn tá ke kar ag vǝ Topē vǝ jĕmĕg mǝ.

⁵⁰ Hā ra Israel ag tóg ũn tātá há ũ fag mré vǝ mǝ, fóg tǝ Israel jykre han mǝ fag. Pā'i ag mré ag tóg vǝ mǝ gé. Paulo ag kato ag tóg vǝ mǝ. Kǝ ag tóg ag vóg kónān mǝ. “Ha mǝ jĕg, ěmā ũ ra,” he ag tóg mǝ sir, ag vóg kónān kar kǝ.

⁵¹ Kǝ Paulo ag tóg ājag pĕn kykǝnhkǝnh mǝ, ag mǝ: “Topē tovānh ājag huri,” he jé. Kǝ ag tóg cidade tǝ Icônio ra mǝ mǝ sir.

⁵² Jesus mré mǝ ag mǝ tóg hā ra sér tǝ. Topē kuprĕg vǝ tǝ ag jagrĕ nǝ, kǝ tóg ag mǝ sér tǝ sir.

14

Cidade tǝ Icônio tá Topē vǝ tó

¹ Ag tǝ cidade tǝ Icônio tá junjun kǝ ag tóg sir Israel tǝ vĕnh kanhrān jafā kāra ge mǝ. Kǝ ag tóg ag mǝ Topē vǝ kāmĕn mǝ. Kǝ Israel tǝ hĕn ri ke ag tóg Jesus ki ge mǝ gé, fóg tǝ hĕn ri ke ag ke gé, ũ tǝ Grego vǝ tó mǝ ěn ag.

² Kǝ Israel ag tóg, ũ tǝ Jesus ki ge jāvānh ag tóg fóg ag krǝn kónān mǝ sir, Jesus mré ke ag to.

³ Hā ra Paulo ag tóg tá nǝtǝ mág han mǝ. Kǝ ag tóg Topē vǝ tó mǝ, ag tǝ ag kamĕg tǝ nǝn kǝ, Topē vǝ kri fi kǝ. Kǝ Topē tóg ag mǝ

ã jykre fig mũ, ag tỹ ãg tỹ nén han vãnh hyn han jé. Hã kỹ vãnh kar tóg Topẽ jykre ki kanhró nỹtĩ sir.

⁴ Kỹ vãnh kar tóg vãnh kãpugpónv kỹ nỹtĩ nĩ. Ủ ag tóg Israel ag to há nỹtĩ, jó ù ag tóg Jesus tỹ ùn vin mũ ag tó há nỹtĩ.

⁵ Kỹ Israel ag tóg fóg ag mré jykren mũ, fóg tỹ pã'i ag mré, ag tỹ Paulo ag vóg kónãn jé, ag tỹ pó tỹ ag pin jé.

⁶ Kỹ Paulo ag tóg jẽmẽg mũ, kỹ ag tóg cidade ù ra mũ mũ, cidade tỹ Listra ra, cidade tỹ Derbe ra ke gé. Ga tỹ Licaônia tá ti nỹtĩ, cidade tag ti.

⁷ Cidade ên mũ mũn kỹ ag tóg tá Jesus vĩ há tugtó mũ sir.

Ag tỹ cidade tỹ Listra tá Paulo vóg kónãn

⁸ Cidade tỹ Listra tá ke ù tóg nĩ nĩ, ùn tĩg vãnh. Ti pẽn vỹ grĩ nỹtĩ. Ge pẽ tóg nĩ, ã mur mũn kã. Pẽn krój tóg nĩ.

⁹ Ên tóg sir Paulo vĩ mẽg mũ. Kỹ Paulo tóg ti tugnỹm mũ. Kỹ tóg ti tỹ Jesus vĩ kri fig mũ vэг mũ, Jesus tỹ ti tỹ há' he jé.

¹⁰ Kỹ tóg jamã hár(a) ti mỹ ke mũ, kỹ tóg: “jẽg nẽ ra,” he mũ. “Vẽnhrã hã jẽg,” he tóg ti mỹ, Paulo ti. Kỹ tóg vãnh hũm he mũ. Kỹ tóg mũ tĩ mũ.

¹¹ Kỹ tóg vãnh kar ên mỹ e tĩ, ag tỹ Paulo tỹ nén han mũ ven kỹ. Kỹ ag tóg ãjag vĩ ki jagnẽ mỹ ke mũ, vĩ tỹ Licaônica he mũn ki. Jamã hár(a) ag tóg: “topẽ ag vỹ ãg tá junjun,” he mũ. “Ëg ri ke ag nỹtĩ, topẽ ag, kỹ ag tóg ãg tá re mũ,” he ag tóg, Paulo ag to.

¹² Kỹ ag tóg Barnabé to: Júpiter, he mũ. Paulo to ag tóg: Mercúrio, he mũ sir, ti vĩ mág to. Ón kỹ ag topẽ jygi vỹ, hã vỹ: Júpiter, Mercúrio, he mũ.

Hã ra Paulo ag tóg ag vĩ ki kagtĩg nỹtĩ.

¹³ Júpiter jo ãn vỹ cidade fyr tá jẽ nĩ, kỹ ti tũ ki rĩr tĩ tóg tá nĩ gé. Kỹ tóg monh gé(g) tĩ mũ, ka fej tỹ coroa ke gé, Júpiter tũ ki rĩr tĩ ên ti. Cidade to ró jãnkã mãra tóg gé(g) tĩ mũ. Tá tóg monh kugprũn sór mũ, Barnabé mỹ, Paulo mỹ ke gé. Ón kỹ ag tóg Paulo ag to: “topẽ ag vỹ,” he mũ, hã kỹ ag tóg ag mỹ monh kuprũn sór mũ, tá ke kar ên ag.

¹⁴ Hã ra Paulo ag tóg mẽg mũ, kỹ ag tóg ãjag kur janjãn mũ, jũgũ kỹ. Ủ tỹ vãnh mãn kỹ nỹtĩ ag to ag tóg pêtẽ mũ. Prẽr kỹ ag tóg ag mỹ:

¹⁵ “ne nẽ?” he mũ. “Tỹ ãg ãprã ke nỹtĩ, ãjag ri ke,” he ag tóg. “Hã ra ãg tóg ãjag mỹ kãmén sór mũ, ãjag tỹ ón kỹ topẽ tag ag tovãnh jé. Topẽ pẽ ki gemnĩ, ùn rĩr mũn ki. Kanhkã han tóg, ga ke gé, goj ke gé, mũ mũ kar ên ke gé, Topẽ ti,” he ag tóg.

¹⁶ “Vãsv Topẽ tóg nação ag mỹ nén ù tó ja tũ nĩgtĩ, kỹ ag tóg ãjag jykre mũ mũgtĩ.

¹⁷ Ge ra tóg ag ki rĩr há han mũ, Topẽ ti, ag tỹ tag to vãnh ti ki kanhrãn jé. Hã jé tóg ta jẽnẽ, kỹ ãjag jakré tóg mogmog mũ. Kỹ ãjag tóg konh ke mũ. Kỹ ãjag fe tóg há' he mũ sir. ãjag mỹ tóg sér tĩ sir, ti tỹ ãjag mỹ vỹjẽn han kỹ, Topẽ ti,” he ag tóg, Paulo ag.

¹⁸ Ag vĩ ki ag tóg ag mỹ nén ù kugprũn tovãnh mũ, Paulo ag mỹ, vãnh kar ên ag. Hã ra ag tóg ag mỹ nén ù kugprũn kren ja nĩgtĩ, tá.

¹⁹ Kar kỹ cidade tỹ Antioquia tá ke ag tóg tá junjun mũ, cidade tỹ Icônio tá ke ag ke gé. Israel ag vỹ, tá junjun mũ ag. Ên ag vãnh kar krĩn kónãn mũ, kỹ ag tóg Paulo pin mũ, pó tỹ. “Ter ti huri,” he ag tóg mũ sir, ti pin kar kỹ. Kỹ ag tóg ti raran mũ sir. Cidade fyr tá ag tóg ti raran kỹ ti fón mũ sir.

²⁰ Kỹ Jesus mré mũ ag tóg ti venh kãmũ mũ, hã ra tóg jẽg nẽ mũ, Paulo ti. Cidade kãra tóg rã mũ.

Tỹ vaj kỹ tóg hã ra cidade tỹ Derbe ra tĩ mũ, Barnabé mré.

²¹ Tá ag tóg Jesus kãme há tó mũ gé, Derbe tá. Kỹ ù tỹ hẽn ri ke ag tóg Jesus ki ge mũ sir.

Paulo ag tỹ cidade tỹ Antioquia ra vỹnvỹn ke

Kar kỹ ag tóg cidade tỹ Listra ra vỹnvỹn ke mũ, cidade tỹ Icônio ra ke gé, cidade tỹ Antioquia ra ke gé, Paulo ag.

²² Vỹnvỹn ke ki ag tóg Jesus mré mũ ag jyvẽn mũ sir, ag tỹ Jesus vĩ kri fi to krónh ke tũ nĩn jé, ag tỹ to fe tar nĩn jé ke gé. “Ëg tỹ Topẽ tỹ tỹ ãg pã'i nĩ ve sór nỹtĩn kỹ ãg tóg ti venh ke jo vãnh jagãgtar jagy venh ke mũ,” he ag tóg, Jesus ki ge kỹ nỹtĩ ag mỹ, Paulo ag.

²³ Kỹ ag tóg ag mỹ kófa ag kuprẽg mũ, ag tỹ Jesus ki ge kỹ nỹtĩ ag ki rĩr jé, ù tỹ Topẽ vĩ mẽ jé vãnh mãn tĩ ag ki. Ag to ag tóg Topẽ mré vĩ mũ gé, nén ù ko tũ nĩn kỹ. Kỹ ag tóg: “Topẽ vỹ ãjag ki rĩr há han mũ,” he mũ. Kỹ ag tóg mũ mũ sir.

²⁴ Kǵ ag tóg ga tǵ Pisidia fīn pa mǵ. Ga tǵ Panfília tá ag tóg junjun mǵ.

²⁵ Cidade tǵ Perge tá ag tóg Topē vī tó mǵ gé sir. Kar kǵ ag tóg cidade tǵ Atália ra mǵ mǵ.

²⁶ Tá junjun kǵ ag tóg cidade tǵ Antioquia ra mǵ mǵ gé, canoa mág kāmī. Antioquia ěn tá ag tóg pa ja nī (mǵr). Tá ke ag tóg ag to Topē mré vī ja nīgtī, ti tǵ ag jy nīgān jé, ag tǵ ti rānhrāj han kǵ. Vēnh rānhrāj ěn han kān ag tóg mǵ (mǵr) sir, kǵ ag tóg Antioquia ra vǵnvǵn ke mǵ.

²⁷ Tá junjun kǵ ag tóg Jesus ki ge mǵ kar jé prēr mǵ, ag tǵ vēnh mǵn jé. Kǵ ag tóg ag mǵ Topē tǵ nén han mǵ kar kāmén mǵ. “Fóg ag ne tóg Jesus ki ge mǵ gé, Topē tǵ ag krīn kǵ,” he ag tóg mǵ ag mǵ.

²⁸ Kǵ ag tóg tá nǵtī, kysā tǵ hēn ri ke ki. Jesus mré mǵ ag mré ag tóg nǵtīgtī.

15

Ag tǵ Topē jykre to jykren

¹ Kejēn Judéia tá ke ũ ag tóg tá junjun mǵ, Antioquia tá. Tá junjun kǵ ag tóg Jesus mré ke ag mǵ kāmén mǵ, kǵ ag tóg: “ājag gré junun fār kym nī,” he mǵ. “Moisés tǵ ěg mǵ nén tó mǵ ěn han nī. Ke tǵ nī mǵ ra ājag tóg krenkren ke tǵ nī,” he ag tóg.

² Hā ra Paulo ag tóg: “ke tǵ vē,” he mǵ. Kǵ ag tóg jagnē vī kafān mǵ sir. Kǵ Jesus mré ke kar ag tóg Paulo ag mǵ ke mǵ, ag tǵ Jerusalém ra mǵ jé. “Tag ag mré mǵmnī, Jerusalém ra,” he ag tóg. “Tá Jesus tǵ ũn vin mǵ ag mré vīmnī, kófa ag mré. Ag mǵ: ěg hǵn hē ri kenh mǵ, vēnh gré junun fār kym ke to? hemnī,” he ag tóg.

³ Kǵ Paulo ag tóg: “ěg mǵnh ke nē ha,” he mǵ. Jesus ki ge kǵ nǵtī ag tóg ag mré mǵ sī han, kǵ ag tóg mǵ mǵ. Kǵ ag tóg ga tǵ Fenícia fīn pa mǵ sir, ga tǵ Samaria fīn ke gé. Ag mǵn kǵ ag tóg Jesus mré ke kar ag mǵ fóg ag kāmén mǵ, fóg ag tǵ Jesus ki ge mǵ ag. Kǵ tóg vēnh kar mǵ sér tí sir.

⁴ Hā kǵ ag tóg Jerusalém tá junjun mǵ. Kǵ tá Jesus ki ge kǵ nǵtī ag tóg vēnh mǵn mǵ, Jesus tǵ ũn vin mǵ ag mré hā, kófa ag mré hā. Kǵ ag tóg ag mǵ Topē tǵ nén han mǵ kar tugtó mǵ.

⁵ Hā ra Fariseu ũ ag tóg tá nǵtī gé, ũ tǵ Jesus ki ge mǵ ag. ěn ag tóg ag mǵ ke mǵ.

“Ěg mǵ tóg há tī, ag tǵ ājag gré junun fār kym kym ken kǵ,” he ag tóg mǵ, fóg ag to. “Ag tǵ Moisés tǵ ěg mǵ vēnh jykre nīm ja ki kanhrān kǵ tóg ěg mǵ há tī,” he ag tóg mǵ sir, Fariseu ag, fóg ag to, ũ tǵ Israel jykre han tǵ ag to.

⁶ Kǵ vāhā Jesus tǵ ũn vin mǵ ag vǵ kófa ag mré vēnh mǵn mǵ, vyr mǵ, to vēmén jé.

⁷ Kǵ ag tóg to vēmén mág han mǵ sir. Kǵ kejēn Pedro tóg jěg nē kǵ ag mǵ: “inh kanhkā’,” he mǵ. “Vāsǵ Topē tóg inh kuprěg ja nī, isǵ fóg ag mǵ Jesus vī há tó jé, ag tǵ jěmě kǵ krenkren jé,” he tóg. “Tag ki kanhró ājag tóg nǵtī,” he tóg.

⁸ “Kǵ Topē tóg ag mǵ ā kuprīg jěněg mǵ. Ag fe ki kanhró tóg nī, Topē ti, kǵ tóg ag mǵ ti jěněg mǵ. Hā ki tóg ěg mǵ ven mǵ, ag tǵ Jesus ki ge kǵ nǵtī ti, ěg ri kén,” he tóg.

⁹ “Hā kǵ Topē tóg ag to: vyr mǵ ke ag vē, he tǵ nīgtī. Ag tǵ ti ki ge kǵ nǵtīn kǵ tóg ag fe tǵ jānhkri’ he mǵ, fóg ag fe tǵ,” he tóg.

¹⁰ “Topē tǵ há vē (mǵr). To: vēnhmǵ ti nī, he tǵg nī,” he tóg. “Ag mǵ ājag tóg vēnh jykre jagy ěn fi sór mǵ, ti tǵ ěg mǵ han jagy ja ra. Ěg jóg’jóg ag mǵ tóg han jagy ja nī, kǵ tóg ag mǵ ag tǵ ki króm tǵ nīnh ha mē tóg tī, ěg mǵ ke gé. Hā ra ājag tóg ag mǵ fi sór mǵ,” he tóg.

¹¹ “Ke tǵg nī. Jesus tǵ ěg jagāgtān kǵ tóg ěg kren han mǵ, ěg tǵ ti vī kri fi kǵ. Kǵ ěg tóg ag ri ke tāvī nǵtī,” he tóg, Pedro ti.

¹² Kǵ vēnh kar ag tóg ěmě kǵ nǵtī nī. Kǵ ag tóg Barnabé tǵ ag mǵ nén tó mǵ měg mǵ, Paulo tǵ ag mǵ nén kāmén ti ke gé. Ag tǵ ěg tǵ nén han vānh hyn han mǵ tó ag tóg mǵ gé. Ag tǵ Topē jykre ki fóg ag mǵ nén hyn han mǵ tó ag tóg mǵ gé sir.

¹³ Ag tǵ tó kǵn kǵ Tiago tóg sir ag mǵ: “ha mē, inh kanhkā’,” he mǵ.

¹⁴ “Simāo vǵ ěg mǵ tó ja nī, Topē tǵ nén han ve ti, Simāo tǵ fóg ag mǵ Topē vī tó ve ti. Kǵ ag tóg tǵ Topē tǵ nǵtī sir, fóg tǵ ti vī měg mǵ ag. Jesus mré ke vǵ tǵ ag nǵtī, ag tǵ ti ki ge kǵ nǵtīn kǵ.

¹⁵ Hā ra tóg vāsǵ rán kǵ nī. Topē vī tó tī tóg tag rán ja nīgtī, ha mē:

¹⁶ “kātīg jé sóg ke mǵ, he tóg, Topē ti. Davi krěm Israel ag tóg e pě ja nǵtī ja nīgtī. Hā ra Davi jykre tóg tǵ’ he mǵ. Kǵ tóg ĩn vag ri ke nī sir. ĩn tǵg han jé sóg ke mǵ, hā vǵ: Davi

krē'krē ũ vỹ tỹ pã'i nĩnh mǎn mũ, he mũ. Isỹ han ken hã vễ.

¹⁷ Ti tỹ sóg ũn mágpễ han ke mũ, povo kar kãmĩ ke ag tỹ inh ki ge sór jé, fóg kar kãmĩ ke ag tỹ isũ nỹtĩ jé, kanhgág kar kãmĩ ke ag ke gé, isỹ ũn kuprêg mũ ag, he tóg.

¹⁸ Topễ tỹ tón hã vễ. ũ tỹ vãsỹ tag kãmén mũ tỹ tón hã vễ," he tóg, Topễ vĩ tó tĩ ti. Hã kỹ êg tóg tag ki kanhró tãvĩ nỹtĩ," he tóg, Tiago ti.

¹⁹ "Isỹ nén to jykrén hã vễ, êg tỹ ag mỹ êg jykre jagy ên tó tũ nĩn jé, ũ tỹ fóg kar kãmĩ Topễ jykre han sór mũ ag mỹ, kanhgág ag mỹ ke gé," he tóg.

²⁰ "Êg tỹ ag mỹ tónh ke, ha mẽ: vễnh kãggrá to festa ko tũg nĩ, ã prũ tũ fi mré nỹ tũg nĩ, nén ũ tỹ vêsóki ter mũ ko tũg nĩ, nén ũ kyvénh ko tũg nĩ gé," he tóg, Tiago ti.

²¹ "Moisés jykre tugtó ag tóg tĩ, êg mré Israel ag, cidade kar ki. Vễnh kán ke kurã ki ag tóg ti tỹ rán mũ to ke tĩ. Vãsỹ ag tóg ke ja nỹtĩ, kỹ ag tóg ũri ke tãvĩ tĩ gé," he tóg. "Hã kỹ ũ tỹ han sór mũ tóg han tĩ, Moisés jykre ti," he tóg, Tiago ti.

Apóstolo ag tỹ carta rán mũ

²² Kỹ Jesus tỹ ũn vin mũ ag tóg to jykrén mũ, kófa ag ke gé, Jesus ki ge mũ ag kar ke gé, ũ tỹ Topễ vĩ mẽ jé vễnh mǎn tĩ ag. Kỹ ag tóg ũ ag kuprêg mũ, ag tỹ Antioquia ra mũ jé, Paulo mré, Barnabé mré. Ag tỹ ũn kuprêg mũ ag hã vễ, hã vỹ: Judas, he mũ, ti jiji ũ hã vỹ: Barsabás, he mũ. Silas kuprêg ag tóg mũ gé. Ên ag tóg tỹ Jesus mré ke ag pã'i nỹtĩ.

²³ Ag mỹ ag tóg vễnh rán nĩm mũ gé. Ag tỹ rán hã vễ, ha mẽ:

"Jesus tỹ ũn vin mũ ag tỹ rán hã vễ, kófa ag tỹ rán ke gé, Jesus mré ke ag. Êg tỹ cidade tỹ Antioquia tá ke ag mỹ rán hã vễ, fóg tỹ Jesus mré ke ag mỹ, ga tỹ Síria tá ke ag mỹ, ga tỹ Cilícia tá ke ag mỹ ke gé. Ājag mỹ há?

²⁴ Êg kã ũ ag tỹ ājag tá junjun mẽ êg tóg. Ājag krĩn ũ han ag tóg mũ, kỹ ājag krĩ tóg kufy' he mũ. Hã ra êg tóg ag mỹ: ha vễnh jykre tag tó, he ja tũ nĩgtĩ.

²⁵ Kỹ êg tóg vễnh mǎn, êg tỹ to jykrén jé. Kỹ êg kar tóg to jykrén kỹ tag ag kuprêg, êg tỹ ājag to ag jěgně jé, ag tỹ Barnabé mré mũ

jé, Paulo mré. Ag to êg há tãvĩ nỹtĩ, Barnabé to, Paulo to ke gé.

²⁶ Ag hã ne tóg fe tũmẽ nỹtĩgtĩ', fe tar kamẽ ag nỹtĩgtĩ'. Kỹ ag tóg êg Senhor tỹ Jesus Cristo vĩ tó mũgtĩ, ũ tỹ hěn ri ke tỹ ag tén sór mũ hã ra.

²⁷ Êg tỹ ag to há nỹtĩn kỹ êg tóg Judas jěněg mũ, Silas ke gé, ag tỹ ājag mỹ êg tỹ rán mũ tag ti kãmén jé.

²⁸ Topễ kuprĩg vỹ êg mỹ tó, kỹ tóg êg mỹ há tĩ gé, êg tỹ ājag mỹ vễnh jykre jagy ên fig tũ nĩn jé. Tag hã han jé ājag tóg ke mũ, ha mẽ:

²⁹ vễnh kãggrá to festa ko tũg nĩ, nén ũ kyvénh ko tũg nĩ gé. Nén ũ tỹ vêsóg ki ter mũ ên ko tũg nĩ gé. Ājag prũ tũ fag mré nỹ tũg nĩ gé. Ājag tỹ tag ki króm kỹ tóg há tĩ. Jatun mỹ nỹtĩmĩnĩ." Vễnh rán hã vễ.

³⁰ Kỹ ag tóg ag mỹ: "ha mũ jěg ge," he mũ. Kỹ ag tóg mũ kỹ Antioquia tá junjun mũ. Tá ag tóg vễnh kar jé prěr mũ. Jesus ki ge mũ kar jé ag tóg prěr mũ sir, ag tỹ to vễnh mǎn jé. Kỹ ag tóg ag mỹ vễnh rán ên nĩm mũ.

³¹ Kỹ ag tóg to ke mũ, vễnh rán to. Kỹ tóg ag mỹ há tĩ, ag tỹ vễnh jyvěn rá ên ven kỹ. Kỹ ag krĩ tóg kãnhvy' he mũ sir.

³² Kỹ Judas vỹ Silas mré vễnh kar jyvěn mũ gé. Topễ vĩ tó tĩ ag vễ. Hã kỹ ag tóg ag jyvěn tỹ hěn ri ke han mũ. Ag fe tỹ ag tóg tar' he mũ.

³³ Tá ag tóg semana tỹ hěn ri ke han mũ. Kỹ Jesus mré ke ag tóg ag mỹ: "ha jatun mỹ mũ jěg," he mũ, ag tỹ Jerusalém ra vỹnvỹn ke jé, ũ tỹ ājag jěgněg mũ ên to.

³⁴ Hã ra tóg Silas mỹ há nĩ, kỹ tóg tá nĩ nĩ sir, tĩ tũ tóg nĩ sir.

³⁵ Kỹ Paulo tóg Barnabé mré Antioquia tá nĩ nĩ. Topễ vĩ tỹ ag tóg ag kanhrãn mũ, kãmén kỹ. Hã ra ũ tỹ hěn ri ke ag tóg ag ri kén Topễ vĩ tó mũ gé.

Paulo tỹ ã pir mỹ tĩg, Barnabé tỹ ã pir mỹ tĩg

³⁶ Si há tũ ra Paulo tóg Barnabé mỹ: "mũ nỹ, êg tỹ êmã ên kar mĩ mũ mǎn jé, êg tỹ Jesus vĩ tó ja tá," he mũ. "Isỹ Jesus mré ke ag venh há tóg tĩ. Ag mỹ hěn ri ke mũn mũ há han mũ vỹ? he sóg tĩ," he tóg, Paulo ti, Barnabé mỹ.

³⁷ Kỹ Barnabé tóg João Marcos pére tĩg sór mũ.

³⁸ Hã ra Paulo mÿ tóg kórég nĩ, Marcos tÿ ag ré kÿ tÿg ja nĩn kÿ, ga tÿ Panfília tá. “Û tÿ ãg mré Topê rãhrãj han ja tũ ãn pére sóg tÿg mãn ke tũ nĩ ha,” he tóg, Paulo ti.

³⁹ Hã to ag tóg jagnê to jũgũ mũ. Kÿ ag tóg vãnh kãpugpóv kÿ mũ mũ. Kÿ Barnabé tóg Marcos mré goj vãso tÿ Chipre ra tĩ mũ, canoa mág kãmĩ.

⁴⁰ Jó Paulo tóg Silas kuprêg mũ, ti tÿ ti mré tÿg jé. Kÿ tóg tĩ mũ sir. Jesus mré ke ag tóg Paulo to Topê mré vĩ mũ, ti tÿ ti jÿ nĩgãn jé.

⁴¹ Kÿ ag tóg ga tÿ Sírĩa mĩ pa mũ, ga tÿ Cilícia mĩ ke gé. Jesus ki ge mũ kar jyvẽn tóg mũ, ã tÿg kÿ, Paulo ti.

16

Timóteo tÿ Paulo mré tÿg

¹ Kÿ Paulo ag tóg cidade tÿ Derbe tá junjun mũ, cidade tÿ Listra tá ke gé. Kÿ tá ù tóg nĩ nĩ, Jesus mré tĩ ù, ti jÿjÿ hã vÿ: Timóteo, he mũ. Ti mÿnh fi ne tóg tÿ Israel nĩ', hã ra fi tóg Jesus ki rã ja nĩgtĩ. Ti panh tóg tÿ fóg tÿ Grego nĩ, Timóteo panh ti.

² Ti to ag tóg vĩ há han mũ, Jesus mré ka ag, Listra tá ke ag, Icônio tá ke ag ke gé, Timóteo to.

³ Kÿ Paulo tóg ti pére tÿg sór mũ, kÿ tóg ti gré junun fár kÿm mũ, Israel ag tugrĩn. Vãnh kar tóg ti panh tÿ tÿ fóg tÿ Grego nĩ ki kanhró nÿtĩ, hã kÿ tóg ti fár kÿm ja tũ nĩ. Hã ra ag tÿ ra mũnh ke tá ag tóg e nÿtĩ, Israel ag, hã kÿ Paulo tóg ti fár kÿm mũ sir.

⁴ Kÿ ag tóg cidade ãn mũ mũ mũ. Kÿ ag tóg ag mÿ Jesus tÿ ùn vin mũ ag tÿ rá kãmén mũ sir, kófa ag tÿ Jerusalém tá nén rán ja ti, Jesus mré ke ag mÿ. Ag tÿ nén ki króm ke hã tÿ ag tóg ag mÿ kãmén mũ.

⁵ Hã kÿ Jesus ki ge mũ ag tóg tar nÿtĩ sir, Jesus jÿkren ki. Vãnh mãn ag tóg tĩ, ag tÿ Topê vĩ mẽ jé. E ag tóg nĩgtĩ sir, komêr hã.

Paulo tÿ nén nẽ vég mũ

⁶ Kÿ Paulo ag tóg ga tÿ Frígia mĩ pa mũ, ga tÿ Galácia mĩ ke gé. Kÿ ag tóg ga tÿ Ásia tá Topê vĩ tóg sór mũ, hã ra Topê kuprĩg tóg ag mÿn nenh mũ.

⁷ Kÿ ag tóg ga tÿ Mísia tá junjun mũ. Kÿ ag tóg ga tÿ Bitínia ra mũ sór mũ, hã ra Topê kuprĩg tóg ag mÿn nenh mũ gé.

⁸ Kÿ ag tóg Mísia jÿ mũ kÿ cidade tÿ Trôade tá junjun mũ.

⁹ Kÿ kutÿg kÿ Paulo tóg nén nẽ vég mũ. Ga tÿ Macedônia tá ke vég tóg mũ, ti vãnhpéti ki. Kÿ tóg ti jo jẽ nĩ. Kÿ tóg ti mÿ: “Macedônia to kãtĩg, ãg kanhrãn jé,” he mũ ti mÿ, ga tÿ Macedônia tá ke ãn ti. Kÿ Paulo tóg rĩr mũ sir.

¹⁰ Paulo tÿ nén nẽ ãn ve kar kÿ ãg tóg vêsÿmér Macedônia ra mũ sór mũ sir. “Jesus hÿn ãg mÿ: ha mũ jãg, hé,” he ãg tóg. “Ag mÿ inh vãn tóg, he ti hÿn, Jesus ti,” he ãg tóg, Paulo tÿ nén nẽ ãn ve kÿ.

¹¹ Kÿ ãg tóg cidade tÿ Trôade ki pa mũ. Vêsÿmér ãg tóg goj vãso tÿ Samotrácia ra mũ mũ. Tÿ vaj kÿ ãg tóg cidade tÿ Neápolis ra mũ mũ.

¹² Tá pa kÿ ãg tóg cidade tÿ Filipos ra mũ mũ. Ga tÿ Macedônia ki cidade ve vẽ. ãg tÿ tá junjun vén jan hã vẽ. Fóg tÿ Romano ag jamã ù vẽ. Tá ãg tóg kurã e sĩ ki nÿtĩ nĩ.

Lídia fi tÿ Jesus ki rã

¹³ Vãnh kãn ke kurã ki ãg tóg cidade to ró mãra mũ mũ, goj ra. “Tãn hÿn Topê mré vĩ jafã nĩ,” he ãg tóg. Tá ãg tóg nĩgnĩ mũ sir. Ûn tãtã fag tóg tá nÿtĩ nĩ, kÿ ãg tóg fag mré vĩ mũ.

¹⁴ Tá ù fi tóg nĩ nĩ, fi jÿjÿ hã vÿ: Lídia, he mũ. Negociar he fi nĩ. Kur kósóg tÿ fi tóg negociar he nĩ. Tÿ fi cidade tÿ Tiatira tá ke nĩ. Topê kamêg fi tóg tĩ. ãn fi vÿ Paulo vĩ mẽg mũ sir. Kÿ Topê tóg fi mÿ krĩ há nĩm mũ, kÿ fi tóg Paulo vĩ jẽmẽ há han mũ.

¹⁵ Kÿ ãg tóg fi kÿpég mũ, fi mré ke kar mré hã. Kÿ fi tóg ãg mÿ: “isÿ Jesus ki rã kÿ jẽ ve ãjag (mÿr),” he mũ. “Ti tÿ ãjag mÿ gen kÿ inh ãn ki gemnĩ,” he fi tóg. “Tã inh mré nÿtĩmnĩ,” he fi tóg. Vĩ ki fi tóg ãg kutãn mũ. Kÿ ãg tóg ke mũ.

Paulo ag tÿ Filipos tá se kÿ nÿtĩ

¹⁶ ãg tÿ kejẽn Topê mré vĩ jafã ra mũ mãn kÿ ù fi tóg ãg kato tẽ mũ. Û camarada fi vẽ. Hã ra fi tóg jagrê kórég nĩ, kÿ fi jagrê tóg vãnh kar mÿ ag tÿ nén venh ke tóg tĩ. Fi patrão ag tóg fi tugnĩn jãnkamy mág vég tĩ, fi tÿ jãnkamy to vãnh kar mÿ ag tÿ nén venh ke tóg kÿ.

¹⁷ ãn fi vÿ Paulo nón tĩ mũ, ãg nón, kÿ fi tóg jamã hár(a) prêr mũ, kÿ fi tóg: “Topê pẽ

camarada ag vĕ (mÿr),” he mŭ. “Vĕnh kar kăfór camarada ag vĕ mÿr. Ag hă ne tóg ajag mÿ vĕnh vĭ tó tĭ', ajag tÿ to krenkren jé',” he fi tóg ěg to.

18 Kură tÿ hĕn ri ke han fi tóg, vĭ tÿ ge han kÿ. Kÿ tóg Paulo mÿ tÿ ũ nÿ, kÿ tóg kyră kÿ fi jagrĕ mÿ: “Jesus Cristo jykre tÿ sóg ã mÿ tó mŭ, ã tÿ fi tovănh jé,” he mŭ. Kÿ tóg vĕsÿmĕr fi tovănh mŭ sir, fi jagrĕ kórég ěn ti.

19 Hă ra fi patrăo ag mÿ tóg tÿ ũ nÿ, ag tÿ fi tugrĭn ganho ve măn tŭ nĭn kÿ. Kÿ ag tóg Paulo ség mŭ, Silas ke gé. Pă'i ag mÿ ag tóg ag ven mŭ, cidade kuju ki.

20 Pă'i ag mÿ ag ven kÿ ag tóg: “Israel tag ag ve ra ha,” he mŭ. “Vĕnh kar jŭgjŭ han ag tóg mŭ nĭ (mÿr), ěg jamă tag mĭ,” he ag tóg.

21 “Vĕnh jykre vĕnhmÿ tó ag tóg mŭ (mÿr), ěg tÿ nĕn han ke tŭ tó ag tóg mŭ (mÿr). Tÿ ěg tóg Romano nÿtĭ, kÿ ag jykre tóg ěg mÿ tÿ ũ nÿ,” he ag tóg.

22 Povo ěn kar tóg ag to kórég nÿtĭ, kÿ ag tóg ag kato vĭ mŭ.

Kÿ pă'i ag tóg polícia ag mÿ: “ag kur nŭ ra,” he mŭ. “Ag mrănmrăn ra,” he ag tóg mŭ gé.

23 Ag mrănmrăn tÿ hĕn ri ke han ag tóg mŭ, ka téj tÿ. Kar ag tóg vĕse ja kăki ag văm mŭ. Vĕse ja ki rĭr tĭ mÿ ag tóg: “ag nĭgfĕnh há han nĭ, ag tÿ kăpa tŭ nĭ jé,” he mŭ.

24 Ag tÿ ti mÿ tag tó to tóg vĕse ja kuju tá ag văm mŭ, vĕse ja mág ěn kuju tá. Ka tÿ tóg ag sigség mŭ sir.

25 Meia noite ki Paulo tóg Silas mré Topĕ mré vĭ mŭ. Ti mÿ ag tóg jănjăn mŭ, Topĕ mÿ. Kÿ vĕse ag kar vÿ jĕmĕg mŭ sir.

26 Kÿ văhă ga tóg jŭrŭn ke mŭ. Vĕse ja krĕm tóg jŭrŭn ke mŭ. Kÿ vĕsÿmĕr jănkă kar vÿ nognor kăn tĭ mŭ, rómrom kăn tóg mŭ. Kÿ vĕse ag kar ěn ferro tóg kygvar kăn mŭ, ag se ja ti.

27 Kÿ tóg vĕse ja ki rĭr tĭ nŭnmăn mŭ gé. hă ra vĕse ja jănkă kar tóg nognor kÿ nÿtĭ nĭ, rómrom kÿ tóg nÿtĭ nĭ. Kÿ ũ tÿ ag ki rĭr tĭ ěn tóg ã kyfé téj, ã rógro ěn kunŭnh kÿ tóg vĕnh kusón sór mŭ. “Vĕse kar ag hÿn vĕnh pigju kăn,” he tóg. Hă kÿ tóg vĕnh kusón sór mŭ.

28 Hă ra Paulo tóg jamă hăr(a): “ker vĕnh vóg kónăn hĕ,” he mŭ. “Ěg kar vÿ ki nÿtĭ,” he tóg.

29 Kÿ tóg néj gru to vĭ mŭ, ũ tÿ ag ki rĭr tĭ ěn ti. Kÿ tóg Paulo ag se ja kăra vĕnhvăg ră mŭ, jŭrŭn ke kÿ. Paulo jo tóg mŭg ke mŭ, Silas jo ke gé, ag tÿ ti mÿ ti kăfór nÿtĭn kÿ.

30 Ag gé(g) tóg tĭ mŭ, vĕse ja kătă kăkutĕ kÿ, kÿ tóg ag mÿ: “inh hÿn hĕ ri kenh mŭ vÿ?” he mŭ. “Topĕ vĭ mranh sóg, hă ra tóg ti tÿ inh kren han há tĭ,” he tóg, ũ tÿ vĕse ja ki rĭr tĭ ěn ti.

31 Kÿ ag tóg ti mÿ: “Jesus Cristo ki ră ge,” he mŭ. “Kÿ ã tóg kren mŭ, ã mré ke kar ag mré hă,” he ag tóg ti mÿ, Paulo ag.

32 Kÿ ag tóg ti mÿ Jesus vĭ kămĕn mŭ, ti mré nÿtĭ ag mÿ ke gé.

33 Kÿ tóg ag ki rĭr mŭ vĕsÿmĕr, kuty ke nÿ ra. Ag tÿ ag mrănmrăn ja ěn kupég tóg mŭ ag mÿ. Kÿ ag tóg vĕnh kaja jé ti kypég mŭ gé, ti mré nÿtĭ ag mré, ag tÿ Jesus ki ge kÿ.

34 Kÿ tóg ã ĩn ra ag tatĭn tĭ mŭ. Ag jĕn tóg mŭ. Ti fe tóg mrin ke mŭ sir, ti tÿ Jesus ki ră kÿ. Ti mré nÿtĭ ag kar mÿ tóg sér tĭ gé sir, ũ tÿ vĕse ja ki rĭr tĭ ěn mré ke fag mÿ.

35 Tÿ vaj kÿ pă'i ag tóg polícia ag jĕgnĕg mŭ, ũ tÿ vĕse ja ki rĭr tĭ ěn mÿ. “Ěn ag mÿ: ha mŭ jĕg, hemnĭ,” he ag tóg ti mÿ.

36 Kÿ ũ tÿ vĕse ja ki rĭr tĭ ěn tóg Paulo mÿ ke mŭ. “Pă'i ag vÿ inh mÿ vĕnh vĭ jĕnĕ, isÿ ajag mÿ: ha mŭ jĕg, he jé. Hă kÿ jatun mÿ mŭ jĕg,” he tóg, Paulo ag mÿ.

37 Kÿ Paulo tóg ti mÿ: “hă ra ag tóg vĕnh ó to ěg mrănmrăn ja nĭ,” he mŭ. “Vĕnh kar vÿ ag tÿ ěg mrănmrăn ve kăn. Hă ra ag tóg ěg ki jĕmĕ ja tŭ nĭ, ěg jyvĕn ja tŭ ag nĭ gé. Tÿ ěg Romano nÿtĭ, hă ra ag tóg vĕse ja kăki ěg văm. Jó ag tóg vĕnh kar vatănh tá ěg mÿ: ha mŭ jĕg, he sór mŭ. Mŭnh ke tŭ ěg nĭ. Ag hă tóg kămŭnh mŭ, pă'i ag. Ěg tatĭ ag tóg mŭnh mŭ. Kÿ ěg mŭnh mŭ ha,” he tóg, Paulo ti.

38 Kÿ polícia ag tóg pă'i ag mÿ tag tó mŭ sir, kÿ tóg ag mÿ e tĭ. Ag tÿ Romano ũ vóg kónăn ke tŭ vĕ vĕ, hă kÿ ag fe tóg jŭrŭn ke mŭ, pă'i ag.

39 “Ěg mÿ vĕnh păte fón nĭ, ěg tÿ ajag se ja ti,” he ag tóg mŭ. Kÿ ag tóg ag tatĭ mŭ mŭ. “Ajag tÿ ěg jamă ki pa kÿ tóg há tĭ,” he ag tóg mŭ sir ag mÿ.

40 Ag tÿ vĕse ja ki pa kÿ ag tóg Lídia fi ĩn ra mŭ mŭ sir. Jesus mré ke ag vĕg ag tóg mŭ. Kÿ ag tóg ag jyvĕn mŭ. Kÿ ag tóg cidade ěn ki pa mŭ sir.

17

Cidade tỹ Tessalônica tá

¹ Kĩ ag tóg cidade tỹ Anfípólís mĩ pa mũ, cidade tỹ Apolônica mĩ ke gé. Kĩ ag tóg cidade tỹ Tessalônica tá junjun mũ. Tá Israel tỹ vėnh kanhrān jafā tóg nĩ.

² Kĩ Paulo tóg ā tỹ nén han tĩ ěn han mũ sir. Israel tỹ vėnh kanhrān jafā kāra tóg rā mũ. Ag mré tóg vĩ mũ, vėnh kán ke kurā tǎgtũ ki. Topě vĩ tó tóg mũ sir ag mỹ, Paulo ti, vāsỹ rán kỹ nĩ ěn ti.

³ Ag mỹ tóg Cristo kāmén mũ, ti jagtar ti, ti ter kar rĩr mǎn ja ěn ti. “Jesus hā vē, hā vỹ: Cristo, he mũ,” he tóg. “Cristo tóg vāsỹ rán kỹ nĩ, ti jagtar ke ti, ti rĩr mǎn ke ti ke gé, hā vỹ: Jesus, he mũ,” he tóg, Paulo ti.

⁴ Kĩ tóg ũ ag mỹ ge nĩ, Israel kāmĩ ũ ag mỹ. Kĩ ag tóg Paulo mré mũgtĩ, Silas mré ke gé. Kĩ fóg tỹ Grego he mũ tỹ hėn ri ke ag tóg to há nỹtĩ gé sir, ũ tỹ Topě kamėg mũ ag, ũn tǎtá há fag ke gé.

⁵ Hā ra Israel ũ ag mỹ tóg tỹ ũ nỹ. Hā kỹ ag tóg ũn kórég ag mỹ: “kāmũ jėg ra,” he mũ, ũn rǎnhrāj vǎnh ag mỹ. Vėnh gėnh kỹ ag tóg vėnh kar jũgũ han mũ. Kĩ ag tóg Jasão he mũ ěn ĩn jy nỹtĩ nĩ sir. Paulo ag kanėg ag tóg mũ, ag jāvǎnh kỹ, ag tỹ vėnh kar jũgũ ěn ag mỹ ag ven jé.

⁶ Hā ra ag tóg ag vėg tũ nĩ, Paulo ag. Kĩ ag tóg Jasão pére mũ mũ, Jesus mré ke ũ ag mré ke gé. Pǎ'i ag mỹ ag tóg ag vin mũ. Kĩ ag tóg jamā hár(a) prěr mũ. “Ũ tỹ mundo kar ki vėnh kar jũgũ han mũ ag tóg tag ki junjun mũ (mỹr),” he ag tóg mũ.

⁷ “Jasão tóg ag mỹ: kǎge jėg ra, hé. Hā ra ag kar tóg pǎ'i mág tỹ imperador vĩ mranh ja tĩgtĩ. “Vyr mỹ ěg pǎ'i mág nĩ, hā vỹ: Jesus, he mũ,” he ag tóg. “Kỹ ěg pi(jé) imperador krēm nỹtĩgtĩ,” he ag tóg, Paulo ag,” he ag tóg mũ. Ag tỹ Paulo to ón hā vē, pǎ'i ag mỹ.

⁸ Kĩ ũ tỹ mėg mũ ag vỹ fe ũ nỹtĩ sir, cidade ěn tá pǎ'i ũ ag, cidade ěn tá ke kar ag ke gé.

⁹ Kĩ pǎ'i ag tóg Jasão ag mỹ: “ėg mỹ jǎnkamy nĩm ké, ěg tỹ to ve jé, ājag tỹ imperador kato tėnh ke tũ ti,” he ag tóg. Ag tỹ ag mỹ nĩm kar kỹ ag tóg: “hā mũ jėg (ge),” he mũ sir.

Cidade tỹ Beréia tá

¹⁰ Kutỹ ěn kǎ Jesus mré ke ag tóg Paulo mỹ: “hā tĩg, cidade tỹ Beréia ra,” he mũ. Silas mỹ ag tóg ke mũ gé. Kỹ ag tóg mũ mũ.

Ag tỹ Beréia tá junjun kỹ ag tóg Israel tỹ vėnh kanhrān jafā kāra ge mũ, ag mỹ Topě vĩ tó jé.

¹¹ Beréia tá ke ag tóg jykre há nỹtĩ. Ag pi(jé) Tessalônica tá ke ag ri ke nỹtĩ'. Kĩ ag tóg Paulo ag vĩ kri fig mũ. Ag mỹ tóg há tĩ sir. Kurā kar ki ag tóg Topě vĩ ki estudar he mũ, ag tỹ to: “ki hā tóg tó tĩ,” hen kỹ.

¹² Kĩ ũ tỹ hėn ri ke ag tóg Jesus ki ge mũ, fóg tỹ Grego ag mré hā, ũn tǎtá há fag mré hā.

¹³ Kĩ Israel ag tóg mėg mũ, cidade tỹ Tessalônica tá. Paulo tỹ Beréia tá Topě vĩ tó mũ mėg ag tóg mũ sir. Kỹ ag tóg Beréia tá junjun mũ, ag tỹ tá vėnh kar jũgũ han jé.

¹⁴ Kĩ Jesus mré ke ag tóg Paulo mỹ: “hā tĩg, canoa mág kāmĩ,” he mũ. Hā ra Silas vỹ tĩ tũ nĩ, Timóteo ke gé. Beréia tá ag nỹtĩ.

¹⁵ Kĩ ũ ag tóg Paulo mré mũ mũ. Cidade tỹ Atenas ra ag tóg ti pére mũ mũ. Ag tỹ tá vỹnvỹn kėnh ken kỹ Paulo tóg ag mỹ ke mũ, ag tỹ Silas jé prěr jé, ag tỹ Timóteo jé prěr jé ke gé, ag tỹ vėsỹmér cidade tỹ Atenas kukām kāmũ jé.

Cidade tỹ Atenas tá

¹⁶ Kĩ Paulo tóg Atenas tá nĩ nĩ, Silas jāvǎnh kỹ, Timóteo jāvǎnh kỹ ke gé. Hā ra tóg sir krĩ ũ nĩ, ti tỹ tá vėnh kǎggrá tỹ hėn ri ke ven kỹ, ti tỹ ag tỹ to jǎn jafā ěn ven kỹ.

¹⁷ Kĩ tóg Israel tỹ vėnh kanhrān jafā ki Israel ag mré vĩ mũ, fóg tỹ Israel jykre han mũ ag mré ke gé. Kurā kar ki tóg cidade kuju tá vėnh kar mré vĩ mũ gé sir, ũ tỹ tá nỹtĩ ag mré.

¹⁸ Kĩ ũ ag tóg ti mré vĩ mũ, ũ tỹ Epicuro tỹ nén rán ja to jykrén mũ ag, ũ tỹ Estóico he mũ ag tỹ nén rán ja to jykrén mũ ag ke gé. Kĩ ag tóg ti to: “vĩ mǎ pė tóg nĩ, vĩ kamě tóg nĩ,” he mũ. “Ti hỹn tóg ne tó'?” he ag tóg. Kĩ ũ ag tóg ti to: “topě ũ tugtó ti hỹn, kór há tá topě,” he mũ. Hā ra Paulo tóg Jesus tỹ vėme sér tó mũ. Jesus rĩr mǎn tó tóg mũ, Paulo ti.

¹⁹ Kĩ ag tóg sór tỹ Areópago ra ti pére mũ mũ. Tá pǎ'i ag tóg ag jyvėn tĩ, sór tỹ Areópago tá. Kĩ pǎ'i ag tóg ti mỹ: “ā tỹ vėnh jykre tag tó mũ kāmén há han ra ěg mỹ,” he mũ, ti mỹ.

20 “(Ge) mẽ ja tũ ãg nýtĩ, ã tỹ ãg mỹ tó mũ tag ti. Kỹ ãg mỹ kāmén há han nĩ,” he ag tóg, pã'i ag.

21 Hã ra Atenas tá ke ag tóg vènh vĩ tãg mẽ to há nýtĩ, cidade ù tá kãmũ kỹ tá nýtĩ ag ke gé. Ag tỹ vènh vĩ tãg mẽ kỹ ag fe tóg mrin ke tĩ.

22 Kỹ Paulo tóg sór tỹ Areópago kri jẽ kỹ ag mỹ: “Atenas tá ke',” he mũ. “Topẽ tỹ hèn ri ke kamẽg ãjag tóg tĩ (mỹr). Tag ve sóg,” he tóg.

23 “Ãjag jamã mĩ sóg tĩ, kỹ sóg ãjag tỹ topẽ jo ãn kãsir kar vigvé. Kỹ sóg topẽ jo ãn sĩ ù vé, kỹ tóg to rán kỹ nĩ, hã vỹ: ãg tỹ topẽ ki kagtĩg jo ãn, he mũ, ti rá ti. Topẽ ãn tó sóg tĩ, ãjag tỹ Topẽ ki kagtĩg ãn. ãjag tỹ ti ki kagtĩg nĩ ra ãjag tóg ti mỹ nén ù kugprũn tĩ,” he tóg.

24 “Topẽ ãn vỹ mundo kar han, mĩ mũ kar ke gé. Kanhkã tãn vỹ mỹr, kỹ tóg tỹ ga to pã'i nĩ gé. Hã kỹ tóg ãg tỹ ti jo ãn han krẽm nĩ tũ nĩgtĩ (mỹr),” he tóg.

25 “Kỹ ãg tóg ti ki rĩr ke tũ nĩ gé, ti jagtar tũ nĩn kỹ. Vènh kar rĩn tóg nĩgtĩ (mỹr), Topẽ ti, kỹ tóg vènh kar tỹ hãmhãm ke han tĩ. Vènh kar tỹ nén precisar he kar nĩm tóg tĩ (mỹr),” he tóg.

26 “Kỹ tóg vènh kyvènh pir tỹ ãprã ke kar hyn han, nação kar (mỹr), ga kar mĩ mũ mũ ag (mỹr). Tỹ ãg vènh kyvènh pir nýtĩ. Kỹ tóg ãg mỹ ãg mur kurã nĩm mũ gé, ãg ter kurã ti ke gé. ãg mỹ tóg ãg jamã nĩm mũ gé, Topẽ ti,” he tóg.

27 “Vènh kar hyn han tóg, Topẽ ti, ãg tỹ ti to há nĩn jé, ãg tỹ ti ki kanhró nýtĩ jé. Kór gy tũ ti nĩ, ti pi(jé) kuvar gy nĩ'. Kakó ti nĩ, Topẽ ti,” he tóg.

28 “Ti tỹ ãg han vỹ mỹr, hã kỹ ãg tóg rĩnrĩr nýtĩ nĩ, ti tigrĩn. Ti tũgnĩn ãg tóg mũgtĩ (mỹr), kỹ ãg tóg ti tigrĩn nýtĩ gé (mỹr), Topẽ tigrĩn. Hã kỹ ãjag kãmĩ vènhrán tĩ ag tóg tó ja nĩgtĩ gé, kỹ ag tóg: tỹ ãg Topẽ krẽ nýtĩ, he ja nĩgtĩ.

29 ãg tỹ tỹ ti krẽ nýtĩn kỹ ãg tóg ti ki kanhró nýtĩ gé. Ouro ri ke tũ ti nĩ, Topẽ ti. Ti pi(jé) prata ri ke nĩ'. Ti pi(jé) pó ri ke nĩ'. Ti pi(jé) tỹ vènh kãggrá nĩ', retrato ke gé, ti sĩnvĩ ra. ãprã ke tỹ nén to jykren mũ ri ke tũ ti nĩ, ãg tỹ nén han mũ ri ke tũ ti nĩ. Topẽ vỹ (mỹr), Topẽ,” he tóg, Paulo ti.

30 “Hã ra Topẽ tóg ãg to fe mág mũ, ãg tỹ ti ki kagtĩg nýtĩn kỹ. Hã kỹ tóg vãhã vènh kar mỹ vènh vĩ jènẽg mũ, ãg tỹ ãg jykre tovãnh jé.

31 Kurã nĩm tóg huri, kỹ tóg kurã ãn ki ãprã ke jykre kar tũgnỹm ke mũ. Kurã ãn ki tóg vènh jykre kuryj han ke mũ inhhã, Topẽ ti, ti tỹ ãg jykre tũgnỹm ke mũn kỹ. Ùn pir kuprẽg tóg, ti tỹ ti jagfy ãg kar jykre tũgnỹm jé. ãn tóg ter ja nĩ, hã ra Topẽ tóg ti ter kỹ ti rĩn mãn ja nĩ, ãg tỹ ti ki kanhró nýtĩ jé, ù tỹ Topẽ jagfy ãg jykre tũgnỹm ke ti,” he tóg, Paulo ti.

32 Ti tỹ ag mỹ ti ter kar rĩr mãn tón kỹ ù ag tóg to é he mũ. Jó ù ag tóg: “kurã ù kã ãg hèn ri ke mũn ã vĩ mẽ mãn sór mũ,” he mũ.

33 Hã kỹ Paulo tóg tĩ mũ, ag ré kỹ.

34 Kỹ ù ag tóg ti nón mũ mũ, kỹ ag tóg Jesus ki ge mũ sir. Ag kã ù vỹ tỹ Dionísio nĩ. Areópago tá ag jyvèn tĩ ag kã ù vỹ, Dionísio ti. Kỹ ù fi tóg Jesus ki rã mũ gé. Fi jyjy hã vỹ: Damáris, he mũ. Kỹ ù ag vỹ ti ki ge mũ gé sir.

18

Cidade tỹ Corinto tá

1 Kỹ Paulo tóg cidade tỹ Atenas ki kutẽ kỹ cidade tỹ Corinto ra tĩ mũ.

2 Tá Israel ù tóg nĩ nĩ, ti jiji hã vỹ: Áquila, he mũ. Ponto tá ke vỹ. Ùri tóg ga tỹ Itália tá kãtĩg ja nĩ, ã prũ fi mré. Fi jyjy hã vỹ: Priscila, he mũ. Pã'i mág tỹ imperador tỹ Cláudio he mũ tóg Israel kar ag mỹ: “cidade tỹ Roma ki pa jẽg,” he ja nĩgtĩ. Hã kỹ fag tóg cidade tỹ Corinto tá junjun ja nĩgtĩ.

3 Kỹ Paulo tóg fag mré nĩ nĩ sir. Fag mré tóg rãnrãj mũ sir. Hã ra fag tóg kur tỹ ãn han mũgtĩ, Paulo kóm. Fag rãnrãj hã vỹ. Hã kỹ Paulo tóg fag mré rãnrãj mũ sir, ti tỹ fag mré nĩn kỹ.

4 Kỹ tóg vènhkán ke kurã kar ki ag mỹ Topẽ vĩ tó mũ, Israel tỹ vènh kanhrãn jafã krẽm, Israel ag tỹ ti vĩ kri fi jé, fóg tỹ Grego ag ke gé.

5 Kỹ Silas vỹ Macedônia tá kãtĩ mũ, Timóteo ke gé. Kỹ Paulo tóg Topẽ vĩ tó tãvĩ nĩ nĩ, ãn tỹ kur han mãn tũ tóg nĩ. Israel ag mỹ tóg Jesus kãmén mũ, ti tỹ tỹ Cristo nĩ ti.

⁶ Hã ra ag tóg ti kato vĩ mũ. Kĩ ag tóg Jesus to é he mũ. Kĩ Paulo tóg ã kur rũmrũm mũ, ag mĩ: “vẽnh hã ki ãjag tóg vãngfor kenh mũ, nũgme ki vár kĩ, inferno ki,” he jé. “Ãjag mĩ sóg tó, Jesus ti, hã ra ãjag tóg mẽ jãvãnh nỹtĩ. Kĩ ãjag tỹ vêsóg ki vêsỹrẽnh ke vẽ. Inh hã tóg fóg ag kar mĩ tónh tĩg ha, kanhgág ag kar mĩ ke gé,” he tóg mũ, Paulo ti.

⁷ Hã kĩ tóg tá kutẽ kĩ fóg ãn kãra rã mũ, ti jiji hã vỹ: Tício Justo, he mũ. Topẽ kamẽg ti tĩ. Ti ãn vỹ Israel tỹ vẽnh kanhrãn jafã rã jẽ gé. Kĩ Paulo tóg ti ãn kãra rã mũ sir.

⁸ Hã ra Israel tỹ vẽnh kanhrãn jafã to pã'i vỹ Jesus ki rã mũ, ti jyjy hã vỹ: Crispo, he mũ. Ti mré ke kar vỹ Jesus ki ge mũ gé, Corinto tá ke tỹ hẽn ri ke ag ke gé, ag tỹ Paulo vĩ mẽ kĩ. Kĩ ag tóg kygpe kĩ nỹtĩ sir.

⁹ Kejẽn Paulo tóg kuty kã nẽn nẽ vэг mũ. Topẽ tỹ ti mĩ vẽnh ven vẽ, kĩ tóg ti mĩ: “kamẽg tũg ra,” he mũ. “Inh vĩ kãmén ra, ha mẽ kĩ nĩ tũg,” he tóg.

¹⁰ “Ã mré sóg nĩnh mũ. Û pi(jé) ã vóg kónãnh mũ,” he tóg. “Cidade tag ki ù tỹ hẽn ri ke ag vỹ tỹ isũ nỹtĩnh mũ,” he tóg, Topẽ ti.

¹¹ Kĩ Paulo tóg prỹg pir kri kysã tỹ 6 ke ki tá nĩ nĩ. Ag mĩ tóg Topẽ vĩ kãmén tĩ nĩ sir, tá.

¹² Kejẽn ù tỹ Gálio he mũ tóg tỹ Romano tỹ governador nĩ, ga tỹ Grécia ki. Kĩ Israel ag kar tóg Paulo kato vãsãnsãn mũ. Kĩ ag tóg ti kãgmĩ kĩ pã'i mág mĩ ti ven mũ mũ.

¹³ Kĩ ag tóg governador mĩ: “tag tóg ẽg jykre tỹ tũ' he sór mũ,” he mũ. “Vẽnh kar tóg ti vĩ tugnĩn Topẽ to jãnjãn tĩ, vẽnh jykre tãg tỹ hã ra,” he ag tóg ti mĩ.

¹⁴ Kĩ Paulo tóg vĩ sór mũ, hã ra Gálio tóg Israel ag mĩ: “Israel,” he mũ. “Ti tỹ nẽn ù kórég han mũ ra sóg ãjag jagfy vĩ tĩ vẽ, ti tỹ crime han mũ ra, Paulo ti,” he tóg.

¹⁵ “Hã ra ãjag jykre to ãjag tóg ti to jũ mũ, ãjag jiji to, ãjag vẽnh rá to (mỹr). Isũ pijé', ãjag tũ tag ti'. ãjag hã ne tag to jykrén ke mũ inhhã'. Inh pi(jé) ãjag tũ to jykrén sór mũ,” he tóg, Gálio ti, pã'i mág ẽn ti.

¹⁶ Kĩ tóg ag mĩ: “ha mũ jẽg,” he mũ sir, vĩ tar han kĩ.

¹⁷ Kĩ tá nỹtĩ ag tóg Sóstenes kãgmĩg mũ. Israel tỹ vẽnh kanhrãn jafã to pã'i vẽ. Ti kãgmĩ kĩ ag tóg ti mrãnmrãn mũ, pã'i mág ẽn ãn tá, hã ra Gálio tóg ki ẽmẽ sór tũ nĩ.

Paulo tỹ Antioquia ra vỹn ke

¹⁸ Kĩ Paulo tóg tá nĩ sir, kurã tỹ hẽn ri ke ki. Kĩ tóg kejẽn Jesus mré ke ag mĩ: “isĩg vẽ ha,” he mũ. Kĩ Áquila tóg ti mré tĩ mũ, ti prũ tỹ Priscila fi mré hã. Ag tỹ ga tỹ Síria ra mũnh ke vẽ. Cidade tỹ Cencreia tá ag tóg canoa mág ki ge sór mũ, va mũ jé. To hã tóg vẽnh jãrэг mũ, Paulo ti, Topẽ mĩ promessa han kĩ.

¹⁹ Kĩ ag kar tóg canoa mág kãki cidade tỹ Éfeso ra mũ mũ. Hã ra Áquila fag vỹ tá nỹtĩ, mũ mãn tũ fag nĩ sir.

Kĩ Paulo tóg Israel tỹ vẽnh kanhrãn jafã kãra rã mũ, Israel ag mré vĩ jé.

²⁰ Ag tỹ ti vĩ mẽ kĩ tá ke ag tóg ti mĩ: “ẽg mré nĩ nĩ,” he mũ.

Hã ra tóg ag mĩ: “hã ra sóg ver tĩg mũ ha,” he mũ.

²¹ “Kãnhmar sóg vỹn kenh ke mũ hã ra, Topẽ tỹ inh vỹn kenh ke to há nĩnh kĩ,” he tóg. Kĩ tóg cidade tỹ Éfeso tá kutẽ mũ.

²² Kĩ tóg cidade tỹ Cesaréia tá jun mũ. Kĩ tóg cidade tỹ Jerusalém ra tĩg kĩ Jesus ki ge mũ kar vigvэг mũ, ù tỹ Topẽ vĩ mẽ jé vẽnh mãn tĩ ag. Kar kĩ tóg cidade tỹ Antioquia ra tĩ mũ.

²³ Tá tóg nĩ sĩ han mũ. Kar kĩ tóg tá kutẽ kĩ ga tỹ Galácia mĩ kutẽ mũ, ga tỹ Frígia mĩ ke gé. Jesus mré mũ ag jyvẽn tóg mũ sir, ag tỹ tar nỹtĩ jé.

Apolo tỹ Topẽ vĩ tó

²⁴ Kejẽn Israel ù tóg cidade tỹ Éfeso tá jun mũ, ti jiji hã vỹ: Apolo, he mũ. Cidade tỹ Alexandria tá tóg mur ja nĩ. Vĩ há ti nĩ. Topẽ vĩ tó tóg tĩ gé, vãsỹ rán kĩ nĩ ẽn to tóg tar nĩ.

²⁵ Ẽn tóg Jesus japry ki kanhró nĩ, Jesus jamĩn ki. Mũmẽg vãn nĩnh kĩ tóg Jesus vĩ tó tĩ mũ, ti tỹ to krónh ke vãn nĩnh kĩ. Hã ra tóg João tỹ ag kygpэг mũ ẽn hã ki kanhró nĩ. Ẽg tỹ Jesus jyjy tó kĩ kygpe kĩ nĩ tag ki kagtĩg tóg nĩ ver.

²⁶ Ẽn tóg Israel tỹ vẽnh kanhrãn jafã krẽm ag kanhrãn mũ sir, ti tỹ mũmẽg vãn nĩnh kĩ. Áquila fag tỹ ti vĩ mẽg kĩ fag tóg ti mĩ: “ẽg venh kãtĩg nĩ,” he mũ. Kĩ fag tóg ti mĩ Topẽ japry kãmén kãn mũ, Topẽ jamĩn ti.

²⁷ Kar tóg ga tỹ Grécia ra tĩg sór mũ, Apolo ti. Kĩ Jesus mré ke ag tóg ti mĩ: “há ti nỹ, ha tĩg ge,” he mũ. Kĩ ag tóg Jesus mré mũ ag

mỹ vãnh rá jêñêg mũ, ag tỹ ti mỹ: “kãrã ra,” hen jé. Tá jun kỹ tóg Jesus ki ge kỹ nỹtĩ ag jyvên mũ, kỹ ag tóg ti tỹ ag jyvên to tar han kỹ nỹtĩ nĩ sir, Topê tỹ ùn jagãgtãn mũ ag.

²⁸ Israel ag mré tóg vĩ tĩ, Apolo ti, vãnh kar jo. Ag mỹ tóg Topê vĩ tó tĩ, vãsỹ rán kỹ nĩ ên ti. Kỹ tóg ag mỹ Cristo kãmén mũ sir. “Cristo vĩ tỹ Jesus nĩ,” he tóg mũ ag mỹ, Apolo ti, ag mỹ Topê vĩ rá kãmén kỹ.

19

Paulo tỹ cidade tỹ Éfeso tá nĩ

¹ Kỹ Apolo tóg cidade tỹ Corinto tá nĩ nĩ sir. Hã ra Paulo tóg cidade tỹ Éfeso tá jun mũ. Ga ên mĩ tóg tĩg ja nĩgtĩ, pãnónh kri kyjer ên mĩ. Kỹ tóg Éfeso tá jun mũ sir.

² Tá ù ag tóg Jesus ki ge ja nĩgtĩ. Kỹ Paulo tóg ag mỹ: “ãjag mỹ Topê kuprĩg tỹ jagrê nỹtĩ, ãjag tỹ Jesus ki gen kã'?” he mũ. Kỹ ag tóg ti mỹ: “kỹ ne nê ge, Topê kuprĩg ti?” he mũ, Paulo mỹ.

³ Kỹ Paulo tóg: “ãjag tỹ kygpe kỹ ãjag hẽ ri ké?” he mũ. Kỹ ag tóg: “João tỹ ag kygpe ri ke ti nĩ, êg kygpe ti,” he mũ.

⁴ Kỹ Paulo tóg: “João tóg ag kygpe ja nĩgtĩ, ag tỹ ãjag jykre tovãnh sór nỹtĩn kỹ,” he mũ. “Kỹ tóg vãnh kar mỹ kãmén ja nĩ gé, ag tỹ ù tỹ ti nón kãtĩ ên ki ge jé, hã vỹ: Jesus, he mũ,” he tóg, Paulo ti.

⁵ Ag tỹ tag mẽ kỹ ag tóg ti mỹ: “Jesus jiji tó kỹ êg kygpe ge,” he mũ.

⁶ Kỹ Paulo tóg ã nĩgé tỹ ag mẽg mũ, kỹ Topê kuprĩg tóg ag ki rá mũ sir. Vãnh vĩ ù han ag tóg mũ sir. Kỹ ag tóg Topê vĩ tó mũ gé.

⁷ Û tỹ 12 ag hỹn, vãnh vĩ ù han mũ ên ag.

⁸ Kỹ Paulo tóg Israel tỹ vãnh kanhrãn jafã kãra rá mũ. Ti tỹ mũmêg vãnh nĩn kỹ tóg Topê tỹ tỹ êg pã'i nĩ kãmén mũ. Kysã tãgtũ ki tóg ag mỹ kãmén mũ, ag tỹ hẽn ri ke mũn ti vĩ kri fi jé.

⁹ Hã ra ù ag tóg ti vĩ to fe ù nỹtĩ sir, ag tỹ kri fi jãvãnh nỹtĩn kỹ. Kỹ ag tóg to é hen kỹ ag tóg to vĩ kónãn mũ, vãnh kar jo. Kỹ Paulo tóg ag mré vĩ mãn tũ nĩ sir. Jesus mré mũ ag mỹ tóg: “vyr mỹ êg nỹtĩ,” he mũ. Kỹ tóg escola krêm ag kanhrãn mũ sir, kurã kar ki. Escola to professor ên jiji hã vỹ: Tirano, he mũ.

¹⁰ Prỹg régre ki tóg tá nĩ nĩ, gen kỹ, Paulo ti. Hã kỹ ga tỹ Ásia tá ke ag kar vĩ Jesus vĩ mẽg mũgtĩ, Israel ag kar, fóg tỹ Grego he mũ ag kar ke gé.

¹¹ Kỹ Topê tóg Paulo mỹ vãnh jykre nĩm mũ gé, kỹ tóg êg tỹ nén han vãnh tỹ hẽn ri ke hyn han mũ.

¹² Kejên ag tóg Paulo kur tỹ ùn kagyga ag mẽgmêg mũ, ag tỹ há' he jé. Paulo tỹ kur mẽ kar kỹ ag tóg tỹ ùn kagyga ag mẽgmêg mũ. Kỹ ag tóg hághá' he mũ. Vãnh jagrê kórég ag vỹ gen kỹ pa mũ gé, ùn kaga ag tỹ ti kur mẽ kỹ.

Kujá ag

¹³ Kỹ Israel ag kujá ag vĩ tá nỹtĩ gé. Kujá ên ag tóg êmã kar kri rùm ke tĩ. Kejên ag tóg ãjag tỹ vãnh jagrê kórég ven kỹ ag tóg Jesus jyjy tó tĩ. Ón kỹ ag tóg tó tĩ. Kỹ ag tóg ù mỹ: “Jesus jykre tỹ sóg ã kutêm ke mũ, Paulo tỹ ùn kãmén tĩ ên jykre tỹ,” he mũ, ùn jagrê kórég mỹ. Hã ra ag tỹ ón kỹ Jesus jiji tó vẽ. Ti mré ke pijé'.

¹⁴ Û tỹ ge tó mũ ag vĩ tỹ Israel ag nỹtĩ. Topê tũ ki rĩr tĩ to pã'i mág krê ag vẽ, kỹ ti jiji hã vỹ: Ceva, he mũ, ag panh jyjy ti. Û tỹ 7 ke ag vẽ, ti krê ên ag.

¹⁵ Ag tỹ ùn jagrê kórég mỹ Jesus jiji tó kỹ vãnh jagrê kórég ên tóg ag mỹ: “Jesus ki kanhró sóg nĩ, Paulo mẽ inh huri ke gé, hã ra ãjag tóg tỹ ù nỹtĩ?” he mũ ag mỹ, kujá ag mỹ.

¹⁶ Kỹ ùn jagrê kórég ên tóg ag to hũm he mũ. Ag kygrêg tóg mũ, hã ra ag tóg ti tỹ hẽn ri ke tũ nĩ. Kỹ ag tóg kator kỹ rinfig mũ sir, kygvénh kỹ.

¹⁷ Kỹ Éfeso tá ke ag kar tóg mẽg mũ, Israel kar, fóg tỹ Grego ag kar ke gé. Kỹ ag tóg mũmêgmêg mũ sir. Kỹ Jesus Cristo jiji tóg ag mỹ tar nĩ, ag mỹ tóg nén kar kãfór nĩ, Jesus Cristo jyjy ti.

¹⁸ Kỹ Jesus ki ge kỹ nỹtĩ ag tóg ãjag jykre kórég tugtó mũ sir, jagnê mỹ.

¹⁹ Û ag tóg curandeiro tũ han ja nĩgtĩ, kujá tũ ke gé. Kỹ ag tóg ãjag vãnh rán gé kãmũ mũ, curandeiro tỹ vãnh rán ên ti. Kỹ ag tóg kuprũn kãn mũ sir, vãnh kar rĩnve. Ag tỹ ti kaja nĩkrén kỹ tóg kaja e ja nĩ, jãnkamy tỹ 50 mĩl hỹn.

²⁰ Hã kȳ Topě vĩ tóg sir vĕnh kar kri rŭm ke mũ. Kȳ ũ tỹ hĕn ri ke ag tóg kri fig mũ sir.

Éfeso tá vĕnh génh

²¹ Kar kȳ Paulo tóg to jykrén mũ. Ga tỹ Macedônia mũ tóg kutĕ sór mũ, ga tỹ Grécia mũ, Jerusalém ra tĩg jé. “Isỹ Jerusalém ra tĩg kar kȳ sóg cidade tỹ Roma ra tĩg sór mũ gé,” he tóg, Paulo ti.

²² Kȳ tóg ga tỹ Macedônia ra ũn régre ag jĕgnĕg mũ, ti mré rĕnhřaj mũ ag, hã vỹ: Timóteo mré Erasto, he mũ. Ti hã tóg hã ra ga tỹ Ásia tá nĩ nĩ ver, Paulo ti.

²³ Kejĕn vĕnh génh tóg kutĕ mũ, Jesus japry tigrĩn, ti jamĩn tugnĩn.

²⁴ Ũ tóg Éfeso tá nĩ nĩ, ũ tỹ prata tỹ ĩn sĩ kĕggrá han mũ ti, ũ tỹ topĕ tỹ Diana he mũ fi jo ĩn sĩ ĕn kĕggrá han mũ ti, retrato ĕn. Ũ tỹ han mũ jiji hã vỹ: Demétrio, he mũ. Ti camarada tỹ hĕn ri ke ag tóg vĕnh rĕnhřaj ĕn ki nĕn há vég tĩ. Ag ganho vĕ.

²⁵ Kȳ tóg ĕ camarada ag jé prĕr kĕn mũ, Demétrio ti. Ũ tỹ ĕ ri kĕn rĕnhřaj mũ ag jé prĕr tóg mũ gé. Ag vĕnh mĕn kȳ tóg ag mỹ: “ha vé,” he mũ. “Vĕnh rĕnhřaj tag ki ĕg tóg nĕn ũ há vég mũgtĩ, ĕg ganho ti. Tag ki ĕg há nỹtĩ,” he tóg.

²⁶ “Hã ra Paulo tag tóg cidade tag ki tóg ũ tỹ hĕn ri ke krĩn mũ sir, ga tỹ Ásia mũ ke gé. Ag mỹ tóg: “vĕnh nĩgé tỹ han ja pi(jé) tỹ Topĕ nĩ,” he tĩ. Kȳ ag tóg ti vĩ kri fig mũ sir. Tag vég ĕg mũ (mỹr),” he tóg.

²⁷ “Kȳ ĕg tỹ nĕn tag tóg tũ' he sór mũ sir ti tigrĩn, ĕg ganho ti. Hã ra Diana fi jo ĩn tóg tỹ nĕn ũ tũ nĩ ke gé, ti sĭnvĩ nĩ ra. Kȳ fi tóg tỹ nĕn ũ tũ nĩ gé sir, fi tỹ tỹ ũn mág nĩ ra. Ásia kar mũ ag tóg fi to jĕnjĕn tĩ, ga kar mũ ke gé. Hã ra tóg fi tỹ tũg' hĕnh ha, Paulo ti, ti tỹ: “vĕnh kĕggrá pi(jé) tỹ Topĕ nĩ', hĕn kȳ,” he tóg, Demétrio ti, ũ tỹ fi jo ĩn sĩ han mũ ĕn ti.

²⁸ Ag tỹ tag mĕ kȳ ag fe tóg gỹm ke mũ sir. Kȳ ag tóg jamĕ hár(a) prĕr kȳ: “!..topĕ tỹ Diana fi vỹ kĕfór ne..! !..Tỹ fi Éfeso ag tũ ne..!” he mũ sir, prĕnprĕr kȳ.

²⁹ Kȳ cidade ĕn ki ag vĕnh génh vĕ sir, kȳ vĕnh kar tóg ĩn mág ĕn ra pétĕ mũ, ĩn kri ĩn tũ ĕn ra. Gaio he mũ ti pére ag tóg mũ mũ, ti kĕgmĩ kȳ, Aristarco ke gé. Macedônia tá ke ag vĕ. ĕn ag tóg Paulo mré kĕmũ ja nĩgtĩ. ĕn

ag kugmĩg ag tóg mũ, ag tỹ ĩn mág ĕn ra ag tatĩ mũ jé.

³⁰ Kȳ Paulo tóg ra tĩg sór mũ, ag mré vĩ jé, hã ra ũ tỹ Jesus ki ge kȳ nỹtĩ ag tóg ti mỹ: “tĩ tũg ra,” he mũ.

³¹ Kȳ ga tỹ Ásia tá pĕ'i ag tóg ti mỹ vĕnh vĩ jĕnĕg mũ gé, ti tỹ ĩn mág ĕn ra tĩ tũ nĩ jé. Ti to ag tóg há nỹtĩ, pĕ'i ag.

³² ĩn mág tá ag tóg vĕnh mĕn kȳ nỹtĩ nĩ, ũ tỹ hĕn ri ke ag. Kȳ ũ ag tóg nĕn ũ tó tĩ, prĕnprĕr kȳ, jó ũ ag tóg nĕn ũ tó tĩ, prĕnprĕr kȳ. Kȳ vĕnh kar tóg vĩ vĩ he kĕn mũ sir. Vĕnh mĕn kȳ ag nỹtĩ, hã ra ag tóg: “ĕg tỹ hĕ ri ke jé vĕnh mĕn nĕ hỹn'?” he mũ.

³³ Kȳ Israel ag tóg vĕnh kar mỹ ũ ven mũ gé, Alexandre he mũ ĕn. Kȳ Alexandre tóg ĕ nĩgé tỹ ge mũ, ag tỹ katy' he jé. Kȳ tóg ag mỹ kĕmĕn sór mũ.

³⁴ Kȳ ag tóg vég mũ sir, ti tỹ tỹ Israel nĩ ti, Alexandre ti. Hã ra ag tóg tỹ fóg nỹtĩ, tá vĕnh mĕn kȳ nỹtĩ ag. Kȳ ag tóg Israel ag to jũgĩ nỹtĩ nĩ. Ag tỹ ti tỹ tỹ Israel nĩ ĕn ven kȳ vĕnh kar tóg prĕr pir han mũ, hã vỹ: “!..Éfeso tá ke fi tỹ vĕnh kar kĕfór ne..! !..Diana he mũ fi vỹ vĕnh kar kĕfór ne..!” he mũ, prĕnprĕr kȳ. Hora régre han ag tóg mũ sir, ge nỹtĩ ki.

³⁵ Governo mỹ rán tĩ ĕn tóg hã ra ag fe tỹ há' he mũ. Kar kȳ tóg ag mỹ: “Éfeso tá ke',” he mũ. “Vĕnh kar vỹ Diana fi ki kanhró nỹtĩ,” he tóg. “Éfeso tá ĕg tóg fi ki rĩr mũ. Fi kĕggrá nĕji tóg kanhkĕ tá kĕkutĕ ja nĩ. Vĕnh kar tóg tag ki kanhró nỹtĩ,” he tóg.

³⁶ “Ũ tóg tag kato vĩ tũ nĩgtĩ (mỹr),” he tóg. “Hã kȳ jatu ké. Krĩ rỹg tũg ra,” he tóg.

³⁷ “Tag ag tatĩ ĕjag tóg kĕmũ ja nĩgtĩ, hã ra ag tóg topĕ fi jo ĩn tá nĕn ũ péju ja tũ nĩgtĩ. ĕg topĕ fi to ag tóg vĩ kónĕn tũ nĩgtĩ (mỹr),” he tóg.

³⁸ “Demétrio mỹ ag kato vĩ sór ke mũ?” he tóg. “Vĕnh kĕggrá han mũ ag mỹ ti mré ag vĩ kafĕn sór mũ?” he tóg. “Kȳ kófa ag mỹ tómnĩ ge, vĕnh jyvĕn ke kurĕ ĕn kĕ. Ag kato vĭmnĩ ge,” he tóg.

³⁹ “Ājag tỹ hã ra nĕn ũ tó sór kȳ ĕjag tóg ĕg tũ ki kanhró nỹtĩ. Kurĕ nĩm jé ĕg tóg ke mũ, kȳ ĕg vĕnh mĕn kȳ venh mũ ha,” he tóg.

⁴⁰ “Hã ra ĕg tỹ ón kȳ vĕnh génh kȳ ũ ag hỹn ĕg to: pĕ'i mág tỹ imperador kato ag tĕ sór

mũ, he mũ. Nén ũ tũ to ãjag tóg vènh mǎn mũ (mỹr),” he tóg. “Ũ tỹ ãg mỹ: ne nẽ? he mũ ra ãg tỹ ne tónh ke tóg tũ tĩ,” he tóg, governo mỹ rán tĩ ti.

⁴¹ Kar kỹ tóg ag mỹ: “ha mũ jẽg,” he mũ. Kỹ ag tóg mũ mũ sir.

20

Paulo tỹ ga tỹ Macedônia mĩ tĩg

¹ Vènh kar tỹ jatu ke mǎn kỹ Paulo tóg Jesus ki ge kỹ nỹtĩ ag jé prër mũ. Ag jyvèn tóg mũ, kỹ tóg ag mỹ: “sỹ tĩ ma,” he mũ. Kỹ tóg ga tỹ Macedônia ra tĩ mũ.

² Kỹ tóg ga ãn mĩ tĩ mũ, kỹ tóg fĩn kutẽ mũ. Jesus ki ge kỹ nỹtĩ kar ag jyvèn mág tóg mũ. Kỹ tóg tĩg mǎn kỹ ga tỹ Grécia tá jun mũ.

³ Tá tóg kysã tãgtũ tũg mũ. Kỹ tóg ga tỹ Sírĩa ra vỹn ke sór mũ, canoa mág kãmĩ. Hã ra Israel ag tóg tá ti vóg kónǎn sór mũ. Kỹ tóg to jykrén kỹ ga tỹ Macedônia mĩ kutẽ mũ, ga tỹ Sírĩa ra vỹn ken jé.

⁴ Tĩ mré ag tóg mũ mũ, hã vỹ: Sópatro, he mũ, Pirro kósĩn tag ti, Beréĩa tá ke tag ti. Kỹ Tessalônica tá Artistarco tóg ti mré tĩ mũ, Segundo ke gé. Derbe tá Gaio tóg ti mré tĩ mũ, Timóteo ke gé. Ásia tá Tíquico tóg ti mré tĩ mũ, Trófimo ke gé.

⁵ ãn ag kar vỹ ãg jo mũ mũ, cidade tỹ Trôade ra. Tá ag tóg ãg jãvǎnh mũ sir.

⁶ Kỹ ãg tóg cidade tỹ Filipos tá pa mũ, festa tỹ pǎo jẽgja tũ ke kurã kar kỹ. Kỹ ãg tóg kurã tỹ 5 (ke) tũg kỹ Trôade tá junjun mũ ag tá, ãg jo mũ ag tá. Tá ãg tóg kurã tỹ 7 (ke) tũg mũ sir.

Cidade tỹ Trôade tá

⁷ Semana tỹ kurã ve ki ãg tóg vènh mǎn mũ sir, Domingo kã, Jesus jamĩ kó jé. Kỹ Paulo tóg tỹ vaj kỹ tĩg sór mũ, hã kỹ tóg ag mré vèmén mág mũ. Kỹ ãg tóg meia noite pètẽm mũ, vèmén nỹtĩn ki.

⁸ ãn to jãpry jafã tá ãg nỹtĩ, kỹ néj gru tỹ hẽn ri ke tá grug kỹ nỹtĩ nĩ.

⁹ Kỹ kyrũ tóg tá nĩ nĩ, ti jyjy hã vỹ: Êutico, he mũ. Jãnkã ror kã tóg nĩ nĩ, janela kã. Hã ra tóg nũr mũ sir. Nũr sér han tóg mũ sir. Jó Paulo tóg vèmén jẽ nĩ. Kỹ tóg ã nũr kỹ jãnkã ror ki kutẽ mũ. Janela tãgtũ tá nĩ kỹ tóg ãprã kutẽ mũ. Kỹ tóg ter ja nĩ sir, ag tỹ re kỹ, ti ve jé.

¹⁰ Kỹ Paulo tóg tere mũ gé sir. Ti kri tóg pǎnh ke mũ. Kỹ tóg ti kãgũg mũ, ã nĩgnó tỹ. Kỹ tóg ag mỹ: “fe kaj tũg ra,” he mũ. “Tĩ kuprĩg vỹ ti kãkã nĩ nĩ,” he tóg.

¹¹ Kỹ tóg tãpry mũ, Paulo ti. Jesus jamĩ kãnhkrég tóg mũ sir, kỹ tóg ko mũ gé. Ag mỹ tóg vèmén mág han mǎn mũ gé, kỹ tóg tỹ vaj mũ. Vaj kỹ tóg tĩ mũ, cidade ãn ki kutẽ kỹ, Paulo ti.

¹² Hã ra ag tóg kyrũ ãn pére kãmũ mũ. Rĩr tóg nĩ nĩ, kỹ ag krĩ tóg há' he mũ sir.

Cidade tỹ Mileto ra

¹³ Kỹ ãg tóg ti jo canoa mág kãra ge mũ, Paulo jo. Kỹ ãg tóg cidade tỹ Assôs ra mũ mũ. Tá Paulo tóg ãg mré canoa kãra rã sór mũ gé, ti tỹ ãg mré tĩg jé. “Iso ra mũ jẽg, inh hã vỹ inh pẽn kã ra tĩ mũ,” he ja tóg nĩgtĩ, Paulo ti.

¹⁴ ãg tỹ cidade tỹ Assôs tá pa kỹ tóg ãg mré tĩ mũ gé, Paulo ti, canoa mág kãmĩ. Kỹ ãg tóg cidade tỹ Mitilene tá junjun mũ.

¹⁵ Tá pa kỹ ãg tóg tỹ vaj kỹ goj vãso tỹ Quios kakãm krỹg mũ. Tỹ vaj kỹ ãg tóg goj vãso tỹ Samos to hã nũgnũr mũ, kỹ ãg tóg tỹ vaj kỹ cidade tỹ Mileto tá junjun mũ sir.

¹⁶ Paulo tóg: “Éfeso ra ãg mũnh ke tũ nĩ,” he ja nĩgtĩ. “ãg tỹ Jerusalém kukãm mũnh ke vẽ, hã kỹ ãg tóg Ásia ki nỹtĩnh ke tũ nĩ. Festa tỹ Pentecoste ki tóg sỹ Jerusalém tá nĩnh há tĩ,” he ja tóg nĩgtĩ, Paulo ti.

Paulo tỹ Jesus mré ke ag mré vĩ

¹⁷ Mileto tá nĩ kỹ tóg Éfeso ra vènh vỹ jẽnẽg mũ, Paulo ti, kófa ag mỹ, Jesus ki ge kỹ nỹtĩ to pã'i ag mỹ, ag kãmũ jé.

¹⁸ Ag tỹ tá junjun kỹ tóg ag mỹ: “inh ve ja ãjag tóg (mỹr),” he mũ. “Inh kãtĩg ven kã ãjag tóg inh vé, isỹ ga tỹ Ásia tá jun vén kã,” he tóg.

¹⁹ “ãg Senhor tỹ Jesus tỹ inh mỹ nén nĩm ja han isóg tĩ. Vènh kãfór han tũ sóg tĩ. Kejẽn sóg fỹ tĩ gé, sỹ vènh jykre pãno ven kỹ. Israel ag tóg iso jũgiũ tĩ gé, kỹ sóg vèsỹrénh tĩ gé,” he tóg.

²⁰ “Nén há kar tó sóg tĩ ãjag mỹ. Inh pi(jé) ãjag mỹ tó tũ nĩgtĩ', sỹ nén ki kanhrãn mũ ti'. ãg vènh mǎn ki sóg tó ja nĩgtĩ, ãjag ãn krẽm ke gé,” he tóg.

21 “Israel ag mǝ sóg tó ja nǝgtǝ, inh mré ke ag mǝ, fóg tǝ Grego ag mǝ ke gé, ag tǝ ājag jykre tovānh jé, Topě jykre han jé, Jesus Cristo ki rā jé, ěg Senhor ki. Tag tó ja sóg nǝgtǝ,” he tóg, Paulo ti.

22 “Ha vé, Jerusalém ra sóg tǝ mǝ, Topě kuprǝg tǝ inh mǝ: ha tǝg, hen kǝ. Isǝ tá nén venh ke ki kagtǝg sóg nǝ ver,” he tóg.

23 “Hā ra Topě kuprǝg tóg inh mǝ tag tó tǝ, ha mē: “ā se jé ag tóg ke mǝ, ā vóg kónān jé ag tóg ke mǝ,” he tóg tǝ. Isǝ ěmā ũ ki rā tóg inh mǝ inh vēsǝrénh ke tó tǝ, Topě kuprǝg ti,” he tóg.

24 “Hā ra tóg inh mǝ tǝ nén ũ tǝ nǝ. Ag tǝ isén ke mǝ ra tóg inh mǝ tǝ nén ũ tǝ nǝ gé. Sǝ inh rānrāj kān há tóg tǝ, Jesus Cristo tǝ inh mǝ vēnh rānrāj nǝm ja ěn ti, hā vǝ: sǝ vēnh kar mǝ Jesus to vǝ sér ěn tó jé, he mǝ, sǝ Topě tǝ ěg jagēgtān mǝ ti tó jé, he mǝ,” he tóg.

25 “Ha vé, inh ve mǝn ke tǝ ājag tóg nǝ ha, ki kanhró sóg nǝ. ũ tǝ hēn ri ke ag mǝ sóg Topě tǝ tǝ ěg pǝ'i nǝ tó ja nǝgtǝ, isǝ ag venh tǝg kǝ. Hā ra ag kar ěn tóg inh ve mǝn ke tǝ nǝ ha,” he tóg.

26 “Hā kǝ sóg ājag mǝ tó mǝ. ũ tǝ Jesus ki rā tǝ nǝn kǝ tóg iso: inh mǝ tóg tó ja tǝ nǝ, hēnh ke tǝ nǝ,” he tóg.

27 “Ājag mǝ sóg tó kǝn, Topě jykre kar tó sóg ājag mǝ. Inh pi(jé) ājag mǝ nén ũ tó tǝg ja nǝ,” he tóg.

28 “Vēnh ki rǝrnmǝ, vēso jykrén kǝ. Kǝ Jesus ki ge mǝ kar ag ki rǝrnmǝ gé. Topě kuprǝg vǝ ājag tǝ ag to pǝ'i hyn han, kǝ ag ki rǝr há han nǝ. Ā kyvénh tǝ tóg ag kygjām mǝ mǝr, Jesus ti. Ti mǝ ag tóg tǝ ti mēg ri ke nǝtǝ, kǝ ājag tǝ ti mēg ěn jēn ke,” he tóg.

29 “Isǝg kǝ ũ ag tóg ājag to junjun ke mǝ, kǝ ag tóg mǝg ri ke nǝtǝ, ti mēg mǝn sór kǝ, hā vǝ: Jesus ki ge kǝ nǝtǝ ag kókén sór mǝ, he mǝ,” he tóg.

30 “Ājag kāmǝ ũ tóg vēnh ó tónh ke mǝ gé, Jesus mré mǝ ag tǝ ag mré mǝ kónān han jé,” he tóg.

31 “Kǝ vēnh ki rǝr. Iso jykrén. Prǝg tāgtǝ ki sóg ājag jyvēn, kurā ki, kuty ki ke gé. Ājag kar jyvēn sóg (mǝr). Ājag jyvēn kǝ sóg fǝ tǝ gé kejēn,” he tóg.

32 “Hā ra sóg Topě mǝ: ag ki rǝr, he mǝ, ājag to. Topě vǝ ā vǝ tǝ ājag ki rǝr ke mǝ gé, ti tǝ ājag jagāgtān kǝ. Ti hā vǝ ti ki rā to ājag tar han ke mǝ, Topě ti. Ājag mǝ tóg ěmā há tāvǝ nǝm ke mǝ gé, kar kǝ, ti tǝ kar ag mré hā,” he tóg, Paulo ti.

33 “Inh pi(jé) ājag mǝ: inh mǝ jānkamy nǝm, inh mǝ kur nǝm, he mǝ,” he tóg.

34 “Isǝ nén ũ génh jé sóg rānrāj ja nǝgtǝ (mǝr), inh nǝgé tǝ. Kǝ inh rānrāj ki inh companheiro ag vǝ ājag tǝ ti vigve ja nǝgtǝ gé inh kóm,” he tóg.

35 “Hā ki sóg ājag mǝ Jesus jykre ti ven mǝ. ěg rānrāj ki ěg tǝ ven kǝ ěg tóg ũn krónhkrój ag mǝ nén ũ vin ke mǝ gé, ěg tǝ ti jykre han kǝ. ěg Senhor tǝ Jesus vǝ mǝ sóg ěkrég tǝ. Ti hā tóg ěg mǝ tag tó ja nǝgtǝ, kǝ tóg: “ũ tǝ ěg mǝ nén ũ nǝm kǝ tóg pǝgsǝ nǝ,” he ja nǝgtǝ. “Hā sǝ tóg nǝ. ěg tǝ ũ mǝ ěg tǝ nǝm hā kǝ tóg há nǝ,” he ja tóg nǝgtǝ, Jesus ti,” he tóg, Paulo ti. Paulo tǝ ag mǝ ken hā vē.

36 Ti tǝ tó kǝn kǝ tóg ā jakrǝ tǝ jē mǝ, kǝ tóg Topě mré vǝ mǝ, vēnh kar to.

37 Kǝ ag tóg kygfǝ' he mǝ. Paulo nunh jāgmǝ ag tóg ājag nǝgnó fón mǝ, ti ki ag tóg nhun ke mǝ.

38 Ag mǝ tóg e tǝ, ti tǝ ag mǝ: “inh ve mǝn ke tǝ ājag nǝ ha,” hen kǝ. Kǝ ag tóg canoa mág ra ti mré mǝ mǝ sir.

21

Jerusalém ra

¹ Vāhā ěg tóg ag mǝ: “ěg mǝ sór vē,” he mǝ. ěg tǝ ag ré kǝ mǝ kǝ tóg ag mǝ jagy tǝ. Ge ra ěg tóg tá pa mǝ. Kǝ ěg tóg canoa mág kāmǝ mǝ mǝ, goj vāso tǝ Cós kukām, vēsǝméri. Tǝ vaj kǝ ěg tóg goj vāso tǝ Rodes tá junjun mǝ. Kar ěg tóg cidade tǝ Pátara tá junjun mǝ sir.

² Tá ěg tóg canoa mág ũ vég mǝ gé, ũ tǝ ga tǝ Fenícia ra tǝ mǝ ěn. Kǝ ěg tóg kǝra ge kǝ kāmǝ mǝ mǝ sir.

³ Goj vāso tǝ Chipre vég ěg tóg mǝ, ěg jakānh tá. Kǝ ěg tóg ga tǝ Síria kukām mǝ mǝ. Cidade tǝ Tiro tá ěg tóg krǝg mǝ. Ag tǝ canoa tǝ nén rǝnh tǝ ěn tǝ tá vin han ke vē, cidade tǝ Tiro tá.

⁴ Tá ěg tóg Jesus mré mǝ ag vég mǝ. Hā kǝ ěg tóg kurā tǝ 7 (ke) ki tá nǝtǝ nǝ. Topě kuprǝg tǝ ag krǝn kǝ ag tóg Paulo mǝ ke mǝ, ti tǝ Jerusalém ra tǝg tǝ nǝ jé, he ag tóg.

⁵ Ge ra ěg tóg kurã tỹ 7 (ke) tũg kỹ mũ mãn mũ. Hã ra ag tóg ěg mré mũ sĩ han mũ, ãjag prũ fag mré hã ke gé. Cidade tá ag tóg pa mũ ěg mré, kỹ ěg tóg goj fyr tá ěg jakrĩ tỹ nỹtĩn kỹ Topẽ mré vĩ mũ.

⁶ Kỹ ěg tóg: “ěg mũnh ken vê ha,” he mũ. Kỹ ěg tóg canoa kãra ge mũ. Jó ag tóg ãjag jamã ra vỹnvỹn ke mũ gé.

⁷ Kỹ ěg tóg cidade tỹ Tiro tá pa kỹ mũ mãn kỹ cidade tỹ Ptolemaida tá junjun mũ. Jesus mré ke ag vég ěg tóg mũ sir tá. Ag mré ěg tóg kurã pir han mũ.

⁸ Tỹ vaj kỹ ěg tóg tá pa kỹ cidade tỹ Cesaréia ra mũ mũ, ěg pẽn kã. Tá ěg tóg Jesus vĩ tó tĩ ù ĩn krẽm nỹtĩ mũ, ti jiji hã vỹ: Filipe, he mũ. Û tỹ 7 (ke) ěn ag kã ù vê, ù tỹ vějẽn vẽn kãpópãm mũ ěn ag kã ù vê.

⁹ Ti kósin fag vỹ tỹ 4 (ke) nỹtĩ, ùn mên ja tũ fag. Ěn fag vỹ Topẽ vĩ tó mũgtĩ.

¹⁰ Si há tũ tá Judéia tá ke ù tóg kãtĩ mũ, ù tỹ Topẽ vĩ tó tĩ ti, ti jyjy hã vỹ: Ágabo, he mũ.

¹¹ Ěn tóg ěg tá jun kỹ Paulo vêsógfĩn ja tỹ ã nĩgé sigség mũ, ã pẽn ke gé. Kỹ tóg: “Topẽ kuprĩg tỹ tón hã vê, ha mẽ: ù tỹ vêsógfĩn ja tag tỹ tũ nĩ ěn vỹ se kỹ jẽn mũ,” he mũ. “Israel ag vỹ ti senh mũ, kỹ ag tóg fóg ag mỹ ti fẽg mũ, he tóg, Topẽ kuprĩg ti,” he tóg, Ágabo ti.

¹² Ěg tỹ tag mẽ kỹ ěg tóg Paulo mỹ: “Jerusalém ra tĩ tũg nĩ,” he mũ. Kỹ tá ke ag tóg ge mũ sir ěg mré.

¹³ Hã ra Paulo tóg: “ãjag hã ne tóg kygfỹ' he mũ!,” he mũ. “Inh fe kaj han ãjag tóg mũ,” he tóg. “Ag tỹ ise sór nỹtĩn kỹ tóg inh mỹ tỹ nén ù tũ nỹ. Ag tỹ isén sór nỹtĩn kỹ tóg inh mỹ tỹ nén ù tũ nỹ gé, ag tỹ Jerusalém tá inh vóg kónãn sór kỹ, ěg Senhor tỹ Jesus tugnĩn,” he tóg, Paulo ti.

¹⁴ Ěg vĩ mẽ jãvãnh tóg nĩ. Kỹ ěg tóg vĩ mãn tũ nĩ sir. “Jesus tỹ nén han mũ vỹ tóg há nĩ,” he ěg tóg mũ sir.

¹⁵ Kar kỹ ěg tóg nén kar kãn mũ. Kỹ ěg tóg Jerusalém ra mũ mũ.

¹⁶ Cesaréia tá ke ù ag tóg ěg mré mũ mũ gé, Jesus mré ke ù ag. Ěg mỹ ag tóg ù ven mũ, ěg tỹ ti ĩn krẽm nỹtĩ jé. Ti jiji hã vỹ: Menasom, he mũ. Goj vãso tỹ Chipre tá ke vê. Vãsỹ tóg Jesus ki rã ja nĩgtĩ. Ěg tỹ ti ĩn krẽm nũgnũr ke vê.

Paulo tỹ Tiago mré vẽnén

¹⁷ Ěg tỹ Jerusalém tá junjun kỹ Jesus mré ke ag fe tóg mrin ke mũ sir.

¹⁸ Tỹ vaj kỹ Paulo tóg ěg mré Tiago vẽn tĩ mũ. Kỹ kófa ag kar tóg tá vẽn mãn mũ gé.

¹⁹ Ag mỹ tóg: “ãjag mỹ há?” he mũ. Kỹ tóg ag mỹ Topẽ tỹ nén han kar tugtó mũ. Tugtó kãn tóg mũ, Topẽ tỹ fóg kar krĩn mũ ti, ti tỹ ag mỹ Topẽ vĩ tón kỹ.

²⁰ Ag tỹ mẽ kỹ ag tóg Topẽ mỹ vĩ há han mũ. Kỹ ag tóg Paulo mỹ: “régre!,” he mũ. “Israel tỹ hẽn ri ke ag vỹ Jesus ki ge kỹ nỹtĩ, ù tỹ mil tỹ hẽn ri ke ag. Ěn kar tóg Moisés tỹ ěg mỹ vẽn jykre nĩm ja han (ka)mẽ nĩgtĩ!,” he ag tóg.

²¹ “Hã ra ù ag tóg ag mỹ ã to ón ja nĩgtĩ. Ě to ag tóg: “Israel kar krĩn kónãn tóg tĩ,” he tĩ. “Israel tỹ fóg mĩ mũ kar krĩn kónãn tóg tĩ, ag tỹ Moisés tỹ ěg mỹ nén nĩm ja tovãnh jé,” he ag tóg tĩ ã to, ón kỹ. ãjag krẽ gré junun fár kym tũg nĩ, he ã nẽji tĩ. Moisés tỹ ěg mỹ nén nĩm ja hán mãn tũg nĩ, he ã nẽji tĩ,” he ag tóg, Paulo mỹ.

²² “Kỹ ěg ne han mũ ha'?” he ag tóg. “Û tỹ hẽn ri ke ag vỹ vẽn mãn ke mũ, ag tỹ ã kãtĩg mẽn kỹ,” he ag tóg, Paulo mỹ.

²³ “Tag hã han jé ã tóg ke mũ, ha mẽ. Û tỹ 4 (ke) ag vỹ ki nỹtĩ ěg mré, Topẽ mỹ promessa han mũ ag,” he ag tóg.

²⁴ “Ag mỹ: “inh mré nỹtĩmnĩ,” hemnĩ. Ag mré vẽn jãnhkri han nĩ, ěg jykre ki. Ag tỹ vějãrég mũ kỹ ag jo kajãm nĩ. Hã kỹ vẽn kar tóg ã jykre ki kanhró nỹtĩ sir. Û ěn ag tỹ ã to ón mũ ve jé ag tóg ke mũ, ã tỹ Moisés tỹ ěg mỹ nén nĩm ja ěn han kỹ,” he ag tóg mũ, Tiago ag, Paulo mỹ.

²⁵ “Jó ěg tóg fóg ag tỹ Jesus ki ge mũ ag mỹ vẽn rá jẽnẽ ja nĩgtĩ, kanhgág ag mỹ ke gé. Û tỹ Israel jykre han tũ kar to ěg tóg jykrén, kỹ ěg tóg ag mỹ vẽn rá ěn jẽnẽ ja nĩ. Ag mỹ ěg tóg: Moisés tỹ ěg mỹ nén nĩm ja ěn han ke tũ ãjag nĩ, he ja nĩgtĩ. ãjag tỹ nén han ken hã vê, ha mẽ: vẽn kãggrá to festa ko tũg nĩ, retrato to festa ěn. Nén ù kyvẽn ko tũg nĩ gé. Nén tỹ vêsóg ki ter ja ěn ko tũg nĩ gé. ãjag prũ tũ fag mré nỹ tũg nĩ gé, he ja ěg tóg nĩgtĩ ag mỹ, ù tỹ Israel jykre han tũ ag mỹ,” he ag tóg, kófa ag, Paulo mỹ.

²⁶ Kÿ Paulo tóg ù tÿ 4 (ke) ên ag mÿ: “inh mré nÿtĩmnĩ,” he mÿ, ù tÿ promessa han mÿ ag mÿ. Tÿ vaj kÿ tóg ag mré vènh jãnhkrig mÿ, Israel ag jykre ki. Kÿ tóg Topê jo ãn to tĩg kÿ ù tÿ ki rĩr tĩ ag mÿ: “ag mré sóg vènh jãnhkrig mÿ,” he mÿ sir. Ag mÿ tóg kurã nĩm, Paulo ti, ag tÿ kurã ên kã Topê mÿ ti tũ pũn jé, ù tÿ 4 (ke) ag jo, Topê tũ ki rĩr tĩ ag. Kurã ên to hã ag tóg vènh jãnhkrig tĩ, kurã tÿ 7 (ke) ki, promessa han mÿ ag.

Ag tÿ Paulo se

²⁷ Kÿ tóg kurã tÿ 7 (ke) ên tũ ken kÿ Israel tÿ Ásia tá ke ag tóg Topê jo ãn tá ti vég mÿ sir, Paulo ti. Kÿ ag tóg vènh génh mág han mÿ. Ti kãmĩg ag tóg mÿ, kÿ ag tóg prẽnprẽr mÿ sir.

²⁸ “!..Israel kar, kãmũ jẽg ra..!” he ag tóg. “!..Ûn gré ên ve ra..! !..Û tÿ vènh kar krĩn kónãn mÿ ên ve ra..! !..Ëg povo to tóg vĩ kónãn mo..! !..Moisés tÿ êg mÿ nén nĩm ja to..! !..Topê jo ãn to tóg vĩ kónãn mo..! !..Kÿ tóg fóg ag mÿ: Topê jo ãn kãra ge jẽg, he ja ne..! !..Hã kÿ tóg Topê jo ãn kavénh mo..!” he ag tóg, prẽnprẽr kÿ, Paulo to.

²⁹ Fóg tÿ Trófimo ên ve ja ag tóg nĩgtĩ, Éfeso tá ke ên, Paulo mré tĩ mÿ ên. Jerusalém tá ag tóg ti ve ja nĩgtĩ, kÿ ag tóg ón kÿ: “Paulo hÿn ti pére vyr, Topê jo ãn kãra,” he mÿ.

³⁰ Kÿ cidade ên tá ke kar ag vÿ vènh génh mÿ sir, jũgũ kÿ. Ag tÿ Paulo kãgmĩ kÿ ag tóg Topê jo ãn kãtã ti kutẽm mÿ. Kÿ ù tÿ ki rĩr tĩ ag tóg Topê jo ãn nĩgfénh mÿ sir.

³¹ Kÿ ag tóg ti rẽg mÿ, Paulo ti.

Hã ra soldado ag pã'i vÿ mẽg mÿ, major ti, Jerusalém tá ke kar ag tÿ vènh génh kÿ.

³² Kÿ tóg soldado ag jé prẽr kÿ, ag pã'i jé prẽr kÿ tóg ag to pétẽ mÿ. Ag tÿ soldado ag ve kÿ, ag tÿ major ve kÿ ag tóg sir krÿg he mÿ, Paulo rẽn kÿ.

³³ Hã ra major tóg tá jun mÿ. “Ti kãgmĩ ra,” he tóg, soldado ag mÿ. “Ti se ra, ferro régre tÿ,” he tóg. “Û nẽ?” he tóg. “Ti tÿ ne han nẽ?” he tóg, vènh kar mÿ, major ti.

³⁴ Hã ra ù ag tóg ti mÿ nén ù tóg, kÿ ù ag tóg ti mÿ nén ù tóg, kÿ tóg ki kanhrãn tũ nĩ sir. Kÿ tóg soldado ag mÿ: “ẽg ãn kãra ti rãg,” he mÿ.

³⁵ Ag tÿ sãnsãn he jafã tá junjun kÿ ag tóg ti vãg mÿ. Vènh kar tÿ ti to vènh génh kÿ ag tóg ti vãg mÿ, ag tÿ ti kã kyn ke jé.

³⁶ Vènh kar tóg ag nón mÿ kÿ: “!..ti rẽ ra..!” he mÿ, prẽnprẽr kÿ.

Paulo tÿ ag mÿ vènh kãmén mÿ

³⁷ Ag tÿ ãn kãra ti rãg sór kÿ Paulo tóg major mÿ: “sÿ ã mré vémén há tóg tĩ,” he mÿ. Grego vĩ ki tóg ti mÿ ke mÿ. Fóg tÿ major vè, hã kÿ tóg Grego vĩ hã tóg tĩ.

³⁸ Kÿ major tóg ti mÿ: “ã hã ne tóg Grego vĩ tóg há nĩ,” he mÿ. “Kÿ ã mÿ tÿ Egito tá ke ên tũ nĩ, ù tÿ kurã ên kã vènh génh han mÿ ên, ù tÿ mil tÿ 4 (ke) mré tĩ mÿ ên, governo kato tẽ mÿ ên ag mré, ãmã tũ mĩ tĩ mÿ ên?” he tóg, Paulo mÿ, major ti.

³⁹ Kÿ Paulo tóg ti mÿ: “hÿ,” he mÿ. “Tÿ sóg Israel nĩ,” he tóg. “Tÿ sóg cidade tÿ Tarso tá ke nĩ. Ga tÿ Cilícia tá cidade mág kãfór vè, inh mur ja ti. Isÿ povo tag mré vĩnh há tóg tĩ,” he tóg, Paulo ti, major mÿ.

⁴⁰ Kÿ tóg ti mÿ: “ha vĩ ge,” he mÿ.

Kÿ Paulo tóg sãnsãn he jafã kri jẽ kÿ ag mÿ ke mÿ sir. Hebreu vĩ ki tóg ag mÿ ke mÿ, kÿ tóg:

22

¹ “inh kanhkã’,” he mÿ. “Ijóg’,” he tóg. “Isÿ ãjag mÿ inh jykre kãmén ke vè, ki ãmẽ,” he tóg ag mÿ.

² Kÿ ag tóg ti tÿ Hebreu vĩ ki ag mÿ vĩ mẽg mÿ sir, kÿ ag tóg katy' he mÿ sir.

³ Kÿ tóg ag mÿ: “tÿ sóg Israel nĩ,” he mÿ. “Cidade tÿ Tarso tá inh mur, ga tÿ Cilícia tá. Cidade tag ki sóg hã ra mog mÿ, kÿ Gamaliel tóg inh kanhrãn. Inh mÿ tóg ẽg jóg'jóg ag jykre tóg kãn, kÿ sóg to tar ja nĩ. Topê jykre to sóg tar tãvĩ ja nĩgtĩ, ãjag tÿ ùri han mÿ ri kén,” he tóg. “Topê jykre hÿn, he sóg tĩ gé, ẽg jykre ên to, hã ra sóg kygnẽ.

⁴ Hã kÿ sóg Jesus mré mÿ ag to jũ tãvĩ ja nĩgtĩ. Ag kãgtén sór ja inh nĩgtĩ, ùn tãtã fag ke gé. Ag sigse ja sóg nĩgtĩ, vèse ja kãki sóg ag vãm ja nĩgtĩ gé.

⁵ Topê tũ ki rĩr tĩ to pã'i mág vÿ ki kanhró nĩ, kófa ag kar ke gé. Ag hã tóg inh mÿ permissão han ja nĩgtĩ, sÿ cidade tÿ Damasco ra tĩg jé, tá ẽg mré ke ag mÿ ven jé. Tá sóg Jesus mré ke ag sigse sór ja nĩ gé, Jerusalém ra ag tatĩ kãtĩg jé, tag ki ag vóg kónãn jé,” he tóg, Paulo ti.

Paulo tỹ ã tỹ Jesus ki rã kãmén
(Hk 9.1-19; 26.12-18)

⁶ “Isĩg kỹ sóg Damasco tá jun mũ. Kỹ tóg vãhã vãnh jẽngrẽ tar tãvĩ tóg vãhã inh ki kómkóm ke mũ. Kanhkã tá ke vễ, vãnh jẽngrẽ tag ti. Rã tỹ ẽg nĩno kã sa ra tóg ke mũ.

⁷ Kỹ sóg kutẽ mũ. Kỹ sóg vãnh vĩ mễg mũ, kỹ tóg inh mỹ: “Saulo', Saulo', ã tỹ ne jé isũ ag vóg kónãn nễ?” he mũ, vãnh vĩ ti.

⁸ Kỹ sóg ẽg Senhor mỹ: “ã tỹ ù nễ?” he mũ. Kỹ tóg inh mỹ: “tỹ sóg Jesus nĩ, Nazaré tá ke ẽn,” he mũ, “ã tỹ ùn vóg kónãn sór tĩ ẽn hã vỹ tỹ inh nĩ,” he tóg inh mỹ.

⁹ Inh mré mũ ag vỹ vãnh jẽngrẽ ẽn vigvэг mũ. Hã ra ag tóg ù tỹ inh mỹ vĩ mũ mễg tũ nĩ.

¹⁰ Kỹ sóg ẽg Senhor ti mỹ: “kỹ sỹ hẽ ri kenh ke nễ?” he mũ. Kỹ tóg inh mỹ: “jẽg nễ ra,” he mũ. “Damasco ki rã. Tá ù tóg ã mỹ tó kãn mũ, ã tỹ nén han ke ti,” he tóg inh mỹ, vãnh vĩ ti.

¹¹ Hã ra sóg nén ù vэг tũ nĩ, vãnh jẽngrẽ ẽn tar tãvĩ nĩn kỹ. Kỹ inh mré mũ ag tóg inh nĩgẽ kãgmĩ kỹ inh pére mũ mũ. Hã ki ẽg tóg Damasco tá junjun mũ sir.

¹² Kỹ ù tỹ Ananias he mũ ẽn tóg inh venh kãtĩ mũ. Moisés tỹ ẽg mỹ vãnh jykre nĩm ja ẽn han kãn tóg nĩgtĩ, Ananias ti. Damasco tá ke kar vỹ ti to vĩ há han mũgtĩ, Israel ẽn ag kar.

¹³ Ẽn tóg inh venh kãtĩ mũ, kỹ tóg iso jun kỹ inh mỹ: “régré'!” he mũ. “Saulo',” he tóg mũ. “Inh ki ẽvãnh ra,” he tóg. Kỹ sóg vễsỹmér ti vэг mũ sir.

¹⁴ Kỹ tóg inh mỹ: “ẽg jóg'jóg ag tỹ Topẽ vỹ ã kuprэг, vãsỹ,” he mũ, “ã tỹ ti jykre ki kanhró nĩ jé, ã tỹ ùn kuryj nĩ ẽn ve jé, Cristo ẽn. Ti hã tóg ã mré vĩnh mũ,” he tóg inh mỹ, Ananias ti.

¹⁵ “Á tỹ vãnh kar mỹ ã tỹ nén vэг mũ tónh ke vễ, ã tỹ nén mễg mũ ti,” he tóg inh mỹ.

¹⁶ “Kỹ ẽmẽ kỹ nĩ tũg nĩ. Jẽg nễ ra, ã tỹ kype kỹ jẽ jé, Topẽ tỹ ã tỹ ti vĩ mranh tỹ tũ' he jé. Ti mré vĩ, ti jiji tó kỹ,” he tóg inh mỹ, Ananias ti,” he tóg, Paulo ti.

Paulo tỹ ã rãnrãj kãmén

¹⁷ “Isỹ Jerusalém ra vỹn ke kỹ sóg Topẽ jo ãn krêm ti mré vĩ mũ. Kỹ sóg nén nễ vэг mũ.

¹⁸ Ti hã vễ, ẽg Senhor hã vễ. Kỹ tóg inh mỹ: “kur Jerusalém tá kutẽ,” he mũ. “Á vĩ mễnh ke tũ ag nĩ, ã tỹ ag mỹ inh kãmén mũ ra,” he tóg inh mỹ.

¹⁹ Kỹ sóg ẽg Senhor ti mỹ: “hã ra ag tóg isỹ nén han ja ki kanhró nỹtĩ,” he mũ. “Ag sigse han ja isóg tĩgtĩ. Vãnh kanhrãn jafã krêm sóg ag mrãnmrãn ja tĩgtĩ gé, ù tỹ ã ki ge kỹ nỹtĩ ag,” he sóg ti mỹ.

²⁰ “Kỹ sóg ag tỹ Estêvão tén kỹ, ag tỹ ù tỹ ã vĩ tó mũ ẽn tén kỹ sóg tá jẽ ja nĩ gé, kỹ tóg inh mỹ há ja tĩ, ag tỹ ti tén kỹ. Ag kur ki sóg rĩr ja nĩgtĩ gé, ù tỹ Estêvão tén mũ ag kur ki,” he sóg, ẽg Senhor mỹ.

²¹ Hã ra tóg inh mỹ: “vó, ha tĩg,” he mũ. “Kór há ra sóg ã jẽnẽnh mũ, kuvar há ra. Fóg kar to sóg ã jẽnẽnh mũ, kanhgág kar to ke gé,” he tóg inh mỹ,” he tóg, Paulo ti.

²² Hã ra vãnh kar ẽn ag tóg ẽmẽ kỹ nỹtĩ nĩ. Ag tỹ ti vĩ tag mẽ kỹ ag tóg prẽnprer mũ sir. “!..Ti tén ra..!” he ag tóg. “!..Ủ tỹ ge vỹ kórэг ne..!” he ag tóg. “!..Ti rĩr nĩn kỹ tóg ẽg mỹ tỹ ù nỹnh mo..!” he ag tóg.

²³ Prẽnprer ag tóg mũ. Ajag kur vãm ag tóg mũ, ga funfur han ag tóg mũ sir. Ag jũgũ vễ.

²⁴ Kỹ major vỹ: “ĩn kãra ti rãg,” he mũ. “Nén fãr tỹ ti mrãnmrãn, cavalo tỹ mrãn ke jafã ri ke ẽn tỹ. Hã tỹ ti ki jẽmẽ. Ag tỹ hẽ ri ke jé ã to vĩ kónãn nễ? hemnĩ ti mỹ,” he tóg, major ti, soldado ag mỹ. Major tóg Paulo tỹ ag mỹ nén tó ja ẽn mẽ ja tũ nĩ, ti tỹ Hebreu ag vĩ ki kagtĩg nĩn kỹ. Hã kỹ tóg soldado ag mỹ: “ti ki jẽmẽ,” he mũ sir.

²⁵ Kỹ ag tóg ti sэг mũ, nén fãr tỹ, ag tỹ ti mrãnmrãn jé. Hã ra Paulo tóg capitão mỹ, ù tỹ tá jẽ ẽn mỹ tóg: “mỹ ã mỹ kuryj, ag tỹ inh mrãnmrãn ke ti?” he mũ. “Tỹ sóg Romano nĩ, hã ra ag tóg nén fãr tỹ inh mrãnmrãn sór mũ, ù tỹ inh ki jẽmễg tũ ra, ag tỹ inh jyvẽn tũ ra,” he tóg, Paulo ti.

²⁶ Kỹ tóg capitão mỹ e tĩ, kỹ tóg major mỹ tónh tĩ mũ. Ti mỹ tóg: “ã tỹ ne han ke nễ ha?” he mũ. “Romano vễ mỹr,” he tóg ti mỹ.

²⁷ Kỹ major tóg ti to kãtĩ mũ, kỹ tóg ti mỹ: “kỹ ã mỹ tỹ Romano nĩ?” he mũ. Kỹ Paulo tóg: “hỹ,” he mũ.

²⁸ Kỹ major tóg ti mỹ: “isỹ tỹ Romano nĩ jé sóg jãnkamy tỹ hẽn ri ke tỹ kajãm,” he mũ

ti mǝ. Kǝ Paulo tóg ti mǝ: “inh mur kǝ sóg ge nǝ hǝ ra, inh panh ri kén,” he mǝ.

²⁹ Kǝ ag tóg ti tovǎnh mǝ sir, ũ tǝ ti mrǎnmrǎn ke mǝ ěn ag. Hǝ ra tóg major mǝ e tǝ, ti tǝ ti se kǝ. Ti tǝ ũn Romano senh ke tǝ vǝ vǝ, hǝ kǝ tóg ti mǝ e tǝ.

Israel tǝ pǎ'i ag tǝ Paulo vǝ mǝg mǝ

³⁰ Tǝ vaj kǝ major tóg Israel ag ki jǝmǝ mǎn sór mǝ, ag tǝ hǝ ri ke kǝ Paulo to jǝ mǝ ti. Kǝ tóg ti kavǎn mǝ. Kǝ tóg Topǝ tǝ ki rǝr tǝ to pǎ'i mág ag jé prǝr mǝ, vǝnh jyvǝn tǝ kar ag ke gé. Kǝ tóg Paulo pére tǝ mǝ, ag jo ti fǝg jé.

23

¹ Kǝ Paulo tóg vǝnh jyvǝn ti ag vég mǝ, kǝ tóg: “inh kanhkǎ!,” he mǝ. “Vǝnh jykre há kar han isóg nǝgtǝ (mǝr), kurǎ kar ki, ũri ke gé, isǝ Topǝ mǝ ěkrén kǝ,” he tóg.

² Kǝ Topǝ tǝ ki rǝr tǝ to pǎ'i mág tóg ke mǝ, ũ tǝ Ananias he mǝ ěn vǝ: “ti jǝnky ki tǎnh,” he mǝ, ti jy nǝtǝ ag mǝ.

³ Kǝ Paulo tóg ti mǝ: “Topǝ vǝ ģ tǎnh ke mǝ,” he mǝ. “Jykre régre ģ nǝ, kǝ ģ tóg tǝ ĩn to ró ri ke nǝ. ěg tǝ tinta kupri tǝ to tǝn kǝ ěg tóg ti kórég vég tǝ nǝgtǝ, tinta krǝm ti kórég ti,” he tóg. “Inh jyvǝn sór ģ tóg mǝ, Topǝ jykre ki, hǝ ra ģ hǝ tóg Topǝ jykre mranh, ģ tǝ ag mǝ: ti tǎnh ra, hen kǝ,” he tóg, Paulo ti.

⁴ Kǝ tá nǝtǝ ag tóg ti mǝ: “ģ hǝ tóg Topǝ camarada mǝ vǝ kónǎn, Topǝ tǝ ki rǝr tǝ to pǎ'i mág mǝ,” he mǝ, Paulo mǝ.

⁵ Kǝ Paulo tóg: “mǝ!,” he mǝ. “Ti tǝ tǝ pǎ'i mág nǝn ki sóg kagtǝg ja nǝ, ke tǝ nǝ mǝ ra sóg ti to vǝ kónǎn ja tǝ nǝ vǝ,” he tóg. “Topǝ vǝ ki tag tóg rán kǝ nǝ nǝ, hǝ vǝ: ģ povo tǝ pǎ'i mág to vǝ kónǎn tǝg nǝ, he mǝ,” he tóg, Paulo ti.

⁶ Hǝ ra Paulo tóg ag vég mǝ, vǝnh jyvǝn tǝ ag. ũ ag tóg tǝ Saduceu nǝtǝ, kǝ ũ ag tóg tǝ Fariseu nǝtǝ. Vyrmǝ ag jykre nǝtǝ. Kǝ Paulo tóg jamǎ hár(a) ke kǝ ag mǝ: “inh kanhkǎ!,” he mǝ. “Tǝ sóg Fariseu nǝ, kǝ inh panh tóg tǝ Fariseu nǝ gé,” he tóg. “Topǝ vǝ ũn ter mǝ ag rǝnrǝn mǎn ke mǝ. Tag vǝ inh mǝ ki hǝ ke nǝ, hǝ kǝ ģag tóg iso jǝgǝ mǝ,” he tóg, Paulo ti.

⁷ Ti tǝ tag tó kar kǝ vǝnh jyvǝn tǝ ag tóg vǝnh kǝpugpóv kǝ nǝtǝ. Fariseu ag tóg

Saduceu ag mré vǝ jǝgǝ han mǝ, jagnǝ vǝ kafǎn kǝ.

⁸ Saduceu ag mǝ tóg tǝ tǝ, Topǝ tǝ ěg ter mǝ rǝn mǎn mǝ ti. Topǝ tǝ jǝnǝ jafǎ tóg ag mǝ tǝ tǝ gé. Kǝ vǝnh kuprǝg tóg ag mǝ tǝ tǝ gé. Hǝ ra Fariseu ag mǝ tóg nǝtǝ, vǝnh kuprǝg, Topǝ tǝ jǝnǝ jafǎ, ti tǝ ěg rǝn mǎn mǝ ke gé. Hǝ kǝ ag tóg jagnǝ vǝ kafǎn mǝ sir.

⁹ Kǝ ag tóg jagnǝ to jǝgǝ kǝ prǝnprǝr mǝ. Fariseu ag kǎmǝ ũ ag tóg jǝg nǝ nǝ kǝ, Saduceu vǝ kafǎn kǝ ag tóg: “nén ũ kórég han tǝ ti nǝ, Paulo ti,” he mǝ. “Hǝn ri ke mǝn ti hǝn nén nǝ ve ja nǝ, vǝnh kuprǝg hǝn ri ke mǝn, ke tǝ nǝ kǝ Topǝ tǝ jǝnǝ jafǎ,” he ag tóg, Fariseu ag, Topǝ vǝ to professor ag.

¹⁰ Kǝ vǝnh génh tóg kutǝ mǝ ve nǝ. Kǝ major tóg Paulo to jykrén mǝ. “Ag hǝn gen kǝ ti janǝn ke mǝ, ti jónǝn kǝ,” he tóg, vǝnh génh ven kǝ. Kǝ tóg soldado ag mǝ: “kur mǝ jǝg, ti kǎgmǝ jé, ěg ĩn kǎra ti rǎg jé,” he mǝ, major ti. Kǝ ag tóg ĩn kǎra ti rǎg mǝ.

¹¹ Tǝ kuty kǝ Jesus tóg Paulo mré vǝ mǝ. “Kamǝg tǝg ra,” he tóg ti mǝ. “Jerusalém tá ģ tóg inh vǝ tó há han. Ge jé ģ tóg ke mǝ, cidade tǝ Roma tá,” he tóg, Paulo mǝ, Jesus ti.

Ag tǝ Paulo tén sór

¹² Tǝ vaj kǝ Israel ag tóg vǝnh mǎn mǝ sir. Jagnǝ mré ag tóg jykrén mǝ. “Paulo tén jé ěg tóg ke mǝ,” he ag tóg. “Jǝn ke tǝ ěg nǝ, kron ke tǝ ěg nǝ gé, ěg tǝ Paulo tén ke jo, ke tǝ nǝ mǝ ra Topǝ jé ěg vóg kónǎn,” he ag tóg.

¹³ ũ tǝ 40 (ke) kǎfór vǝ, jagnǝ mré jykrén mǝ ag.

¹⁴ ěn ag vǝ Topǝ tǝ ki rǝr tǝ to pǎ'i mág ag mré vǝnh kǎmǝ mǝ, kófa ag mré hǝ. “Jagnǝ mré ěg jykrén,” he ag tóg. “Nén ũ kǎmǝnh ke tǝ ěg nǝ, ěg tǝ Paulo tén ke jo, ke tǝ nǝ mǝ ra Topǝ jé ěg vóg kónǎn,” he ag tóg.

¹⁵ “Kǝ major mré vǝnh mǝmnǝ. Vǝnh jyvǝn tǝ ag mré mǝmnǝ, ģag tǝ ti mré vǝ jé. Ti mǝ: ěg tǝ ti tǝ nén ũ kórég han mǝ to jykrén mǎn ke vǝ, hemnǝ, hǝ to ěg mǝ ti ven mǎn nǝ, hemnǝ ti mǝ. Ti tǝ: hej, hen kǝ ěg tóg ti tén ke mǝ, kǝ tóg ģag to jun ke tǝ nǝ,” he ag tóg, pǎ'i ag mǝ.

¹⁶ Hǝ ra Paulo ve fi kósin tóg ag tǝ han sór mǝ ěn mǝg mǝ. Kǝ tóg soldado jo ĩn kǎra rǎ kǝ Paulo mǝ tó mǝ.

17 Kĩ Paulo tóg capitão ù jé prēr kĩ ti mĩ: “major mĩ kyrũ tag pére tĩg, ti tĩ ti mĩ nén ù tó jé,” he mũ ti mĩ.

18 Kĩ tóg ti pére tĩ mũ sir, major to. Kĩ tóg ti mĩ: “ù se kĩ jẽ ãn tóg, Paulo ãn tóg inh jé prēr,” he mũ, “kĩ tóg inh mĩ: “kyrũ tag tĩ major mĩ ti pére tĩg,” he mũ. Ti tĩ nĩji ã mré vĩ sór nẽ,” he tóg, capitão ti.

19 Kĩ major tóg ti nĩgé kãgmĩ kĩ ti pére tĩ mũ, vãnh péju kĩ. Kĩ tóg ti mĩ: “ã hẽ ri ké?” he mũ.

20 Kĩ tóg ti mĩ: “Israel ag tóg to jykrén, ag tĩ ã mĩ to vĩjé, ã tĩ vaj kĩ Paulo jẽnẽ jé, vãnh jyvẽn tĩ ag to. Ón kĩ ag tóg ã mĩ: “ti ve mãn jé ãg tóg ke mũ, ãg tĩ ti to jykrén mãn jé,” henh ke mũ. Hã ra ag ón vẽ,” he tóg, major mĩ.

21 “Ag mĩ: hej, he tũg nĩ. Û tĩ 49 (ke) ag tóg, ti jo vãjig mũ. Jagnẽ mré ag jykrén, ag tĩ nén ù konh ke tũ nĩ jé, kron ke tũ nĩ jé, ti tén ken jo. “Ke tũ nĩ mũ ra Topẽ jé ãg vóg kónãn,” he ag tóg. Ën ag tóg ã tĩ ag mĩ: hej, henh ke jãvãnh mũ sir,” he tóg, kyrũ ti, major mĩ.

22 Kĩ major tóg ti mĩ: “ù mĩ: ti mĩ sóg tó, he tũg nĩ,” he mũ. “Ha jatun mĩ tĩg,” he tóg ti mĩ.

Major tĩ Paulo jẽnẽnh ke, pã'i mág tĩ governador ra

23 Kĩ major tóg capitão régre ag mĩ: “kãmũ jẽg ra,” he mũ. Kĩ tóg ag mĩ: “ãjag tũ kãnkãn ra,” he mũ. “Cidade tĩ Cesaréia ra ãjag mũnh mũ, kuty tag kã 9 horas ki. Kĩ soldado tĩ 200 (ke) ag vỹ mũnh mũ, cavalo kri mũ ag tĩ 70 (ke) ag ke gé, kĩ ù tĩ 200 (ke) ù ag vỹ rógro pu gég mũnh mũ,” he tóg.

24 “Kĩ cavalo ù ag vỹ mũnh ke mũ gé, Paulo tĩ kri nĩ jé. Governador tĩ Félix to ti pére mũ jẽg, tĩ tĩ jatun mĩ tá jun jé,” he tóg, major ti, capitão ag mĩ.

25 Kĩ tóg pã'i mág tĩ Félix mĩ rán mũ, major ti, kĩ tóg:

26 “Cláudio Lísias tĩ rá vẽ,” he mũ. “Isỹ Governador tĩ Félix mĩ rán hã vẽ, ã tĩ inh kãfór nĩn kĩ. ã mĩ sóg: ã mĩ há? he mũ,” he tóg.

27 “Tag vỹ tĩ Israel ag vẽse jẽ. Ti tén kren ag tóg. Hã ra sóg ti tĩ tĩ Romano nĩ jẽmẽ, kĩ sóg inh soldado ag mré ti kren han.

28 Hã ra sóg ti kato tẽ mũ ag ki jẽmẽ sór mũ. Ag tĩ hẽ ri ke jé ti to jũgũ nẽ? he sóg. Hã kĩ sóg vãnh jyvẽn tĩ ag mĩ ti ven mũ.

29 Kĩ sóg vég mũ. Ag jykre tugrĩn ag tóg ti to jũgũ mũ. Crime han tũ ti nĩ. Ti tĩ nén ù to ter jé han tũ ti nĩ gé. Kĩ tóg ti tĩ nén ù to se kĩ nĩ jé tóg han tũ nĩ gé.

30 Hã ra sóg nén ù mẽ gé. Ti to ag tóg vãjig mũ sir, hã kĩ sóg vỹsýmér ti jẽnẽg mũ ã to. Ti kato vĩ mũ ag mĩ sóg: ti hã mré vĩmĩnĩ, he mũ gé,” he tóg.

Vãnh rá ki tóg tó ja nĩ, major ti, governador mĩ.

31 Kĩ soldado ag tóg han mũ sir, ti tĩ ag mĩ nén tó mũ ti. Paulo pére ag tóg mũ mũ. Kuty tá mũ kĩ ag tóg cidade tĩ Antipátride tá junjun mũ.

32 Tĩ vaj kĩ ag tóg kyrãgrã mũ, ãjag jamã ra, ù tĩ ãjag pẽn kã mũ mũ ag. Cavalo kri mũ ag tóg ti pére mũ mũ inhhã.

33 Ën ag vỹ Cesaréia tá junjun mũ. Governador mĩ ag tóg vãnh rá ãn nĩm mũ. Kĩ ag tóg ti mĩ Paulo ven mũ.

34 Kĩ pã'i mág ãn tóg vãnh rá vég mũ, kĩ tóg Paulo mĩ: “tĩ ã ga tĩ hẽ tá ke nĩ, ga tĩ ne tá?” he mũ. Kĩ tóg ti mĩ: “ga tĩ Cilícia tá,” he mũ.

35 Kĩ tóg Paulo mĩ: “ã kato vĩ mũ ag tĩ junjun kĩ sóg ã ki jẽmẽnũ,” he mũ. Kĩ tóg soldado ag mĩ: “pã'i mág tĩ Herodes tĩ vãnh jyvẽn jafã krẽm ti nĩm,” he mũ, pã'i mág tĩ Félix ti.

24

Ag tĩ Paulo kato vĩ

1 5 dias tũg kĩ pã'i tĩ Ananias vỹ tá jun mũ, cidade tĩ Cesaréia tá. Topẽ tũ ki rĩr tĩ to pã'i mág vẽ. Kófa ag vỹ junjun mũ gé ti mré. Û vỹ vĩ kãfór han tĩ gé, ti jiji hã vỹ: Tértulo, he mũ. Kĩ ag tóg pã'i mág tĩ governador mĩ Paulo tó mũ, ón kĩ ti kato vĩ kĩ.

2 Kĩ tóg Paulo jé prēr mũ.

Kĩ Tértulo tóg ti kato vĩ mũ, kĩ tóg: “Félix!” he mũ. “Hã tãvĩ ã tóg jẽ,” he tóg ti mĩ. “Ëg ki ã tóg rĩr há tãvĩ han tĩ, kĩ ãg tóg jatun mĩ nỹtĩ. ã tĩ nén to jykrén mũ kar tóg ãg mĩ há tĩ,” he tóg, Félix mĩ.

3 “Hã kȳ ãg tóg ã to há (pě) tävĩ nýtĩ. Ā to ãg jykrén há han tí. Kurã kar ki ãg tóg ã to vĩ há han tí,” he tóg.

4 “Kȳ ãg tóg ã mré nén ũ sĩ (pě) to vĩnh kãmũ mũ. Kutar ã nĩ, ãg ki rĩr há han kȳ, hã kȳ ãg tóg ã mẽ vĩmág han sór tũ nĩ. Āg to ã há nĩ, hã kȳ ã tóg ãg vĩ mẽ sór mũ,” he tóg.

5 “Tag ti vĩ vĩ kónãn tävĩ han tí. Israel kar ag krĩn kónãn tóg tí, kȳ ag tóg tí tugrĩn vãnh kãpugpów kȳ nýtĩ. Ga kar mũ tóg ke tí. Kȳ tóg tỹ Nazaré tá ke ģn mré ke ag pã'i mág nĩ gé,” he tóg. Paulo to tóg ke mũ.

6 “Kȳ tóg Topě jo ģn kãvėnh sór mũ gé, hã kȳ ãg tóg ti kãgmĩ. Āg tỹ ãg jykre ki ti jyvėn ke vė vė.

7 Hã ra Lísias tóg kãtĩ mũ, major ģn ti. Kȳ tóg ti kãgmĩg mũ. Āg kuju ki tóg ti tỹ hãn ke mũ, jũ kȳ.

8 Kȳ tóg ti kato vĩ mũ ag mẽ ké, ag tỹ ã vėnh kãmũ jé. Ā tỹ vėse tag ti ki jėmė kȳ ã tóg vėnh mũ. Ki hã ãg tóg ke tí. Ā mẽ ti tónh mũ,” he tóg, Tértulo ti. Ti tỹ Paulo to ón hã vė.

9 Kȳ Israel ag tóg ti mré tó mũ gé, pã'i ģn ag. “Ti tỹ ki hã ke vė,” he ag tóg, Tértulo to.

Paulo tỹ vėnh kãmėn

10 Kȳ governador tóg Paulo mẽ ã nĩgė tỹ ven mũ, Paulo vĩ jé. Kȳ Paulo tóg: “prỹg tỹ hėn ri ke ki ã tóg tỹ pã'i mág nĩ, Israel ag mẽ,” he mũ. “Hã kȳ tóg sỹ ã mẽ ģnh jykre tón kȳ tóg ģnh mẽ sér tí,” he tóg.

11 “Kurã tỹ 12 pãtėn tũ tóg nĩ, sỹ Jerusalém tá jun ti. Sỹ tá Topě tũ han jé sóg ra tĩg ja nĩgtĩ. Vėnh kar vĩ tá ģnh ve ja nĩgtĩ. Ag hỹn ã mẽ tónh mũ, ã tỹ ag ki jėmėn kȳ,” he tóg.

12 “Hã ra sóg jatun mẽ isũ han tí ja nĩ. Topě jo ģn krēm sóg ũ vĩ kafãn ja tũ nĩ. Vėnh génh han ja tũ sóg nĩ gé, ãg vėnh kanhrãn jafã krēm. Cidade ki sóg nén ũ kórég han ja tũ nĩ gé,” he tóg.

13 “Ag tỹ ģnh kato vĩ mũ pi(jé) tỹ ki hã ke nĩ'. Ā tỹ ve há nĩn kȳ ã tóg ki kanhró nĩnh mũ,” he tóg.

14 “Kȳ sóg ã mẽ ki hã tónh mũ ha,” he tóg. “ģnh jóg'jóg ag tỹ Topě jykre han tí ģn hã han isóg tí gé, kȳ sóg vãsỹ nén rán kȳ nĩ ģn kri fig tí gé, ũ tỹ Topě vĩ tó tí ag tỹ nén rán ja ģn ti, Moisés mré hã. Hã ra sóg vėnh jykre tãg tag han mũ gé, Topě tỹ ũri ģg mẽ nén tó

mũ ti. Tag to ag tóg: “vyr mẽ vėnh jykre vė,” he tí, pã'i ag.

15 Hã ra sóg ag ri kén Topě tỹ nén han ke ģn ve sór mũ. Ti tỹ ãg ter kar kȳ ãg rĩn mãn ģn ve sór isóg mũ. Ũn jykre kuryj ag rĩn mãn jé tóg ke mũ, ũn jykre pãno ag ke gé,” he tóg.

16 “Kȳ sóg tĩg há han sór mũ (mỹr), ũ tỹ iso: nén ũ kórég han ti huri, he tũ nĩn jé,” he tóg. “Topě rĩnve sóg tĩg há han sór mũ,” he tóg.

17 “Vãhã sóg Jerusalém tá jun mãn. Prỹg tỹ hėn ri ke ki sóg tá jun ja tũ nĩ vė. Hã ra sóg ra vyr, sỹ ģnh povo ki ũn jagãgtar fag mẽ nén ũ vin jé, sỹ Topě mẽ nén ũ pũn jé gé,” he tóg.

18 “Vėnh jãnhkrig ja sóg nĩ, ãg jykre ki. Kȳ sóg Topě jo ģn kãra rã ja nĩ, jatun mẽ, vėnh génh han tũ kȳ.

19 Hã ra Israel ag tỹ Āsia tá ke ag vĩ tá ģnh ve ja nĩgtĩ gé,” he tóg. “Ān ag tỹ ã jo nýtĩn kȳ, ag tỹ ģnh kato vĩ kȳ tóg há tí vė, ag tỹ iso jykrén mũ ra, ag tỹ iso jũ mũ ra,” he tóg.

20 “Hã ra ũ tỹ ki nýtĩ ag tỹ ã mẽ ģnh jykre kórég tónh ke vė. Vėnh jyvėn tí ag vĩ ģnh ki jėmė ja nĩ, kȳ tag ag vĩ tá nýtĩ ja nĩ. Hã ra ag tóg tá isỹ nén ũ vėnhmỹ han ve ja tũ nĩ,” he tóg.

21 “Vėnh vĩ pir tỹ sóg jamã hár(a) tó ja nĩ, isỹ ag rĩnve jėn kȳ, hã vĩ: Topě tỹ ũn ter mũ rĩn mãn mũ ģn kri sóg fig mũ, hã kȳ ãjag tóg ũri iso jũgũ mũ, he ja sóg nĩ ag mẽ,” he tóg, Paulo ti.

22 Kȳ Félix tóg kurã ũ kã ti ve mãn sór mũ, pã'i mág tỹ governador ģn ti. Jesus japry ki kanhró tóg nĩ, Jesus jamĩn ki, ti jykre ki, Félix ti. Hã kȳ tóg: “major tỹ Lísias kãtĩg kȳ sóg ãjag ki jėmė kãn mũ,” he mũ.

23 Kȳ tóg capitão mẽ: “ti fėg han ra,” he mũ. “Ti jagãgtãn ra hã ra,” he tóg. “Ti mré ke ag tỹ ti mẽ nén ũ nĩm sór kȳ tóg há nĩ. Ag mẽ nẻnh tũg nĩ,” he tóg, capitão mẽ, Félix ti. Ti tỹ Paulo to ken hã vė.

Félix tỹ Paulo ki jėmė mãn

24 Si há tũ ra Félix vĩ Paulo vĩ mẽ mãn sór mũ, ti prũ fi mré. Fi jyjy hã vĩ: Drusila, he mũ. Israel fi vė. Kȳ tóg Paulo jé prěr mũ sir, Félix ti, ti tỹ fag mẽ Jesus Cristo ki rã kãmén jé.

25 Kȳ Paulo tóg vėnh jykre kuryj kãmén mũ sir. Vėso jykrén ke kãmén tóg mũ. Topě tỹ kar kȳ vėnh kar tỹ nén han mũ tó tóg mũ.

Kỹ Félix tóg ã kanē tỹ jūrũn' ke mũ sir, ti tỹ ã jykre pãno mĩ ěkrén kỹ. Kỹ tóg ti mỹ: “ha ver tĩg,” he mũ. “Kejĕn sóg ã ki jĕmĕ mãn mũ gé, kar kỹ, inh kutar tũ nĩn kỹ,” he tóg, Félix ti, Paulo mỹ.

²⁶ Hã ra tóg Paulo ki jãnkamy mãn sór mũ gé, ti tỹ ti kavãn jé, ti tỹ ti kyvãn jé. Hã jé tóg kãnhmar ti jé prĕr mãn', kãnhmar ti jé prĕr mãn' he tĩ, ti mré vĕmĕn jé. Hã ra Paulo tóg ti mỹ ven tũg.

²⁷ Hã ki prỹg régre tóg tũg mũ sir. Kỹ Félix jĕgja kã ũ tóg jĕ mũ sir, hã vỹ: Pórcio Festo, he mũ. Kỹ Félix tóg Israel ag tỹ ã to vĩ há han sór mũ, ag tỹ ti tỹ jykrén há han jé, ti nón. Hã kỹ tóg Paulo kavãg tũ nĩ. Se kỹ tóg jĕ nĩ.

25

Paulo tỹ pã'i mág tỹ Imperador ve sór

¹ Hã kỹ Festo vỹ tỹ governador nĩ sir. Ti tỹ 3 (ke) dias ěn kã pã'i mág nĩn kỹ tóg cidade tỹ Cesaréia tá kutĕ kỹ cidade tỹ Jerusalém ra tĩ mũ.

² Kỹ Topĕ tũ ki rĩr tĩ to pã'i mág ag vỹ Israel há ag mré vĩ mág han mũ, Paulo kato. Kỹ ag tóg governador mỹ nén ũ to vĩ mũ.

³ “Ã tỹ ěg to há nĩn kỹ vĕnh vĩ jĕnĕmnĩ, Paulo tỹ Jerusalém mĩ kãtĩg jé, ěg mĩ,” he ag tóg ti mỹ. Hã ra ag tóg ti kãtĩg kỹ ti tén sór mũ, ěpry kri, ěmĩn kri.

⁴ Hã ra Festo tóg ag mỹ: “Cesaréia tá tóg se kỹ jĕ, Paulo ti,” he mũ. “Jó sóg kãnhmar ra tĩg mũ gé,” he tóg.

⁵ “Kỹ ãjag pã'i ag vỹ inh mré mũnh mũ gé. Tá sóg ãjag mré ti venh mũ, ti tỹ hĕn ri ke mũn nén ũ kórég han ja ěn ti,” he tóg.

⁶ Kỹ tóg tá nĩ sĩ han mũ sir, 8 (ke) dias hỹn hĕn ri ke mũn, ke tũ nĩ kỹ 10 (ke) dias hỹn. Kỹ tóg Cesaréia ra vỹn ke mãn mũ. Tỹ vaj kỹ tóg ã tỹ kri nĩn kỹ ag jyvĕn jafã kri nĩ mũ. Kỹ tóg soldado mỹ: “Paulo pére kãtĩ,” he mũ.

⁷ Ti katĩg kỹ Israel ag tóg ti jy nỹtĩ, Jerusalém tá kãmũ ag. Paulo kato ag tóg vĩ tỹ hĕn ri ke han mũ. Ti jykre pãno tugtó ag tóg mũ sir, ón kỹ, hã ra tóg ag mỹ ki krov tũ nĩ.

⁸ Kỹ Paulo tóg vĕnh kãmĕn mũ sir, kỹ tóg: “Israel ag jykre mranh ja tũ sóg nĩ,” he mũ. “Topĕ jo ĩn kavĕnh ja tũ sóg nĩ gé. Kỹ sóg ěg

kar pã'i mág tỹ Imperador vĩ mranh ja tũ nĩ gé,” he tóg, Paulo ti.

⁹ Hã ra Festo tóg Israel ag mỹ nén ũ há han sór mũ. Hã kỹ tóg Paulo mỹ: “mỹ ã tỹ Jerusalém ra tĩg jé há?” he mũ. “Sỹ tá ã jykre venh há tóg tĩ, ag tỹ ã kato vĩ ti,” he tóg, Festo ti.

¹⁰ Hã ra tóg Paulo mỹ ag tỹ tá ti tén ha mĕ tĩ, hã kỹ tóg: “ne jé,” he mũ. “Ěg pã'i mág tỹ Imperador jĕgja kã ã tóg inh ki jĕmĕg mũ,” he tóg. “Hã kỹ ã tỹ tag ki inh jykre venh ke vĕ,” he tóg. “Israel ag to sóg jykre pãno han ja tũ nĩ (mỹr). Kỹ ã tóg ki kanhró nĩ (mỹr), ha mĕ,” he tóg.

¹¹ “Isỹ crime han ra isỹ to ter ke vĕ vĕ. Kỹ sóg ne tónh ke tũ nĩ vĕ. Hã ra ag tóg ón kỹ inh kato vĩ mũ sir. Hã kỹ tóg ã tỹ ag mỹ inh fĕg kỹ vĕnhmỹ tĩ. ã tỹ ag mỹ nén há han sór vĕ (mỹr), hã kỹ ã tóg ag mỹ ke mũ. Ěg pã'i tỹ Imperador hã tóg ã pin kỹ inh jykre venh ke mũ,” he tóg, Paulo ti.

¹² Kỹ Festo tóg ã mré jykrén mũ ag mré vĩ mũ, kỹ tóg Paulo mỹ: “ã tỹ Imperador ve sór kỹ ã tóg Imperador venh tĩg mũ, cidade tỹ Roma ra,” he mũ, Paulo mỹ.

Pã'i tỹ Agripa tỹ Paulo mré vĩ

¹³ Si há tũ ra Israel ag pã'i mág tỹ Agripa vỹ cidade tỹ Cesaréia tá jun mũ, ti prũ tỹ Berenice fi mré. Fag tỹ Festo to pygsa ke vĕ.

¹⁴ Tá fag tóg kurã pir tũg mũ. Kỹ Festo tóg ti mỹ Paulo kãmĕn mũ. Kỹ tóg ti mỹ: “Félix vỹ vĕse ũ kavãn ja tũ nĩ,” he mũ.

¹⁵ “Kỹ Topĕ tũ ki rĩr tĩ to pã'i mág ag tóg inh mỹ ti kãmĕn, Israel ag kófa ag ke gé. Jerusalém tá ag tóg inh mré ti kato vĩ, isỹ ag mỹ: té, ha ti vóg kónãn, he jé,” he tóg.

¹⁶ “Kỹ sóg ag mỹ: ěg jykre tóg ge tũ nĩ, he mũ. Ěg pi(jé): ti tén ra, hĕnh mũ', kãnhmar', he sóg. Ti kato vĩ mũ ag tỹ ti kato nỹtĩn kỹ tóg vĕnh kãmĕn tĩ, vĕse ti. Kar ěg tóg ti vóg kónãn tĩ sir. Romano jykrén hã vĕ, he sóg ag mỹ,” he tóg Festo ti.

¹⁷ “Hã kỹ ag tóg tag ki vĕnh mãn mũ. Kỹ sóg vĕsỹmĕr ag vég mũ, tỹ vaj kỹ. Inh nĩg jafã kri nĩ kỹ sóg Paulo jé prĕr mũ,” he tóg.

¹⁸ “Kỹ ag tóg ti kato vĩ mũ. Hã ra ag tóg isỹ nén to jykrén mũ tó tũ nĩgtĩ (mỹr), ti jykre kórég ti,” he tóg.

19 “Ag Topē jykre tó ag tóg mũ. Ûn ter mũ tó ag tóg mũ, ag tỹ ùn to: Jesus, he mũ ên ti. Hã ra Paulo tóg ti to: rĩr ti jẽ nĩ, he mũ,” he tóg.

20 “Kỹ sỹ ne to jykrén ke tóg tũ tĩ inh mỹ. Kỹ sóg Paulo mỹ: ã mỹ Jerusalém ra tĩg ke tũ nĩ? he mũ. Tá ag tóg ã jyvẽn há han mũ sir, he sóg ti mỹ,” he tóg.

21 “Hã ra Paulo tóg ẽg pã'i mág tỹ Imperador ve sór mũ, ti tỹ ti jykre ve jé. Hã kỹ sóg soldado ag mỹ: ti fẽg han ra, he mũ. Kejẽn sóg Imperador ra ti jẽnẽn mũ, he sóg ag mỹ,” he tóg, Festo ti, pã'i tỹ Agripa mỹ.

22 Kỹ Agripa vỹ Festo mỹ: “sỹ ti vỹ mẽnh hã tóg ti,” he mũ.

Kỹ Festo tóg: “vaj kỹ ã tóg ti vỹ mẽnh mũ,” he mũ

23 Tỹ vaj kỹ Agripa vỹ kãtĩ mũ, Berenice fi mré. Kur sĩnvĩ rĩnh kỹ fag nỹtĩ, pã'i mág kur ti. Tenente ag mré fag tóg kãmũ mũ, ùn kãfór ag mré ke gé, cidade ên tá ke ag. Ìn mág kãra ag tóg ge mũ. Kỹ Festo tóg Paulo jé prẽr mũ sir. Kỹ ag tóg ti péré kãmũ mũ.

24 Kỹ Festo vỹ: “pã'i tỹ Agripa',” he mũ. “Tag ki ke kar',” he tóg. “Tag ti ve ra ha,” he tóg. “Israel kar ag tóg Jerusalém tá inh mré ti to vỹ. Tag ki ag tóg inh mré vỹ mũ gé ti to. Prẽnrẽr ag tóg, ti ter jé,” he tóg.

25 “Hã ra sóg vég mũ. Nén ù vẽnhmỹ han tũ tóg nĩ, ti tỹ to ter jé. Kỹ tóg pã'i mág tỹ Imperador ve sór mũ, hã kỹ sóg to jykrén mũ. Sỹ ti jẽnẽn ke vỹ,” he tóg.

26 “Hã ra sóg ti to nén rán ke ki kagtĩg nĩ ver, sỹ Imperador mỹ nén rán jé. Hã kỹ sóg ti jé prẽr, ãjag tỹ ti ve jé, ã tỹ ti ve jé, pã'i tỹ Agripa',” he tóg. “Ãjag tỹ ti ki jẽmẽ kỹ sóg sỹ nén rán ke ki kanhró nĩnh mũ,” he tóg.

27 “Sỹ nén rán tũ ra ti jẽnẽ kỹ tóg vẽnhmỹ nỹnh mũ, sỹ ag tỹ ti kato nén tó mũ ên rán tũ ra,” he tóg, Festo ti.

26

Paulo tỹ vẽn kãmén mãn

1 Kỹ Agripa vỹ Paulo mỹ: “ã tỹ vẽn kãmén kỹ tóg há tĩ,” he mũ. Kỹ Paulo tóg ã nĩgẽ tỹ krỹg he mũ, kỹ tóg: “pã'i Agripa',” he mũ.

2 “Ã hã ne tóg Israel jykre kar ki kanhró nĩ'. Hã kỹ tóg inh mỹ há tĩ, sỹ ùri ã jy vỹ kỹ,” he tóg.

3 “Israel ag tỹ inh kato vỹ mũ to sóg kãmén kãn sór mũ ã mỹ,” he tóg. “Hã kỹ jatun mỹ inh vỹ jẽmẽnĩ,” he tóg.

4 “Israel kar vỹ inh ki kanhró nỹtĩ, vãsỹ, isĩ kã, isỹ inh mur ja tá nĩn kã, isỹ kar kỹ Jerusalém tá nĩn kỹ ke gé,” he tóg.

5 “Isĩ kã sóg ẽg jykre han kãn mũ, tag ki kanhró ag nỹtĩ, ag tỹ tó sór kỹ,” he tóg. “Tỹ sóg Fariseu nĩ (mỹr), jó Fariseu ag vỹ ẽg jykre kar to tar nỹtĩ (mỹr),” he tóg.

6 “Hã ra ag tóg inh kato vỹ mũ. Topē vỹ ẽg jóg'jóg ag mỹ: “rĩr mãn jé ãjag tóg ke mũ, ãjag ter kỹ,” he ja nĩgtĩ. Ti vỹ tag kri sóg fig mũ, hã kỹ ag tóg inh kato vỹ mũ,” he tóg.

7 “Povo tỹ 12 (ke) vỹ tỹ ẽg nỹtĩ. Ẽg kar vỹ Topē jykre hyn han tĩ, kuty ki, kurã ki ke gé. Ẽg tỹ ter kar rĩr mãn jé, hã jé ẽg tóg ke tĩ, hã jé ẽg tóg Topē jykre han tĩ, pã'i tỹ Agripa',” he tóg. “Sỹ Topē tỹ ẽg mỹ tag tó kri fi kỹ Israel ag tóg inh kato vỹ mũ,” he tóg.

8 “Mỹ ãjag mỹ vẽnhmỹ, Topē tỹ ùn ter kar rĩn mãn ke ti?” he tóg. “Vẽnhmỹ ke tũg nĩ,” he tóg, Paulo ti.

9 “Hã ra sóg vãsỹ Jesus kato tẽ ja nĩ gé. Nazaré tá ke ên mré ke ag vóg kónãn jagy han ja sóg nĩ vỹ, vãsỹ,” he tóg.

10 “Jerusalém tá sóg ke ja nĩgtĩ. Jesus tũ ag sigse ja sóg nĩgtĩ gé. Topē tũ ki rĩr tĩ to pã'i mág ag vỹ inh mỹ tag to permissão han ja nĩgtĩ gé,” he tóg. “Ag tỹ Jesus mré ke ag kãmĩ ù tén kỹ tóg inh mỹ há ja tĩgtĩ gé,” he tóg.

11 “Ẽg vẽn kanhrãn jafã krẽm isóg ag vóg kónãn ja nĩgtĩ gé, ag tỹ Jesus ki ge tag tovãnh jé, ag tỹ ti mỹ vỹ kónãn jé. Ag to sóg jũ tãvĩ ja nĩgtĩ gé, inh fe tỹ gỹm ken kỹ. Kỹ sóg cidade ù ra ag nón tĩg ja nĩgtĩ gé, ag vóg kónãn jé,” he tóg.

Paulo tỹ ã tỹ Jesus ki rã kãmén (Hk 9.1-19; 22.6-16)

12 “Hã kỹ sóg cidade tỹ Damasco ra tĩg ja nĩ gé. Topē tũ ki rĩr tĩ to pã'i mág ag vỹ inh mỹ permissão han ja nĩgtĩ, inh mỹ: ha tĩg, hen kỹ.

13 Ẽpyr jagma sóg meio dia ki jẽngrẽ tar vé, kanhkã tá. Rã kãfór vỹ, ha mé, pã'i,” he tóg. “Jẽngrẽ ên vỹ inh ki kómkóm ké, inh mré mũ ag ki ke gé.

14 Kỹ ẽg kar vỹ vár mũ, ga kri. Kỹ sóg vẽn vỹ mẽ. Inh mré tóg vỹ, Hebreu vỹ ki, kỹ tóg

inh mÿ: “Saulo', Saulo',” he mÿ. “Ā hã ne tóg isÿ ag vóg kónãn nĩ,” he tóg inh mÿ. “Ā vóg isóg mÿ, ka junun kri ferro ên tÿ, monh vóg jafã ên tÿ. Kÿ tóg ã tÿ inh kato nig kÿ, ã tÿ ka kato vãsãn kÿ tóg kaga mág tĩnh mÿ,” he tóg inh mÿ, vënh vĩ tĩ,” he tóg, Paulo ti.

15 “Kÿ sóg êg Senhor mÿ: “ã tÿ ù nẽ?” he mÿ. Kÿ tóg inh mÿ: “tÿ sóg Jesus nĩ,” he mÿ. “Ā tÿ ùn vóg kónãn sór tĩ ên vÿ tÿ inh nĩ,” he tóg inh mÿ.

16 “Jëg ra, vënh rã hã jëg,” he tóg. “Ā mÿ sóg vënh ven, ã tÿ isÿ han jé, ã tÿ nén vëg mÿ tag tó jé. Ā mÿ sóg vënh ven mãn ke mÿ gé, kejën. Tag kar tó jé ã tóg ke mÿ,” he tóg inh mÿ.

17 “Ā povo mÿ sóg ã jënënh mÿ, fóg kar ag mÿ ke gé, kanhgág kar ag mÿ ke gé. Hã ra sóg ã jy nĩgãn mÿ,” he tóg inh mÿ.

18 “Ag kanë nugnón sór inh mÿ (mÿr). Ag tÿ vënh jykre pãno han kÿ tóg ag kãki kuty nĩ sir, hã ra sóg ag kãki jëngrë han sór mÿ. Satanás krëm ag nÿtĩ, Japo krëm. Hã ra sóg ag kygvãn sór mÿ, ag tÿ inh jykre han jé. Ag tÿ inh vĩ mranh tÿ sóg vënh pãte fón sór ke mÿ (mÿr), ag tÿ ù tÿ inh ki ge kÿ nÿtĩ ag mré kanhkã tá nÿtĩnh ken jé, isÿ ùn kuprëg kar ag mré hã,” he tóg inh mÿ, Jesus ti,” he tóg, Paulo ti.

Paulo tÿ ã rãnrãj kãmén

19 “Kÿ sóg ti vĩ mranh tũ nĩ, pã'i tÿ Agripa',” he tóg. “Kanhkã tá nĩ kÿ tóg inh mré vĩ ja nĩ, Jesus ti, kÿ sóg ti vĩ han.

20 Damasco tá ke ag mÿ sóg tó vén, kar Jerusalém tá ke ag mÿ ke gé, ga tÿ Judéia tá ke ag kar mÿ ke gé. Israel kar ag mÿ sóg tó mÿ, kar sóg fóg ag mÿ tó mÿ gé sir, kanhgág ag mÿ ke gé. Ag mÿ sóg tó, ag tÿ ãjag jykre tovãnh jé, ag tÿ Topë jykre han jé sir, ag tÿ vënh jykre kuryj han jé, vënh kar tÿ ag tÿ ãjag jykre tovãnh ve jé,” he tóg, Paulo ti.

21 “Isÿ tag han to Israel ag tóg Topë jo ïn krëm inh kãgmĩ ja nĩgtĩ, isén jé,” he tóg.

22 “Hã ra Topë tóg inh jy nĩgãn mÿ. Hã kÿ sóg ùri jë mÿ. Ti vĩ tó inh mÿ (mÿr), ùn mág ag mÿ, ùn kãsir ag mÿ ke gé. Vãsÿ Topë vĩ tó tĩ ag tóg tó ja nĩgtĩ, isÿ nén tó mÿ tag, Moisés mré hã,” he tóg.

23 “Cristo jagtar ke tó ja ag tóg nĩgtĩ. Ā ter kar rĩr vén ke ti, êg jo, he ja ag tóg nĩgtĩ,

Cristo to. Kÿ tóg êg povo mÿ jëngrëg tĩ ên ri ke nĩ sir, fóg kar ag mÿ ke gé, kanhgág kar ag mÿ ke gé,” he tóg, Paulo ti.

24 Paulo tÿ gen kÿ tóg Festo mÿ e tĩ sir, Paulo tÿ vënh kãmén kÿ. Kÿ Festo tóg jamã hár(a): “krĩ tũ ã nĩ, Paulo',” he mÿ. “Ā tÿ vënh rá ve mág kÿ tóg ã krĩ tũ (pë) tĩ,” he tóg, Festo ti.

25 Hã ra tóg ti mÿ: “inh krĩ vÿ há nĩ, Festo',” he mÿ. “Há tâvĩ ã jë nĩ vÿ,” he tóg ti mÿ. “Hã ra sóg ki hã tó mÿ (mÿr), to jykrén há han kÿ,” he tóg.

26 “Tag kã nĩ vÿ ki kanhró nĩ, pã'i tÿ Agripa tag ti. Hã kÿ sóg ti ve kÿ mÿ'ãg tũ nĩ. Tó kãn sóg mÿ. Më ti huri, ki kanhró tóg nĩ. Vënh kar tóg më kãn tĩ ha,” he tóg.

27 “Pã'i tÿ Agripa',” he tóg. “Ā mÿ Topë vĩ tó tĩ ag tÿ nén tó mÿ kri fig mÿ'?” he tóg. “Kri nĩm ã tóg mÿ, ki kanhró sóg nĩ,” he tóg.

28 Kÿ Agripa tóg Paulo mÿ: “vëme sÿ tÿ ã mÿ isÿ Cristo ki rã han sór mÿ'?” he mÿ.

29 Kÿ Paulo tóg ti mÿ: “hÿ,” he mÿ. “Hã to sóg Topë mré vĩ mÿ,” he tóg. “Ā tÿ vëme sÿ hã ki Jesus ki rãnh ken kÿ tóg há tĩ vë, ke tũ nĩ kÿ vëme mág ki. Ā tÿ inh ri kén ke kÿ tóg há tĩ vë, ã, ã mré inh vĩ mëg mÿ ag ke gé. Isÿ se kÿ jë tag hã to sóg ã mÿ: inh ri kemnĩ, henh ke tũ nĩ,” he tóg, Paulo ti.

30 Kÿ pã'i tÿ Agripa vÿ jëg nẽ mÿ sir, governador ke gé, Berenice fi ke gé, ag mré nÿtĩ kar ag ke gé.

31 Kÿ ag tóg kãpa mÿ. Kÿ ag tóg jagnë mré vĩ mÿ. “Nén ù kórég han tũ ti nĩ,” he ag tóg. “Véké tóg se kÿ jë. Ā tÿ nén han tũ to tóg ter ke tũ nĩ,” he ag tóg.

32 Kÿ Agripa tóg Festo mÿ: “ti tÿ kyvar kÿ jë hã vë vë, hã ra tóg pã'i mág tÿ Imperador ve sór mÿ,” he tóg mÿ.

27

Cidade tÿ Roma ra

1 Hã kÿ Festo tóg kejën Paulo mÿ: “ã tÿ ga tÿ Itália ra tĩg ke nẽ ha,” he mÿ. Kÿ tóg pã'i mÿ ti fëg mÿ. Soldado ag capitão vë, pã'i ên ti. Û tÿ Imperador mré ke ag he mÿ ên capitão vë. Ti jiji hã vÿ: Júlio, he mÿ. Ti mÿ ag tóg vëse ù ag vin mÿ gé.

2 Kÿ êg tóg canoa mág kãra ge mÿ sir. Cidade tÿ Adramítio tá ke vë, canoa mág

ĕn ti. Ag tỹ ga tỹ Āsia fyr to mũ sór vĕ, canoa kāmĩ. Kỹ ĕg tóg goj kāmĩ mũ mũ, tá pa kỹ. Aristarco tóg ĕg mré tĩ mũ, cidade tỹ Tessalônica tá ke ĕn ti, ga tỹ Macedônia tá ke ĕn ti.

³ Tỹ vaj kỹ ĕg tóg cidade tỹ Sidom tá krỹg mũ sir. Kỹ Júlio tóg Paulo mỹ vĩ há han mũ. Kỹ tóg ti mỹ: “ã mré ke ag venh tĩg, ag tỹ ã ki rĩr jé,” he mũ.

⁴ Tá pa kỹ kĀka tóg ĕg kato tĕ mũ. Kỹ ĕg tóg goj vĀso tỹ Chipre kakĀm mũ mũ, ti tỹ ĕg jakĀnh tá nĩn kỹ.

⁵ Kỹ ĕg tóg goj kafĀ tũ kāmĩ mũ mũ, ga tỹ Cilícias fyr to, ga tỹ Panfília fyr to ke gé. Kỹ ĕg tóg cidade tỹ Mirra tá junjun mũ sir, ga tỹ Lícia tá.

⁶ Tá capitĀo tóg canoa mág ũ vĕg mũ, cidade tỹ Alexandria tá canoa, ũ tỹ ga tỹ ItĀlia ra tĩ mũ ĕn. Kỹ tóg ĕg mỹ: “kĀ ge jĕg,” he mũ, capitĀo ti.

⁷ Kāmĩ ĕg tóg mũ mũ. Komĕr hĀ ĕg tóg mũ mũ, kurĀ tỹ hĕn ri ke ki. Kỹ ĕg tóg vĀhĀ goj vĀso tỹ Cnido tá junjun mũ. HĀ ra kĀka tóg ĕg kato tĕ mũ gé. Kỹ ĕg tóg tá fĩn rĀm tũ nĩgtĩ. Kỹ ĕg tóg goj vĀso tỹ Creta kakĀm mũ mũ, kĀka tỹ ĕg tỹ vĩrĩn ke kỹ. Krĩ tỹ Salmona kakĀm mũ ĕg tóg mũ, kĀka krĕfĩn.

⁸ Kāmĩ tĩg tóg jagy tĩ, Creta fyr to hĀ tĩg kỹ. Kỹ ĕg tóg vĀhĀ komĕr hĀ ĕg tóg canoa sag ja há he mũ tá junjun mũ. Cidade ũ vĩ tá kakó nĩ, ti jyjy hĀ vĩ: Laséia, he mũ.

⁹ HĀ ra ĕg tóg komĕr hĀ mũ ja nĩgtĩ, hĀ kỹ kusa tóg kakó tĩ ha. Kỹ tóg goj kāmĩ tĩg kórég nĩ, kóho tugrĩn. Festa ũ pĀtén tóg hurĩ, Israel ag vĀkre jafĀ ti. HĀ kỹ Paulo tóg ag jyvĕn kỹ:

¹⁰ “goj tóg kāmĩ tĩg kórég tĩ ha, vĩ,” he mũ. “Kỹ ĕg tóg jagĀgtar mũ ha. Kỹ tóg inh mỹ canoa tỹ nĩninh mỹ tĩg ha mĕ tĩ, kỹ Ājag tũ vĩ vĀgfor mũ sir, jó ĕg hĕn ri ke mũn kĀgter ke mũ gé,” he tóg, Paulo ti.

¹¹ HĀ ra capitĀo tóg canoa tỹ ũ tũn mũn vĩ mĕg mũ sir. Canoa vóg mũ vĩ mĕg tóg mũ gé, hĀ kỹ tóg Paulo vĩ mĕg tũ nĩ sir.

¹² Canoa sag ja ĕn tóg há sĩ nĩ, hĀ kỹ ag tóg tá kusa fĩn pa vĀnh nỹtĩ. HĀ kỹ ũn e ag tóg tá pa sór mũ, ag tỹ cidade tỹ Fenice tá junjun jé, tá kusa fĩn pa jé. Goj vĀso tỹ Creta tá cidade ũ vĕ, canoa sag ja ũ vĕ, Fenice ti.

Tá rĀ krĕfĩn tá kĀka vĩ króg he tũ nĩgtĩ. HĀ kỹ ag tóg ra mũ sór mũ sir.

Kóho mág

¹³ HĀ ra kĀka sĩ tóg komĕr hĀ kraug he mũ sir. Kỹ tóg ag mỹ há tĩ. HĀ kỹ ĕg tóg tá pa kỹ Creta fyr ra mũ mũ sir, Creta fyr kakó ra, goj kāmĩ mũn kỹ.

¹⁴ VĀhĀ kóho jũ tóg canoa kato tĕ mũ sir, ti jiji hĀ vĩ: Nordeste, he mũ. Creta tán kĀtĩ mũ.

¹⁵ HĀ ra ĕg tóg kóho jũ tag kato canoa vóg tỹ hĕ ri ke tũ nĩ, kỹ ĕg tóg ti vóg tovĀnh mũ sir. Kỹ kóho tóg canoa va tĩ mũ.

¹⁶ Kỹ ĕg tóg goj vĀso sĩ to hĀ mũ mũ, ti jyjy hĀ vĩ: Cauda, he mũ. HĀ ra ĕg tóg canoa sĩ nỹgnỹn kĀmũ ja nĩ, ti se kỹ. Cauda tá ĕg tóg canoa mág kri ti fi han sór mũ, hĀ ra ĕg tóg to jagĀgtar mũ, kóho to.

¹⁷ VĀhĀ ag tóg ti kĀtĀnfyn mũ, canoa vóg tĩ ag. Kar ag tóg canoa mág tógfĩn mũ, ti tỹ vĀm ke tũ nĩ jé. HĀ ra ag tóg rỹnhřỹj kamĕg mũ, rỹnhřỹj tỹ Sirte he mũ ĕn, ga tỹ Líbia fyr tá. HĀ kỹ ag tóg kur kunũg mũ sir. Kur ĕn vĩ canoa kri sag tĩ, kĀka tỹ ti tĩn jé. ĕn kunũg ag tóg mũ sir.

¹⁸ HĀ ra ĕg tóg kóho jũ to jagĀgtar' he mũ, kỹ ag tóg tỹ vaj kỹ canoa tỹ rĩg mũ ĕn kuju vĀm mũ sir, goj ki, ti kufy vĕnh kĀpĀm ag tóg mũ sir.

¹⁹ Tỹ vaj ũn kỹ ĕg tóg jagĀgtar tĀvĩ nỹtĩ, kỹ ĕg tóg vĀvĀm kĀn mũ sir, canoa kĀki nỹtĩ ĕn, ti tralha ti. ĕg kar tóg ag mré vĀvĀm mũ sir.

²⁰ KurĀ tỹ hĕn ri ke ki ĕg tóg rĀ vĕg tũ (pĕ) nĩ, krĩg ke gé. Kóho jũ ĕn tóg ĕg kato tĕ mũ. Kỹ tóg ĕg mỹ ĕg kĀgter ha mĕ tĩ. “ĕg hỹn krenkren ke tũ nĩ ha,” he ĕg tóg.

²¹ HĀ ra ĕg tóg jĕg tũ (pĕ) ja nĩ, kurĀ tỹ hĕn ri ke ki. Kỹ Paulo tóg ag to tĩg kỹ: “Ājag tỹ inh vĩ kri finh ke vĕ vĕ,” he mũ. “ĕg tỹ Creta tá kĀpa tũ nĩ ra ĕg jagĕgtar tũ nĩnh ke vĕ vĕ, kỹ Ājag tỹ nĕn ũ kren tũ nĩnh ke vĕ vĕ,” he tóg.

²² “HĀ ra Ājag fe ti tỹ rỹnh kemnĩ. ĕg kar vĩ krenkren mũ. Canoa hĀ vĩ tũ' henh mũ,” he tóg.

²³ “Kuty tag kĀ Topĕ tỹ jĕnĕ jafĀ tóg inh mré vĩ mũ. Inh Senhor hĀ vĕ, ũ tỹ ti jĕnĕg mũ ti, hĀ vĩ: Topĕ, he mũ,” he tóg.

²⁴ “Ti tỹ jĕnĕ jafĀ tóg inh mỹ: “kamĕg tũg nĩ, Paulo’,” he mũ. “PĀ'i mág tỹ Imperador

ve jé ã tóg ke mũ, kÿ Topê tóg ã mré mũ ag kar vin, ag tÿ ã mré krenkren jé,” he tóg inh mÿ,” he tóg, Paulo ti.

25 “Kÿ ãjag fe ti tÿ há' hemnĩ. Topê vĩ kri sóg fig mũ. Ti tÿ inh mÿ tó mũ vÿ ge nĩnh mũ,” he tóg, Paulo ti.

26 “Jó ãg tÿ canoa tÿ goj vãso to tĩn há tóg tĩ,” he tóg.

27 Semana régre vè sir, ãg tÿ goj kafãn tũ mĩ mũ kri, kóho tÿ ãg ran tĩ ki. Goj kafã tũ ãn jiji hã vÿ: Mediterrâneo, he mũ. Meio noite ki canoa vóg tĩ ag tóg: “ga hÿn kakó nĩ ha,” he mũ.

28 Kÿ ag tóg goj kãmun mũ sir. Kÿ tóg 36 (ke) metros he mũ. Kãnhmar ag tóg kãmun mãn, kÿ tóg 27 (ke) metros he mũ sir.

29 Kÿ ag tóg pãró kamẽg mũ, ãg tÿ ag mÿ kã ta kenh ha mẽ tĩn kÿ. Kÿ ag tóg canoa nér tá ti se jafã tÿ 4 (ke) vin mũ. Ferro ù vè, ti se jafã ti. Ti tÿ rÿnhÿj kãkã nÿ kÿ canoa tóg tá krÿg he mũ. Ti vin kÿ tóg ag tÿ kurã venh há tĩ, canoa vóg tĩ ag.

30 Kÿ ag tóg canoa sĩ ãn térem mũ, goj ki. Canoa se jafã tÿ ag tóg kãki vin mũ, ag tÿ ón kÿ canoa krĩ tá vin jé. Hã ra ag tóg canoa mág ré kÿ ga ra mũ sór mũ.

31 Hã ra Paulo tóg vég mũ. Kÿ tóg capitão mÿ, soldado ag mÿ tóg: “ag tÿ pa kÿ ãjag vÿ krenkren ke tũ nĩ,” he mũ.

32 Kÿ soldado ag tóg vãfe kym mũ sir, ag tÿ vãfe tÿ canoa sĩ térem kÿ. Kÿ canoa sĩ ãn tóg kutẽ mũ sir.

33 Tÿ vaj ken kÿ Paulo tóg vènh kar jyvèn mũ, ag jèn jé. Kÿ tóg: “semana régre vè (mÿr), ãjag fe von kÿ,” he mũ. “Nén ù kãmẽg tũ ãjag nÿtĩ (mÿr) ver,” he tóg.

34 “Pão ko ra, ãjag tÿ tar há ki krenkren jé. Û vÿ ter ke tũ nĩ, kÿ ù vÿ kaganh ke tũ nĩ gé,” he tóg, Paulo ti.

35 Ti tÿ tag tó kar kÿ tóg pão mãg mũ sir. Vènh kar rĩnve tóg Topê mré vĩ mũ, kÿ tóg kupãn kÿ ko mũ sir.

36 Kÿ vènh kar tóg fe tar nÿtĩ sir. Kÿ ag tóg ko mũ gé sir.

37 276 (ke) ãg nÿtĩ, canoa mág ãn kãki.

38 ãg tÿ ko kar kÿ ag tóg goj ki trigo kugjẽg mũ, canoa tÿ kãnhvy' hen jé.

39 Tÿ vaj kÿ ag tóg vég mũ sir, hã ra ag tóg goj vãso ãn ki kagtĩg nÿtĩ. Kÿ ag tóg tá

rÿnhÿj vég mũ sir, rĩnhÿj ti. Tá kóho tóg há sĩ nĩ. Kÿ ag tóg tag ra canoa tĩn sór mũ.

40 Kÿ ag tóg ferro ãn kykym mũ sir, goj kãki. Kÿ ag tóg canoa vóg jafã kygvãg mũ gé. Canoa krĩ tá ag tóg kur kujén mũ, kóho kato.

41 Hã kÿ ãg tóg rÿnhÿj ãn to mũ mũ sir. Kÿ goj régre tóg jagnẽ ki jun nĩ. Kÿ canoa tóg rÿnhÿj kãra rã mũ sir. Ti krĩ tóg rĩnhÿj krêm rã mũ, kÿ tóg sir tar mũ sir. Kÿ ti nér tóg kam ke mũ sir, goj jũ kÿ. Kÿ tóg mráj mũ, canoa ti.

42 Kÿ soldado ag tóg vènh sigse ag kãgtén sór mũ, ag mrogmro kÿ vènh pigju tũ nĩn jé, ag krenkren tũ nĩn jé.

43 Hã ra capitão tóg Paulo kren han sór mũ. Kÿ tóg ag mÿ: “ke tũg ra,” he mũ. “ãjag tÿ tũgnũm há nĩn kÿ goj kãra ge vén inhhã, ãjag tÿ ga ra ge vén jé, tũgnũm kÿ,” he tóg.

44 “ãjag tÿ tũgnũm kórég kÿ kan kri nÿmnĩ, canoa mrãnhÿj kri,” he tóg, capitão ti.

Kÿ ag tóg ge mũ sir. Hã kÿ ãg kar tóg ga tá junjun mũ, krenkren kÿ.

28

Goj vãso tÿ Malta tá

1 ãg tÿ ga tá nÿtĩn kÿ ãg tóg ga jiji mẽg mũ, hã vÿ: Malta, he mu.

2 Tá ke ag tóg ãg jagãgtãn mũ. Kÿ ag tóg pĩn han mũ. ãg mÿ ag tóg: “kãge jẽg ra,” he mũ, ta kutẽ kÿ, kusa jagy tĩn kÿ. Kanhgág ri ke ag vè, tá ke ag.

3 Kÿ Paulo tóg pĩnh tĩ mũ, kÿ tóg pĩ ki nĩn mũ. Hã ra pÿn tóg pĩ kãkã nÿ ja nĩ. Rÿ mẽ kÿ tóg tim ke kÿ Paulo prãg mũ, ti nĩgẽ ki.

4 Kÿ tá ke ag tóg pÿn ãn vég mũ, ti tÿ ti nĩgẽ to sa kÿ. Kÿ ag tóg jagnẽ mÿ: “ũ tén tĩ hÿn vè,” he mũ. “Goj tán kren, hã ra tóg ã tÿ nén han jan kajãm mũ,” he ag tóg, Paulo to.

5 Hã ra Paulo tóg pÿn kãvén mũ, pĩ ki tóg tÿ vén mũ. Hã ra tóg kaga tũ nĩ, ti nĩgẽ ti, Topê tÿ ti tÿ há' hen kÿ.

6 Hã ra ag tóg ti tugnÿm mũ, ti kãnhpar ve jé, ke tũ nĩ kÿ ti ter kÿ kutẽ ve jé. Hã kÿ ag tóg ti vég nÿtĩ, hora tÿ hèn ri ke ki. Hã ra tóg ke tũ nĩ. Kÿ ag tóg ti to jykrén mãn mũ. “Topê tũ mÿ vó?” he ag tóg mũ, ón kÿ, Paulo to. Ag mÿ tóg e tĩ, hã kÿ ag tóg ti to: “topê hÿn,” he mũ.

⁷ Goj vāso tá ke ěn ag kĀfór vỹ tỹ Públío nĩ. Tá tóg ĩn nĩ, Ā japỹ tá. Ěg tỹ tón nỹtĩ tag tá tóg kakó nĩ, ti ĩn ti. Kỹ tóg ěg mỹ: “kĀge jĕg ra,” he mũ. Ti mré ěg tóg kurĀ tĀgtũ han mũ.

⁸ HĀ ra Públío panh tóg kaga nỹ nĩ. JĀgfa kyvĕnh han tóg, kỹ tóg to rỹg nỹ nĩ gé. Kỹ Paulo tóg ti venh rĀ mũ. Kỹ tóg ti to Topĕ mré vĩ mũ. Ā nĩgé tỹ tóg ti mĕg mũ, kỹ tóg há' he mũ sir.

⁹ Ti han kỹ vĕnh kagyga kar ag vỹ tá junjun mũ sir, goj vāso ěn tá. Kỹ tóg ag tỹ há' he kĀn mũ, Paulo ti.

¹⁰ Kỹ ag tóg ěg ki rĩr há han mũ. Ěg tỹ kar kỹ canoa ũ kĀra ge kỹ ag tóg ěg mỹ ěg tỹ nĕn ve sór mũ kar ěn vin mũ.

Roma ra

¹¹ KysĀ tĀgtũ tũg kỹ ěg tóg canoa ũ kĀra ge mũ sir. Cidade tỹ Alexandre tá ke vĕ gé, canoa ěn. Tá tóg kusa fĩn rĀ ja nĩ, Malta tá. Ti rá vỹ tỹ ti vĕgni kĀggrá nĩ, ti retrato ěn ti. Ón kỹ Romano ag topĕ ũ vĕ, ti vĕgni kĀggrá ti.

¹² Tá pa kỹ ěg tóg mũ kỹ cidade tỹ Siracusa tá krỹg mũ. Kỹ ěg tóg tá kurĀ tĀgtũ tũg mũ.

¹³ Tá pa kỹ ěg tóg cidade tỹ Régio tá junjun mũ. Tỹ vaj kỹ kĀka tóg ěg vóg há han mũ. HĀ kỹ ěg tóg kurĀ régre tũg kỹ cidade tỹ Pozuoli tá junjun mũ sir.

¹⁴ Tá ěg tóg Jesus mré ke ag vég mũ, kỹ ag tóg ěg mỹ: “ěg mré semana tũg nĩ ver,” he mũ. Kar kỹ ěg tóg cidade tỹ Roma ra mũ mũ sir.

¹⁵ Roma tá ke ag tóg ěg kĀmũ mĕ ja nĩ, Jesus mré ke ag. Kỹ ag tóg ěg venh kĀmũ mũ. Cidade tỹ Ápio jamĀ he mũ ěn tá ag tóg ěg kato tĕgtĕ mũ, ěmĀ tỹ Venda TĀgtũ he mũ ěn tá ke gé. Paulo tỹ ag ve kỹ ti fe tóg mrin ke mũ. Kỹ tóg Topĕ mỹ vĩ há han mũ. Ti krĩ tóg kĀnhvy' he mũ sir.

¹⁶ Ěg tỹ cidade mág tỹ Roma tá junjun kỹ Paulo tóg vyr mỹ nĩ nĩ, vĕse ũ ag mré tóg nĩ tũ nĩ. Soldado pir hĀ tóg ti ki rĩr mũ. CapitĀo tóg ti mỹ tag to: “hej,” he ja nĩ.

Roma tá

¹⁷ KurĀ tĀgtũ tũg kỹ Paulo tóg Israel kĀfór ag jé prĕr mũ. Ag vĕnh mĀn kỹ tóg ag mỹ: “ĩnh kĀhkĀ,” he mũ. “Se kỹ ĩnh jĕ, Jerusalém tá, kỹ ag tóg tá fóg tỹ Romano ag mỹ ĩnh fĕg, isỹ nĕn ũ han tũ hĀ ra, isỹ ěg

jykre mranh tũ hĀ ra, isỹ ěg jóg'jóg tỹ ěg mỹ vĕnh jykre nĩm ja ěn mranh tũ hĀ ra,” he tóg.

¹⁸ “Fóg tỹ Romano ag tóg ĩnh kavĀn sór mũ vĕ, ag tỹ ĩnh ki jĕmĕ kar kỹ. Isỹ nĕn han ja tũ to sóg ter ke tũ nĩ vĕ.

¹⁹ HĀ ra Israel ag tóg ĩnh kato vĩ, hĀ kỹ sóg sir pĀ'i mág tỹ Imperador ve sór mũ, ag tỹ isĕn tũ nĩ jé. HĀ ra sóg ěg povo kavĕnh sór tũ nĩ, Imperador jo,” he tóg.

²⁰ “HĀ kỹ sóg Ājag jé prĕr mũ, sỹ Ājag ki jĕmĕ jé. Ěg povo tỹ Israel kar vỹ Cristo ve sór mũ. Sỹ Cristo tó hĀ to sóg se kỹ jĕ nĩ,” he tóg, Paulo ti.

²¹ Kỹ ag tóg ti mỹ: “ũ tóg ěg mỹ Ā to vĕnh rán han ja tũ nĩ, Judĕia tá,” he mũ ti mỹ, pĀ'i ag. “Kỹ ěg kĀhkĀ ũ tóg ěg ki jun ja tũ nĩ jé, ti tỹ ěg mỹ Ā tỹ nĕn ũ kórĕg han mũ ěn tó jé,” he ag tóg.

²² “HĀ ra tóg ěg tỹ Ā ki jĕmĕnh há tĩ, Ā tỹ nĕn to jykrĕn mũ ti. Vĕnh jykre tĀg tag kato ag tóg vĩ tĩ, vĕnh kar ag, hĀ kỹ tóg ěg tỹ Ā ki jĕmĕnh há tĩ,” he ag tóg ti mỹ, Israel mág ag.

²³ Kỹ ag tóg ti mỹ kurĀ nĩm mũ. Kỹ ũn e ag tóg vĕnh mĀn mũ sir, ti tỹ ĩn krĕm nĩ ěn tá. Ag mỹ tóg Topĕ tỹ tỹ ěg pĀ'i nĩ kĀmĕn mũ. Jesus kĀmĕn tóg mũ, ag tỹ hĕn ri ke mũn ti ki ge jé. Moisés tỹ ag mỹ vĕnh jykre nĩm ja ěn tó tóg mũ sir ag mỹ, vĀsỹ Topĕ vĩ tó tĩ ag vĩ ke gé. Vĕnh rá ěn ki tóg ag mỹ Jesus ti ven mũ sir. KusĀ ki ag tóg kĀmũ ja nĩ, tỹ vĕmĕn nỹtĩ ki ag tóg kutyg mũ.

²⁴ Kỹ tóg ũ ag mỹ ki hĀ tó ti, Paulo tỹ ag mỹ nĕn tó mũ ti, kỹ ag tóg kri fig mũ. HĀ ra tóg ũ ag mỹ há tũ nĩ.

²⁵ HĀ kỹ ag tóg vĕnh kĀpugpóv kỹ nỹtĩ. Kỹ ag tóg mũ mũ, Paulo tỹ ag mỹ tag tó kar kỹ, ha mĕ. Ag mỹ tóg: “Topĕ kuprĩg tóg tó há han ja nĩ, ti tỹ Topĕ vĩ tó tĩ tỹ Isaías mỹ: ag mỹ tag tó, hen kỹ,” he tóg.

²⁶ “Ěg jóg'jóg ag mỹ tóg tag tó ja nĩ, hĀ mĕ: “povo tag mỹ tag tó, hĀ mĕ: mĕ jé Ājag tóg ke mũ, ón kỹ, hĀ ra Ājag tóg to jykrĕn ke tũ nĩnh mũ, hemnĩ,” he tóg.

²⁷ “Kỹ ag tóg ki kagtĩg nỹtĩnh mũ. Povo tag ag vỹ krĩ tũ nỹtĩ, nĩgrĕg kutu ag tóg nỹtĩ gé, kanĕ kyvó ag tóg nỹtĩ gé, ag tỹ nĕn ũ ve sór tũ nỹtĩn kỹ, ag tỹ jĕmĕ sór tũ nỹtĩn kỹ, ag tỹ to jykrĕn sór tũ nỹtĩn kỹ ke gé. HĀ kỹ ag tóg ĩnh ki ge sór tũ nỹtĩ gé, kỹ sóg ag tỹ

há' henh ke tũ nĩ gé," he tóg, Isaías ti," he tóg mũ, Paulo ti, Israel ag mĩ.

²⁸ "Hã kũ sóg, ãjag mĩ tó mũ," he tóg, Paulo ti. "Ájag tỹ mẽ jãvãnh nỹtĩn kũ fóg ag vỹ mẽnh mũ, kanhgág ag ke gé, Topẽ tỹ ag krenkren han sór mũ ti. Kũ ag tóg ti mĩ: hej, henh mũ," he tóg, Paulo ti, Israel ag mĩ.

²⁹ Paulo tỹ tag tó kar kũ Israel ag tóg mũ mũ sir, jagnẽ vĩ kafãn kũ.

³⁰ Paulo vỹ prỹg régre tũg mũ, ã ãn krẽm nĩn kũ. Alugar hen kũ tóg jẽ nĩ, ãn ãn ti, kũ tóg kajãm mũ, Paulo ti, ã jãnkamy tỹ. Kũ tóg ã tỹ ti mré vĩ sór mũ mĩ: "kãrã ra," he ti.

³¹ Vẽnh kar mĩ tóg Topẽ tỹ tỹ ãg pã'i nĩ kãmén mũ sir, fe tar han kũ. Ëg Senhor tỹ Jesus Cristo kãmén tóg mũ sir. Û tóg ti mĩ: "vĩ tũg ra," he tũ nĩ, ti se kũ nĩ hã ra.

PAULO TÏ CARTA HAN: ROMA TÁ KE AG MÏ CARTA

¹ Paulo tÏ rá vë. IsÏ cidade tÏ Roma tá ke ag mÏ rán ken hã vë.

TÏ sóg Jesus Cristo camarada nÏ, kÏ tóg inh fëg, isÏ tÏ apóstolo nÏ jé. Hã jé tóg inh jé prër. KÏ tóg inh kuprëg gé, isÏ vënh kar mÏ vënh vÏ sér kãmén jé, Topë tÏ ëg mÏ vënh vÏ jënë ja ën ti.

² Topë vÏ vãsÏ ã vÏ tó tÏ ag mÏ: “ha inh kósín kãmé tó,” he ja nÏgtÏ, kÏ ag tóg ti kãmé rán ja nÏgtÏ gé, ag tÏ Topë vÏ rán kÏ.

³ Topë kósín ën tó ja ag tóg nÏgtÏ, ëg Senhor tÏ Jesus Cristo ti. TÏ tóg vãsÏ pã'i mág tÏ Davi kósín nÏ, Jesus ti. Ti jóg'jóg ve hã vë, Davi ti.

⁴ Ti tÏ tÏ Davi kósín nÏn kÏ tóg tÏ ëprã ke nÏ, Davi ri ke, hã ra tóg tÏ Topë kósín nÏ gé, hã kÏ tóg ã ter kar kÏ rÏr mãn ja nÏ. Topë tÏ ti rÏn mãn to ëg tóg ti tÏ tÏ Topë kósín nÏn ki kanhró nÏtÏ. Topë vÏ ti tÏ ùn mág han mÏ gé sir, ëg Senhor tÏ Jesus tÏ.

⁵ Topë hã ne isar han', Jesus tigrÏn. Ti hã ne inh fëg', isÏ tÏ apóstolo nÏn jé, isÏ fóg ag kar mÏ ti kãmén jé, kanhgág ag mÏ ke gé, ag tÏ ti ki ge jé, ti vÏ kri fi jé, ti vÏ kri nÏm jé, ti jÏji më kÏ.

⁶ Û tÏ inh vÏ mëg mÏ vÏ tÏ ãjag nÏtÏ gé.

Topë vÏ ãjag kuprëg, hã kÏ ãjag vÏ tÏ Jesus Cristo tÏ nÏtÏ.

⁷ KÏ sóg ãjag mÏ vënhrá jënëg mÏ, Topë tÏ ãjag to há nÏn kÏ. Cidade tÏ Roma tá ãjag tóg nÏtÏ. Topë ne ãjag kuprëg', hã kÏ ãjag vÏ tÏ ti tÏ nÏtÏ. Hã kÏ sóg ëg jóg tÏ Topë mÏ: “ag tar han nÏ, ag mÏ vënh jÏkre kusa nÏm nÏ,” he tÏ, Topë mÏ, ëg Senhor tÏ Jesus Cristo mÏ ke gé.

Paulo tÏ Roma tá ke ag ve sór

⁸ Ha më, vënh kar vÏ ãjag tÏ ti ki ge kÏ nÏtÏ tag më huri, kÏ sóg ãjag to Topë mÏ vÏ há han tÏ, Jesus Cristo tigrÏn. Ti hã mré sóg vëmén tÏ.

⁹ Ti hã mÏ sóg rãnhraj tÏ, to krónh ke vãnh sóg nÏgtÏ, hã kÏ sóg ti kósín to vëme sér ën tó tÏ. Ti hã mré sóg ãjag jagfy vÏ tÏ gé, kÏ tóg ki

kanhró nÏ. Kurã kar ki sóg ãjag kãmén tÏgtÏ, ti mÏ.

¹⁰ IsÏ ti mré vëmén kÏ sóg ãjag tó tÏ. Ti mÏ sóg sÏ kejën ãjag ve sór mÏ tó tÏ. Ti tÏ kejën sÏ ãjag venh ke to há nÏn kÏ tóg inh mÏ: hej, henh ke mÏ.

¹¹ ãjag ve sór tãvÏ inh nÏgtÏ, sÏ ãjag mÏ Topë kuprÏg tÏ inh kanhrãn ja ën kãmén jé, ãjag tÏ inh vÏ jëmén kÏ tar nÏtÏ jé.

¹² KÏ ëg tóg jagnë tar han ke mÏ sir, ëg tÏ jagnë jÏkre ven kÏ, ãjag tÏ isÏ Jesus ki rã kÏ nÏ ven kÏ, isÏ ãjag tÏ ti ki ge kÏ nÏtÏ ven kÏ ke gé.

¹³ Inh kanhkã', inh mÏ tóg ãjag tÏ tag ki kanhró nÏtÏnh há tÏ, ha më: ãjag venh tÏg ke to inh jÏkrén tÏ hën ri ke han huri, hã ra tóg inh mÏ ki króm ja tÏ nÏ ver. IsÏ ãjag mÏ Topë vÏ kãmén sór vë, Roma ki ke ù ag mÏ ke gé, ag kãmÏ ù tÏ Topë ki ge jé. Fóg kar mÏ sóg ke tÏ, kÏ tóg inh mÏ sér tÏnh mÏ, sÏ Roma tá tónh ke mÏn kÏ ke gé.

¹⁴ Fóg tÏ Grego ag mÏ sóg Topë vÏ tó tÏ, fóg kar ag mÏ ke gé, kanhgág ag mÏ ke gé, ù tÏ nén ù ki kanhró ag mÏ, ù tÏ nén ù ki kagtÏg ag mÏ ke gé. Topë vÏ inh mÏ: “ha ag mÏ tó,” he ja nÏgtÏ.

¹⁵ Hã kÏ sóg Roma tá ti tó sór mÏ gé, Topë vÏ sér ën ti.

Topë jÏkre tar

¹⁶ Inh pi(jé) Topë vÏ sér tag to mÏ'äg sór mÏ'. Topë hã ne tag to ëg kren han tÏ', ëg tÏ kri fin kÏ. Topë jÏkre tar hã vë. Judeu ag kren han sór tóg mÏ, kar kÏ fóg kar ag ke gé, kanhgág ag ke gé.

¹⁷ Tag hã ki ëg tóg Topë jÏkre ki kanhró nÏtÏnh mÏ, Topë vÏ sér hã ki. Ëg tÏ ti ki rã hã kÏ ëg tóg ti mÏ kuryj nÏtÏ. Hã kÏ tag tóg rán kÏ nÏ, ha më: “ëg tÏ Topë ki rã hã tugnÏn ëg tóg ti mÏ kuryj nÏtÏnh ke mÏ, kÏ ëg rÏnrÏr mãn ke mÏ,” he ja tóg nÏ, Topë vÏ rán ki.

Ëprã ke ag jÏkre pãno

¹⁸ Hã ra Topë tóg jÏ nÏ gé, kanhkã tá. Û tÏ ti ki ëkrég tÏ ag to tóg jÏ mÏ. Topë vÏ ag mÏ tÏ nén ù tÏ nÏ, hã kÏ ag tóg vënh jÏkre kuryj han sór tÏ nÏgtÏ. Vënh vÏ há tÏ ag tóg tÏg' he sór tÏ gé, vënh jÏkre kórég han sór kÏ.

¹⁹ Topë jÏkre há nÏtÏn hã ki kanhró ag tóg nÏtÏ vë, ag tÏ ki kanhrãn sór kÏ. Topë vÏ ëg kar mÏ tag ven tÏ.

²⁰ Ęg pi(jé) Topě vég tĩ'. Hã ra tóg nén ũ kar han, ěg tỹ nén vég mũ kar. Ęn vigve kỹ ěg tóg ti jykre mág nĩ ěn ki kanhró nĩ sir. “Ũ tỹ tag han mũ vỹ tỹ ũn mág nĩ,” he jé ěg tóg ke mũ. “Ęn jykre vỹ tar nĩ, ěn hỹn tóg tũ' henh ke tũ nĩ,” he jé ěg tóg ke mũ, ěg tỹ Topě tỹ nén han ja vigve kỹ. Hã ra ag tóg ki kanhrãn jãvãnh nỹtĩ, hã kỹ Topě tóg ag to jũnh ke mũ, hã ra ag tỹ ne tónh ke tóg tũ tĩnh mũ.

²¹ Ti tỹ tỹ Topě nĩn ki kanhró ag tóg nỹtĩ vẽ, hã ra ag tóg ti to: “Topě vẽ,” he tũ nĩgtĩ. Ti tỹ tỹ ũn mág nĩ tag tó sór tũ ag tóg nĩgtĩ. Ti mỹ ag: “inh mỹ tóg há tĩ,” he ja tũ nĩgtĩ gé, ti tỹ ag ki rĩr há han mũ ra. Hã kỹ ag tóg ag tỹ krĩ há ra ki kagtĩg nỹtĩ sir, ag krĩ há tóg tũ' he ja nĩgtĩ sir. Nén ũ há to jykren mũ ki kagtĩg ag nỹtĩ ha.

²² “Ki kanhró mág inh nĩ,” he ag tóg tĩ, hã ra ag tóg krĩ vẽnhmỹ nỹtĩ ha.

²³ Kỹ ag tóg Topě pẽ tag jẽgja kã, ũn ter vãnh tag jẽgja kã ag tóg sir ěprã ke kãggrã fẽg mũ sir, ěprã ke ag kãgter tĩn ra. Sẽsĩ kãggrã vin ag ke gé, bicho tỹ fa tỹ 4 ag kãggrã ke gé, pỹn kãggrã ke gé. Tag vỹ ag mỹ tỹ topě nỹtĩ sir.

²⁴ Hã kỹ Topě tóg ag tovãnh mũ sir. Ag tỹ ãjag tỹ nén to ěn mũ ěn han sór nỹtĩn kỹ tóg ag tovãnh mũ, ag tỹ han jé. Jagně kavénh ag tóg mũ sir.

²⁵ Topě vĩ há kri fi vãnh ra ag tóg vẽn h ó hã kri nĩm tĩ. Ag tỹ ũ tỹ nén ũ kar han ja ěn to: “Topě vẽ,” henh ke vẽ vẽ, hã ra ag tóg ti tỹ nén han ja to: “Topě vẽ,” he sór mũ, ón kỹ. Ũ tỹ nén ũ kar han mũ hã ne ã pir mỹ tỹ ũn mág nĩ', ti hã mỹ ěg tóg vĩ há han ke mũ'. To krónh ke vãnh ěg nỹtĩ. Amém.

²⁶ Ag tỹ Topě tỹ nén han ja to: “Topě vẽ,” hen kỹ Topě tóg ag togvãnh gé, ag tỹ ãjag tỹ nén to ěn mũ ěn han jé, ěg kavénh tĩ ěn ti. Ag prũ fag tỹ ag mré nỹ tũg kỹ fag tóg jag(ně) hã mré ti vẽnhmỹ han mũ sir, mỹr, ha mẽ.

²⁷ Kỹ fag mén ag tóg ãjag prũ fag mré nỹ tovãnh kỹ jagně to ěn mũ gé sir. Jagně to ěn kỹ ag tóg jagně mré nỹ kỹ ti kórég han mũ gé sir, jagně kavénh kỹ. Hã kỹ ag tóg ag tỹ Topě tovãnh to jagãgtar nỹtĩnh mũ. Tĩ tỹ ag vóg kónãn hã vẽ.

²⁸ Ve ra ha. Topě ki ěkrén jãvãnh ag tóg nỹtĩ, ti to é he kỹ. Hã kỹ Topě tóg ag togvãnh

ja nĩgtĩ gé sir, vẽn kato, ag tỹ vẽn jykre pãno han sór kỹ. “Ha han, ge kỹ sir,” he ja tóg nĩgtĩ.

²⁹ Vẽn jykre pãno tỹ ag fór nỹtĩ ha, ti kórég tãvĩ tỹ. Nén kar to ěn (ka)mě ag nỹtĩ. Vẽn jykre kuryj han vãnh ag nỹtĩ. Jagně tũ to ěn (ka)mě ag nỹtĩ. Jagně kãgtén ag tóg tĩ gé. Jagně vĩ kafãn ag tóg tĩ gé. Jagně mỹ un'ón ag tóg tĩ gé. Jagně krĩn kónãn ag tóg tĩ gé. Jagně to vĩ kónãn ag tóg tĩ gé.

³⁰ Jagně to un'ón ag tóg tĩ gé. Topě kato tẽ mág ag tóg nỹtĩ. Jagně vóg kónãn ag tóg tĩ. “Ag kãfór vỹ tỹ inh nĩ,” he ag tóg tĩ, kỹ ag tóg veso nén ũ há tó tĩ, ón kỹ. “Inh hỹn vẽn jykre pãno tỹ ne han mũ, ũri?” he ag tóg tĩ, kurã kar ki. Ājag mỹnh fag vĩ han vãnh ag tóg nỹtĩ gé, ãjag panh ag vĩ ti.

³¹ Krĩ tũ ag nỹtĩ. Ón kỹ ag tóg jagně mré nén kar to jykren tĩ, ãjag tỹ ki króm ke tũ (hã) ra. Jagně mré há nỹtĩ ki kagtĩg ag nỹtĩ, kỹ ag tóg jagně jagãgtãn ki kagtĩg nỹtĩ gé.

³² Topě vỹ ũ tỹ tag han mũ to: “kãgter jé ag tóg ke mũ,” he ja nĩgtĩ. Ag tỹ tag ki kanhró nỹtĩ ra ag tóg han mũ sir, kỹ ag tóg ũ tỹ tag han mũ to há nỹtĩ gé, mỹr, ha mẽ.

2

Topě tỹ vẽn jykre pãno to jũ

¹ Fóg mré kanhgág ag vỹ vẽn jykre kórég tag hyn han kãn tĩ, kỹ ag tóg Judeu ag mỹ kórég nỹtĩ. Hã ra Judeu ag vỹ ti kórég han tĩ gé, ag tỹ ón kỹ ag to vĩ mũ ra. “Kórég ag nỹtĩ,” he ag tóg tĩ, hã ra ag tóg fóg jykre kórég ěn han tĩ gé, kanhgág jykre kórég ti ke gé. Hã kỹ ag tóg ãjag jykre tugnĩn ti kórég venh ke mũ gé.

² Topě vỹ ũ tỹ tag han mũ vóg kónãn ke mũ, ti jykre kuryj nĩn kỹ, Topě ti. Ti tỹ ke há vẽ.

³ ũn jykre kórég ag tóg ag mỹ kórég nỹtĩ, Judeu ag mỹ, hã ra ag tóg hã han tĩ gé. Kỹ ag hỹn hẽ ri kenh mũ, Topě tỹ ag vóg kónãn tũ nĩ jé? Ag vóg kónãn jé tóg ke mũ, ha vemnĩ.

⁴ Ver tóg ěg to há nĩ, ver tóg ěg to fen nĩnh mũ, ver tóg jũ vãnh nĩ, Topě ti. Tĩ tỹ ěg tỹ ěg jykre kórég tovãnh ve sór vẽ, hã kỹ tóg ver ěg to há tãvĩ nĩ. Hã ra tóg ag mỹ tỹ nén ũ tũ nĩ ve nĩ, Topě tỹ ěg to fen nĩnh ke mũ ti.

⁵ Kutu ag nỹtĩ, vẽn jykre pãno tovãnh jãvãnh ag nỹtĩ, hã kỹ Topě tỹ ag to jũ tóg

komēr hã mág rã nĩ. Kejĕn tóg Topĕ tỹ vĕnh kar jykre venh ke kurã pétĕm ke mũ sir. Kỹ ag tóg venh ke mũ, Topĕ tỹ ag vóg kónãn ke ti, kỹ vĕnh kar vỹ ti jykre kuryj venh ke mũ, ti tỹ ěg mỹ ki hã tó mũ ti.

⁶ Ti hã ne ěg mỹ nĩm ke mũ', ěg tỹ nĕn hyn han ja ěn kaja ti.

⁷ Ěn kã tóg ěg mỹ ěg rĩr krỹg ja tũ ven ke mũ, ũn jykre kuryj ag mỹ. Ěg tỹ ti jykre há to tar nỹtĩn kỹ tóg ěg mỹ ěg rĩr krỹg ja tũ ven ke mũ, ěg tỹ tá tỹ ũn mág nỹtĩ sór kỹ, ěg tỹ Topĕ hã tỹ ěg mỹ vĩ há han ke ve sór kỹ, ěg tỹ ěg rĩr krỹg ja tũ ve sór kỹ. Kỹ tóg ěg mỹ ven ke mũ.

⁸ Hã ra tóg ũ vóg kónãn ke mũ gé. Ũ tóg ãjag tỹ nĕn han sór mũ ěn hã han ti. Vĕnh vĩ há kri fi vãnh ag nỹtĩ, ag tỹ vĕnh jykre pãno hyn han sór kỹ. Hã kỹ tóg ag vóg kónãn ke mũ.

⁹ Ũ tỹ vĕnh jykre pãno han mũ kar vỹ kanĕ junjur ke mũ, jagtar jagy hyn han kỹ. Ag tỹ tỹ Judeu nỹtĩ ra ag tóg jagãgtar ke mũ, kar kỹ fóg kar ag ke gé, kanhgág ag ke gé.

¹⁰ Ũ tỹ vĕnh jykre kuryj han mũ tỹ tóg ũn mág hyn han ke mũ hã ra, to tóg vĩ há han ke mũ, ěg mỹ tóg vĕnh jykre kusa nĩm ke mũ, ěg tỹ tỹ Judeu nỹtĩ ra, kar kỹ fóg ag mỹ ke gé, kanhgág ag mỹ ke gé.

¹¹ Ha vé, Topĕ mỹ ti tỹ nĕn ũ tũ nĩ, Judeu ag, fóg ag, kanhgág ag. Ti mỹ ěg tóg tỹ ũn pir nỹtĩ.

¹² Ũ ag tóg Topĕ vĩ mẽ ja tũ nỹtĩ. Kỹ ag tóg ti kórég kar hyn han mũ sir. Kỹ ag tóg nũgme ki vár ke mũ sir, inferno ki, ag jykre kórég to. Ag jãvo Judeu ag vỹ Topĕ vĩ mẽ ja nĩgtĩ. Hã ra ag tóg ti kórég han tĩ gé. Kỹ Topĕ tóg ag vóg kónãn ke mũ gé sir. “Isỹ ãjag mỹ nĕn tó ja ěn han ja tũ ãjag nỹtĩ,” he jé tóg ke mũ.

¹³ Ha vé, ěg tỹ Topĕ vĩ mẽg mũ ra han tũ nĩn kỹ ěg Topĕ mỹ há tũ nỹtĩ. Ěg tỹ ti vĩ ki króm kỹ ěg tóg ti mỹ kuryj nỹtĩ.

¹⁴ Fóg ag mré kanhgág ag vỹ Topĕ vĩ mẽ ja tũ nĩ ver, ũ tỹ Judeu jykre han tũ kar ag. Ge ra vĕnh jykre há tóg ag mỹ sér tĩ, ag tỹ Topĕ vĩ mẽ ja tũ (hã) ra. Kỹ ag tỹ vĕnh jykre há han sór mũ tag vỹ ag mỹ ag tỹ ki króm han jafã nĩ.

¹⁵ Topĕ tỹ nĕn tó ja ěn vỹ ag kãkã nĩ, hã kỹ ag tóg han sór mũ, ag tỹ mẽ ja tũ ra. Hã kỹ

tóg ag mỹ sér tĩ, ag tỹ nĕn ũ há han kỹ. Jãvo tóg ag mỹ e tĩ, ag tỹ ti kórég han kỹ. Ag tỹ Topĕ vĩ mẽ ja tũ ra ag tóg vĕnh jykre há ki kanhró nỹtĩ.

¹⁶ Kejĕn Topĕ tóg Jesus Cristo mỹ: “ag jykre ve kãn nĩ,” hĕnh ke mũ, ti kurã ěn kã. Kỹ vĕnh kar jykre vỹ vĕnh ven ke mũ, ag jykre kórég mré hã, ag tỹ vĕnh kar vatánh tá nĕn han ja ti. Tag hã tó sóg tĩ, sỹ vĕnh kar mỹ ti vĩ sér kãmĕn kỹ.

Judeu ag tỹ Topĕ vĩ mranh ja

¹⁷ Ha vé, Judeu ag mỹ tóg sér tĩ, ag tỹ tỹ Judeu nỹtĩn kỹ. “Topĕ ne ěg jyvĕn ja nĩgtĩ', kỹ ěg nũgme ki vár ke tũ nĩ,” he ag tóg tĩ. “Topĕ to ěg há nỹtĩ,” he ag tóg tĩ gé.

¹⁸ Ti tỹ ěg ki nĕn ve sór mũ ki kanhró ag tóg nỹtĩ. Ti vĩ ki tóg rán kỹ nĩ, hã kỹ ag tóg ěn ve kỹ vĕnh jykre kuryj ki kanhró nỹtĩ.

¹⁹ “Ki kanhró ěg nỹtĩ,” he ag tóg tĩ, hã kỹ ag tóg ũ tỹ ki kagtĩg ag mỹ tó tĩ, Judeu ag, ag tỹ ag mỹ ũn kyvó ag ri ke nỹtĩn kỹ. Kuty mĩ ag tóg mũgtĩ, kỹ ag tóg ag mỹ jĕngrĕ han sór tĩ, ag mỹ Topĕ vĩ tó kỹ.

²⁰ Ũ tỹ ki kagtĩg ag kanhrãn ag tóg tĩ, gĩr ag ke gé. “Topĕ vỹ há nĩ, vĕnh jykre há vĕ, ki hã tóg tó tĩ, hã to ěg Topĕ ki kanhrãn tĩ,” he ag tóg tĩ.

²¹ Őn kỹ ag tóg ũ ag kanhrãn tĩ, ãjag tỹ ki kagtĩg nỹtĩ (hã) ra. Ũ mỹ ag tóg: “nĕn ũ péju(g) tũg nĩ,” he tĩ. Hã ra ag tóg ũ tũ péju(g) tĩ.

²² Őn kỹ ag tóg: “ã prũ tũ fi mré nỹ tũg nĩ, ã mén tũ mré nỹ tũg nĩ gé,” he tĩ. Hã ra ag tóg fag mré nỹgnỹ tĩ. Őn kỹ ag tóg vĕnh kãggrá tỹ topĕ to: “Topĕ pijé',” he tĩ. Hã ra ag tóg vĕnh kãggrá ag jo ĩn krĕm ag tũ péju(g) tĩ.

²³ “Topĕ vỹ ěg jyvĕn ja nĩgtĩ,” he ag tóg tĩ. Hã ra ag tóg ti vĩ mranh tĩ. Topĕ kavĕnh ag tóg tĩ.

²⁴ Hã kỹ tag tóg rán kỹ nĩ, Judeu ag to, Topĕ vĩ rán ki, ha mẽ: “ãjag jykre kórég ve kỹ fóg ag mré kanhgág ag vỹ Topĕ jykre to: kórég ti hỹn nĩ,” he tĩ,” he ja tóg nĩgtĩ, Judeu ag to, Topĕ vĩ rán ki.

²⁵ Há ti nĩ, ěg tỹ tỹ Judeu nỹtĩ ti, ěg tỹ Topĕ vĩ ki króm kỹ. Ěg tỹ hã ra ti vĩ mranh kỹ tóg ěg mỹ nĕn ũ há han ke tũ nĩ, ěg tỹ tỹ Judeu nỹtĩ ra. Fóg ri ke vỹ tỹ ěg nỹtĩ, kanhgág ri ke, ěg tỹ ti vĩ mranh kỹ.

²⁶ Kejĕn fóg ũ tóg sir Topĕ vĭ ki króm mũ sir, kanhgág ũ hĕn ri ke mũn. Kÿ tóg Topĕ mÿ tÿ Judeu ri ke nĭ sir, ti tÿ Topĕ vĭ ki króm to.

²⁷ Hã kÿ fóg ag mré kanhgág ag vÿ Judeu ag jykre kórég tónh ke mũ, ha vemnĭ, ag tÿ Topĕ vĭ ki króm kÿ. Topĕ vĭ mranh ag tóg tĭ, ag tÿ tÿ Judeu nÿtĭ ra, ag tÿ Topĕ vĭ rá vég nÿtĭ ra. Hã tó jé ag tóg ke mũ, fóg ag, kanhgág ag ke gé.

²⁸⁻²⁹ Ón kÿ ag tóg tÿ Judeu nÿtĭ, ag pi(jé) tÿ Topĕ tũ pĕ nÿtĭ!. Ón kÿ ag gré junun fár vÿ kym kÿ nĭ, Topĕ tÿ ag mÿ: “kym ra,” he ja nĭn kÿ. Kÿ ag tóg tag tugnĭn jagnĕ mÿ: “Topĕ tũ vÿ tÿ ĕg nÿtĭ,” he tĭ. Hã ra ag pi(jé) tag tugrĭn tÿ Topĕ tũ nÿtĭ!. Topĕ tũ ag vÿ ãjag fe tÿ ti ki rá tĭ, kÿ ag jykre hã ne kym kÿ nĭ ri ke nĭ!. Ag tÿ vĕnh jykre kórég tovãnh to ken hã vĕ. Topĕ kuprĭg ne ĕg jykre há han tĭ!, kÿ Topĕ tóg ĕg mÿ vĭ há han tĭ gé sir, ĕg jykre há nÿtĭn kÿ. Ti pi(jé) ĕprã ke ri ke ón kÿ vĭ há han tĭ!, ti ki ge kÿ nÿtĭ ag mÿ. Ĕg hã vÿ tÿ Topĕ tũ pĕ nÿtĭ!.

3

¹ Kÿ Judeu ag hÿn inh mÿ: “kÿn mÿ há tũ nĭ, ĕg tÿ tÿ Judeu ag krĕ nÿtĭn kÿ?” he sór mũ. “Ĕg gré junun fár kym kÿ nĭn kÿn mÿ tÿ nĕn ũ tũ nĭ?” he sór ag hÿn mũ.

² Vó, há tãvĭ ti nĭ gé. Ĕg hã mÿ tóg ã vĭ ti tó ja nĭgtĭ, Topĕ ti, ĕg tÿ tÿ Judeu krĕ nÿtĭn kÿ.

³ Ĕg kãmĭ ũ tóg ti vĭ kri fig tũ nĭgtĭ. Hã ra Topĕ pi(jé) ag tugrĭn ã tÿ nĕn tó ja ĕn han ke tũ nĭ!, ag tÿ ti vĭ ki króm tũ ra tóg ã vĭ ki króm tĭ, Topĕ ti, ag jãvo.

⁴ Tĭ tÿ ĕg mÿ tó ja ĕn han ti tĭ, ón vãnh ti nĭgtĭ. Ĕprã ke ag ne un'ón tĭ!, hã ra tóg ón ke tũ pĕ nĭ, Topĕ ti. Hã kÿ tag tóg rán kÿ nĭ, Topĕ vĭ rán ki, hã vÿ: “vĕnh kar vÿ venh ke mũ, ã tÿ ã vĭ han tĭ ti,” he mũ. “Ũ tÿ ã jykre tugnÿm kÿ tóg venh ke mũ sir, ã tÿ ki hã tó tĭ ti,” he ja tóg nĭ, Topĕ to, Topĕ vĭ tÿ rán kÿ nĭ ki. Hã ra tóg ge nĭ.

⁵ Kÿ Judeu ag hÿn ón kÿ inh mÿ: “kÿn hÿn há nĭ, ĕg jykre pãno ti,” he sór mũ. “Vĕnh kar vÿ ĕg jykre pãno ve kÿ Topĕ jykre kuryj nĭ ki kanhró nÿtĭ, ti tÿ ĕg jãvo vĕnh jykre pãno to há tũ nĭn kÿ. Hã kÿ ĕg jykre pãno tag vÿ tÿ nĕn ũ há nĭ. Hã ra tóg to ĕg vóg kónãn sór mũ, ĕg jykre pãno to, ti tÿ tÿ nĕn ũ há nĭ ra.

Tag tugnĭn tóg jykre pãno nĭ ve nĭ, Topĕ ti,” he sór ag hÿn mũ, Judeu ũ ag. Ĕprã ke ag vÿ ón kÿ vĭ tÿ ge han tĭ.

⁶ Hã ra tóg há tũ nĭ, ag vĭ tag ti. Topĕ jykre hã ne kuryj nĭ!. Ti jykre há nĭn kÿ tóg ĕprã ke jykre to: “há tũ ti nĭ,” hĕnh ke mũ. Jykre kuryj ti nĭ inhhã.

⁷ Hã ra Judeu ũ ag tóg ón kÿ: “vĕnhmÿ ĕg ki króm kÿ nÿtĭ vĕ,” he tĭ gé. “Ĕg ón tugrĭn Topĕ tÿ tÿ ũn mág nĭ tag vÿ vĕnh ven mũ, ti ón vãnh vÿ vĕnh ven mũ ĕg jãvo. Há ti nĭ, tag ti. Hã kÿ ti tÿ ĕg ón mũ tag to: “inh vĭ mranh ja ãjag tóg nĭgtĭ,” hĕn kÿ tóg vĕnhmÿn kÿ tó mũ, Topĕ ti,” he ag tóg tĭ, ón kÿ.

⁸ “Tĭ kórég han jé ĕg tóg ke mũ, Topĕ tÿ ĕg jykre kórég tÿ nĕn ũ há han jé,” he ag tóg tĭ, ón kÿ. Kÿ ag tóg iso ón kÿ: “tag tó ti tĭ, Paulo ti,” he tĭ gé. Ũ tÿ tag tó mũ ag vóg kónãn jé tóg ke mũ, Topĕ ti, ag ón mũ tag to, ti jykre kuryj nĭn kÿ, ha vemnĭ.

Ĕg kar tÿ Topĕ vĭ mranh kãn

⁹ Kÿ isÿ Judeu ag to ne tó nĕ? Ĕg mÿ fóg ag kãfór nÿtĭ, ĕg tÿ tÿ Judeu nÿtĭn kÿ? Vó, ag kãfór tũ ĕg nÿtĭ. Topĕ vĭ mranh kãn ĕg mÿr, Judeu, fóg, kanhgág, ĕg kar mÿr. Tag tó inh huri. Hã ra tóg ge nĭ.

¹⁰ Hã kÿ tag tóg rán kÿ nĭ gé, ha mĕ: “ũn jykre kuryj vÿ tũ tĭ, ũn jykre kuryj venh ke tũ pĕ ĕg nĭgtĭ.

¹¹ Vĕnh jykre há han ki kagtĭg kar ĕg nÿtĭ, ũ tÿ Topĕ jykre han sór mũ vÿ tũ tĭ.

¹² Ĕg kar vÿ Topĕ japry, Topĕ jamĭn tovãnh kãn kÿ nÿtĭ. Jykre kórég kar ĕg nÿtĭ. Vĕnh jykre kuryj han vãnh ĕg nÿtĭ. Ũn jykre há venh ke tũ pĕ ĕg nĭ.

¹³ Un'ón (ka)mĕ kar ĕg nÿtĭ, jagnĕ to. Ĕg tÿ vĕser to nón kÿ vĕser ger tóg kãkutĕ tĭ. Ĕg ón vÿ vĕser ger tag ri ke nĭ. Jagnĕ mÿ ĕg tóg un'ón tĭ gé. Ĕg vĭ jũ tÿ ĕg tóg jagnĕ kãgtĕn ri ke han tĭ gé, kÿ tóg pÿn veneno ri ke nĭ, ĕg vĭ jũ ti.

¹⁴ Vĕnh vĭ jũ tÿ ĕg fór nÿtĭ, kÿ ĕg tóg vĕnh kar mÿ vĭ kónãn tĭ.

¹⁵ Jagnĕ kãgtĕn (ka)mĕ ĕg nÿtĭ, tag hã tóg ĕg mÿ sér tĭ.

¹⁶ Ĕg tÿ hĕn mĭ mũ kÿ ĕg tóg nĕn ũ kar kókég tĭ, hã kÿ ĕg mré ke fag vÿ jagtar nÿtĭ, ĕg to.

17 Ëg pi(jé) vënh jykre kusa ve sór tí'.

18 Topë kamëg sór vãnh ãg nýtí," he ja tóg nýtí, Topë ví týt rán ký nĩ ki. Hã ra tóg ge nĩ.

19 Hã ra ãg kar výt tag ki kanhró nýtí, ha mẽ. Ëg hã mýt ti rán ký nĩ, Topë ví ti, ãg týt ki króm jé. Hã ra ãg tóg mranh kãn. Ký Topë týt ãg mýt: "ti kórég han ã," he mũ ra tóg ãg týt ti mýt ne tónh ke tóg tũ tí, ãg kar ti. Hã jé tóg ãg mýt ã ví jënë ja nýtí, ãg týt to ãg kórég nĩ tag ki kanhrãn jé.

20 Topë ví ki króm kãn ja tũ ãg tóg nýtí, hã ký ãg kuryj tũ nýtí, Topë mýt. Hã ký ãg týt Topë týt vãsýt ãg jyvën ja ãn mẽg mũ ra ãg tóg Topë ví mranh ki kanhrãn mũ, ti týt ãg mýt: "tag han tũg ra," hen ký. Ge ta ãg tóg mranh tí.

Topë týt ãg kren han sór

21-22 Vãhã Topë jykre kuryj tóg vãnh ven ja nýtí. Ti hã ne ãg mýt vãnh pãte fón mũ sir', inhhã', ãg týt Jesus Cristo ki ge ký, ãg týt ti týt ãg jyvën ja ãn mranh ja (hã) ra. Ti jykre kuryj hã vë. Vãsýt tóg tó ja nĩ, Topë ti, ti týt tag han ke ti. Á jykre si ki tóg tó ja nĩ, ký ti ví tó tí ag, profeta ãn ag tóg tó ja nýtí gé, ti jykre tãg ke ti. Û týt ti ki ge ký nýtí kar mýt tóg vãnh pãte fón tí. Ký ãg kar tóg jagnë ri ke nýtí ha, ãg týt ti ki ge ký.

23 Topë ví mranh kãn ãg, vãnh jykre kuryj han tũ ãg nýtí, Topë jykre kuryj tag han ki kagtíg ãg nýtí.

24 Hã ra tóg ãg jagãgtãn ký ãg mýt vãnh pãte fón sór mũ. Fagrĩnh mýt ke vë, kajãm ke tũ ãg tóg nĩ. Jesus Cristo tugnĩn tóg ãg kren han sór mũ.

25 Topë ne Jesus fëg', ti hã týt ãg týt Topë ví mranh týt tũg' hen jé, ti ter ký ti kyvënh týt ãg jagfy ti ki kãkutë ký. Ký ãg tóg ti ki rã ký há nýtí sir, Topë jykre kuryj hã vë sir. Jesus to ãg ki kanhrãn mũ, vãnh jykre kuryj ti. Hã ký Topë tóg ãg týt vãsýt ti ví mranh ja ãn to tóg ãg vóg ja tũ nĩ ver, ãg to fen ký,

26 ti týt ùri ãg mýt ã jykre tãg ven sór ký. Topë výt kuryj nĩ. Ti týt ãg mýt vãnh pãte fón ký ãg ti mýt kugryj nýtí sir, ãg týt Jesus ki gen ký. Topë jykre kuryj hã vë sir.

27 Ký Judeu ag hỹn inh mýt: "ký ãg mýt Topë mýt há tũ nýtí, ãg týt ti ví ki króm sór mũ ra?" he sór mũ. Hỹ, hã vë. Kórég ãg nýtí, hã ký ãg tóg ti ví ki króm sór mũ ra mranh tí.

Ëg týt ti ki ge ký tóg ãg mýt vãnh pãte fón tí, ký ãg há nýtí.

28 Tag ki kanhró ãg nýtí, ha mẽ. Ëg týt Topë jykre si ãn han sór mũ ra ãg jykre pãno výt ãg kãkã nĩ nĩ. Ëg týt Jesus ki gen hã ký tóg ãg mýt vãnh pãte fón ke mũ hã ra.

29 Topë pi(jé) Judeu ag tãvĩ vég nĩ nĩ'. Fóg ag vég ti nĩ gé, kanhgág ag ke gé.

30 Pir ti nĩ, Topë ti. Hã ký tóg ù týt ti ki ge mũ ag mýt vãnh pãte fón tí, Judeu ag mré hã, fóg ag mýt ke gé, kanhgág ag mýt ke gé. Ëg týt ti ki ge to tóg ãg mýt vãnh pãte fón tí, ãg kar mýt.

31 Ký ãg mýt ti ki ge ký (ãg mýt) Topë týt vãsýt ãg mýt vãnh jykre nĩm ja ãn týt tũg' he tí, Topë týt Judeu ag jyvën ja ãn tí? Vó. Vãhã ãg ki króm há han ki kanhró nýtí, Topë týt ãg mýt vãnh jykre nĩm ja ãn ki.

4

Topë týt Abraão mýt vãnh pãte fón

1 Ký Judeu ag hỹn inh mýt: "ãg jóg'jóg ve pë týt Abraão hỹn hë ri ke tí?" he sór mũ.

2-3 "Nén ù há kar han tí tí, Abraão tí, hã tigrĩn tóg týt Topë mýt ùn há nĩ," he sór ag hỹn mũ, Judeu ag. Vó, hã tũ vë. Ti ki rã tugnĩn ke vë. Hã ký tag výt ti to rán ký nĩ, ha mẽ: "Abraão výt Topë ki rã, hã ký tóg týt Topë mýt ùn há nĩ, ti týt ti ki rã tigrĩn," he tóg mũ, Topë ví rán ki. Ti týt nén ù há han tugnĩn Topë mýt týt ùn há nĩ ra tóg vëso: "týt sóg ùn há nĩ, ag kar kãfór," henh ke mũ vë, vësýt ùn há han sór ký. Hã ra ãg vësýt ùn há han ki kagtíg nýtí.

4 Hã vé, ãg rãnrãj to ãg tóg ãg rãnrãj kaja vég tí. Fagrĩnh mýt ke tũ vë, ãg rãnrãj kaja ti.

5 Topë jykre výt ge tũ nýtí. Ëg týt ti ki ge ký ãg tóg ti mýt týt, ùn há nýtí. Ëg týt ti ki ge tigrĩn tóg ãg mýt vãnh pãte fón tí, ãg týt ti ví mranh ja ti. Ëg rãnrãj pijé'. Topë týt nén han mũn hã vë.

6 Hã ký vãsýt ãg pã'i týt Davi tóg tó ja nýtí gé. Û týt nén ù kórég han tí ãn to tóg ví há han ja nĩ, Davi tí. Topë výt ãg mýt vãnh pãte fón tí, ãg týt ti ví mranh ja ti. Topë týt ùn mýt vãnh pãte fón ja ãn to Davi tóg tag tó ja nýtí, ha mẽ:

7 "Topë výt ãg ve há han ke mũ, hã ký tóg ãg mýt ãg týt ti ví mranh ja ãn týt vãnh pãte fón

tĩ. Kĩ ěg ve mǎn ke tũ nĩ ha, ěg jykre pǎno ja ěn ti, ti tỹ vĕnh pǎte fón kỹ nĩn kỹ.

⁸ Topĕ vỹ ěg ve há han ke mũ, hǎ kỹ tóg ěg mỹ ěg tỹ ti vĩ mranh ja ěn kaja kórég ěn ven ke tũ pĕ nĩ,” he ja tóg nĩgtĩ, Davi ti.

⁹ Kĩ Judeu ag hỹn inh mỹ: “Davi hỹn ũ tỹ hĕ to tag tó ja nĩgtĩ?” he sór mũ. “Judeu jykre han mũ ag to ke mỹ vó, ag jykre han tũ ag to ke mỹ vó?” he sór ag hỹn mũ. ěg kar to ke vĕ. Hǎ vĕ, Abraão to sóg: “ti tỹ Topĕ ki rǎ tugrĩn tóg tỹ Topĕ mỹ ũn há nĩ,” he ja nĩ.

¹⁰ Kĩ ti jykre tỹ Topĕ mỹ kuryj nĩ ěn kǎ ti mỹ Judeu ag jykre han kỹ tĩ nĩ, Abraão ti? Vó, ěn kǎ ti ěg jykre han tũ nĩ ver. ěn kǎ ti ǎ gré junun fár kym ja tũ nĩ ver.

¹¹ Topĕ vỹ ti mỹ vĕnh pǎte fón, ti tỹ ti ki rǎ tugnĩn, ti tỹ ver Israel ag jykre ki kagtĩg nĩn kǎ. Ti mỹ vĕnh pǎte fón kar kỹ Topĕ tóg ti mỹ ěg jykre tag nĩm ja nĩ, ti tỹ ǎ gré junun fár kym jé sir, vĕnh kar tỹ ti jykre há nĩ ki kanhrǎn jé. Hǎ kỹ tóg tỹ ũ tỹ Topĕ ki ge mũ kar jóg nĩ sir, Abraão ti, ag tỹ Judeu ag jykre han tũ ra, ag tỹ ǎjag fár kym tũ ra ke gé. Topĕ ki ge kỹ ěg tóg Topĕ mỹ tỹ ũn há nỹtĩ, Abraão ri ke.

¹² Kĩ tóg tỹ Judeu jykre han mũ ag jóg'jóg ve pĕ nĩ gé sir, Abraão ti, ag tỹ ti mré Topĕ ki ge kỹ. Judeu jykre han to hǎ tóg Topĕ ki rǎ, ěg jóg tỹ Abraão ti. Kĩ ěg tỹ Topĕ ki ge kỹ tóg tỹ ěg jóg pĕ nĩ gé sir, ěg tỹ tỹ Judeu krĕ nỹtĩ ra Topĕ ki ge kỹ nỹtĩn kỹ.

¹³ Topĕ vỹ Abraão mỹ: “ǎ krĕ vỹ ga kar mĩ mũnh mũ, kỹ tóg tỹ ag tũ kar nĩnh mũ,” he ja nĩgtĩ. Ti tỹ Topĕ vĩ kri fi tugrĩn tóg ti mỹ tag tó. Vĕnh jykre si ki króm tugnĩn ke pijé'. Ti tỹ Topĕ ki rǎ kỹ tóg ti mỹ tỹ ũn há nĩ, hǎ kỹ Topĕ tóg ti mỹ tag tó ja nĩ.

Topĕ tỹ ũ tỹ ti ki ge kỹ nỹtĩ ag to há

¹⁴⁻¹⁵ Ha vé, ěg tỹ Topĕ tỹ vǎsỹ ěg mỹ vĕnh jykre nĩm ja ěn han sór mũ ra ěg tóg mranh tĩ, kỹ Topĕ tóg ěg vóg kónǎn ke mũ vĕ sir. Hǎ kỹ ěg tóg ti tỹ ěg mỹ nén ũ há tó ja ěn venh ke tũ pĕ nĩ vĕ sir. ěg vóg kónǎn jé tóg ke mũ vĕ sir, kỹ tóg ěg mỹ nén ũ há nĩm ke tũ nĩ vĕ sir. Kĩ tóg ěg mỹ: “ha inh ki rǎ,” henh ke tũ nĩ vĕ gé. Topĕ tỹ ěg vóg kónǎn ke mũ hǎ ne kǎ nĩ vĕ', ti vĩ mranh tugrĩn.

¹⁶ Hǎ ra tóg ěg mỹ: “ha inh ki rǎ, sỹ ǎjag mỹ nén ũ há ěn han jé, ǎjag tỹ inh ki ge

tugrĩn,” he ja nĩgtĩ. Ti tỹ ěg jagǎgtǎn hǎ vĕ. Topĕ tóg Abraão krĕ kar ag mỹ vin sór mũ, ǎ tỹ nén tó ja ěn. Ti pi(jé) Judeu jykre han mũ ag tǎvĩ mỹ vin sór mũ'. Ũ tỹ Abraão ri ke Topĕ ki ge mũ ag mỹ tóg vin sór mũ gé, Topĕ ti. ěg kar jóg'jóg ve vỹ tỹ ti nĩ, Abraão ti.

¹⁷⁻¹⁸ Topĕ hǎ ne ti mỹ: “ǎ krĕ tỹ sóg povo e hyn han ke mũ,” he ja nĩ, hǎ kỹ tóg tỹ ěg kar jóg'jóg ve pĕ nĩ. Rán kỹ ti nĩ, Topĕ vĩ rán ki. Kỹ tóg ti vĩ tag kri fi ja nĩgtĩ, Abraão ti, ǎ tỹ gĩr ve vǎnh nĩ ra, ti kófa nĩn kỹ. Ũn ter mũ ag rĩnrĩr mǎn han ki kanhró tóg nĩ, Topĕ ti. Kỹ tóg nén kar han ki kanhró nĩgtĩ gé. Nén ũ tóg tũ tĩ ver, hǎ ra Topĕ tóg nén ũ kar han tĩ, ǎ vĩ tỹ. Hǎ kỹ tóg Abraão mỹ ti kósin ke tó ja nĩgtĩ gé. Kỹ Abraão tóg ti vĩ kri fi ja nĩgtĩ. Ver tóg kósin ja tũ nĩ, ǎ kófa nĩ ra, hǎ ra tóg Topĕ vĩ kri fi ja nĩgtĩ, Topĕ tỹ ti mỹ: “ǎ krĕ tỹ sóg povo e hyn han ke mũ,” he ja tag to.

¹⁹⁻²⁰ Topĕ tỹ ti mỹ tag tó kỹ tóg 100 (ke) anos pétĕm, Abraão ti. Si há ti nĩ ja nĩgtĩ, ti prũ tỹ Sara fi ke gé. Gĩr han vǎnh fag nỹtĩ, ěn kǎ. ěn hǎ kǎ Topĕ tóg ti mỹ ti krĕ e hyn han ke tó ja nĩgtĩ. Kỹ tóg ti vĩ kri fi ja nĩgtĩ, to krónh ke tũ ja tóg nĩgtĩ. “Hỹ mỹ vỹ?” he ja tũ ti nĩgtĩ, Topĕ vĩ tag to. Ti vĩ kri fi kỹ tóg Topĕ to: “ũn mág vỹ tỹ ti nĩ,” he ja nĩgtĩ.

²¹ “Topĕ vỹ ǎ tỹ nén tó ja han ki kanhró nĩ,” he ja ti nĩ, Abraão ti, to krónh ke tũ nĩn kỹ.

²² Tag hǎ tugnĩn tóg Topĕ mỹ tỹ ũn há nĩ, ti tỹ ǎ fe tỹ ti ki rǎn kỹ.

²³ Topĕ vĩ tó tĩ ũ tóg Abraão to rán ja nĩ, Topĕ vĩ rán ki, ti tỹ Topĕ mỹ tỹ ũn há nĩ ti.

²⁴ Hǎ ra tóg ěg to rán ja nĩ gé. Topĕ mỹ ěg tóg tỹ ũn há nỹtĩnh ke mũ gé, Abraão ri ke, ěg tỹ ti ki ge kỹ. Hǎ kỹ tóg ěg Senhor tỹ Jesus rĩn mǎn ja nĩgtĩ, ti ter ja tá.

²⁵ ěg jagfy tóg ter ja nĩ, Jesus ti, ti tỹ ěg tỹ Topĕ vĩ mranh tỹ tũg' he jé. Hǎ jé Topĕ tóg ti fĕg ja nĩ. Kỹ tóg ti rĩn mǎn ja nĩ gé, ti tỹ ěg mỹ vĕnh pǎte fón jé, ěg tỹ ti vĩ mranh ja ti.

5

Topĕ tỹ ěg to jũ mǎn ke tũ

¹ Kĩ tóg ěg mỹ vĕnh pǎte fón mũ sir, ěg tỹ Jesus Cristo ki ge kỹ nỹtĩn kỹ. Kĩ ěg tóg

jatun mý nýtí, Topě tỹ ěg to jũ mǎn tũ nĩn kỹ, ěg Senhor tỹ Jesus Cristo tugrĩn.

² Ti hǎ tugnĩn Topě tóg ěg jagǎgtǎn tĩ. Tag tugrĩn ěg tar nýtĩ sir. Kỹ tóg ěg mý sér tĩ gé. Topě vỹ ěg tỹ ũn mág han ke mũ, ti tỹ tỹ ũn mág nĩ ěn ri ke han jé tóg ke mũ, kỹ tóg ěg mý sér tĩnh mũ sir.

³ Ver ěg tóg ti jagy vég tĩ, tag ki. Hǎ ra tóg ěg mý sér tĩ gé, ěg tỹ ti jagy vég mũ ra. ěg tỹ ti jagy vég mũ tag ne ěg tar han ke mũ', koměr hǎ.

⁴ ěg tar nýtĩn kỹ ěg ti tovǎnh sór tũ nĩ ki kanhró nýtĩ sir. ěg tỹ ti tovǎnh sór tũ nýtĩn kỹ ěg tóg Topě tỹ ěg mý nén tó ja kar venh ke mũ, ti tỹ ěg mý nén ũ há ven ke ěn ti, tá.

⁵ ěg pi(jé) venh ke tũ nĩ', Topě tỹ nén tó ja ěn ti. ěg mý tóg ǎ kuprĩg jěně huri, ti tỹ tỹ ěg jagrě nĩ jé. ěg jagrě tag vỹ ěg mý: "Topě vỹ ǎ to há nĩ," he tĩ. Ti hǎ tugrĩn ěg ki kanhró nýtĩ, ěg tỹ Topě tỹ ěg mý nén tó ja ěn venh ke ki.

⁶ Jykre pǎno ěg nýtĩ, krój ěg nýtĩ. ěg tỹ ver kórég nýtĩ ěn kǎ Cristo ne ěg jagfy ter ja nĩgtĩ'.

⁷ Ti jǎvo ěg kǎ ũ tóg ěg jagfy ter ke tũ nĩ. ũn jykre há jagfy ter ke tũ ěg nýtĩ.

⁸ ěg jǎvo Cristo vỹ ěg jagfy ter ja nĩ, ěg tỹ tỹ Topě vĩ mranh jafǎ nýtĩ ra. Hǎ ki ěg ki kanhró nýtĩ, Topě tỹ ěg to há tǎvĩ nĩ ti.

⁹ Kỹ Topě tóg ěg mý vėnh pǎte fón mũ sir, Jesus tỹ ěg jagfy ter ja tugnĩn, ti kyvėnh tugrĩn. Kỹ tóg Topě tỹ vėnh kar to jũnh ke kurǎ ěn ki ěg kren han ke mũ gé, ha mē.

¹⁰ ěg tỹ ver ti kato tē nýtĩ ra Topě kósin tóg ěg jagfy ter, kỹ Topě tóg ěg to há nĩ, ěg to jũ mǎn tũ ti nĩ. Kỹ tóg ěg to há nĩ ha. Kỹ tóg kurǎ ěn kǎ ěg kren han ke mũ gé, ti rĩr jěnh kỹ, ti kósin ti.

¹¹ Kurǎ ěn kǎ tóg ěg kren han ke mũ, hǎ ra tóg ũri ěg to há nĩ gé, kỹ tóg ěg mý sér tĩ. ěg Senhor tỹ Jesus Cristo tugnĩn ke vė. Ti hǎ ne Topě tỹ ěg to há nĩnh ke han'. Ti hǎ ne Topě tỹ ěg to jũ tỹ tũ' he mũ'.

Adǎo vỹ Topě vĩ mranh vén, Jesus vỹ ki króm kǎn

¹² Ha vé, ũn pir vỹ Topě vĩ mranh vén, kỹ Topě vĩ mranh vỹ kǎ nĩ nĩ sir. Ti vĩ mranh tugrĩn tóg ter ja nĩ gé, ũ tỹ ti vĩ mranh vén mũ ěn ti. ũ tỹ ti vĩ mranh vén ja ěn ri ke ěg

nýtĩ, Topě vĩ mranh kǎn ja ěg tóg nĩ gé, ěg tỹ tỹ ũn ve nón ke nýtĩn kỹ. Kỹ ěg tóg kǎgter kǎn ke mũ gé, Topě vĩ mranh kỹ.

¹³ Topě tỹ ěg jyvėn to hǎ ag tóg ti vĩ mranh ja nĩgtĩ gé, hǎ ra ag tóg vėnh jykre kórég to: "Topě vĩ mranh vė," he ja tũ nĩ ver, ag tỹ Topě tỹ ěg jyvėn tĩ ěn mē ja tũ nĩn kỹ, Moisés tỹ Topě vĩ rán ja to hǎ.

¹⁴⁻¹⁵ Ge ra ag tóg kǎgter ja nĩ, ěn to. Adǎo vỹ ter, ti nón ke ag vỹ kǎgter, Moisés mur to hǎ. Adǎo ne Topě tỹ ti mý ka kaně to: "ko tũg nĩ," he ja ěn ko ja nĩgtĩ'. Ti nón ke ag vỹ Topě vĩ mranh gé, hǎ ra ag pi(jé) Adǎo tỹ Topě vĩ mranh ja ěn ri ke hyn han ja nĩgtĩ'. Ge ra ag tóg kǎgter. Kỹ ěg ũri kǎgter tĩ gé, ěg tỹ ũn ve ěn nón Topě vĩ mranh kỹ.

ũn pir tỹ Topě vĩ mranh vén ja tugrĩn ěg tóg kǎgter kǎn ke mũ. ũn ve tỹ ěg jo vėnh jykre kórég han jan hǎ vė. Ti jǎvo ti nón ke ěn ti, Jesus hǎ vỹ ěg mý vėnh jykre há nĩm ke mũ. Ti tugnĩn Topě vỹ ũn e tǎvĩ jagǎgtǎn ke mũ sir. ěg mý tóg nén tỹ hėn ri ke hyn han ke mũ sir, kỹ tóg presente há tǎvĩ ri ke nĩ sir, ũn pir tugrĩn, hǎ vỹ: Jesus Cristo, he mũ. Kỹ Jesus tỹ ěg mý vėnh jykre há nĩm mũ ěn vỹ ũn ve tỹ ěg mý vėnh jykre kórég nĩm ja ěn kǎfór nĩ.

¹⁶ ũn pir tỹ Topě vĩ mranh vén ěn tugnĩn ěg kǎgter kǎn ke mũ. Topě vĩ mranh pir tugrĩn tóg ěg vóg kónǎn kǎn ke mũ. Hǎ ra tóg ěg mý presente ri ke han sór mũ ha. ěg jagǎgtǎn tóg tĩ, ěg tỹ ti vĩ mranh tỹ hėn ri ke han ja ra, kỹ tóg ěg mý vėnh pǎte fón mũ gé sir.

¹⁷ ũn pir tỹ Tope vĩ mranh vén ja tugnĩn ěg kar kǎgter kǎn ke mũ. Hǎ ra tóg ũn pir ũ tugrĩn ěg jagǎgtǎn ke mũ ha, kỹ tóg ěg mý vėnh pǎte fón mũ. Kỹ tóg ěg kugrynh ke mũ. ěg mý presente ri ke han hǎ vė. Kỹ ěg tóg rĩnrĩr mǎn ke mũ gé, kỹ ěg tóg tá tỹ ũn mág nýtĩnh mũ sir, ũn pir tugnĩn, hǎ vỹ: Jesus Cristo, he mũ. Hǎ ki Jesus tỹ ěg mý vėnh jykre há nĩm mũ tóg ũn ve tỹ ěg mý vėnh jykre kórég nĩm ja ěn kǎfór nĩ.

¹⁸ Hỹ, ũn pir tỹ Topě vĩ mranh vén ja tugrĩn Topě tóg ěg vóg kónǎn kǎn ke mũ sir. Ri ke ti nĩ, Jesus tỹ ěg kren han mũ ti. ũn pir tỹ Topě vĩ ki króm kǎn tugnĩn Topě tóg ěg kar jagǎgtǎn ke mũ sir, kỹ tóg ěg mý vėnh

pâte fón ke mũ, ãg kãgter mãn tũ nĩ jé, ãg kuprĩg ti.

¹⁹ Ûn pir tóg Topẽ vĩ han ja tũ nĩ, kũ ãg kar vỹ Topẽ vĩ mranh tĩ sir, ti nón. Kar kũ ãn pir vỹ Topẽ vĩ han kãn ja nĩgtĩ, kũ Topẽ tóg ti tugrĩn ãg mũ vẽn h pãte fón kãn ke mũ gé sir.

²⁰ Kũ Topẽ tóg Moisés tỹ ãg jyvẽn ja nĩgtĩ, hã kũ tóg rán ja nĩ. Kũ ãg tóg ti vĩ mẽ kũ ãg tỹ Topẽ vĩ mranh e han ja ãn ki kanhrãn mũ sir. ãg tỹ ti vĩ mranh e tãvĩ nĩ ra Topẽ tóg ãg jagãgtãn kãfór han mũ gé sir,

²¹ ti tỹ ãg jykre kugrynh jé sir. Nũgme ki ãg tóg vãr kãn ke mũ vẽn, inferno ki, ãg tỹ Topẽ vĩ mranh to. Jagy ti nĩ. Hã ra Topẽ tóg ãg jagãgtãn kãn ke mũ, kũ tóg ãg kugrynh ke mũ, kũ ãg rĩr krỹg ja tũ venh ke mũ, nũgme ki vãr ke tũ ãg nỹtĩ, inferno ki. Topẽ tỹ ãg jagãgtãn hã vẽn, ãg Senhor tỹ Jesus Cristo tỹ ãg jagfỹ ter ja tugrĩn ken hã vẽn.

6

Jesus Cristo tỹ ãg jykre si tũg

¹ Kũ Judeu ã hỹn inh mũ: “kỹn hỹn há nĩnh mũ, ãg tỹ Topẽ vĩ mranh kũ,” he sór mũ. “Kũ tóg ãg jagãgtãn kãfór han ke mũ gé, ãg tỹ mranh mág kũ,” he sór ag hỹn mũ.

² Vó, há tũ pẽ ti nĩ. Kórég ti nĩ. Ti ki ge kũ ãg tóg vẽn h jykre tãg han tĩ, kũ ãg jykre si tóg tũ tĩ ha, ti tỹ ãg jykre si tỹ tũ' hen kũ.

³ Ha vé, vẽn h kype kũ ãg nỹtĩ. Batismo tag vỹ ge nĩ, ha mẽ. ãg tỹ Cristo ki rã to ken hã vẽn. Cristo vỹ ter ja nĩ. Ter kũ tóg ãg jykre si tỹ tũ' hé.

⁴ Tũg kũ tóg ti mré vẽn h kej kãkã nỹ ri ke han mũ gé, ãg jykre si ti. Kũ Cristo vỹ rĩr mãn, ter kar kũ, Topẽ tỹ ti rĩn mãn kũ. Tar ti nĩ, Topẽ ti, hã kũ tóg ti rĩn mãn. ãg tỹ ti mré rĩr mãn ri ke ti nĩ, hã vỹ: vẽn h jykre tãg to tar nĩ, he mũ. Batismo to ken hã vẽn.

⁵ ãg jykre si tỹ tóg tũ' hé, ti ter kũ, kũ ãg jykre tãg tóg nỹ ha, ãg tỹ ti mré rĩnrĩr nỹtĩn kũ, ti rĩr mãn ãn ri ke.

⁶ Ti tỹ cruz to sa kũ ãg jykre si tóg ti mré to sa ri ke han gé, kũ tóg tũ' he mũ, ãg tỹ ti vĩ mranh mãn tũ nĩ jé. Topẽ vĩ mranh jafã vỹ tỹ ãg nỹtĩ ja nĩgtĩ, hã kũ tóg tỹ tũg' he ja nĩ, Jesus Cristo ti. Hã kũ ãg tóg ãn Topẽ vĩ mranh tĩ ag ri ke tũ nỹtĩ ha.

⁷ ãg jykre si tũg kũ ãg tóg jykre kuryj nỹtĩ ha, ha mẽ, kũ ãg tóg mranh sór mãn tũ nĩ ha.

⁸ Cristo vỹ ãg jykre si tỹ tũg' hé, ti ter kũ. Kũ tóg ãg mũ vẽn h jykre tãg han mũ gé, rĩr mãn kũ, kũ ãg tóg ti mré jykre tãg ãn hã mũ mũnh mũ. Vẽn h vĩ há to ken hã vẽn.

⁹ Cristo ne rĩr mãn', ter kar kũ. Kũ tóg ter mãn ke tũ nĩ ha. Û vỹ ti tén mãn ke tũ pẽ nĩ ha.

¹⁰ Ter ja ti nĩ. Ti ter ja vỹ pir nĩ, ãg tỹ Topẽ vĩ mranh ãn tugnĩn. Kũ tóg rĩr jẽ nĩ sir, Topẽ mũ, ti tỹ Topẽ tũ han kãn jé.

¹¹ Kũ ti ri ke han nĩ. Topẽ vĩ mranh tũg nĩ, ãjag jykre si ter kũ nỹn kũ. Topẽ jykre hã han nĩ, ãjag tỹ ti tũ han kãn jé, ãjag tỹ Jesus Cristo ki ge kũ nỹtĩn kũ.

¹² ãg jykre vỹ Topẽ vĩ mranh sór mũ, ãg jykre ter ke tag. ãg jykre tỹ nén to é n mũ ãn han tũg nĩ, Topẽ vĩ mranh tũg nĩ.

¹³ Kejẽn ãjag tóg ãjag pẽn tỹ, ãjag nĩgé tỹ, ãjag nũnẽ tỹ, ãjag há ki nỹtĩ kar tỹ Topẽ vĩ mranh sór mũ. ãjag tỹ mranh kũ ãjag tóg ãjag há tỹ vẽn h jykre pãno han ja nỹtĩgtĩ, Topẽ kato tẽ ja nỹtĩgtĩ. Kũ ke tũg nĩ. Topẽ mũ vẽn h fẽg nĩ. ãjag jykre si ter kũ, ãjag jykre tãg nỹtĩn kũ Topẽ mũ vẽn h fẽg kãn nĩ, ti jykre hã han sórmnĩ, ãjag jykre tỹ, ãjag há ki nỹtĩ kar tỹ. ãg tỹ ti mũ vẽn h fẽg kũ ãg tóg ti jykre há han kãn ke mũ sir.

¹⁴ Kũ ãg tóg ãn Topẽ vĩ mranh tĩ ag ri ke tũ nỹtĩ ha, Topẽ tỹ ãg jagãgtãn kũ, ti tỹ ãg tar han kũ. Ti tỹ ãg jyvẽn ja ãn tugnĩn tóg ãg vóg kónãn ke mũ vẽn, ãg tỹ mranh kũ, hã ra tóg ãg jagãgtãn mũ ha.

Jesus Cristo tỹ ãg jykre tãg

¹⁵ Kũ Judeu ag hỹn inh mũ: “kũ Topẽ vỹ ãg tỹ ti vĩ mranh mũ ra ãg vóg kónãn mãn ke tũ nĩ. Kũ ãg hỹn jatun mũ mranh mũ,” he sór mũ. “ãg jagãgtãn ti tĩ, hã kũ tóg tỹ nén ã tũ nĩ, ti vĩ mranh mũ ti,” he sór ag hỹn mũ. Hã tũ vẽn hã ra. Kórég ti nĩ, ãg tỹ ti vĩ mranh kũ.

¹⁶ ãg tỹ ã mũ vẽn h fẽg kũ tóg tỹ ãg patrão nĩ, kũ ãg hã vỹ tỹ ti camarada nỹtĩ. Ri ke ti nĩ, ãg tỹ Topẽ vĩ mranh sór kũ. Ti vĩ mranh jafã vỹ tỹ ãg nỹtĩ, ãn kã. ãg tỹ Topẽ vĩ kri fig tĩ nĩn kũ ãg tóg ti mũ há nỹtĩ sir.

¹⁷ Vãsy ãjag tóg tỹ Topẽ vĩ mranh jafã ja nỹtĩgtĩ. Hã ra ãjag tóg ãn Topẽ vĩ kri fig tĩ

ha, ājag fe tỹ ti ki ge kỹ. Ājag tỹ Topě vī mē ja ěn kri fig ājag tóg tĩ, kỹ sóg Topě mỹ vī há han tĩ, ājag to.

¹⁸ Topě vỹ ājag jykre kugrynh, ājag tỹ tỹ ti vī mranh jafã tũ nỹtĩ jé, ũri. Kỹ ājag tóg tỹ Topě krēm ke nỹtĩ, ājag tỹ tỹ ti jykre kuryj mĩ mũ jafã nỹtĩ jé, ũri.

¹⁹ Ājag mỹ sóg ěg tỹ tỹ ti vī ki króm jafã nỹtĩ tag tó mũ, comparação han kỹ, ājag tỹ to ěg tỹ tỹ ũn há mỹ vĕnh fĕg ki kanhró nỹtĩ jé, hã vỹ: Topě, he mũ. Vãsỹ ājag tóg vĕnh jykre pãno han sór ja nỹtĩ, nĕn ũ kavėj ti, nĕn ũ kórég kar ti. Tag han kỹ ājag tóg ũn kórég mỹ vĕnh fĕg ja nỹtĩ. Ũri Topě mỹ vĕnh fĕg kãn, ājag tỹ tỹ ti tũ nỹtĩ jé, vĕnh jykre kuryj hã han jé sir.

²⁰ Vãsỹ, ājag tỹ tỹ Topě vī mranh kỹ nỹtĩn kỹ vĕnh jykre há tóg ājag mỹ tũg ja nĩ.

²¹ Kỹ ājag ne han ja nỹtĩ, tempo ěn kã? Vĕnh jykre kórég tãvĩ han ja ājag tóg nỹtĩ. Ājag tỹ ājag jykre si to jykrĕn kỹ tóg ājag mỹ'a tĩ, ũri. Vĕnh jykre tag tugnĩn ěg nũgme ki vár kãn ke mũ vĕ, hã kỹ tóg ājag mỹ'a tĩ, ājag tỹ ti kórég han ja to jykrĕn kỹ.

²² Ũri ājag tóg kygvar kỹ nỹtĩ, mỹr, ha mē, Topě vī mranh ja ěn tỹ tóg tũg' he ja nĩ. Topě mỹ ājag vĕnh fĕg kỹ nỹtĩ. Ājag tỹ nĕn han mũ vỹ tỹ ti tũ nĩ, ti jykre kuryj, kỹ ājag tóg ter ke tũ nĩ ha, ājag kuprĩg vỹ rĩr nĩ ha.

²³ Topě vī mranh tigrĩn ěg nũgme ki vár ke mũ vĕ. Topě tỹ ěg vóg kónãn hã vĕ. Hã ra tóg ěg jagãgtãn mũ, kỹ tóg ěg mỹ rĩr krỹg ja tũ ven ke mũ. Ti tỹ ěg mỹ presente han hã vĕ, hã vỹ: ěg tỹ ěg rĩr krỹg ja tũ venh ke, he mũ, ěg Senhor tỹ Jesus Cristo tugnĩn.

7

Vĕnh prũg to comparação

¹ Inh kanhkã', Topě tỹ vãsỹ ěg mỹ vĕnh jykre nĩm ja ěn ki kanhró ājag tóg nỹtĩ, Moisés tỹ rán ja ěn ti. ěg rĩr nỹtĩn kỹ ěg tóg vĕnh jykre ěn han kỹ nỹtĩ, ěg ter kỹ tóg ěg mỹ tũ' he mũ, vĕnh jykre ěn ti.

² Ri ke ti nĩ gé, ěg prũ fi mré. Fi mén rĩr jĕn kỹ fi tóg tỹ ti tũ jĕ, fi mén tũ. Ti ter kỹ fi tóg tỹ ti tũ tũ jĕ sir, ti tũg kỹ.

³ Fi mén rĩr jĕn kỹ fi tóg tỹ ti tũ jĕ. Fi tỹ ti rĩr tĩ ra ũ mré nỹ kỹ fi tóg ģ mén tũ mré nỹ mũ. Ti ter kỹ fi tóg mén tũ jĕ sir, kỹ, fi tỹ ũ

mré tĩg sór kỹ tóg sir há tĩ, fi mén vĕ sir, fi tỹ ũ mré tĩ mũ ěn ti.

⁴ Ri ke ti nĩ, Topě tỹ vãsỹ ěg mỹ vĕnh jykre nĩm ja ěn ti. Cristo ter kỹ tóg ěg jykre si tỹ tũg' hé gé. Hã kỹ tóg ěg tỹ ti tỹ ěg jyvĕn ja ěn mranh ja ra tóg ěg vóg kónãn ke tũ nĩ sir. Vãhã ěg tóg tỹ Cristo tũ nỹtĩ ha, ũ tỹ ter kar kỹ rĩr mãn ja ěn tũ vỹ tỹ ěg nỹtĩ. Kỹ ěg tóg ũri Topě jykre hã han sór mũ ha, ti mỹ sér tĩ jé.

⁵ Vãsỹ ěg tóg ěg tỹ nĕn to ěn ja ěn hyn han tĩ ja nĩgtĩ. Kỹ ěg tóg vĕnh jykre kavėj han kãn ja nĩgtĩ, ěg jykre tỹ, ěg há ki nỹtĩ kar tỹ ke gé. ěg jykre kavėj tigrĩn ěg nũgme ki vár ke mũ vĕ. Topě tỹ ěg jyvĕn mũ jĕmĕn kỹ ěg tóg ki kanhrãn mũ, ěg tỹ ti vī mranh mũ tag ki. Jérĩn mỹ ěg tóg mranh mãn', mranh mãn' he mũ sir.

⁶ Hã ra tóg ěg mỹ tũ tĩ ha, ěg tỹ Topě tỹ vãsỹ ěg jyvĕn jĕmĕg mũ ra mranh mũ ti, Cristo tỹ ter kỹ ěg jykre si tỹ tũg' hen kỹ. Topě vī mranh sór tũ ěg nỹtĩ ha. ěg kygvãn ti huri, kỹ ěg tóg Topě tũ hã han tĩ sir, Topě kuprĩg tỹ ěg krĩn kỹ. Kỹ ěg tóg Topě tỹ ěg jyvĕn to kanĕ jur han mãn ke tũ nĩ ha. Ki króm sór ěg nỹtĩ ha. ěg kanĕ jur pijé'. Topě kuprĩg tỹ ěg mỹ vĕnh jykre tãg nĩm jan hã vĕ.

Vĕnh jykre kórég han kỹ ěg Topě vī mranh tĩ

⁷ Kỹ Judeu ag hỹn inh mỹ: “kỹ Topě tỹ vãsỹ ěg jyvĕn mũ ěn mỹ kórég nĩ?” he sór mũ. Vó, kórég tũ ti nĩ. ěg jyvĕn ja tóg nĩgtĩ, kỹ ěg tóg ti vī mē kỹ: “vĕnh jykre kórég han kỹ inh hỹn tóg ti vī mranh tĩ,” he tĩ. Topě vỹ ěg mỹ: “nĕn ũ to ěn tũg nĩ,” he ja nĩ. Tag jĕmĕn kỹ ěg tóg ũ tũ to ěn tag tỹ Topě vī mranh nĩ ki kanhró nỹtĩ.

⁸ Topě tỹ ěg jyvĕn mũ ra ěg tóg ti vī mranh sór mũgtĩ, Jérĩn mỹ. Ti tỹ ěg mỹ: “tag han tũg ra,” he mũ ra ěg tóg han sór tĩ, hã kỹ ěg tóg ũ tũ to ěn sór tĩ. Topě tỹ ěg jyvĕn tũ ra ěg ki kanhrãn ke tũ nĩ vĕ, vĕnh jykre pãno tỹ ti vī mranh nĩn ki.

⁹ Vãsỹ ěg tóg Topě tỹ ěg jyvĕn mũ ěn mĕg tũ ja nỹtĩgtĩ. Véké ěg tóg mũ ja nỹtĩgtĩ, jatun mỹ. Kỹ tóg vãhã ěg mỹ ģ vī jĕnĕ ja nĩ, Topě ti, ěg jyvĕn kỹ. ěn mē kỹ ěg tóg ěg tỹ ti vī mranh ja ěn ki kanhrãn ja nỹtĩgtĩ, ěg tỹ to nũgme ki vár ke mũ mré hã. Kỹ ěg tóg kanĕ jur nỹtĩ ha.

10 Topě vỹ tóg ěg jyvĕn, ěg tỹ nũgme ki vár ke tũ nỹtĩ jé. Jérĩn mỹ ěg tóg ki vár ke mũ, ěg tỹ ti tỹ ěg jyvĕn kri fig tũ nĩn kỹ. Hã ve ěg tóg, ěg tỹ ti tỹ ěg jyvĕn mẽ kỹ.

11 Ěg tỹ Topě vĩ mranh kỹ ěg tóg Topě tỹ ěg jyvĕn mũ kato tẽ mũ. Kỹ ěg nũgme ki vár ke mũ sir, ěg tỹ: “ti hỹn tỹ nén ũ tũ nĩ, sỹ ti vĩ mranh mũ ti,” he mũ ra.

12 Hã kỹ Topě tỹ vãsỹ ěg jyvĕn mũ ěn vỹ há nĩ, ti tỹ tỹ Topě tũ nĩn kỹ. Kỹ Topě tỹ vãsỹ ěg mỹ vĕnh jykre nĩm ja ěn vỹ kuryj nĩ gé. Há ti nĩ, Topě tũ vỹ tỹ ti nĩ gé.

13 Kỹ Judeu ag hỹn inh mỹ: “ěg mỹ vĕnh jykre há tugnĩn nũgme ki vár ke mũ?” he sór mũ. Vó, ke tũ vĕ. Topě vĩ mranh tigrĩn ěg nũgme ki vár ke mũ. Nén ũ há ja vĕ, Topě tỹ ěg jyvĕn ja ti, hã ra ěg tóg mranh. Ěg tỹ Topě tỹ ěg jyvĕn mẽ kỹ ěg tóg ěg jykre kórég to: “ti vĩ mranh ja inh nĩgtĩ,” he tĩ. Hã ki ěg tóg ki kanhrãn mũ, ěg tỹ Topě vĩ mranh tag tỹ tỹ nén ũ kórég tãvĩ nĩn ki.

14 Topě tỹ ěg jyvĕn mũ ěn vỹ tỹ ti tũ nĩ, ti kuprĩg vỹ to ěg kanhrãn tĩ. Jérĩn mỹ ěg tóg ěg tỹ nén to ěn mũ ěn han sór tĩ, ěg krój nỹtĩn kỹ. Ti vĩ mranh kỹ ěg tóg tỹ ti vĩ mranh jafã nỹtĩ.

Ěg tỹ ti kórég han sór tũ ra ěg tóg han tĩ

15 Ěg jykre tóg inh mỹ e tĩ. Sỹ nén to há ěn han tũ sóg nĩgtĩ. Sỹ nén to há tũ ěn hã han sóg tĩ mỹr, kỹ tóg inh mỹ e tĩ.

16 Ěg tỹ ti kórég han sór tũ ra ěg tóg han tĩ. Ti vĩ mranh mũ vỹ ěg mỹ kórég nĩ, kỹ ěg tóg ki kanhró nỹtĩ, ti tỹ ěg jyvĕn há han ja ěn ki. Ge ra ěg tóg mranh tĩ.

17 Ěg jykre si hã vĕ. Ěg tỹ ěg jykre si tovãnh kãn ja tũ nĩn kỹ ěg tóg ti vĩ mranh tĩ, ěg tỹ mranh sór tũ (hã) ra. Ěg jykre tãg tũ vĕ, tag ti.

18 Ěg pi(jé) vĕnh jykre há to tar nỹtĩ!. Vĕnh jykre kórég vỹ ver ěg kãkã nĩ nĩ. Vĕnh jykre kuryj tóg ěg mỹ sér tĩ, ge ra ěg tóg ti pãno han tĩ, ěg tỹ ũn há han sór mũ ra.

19 Hã kỹ ěg pi(jé) vĕnh jykre há han tĩ', ěg tỹ han sór mũ ra'. Ti kórég hã han ěg tĩ, ěg tỹ han sór tũ ra.

20 Ěg tỹ nén han sór tũ ěn han ěg tóg tĩ, vĕnh vatãnh tá. Ěg jykre si hã tigrĩn ěg tóg Topě vĩ mranh tĩ, ěg tỹ tovãnh kãn ja tũ nĩn kỹ.

21 Ha vé, ěg jykre ti. Ũn há hã han sór ěg tóg mũgtĩ. Ge ra ěg tóg ũn kórég hã han tĩ, ěg jykre si tỹ ěg kãkã nĩn kỹ.

22 Ěg tỹ to jykren há han kỹ ěg tóg: “Topě tỹ ěg jyvĕn mũ vỹ há nĩ,” he ti. Ěg mỹ tóg sér tĩ.

23 Ěg tỹ hã ra ěg jykre to jykren kỹ ěg tóg vĕnh jykre kórég hã han mũgtĩ ver, vĕnh vatãnh tá. Kỹ ěg tóg sir vĕnh jykre há kato tẽ mũ, ěg tỹ vĕnh jykre kórég han kỹ, vĕnh jykre há tỹ ěg mỹ há nĩ (hã) ra. Ti vĩ mranh jafã vỹ tỹ ěg nỹtĩ, ěg tỹ Topě vĩ mranh to ěn kỹ, ěg tỹ to ěn sór tũ ra. Ěg kãkã tóg nĩ nĩ, vĕnh jykre kórég ti.

24-25 Ěg tỹ to jykren há han kỹ Topě tỹ ěg jyvĕn tĩ ěn tóg ěg mỹ há tĩ, kỹ ěg tóg han sór mũ. Ge ra ěg tóg ti vĩ mranh ja nĩgtĩ, kỹ ěg tóg mranh mãn', mranh mãn' he tĩ sir, ěg tỹ mranh sór tũ ra.

Jagy pĕ ti nĩ. Kórég ěg nỹtĩ, ěg tỹ ũn há han ki kagtĩg nỹtĩn kỹ. Nũgme ki vár kãn jé ěg tóg ke mũ mỹr. Ũ nỹ hỹn ěg kren han ki kanhró nĩ, vĕnh jykre kórég tag to? Ěg Senhor tỹ Jesus Cristo hã vĕ. Ti hã vỹ ěg kren han mũ. Kỹ ěg tóg Topě mỹ: “há ti nĩ, ã kósin tỹ ěg kren han mũ ti,” he tĩ. Hã kỹ ěg tóg vĕsóg ki ěg jykre si tỹ tũg' he ki kagtĩg nỹtĩ. Jesus hã tugnĩn Topě tóg ěg mỹ vĕnh pãte fón tĩ, kỹ ěg tóg ti mỹ há nỹtĩ.

8

Topě kuprĩg tỹ ěg jagrĕ

1 Kỹ tóg, ěg tỹ Jesus Cristo ki rã kỹ Topě tóg ěg vóg kónãn mãn ke tũ nĩ ha.

2 Vĕnh jykre tãg vỹ ěg kãkã nĩ ha, Topě kuprĩg tigrĩn, ěg tỹ Jesus Cristo ki ge kỹ nỹtĩn kỹ. Ti tỹ tỹ ěg jagrĕ nĩn kỹ ěg rĩnrĩr nỹtĩ, kỹ ěg kygvar kỹ nỹtĩ sir, Topě vĩ mranh jan ki. Nũgme ki vár ke tũ ěg nỹtĩ ha.

3 Topě tỹ vãsỹ ěg jyvĕn mũ ra ěg krenkren ja tũ nĩ ver, ěg tỹ ki króm kãn ja tũ nĩn kỹ, ěg krónhkrój nỹtĩn kỹ. Hã kỹ Topě tóg ã kósin jĕnĕ ja nĩ. Ũ tỹ Topě vĩ mranh jafã ri ke tóg mur, ěg ri ke, hã ra tóg mranh ja tũ nĩnhã. Kỹ tóg ěg jagfy ter ja nĩ, ěg hã tỹ ti vĩ mranh ja tigrĩn. Topě tỹ ti vóg kónãn hã vĕ, ěg nỹtĩg ja ki.

4 Vãhã ěg tóg Topě tỹ vãsỹ ěg jyvĕn mũ ěn ki króm há nỹtĩ, Topě kuprĩg tỹ tỹ ěg jagrĕ

nĩn kÿ. Kÿ ãg tóg ãg tÿ nén to én mÿ ãn han mǎn ke tũ nÿtĩ sir, ãg jagrẽ há tÿ ãg tar han mÿ tugnĩn.

⁵ ãg tÿ ãg tÿ nén to én mÿ ãn han sór kÿ ãg tóg tÿ Topẽ vĩ mranh jafã nÿtĩ. ãg tÿ hã ra Topẽ kuprĩg tÿ jagrẽ nĩn kÿ ãg tóg ti hã tÿ ãg mÿ nén tó mÿ ãn han tĩ.

⁶ ãg tÿ nén to én mÿ ãn han kÿ ãg nũgme ki vár ke mÿ vẽ. ãg tÿ Topẽ kuprĩg tÿ ãg mÿ nén tó mÿ ãn han kÿ ãg tóg vẽn h jykre tãg han kÿ nÿtĩ, kÿ ãg jatun mÿ mũgtĩ sir.

⁷ Û tÿ ãg tÿ nén to én mÿ ãn han kÿ tóg Topẽ kato tẽ mÿ sir. Ti pi(jé) Topẽ jykre han tĩ'. Han ki kagtĩg tóg nĩgtĩ. ãg jykre sin hã vẽ.

⁸ Û tÿ ãg tÿ nén to én mÿ ãn han to tóg kórég nĩ, Topẽ ti.

⁹ Ag jãvo ãjag tóg Topẽ kuprĩg tÿ ãjag mÿ nén tó mÿ ãn hã han tĩ. ãg tÿ nén to én mÿ ãn han vãn h ãjag nÿtĩ, Topẽ kuprĩg tÿ tÿ ãjag jagrẽ nĩn kÿ. Û tÿ Cristo kuprĩg tÿ jagrẽ tũ nĩ ãn pi(jé) tÿ ti tũ nĩ'.

¹⁰ Cristo tũ vÿ tÿ ãg nÿtĩ, kÿ tóg ãg kãkã jẽ nĩ, Jesus Cristo ti, ã kuprĩg tÿ. Kÿ ãg há vÿ ter ke mÿ, ãg tÿ Topẽ vĩ mranh jan kÿ. Hã ra ãg tóg ãg rĩr krÿg ja tũ venh ke mÿ, Topẽ tÿ ãg mÿ vẽn h pãte fón ja nĩn kÿ.

¹¹ Topẽ kuprĩg vÿ tÿ ãg jagrẽ jẽ ha. Topẽ vÿ Jesus rĩn mǎn, ti ter kar kÿ. Ti tÿ Jesus rĩn mǎn kÿ tóg ãg há ter ke tag rĩn mǎn ki kanhró nĩ gé, ãg mÿ ãg há tãg han kÿ, ti kuprĩg tÿ tÿ ãg jagrẽ nĩn kÿ.

¹² Inh kanhkã', Topẽ tũ vÿ tÿ ãg nÿtĩ ha, ãg tÿ ti jykre hã han jé. Kÿ han tũg nĩ, ãjag tÿ nén to én mÿ ti.

¹³ ãg tÿ nén to én mÿ ãn han kÿ ãg nũgme ki vár ke mÿ. Topẽ tÿ ãg jagrẽ vÿ ãg tÿ nén to én mÿ tag tÿ tũg' he sór mÿ. ãg tÿ ti mré tÿ tũg' hen kÿ ãg vẽn h jykre tãg han kÿ nÿtĩn mÿ.

¹⁴ ãg tÿ Topẽ kuprĩg tÿ ãg mÿ nén tó tĩ ãn han kÿ ãg tóg tÿ Topẽ krẽ nÿtĩ, Jesus jãvy ãg nÿtĩ mÿr, ha mẽ.

¹⁵ ãg tÿ tÿ Jesus jãvy nÿtĩn kÿ ti pi(jé) ãg kanẽ jun ke mÿ'. Ti kuprĩg vÿ tÿ ãg jagrẽ nĩ, kÿ ãg tóg tÿ Jesus jãvy nÿtĩ ha. Topẽ pi(jé) tÿ ãg patrão kórég ri ke nĩ'. Tÿ tóg ãg panh nĩ ha. Hã kÿ ãg tóg ti mÿ: "Aba," he tĩ, hã vÿ:

"ãg jóg," he mÿ, ãg vĩ ki. ãg jagrẽ hã jamẽn kÿ ãg tóg ti mÿ: "ãg jóg mág," he tĩ.

¹⁶ Topẽ kuprĩg hã ne ãg mÿ tó tĩ', ãg tÿ tÿ Topẽ krẽ nÿtĩ ti, Jesus jãvy. Hã kÿ ãg ki kanhró nÿtĩ.

¹⁷ ãg tÿ tÿ ti krẽ nÿtĩn kÿ tóg ãg mÿ ã tũ nĩm kãn ke mÿ gé, Topẽ ti. Jesus Cristo hã mÿ tóg nĩm kãn ke mÿ, kÿ tóg ãg mÿ nĩm kãn ke mÿ gé sir, ãg kãke mré. Hã jé ãg tóg ti mré jagãgtar ke mÿ gé, ti tÿ vẽn h jykre há to jagtar ja ãn ri ke. Kÿ ãg tóg ti mré tÿ ãn mág nÿtĩn h ke mÿ gé, ãg jagtar kar kÿ.

Kanhkã ve jé ãg tóg ke mÿ

¹⁸ Ha vé, tag ki kanhró sóg nĩ, ha mẽ. Kanhkã tá tóg sér pẽ tĩn mÿ. Tá ãg tóg tÿ ãn mág nÿtĩn mÿ. Kÿ ãg tÿ ãri ti tugnĩn jagãgtar mÿ tag vÿ tÿ ãg mÿ nén ã tũ pẽ nĩgtĩ, ãg tÿ tÿ ãn mág nĩn h ke to jykren kÿ.

¹⁹ Topẽ vÿ ã krẽ tÿ tÿ ãn mág han ke mÿ. Kÿ Topẽ tÿ ãn han mÿ kar ag tóg tag hã ve sór mÿ gé, bicho kar, ka kar, êkré kar ke gé, nén kar ti.

²⁰ Nén kar vÿ jagãgtar nÿtĩ, ãn ve tÿ Topẽ vĩ mranh tugrĩn. Vẽn h kókén ja tũ ti nĩ, Topẽ vĩ mranh ja tũ ti nĩ, hã ra tóg ãn ve tÿ Topẽ vĩ mranh ja tugnĩn jagtar nÿtĩ, Topẽ tÿ ãg mré ti vóg kónãn kÿ, nén kar ti.

²¹ Hã ra Topẽ tóg ã tÿ ãn han mÿ kar ag mÿ: "kejẽn ãjag jagtar mǎn ke tũ nÿtĩ ha," he ja nĩ. Kÿ Topẽ tÿ Jesus jãvy ag tÿ ãn mág hyn han ke kurã ãn kã tóg nén kar tÿ há' henh ke mÿ gé, kÿ tóg tũg mǎn ke tũ nĩ ha, nén kar ti. Nén kar vÿ há nÿtĩn mÿ, Jesus jãvy há nÿtĩn h ke ãn ri ke.

²² Ver tóg Topẽ tÿ ãn han mÿ kar ag mÿ jagy tĩ, kÿ tóg fag tÿ fag kósin mǎn kÿ fag vẽn hkrẽr ãn ri ke han tĩ, Topẽ tÿ ãn han kar ti, ti jagãgtar nÿtĩn kÿ.

²³ Nén ã kar tag vẽn hkrẽr ri ke han ãg tóg tĩ gé, ãg tÿ ti jagy ven kÿ, ãg tÿ ti kuprĩg tÿ jagre nÿtĩ ra. ãg jagrẽ to ãg tóg ki kanhró nÿtĩ, ãg tÿ tá tÿ ãn mág nÿtĩn h ke ti. Ge ra tóg ver ãg mÿ jagy tĩ, tag ti ki, kÿ ãg tóg ti mré nÿtĩ sór mÿ. Kÿ ãg tóg venh ke mÿ sir, ti tÿ ã krẽ pẽ mÿ nén nĩm ke mÿ ãn ti. Hã jãvãn h ãg tóg mÿ. ãn kã tóg ãg mÿ ãg fár tãg han ke mÿ, ãg fár ter ke tũ ti.

²⁴ Krenkren kÿ ãg nÿtĩ, hã ra ãg tóg ver vég tũ nĩgtĩ, ãg krenkren kÿ nÿtĩ tag, ãg fár

tăg tag. Ëg tỹ venh há tóg tĩ. Hã jăvănĥ ãg tóg tĩ. Ëg tỹn jăvănĥ mũ ra ãg tóg ver vég tũ nỹtĩ. Ëg tỹn ve kar kỹ ãg tóg ti jăvănĥ măn ke tũ nỹtĩ ha.

²⁵ Hã ra ãg tóg ver vég tũ nỹtĩ, hã kỹ ãg tóg ti jăvănĥ mũ ra ver. To krónĥ ke tũ ãg tóg nỹtĩ, ti jăvănĥ to.

Topě kuprĩg tỹ ãg jagfy vĩ

²⁶ Hã ra Topě kuprĩg vỹ ãg tar han tĩ, ãg krój nỹtĩn kỹ. Kejĕn ãg ki kagtĩg nỹtĩ, ãg tỹ ne to vĩnh ken ki, ãg tỹ Topě mré vĕmĕn kỹ. Hã kỹ tóg ãg jagfy vĩ tĩ, Topě kuprĩg ti. Kejĕn ãg jĕnger mág han tĩ, ãg tỹ nĕn ũ to vĩnh ken ki kagtĩg nỹtĩn kỹ. Hã ra tóg ãg mré vĩ tĩ gé, ãg jagfy, Topě kuprĩg ti. Ti vĩ ki kagtĩg ãg nỹtĩ, hã ra tóg ãg jagfy vĩ' vĩ' he tĩ.

²⁷ Kỹ Topě vỹ ãg tỹ nĕn ũ to jykrĕn mũ kar vég tĩ. Kỹ tóg ã kuprĩg tỹ nĕn tó mũ tag ki kanhró nĩ gé. Ti jykre vỹ ti mỹ há nĩ, ti tỹ nĕn to vĩ mũ ti, ãg jagfy, Topě tũ kar ag jagfy. Topě tỹ nĕn ũ han sór mũ ĕn hã to vĩ tóg tĩ, ti kuprĩg ti.

²⁸ Ha vé, Topě to há ãg nỹtĩ, hã kỹ ãg tỹ nĕn vég mũ kar vỹ ãg tar han ke mũ, ãg tỹ ti jagy vég mũ mré hã. Topě hã vỹ ãg ki rĩr mũ, hã kỹ nĕn ũ kar vỹ ãg tar han ke mũ, ti tỹ ãg kuprĕg ja nĩn kỹ.

²⁹ Ëg tỹ ti ki ge tũg ki tóg: “inh ki tóg rănĥ ke mũ, tag,” he ja nĩ, ki kanhró nĩn kỹ. Kỹ tóg ãg kuprĕg ja nĩ gé, ãg tỹ ti kósĩn ri ke pĕ nỹtĩ jé. Ti hã vỹ tỹ Topě kósĩn pĕ nĩ inhĥã, ti kósĩn ve, kỹ tóg tỹ ãg kãke nĩ gé sir, kỹ ti jăvy ag, ti ve fag vỹ e tăvĩ tăvĩ nỹtĩnĥ mũ ha. Ëg hã vĕ sir. Topě tỹ nĕn to jykrĕn hã vĕ.

³⁰ Hã jé tóg ãg kuprĕg, kỹ tóg ãg mỹ vĕnh vĩ jĕnĕ. Ti tỹ ãg mỹ vĕnh vĩ jĕnĕ kỹ tóg ãg mỹ vĕnh pãte fón gé. Ëg mỹ vĕnh pãte fón kỹ tóg ãg tỹ ũn mág hyn han ke mũ gé, ti mré, tá.

Topě tỹ ãg to há

³¹ Tag tóg inh mỹ e tĩ, sỹ to jykrĕn ke tóg inh mỹ tũ tĩ. Topě vỹ tỹ ãg mré ke nĩ mỹr. Hã kỹ ãg kato tĕ ũ pi(jé) ãg tỹ ĕrĩ kenĥ mũ ha'.

³² Topě vỹ ã kósĩn pir fĕg ja nĩ, ti tỹ ãg jagfy ter jé. Ā kósĩn pir nenĥ ja tũ tóg nĩ, hã kỹ tóg ãg mỹ nĕn ũ há nenĥ ke tũ pĕ nĩ, ti tỹ ã kósĩn pir nenĥ ja tũ nĩn kỹ.

³³ Topě tỹ ãg kuprĕg kỹ tóg ũ tỹ ãg kato vĩ sór mũ ra tóg ag mỹ vĕnhmỹ tĩ. Topě hã ne ãg mỹ vĕnh pãte fón ja nĩgtĩ'.

³⁴ Kỹ ũ ag tỹ ãg to: “kórĕg ag nỹtĩ,” he mũ ra ãg tóg Topě mỹ há nỹtĩ. Jesus Cristo hã tóg ter ja nĩ, ãg jagfy, kỹ tóg rĩr măn ja nĩ gé. Topě pĕgia tá tóg nĩ nĩ, ti rã hã, kỹ tóg ãg jagfy vĩ tĩ.

³⁵ Kỹ ũ pi(jé) Cristo tỹ ãg to jũ han ki kanhró nĩ'. Ti fe vỹ tỹ ãg nỹtĩ. Kejĕn ãg tóg nĕn ũ jagy venĥ ke mũ, ti tugrĩn. Kejĕn ãg kanĕ jur ke mũ. Kejĕn ag tóg ãg vóg kónãn ke mũ. Kejĕn ãg tóg kókĩnkĩr ke mũ. Kejĕn ãg tóg kur venĥ ke tũ nĩ gé. Kejĕn ãg tóg kãgter kren ke mũ. Kejĕn ag tóg ãg kãmĩ ũ tĕn ke mũ. Jérĩn mỹ ãg tóg Cristo tovãnh ke tũ nĩ. Kỹ tóg ãg tovãnh ke tũ nĩ gé, Jesus Cristo ti. Ëg to há nĩn kỹ tóg nĩ nĩ.

³⁶ Kejĕn ãg tóg ti jagy tag vég tĩ, hã kỹ tóg rán kỹ nĩ, ha mĕ: “ãg tỹ ã to há nỹtĩ tugnĩn ag tóg ãg tĕn sór tĩ, kurã kar ki. Ag mỹ ãg tóg carneiro ri ke nỹtĩ. Carneiro tãnh ãg tóg tĩ, ãg tỹ ko jé. Vĕnh mĕg ri ke ãg nỹtĩ, ag mỹ, ãg tỹ ã to há nỹtĩ tugrĩn,” he ja tóg nĩ, Topě vĩ rá ki. Hã ra tóg ge nĩ.

³⁷ Hã ra tóg tỹ nĕn ũ tũ nĩ, ãg mỹ. Ti hã ne ãg tar han tĩ', ũ tỹ ãg to há tăvĩ nĩ tĩ. Hã kỹ tóg ãg mỹ sér tĩ, ãg tỹ nĕn jagy vég mũ ra, ti tugrĩn.

³⁸ Ha vé, tag ki kanhró sóg nĩ, ha mĕ. Nĕn ũ pi(jé) Topě tỹ ãg to há nĩ tag tỹ tũg' henĥ mũ', ha mĕ. Ëg ter mũ ra tóg ãg to há nĩ, ãg ter tũ ra ke gé. Topě tỹ jĕnĕ jafã ag vỹ Topě tỹ ãg kato tĕ han ki kagtĩg nỹtĩ gé. Japo ag vỹ ti tỹ ãg kato tĕ han ke tũ nĩ gé, ag tỹ han sór mũ ra. Pã'i kar ag vỹ tag han ki kagtĩg nỹtĩ gé. Ëg tỹ ũri nĕn ũ jagy vég mũ ra ãg tóg ti tovãnh ke tũ nĩ, kỹ tóg ãg to jũnh ke tũ nĩ gé, ãg tỹ kejĕn nĕn ũ jagy tăvĩ vég mũ ra.

³⁹ Kanĥkã tãn ag vỹ ti tỹ ãg to jũ han ke tũ nĩ gé, nũgme tãn ag ke gé, ag tỹ ti tỹ ãg to jũ han sór mũ ra. Topě tỹ nĕn hyn han ja kar vỹ ti tỹ ãg to jũ (jé) han ke tũ pĕ nĩ. Ëg to há nĩ kỹ tóg nĩ nĩ, ãg tỹ ãg Senhor tỹ Jesus Cristo ki ge kỹ nỹtĩn kỹ.

9

Topě tỹ Judeu ag kuprĕg

¹ Nén ù tó sór inh mũ gé, ha mẽ. Cristo vỹ ki kanhró nĩ, sỹ tónh ke mũ tag. Sỹ ki hã ke vễ, ón tũ sóg nĩgtĩ, kỹ Topẽ kuprĩg vỹ inh mỹ: “ki hã ã tóg tó,” he tĩ gé.

²⁻³ Ha mẽ, inh mré ke ag to sóg fe kaj tãvĩ nĩ, Judeu ag to, ag tỹ Jesus kato tẽn kỹ. Fỹ sóg tĩ, sỹ ag mũ ěkrén kỹ, inh mỹ tóg vẽn kaga jagy ri ke nĩ, ha mẽ. Kỹ, Topẽ tỹ ag jagfy inh kato tẽ ra tóg inh mỹ há tĩ vễ, Jesus tỹ ěg jagfy ter ri ke, ag tỹ ti ki ge jé. Ti tỹ ag jagfy isỹ Cristo mré ke tũ han ra tóg inh mỹ há tĩ vễ. Tỹ ag tóg inh kanhkã pẽ nỹtĩ,

⁴ isỹ tỹ ag mré Israel krẽ nĩn kỹ. Tỹ ag tóg Topẽ krẽ ja nỹtĩ vễ, kỹ tóg ag mỹ ã jykre tar ven ja nĩ gé. Ag mré vẽn jykre tỹ hẽn ri ke han ja tóg nĩgtĩ, ag jyvẽn ja tóg nĩgtĩ gé, kỹ ti vĩ tó tĩ ag vỹ rán ja nĩgtĩ gé, Topẽ vĩ ti. Ti jo ĩn pẽ han ja ag tóg nĩgtĩ, Jerusalém tá, krẽm nén ù kar pũn jafã. Ag mỹ tóg ã tỹ nén han ke ti kãmén ja nĩgtĩ.

⁵ ěg jóg'jóg ve ag, ù tỹ vãsỹ Topẽ mré vēmén tĩ ag vỹ ag jóg'jóg ve nỹtĩ gé, kỹ Cristo vỹ tỹ ag kã ù nĩ gé, ag kanhkã, ti tỹ ga kri tĩg kỹ. ěg kri ke kar vễ, Cristo ti, Topẽ ti. Ti hã mỹ ěg vĩ há han ke mũ, to ěg krónh ke vãnh nỹtĩ, ga kri, kanhkã tá ke gé, ti mỹ vĩ há han to. Amém.

⁶ Jesus kato tẽ ag tóg nỹtĩ ha, Israel ag, Topẽ tỹ ag jyvẽn ja ra. Hã kỹ tóg Topẽ tỹ ag mỹ tó há han ja tũ nĩ ve nĩ. Hã tũ vễ hã ra. Ag hã ne to jykrén há han ja tũ nĩ', ti tỹ ag mỹ tó há han ja ra. ěg tỹ to jykrén há han kỹ ěg Israel ag jykre ki kanhrãn mũ, ha mẽ: Israel krẽ ù tóg tỹ Topẽ krẽ pẽ tũ nỹtĩ, ha mẽ.

⁷ Hã ra ag tóg: “Abraão vỹ tỹ ěg jóg'jóg ve nĩ,” he tĩ, “hã kỹ ěg tóg tỹ Topẽ krẽ nỹtĩ, Abraão tugnĩn,” he ag tóg tĩ. Kygnẽ kỹ ag tóg tag tó tĩ, ha mẽ. Topẽ tóg Abraão mỹ: “ã kósin tỹ Isaque krẽ vỹ tỹ ã krẽ pẽ nỹtĩnh mũ,” he ja nĩ.

⁸ Hã ra Abraão vỹ krẽ e han ja nĩgtĩ, kósin pir tũ ti nĩ. Hã kỹ Abraão krẽ ù vỹ tỹ Topẽ krẽ tũ nỹtĩ, Abraão tỹ ag han ja ra. Û tỹ Topẽ ki ge kỹ nỹtĩ ag hã vỹ tỹ Topẽ krẽ nỹtĩ, Topẽ tỹ ùn kuprẽg ja ag.

⁹ Topẽ vỹ Abraão mỹ: “prỹg tũg kỹ sóg ã venh kãtũg mãn ke mũ, kỹ Sara fi kósin vỹ kã nỹnh mũ sir, ha vemnĩ,” he ja nĩ. Topẽ tỹ

Abraão mỹ Isaque mur ke tó jan hã vễ, ti tỹ Isaque hã kuprẽg jan kỹ.

¹⁰ Kỹ tóg ge nĩ gé, ěg tỹ Rebeca fi krẽ to jykrén kỹ, Isaque prũ fi. Krẽ vẽnri han ja fi nĩ, kỹ ag tóg tỹ ěg jóg tỹ Isaque krẽ kar nỹtĩ, ùn vẽnri ja ag.

¹¹⁻¹² Kỹ ag mur tũg ki, ag tỹ ver nén ù han tũg ki Topẽ tóg ag mỹnh fi mỹ: “ùn mur vén ke mũ vỹ tỹ ù tỹ ti nón mur ke mũ ěn krẽm ke jẽn h ke mũ, ha vemnĩ,” he ja nĩ. Topẽ tỹ fi mỹ tó kã ag tóg nén ù há mré nén ù kórég han ja tũ nĩ ver. Ag mur tũg ki ke ja vễ. Topẽ tỹ ěg mỹ ã jykre ven sór ja vễ, hã kỹ tóg ag mur tũg ki tag tó ja nĩ. Ā tỹ nén to jykrén mũ ěn han ti tĩ, Topẽ ti. Kỹ tóg ã tỹ ùn kuprẽg sór mũ ěn hã kuprẽg tĩ gé, ag tỹ ver nén ù han tũg ki.

¹³ Hã kỹ tag tóg rán kỹ nĩ gé, Rebeca fi krẽ ěn ag to, ha mẽ: “Jacó to inh há nĩ, hã ra sóg ti jo mur ja tỹ Esaú to kórég nĩ,” he ja tóg nĩ, Topẽ vĩ rán ki.

¹⁴ Kỹ Judeu ag hỹn inh mỹ: “Topẽ jykre vỹ há tũ nĩ,” he sór mũ. “Kuryj tũ ti nĩ, ti tỹ vėsóg ki nén to jykrén sór kỹ, ti tỹ ùn kuprẽg mũ ěn to,” he ag hỹn tĩ. Hã tũ vễ hã ra.

¹⁵ Hã kỹ tóg Moisés mỹ: “isỹ ùn jagãgtãn sór mũ ěn hã jagãgtãn jé sóg ke mũ,” he ja nĩ, Topẽ ti.

¹⁶ ěg tỹ to vãsãn tũ vễ, ěg tỹ to tar nĩnh ke tũ vễ. Topẽ tỹ vėsóg ki ěg jagãgtãn hã vễ.

¹⁷ Hã kỹ ga tỹ Egito tá pã'i tỹ Faraó to tag tóg rán kỹ nĩ gé, ha mẽ. “Ùn tar vỹ tỹ inh nĩ,” he ja ti nĩ, Topẽ ti, Faraó mỹ. “Ā tỹ sóg ùn tar han, vẽnri kar tỹ isỹ tỹ ùn tar nĩ tag ki kanhró nỹtĩ jé, isỹ ã vóg kónãn to, ã tar jẽ ra. Vẽnri kar tỹ inh jyjy mẽnh ke vễ, hã jé sóg ã fẽg,” he ja ti nĩ, vãsỹ, Topẽ ti, Faraó mỹ.

¹⁸ Hã kỹ, Topẽ tỹ ùn jagãgtãn sór nĩn kỹ tóg ti jagãgtãn tĩ sir. Hã ra tóg ù tỹ mẽ jãvãn ěn ti kutu kãfór han mũ sir, Faraó ri ke.

Topẽ tỹ ã tỹ nén han sór mũ ěn han tĩ

¹⁹ Kỹ Judeu ag hỹn inh mỹ: “kỹ ěg hỹn Topẽ tỹ ěg kuprẽg tũ tũgrĩn kutu nỹtĩnh mũ,” he sór mũ. “Ti tũgnĩn ke vễ. Kỹ ti tỹ ne jé ěg vóg kónãn sór nẽ?” he sór ag hỹn mũ, ón kỹ Topẽ to vĩn kỹ.

²⁰ Ha vé, ěprã ke vỹ tỹ ěg nỹtĩ. Ti vĩ kafãn ke tũ pẽ ěg tóg nĩ. Ti kamẽg jé ěg tóg ke mũ. Ā tỹ nén han sór mũ ěn han ti tĩ.

Ēg rānhrāj to jykrén nī. Kejēn ěg tóg nén ũ han tī, go'or tỹ. Kỹ go'or tóg ěg mỹ: “isỹ kukrũ kórég han tũg nī, isỹ kukrũ sīnvī han nī,” he tũ nĩgtī. Ēg vī kafān ke tũ ti nī, go'or ti. Ēg tỹ tỹ nén han sór mũ ěn han ěg tóg tī, ti ki jēmē vānh ěg nỹtī.

²¹ Go'or ũ tỹ ěg kukrũ sīnvī han tī, ũ tỹ ěg kukrũ kórég han tī. Ēg tỹ nén han sór mũ ěn han ěg tóg tī.

²² Topē vỹ ěg rānhrāj tag ri ke han tī gé. Ti tỹ nén han sór mũ ěn han ti tī, ěg tỹ, ěg tỹ ti mỹ go'or tỹ kukrũ ri ke nỹtīn kỹ. Ũ ag to tóg jũ tī, ěg kar tỹ ag ki ti tar nī to jykrén jé, ti jũ ěn ti, Topē ti. Kỹ tóg kānhmar ag to jũnh ke vē vē, hā ra tóg ver ag to fe mág nī, ag kórég tāvī nỹtī ra, ti tỹ ũ to jũnh ke mũ ag. Hā ra tóg ag vóg kónān ke mũ, ha vemnī.

²³ Kỹ tóg ũ ag jagāgtān mũ gé, vēnh kar tỹ ag ki Topē tỹ tỹ ũn há tāvī nī to jykrén jé, ěg há kar káfór. Hā jé tóg ag kuprēg ja nĩgtī. Ti tỹ ag tỹ ũn mág han sór vē, ti mré.

²⁴ Ēg hā vē sir, ũn kuprēg kỹ nỹtī tag ag. Hā kỹ tóg ěg mỹ vēnh vī jēnē. Judeu ag kāmī tóg ěg mỹ vēnh vī jēnē, fóg ag kāmī ke gé, kanhgág ag kāmī ke gé, ti tỹ ěg jagāgtān sór kỹ.

²⁵ Hā kỹ Oséias tóg tag tó ja nī, ha mẽ. “Vāsỹ ag vỹ tỹ inh mré ke tũ ja nỹtī, hā ra sóg ag mỹ: “inh mré ke vỹ tỹ ājag nỹtīnh mũ ha, isũ ag,” he sór mũ, he ti, Topē ti,” he ja tóg nĩgtī, Oséias ti. “Vāsỹ sóg ag to há tũ ja nĩgtī, hā ra sóg ag to há nīnh mũ ha,” he ti.

²⁶ “Vāsỹ sóg ag mỹ: “ājag pi(jé) tỹ isũ nỹtī,” he ja nĩgtī. Hā ra sóg ag mỹ: “Topē krē vỹ tỹ ājag nỹtīnh mũ,” hēnh ke mũ, “ũn rīr nī ěn krē vỹ tỹ ājag nỹtīnh mũ,” he jé sóg ke mũ ag mỹ,” he ti, Topē ti,” he ja tóg nī, Oséias ti. Ti tỹ ũ tỹ ũri Cristo ki ge kỹ nỹtī ag kāmén hā vē.

²⁷ Kỹ Isaiás vỹ Israel krē ag to tag tó, ha mẽ: “e ag nỹtī, Israel krē ag, rỹnhrỹj e nī ěn ri ke, goj kāmī pó rynthryj e nī ěn ri ke. Ge ra ag pipir nỹtīnh mũ, ũn krenkren ke mũ ag.

²⁸ Topē vỹ kānhmar ā tỹ nén tó ja ěn han ke mũ, ga tag ki, kỹ tóg ag vóg kónān kān ke mũ, ũn e ěn ag, ag kórég nỹtīn kỹ,” he ja ti nī, Isaiás ti.

²⁹ Kỹ tóg tag tó ja nī gé, ha mẽ: “ěg tũg kān kren ti, Topē ti, vēnh kar kri nī ěn ti. Hā ra tóg ěg kāmī ũn pipir krenkren han ja nĩgtī.

Cidade tỹ Sodoma tá ke ag tũg kān ja tóg nī, Topē ti, cidade tỹ Gomorra tá ke ag ke gé. Kỹ tóg ěg tũg kān kren gé, ag ri kén, hā ra tóg ěg kāmī ũ krenkren han mũ,” he ja tóg nī, Isaiás ti.

³⁰ Oséias mré Isaiás ag tỹ tó mũ vỹ ge nī, ha mẽ. Fóg ag, kanhgág ag pi(jé) vēnh jykre kuryj nón mũ ja nĩgtī'. Ge ra Topē tóg ag jagāgtān kỹ ag mỹ vēnh pāte fón mũ ha, ag tỹ Jesus ki rā kỹ.

³¹ Ag jāvo Israel krē ag vỹ ājag jykre hā tỹ Topē tỹ ag jyvēn ki króm sór ja nĩgtī. “Ti vī han ěg tī, kỹ tóg ěg to há nī,” he ag tóg tī. Hā ra ag tóg ki króm kān ja tũ nī, hā kỹ Topē tóg ag to há tũ nī, jérīn mỹ.

³² Hē ri ken kỹ hỹn'? Ag tỹ ti ki ge ja tũ nīn kỹ, hā kỹ tóg ag mỹ vēnh pāte fón ja tũ nī gé. Ag tỹ vēsóg ki Topē jykre ki króm sór ja vē. Hā kỹ ag tóg ón kỹ ki króm ja nĩgtī. Hā kỹ ag tóg Cristo kato tē nỹtī.

Pó ri ke ti nī, Cristo ti, ěg tỹ tỹ krīm ke jafā. Ag tỹ ti tỹ krīm ke jan hā vē, hā vỹ: ti ki rā tũ, he mũ.

³³ Hā kỹ tag tóg rán kỹ nī, Jesus Cristo to, ha mẽ. “Pānónh sī tỹ Siāo pēnīn cidade ki sóg pó nīm mũ, ag tỹ tỹ krīm ke jé. Kỹ ag tóg, pāró tag tỹ ag tóg krīm ke kỹ vár ke mũ sir. Hā ra ũ tỹ ti ki rā mũ vỹ ā tỹ nén ve sór mũ ěn venh ke mũ,” he ja ti nī, Topē vī rán ki, Jesus Cristo to.

10

Judeu ag tỹ Jesus ki ge kỹ krenkren ke

¹ Inh kanhkā', isỹ inh mré ke tỹ Israel tỹ krenkren han venh há tāvī tóg tī, hā jé sóg Topē mré vēmén tī.

² Topē vī han jé ag tóg vāsānsān mũgtī, tag vég isóg nī nī. Hā ra ag tóg ki kagtīg nỹtī, kỹ ag tóg ěg tỹ nén han ke tũ ěn han tī.

³ Vēsóg ki ag tóg vēnh jykre kuryj to vāsān sór tī. Hā ra ũ tỹ ěg mỹ vēnh jykre kuryj nīm sór mũ vỹ tỹ Topē ti nī. Tag ve sór tũ ag nỹtī, Topē tỹ ěg mỹ nīm ke tag. Hā kỹ ag tóg Topē kato vāsānsān mũ.

⁴ Cristo vỹ hur kātīg. Kỹ ěg tóg ti ki ge kỹ nỹtīn kỹ ti mỹ há nỹtī ha. Ēg tỹ Topē tỹ vāsỹ ěg jyvēn ki króm tugnīn ke pijé'. Jesus Cristo ki rā tigrīn ke vē.

⁵ Ha vé, Moisés vỹ Topē jykre si to tag rán, ha mẽ. “Ũ tỹ vēnh jykre kuryj han kān mũ

vỹ rĩr nĩnh ke mũ, ù tỹ ge vỹ rĩr krỹg ja tũ venh ke mũ, ti tỹ Topẽ tỹ ẽg jyvẽn tí ẽn ki króm kãn tugnĩn,” he ja tóg nĩ, Moisés ti. Hã ra ẽg tóg ki króm kãn ki kagtĩg nỹtĩ, hã kỹ ẽg tóg ẽg tỹ ki króm kãn sór mũ ra rĩr nĩnh ke tũ nĩ.

⁶ Ẽg tỹ Jesus ki rã tugrĩn ẽg Topẽ mỹ há nỹtĩ. Kỹ ẽg tóg: “ũ nỹ hỹn kanhkã ra tĩg mũ, Cristo pére kãtĩg jé?” henh ke tũ pẽ nĩ. Mur kỹ ti nĩ ha.

⁷ Kỹ ẽg: “ũ nỹ hỹn vẽn kuprĩg ag jamã ra tĩg mũ, Cristo rĩn mãn jé?” henh ke tũ pẽ nĩ gé. Rĩr mãn kỹ ti nĩ ha.

⁸ Tag tó jé ẽg tóg ke mũ, ha mẽ: “jagy tũ ti nĩ, Topẽ vĩ ti, to jykrén há ti nĩ. Kãnhmar ẽg tónh ke mũ, kãnhmar ẽg to jykrén ke mũ, Topẽ vĩ to,” he jé ẽg tóg ke mũ.

Topẽ vĩ tag hã tó sóg tí. “Jesus Cristo ki rã tugnĩn ẽg krenkren ke mũ,” he sóg tí.

⁹ Ẽg krenkren jé ẽg tóg Jesus to: “ẽg Senhor vỹ tỹ ti nĩ,” henh ke mũ. Vẽn kar mỹ ẽg tónh ke mũ. Kỹ ẽg tóg ẽg fe tỹ ti ki rãnh ke mũ gé. Topẽ tỹ ti ter kar kỹ ti rĩn mãn ja tag vỹ tỹ ẽg mỹ ki hã ke nĩ, kỹ ẽg kri fig mũ. Kỹ ẽg tóg krenkren ke mũ sir.

¹⁰ Ẽg tỹ ẽg fe tỹ ti ki rã kỹ ẽg tóg ti mỹ há nỹtĩ. Ẽg tỹ vẽn kar mỹ ti kãmén kỹ ẽg krenkren ke mũ sir.

¹¹ Hã kỹ tag tóg rãn kỹ nĩ, ha mẽ: “ẽg tỹ ti ki ge kỹ ẽg tóg ẽg tỹ nén ve sór mũ ẽn venh ke mũ,” he ja tóg nĩ, Topẽ vĩ rãn ki.

¹² Vẽn kar mỹ ke vẽn sir, vẽn vĩ tag. Judeu ag mỹ ke vẽn, kar kỹ fóg ag mỹ ke vẽn gé, kanhgág ag mỹ ke vẽn gé. Tỹ tóg ẽg kar Senhor nĩ mỹr. Kỹ, ẽg tỹ ti mỹ nén ù to vĩn kỹ tóg ẽg mỹ nén ù tỹ hẽn ri ke nĩm ke mũ gé sir, ẽg kar mỹ.

¹³ Tag hã vỹ rãn kỹ nĩ gé, ha mẽ: “ẽg tỹ ẽg Senhor mỹ: “inh kren han nĩ,” hen kỹ ẽg krenkren ke mũ, ẽg kar,” he ja tóg nĩ, Topẽ vĩ tỹ rãn kỹ nĩ ki.

¹⁴ Ẽg tỹ ti ki rã tũ nỹtĩ ra ẽg tóg: “inh kren han nĩ,” he ki kagtĩg nỹtĩnh mũ vẽn. Ẽg tỹ ti vĩ mẽ ja tũ nỹtĩ ra ẽg tóg ti ki ge ki kagtĩg nỹtĩnh mũ vẽn. ù tỹ ẽg mỹ ti vĩ tó tũ nĩ ra ẽg ti vĩ mẽnh ke tũ nĩnh mũ vẽn.

¹⁵ Topẽ tỹ ag jẽgnẽg tũ nĩ ra ag tóg ẽg mỹ ti vĩ tónh ke tũ nĩnh mũ vẽn. Hã kỹ tag tóg rãn kỹ nĩ, ha mẽ. “Ù tỹ ẽg mỹ Topẽ vĩ sér ma kãmũ ag junjun vỹ ẽg mỹ sér pẽ tí,” he ja tóg

nĩ, Topẽ vĩ tỹ rãn kỹ nĩ ki. Topẽ tỹ ã vĩ tó tí ag jẽgnẽ to ken hã vẽn.

¹⁶ Hã ra ù ag tóg kri fi jãvãnh nỹtĩ gé, ag tỹ ón kỹ mẽg mũ ra, Topẽ vĩ sér ti. Isaías vỹ ag to Topẽ mỹ tag tó ja nĩ. “Ẽg jóg mág', inh vĩ mẽ jãvãnh ag nỹtĩ,” he ja tóg nĩ.

¹⁷ Hã kỹ tóg, ẽg tỹ ti vĩ mẽ há han kar kỹ ẽg tóg ti ki rã tí. Ẽg tỹ Cristo kãmẽ mẽ kỹ ẽg ti ki rã tí.

¹⁸ Kỹ ãjag hỹn inh mỹ: “Judeu ag mỹ hẽn ri ke mũn mẽ ja tũ nĩ, hã kỹ ag mỹ ti ki ge ja tũ nĩ?” he sór mũ, ãjag tỹ inh carta tag ve kỹ. Vó, mẽ kỹ ag nỹtĩ vẽn. Tag vỹ rãn kỹ nĩ, ha mẽ: “ga kar mĩ ag tóg mẽ ja nĩgtĩ, ã vĩ ti. Ga fyr tá tóg jun gé, ã vĩ ti,” he ja ti nĩ, Topẽ vĩ rá ki.

¹⁹ Kỹ ãjag hỹn inh mỹ: “kỹ Judeu ag hẽn ri ke mũn to jykrén há han ki kagtĩg nỹtĩ, ag tỹ mẽg mũ ra?” he sór mũ, ãjag tỹ inh carta tag ve kỹ. Vó, ag tỹ to jykrén sór kỹ ag tóg to jykrén mũ vẽn. Moisés vỹ ẽg mỹ tag kãmén, ha mẽ: “Topẽ tóg fóg mré kanhgág to tag tó sór mũ, ha mẽ,” he tóg. “Ag vỹ tỹ isũ tũ nỹtĩ ver, hã ra sóg ag tỹ isũ han sór mũ, ãjag tỹ ag ve kỹ ãjag tỹ inh ki rã to én jé,” he tóg. “Fóg mré kanhgág ag vỹ ãjag mỹ krĩ tũ nỹtĩ, hã ra sóg ag to há nĩ sór mũ, ãjag tỹ ag tugrĩn jũgũ jé, he tóg, Topẽ ti,” he ja tóg nĩgtĩ, Moisés ti, Judeu ag mỹ.

²⁰ Kỹ Isaías tóg tag tó mũ gé, fóg ag to, kanhgág ag to, ha mẽ. “Ù ag tóg inh jãvãnh ja tũ nỹtĩgtĩ, hã ra ag tóg inh vĩ jẽmẽg mũ ha. Topẽ hẽn ri ke tí? he ja tũ ag nỹtĩ, hã ra sóg ag mỹ inh vĩ jẽnẽg mũ ha, he tóg, Topẽ ti,” he ja ti nĩ gé, Isaías ti. Pã'i ag kamẽg vãn kỹ tóg Judeu ag mỹ fóg ag mré kanhgág ag tỹ Topẽ ki genh ke tó ja nĩ, Isaías ti.

²¹ Kỹ tóg Israel ag to tag tó ja nĩ gé sir, ha mẽ: “kurã kar ki sóg ãjag mỹ: kunĩg, he tí. Hã jé sóg ãjag mỹ inh nĩgé ven tí, ãjag tỹ gĩr mỹ ãjag nĩgé ven tí ẽn ri ke. Hã ra ãjag tóg inh vĩ mẽ jãvãnh nỹtĩ'. Inh vĩ kafãn kónãn ãjag tóg mũ mỹr',” he ja tóg nĩ, Isaías ti, ti tỹ Judeu ag mỹ Topẽ vĩ tón kỹ.

11

Israel krẽ'krẽ pipir ag vỹ tỹ Topẽ tũ nỹtĩ

¹ Kỹ ãjag hỹn: “kỹ Topẽ mỹ ã povo tỹ Israel tovãnh kãn kỹ nĩ?” he sór mũ, ãjag tỹ inh carta tag ve kỹ. Vó, ag tovãnh kãn tũ ti nĩ.

Hã vé, tỹ sóg Israel krẽ nĩ gé, hã ra sóg ti ki rã. Abraão krẽ'krẽ ù vỹ tỹ inh nĩ gé, ti kósin'kósin tỹ Benjamim krẽ'krẽ ù mỹr.

² Isovãnh ja tũ ti nĩ, Topẽ ti, hã kỹ tóg ã povo tovãnh kãn ja tũ nĩ. Nén kar han tũg ki tóg ãg kuprẽg ja nĩ, ãg tỹ tỹ ti tũ nỹtĩ jé.

Elias to jykrén nĩ. Ti kãme tóg rán kỹ nĩ, Topẽ vỹ rá ki. Elias tempo kã Israel ag tóg Topẽ kato tẽ mũ. Kỹ ag tóg Elias kato tẽ mũ gé, ti tén jé. Hã kỹ tóg Topẽ mỹ tó mũ, Elias ti, kỹ tóg:

³ “Senhor’,” he mũ. “Ã vỹ tó tĩ ag kãgtén kãn ag huri, ã mỹ pũn jafã kókén ag huri ke gé. Inh pir mỹ sóg kren, kỹ ag tóg isén sór mũ ha ke gé. Á tovãnh kãn kỹ ag nỹtĩ,” he ja tóg nĩ, Elias ti, Topẽ mỹ, Israel ag to.

⁴ Hã ra Topẽ tóg ti mỹ: “krĩ kufy han tũg nĩ,” he mũ. “Û tỹ 7 mil (ke) vỹ ki nỹtĩ, ù tỹ isovãnh tũ ag, sỹ ùn kuprẽg ja ag. Tag ag vỹ vãnh kãgrá tỹ topẽ tỹ Baal mỹ: “Topẽ vỹ tỹ ã nĩ,” he ja tũ nĩ,” he ja tóg nĩ, Topẽ ti, Elias mỹ. Ti tỹ Israel pipir ag tỹ Topẽ tovãnh tũg ja ãn tó vẽ.

⁵ Ge ti nĩgtĩ, ùri. Pir ag nỹtĩ, Israel tỹ Topẽ to há nỹtĩ ag. Ti kato tẽ kãn tũ ãg mỹr. Topẽ vỹ ãg jagãgtãn, kỹ tóg ãg kuprẽg, hã kỹ ãg tóg ti to há nỹtĩ, ãg pipir nỹtĩ ra, ãg tỹ tỹ Israel krẽ nỹtĩn kỹ.

⁶ ãg tỹ vêsóg ki han pijé', ãg tỹ to vãsãn pijé'. Topẽ tỹ vêsóg ki ãg jagãgtãn hã vẽ. Ke tũ nĩ mũ ra tóg: “vêsóg ki sóg ãg jagãgtãn,” henh ke tũ nĩ vẽ. Hã ra tóg vêsóg ki ãg jagãgtãn.

⁷ Ge ti nĩ, ha mẽ, Israel ag vỹ ve sór ja nĩgtĩ, Topẽ tỹ ãg mỹ nén ù há ven ke ãn ti, hã ra ag tóg vãnh ke tũ nĩ. Topẽ tỹ ùn kuprẽg mũ ag hã mỹ tóg ven tĩ, Topẽ ti. Jãvo ù ag tóg kutu nỹtĩ sir, ag tỹ Topẽ vỹ mẽ jãvãnh nỹtĩn kỹ.

⁸ Hã kỹ tag tóg rán kỹ nĩ, Israel ag to, ha mẽ: “Topẽ vỹ ag krĩ tũ han, hã kỹ ag tóg ti vỹ rá vэг mũ ra to jykrén tũ nỹtĩgtĩ. Mẽg tũ ag nỹtĩ, ãg nĩgrẽg ra. Ùri ag tóg gen kỹ nỹtĩnh mũ ver,” he ja ti nĩ, Topẽ vỹ rán ki.

⁹ Kỹ Davi vỹ Judeu ag to tag tó ja nĩ gé, ha mẽ: “Topẽ mỹ festa han ag tóg tĩ. Hã ra ag tóg ón kỹ ti mỹ festa han tĩ, kỹ ag tóg to sigse kỹ nỹtĩnh mũ, ag festa to. Ag sigse kỹ tóg ag vóg kónãn ke mũ, Topẽ ti. Krenkren ke tũ ag tóg nĩ.

¹⁰ Kutu ag nỹtĩ, to jykrén ke tũ pẽ ag nỹtĩ, kỹ ag tóg vãnh jykre kufy hã vãnh ke mũ, hã to ag jagtar nỹtĩnh mũ,” he ja tóg nĩ, Judeu ag to, Davi ti.

Judeu ag to é henh ke tũ ãg tóg nĩ

¹¹ Kỹ ãg hỹn inh mỹ: “kỹ Topẽ mỹ Judeu ag tỹ nũgme ki vár ke tag ve sór mũ, hã jén mỹ ag mỹ Jesus jẽnẽ ja nĩ, ag tỹ ti tỹ prãnh ke jé?” he sór mũ. Vó. Hã ra ag tóg Topẽ kato tẽgtẽ tĩ. Ti vỹ mranh ja ag tóg nỹtĩgtĩ, hã kỹ Topẽ tóg fóg ag mré kanhgág ag krenkren han sór mũ, Judeu ag tỹ ag ve kỹ ti ki ge to ãn jé.

¹² Kỹ Judeu ag tỹ Topẽ vỹ mranh kỹ Topẽ tóg fóg mré kanhgág kar to há nĩ. Kỹ Judeu ag vỹ jagãgtar nỹtĩ. Ag nỹtĩg ja ki ù ag kar vỹ Topẽ tỹ ag to há nĩ vэг mũ. Há ti nĩ, tag. Kỹ, Topẽ tỹ Judeu ag to há' he mãn nĩ ra tóg hã ra ga kri mũ kar mỹ há pẽ tãvĩ tĩnh mũ vẽ, mỹr, ha mẽ. Hã ra tóg ag to há tũ nĩ ver.

¹³ Kỹ sóg ãg mỹ tag tó sór mũ, ãg tỹ tỹ fóg nỹtĩn kỹ, kanhgág ag mỹ ke gé. ãg apóstolo vỹ tỹ inh nĩ, sỹ ãg mỹ Topẽ vỹ tó jé. Inh rãnrãj vỹ inh mỹ sér pẽ tĩ.

¹⁴ Isỹ ãg mỹ Topẽ vỹ tó kỹ inh mré ke ag hên ri ke mũn ãg kóm Jesus ki ge sór mũ gé, kỹ ag krenkren ke mũ sir, Israel ag.

¹⁵ Ha vé, Topẽ tỹ inh mré ke ag tovãnh to tóg povo ù ag to há nĩ ha, ag to jũ mãn tũ tóg nĩ sir. Topẽ tỹ Israel ag to há' he mãn mũ ra tóg vãnh kar mỹ há pẽ tãvĩ tĩnh mũ vẽ, kỹ vãnh kar vỹ rĩnrĩr mãn ke mũ vẽ, ùn kãgter mũ ag mré hã. Hã ra tóg ag to há tũ nĩ ver.

¹⁶ Ëmĩ to jykrén nĩ. Ëmĩ kubar ko há nĩn kỹ tóg ko há kar nĩ. Ge ti nĩgtĩ gé, ka tỹ. Ti jãre há nĩn kỹ ka vỹ há kar nĩ. Israel ag vỹ tag ri ke nỹtĩ. Ag jóg'jóg ve ag vỹ ka jãre ri ke nỹtĩ. Topẽ mỹ ag há nỹtĩ ja nĩgtĩ, hã kỹ ag krẽ vỹ Topẽ mỹ há nỹtĩnh ke mũ gé.

¹⁷ Povo tỹ Israel vỹ ka tỹ oliveira há ri ke nỹtĩ. Ti jãre vỹ há nĩ, hã ra ti pẽ ù tóg kórég nỹtĩ. Hã kỹ tóg mrynhmranh kỹ vãvãm mũ, Topẽ ti, ti pẽ kórég ãn ti. Ti tỹ Israel kórég ag togvãnh to ken hã vẽ, hã vỹ: ka pẽ kórég vãvãm, he mũ. Ka pẽ kórég tag nỹtĩg ja ki tóg ka ù pẽ vin, vãnh kãmĩ ka tỹ oliveira pẽ tỹ, ùn kanẽn vãnh pẽ tỹ. ãg hã vẽ sir, ãg tỹ tỹ fóg nỹtĩn kỹ, kanhgág ag ke gé. Hã ra ka ù pẽ tag vỹ ka há jãre ãn tỹ ti kume vэг tĩ, kỹ

tóg tỹ há' he mũ sir. Ājag tỹ Topẽ tỹ Israel jóg'jóg ve tỹ Abraão mỹ nén tó ja ěn vég mũ to ken há vễ, há vỹ: ka há jãre kume vég mũ, he mũ.

¹⁸ Kỹ Israel ag to é he sór tũg nĩ, Topẽ tỹ ag vãm mũ ra, ěg tỹ ka pẽ kórég vãm ri ke. Ag nỹtĩg ja ki ājag nỹtĩ. Hã ra ka jãre vỹ tỹ Judeu ag jóg'jóg ve nỹtĩ. Ājag jóg'jóg ve pijé', fóg pijé', kanhgág pijé'. Judeu ag vễ. Kỹ Judeu ag to é he sór tũg nĩ.

¹⁹ Hẽn ri ke mũn ājag tóg inh mỹ: “hã ra tóg Judeu ag vãm, ěg to há nĩ jé,” he sór mũ. “Hã kỹ tóg ěg to há nĩ,” he ājag hỹn mũ.

²⁰ Hỹ, ag vãm tóg. Hã ra ag tóg ti ki rã jãvãnh ja nỹtĩgtĩ, há kỹ tóg ag vãm. Jãvo tóg ājag to há nĩ, ājag tỹ ti ki ge to. Hã kỹ ag to é he sór tũg nĩ. Topẽ kamẽg nĩ mỹr.

²¹ Israel krẽ ag tỹ ti ki ge jãvãnh tũgnĩn tóg ag vãm. Ag jagãgtãn jãvãnh tóg nĩ ha. Kỹ tóg ājag jagãgtãn ke tũ nĩ gé, ājag tỹ ti ki ge to tar tũ nỹtĩn kỹ. Hã kỹ ti há kamẽg nĩ.

²² Hã ki Topẽ tỹ tỹ ùn há nĩ tóg ve há tĩ, há ra tóg ù ag vóg kónãn jagy han tĩ gé. Û tỹ ti vỹ mranh mũ ag vóg kónãn jagy han tóg tĩ, Topẽ ti. Hã ra tóg sir ājag to há nĩ sir, ājag tỹ ti tovãnh tũ nĩn kỹ. Ājag tỹ ti tovãnh kỹ tóg ājag vãm ke mũ gé, ha vemnĩ.

²³ Judeu ag tỹ ti ki ge kỹ tóg ag to há nĩ mãn ke mũ gé sir, kỹ tóg ka há ki ti pẽ mrynhmráj ja ěn ki vin mãn ke ri ke nĩ sir.

²⁴ Ha vé, ājag há vỹ tỹ ka kanẽn vãn pẽ ri ke nỹtĩ'. Hã ra tóg ka há ki ājag vin, ājag tỹ tỹ ka kanẽn vãn pẽ nỹtĩ ra. Kỹ tóg, ti tỹ ka há ěn pẽ mrynhmráj ja ěn ki vin mãn sór nĩ ra tóg vin mãn mũ sir, ka há ěn ki, há vỹ: Judeu ag tỹ Jesus ki rã, he mũ. Ka há pẽ mrynhmráj ja ěn ki vin mãn to ken há vễ. ěg pi(jé) ka kanẽn vãn pẽ tỹ ka kanẽn há ki vin tĩ'. ěg tỹ ka há pẽ tỹ ki vin mãn tag vỹ jagy tũ nĩ vễ. Hã kỹ tóg Topẽ mỹ jagy tũ tĩ, ti tỹ Judeu ag to há nĩ mãn kỹ.

Topẽ tỹ Israel ag krenkren han sór

²⁵ Isỹ ājag mỹ nén ù kãmén sór vễ, ājag tỹ mẽ ja tũ ù, ha mẽ. Sỹ ājag mỹ kãmén sór vễ, ājag tỹ Judeu ag to é he tũ nĩ jé. Ha vé, Israel ù ag vỹ ver mẽ sór tũ nỹtĩ. Û ag tóg mẽ sór mũ, há ra ù ag tóg mẽ jãvãnh nỹtĩ gé, vẽn kar tỹ Topẽ vỹ mẽ jé, Judeu tũ ag kar. Kejẽn

ag tóg mẽ kãn ke mũ, fóg kar, kanhgág kar ke gé.

²⁶ Ag tỹ mẽ kãn ke ěn kã Israel ag tóg krenkren ke mũ gé. Hã kỹ tag tóg ag to rãn kỹ nĩ, ha mẽ: “ag krenkren han tĩ vỹ jun ke mũ. Pãnónh sĩ tỹ Sião pẽnĩn cidade ěn tá tóg vẽn ven ke mũ, ag krenkren han tĩ ti. ěn vỹ Jacó krẽ ag tỹ inh vỹ mranh ja ěn tỹ vẽn pãte fón ke mũ, Israel krẽ en ag mỹ.

²⁷ Sỹ ag mré jykrén jan há vễ. Ag tỹ inh vỹ mranh tỹ sóg tũg' he mũ,” he ja tóg nĩ, Topẽ vỹ rá ki, Judeu ag to.

²⁸ Jesus kato tẽ ag tóg mũ ver, ti kãmé sér mẽ jãvãnh ag nỹtĩ ver, há kỹ ājag tóg ag nỹtĩg ja ki Topẽ vỹ sér mẽg mũ. Hã ra ag jóg'jóg ve ag vỹ Topẽ to há nỹtĩ ja nĩgtĩ, há kỹ Topẽ tóg ag krẽ'krẽ to há nĩnh ke mũ ge kejẽn, ti tỹ vãsỹ ag kuprẽg ja nĩn kỹ.

²⁹ Topẽ tỹ ù to há nĩn kỹ tóg ti to há nĩ, ti tỹ ù kuprẽg kỹ tóg kuprẽg kỹ jẽ nĩ gé. Tỹ tũg' henh ke tũ ti nĩ, Topẽ ti.

³⁰ Vãsỹ ājag tóg Topẽ vỹ ki kagtĩg ja nỹtĩgtĩ gé. Hã ra Topẽ tóg ùri ājag jagãgtãn, ājag tỹ ti ki ge jé, Judeu ag tỹ ti vỹ mranh ag nỹtĩg ja kã.

³¹ Kỹ ěn ag tóg ti vỹ mranh mũgtĩ ver, Topẽ tỹ kar kỹ ag jagãgtãn jé, ti tỹ ājag jagãgtãn ri ke.

³² Kỹ Topẽ tóg ěg kar mỹ ěg tỹ ti vỹ mranh mũ tag ven kãn sór mũ, ěg tỹ to jykrén mãn jé. Ti tỹ ěg jagãgtãn sór vễ, ěg tỹ ti ki ge jé, há jé tóg ěg mỹ ěg tỹ ti vỹ mranh mũ ven sór mũ.

Topẽ jykre tỹ ěg jykre kãfór nĩ

³³ Topẽ vỹ tỹ ùn mág pẽ nĩ, mỹr, ha mẽ. Ti jykre vỹ vẽn kar kri nĩ kar nĩ. Ve kãn jãvãnh ěg nỹtĩ, ti jykre ti, tá krỹg jãvãnh ěg nỹtĩ. Nén ù kar ki kanhró ti nĩ mỹr, nén ù kar to jykrén há han kãn ti tĩ mỹr. Ti tỹ nén to jykrén mũ ve kãn ke tũ pẽ ěg nĩ. “Ti hỹn hẽ ri ken kỹ tag han?” henh ke tũ ěg tóg nĩ gé. To jykrén kórég ěg tóg nỹtĩ.

³⁴ Û nỹ Topẽ tỹ nén to jykrén mũ ki kanhró nĩ? Ki kagtĩg kar ěg nỹtĩ. Û nỹ Topẽ mỹ: “tag han ra, tag han tũg ra,” he tĩ? Û vỹ ti jyvẽn ke tũ pẽ nĩ.

³⁵ Û nỹ ti mỹ nén ù nĩm', Topẽ tỹ ti mỹ kajãm jé'? Nén kar vỹ tỹ ti tũ nỹtĩ mỹr, há kỹ tóg ěg há mỹ nén ù kar nĩm tĩ, ěg jagãgtãn kỹ.

³⁶ Topě hã ne nén kar hyn han'. Ti hã jaměn kÿ ěg tóg nÿtĩ, nén ũ kar vÿ ti jaměn kÿ nÿtĩ gé. Hã kÿ ěg tóg tÿ ti tũ nÿtĩ gé, nén ũ kar ti ke gé. Kÿ ti hã ne tóg tÿ ũn mág nĩ', ti pir mÿ. Ti hã mÿ ěg tóg vĩ há han tĩ, to krónh ke tũ ěg nĩ, ga kri, kanhkã tá ke gé. Amém.

12

Topě mÿ ěg věnh fěg ke mũ

¹ Inh kanhkã', Topě vÿ ājag jagāgtān. Hã kÿ sóg ājag mÿ: “ti mÿ věnh fěg,” he mũ. Kÿ tóg ěg tÿ ti mÿ nén ũ pũn ri ke nĩ, ěg tÿ ti mÿ věnh fěg kÿ. Judeu ag vÿ ājag mēg tãnh kÿ pũn tĩ. Ag jāvo ěg tóg ti mÿ ěg rĩnrĩ nÿtĩn kÿ věnh fěg tĩ. Ti mÿ tóg sér tĩ, ěg tÿ tag han kÿ, ěg tÿ tÿ ti tũ nÿtĩn kÿ sir. Gen kÿ ājag tóg Topě jykre han ke mũ.

² Ěprã ke ag jykre han sór tũg nĩ. Topě vÿ ājag krĩ tãg han sór mũ. Věnh jykre tãg han sór tóg mũ. Kÿ ājag tóg nén há han ki kanhró nÿtĩnh mũ. Věnh jykre kuryj han jé ājag tóg ke mũ. Kygněnh ke tũ ājag tóg nĩ. Tag ve sór tóg mũ, Topě ti. Tag hã to tóg ěg kanhrãn ke mũ.

³ Ha vé, Topě vÿ isar han, kÿ sóg ājag jyvěnh há han ki kanhró nĩ. Hã kÿ sóg ājag kar mÿ tag tó mũ. Věsÿ ũn mág han sór tũg nĩ. “Tÿ inh ũn mág nĩ,” he tũg nĩ, ā tÿ tÿ ũn mág tũ nĩn kÿ. Ěg kar vÿ Topě ki ge kÿ nÿtĩ, kÿ tóg ěg kar tÿ nén ũ to tar han tĩ, ěg kar tÿ ti rãnrãj han jé. Tag to jykren kÿ jagně to é he tũg nĩ.

⁴ Ěg há to jykren nĩ. Ti ki nÿtĩ vÿ e nÿtĩ, ěg pěn, ěg nĩgnó, ěg kaně, ěg nĩgrěg, ti kar ti. Ěg há ki nÿtĩ vÿ jagně kóm rãnrãj nÿtĩ kar nÿtĩ, vyr mÿ.

⁵ Ge ti nĩgtĩ, ěg mré. E ěg nÿtĩ, hã ra ěg tÿ Cristo ki ge kÿ nÿtĩn kÿ ěg tóg ěg há ri ke nÿtĩ, kÿ ěg tóg jagně ki rĩr ke mũ sir, ěg há ki nÿtĩ tÿ jagně ki rĩr tĩ ěn ri ke.

⁶ Hã ra ũ tóg nén ũ han há nĩgtĩ, kÿ ũ tóg nén ũ ũ han há nĩgtĩ gé, Topě tÿ to ěg tar han kÿ. Ěg kãmĩ ũ mÿ tóg: “ag jyvěnh nĩ,” he tĩ, Jesus ti. Kÿ Topě tÿ ā mÿ nén tó mũ hã tÿ ěg jyvěnh nĩ, ti tÿ ā mÿ: “ag jyvěnh nĩ,” hen kÿ.

⁷ Ěg kãmĩ ũ mÿ tóg: “ũn jagāgtar ag jagāgtān nĩ,” he tĩ gé. Kÿ ěg jagāgtān há han to tar nĩmnĩ. Ěg kãmĩ ũ mÿ tóg: “inh vĩ kãmén nĩ,” he tĩ gé. Kÿ to krónh ke tũg nĩ.

⁸ Ěg kãmĩ ũ mÿ tóg: “ag mÿ ag tÿ nén han ke kãmén nĩ,” he tĩ gé. Kÿ ā rãnrãj tag ki rĩr há han nĩ. Ěg kãmĩ ũ mÿ tóg: “ā tÿ nén ũ nĩm mág nĩ, inh mÿ,” he tĩ gé. Kÿ ón kÿ ti mÿ nĩm sór tũg nĩ. Ěg kãmĩ ũ mÿ tóg: “culto to pã'i vÿ tÿ ā nĩ,” he tĩ gé. Ā tÿ tÿ to pã'i nĩn kÿ to jykren há han nĩ. Ěg kãmĩ ũ mÿ tóg: “ag jagāgtān nĩ,” he tĩ gé. Kÿ ti tÿ ā mÿ ā tÿ ěg jagāgtān ke tag tó kÿ to mÿ sér nĩmnĩ. Ěg tÿ jagně ki rĩr to ken hã vē.

⁹ Jagně to há tãvĩ nÿtĩmnĩ. Ón kÿ jagně to há nÿtĩ sór tũg nĩ. Věnh jykre pãno to kórég tãvĩ nÿtĩmnĩ, kÿ tovãnh kãn nĩ. Věnh jykre há hã mĩ mũmnĩ.

¹⁰ Jagně to há pě tãvĩ nÿtĩmnĩ, ājag tÿ jagně mré pafa ja ag to há ri ke nÿtĩmnĩ, jagně to. Jagně mÿ koměr hã vĩmnĩ, ěg tÿ pã'i mÿ koměr hã vĩ ěn ri kemnĩ, jagně mÿ.

¹¹ Topě jykre to krónh ke tũg nĩ. Ti tÿ ājag mÿ: “tag han ra,” he to jěnjěr ke tũg nĩ gé, to vãsãn nĩ. Ti kuprĩg tÿ ājag mÿ nén tó mũ ěn ki króm nĩ, kÿ tóg ājag mÿ sér tĩnh mũ. Ěg Senhor tũ han nĩ.

¹² Topě vÿ ěg mÿ nén ũ há kar han ke mũ. Tag to mÿ sér nÿtĩmnĩ. Kejěnh ājag tóg nén ũ jagy venh ke mũ, ti tugnĩn. Tag to krónh ke tũg nĩ. Topě mré vēmén kÿ nÿtĩmnĩ.

¹³ Ājag mré Topě ki rã ũ jagtar nĩn kÿ ti jagāgtān nĩ. Ũ tÿ ājag to pasa ke kÿ ti mÿ: “inh mré nĩ,” hemnĩ.

¹⁴ Kejěnh ũ tóg ājag vóg kónãn sór mũ. Ěn to Topě mÿ: “ti jagāgtān nĩ,” hemnĩ. Ti to: “ti vóg kónãn nĩ,” he tũg nĩ.

¹⁵ Kejěnh tóg ũ mÿ sér tĩ. Kÿ ti mré mÿ sér nÿtĩmnĩ gé. Kejěnh ũ tóg fÿ tĩ. Ti mré fÿmnĩ gé.

¹⁶ Jagně mré věnh jykre pir hã han nĩ, hã vÿ: jagně to há, he mũ. Věsÿ ũn mág han sór tũg nĩ. Tÿ ũn kãsir ag mré ke nÿtĩmnĩ. “Ag mré ke vÿ tÿ inh nĩ,” hemnĩ, ũn kãsir ag to. Hěn ri ke mũn ājag kãmĩ ũ tóg věnh kanhrãn mág to tar nĩ, ājag kãfór. Ti jé: “ag kãfór inh nĩ, věnh kanhrãn mág ja tag to,” he tũg nĩ.

¹⁷ Kejěnh ũ tóg ājag mÿ nén ũ kórég han tĩ. Ge ra ti mÿ nén ũ há hã han nĩ. Věnh kar mÿ vĩ há tãvĩ han nĩ, ũ tÿ ājag to: “kygně ti huri,” he tũ nĩ jé.

¹⁸ Vãsãn nĩ, ājag tÿ ũ to krĩ rÿ tũ nÿtĩ jé, ājag tÿ věnh kar to krĩ kuprã nÿtĩ jé.

19 Inh kanhkã, ù tỹ ãjag mỹ nén ù kórég han mũ ra vènh kajãm sór tũg nĩ. Topẽ hã tóg ã tỹ ti to jũnh ke ãn ki kanhró nĩ'. Hã kỹ tag vỹ rán kỹ nĩ, ha mẽ: “inh hã ne ãjag kajãm ke mũ', inh hã ne ag mỹ ven ke mũ', ag tỹ ãjag jykre kórég to jagãgtar ke ti, he ti, ãg Senhor ti,” he ja tóg nĩ, Topẽ vỹ tỹ rán kỹ nĩ ki.

20 Kỹ ù tỹ ãjag kato tẽ mũ mỹ nén ù há kar han nĩ. Tĩ kókĩr nĩn kỹ ti mỹ vèjẽn ven nĩ. Tĩ hãghã kỹ ti mỹ goj ven nĩ. Gen kỹ ã tóg ti mỹ'a pẽ han ke mũ, ha vemnĩ, ã tỹ ti to há nĩn kỹ, ti tỹ ã to kórég nĩ ra.

21 Ù tỹ vènh jykre pãno han mũ ag vỹ ãg kato tẽ tĩ. Kỹ ãg tóg ag ki rĩr ke mũ, vènh kaja jé. Ag jagtar nỹtĩn kỹ ãg tóg ag jagãgtãn ke mũ. ãg tỹ ag jagãgtãn kỹ ag jykre pãno tóg ag mỹ vènhmỹ nĩnh mũ, ag tỹ ãg jykre ve kỹ, ha vemnĩ.

13

ãg pã'i ag

1 ãg kri pã'i vỹ nỹgtĩ. Kỹ tóg ãg tỹ ag vỹ ki han há tĩ. Topẽ tỹ ag tỹ pã'i han hã vè, ag krĩn kỹ. Tĩ hã vỹ ù tỹ hẽ nỹ tỹ pã'i nĩnh ke to jykren tĩ'.

2 Kỹ ag kato tẽ sór tũg nĩ. Topẽ hã vỹ ag vin tĩ, pã'i ag krĩn kỹ, kỹ ag kato vãsãn tũg nĩ. Ù tỹ ag kato vãsãnsãn mũ ag vóg kónãn jé ag tóg ke mũ, pã'i ag.

3 ãg tỹ vènh jykre há han kỹ ãg tóg pã'i ag vég mũ ra kanẽ jur han ke tũ nĩ. Ù tỹ vènh jykre kórég han mũ ag vỹ vèso kanẽ jur tĩ, pã'i ag ve kỹ. Kỹ ãg hỹn hẽ ri kenh ke mũ, ag tỹ ãg kanẽ jun tũg jé? Vènh jykre há tãvĩ han jé ãg tóg ke mũ, kỹ ag tóg ãg to vèmén há han ke mũ sir, pã'i ag.

4 ãg pã'i ag ne ãg jyvèn tĩ', ãg tỹ vènh jykre há to tar nỹtĩ jé. Ag tỹ Topẽ tỹ ag mỹ nén tó mũn han hã vè. ã tỹ vènh jykre kórég han kỹ kanẽ jurmĩ. ã vóg konãn jé ag tóg ke mũ, ha vemnĩ, hã jé Topẽ tóg ag vin. Topẽ tũ ag vè, ag tỹ ùn jykre kórég han mũ ag vóg kónãn jé, ag tỹ ag jykre pãno to ag jagãgtar han jé.

5 Hã kỹ ag vỹ ki króm nĩ, ag tỹ ãjag to jũ tũ nỹtĩ jé. ãjag kakã kavénh ti tĩ gé, ãjag tỹ pã'i ag vỹ ki króm tũ ãn ti. Hã kỹ ki króm sórmnĩ.

6 Kỹ governo mỹ imposto kajãm nĩ gé. Topẽ tỹ ag mỹ vènh rãnrãj nĩm ja ãn han ag tĩ, kurã kar ki, pã'i ag, governo mỹ rãnrãj tĩ ag. Kỹ ag mỹ kajãm nĩ.

7 Kỹ ãjag név(e) kajãm kãn nĩ, governo mỹ ke gé. ãjag tỹ pã'i ù mỹ imposto kajãm ken kỹ ti mỹ ven nĩ, jãnkamy ti. ãjag pã'i ag kamẽg nĩ, ag mỹ komẽr hã vĩmĩ.

Topẽ jykre hã mũ mũmĩ

8 ãjag név(e) kajãm kãn nĩ. Mré hã jagnẽ to há tãvĩ nỹtĩmĩ gé. Jagnẽ to há nỹtĩ to krónh ke tũg nĩ. ãg tỹ jagnẽ to há nỹtĩn kỹ ãg tóg Topẽ tỹ ãg jyvèn ja ãn ki króm kãn mũ sir.

9 Ha vé, Topẽ tóg ãg mỹ: “ã prũ tũ fi mré nỹ tũg nĩ, kỹ ã mén tũ mré nỹ tũg nĩ gé,” he ja nĩ. Kỹ tóg: “ù tén tũg nĩ, nén ù péju(g) tũg nĩ, ù to ón tũg nĩ, nén ù to én tũg nĩ gé,” he ja nĩ gé. Tĩ tỹ ãg jyvèn vỹ e nỹtĩ. Hã ra ãg tỹ ti tỹ ãg jyvèn kar tỹ tó pir han sór kỹ ãg tóg tag tónh ke mũ, ha mẽ: “ã régre ki rĩr nĩmĩ. ã tỹ vènh ki rĩr há ri ke han nĩ, ã régre ki,” he jé ãg tóg ke mũ.

10 ãg tỹ ãg régre kar ki rĩr há nỹtĩn kỹ ãg tóg ag mỹ nén ù kórég han ke tũ nĩ. Hã kỹ ãg tóg jagnẽ ki rĩr há nỹtĩn ki Topẽ tỹ ãg jyvèn tĩ ãn ki króm kãn ke mũ.

11 Vãsãn nĩ. Vènh jykre kórég tovãnh kãn nĩ. Tĩ tỹ ãg kren han ke kurã vỹ kakó pẽ tĩ ha. ãg tỹ ti ki ge vén kỹ tóg ver kór gy nỹ ja nĩ, kuvar gy nỹ ja tóg nĩ ver ãn kã, hã ra tóg ùri kakó tãvĩ tĩ ha.

12 Tĩ kãtĩg to hã tóg ãg mỹ kuty ri ke nĩ. Kuty tag vỹ tũg ke nẽ ha, tỹ vaj ke ti nỹ ha. Tĩ tỹ kãnhmar kãtĩg ke to ken hã vè. Hã kỹ ag tỹ kuty kã nén han tĩ ãn han mãn sór tũg nĩ, vènh jykre kavéj ãn ti. ãg tỹ kurã ki nén han jafã ãn han nĩ, vènh jykre kuryj ti, ãg tỹ vènh jykre há han kỹ vènh jykre kórég kato tẽ jé, tỹ tũg' he jé.

13 ãg tỹ kurã mũ tĩg há han tĩ ãn ri ke han nĩ. Ag tỹ baile ki nén ù vènhmỹ han tĩ ãn han tũg nĩ. Kronkron tũg nĩ gé. Fag to én tũg nĩ, kỹ fag mré nỹ tũg nĩ, ag mré ke gé. Jagnẽ to jũ tũg nĩ gé, jagnẽ tũ to én tũg nĩ gé.

14 ãg Senhor tỹ Jesus Cristo jykre tãg hã han nĩ. ãg tỹ nén to én mũ ãn han sór mãn tũg nĩ. ãg jykre si tovãnh kãn nĩ.

14

Jesus ki ge ky n̄tĩ fag t̄y jagnē to há n̄tĩnh ke

¹ Ũ tóg krój n̄tĩ ver. Jesus jykre ũ tóg ver ag m̄y jagy tĩ, ag t̄y ti ki ge ky n̄tĩ ra. Ũ t̄y ge tovãnh tũg nĩ, ag m̄y: “ẽg mré Topẽ vĩ m̄enh kãtĩg nĩ,” hemnĩ. Ag vĩ kafãn tũg nĩ hã ra, ag t̄y kygnē ky: “tag tóg inh m̄y ge nĩ, ge nĩ,” he mũ ra.

² Ũ m̄y tóg nén kar ko há tĩ, hã ra ũ tóg nén ũ nĩ ko vãnh n̄n ky ẽkré hã ko tĩ. “Vẽnh kãggrá m̄y ag tóg pũn ja nĩ, v̄enh m̄eg ẽn nĩ ti, ag t̄y ón ky topẽ kãggran ja ẽn m̄y, hã ky sóg ti nĩ ko sór tũ nĩ,” he ag tóg tĩ, ũn krój ag.

³ Hã ra ãjag kãmĩ ũ ag tóg ge ra ko tĩ, v̄enh kãggrá t̄y ag m̄y t̄y nén ũ tũ n̄n ky. ãjag t̄y ko ky ũ t̄y ko vãnh ẽn to é he tũg nĩ. Ky ãjag t̄y ko sór vãnh ky ũ t̄y ko mũ ẽn to: “ti kórég han ti tĩ,” he sór tũg nĩ gé. V̄ej̄en to jagnē m̄y vĩ tũg nĩ. ã mré tóg Topẽ ki rã ky j̄é gé, ũ t̄y ko mũ ti, ky ti to vĩ tũg nĩ.

⁴ Jesus m̄y rãnrãj tĩ v̄y t̄y ẽg n̄tĩ, ẽg kar, hã ky tóg v̄enhm̄y tĩ, ẽg t̄y jagnē to vĩ sór ky. Ũ t̄y ẽg m̄y v̄inh ke mũ v̄y t̄y ẽg Senhor ti nĩ, ẽg t̄y t̄y ti tũ n̄tĩnh ky. Hã ra ẽg kar v̄y há kutẽ kãn ke mũ, kurã ẽn kã, ha vemnĩ, ẽg Senhor t̄y ẽg tar han ky.

⁵ Ũ tóg v̄enh kãn ke kurã to: “kurã kórég,” he tĩ, kurã ũ to ke gé. Jãvo ũ tóg kurã kar to: “kurã há,” he tĩ gé. Há kar ti n̄tĩ, ãjag t̄y kurã han mũ ti. Ky ãjag t̄y nén to jykren mũ ẽn hã han nĩ.

⁶ ẽg kar v̄y ẽg Senhor jykre mĩ mũ sór mũ, hã ky ũ tóg kurã kórég han sór tĩ, ti jykre mĩ tĩ j̄é, jãvo ũ tóg kurã kórég han vãnh nĩ, ti jykre mĩ tĩ j̄é gé. Há kar ti nĩ.

Ky ũ t̄y nén ũ kar ko mũ v̄y ge nĩ gé. ẽg Senhor jykre mĩ tĩ hã j̄é tóg ko tĩ gé. Ti hã m̄y tóg to vĩ há han tĩ, v̄ej̄en to, Topẽ hã m̄y. Ũ t̄y nén ũ nĩ ko vãnh ẽn v̄y ẽg Senhor jykre mĩ tĩ hã j̄é ko vãnh nĩ gé, ti t̄y ti m̄y há nĩ j̄é. Ky tóg to Topẽ m̄y vĩ há han tĩ gé. Há kar ti nĩ, ẽg t̄y nén ũ nĩ ko mũ ti, ẽg t̄y ko vãnh ti ke gé.

⁷ ẽg pi(jé) ẽg jykre han ke mũ', ẽg t̄y ga kri m̄n ky. Ky, ẽg ter ken ky ẽg pi(jé) ẽg jykre ki ter ke mũ gé'.

⁸ ẽg t̄y ga kri m̄n ky ẽg tóg ẽg Senhor jykre hã han ke mũ. Ti tũ han hã j̄é ẽg tóg

ga kri mũ nĩ. Ky, ẽg ter ken ky ẽg tóg ti jykre hã ki ter ke mũ gé'. Hã ky ẽg tóg t̄y ti tũ kar n̄tĩ sir, ẽg t̄y ga kri m̄n ky ke gé. ẽg Senhor t̄y Jesus Cristo tũ v̄y t̄y ẽg n̄tĩ.

⁹ ẽg t̄y t̄y ti tũ n̄tĩ hã j̄é tóg ter ja nĩ. Hã j̄é tóg rĩr m̄an ja nĩ gé. Ti t̄y t̄y ẽg Senhor nĩ hã j̄é tóg ter ja nĩ, v̄enh kar pã'i, ũn rĩnrĩr mũ ag pã'i, ũn kãgter ja ag pã'i ke gé.

¹⁰ Ky ãjag t̄y h̄e ri ke j̄é jagnē to vĩ sór n̄e? ãjag t̄y h̄e ri ke j̄é jagnē to é he n̄e? Topẽ hã v̄y ẽg jykre ve kãn ke mũ, ẽg kar, ti t̄y ẽg j̄é pr̄er ken ky.

¹¹ Hã ky tag tóg rán ky nĩ, ha m̄e. “Rĩr inh j̄é nĩ,” he tóg, ẽg Senhor ti. “Vẽnh kar v̄y inh kr̄em gr̄inh kenh ke mũ, ha vemnĩ. Vẽnh kar v̄y inh m̄y: “ũn mág v̄y t̄y ã nĩ,” henh ke mũ, he ti, Topẽ ti,” he tóg, Topẽ v̄y rán ky nĩ ki.

¹² ẽg kar v̄y Topẽ rĩnja tá n̄tĩnh ke mũ, ky tóg ẽg jykre tugn̄m ke mũ. ẽg hã ki tóg j̄em̄enh ke mũ, ẽg t̄y nén han ja ẽn to.

¹³ Hã ky jagnē to vĩ m̄an tũg nĩ.

ẽg t̄y jagnē to fen ke

Jagnē to: “kórég ti nĩ,” he m̄an tũg nĩ. ãjag t̄y nén ũ han ken ky tag to jykren nĩ, ha m̄e. “Is̄y tag han ky inh régre m̄y inh ve ky Topẽ vĩ mranh ke tũ nĩ v̄y?” he j̄é ẽg tóg ke mũ. “Ti m̄y t̄y pr̄anh kenh ke tũ nĩ v̄y, is̄y tag han ky?” he j̄é ẽg tóg ke mũ.

¹⁴ Tag ki kanhró inh nĩ, ha m̄e: “v̄ej̄en pi(jé) ẽg kavénh tĩ'.” Jesus t̄y tón hã v̄e. Nén ũ tũ v̄e, v̄ej̄en ti, ẽg t̄y ko jafã tãvĩ v̄e. Hã ra ũ tóg nén ũ nĩ to: “v̄enh kãggrá m̄y ag tóg pũn ja nĩ, v̄enh m̄eg ẽn nĩ ti, hã ky sóg ko ky Topẽ vĩ mranh tĩ,” he tĩ. Ũ t̄y tag tó mũ jykre kavénh ti tĩ, ti t̄y ge ra kon ky.

¹⁵ Inh m̄y tóg t̄y Topẽ vĩ mranh tũ nĩ, is̄y nén ũ nĩ ko tag ti. Ky sóg ko' he mũ sir. Ky inh régre ũ tóg is̄y ko mũ ve ky ko sór mũ gé sir, hã ra tóg ti hã m̄y Topẽ vĩ mranh ri ke nĩ. Ky tóg ko ky isugr̄in Topẽ vĩ mranh mũ sir. Ky tóg nũgme ki kut̄enh ke mũ sir, ti t̄y ko ky Topẽ vĩ mranh ky. Ky tóg is̄y ti tén ri ke nĩ sir, Cristo t̄y ũn jagfy ter ja ẽn ti. Is̄y tag han ky tóg s̄y ti to há tũ ri ke nĩ, is̄y inh j̄en tugn̄n ti tén ri ke han ky.

¹⁶ Ky tag han sór tũg nĩ, ũ t̄y ãjag t̄y nén han mũ to ãjag to vĩ tũ nĩ j̄é. Há ti nĩ v̄e, ãjag t̄y kon ky, hã ra ũ t̄y ãjag j̄en to ãjag to v̄in ky ko sór tũg nĩ.

17 Topě tỹ tỹ ěg Senhor nĩn kỹ ěg jěn tóg tỹ nén ũ tũ nĩ ha mỹr, kỹ ěg tỹ nén ũ nĩ ko tũ ra tóg ěg mỹ tỹ nén ũ tũ nĩ. Nén ũ ũ to ěg jykren ke mũ ha, hã vỹ: vėnh jykre kuryj, he mũ, vėnh jykre kusa, he mũ, vėnh jykre sér, he mũ, Topě kuprĩg tỹ mỹr, ěg jagrė tãg ti.

18 ěg tỹ gen kỹ Cristo jykre han kỹ tóg Topě mỹ há tĩ ha, ěg jykre ti, kỹ tóg ěg mré ěprã ke ag mỹ há tĩ gé sir, ha vemnĩ.

19 Kỹ ěg jé jagnė krĩ kuprãg hã to jykren. ěg jé jagnė tar han sór.

20 Kỹ tóg ěg tỹ nén ũ nĩ ko to ěg régre tỹ tỹ prãnh ke han kỹ tóg kórég nĩ, ěg tỹ ũ tỹ Topě ki rã kỹ nĩ ũ tỹ tỹ prãnh ke han kỹ. Vėjėn kar vỹ há nĩ. Hã ra ũ tóg vėjėn ũ to jykren kónãn sór mũ, ti tỹ to Topě vĩ mranh kỹ. Ti tỹ ge ra kon kỹ tóg tỹ prãnh ke mũ sir.

21 Kỹ tóg kórég nĩ, ěg régre tỹ ěg tugnĩn Topě vĩ mranh kỹ. Hã jé nén ũ nĩ ko tũg nĩ, ã régre tỹ to tỹ prãnh kenh (ka) mẽ tĩn kỹ. Ti rĩnve vinho kron tũg nĩ gé. Nén ũ tỹ ã régre tỹ Topě vĩ mranh han ěn tovãnh kãn nĩ.

22 Ā tỹ nén ũ to: “kórég tũ ti nĩ,” hen kỹ Topě hã mỹ tómnĩ. Hã ra ã régre rĩnve han tũg nĩ, ti tỹ ã mỹ há nĩ ra, ã régre tỹ ã tugnĩn Topě vĩ mranh tũ nĩ jé. Ā tỹ Topě tỹ ã mỹ nén tó hã han kỹ tóg há nĩ, kỹ ã tóg jatu nĩ, ha vemnĩ.

23 Ũ tóg ko tĩ, hã ra tóg ã tỹ ko mũ tag to: “isỹ Topě vĩ mranh ja mỹ vỹ?” he mũ sir. Ti tỹ ge ra ko kỹ tóg to krĩ kufy nĩ sir, kỹ tóg Topě vĩ mranh mũ sir. ěg tỹ ti ki ge kỹ nỹtĩn kỹ ěg tóg ti tũ hã han sór mũ sir. ěg tỹ nén ũ to: “tag han kỹ inh mỹ ti vĩ mranh mũ vỹ?” hen kỹ ěg han ke tũ nĩ, ke tũ nĩ mũ ra ěg ti vĩ mranh mũ.

15

ěg tỹ ěg mré ke ag to há nỹtĩnh ke

1 Ha vé, tar ěg nỹtĩ. Hã kỹ tóg ěg tỹ ũn krój nỹtĩ ag to fen nỹtĩnh há tĩ. “Ěn tóg inh mỹ há tĩ, hã kỹ sóg han sór mũ,” henh ke tũ ěg tóg nĩ.

2 “Mỹ inh régre mỹ há nĩ vỹ?” he jé ěg tóg ke mũ. Ti tỹ ti mỹ há tũ nĩn kỹ ěg han ke tũ nĩ. ěg tỹ ti tar han sór vė, ěg tỹ nén han mũ kar tỹ.

3 Cristo pi(jé) ã tỹ nén to én mũ ěn han ja nĩgtĩ', hã kỹ tóg ěg jagfy jagtar ja nĩgtĩ. Kỹ

tóg Topě mỹ: “ã to ag tóg vĩ kónãn tĩ, ã kato tẽ ag, hã ra ag vỹ vỹ inh kri kutėnh ke mũ,” he ja nĩ. Ti mur tũg ki Topě vĩ tó tĩ ũ tóg ti vĩ tag rán ja nĩ, hã ra tóg ge nĩ.

4 Hã ra Topě tóg ěg kanhrãn sór mũ, hã kỹ tóg ã vĩ tó tĩ ag mỹ: “ha rán,” he ja nĩgtĩ, hã kỹ ag tóg ránrán ja nĩgtĩ. Ěn ve kỹ ěg tar nỹtĩ, Jesus jykre mĩ mũ to, kỹ ěg tỹ prãnh kenh ke tũ nĩ. Kỹ ěg tóg ěg tỹ kanhkã tá nén venh ke ěn kã jatu' henh ke tũ nĩ gé.

5 Topě vỹ ěg to fen kỹ nĩ. Ti hã vỹ ãjag tỹ jagnė to fen han ke mũ, ti kóm, ãjag tỹ ti mré jykre pir nỹtĩ jé, ãjag tỹ Jesus Cristo ki ge kỹ nỹtĩn kỹ. ěg tỹ to vãsãn han ki kanhró tóg nĩ, Topě ti.

6 Kỹ ãjag tóg jagnė mré ěg jóg tỹ Topě to: “ũn mág vỹ tỹ ti nĩ,” henh ke mũ gé. Vėnh vỹ pir han jé ãjag tóg ke mũ, ti to, ěg Senhor tỹ Jesus Cristo to ke gé.

Fóg ag mré kanhgág ag tỹ Topě vĩ mẽnh ke

7 Hã kỹ jagnė to há nỹtĩmnĩ, Cristo tỹ ěg to há nĩ ri ke nỹtĩmnĩ, jagnė to. Kỹ ũ tóg ãjag jykre ve kỹ Topě to: “ũn mág vỹ tỹ ti nĩ,” henh ke mũ.

8 Tag to jykren nĩ, ha mẽ. Cristo vỹ Judeu ag ki rĩr jé kãtĩg ja nĩ, ti tỹ Topě tỹ vãsỹ ěg jóg'jóg ve ag mỹ nén tó ja ěn ki han jé. Ěn ve kỹ ěg tóg ki kanhrãn mũ, Topě tỹ vėnh vĩ há hã tó tĩ ti.

9 Kỹ tóg povo ũ ag jagãgtãn gé, kỹ ag tóg ti tugerĩn Topě mỹ vĩ há han mũ gé sir, fóg ag, kanhgág ag ke gé. Hã kỹ Davi tóg tag rán ja nĩ gé, ha mẽ: “tag tugnĩn sóg ã mỹ vĩ há han ke mũ, fóg ag rĩnve, kanhgág ag rĩnve ke gé. Ag rĩnve sóg ã mỹ jãn ke mũ, ã jé tó jé sóg ke mũ, ã jiji tó kỹ,” he ja tóg nĩ, Davi ti, Topě vĩ tỹ rán kỹ nĩ ki.

10 Kỹ tag tóg rán kỹ nĩ gé, ha mẽ. “Fóg', kanhgág', mỹ sér nỹtĩmnĩ, Judeu ag mré hã, ti tũ ag mré hã,” he tóg mũ gé, Topě vĩ tỹ rán kỹ nĩ ki.

11 Kỹ tag tóg rán kỹ nĩ gé, ha mẽ. “Fóg', kanhgág', ěg Senhor mỹ vĩ há han nĩ. Topě to vĩ há han kãn nĩ, povo kar',” he ja tóg nĩ gé, Topě vĩ tỹ rán kỹ nĩ ki.

12 Kỹ Isaías vỹ Cristo to tag tó ja nĩ gé, ha mẽ: “Jessé krė'krė ũ vỹ tỹ ũn mág jėnh mũ, Davi panh ěn krė'krė ũ, kỹ tóg tỹ povo kar ag pã'i mág jėnh mũ. Fóg ag vỹ kanhgág ag

mré ti ki ge sór ke mũ," he ja tóg nĩ, Isaías ti. Ti tỹ Jesus tón há vễ.

¹³ Topê há ne ãg mỹ ven ke mũ', nén ù há kar, há kỹ tóg ãg mỹ tó ja nĩ. Ti há ki ãjag tóg ge kỹ nỹtĩ. Ti há vỹ ãjag fe tỹ mrin kenh ke mũ, ti há vỹ ãjag krĩ kuprãg ke mũ'. Topê kuprĩg vỹ tỹ ãjag jagrẽ nĩ, kỹ tóg nén kar han há nĩgtĩ. Ti há vỹ ãjag tar han ke mũ', ãjag tỹ Topê tỹ ãg mỹ nén ù há ven kenh ke ãn to tar nỹtĩ jé, ãjag tỹ tag há mĩ êkrén jé.

Paulo rãnrãj

¹⁴ Inh kanhkã', vễnh jykre há han kỹ ãjag tóg nỹtĩ. Isỹ ãjag mỹ tó tũg ki ãjag tóg ki kanhrãn ja nĩ. Vég isóg nĩ nĩ. Há kỹ ãjag tóg jagnẽ jyvẽn ki kanhró nỹtĩ gé.

¹⁵ Inh vễnh rá tag ki sóg ãjag mỹ nén ù tỹ hẽn ri ke kãmén, ti tỹ inh mỹ sér tĩn kỹ, sỹ ãjag vég tũ ra. ãjag mỹ sóg kãmén há han, ãjag tỹ kã jatu tũ nĩ jé, ãjag tỹ mễg mũ tag kã. Topê ne tag to inh jẽnẽ', tag to tóg isar han'.

¹⁶ Inh jé prẽr tóg, isỹ povo kar mỹ Jesus Cristo kãmén jé. Kỹ sóg ti tũ ki rĩr jẽ nĩ, Topê vĩ sér tó sóg tĩ, fóg ag mỹ, kanhgág ag mỹ ke gé. Ag tỹ ti ki ge kỹ tóg ti mỹ sér tĩ, Topê kuprĩg tỹ ag tỹ ùn há han kỹ, ag tỹ tỹ Topê tũ nỹtĩn kỹ. Inh rãnrãj há vễ.

¹⁷ Tỹ sóg Jesus Cristo rãnrãj han jafã nĩ, Topê tỹ isar han kỹ, kỹ inh rãnrãj tóg inh mỹ sér tĩ.

¹⁸ Kỹ sóg ãjag mỹ Cristo tỹ inh mỹ vễnh rãnrãj nĩm ja há tỹ vემեն sór mũ. Fóg ag mré kanhgág ag tỹ ti ki ge jé tóg isar han tĩ, ti vĩ tó tag to. Inh vĩ mẽ kỹ ag tóg ti ki ge sór mũ, ag tỹ inh jykre ve kỹ ke gé. Jesus Cristo tỹ nén han mũn há vễ.

¹⁹ Milagre hyn han sóg tĩ gé, Topê tỹ isar han kỹ. Ti kuprĩg tỹ inh krĩn kỹ sóg hyn han tĩ, milagre ti. Milagre hyn han kỹ sóg vễnh kar mỹ ti vĩ ti tó ja nĩgtĩ, Jerusalém tá, kỹ tá kãkutẽ kỹ sóg ga kar mĩ tĩg ja nĩgtĩ gé, ga tỹ Ilíria mĩ há. Vễnh kar mỹ sóg Cristo kãme sér tó ja nĩgtĩ.

²⁰ Û tỹ tá jun tũ ra sóg tá jun vén ja nĩgtĩ, sỹ tá ti vĩ tó vén jé, ag tỹ vãhã Cristo kãme mẽ jé, ù tỹ mẽ ja tũ ag. Inh há ne ag mỹ tó vén sór ja nĩgtĩ', isỹ ù rãnrãj ja ki rãnrãj tũ nĩ jé.

²¹ Há kỹ tag tóg rán kỹ nĩ, ha mẽ: "ũ tỹ ti vễme mẽ ja tũ ãn ag vỹ ti ki kanhrãn ke mũ. Û tỹ ti vĩ mẽ ja tũ ag vỹ mễnh ke mũ," he ja tóg nĩ, Topê vĩ rá ki. Sỹ ti vĩ tag há ki króm sór vễ.

Paulo tỹ Roma ra tĩg sór

²² Há kỹ sóg ãjag tá jun ja tũ nĩ ver, sỹ ãjag venh há há ra.

²³ Há ra sóg hur han kãn, tag ki inh rãnrãj ti. Vãsy sóg to jykrén, sỹ ãjag venh tĩg jé.

²⁴ Kỹ tóg hẽn ri ke mũn inh mỹ ki króm ke mũ ha. Sỹ ga tỹ Espanha ra tĩg sór vễ, kỹ sóg ãjag venh rãnh mũ, ãpyr kãkre ki, ãmĩn kãkre ki. Kỹ tóg há tĩ, ãjag tỹ inh jagãgtãn ken kỹ, sỹ ãjag tá jun ken kỹ. ãjag tỹ inh jagãgtãn há han kỹ sóg tĩg há han ke mũ, Espanha ra. Há ra sóg ãjag mré nĩ sĩ han sór mũ, ãjag tỹ isar han jé.

²⁵ Há ra sóg ver Jerusalém ra tĩg sór mũ. Sỹ tá Topê tũ ag mỹ jãnkamy ma tĩg ke vễ.

²⁶ Ga tỹ Macedônia tá Jesus mré ke ag vỹ inh mỹ jãnkamy vin, ga tỹ Grécia tá Jesus mré ke ag ke gé, isỹ Jerusalém tá ùn jagãgtar nỹtĩ ag jagãgtãn jé, jãnkamy ãn tỹ. ãg mré ke ag vễ gé, Jerusalém tá ùn jagtar nỹtĩ ag.

²⁷ Macedônia tá ke ag mỹ tóg sér tĩ, ag tỹ Jerusalém tá ke ag mré jãnkamy vễnh kãpãm kỹ. Grécia tá ke ag mỹ tóg sér tĩ gé. Há ra tóg inh mỹ há tĩ gé. Jerusalém tá ke ag vỹ Jesus ki ge vén, Judeu ag, kỹ fóg ag vỹ ag vĩ mẽ kỹ Jesus kãme mẽ ja nĩgtĩ. Há kỹ fóg ag vỹ Judeu ag tũ mãn ja nĩ, há vỹ: Topê vĩ, he mũ. Kỹ tóg há nĩ ha, ag tỹ mẽ kar kỹ ag mỹ ãjag tũ vễnh kãpãm kỹ, vễnh kaja jé, ag jãnkamy ti.

²⁸ Isỹ tag han kãn kỹ, sỹ ag mỹ jãnkamy tag vin kar kỹ sóg cidade tỹ Roma tá nĩ sĩ han kar kỹ ga tỹ Espanha ra tĩg sór mũ ha.

²⁹ Ha mẽ, isỹ ãjag ki jun ken kỹ Cristo vỹ ãjag mỹ sér tĩnh mũ, ãg tỹ jagnẽ mré ti to vემեն kỹ, isỹ ãjag mỹ ti vĩ tón kỹ, ha vemnĩ. Ti vĩ sér to tóg ãg mỹ sér tĩnh mũ.

³⁰ Inh kanhkã', ãg Senhor tỹ Jesus Cristo ki ge kỹ ãjag tóg nỹtĩ, kỹ ãjag tóg jagnẽ to há nỹtĩ gé, Topê kuprĩg tugrĩn. Kỹ sóg ãjag mỹ tag to vĩ sór mũ gé, ha mẽ. Iso Topê mré vĩmĩn, inh mré, to krónh ke tũg nĩ.

³¹ Judéia tá ag vỹ e nỹtĩ, ù tỹ Jesus kato tẽ mũ ag, kỹ ag tóg inh kato tẽ sór mũ gé.

Kỹ iso Topê mré vîmnĩ, ti tỹ inh jy nĩgãn jé, Jerusalém tá ù tỹ Jesus ki ge kỹ nỹtĩ ag tỹ inh mỹ vĩ há han jé gé, ti tỹ ag mỹ há tĩ jé, sỹ jãnkamy ên tỹ ag jagãgtãn sór mũ tag ti.

³² Tá kãtĩg kỹ sóg jatun mỹ ãjag ki jun ke mũ. Kỹ tóg êg kar mỹ sér tĩnh mũ, sỹ ãjag to pasanh tĩg ken kỹ, Topê tỹ isĩg ke tag to há nĩn kỹ. Kỹ ãjag tóg isar han ke mũ sir.

³³ Topê vĩ êg krĩ kuprãg tĩ. Kỹ sóg ti mỹ to vĩ tĩ, ti tỹ ãjag krĩ kãnhvy han jé. Amém.

16

Paulo tỹ ùn e mĩ êkrég tĩ

¹ ãjag mỹ sóg êg mré ke fi tó sór mũ, Febe fi. Cidade tỹ Cencreia tá fi tóg Jesus ki ge kỹ nỹtĩ fag ki rĩr tĩgtĩ.

² Fi tỹ kejên ãjag ki jun kỹ fi mỹ: “ha kãrã,” hemnĩ. ãjag mré fi tóg Jesus ki rã kỹ jẽ nĩ, kỹ fi mỹ nén tỹ fi mỹ tũ ên ven kãn nĩ. Û tỹ hên ri ke jagãgtãn fi huri, inh ke gé.

³ Priscila fi mĩ sóg êkrég tĩ, fi mén tỹ Áquila mĩ ke gé. Inh mré fag tóg rãnrãj mág, Jesus Cristo rãnrãj han kỹ.

⁴ Isugnĩn fag tóg kãgter kren, inh jy nĩgãn jé. Tag hã mĩ sóg êkrég tĩ, kỹ sóg fag to há tãvĩ nĩ. Kỹ fóg kar kãmĩ Jesus ki ge kỹ nỹtĩ ag vĩ tag tugrĩn fag to há nỹtĩnh ke mũ gé, fag tỹ inh jy nĩgãn kỹ.

⁵ Fag ãn krêm ù ag tóg vênh mãn tĩ gé, culto han jé. Ên fag ki sóg êkrég tĩ gé.

Iso há ù vĩ nĩ gé, hã vĩ: Epêneto, he mũ. Ga tỹ Ásia tá ù tỹ Jesus ki rã vén jan hã vê. Ti mĩ sóg êkrég tĩ gé.

⁶ Kỹ Maria fi vĩ nĩ gé. ãjag mỹ fi rãnrãj mág. Fi mĩ sóg êkrég tĩ gé.

⁷ Kỹ sóg Adrônico mĩ êkrég tĩ gé, Júnias mĩ ke gé. Inh kanhkã ag vê. Inh mré ag tóg sigse kỹ nỹtĩ ja nĩgtĩ gé. Apóstolo ag kãmĩ ag tóg tỹ ùn mág nỹtĩ. Vãsỹ ag tóg Jesus ki ge jêg, isỹ ti ki rã tũg ki.

⁸ Ampliato mĩ sóg êkrég tĩ gé. Ti to inh há tãvĩ nĩ, êg Senhor tugrĩn.

⁹ Kỹ sóg Urbano mĩ êkrég tĩ gé. Inh mré tóg Cristo rãnrãj han tĩ. Kar kỹ iso há ù vĩ nĩ gé, Estáquis ti. Ti ki sóg êkrég tĩ gé.

¹⁰ Apeles mĩ sóg êkrég tĩ gé. Cristo tovãnh jãvãnh ja ti nĩ. Aristóbulo mré ke fag mĩ sóg êkrég tĩ gé.

¹¹ Kar kỹ inh kanhkã ù vĩ tá jẽ gé, Herodião ti. Ti ki sóg êkrég tĩ. Kỹ sóg Narciso mré ke fag mĩ êkrég tĩ, ù tỹ fag kãmĩ êg Senhor ki ge kỹ nỹtĩ fag.

¹² Kỹ sóg Trifena fi ki êkrég tĩ, Trifosa fi mĩ ke gé. Êg Senhor mỹ fag rãnrãj mũgtĩ. Kỹ sóg iso há tãvĩ ù fi mĩ êkrég tĩ gé, hã vĩ: Péside, he mũ. Êg Senhor mỹ rãnrãj to fi tar tãvĩ nĩ.

¹³ Kỹ sóg Rufo mĩ êkrég tĩ. Topê ne ti kuprêg', ti mỹnh fi ke gé'. Inh mỹ fi tóg tỹ inh mỹnh ri ke nĩ, ti mỹnh fi.

¹⁴ Kỹ sóg Asíncrito mĩ êkrég tĩ, Flegonte mĩ ke gé, Hermes mĩ ke gé, Pátrobas mĩ ke gé, Hermas mĩ ke gé, ag mré Topê vĩ mẽ jé vênh mãn tĩ ag mĩ ke gé.

¹⁵ Kỹ sóg Filólogo mĩ êkrég tĩ, Júlia fi mĩ ke gé, Nereu mĩ ke gé, ti ve fi mré, Olimpas mĩ ke gé, kỹ ag mré Jesus vĩ mẽ jé vênh mãn tĩ ag mĩ ke gé, Topê tũ kar ag mĩ.

¹⁶ Kỹ jagnê ki nhun ke ri ke han nĩ, Jesus mré ke kar ki, jagnê nĩgé kãgmĩ kỹ. Cristo ki ge kỹ nỹtĩ kar vĩ ãjag mĩ êkrég tĩ, êmã kar ki ke ag.

Ón kỹ vênh vĩ há mẽ sór tũg nĩ

¹⁷ Nén ù tó sór sóg mũ gé ver ãjag mỹ. Û ag tóg ãjag tỹ jagnê to jũ han sór mũ. ãjag tỹ jagnê vĩ kafãn kónãn mũ han sór ag tóg mũ. Ag pi(jé) ãjag tỹ Topê vĩ mẽ ja ên ri ke tó tĩ'. Ên ag vĩ mẽ sór tũg nĩ.

¹⁸ Ag pi(jé) êg Senhor tỹ Cristo rãnrãj han sór tĩ'. Ag nug hã ki rĩr ag tóg tĩ'. Ag vĩ vĩ mẽ há tĩ, ón kỹ, kỹ ù tỹ hên ri ke ag tóg kri fi sór mũ, ag vĩ kri, ag tỹ ag jykre kórég ki kagtũg nỹtĩnh kỹ, ù tỹ nén ù vênhmỹ to jykrén tũ ag. Inh mỹ tóg ag tỹ ù tỹ ge krĩn kónãn ha mẽ tĩ. Kỹ ag vĩ mẽ sór tũg nĩ.

¹⁹ ãjag tỹ Topê vĩ kri nĩm mũ tag vĩ mẽ há tĩ. Vênh kar vĩ mẽ, kỹ tóg inh mỹ sér tĩ sir, ãjag to. Kỹ tóg ãjag tỹ vênh jykre há ki kanhrãn mág nỹtĩnh há tĩ. ãjag tỹ vênh jykre pãno to jykrén tũ pẽ nỹtĩnh kỹ tóg há tĩ gé.

²⁰ Topê vĩ êg krĩ kuprãg tĩ. Kãnhmar tóg êg mỹ Satanás tỹ tũg' henh ke mũ gé, ha vemnĩ, kỹ tóg ãjag vóg mãn ke tũ nĩ ha.

Êg Senhor tỹ Jesus mỹ sóg to vĩ tĩ, ti tỹ ãjag mỹ ã tỹ nén ù há ên vin jé.

Paulo mré ke ag tỹ Roma ki ke fag mĩ ěkrég tĩ

²¹ Inh mré Jesus rãnrãj han mũ tỹ Timóteo vỹ ājag mĩ ěkrég tĩ gé, Lúcio ti ke gé, Jasão ke gé, Sosípatro ke gé, inh kanhkã ag.

²² Ũ tỹ Paulo mỹ tag rán mũ vỹ tỹ inh nĩ, hã vỹ: Tércio, he mũ. Kỹ sóg ājag mĩ ěkrég tĩ gé, ājag tỹ inh mré ěg Senhor ki ge kỹ nỹtĩn kỹ.

²³ Gaio vỹ ājag mĩ ěkrég tĩ. Ti ĩn krēm sóg jě, kỹ ěg tóg ti ĩn krēm culto han tĩ. Erasto vỹ ājag mĩ ěkrég tĩ gé, ũ tỹ cidade jãnkamy ki rĩr tĩ ěn ti. ěg régre tỹ Quarto vỹ ājag mĩ ěkrég tĩ gé.

²⁴ ěg Senhor tỹ Jesus Cristo mỹ sóg to vĩ tĩ, ti tỹ ājag kar tar han jé. Amém.

Topě mỹ ěg vĩ há han ke

²⁵ Ha mẽ, ěg jé Topě mỹ vĩ há han. ěg tar han ki kanhró tóg nĩ, ěg tỹ ti ki rã kar krónh ke tũ nĩn jé. Sỹ ājag mỹ Topě vĩ sér tó mũn hã vě, Jesus Cristo kãmén kỹ. Vãsỹ ěg tóg mẽ ja tũ nĩ, ti vĩ sér tag ti. ěg tỹ vãhã mẽ vě, Topě tỹ ěg mỹ to vėnh jykre nĩm kỹ. Prỹg tỹ hėn ri ke ki ag tóg mẽ ja tũ nỹtĩ, ěg jo ke ag.

²⁶ Ũri hã ěg tóg męg mũ. Vãsỹ Topě vĩ rán tĩ ag vỹ ěg tỹ ũri męg mũ tag tó ja nĩgtĩ. Kỹ Topě tóg tag to: “povo kar mỹ kãmén nĩ, fóg ag mỹ, kanhgág ag mỹ, Judeu ag mré hã,” he ja nĩ, ěg tỹ mẽ kãn jé, ti ki ge jé, ti vĩ kri fi jé, ti tỹ tỹ ěg Senhor kar jě jé. Ā tỹ nén kar han tũg ki tóg nĩ nĩ, Topě ti, ũ tỹ ti han ja tũ (hã) ra. Kỹ tóg tũ' henh ke tũ nĩ gé. Gen kỹ tóg nĩ nĩ.

²⁷ Ti hã ne ã pir mỹ nén ũ kar ki kanhró nĩ', Topě ti. Jesus Cristo hã tóg ěg mỹ Topě ven ke mũ. Kỹ ěg tóg ti hã mỹ vĩ há han sór mũ, Topě hã mỹ, kỹ tóg krỹg henh ke tũ nĩ, ěg tỹ ti mỹ vĩ há han mũ ti. Amém.

PAULO TÏ CARTA HAN: CORINTO TÁ KE AG MÏ CARTA VE

¹ Paulo tÏ rá vë. Isÿ cidade tÏ Corinto tá ke ag mÏ rán hã vë. Kÿ ãg régre tÏ Sóstenes vÿ inh mré rán mÏ gé. Topë hã ne inh kuprëg', kÿ tóg inh jé prër, Jesus Cristo tÏ inh fëg jé, sÿ tÏ ti apóstolo jë jé sir. Hã kÿ sóg ãjag mÏ rán mÏ.

² Corinto tá ãjag tóg vënh măn tÏ, Topë vÏ mẽ jé. Topë tÏ vÿ tÏ ãjag nÿtÏ, ãjag tÏ tÏ Jesus Cristo mré ke nÿtÏn kÿ. ãjag jé prër tóg, ãjag tÏ tÏ ti tÏ nÿtÏn jé.

Vënh kar mÏ ke vë gé, vënh rá tag ti, ù tÏ hë tá ãg Senhor tÏ Jesus Cristo jiji tó tÏ ag mÏ. Û tÏ ti hã to: “ãg Senhor vë,” he tÏ ag mÏ ke vë gé. Ag Senhor vë, kÿ tóg tÏ ãg Senhor nÏ gé, Jesus ti.

³ Topë mÏ sóg to vÏ tÏ, ti tÏ ãjag tar han jé, ti tÏ ãjag krÏ kuprãg jé, ãg jóg mág ti, ãg Senhor tÏ Jesus Cristo jóg ti.

Topë tÏ ãg mÏ nén han mÏ vÿ há nÏ

⁴ Kurã kar ki sóg ãjag to Topë mré vÏ tÏ. Ti mÏ sóg: “há ti nÏ, ã tÏ Jesus Cristo tigrÏn ag tar han kÿ,” he tÏ.

⁵ Ti tugnÏn ãjag tóg ùn rico ag ri ke nÿtÏ, nén kar to mÿr, Topë vÏ to, vënh jykre há kar to. Ki kanhró ãjag tóg nÿtÏ.

⁶ Cristo tÏ vëme ki kanhró ãjag tóg nÿtÏ mÿr, to tar ãjag tóg nÿtÏ.

⁷ Hã kÿ Topë kuprÏg tÏ ãg mÏ nén nÏm tÏ ãn vÿ tÏg' he vãn nÏgtÏ ãjag mÏ. ãg Senhor tÏ Jesus Cristo vënh ven măn ãn jãvãn ãjag tóg mÏgtÏ gé, ti kãtÏg ke ti.

⁸ Ti hã vÿ ãjag tar han mÏ', ãjag tÏ ti tovãn tÏ nÏ jé, ãjag tÏ kygnëg tÏ nÏ jé. Kÿ ãg Senhor tÏ Jesus Cristo kãtÏg măn kÿ, ti kurã ki, kÿ tóg ãjag tÏ kygnë ja tÏ ãn venh ke mÏ sir.

⁹ Topë ne fagrÏnh mÏ vÏ vãn nÏgtÏ'. ãjag jé prër tóg, ãjag tÏ tÏ ti kósin tÏ Jesus Cristo mré ke nÿtÏ jé, ãjag tÏ tÏ ãg Senhor mré ke nÿtÏ jé gé.

Vënh kãpãm kÿ nÿtÏ tÏg nÏ

¹⁰ Inh kanhkã', vënh vÏ pir han nÏ. ãg Senhor tÏ Jesus Cristo jiji ki sóg ãjag jyvën

sór mÏ, hã kÿ sóg ke mÏ. Vënh kãpãm sór tÏg ra. Vënh jykre pir han sór ra. Nén pir hã to jykren nÏ. Vënh jykre pir hã han sór ra.

¹¹ Inh kanhkã, ãjag to sóg vënh vÏ jagy mẽ. Cloe fi mré ke fag vÿ inh mÏ tó, kÿ fag tóg inh mÏ ãjag tÏ vënh kãpãm sór mÏ kãmén, ãjag tÏ jagnë to jÏ sór mÏ ti.

¹² Tag mẽ sóg, ha mẽ: ãjag kãmÏ ù tóg nÿji: “tÏ sóg Paulo mré ke nÏ,” he tÏ. Kÿ ù tóg nÿji: “tÏ sóg Apolo mré ke nÏ,” he tÏ gé. Jãvo ù tóg: “tÏ sóg Pedro mré ke nÏ,” he tÏ, kÿ ù tóg: “tÏ sóg Cristo mré ke nÏ,” he tÏ gé.

¹³ Cristo mÏ vënh kãpãm kÿ nÏ'? Vó. Inh hã mÏ ãjag jagfy cruz to sa'? Vó. Inh jyjy tó kÿ ãjag mÏ vënh kygpe kÿ nÿtÏ', isÿ tÏ Paulo nÏn kÿ'? Vó, ke tÏ vë.

¹⁴ Hã kÿ tóg inh mÏ há tÏ, ùri, sÿ ãjag kygpe ja tÏ nÏ ti. Tag to sóg Topë mÏ: “há ti nÏ,” he tÏ.

¹⁵ Kÿ ãjag tóg iso: “ti jiji tó kÿ sóg kype kÿ nÏ,” he vãn nÿtÏgtÏ. Crispo hã kype inh, kar kÿ Gaio ti ke gé.

¹⁶ Kar kÿ sóg Estéfanos fag kygpé gé. Kar inh ù kygpég tÏ nÏ, hÿn, he sóg.

¹⁷ Cristo pi(jé) inh mÏ: “ha ag kygpenh tÏg,” he ja nÏ'. Inh mÏ tóg: “ha ag mÏ inh kãmén tÏg, ha inh vÏ tónh tÏg,” he ja nÏ. Kÿ sóg tó tÏgtÏ. Hã ra sóg ón kÿ tÏ vëme kanhró han vãn nÏgtÏ, ke tÏ nÏ mÏ ra Cristo tÏ cruz to sa ja ãn tÏ nén ù tÏ ri ke nÏ sir, isÿ inh vÏ kanhró tÏ ãjag krÏn sór mÏ ra.

Jesus tÏ cruz to sa ja hã tó ãg tÏ

¹⁸ Û mÏ ãg tóg vënh kagtÏg nÿtÏ ve nÏ, ãg tÏ Jesus tÏ cruz to sa mÏ ãn tó kÿ. Hã ra ag tÏ nÏgme ki vár ke vë. Ag jãvo tóg ãg mÏ Topë tÏ há (r) nÏ, Jesus tÏ cruz to sa ti, hã kÿ ãg krenkren kÿ nÿtÏ, Topë tÏ hã tigrÏn ãg krenkren han kÿ.

¹⁹ Hã kÿ tóg rán kÿ nÏ, ha mẽ. “Ûn kanhró mág ag jykre tÏ sóg tÏ' henh ke mÏ, ha vemnÏ, ùn estudo mág ag tÏ nén to jykren mÏ tÏ sóg tÏ' henh ke mÏ,” he tóg, Topë ti.

²⁰ Hã kÿ ón kÿ ùn kanhró mág ag pi(jé) tÏ nén ù nÿtÏ'. Ón kÿ vënh rán tÏ ag pi(jé) tÏ nén ù nÿtÏ'. Ón kÿ ùn estudo mág ag pi(jé) tÏ nén ù nÿtÏ'. ãg tÏ tag ki nén ù ki kanhrãn mÏ to tóg: “nén ù tÏ vë,” he ja nÏgtÏ, Topë ti. “KrÏ tÏ ag nÿtÏ, ù tÏ tag hã nón mÏ sór mÏ ag,” he tóg, Topë ti.

21 Topě tỳ nén to jykren mũ vỹ ge nĩ, ha mẽ. Ëg tỳ vėsóg ki Topě to jykren sór mũ ra Ëg tóg ti ki kanhrân ja tũ nĩgtĩ, Ëg tỳ ga kri mũn kỹ. Hã kỹ Topě tóg Ëg tỳ ti vỹ jēmẽ kỹ kri fi kỹ Ëg kren han mũ. Hã kỹ tóg ag mẽ Topě krĩ tũ nĩ ve nĩ, ù tỳ ki kagtĩg ag mẽ.

22 Judeu ag ne Ëg tỳ nén han vanh ve sór mũ', milagre ti, ag tỳ Topě jykre ki kanhrân jé. Kỹ fóg tỳ Grego ag ne ón kỹ ti jykre to vēmén sór mũ'.

23 Ag jãvo Ëg tóg nén pir hã tó tĩ, hã vỹ: Cristo tỳ cruz to sa kỹ ter ja ti, he mũ. Judeu ù ag mẽ tóg jëggry tĩ, ti cruz ti, jãvo tóg Judeu tũ ag mẽ Ëg krĩ tũ nĩ ve nĩ, ag tỳ Ëg vỹ mẽ kỹ, fóg ù ag mẽ, kanhgág ù ag mẽ ke gé.

24 Judeu kãmĩ ù ag tóg kuprëg kỹ nỹtĩ jãvo, fóg kãmĩ ù ag tóg kuprëg kỹ nỹtĩ gé, kanhgág ag kãmĩ ke gé. Ag hã mẽ tóg há tĩ, Cristo tỳ cruz to sa kỹ ter ja ti, ùn kuprëg kỹ nỹtĩ ag mẽ. Ëg hã vỹ. Topě jykre tar hã vỹ, Cristo tỳ cruz to sa ja ti. Topě krĩ há to ken hã vỹ, hã vỹ: Cristo ter ja ti, he mũ.

25 Topě krĩ tũ nĩ ve vỹ Ëprã ke krĩ há nĩ ve kãfór nĩ mỹr, ti hã ne ã pir mẽ krĩ há nĩ'. Kỹ Topě krój nĩ ve vỹ Ëprã ke ag tar nĩ ve kãfór nĩ gé. Topě hã ne ã pir mẽ tar nĩ'.

Topě vỹ Ëg kuprëg, Ëg tỳ tỳ nén ù tũ ra

26 Inh kanhkã', vëso jykren. Topě vỹ ãjag jé prër. ãjag kãmĩ ti pipir nỹtĩ, ùn kanhró mág ag, escola tỳ hën ri ke ki vënh kanhrân ja ag. ùn mág ag vỹ pipir nỹtĩ gé, ùn mág krë ag ke gé. ù tỳ ge kuprëg mág tũ ti nĩgtĩ, Topě ti.

27 ù tỳ ùn mág ag mẽ krĩ tũ nĩ ve ag hã kuprëg ti tĩ mỹr, ùn vënh kagtĩg ag. Ti tỳ ùn krĩ há ag mẽ'a han sór vỹ. Kỹ tóg tag ki ùn krój nỹtĩ ag kuprëg, ùn tar ag mẽ'a han jé.

28 Hã jé Topě tóg ù tỳ tag ki jagtar nỹtĩ ag kuprëg. ùn mág ag tỳ Ëg ve kỹ Ëg tóg ag mẽ jagãgtar nỹtĩ. Nén ù tũ vỹ tỳ Ëg nỹtĩ. Hã ra Topě tóg Ëg kuprëg mũ, ag tỳ tũ' hen jé, ùn mág ag vỹ tỳ.

29 Hã kỹ ù tóg Topě mẽ: “ùn mág vỹ tỳ inh nĩ, há inh nĩ,” henh ke tũ pẽ nĩ, Ëg tỳ kejën ti ve kỹ. Hã jé Topě tóg ùn jagtar ag kuprëg.

30 Topě mré ke vỹ tỳ Ëg nỹtĩ, ha mẽ, Ëg tỳ tỳ Jesus Cristo mré ke nỹtĩn kỹ. Topě hã vỹ Ëg krĩ há han mũ', Jesus tugnĩn. Topě hã vỹ Ëg mẽ vënh pãte fón mũ', ti tũgrĩn. Ti hã ne

Ëg tỳ tỳ ti tũ nỹtĩ han mũ', ti tũgnĩn. Ti hã ne Ëg krenkren han mũ'. Topě tỳ ti mẽ vënh jykre nĩm hã vỹ, Ëg tỳ tag han jé,

31 ù tỳ rán kỹ nĩ tag ti, hã vỹ: “ãjag tỳ ù to: ùn mág vỹ tỳ ti nĩ, he sór kỹ Ëg Senhor ti tómnĩ,” he mũ, Topě vỹ rán ki.

2

Paulo vỹ krój nĩ gé

1 Inh kanhkã', ãjag ki sóg jun ja nĩ, sỹ ãjag mẽ Topě jykre tó jé. Inh pi(jé) ãjag mẽ ón kỹ vëme kanhró han'. Inh pi(jé) ãjag tỳ vënh vỹ ki kanhró jãvãnh tó'.

2 Nén pir hã to sóg jykren ja nĩgtĩ, sỹ ãjag mẽ tó jé, hã vỹ: Jesus Cristo, he mũ, ti tỳ cruz to sa kỹ ter ja Ën ti.

3 Krój ja inh nĩ, sỹ ãjag ki jun kỹ. Mũmëg ja inh nĩ, kanë jur han ja inh nĩ, sỹ ãjag mré nĩn kỹ.

4 Isỹ ãjag mẽ Topě vỹ tó kỹ inh pi(jé) vënh vỹ sĩnvĩ tỳ ãjag krĩn sór ja nĩgtĩ', inh pi(jé) inh krĩ há tỳ vënh vỹ kanhró tó ja nĩgtĩ'. Topě kuprĩg tỳ inh jagrë nĩ hã tỳ sóg ãjag mẽ tó ja nĩgtĩ', ti jykre tar tỳ.

5 Hã kỹ ãjag pi(jé) Ëprã ke jykre há ki ge jëg', Ëprã ke vỹ kanhró ki'. Hỹ, hã ra ãjag tóg Topě jykre tar ki ge jëg mẽr'.

Topě kuprĩg vỹ Topě tỳ nén to jykren mũ ki kanhró nĩ

6 Jãvo sóg ù tỳ Jesus ki kanhró mág ag mẽ Topě vỹ kanhró tó tĩ gé, ù tỳ to jykren há ag mẽ. Hã ra ti pi(jé) tỳ Ëprã ke vỹ kanhró nĩ'. Ga kri ke ag jykre tó tũ sóg nĩgtĩ, ùri ùn mág ag vỹ ti. Tũ' he jé tóg ke mũ, ùri ùn mág ag vỹ ti.

7 Topě vỹ kanhró tó sóg tĩ mẽr'. Ën tỳ Ëg vësóg ki ki kanhrân ke tũ nĩ. Vãsỹ Ëg tóg ki kanhrân ja tũ nĩ gé. Hã ra Topě tóg vãsỹ to jykren mũ, mundo tỳ kã nĩ to hã tóg to jykren mũ, Ëg tỳ ti vỹ ki kanhrân jé, Ëg tỳ ti jykre ki kanhró tũgrĩn tỳ ùn mág nỹtĩ jé.

8 ùri ùn mág ag pi(jé) ki kanhró nỹtĩ', Topě jykre tag ki'. Ag tỳ ki kanhró nỹtĩ ra ag pi(jé) Jesus tỳ ka to ti sanh mũ vỹ', Ëg Senhor tỳ, ù tỳ vënh kar kãfór nĩ tag tỳ mẽr. Hã ra ag tóg ti ki kagtĩg nỹtĩn kỹ ag tóg cruz to ti sa ja nĩgtĩ.

9 Hã ra tóg rán kỹ nĩ, Topě jykre ti, hã vỹ: “Topě tóg Ëg mẽ nén ù há tãvĩ kãn ja nĩ, ù tỳ

ti to há kar mý mýr," he mǔ. "Ū pi(jé) tag ve ja nǐ ver'. Ū pi(jé) tag mē ja nǐ ver'. Ęprā ke ag pi(jé) to jykrén ja nǐ ver'. Topē hā ne to jykrén ja nǐgtǐ, ti tǔ ěg mý kǎn ke ěn to," he ja tóg nǐgtǐ, Topē vǐ rán ki.

¹⁰ Kǔ tóg ěg hā mý tó ja nǐ. Ā kuprǐg tǔ tóg ěg kanhrān ja nǐ, to. Ti kuprǐg vǔ nén kar to jykrén tǐgtǐ, Topē tǔ nén to jykrén mǔ mré hā, ti tǔ vĕnh kar vatánh tá nén to jykrén mǔ mré hā.

¹¹ Ge ti nǐ, ha mē. Ęprā ke tǔ nén to jykrén mǔ ki kanhró ěg tóg nǐ. Kǔ ěg ne tǔ ki kanhrān tǐ? Ęg krǐ tǔ ěg ki kanhrān tǐ. Ęprā ke krǐ vǔ ěprā ke tǔ nén to jykrén mǔ ki kanhrān tǐ. Hā ra Topē kuprǐg vǔ Topē tǔ nén to jykrén mǔ ki kanhrān tǐ. Ęprā ke pi(jé) Topē tǔ nén to jykrén mǔ ki kanhrān tǐ, ti tǔ Topē kuprǐg tǔ jagrē tǔ ra'.

¹² Hā ra Topē pi(jé) ěg mý ěprā ke kuprǐg tǔ ěg jagrē han'. Topē kuprǐg tǔ tóg ěg mý ěg jagrē han, ěg tǔ ti tǔ ěg mý nén nǐm mǔ ki kanhró nǐtǐ jé. Ti hā vǔ ěg kren han sór mǔ, ěg tǔ vĕnh krenkren han ki kagtǐg ra. Ti tǔ ěg mý nén nǐm to ken hā vĕ.

¹³ Hā tó sóg tǐ. Ęprā vĕnh kanhró pijé', sǔ ājag mý tó mǔ tag ti. Topē kuprǐg kanhró vĕ. Hā kǔ sóg ti kuprǐg hā tǔ ti jykre kāmén tǐ.

¹⁴ Ęprā ke ag pi(jé) Topē kuprǐg to há nǐtǐ', ti jykre to'. Ag mý tóg tǔ Topē krǐ tǔ nǐ ve nǐ. To jykrén há han ki kagtǐg ag nǐtǐ, ag tǔ Topē kuprǐg tǔ jagrē tǔ nǐtǐn kǔ.

¹⁵ Ū tǔ ti kuprǐg tǔ jagrē jĕ ěn hā ne nén kar to jykrén há han tǐ'. Kǔ ū pi(jé) ěg tǔ nén han mǔ ěn ki kanhró nǐ', ti tǔ vég mǔ ra, ti tǔ Topē kuprǐg tǔ jagrē tǔ jĕn kǔ.

¹⁶ Hǔ, ū nǔ hǔn Topē tǔ nén to jykrén mǔ ki kanhró nǐ'? Ū nǔ hǔn Topē kanhrān mǔ'? Ū tǔ ti kanhrān mǔ venh ke tǔ ěg tóg nǐ. Jāvo Cristo hā ne ěg kanhrān tǐ', ti tǔ ěg krǐ ri ke nǐn kǔ.

3

Topē camarada ag tǔ jagnĕ ri ke

¹ Inh kanhkā', inh pi(jé) ājag mý Topē jykre tó kǎn ja nǐ ver', sǔ ājag mý tó sór mǔ ra. Ū tǔ Topē kuprǐg tǔ jagrē nǐtǐ tǔ ri ke vǔ tǔ ājag nǐtǐ, gǐr ri ke vǔ tǔ ājag nǐtǐ, ājag tǔ Cristo jykre to tar tǔ nǐtǐn kǔ.

² Hā kǔ sóg ājag mý leite ri ke hā ven ja nǐ, sǔ ājag mý Topē vǐ tó kǔ. Inh pi(jé) ājag mý vĕjĕn tar ri ke ven ja nǐgtǐ', ājag tǔ to tar tǔ ja nǐtǐn kǔ ver. Kǔ ājag tóg ūri to tar tǔ nǐtǐ gé. Ver ājag tóg ū tǔ Topē kuprǐg tǔ jagrē tǔ nǐtǐ ve nǐ.

³ Hā kǔ ājag tóg vĕnh kǎpugpóv kǔ nǐtǐ, ājag tǔ jagnĕ to jǔ nǐtǐn kǔ. Hā ki ājag tóg ěprā ke jykre han tǐ, hā ki ājag tóg ti tǔ jagrē tǔ nǐtǐ ve nǐ.

⁴ Kǔ ājag kāmǐ ū ne tóg: "Paulo mré ke vǔ tǔ inh nǐ," he tǐ'. Kǔ ū tóg: "jāvo sóg tǔ Apolo mré ke nǐ," he tǐ gé'. Ęprā ke jykre hā vĕ, ājag tǔ han mǔ tag ti.

⁵ Ū nǔ tǔ Apolo nǐ', jo ū nǔ tǔ inh nǐ', hā vǔ: Paulo, he mǔ? Topē camarada ri ke ěg nǐtǐ, kǔ ājag tóg ěg vǐ kri fi kǔ Jesus ki ge ja nǐgtǐ, ěg Senhor tǔ ājag krǐn kǔ. Ti hā vǔ ěg mý ěg rānrāj nǐm ja nǐ.

⁶ Topē vǐ krān inh, ājag kǎki, kǔ Apolo vǔ ki gónh, hā ra ū tǔ ti mog han mǔ vǔ tǔ Topē nǐ.

⁷ Hā kǔ ū tǔ krān mǔ pi(jé) tǔ ūn mág nǐ'. Ū tǔ ki gónh mǔ pi(jé) tǔ ūn mág nǐ gé'. Pir ti nǐ, ūn mág ti, hā vǔ: Topē, he mǔ, ū tǔ ti mog han mǔ ěn ti.

⁸ Ū tǔ krān mǔ vǔ ū tǔ ki gónh mǔ ěn ri ke nǐ. Kanhkā tá ěg tóg ěg rānrāj kaja venh ke mǔ. Sǔ krān ja kaja ve jé sóg ke mǔ, jāvo tóg ā tǔ ki gónh ja kaja venh ke mǔ gé.

⁹ Topē hā mré ěg tóg rānrāj mǔgtǐ. Topē japǔ ri ke ājag nǐtǐ.

Topē tǔ ěg rānrāj tugnǔm ke

Kǔ ājag tóg ti tǔ ĩn han mǔ ri ke nǐtǐ gé.

¹⁰ ĩn tǔ kri jĕ jafā ri ke han inh, ĩn króggróg ri ke ti, sǔ ājag mý ti jykre tó kǔ, Topē tǔ to inh krǐn kǔ. Kǔ sóg to jykrén há han, sǔ ĩn tǔ kri jĕ jafā ri ke ěn tar há han jĕ. Kǔ ājag kāmǐ tóg kri ĩn ri ke han mǔ sir, ti tǔ isǔ ājag kanhrān nón ājag kanhrān kǔ. Kǔ ū tǔ Topē vǐ tó mǔ jé to jykrén há han.

¹¹ ĩn tǔ kri jĕ jafā ri ke ěn vǔ pir nǐ, hā vǔ: Jesus Cristo, he mǔ, hā kǔ sóg ājag mý ri ke han, sǔ ti kāmén kǔ. Ū venh ke tǔ ěg tóg nǐgtǐ.

¹² Kri ěg tóg ĩn ri ke hyn han tǐ. Ū tóg ouro tǔ han mǔ, ū tóg prata tǔ han mǔ, ū tóg pó sǐnvǐ tǔ han mǔ, ū tóg ka tǔ han mǔ, ū tóg re tǔ han mǔ, ū tóg ěkre fár tǔ han mǔ.

¹³ Kurã tỹ ãgno ki ãg tóg venh ke mũ, ãn há ti, há vỹ: ãg tỹ ù mỹ ti vĩ kãmén há han ja ti, he mũ. Pĩ vỹ ãg rãnrãj kókén ke mũ, kỹ ãg tóg pĩ ki ãg rãnrãj jykre venh ke mũ.

¹⁴ Pĩ tỹ ti kókén vãn nĩn kỹ ãg tóg ti kaja venh ke mũ sir, ãg tỹ ãn tỹ kri jẽ jafã kri han ja kaja ti.

¹⁵ Pĩ tỹ ãg rãnrãj kókén kỹ ãg tóg ãg rãnrãj ti kren ke mũ sir, ti tũg kỹ, ge ra ãg hã tóg kren ke mũ hã ra, ãg tỹ kanhkã ra mũn kỹ. Hã ra tóg ãg tỹ pĩ ki kren ri ke nĩ sir.

¹⁶ Ha mẽ, Topẽ ãn ri ke ãg nỹtĩ, Topẽ kuprĩg tỹ ãg kãkã jẽn kỹ. Ājag mỹ tag ki kagtĩg? Ki kagtĩg nĩ ve ājag nỹtĩ.

¹⁷ Ū tỹ Topẽ ãn kókén mũ ãn kókén jé tóg ke mũ, Topẽ ti. Ti tũ vỹ mỹr, ti ãn ti. Ājag hã vỹ, ti ãn ti, ãg hã vỹ.

Ēg pi(jé) jagnẽ kãfór nỹtĩ

¹⁸ Kygnẽ tũg nĩ, ājag tỹ vỹso: “ki kanhró mág ãn nĩ,” hen kỹ. Ājag tỹ ěprã ki kanhró mág nỹtĩn kỹ to: “nén ù tũ vỹ,” hemnĩ, to: “sỹ nén ù ki kagtĩg ri ke vỹ,” hemnĩ, ājag tỹ Topẽ jykre hã ki kanhrãn jé.

¹⁹ Ēprã ki kanhró mág ag to Topẽ tóg: “nén ù tũ vỹ,” he tĩ. Vẽnh kagtĩg ag tóg nỹtĩ, ti mỹ. Hã kỹ tag tóg rán kỹ nĩ, ha mẽ: “ẽprã ke ag mỹ tóg ag tỹ ki kanhró mág nỹtĩ ve nĩ, hã ra Topẽ tóg hã ki ag mỹ ag krĩ tũ nỹtĩ ãn ven ke mũ,” he tóg, Topẽ vĩ rá ki.

²⁰ Kỹ ti rá ù vỹ ge nĩ gé, ha mẽ: “Topẽ vỹ ki kanhró nĩ, ù tỹ ki kanhró mág ag tỹ nén to jykren mũn ki. Nén ù tũ vỹ, ag tỹ nén to jykren mũ ti. Kỹ tóg ki kanhró nĩ, Topẽ ti,” he tóg mũ gé, Topẽ vĩ rá ki.

²¹ Hã kỹ ěprã ke jiji tó sór tũg nĩ. Ag pi(jé) tỹ ùn mág nỹtĩ'. Ājag mré ke kar ag vỹ mỹr.

²² Ình hã vỹ tỹ ājag mré ke nĩ. Apolo vỹ tỹ ājag mré ke nĩ gé, Pedro ti ke gé. Mundo ki ke kar vỹ tỹ ājag tũ nĩ gé, ājag rĩnrĩr nĩ ti ke gé, ājag ter ke ti ke gé, ājag tỹ ùri vég mũ ti ke gé, ājag tỹ vãhã venh ke ti ke gé. Ājag tũ kar vỹ mỹr,

²³ jãvo ājag hã ne tỹ Cristo tũ nỹtĩ', kỹ Cristo vỹ tỹ Topẽ tũ nĩ. Vyrmỹ tũ han sór tũg nĩ.

¹ Ājag tỹ ãg to jykren kỹ tag to jykren nĩ, ha mẽ. Cristo camarada vỹ tỹ ãg nỹtĩ. Topẽ jykre tó ãg tóg tĩ, ãg tỹ vỹsóg ki nén to jykren vãn ãn. Ēn ki rĩr ãg tóg tĩ.

² Kỹ ãg patrão tóg nén ù pir ve sór nĩgtĩ, ãg tỹ ti tũ ki rĩr mũn kỹ, há vỹ: ãg tỹ ki rĩr há han mũ, he mũ. Ge ti nĩ, Topẽ tỹ ãg ki nén ve sór mũ ti. Ti tũ ki rĩr há han jé ãg tóg ke mũ.

³ Kỹ ājag tỹ isỹ nén han mũ to vĩ mũ ra tóg ãn mỹ tỹ nén ù tũ nĩ, ěprã ke ag tỹ ãn jykre to vĩ mũ ra. Kỹ isóg ãn jykre to: há ti nĩ, he tũ nĩgtĩ gé.

⁴ Ình pi(jé) sỹ ti vĩ mranh mũ ki kanhró nĩ'. Hã ra sóg tag to: “hã kỹ ãn jykre vỹ kuryj kar nĩ,” he tũ nĩgtĩ gé. Topẽ hã ne ãg jykre tugnỹm tĩ', há kỹ tóg ki kanhró kar nĩ, há kỹ tóg tónh ke mũ.

⁵ Kỹ ù jykre to vĩ sór tũg nĩ, kurã tỹ ãgno to hã, ãg Senhor kãtĩg ke to hã. Ti ha ne nén kar vẽn ven han ke mũ', ãg tỹ vẽn vatãnh tá nén han mũ mré hã, ãg tỹ kuty tá nén han mũ mré hã. Kỹ tóg ãg tỹ nén ù to jykren mũ ãn vẽn ven han kãn ke mũ gé mỹr. Kỹ ãg tóg mẽnh mũ sir, Topẽ tỹ ãg mỹ vĩ há han ke ti. Vyrmỹ tóg ãg mỹ tónh ke mũ, ãg kar mỹ, ãg tỹ nén han ja ti.

⁶ Ình kanhkã', Topẽ vĩ rán ja pãtén sór tũg nĩ. Ū tỹ ājag kanhrãn mũ to: “Topẽ vĩ tó tĩ ag kãmĩ kãfór vỹ tỹ ti nĩ,” he tũg nĩ. Ājag tỹ to jykren há han jé, há jé sóg vẽn hã to tag rán, ājag mỹ, Apolo to ke gé, ãg tỹ jagnẽ ri ke nỹtĩ tag ti.

⁷ Ēg tỹ jagnẽ kãfór han sór kỹ ãg tóg ón kỹ ke tĩ. Ha vé, Topẽ vỹ ãg mỹ ãg tũ vin kãn. Ēg tỹ vỹsóg ki mãn ja pijé'. Kỹ ājag tỹ ne jé to: “isũ vỹ,” he sór nẽ? Tỹ tóg Topẽ tỹ ājag mỹ nĩm tũ nĩ ve nĩ, ājag tỹ to: “isũ vỹ ã tũ kãfór nĩ,” hen kỹ.

⁸ Tỹ ùn há nỹtĩ ve ājag nỹtĩ, vẽnhmỹ. Rico nỹtĩ ve ājag nỹtĩ, vẽnhmỹ. Tỹ ùn mág nỹtĩ ve ājag nỹtĩ vẽnhmỹ, ãn jãvo. Hỹ, há ti nĩ vỹ, ājag tỹ tỹ ùn mág nỹtĩ ra. Kỹ sóg tỹ ājag mré ùn mág nĩnh mũ gé vỹ vỹ. Hã ra tóg ke tũ tĩ.

⁹ Jesus tỹ ùn fẽg mũ vỹ tỹ ãn nĩ, apóstolo vỹ tỹ ãn nĩ. Hã ra tóg sỹ to jykren mũ ra tóg Topẽ tỹ isỹ ùn jykre kórég ag ri ke han nĩ ve nĩ, ùn kónẽg ag ri ke, ag tỹ ùn kãgtén mũ ãn ag ri ke. Vẽn kar ne tóg isugnỹm tĩ', ěprã ke

4

Apóstolo ag

kar, Topě tỹ jěně jafã ag kar ke gé, mundo tag ki ke kar ag mÿr.

¹⁰ Krĩ tũ nĩ ve sóg nĩ mÿr, Cristo tugrĩn. Inh jãvo ãjag tóg krĩ há nÿtĩ ve nÿtĩ, Cristo jykre ki. Krój inh nĩ, jãvo ãjag tóg tar nÿtĩ ve nÿtĩ. ãjag to ag tóg vĩ há han tĩ, jãvo ag tóg iso é he tĩ.

¹¹ Hã kÿ sóg kókĩr mũ, ũri, kur tũ sóg nĩ gé, iso kry ag tóg mũ gé, jamã tũ sóg nĩ gé,

¹² ron sóg tĩ gé, sÿ inh rãnrãj ki ijěn ven jě. Ag tỹ iso é he mũ ra sóg ag mÿ nén ũ há tó tĩ, Topě tỹ ag mÿ han jé. Ag tỹ inh vóg kónãn kÿ sóg ag mÿ vėnh nenh tũ nĩgtĩ.

¹³ Ag tỹ iso fé fé he mũ ra sóg koměr hã ag mÿ vĩ tĩ, ag jũ tỹ tũ' he jé. Vãfãr ri ke inh nĩ, vėnh kar mÿ, ag tỹ nén fón tĩ kar ri ke inh nĩ.

¹⁴ Inh pi(jé) ãjag mÿ'a han sór mũ'. Hã ra sóg ãjag mÿ tag rán, sÿ ãjag jyvěn jé, ãjag tỹ tỹ inh krē ri ke nÿtĩn kÿ, sÿ ãjag to há tãvĩ nĩn kÿ.

¹⁵ Ũ tỹ ãjag kanhrãn sór mũ vÿ e nÿtĩ, ũ tỹ Cristo jykre tỹ ãjag kanhrãn sór mũ ag. Mĩl kãfór ag nÿtĩ, hÿn. Hã ra sóg pir nĩ, sÿ ãjag panh ri ke nĩn kÿ. Isÿ ãjag mÿ Jesus Cristo kãmén kÿ sóg ãjag panh ri ke nĩ, ti tỹ sÿ ãjag hyn han ri ke nĩn kÿ.

¹⁶ Hã kÿ sóg ãjag jyvěn mũ, ãjag tỹ sÿ nén han mũ han jé.

¹⁷ Hã jé sóg Timóteo jěně, ãjag to. Inh kósĩn ri ke ti nĩ, ti to inh há tãvĩ nĩ, kÿ tóg ěg Senhor jykre to tar nĩ. Ěn hã vÿ ãjag mÿ tó mãn ke mũ, isÿ Jesus Cristo japry jagma tĩ ti, isÿ ti jamĩn jagma tĩ ti, isÿ igreja kar ki ke ag kanhrãn tĩ ti, ěmã kar mĩ hã.

¹⁸ Jãvo ãjag kãmĩ ũ tóg vėsÿ ũn mág han sór mũ, iso: “kãtĩg ke tũ pě ti nĩ,” hen kÿ.

¹⁹⁻²⁰ Hã ra sóg kãnhmar ãjag to pasa ke kãtĩg ke mũ, ha vemnĩ, ěg Senhor tỹ: “ha tĩg,” hen kÿ. Kÿ sóg ag jykre venh ke mũ, vėsÿ ũn mág han mũ ag. Ěg pi(jé) ũ vĩ tỹ Topě tỹ tỹ ěg pã'i nĩ ěn vėg tĩ'. Hã ra ti jykre tar hã tỹ ěg vėg tĩ. Hã kÿ inh pi(jé) ag vĩ mē sór mũ ver'. Ag jykre tar ve sór inh mũ, ũ tỹ vėsÿ ũn mág han mũ ag.

²¹ Kÿ isÿ ãjag tá jun kÿ ne nÿ hÿn ãjag mÿ há nĩnh mũ? Inh mÿ ka ma kãtĩ mũ', ãjag mrãnmrãn jé? Inh mÿ ãjag mÿ vĩ há han ke mũ', koměr hã, ãjag tỹ tỹ inh fe nÿtĩn kÿ? Ne nÿ hÿn há nĩ ãjag mÿ? Ha to jykren.

5

Ũn prũg kónãn mũ

¹ Nén ũ tóg mē há tĩ ãjag to, ke gé. Nén ũ vėnhmÿ han ãjag nēji tĩ, hã ra tóg kórég pē nĩ, ãjag kãmĩ ũ tỹ nén han mũ ti. Tag mē inh, ha mē: ãjag kãmĩ ũ tóg nēji ã panh prũ fi tỹ prũg mũ. Ũ tỹ Topě jykre ki kagtĩg ag pi(jé) ti ri ke han tĩ', ti jykre kórég tag ti'.

² Hã ra ãjag tóg to fe kaj tũ nÿtĩgtĩ. Vėsÿ ũn mág han sór ãjag tóg mũgtĩ, vėnh jykre kórég tag tỹ ãjag kãmĩ ũ kãkã nÿ ra. ãjag ne tóg vėsÿrėnh tũ nÿtĩgtĩ', ãjag tỹ ũ tỹ ti kórég tỹ ge han mũ ěn kutēm jé, ãjag kãmĩ.

³ Ha mē, ěg tỹ ti tỹ nén han ke to inh jykren huri, sÿ ãjag mré nĩ tũ ra ver. Hã ra sóg ãjag to jykren tĩ. Sÿ ãjag mré nĩ ri ke han sóg tĩ, sÿ ãjag mré ti to jykren kÿ. Ũ tỹ vėnh jykre pãno tỹ ge han mũ ěn tỹ tag han nĩ, ha mē.

⁴ Vėnh mãn jé ãjag tóg ke mũ, jó sóg ãjag mré nĩ ri ke han mũ, ãjag vėnh mãn ki. Ěn ki ěg Senhor tỹ Jesus vÿ ãjag mÿ vėnh jykre nĩm ke mũ. Kÿ ãjag tóg sir Jesus jyjy tó kÿ

⁵ ti fėg ke mũ, ũn jykre kórég ěn ti, Satanás mÿ, ti tỹ ti fãr kókén jé. Satanás tỹ ti fãr kókén kÿ tóg hěn ri ke mũn to jykren mãn ke mũ, kÿ ti kuprĩg vÿ kren ke mũ, ěg Senhor tỹ Jesus kurã ěn kã.

⁶ ãjag tỹ vėsõ: “há ěg nÿtĩ,” he mũ ran pi(jé) há nĩgtĩ'. Ha mē, pão jãgja sĩ tỹ, fermento sĩ tỹ pão kar tóg sòn ke kÿ mog tĩ. Tag to jykren.

⁷ Hã kÿ fón kãn nĩ, pão jãgja si ti, ãjag tỹ pão tãg han jé, ũn jãgja tũ ri ke ãjag nÿtĩ, ãjag jykre ti, ti há nĩn kÿ. Kÿ vėnh jykre kórég vãm kãn nĩ. Cristo vÿ ěg jagfy ter mÿr. Ěg tỹ Páscoa kã cordeiro tãnh tĩ ěn ri ke ti nĩ, Jesus ter ti.

⁸ Ěg tỹ festa ěn ko jé ěg tóg pão jãgja si fón kãn tĩ. Kÿ kemnĩ gé, hã vÿ: vėnh jykre pãno tovãnh, he mũ, nén ũ vėnhmÿ han mãn tũg, he mũ, ãjag tỹ pão jãgja tũ ri ke nÿtĩ jé, hã vÿ: vėnh jykre kuryj han nĩ, he mũ, vėnh jykre pir han nĩ, he mũ gé.

⁹ Hã jé sóg ãjag mÿ rán ja nĩ, ãjag tỹ ũ tỹ nén ũ vėnhmÿ han mũ ag mré mũ tũ nĩ jé.

¹⁰ Hã ra sóg ũ tỹ Jesus ki ge tũ ag tó ja tũ nĩ, isÿ: “ag mré mũ tũg nĩ,” hen kÿ. Jykre pãno ag nÿtĩ, ěprã ke ag, hã vÿ: nén kar

to én (ka)mě, he mũ, nén ù péju tĩ he mũ vyrmỹ topě han mũ, he mũ. Ājag tỹ tag ag mré vēmén sór tũ nĩn kỹ ājag hỹn mundo tag tovānh kỹ hẽ ra mũnh ke mũ. Inh pi(jé) tag tó ja nĩ'.

¹¹ Hã ra sóg ājag mỹ ù tỹ ón kỹ tỹ ěg régre nĩ ěn rán mũ. Û tỹ: “tỹ inh ā mré Jesus ki rã kỹ nĩ,” he mũ ra nén ù vēnhmỹ han tovānh sór tũ nĩn kỹ ti mré tĩg mǎn tũg nĩ, ti tỹ nén kar to én (ka)mě nĩn kỹ, ti tỹ vyrmỹ topě han kỹ, ti tỹ ù to vĩ kónān (ka)mě nĩn kỹ, ti tỹ kron (ka)mě nĩn kỹ, ti tỹ nén ù pigju(g) ti nĩn kỹ. Û tỹ ge mré nĩ sór tũg, nĩ, ti mré jẽn tũg nĩ gé.

¹² Ěg pi(jé) ěg mré ke tũ ag jykre tugnỹm ke mũ', Jesus ki ge tũ ag. Ājag tỹ ěg mré ke ag jykre tugnỹm ke vễ, ag jykre to: “tag vỹ há nĩ, tag vỹ kórég nĩ,” henh ke vễ.

¹³ Topě hã ne ù ag jykre venh ke mũ', ěg mré ke tũ ag. Ěg mré ke tỹ vēnh jykre pāno han kỹ ěg ti jykre tónh ke mũ. Hã kỹ ù tỹ vēnh jykre kórég han mũ ěn kutēm nĩ, ājag kāmĩ.

6

Ěg tỹ pã'i ag mỹ ěg mré Jesus ki rã kỹ nỹtĩ ù tónh ke tũ

¹ Kỹ nén ù tóg vēnhmỹ tĩ gé. Ājag kāmĩ ù tóg ā mré ke to jũ kỹ Jesus mré ke tũ ag tỹ pã'i mỹ tó tĩ, pã'i ag jykre pāno ra. Ti pi(jé) Topě tũ ag mỹ tó tĩ'. Vēnhmỹ ti nĩ, tag ti.

² Ěprã ke ag jykre tugnỹm jé ājag tóg ke mũ mỹr, ājag tỹ tỹ Topě tũ nỹtĩn kỹ. Ājag mỹ tag mẽ ja tũ? Kỹ, ājag tỹ ga kri ke kar jykre tugnỹm ken kỹ ājag hỹn jagně jykre tugnỹm há han ke mũ gé, jagně to jũ tỹ tũ' henh ke jé ājag tóg ke mũ gé. Ki ājag tóg krỹg mũ mỹr.

³ Topě tỹ jẽně jafã ag jykre tugnỹm jé ājag tóg ke mũ mỹr, ājag mỹ tag mẽ ja tũ? Kỹ ājag hỹn ěprã ke jykre tugnỹm há han ke mũ gé.

⁴ Ge ra ājag tóg ěg mré ke tũ ag mỹ: “ha inh mỹ isũ ti vé,” he tĩ, ù tỹ ěg mré vēnh mǎn tĩ tũ ag mỹ, ag tỹ ga kri ājag tũ ven jé.

⁵ Mỹ ājag mỹ'a tũ? Ājag kāmĩ ù mỹ kri há tũ nĩ', ti tỹ ājag jyvẽn jé ājag tũ to, ājag tỹ jagně tũ to jykrén mũ to?

⁶ Vēnhmỹ ti nĩ, irmão tỹ irmão ù tón kỹ, ù tỹ Jesus ki rã kỹ nĩ tũ mỹ, ti tỹ ājag tũ ven jé.

⁷ Ājag tỹ jagně tũ to jykrén kónān kỹ tóg vēnhmỹ pẽ nĩ, ājag tỹ to jagně to jũ kỹ mỹr. Ājag tỹ ne jé ājag tũ tovānh sór tũ nĩ nẽ? Ājag tỹ ne jé ù tỹ ājag tũ mǎn sór kỹ ti mỹ nenh ke nẽ? Ti hã tóg vēnh jykre pāno han mũ, ājag tũ mǎn sór kỹ. Ge ra ti mỹ nĩm nĩ. Kỹ ā tóg Topě vĩ mranh tũ nĩ, inhhã, ti tigrĩn.

⁸ Hã ra ājag tóg ti mỹ nenh sór mũ. Kỹ ājag tóg jagně tũ to vēnh jykre kórég han tĩ gé mỹr, jagně tũ mǎn sór ājag tóg mũ gé mỹr, ājag mré ke tũ ěn mỹr.

⁹ Ûn jykre pāno ag pi(jé) Topě tỹ tỹ ěg pã'i nĩ venh ke mũ'. Ājag mỹ tag mẽ ja tũ?

Ha mẽ, ker kygně hẽ'. Û tỹ ùn mén tũ fag mré nỹ mũ ag pi(jé) venh ke mũ', Topě tỹ ěg pã'i nĩ ti. Û tỹ vyrmỹ topě han mũ ag pi(jé) venh ke mũ'. Û tỹ ā prũ ra ù fi mré nỹ mũ ěn pi(jé) venh ke mũ', ù fi tỹ ā mén ra ù mré nỹ kỹ fi pi(jé) venh ke mũ'. Ûn gré tỹ ùn gré ù tỹ prũg mũ ěn pi(jé) venh ke mũ'. Ûn gré tỹ ti tỹ prũg sór mũ mỹ nenh tũ ěn pi(jé) venh ke mũ gé'.

¹⁰ Ûn tũ péju(g) tĩ ěn pi(jé) venh ke mũ', ù tỹ nén kar to én (ka)mě pi(jé) venh ke mũ', ùn kron (ka)mě pi(jé) venh ke mũ', ù tỹ ěg to vĩ kónān tĩ pi(jé) venh ke mũ', ù tỹ ěg vatánh tá ěg tũ mǎg tĩ pi(jé) venh ke mũ'. Topě tỹ tỹ ěg pã'i nĩ venh ke tũ ag tóg nĩ, vēnh jykre tỹ ge han tĩ ag.

¹¹ Ājag kāmĩ ù tóg vēnh jykre tỹ ge han ja nĩgtĩ, vāsỹ, hã ra ājag tóg vēnh kugpe kỹ nỹtĩ, ùri. Kykũnh kỹ ājag tóg nỹtĩ, ěn tỹ, kỹ Topě tóg ājag mỹ vēnh pãte fón ja nĩ sir, ěg Senhor tỹ Jesus Cristo tigrĩn, Topě kuprĩg tugnĩn.

Ěg tỹ nén ù vēnhmỹ han ke tũ

¹² Kỹ ājag hỹn inh mỹ: “isỹ nén han sór mũ ěn han jé sóg ke mũ. Topě vỹ ge ra inh jagāgtān ke mũ,” he sór mũ. Vó. Nén ù tóg ěg mỹ nén ù há han ke tũ nĩ, kỹ tóg ěg tỹ ěn han mũ ra há tũ nĩ. Ěg tỹ nén ù han sór mũ ěn tóg han há nỹtĩnh mũ vễ, hã ra isỹ nén ù kórég tỹ tǎn nĩn kỹ tóg inh mỹ há tũ nĩ sir.

¹³ “Vějẽn vỹ tỹ ěg nug tũ nĩ, kỹ ěg nug vỹ tỹ vějẽn né nĩ,” he ājag tóg tĩ. Hỹ, hã ra Topě vỹ tỹ tũ' henh ke mũ, vějẽn tỹ, ěg nug tỹ ke gé. Ěg han ja tóg nĩgtĩ, Topě ti. Hã ra ti pi(jé) ěg tỹ tỹ ùn mén tũ mré nỹ jafã han'. Ěg Senhor tũ vễ, ěg, kỹ ěg Senhor vỹ tỹ ěg tǎn nĩ sir.

14 Ëg Senhor rĩn mǎn tóg, Topê ti, kÿ tóg ãg rĩn mǎn ke mũ gé, ti jykre tar tÿ.

15 Kÿ ãg hǎ vÿ tÿ Cristo tũ nÿtĩ, ti mré ãg tóg tÿ ùn pir ri ke nÿtĩ. Ājag mũ tag mẽ ja tũ'? Kÿ ãg tÿ Cristo tũ tÿ ùn mén tũ fi mré tÿ ùn pir ri ke han kÿ tóg vènhmÿ pẽ nĩgtĩ, fi mré nÿn kÿ. Ke tũg nĩ.

16 Ha mẽ, ù tÿ ùn mén (ka)mẽ fi mré nÿ kÿ tóg fi mré tÿ ùn pir ri ke nĩ. Hǎ kÿ tóg vǎsÿ tó ja nĩ. "Ùn pir ri ke fag nÿtĩ, jagnẽ mré nÿtĩ fag," he ja tóg nĩ. Ājag mũ tag mẽ ja tũ'?

17 Fag jǎvo ãg tÿ tÿ ãg Senhor mré ke nÿtĩn kÿ ãg tóg ti mré vènh kuprĩg pir ri ke nÿtĩ gé sir.

18 Ëg tÿ ùn mén tũ mré nÿ kÿ, ãg tÿ ùn prũg tũ mré nÿ kÿ ãg tóg vènh kavènh tĩ sir, ãg tÿ Topê vĩ mranh tag tÿ. Ëg tÿ nén ù ù ki Topê vĩ mranh kÿ ãg tóg vènh kavènh tÿ ge han tũ nĩgtĩ. Hǎ kÿ ùn mén tũ mré nÿ tovǎnh kǎn nĩ, ùn prũ tũ mré nÿ tovǎnh kǎn nĩ gé.

19 Ëg hǎ vÿ Topê kuprĩg jo ĩn ri ke nÿtĩ. Ëg kǎkǎ tóg jẽ nĩ, Topê kuprĩg ti, ti tÿ tÿ ãg jagrẽ nĩn kÿ. Topê tÿ ãg mũ nén han hǎ vè. Ājag mũ tag mẽ ja tũ? Hǎ kÿ ãg pi(jé) tÿ vènh pǎ'ĩ jẽ'. Topê krêm ke vÿ tÿ ãg nÿtĩ.

20 Ëg kajǎm tóg mÿr, kaja e to. Hǎ kÿ vènh kar mũ Topê tÿ tÿ ùn há nĩ ven nĩ, ājag tÿ ti jykre kuryj han mũn kÿ.

7

Ëg tÿ prũg há han to vènh jykre

1 Ājag tÿ inh mũ vènh rán jènèn kÿ ājag tóg inh mũ ājag prũg ke ti tó ja nĩ. Ājag prũg tũ nĩn kÿ tóg há tĩ vè.

2 Hǎ ra tóg ājag mũ vènhmÿ tĩnh mũ, kÿ tóg inh mũ ājag tÿ ùn mén tũ fag to én ha mẽ tĩ. Hǎ kÿ tóg há nĩ, ù tÿ ùn pir fi tÿ prũg kÿ, fi tÿ tÿ ti prũ pẽ nĩ jé. Û fi tÿ ùn pir tÿ mén kÿ tóg há tĩ gé, ti tÿ fi mén pẽ nĩ jé gé.

3 Kÿ fi mén jé fi mũ fi tũ han, fi mré nÿ kÿ, jǎvo ti prũ fi jé ti tũ han, ti mré nÿ kÿ.

4 Fi pi(jé) tÿ vèsũ nĩ', fi mén jèn kÿ'. Fi mén tũ vè sir. Kÿ ti hǎ vÿ ri ke nĩ gé. Ti pi(jé) tÿ vèsũ nĩ gé', ti prũ jèn kÿ'. Fi tũ vè, fi mén ti.

5 Hǎ kÿ jagnẽ mũ vènh nenh tũg nĩ. Hèn ri ke mũn ājag kejèn jagnẽ mré to jykren sór mũ, ājag tÿ kuty pipir ki jagnẽ mré nÿ tũ nĩ jé, ājag tÿ Topê mré vémén jé vǎsǎnsǎn jé. Kÿ tag pǎte jagnẽ mré nÿ mǎn nĩ sir, Satanás tÿ

ājag krĩn kónǎn tũ nĩ jé. Ājag tÿ ù mré nÿ sór kÿ tóg inh mũ to ājag tÿ Topê vĩ mranh ha mẽ tĩ, Satanás tÿ ājag krĩn kÿ. Hǎ kÿ tóg ājag tÿ kǎnhmar jagnẽ mré nÿ mǎn kÿn há tĩ.

6 Tag kar tó sóg ājag mũ, ājag krój nÿtĩn kÿ. Inh pi(jé) vènh kar mũ: "ha prũg, ha mén," he sór mũ'.

7 Vènh kar tÿ inh ri ke nÿtĩ ra tóg inh mũ há tĩ vè, isÿ prũ tũ nĩ tag ri ke. Hǎ ra Topê tóg vènh kar tÿ vyrmÿ nén ù to tar han tĩ, ãg tÿ ki króm jé. Hǎ kÿ ù tóg ã prũ tũ to tar nĩ, jó ù tóg ã prũ fi to tar nĩ. Topê tÿ nén han jan hǎ vè.

8 Hǎ ra sóg ùn prũ tũ mũ tag tó sór mũ, ha mẽ. Ājag tÿ inh prũ tũ ri ke nÿtĩ ra tóg há tĩ vè, kÿ ùn mén ter ja fag tÿ mén mǎn tũ ra tóg há tĩ vè gé.

9 Ājag tÿ hǎ ra prũg sór kÿ, ājag tÿ mén sór kÿ tóg há tĩ gé, kÿ ājag tóg vènh prũg han mũ sir. Ājag tÿ prũ tũ nĩ ra fag to én kÿn pi(jé) há nĩ', ājag tÿ ag to én kÿ ke gé'. Hǎ kÿ prũg nĩ, mén nĩ ājag tÿ ù to én tũ nĩ jé.

10 Ājag kǎmĩ ù tóg prũ nÿtĩ, ù fag tóg mén nÿtĩ gé. Ëg Senhor vÿ ājag hǎ mũ tag tó mũ, sÿ tónh ke tag, ha mẽ. Isÿ tó pijé', ti tÿ tó hǎ nẽ', ha mẽ. Ā mén fón tũg nĩ.

11 Ā tÿ ge ra to fón kÿ mén mǎn tũg nĩ. Ā tÿ mén mǎn sór kÿ ã mén fón jan hǎ mré to jykren, ājag tÿ jagnẽ mré nÿtĩ mǎn jé sir. Kÿ ã prũ jèn kÿ fi fón tũg nĩ gé. Ëg Senhor tÿ tón hǎ vè.

12 Jǎvo inh hǎ tóg tag tó mũ ājag mũ, ha mẽ. Ëg Senhor tÿ tó pijé', ha mẽ. Ājag kǎmĩ ù prũ fi tóg Jesus ki rǎ sór tũ nĩ, fi mén tÿ tÿ Jesus mré ke nĩ ra. Fi tÿ ti mré nĩ sór nĩn kÿ tóg fi mré nĩ ha sir. Fi tovǎnh sór tũg nĩ.

13 Kÿ ã mén tÿ Jesus ki rǎ sór tũ ra ã mré nĩ sór kÿ ti mré nĩmĩ gé.

14 Topê tũ vÿ tÿ ã nĩ, ã mén tÿ ti ki rǎ sór tũ ra. Hǎ ra tóg ã mré nĩn kÿ tÿ ti tũ ri ke nĩ gé sir. Kÿ ã prũ fi tÿ Jesus ki rǎ sór tũ ra fi tóg tÿ Topê tũ ri ke nĩ gé sir, fi tÿ ã mré nĩn kÿ. Ke tũ nĩ mũ ra ājag krẽ vÿ ti ki rǎ tũ krẽ ri ke nÿtĩnh mũ vè, Topê mũ. Hǎ ra ag pi(jé) ri ke nÿtĩ'. Tÿ Topê tũ ri ke ag nÿtĩ gé sir, ājag krẽ ti.

15 Hèn ri ke mũn ã mén, ã prũ fi ã fón sór mũ, fi tÿ Jesus ki rǎ sór tũ nĩn kÿ. Kÿ fi mũ, ti mũ: "ha tĩ ge," hemnĩ. Topê vÿ ãg krĩ kuprǎg

sór mũ, hã jé tóg ãg kuprẽg. Hã kÿ ã pi(jé) tÿ ã mén krẽm ke nĩ', ti tÿ ã tovãnh sór kÿ, ã pi(jé) tÿ ã prũ fi krẽm ke nĩ gé', fi tÿ ã tovãnh sór kÿ, ã tÿ jesus ki rã tigrĩn.

16 Hẽn ri ke mũn ti kejẽn kren ke mũ, ã jamẽn kÿ, ã mén ti, hã ra ã pi(jé) ki kanhró nĩ', ti kren ke ti'. Hẽn ri ke mũn fi kejẽn kren ke mũ, ã jamẽn kÿ, ã prũ fi, hã ra ã pi(jé) ki kanhró nĩ', fi kren ke ti'. Hã kÿ fi tĩg kamẽg tũg nĩ, fi tĩg sór kÿ, ti tĩg sór kÿ ke gé.

Ëg tÿ Topẽ jykre hã mũ mũnh

17 Topẽ tÿ ã jykre tÿ ã kuprẽg ja ẽn hã mũ tĩg nĩ, ãg Senhor tÿ ã mũ Vẽn jykre nĩm ja ẽn hã mũ. Hã tóg sóg tĩ, ãg mré vẽn mãn tĩ kar ag mũ.

18 Topẽ vÿ ã kuprẽg. ã tÿ tÿ Israel mré ke nĩn kÿ ã gré junun fár vÿ kym kÿ nĩgtĩ. Kÿ tóg há tĩ. Tÿ tũ' he sór tũg nĩ. ã tÿ tÿ Israel mré ke tũ nĩn kÿ ã fár vÿ kym kÿ nĩ tũ nĩ. Kÿ tóg há tĩ gé. Kym sór tũg nĩ gé.

19 Nén ù tũ vễ, ti fár kym ke ti, ti fár kym ke tũ ti ke gé. Nén pir vÿ há nĩ, hã vÿ: ãg tÿ Topẽ vĩ ki króm, he mũ, ãg tÿ ti tÿ ãg jyvẽn mũ han, he mũ.

20 Topẽ tÿ hã tÿ ã kuprẽg kÿ vẽn jykre ẽn hã mũ tĩmnĩ.

21 ãg kãmĩ ù vÿ patrão nÿtĩ. ãg kajãm tóg, ãg patrão ti, ãg tÿ ãg mẽg kajãm ẽn ri ke, hã kÿ ãg tóg tÿ ti tũ nÿtĩ, fagrĩnh mũ ãg tóg ti rãnrãj han ti. To krĩ kufy nÿtĩ tũg nĩ. ãg tÿ hã ra ãg patrão tovãnh to vẽn jykre há ve kÿ tovãnh nĩ, ti tÿ ãg tovãnh sór kÿ.

22 Ha vé, ãg Senhor vÿ ãg kuprẽg, ãg patrão nÿtĩ ra. ãg tÿ tÿ Cristo tũ nÿtĩn kÿ ãg tóg tÿ ùn patrão tũ ẽn ri ke nÿtĩ sir, ãg tÿ ãg patrão krẽm nÿtĩ ra. Kÿ ãg patrão vÿ ge nĩ gé. Ëg Senhor tÿ ti kuprẽg kÿ tóg tÿ ti patrão jẽ sir. Hã kÿ ùn patrão tũ ag vÿ Cristo ki ge kÿ tÿ Cristo krẽm ke nÿtĩ. jãvo ùn patrão ag vÿ Cristo tigrĩn tÿ ùn patrão tũ ẽn ri ke nÿtĩ gé.

23 Hÿ, ãg kygãm ti mÿr, kaja e tÿ, Cristo ti. Hã kÿ ãg patrão ke ag krẽm nÿtĩ sór tũg nĩ, tũ nĩ mũ ra ag tóg ãg tÿ Cristo mré mũ kamẽg mũ.

24 Inh kanhkã', Topẽ tÿ hã tÿ ãg kuprẽg kÿ vẽn jykre ẽn hã mũ mũmnĩ.

Ûn mén ja tũ fag tóg vẽn jykre

25 Ûn mén ja tũ fag tóg ja ãg tóg nĩgtĩ inh mũ, ãg tÿ rán ki. Hã ra ãg Senhor pi(jé) fag to nén ù tóg ja nĩgtĩ'. Kÿ sóg to jykren kÿ ãg mũ tag tóg sór mũ, ha mẽ. Ëg Senhor tóg inh jagãgtãn, kÿ tóg isar han, sÿ to jykren há han jé.

26 Kÿ sóg ãg tÿ ti jagy vэг tĩ tag to jykren mũ. To jykren kÿ tóg inh mũ há tĩ, ãg tÿ ùn mén han mũ tag tovãnh sór tũ nĩ jé.

27 ã mũ prũ jẽ? Kÿ fi fón sór tũg nĩ. ã mũ prũ tũ jẽ? Kÿ prũg sór tũg nĩ gé.

28 ã tÿ ge ra prũg sór kÿ tóg há tĩ gé hã ra, Topẽ vĩ mranh ke tũ ã tóg nĩ, prũg kÿ. Kÿ ùn mén ja tũ fi mén kÿ tóg há tĩ gé sir. Topẽ vĩ mranh pijé'. Hã ra tóg jagy tĩnh mũ. Krĩ kufy ve jé ãg tóg ke mũ, tag ki, ãg patrão, ãg patrão prũg kÿ, ãg mén kÿ ke gé. Hã ra tóg inh mũ há tĩ vễ, ãg krĩ kufy tũ nĩ ti.

29 Inh kanhkã', inh vÿ tag jẽmẽ ra, ha mẽ. Kurã tÿ ãg vÿ kãnhmar jun ke mũ. Hã kÿ ùn mén fi jé ùn mén ja tũ fi ri ke nĩ, ùn prũg ja tũ ri ke nĩ gé. Tag ki vẽn jykre vễ, fag tÿ jagnẽ mré nÿtĩg ti. Kãnhmar tóg tũ' henh ke mũ.

30 Hã kÿ ù tÿ tag ki fÿ mũ jé ùn fÿ tũ ri ke nĩ. Û tÿ tag ki mũ sér nĩ jé ùn mũ sér vãn ri ke nĩ. Û tÿ nén ù comprar he mũ jé ù tÿ nén ù comprar he tũ ri ke nĩ.

31 Û tÿ ga kri tÿ nén ù mág nĩ ẽn jé ù tÿ nén ù tũ ẽn ri ke nĩ. Tũg kãn jé tóg ke mũ, ãg tÿ tag ki nén vэг mũ ti.

32 Nén ù pir tóg inh mũ há tĩ vễ, hã vÿ: ãg krĩ kuprã kÿ nÿtĩmnĩ, he mũ, ãg tÿ nén ù to krĩ kufy tũ nÿtĩ jé.

Ûn prũg tũ ẽn vÿ ãg Senhor tũ ki rĩr tũgtĩ, kÿ tóg: “ãg Senhor mÿn mũ há nĩ vÿ, sÿ nén han mũ ti?” he tĩ.

33 Jãvo ùn prũg mũ vÿ ãg tÿ tag ki nén vэг tĩ ki rĩr nĩgtĩ, kÿ tóg: “inh prũ fi mÿn mũ há nĩ vÿ, sÿ nén han mũ ti?” he tĩ gé.

34 Kÿ tóg ãg Senhor tũ ki rĩr tãvĩ han tũ nĩ sir, ùn prũ ẽn ti. Kÿ fi vÿ ge nĩgtĩ gé, ùn mén ter ja fi, ùn mén ja tũ fi ke gé. Ëg Senhor tũ ki rĩr fag tóg nĩgtĩ, fag tÿ tÿ ti tũ tãvĩ nÿtĩ jé, fag tÿ ti tũ ki króm há han jé, fag tÿ nén ù han kÿ, fag tÿ nén ù to jykren kÿ ke gé. Ûn mén mũ fi tóg hã ra ãg tÿ tag ki nén vэг tĩ ki rĩr nĩgtĩ, kÿ fi tóg: “inh mén mÿn mũ há nĩ vÿ, sÿ nén han mũ ti?” he tĩ gé.

³⁵ Sỹ ãjag tũ to jykrén há han kÿ, hã kÿ sóg ãjag mÿ tag tó mũ. Inh pi(jé) ãjag mÿ vĩ tar han sór mũ', ãjag tÿ ti tÿ ãjag mÿ há tũ nĩ ên han jé'. ãjag tÿ mũ há han kÿ tóg inh mÿ há tũ, ãjag tÿ êg Senhor tũ ki rĩr há han kÿ, nén ù tÿ ãjag kutãn tũ nĩ jé.

³⁶ Hên ri ke mũn ti ãjag kãmĩ ù mÿ há tũ nĩ, ti kósin fi mén tũ nĩn kÿ. Hên ri ke mũn tóg fi mÿ vênhmÿ nÿ ve nĩ, fi panh mÿ ke gé. Hên ri ke mũn fi sanh há nĩ ha, hên ri ke mũn fi jagtar ke mũ, fi mén ke tũ to. Kÿ tóg jatun mÿ fi tÿ ã tÿ nén han sór mũ ên han mũ sir, fi panh ti. Há ti nĩ, fi mén ke ti. Topê vĩ mranh pijé'.

³⁷ Hên ri ke mũn ù tóg to jykrén há han mũ hã ra, kÿ tóg fi mén sór tũ nĩ sir. Kÿ tóg tá krÿ nĩ, ã kósin fi ki rĩr ke ti. Kÿ tóg to jykrén mãn mũ ra tóg ti mÿ há tũ, fi mén ke tũ ti. Tovãnh sór tũ ti nĩ. Kÿ tóg fi mén tũ nĩ sir. Tag vĩ há tãvĩ nĩ.

³⁸ Hã kÿ tóg ge nĩ, ha mẽ. Ti tÿ fi mén kÿ tóg há nĩ, ã kósin mén ja tũ fi. Ti tÿ fi mén tũ nĩn kÿ tóg há kãfór nĩ.

³⁹ Ûn tÿtá fag vĩ tÿ ãjag mén tũ nÿtĩ, ag rĩnrĩr nÿtĩn kÿ. Û fi mén ter kar kÿ fi hã ra ù tÿ mén sór mũ kÿ fi tóg mén mũ sir, jatun mÿ. Fi mén mãn vè sir, Há ti nĩ. Hã ran jé tÿ êg Senhor mré ke nĩ, fi mén mãn ke ti.

⁴⁰ Fi tÿ mén mãn sór tũ nĩn kÿ tóg há kãfór nĩ sir, fi mÿ sér kãfór. Isÿ fag to jykrén hã vè. Hã ra sóg Topê kuprĩg tÿ jagrẽ nĩ, hã kÿ sóg ãjag mré to jykrén há han mũ gé.

8

Vênh kãggrá tÿ topê to vênh jykre

¹ Kÿ sóg ãjag mÿ vjên tó sór mũ gé. ãjag mẽg tãnh kÿ ag tóg vênh kãggrá tÿ topê mÿ pũn vén tĩ, pũn kar kÿ ag tóg açougue ki ãjag mÿ vjêne he tĩ. Kÿ ãjag kãmĩ ù tóg: “inh mÿ açougue ki mãn kÿ konh mÿ vĩ?” he tĩ, hã kÿ sóg ãjag mÿ kãmén sór mũ.

Hã ra ãjag kãmĩ ù tóg: “ki kanhró êg nÿtĩ, to tar êg nÿtĩ,” he tĩ. “Jatun mÿ êg tóg konh ke mũ,” he ag tóg tĩ. Êg tÿ nén ù to: “ki kanhró mág inh nĩ,” hen kÿ tóg inh mÿ êg tÿ kãnhmar ù to: “ti pi(jé) inh ri ke nĩ', ti kãfór inh nĩ,” henh ha mẽ tĩ. Êg tÿ jagnẽ to há nÿtĩnh ke vè. Êg tÿ jagnẽ to há nÿtĩn kÿ

êg tóg jagnẽ mÿ nén ù há tó tũ, êg kar tÿ ki kanhrãn há han jé sir.

² Êg tÿ nén ù to: “ki kanhró sóg nĩ, ã jãvo,” hen kÿ êg pi(jé) ki kanhrãn há han mũ ver'.

³ Êg tÿ Topê to há nÿtĩn kÿ, kÿ tóg êg tÿ ti ki kanhrãn há han mũ sir Topê ti.

⁴ Kÿ sóg ãjag mÿ vjên ên kãmén sór mũ, ag tÿ ón kÿ vênh kãggrá tÿ topê mÿ pũn tĩ ên ti. Nén ù tũ vè ón kÿ vênh kãggrá tÿ topê ti. Pir ti nĩ, Topê ti. Topê ù vĩ tũ nĩ.

⁵ Nén ù e to ag tóg ón kÿ: “Topê vè,” he tĩ, kãnhkã tãn ù ag to, ga tãn ù ag to ke gé, Û tÿ ge vĩ e nÿtĩ, topê tÿ ge ti, Senhor tÿ ge ti.

⁶ Hã ta tóg êg mÿ pir nĩ, Topê ti, êg jóg mág ti, ag jãvo. Nén kar han ja ti nĩgtĩ mÿr vênhmÿ, kÿ êg tóg ti hã ve sór mũ gé sir. Pir ti nĩ gé, êg Senhor ti, hã vĩ: Jesus Cristo, he mũ. Nén ù kar vĩ nÿtĩ ti tugrĩn, kÿ êg ti tugnĩn krenkren ke mũ gé.

⁷ Hã ra êg kãmĩ ù ag tóg tag ki kagtĩg nÿtĩ ver. Tãg ti nĩ ver, ãjag tÿ ón kÿ vênh kãggrá tÿ topê tovãnh mũ ti, kÿ tóg ver ag mÿ e tĩ. Hã kÿ ón kÿ vênh kãggrá tÿ topê mÿ vjên pũn ja ên tóg tÿ vênh kãggrá tÿ topê ên tũ nĩ nÿji ag mÿ. Kÿ tóg ag tũ vjên ên ko kÿ tóg ag tÿ vênh kãggrá tÿ topê ên tũ ko ri ke nĩ sir ag mÿ. Kÿ tóg ag mÿ há tũ tĩ sir, ag tÿ tag to krój nÿtĩn kÿ ver. Kÿ tóg ag mÿ ag tÿ vjên to vênh kavénh ha mẽ tĩ.

⁸ Êg pi(jé) vjên tugrĩn Topê to há nÿtĩ', ti to kórég nÿtĩ'. Êg tÿ ko tũ (hã) ra nén ù tũ vè gé, vênh kãggrá tÿ Topê mÿ pũn ja ên ti. Vjên vè mÿr.

⁹ Nén ù kar vĩ tÿ êg tũ nĩ.

Hã ra ùn krój tóg hên ri ke mũn Topê vĩ mranh ke mũ, êg tugrĩn, ti tÿ êg tÿ ti mÿ nén ù vênhmÿ to tar nÿtĩ nĩ ve nĩn kÿ. Kÿ tag han sór tũg nĩ.

¹⁰ Ve ra ha. Tar ã tóg nĩ, ki kanhró ã tóg nĩ, vênh kãggrá tÿ topê vĩ tÿ nén ù tũ nĩ ã mÿ. Hã kÿ ã tóg ti jo ãn krêm rã kÿ ko mũ sir, ti festa ti, ã mré ke ù tÿ ti mÿ festa han kÿ. Nén ù tũ vè vè. ã tÿ ti festa ko mũ ti. Hã ra êg mré Jesus ki rã kÿ jẽ ù tóg tag to krój nĩ ver, kÿ tóg tá ã vèg mũ sir, ã tÿ ti festa ko mũ ên kã. Kÿ tóg ã ve kÿ to jykrén mũ sir, ti festa ko sór jé, vênh kãggrá tÿ topê mÿ festa ên, ti mÿ pũn ja ên ti. Hã ra vênh kãggrá tÿ topê tóg ti mÿ tar nĩ, ùn krój mÿ, ti tÿ Jesus ki rã kÿ nĩ (hã) ra.

¹¹ Kĩ tóg ã tỹ ko mũ tigrĩn vãfor ke mũ sir, ùn krój nĩ ti. Ti jãvo ã tóg ki kanhró nĩ, hã ra tóg ã tũgnĩn tũ' henh ke mũ, ùn krój nĩ ti. Hã ra Cristo tóg ti jagfý ter ja nĩgtĩ.

¹² ã tỹ ti vĩ mranh hã vë sir, ã régre krój ãn to. Ti vóg kónãn ã tóg mũ sir, ti krój nĩn kũ. Hã ki ã tóg Cristo vĩ mranh mũ sir, mýr, ha mẽ.

¹³ Hã kũ sóg tag han sór tũ nĩ. Inh irmão tỹ isỹ nén ù nĩ ko to Topẽ vĩ mranh kũ sóg nén ù nĩ ko sór mãn ke tũ nĩ ha, ón kũ vënh kãgrá tỹ topẽ mý pũn ja ãn ti, ti tỹ mranh tũ nĩ jé sir, isugrĩn.

9

Paulo tỹ jãnkamy ve sór tũ

¹ Isỹ nén han mũ ve ra. Èprã ke ag tỹ inh mý nén tó mũ ãn han sór tũ inh nĩgtĩ. Jesus hã vỹ inh fëg, isỹ tỹ apóstolo jë jé. Ti ve inh mýr, ãg Senhor tỹ Jesus ti. Kũ ãjag vỹ isũgnĩn ãg Senhor ki ge jëg. Inh rãnrãj kaja vỹ tỹ ãjag nỹtĩ.

² Hën ri ke mũn sóg ù mý tỹ apóstolo tũ nĩ. ãjag hã mý sóg tỹ apóstolo jë mýr, ãjag tỹ inh vĩ mẽ tigrĩn ti ki ge kũ. Hã ki tóg ve há tĩ, ãg Senhor tỹ inh fëg ja ti.

³ Kũ ù tỹ kejën inh kato vĩ sór mũ mý sóg tag tó tĩ, ha mẽ.

⁴⁻⁵ Jesus tỹ ùn vin mũ ù ag ri ke inh nĩ, apóstolo ù ag ri ke, ù tỹ Jesus mré pygfa mũ ag ri ke, Pedro ri ke ke gé, isỹ vëjën to, inh prũ tũ to ag jykre han tũ ra. ãjag prũ fag pére ag mũ tĩ, ag tỹ hën ra mũn kũ. Isỹ ag ri ke ù tỹ Jesus ki rã kũ jë ù fi tỹ prũg sór mũ ra sóg fi pére tũg ke mũ vë gé, hã ra sóg ke sór tũ nĩ. Kũ ag tóg ãjag jën ko tĩ, ag tỹ ãjag mý Topẽ vĩ tó to. Isỹ ag ri kén ãjag jën ko sór mũ ra sóg konh ke mũ vë gé, hã ra sóg ko sór tũ nĩ.

⁶ Inh nĩgé rãnrãj ja kaja hã ko sór inh tĩ, Barnabé ti ke gé. ãg tỹ Topẽ vĩ tó tĩ ù ag ri kén ãg nĩgé rãnrãj tovãnh sór mũ ra ãg tóg tovãnh ke mũ vë, hã ra ãg tóg rãnrãj sór mũ.

⁷ ãg tỹ Topẽ tỹ ãg mý vënh rãnrãj nĩm kaja venh ken kũ tóg há tĩ vë. Soldado jykre ri ke ti nĩ. Ag pí(jé) ãjag tũ ko tĩ', ag tỹ vënh génh han kũ, soldado ag. ãjag vënh génh hã to ag tóg vëjën vëg tĩ. Kũ ù tỹ uva ki rĩr tĩ vỹ ti kanë ko tĩ gé. Kũ ù tỹ ovelha ki rĩr tĩ vỹ fi

leite kron tĩ gé. Hã kũ tóg ãg tỹ Topẽ vĩ tó to ganho ve sór mũ ra tóg há tĩ vë, hã ra ãg tóg ve sór tũ nĩ.

⁸ Èprã ke jykre ki ãg tóg ãg rãnrãj pë to ãg jën vëg tĩ. Kũ Topẽ vỹ tag tó ja nĩgtĩ.

⁹ Moisés vỹ tag rán ja nĩ, ha mẽ. “Monh tỹ ãkré jãnkre ki rãnrãj kũ ti jënky tógfĩn tũg nĩ, ti jën kamëg tũg nĩ,” he ja ti nĩ, Topẽ vĩ rá ki. Topẽ mý monh hã to jykren kũ tag tó ja nĩ? Vó.

¹⁰ ãg to jykren hã kũ tóg tag tó ja nĩ. ãg hã to tóg rán kũ nĩ, ãg tỹ ãg rãnrãj to ãg jën ve jé. Hã kũ ù tỹ ãpỹ ki rãnrãj mũ tóg to nén ù ve sór mũ, hã jé tóg rãnrãj jë nĩ. ù tỹ jãnkreg mũ vỹ to nén ù ve sór mũ gé, ã rãnrãj to.

¹¹ Isỹ ãjag mý kanhkã jykre tó kũ tóg sỹ nén ù krãn ri ke nĩ, kũ sỹ ãjag ki nén ù ve sór mũ ra tóg há tĩ vë, ijën jé, hã ra sóg ve sór tũ nĩ.

¹² ù ag tóg ãjag jën vëg tĩ, Topẽ vĩ to. Kũ tóg sỹ ag ri kén ãjag ki jãnkamy ve sór mũ ra há tĩ vë, sỹ ãjag mý Topẽ vĩ tó vén kũ. Hã ra sóg ãjag jën ve sór tũ nĩ. Inh jagtar ra tóg inh mý tỹ nén ù tũ nĩ, ù tỹ isugrĩn Cristo kãme sér kato vĩ tũ nĩ jé, sỹ ti kaja ve tũgnĩn Jesus to kórég tũ nĩ jé. Hã kũ sóg ve sór tũ nĩ.

¹³ ù tỹ Topẽ ãn krëm ti tũ ki rĩr tĩ ag vỹ tá ãjag jën vëg tĩ gé, ag tỹ Topẽ mý nén vin tĩ ãn tỹ. Kũ ù tỹ Topẽ mý nén ù pũn tĩ ãn vỹ ti ke ko tĩ gé. ãjag mý tag mẽ ja tũ?

¹⁴ Hã kũ ãg Senhor vỹ tag tó ja nĩgtĩ gé, hã vỹ: “ù tỹ ti kãmén mũ ãn vỹ tag to ãjag jën venh ke mũ,” he mũ.

¹⁵ Hã ra sóg ãjag jën ve sór ja tũ nĩ. Kũ sóg ve sór tũ nĩ gé, ùri, hã kũ sóg ãjag mý rán mũ. Isỹ ijën to inh nĩgé tỹ rãnrãj mũ hã to sóg tỹ ùn mág nĩnh mũ, kanhkã tá. Kũ sóg tỹ tũ' he sór tũ nĩgtĩ. Iser jé tóg inh mý há tĩ, ù tỹ inh mý Topẽ vĩ kajãm sór mũ (hã) ra.

¹⁶ Jesus kãmén sóg tĩ. Inh rãnrãj hã vë. Ti hã tóg inh mý tó, sỹ ti kãmén jé. Kũ sóg ti tó tigrĩn tỹ ùn mág nĩnh ke tũ nĩ. Isỹ ti kãmén sór tũ ra Topẽ tóg inh vóg kónãn ke mũ vë, isỹ inh rãnrãj han tũ nĩn kũ.

¹⁷ Topẽ tỹ inh mý: “ha kãmén,” he tũ nĩ ra sóg kanhkã tá to ganho venh ke vë vë, sỹ ti kãmén tĩ ti to. Hã ra tóg inh mý: “ha kãmén,” he ja nĩ, kũ tóg sỹ ti rãnrãj ki rĩr há han mũ ve sór mũ sir inh ki, Topẽ ti.

¹⁸ Kÿ sóg kanhkã tá to ganho venh ke tũ nĩ, inh rãnrãj ja to. Hã ra sóg ganho ve sór mũ tá. Hã kÿ sóg ãprã ke ag ki sÿ nèn ve sór mũ ãn ve sór tũ nĩ, ijẽn jé. Æjag tÿ inh mÿ nèn vin ke ti ve sór tũ inh nĩ. Véké sóg ãjag mÿ tó tĩ, Topẽ vĩ ti, vẽn kar mÿ ke gé. Æjag tÿ inh mÿ kajãm tũ ra tóg inh mÿ há tĩ. Kÿ sóg tag hã to kanhkã tá inh ganho ti venh ke mũ.

Ûn e tÿ Jesus ki ge kÿ tóg Paulo mÿ há tĩ

¹⁹ Û pi(jé) inh kri ke nĩ'. Ge ra sóg vêsÿ vẽn kar krẽm ke han, vẽn kar tÿ inh patrão ri ke nÿtĩ jé. "Hẽn ri ke mũn ù tóg Jesus ki rã sór mũ, isÿ tÿ ti krẽm ke nĩn kÿ," he sóg tĩ. Hã jé sóg vêsÿ ag krẽm ke han tĩ, ù tÿ ti ki ge mũ ag e nÿtĩ jé, isugrĩn.

²⁰ Judeu ag tugnĩn sóg vêsÿ Judeu han tĩ, Judeu ag tÿ Jesus ki ge jé. Isÿ ag jykre han sór tũ ra inh han ke tũ nĩ vẽn, hã ra sóg han sór tĩ, isÿ ag to há nĩn kÿ. Kÿ sóg Judeu jykre han mũ ag tigrĩn ag jykre han tĩ, ù tÿ ag jykre han mũ ag tÿ Jesus ki ge jé, isugnĩn.

²¹ Kÿ fóg ag vÿ Judeu jykre han tũ nĩgtĩ, kanhgág ag ke gé. Kÿ sóg fóg ag tigrĩn fóg jykre han tĩ, kanhgág ag tugnĩn sóg kanhgág jykre han tĩ, ag tÿ isugrĩn Jesus ki ge jé. Inh pi(jé) Topẽ jykre tovãnh mũ hã ra'. Cristo jykre han sóg tĩgtĩ mÿr. Judeu jykre hã tovãnh inh tĩ, fóg to, kanhgág to ke gé.

²² Kÿ sóg ùn krój ag mÿ komẽr hã vĩ tĩ, ag tÿ isugnĩn Jesus to vãsãnsãn mãn jé. Isÿ ùn jykre ve kÿ sóg ti jykre ri ke han tĩ, ag tÿ Jesus ki ge jé, isugrĩn.

²³ Tag kar han sóg tĩ, Jesus kãme tugnĩn, isÿ ti mré ti rãnrãj ki rĩr jé.

²⁴ Ha mẽ, ùn e tóg corridã han tĩ, hã ra ùn pir tóg ganhar ke tĩ inhhã. Ag ri ke han nĩ. Vãsãn ra, ãjag tÿ ganhar ken jé, Jesus tÿ ãg mÿ nèn ven ke ti.

²⁵ Ha vé, ù tÿ torneio han tĩ ag vÿ to jykren mág tĩ, kÿ ag vãkrég tĩ gé, ag tÿ ganhar ken jé. Æprã jykre ki ag tóg ganhar ke sór tĩ, hã jé ag vãkrég tĩ, ti tÿ kãnhmar tũ' he mũ ra, ag ganho ti. Hã ra ãg tóg kanhkã tá ãg ganho venh ke mũ, ù tÿ tũg ke vãnh ãn ti.

²⁶ Ge sóg tĩ gé, sÿ corridã ri ke han kÿ. Pétẽm sór inh nĩ, to krónh ke tũ sóg nĩ. Rará ri ke han sóg tĩ to. Inh pi(jé) véké rará tĩ'.

²⁷ Vẽn hã to rá sóg tĩ, kÿ sóg isÿ nèn to ãn mũ ãn han ke tũ nĩ. Inh mÿ Topẽ tÿ inh fón

ha mẽ tóg tĩ, isÿ ãjag jyvẽn kar kÿ vẽn jykre pãno han kÿ. Hã kÿ sóg veso rá tĩ, sÿ han tũg jé.

10

Ëg jo ke ag to jykren nĩ

¹ Inh kanhkã', tag jẽmẽ ra, ãjag tÿ ki kanhrãn jé. Ëg jóg'jóg ve ag vÿ Moisés mré mũ ja nĩgtĩ. Kanhkã góg ãn krẽm ag tóg mũ kãn ja nĩgtĩ, kÿ ag tóg goj kusũg nig ãn kafã ra pa kãn ja nĩgtĩ gé.

² Ëg vẽn kygpe ri ken hã vẽn, ag tÿ kanhkã góg krẽm mũ ja ti, ag tÿ goj kusũg nig kafã ra pa ja ti ke gé. ãn kã Moisés vÿ ag jãmĩ tĩg ja nĩgtĩ, Jesus tÿ ãg ki rĩr nĩ tag ri ke.

³ Kÿ ãg jóg'jóg ve ag tóg kanhkã tá vẽnẽn ko kãn ja nĩgtĩ gé,

⁴ kanhkã tá goj tÿ ãganẽ ki kronkron kãn ja ag tóg nĩgtĩ gé, kanhkã tá goj tÿ vẽn kanẽ ti. Pãró tá ag tóg goj ve ja nĩgtĩ, hã ra tóg tÿ kanhkã tá ke nĩ ja nĩgtĩ. Cristo to ken hã vẽn. Ti hã vÿ ag mré tĩ ja nĩgtĩ. Kÿ tóg ag mÿ goj ãn ven ja nĩgtĩ.

⁵ Ge ra Topẽ tóg ãg jóg'jóg ve ag to jũ kãn ja nĩgtĩ, kÿ ag tóg kãgter kãn ja nĩgtĩ, ga kórég ãn tá. Hã ra tóg ùn pipir ag hã to há ja nĩgtĩ, Topẽ ti, kÿ ag hã tóg krenkren ja nĩgtĩ, ùn pipir ãn ag.

⁶ Hã ra tóg rán kÿ nĩ, ãg tÿ tÿ vẽn kanhrãn jé, ãg tÿ nèn ù kórég to ãn tũ nĩ jé. To ãn ja ag tóg nĩgtĩ, ãg jóg'jóg ve ag, kÿ ãg tag han ke tũ nĩ.

⁷ Hã kÿ ón kÿ vẽn kãggrã tÿ topẽ nón mũ sór tũg nĩ. Tag han ja ag tóg nĩgtĩ gé, ãg jóg'jóg ve ag. Hã kÿ tag tóg rán kÿ nĩ, hã mẽ. "Povo kar vÿ nĩgnĩ mũ sir, ag tÿ vẽn kãggrã tÿ topẽ to festa ko jé, ag kronkron jé sir, ag tÿ kar kÿ vẽn gringrén jé fag mré," he ja tóg nĩgtĩ, Topẽ vĩ rán ki. Hã to Topẽ tóg ag to jũ ja nĩgtĩ gé.

⁸ Kÿ ãg ùn mén tũ fag mré nÿnh ke tũ nĩ gé. Tag han ja ag tóg nĩgtĩ gé, ãg jóg'jóg ve ag, kÿ kurã pir ki ù tÿ 23 mil (ke) ag vÿ kãgter ja nĩgtĩ, Topẽ tÿ ag tũg kÿ.

⁹ Kÿ ãg Topẽ to: "ti hÿn iso jũnh ke tũ nĩ, sÿ ti vĩ mranh mũ ra," henh ke tũ nĩ gé. Ke ja ag tóg nĩgtĩ gé, ãg jóg'jóg ve ag, kÿ pÿn tóg ag kãgtén ja nĩgtĩ, Topẽ tÿ ag to jũn kÿ.

10 Kÿ ãg Topẽ to vÿ kónãn ke tũ nĩ gé. Ke ja ag tóg nĩgtĩ gé, ãg jóg'jóg ve ag, kÿ Topẽ tÿ jênẽ jafã tóg ag kãgtén ja nĩgtĩ.

11 Hã ra Topẽ tóg ag vóg kónãn, ãg tÿ ag to vãnh kanhrãn jé. Hã jé tóg rán kÿ nĩ gé, ti tÿ to ãg jyvẽn jé. ãg hã mÿn kakó nĩ, kurã tÿ ãgno ti.

12 Hã kÿ veso jykrén. ã tÿg há han kÿ, ã tÿ ti vÿ mranh tÿg kÿ tóg há tĩ. Hã jé vãnh ki rÿr, ã tÿ prãnh ke tũ nĩ jé.

13 Nén-Kórég vÿ ãg krÿn sór mũ, ãg tÿ Topẽ vÿ mranh jé. Hã ra tóg ãprã ke jykre ki ãg krÿn sór tĩgtĩ, Japo ti. Kÿ Topẽ tóg ti végtĩ, kÿ tóg ãg ki rÿr tĩ. Kÿ tóg kejèn ti mÿ: “gen kÿ,” he tĩ sir, ti tÿ ãg kutãn tãvÿ han mũ ra ãg tÿ hẽ ri ke tũ nĩ jé. Kÿ tóg ãg tar han ke mũ gé, ãg tÿ Nén-Kórég tÿ ãg krÿn kónãn mũ ra ti kato tẽ jé, ãg tÿ ti mÿ: “hej,” he tũ nĩ jé.

Vãnh kãggrã tÿ topẽ jykre han sór tÿg nĩ

14 Inh krẽ', tag tũgrÿn vãnh kãggrã tÿ topẽ tovãnh pẽ han nĩ, ve sór tÿg nĩ.

15 Ki kanhró ãgag tóg nÿtĩ, hã kÿ ãg tÿ Jesus jamĩ ko tĩ ãn to jykrén nĩ, ha mẽ.

16 ãg tÿ Cristo ter ja mĩ ãkrén kÿ ãg tóg kron tĩ, ti kyvãnh ri ke ãn ti. Copa ãn to Jesus tóg Topẽ mré vÿ há han ja nĩgtĩ, ag tÿ kron jé. Kÿ ãg tóg to Topẽ mré vÿ kar kÿ kron tĩ sir. ãg tÿ kron kÿ ãg tóg tÿ ti mré ke nÿtĩ sir, ãg tÿ ti kyvãnh ri ke ãn kron kÿ. Kÿ ti jamĩ vÿ ge nĩgtĩ gé. Kupãn kÿ ãg tóg ko tĩ, Cristo tÿ ãg mÿ tón kÿ. ãg tÿ kon kÿ ãg tóg tÿ ti mré ke nÿtĩ gé sir, ãg tÿ ti nĩ ri ke ãn kon kÿ.

17 Ti jamĩ vÿ pir nĩ, kÿ ãg tóg ko kãn kÿ ãg tóg tÿ ãn pir nÿtĩ gé, ti mré, ãg e hã ra. Jesus jamĩ ko to vãnh jykre hã vẽ.

18 Kÿ povo tÿ Israel ag to jykrén nĩ gé, ha mẽ, Israel krẽ ag to. Topẽ mÿ ag tóg nén ã pũn tĩ, ti pũn jafã kri. Pũn kÿ ag tóg ko tĩ gé. Ag tÿ kon kÿ ag tóg tÿ ag tÿ ãn mÿ pũn mũ ãn mré ke nÿtĩ gé sir, ãg tÿ tÿ Jesus mré ke nÿtĩ ri ke.

19-20 Kÿ ón kÿ vãnh kãggrã tÿ topẽ to jykrén nĩ gé, ha mẽ. Ag tÿ vãnh kãggrã tÿ topẽ mÿ nén ã pũn kÿ ag tóg Nén-Kórég ag hã mÿ pũn tĩ. Ag pi (jé) Topẽ pẽ mÿ pũn tĩ'. Hã kÿ tóg inh mÿ há tũ nĩ, ãgag tÿ tÿ Nén-Kórég ag mré ke nÿtĩn kÿ, ãgag tÿ ag tũ kon kÿ ke gé.

Inh pi(jé) ãgag mÿ: “vãnh kãggrã tÿ topẽ vÿ nÿgtĩ, kÿ ag tÿ ag mÿ pũn mũ ãn vÿ tÿ nén ã nĩ,” he sór tĩ'. Nén ã tũ vẽ, Topẽ tũ vẽ, ón kÿ vãnh kãggrã tÿ topẽ ti.

21 Hã ra tóg vãnhmÿ nĩ, ãgag tÿ ãg Senhor tÿ copa ki ke kron kar kÿ Nén-Kórég tÿ copa ki ke kron kÿ ke gé. Vãnhmÿ ti nĩ, ãgag tÿ ãg Senhor jèn ko kar Nén-Kórég ag jèn kon kÿ ke gé.

22 ãg tÿ Nén-Kórég ag tũ kon kÿ ti hẽn ri ke mũn ãg to jũnh ke mũ, ãg Senhor ti. Ti tÿ ãg to jũ nĩn kÿ tóg vãnhmÿ nĩ. ãg pi(jé) ti tÿ hẽ ri kenh mũ'. Hã kÿ ón kÿ vãnh kãggrã tÿ topẽ ve sór tÿg nĩ.

ãg régre tũgrÿn ãg kejèn konh ke tũ nĩ

23 Hã ra ãgag tóg inh mÿ: “isÿ nén han sór mũ ãn han jé sóg ke mũ, pi(jé) kórég nĩ,” he sór mũ. Há ti nĩ vẽ, tag ti. Hã ra ãg tÿ nén han mũ ã tóg ãg mÿ nén ã há han tũ nĩgtĩ. Nén ã kar han há ãg tóg tĩ vẽ, hã ra ãg tÿ nén han mũ ã tóg ãg tar han ke tũ nĩ, Jesus to.

24 Kÿ ã tũ to jykrén tãvÿ han tÿg nĩ, ã régre tũ to jykrén nĩ gé, ti mÿ há nĩ jé, ha mẽ.

25 Kÿ ã tÿ nén ã tãnh jafã ki nén ã nĩ kajãm sór nĩn kÿn há tĩ, kÿ ag mÿ: “ũ mÿ ón kÿ vãnh kãggrã tÿ topẽ mÿ ti nĩ tag pũn ja tũ?” he tÿg nĩ. Jẽmẽ tÿg nĩ, jatun mÿ komnĩ.

26 Topẽ tũ vẽ, ga ti, ga kri ke kar ti ke gé, hã kÿ jatun mÿ komnĩ.

27 Kejèn ã tÿ Jesus ki rã tũ ã vÿ ã mÿ: “inh mré jèn kãtÿg,” he mũ sir. ã tÿg sór kÿ ã tóg tÿg mũ, kÿ ã tóg nén ã kar konh ke mũ. Ti ki jẽmẽ tÿg nĩ, ã tÿ hẽn ri ke mũn ón kÿ vãnh kãggrã tÿ topẽ mÿ nén ã pũn ja ti, ã tÿ jatun mÿ ko jé.

28 Hẽn ri ke mũn ã tóg sir ã mÿ: “vẽjẽn tag ã pũn ag, ón kÿ vãnh kãggrã tÿ topẽ mÿ,” he mũ. Kÿ ko tÿg nĩ sir, ti tũgrÿn, ã tÿ ã mÿ tó mũ tũgnĩn, ti tÿ ã to jykrén kónãn tũ nĩ jé.

29 ã pi(jé) to jykrén mũ vẽ', hã ra ti hã tóg to jykrén mũ, hã kÿ tóg ã mÿ tó mũ. Há tũ ti nĩ inh mÿ, ã tÿ iso jykrén kónãn kÿ, isÿ nén ã tÿ inh mÿ kórég tũ han to.

30 Topẽ mÿ sóg vẽn ãn to vÿ há han ja nĩgtĩ. Kÿ ã tÿ tag to iso vÿ vÿ he mũ ra tóg inh mÿ kórég nĩ, sÿ Topẽ mÿ vÿ há han ja ãn to. Hã kÿ sóg ko sór tũ nĩ, ã tÿ iso jykrén kónãn sór kÿ.

³¹ Hã ky Topê hã my nén kar han nĩ, vènh kar tỹ Topê jykre há nĩ ve jé. ã jèn ky ti jykre ki jèn nĩ. ã kron ky ti jykre ki kron nĩ. ã tỹ nén ù han ky ti jykre hã ki han nĩ gé, vènh kar tỹ ti jykre há nĩ ve jé.

³² Û tỹ ã tigrĩn Topê to jũ tũ nĩ jén há tĩ, Judeu ag, fóg ag, kanhgág ag, Topê tũ ag ke gé, ù tỹ èg mré ke ag. Kỹ vènh jykre há hã han nĩ.

³³ Ke sóg tĩ gé. Vāsān sóg tĩ, vènh kar tỹ iso há nỹtĩ jé. Hã jé sóg isũ ki rĩr tãvĩ han tũ nĩgtĩ. Vènh kar tũ ki rĩr inh tĩ, ag tỹ Jesus ki ge jé.

11

¹ Inh jykre han sórmnĩ, isỹ Jesus jykre han ri ke.

Ûn tỹtá fag jykre

² Hỹ, ãjag my sóg vĩ há han sór mũ myr. Isỹ ãjag my nén tó mũ èn to jykren kãn ãjag tóg mũgtĩ myr'. Isỹ ãjag kanhrãn èn ki króm sór ãjag tóg tĩ.

³ Hã ky sóg nén ù ki ãjag kanhrãn sór mũ sir, ha mẽ. Cristo vỹ tỹ ag kri ke nĩ, ky ag vỹ tỹ ãjag prũ fag kri ke nỹtĩ, ky Topê vỹ tỹ Cristo kri ke nĩ gé.

⁴ Kỹ ag kãmĩ ù tỹ kur tỹ vènh kri fón ky Topê mré vỹ ky tóg há tũ nĩ, ti tỹ kur tỹ vènh kri fón ky jèn ky Topê vỹ tón ky. Ti my'ãg vè sir.

⁵ Ûn tỹtá fag tỹ hã ra kur tỹ vènh kri fón tũ ra Topê mré vỹ ky tóg há tũ nĩ. Fag tỹ kur tỹ vènh kri fón tũ ra Topê vỹ tó ky fag tóg ãjag kri ke èn my'a han mũ sir, ky tóg fag my'a tĩ gé sir, fag krĩ kator ri ke ti nĩ sir.

⁶ Hã ky tóg fag tỹ vènh kri fón sór tũ ky fag krĩ kator ri ke nĩ. Hã ra tóg fag my'a tĩ, fag gãn rhonh ke to, fag krĩ kator nĩnh ke to. Hã ky tóg há tĩ gé, fag tỹ kur tỹ vènh kri fón tĩ.

⁷ Hỹ, hã vè. Ag kãmĩ ù tóg kur tỹ vènh kri fón ke tũ nĩ, ti tỹ tỹ Topê ri ke nĩn ky, èg tỹ ti tigrĩn Topê tỹ ti kri tỹ ùn mág nĩ ven ky. Hã ra èg tóg ùn tỹtá fag hã tigrĩn èg tóg ag tỹ fag kri tỹ ùn mág nỹtĩ vég tĩ.

⁸ Ha vé, Topê pi(jé) ùn ve fi tỹ ùn ve ti han ja nĩ'. Ûn ve tỹ tóg fi han ja nĩ myr.

⁹ Kyn pi(jé) fi tigrĩn ti han'. Ti hã tugnĩn tóg fi han.

¹⁰ Hã ky ùn tỹtá fag tóg kur tỹ vènh kri fón ke mũ, fag tỹ tỹ ag krèm ke nỹtĩn ky. Kỹ

Topê tỹ jènè jafã ag tóg fag tỹ tỹ ag tũ nỹtĩ ki kanhró nỹtĩ sir, kur èn to.

¹¹ Hã ra èg kar vỹ èg Senhor ki ge ky nỹtĩ. Ti ki ge ky nỹtĩn ky ùn tỹtá fag pi(jé) ãjag pir my tỹ nén ù nỹtĩ'. Ag mré ke fag nỹtĩ. Kỹ ag pi(jé) ãjag pir my tỹ nén ù nỹtĩ gé'. Fag mré ke ag nỹtĩ gé. Jagnè ki rĩr èg tóg tĩ ha.

¹² Hỹ, ùn tỹtá fi vỹ tỹ ti ki han ky nĩ. Hã ra ag kar tóg fag ki mur tĩ sir, jãvo èg kar vỹ tỹ Topê tỹ há (r) kar nỹtĩ.

¹³ Kỹ to jykren, ãjag. Há tũ tóg nĩ, ùn tỹtá fag tỹ kur tỹ vènh kri fón tũ ra Topê mré vèmén ky.

¹⁴ Fag kar vỹ kur tỹ vènh kri fón tĩ, èg mré ke tũ fag mré hã. Hã ky èg vèsóg ki ki kanhró nỹtĩ, vènh jykre tag ti. Há ti nĩ myr.

Ag my'a tóg tĩ, ag gãn rh tég ti. Vèsóg ki èg tag to jykren tĩ.

¹⁵ Hã ra tóg fag my sér tĩ, fag gãn rh tég ti. Hỹ, fag gãn rh vỹ tỹ fag krĩ kri fón ja ri ke nĩ.

¹⁶ Hèn ri ke mũn ãjag kãmĩ ù my tóg há tũ nĩ hã ra, fag krĩ kri fón ja ti. Kỹ tag to jykren nĩ, ha mẽ: ã tỹ kri fón sór tũ tag pi(jé) tỹ èg jykre nĩ'. Topê tũ fag jykre pijé'. Igreja kar ki fag tóg kur tỹ vènh kri fón tĩ, ha mẽ. Kỹ igreja krèm èg my'a han sór tũg nĩ.

Santa Ceia to vènh jykre

(Mt 26.26-28; Mc 14.22-24; Lc 22.17-20)

¹⁷ Kỹ sóg nén ù ki ãjag my vỹ há han ke tũ nĩ gé. ãjag jykre ù tóg há tũ nĩ, ha mẽ. ãjag vènh mãn ky ãjag nèji, Jesus jamĩ ko ky ãjag nèji jagnè jèn vóg tĩ, ky ãjag nèji jagnè kókég tĩ sir.

¹⁸ ãjag vènh mãn ky ãjag nèji jagnè kato tẽ tĩ, vènh kãpãm ky, ky tóg inh my ki hã ke ve nĩ, sỹ to jykren ky. ãjag kãmĩ ù hỹn vènh kãpãm sór tĩ, he sóg tĩ.

¹⁹ Hỹ, há ti nĩ vè, ãjag tỹ vènh kãpãm ky nỹtĩn ky. Kỹ ùn jykre há ag vỹ vènh ven ke mũ, ãjag kãmĩ.

²⁰ Kỹ, ãjag vènh mãn ky ãjag pi(jé) èg Senhor jamĩ ko tĩ', Santa Ceia he mũ èn tĩ'.

²¹ Tỹ festa han ky ãjag kar nèji vènh fãn hã jé ko tĩ, ãjag fór sór ky. Tá jun ky ãjag nèji kãn hmar ko tĩ. Kỹ ù ag nèji vènh fãn tĩ, vinho kron ky ag nèji tỹ pépév tĩ, jó ù ag tóg kókĩnkĩr tĩ sir, ù tỹ kãn hmar tá junjun mũ ag tỹ ag tũ kaggran ky.

22 Ha mē, vēnhmỹ ti nĩ. Topē mré ke ag to é he mũ ve ājag tóg nỹtĩ mỹr', ājag tỹ ag tũ kaggran kỹ. Ũn jagtar ag mỹ'a han ājag tóg mũ mỹr', ājag tỹ ag jēn kaggran kỹ, ag junjun to hã. Tag tỹ inh hỹn hē ri kenh mũ? Inh mỹ ājag mỹ vĩ há han ke mũ', tag to? Vó', kenh ke tũ inh nĩ. Kórég ti nĩ, ājag tỹ han mũ tag ti. Ājag ĩn hã tá vėjēn tỹ vēnh fãn nĩ.

23 Ha mē, ěg Senhor tóg inh mỹ tó ja nĩ, sỹ ājag mỹ tó mũ ti, ěg tỹ ti ter to jykrén kỹ tag han jé, ha mē. Kuty ěn kã, Judas tỹ pã'i ag mỹ ěg Senhor tỹ Jesus tó ja ěn kã ěg Senhor tóg ěmĩ mãn ja nĩgtĩ, Jesus ti.

24 To tóg Topē mré vĩ ja nĩgtĩ. Kupãn kỹ tóg ag mỹ: “inh hã vē,” he ja nĩgtĩ. “Ājag jagfy sóg ter ke mũ. Kỹ inh mĩ ěkrén nĩ, ājag tỹ pão tag kon kỹ,” he ja tóg nĩgtĩ.

25 Ag tỹ ko kar kỹ tóg copa mãn ja nĩgtĩ gé sir. Kỹ tóg ag mỹ: “copa ki jē tag vĩ inh kyvénh ri ke nĩ,” he ja nĩgtĩ. “Inh jykre tãg to ken hã vē, isỹ inh kyvénh tugrĩn ājag mỹ vēnh pãte fón jé. Kỹ inh kyvénh tỹ inh ki kutē mũ ěn mĩ ěkrén nĩ, ājag tỹ copa kãkã nĩ tag kron kỹ,” he ja tóg nĩgtĩ gé.

26 Hã kỹ ěg tỹ ěmĩ ěn kon kỹ, ěg tỹ copa kãkã nĩ ěn kron kỹ ěg tóg sir ěg Senhor ter ti tó tĩ. Tag han ěg tĩ, ti kãtĩg ken jo.

27 Hã kỹ vēnh jykre kórég ki ěmĩ ěn ko sór tũg nĩ, copa kãkã nĩ ěn kron kónãn sór tũg nĩ gé, ěg Senhor tũ ti. Ke tũ nĩ mũ ra tóg ěg tỹ ti ter to é he ri ke nĩ, ěg tỹ ti kyvénh kutē to é he ri ke ti nĩ, ěg tỹ ěg jykre kórég ra kron kỹ.

28 Hã kỹ ěg jé ěg jykre tugnỹm. Tugnỹm kar kỹ, ti há nĩ ve kar kỹ ěg tóg ěmĩ ěn konh mũ, copa kãkã nĩ ěn kron ke mũ gé.

29 ěg tỹ ón kỹ ko sór kỹ, ón kỹ kron sór kỹ, ti tỹ ěg mỹ vėjēn ũ ri ke nĩn kỹ Topē tóg ěg vóg kónãn ke mũ sir, ěg tỹ ěmĩ ěn to ěg Senhor ter mĩ ěkrég tũ nĩn kỹ. Kỹ ěg tóg Topē tỹ ěg vóg kónãn hã jé tỹ nén ũ tũ han kỹ ko' he mũ, kron' he mũ gé sir.

30 Ājag tỹ Jesus jamĩ ko to vēnh ki rĩr há han tũ nỹtĩn kỹ, hã kỹ ũ ag tóg krónhkrój nỹtĩ, ājag kãmĩ, kỹ ũ ag tóg kaga nỹtĩ, kỹ ũ tỹ hēn ri ke ag tóg kãgter huri ke gé.

31 Ha vé, ěg tỹ ěg jykre tugnỹm kỹ ti mỹ tó kỹ tóg ěg mỹ vēnh pãte fón ke mũ. Kỹ tóg ěg jykre tugnỹm mãn ke tũ nĩ sir, ěg vóg kónãn

ke tũ tóg nĩ gé, ěg Senhor ti.

32 Hã ra tóg kejēn ěg vóg kónãn tĩ. ěg Senhor tỹ ěg kanhrãn sór vē, ti tỹ ěg tỹ kygnē to ěg vóg kónãn kỹ, ti tỹ ěg vãm tũ nĩ jé, ũ tỹ ti vĩ mranh mũ ag mré hã.

33 Inh kanhkã', tag to jykrén, kỹ jagnē jãvãnh nĩ, ājag tỹ vėjēn tỹ Santa Ceia ko sór kỹ.

34 Ājag kãmĩ ũ kókĩr nĩn kỹ tóg ã ĩn tá ã jēn tỹ vēnh fãn ke mũ, ke tũ nĩ mũ ra tóg ājag vóg kónãn ke mũ, ěg Senhor ti, ājag tỹ vēnh mãn kỹ vēnh fãnfan kỹ.

Sỹ ājag mỹ nén tónh ke ũ tóg nỹtĩ ke gé, hã ra sóg rán ke tũ nĩ. Sỹ ājag mré nĩnh ken kỹ sóg ājag mỹ kãmén ke mũ.

12

Topē vĩ ěg tar han mũ, ti kuprĩg tỹ

1 Kỹ sóg ājag mỹ Topē kuprĩg tỹ ěg krĩn ke tag tó sór mũ, ājag tỹ inh ki jēmēn kỹ. Kejēn tóg nén ũ to ěg tar han tĩ, ěg tỹ han jé, Topē kuprĩg ti.

2 Ha vé, vãsỹ, ājag tỹ Jesus ki ge tũg ki ājag tóg ón kỹ vēnh kãggrá tỹ topē nón mũ ja nĩgtĩ gé. Vĩ vãnh ti nỹtĩ, vēnh kãggrá tỹ topē ti, hã ra Japo vĩ ājag tỹ ag ki rã han ja nĩgtĩ.

3 Hã kỹ sóg tag to ājag kanhrãn sór mũ, ha mē. Topē kuprĩg tỹ ěg krĩn kỹ ěg pi(jé) Jesus to: “Nén-Kórég ag pã'i mág,” he tĩ'. Jãvo ěg tỹ Jesus mỹ: “ěg Senhor,” hen kỹ Topē kuprĩg tóg ěg krĩn mũ sir, ke tũ nĩ mũ ra ěg ti mỹ: “ěg Senhor,” he vãnh nĩ sir.

4 Kỹ Topē kuprĩg vĩ tỹ ũn pir nĩ, hã ra tóg ěg tar han tĩ, nén ũ kar to. Vyrmỹ tóg ěg tãn tĩ', ěg tãn tĩ' he tĩ.

5 Kỹ ěg rãnrãj vĩ e nỹtĩ gé, ěg kar vĩ vyrmỹ rãnrãj nỹtĩ gé, hã ra tóg pir nĩ, ěg Senhor ti, ũ tỹ ěg mỹ vēnh rãnrãj nĩm tĩ ti.

6 Kỹ ěg tỹ ti jykre ki nén ũ hyn han mũ vĩ e nỹtĩ, hã ra tóg pir nĩ, Topē ti, ũ tỹ ěg tar han mũ ti.

7 Kỹ Topē kuprĩg vĩ ěg tar han kãn tĩ sir, kỹ tóg ũ tỹ nén ũ to tãn kỹ nĩ han tĩ, jó tóg ũ tỹ nén ũ ũ to tãn kỹ nĩ han tĩ gé, ěg kar tỹ jagnē mỹ nén ũ há han jé, ěg tỹ nén ũ to tar nỹtĩ ěn tỹ.

8 Hã kỹ Topē kuprĩg tóg ũ tar han tĩ, ti tỹ ěg mỹ ti vĩ kãmén há han jé sir. Ũ tar han tóg tĩ gé, ti tỹ Topē vĩ ki nén ũ kar ki kanhró nĩ jé.

⁹ Kÿ Topě kuprīg tóg ũ tar han tĩ, ti tỹ ti ki fé mág to. Ũ tar han tóg tĩ gé, ti tỹ ũn kagyga tỹ há' he jé, Topě kuprīg ěn ti mÿr.

¹⁰ Ũ tar han tóg tĩ gé, ti tỹ ěg tỹ nén han vānh han jé, ũ tar han tóg tĩ, ti tỹ ěg jyvĕn há han jé, kÿ tóg ũ tar han tĩ, ti tỹ: “tag vỹ tỹ vĕnh jagrĕ há nĩ, tag vỹ tỹ vĕnh jagrĕ kórĕg nĩ,” he jé. Ũ tar han tóg tĩ, ti tỹ ěg tỹ vĕnh vĩ ki kagtīg ki Topě mré vĕmén jé, kÿ tóg ũ tar han tĩ, ti tỹ ěg tỹ vĕnh vĩ ki kagtīg mĕ kÿ ěg vĩ ki tó jé sir.

¹¹ Hã ra tóg pir nĩ, Topě kuprīg ti. Ti pir nĩ ra tóg nén ũ e tag hyn han tĩ, kÿ tóg to ěg tar han tĩ. Ti hã ne to jykrén kÿ: “tag tar han jé sóg ke mũ, tag to, jó sóg ũ ěn tar han ke mũ, ěn to,” he tĩ'. Kÿ tóg vÿrmÿ ũ tar han', vÿrmÿ ũ tar han' he tĩ sir.

Nén ũ pir ri ke ěg nÿtĩ, ěg jagrĕ pir nĩn kÿ

¹² ěg há to jykrén nĩ, ha mĕ. ěg há vỹ tỹ ũn pir nĩ, hã ra ěg há ki nÿtĩ vỹ e nÿtĩ, ěg pĕn, ěg nĩgé, ěg nĩgrĕg, ti kar ti. Kÿ ěg há ki nÿtĩ kar vỹ tỹ ěg há nĩ sir. Nén ũ pir vĕ sir, ti e nÿtĩ ra, ti tỹ ěg ki nÿtĩ kar nĩn kÿ. Tag ri ke ěg nÿtĩ gé. Cristo há ri ke ěg nÿtĩ, ěg tỹ ti ki ge kÿ nÿtĩn kÿ.

¹³ Topě kuprīg vỹ tỹ ũn pir nĩ, kÿ ěg kar vỹ kygpe kÿ nÿtĩ, ti kuprīg tỹ, hã vỹ: Cristo há pir, he mũ. ěg kãmĩ ũ ag tóg tỹ povo tỹ Israel ag ki ke nÿtĩ, ũ ag tóg tỹ povo ũ ag ki ke nÿtĩ gé, ũ ag tóg ěprã ke tỹ patrão nÿtĩ, jó ũ ag tóg patrão tũ nÿtĩ. Hã ra Topě kuprīg vỹ tỹ ũn pir nĩ, ěg jagrĕ ti, kÿ tóg tỹ ěg jagrĕ kar nĩ, ti pir nĩ hã ra. Nén ũ pir vỹ tỹ ěg nÿtĩ.

¹⁴ ěg há vỹ ge nĩ, ha mĕ. ěg há ki nÿtĩ pi(jé) tỹ ũn pir nĩ'. E ti nÿtĩ, ěg há ki nÿtĩ ti. Kÿ ěg jé ěg rãnrãj to vĩ vĩ he tũ nĩ.

¹⁵ Hĕn ri ke mũn ěg pĕn tóg to jykrén kÿ: “inh pi (jé) tỹ vĕnh nĩgé nĩ', hã kÿ sóg vĕnh há ki nÿtĩ tũ nĩ,” he tĩ. Hã tũ vĕ hã ra. ěg há ki nÿtĩ ti nĩ, ěg pĕn ti, ti tỹ tỹ ěg nĩgé tũ nĩ ra.

¹⁶ Kÿ ěg nĩgrĕg tóg to jykrén kÿ hĕn ri ke mũn: “inh pi(jé) tỹ vĕnh kanĕ nĩ', hã kÿ sóg vĕnh há ki nÿtĩ tũ nĩ',” he tĩ gé. Hã tũ vĕ mÿr.

¹⁷ ěg há tỹ tỹ vĕnh kanĕ tãvĩ nĩ hã ra ěg ne tỹ jĕmĕnh mũ vĕ? ěg há tỹ tỹ vĕnh nĩgrĕg tãvĩ nĩ hã ra ěg nén ũ ger mĕnh ke tũ nĩ vĕ.

¹⁸ Topě hã ne ěg há ki nÿtĩ hyn han kãn', kÿ tóg ti ki nÿtĩ kar mÿ vÿrmÿ vĕnh jykre

vin kãn ja nĩgtĩ, ti tỹ ã rãnrãj ěn han jé. Topě tỹ nén to jykrén jan hã vĕ.

¹⁹ Kÿ ti ki nÿtĩ kar tỹ vĕnh jykre pir nĩ ra ěg há vỹ tũ nĩ vĕ.

²⁰ Há ti nĩ, Topě jykre ti. ěg há ki nÿtĩ jykre e han ti, ti e tỹ ěg há pir han jé sir.

²¹ Hã kÿ ěg kanĕ pi(jé) ěg nĩgé mÿ: “ã pi(jé) inh mré rãnrãj tĩ',” he tĩ'. Kÿ ěg krĩ vỹ ge nĩgtĩ gé. ěg pĕn mÿ ti: “ã pi(jé) inh mré rãnrãj tĩ',” he tũ nĩgtĩ gé.

²² Ge tũ ti nĩ, ěg há jykre ti. ěg há ki nÿtĩ ũ tóg rãnrãj krój han nĩ ve nĩ, hã ra ěg tóg jarĩn mÿ tỹ jagnĕ mré rãnrãj kãn tĩ.

²³ Kÿ ti ki nÿtĩ ũ tóg rãnrãj kufy han tĩ, kÿ ěg tóg hã ra ti ki rĩr há han tĩ sir. Kÿ ti ki nÿtĩ ũ tóg ěg mÿ sĩnvĩ tũ nÿtĩ, hã kÿ ěg tóg kur krĕm ti rãg tĩ.

²⁴ Ũ tỹ ěg mÿ sĩnvĩ nÿtĩ tỹ ěg tóg kur krĕm rãg tũ nĩgtĩ sir. Kÿ Topě tóg ěg mÿ vĕnh jykre nĩm, ěg tỹ ti ki nÿtĩ tỹ vĕnh rãnrãj kufy han mũ ěn ki rĩr há han jé sir. ěg há jykre hã vĕ. Topě vỹ to jykrén kãn, kÿ tóg ěg há ki nÿtĩ han kãn,

²⁵ ěg há tỹ vĕnh jykre pir han jé. Kÿ tóg ti mÿ há tĩ, ěg tỹ ěg mré Jesus ki ge kÿ nÿtĩ kar ag ki rĩr há han kÿ. ěg tỹ jagnĕ ki rĩr há han kÿ ěg kãmĩ ũ vỹ jagtar tũ nÿtĩn mũ, ěg tỹ ěg há ki nÿtĩ jykre pir ri ke han kãn kÿ, jagnĕ mÿ.

²⁶ Hÿ, ěg há ki nÿtĩ pir kaga nĩn kÿ tóg kaga kãn tĩ sir. Kÿ tóg ge nĩ gé, ěg mré. Jagnĕ mré tóg ěg mÿ e tĩ. Kÿ ũ tỹ ěg kãmĩ ũ mÿ vĩ há han kÿ tóg ěg kar mÿ sér tĩ gé sir.

²⁷ Ha mĕ, Cristo há ri ke ěg nÿtĩ, kÿ ěg kar vỹ ti há ki nÿtĩ ri ke nÿtĩ gé sir.

²⁸ Kÿ Topě tóg ũ tỹ igreja ki ke kar mÿ vĕnh rãnrãj vin kãn, ěg mÿ. ěg kãmĩ ũ ag vin tóg, ag tỹ tỹ apóstolo nÿtĩ jé. Tag pãte tóg ũ ag vin, ag tỹ jagnĕ jykre ki kanhrãn kÿ jagnĕ jyvĕn jé. Tag pãte tóg ũ ag vin, ag tỹ tỹ ti vĩ tó jafã nÿtĩ jé. Kÿ tóg ũ ag vin, ag tỹ ěg tỹ nén han vānh hyn han jé. Kÿ tóg ũ ag vin, ag tỹ ũn kagyga tỹ há' he jé. Kÿ tóg ũ ag vin, ag tỹ ũ jagãgtãn jé. Kÿ tóg ũ ag vin, ag tỹ tỹ igreja krĕm tỹ pã'i nÿtĩ jé. Kÿ tóg ũ ag vin, ag tỹ ěg tỹ vĕnh vĩ ki kagtīg ki Topě mré vĕmén jé.

²⁹ ěg kar pi(jé) tỹ apóstolo nÿtĩ'. ěg kar pi(jé) tỹ vĕnh jyvĕn jafã nÿtĩ'. ěg kar pi(jé)

tỹ Topě vī kāmén jafã nýtĩ'. Ěg kar pi(jé) ěg tỹ nén han vānh hyn han tĩ'.

³⁰ Ěg kar pi(jé) ũn kagyga tỹ há' he tĩ'. Ěg kar pi(jé) ěg tỹ vėnh vī ki kagtĩg tỹ Topě mré vėmén tĩ'. Ěg kar pi(jé) vėnh vī ěn mě kỹ ěg vī ki hã tó tĩ'.

³¹ Kỹ Topě mỹ to vī mág, ti kuprĩg tỹ nén ũ há to ājag tar han jé, ājag kar tỹ jagně mré rānrhāj kãn jé sir.

Ājag tỹ nén han mũ ũ tóg há sĩ nĩ, kỹ ũ tóg há tãvĩ nĩ gé. Kỹ sóg ājag mỹ nén ũ há tãvĩ kāmén sór mũ, ha mẽ.

13

Vėnh kar to há nýtĩmnĩ

¹ Hėn ri ke mũn ěg tóg ěprã ke ag vī tỹ hėn ri ke tó há nýtĩgtĩ, Topě tỹ jėnė jafã ag vī mré hã. Ěg tỹ jarĩn mỹ vėnh kar to há tũ nýtĩn kỹ ěg tóg ón kỹ ke nĩ hã ra, ěg vī tag ti. Ěg tỹ vėnh kar to há tũ nýtĩn kỹ ěg tóg ón kỹ vī há han tĩ, ferro tỹ véké kyr ri ke, sino tỹ kejėn ón kỹ kyr ěn ri ke.

² Hėn ri ke mũn ěg tóg vėnh jyvėn há han tĩgtĩ. Topě hėn ri ke mũn nén ũ kar tó tĩ ěg mỹ, ěprã ke jykre ki kanhró kar ěg nýtĩ hėn ri ke mũn. Hėn ri ke mũn ěg tóg Topě ki rã há han kỹ nýtĩ, kỹ ěg ti vī to: “hỹ mỹ vỹ?” he tũ pė nĩgtĩ. Kỹ ěg tóg pãnónh mỹ: “ha tĩg,” he tĩ, hã ra tóg sir tĩ tĩ. Ěg tỹ jarĩn mỹ vėnh kar to há tũ nýtĩn kỹ tóg tỹ ón kỹ ke nĩ.

³ Hėn ri ke mũn ěg tóg ěg tũ vin kãn tĩ, ũn jagtar ag mỹ. Hėn ri ke mũn ěg tóg ũ tỹ Jesus kato tē mũ ag mỹ vėnh fėg mũ, ag tỹ ěg pũn jé. Ěg tỹ jarĩn mỹ vėnh kar to há tũ nýtĩn kỹ tóg ěg mỹ nén ũ há han ke tũ nĩ.

⁴ Ěg tỹ vėnh kar to há nýtĩn kỹ ěg tóg vėnh kar to fen nýtĩ. Ag mỹ ěg tóg nén há kar han sór mũ. Ěg pi(jé) jagně tũ to ěn ke mũ'. “Ā kãfór vỹ tỹ inh nĩ,” hėnh ke tũ ěg tóg nĩ. “Ūn mág vỹ tỹ inh nĩ,” hėnh ke tũ ěg tóg nĩ gé.

⁵ Vėnhmỹ mẽ han ke tũ ěg tóg nĩ gé, ěg tũ tãvĩ hã to jykren ke tũ ěg tóg nĩ gé. “Ti hyn ne ki kanhrān ke tũ pė nĩ,” hėnh ke tũ ěg tóg nĩ gé. Kỹ ũ tỹ ěg vóg kónān mũ ra ěg tóg ti to jũnh ke tũ nĩ gé.

⁶ Ěg tỹ vėnh jykre pāno ven kỹn pi(jé) ěg mỹ sér tĩnh mũ'. Ěg tỹ ũ tỹ ki hã tó mũ mẽ kỹ tóg ěg mỹ sér tĩnh mũ.

⁷ Ěg tỹ nén ũ jagy vėg mũ ra ěg pi(jé) to vĩnh ke mũ'. Nén ũ kar to ěg tóg: “Topě vỹ tag han há nĩ,” hėnh ke mũ. Ti hã ki ěg tóg nén ũ kar ve sór ke mũ. Vėnh kar ki ěg fe mág nýtĩnh mũ, ěg tỹ vėnh kar to há nýtĩn kỹ.

⁸ Ěg tỹ vėnh kar to há nýtĩ ěn vỹ krỹg ja tũ nĩnh mũ. Jãvo ěg tỹ jagně jykre ki vėnh kanhrān kỹ jagně jyvėn tĩ ěn vỹ krỹg ja nỹ. Ěg tỹ ěg tỹ vėnh vī ki kagtĩg tỹ Topě mré vėmén tĩ ěn vỹ krỹg ja nỹ gé. Ěg tỹ ěprã nén ũ ki kanhró nýtĩ ěn kar vỹ krỹg ja nỹ gé.

⁹ Ūri ěg tóg nén sĩ hã ki kanhró nýtĩ. Nén sĩ tỹ ěg tóg jagně jyvėn tĩ, Topě tỹ ěg mỹ tó tỹ. Ěg pi(jé) ki kanhrān kãn kỹ nýtĩ ver'.

¹⁰ Kānhmar tóg vėnh ven ke mũ, ũ tỹ nén ũ kar ki kanhró kar nĩ ěn ti. Kỹ hã ěg tóg nén ũ hyn han há tãvĩ han kãn ke mũ, kurã ěn kã.

¹¹ Ěg mog mũ ri ke ti nĩ. Vãsỹ sóg sĩ ja jėgtĩ. Kỹ sóg ũn kāsir ag tỹ nén tó tĩ ěn tó ja nĩgtĩ gé. Ūn kāsir ag mỹ ke ěn tóg inh mỹ ke ja nĩgtĩ gé. Ūn kāsir tỹ nén to jykren tĩ ěn to sóg jykren ja nĩgtĩ gé. Kejėn sóg sanh há jė sir. Kỹ sóg ũn kāsir jykre tovānh kãn ja nĩgtĩ. ěn ri ke ti nĩ, ěg Senhor kātĩg mãn ke ti. Ki kanhrān kãn jé ěg tóg ke mũ, ěn kã.

¹² Ūri ěg tóg ve há han tũ nĩgtĩ ver, ěg Senhor jykre ti, kỹ tóg ěg tỹ vėnh ve jafã ki vėnh ve há han tũ ri ke nĩ. Kutu nĩ ve ti nĩ, ěg tỹ vėnh ve jafã ki nén vėg mũ ti. Hã kỹ ěg tóg ve há han tũ nĩ ver. Kurã ěn kã ěg tóg nén kar ve há han kãn ke mũ hã ra. Ěg hã vỹ tóg ti venh ke mũ. Ūri ěg tóg sĩn kỹ ti ki kanhró nýtĩ. Kurã ěn kã ěg tóg ki kanhrān kãn ke mũ, ti tỹ ěg ki kanhró kar ěn ri ke.

¹³ Hã kỹ tag vỹ krỹg ja tũ nỹ, ha mẽ. Ěg tỹ Topě ki rã mũ vỹ krỹg ja tũ nỹ. Ěg tỹ ti hã ki nén ũ kar ve sór mũ vỹ krỹg ja tũ nỹ gé. Ěg tỹ vėnh kar to há vỹ krỹg ja tũ nỹ gé. Kỹ nén ũ pir tóg kãfór nĩ, hã vỹ: ěg tỹ vėnh kar to há nĩ, he mũ.

14

Topě vỹ ā kuprĩg tỹ ěg tar han tĩ, ěg tỹ jagně ki rĩr jé

¹ Kỹ vėnh kar to há nýtĩmnĩ. Kỹ Topě mỹ to vĩmnĩ gé, ti kuprĩg tỹ nén ũ to ājag tar han

jé. Ti tỹ nén ù to ěg tar han tĩ ù vỹ kãfór nĩ, hã vỹ: ěg tỹ jagně jykre ki kanhrãn kỹ jagně jyvěn tĩ, he mũ.

² ěg tỹ hã ra ěg tỹ vĕnh vĩ ki kagtĩg ki vĕmĕn kỹ ěg pi(jé) ěprã ke ag mỹ nén ù tó tĩ'. Topĕ hã mỹ ěg tó tĩ, ěg tỹ tag tó kỹ. Û pi(jé) ki kanhró nĩ', ěg tỹ vĕnh vĩ ki kagtĩg ki vĕmĕn kỹ'. Topĕ kuprĩg hã tóg ěg krĩn tĩ, ěg tỹ vĕnh vĩ ki kagtĩg ěn tó jé. Kỹ ěg tóg ki kagtĩg nỹtĩ, ěg tỹ nén tó mũ ti.

³ ěg tỹ hã ra ěg vĩ ki jagně jyvĕn kỹ ěg tóg ù tỹ mĕg mũ kar jyvĕn tĩ sir. Tỹ ěg tóg jagně tar han tĩ, Topĕ to. Jagně jyvĕn ěg tóg tĩ, jagně fe kaj tỹ ěg tóg tũg' he tĩ gé, ěg tỹ jagně mỹ ěg vĩ ki vĕmĕn kỹ.

⁴ Û tỹ ěg tỹ vĕnh vĩ ki katĩg ki vĕmĕn mũn vỹ vĕnhmỹ tỹ ùn tar jĕ sir, Topĕ to, ùn vĕmĕn mũ ti. Û tỹ ěg vĩ ki vĕnh jyvĕn tĩ ěn tóg ěg tar han kãn mũ sir, Topĕ to, ěg mré vĕnh mãn kỹ nỹtĩ ag kar.

⁵ Inh mỹn há tĩ vĕ, ãjag kar tỹ ěg tỹ vĕnh vĩ ki kagtĩg tỹ Topĕ mré vĕmĕn há hã ra. Ājag kar tỹ ěg vĩ ki jagně jykre to jagně jyvĕn há nỹtĩ ra tóg hã ra tag kãfór nĩ. Kỹ tóg inh mỹ há kãfór nĩ vĕ, ãjag tỹ ke kãn mũ ra. Û tỹ ěg vĩ ki tó mũ vỹ ù tỹ ěg tỹ vĕnh vĩ ki kagtĩg ki vĕmĕn mũ ěn kãfór nĩ, ù tỹ ěg vĩ ki jagně jykre to vĕnh jyvĕn tĩ ěn, mỹr, ha mĕ. Kejĕn ù tóg ěg tỹ vĕnh vĩ ki kagtĩg ki vĕmĕn tĩ. Kar kỹ ù tóg ti vĩ ěn mĕ kỹ ěg vĩ ki tó mũ sir, ti tỹ nén tó ja ěn ti. Tag vỹ há tĩ gé. Û tỹ vĕnh mãn kỹ nỹtĩ kar vỹ ki kanhrãn kãn mũ sir, ti vĩ ti, kỹ ag tóg tỹ tar nỹtĩnh mũ sir.

⁶ Inh kanhkã', ha vé. Hĕn ri ke mũn sóg ãjag ki jun kỹ ěg tỹ vĕnh vĩ ki kagtĩg ki vĕmĕn mũ. Kỹ sóg ãjag mỹ nén ù há han ke tũ nĩ ha, tỹ, ãjag tỹ inh vĩ ki kagtĩg nỹtĩn kỹ. Jãvo isỹ ãjag mỹ Topĕ tỹ inh mỹ nén tó mũ tỹ ěg vĩ ki kãmĕn kỹ sóg tỹ ãjag tar han mũ sir, isỹ ãjag mỹ sỹ nén to jykrĕn mũ kãmĕn kỹ, sỹ ãjag jyvĕn kỹ, sỹ ãjag mỹ Topĕ vĩ ki nén rán kỹ nĩ ěn kãmĕn kỹ. Kỹ sóg tỹ ãjag tar han mu sir, mỹr, ha mĕ, ãjag tỹ inh vĩ ki kanhrãn kỹ.

⁷ Vãn tỹ vãkyn jafã to jykrĕn nĩ, vãkyn jafã ù to ke gé. Ag tỹ kyn kórĕg kỹ ěg tóg ki kagtĩg nỹtĩ sir, ag tỹ vãkyn mũ ti.

⁸ Kỹ vãkyn jafã tỹ trombĕta vỹ ge nĩgtĩ gé. Ag tỹ ti kyr mĕ kỹ soldado ag vỹ vĕnh kãn kãn tĩ, vĕnh génh ke to. Ag tỹ tỹ kyn há han

tũ nỹtĩn kỹ ag pi (jé) vĕnh génh ke to vĕnh kãn ke mũ'.

⁹ Ge ti nĩ gé, ěg vĩ ti. ěg tỹ ag tỹ ki kagtĩg ěn tó kỹ ag tóg to jykrĕn ke tũ nĩ gé, ěg tỹ nén tó mũ to. Vĕké ěg tóg vĕmĕn mũ sir, ěg tỹ gen kỹ.

¹⁰ Vĕnh vĩ vỹ e nỹtĩ, ga tag kri. Povo kar vỹ vỹrmỹ vĩ nĩ' he kar nỹtĩ. ěg vĩ pĕ ki ěg tóg vĕmĕn ki kanhró nỹtĩ.

¹¹ Kỹ sóg kejĕn hĕ tá ke ù vĩ mĕg tĩ. Sỹ ti vĩ ki kagtĩg nĩn kỹ sóg ti jykre ki kanhrãn ke tũ nĩ, ùn vĩ mũ ti, kỹ tóg inh jykre ki kanhrãn ke tũ nĩ gé. Ge ti nĩ gé, ěg tỹ vĕnh vĩ ki kagtĩg ki vĕmĕn kỹ. Ki kagtĩg ěg tóg nỹtĩ sir.

¹² Topĕ kuprĩg tỹ ãjag tar han mũ ve sór ãjag tóg nỹtĩ, nén ù ù to. Kỹ tóg há tĩ. Kỹ hã ra ěg mré ke ag tar han jafã to ěn nĩ, ěn hã to Topĕ mré vĩmĩnĩ, hã vỹ: ěg vĩ ki jagně jyvĕn, he mũ.

¹³⁻¹⁴ ěg tỹ vĕnh vĩ ki kagtĩg ki Topĕ mré vĕmĕn kỹ ěg tóg to jykrĕn kỹ nĩ tũ ra Topĕ mré vĕmĕn tĩ. Kỹ, ã tỹ vĕnh vĩ ki kagtĩg ki vĕmĕn to tar nĩn kỹ Topĕ mỹ to vĩmĩnĩ, ti tỹ ã tỹ nén tó ja ěn ki kanhrãn kỹ ěg mỹ ěg vĩ ki kãmĕn to ã tar han jé gé. Kỹ ã tóg: “tag tó ja inh nĩ, tag tó ja inh nĩ,” hĕnh ke mũ gé sir, kỹ tóg há tĩ.

¹⁵ ěg tỹ to jykrĕn kỹ nĩ tũ ra Topĕ mré vĕmĕn kỹ tóg há tĩ. ěg tỹ hã ra to jykrĕn kỹ nĩn kỹ ti mré vĕmĕn kỹ tóg há tĩ gé. ěg tỹ to jykrĕn kỹ nĩ tũ ra Topĕ mỹ jãn kỹ tóg há tĩ. ěg tỹ hã ra to jykrĕn kỹ nĩn kỹ ti mỹ jãn kỹ tóg há tĩ gé. Sỹ tag han kãn sór vĕ.

¹⁶ Ha vé, ã tỹ to jykrĕn kỹ nĩ tũ ra Topĕ to vĩ há han kỹ ã vĩ mĕg mũ ag vỹ ki kagtĩg nỹtĩ, ã vĩ ti, ã tỹ ěg tỹ vĕnh vĩ ki kagtĩg ki vĕmĕn kỹ. Kỹ tóg ag tỹ ã mré: “hỹ, hã vĕ,” he sór mũ ra tóg vĕnhmỹ tĩ. “Ti ne tó mũ vỹ? Sỹ ki kagtĩg tóg tĩ,” he jé ag tóg ke mũ.

¹⁷ Tó há han ã tĩgtĩ, ã tỹ ěg tỹ vĕnh vĩ ki kagtĩg ki vĕmĕn kỹ. Hã ra ù tỹ mĕg mũ ag vỹ ki kagtĩg nỹtĩ, kỹ ã pi(jé) ag tar han tĩ'.

¹⁸ ěg tỹ vĕnh vĩ ki kagtĩg ki vĕmĕn to sóg tar pĕ nĩ inhhã. To tar nĩn kỹ sóg ãjag kãfór nĩ.

¹⁹ Hã ra sóg tag tó sór tũ nĩ, ěg vĕnh mãn kỹ nỹtĩn kỹ. Hĕn ri ke mũn sóg vĕnh vĩ tỹ mil (ke) han ke mũ, ěg tỹ vĕnh vĩ ki kagtĩg ki vĕmĕn kỹ. Hã ra sóg jĕrĩn mỹ ãjag tar han ke tũ nĩ. Hã kỹ sóg tag tó sór tũ nĩ. Sỹ nén

to jykrén mũ hã tó sór inh mũ, kỹ sóg inh vĩ pir tỹ ãjag tar han ke mũ.

²⁰ Inh kanhkã', to jykrén há han nĩ. Gĩr tỹ nén ù to jykrén tũ ên ri ke nỹtĩ sór tũg nĩ. Vẽnh jykre pãno hã to gĩr tỹ ti ki kagtĩg nĩ ên ri ke nỹtĩmĩ, ãjag tỹ ti kórég han tũ nĩ jé. Nén ù há to jykrén kỹ tóg inh mũ ãjag tỹ ùn sanh há ag tỹ nén ù to jykrén há ên ri ke nỹtĩnh há tĩ.

²¹ Ve ra, Topẽ vĩ rán ki tag vĩ rán kỹ nĩ, ha mẽ. “Inh povo tỹ inh vĩ mẽ jãvãnh nỹtĩn kỹ sóg ag mũ ùn vĩ ù ag vĩ ki inh vĩ jẽnhẽnh ke mũ. Povo tỹ vỹrmỹ vĩ ag mũ sóg: “ha ag mũ inh vĩ ti tóg,” henh ke mũ, “ag vĩ tũ ki hã ra, ù tỹ inh vĩ mẽ jãvãnh ag mũ,” he jé sóg ke mũ. Hã kỹ ag tóg mẽnh ke tũ nĩ, inh povo ti, ag tỹ ag vĩ tũ ki ag mũ vẽnẽn kỹ,” he tóg, êg Senhor ti, Topẽ vĩ rá ki.

²² Hã kỹ tóg tỹ ù tỹ Topẽ ki ge jãvãnh ag tỹ ki kagtĩg han jafã nĩ, êg tỹ vẽnẽnh vĩ ki kagtĩg tỹ vẽnẽn mũ ti. Ti ki ge kỹ nỹtĩ ag mũ ke pijé'. Jãvo êg tỹ jagnẽ jykre ki kanhrãn kỹ jagnẽ jyvẽn tag vĩ tỹ ti ki ge kỹ nỹtĩ ag tar han jafã nĩ. Ti ki ge jãvãnh ag mũ ke pijé'.

²³ Ha vé, kejẽn êg mré ke ag vĩ vẽnẽnh mãn kãn mũ. Kỹ vẽnẽnh kar tóg hẽn ri ke mũn êg tỹ vẽnẽnh vĩ ki kagtĩg ki vẽnẽn mũ. Kỹ ù tỹ ki kagtĩg tóg venh ke kãtĩg mũ, ù tỹ Jesus ki rã ja tũ ti hẽn ri ke mũn. Kỹ tóg ti tỹ ãjag tỹ vẽnẽnh vĩ ki kagtĩg tag mẽ kỹ tóg ãjag to: “krĩ vẽnẽnhỹ ag nỹtĩ,” henh ke mũ sir, ón kỹ.

²⁴ ãjag tỹ êg vĩ ki jagnẽ jykre ki kanhrãn kỹ jagnẽ jyvẽn kỹ tóg hã ra há tĩ. Kỹ ù tỹ Jesus ki rã tũ vĩ jun mũ, ù tỹ ki kagtĩg. Kỹ tóg ãjag vĩ mẽnh mũ, kỹ tóg to jykrén ke mũ sir. ãjag vĩ to tóg: “hỹ, hã vẽnẽ,” henh ke mũ. Ti jykre pãno to tóg jykrén ke mũ gé.

²⁵ Ti tỹ nén ù to jykrén mũ vĩ vẽnẽnh ven kãn ke mũ, kỹ tóg ti mũ e tĩnh mũ sir. Mũg ke jé tóg ke mũ. “Topẽ vĩ tỹ ùn mág nĩ,” he jé tóg ke mũ. Kỹ tóg ki kanhró nĩnh mũ, tóg jé tóg ke mũ sir, Topẽ tỹ ãjag mré nĩ ti.

Culto ki vẽnẽnh jykre

²⁶ Kỹ ãjag vẽnẽnh mãn kỹ tag vĩ há nĩ, ha mẽ. ù tóg Topẽ mũ jãn ke mũ, ti mũ cantar ken jé. ù tóg Topẽ vĩ tỹ vẽnẽnh kanhrãn kỹ tónh ke mũ. ù mũ tóg nén ù tónh mũ, Topẽ ti, ti tỹ tỹ ãjag jyvẽn jé. ù tóg êg tỹ vẽnẽnh vĩ ki kagtĩg ki vẽnẽn ke mũ, ù tóg ti vĩ mẽ kỹ êg vĩ pẽ ki

tónh ke mũ, ti tỹ nén tóg mũ ên ti. Há kar ti nĩ, ãjag tỹ tag tỹ Topẽ to tar nỹtĩ jé.

²⁷ ãjag tỹ êg tỹ vẽnẽnh vĩ ki kagtĩg ki vẽnẽn sór kỹ ùn pipir ag hã tóg tónh ke mũ, hẽn ri ke mũn ùn régre, ke tũ nĩn kỹ ùn tãgtũ, jagnẽ ri ke. ù tỹ tóg kỹ ù tóg vẽnẽnh ke tũ nĩ sir. ùn pir tỹ vẽnẽn kỹ tóg há tĩ. Kỹ ù tóg ti vĩ mẽ kỹ êg vĩ pẽ ki tónh ke mũ gé sir, ti tỹ nén tóg mũ ên ti.

²⁸ Kejẽn tóg ki tũ nĩ, ù tỹ ti tỹ nén tóg mũ ên tỹ êg vĩ ki tónh ke mũ ti. Kỹ êg tóg êg tỹ vẽnẽnh vĩ ki kagtĩg tỹ vẽnẽn ke tũ nĩ sir, vẽnẽnh kar rĩnve. ãjag ãn hã tá vẽnẽn nĩ, êg tỹ vẽnẽnh vĩ ki kagtĩg tỹ. Ên tỹ igreja krẽm vẽnẽn tũg nĩ, êg tỹ vẽnẽnh vĩ ki kagtĩg tỹ, ù tỹ ti tỹ nén tóg mũ tỹ êg vĩ ki tónh ke tũ nĩn kỹ.

²⁹ Kỹ tóg ãjag tỹ jagnẽ jykre ki kanhrãn kỹ êg vĩ ki jagnẽ jyvẽn ken kỹ tóg ge nĩ gé, ha mẽ. ùn régre vĩ tónh ke mũ, ke tũ nĩn kỹ ùn tãgtũ, jagnẽ ri kén tónh jé. Kỹ ag vĩ mẽg mũ ag vĩ to jykrén ke mũ, ag tỹ ti kygnẽ tũ ve jé.

³⁰ Hã ra hẽn ri ke mũn Topẽ tóg ù mũ nén ù tónh ke mũ gé. Kỹ ùn vẽnẽn vén mũ tóg krỹg henh ke mũ ver, kỹ ù tóg ti ri kén tónh mũ sir, Topẽ tỹ ti mũ nén tóg ja ti.

³¹ Hã kỹ ãjag kar vĩ jagnẽ jyvẽn ke mũ, ãjag tỹ jagnẽ ri kén vẽnẽn kỹ. Gen kỹ ãjag tóg jagnẽ kanhrãn ke mũ sir, jagnẽ krĩ kuprãg ke ãjag tóg mũ gé sir.

³² Topẽ kuprĩg vĩ êg krĩn tĩ, êg tỹ jagnẽ jyvẽn jé. Hã ra ti pi(jé) êg tỹ nén tóg sór tũ ra êg kri gĩnh ke tĩ'.

³³ Hã kỹ tóg Topẽ mũ há tũ nĩ, êg tỹ ù vẽnẽn jẽ ra êg tỹ nén tónh ke mũ ên tóg sór kỹ. Êg tỹ jagnẽ tỹ tóg kar kỹ êg tỹ nén tónh ke tóg kỹ tóg ti mũ há tĩ, kỹ vẽnẽnh kar tóg jatun mũ mẽnh ke mũ sir, êg tỹ nén tóg mũ ti. Topẽ jykre kusan hã vẽnẽ.

³⁴ Topẽ tũ vĩ tỹ êg nỹtĩ. Kỹ ùn tỹtã fag vĩ vẽnẽn ke tũ nĩ, igreja krẽm. Hẽ tá igreja krẽm fag vĩ jatun nỹtĩgtĩ, êmã kar mũ, kỹ ãjag tóg fag ri ke jatun nỹtĩnh mũ gé. “Tỹ fag tóg ag krẽm ke nỹtĩ,” he ja tóg nĩ, Topẽ ti, hã kỹ fag tóg vẽnẽn ke tũ nĩ, igreja krẽm.

³⁵ Kỹ fag tóg ãjag tỹ Topẽ vĩ ki kanhrãn há han tũ nĩn kỹ fag tóg ãjag ãn tá ãjag mẽn ki jẽmẽn mũ, ãjag tỹ ki kanhrãn há han tũ ja ên ti. Êg mũ'a tóg tĩ, fag tỹ igreja krẽm vẽnẽn

sór kÿ, kÿ ke sór tÿg nÿ.

³⁶ Ājag hÿn tag ki króm sór tÿ nÿ, vég isóg nÿ nÿ. “Ēg hã vÿ to jykrén há tâvÿ han tÿ, Ēg hã vÿ tó vén, vĕnh kar jo, Topĕ vÿ ti,” he ājag tóg tÿ, Ēg kãfór nÿtÿ sór kÿ. Hã ra tóg e nÿtÿ, Jesus ki ge mÿ ag. Tó há han ag tóg tÿ gé. Ag mré vĕnh jykre pir han sórmnÿ.

³⁷ Ājag kãmÿ ũ hÿn: “Topĕ vÿ inh mré vĕmén tÿ, ti kuprÿg tÿ inh krÿn tag to sóg tar tâvÿ nÿ,” he tÿ. Kÿn hÿn ki kanhró nÿ, sÿ ājag mÿ Topĕ jykre tó mÿ tag, ājag tÿ igreja krĕm vĕnh mãn ke to. Ēg Senhor tÿ Ēg mÿ vĕnh jykre nÿm jan hã vĕ, sÿ ājag mÿ rán mÿ tag tÿ.

³⁸ Ũ tÿ tag to: “nén ũ tÿ vĕ,” he mÿ ra sóg ti to: “nén ũ tÿ vÿ tÿ ã nÿ,” he mÿ gé.

³⁹ Inh kanhkã', Topĕ mÿ to vÿ mág, ti kuprÿg tÿ ājag tar han jé, ājag tÿ jagnĕ jykre ve kÿ jagnĕ jyvĕn há han jé, Ēg vÿ ki. Ũ tÿ Ēg tÿ vĕnh vÿ ki kagtÿg ki vĕmén sór kÿ ti mÿ: “vÿ tÿg ra,” he tÿg nÿ gé.

⁴⁰ Hã ra ũ vĕmén jĕ ra Ēg tÿ nén tónh ke mÿ ěn tó sór tÿg nÿ. To jykre kusa nÿtÿmnÿ.

15

Jesus rÿr jĕ

¹ Inh kanhkã', sÿ ājag mÿ Jesus kãme sér ěn tó mãn ke vĕ, sÿ ājag mÿ tó ja ěn ti. Ēn kri fig ājag tóg tÿ, kÿ ājag tóg mÿ mÿgtÿ.

² Ti vÿ kri nÿm kÿ ājag tóg krenkren ke mÿ, ājag tÿ tovãnh tÿ nÿn kÿ. Sÿ ājag mÿ nén tó ja ěn tÿ tÿ' he tÿg nÿ, ke tÿ nÿ mÿ ra ājag tóg véké kri fi ja nÿnh mÿ. Kÿ ājag tóg tá nén ũ venh ke tÿ nÿ gé.

³ Sÿ ājag mÿ Topĕ vÿ kãmén kÿ sóg ājag mÿ sÿ nén mĕ ja ěn hã tó vén ja nÿgtÿ, hã vÿ: Cristo vÿ Ēg jagfy ter ja nÿgtÿ, Ēg tÿ Topĕ vÿ mranh ja tugrÿn, he mÿ. Tag vÿ rán kÿ nÿ, Topĕ vÿ rá ki.

⁴ Kÿ ag tóg vĕnh kej kãtá ti fi ja nÿgtÿ. Kurã tâgtÿ tÿg kÿ tóg rÿr mãn ja nÿgtÿ gé. Tag vÿ rán kÿ nÿ gé, Topĕ vÿ rá ki.

⁵ Kÿ tóg Pedro mÿ vĕnh ven, kar kÿ ũ tÿ 12 (ke) ag mÿ ke gé.

⁶ Kar kÿ tóg ũ tÿ 500 (ke) kãfór ag mÿ vĕnh ven gé, vĕnh ven pir ki, ag vĕnh mãn kÿ nÿtÿ ěn ki. Ēn ag kãmÿ ũn pipir ag tóg kãgter ja nÿgtÿ, hã ra ũn e ag tóg ver Ēg mré nÿtÿ.

⁷ Kar kÿ Tiago tóg ti vé gé, kar kÿ ti tÿ ũn vin mÿ kar ag, ke gé, apóstolo kar ěn ag.

⁸ Kar kÿ sóg vãhã ti vé gé, ag kar nón. Sÿ ti venh ke tÿ vĕ vĕ, sÿ kãnhmar ti ki rã ja tÿ nÿn kÿ.

⁹ Apóstolo ag krĕm ke kar vÿ tÿ inh nÿ. Sÿ tá krÿg ke tÿ vĕ vĕ, sÿ tÿ apóstolo nÿnh ke ti, isÿ Topĕ ki ge kÿ nÿtÿ ag vóg kónãn jan kÿ, fag ke gé.

¹⁰ Hã ra Topĕ tóg inh jagãgtãn, hã kÿ tóg isÿ apóstolo han mÿ. Kÿ ti pi(jé) fagrÿnh mÿ inh jagãgtãn'. Rãnrãj mág han inh mÿr, ag rãnrãj kãfór kar. Hã ra sóg inh pir mÿ han tÿ nÿgtÿ. Topĕ hã ne isar han tÿ', inh rãnrãj to'.

¹¹ Hã ra Ēg kar tóg Jesus tó tÿ. “Jesus vÿ rÿr jĕ,” he ag tóg tÿ, apóstolo ũ ag, kÿ sóg tag tó tÿ gé, ag mré. Kÿ ājag tóg sÿ ti kãmén kÿ inh vÿ kri fig tÿ.

¹² Ēg kar vÿ Cristo tÿ ter kar ti rÿr mãn ja ěn tó tÿ.

Jesus mré Ēg rÿnrÿr mãn ke mÿ gé

Cristo rÿr mãn mÿ ra ājag kãmÿ ũ tóg ón kÿ: “Ēg ter kar kÿ Ēg rÿr mãn ke tÿ nÿ ha,” he tÿ'. Hã tÿ vĕ.

¹³ Ēg tÿ Ēg ter kar kÿ rÿr mãn ke tÿ nÿ hã ra Cristo vÿ rÿr mãn ja tÿ nÿnh mÿ gé vĕ vĕ.

¹⁴ Cristo rÿr mãn ja tÿ nÿ hã ra Ēg tóg fagrÿnh mÿ ājag mÿ ti kãmén ja nÿnh mÿ gé vĕ vĕ. Kÿ ājag tóg fagrÿnh mÿ kri fi ja nÿnh mÿ gé vĕ vĕ.

¹⁵ Kÿ Ēg tóg Topĕ to ón ja nÿnh mÿ gé vĕ vĕ, Ēg tÿ ti to: “Cristo rÿn mãn ja tóg nÿ,” hen kÿ. Kÿ Ēg kar vÿ ti to ón ja nÿnh mÿ vĕ. Hã ra tóg Jesus rÿn mãn ja nÿ, Topĕ ti.

¹⁶ Hÿ, ũn kãgter mÿ ag rÿnrÿr mãn ke tÿ nÿ ra Cristo vÿ rÿr mãn ja tÿ nÿnh mÿ gé vĕ vĕ, ha mĕ.

¹⁷ Kÿ Cristo rÿr mãn tÿ nÿ ra Ēg tóg fagrÿnh mÿ ti ki ge ja nÿnh mÿ gé vĕ vĕ. Kÿ Ēg tóg Topĕ vÿ mranh ja ěn hã ki nÿtÿnh mÿ vĕ ver, tÿ tÿ' he ja tÿ ti nÿnh mÿ vĕ, ti rÿr mãn tÿ nÿ hã ra.

¹⁸ Kÿ ũ vĕ gé, ha mĕ: ti rÿr mãn tÿ nÿ ra ũ tÿ Cristo ki ge kar kÿ kãgter mÿ ěn ag vÿ nÿgme ki vár kãn kÿ nÿtÿnh mÿ gé vĕ vĕ, ha mĕ.

¹⁹ Hã kÿ tóg vĕnhmÿ tÿ, ājag tÿ: “rÿr mãn ke tÿ Ēg nÿ,” hen kÿ. Cristo pi(jé) Ēg tÿ ga kri mÿ tag tâvÿ ki rÿr nÿgtÿ'. Kanhkã tá Ēg tóg junjun ke mÿ. Ke tÿ nÿ mÿ ra Ēg tóg ũn jagãgtar

ag kãfór kar nýtĩnh mũ vễ, ẽg tỹ fagrĩnh mỹ Jesus ki rã ja nýtĩ ra. Hã tũ vễ mỹr.

20 Cristo vỹ rĩr mãn, ter kar kỹ. Hã vễ. Ûn kãgter kỹ nýtĩ ag kar kãmĩ ti rĩr mãn vén, Cristo ti, hã kỹ ẽg tóg rĩnrĩr mãn ke mũ gé, ẽg tỹ ti ki ge kỹ.

21 Ûn pir tugrĩn ẽg kar vỹ kãgter ke mũ, hã kỹ ẽg tóg ùn pir tugnĩn rĩnrĩr mãn kãn ke mũ gé, ẽg ter kar kỹ.

22 Adão tỹ Topẽ vỹ mranh tugrĩn ẽg tóg kãgter kãn ke mũ, ẽg tỹ tỹ ti krẽ nýtĩn kỹ. Ri ke ti nĩ, Cristo tugnĩn ẽg tóg rĩnrĩr mãn kãn ke mũ gé, ẽg tỹ ti ki ge kỹ nýtĩn kỹ.

23 Topẽ tỹ nén to jykrén mũn hã vễ, Cristo tỹ ẽg jo rĩr mãn tag ti. Hã kỹ tóg rĩr mãn vén. Kar kỹ ù tỹ Cristo ki ge kỹ nýtĩ ag vỹ rĩnrĩr mãn ke mũ gé sir, ti kãtĩg mãn kỹ.

24-25 Kỹ vãhã kurã tỹ ẽgno vễ sir. Kurã ẽn kã Jesus vỹ Topẽ mỹ: “ã hã ne ẽg kri ke jẽ ha,” henh ke mũ, ti panh mỹ. Ûri tóg tỹ pã'i mág nĩ ver, Cristo ti, kỹ tóg pã'i ù ag vỹ tỹ tũ' he kãn mũ, ùn jykre tar kar, ù tỹ ẽg kãfór nýtĩ kar. Tỹ tũ' he kãn jé tóg ke mũ, hã jé tóg ver tỹ pã'i mág nĩ, Cristo ti, ti tỹ ã kato tẽgtẽ mũ ag jykre sãn kãn jé, ti tỹ ag vỹ tỹ tũ' he kãn jé.

26 Ẽg tỹ Topẽ vỹ mranh tugrĩn ẽg kãgter kãn mũ. Hã ra tóg tỹ tũ' henh ke mũ gé, ẽg ter mũ tỹ, kỹ ẽg ter mãn ke tũ nĩ ha, kurã tỹ ẽgno ẽn kã. Ti tỹ ẽg ter mũ tỹ tũ' hen kỹ tóg há kar nĩ sir.

27 Hỹ, vễnh kar vỹ tỹ ti krẽm ke nýtĩ, ti tỹ ag jykre sãn kỹ, ti tỹ ùn mág ag vỹ tỹ tũ' hen kỹ. Vễnh kar vỹ tỹ ti krẽm ke nýtĩ, Cristo krẽm. Hã ra ùn pir vỹ tỹ ti krẽm ke tũ nĩ, hã vỹ: ù tỹ vễnh kar tỹ ti krẽm ke han ja ẽn, he mũ, hã vỹ: Topẽ, he mũ.

28 Vễnh kar tỹ ti krẽm ke nýtĩn kỹ, kurã ẽn kã tóg ti krẽm vễnh fẽg ke mũ gé, ti kósin ti, ã panh krẽm, ù tỹ vễnh kar tỹ ti krẽm vin ja ẽn krẽm. Kurã ẽn kã Topẽ tóg tỹ vễnh kar kri ke jẽnh mũ, ã pir mỹ. Kỹ ù tóg ti ri ke jẽnh ke tũ pẽ nĩ.

29 Ẽg rĩr mãn ke tũ nýtĩ ra ãjag kã ù tóg fagrĩnh mỹ ùn ter mũ ag jagfy vễnh kygpenh mũ vễ. Ag rĩr mãn tũ ra tóg vễnhmỹ tĩ vễ, ãjag tỹ ag jagfy vễnh kygpenh ke ti. Hã tũ vễ hã ra. Rĩr mãn jé ẽg tóg ke mũ.

30 Hã kỹ sóg kurã kar ki ti jagy vэг tĩ gé, hã ra sóg ag mỹ vễnh nenh tũ nĩgtĩ, ù tỹ inh vóg kónãn sór mũ ag mỹ.

31 Kurã kar ki sóg ter kren' he tĩgtĩ. Ki hã sóg tó tĩ, ki kanhró ãjag nýtĩ. ãjag hã ki sóg tỹ ùn mág nĩ, Jesus Cristo ki, ẽg Senhor ki.

32 Cidade tỹ Ẽfeso tá sóg mĩg mré rárá ri ke han mỹr, hã ra tóg inh mỹ nén ù há han ke tũ nĩ vễ, ẽg tỹ rĩr mãn' he tũ ra. Ûn kãgter mũ ag rĩnrĩr mãn ke tũ ra ẽg tóg jatun mỹ ẽg tỹ nén to ẽn mũ han ke mũ vễ, ẽg tỹ: “mũ nỹ, jẽn jé, kron jé, ẽg hỹn vaj kỹ ter ke mũ,” hen kỹ, Topẽ ki ge tũ ag ri kén ken kỹ.

33 Hã tũ vễ hã ra.

Kygnẽ tũg nĩ. Tag to jykrén nĩ, ha mẽ: ùn vỹ kórég ag vỹ jẽmẽ sór tũg nĩ. Vễnh jykre há pãno han ti tĩ, ag vỹ kórég ti.

34 Krĩ há han ra, tag hã ne há nĩ'. Topẽ vỹ mranh tũg nĩ. ãjag kãmĩ ù vỹ Topẽ ki kanhró tũ nýtĩ ver'. Tag to vễnh mỹ en nĩ.

Ẽg rĩr mãn ke to vễnh jykre

35 Kỹ ù tóg to jykrén kỹ inh mỹ: “Topẽ hỹn hẽ ri kenh ke mũ, ti tỹ ùn ter mũ ag rĩnrĩr mãn jé?” he sór mũ. “Ẽg fár hỹn hẽ ri kenh ke mũ?” he sór ãjag hỹn mũ.

36 Krĩ tũ ãjag nýtĩ mỹr'. Nén ù fy jykre vỹ ẽg ter ri ke nĩ, ha mẽ. Ẽg tỹ krãn kỹ tóg kugnãnh tĩ, ti fár ti, jãvo tóg ti kãtã mur mãn mũ sir.

37 Kỹ ti fy pi(jé) ti féj ri ke nĩ gé', ti tỹ han ke ti. Sĩ ti nĩ, trigo fy ti, nén ù kar fy ti ke gé.

38 Topẽ hã ne ti pẽn han mũ', ti féj ke gé, ti fej ke gé. Ti hã ne to jykrén tĩ'. Kỹ tóg nén kar fy mỹ ti féj ù nĩm', ti féj ù nĩm' he tĩ.

39 Kỹ nén ù fár vỹ ge nĩgtĩ gé. Ti pi(jé) pir nĩ gé'. Ẽg fár vỹ vỹrmỹ nĩ, kar kỹ bicho fár vỹ vỹrmỹ nĩ gé, kar kỹ sēsĩ fár vỹ vỹrmỹ nĩ gé, jēsĩ fár ti, kar kỹ pirã fár vỹ vỹrmỹ nĩ gé.

40 Kỹ kanhkã tãn ag vỹ vỹrmỹ fár nýtĩ gé, ẽprã ke ag vỹ vỹrmỹ fár nýtĩ gé. Kỹ ẽg ve vỹ ge nĩgtĩ gé. Kanhkã tá ke ag ve vỹ vỹrmỹ nĩ, ẽprã ke ag ve vỹ vỹrmỹ nĩgtĩ gé.

41 Rã jẽngrẽ vỹ vỹrmỹ nĩ, kysã jẽngrẽ vỹ vỹrmỹ nĩ gé, krĩg jẽngrẽ vỹ vỹrmỹ nĩ gé. Kỹ krĩg ag vỹ jagnẽ ri ke tũ nýtĩ gé, ãjag jẽngrẽ ki.

42 Ge ti nĩ, ẽg ter kar kỹ ẽg rĩr mãn ke ti. Ter jé ẽg tóg ke mũ, kỹ tóg ẽg tỹ nén ù fy krãn

ri ke nĩ sir, ẽg fár tỹ ga ra rã mũ ti. Ẽg rĩr mãn kỹ ẽg pi(jé) ter mãn ke mũ'.

Kejẽn tóg ẽg mỹ'a tĩ, ẽg ter ke to hã. Hã ra ẽg tóg sĩnvĩ nỹtĩnh mũ, ẽg rĩr mãn kỹ.

⁴³ Krój ẽg nỹtĩ. Hã ra ẽg tóg tar nỹtĩnh mũ, ẽg rĩr mãn kỹ.

⁴⁴ Ẽri ẽg tóg tỹ ẽprã ke nỹtĩ, kỹ ẽg fár vỹ tỹ ẽprã ke fár nĩ. Ẽg rĩr mãn kỹ ẽg tóg Topẽ kuprĩg jamã tá fár nỹtĩnh mũ. Ẽprã ẽg fár nỹtĩ, kỹ ẽg tóg tỹ ẽprã ke nỹtĩ. Kỹ ẽg tóg ẽg tỹ Topẽ kuprĩg jamã tá ẽg fár ù venh ke ki kanhró nỹtĩ sir. Ẽprã ke fár ve vén ẽg tĩ. Kar kỹ ẽg tóg Topẽ kuprĩg jamã tá fár ù venh ke mũ, ẽprã ke fár ve kar kỹ.

⁴⁵⁻⁴⁶ Hã kỹ tag tóg rán kỹ nĩ, ha mẽ: “ũn ve ti, Adão ti vỹ rĩr nĩ ja nĩgtĩ. Jãvo ù tỹ ẽgno ti, Cristo ti vỹ ã kuprĩg tỹ nén kar rĩnrĩr han,” he ja tóg nĩgtĩ, Topẽ vĩ rá ki.

⁴⁷ Ẽn ve ẽn, Adão ẽn vỹ ga tỹ há (r) nĩ, hã kỹ ti jykre tóg tỹ ẽprã ke jykre nĩ. Cristo vỹ tỹ kanhkã tá ke nĩ.

⁴⁸ Ẽn ve vỹ tỹ ẽprã ke nĩ, kỹ ti krẽ kar vỹ tỹ ẽprã ke nỹtĩ gé, ti mré. Jãvo Cristo vỹ tỹ kanhkã tá ke nĩ. Kỹ ti mré ke kar vỹ tỹ kanhkã tá ke nỹtĩ gé, ti mré.

⁴⁹ Ẽprã ke ẽn ve ri ke ẽg nỹtĩ, ẽg kar tỹ Adão ve kỹ. Kỹ ẽg tóg kanhkã tá ke ẽn ve ri ke nỹtĩnh ke mũ gé, ẽg tỹ Cristo ve kỹ, ẽg rĩnrĩr mãn ken kỹ.

Jesus kãtĩg mãn ken kỹ tóg ẽg kar han mãn ke mũ

⁵⁰ Inh kanhkã', sỹ ãjag mỹ tag tó há han sór vẽ, sỹ ki kanhrãn há han kỹ, ha mẽ. Ẽg fár tỹ ẽprã ke tag pi(jé) Topẽ tỹ tỹ ẽg pã'i nĩ venh ke mũ'. Nén ter ke mũ ẽn pi(jé) nén ù ter vãnã tá venh ke mũ'. Topẽ vỹ ẽg han mãn ke mũ, ẽg tỹ ve jé.

⁵¹ Kỹ sóg ãjag mỹ nén ù tó sór mũ gé, ãjag tỹ mẽ ja tũ ti, ha mẽ. Ẽg kãmĩ ù ag tóg ti jun ke pétẽm mũ, kãgter ke tũ ag tóg nĩ. Kỹ Topẽ tóg ẽg kar han mãn kãn ke mũ, kurã ẽn kã, ẽg tỹ ti ki ge kỹ nỹtĩnh kỹ.

⁵² Kỹ tóg ẽg tỹ pan ke kar mrin ke ẽn ri ke nĩnh mũ, ti tỹ ẽg han mãn ke ti, trombeta kyr rãn kã. Trombeta kyr ẽn vỹ mẽ há tĩnh mũ, kỹ ùn kãgter mũ ag vỹ rĩnrĩr mãn kãn ke mũ, ag tỹ kãgter mãn ke tũ nĩ jé sir. Ẽn kã tóg ẽg han mãn ke mũ gé sir, ẽg tỹ ti jun ke pétẽm mũ ra kãgter ja tũ ra.

⁵³ Ha vé, ti tỹ ẽg fár kókrãnh mũ tag tỹ ù han tũ ra ẽg tóg venh ke tũ nĩnh mũ vẽ, kanhkã ti. Hã kỹ tóg ẽg fár ter ke mũ tag tỹ ù han ke mũ, ti han mãn kỹ, ti ter mãn tũ nĩ jé, kókrãnh mãn tũ nĩ jé. Kejẽn tóg kenh ke mũ.

⁵⁴ Ẽg fár kókrãnh mũ tag tỹ tóg ù han ke mũ, ti kókrãnh vãnã nĩ jé sir. Ẽg fár ter ke mũ tag tỹ ù han jé tóg ke mũ, ti ter vãnã nĩ jé. Kurã ẽn kã ẽg tóg vãnã rá tag venh ke mũ gé, vãsỹ rán kỹ nĩ tag, hã vỹ: “tũg ti huri, ẽg ter ke mũ ti, ẽg ter pãte rẽg kỹ,” he mũ. “Topẽ vỹ tỹ tũg' hé, ẽg ter ke mũ tỹ.

⁵⁵ Kãgter kãn ja ẽg tóg nĩgtĩ. Hã ra ẽg tóg tag ve mãn ke tũ nĩ ha. Nén ù tỹ ã préj tỹ ẽg tugtãn tỹ ẽg tén ri ke ti nĩ, ẽg ter ke mũ ti, hã ra Topẽ tóg tỹ tũg' hé,” he tóg, Topẽ vĩ rá ki.

⁵⁶ Topẽ vĩ mranh hã tugrĩn ẽg tóg kãgter tĩ. Nén ù tỹ ẽg tugtãg tĩ préj ri ken hã vẽ, hã vỹ: ẽg tỹ Topẽ vĩ mranh, he mũ. Hã ra Jesus tóg tỹ tũg' he kãn, ẽg tỹ Topẽ vĩ mranh tỹ. Kỹ tóg nén ù préj ẽn tỹ préj tũ nĩ ri ke nĩ sir. Ter mãn ke tũ ẽg tóg nỹtĩ ha, kurã ẽn kã. Topẽ vỹ ẽg jyvẽn tĩ. Ẽg tỹ ti vĩ mranh hã tugnĩn ẽg tóg kãgter kãn ja nĩgtĩ.

⁵⁷ Hã ra Jesus tóg tỹ tũg' hé huri.

Topẽ hã mỹ sóg vĩ há han mũ, ti hã vỹ ẽg tar han tĩ, ẽg tỹ ti vĩ mranh mãn tũg jé. Ẽg Senhor tỹ Jesus Cristo tugrĩn tóg ẽg tar han tĩ, Topẽ ti.

⁵⁸ Tag to jykrãn kỹ tar nỹtĩmĩ, Topẽ to, ãjag tỹ ti ki rã tovãnã tũ nĩ jé. Ẽjag to sóg há tãvĩ nĩ, inh kanhkã'. Ẽg Senhor rãnhrãj han kãn sórmnĩ. Tag to jykrãn nĩ, ha mẽ: ẽg pi(jé) véké rãnhrãj tĩgtĩ', ẽg tỹ ẽg Senhor rãnhrãj han kỹ'. Ti kaja ve jé ẽg tóg ke mũ mỹr, kanhkã tá.

16

Ẽg tỹ ẽg mré Jesus ki ge kỹ nỹtĩ ag jagãgtãn ke

¹ Kỹ sóg ãjag mỹ ãjag tỹ ù tỹ Topẽ ki ge kỹ nỹtĩ ra jagãgtar nỹtĩ ag mỹ jãnkamỹ jẽnẽnh ke ẽn tó sór mũ gé sir, ãjag tỹ inh ki nén jẽmẽ sór mũ ti. Ga tỹ Galácia tá igreja krẽm vãnã mãn tĩ ag mỹ sóg tag tó ja nĩ, sỹ ãjag mỹ tónh ke tag ti, ha mẽ.

² Domingo kar ki nén ù sĩ tỹ vỹrmỹ nĩmĩ, ãjag ãn tá. Ẽ tỹ nén ù mág ẽn tóg nén ù mág

sĩ tỹ vurmỹ nĩm ke mũ gé, kỹ ù tỹ nén ù sĩ ãn tóg nén ù sĩ tỹ vurmỹ nĩm ke mũ gé. Ājag tỹ semana kar ki nĩm han kỹ tóg komēr hã mág mũ sir. Kỹ tóg kar kỹ nĩ, sỹ ājag ki jun mũ ra. Ājag tỹ inh kãtĩg ken jo vyr mỹ nĩm han ja tũ nĩn kỹ tóg há tũ nỹ.

³ Kỹ ùn kuprēg nĩ gé, ag tỹ ājag tỹ nén ù ma mũ jé, Jerusalém ra, ājag tỹ tá ke fag mỹ nén ven sór mũ ti. Inh jun kỹ sóg ag jēgnēnh ke mũ, carta mré hã.

⁴ Ājag tỹ nén ù ãn éhé nĩn kỹ sóg hēn ri ke mũn ma tĩg sór mũ gé, kỹ sóg ag mré tĩg mũ gé.

Paulo tỹ nén han sór mũ

⁵ Kỹ tóg, isỹ ga tỹ Macedônia mĩ kutēnh ken kỹ sóg vãhã ājag tá jun sór mũ sir. Isỹ Macedônia mĩ kutē sór vē.

⁶ Hã ra sóg ājag mré nĩg mág sĩ han sór mũ, ti tỹ inh mỹ ki króm ken kỹ. Hēn ri ke mũn sóg prỹg kusa fĩn rãm ke mũ, ājag mré nĩ ki, kỹ ājag tóg sir inh jagãgtãn kenh ke mũ, isỹ kar hēn ra tĩg ken kỹ.

⁷ Inh pi(jé) ājag ve sĩ han sór mũ', hã ra sóg ver kutar nĩ, hã kỹ sóg kar hã ājag venh tĩg sór mũ. Sỹ ājag mré nĩ sór vē mỹr, ěg Senhor tỹ to há nĩn kỹ.

⁸ Ver sóg cidade tỹ Éfeso tag kã nĩ ki festa tỹ Pentecoste pétēm sór mũ.

⁹ Tag ki ke ag tóg mē há han mũ, inh vĩ ti, ù tỹ hēn ri ke ag. Hã ra tag ki ver ù tỹ inh kato vãsãnsãn mũ ag vỹ e nỹtĩ. Hã kỹ sóg Éfeso tag kã nĩg mág sĩ han sór mũ, sỹ kar ājag venh tĩg jé.

¹⁰ Hēn ri ke mũn Timóteo tóg ājag ki jun ke mũ. Kỹ ti vĩ jēmē há han nĩ, ti mỹ'ãg tũ nĩ jé, ti tỹ ājag mré nĩn kỹ. ěg Senhor rãnrãj han tóg tĩ mỹr, inh kóm.

¹¹ Kỹ ti to é he tũg nĩ, ti kyrũ hã ra. Kỹ ti tĩg ken kỹ ti jagãgtãn nĩ gé, ti tỹ jatun mỹ inh ki jun jé. Sỹ ti jãvãnh vē, ěg régre ag mré hã.

¹² ěg régre tỹ Apolo mré sóg vēmén gé. Ti mỹ sóg to vĩ mũ vē, ti tỹ ājag venh tĩg jé, ěg régre tag ag mré hã, ù tỹ ājag venh kãmũ tag ag mré. Hã ra tóg tĩg jãvãnh nĩ ver. Ti tỹ ti mỹ ki króm ken kỹ ti nēji kejēn ājag venh tĩg ke mũ hã ra.

Jesus ki ge kỹ nỹtĩ ag tỹ jagnē mĩ ěkrén

¹³ Ājag kanē fãn nĩ. ěg Senhor ki rã tovãnh tũg nĩ. Krónh ke tũg nĩ, tar nỹtĩmĩ.

¹⁴ Kỹ ājag tỹ nén ù kar han kỹ vēnh kar to há nỹtĩmĩ.

¹⁵ Kỹ sóg ājag mỹ nén ù to vĩ sór mũ gé, Estéfanas to mỹr. Estéfanas fag vỹ Jesus ki ge ven ja nĩgtĩ, ājag jamã tá, ga tỹ Grécia tag tá. Kỹ fag tóg Topē tũ fag ki rĩr nỹtĩgtĩ, Topē tũ fag kar ki.

¹⁶ Hã kỹ sóg fag tó mũ ājag mỹ. Kỹ fag vỹ jēmēmĩ. Kỹ Topē rãnrãj han mũ ag kar vỹ jēmē kãn nĩ, ke gé, ěg mré rãnrãj mũ ag kar vỹ ti.

¹⁷ Estéfanas tóg inh ki jun há han, Fortunato ke gé, Acaico ke gé. Ag tỹ inh ki junjun kỹ inh fe tóg mrin ke mũ mỹr. Sỹ ājag venh há tĩn kỹ tóg inh mỹ sér pē tĩ, sỹ ag ve kỹ, ājag jēgja kã ke vē mỹr, ag tỹ tỹ ājag mré ke nỹtĩn kỹ.

¹⁸ Inh mỹ ag tóg vĩ há han mũ ājag to, kỹ ag tóg inh krĩ kusãg mũ sir. Ag tỹ ājag krĩ kusãg ke vē gé. Û tỹ ge to há tãvĩ nỹtĩmĩ.

¹⁹ Ga tỹ Ásia tá igreja krēm vēnhmãn tĩ ag vỹ ājag mĩ ěkrég tĩ. Kỹ Áquila mré Priscila fag vỹ ājag mĩ ěkrén mág tĩ gé, fag tỹ ājag mré ěg Senhor ki ge kỹ nỹtĩn kỹ. Fag ĩn krēm fag tóg culto han tĩ. Fag ĩn tá culto to kãmũ fag vỹ ājag mĩ ěkrég tĩ gé,

²⁰ kar kỹ ěg Senhor ki ge kỹ nỹtĩ fag kar ke gé. Jagnē to há tãvĩ nỹtĩmĩ, kỹ jagnē ki nhun ke ri ke han nĩ, Jesus mré ke kar ki, ājag tỹ jagnē nĩgé kãgmĩ kỹ.

²¹ Sỹ vãhã vēsóg ki ājag mỹ rán vē, ù tỹ inh vĩ rán ja pãte, inh, hã vỹ: Paulo, he mũ.

²² Topē mỹ sóg to vĩ tĩ, ti tỹ ù tỹ ěg Senhor to há tãvĩ tũ ãn ag vóg kónãn kãn jé. “Marana tá,” he sóg tĩ, hã vỹ: ha kãtĩg, Senhor, he mũ, ājag vĩ ki.

²³ ěg Senhor tỹ Jesus mỹ sóg to vĩ tĩ, ti tỹ ājag tar han jé.

²⁴ Ājag jé isỹ ājag to há tãvĩ nĩ ki kanhrãn, ěg tỹ Jesus Cristo ki ge kỹ nỹtĩn kỹ. Hã vē.

PAULO TỸ CARTA HAN: CORINTO TÁ KE AG MỸ CARTA Û

¹ Paulo tỹ rá vë, ãg régre tỹ Timóteo mré. Jesus Cristo hã ne inh fêg', isỹ tỹ ti apóstolo jê jé, Topê tỹ inh kuprêg ký. Isỹ Topê tũ ag mỹ rán vë, ù tỹ cidade tỹ Corinto tá vënh mãn tĩ ag mỹ, ù tỹ Grécia tá vënhmãn tĩ ag mỹ ke gé.

² Ëg jóg tỹ Topê jé ãjag tar han, ti jé ãjag krĩ kuprãg, ãg Senhor tỹ Jesus Cristo ti ke gé.

Topê tỹ Paulo krĩ tỹ kãnhvy' he

³ Topê mỹ sóg vĩ há han tĩ, ãg Senhor tỹ Jesus Cristo panh ti mỹ, ãg jóg mỹ, ù tỹ ãg jagãgtãn tĩ ãn mỹ. Ëg vësýrénh ký tóg ãg krĩ tỹ kãnhvy' he tĩ, Topê ti. Ti hã mỹ sóg agradecer he tĩ mýr.

⁴ Ti hã ne inh vësýrénh mũ ra inh krĩ tỹ kãnhvy' he tĩ', inh jagtar tĩn ký. Ti tỹ inh krĩ tỹ kãnhvy' he tugrĩn sóg inh kanhkã ag krĩ tỹ kãnhvy' he ki kanhró nĩ ha, inh kanhkã ù tỹ nén ù jagy vég mũ ra.

⁵ Cristo jagtar ja ãn ri ke pë ve mág sóg mýr, hã ký Cristo tóg inh krĩ kufy tỹ hën ri ke tỹ tũ' he tĩ gé sir.

⁶ Hã ra sóg ãjag jagfy jagtar nĩ, ãjag tỹ ti hã to tar nýtĩn jé gé, ãjag krenkren jé. Topê tỹ isar han ký tóg inh kóm ãjag tar han ke mũ gé sir. ãjag tỹ inh kóm jagtar nýtĩn ký ãjag tóg inh kóm ti to krónh kenh ke tũ nĩ gé sir.

⁷ ãjag ki êkrén mág sóg tĩ, hã ra sóg ki kanhró nĩ, Topê tỹ ãjag tar han ãn ki. Ûri ãjag tóg hã ra inh mré jagtar nýtĩ, hã ký Topê tóg ãjag krĩ tỹ kãnhvy' he tĩ gé, ti tỹ inh krĩ tỹ kãnhvy' he tĩ ãn ri ke han tóg tĩ, ãjag mỹ.

⁸ Inh kanhkã', ãjag mỹ sóg inh jagtar mág ja tó sór mũ. Ga tỹ Ásia tá sóg nén ù jagy távĩ ve ja nĩ, tá ag tóg isỹ hën ri ke kren, ký sóg: “Ûri inh hýn kren mãn ke tũ nĩ ha,” he ja nĩ.

⁹ “Ag tỹ isỹ tũg' henh ke hýn,” he sóg mũ vë. ãn kã sóg Topê hã mĩ êkrég mũ sir, isỹ vënhmỹ kren mãn ke tũ nĩn ký. “Ti hã ne inh kren han ki kanhró nĩ,” he ja inh nĩ. “Ûn kãgter mũ ag rĩnrĩn mãn ki kanhró tóg nĩ, ký

tóg inh kren han ki kanhró nĩ gé,” he ja inh nĩ.

¹⁰ Ký tóg inh kren han ja nĩ, iser kren mũ ãn kã, ký tóg kejën inh kren han mãn ke mũ gé. Ti hã mỹ sóg to vĩ tĩ, ti hã tỹ inh kren han jé.

¹¹ Ký iso vãsãn nĩ gé, iso Topê mré vĩ ký, ký Topê tóg ãjag vĩ mën h mũ. Ti tỹ ãjag vĩ mẽ tugrĩn inh jagãgtãn ký ãjag tóg ti mỹ agradecer henh ke mũ. Ký ù tỹ hën ri ke ag vỹ Topê mỹ vĩ há han ke mũ, ti tỹ inh jagãgtãn ke tugrĩn.

Paulo tỹ Corinto tá ke ag venh kãtig ja tũ

¹² Ha vé, inh jykre tóg tỹ ùn há nỹ, ki kanhró inh nĩ. Vënh kar mỹ sóg nén ù há hã han tĩ, vënh jykre kuryj, ký sóg ki hã tó tĩ gé, Topê jykre han ký. Inh pi(jé) isỹ vësóg ki nén to jykrén mũ ãn hã han tĩ'. Topê hã ne isar han tĩ', isỹ ti jykre ki króm jé. Ký sóg ãjag mỹ ti jykre hã kãmén ja nĩgtĩ gé.

¹³ Tag hã rán isóg tĩ gé, ký ãjag tóg isỹ rá ve ký (ãjag tóg) ki kanhrãn ke mũ gé sir. Ti pi(jé) mẽ jagy tĩ'. ãjag tỹ ki kanhrãn kãn ký tóg há tĩn mũ.

¹⁴ ãjag tỹ ki kanhrãn sĩ tag kãfór han ký tóg há tĩn mũ. Ký kurã ãn kã, ãg Senhor tỹ Jesus kurã ãn kã tóg ãjag mỹ sér tĩn ke mũ, ãjag tỹ inh ven ký. Ký tóg inh mỹ sér tĩn ke mũ gé, isỹ ãjag ven ký.

¹⁵ Tag to jykrén ký sóg ãjag ki jun kren ja nĩgtĩ. Isỹ ãjag ki jun ke vë vë, isỹ ãjag tar han jé. Isỹ vãsý ãjag tar han ja ãn ri ke han mãn ke vë vë.

¹⁶ Ký sóg ãjag ve kar ký (sóg) ga tỹ Macedônia ra tĩg ke mũ vë. Kar ký, isỹ Macedônia tá kãtig mãn ký sóg ãjag ve mãn ke mũ vë gé, ãjag tỹ inh jagãgtãn ký inh mỹ jãnkamy nĩmnĩm' he jé vë vë, isỹ ga tỹ Judéia ra tĩg há han ke to.

¹⁷ Hã ra tóg inh mỹ ki krov ja tũ nĩ, hã ký sóg kãtig ja tũ nĩ. Ký inh mỹ kanhir ký ãjag mý: “kãtig jé sóg ke mũ,” he ja nĩ'? Vó. Inh jykre pijé', isỹ kanhir ký tó tĩ ãn ti. Ký sóg jykré régre han tũ nĩgtĩ gé. Ûn jykre régre ag tỹ: “hej,” he mũ ra ag tóg han sór tũ nĩ. Ge tũ inh nĩgtĩ.

¹⁸ Topê hã ne ón vãn h nĩ', hã ra tóg ki kanhró nĩ, inh jykre pir nĩ ti.

¹⁹ Topê kósĩn jykre hã han sóg tĩ, Jesus Cristo jykre ti. Inh hã ne ãjag mỹ ti kãmén

ja nĩ', Silas mré, Timóteo mré ke gé. Ti pi(jé) ã tỹ: "hej," he mũ ra han ke tũ nĩ'. Han ti tĩ, nén ù kar ti, Topě kósin ti.

²⁰ Topě hã vỹ ěg mỹ ěg tỹ nén vėnh ke ti tó ja nĩgtĩ, kỹ ěg tóg ti kósin hã tigrĩn vėg mũ sir, ti panh tỹ ěg mỹ nén tó mũ ěn ti. Hã tó sóg tĩ, vėnh kar mỹ, Topě ón vãnh ěn hã tó sóg tĩ. Kỹ ěg tóg ti hã mỹ vĩ há han tĩ sir, Topě hã mỹ, ěg tỹ ti tỹ ěg mỹ nén tó mũ ěn to: "hã vė," hen kỹ.

²¹ Topě hã ne Cristo ki isar han, ājag mré hã. Kỹ tóg ěg kuprėg gé.

²² Kỹ tóg ěg nĩgěg kỹ ěg vin tĩ gé. Ā kuprĩg ĵėnėg tóg mũ ěg mỹ. Ti tỹ ěg mỹ Ā kuprĩg ĵėnė tigrĩn ěg tóg ki kanhró nỹtĩ, ti tỹ ěg mỹ nén ù kar vin ke mũ ěn ti.

²³ Ha vé, ki hã sóg tó mũ, Topě ne ki kanhró nĩ'. Inh ón tĩ nĩ ra tóg inh vóg kónãn mũ vė. Isỹ ājag to ĵũ tũ nĩ jé, hã jé sóg ājag tá jun ja tũ nĩ ver, cidade tỹ Corinto tá. Sỹ tá jun ra sóg ājag to ĵũnh ke mũ vė.

²⁴ Inh pi(jé) ājag to tar han sór mũ'. Jesus hã ki ge kỹ ājag nỹtĩ, ti hã to tar ājag nỹtĩ. Ājag fe tỹ mrin ke han sór sóg mũ vė, hã jé sóg ājag to vãsãn tĩ vė.

2

¹ Hã kỹ sóg tag to jykrén ja nĩ, ha mẽ: "ag kanė jun mãn sór tũ inh nĩ," he sóg, "hã kỹ sóg ag venh tĩg ke tũ nĩ ver," he sóg ājag to.

² Ha mẽ, isỹ ājag kanė jun kỹ ù nỹ hỹn inh fe tỹ mrin kenh mũ? Isỹ ājag kanė jun kỹ ù tỹ inh fe tỹ mrin kenh ke tóg tũ tĩ.

³ Hã kỹ sóg ājag mỹ vėnh rá ěn ĵėnė gé, ājag tỹ inh kanė jun tũ nĩn jé gé, sỹ ājag ki jun kỹ. Inh jun kỹ tóg inh mỹ há tĩnh mũ, ājag tỹ inh fe tỹ mrin kenh kỹ. Tag to sóg jykrén tĩ gé, ha mẽ. "Ag tỹ inh fe tỹ mrin ke kỹ tóg hỹn ag mỹ sér tĩ gé," he sóg tĩ, ājag to.

⁴ Sỹ ājag mỹ carta ěn rán mũn kỹ sóg to fỹ mág mỹr, ājag tigrĩn sóg kanė jur, ājag tigrĩn sóg vėnh mỹ en. Inh pi(jé) ājag kanė jun sór ja nĩ'. Isỹ ājag to há pė nĩn kỹ sóg ājag mỹ vėnh rá ěn han ja nĩgtĩ, ājag tỹ isỹ ājag to há nĩ tag ki kanhró nỹtĩn jé.

Ěg tỹ jagnė mỹ vėnh pãte fón ke

⁵ Ha mẽ, ājag kãmĩ ù tóg ājag kanė jur han ja nĩ. Ti pi(jé) isavĩn kanė jun ja nĩ'. Ājag kar kanė jun ja tóg nĩ. Hėn ri ke mũn sóg tó há

han ja tũ nĩ, isỹ: "ājag kar," he kỹ. Ājag kãmĩ ùn e kanė junjur han tóg hã ra, ti tỹ Topě vĩ mranh tigrĩn.

⁶ Kỹ ājag tóg hur ti mỹ vĩ kónãn. Ha ti tovãnh, gen kỹ.

⁷ Vãhã ti mỹ vėnh pãte fón nĩ, ti mỹ vėnh vĩ há hã tómnĩ. Ke tũ nĩ (mũ) ra ti fe kaj tóg ti tén ke mũ, ha vemnĩ.

⁸ Hã kỹ sóg ājag mỹ tag to vĩ sór mũ vãhã, ha mẽ: ti mỹ ven nĩ, ājag tỹ ti to há nỹtĩ ti.

⁹ Isỹ ājag tỹ inh vĩ kri fig mũ ěn ve sór ja vė, hã jé sóg ājag mỹ vėnh rá ěn ĵėnė ja nĩ, mỹr, ha mẽ.

¹⁰ Ājag tỹ ù mỹ vėnh pãte fón kỹ sóg ti mỹ vėnh pãte fón tĩ gé. Keĵėn sóg vėnh pãte fón tĩ, ù mỹ. Kỹ sóg Cristo rĩnve ti mỹ vėnh pãte fón tĩ, ājag jagãgtãn kỹ.

¹¹ Satanás tỹ ěg tỹ hė ri ke tũ nĩn jé sóg vėnh pãte fón tĩ. Ti tỹ nén to jykrén mũ ěn ki kanhró ěg tóg nĩ mỹr, Satanás tỹ nén to jykrén mũ ti.

Paulo krĩ kufy

¹² Ha vé, isỹ cidade tỹ Trôade tá jun ja nĩn kỹ sóg tá ke ag mỹ Cristo kãmė sér ěn tó ja nĩgtĩ. Kỹ ag tóg ĵėmė há han ja nĩgtĩ, ěg Senhor tỹ ag krĩn kỹ.

¹³ Hã ra sóg ěg mré ke tỹ Tito ve ja tũ nĩ tá. Isỹ tá ti venh ke vė vė, hã ra tóg ki tũ nĩ, isỹ tá jun mũ ra. Hã kỹ sóg ti to krĩ kufy nĩ ja nĩgtĩ. Hã kỹ sóg ag mỹ: "isĩg ke vė," he kỹ tĩg ja nĩ sir, ga tỹ Macedônia ra, ti nón.

Jesus vĩ tỹ nén ger há ri ke nĩ

¹⁴ Hã ra sóg Topě hã mỹ vĩ há han tĩ. Ti hã ne inh ĵėnėg tĩ', isỹ ěmã kar mĩ tĩg jé, Cristo tigrĩn. Kỹ vėnh kar tóg ti tỹ tỹ ùn mág pė nĩ hã vėg tĩ, ag tỹ inh jykre jagma ěvãnh kỹ. Hã kỹ vėnh kar tóg ti ki kanhrãn mũ sir, isỹ ag mỹ ti tón kỹ. Kỹ tóg ag mỹ nén ger há kri nĩ nĩ, ag tỹ ti vĩ mẽn kỹ.

¹⁵ Nén ger há tóg vėnh kar kri rĩm ke tĩ. Ri ke ti nĩ, isỹ vėnh kar mỹ Cristo kãmén kỹ, ag tỹ Topě ki kanhrãn jé. Vėnh kar mỹ sóg ti vĩ tó tĩ, ùn krenkren mũ ag mỹ, ùn vãgfor kỹ nỹtĩ ag mỹ ke gé.

¹⁶ Ûn vãgfor kỹ nỹtĩ ag tỹ inh vĩ mẽg mũ ra kri fig tũ nĩn kỹ ag tóg nũgme ki vár ke mũ. Kỹ inh vĩ tóg ag mỹ nén ù ter ger gy ěn ri ke nĩ. Ag ĵãvo ùn krenkren mũ ag tỹ inh vĩ ĵėmė kỹ ag tóg rĩnrĩr ke mũ, ag tỹ inh vĩ

kri nĩm kũ. Kũ inh vĩ tóg ag mĩ ěg tũ nén ger há mẽ kũ ěg fe tũ mrin ke ěn kri nĩ nĩ. Hã ra ěg pi(jé) vėsóg ki vėnh rãnrãj tag han há nỹtĩtĩ'.

¹⁷ Ha vé, ũ ag vỹ Topě vĩ kãmén to ti kaja ve sór tĩ, jãnkamy ve sór to ag tóg Topě vĩ kãmén tĩ. Ke tũ nĩ kũ ag tóg ti vĩ tó ěn tigrĩn vėsỹ ũn mág han tĩ. Ag jãvo inh pi(jé) ti kaja ve sór tĩ', inh pi(jé) vėsỹ ũn mág han sór mũ'. Cristo ki rã kũ sóg Topě rĩnve ti kãmén tĩ. Jykre pir han sóg tĩ gé mỹr. Kũ ũ tũ inh jėnėg mũ vỹ tũ Topě ti nĩ.

3

Vėnh jykre tãg

¹ Kũ ģjag hỹn iso: “tũ sóg ũn há nĩ, he tóg tĩ, Paulo ti,” he sór tĩ. Hã tũ vē. Ũ ag tóg ģjag mỹ carta to vĩ tĩ, kũ ag tóg: “ũn há vỹ tũ ti nĩ, hemnĩ iso, carta ki,” he tĩ, “kũ vėnh kar tóg vėnh rá tag ve kũ isỹ tũ ģn há nĩ ki kanhró nỹtĩnh mũ,” he ag tóg tĩ. Inh pi(jé) carta tũ ge ma tĩg sór mũ'.

² Inh mỹ ģjag tóg carta ri ke nỹtĩ. ģjag mĩ sóg ěkrég tĩ, kũ sóg vėnh kar mỹ ģjag kãmén tĩ. Inh há ki ag tóg ģjag jykre há vég tĩ, kũ ag tóg isỹ tũ ģn há nĩ ěn ki kanhrãn mũ sir. Hã ki ģjag tóg carta ri ke nỹtĩ.

³ ģjag mỹ sóg Cristo jykre kãmén ja nĩ, kũ ģjag tóg mĩ mũgtĩ. Kũ vėnh kar tóg ģjag jykre ve kũ (ag tóg) Cristo ki kanhró nỹtĩ, kũ ģjag tóg tũ Cristo tũ vėnh rá ri ke nỹtĩ, sỹ carta han ja ri ke. Hã ra ti pi(jé) caneta tũ rán kũ nĩ'. Topě kuprĩg tũ tóg rán kũ nĩ, ũn rĩr nĩ ěn kuprĩg tũ tóg rán kũ nĩ, carta ěn ti. Kũ tóg pó tũ rán jafã kri rán kũ nĩ tũ nĩ gé. ěg ki tóg rán kũ nĩ, kũ tóg tũ ěg jykre nĩ sir, carta ri ke ěn ti.

⁴ Topě há vỹ Cristo tũ isar han tĩ, há kũ sóg ģjag ki carta tũ ge han ki kanhró nĩ.

⁵ Inh pi(jé) vėsóg ki nén ũ há to jykrén ki kanhró nĩ'. Inh pi(jé) vėsóg ki nén ũ há han ki kanhró nĩ gé'. Hỹ, Topě há ne isar han tĩ', isỹ nén ũ há han ke to.

⁶ Ti há ne inh krĩn tĩ', isỹ ti jykre tãg kãmén jé, vėnh kar mỹ. Ti pi(jé) ěg mỹ vãsỹ nén rán kũ nĩ ěn tó mãn mũ'. Vãhã tóg ěg mỹ ģ kuprĩg jėnėg mũ. Vėnh jykre tãg to ken há vē, há vỹ: “Topě kuprĩg tũ ěg krĩn mũ,” he mũ. Ha vé, Topě kuprĩg vỹ ěg rĩn tĩ, jãvo

vãsỹ Topě vĩ rán kũ nĩ ěn vỹ ěg tén ke ja nĩgtĩ, ěg tũ mranh kũ.

⁷ Topě vĩ tũ vãsỹ rán kũ nĩ ja ěn vỹ pó kri rán kũ nĩ ja nĩ, ũ tũ ěg tén mũ ěn ti. Moisés tóg pó kri ti rán ja nĩ, Topě tũ ti mỹ tón kũ. Ti tũ ti mỹ tó kar kũ ti kakã tóg jėngrė nĩ ja nĩgtĩ, Moisés ti. Kũ tóg Israel ag mỹ e ja tĩ, Moisés kakã ki ěvãnh tũ ja ag tóg nĩgtĩ sir, ti tũ kakã jėngrė nĩn kũ. Hã ra tóg kejėn tũ' he ja nĩgtĩ gé, ti kakã jėngrė ti.

⁸ Kũ ũ tũ Topě kuprĩg kãmén mũ ěn hỹn tóg Moisés kakã jėngrė kãfór nĩ, ti sĩnvĩ kãfór ti nĩ.

⁹ Moisés vỹ Topě tũ ěg vóg kónãn ke ěn tó ja nĩgtĩ. Hã ra Topě vĩ tag tóg ti kakã jėngrė han, ti sĩnvĩ han ti. Jãvo sóg Topě tũ ěg mỹ vėnh pãte fón ke ěn há tó tĩ. Ti tũ ěg to “jykre há ag nỹtĩ ha,” he mũ ěn tó sóg tĩ. Topě vĩ tag tigrĩn sóg Moisés sĩnvĩ kãfór pė nĩ.

¹⁰ Kũ vãsỹ nén sĩnvĩ ěn tóg vãhã ěg mỹ sĩnvĩ tũ nĩ ha, vãsỹ jėngrė ěn tóg ěg mỹ jėngrė tũ nĩ ha, ěg tũ ũ tãg tag sĩnvĩ ve kũ, ěg tũ ũ tãg jėngrė ven kũ. ũn tãg tag vỹ nén kar sĩnvĩ kãfór nĩ.

¹¹ Vãsỹ rán kũ nĩ ja ěn tóg tũ' he ja nĩ. Kũ ũ tũ tũ' he mũ ěn tóg sĩnvĩ ja nĩgtĩ gé. Ti jãvo isỹ vėnh jykre tó mũ tag vỹ tũ' henh ke tũ pė nĩ, há kũ tóg ũn si sĩnvĩ ěn kãfór nĩ.

¹² ěg tũ tag venh ke jãvãnh sóg mũ mỹr. Hã kũ sóg jamã hár(a) tó mũ, inh pi(jé) sỹ ag mỹ tó jé to mỹ'ãg mũ'.

¹³ Moisés ri ke han tũ sóg nĩ. Kur tũ tóg vėnh kri fón ja nĩ. Kũ tóg vėnh pugrĩn ja nĩ, ti tũ ģ kakã jėngrė ěn pėju jé. Hã ra tóg komėr há tũ' he ja nĩ, ti jėngrė ěn ti. Hã kũ tóg kur krēm vėnh pėju, Moisés ti, Israel ag tũ ti jėngrė vég tũ nĩ jé.

¹⁴ Hã ra ag tóg ũri ki kagtĩg nỹtĩ gé ver. Kyvó ri ke ag nỹtĩ, kutu, Israel ag. Ag tũ vãsỹ rán kũ nĩ ěn to ken kũ tóg ag mỹ Moisés vėnh pugrĩn kũ nĩ ěn ri ke nĩ, ti pãkrĩ ri ke. Ag tũ ki kagtĩg to ken há vē. Cristo há tigrĩn ěg tóg vãsỹ nén rán kũ nĩ ěn to jykrén há han mũ ha, há ra ag tóg ki kagtĩg nỹtĩ jãvo.

¹⁵ Hã kũ ag tóg Moisés tũ nén rán mũ to ke ěn mẽg tĩ, há ra ag tóg to jykrén tũ nĩgtĩ, kũ tóg Moisés vėnh pugrĩn ěn ri ke nĩ ag mỹ, ti pãkrĩ ěn ri ke.

¹⁶ Kejėn ũ tóg ěg Senhor ki rã mũ, ag kãki ũ. Kũ tóg vãhã ag tũ ti vėnh pugrĩ vym ri ke

nĩ.

¹⁷ Hã kÿ tag tóg rán kÿ nĩ, Topě vĩ rá ki, ha mẽ: Moisés tÿ ěg Senhor mré vēmén kÿ tóg ă vĕnh pugrĭn tÿ vym ke ja nĩgtĩ,” he ja tóg nĩ, Topě vĩ rá ki. Topě kuprĭg to ken hã vĕ, ěg Senhor he mũ tag ti. Kÿ ěg Senhor kuprĭg hã ne ěg kygvăn ke mũ!, ěg tÿ ti vĩ ki króm ke to.

¹⁸ Hã kÿ tóg ěg mÿ ti vĕnh pugrĭn tÿ vym ke ja ri ke nĩ, kÿ ěg tóg ěg Senhor sĭnvĩ ěn, jĕngrĕ ěn ve há han tĩ. ěg tÿ vĕnh ve jafă ki nĕn ũ ve há ěn ri ke tóg nĩ sir. ěg tÿ ěg Senhor ki ěvăn kÿ ěg tóg ti ri ke nÿtĭn ke mũ gé. Komĕr hã ěg tóg ve ũ han ke mũ, ti ve ěn ri ke, ěg tÿ ti tugnÿm kÿ, ěg tÿ ěg Senhor tugnÿm kÿ, ti kuprĭg ti.

4

Paulo krój nĩ

¹ Inh rănhrăj hã vĕ, Topě tÿ inh mÿ vĕnh rănhrăj nĭm jan hã vĕ. Kÿ tóg inh jagăgtăn mũ gé, isÿ ti rănhrăj to krónh ke tũ nĩ jé.

² Hÿ, ũ ag tóg nĕn tÿ ěg mÿ'ăg han tĩ ěn han tĩ, kuty tá, ũ tÿ ag vég tũ nĭn jé. Vĕnh jykre tÿ ge tovăn kăn inh huri mÿr. Kÿ sóg ăjag mÿ ón tũ nĩgtĩ gé, ăjag lograr henh ke tũ sóg nĩ gé. Ón kÿ sóg: “Topě vÿ tag tó ja nĩ,” he tũ nĩ gé. Ki hã sóg tó tĩ. Topě rĭnve sóg vēmén tĩ, hã kÿ sóg ón tũ nĩgtĩ. Ũ tÿ isugnÿm mũ ěn vÿ ki kanhrăn kăn ke mũ, inh jykre ki.

³ Kÿ ũ tóg kejĕn ki kagtĭg nÿtĩ, isÿ Jesus kăme sér tó mũ ěn ki. Ag mÿ tóg nĕn ũ péju kÿ nĩ ri ke nĩ. Ũ tÿ văgfor kÿ nÿtĩ ag vĕ, hã kÿ ag tóg ki kanhrăn tũ nĩgtĩ.

⁴ Kyvó ag nÿtĩ, krĭ tũ ag nÿtĩ. Jesus ki ge sór tũ ag nÿtĩ, Satanás tÿ ag kyvó nĭm ti kÿ. ěpră pă'i ag kri ke vÿ tÿ ti nĩ, Satanás ti. Ti tÿ ag kyvó nĭm ti kÿ ag tóg Cristo kăme tag to jykren tũ nĩgtĩ. Ti jĕngrĕ vég tũ ag tóg nĩgtĩ, ti sĭnvĩ ti. Cristo hã vÿ tÿ Topě kănhvég ri ke nĩ, ti ve ri ke.

⁵ Inh pi(jé) inh jykre kămén tĩ'. Jesus Cristo hã kămén sóg tĩ, ti tÿ tÿ ěg Senhor nĩ ti. Jăvo sóg tÿ ăjag camarada ri ke nĩ, isÿ Jesus to há nĭn kÿ.

⁶ Ha vé, ũ tÿ kutyg mũ ra kurăg han mũ ěn tóg ěg ki kură han mũ gé sir, Topě ti, ěg tÿ ki kanhrăn jé, Topě tÿ tÿ ũn mág nĭn ki. ěg tÿ Cristo ve kÿ ěg tóg Topě ki kanhrăn tĩ.

Cristo vÿ tóg Topě ve hã pĕ nĩ. ěg ki kură to ken hã vĕ, hã vÿ: Topě ki kanhró he mũ.

⁷ ěg tÿ tÿ ěpră ke nÿtĩ (hã) ra tóg ěg kanhrăn sór tĩ, kÿ tóg ěg tÿ go'or tÿ kukrũ han kÿ kăki jănkamy e vin ěn ri ke nĩ. ěg hã vÿ tÿ go'or tÿ kukrũ ěn ri ke nÿtĩ, ěg krój nÿtĭn kÿ, inh ke gé. Hã ra tóg ěg kanhrăn tĩ, vĕnh kar tÿ ti hã tÿ tÿ ũn tar tăvĩ nĩ ěn ve je. Jănkamy ri ke to ken hã vĕ. ěg pi(jé) tar nÿtĩ'. Ũ tÿ ěg tar han mũ vÿ tÿ Topě ti nĩ.

⁸ Inh krój nĩ ra Topě tÿ isar han mũ vĕ, ha vé ha. Nĕn kar tóg inh kutăn tĩ, hã ra inh pi(jé) to krĭ kufy han tĩ'. Kejĕn tóg inh jykre tũ tĭgtĩ, kÿ tóg isÿ: hÿ mÿ vÿ? he ja há tĭgtĩ, hã ra inh pi(jé) to krónh ke tĩ'.

⁹ Inh vóg kónăn ag tóg tĩ, hã ra Topě pi(jé) isovăn tĩ'. Inh rÿnh ag tóg tĩ, hã ra ag pi(je) isĕn tĩ'.

¹⁰ Kură kar ki sóg Jesus vĕsÿrĕnh ěn ri ke han tĭgtĩ. Hã tugrĭn vĕnh kar tóg Jesus rĭr nĩ tag venh ke mũ gé, inh vĕsÿrĕnh tugrĭn.

¹¹ Kură kar ki sóg ter kren tĩ, Jesus tugrĭn. Hã ki Jesus rĭr nĩ tóg inh ki ve há tĩ, inh făr vag ke mũ ra.

¹² Iser kren kÿ ajag tóg tar nÿtĩ jăvo, rĭnrĭr ăjag nÿtĩ.

¹³ Tag vÿ Topě vĩ ki rán kÿ nĩ, ha mẽ: “Topě vĩ kri nĭm inh, hã kÿ sóg tó,” he ja tóg nĩgtĩ, Topě vĩ rá ki. Topě vĩ tag hã vÿ inh jykre han tĩ, hã kÿ sóg tó tĩ gé. Kri fig sóg tĩ, hã kÿ sóg tó tĩ mÿr.

¹⁴ Topě ne ěg Senhor tÿ Jesus rĭn măn ja nĩ'. ěn vÿ inh rĭn măn ke mũ gé, ki kanhró sóg nĩ. Kură ěn kă tóg ăjag mré inh jé prĕr ke mũ, ěg tÿ ti mÿ vĕnh ven jé.

¹⁵ ăjag tugrĭn sóg ti jagy tag ve kăn tĩ. Kÿ komĕr hã ũn e tóg Topě tÿ ag jagăgtăn tag mĕnh ke mũ. Vĕnh grun jé ěg tóg ke mũ, kÿ ũn e tóg sir ti mÿ vĩ há han ke mũ. Kÿ Topě to vĩ há han mũ ag tóg e tăvĩ nÿtĩ sir. Topě tÿ tÿ ũn mág nĭn hã vĕ.

ěg tÿ Jesus ki ge kÿ nÿtĭn kÿ ěg krenkren ke

¹⁶ Hã kÿ sóg to krónh ke jăvăn nĩ. Ha vé, inh făr tag tóg krój nĩ, komĕr hã tóg ter sór mũ, ti vag jé. Hã ra inh kuprĭg tóg tar nĩ jăvo. Kură kar ki tóg vĕnh han măn tĩ, Topě tÿ isar han kÿ, inh kuprĭg ti.

¹⁷ Tag ki sóg ti jagy végtĩ, hã ra tóg inh mÿ kănhvy nĩ. Tũ' he jé tóg ke mũ, tag ki ti jagy

ti. Tá ãg tóg nén ũ há távĩ venh ke mũ, ãg tỹ tag ki ti jagy ve ja tigrĩn, hã ra tóg tũ' he jãvãnh nĩ, ãg tỹ tá nén venh ke mũ ãn ti. Ki kagtĩg ãg nĩ ver, hã ra tóg há távĩ nĩnh mũ, ãg tỹ tag ki nén ũ há ve kãfór ti nĩnh mũ, tá.

¹⁸ Hã ve sór inh nĩ, hã mũ sóg ãkrég tĩ. Ver ãg tóg vég tũ nĩgtĩ, sỹ nén ve sór mũ tag ti. Hã kỹ sóg ãg tỹ nén (ũ) vég mũ tag to jykrén sór tũ nĩgtĩ. ãg tỹ nén (ũ) vég mũ tag vỹ tũ' henh ke mũ. ãg tỹ ũri nén (ũ) vég tũ ãn vỹ tũ' henh ke tũ nĩ, ãg tỹ tá nén venh ke mũ ãn ti.

5

¹ ãg fãr vỹ ãg pãjó ri ke nĩ. Tũ' he jé tóg ke mũ, ãg fãr ti. Hã ra Topẽ ne ãg mũ ĩn tãg ri ke han ke mũ', kanhkã tá'. Hã ra tóg ãg tỹ tag ki ĩn han ri ke tũ nĩ. Tũ' he jãvãnh tóg nĩ, Topẽ tỹ ãg jamã tãg han mũ ti.

² Tag ki ãg tóg vësỹrénh tĩ, ãg fãr tỹ ãg pãjó ri ke tag ki. Kỹ tóg ãg tỹ kanhkã tá ãg jamã tãg ãn venh há tĩ. Hã jé ãg tóg prër tĩ. Kỹ tóg ãg tỹ kur tãg tu ri ke nĩ.

³ ãg tỹ kur tu kỹ ãg kator tũ nỹtĩ. ãg kur ri ke ti nĩ, kanhkã tá ãg jamã ti, ãg tỹ ãg fãr tãg tun kỹ.

⁴ Ha vé, ki hã sóg tó mũ. Tag ki, ãg tỹ ãg fãr tỹ pãjó ri ke tag ki nỹtĩn kỹ ãg tóg vësỹrénh tĩ, ãg mũ ãg ter jãvãnh tĩn kỹ. ãg mũ tóg ãg rĩr hã tag tỹ kanhkã tá jun há tĩ vë, kỹ tóg ãg tỹ tag ki ãg kur kunũg tũ ra ãg tỹ kanhkã tá jun kỹ ãg kur tãg tu ri ke nĩnh mũ, ãg mũ. Kỹ ãg tỹ ãg fãr tãg ve kỹ ãg fãr si tóg tũ' he mũ, ãg ter tũ ra. Tag hã tóg ãg mũ há tĩnh mũ vë.

⁵ ãg tỹ kanhkã tá ãg fãr tãg venh ke jé Topẽ tóg ãg mũ vënh jykre nĩm, kỹ tóg ãg mũ ã kuprĩg jënẽ gé. Hã ki ãg tóg ki kanhró nỹtĩ, ãg tỹ tá nén (ũ) venh ke mũ ãn ki.

⁶ Hã kỹ tóg inh mũ sér tĩ. ãg tỹ ver ga kri mũn kỹ ãg tóg ãg Senhor vég tũ nĩgtĩ ver.

⁷ ãg tỹ ti vég tũ ra ãg tóg ti vỹ kri fig tĩ.

⁸ Kỹ sóg kanẽ jur mãn tũ nĩ ha. Isỹ inh fãr tỹ pãjó ri ke tag tovãnh há tóg tĩ, sỹ ãg Senhor mré nĩ jé, inh jamã pẽ tá.

⁹ Hã kỹ sóg vãsãn tĩ, inh jykre tỹ ti mũ há nĩ jé. Isỹ tag kã nĩ kỹ sóg vãsãn tĩ, kỹ sóg tá vãsãn ke mũ gé, sỹ tá ti mré nĩnh ken kỹ.

¹⁰ Ha vé, ãg kar vỹ Cristo mũ vënh ven ke mũ, ti tỹ ãg jykre tugnyĩm jé. Kỹ tóg ãg mũ

nĩm ke mũ, ãg tỹ tag ki nén (ũ) han mũ kaja ti. ũ tỹ tag ki nén (ũ) há han mũ ãn tóg ã tũ kajan venh ke mũ gé, kỹ ũ tỹ tag ki nén (ũ) kórég han mũ ãn ag tóg ãjag vësỹrénh venh ke mũ gé sir.

Cristo tỹ ãg jykre si tỹ tũ' he

¹¹ Ha vé, ãg Senhor kamẽg sóg tĩ, hã kỹ sóg ãprã ke ag mũ ki hã tó tĩ, ag tỹ ti ki ge jé. Topẽ hã ne inh ki kanhró kar nĩ'. Kỹ ãjag hỹn, ãjag tỹ nén to jykrén há han kỹ (ãjag hỹn) inh ki kanhró nỹtĩnh ke mũ gé, he sóg tĩ.

¹² Inh pi(jé) ãjag mũ: “ũn mág vỹ tỹ inh nĩ,” he sór tĩ'. Hã ra sóg ãjag mũ vënh kãmén mũ, ti tỹ ãjag mũ sér tĩ jé, sỹ ãjag mũ nén (ũ) kãmén mũ ãn tigrĩn, ãjag tỹ iso: “jykre há távĩ ti nĩ,” he jé. Tag tómnĩ, ũ tỹ vësỹ tỹ ũn mág han sór mũ ag mũ. ũ tỹ ge jykre vỹ sĩnvĩ nĩ ve nĩ, hã ra tóg ãg tỹ ve há han kỹ (tóg) krój nĩ, ag jykre ti.

¹³ Ha vé, krĩ tũ inh nẽji nĩ. Topẽ jykre han tigrĩn sóg krĩ tũ nĩ ve nĩ. Kejẽn sóg krĩ há han tĩ gé. ãjag tigrĩn ke vë, inh krĩ há ti.

¹⁴ Cristo hã vỹ tỹ inh fe nĩ, hã kỹ sóg vënh kar to há nĩ. Tag to sóg jykrén mũ, ha mẽ: vënh kar jagfy tóg ter ja nĩ, Cristo ti, kỹ ãg kar jykre si vỹ tũ' he mũ sir, ti jamẽn kỹ.

¹⁵ Ti hã ne vënh kar jagfy ter ja nĩ'. Hã kỹ ãg pi(jé) tỹ ãg tũ nỹtĩ', ũri'. Ti tũ vỹ tỹ ãg nỹtĩ, ti tỹ ãg jagfy ter ja nĩn kỹ, ti tỹ ãg jagfy rĩr mãn ja nĩn kỹ ke gé. Kỹ ti hã ne ãg mũ ãg tỹ nén han ke mũ ãn tó tĩ', ũri'.

¹⁶ Vãsỹ ãg tóg ãg tỹ vësóg ki nén (ũ) to jykrén kỹ (ãg tóg) ãprã ke jykre to: “tag vỹ há nĩ, tag vỹ kórég nĩ,” he ja nĩgtĩ. ũri ãg tóg vësóg ki tag to jykrén mãn ke tũ nĩ ha. Cristo to ãg vësóg ki jykrén mãn ke tũ nĩ gé, ãg tỹ vãsỹ vësóg ki ti to jykrén' he ja ãn ri ke tũ vë ha, ũri.

¹⁷ Hẽ ri ken kỹ? Cristo tỹ ãg han mãn kỹ mũr. Ti ki ge kỹ ãg nỹtĩ, hã kỹ tóg ãg han mãn ja nĩ. ãg jykre si tóg tũ tĩ ha, ãg tỹ nén han ja ãn tóg tũ tĩ ha ke gé. ũri ãg tóg tỹ ũn tãg nỹtĩ ha, ãg krĩ, ãg jykre ti ke gé.

¹⁸ Topẽ tỹ nén han mũn hã vë. Topẽ kato vãsãn ãg tĩ vë, hã ra ãg tóg ũri tỹ Cristo mré ke nỹtĩ ha, Topẽ tỹ ãg han mãn kỹ, Cristo tigrĩn. Kỹ tóg ãg mũ vënh rãnrãj tag nĩm mũ gé sir, ãg tỹ vënh kar mũ: tỹ Cristo mré ke nỹtĩmĩ, he jé.

19 Ha vé, Topě vỹ Cristo jěně, ti tỹ ěg tỹ tỹ ti mré ke nýtĩ han jé, ěprã ke kar tỹ ti ki ge sór jé. Kỹ tóg ěg tỹ ti vỹ mranh tỹ tũ' he sór mũ gé sir, ěg tỹ ti kaja kórég vég tũ nĩ jé. Kỹ tóg ěg mỹ: ha vėnh kar mỹ tó, isỹ ag to há nĩ sór mũ ti," he ja nĩ gé.

20 Cristo hã ne inh jěněg mũ', isỹ ti jiji tó jé. Kỹ Topě tóg vėnh kar jyvėn tĩ, kỹ sóg hã tó jě nĩ. Hã kỹ sóg Cristo jyjy tó kỹ (sóg) ājag mỹ tag to vỹ sór mũ, ha mẽ: "Topě to há nýtĩmnĩ, ti kato vãsãn mãn sór tũg nĩ," he sóg mũ.

21 Jesus pi(jé) Topě vỹ mranh ja nĩgtĩ'. Hã ra tóg ěg tỹ ti vỹ mranh ja ěn kajãm kãn. Kỹ tóg ěg mỹ Topě jykre kuryj ěn nĩm mũ sir, ěg jagfy kajãm kar kỹ.

6

1 Topě mré sóg rãnrãj tĩgtĩ. Hã kỹ sóg ājag jyvėn mũ, ājag tỹ Topě vỹ ki króm jé. Ājag tỹ ti vỹ ki króm tũ nĩn kỹ tóg fagrĩnh mỹ ājag jagãgtãn nĩ.

2 Ti hã ne tag tó ja nĩ', ha mẽ: sỹ ājag jagãgtãn ke kurã ki sóg ājag tỹ inh mỹ nén to vỹ mũ ěn han ke mũ. Ājag krenkren ke kurã ki sóg ājag krenkren han ke mũ," he ja tóg nĩ, Topě ti. Ājag krenkren ke kurã vỹ hur jun, ha mẽ. Ũri tóg ěg krenkren han sór mũ, Topě ti.

3 Kỹ sóg nén ũ vėnhmỹ han tũ nĩgtĩ sir, ũ tỹ iso vėnh jykre kórég tó tũ nĩ jé, inh rãnrãj to.

4 Vėnh jykre há mĩ sóg tĩ mỹr, isỹ tỹ Topě camarada jě kỹ, kỹ inh jykre tóg vėnh kar mỹ ve há tĩ. Isỹ nén ũ jagy vég mũ ra sóg ti to krónh ke tũ nĩgtĩ, ijagtar nĩ ra, inh kaně jur mũ ra.

5 Kejěnh ag tóg inh mrãnrãn tĩ, vėseja kãtã ag tóg inh fón tĩ, vėnh kar tóg kejěnh inh kri rũv tĩ. Kejěnh sóg inh rãnrãj tỹ inh kutãn to jagtar tĩ, kejěnh sóg nũr tũ nĩgtĩ, kejěnh sóg vėjěnh vég tũ nĩgtĩ.

6 Isỹ ti jagy vég mũ hã ra ijykre tóg tỹ ũn há nỹ, Topě vỹ ki kanhró mág sóg nĩ, vėnh kar to sóg fe nĩ, vėnh kar mỹ sóg koměr hã vỹ tĩ, vėnh kar tỹ isỹ tỹ Topě camarada jě tag ki kanhrãn kãn jé. Topě kuprĩg vỹ tỹ inh jagrě nĩ, hã kỹ sóg vėnh jykre kuryj to tar nĩ. Inh pi(jé) ón kỹ ũ to há nĩ'.

7 Ki hã tó sóg tĩ. Topě hã ne isar han'. Ti hã ne inh mỹ ā jykre kuryj nĩm', kỹ tóg tỹ

isỹ tỹ rará jafã nĩ, Topě jykre há ěn ti. Inh kren han tóg, Topě ti, ti tỹ inh mỹ vėnh jykre kuryj nĩm ti kỹ, kỹ ag tóg ti jykre hã tũgrĩn (ag tóg) ājag jykre kórég vég tĩ gé.

8 Kejěnh ag tóg inh mỹ vỹ há han tĩ, kejěnh ag tóg iso é he tĩ. Kejěnh ag tóg iso ti kórég kar tó tĩ, kejěnh ag tóg iso nén ũ há tó tĩ. Kejěnh ag tóg iso: "ti ón nē," he tĩ, hã ra sóg ón vãnh nĩgtĩ.

9 Ũ tóg kãmĩ inh ki kagtĩg nĩ ve nýtĩ, hã ra vėnh kar tóg inh ki kanhró nýtĩ. Ter kren tỹ hěnh ri ke han sóg tĩgtĩ, hã ra sóg rĩr tĩ nĩ ver. Inh vóg kónãn ag tóg tĩ, hã ra ag tóg isén ja tũ nĩ.

10 Inh fe kaj tóg tĩ, ge ra tóg inh mỹ sér tĩ. Jagtar sóg tĩ, hã ra sóg ũ tỹ hěnh ri ke ag jagãgtãn tĩ, ag mỹ Topě vỹ tón kỹ. Nén ũ tỹ isóg tũ tũ nĩ, hã ra Topě tỹ ěg mỹ nén nĩm mũ ěn kar vỹ tỹ isũ nýtĩ.

11 Ājag hã mỹ sóg ijagtar tag kãmén mũ, tó kãn sóg mũ, ājag mỹ, isỹ ājag to há tãvĩ nĩn kỹ. Ājag hã to sóg fen mág kỹ nĩ.

12 Inh pi(jé) ājag to kórég nĩ'. Ājag hã ne iso há tũ nĩ ve nýtĩ'.

13 Inh krě ri ke ājag nýtĩ. Hã kỹ sóg ājag mỹ tag to vỹ sór mũ, ha mẽ: "isỹ ājag to há kóm iso há nýtĩmnĩ, iso fe mág nýtĩmnĩ," he sóg mũ.

Ũ tỹ Jesus ki ge tũ ag pi(jé) tỹ ěg mré ke nýtĩ'

14 Ũ tỹ Jesus ki rã tũ mré jykren sór tũg nĩ. Tỹ ag ěg mré ke tũ nýtĩ. Hã kỹ ũn jykre pãno ag mré jykren sór tũg nĩ gé, ājag tỹ vėnh jykre kuryj han kỹ nýtĩn kỹ. Kurã pi(jé) tỹ kuty mré ke nĩ'.

15 Cristo pi(jé) Japo mré jykren tĩ'. Kỹ ũ tỹ ti ki rã kỹ jě pi(jé) ũ tỹ ti ki rã tũ mré jykren há nĩnh mũ'.

16 Kỹ Topě jo ĩn pi(jé) tỹ ón kỹ topě jo ke nĩ'. Ha vé, Topě jo ĩn vỹ tỹ ěg nýtĩ, ũn rĩr mũ jo ĩn. Ti hã ne tag tó', ha mẽ: "ag ki sóg ijamã han ke mũ, ag mré sóg tĩg ke mũ, ag Topě vỹ tỹ inh nĩnh mũ, kỹ ag vỹ tỹ inh povo nýtĩnh mũ," he ja ti nĩgtĩ.

17 Hã kỹ ěg Senhor tóg tag tó, ha mẽ: "ag ré kỹ mũmnĩ, vyrmỹ nýtĩmnĩ. Vėnh jykre kavěj han tũg nĩ, kỹ sóg ājag mỹ: ha kãmũ jěg, henh ke mũ.

18 Ājag jóg vỹ tỹ inh nĩnh mũ, kỹ ājag vỹ tỹ inh krě nýtĩnh mũ," he tóg, ěg Senhor ti, ũ tỹ

nén (ũ) kar han ki kanhrãn ky nĩ ên ti,” he ja tóg nĩgtĩ, Topê vĩ rán ki.

7

¹ Inh kanhkã', inh fe vỹ tỹ ãjag nỹtĩ. Hã ky sóg ãjag mỹ tag tó mũ. Êg hã mỹ tóg tó mũ, Topê ti, ti tỹ tỹ êg jóg mág nĩ tag ti, ky êg tóg ti venh ke mũ. ãjag tỹ ti ve hã jé nén (ũ) kavéj ên tovãnh kãn nĩ, ãjag jãnhkri nỹtĩ jé. Nén (ũ) kavéj han tũg nĩ, to jykrén tũg nĩ gé. Komêr hã jykre há távĩ nỹtĩ sórmnĩ. Topê tũ vỹ tỹ êg nỹtĩ, ky ti kamêg nĩ, ti jykre kuryj ên ri ke nỹtĩ sórmnĩ.

Paulo fe tỹ mrin ke

² Iso fe mág han mãn nĩ, ha mẽ. Inh pi(jé) ũ mỹ vènh jykre pãno han sór tĩ', inh pi (jé) ũ krĩn kónãn sór tĩ', inh pi(jé) ũ tỹ nén ũ péju sór tĩ'.

³ Isỹ ãjag mỹ tag tó mũ jãvo sóg ãjag to kórég tũ nĩ. ãjag mré ke vỹ tỹ inh nĩ, ky êg tóg jatun mỹ jagnê mré mũ mũ, jagnê mré kãgter êg tóg ke mũ gé, hên ri ke mũn.

⁴ Inh mỹ ag tóg vènh vỹ há tónh ke mũ, he sóg tĩ ãjag to. Ky sóg vènh kar mỹ ãjag to: há ag nỹtĩ, he tĩ. Tag ki sóg ti jagy pẽ vég mũ, hã ra inh krĩ tóg kãnhvy nĩ, ãjag to, ky tóg sir inh mỹ sér pẽ tĩ.

⁵ Ha vé, isỹ ga tỹ Macedônia tá jun ky sóg nén ũ tỹ inh krĩ kuprãg ke ve ja tũ nĩ. Tá sóg ti jagy ve mãn gé. Iso rárá ag tóg, tá, ky sóg vènhmỹ en mãn gé sir.

⁶ Hã ra Topê tóg inh mỹ Tito jênê, ky ti hã tóg inh krĩ tỹ kãnhvy' hé. Ũn vèsýrénh mũ ên mỹ tóg vỹ há han tĩ, Topê ti, hã ky tóg inh mỹ Tito jênê, ên kã.

⁷ Ti tỹ inh ki jun ky tóg inh mỹ vỹ há han. Ky tóg inh mỹ ãjag tỹ iso vỹ há han ja tag tó mũ gé sir, ãjag tỹ inh ve sór mũ tag tó ti mũ, ãjag tỹ vènh jykre kórég to vènhmỹ en ên kãmén ti mũ, ãjag tỹ inh jagfy vènh vỹ tó sór mũ tó ti mũ gé inh mỹ. Sỹ tag mẽ ky tóg inh mỹ sér gy tĩ sir.

⁸ Inh carta tỹ ãjag ki jun ky tóg ãjag fe kaj han, isỹ rá ti. Hã ra tóg há tĩ. ãjag fe kaj han tóg, kurã pir ki, ky ãjag tóg ãjag jykre kórég ên tovãnh ja nĩ, hã ky tóg inh mỹ sér tĩ. Ũri tóg inh mỹ sér tĩ, isỹ carta rán ky jênê ja ên mũ êkrén ky, hã ky sóg rán tũg sór ja tũ nĩ.

⁹ Inh mỹ tóg sér tĩ. Hê ri ken ky? ãjag fe kaj mỹ inh mỹ sér tĩ? Vó. ãjag tỹ ãjag fe kaj tỹ ãjag mỹ jagy tĩn ky ãjag jykre kórég ên tovãnh ky tóg inh mỹ sér tĩ. ãjag fe kaj tugrĩn ãjag tóg Topê mỹ vènh fêg, ky inh carta tóg ãjag mỹ nén (ũ) kórég kãmén ja tũ nĩ.

¹⁰ Êg tỹ êg fe kaj tugrĩn Topê mỹ vènh fêg ky êg tóg êg jykre kórég tovãnh kãn ke mũ, ky êg krenkren ke mũ. Tag vỹ êg mỹ sér tĩ. Jãvo êg tỹ fe kaj ra êg jykre kórég tovãnh tũ nĩn ky êg ter pẽ han ke mũ sir.

¹¹ Ha vé. ãjag fe kaj tĩn ky ãjag tóg ãjag jykre tugnỹm mũ sir, Topê tỹ ãjag krĩn ky. Vènh jykre kórég ên to ãjag tóg jũ mũ sir, kanê jur han ãjag tóg mũ sir, ky ãjag tóg: “vènh jykre kórég ên han sór tũ êg tóg nĩgtĩ,” he mũ sir. Inh ve sór ãjag tóg mũ nĩ sir, vènh jykre kórég tỹ ãjag tóg tũ' he sór mũ, ũn tỹ vènh jykre kórég han mũ ên mỹ vỹ tar han sór ãjag tóg mũ. Há kar ti nĩ. Hã ki tóg ãjag tỹ ti mré ti jykre kórég ên han ja tũ (tóg) ve há tĩ sir.

¹² Isỹ ãjag mỹ carta ên rán ky sóg ũ tỹ vènh jykre kórég han mũ ên tó ja nĩ, ti tỹ ũn mỹ ti kórég han mũ ên tó ja inh nĩ gé. Hã ra sóg tag to jykrén, sỹ rán ky, ha mẽ: “isỹ Corinto tá ke ag tỹ iso há nỹtĩ venh há tóg tĩ, ag tỹ ãjag tỹ iso há nĩn ki kanhrãn jé, Topê rĩnve,” he ja sóg nĩ, hã ky sóg carta ên rán ja nĩ.

¹³ Hã ky inh krĩ tóg kãnhvy' he mũ sir, isỹ ãjag tỹ iso há nỹtĩn mên ky. Ky inh krĩ tỹ kãnhvy' hen mré tóg inh mỹ sér pẽ tĩ gé sir, Tito tỹ ãjag to vỹ há han ky. Ti krĩ tỹ kuprã' he ja ãjag tóg nĩ, ti tỹ ãjag mré nĩn ky, ky tóg ti mỹ há tĩ gé.

¹⁴ Ti mỹ sóg ãjag kãmén ja nĩ, ãjag tỹ ti mỹ vỹ há han ke tag ti. Ti tĩg ke to hã sóg ti mỹ ãjag kãmén ja nĩ, hã ra ãjag tóg ti mỹ ki hã han ja nĩ. Inh kavénh ja tũ ãjag tóg nĩ. Ha vé, ãjag mỹ sóg ki hã tó há han tĩ. Ky tóg ri ke nĩ ja nĩgtĩ, sỹ Tito mỹ ãjag to vỹ há han ja nĩn ky. Ki hã han ja ãjag tóg nĩgtĩ.

¹⁵ Ky tóg kurã kar ki ãjag mũ êkrég tĩ, ãjag to tóg há távĩ nĩ, Tito ti. ãjag tỹ inh vỹ kri nĩm mũ ên mũ tóg êkrég tĩ, ãjag tỹ inh kamêg mũ ên mũ, ky ãjag nêji ti kamêg ja nĩ gé, isỹ ti jênên ky. Hã tó tóg tĩ.

¹⁶ Ky tóg inh mỹ sér tĩ gé sir, ãjag tỹ inh kavénh ja tũ nĩn ky, ãjag tỹ inh vỹ ki króm ky.

8

Ĕg tỹ jãnkamy nĩm ke

¹ Kĩ sóg ãjag mỹ Topẽ tỹ ga tỹ Macedônia tá ke ag tar han mũ tó sór mũ gé, Macedônia tá igreja krẽm vẽnhmãn kỹ nỹtĩ ag, ù tỹ tá vẽn pãnpin tĩ ag. Ājag jagãgtar hã ra ag tóg Jerusalém tá ke ag jagãgtãn sór mũ, ag mỹ jãnkamy jẽnẽnh kỹ.

² Ha vé, ti jagy pẽ hã ve ja ag tóg nĩgtĩ, Macedônia tá ke ag, ag jykre há vẽn ven jé. Ge ra tóg ag mỹ sér tĩ. Jagãgtar ag nỹtĩ gé, tỹ nén (ũ) mág tũ ag nỹtĩ. Hã ra ag tóg, ag mỹ sér nĩn kỹ (ag tóg) vin mág pẽ han ja nĩgtĩ, ag jagtar mág mũ ra. Ag tỹ Jerusalém ra jãnkamy jẽnẽ sór vẽn.

³ Ha vé, ag jykre ve inh. Ājag tỹ nén (ũ) tỹ vẽn kãpãm ag tóg, ag jẽn mré hã.

⁴ To ag tóg inh mỹ to vĩ mág, isỹ ag mỹ: “ãjag tũ tỹ vẽn kãpãm tũg nĩ,” he tũ nĩn jé. Ag tỹ Topẽ tũ ag mỹ nén ù há han sór vẽn. Tag hã ne ag mỹ sér tĩ', Topẽ tỹ tag to ag tar han kỹ, hã kỹ ag tóg inh mỹ: “Ĕg tỹ ag mỹ jãnkamy jẽnẽ sór vẽn,” he mũ.

⁵ Kỹ ag tóg vẽn jykre há han, isỹ ag ki vẽn jykre há ve sór mũ ěn kãfór. Ĕg Senhor mỹ ag tóg vẽn vin, kar kỹ ag tóg inh mỹ vẽn vin gé, Topẽ tỹ ag mỹ: “ha ti mỹ vẽn vin,” hen kỹ.

⁶ Kĩ sóg Tito mỹ ké, ti tỹ ãjag ki jãnkamy ù ve jé, ãjag tỹ Jerusalém tá ke ag mỹ jãnkamy jẽnẽnh ke ti. Ājag ki tóg hur jãnkamy sĩ vé, kỹ tóg ti tỹ ùri ve kãn há tĩ, ti tỹ ãjag mỹ sér tĩ jé gé, Topẽ tỹ tag to ãjag tar han kỹ.

⁷ Ha vé, Jesus ki ge kỹ ãjag nỹtĩ. Vĩ há ãjag nỹtĩ. Ki kanhrãn mág ãjag nỹtĩ. ù jagãgtãn sór ãjag nỹtĩ. Jagnẽ to há ãjag nỹtĩ. Tag kar ki ãjag tóg ùn rico ri ke nỹtĩ. Kỹ nén ù há tag han sórmnĩ gé, Tito tỹ ãjag ki nén venh ke mũ tag ti.

⁸ Inh pi(jé) ãjag mỹ: “ker ag jagãgtãn tũg hẽ,” he sór mũ. Sỹ ãjag tỹ vẽn kar to há nỹtĩ ve sór vẽn, ãjag tỹ ù ag jagãgtãn mũn ki.

⁹ Ha vé, ěg Senhor tỹ Jesus Cristo vỹ ěg jagãgtãn ja nĩ gé. Tag ki kanhró ãjag tóg nỹtĩ. Kanhkã tá ti rico nĩ ja nĩgtĩ, hã ra tóg ã tỹ nén (ũ) ěn tovãnh kãn. Ā tỹ ěg jagfy jagtar tĩ jé tóg kãtĩg. Kỹ ěg tóg ti jagtar tugrĩn rico nỹtĩ sir.

¹⁰ Kỹ sóg tag to jykren, ha mẽ. Ano ti nĩ ha, ãjag tỹ ag mỹ jẽnẽnh ke tỹ vurmỹ vin han vén kri. Ājag hã ne to jykren vén ja nĩgtĩ gé', Jerusalém tá ke ag mỹ jãnkamy jẽnẽnh ke to.

¹¹ Kỹ ãjag tỹ nén han vén ja ěn han kãn nĩ, ùri. To jykren ja ãjag tóg nĩgtĩ, kỹ han kãn sórmnĩ gé. Ājag tỹ vurmỹ nén vin ja ěn kri vin mãn nĩ, ag mỹ jẽnẽnh jé.

¹² Ājag tỹ nén nĩm kỹ ti tỹ ãjag mỹ sér nĩn kỹ tóg Topẽ mỹ há tĩ. ù tỹ nén ù mág vỹ nĩm mág han ke mũ, ù tỹ nén ù sĩ vỹ sĩn kỹ nĩm ke mũ. Topẽ pi(jé) ù tỹ nén ù sĩ tỹ nĩm mág ve sór mũ'.

¹³ Ti tỹ ãjag tỹ ù jagãgtãn tugrĩn ãjag mỹ tũ tĩn kỹ tóg Topẽ mỹ ù tĩ sir. Vẽn kar tỹ nén ù sĩ ve kỹ tóg há tĩ.

¹⁴ ùri ãjag tũ tóg e nĩ, hã kỹ tóg ãjag tỹ ùn jagãgtar ag mỹ vẽn kãpãm há tĩ. Kejẽn tóg ãjag mỹ tũ' henh ke mũ gé, kỹ ag tóg sir ãjag mỹ nén (ũ) vin ke mũ gé, vẽn kato. Kỹ vẽn kar vỹ jagnẽ ri ke nỹtĩ sir. Tag hã vỹ há nĩ'.

¹⁵ Hã kỹ tag tóg rán kỹ nĩ, ha mẽ: “ù tóg vẽn gẽn mág han ja nĩgtĩ, ù tóg gẽn pir han ja nĩgtĩ gé. Kỹ ù tỹ gẽn mág han mũ mỹ tóg kãfór ja tũ nĩgtĩ, hã ra ù tỹ gẽn pir han mũ ěn mỹ tóg tũ' he ja tũ nĩgtĩ gé,” he tóg mũ, Topẽ vĩ rá ki. Jagnẽ ri ke ag tóg nỹtĩ ja nĩgtĩ. Hã kỹ tóg ěg tỹ ù tỹ nén (ũ) pir nĩ ěn jagãgtãn há tĩ.

Tito to vẽnme

¹⁶ Topẽ hã ne Tito fe han', ti tỹ ãjag to há tãvĩ nĩ jé. Kỹ sóg Topẽ mỹ vĩ há han tĩ sir, ti tỹ ti fe han kỹ.

¹⁷ Kỹ tóg kãnhmar inh mỹ: “hej,” hé, sỹ ti mỹ: “ha Corinto ra tũg,” hen kỹ. Kãnhmar tóg tũg sór ja nĩ, Tito ti.

¹⁸ Kỹ sóg ti mré ěg régre ù jẽnẽ sór mũ gé. Ĕg régre tag vỹ Jesus kãmén tĩ, kỹ igreja krẽm vẽnhmãn kỹ nỹtĩ ag kar vỹ ti to vĩ há han tĩ, ù tỹ ěmã kar ki Topẽ vĩ to vẽn pãnpin tĩ ag.

¹⁹ Kỹ igreja krẽm ke kar vỹ ti hã kuprẽg, ti hã tỹ inh mré ěg tỹ ùn jagãgtar ag mỹ nén jẽnẽnh ke tag ki rĩr jé. Ĕg Senhor tỹ ùn mág nĩ tag vẽn ven hã jé ěg tóg tag ki rĩr sór mũ, ěg tỹ ag jagãgtãn ke tag ti ki. Kỹ tóg inh mỹ há tĩ gé, sỹ inh pir mỹ ki rĩr tũ nĩn kỹ.

²⁰ Kỹ ù tóg iso jykren kónãn ke tũ nĩ gé, isỹ inh pir mỹ ki rĩr tũ nĩn kỹ. Jãnkamy e vẽn, ěg

tỹ ma mũnh ke ti, kỹ tóg inh mỹ ù tỹ tag to iso jykrén kónãnh ha mẽ tĩ. Kỹ tóg inh mỹ há tĩ, ù ag tỹ inh mré ki rĩr mũn kỹ.

²¹ Isỹ vènh jykre kuryj han sór vễ, hã to sóg jykrén tĩ. Êg Senhor ne inh jykre ki kanhró nĩ', kỹ tóg há tĩ gé, êprã ke ag tỹ inh jykre há vég mũn kỹ.

²² Inh mré tĩg ke mũ tag vỹ Tito mré ãjag ki jun ke mũ, kar kỹ êg régre ù ke gé. Êg régre tag hã ne êg Senhor tũ ki rĩr há han tĩgtĩ', tag ve tỹ hèn ri ke han inh huri. Ti tũ ki rĩr nĩ vỹ ti mỹ sér tĩ. Kỹ tóg ãjag vễme mẽ, hã kỹ tóg ãjag ve sór mũ. ãjag to tóg há tãvĩ nĩ, ti tỹ ãjag vễme mẽn kỹ.

²³ Kỹ Tito ne ãjag venh kãtĩg ke mũ'. Inh mré rãnhraj jafã vễ, Tio ti, kỹ tóg inh mré ãjag to vãsãnh tĩ. Ti mré kãmũ tag ag vỹ tỹ ùn há nỹtĩ gé. ù tỹ igreja krêm vènhmãn kỹ nỹtĩ ag vỹ ag jègnê ja nĩ, ãjag to. Ag tỹ Cristo jykre há ên han kỹ nỹtĩ vỹ ve há tĩ.

²⁴ Ag tỹ ãjag ki junjun kỹ ag ki rĩr há han nĩ, vènh kar tỹ ve jé, ãjag tỹ ag to há nỹtĩ ti, igreja krêm vènh pãnpin tĩ ag kar tỹ ãjag jykre há ve jé. Vènh kar mỹ sóg ãjag to: “vĩ há tãvĩ han ag tóg tĩ,” he tĩ. Kỹ Tito ag mỹ vĩ há han nĩ, ke tũ nĩ (mũ) ra sóg ón ja nĩnh mũ.

9

Ag tỹ jãnkamy jènênh ke

¹ Kỹ ãjag tóg, êg tỹ Jerusalém tá Topê ki ge kỹ nỹtĩ ag mỹ jègnênh ke tag ki kanhró (ãjag tóg) nỹtĩ, hã kỹ sóg tóg sór tũ nĩ.

² Ag jagãgtãn sór ãjag tóg mũ, ki kanhró sóg nĩ. Hã kỹ sóg Macedônia tá ke ag mỹ tóg tĩ. Ag mỹ sóg: “Grécia tá ke ag ne Jerusalém tá ke ag mỹ nén ù jènê sór tĩ',” he tĩ. “Kri prỹg tóg nỹ ha, ag tỹ nén ù jènê sór mũn kri,” he sóg tĩ, ãjag to. Kỹ ag tóg ke sór mũ gé sir, ãjag kóm.

³ Hã kỹ sóg ãjag mỹ êg régre ag jègnêg mũ, ãjag tỹ ki kanhrãn jé, sỹ ãjag kãmén mũ ti. Kỹ ãjag tỹ nén (ũ) nĩm sór mũ ên vin kãn nĩ, ùri, kỹ sóg fagrĩnh mỹ vĩ ja tũ nĩnh mũ.

⁴ Hèn ri ke mũn Macedônia tá ke ù ag tóg inh mré kãmũ sór mũ. Kỹ tóg ãjag tỹ nén vin ja tũ nĩ kỹ inh mỹ'a tĩnh mũ, isỹ ón kỹ vĩ ja nĩnh kỹ. Kỹ tóg ãjag mỹ'a tĩnh mũ gé sir.

⁵ Hã kỹ sóg to jykrén, sỹ ãjag mỹ êg régre tag ag jègnê jé, inh kãtĩg ke to hã, ãjag tỹ nén

vin han kãn jé, ãjag tỹ nén (ũ) tỹ êg mré ke ag jagãgtãn ke ti. Vãsỹ ãjag tóg tóg ja nĩ, ãjag tỹ nén vin sór mũ ên ti, kỹ ha vin han, kỹ tóg e nĩnh mũ, jãnkamy ti, kỹ tóg ve há tĩ, ti tỹ ãjag mỹ sér nĩ ti. Kỹ ù tóg ãjag to: “ti mỹ ag mỹ há tũ ja, hã kỹ ag tóg nĩm sĩ han ja nĩ?” henh ke tũ nĩ.

⁶ Kỹ sóg tag tóg sór mũ, ha mẽ: “ũ tỹ ti fy pir krãn kỹ tóg pin kỹ génh ke mũ gé sir. ù tỹ krãn mág mũ ên hã tóg génh mág han ke mũ gé sir,” he sóg tĩ.

⁷ Kỹ ãjag tỹ nén to jykrén mũ ên hã vin nĩ, ãjag tỹ Jerusalém ra jènê jé. Ti tỹ ãjag mỹ sér tũ nĩnh kỹ tóg há tũ nĩ. Inh pi(jé) ãjag mỹ vĩ tar han mũ'. Mỹ sér nỹtĩmĩ, ãjag tỹ êg mré ke ag jagãgtãn to, kỹ tóg Topê mỹ há tĩ sir. ù tỹ ge to tóg há tãvĩ nĩ.

⁸ Kỹ Topê tóg to tar nĩ gé, ãjag mỹ nén vin mág han ke to, ãjag tũ tỹ ãjag ki e nĩ jé, kurã kar ki, nén ù tỹ ãjag mỹ tũ' he tũ nĩ jé. Kỹ tóg, ãjag tũ tỹ ãjag ki mág nĩnh kỹ (tóg) ãjag tỹ ù jagãgtãn', ù jagãgtãn' henh há tĩ sir.

⁹ Tag vỹ rán kỹ nĩ, ha mẽ: “ùn jagãgtar ag mỹ tóg vin mág tĩ, ti tỹ êg mỹ vènh vĩ há tóg tũ' henh ke tũ nĩ,” he tóg, Topê vĩ rá ki.

¹⁰ Ha vé, Topê ne êg mỹ nén (ũ) kar fy vin mũ', êg tỹ krãn jé, kỹ tóg êg mỹ pão han jafã nĩm mũ gé, êg tỹ tỹ pão han kỹ kon jé. Kỹ tóg ãjag mỹ ãjag tỹ ù jagãgtãn ke mũ ên ven mũ gé, kỹ tóg nén ù fy ri ke nĩ. Kanê há ri ke han jé tóg ke mũ gé, ãjag tỹ vènh jykre kuryj tag han kỹ, hã vỹ: jagnê jagãgtãn, he mũ.

¹¹ Tag ki ãjag tóg rico nỹtĩnh ke mũ, ãjag tỹ vènh kar jagãgtãn kỹ. Kỹ ag tóg e nỹtĩnh mũ gé sir, ù tỹ êg tũgrĩn Topê to vĩ há han mũ ag, ag tỹ êg tỹ ag jagãgtãn tũgrĩn Topê to vĩ há han kỹ.

¹² Kỹ tóg ge nĩ. Êg tỹ Topê ki ge kỹ nỹtĩ ag jagãgtãn kỹ êg tóg ag jagãgtar tỹ tũ' he mũ. Tag tóg há tĩ. Hã ra ag tóg êg tỹ ag jagãgtãn tũgrĩn (ag tóg) Topê mỹ vĩ há han ke mũ gé sir.

¹³ Hã ki ag tóg ãjag tỹ Topê vĩ kri fig mũ vég mũ, ãjag tỹ ag jagãgtãn ki. Kỹ ag tóg tag to Topê to vĩ há han ke mũ gé sir, ha vemnĩ. Cristo to vễme to ãjag nêji há nỹtĩ. Hã ve jé ag tóg ke mũ, ãjag tỹ ag jagãgtãn mág kỹ, ãjag tỹ vènh kar jagãgtãn kỹ ke gé.

¹⁴ Kÿ ag tóg ãjag to Topê mré vēmén ke mû gé sir, ãjag to há tâvĩ nÿtĩn kÿ. Topê tÿ ãjag jagãgtãn há pẽ han mû ên ve jé ag tóg ke mû, hã kÿ ag tóg ãjag ve sór ke mû gé sir.

¹⁵ Topê ne êg mÿ nén ù há tâvĩ vin tĩ mÿr'. Pi(jé) kaja nĩ', ti tÿ êg mÿ nén vin mû ti. Êg jé ti mÿ to vĩ há han, ti mÿ agradecer hen kÿ.

10

Paulo tÿ nén to vĩ

¹ Ha vé, ãjag jyvẽn sór inh mû, inh, hã vÿ: Paulo, he mû. Sÿ ãjag mré nĩn kÿ sóg nẽji komêr hã vĩ tĩ, kÿ, isÿ kór há tá nĩn kÿ isóg nẽji vĩ jũ han tĩ ãjag mÿ. Cristo ne komêr hã vĩ tĩ'. Ûn há vé, Cristo ti. Ti jykre hã han sór inh nĩgtĩ.

² Hã kÿ sóg ãjag mÿ tag to vĩ sór mû, ha mẽ. Isÿ ãjag mÿ nén rán mû tag jēmēmñĩ. Kÿ sóg ãjag ki jun kÿ vĩ jũ han ke tũ nĩ. Vĩ jũ han jé sóg ke mû, ha vemñĩ, ù tÿ inh kato vĩ mû ag mÿ, ù tÿ iso: “ã tÿ vėsóg ki nén to jykrén mû ên hã han tóg tĩ,” he mû ag mÿ.

³ Êprã ke vÿ tÿ inh nĩ, hã ra inh pi(jé) êprã ke jykre han kÿ vênh jykre kórég han to vãsãn tĩ'.

⁴ Vãsãn mág sóg tĩ, hã ra inh pi(jé) êprã ke ag jykre han kÿ vãsãn mû'. Topê jykre tar ên hã han kÿ sóg hã to vãsãn tĩ, kÿ tóg soldado tÿ rará jafã ri ke nĩ, Topê jykre tar ti. Tÿ sóg êg kato tẽ mû ag vênh pigju jafã mág ên kókég tĩ, hã vÿ: isÿ ù tÿ êg vĩ kato vãsãnsãn mû ag vĩ tÿ tũ' he mû, he mû.

⁵ Û tÿ Topê kato vĩ sór mû ag vĩ tÿ sóg tũ' he tĩ gé. Vēsÿ ùn mág han sór ag tóg nÿtĩ, Topê kato vãsãn kÿ, êg tÿ Topê jykre ki kanhrãn mû kato vãsãn kÿ. Tÿ tũ' he jé sóg ke mû, Topê jykre tar hã tÿ. Êprã ke ag tÿ Topê vĩ kato tẽ mû ag tÿ Cristo krêm ge han kãn sór sóg mû, kÿ ag sigse kÿ nÿtĩ ri ke vë sir.

⁶ Kÿ, sÿ ãjag tÿ Topê vĩ kri nĩm mû ve kÿ sóg ù tÿ kri fi sór tũ ag mÿ vĩ jũ han ke mû sir, ha vemñĩ.

⁷ To jykrén há han nĩ, ha mẽ. “Tÿ sóg Cristo mré ke nĩ,” he ãjag tóg tĩ, ãjag kãmĩ ù. Kÿ to jykrén há han nĩ. Tÿ sóg Cristo mré ke nĩ gé, inh, ãjag kóm mÿr, ha mẽ.

⁸ Êg Senhor ne inh fêg', sÿ ãjag jyvẽn jé. Ti pi(jé) inh mÿ: “ha ag kókén,” hé'. Kÿ sóg ãjag mÿ tó, êg Senhor tÿ inh fêg ja ti. Isÿ vëso vĩ

há han hã vë. Ge ra tóg inh mÿ'a tũ nĩ, isÿ vëso vĩ há han mû ti.

⁹ Sÿ ãjag jyvẽn sór vë. Inh pi(jé) ãjag kanẽ jun sór mû'. ãjag jyvẽn hã jé sóg ãjag mÿ rán.

¹⁰ Inh carta ki inh nẽji ãjag mÿ vĩ tar han tĩ, vĩ jũ, kÿ sÿ ãjag mré nĩn kÿ sóg nẽji krój nĩ ve nĩ, kÿ inh vĩ nẽji tóg tÿ nén ù tũ nĩ ve nĩ.

¹¹ Tag to jykrén, ha mẽ: isÿ rán mû ri ke han jé sóg ke mû, isÿ ãjag mré nĩnh ken kÿ, ha mẽ. ãjag vég tũ sóg nĩ, isÿ carta tag rán kÿ. Isÿ ãjag mré nĩnh ken kÿ sóg inh vĩ tag ri ke han ke mû, ha vemñĩ.

¹² ãjag kãmĩ ù tóg vëso vĩ há han sór tĩ. Inh pi(jé) ag ri ke nĩ', inh pi(jé) tÿ ag mré ke nĩ gé'. Vėsóg ki to jykrén kÿ ag tóg nén ù to: “tag vÿ há nĩ, tag vÿ há tũ nĩ,” he tĩ. Tag to jykrén kÿ ag jykre tóg ag mÿ há nĩ ve nĩ. Topê jykre ve vén sór tũ ag tóg nĩ. Ag tÿ vėsóg ki nén to jykrén hã tóg ag mÿ há tĩ. Krĩ tũ ag nÿtĩ.

¹³ Ag jãvo sóg Topê jykre vég tĩ, hã kÿ sóg ãjag mÿ: “inh jykre vÿ há nĩ,” he tĩ. Topê ne inh mÿ inh rãnrãj ti nĩm, kÿ tóg inh mÿ: “ha Corinto tá ke ag ki rĩr,” he ja nĩgtĩ gé.

¹⁴ Inh pi(jé) Topê tÿ inh mÿ vênh rãnrãj nĩm ên pãtén tĩ', kÿ sóg pãtén ja tũ nĩ gé, sÿ ãjag mÿ rán kÿ. Inh hã ne ãjag mÿ Cristo kãmén vén ja nĩgtĩ'.

¹⁵ Hã kÿ sóg isÿ tÿ ãjag jyvẽn tĩ. Û tũ pijé'. Inh pi(jé) ù rãnrãj to: “isÿ han ja vë,” he mû'. Isÿ hã ki sóg tÿ ùn mág nĩ. Kÿ sóg tag to jykrén mû gé, ha mẽ: ãjag tÿ Topê ki ge kÿ nÿtĩ to tar nÿtĩn kÿ sóg tÿ ùn mág tâvĩ nĩnh ke mû gé, ãjag mré. Isÿ hã vë, inh rãnrãj hã vë.

¹⁶ Kÿ sóg ãjag jamã mã ra tĩg sór mû gé, sÿ Cristo kãmén jé, ù tÿ ag mÿ tó ja tũ ên ra. Sÿ tãtã ag mÿ kãmén kÿ sóg inhhã ki rãnrãj mû sir, ù tÿ ag mÿ tá Topê vĩ kãmén ja tũ nĩn kÿ. Kÿ sóg inh rãnrãj hã tugñĩn tÿ ùn mág jênh mû, ù rãnrãj tugrĩn ke tũ vë.

¹⁷ Hã ra tóg há tũ tĩ, êg vême tag ti. ãjag tÿ ùn mág nĩ tó sór kÿ êg Senhor ti tómnĩ.

¹⁸ Êg tÿ vëso: “ùn há vÿ tÿ inh nĩ,” he mû ra êg pi(jé) tÿ ùn há nÿtĩ'. Êg Senhor tÿ êg to: “ùn há vÿ tÿ ã nĩ,” hen hã kÿ êg tóg tÿ ùn há nÿtĩ.

Ón kÿ apóstolo ag

¹ Iso fe nÿtĩmnĩ. Krĩ tũ nĩ ve inh nĩ, isÿ vėsó kÿ. Hã ra ãjag tóg iso fe nÿtĩ, kÿ tóg há tĩ.

² ãjag to sóg há pẽ nĩ, Topẽ tÿ ãjag to há nĩ ri ke, hã kÿ sóg ãjag jyvẽn tĩ. Kÿ ãjag tóg ùn mén ke mũ fi ri ke nÿtĩ, kÿ Cristo vÿ ãjag mén ke ri ke nĩ sir. Vẽn prũg tag to sóg ãjag kãn sór mũ mÿr, ãjag jãnhkri nÿtĩ jé, tátãg tÿ mén ja tũ jãnhkri ri ke.

³ Hã ra sóg ãjag to: “ag mÿ ti tovãnh sór tũ nĩ vÿ?” he mũ. Pÿn vÿ Eva fi mÿ ón, Japo ti, ti jykre (ka)mẽ nĩn kÿ, kÿ fi tóg ti vĩ kri nĩm. Kÿ tóg ãjag mÿ ón sór mũ gé, Japo ti, ãjag tÿ Cristo tovãnh jé, ãjag tÿ ti jykre pir tovãnh jé, ãjag tÿ ti to tar ẽn to krónh ke jé.

⁴ Hã kÿ ãjag tóg ù ag vĩ jẽmẽ sór mũ, ag tÿ ãjag mÿ ón kÿ Jesus tó kÿ, ag tÿ isÿ ãjag mÿ nén tó mũ ẽn hã tũ tó mũ ra ãjag tóg jẽmẽ sór tĩ. Ón kÿ jagrẽ vÿ ãjag mÿ há nĩ ve nĩ, Topẽ tÿ ãjag mÿ nĩm ja tũ ẽn. Ón kÿ topẽ vĩ vÿ ãjag mÿ mẽ sér tĩ ve nĩ, ãjag tÿ vãsÿ mẽ ja tũ ẽn. Vẽnhmÿ han sór ãjag tóg mũ.

⁵ Ón kÿ apóstolo ag ne ãjag mÿ vẽn vĩ tag tó sór mũ'. Inh pi(jé) tÿ ag krẽm ke nĩ', ha mẽ.

⁶ Vĩ sĩnvĩ han tũ inh nẽji nĩ, ag vĩ sĩnvĩ ri ke han tũ inh nẽji nĩ. Hã ra sóg nén tÿ hẽn ri ke ki kanhró nĩgtĩ, tag ve ãjag tóg mÿr, ãjag tÿ inh vĩ mẽ tÿ hẽn ri ke han mũ ẽn ki.

⁷ ãjag mÿ sóg Topẽ vĩ tó ja nĩgtĩ, kÿ sóg tag to ãjag ki ti kaja ve sór ja tũ nĩ. Vėsÿ ùn sĩ han ja inh nĩ, sÿ ãjag mré nĩn kÿ, ãjag tÿ tÿ ùn mág nÿtĩ jé, isugrĩn. Tag tugrĩn inh mÿ Topẽ vĩ mranh'? Vó, vẽn jykre há vé.

⁸ Êmã ù tá Jesus ki ge kÿ nÿtĩ fag ne inh mÿ fag jãnkamy vẽn kãpãm, kÿ fag tóg inh mÿ ti jẽnẽ ja nĩ, sÿ ãjag mré nĩn kÿ. Fag tũ hã ko ja inh nĩgtĩ.

⁹ Kÿ, isÿ jãnkamy ve sór mũ ra sóg ãjag mÿ tó ja tũ nĩ gé. “Tĩ hÿn ag mÿ jagy tĩnh mũ,” he sóg tĩ, hã kÿ sóg ãjag mÿ to ja tũ nĩ. Ga tÿ Macedônia tá ẽg régre ag ne inh ki junjun ja nĩgtĩ', sÿ ãjag mré nĩn kÿ, kÿ ag tóg inh mÿ jãnkamy ù ma kãmũ ja nĩ gé, sÿ to nén tÿ inh mÿ tũ nĩ ẽn mãn jé. Gen kÿ sóg isũ vég tĩ hã ra, ti tÿ ãjag mÿ jagy tũ nĩn jé. Inh jykren hã vé. Tovãnh sór tũ inh nĩgtĩ.

¹⁰ Ki hã tó sóg tĩ, Cristo tÿ ki hã tó tĩ ẽn ri ke han sóg tĩ. Kÿ sóg ãjag to: “ga tÿ Grécia

tá ke ag vÿ jãnkamy to inh jykre ki kanhrãn kãn ke mũ, ag tÿ iso vĩvĩ he tũ nĩn jé,” he mũ. ãjag jãnkamy ve sór tũ pẽ inh nĩgtĩ.

¹¹ Hẽ ri ken kÿ? Inh mÿ ãjag to há tũ nĩgtĩ? Vó, ãjag to sóg há tãvĩ nĩ, kÿ Topẽ ne ki kanhró nĩ'.

¹² Hã ra sóg ãjag tũ ve sór tũ nĩ, sÿ ag vĩ tÿ tũ' hen jé, ón kÿ apóstolo ẽn ag vĩ ti. Inh mÿ tóg ag tÿ ãjag mÿ: “Paulo ri ke inh nĩ. Inh mÿ ãjag tũ vẽn kãpãm,” henh ha mẽ tĩ. Hã kÿ sóg ãjag tũ ve sór tũ nĩ.

¹³ Ón kÿ apóstolo vÿ tÿ ag nÿtĩ, mÿr, ha mẽ, ón kÿ ag tóg: “Topẽ rãnrãj han ẽg tóg mũ,” he tĩ. Ón kÿ ag tóg: “Cristo vÿ ẽg tÿ apóstolo han,” he tĩ.

¹⁴ Satanás jykre hã vé. Vėsÿ tóg Topẽ tÿ jẽnẽ jafã ri ke han tĩ, ón kÿ, Satanás ti.

¹⁵ Kÿ Satanás mÿ rãnrãj tĩ ag tóg ón kÿ (ag tóg) jykre kuryj nÿtĩ ve nĩ gé. Hã ra Topẽ tóg ag vóg kónãn ke mũ, ag rãnrãj kórég to.

Paulo jagtar

¹⁶ Ha mẽ, tó mãn jé sóg ke mũ, sÿ tó ja ti. Inh pi(jé) krĩ tũ nĩ'. Isÿ ãjag mÿ krĩ tũ nĩ ve (hã) ra, ge ra iso hã nÿtĩmnĩ, sÿ vėsó vẽn vĩ há tón kÿ.

¹⁷ Sÿ ãjag mÿ sÿ nén ve ja ẽn tó sór vẽ, kÿ tóg inh krĩ tũ nĩ ve nĩ. Sÿ vėsó vĩ há han kÿ sóg krĩ tũ nĩ ve nĩ. Ẽg tÿ ẽg Senhor jykre tó kÿ ẽg tóg tag tó tũ nĩgtĩ, sÿ tónh ke tag.

¹⁸ Hã ra sóg tó sór mũ. Vẽn kar tóg ãjag mÿ ag tÿ nén ve ja tó tĩ, kÿ sóg ãjag mÿ sÿ nén ve ja ẽn tó sór mũ gé, ha mẽ.

¹⁹ Krĩ há ãjag nÿtĩ, ge ra ùn krĩ tũ ag tóg ãjag mÿ há nÿtĩ ve nĩ.

²⁰ Û tÿ ãjag mÿ: “tag han ra, tag han tũg ra,” hen kÿ tóg ãjag mÿ sér tĩ ve nĩgtĩ. Û tÿ ãjag tũ mãn sór kÿ tóg ãjag mÿ há tĩ ve nĩgtĩ, ù tÿ ãjag mÿ un'ón mũ ag tóg ãjag mÿ há nÿtĩ ve nĩgtĩ, ù tÿ vėsó: “tÿ inh ùn mág nĩ,” he mũ ag vÿ ãjag mÿ há nÿtĩ ve nĩgtĩ gé, ù tÿ ãjag kakã ki tãnh tĩ ẽn ag ke gé. Û tÿ ge vÿ ãjag mÿ há kar nÿtĩ ve nĩgtĩ.

²¹ Inh mÿ'a tóg tĩ, sÿ tag tó kÿ. Vẽn jykre tag to sóg krój nĩ, tag han sór vãninh inh nĩgtĩ, ag tÿ han ri ke tag.

Hã ra ag tóg ãjag mÿ ag tÿ nén ve ja ẽn ti tó sór mũ, ón kÿ apóstolo ẽn ag, ag tÿ nén ù há kar han mũ tó ag tóg tĩ. Kÿ sóg ag ri ke tónh ke mũ gé sir, ùn krĩ tũ ag ri kén.

²² Hebreu vỹ tỹ ag nỹtĩ. Tỹ sóg Hebreu nĩ gé. Israel krẽ'krẽ vỹ tỹ ag nỹtĩ. Tỹ sóg Israel krẽ'krẽ nĩ gé. Abraão krẽ'krẽ vỹ tỹ ag nỹtĩ. Tỹ sóg Abraão krẽ'krẽ nĩ gé.

²³ Cristo camarada vỹ tỹ ag nỹtĩ. Tag to sóg ag kãfór nĩ hã ra. Ha vé, krĩ tũ pẽ nĩ ve sóg nĩ, sỹ tỹ ag kãfór nĩ tag tón kỹ.

Ha mẽ, isỹ tỹ Cristo camarada nĩ ti: inh rãnrãj e tag hã to sóg ag kãfór nĩ, ise kỹ nĩn e ja hã to sóg ag kãfór nĩ gé. Inh mrãnmrãn kãfór han ag tóg tĩ gé, ter kren tỹ hẽn ri ke ve inh, ag kãfór ke gé.

²⁴ Judeu ag ne inh mrãnmrãn tỹ 5 (ke) han', ag tỹ ù mrãnmrãn tỹ 39 (ke) han tĩ ên tỹ 5 (ke) han ag tóg isỹ, kurã tỹ hẽn ri ke han tóg, ti tỹ 5 (ke) ên tá krỹg jé.

²⁵ Kar kỹ ag tóg ka tỹ inh mrãnmrãn tỹ 3 (ke) han ja nĩgtĩ gé. Kurã tỹ hẽn ri ke han tóg ke gé, ti tỹ 3 (ke) ên tá krỹg jé. Pó tỹ ag inh pin ja nĩgtĩ gé, isén jé, kurã pir ki. Kar kỹ sóg goj ki ter kren tãgtũ han ke gé, ên kã sóg kejẽn kuty pir ki kurã mré goj nig kãki nãgnãr, goj kafã tũ kãki.

²⁶ Kuvar há ra tĩg tỹ hẽn ri ke han inh, kỹ goj var tóg inh jagtar han. Êg tũ péju(g) tĩ ag vỹ inh jagtar han tĩ. Inh mré ke ag vỹ inh vóg kónãn sór nĩgtĩ, fóg ag ke gé, cidade ki ke ag ke gé, êmã tũ tá ke ag ke gé. Goj kafã tũ kri inh jagtar han. Ón kỹ êg kanhkã ag vỹ inh jagtar han tĩ gé.

²⁷ Rãnrãj mág to inh jagtar tĩ gé, to sóg ron tĩ, kỹ sóg nũr tũ tỹ hẽn ri ke hyn han tĩ gé. Kejẽn sóg kókĩr tĩ, kejẽn sóg goj vég tũ nĩgtĩ, vãkre tỹ hẽn ri ke han sóg tĩ, kusa mẽg sóg tĩ, inh kur tóg iso tũg tĩ gé.

²⁸ Kỹ, isỹ kurã kar ki ti jagy tag vég mũ mré hã sóg igreja krẽm vẽnhmãn tĩ ag to krĩ kufy han tĩ gé.

²⁹ Û tỹ Cristo vĩ to krónh ken kỹ tóg inh mỹ jagy tĩ gé. Û tỹ Topẽ vĩ mranh kỹ sóg kanẽ jur tĩgtĩ gé.

³⁰ Kỹ, isỹ vėsó kỹ sóg isỹ nén ù jagy vég mũ ên tóg sór tĩ, inh krój nĩ ên ti.

³¹ Topẽ ne ki kanhró nĩ', êg Senhor tỹ Jesus jóg ti. Êg tỹ ti mỹ vĩ há han tóg tũ' henh ke tũ pẽ nĩ. Tĩ hã ne ki kanhró nĩ'. Inh pi(jé) ón mũ'.

³² Cidade tỹ Damasco tá sóg nĩ ja nĩgtĩ, kỹ pã'i mág tỹ rei tỹ Aretas ên krẽm pã'i ù vỹ

governo ki rĩr nĩ ja nĩgtĩ. Ên tóg ijo vãji ja nĩgtĩ. Ti polícia ag tóg ijo vãji ja nĩgtĩ, ag tỹ ise jé.

³³ Hã ra inh mré ke ag tóg kěj mág kãkã inh péju kỹ jãnkã ror tỹ isérem, cidade to ró tỹ, hã kỹ sóg kren. Isỹ ti jagy ve jan hã vỹ.

12

Paulo tỹ nén nẽ ve

¹ Kỹ ãjag tỹ isỹ tỹ ùn mág nĩ tag mẽ sór kỹ, kỹ sóg ãjag mỹ êg Senhor tỹ inh mỹ nén ven mũ ên tóg sór mũ gé ver, ti tỹ inh mỹ nén kãmén mũ ti. Sỹ ãjag mỹ tónh ke tũ vỹ vỹ, hã ra ãjag tóg mẽ sór mũ.

² Ha vé, ù ki kanhró sóg nĩ, Jesus ki rã ù. 14 (ke) anos ti nĩ ha, ti tỹ kanhkã ra tĩg kri, kanhkã tãgtũ he mũ ên ra. Hẽn ri ke mũn tóg ã rĩr há ra vyr, hẽn ri ke mũn ti kuprĩg tóg ra vyr, inh pi(jé) ki kanhró nĩ'. Topẽ hã ne ki kanhró nĩ'.

³ Hã ra tóg ra vyr, hẽn ri ke mũn ã rĩr há ra, ti kuprĩg hẽn ri ke mũn, inh pi(jé) ki kanhró nĩ', Topẽ hã ne ki kanhró nĩ'.

⁴ Kỹ tóg êg tỹ hẽ tá Topẽ mré nỹtĩnh ke mũ ên ra vyr, Paraíso he mũ ên ra. Tá tóg vẽn h vỹ jẽmẽ, êprã ke tỹ nén tónh ke tũ ên mẽ tóg tá, kanhkã tá vẽn jykre sĩnvĩ pẽ ên, êg tỹ tag ki nén ki kagtĩg ên.

⁵ Ên hã to sóg: “ùn mág vỹ tỹ inh nĩ,” he sór mũ. Isỹ vėsóg ki kanhkã ra tĩg pijé'. Isỹ êg tỹ êprã vég tĩ ên tóg sóg inh krój nĩ há tóg sór mũ.

⁶ Isỹ ùn mág nĩ tag tóg kỹ sóg ki hã tóg tĩ, vẽn ó pijé'. Hã ra sóg tóg tũ nĩ, ãjag tỹ iso: “vẽn kar kãfór vỹ tỹ ti nĩ,” he tũ nĩ jé. Inh jykre vég ãjag tóg mũgtĩ, inh vỹ mẽg ãjag tóg mũgtĩ, kỹ tag hã to jykrén nĩ, tag hã to ãjag tóg inh jykre ki kanhrãn ke mũ.

⁷ Kỹ Topẽ tóg, ti tỹ inh mỹ kanhkã ven kar kỹ (tóg) to jykrén gé, sỹ vēsỹ ùn mág han sór tũ nĩ jé. Hã jé tóg inh há tỹ nén ù jagy ki nĩ han tĩ gé, kỹ tóg sónh tỹ inh ki já ri ke nĩ. Satanás krẽm ke ù vỹ, kỹ tóg isãnh tĩ, isỹ vēsỹ ùn mág han tũ nĩ jé.

⁸ Kỹ sóg êg Senhor mỹ to vỹ tãgtũ han, ti tỹ inh mỹ tỹ tũ' hen jé.

⁹ Hã ra tóg ke jãvãnh ja nĩ. Kỹ tóg inh mỹ: “ã jagãgtãn sóg tĩ,” he ja nĩ, “kỹ tóg há tĩ,” he ja tóg nĩ, êg Senhor ti. “Ã krój nĩ hã ki isỹ tỹ ùn tar nĩ ve há tĩ,” he ja tóg nĩ inh mỹ, êg

Senhor ti. Hã ky inh krój nĩ tag tóg inh mĩ há tĩ. Inh krój nĩn ky sóg Cristo tar hã tĩ tar nĩ nĩ. Tag hã ne há tĩ'.

¹⁰ Hã ky inh krój nĩ tóg inh mĩ sér tĩ, ag tĩ iso vĩ kónãn ti ke gé, inh jagtar nĩ ti ke gé, ag tĩ inh vóg kónãn ti ke gé, inh kanẽ jur ti ke gé. Inh mĩ tóg sér kar tĩ, sỹ nén vég mũ ti, sỹ Cristo hã tĩ fe nĩn ky. Inh krój nĩ ẽn kã sóg tar nĩ, mĩr, ha mẽ.

Paulo tĩ Corinto tá ke ag to nén to jykren

¹¹ Ha vé ha, vèsỹ ùn krĩ tũ nĩ ẽn ri ke han sóg, ãjag tĩ inh kutãn ky. ãjag tĩ iso vĩ há han ke vè vè. Inh pi(jé) ù tĩ vèsỹ apóstolo han mũ ẽn ag krẽm ke nĩ', isỹ tĩ nén (ũ) tũ hã ra, mĩr, ha mẽ.

¹² ãjag mĩ sóg sỹ tĩ apóstolo jẽ ven huri. Isỹ nén (ũ) jagy vég mũ ra sóg to krónh ke tũ nĩgtĩ. Ēg tĩ nén han vãn hyn han ja inh nĩgtĩ, ãjag rĩnve, milagre ti, Topẽ jykre ti ke gé. Hã ki ãjag tóg venh mũ, sỹ tĩ apóstolo jẽ ti.

¹³ Ky inh ãjag mĩ ne han ja tũ nĩ nẽji, ãjag tĩ ẽmã ù tá Jesus to vènhmãn tĩ ag to: “Ēg kãfór ag nĩtĩ,” hen jé? Nén pir hã han tũ inh nĩ, hã vỹ: ãjag jẽn ko ja tũ inh nĩ, he mũ, sỹ ãjag mré nĩn ky, ky tóg ãjag mĩ jagy nĩ ja tũ nĩ. Tag tĩ kórég ky inh mĩ vènh pãte fón nĩ.

¹⁴ Ha vé ha, sỹ ãjag ve mãn sór vè mĩr. Sỹ tag to jykre tãgtũ hã vè sir. Ky sóg inh jun ky ãjag mré nĩn ky (sóg) ãjag mĩ ti jagy nĩm sór tũ nĩ gé, ùri. Inh pi(jé) ãjag tũ mãn sór mũ'. Sỹ ãjag venh kãtĩg ke vè. Ēg krẽ pi(jé) ěg rico han tĩ', ěg tĩ ag jẽ'yn mũ ra. Ēg hã ne ěg krẽ mĩ nén ù nĩm tĩ'.

¹⁵ Hã ky sóg isũ fón kãn ke mũ, ãjag tugrĩn, vènh fẽg jé sóg ke mũ gé, sỹ ãjag krenkren han jé. ãjag to sóg há tãvĩ nĩ. Hã ky tóg inh mĩ e tĩ, ãjag tĩ iso há tũ nĩtĩ ti.

¹⁶ Ky ãjag tóg ki kanhró nĩtĩ, isỹ ãjag mré nĩn ky ãjag mĩ ti jagy nĩm sór tũ nĩ ti.

Hã ra sóg nẽji ãjag vatánh tá ãjag krĩn tĩ, ãjag mĩ sóg nẽji ón tĩ.

¹⁷ Ky inh mĩ ãjag vatánh tá ãjag tũ mãg tĩ', sỹ ãjag mĩ inh mré ke ag jègnèn ky'? Ke tũ sóg nĩgtĩ mĩr.

¹⁸ Tito mĩ sóg to vĩ, ti tĩ ěg régre ù ẽn mré ãjag venh tĩg jé. Ky Tito mĩ inh mĩ ãjag tũ ma kãtĩg ja nĩ'? Ke tũ tóg nĩ, ki kanhró ãjag

tóg nĩtĩ. Inh jykre hã han tóg tĩ, Tito ti. Isỹ nén han mũ ẽn hã han tóg tĩ.

¹⁹ ãjag hỹn iso: “ón ky tóg vènh jagfy vĩ mũ,” he mũ. “Ti tĩ ěg tĩ ã to há nĩtĩ ẽn han sór vè,” he ãjag hỹn mũ iso. Hã tũ vè, ky Cristo vỹ ki kanhró nĩ, Topẽ ti ke gé. ãjag to sóg há pẽ nĩ, hã ky sóg vĩ mũ, ãjag tĩ inh vĩ tugrĩn tĩ hã to tar nĩtĩ jé.

²⁰ Tag hã to sóg jykren mũ, ha mẽ: hèn ri ke mũn ěg tóg jagnẽ tĩ ùn mũ, sỹ ãjag ki jun ky. Hèn ri ke mũn ãjag tóg jagnẽ to jũ mũ, hèn ri ke mũn ãjag tóg jagnẽ tũ ki vè'ĩ mũ, hèn ri ke mũn ãjag tóg jagnẽ to krĩ rỹ nĩtĩ, vènh kar hèn ri ke mũn ãjag tũ hã mĩ ěkren sór tĩ, hèn ri ke mũn ãjag tóg jagnẽ to vĩ kónãn mũ, hèn ri ke mũn ãjag tóg jagnẽ to vĩ vĩ henh mũ, hèn ri ke mũn ãjag tóg jagnẽ kãfór nĩtĩ sór mũ, hèn ri ke mũn ãjag tóg vènh jykre e han sór mũ.

²¹ Ky tóg inh mĩ'a tĩnh mũ, sỹ ãjag ki jun ky, ky Topẽ tĩ isỹ ùn sĩ han ri ke vè sir. Inh fỹnh ke vè, ãjag tĩ vãsỹ Topẽ vĩ mranh ja ẽn tovãn sór tũ nĩtĩn ky, nén ù kavéj ẽn ti, ã prũ tũ fi mré nỹ, ã mén tũ mré nỹ, fag to ẽn tĩ ẽn mĩr. ãjag tĩ ẽn tovãn tũ nĩn ky tóg inh mĩ'a tĩnh mũ.

13

Paulo tĩ ag jyvèn mãn mũ

¹ Sỹ ãjag ve tãgtũnh ke vè ha. Ky sóg ãjag jykre venh ke mũ. ù tĩ ãjag jykre kórég vég mũ vỹ tónh ke mũ, ãjag tĩ ti kórég han ja ti. ùn régre vỹ tugtónh ke mũ, ke tũ nĩn ky ùn tãgtũ.

² Tag to inh huri, ky sóg to mãn sór mũ mĩr. Sỹ ãjag mré nĩ ja nĩn ky sóg ãjag mĩ tag to ja nĩ, ky sóg ùri ãjag mĩ rán mũ sir, sỹ ãjag mré nĩ tũ nĩn ky, ha mẽ. Sỹ ãjag mré nĩ ja nĩn ky sóg komẽr hã vĩ ja nĩ, ù tĩ Topẽ vĩ mranh ja ẽn ag mĩ. Inh jun mãn ky inh pi(jé) komẽr hã vĩ mãn mũ', ha vemnĩ. Vĩ tar han jé sóg ke mũ mĩr.

³ Cristo vĩ mẽ sór ãjag mũ, inh ki. Mẽ jé ãjag tóg ke mũ. Ti pi(jé) krój nĩ'. Tar ti nĩ, hã ky sóg vĩ tar han ke mũ gé.

⁴ Krój nĩ ve ja ti nĩ, ti tĩ cruz to sa ky. Hã ra tóg rĩr mãn, Topẽ tĩ ti rĩn mãn ky. Topẽ tar nĩ hã vè. Ky sóg krój nĩ gé, sỹ ti ki rã ky

jěn kȳ, hã ra sóg ti mré rĩr kȳ jě gé, ãjag mỹ,
Topě tar nĩn kȳ.

⁵ ãjag jykre tugnȳm nĩ. “Inh mỹ Jesus ki
rã há han mũ vỹ?” hemnĩ, vēso jykrén kȳ.
“Jesus Cristo mỹ inh kãkã nĩ?” hemnĩ. ãjag
tỹ tag to: “hỹ, hã vē,” he tũ nĩn kȳ ãjag pi(jé)
tỹ ti tũ nỹtĩ'. Ęn kã ãjag tóg ti tovãnh kȳ mũ
nĩ sir.

⁶ Hã ra sóg ti tovãnh ja tũ nĩ. ãjag tỹ tag ki
kanhrãn kỹn há tĩ.

⁷ ãjag to sóg Topě mré vēmén tĩ, ãjag tỹ nén
ũ kórég han tũ nĩ jé. Kȳ inh rãnrãj tóg Topě
mỹ há tĩ sir, vēnh kar mỹ ke gé. Ag tỹ hã ra
iso é he mũ ra nén ũ há tãvĩ han sórmnĩ, ha
mẽ, kȳ ãjag tỹ Jesus tũ hã han ke mũ tag ne
há tãvĩ nĩnh mũ'.

⁸ Inh pi(jé) ũ tỹ ki hã tó mũ kato tẽ sór mũ'.
Ũ tỹ ki hã tó mũ tag ve sór inh nĩ mỹr.

⁹ Inh mỹ tóg sér tĩ, inh krój nĩn kȳ, kȳ tóg
inh mỹ sér tĩ gé, ãjag tar nỹtĩn kȳ. Hã jé sóg
Topě mré vĩ tĩ, ti tỹ ãjag mỹ vēnh jykre há ěn
nĩm jé, ãjag tỹ há pẽ nỹtĩ jé.

¹⁰ Hã kȳ sóg ãjag mỹ carta tag rán, sỹ ãjag
vég tũ nĩn kȳ. Kȳ sóg koměr hã vĩ sór mũ, sỹ
ãjag mré nĩnh ken kȳ. Inh pi(jé) vĩ tar han
sór mũ', inh pi(jé) ěg Senhor tỹ isar han kȳ
inh vĩ tar tỹ ãjag kókén sór mũ'. ãjag tar han
sór inh mũ mỹr.

¹¹ Inh kanhkã', sỹ ãjag mỹ rán kãn hã vē.
Hã ra sóg ver tag tó sór mũ, ha mẽ: vēnh kãn
nĩ, ãjag tỹ kygněg tũ nĩ jé, inh vĩ jēměmnĩ,
vēnh jykre pir han nĩ, krĩ kuprã nỹtĩmnĩ.
Topě ne ěg tó há nĩ', ti ne ěg krĩ kuprãg tĩ'.
Ti hã ne ãjag ki rĩr mũ', ãjag tỹ ti jykre tag
han kȳ.

¹² Jagně ki nhun ke ri ke han nĩ, Jesus mré
ke kar ki, ãjag tỹ jagně nĩgé kãgmĩ kȳ. Topě
tũ ki ge kȳ nỹtĩ kar vỹ ãjag mỹ: “ãjag mỹ há?”
he sór mũ.

¹³⁻¹⁴ Ęg Senhor tỹ Jesus Cristo jé ãjag tar
han tĩ. Topě vỹ ãjag to há nĩ. Ti kuprĩg vỹ tỹ
ãjag jagrě nĩ. Ti jykre hã mũ mũmnĩ.
Hã vē.

PAULO TÛ CARTA HAN: GALÁCIA TÁ KE AG MÛ CARTA

¹ Paulo tÛ rá vë, inh. Isÿ ga tÛ Galácia tá ke ag mÛ rán hã vë. Jesus Cristo hã vÿ inh fëg, sÿ tÛ ti apóstolo jë jé, ëg jóg tÛ Topë ti ke gé. Ëprã ke tÛ inh fëg pijé'. Jesus Cristo hã ne inh fëg', Topë tÛ ùn rÿn mãn mÛ ti, ti ter kar kÿ.

² Sÿ inh mré ke ag mré ga tÛ Galácia tá ke ag mÛ rán hã vë, ù tÛ Galácia tá Jesus to vënhmãn tÿ ag mÛ.

³ Topë mÛ sóg to vÿ tÿ, ti tÛ ãjag tar han jé, ëg jóg mág tÛ ãjag krÿ kuprãg jé, ëg pã'i tÛ Jesus Cristo ti ke gé.

⁴ Ti hã ne ù tÛ ã tén mÛ ag mÛ vënh fëg', ti tÛ ëg tÛ Topë vÿ mranh tÛ tÛ' he jé, kÿ tóg ëg kren han, ëprã ke jykre to. Ëprã ke jykre tÛ pãno nÿ kÿ tóg vënh jykre tag ki ëg kunÛ. Ëg jóg tÛ Topë tÛ nén ve sór mÛn hã vë, ti hã ne Jesus mÛ tag tó ja nÿ'.

⁵ Kÿ ëg tóg Topë to vÿ há han sór mÛ, kÿ tóg tÛg' he jávãnh nÿ, ti to vÿ há tag ti. Hã vë.

Jesus kãme pir nÿ

⁶ ãjag ne tóg kãnhmar sÿ ãjag mÛ Cristo kãmén ja ën tovãnh sór mÛ', ti tÛ ëg jagfy ter ja kãme ti. Ti kãme ù nón mÛ sór ãjag tóg mÛ, Cristo tÛ ëg mÛ tó ja tÛ nón. Inh mÛ tóg e tÿ mÿr, ãjag jykre tag ti.

⁷ Cristo kãme vÿ pir nÿ, kÿ ti kãme ù tóg tÛ tÿ. Hã ra ù ag tóg ãjag krÿ kufy han sór mÛ, hã kÿ ag tóg Cristo kãme ën ki króm há han tÛ nÿgtÿ. Û tó sór ag tóg mÛ mÿr, Cristo jykre to, hã vÿ: “ãjag krenkren jé ãjag tóg Cristo ki rã kar kÿ Judeu ag jykre han ke mÛ gé, Topë tÛ Moisés mÛ nén tó ja ën ti,” he mÛ.

⁸ Hã ra sóg ãjag mÛ tó há han ja nÿgtÿ, isÿ ãjag mÛ: “ti ki rã tãvÿ han jé ãjag tóg ke mÛ,” hen kÿ. Û tÛ inh vÿ tag ri ke tó tÛ ag jé mÛ kónãn. Hën ri ke mÛn isóg ãjag mÛ tag tó tÛ nÿ, hën ri ke mÛn sóg ti pãte nén ù tónh ke mÛ. Kÿ inh jé tÿg kónãn. Hën ri ke mÛn kanhkã tá Topë tÛ jënë jafã tóg isÿ tó ja ën ri ke han ke tÛ nÿ, pãte tóg hën ri ke mÛn nén ù tó sór mÛ. Kÿ ti jé tÿg kónãn.

⁹ Tag tó ja inh nÿ, kÿ sóg tó mãn mÛ sir. Û tÛ ãjag mÛ Cristo kãmén kÿ, hã ra tóg ãjag mÛ isÿ tó ri ke han tÛ nÿ, isÿ tó pãte tóg ù tó sór mÛ, kÿ ti jé tÿg kónãn.

¹⁰ Vÿ tar han sóg tÿ, ëprã ke kórég ag to. Inh pi(jé) ón kÿ ag mÛ vÿ há han sór mÛ', ag tÛ iso há nÿtÿ jé'. Ëprã ke ag tÛ iso há nÿ tag, ag tÛ iso kórég nÿ tag tóg inh mÛ tÛ nén ù tÛ nÿ.

Isÿ ëprã ke ag tÛ iso nén tó mÛ to jykren nÿ ra inh hÿn Cristo tÛ ki rÿr tÛ nÿnh mÛ vë. Hã ra sóg ti hã to jykren tÿ. “Isÿ nén tó mÛ hÿn ti mÛ há nÿ, ti mÛ kórég nÿ vó?” he sóg tÿ, ti tÛ inh mÛ vÿ há han jé, Topë ti.

Paulo tÛ Topë vÿ há tó

¹¹⁻¹² Cristo kãmén ja inh nÿgtÿ, isÿ ãjag mÛ: “ti ki rã kÿ ëg krenkren ke mÛ, ëg tÛ Moisés jykre han tÛ ra,” hen kÿ. Ëprã ke tÛ véké nén ù to jykren ja pijé', sÿ ãjag mÛ nén tó mÛ ti. Ëprã ke tÛ inh kanhrãn ja pijé'. Û pi(jé) inh mÛ: “tag tómnÿ,” he mÛ'. Jesus Cristo hã ne inh kanhrãn', ti hã ne inh mÛ tag tó kãn'. Tag to jykren nÿ, inh kanhkã'.

¹³⁻¹⁴ Isÿ vãsÿ nén han ja mÛ ãjag tóg huri. TÛ sóg Judeu krë nÿ, hã kÿ sóg Judeu jykre han tÿ ja nÿgtÿ, Moisés tÛ ëg jóg'jóg ve ag mÛ Topë jykre tó ja ën ti. Kÿ sóg inh povo jykre ki, Judeu jykre ki sóg vãsãn mág, hã kÿ sóg inh régre ag pãtén, sÿ ëg jykre ki króm to tar tãvÿ nÿn kÿ. Ëg jóg'jóg ve ag jykre tãvÿ han sóg nÿgtÿ mÿr, tag hã mÛ sóg êkren ja nÿgtÿ. Kÿ sóg kygnë kÿ: “Jesus hÿn ón kÿ vësÿ Topë han,” he ja nÿ gé. Hã kÿ sóg ti ki ge kÿ nÿtÿ ag vóg kónãn tãvÿ han, isÿ ag tÛ tÛ' he jé. Ag jagãgtãn vãnh ja inh nÿgtÿ.

¹⁵⁻¹⁶ Hã ra Topë tóg kejën inh mÛ Jesus to: “inh kósin vÿ tÛ ti nÿ,” hé, isÿ fóg ag mÛ, kanhgág ag mÛ ti kãmén jé, ù tÛ mÛ ja tÛ ag kar mÛ. Ti hã tóg inh mur to hã inh kuprëg, inh jagãgtãn kÿ. Kÿ, Jesus tÛ inh mÛ vënh ven kar inh pi(jé) ëprã ke ù mré vëmén', ti ki jëmë jé'.

¹⁷ Kÿ sóg Jerusalém ra tÿg ja tÛ nÿ gé, sÿ ijo apóstolo ag mré vëmén jé. Ga tÛ Arábia ra sóg vyr, ën kã, kar kÿ sóg tá kãtÿg kÿ cidade tÿ Damasco tá jun mãn.

¹⁸ Kÿ, 3 anos tÛg kÿ sóg kejën Jerusalém ra vyr, sÿ apóstolo Pedro mré vëmén jé. Ti mré sóg kurã tÿ 15 (ke) han, tãvÿ.

¹⁹ Ën kã inh pi(jé) apóstolo ù ag vé'. Tiago hã ve inh, ãg Senhor jãvy ãn, isỹ Pedro mré vñn ký.

²⁰ Æjag mỹ sóg ki hã rán mũ. Inh pi(jé) ón mũ', Topẽ hã ne ki kanhró nĩ'.

²¹ Tag pãte sóg ga tỹ Síria ra vyr, ga tỹ Cilícia ra ke gé.

²² Isỹ ra tĩg jé sóg ga tỹ Judéia fñn rãm. Ký Judéia tá Jesus to vãnh mãn tĩ ag inh ki kagtĩg nỹtĩ ja nĩgtĩ. Inh ve ja tũ ag nỹtĩ ver, Judéia tá Cristo ki ge ký nỹtĩ ag.

²³ Iso vĩ hã mẽ ja ag tóg nĩgtĩ, hã vỹ: “ù tỹ ãg vóg kónãn mũ ãn nãji Cristo tó mũ,” he mũ. “Vãsỹ tóg ù tỹ ti ki ge ký nỹtĩ ag tũg sór ja nĩ, hã ra tóg ùri ti kãmén mũ ha, nãji,” he ja ag tóg nĩgtĩ iso.

²⁴ Ký ag tóg isugrñn Topẽ to vĩ há han ja nĩgtĩ, ag tỹ tag mẽ ký.

2

Paulo jykre tỹ apóstolo ù ag mỹ há nĩ.

¹ Tag pãte 14 anos tũg kar sóg Jerusalém ra tĩg mãn gé, Barnabé mré, ký Tito tóg ãg mré vyr gé.

² Topẽ tỹ inh mỹ: “ha ra tĩg,” he ja vẽ. Tá jun ký sóg ag mỹ isỹ nén tó tĩ ãn kãmén kãn ja nĩ sir, sỹ fóg ag mỹ nén kãmén tĩ ãn ti. Vyr mỹ sóg tag to pã'i ag mré vãmén. Fóg ag mỹ sóg: “Jesus ki rã ký ãg krenkren ke mũ, ãg tỹ Moisés jykre han tũ ra,” he tĩ. Ký sóg tag to pã'i ag ki jẽmẽ sór ja nĩ, sỹ ag mỹ: “mỹ há, fóg ag tỹ Moisés jykre han tũ ra, kanhgág ag ke gé?” he jé. Isỹ fagrñnh mỹ rãnrãj jãvãnh tóg tĩ, isỹ fagrñnh mỹ carreira ri ke han jãvãnh tóg tĩ, hã ký sóg ag ki jẽmẽnh vyr.

³ Ký tóg ag mỹ há tĩ, sỹ fóg ag mỹ, kanhgág ag mỹ Jesus hã tó mũ ti, sỹ ag mỹ Moisés tó tũ ra, sỹ ag mỹ Judeu ag jykre tó tũ ra, sỹ ag mỹ: “ha ãjag gré fár junun kym,” he tũ ra. Hã ký ag tóg Tito mỹ: “ha kym,” he ja tũ nĩ gé. Fóg tỹ Grego vẽ, Tito ti, ù tỹ Jerusalém ra inh mré tĩ mũ ãn ti. Hã ký tóg ã gré fár kym ja tũ nĩ, ti tỹ tỹ Judeu tũ nñn ký.

⁴ Hã ra ón ký Jesus ki ge ký nỹtĩ ag tóg ti kym sór ja nĩ. Ón ký ag tóg Jesus jykre ve sór ja nĩ. “Ti mỹ Moisés jykre tovãnh tũ'?” he ag tóg iso. Ag tỹ Moisés jykre krẽm ãg vin mãn sór ja vẽ, ký tóg ãg patrão ri ke nĩ, Moisés jykre ãn ti.

⁵ Hã ra sóg ag kato tẽ. Inh pi(jé) ag mỹ: “hỹ,” he ja nĩgtĩ'. Ag kato tẽ tãvĩ han ja inh nĩgtĩ ãjag jagfy, ãjag tỹ vãnh vĩ há hã kri fi jé, Jesus kãmẽ tỹ ãjag mỹ sér tĩ jé, ãjag tỹ Moisés jykre kufy ãn han tũ nñn ký.

⁶ Ký pã'i ag tóg isỹ ag mỹ nén kãmén mũ ãn to: “tó kãn ja tũ ã nĩ,” he ja tũ nĩ gé, ùn mág ag. Vãsỹ ag tóg tỹ pã'i tũ ja nỹtĩgtĩ, ùn mág tag ag, hã ra tóg inh mỹ tỹ nén ù tũ nĩ, ha mẽ. Topẽ mỹ ti tỹ nén ù tũ nĩ, ãg tỹ ãprã ke ag mỹ tỹ ùn mág nỹtĩ ti, ùn sĩ nỹtĩ ti ke gé.

⁷ Ký tóg pã'i tag ag mỹ há tĩ, sỹ fóg ag mỹ, sỹ kanhgág ag mỹ Topẽ vĩ tónh ke ti, ùn gré fár junun kym ja tũ ãn ag mỹ, Topẽ tỹ inh mỹ: “povo ù ag mỹ tónh tũg,” hen ký. “Topẽ vỹ Pedro mỹ tó, ti tỹ Judeu ag mỹ tó jé, ùn gré fár junun kym ký nỹtĩ ãn ag mỹ, hã ra ã tóg ù ag mỹ tónh ke mũ,” he ja ag tóg nĩ inh mỹ, Jerusalém tá ùn mág ag.

⁸ Topẽ ne Pedro ti tar han, ti tỹ tỹ Judeu ag apóstolo jẽ jé. Ký tóg isar han, isỹ tỹ ù ag apóstolo jẽ jé, ùn tỹ Judeu ag jykre han tũ kar ag.

⁹ Tag ve ag, Topẽ tỹ tag to isar han mũ ve ag, Tiago ti, Pedro ti, João ti ke gé. Igreja to pã'i vỹ tỹ ag nỹtĩ, ký ag tóg tỹ igreja nũna ri ke nỹtĩ. Ën ag ne inh nĩgé mẽ', Barnabé nĩgé ke gé. Hã ký ag tóg ãg mỹ: “há ti nĩ, ãjag rãnrãj ti, ãjag tỹ nén han sór mũ ti,” he mũ. “Ha fóg ag mỹ tónh mũjãg, kanhgág ag mỹ, jãvo ãg tóg ù tỹ Judeu ag jykre han mũ ag hã mỹ tónh ke mũ,” he ag tóg mũ ãg mỹ, pã'i ag.

¹⁰ Ký ag tóg ãg mỹ to vĩ, ãg tỹ ag kãmĩ ùn vãsỹrãnh mũ ag jagãgtãn jé, ãg tỹ ag mỹ nén ù jẽnẽ jé, fag mỹ ke gé. Tag han sóg tĩ mỹr. Inh pi(jé) kã jatun tĩ'.

Fóg ag tỹ Judeu ag ri ke nỹtĩ

¹¹ Ký kejẽn Pedro tóg cidade tỹ Antioquia tá jun ja nĩgtĩ. Hã ra tóg tá kygnẽ, ký sóg ti kato tẽ. Ti hã mỹ sóg ti kygnẽ ãn tó.

¹² Ký Tiago tóg kejẽn ti mré ke ù ag jẽgnẽ ja nĩgtĩ. Ag tỹ junjun tũ ki Pedro tóg fóg ag mré jẽn ja nĩgtĩ, Judeu tũ ag mré. Hã ra Tiago tá ke ag tỹ junjun ký tóg sir Judeu tũ ag mré jẽn jãvãnh nĩ sir, ti tỹ Judeu ag kamãg vẽ sir, ùn gré junun fár kym tĩ ag jagfy. Ký Pedro tóg ón ký vyrmỹ nĩ mũ sir, fóg ag vãm ký.

¹³ Kĩ ti mré Judeu ù ag tóg fóg ag vãm mũ gé sir. Kĩ vãhã Barnabé tóg fóg ag vãm mũ gé sir. Ki kanhró ti nĩ vë, Barnabé ti, ãg tỹ jatun mỹ fóg mré nĩnh ke ti, ãg tỹ tỹ Judeu nỹtĩ ra.

¹⁴ Ag kar vỹ kygnë kãn, Pedro nón. Jesus jykre pijé', vënh vĩ sér pijé'.

Sỹ ag tỹ kygnë tag ve kỹ sóg vënh kar rĩnve Pedro mỹ tag tó, ha mẽ. “Ha vé, Judeu vỹ tỹ ã nĩ,” he sóg ti mỹ. “Ã tỹ tỹ Judeu nĩ ra ã tóg fóg jykre han ja nĩgtĩ, fóg mré jën kỹ,” he sóg ti mỹ. “Kỹ ã tỹ ne jé ùri Judeu jykre han mãn sór nẽ? ã tỹ ne jé fóg ag mỹ: Judeu ag jykre han nĩ, he sór nẽ?” he sóg ti mỹ.

Jesus ki ge kỹ nỹtĩ kỹ ãg povo pir ri ke nỹtĩ

¹⁵ Judeu krë vỹ tỹ ãg nỹtĩ, kỹ ãg tóg fóg ag tỹ Topë vĩ mranh tĩ ên ri ke tũ nỹtĩ.

¹⁶ Hã kỹ ãg tóg Topë tỹ vãsỹ ãg jyvën tĩ ên ki kanhró nỹtĩ. Hã ra ãg pi(jé) tag tigrĩn Topë mỹ há nỹtĩ'. ãg tỹ Jesus Cristo ki ge kỹ ãg ti mỹ há nỹtĩ. Hã kỹ ãg tóg Jesus Cristo ki ge kỹ nỹtĩ, ãg tỹ ti mỹ tỹ ùn há nỹtĩ jé, ti tỹ ãg tỹ ti ki ge kỹ nỹtĩ tag tigrĩn ãg mỹ vënh pãte fón jé sir. ãg pi(jé) Topë tỹ vãsỹ ãg jyvën tĩ ên ki króm ja nĩgtĩ', hã kỹ ãg tóg ti mỹ tỹ ùn há tũ nỹtĩ, ãg tỹ ti tỹ vãsỹ ãg jyvën han sór mũ ra. Topë pi(jé) Moisés tỹ ãg mỹ vënh jykre nĩm ja ên tigrĩn ãg mỹ vënh pãte fón ke mũ'. Jesus Cristo tigrĩn ke vë.

¹⁷ Kĩ tóg ge nĩ. ãg tỹ Cristo ki ge tigrĩn ãg tóg Topë mỹ tỹ ùn há nỹtĩ. ãg tỹ Topë vĩ mranh kỹ, hã kỹ tóg ãg mỹ vënh pãte fón mũ, ãg tỹ tỹ Judeu nỹtĩn kỹ, kỹ tóg fóg ag mỹ vënh pãte fón mũ gé, kanhgág ag mỹ ke gé.

Kỹ ãg hỹn iso: “ã tỹ tag tó kỹ ã tóg: Cristo vỹ Topë vĩ mranh tag to há nĩgtĩ, he tĩ,” he sór mũ. Vó, hã tũ vë.

¹⁸ Hã ra tag to jykren, ha mẽ: ãg tỹ Topë tỹ vãsỹ vënh jykre to: “vënh jykre tag han mãn ke tũ ãg nĩ ha,” he kar kỹ: “vó, han mãn jé ãg tóg ke mũ, ge ra,” hen kỹ tóg vënhmỹ tĩ sir. Vënh jykre régre vë sir.

¹⁹ Topë tỹ vãsỹ ãg jyvën ja ên ki kanhró ãg tóg nỹtĩ. Kỹ ãg tóg ti tỹ ãg jyvën mũ ên mẽ kỹ: “vënh jykre kórég han kỹ sóg Topë vĩ mranh tĩ,” he mũ sir. Ti vĩ ki króm ki kagtĩg ãg tóg nỹtĩ, ãg tỹ ki króm sór mũ ra. Hã ra Cristo vỹ ãg jykre si tỹ tũ' he ja nĩ. Ti mré tóg cruz

to sa ja nĩ, ãg jykre si ti. Kỹ tóg ãg mỹ vënh jykre tãg nĩm mũ sir, ãg tỹ tỹ Topë tũ nỹtĩ jé.

²⁰ ãg jykre si vỹ tũ' hé. Hã kỹ ãg tóg ti tũ hã han tĩ, ãg tỹ ver ga kri mũn kỹ. Topë kósin ki rã tigrĩn ãg tóg sir rĩnrĩr nỹtĩ. Ti fe vỹ tỹ ãg nỹtĩ, ãg kar vỹ tỹ ti fe nỹtĩ, kỹ tóg ãg jagfy ù tỹ ã tén tĩ ag mỹ vënh fëg, kỹ tóg ãg jagfy ter ja nĩ.

²¹ Ti ki ge kỹ nỹtĩ tigrĩn ãg tóg Topë mỹ há nỹtĩ. Topë tỹ ãg jagãgtãn hã vë. ãg tỹ: “Topë jykre si ki króm kỹ inh hỹn Topë mỹ tỹ ùn há nĩ,” hen kỹ Cristo vỹ fagrĩnh mỹ ter ja nĩ. Kỹ ãg tóg Topë tỹ ãg jagãgtãn tag tỹ tũ' he mũ. Hã tũ vë mỹr.

3

ãg tỹ Jesus ki ge kỹ ãg krenkren ke

¹ Galácia tá ke', ãgag ne tóg krĩ tũ nỹtĩ ve nỹtĩ'. ù nỹ ãgag krĩn kónãn, ãgag tỹ Jesus Cristo tovãnh sór jé? Ti tỹ ka to sa ja ên tó kãn inh mỹr ãgag mỹ, kỹ ãgag tỹ ne jé vãsỹ vënh jykre ên han sór nẽ?

² Kỹ sóg ãgag ki tag jëmë sór mũ, ha mẽ: Topë ne ãgag mỹ ã kuprĩg jënë'. ãgag tỹ vãsỹ vënh jykre si ên mũ tigrĩn ãgag mỹ jagrën kỹ nỹtĩ'? Vó, inh vĩ tigrĩn ãgag tóg Cristo ki ge kỹ nỹtĩ, kỹ ãgag tóg Cristo ki ge tigrĩn jagrën kỹ nỹtĩ.

³ Kỹ krĩ vënh mỹ han sór tũg nĩ. Topë kuprĩg tỹ ãgag krĩn kỹ ãgag Jesus ki ge ja nĩ. Kỹ: vësóg ki sóg ti jykre ki krov,” he tũg nĩ.

⁴ Ke tũ nĩ (mũ) ra ãgag tóg fagrĩnh mỹ Topë kuprĩg tỹ jagrë nĩ ên vé. Hã ra tóg inh mỹ fagrĩnh mỹ ke tũ nĩ.

⁵ Kỹ ù tỹ ãgag mỹ ã kuprĩg jënëg mũ ên vỹ ãg tỹ nén han vãnh hyn han ja nĩgtĩ gé. Ti mỹ ãgag tỹ vãsỹ vënh jykre si mũ tigrĩn milagre ên hyn han'? Vó. ãgag tỹ Cristo kãme sér mẽ kỹ ti ki ge tigrĩn tóg milagre ên hyn han. Tag to jykren.

⁶ Kỹ Abraão to jykren nĩ gé. Topë ki tóg rã kỹ nĩ ja nĩ, kỹ tóg Topë mỹ tỹ ùn há nĩ sir, Abraão ti.

⁷ Tag to jykren há han nĩ. ãg tỹ Abraão nón Topë ki ge kỹ nỹtĩ kỹ ãg tóg Abraão krë'krë ag ri ke nỹtĩ.

⁸ Topë vỹ fóg ag mré kanhgág ag krenkren han sór mũ, ag tỹ ti ki ge kỹ. ù tỹ Judeu jykre han tũ ag kar krenkren han

sór tóg mũ. Hã tóg rán kÿ nĩ. Vãsÿ tóg rán kÿ nĩ, Topê vĩ tÿ rán kÿ nĩ ki. Vãsÿ tóg Abraão mÿ vênh vĩ sér tag tó ja nĩ, ha mẽ: “povo kar mÿ sóg vĩ há han ke mũ, ã tigrĩn,” he ja tóg nĩ, Topê ti, Abraão mÿ.

⁹ Ti mÿ tóg vĩ há han ja nĩ, Topê ti, Abraão mÿ, ti tÿ ti ki rã há han kÿ. Kÿ tóg ù tÿ ti nón ti ki ge kÿ nÿtĩ ag mÿ vĩ há han ke mũ gé.

¹⁰ Û tÿ vãsÿ vênh jykre si ên ki króm tigrĩn kren sór mũ ag mÿ tóg vĩ kónãn ke mũ, Topê ti, ag tÿ ki króm sór mũ ra mranh kÿ, mÿr, ha mẽ. Hã kÿ tag tóg rán kÿ nĩ, ha mẽ. “Topê tÿ êg jyvên mũ tóg e nÿtĩ, kÿ ti vĩ tóg rán kÿ nÿtĩ. Êg tÿ ki króm kãn ke vë. Û tÿ mranh pir han mũ mÿ tóg vĩ kónãn ke mũ, Topê ti,” he tóg, Topê vĩ tÿ rán kÿ nĩ ki.

¹¹ Hã kÿ êg tÿ Topê tÿ vãsÿ êg jyvên mũ ên ki króm sór mũ ra êg tóg ti mÿ tÿ ùn há tũ nÿtĩ, Topê ti mÿ, êg tÿ ki króm kãn tũ nĩn kÿ. Hã kÿ tag tóg rán kÿ nĩ gé: “êg tÿ Topê ki ge kÿ nÿtĩn hã kÿ êg tóg ti mÿ tÿ ùn há nÿtĩ, kÿ êg tóg krenkren ke mũ ha,” he ja tóg nĩ, Topê vĩ tÿ rán kÿ nĩ ki.

¹² Kÿ Topê tÿ vãsÿ êg jyvên tĩ ên vÿ êg tÿ ti ki rã ri ke tũ nĩ. Hã kÿ tóg tag tó ja nĩ, Topê ti, ha mẽ: “ãjag tÿ inh vĩ ki króm tigrĩn ãjag krenkren ke mũ,” he ja tóg nĩ. Hã ra êg tóg ki króm ki kagtĩg nÿtĩ, hã kÿ êg tóg ti jykre si ki króm sór mũ ra ki króm ja tũ nĩ, hã kÿ êg tóg krenkren ke tũ nĩ sir.

¹³ Jãvo êg tÿ Cristo ki ge kÿ êg krenkren ke mũ. Topê vÿ êg mÿ vĩ kónãn ke mũ vë, êg tÿ ti tÿ vãsÿ êg jyvên mũ ên mranh ja to. Hã ra Cristo tóg êg kren han mũ, Topê tÿ êg mÿ vĩ kónãn tũ nĩ jé. Cristo hã ne Topê mÿ: “ha ag jagfy inh hã mÿ vĩ kónãn,” he ja nĩgtĩ'. Ti to tag tóg rán kÿ nĩ, ha mẽ: “ù tÿ cruz to sa mũ ên mÿ tóg vĩ kónãn mũ, Topê ti,” he ja tóg nĩgtĩ, Topê vĩ tÿ rán kÿ nĩ ki.

¹⁴ Ti tÿ Cristo hã mÿ vĩ kónãn kÿ tóg êg hã mÿ vĩ há han mũ sir, ti tÿ Abraão mÿ vĩ há han ja ên ri ke. Fóg ag mÿ tóg vĩ há han mũ, kanhgág ag mÿ ke gé, Jesus Cristo tigrĩn. Kÿ tóg êg mÿ ã kuprĩg jênêg mũ sir, êg tÿ ti ki rã ja tigrĩn. Tó ja ti nĩ, ti tÿ êg jagrên ke ti, kÿ tóg ke mũ, êg tÿ ti ki rã ja tigrĩn.

Abraão tÿ Topê vĩ kri nĩm kÿ tÿ ùn há nĩ

¹⁵ Inh kanhkã', êprã ke jykre to jykren. Kejên ùn régre ag tóg jagnê mré nén ù to

jykren tĩ. To jykren kar kÿ ag tóg rán tĩ, kÿ ag tóg ãjag jygji ránrán tĩ gé sir. Ag jygji ránrán kar kÿ ù tóg sir tÿ nén ù han mãn ke tũ nĩ. Rán kÿ tóg nĩ nĩ, kÿ ag tóg tÿ ti rá ù han tũ nĩgtĩ sir. Êprã ke jykre hã vë.

¹⁶ Kÿ Topê jykre vÿ ge nĩgtĩ gé. Topê vÿ Abraão mÿ tó ja nĩ, vãsÿ, ti tÿ ti mÿ nén ù há han ke ti, ti krê'krê mÿ ke gé. Kÿ tóg, ti tÿ ti krê'krê tó kÿ (tóg) Abraão krê'krê ag kã ùn pir hã tó ja nĩ. Ti pi(jé) Abraão mÿ: “ã krê'krê ag,” he ja nĩ'. “Ã krê'krê,” he ja ti nĩ, hã vÿ: Cristo, he mũ, hã vÿ: Abraão krê'krê ag kã ùn pir, he mũ.

¹⁷ Kÿ Topê tóg Moisés mur ke to hã Abraão mÿ ti tÿ ti krê'krê ag kã ù mÿ vĩ há han ke tag tó ja nĩ, ti tÿ Abraão mré jykren kÿ. Kÿ, tag pãte, 430 (ke) anos tũg kÿ tóg Moisés mÿ ti tÿ êg jyvên ke ên nĩm. Hã ra tóg ã tÿ Moisés mÿ vênh jykre ên nĩm mũ ra tóg ã tÿ Abraão mÿ vênh jykre tó ja ên tÿ tũ' he ja tũ nĩ.

¹⁸ Kÿ Topê tÿ Abraão mÿ: “ve jé ã tóg ke mũ, ã krê'krê mrê,” he ja ên tigrĩn tóg ve ja nĩ, Topê vĩ hã tigrĩn tóg ve ja nĩ, Abraão ti. Ti tÿ êg jyvên ên to ke tũ vë, ti tÿ êg mÿ: “ên ve jé ãjag tóg ke mũ,” hen kÿ êg tóg venh ke mũ, ti vĩ tũgnĩn.

¹⁹ Kÿ ãjag hÿn inh mÿ: “Topê tÿ ne jé Moisés mÿ ti tÿ êg jyvên ke ên tó ja nê?” he sór mũ. Êg tÿ: “venh jykre kórég han kÿ inh hÿn tóg Topê vĩ mranh,” he jé, hã jé Topê tóg Moisés mÿ ti tÿ êg jyvên ke ên nĩm ja nĩ, Jesus mur ke to hã. Abraão kósin tÿ Jesus mur ke tũg ki ke ja vë, Topê tÿ êg jyvên ja ên ti. Ti hã mÿ tóg vĩ há han sór ja nĩ, Topê ti, Jesus hã mÿ.

Topê tÿ Israel ag jyvên kÿ tóg ã tÿ jênê jafã ag mÿ tó ja nĩ. Kÿ Topê tÿ jênê jafã ag tóg Moisés mÿ tó ja nĩ, Moisés tÿ Israel ag mÿ kãmén jé. Topê tÿ êg jyvên jafã ti nĩ ja nĩ, Moisés ti.

²⁰ Topê jëgja kã jëg kÿ tóg Israel ag mÿ vĩ ja nĩgtĩ, Moisés ti, Topê tÿ Israel ag mré jykren kÿ. Kÿ Moisés tóg ag jyvên, ag tÿ Topê vĩ ki króm jé. Topê tÿ êg kren han kÿ tóg ge tũ nĩgtĩ. Á pir mÿ tóg êg mÿ tó mũ, ti tÿ êg kren han sór mũ ti, Topê ti. Û tóg ti jagfy êg mré vĩ tũ nĩ sir.

Topê vÿ êg jyvên, êg tÿ ti vĩ ki kanhrãn jé

21 Isỹ tag tó ký Topě hỹn ãjag mỹ tỹ ùn ón mé nĩ ve nĩ. “Topě tỹ ěg jyvěn mũ ra ěg tóg ti vĩ mranh tĩ. Hã ký tóg ěg vóg kónãnh ke mũ. Ký tóg ěg kren han ke tũ nĩ,” he ãjag hỹn tĩ. Vó, Topě pi(jé) ón tĩ!. Hã ra Topě tỹ ěg jyvěn mũ ra ěg tóg ki króm tũ nĩgtĩ, hã ký ti tỹ ěg jyvěn tag tóg ěg kren han jãvãnh nĩ. Ti tỹ ěg jyvěn ěn tỹ ěg kren han mũ ra ěg tóg ti tỹ ěg jyvěn tugrĩn jykre kuryj nỹtĩnh mũ vë.

22 Hã ra tag tóg rán ký nĩ, ha mẽ: “vënh kar vĩ Topě vĩ mranh kãn ja nĩgtĩ,” he ja tóg nĩ, Topě vĩ tỹ rán ký nĩ ki. Ký ěg tỹ Jesus ki ge hã ký ěg tóg krenkren ke mũ sir. Ủ tỹ ti ki ge ký nỹtĩ ag hã vĩ krenkren ke mũ.

23 Ký, ěg tỹ Cristo ki rãnh ke to hã ěg tóg Topě tỹ vãsỹ ěg jyvěn mũ ěn krêm nỹtĩ ja nĩgtĩ, ký tóg ěg kanhrãn tĩ ja nĩgtĩ. Ti tỹ ěg mrãnmrãn ri ke ja ti nĩgtĩ, ti vĩ ti. Krêm ěg tóg sigse ký nỹtĩ ja nĩgtĩ. ěg tỹ Cristo ki ge ký ěg tóg kygvar ký nỹtĩ sir. Cristo mur to hã ke ja vë, Topě tỹ vãsỹ ěg jyvěn ja ti.

24 Ký tóg ěg jyvěn ja nĩgtĩ, ěg tỹ Cristo ki rãnh ke to jykrén jé. Cristo ki ge tugrĩn ěg tóg Topě mỹ tỹ ùn há nỹtĩ ha.

25 Ký, ěg tỹ ti ki rã kar ký ěg tóg Topě tỹ vãsỹ ùn mỹ: ag jyvěn nĩ, he mũ ěn krêm ke tũ nỹtĩ ha.

26 Topě krë vĩ tỹ ěg nỹtĩ ha, ěg tỹ Jesus Cristo ki ge ký.

27 Ti jiji tó ký ěg kygpe ký nỹtĩ, ký ěg tóg ti ri ke nỹtĩ sir, tỹ ti hã ri ken hã vë.

28 Hã ký ěg tóg tỹ jagnë hã nỹtĩ gé. Ký ěg tỹ ti ki ge ký Judeu ag vĩ fóg ag ri ke nỹtĩ, ký fóg ag vĩ kanhgág ag ri ke nỹtĩ gé. Ủ camarada ag vĩ ãjag patrão ri ke nỹtĩ. Ag vĩ fag ri ke nỹtĩ gé. Nén ù pir vĩ tỹ ěg nỹtĩ, ěg tỹ Jesus Cristo ki ge ký nỹtĩnh ký.

29 Ký, ěg tỹ tỹ Cristo mré ke nỹtĩnh ký ěg tóg tỹ Abraão krë'krë ag ri ke nỹtĩ gé sir, ěg kar, ký ěg venh ke mũ sir, Topě tỹ Abraão mỹ nén to mũ ěn ti.

4

1 Sỹ ãjag mỹ kãmén mãn ke vë, sỹ nén tó ja ěn ti. ùn rico kósin vĩ ti tũ mãn kãn ke mũ, ti mog ký. Ti tỹ ver sĩ nĩnh ký tóg nén ù venh ke tũ nĩ ver. Ti panh camarada ri ke tóg nĩ ver, ti sĩ nĩnh ký. Hã ra ti panh tỹ nén kar vĩ tỹ ti tũ nỹtĩnh ke mũ.

2 Ge ra ag tóg ver ti kanhrãn tĩ, ti sĩ nĩnh ký. Ký ti kri ke ag ne ti tũ to jykrén tĩ!. Gen ký tóg kejën ti panh tỹ ti mỹ kurã nĩm ja ěn pétêm ke mũ. ěn kã tóg ã tũ mãn kãn ke mũ sir.

3 Ge ti nĩgtĩ ěg mré, ěg tỹ tỹ Topě krë nỹtĩnh ký. Jesus mur ke to hã ěg tóg gĩr ri ke nỹtĩ ja nĩgtĩ. Nén kar tãn kamëg ja ěg tóg nĩgtĩ, krĩg tãn mré hã. ěg sigse ri ke han ja ag nĩgtĩ, nén tãn ag.

4 Ký, ti kurã tá krỹg ký Topě tóg ã kósin jënë. ěprã ke fi ki tóg mur. Moisés tỹ ěg jyvěn tĩ ěn ki króm kãn ja tóg nĩgtĩ.

5 ěg kren han jé tóg mur, ti tỹ Moisés tỹ ěg jyvěn ja ěn to ěg kygvãn jé sir, ěg tỹ vãhã tỹ Topě krë pë nỹtĩ jé sir. Tỹ ěg ti krë tũ ja nỹtĩgtĩ vë, hã ra Topě tóg ěg jë'ỹn sór mũ ha sir.

6 Ký ěg tóg tỹ ti krë nỹtĩ sir. ěg tỹ tỹ ti krë nỹtĩnh ký tóg ěg mỹ ã kuprĩg jënëg mũ sir, ti tỹ tỹ ěg jagrë nĩ jé. Ti kósin kuprĩg ri ke ti nĩ, Topě kuprĩg ti. ěg jagrë tag tỹ ěg tóg sir Topě to: “ěg jóg mág,” he tĩ.

7 Hã ký ěg tóg tỹ ù camarada ri ke tũ nỹtĩ ha. Topě krë vĩ tỹ ěg nỹtĩ ha. Ký, ěg tỹ tỹ ti krë nỹtĩnh ký ěg tóg ti tỹ nén mãn ke mũ gé sir, ti tỹ ěg mỹ nén nĩm ke ti. Topě tỹ ěg mỹ nén han hã vë.

Paulo tỹ krĩ kufy nĩ

8 Vãsỹ ãjag tóg Topě ki kagtĩg ja nỹtĩgtĩ. Ký ãjag tóg ón ký vënh kãgrã hã to: “ěg Topě vë,” he ja nĩgtĩ. Vënh kãgrã pi(jé) tỹ Topě nĩ!. Vënh kãgrã hã nón mũn ký ãjag tóg sigse ký nỹtĩ ja nĩgtĩ.

9 ùri ãjag tóg Topě ki kanhró nỹtĩ jãvo. Hã ra tóg vãsỹ ãjag ki kanhró nĩ ja nĩ vë, Topě ti, ha mẽ. Ký ãjag tỹ ne jé tỹ nén kar tãn ag mré ke nỹtĩ mãn sór në? Krój ti nỹtĩ, nén kar tãn ti, to ěg jagtar' he nỹtĩ ja nĩgtĩ, sigse ký ěg nỹtĩ ja nĩgtĩ, ěg tỹ tỹ ag mré ke ja nỹtĩnh ký. ãjag mỹ sigse ký nỹtĩ mãn sór mũ?!

10 Kurã to ãjag tóg jykrén sór mũ, kurã kórég to, kar ký kysã kórég to ke gé, prỹg kórég to ke gé.

11 Inh kanë jur tóg tĩ, sỹ tag mẽ ký. Inh hỹn fagrĩnh mỹ ag mỹ Jesus kãmén, he sóg tĩ, mỹr.

12 Inh kanhkã, inh ri ke nỹtĩ sórmnĩ. ãjag mré ke vĩ tỹ inh nĩ, ký inh ri ke han sórmnĩ.

Tag hã to sóg vī mū, ājag mý. Ājag pi(jé) inh jū han'.

¹³ Sý ājag ki jun vén mū ěn mī ěkré, sý ājag mý Topě vī tó vén mū ti. Ěn kã sóg kaga ný ja nĩgtĩ.

¹⁴ Ký tóg ājag mý e tĩ ja nĩgtĩ, ājag tỹ inh kaga ven ký. Ge ra ājag tóg iso é he ja tũ nĩgtĩ, ti pi(jé) ājag mý jěgry ja nĩgtĩ', inh kaga ti. Inh mý vī há han ja ājag tóg nĩgtĩ, sý tỹ Topě tỹ jěně jafã nĩn ký, ājag mý. Ājag tỹ Jesus Cristo ki rĩr mū ěn ri ke han ja ājag tóg nĩgtĩ isý.

¹⁵ Ěn kã tóg ājag mý sér pě tĩ ja nĩgtĩ. Hã ký ājag tóg inh jagãgtãn ja nĩgtĩ. Isý ājag mý ājag kaně to vī ra ājag hýn inh mý vin ke mū vē. Ký ti tỹ ne jé ājag mý sér tũ tĩ ně, ũri?

¹⁶ Ājag mý sóg ki hã tó mū. Inh mý tag tigrĩn ājag mý kórég nĩ ha'? Inh mý tóg e tĩ, tag ti.

¹⁷ Ũ ag tóg ājag mý vī há han sór mū. Ag ón vē hã ra. Ag tỹ ājag tỹ inh kato tẽ han sór vē, hã ký ag tóg ón ký vī há han sór mū, ājag tỹ ag hã nón mū jé sir, isovãnh ký.

¹⁸ Há ti nĩ vē, nén ũ há tỹ ājag mý sér nĩn ký. Isý ājag mré nĩn ký nén ũ há ěn tóg ājag mý sér nĩ ja nĩgtĩ. Ký ājag tỹ tag tovãnh tũ nĩ ký tóg há tĩ, inh mý. Ký nén ũ há hã to tar nýtĩmnĩ.

¹⁹ Inh krě', ājag mýnh ri ke vỹ tỹ inh nĩ. Ěg mýnh fi ne kaga tĩ', ěg tỹ fi ki mur ken ký. Fi kaga tag ri ke han mãn inh, ājag to. Ājag tỹ Cristo hã ri ke nýtĩn ký tóg há tĩ, sý tag hã ve sór vē, hã jé sóg ěg mýnh fi kaga ěn ri ke han mãn mū, ājag tigrĩn.

²⁰ Sý ājag mré nĩnh há tóg tĩ, sý ājag mré vēmén jé, sý ājag mý kãmén há han jé sir. Sý koměr hã ājag mý kãmén há tóg tĩ. Hã ra sóg kaně jur mū, ājag to, hã ký sóg vī mū.

Agar fi mré Sara fag to vėnh jykre

²¹ Ājag kãmĩ ũ tóg Moisés tỹ ěg jyvėn ja ěn han sór mū. Ājag hýn mē kãn ja tũ nĩ, vãsý vėnh jykre ěn ti, hã ký ājag tóg han sór mū. Ājag tỹ mē há han kãn ja nĩ ra ājag hýn han sór ke tũ nĩ vē. Hã mē, vãsý vėnh jykre ěn ti, ājag tỹ nén han sór mū ěn ti.

²² Tag vỹ rán ký nĩ, ha mē. Abraão vỹ kósin régre nĩ ja nĩgtĩ. Ũ mýnh fi vỹ tỹ ti

camarada fi nĩ, ký ũ mýnh fi vỹ tỹ ti prũ pě fi nĩ.

²³ Ký Abraão tóg ě camarada fi mré ný ja nĩ, ti tỹ ver kófa tũ ra, ký ti kósin tóg fi ki mur mū sir. Hã ra tóg ě prũ pě fi ki (tóg) ě kófa ra kósin mū gé sir. Topě tỹ ti mý: “ã kófa nĩ ra ě tóg kósin ke mū,” he jan hã vē.

²⁴ Topě tóg tag han, ěg tỹ ti jykre ki kanhrãn jé. Ti tỹ ěg mý comparação han hã vē, fag to, ha mē. Topě tỹ ěg mré jykrén mū ri ke fag nýtĩ, Abraão prũ fag. Agar fi vỹ tỹ Abraão camarada ja nĩgtĩ. Ti mré ke pě tũ fi vē. Ký fi tóg ri ke nĩ, Topě tỹ krĩ tỹ Sinai tá Moisés mý ti tỹ ěg jyvėn ěn tó ja ti. Tag vỹ Agar fi ri ke nĩ, ti camarada fi ri ke. Ũ tỹ vėnh jykre ěn han mū vỹ tỹ ũ camarada ri ke nýtĩ, fi kóm. Tỹ ag tóg sir Topě mré ke tũ nýtĩ, ũ tỹ Judeu jykre han mū ag.

²⁵ Ký Agar fi vỹ krĩ tỹ Sinai ri ke nĩ, ga tỹ Arábia tá. Hã ra fi tóg cidade tỹ Jerusalém ri ke nĩ gé, hã vỹ: Judeu ag jykre han mū ag kar, he mū, hã vỹ: Jerusalém, he mū. Tỹ ag Topě mré ke tũ nýtĩ, ũ tỹ Judeu ag jykre han mū ag.

²⁶ Hã ra ěg jamã vỹ kanhkã tá nĩ, Jerusalém tãg to ken hã vē, hã vỹ: kanhkã, he mū. Ěg mýnh ri ke vē sir, Abraão prũ pě fi ri ke vē sir, Jerusalém tãg, he mū tag ti.

²⁷ Tag to tag tóg rán ký nĩ, ha mē: “kurĩ ě tóg nĩ, krėg vãnh ě tóg nĩ. Ge ra mý sér tĩmnĩ, jamã há ra prėrmnĩ, ě mý sér tĩn ký, gĩr ũ tỹ ě ki mur ja tũ ra. Ā krė vỹ e tãvĩ nýtĩnh mū, ũn krėg mū fi krė e kãfór ti nýtĩnh mū, ě krė ti, ě mén tỹ ě fón mū ra. Ũ tỹ fi mén mré tĩ mū fi krė kãfór ti nýtĩnh mū, ě krė ti,” he ja tóg nĩ, Topě vī tỹ rán ký nĩ ki.

²⁸ Ký ěg tóg Isaque ri ke nýtĩ. Topě tóg Isaque to Abraão mý: “ã kófa nĩ ra ě tóg kósin ke mū,” he ja nĩ. Ký ěg tóg Cristo ki ge ký nýtĩ ký tỹ Topě krė nýtĩ, Topě tỹ: “inh krė vỹ tỹ ājag nýtĩnh mū,” hen ký. Topě vī tag tigrĩn ěg tóg Isaque ri ke nýtĩ.

²⁹ Ký Abraão kósin ve vỹ ti prũ pě fi kósin vóg kónãn ja nĩgtĩ. Abraão vỹ ě kófa tũ ra ě kósin ve ěn han, hã ra tóg Topě kuprĩg tigrĩn ě prũ pě fi kósin han, ě kófa pě ra. Ký ti kósin ve vỹ ěgno vóg kónãn mū. Hã ký ěg tóg tag vég tĩ gé, ũri. Judeu jykre han mū ag vỹ ěg vóg kónãn sór tĩ gé ver.

³⁰ Ký Abraão krė ag to tag vỹ rán ký nĩ, ha

mě: “ã camarada fi fón nĩ, fi kósin mré,” he ja tóg nĩ. “Ã camarada fi kósin pi(jé) ã prũ pẽ fi kósin mré ã tũ mǎn ke mũ'. Á pir mỹ ti mǎn ke mũ, ã prũ pẽ fi kósin ti,” he ja tóg nĩgtĩ, Topẽ vĩ tỹ rán kỹ nĩ ki, Abraão krẽ to.

³¹ Kỹ ãg tóg ti prũ pẽ fi kósin ri ke nỹtĩ. Ëg pi(jé) tỹ ti camarada fi kósin ri ke nỹtĩ, ãg tỹ Jesus ki ge kỹ nỹtĩn kỹ.

5

Jesus tỹ ãg kygvǎn ja

¹ Kỹ Jesus tóg ãg kygvǎ, vǎnh jykre si to, ãg kygvar kỹ nỹtĩ jé sir. Hã kỹ Judeu ag jykre ãn han sór tũg nĩ. Ũ tỹ tag to ãgag krĩn sór mũ ãn ag kato tǎmĩ, ag nón mũ sór tũg nĩ, ãgag tỹ vǎnh jykre ãn krẽm sigse kỹ nỹtĩ mǎn tũ nĩn jé sir.

² Hã kỹ sóg ãgag mỹ kǎmén mũ, inh, hã vỹ: Paulo, he mũ. Sỹ ãgag mỹ nén tónh ken hã vǎ, ha mẽ: ãgag tỹ ãgag gré junun fár kym kỹ, ãgag tỹ Judeu ag jykre han jé, kỹ Cristo vỹ ãgag mỹ nén ũ há han ke tũ nĩ.

³ Ha vé, sỹ tag tó mǎn ke vǎ gé, ha mẽ. Ágag tỹ ãgag fár kym kỹ ãgag han kǎn ke mũ sir, Moisés tỹ ãg mỹ vǎnh jykre nĩm ja ãn ti.

⁴ Hã ra ãgag tóg Cristo tovǎnh ke mũ, ãgag tỹ Moisés tỹ ãg jyvǎn tĩ ãn han sór kỹ, ãgag tỹ Moisés jykre tugrĩn Topẽ mỹ tỹ ũn há nỹtĩ sór kỹ. Topẽ vỹ ãg jagǎgtǎn sór mũ. Ágag tỹ Moisés jykre han sór kỹ ãgag tóg ti tỹ ãg jagǎgtǎn tag to é he mũ sir.

⁵ Ágag jǎvo ãg tóg ãg tỹ Jesus ki gen kỹ Topẽ mỹ tỹ ũn há nỹtĩnh mũ. Ëg tỹ ti ki ge kỹ nỹtĩn kỹ ãg tóg Topẽ kuprĩg tỹ jagrẽ nỹtĩ. Ëg jagrẽ tag tugnĩn ãg tóg Topẽ mỹ tỹ ũn há nỹtĩ.

⁶ Ha vé, ãg tỹ Jesus Cristo ki ge kỹ nỹtĩn kỹ tóg tỹ nén ũ tũ tĩ sir, ũn gré junun fár kym ja ti, ũn tỹ kym ja tũ ti ke gé. Ti ki ge kỹ ãg tóg nỹtĩ, kỹ ãg tóg tỹ nén ũ pir nỹtĩ ha, jagnẽ to há ãg nỹtĩ ha.

⁷ Ha vé, mũ há han ja ãgag nĩgtĩ. Ágag tỹ ne jé tovǎnh sór nẽ? Ágag tỹ ne jé vǎnh vĩ há kri nĩm sór tũ nĩ nẽ?

⁸ Topẽ tỹ ãgag krĩn pijé'. Ti hã ne ãgag jé prẽr ja nĩgtĩ'.

⁹ Tag to jykrén: fermento sĩ vỹ ãg tỹ pǎo kujǎgja kỹ kri rũm ke tĩ, kỹ tóg tỹ sónsón ke kǎn tĩ, tỹ nĩ kǎn tóg tĩ, pǎo ti. Topẽ vỹ kujǎgja vỹ ge nĩ, ha mẽ. Ke tũg nĩ.

¹⁰ Ëg Senhor tũ vỹ tỹ ãgag nỹtĩ. Hã kỹ sóg ãgag to: “ag hỹn ti tovǎnh ke tũ nĩ,” he tĩ, “ag hỹn ti japry, ti jamĩn jagma mũ mǎn ke mũ,” he sóg tĩ. Ũ tỹ ãgag krĩn mũ ãn ne vǎsỹrénh ke mũ', ãgag krĩn kónǎn ja tag to, ti tỹ tỹ pǎ'i nĩ ra.

¹¹ Inh pi(jé) ãg gré junun fár kym to: “ke ra,” he tĩ'. Isỹ ag mré tag tó ra ag hỹn inh vóg kónǎn ke tũ nĩ vǎ. Isỹ ag mré tag tó ra ag hỹn iso jũnh ke tũ nĩ vǎ. Ëg tỹ ãg fár kym tugrĩn krenkren tĩ ra ãg tóg Jesus tỹ ka to sa ja ãn to krenkren ke tũ nĩ vǎ, kỹ tóg ag mỹ sér tĩ vǎ, isỹ vǎnh jykre si tó tĩ ra. Hã ra sóg tó tũ nĩgtĩ.

¹² Ũ tỹ tag tó mũ ag jé ãgag grǎfy kym kǎn, ũ tỹ ãgag krĩn kónǎn mũ tag ag.

¹³ Hã ra Topẽ tóg ãg jé prẽr, ti tỹ ãg kygvǎn jé. Ti tỹ ãg kygvǎn kỹ ãg kygvar kỹ nỹtĩ ha. Ge ra ãg tóg ãg tỹ vǎsóg ki nén to jykrén mũ ãn han sór ke tũ nĩ, ti kórég nĩn kỹ. Ëg tũ hã han ke tũ ãg nĩ. Ëg tỹ jagnẽ to há nỹtĩ tag hã ne há nĩ'. Jagnẽ ki rĩr to ken hã vǎ.

¹⁴ Ha vé, Topẽ tỹ ãg jyvǎn e ãn ki króm kǎn jé ãg tóg ke mũ, ãg tỹ nén ũ pir han kỹ, hã vỹ: “ã régre ki rĩr há han nĩ, ã tỹ vǎnh ki rĩr há ri ke han nĩ, ã régre ki,” he mũ.

¹⁵ Jǎvo ãgag tóg mĩg ri ke jagnẽ mǎn sór mũ, jagnẽ to jũn kỹ. Jagnẽ tỹ tũ' he jé ãgag tóg ke mũ, ge kỹ, ha vemnĩ.

Ëg tỹ ãg tỹ nén to én mũ ãn han ke tũ

¹⁶ Hã kỹ sóg ãgag mỹ: “Topẽ kuprĩg tỹ ãgag mỹ nén tó mũ ãn hã han nĩ,” he sór mũ. Kỹ ãgag tóg ãgag tỹ nén to én mũ ãn han ke tũ nĩ.

¹⁷ Ëg tỹ nén to én mũ vỹ Topẽ kuprĩg tỹ ãg mỹ nén tó mũ ãn kato tǎn nĩ, kỹ Topẽ kuprĩg vỹ ãg tỹ nén to én mũ ãn kato tǎn nĩ gé. Jagnẽ to rǎrá ag tóg tĩ, hã kỹ ãg tóg ãg tỹ nén han sór mũ ãn han ke tũ nĩ.

¹⁸ Ëg tỹ hã ra Topẽ kuprĩg tỹ ãg mỹ nén tó mũ ãn han kǎn kỹ tóg ãg se mǎn ke tũ nĩ sir, Topẽ tỹ vǎsỹ ãg jyvǎn ja ãn ti.

¹⁹ Ëg tỹ vǎsóg ki nén to jykrén mũ ãn vỹ kórég nĩ, kỹ vǎnh kar vỹ ki kanhró nỹtĩ. Ëg tỹ vǎsóg ki nén to jykrén to ken hã vǎ, hã vỹ: mén tũ mré nỹ, he mũ, prũ tũ mré nỹ, he mũ, nén ũ kavéj han tĩ, he mũ, ãg tỹ nén to én mũ kar han tĩ, he mũ,

²⁰ ãg tỹ vǎnh kǎgrá to: Topẽ vǎ, he tĩ, he mũ, kujǎ jykre han tĩ, he mũ, curandeiro

jykre han tĩ, he mũ, jagně kato vāsān tĩ, he mũ, jagně to ājag fe tỹ gỹm ke (ka)mě, he mũ, jagně tũ to jykrén kónān tĩ, he mũ, vēsỹ ũn mág han sór mũ, he mũ, vēnh kāpām kỹ nỹtĩ sór mũ, he mũ, jagně vĩ kato tē mũ, he mũ,

²¹ jagně tũ to én tĩ, he mũ, kronkron tĩ, he mũ, krĩn tũ, he mũ, vēnh jykre pāno han tĩ tỹ hēn ri ke ke gé. Tag to sóg ājag jyvēn huri, hā ra sóg tó mǎn sór mũ. Ũ tỹ tag han mũ ag pi(jé) Topě tỹ tỹ ěg pā'i nĩ venh ke mũ'.

²² Topě kuprĩg tỹ ěg kanhrān mũ vỹ tag ri ke tũ nĩ. Há kar ti nĩ. Ti tỹ ěg kanhrān to ken hā vē, hā vỹ: jagně to há, he mũ, mỹ sér tĩ, he mũ, krĩ kuprā, he mũ, jagně to fe há nỹtĩ, he mũ, komēr hā vỹ, he mũ, jagně jagāgtān tĩ, he mũ, jagně mỹ ón vānh, he mũ,

²³ vēsỹ ũn mág han sór tũ, he mũ, vēso jykrén tĩ, he mũ. Topě pi(jé) tag kato tē tĩ', ti tỹ vāsỹ ěg jyvēn ti vỹ tag ri ke ja nĩgtĩ gé.

²⁴ Ěg tỹ tỹ Jesus Cristo tũ nỹtĩn kỹ, kỹ ěg tóg tỹ ti tỹ ka to sa ja ěn ri ke nỹtĩ. Hā kỹ ěg tóg ěg tỹ nén to én mũ ěn han mǎn sór ke tũ nĩ ha sir, ěg tỹ nén ki vē'ĩ mũ ěn han mǎn sór ke tũ ěg nĩ ha.

²⁵ Ěg tỹ Topě kuprĩg tỹ jagrě nỹtĩn kỹ, kỹ ěg tóg ti tỹ ěg mỹ nén tó mũ ěn han kǎn ke mũ sir, ti kuprĩg tỹ ěg mỹ nén tó mũ ěn ti.

²⁶ Kỹ ěg tóg sir tỹ ũn mág nỹtĩ sór ke tũ nĩ, jagně jũ han mǎn sór ke tũ ěg nĩ, jagně tũ mǎn sór ke tũ ěg nĩ gé. Vēnh jykre há hā han jé ěg tóg ke mũ.

6

Ěg tỹ jagně jagāgtān ke

¹ Inh kanhkā', kejēn ājag kāmĩ ũ tóg kygněg tĩ, vēnh vatánh tá. Kỹ ũ tỹ kygněg mũ ěn mỹ: “kygně ā mỹr,” hemnĩ, ājag tỹ Topě kuprĩg tỹ jagrě nỹtĩn kỹ. Komēr hā ti mỹ tómnĩ, ti tỹ kygněg mũ ěn ti. Kỹ vēso jykrén há han nĩ gé, ājag tỹ ti tỹ kygně ěn ri ke han tũ nĩ jé, ti kóm.

² Jagně ajudar hemnĩ, ājag mré ke ũ tỹ jagtar nĩn kỹ. Cristo tỹ ěg jyvēn mũn hā vē.

³ Kejēn ũ tóg vēsóg ki vēsỹ ũn mág han sór tĩ. Hā ra tóg tỹ nén ũ tũ nĩ. Kygněg ti tĩ, ũ tỹ tag to jykrén mũ ti. Vēnh hā mỹ tóg ón mũ sir.

⁴ Ājag jykre tugnỹm nĩ. Ti há nĩn kỹ tóg há tĩ, kỹ tóg tỹ ũn há nĩ, ũ tỹ vēnh jykre há han

mũ ěn ti. Jagně mỹ: inh jykre há vỹ ā jykre há kǎfór nĩ, he tũg nĩ.

⁵ Topě hā ne ěg ki ěg jykre há ěn vэг tĩ', kar kỹ tóg ěg mré ke ag jykre ki kanhró nĩ gé, Topě ti.

⁶ Kejēn ũ tóg ājag mỹ Topě vĩ kāmén mũ. Ti mỹ ājag tỹ nén ũ nĩmnĩ, ti tỹ ājag mỹ kāmén mũ kaja ti.

⁷ Kygně tũg nĩ, ěg tỹ Topě to é he kỹn pi(jé) há nĩ'. Ěg tỹ ón kỹ: vēnh jykre há kǎgmĩ kỹ inh nĩ ha, hen kỹ tóg ěg kren han ke tũ nĩ. Topě vỹ ěg jykre ki kanhró nĩ.

⁸ Ge ti nĩgtĩ, ěg tỹ nén han mũn ti. Ěg tỹ ěg tỹ nén to én mũ ěn han kỹ ěg tóg ter ke mũ sir. Kỹ tog ěg tỹ mandioca ko vānh krān kỹ ti nin ko kỹ ti tỹ ěg tén ěn ri ke nĩ sir. Ěg tỹ Topě kuprĩg tỹ ěg mỹ nén tó mũ ěn han kỹ ěg tóg rĩr krỹg ja tũ ěn venh ke mũ, kỹ tóg ěg jakré tỹ kanēn há han kỹ ěg tỹ ko ěn ri ke nĩ sir.

⁹ Hā kỹ nén ũ há han to krónh ke tũg nĩ. Ve jé ěg tóg ke mũ, ti kanē há ěn ti, Topě tỹ ěg mỹ nén ũ há han ke ti, ěg tỹ Topě jykre há tovānh tũ nĩn kỹ.

¹⁰ Hā kỹ ěg tóg vēnh kar jagāgtān ke mũ. Kỹ tóg há tāvĩ nĩ, ěg tỹ ěg mré Jesus ki ge kỹ nỹtĩ ag jagāgtān ti.

Paulo tỹ ag jyvēn mǎn

¹¹ Ha vé, rá mág han sóg tĩ, sỹ vēsóg ki ājag mỹ rán kỹ.

¹² Ũ ag tóg ājag kutān tĩ, ājag tỹ ājag gré junun fár kym jé. Ag tỹ vēnh mỹ nén ũ há han sór vē, ha mẽ. Judeu ag tóg ěg vóg kónān tĩ, ěg tỹ fóg ag mỹ: “ājag gré junun fár kym nĩ,” he tũ to. Ũ tỹ ājag kutān mũ ag vỹ Judeu tỹ ag vóg kónān ěn ve sór tũ nĩ. Cristo tỹ cruz to sa ja ra ag vēsýrénh sór tũ nĩ, hā kỹ ag tóg ājag mỹ: “ha ājag fár kym nĩ,” he mũ. Ag vĩ jēmě tũg nĩ.

¹³ Ha vé, ag tỹ ājag gré junun fár kym ja ra ag tóg Topě tỹ vāsỹ ěg jyvēn tĩ ěn han kǎn ja tũ nĩgtĩ. Hā ra ag tóg ājag mỹ ājag tỹ vēnh kym ke ti tó mũ, ag tỹ vēnh kar mỹ ājag tỹ nén han mũ tó jé sir. Tag ki ag tóg tỹ ũn mág nỹtĩ sór mũ, vēsóg ki.

¹⁴ Ag jāvo sóg tỹ ũn mág nĩ sór tũ nĩ. Nén pir tóg inh mỹ sér tĩ, hā vỹ: ěg pā'i tỹ Jesus Cristo tỹ cruz to sa ja ěn, he mũ. Kỹ ěprā ke jykre inh mỹ tũ tĩ ha. Jesus tỹ cruz to sa kỹ

tóg inh mÿ tÿ tũ' he ja nĩ, ěprã ke jykre tÿ, Jesus ti. Kÿ sóg han sór tũ nĩ ha. Jãvo sóg cruz to sa ri ke han kÿ nĩ gé, ěprã ke jykre mÿ sóg hur tũg. Sÿ han tũ to ken hã vë.

¹⁵ Ũ ag tóg ãjag fár kym tĩ, jãvo ũ ag tóg kym tũ nĩ gé. Hã ra tóg tÿ nén ũ tũ nĩ gé. Topě mÿ ěg há nÿtĩ, ěg tÿ ti ki ge kÿ nÿtĩn kÿ. Topě vÿ ěg han mãn, kÿ ěg tóg tÿ ũn tãg nÿtĩ ha. Tag hã ne há nĩ'.

¹⁶ Ũ tÿ vënh jykre tãg tag han mũ ag krĩ kuprãg ti tĩ, Topě ti, ũ tÿ ge jagãgtãn ti tĩ. Topě tũ ag hã vë ha. Israel pë ag hã vë sir.

¹⁷ Kÿ inh kutãn mãn tũg nĩ, inh vësÿrénh han mãn tũg nĩ. Jesus vësÿrénh ja ěn ri ke han inh mÿr, hã kÿ sóg ti ri kén kygven kÿ nĩ ha.

¹⁸ Inh kanhkã', ěg pã'i tÿ Jesus Cristo jé ãjag tar han, ti jé ãjag krĩ kuprãg. Hã vë.

PAULO TỸ CARTA HAN: ÉFESO TÁ KE AG MỸ CARTA

¹ Paulo tỹ rá vễ. Isỹ cidade tỹ Éfeso tá ke ag mỹ rán hã vễ. Jesus Cristo vỹ inh fêg', sỹ tỹ ti apóstolo jê jé, Topê tỹ isỹ apóstolo han kỹ. Hã kỹ sóg ãjag mỹ carta tag rán mũ. Topê tũ vỹ tỹ ãjag nỹtĩ, kỹ ãjag tóg cidade tỹ Éfeso tá Jesus to vễnhmãn tĩ. Jesus Cristo tovãnh tũ ãjag tóg nỹtĩ.

² Ëg jóg tỹ Topê jé ãjag tar han, ti jé ãjag krĩ kuprãg, ãg Senhor tỹ Jesus Cristo ti ke gé.

Cristo tỹ ãg mỹ vĩ há han mũ

³ Ëg kar jé Topê mỹ vĩ há han, ãg jé ti mỹ agradecer hé, ãg Senhor tỹ Jesus Cristo panh mỹ. Ëg tỹ Cristo ki ge kỹ nỹtĩn kỹ tóg ãg mỹ kanhkã ti ven sór mũ, Topê ti. Tá tóg ãg mỹ nén (ũ) há kar ven sór mũ gé, kỹ nén ù tóg ãg mỹ tũ' henh ke tũ pẽ nĩ, tá. Hã jé tóg ãg mỹ ã kuprĩg jẽnẽ, ãg tỹ ti tigrĩn nén (ũ) há kar ve jé.

⁴ Vãsỹ tóg ãg kuprẽg ja nĩ, ã tỹ nén (ũ) kar han ke to hã tóg ãg kuprẽg ja nĩ, Topê ti, ãg tỹ tỹ ti tũ nỹtĩ jé, Cristo tigrĩn. Ëg tỹ ti ri ke nỹtĩ jé tóg ãg kuprẽg, ãg tỹ kygnẽg tũ nĩ jé. Ti fe vỹ tỹ ãg nỹtĩ.

⁵ Hã kỹ tóg ãg kuprẽg, ãg tỹ tỹ ti krẽ nỹtĩ jé, Jesus Cristo tigrĩn. Ti hã ne vêsóg ki ãg kuprẽg ke to jykrén ja nĩgtĩ'.

⁶ Ëg tỹ ti mỹ vĩ há han jé tóg ãg kuprẽg. Ûn mág vỹ tỹ ti nĩ, ãg jagãgtãn tóg tĩ, hã kỹ tóg há tĩnh mũ, ãg tỹ ti mỹ agradecer hen kỹ. Ti kósın pir tigrĩn ãg tóg tỹ ti fe pẽ nỹtĩ.

⁷ Ti hã ne ãg kren han tĩ', ti kyvénh tỹ ãg jagfy kãkutẽ ja nĩn kỹ. Tỹ tóg ãg tỹ Topê vĩ mranh ja ên tỹ tũ' he ja nĩgtĩ, ã kyvénh tỹ. Topê tỹ ãg mỹ nén ù há han hã vễ.

⁸ Hã ra tóg tũ' henh ke tũ nĩ, ti tỹ ãg mỹ nén nĩm ja tag tĩ. Krĩ há ti nĩ, nén kar to jykrén há han ti tĩ, Topê ti.

⁹ Vãsỹ tóg to jykrén ja nĩgtĩ, kỹ tóg ùri ãg mỹ tó mũ sir, ti tỹ Cristo tigrĩn nén han sór mũ ti.

¹⁰ Cristo tỹ tóg ùn mág han sór mũ, vễnh kar kri ke, kanhkã tãn ag kri ke, ga kri mũ ag kri ke gé, kỹ vễnh kar vỹ tỹ ti krẽm ke

nỹtĩnh mũ. Povo pir ri ke ag nỹtĩnh mũ, kurã ên kã. Ti kurã ki tóg ti tỹ ùn mág han sór mũ ha, Topê ti.

¹¹ Ëg tỹ Cristo ki ge kỹ nỹtĩ kỹ ãg tóg venh ke mũ gé, Topê tỹ ã tũ ag mỹ nén ven ke mũ ên ti. Ëg tỹ ên ve jé Topê tóg ãg kuprẽg ja nĩ, ti tỹ ãg kuprẽg to jykrén kỹ. Nén kar to tóg jykrén há han tĩ, vêsóg ki, kỹ tóg ãg kuprẽg to jykrén ja nĩ gé,

¹² Ëg tỹ Jesus hã pin kỹ ti ki êvãnh jé. Ëg tỹ ti ki êvãnh kar kỹ ãg tóg vãhã Topê mỹ vĩ há han ki kanhró nỹtĩ. Ti hã ki êvãnh kỹ ãg tóg Topê to: “ùn mág vỹ tỹ ti nĩ,” he' he tĩ sir.

¹³ Ti kãme mẽ ja ãjag tóg nĩgtĩ gé, vễnh vĩ há ên, ti tỹ ãg krenkren han sór mũ kãme. Ti kãme ên mẽ kỹ ãjag tóg ti ki ge jêg. Kỹ Topê tóg ãjag mỹ ã kuprĩg jẽnẽ. Tỹ tóg ãjag jagrẽn há han. Ti tỹ ãjag nĩgĩg hã vễ, ã kuprĩg tỹ.

¹⁴ Ëg jagrẽ tigrĩn ãg tóg ki kanhró nỹtĩ, ti tỹ ãg mỹ ã tỹ ãg mỹ nén tó ja ên ven kãn ke ti. Kejẽn ãg tóg venh ke mũ, ha vemnĩ, ãg tỹ tỹ ti tũ nỹtĩn kỹ, kỹ tóg ãg mỹ sér tĩnh mũ. Kỹ ãg tóg ti mỹ vĩ há han ke mũ, ti tỹ tỹ ùn mág jẽn kỹ.

Paulo tỹ Topê mré vĩ mũ

¹⁵ ãjag tỹ ãg Senhor tỹ Jesus ki ge mẽ kỹ inh nĩ, ãjag tỹ jagnẽ to há nỹtĩ ti ke gé, ãjag tỹ ù tỹ Jesus ki ge kỹ nỹtĩ ag kar to há nỹtĩ ti.

¹⁶ Hã kỹ sóg ãjag to Topê mỹ: “há ti nĩ,” he tĩ. Ajag to ti mré vēmén to krónh ke vãnh inh nĩgtĩ.

¹⁷ Ëg Senhor tỹ Jesus Cristo panh mré sóg vēmén tĩ, ãg jóg mré, ùn mág pẽ ên mré. Ti mré vēmén kỹ sóg ti mỹ: “ã kuprĩg tỹ ag krĩn nĩ,” he tĩ, “ã kuprĩg tỹ ag mỹ vễnh kãmén há han nĩ, ag tỹ ã ki kanhrãn há han jé,” he sóg tĩ.

¹⁸ “Ha ag mỹ krĩ há nĩm. Ha ag kanẽ tar han, ag tỹ ve há han jé. Ag kuprẽg ja ã tóg nĩ, ã tỹ ag mỹ nĩm jé, ã tỹ nén tó ja ên ti. Ag tỹ tỹ ã tũ nỹtĩn kỹ ã tóg ag mỹ ã tũ vin ke mũ, ã tỹ nén tó mũ ên ti, hã ra tóg e tãvĩ nỹtĩ, ã tỹ ag mỹ nén vin ke mũ ên ti.

¹⁹ Tar tãvĩ ã tóg nĩ gé, kỹ ã tóg ag mỹ nén kar há han tĩ tag ki, tá ke gé, ag tỹ ã ki ge kỹ nỹtĩn kỹ. Ag mỹ tag kãmén nĩ,” he sóg tĩ, Topê mỹ.

20 Ti tar tävī nīn kŷ tóg Cristo ter kar kŷ ti rīn mǎn ja nŷgtī gé. Kŷ tóg ti mŷ: “ha inh pēgja tá nī,” he ja nī gé, kanhkā tá.

21 Ti tŷ tóg pā'i mág han, kŷ tóg tŷ pā'i kar ag kri ke jē, kanhkā tǎn kar ag kri ke, ěg tŷ ũn vэг tŷ kar ag kri ke, ũn tar ag, ũn mág ag. Tŷ tóg ag kri ke kar jē, Cristo ti, kŷ ti jiji vŷ vĕnh kar ag jygji kǎfór nī gé, ěg tŷ ũri ũn tó mŷ ag jygji, ěg tŷ kar kŷ ũn tónh ke ag jygji mré hǎ.

22 Kŷ Topē tóg ti krĕm vĕnh kar vin kǎn. Kŷ tóg tŷ vĕnh kar kri ke jē sir, Cristo ti. Kŷ tóg tŷ ěg kri jē nī sir, ěg tŷ tŷ ti tŷ nŷtīn kŷ.

23 Jǎvo ěg tóg ti há ri ke nŷtī gé sir, kŷ ěg tóg tŷ ũn pir nŷtī jagnĕ mré, Jesus ti mré ke gé. ěg há vŷ ā pir mŷ tŷ nĕn ũ tŷ nī. ěg krī mré tóg tŷ nĕn ũ pir nī, ěg há ti. Ri ke ti nī, ěg tŷ Jesus mré tŷ ũn pir nŷtī ti. Ti hǎ vŷ nĕn kar rīr han tī, Jesus ti.

2

Ti ki ge kŷ ěg rīnrīr nŷtī

1 Vǎsŷ ājag tóg nŷgme ki vǎr ke mŷ vĕ, ājag tŷ ti vī ki króm ja tŷ nīn kŷ, ājag tŷ ti vī mranh ja nīn kŷ.

2 ěn kǎ ājag tóg ěprǎ ke ag jykre pǎno jagma mŷ ja nŷgtī, Nĕn-Kórég pā'i mág ěn tŷ ājag krīn kŷ, ũ tŷ nĕn ũ ũ tǎn ag kri pā'i ěn tŷ ājag krīn kŷ. Tŷ ti krīg tǎn ag kri pā'i nī gé. ěn vŷ tŷ ũ tŷ Topē vī mranh tī ag jagrĕ nī mŷr.

3 Vǎsŷ ěg tóg tŷ ti tŷ nŷtī ja nŷgtī gé, ti krĕ ag ri ke. ěn kǎ ěg tóg ěg tŷ nĕn to ěn mŷ ěn han ja nŷgtī, ěg tŷ nĕn to jykrĕn mŷ kar ěn ti. Kŷ Topē tóg ěg vóg kónǎn mŷ vĕ, ti tŷ ag vóg kónǎn ke ěn ri ke.

4 Hǎ ra Topē tóg ěg jagāgtǎn pĕ han. ěg to tóg há tävī nī, kŷ ěg tóg tŷ ti fe nŷtī.

5 ěg tŷ ti vī mranh ja nīn kŷ ěg tóg vĕser ri ke nŷtī ja nŷgtī, hǎ ra tóg ěg rīnrīn mǎn ja nŷgtī, Cristo mré. Ti tŷ ěg jagāgtǎn kŷ tóg ěg krenkren han ja nŷgtī.

6 Cristo mré tóg ěg rīnrīn mǎn ja nŷgtī gé. Kanhkā tá tóg ěg tŷ ũn mág han ke mŷ, Jesus Cristo mré hǎ.

7 Tag ve kŷ vĕnh kar vŷ ki kanhró nŷtīnh mŷ, Topē tŷ Jesus Cristo tugrīn ěg to há tävī nīn ki. Hǎ jé tóg ěg mŷ nĕn ũ há ěn ven ke mŷ. Tŷ' he jǎvǎnh ti nī, ti tŷ ěg mŷ nĕn ven

ke ti. Ti tŷ Jesus Cristo to há nīn kŷ tóg ěg mŷ nĕn ũ há kar ven ke mŷ.

8 Ha vé, ti tŷ ěg jagāgtǎn kŷ tóg ěg kren han ja nŷgtī, ěg tŷ ti ki ge kŷ nŷtīn kŷ. ěg tŷ vĕsóg ki vĕnh kren han pijé'. Topē tŷ ěg kren han ja vĕ mŷr. Kŷ tóg ti tŷ ěg mŷ presente han ri ke nī.

9 ěg vǎsǎn pijé'. ěg tŷ ěg vǎsǎn to kren tī ra ěg Topē mŷ: “há inh nī, vǎsǎn ja inh nī, hǎ kŷ sóg kren mŷ,” hĕnh mŷ vĕ. Hǎ ra ěg pi(jé) ěg vǎsǎn to kren ke mŷ'. Ti tŷ ěg jagāgtǎn vĕ mŷr.

10 Ti hǎ ne ěg han mǎn ja nŷgtī'. Jesus Cristo tŷ tóg ěg han ja nŷgtī, ěg tŷ vĕnh jykre há han jé. Topē vŷ ěg mŷ vĕnh jykre há tag nīm kǎn, ěg tŷ vĕnh jykre tag jagma mŷ jé.

ěg tŷ Cristo mré tŷ ũn pir nŷtī

11 Ājag tŷ vǎsŷ nĕn han tī ja ěn mī ěkrĕ. Fóg vŷ tŷ ājag nŷtī, Judeu ag tŷ ũ to: “ũn grĕ junun fǎr kym ja tŷ ag,” he mŷ ěn ag vŷ tŷ ājag nŷtī. Jǎvo Judeu ag vŷ ājag grĕ junun fǎr kym tŷ. Hǎ ra ěg fǎr vŷ tŷ ěprǎ ke nī.

12 Ũ tŷ kym tī ag jǎvo ājag tóg vǎsŷ Cristo ki kagtīg ja nŷtīgtī, kŷ ājag pi(jé) tŷ Israel ag mré ke nŷtī ja nŷgtī', vǎsŷ. Topē tŷ Israel jóg'jóg ve ag mré nĕn ũ to jykrĕn mŷ ěn ki kagtīg ja ājag tóg nŷtī gé, Topē ki kagtīg ja ājag tóg nŷtīgtī gé, kŷ ājag tóg Topē tŷ ěg mŷ nĕn ven ke mŷ tag ki kagtīg ja nŷtīgtī gé.

13 ěn kǎ tóg ājag mŷ kuvar gy nī ja nŷgtī, Topē ti. Ũri tóg ājag mŷ kakó nī ha, Topē ti, ājag tŷ Jesus Cristo ki ge kŷ nŷtīn kŷ. Ti tŷ ěg jagfy ā kyvĕnh kujĕn ja tugrīn tóg ājag mŷ kakó nī ha.

14 Ũri ěg tóg tŷ povo pir ri ke nŷtī, Judeu ag, fóg ag, kanhgág ag. Topē hǎ ne ěg tŷ jagnĕ to há nŷtī tag han'. Jagnĕ fyn kŷ ěg tóg nŷtī ja nŷgtī, hǎ ra tóg vǎfynyn ěn kókĕn, Jesus ter kŷ. ěg tŷ tóg povo pir ri ke han, ěg tŷ jagnĕ kato vǎsǎn mǎn tŷ nī jé.

15 Topē tŷ vǎsŷ Judeu ag jyvĕn tī ěn tŷ tŷ' he ja tóg nŷgtī, ti tŷ ag jyvĕn kar ěn tŷ. Ā ter tugrīn tóg tŷ tŷ' he ja nŷgtī, ti tŷ ěg mŷ ũ tǎg nīm jé sir. Nĕn ũ régre tŷ tóg ũn pir han ja nŷgtī, ũ tǎg, ěg tŷ jagnĕ kato vǎsǎn mǎn tŷ nī jé. Topē tŷ nĕn to jykrĕn mŷn hǎ vĕ. Cristo tugrīn tóg ěg tŷ ũn pir han, ěg tŷ tŷ vĕnh kanhkā pir nŷtī jé.

16 Cristo vỹ ã ter kÿ Topê tỹ ãg kar to há nĩ han, Judeu mré Judeu tũ ag to. Ti tỹ cruz to sa kÿ tóg Topê tỹ ãg kato tẽ ên tỹ tũ' he kãn ja nĩgtĩ.

17 Jesus tỹ nén han jan hã vễ. Kÿ tóg Topê tỹ ãg to há nĩ tag tó ja nĩ, ãjag mỹ, ãjag tỹ tỹ Judeu tũ ra, ãg mỹ ke gé, ãg tỹ tỹ Judeu nỹtĩn mỹ.

18 Ti tigrĩn ãg tóg ãg jóg tỹ Topê mré vēmén tĩ ha, ãjag, ãjag tỹ tỹ Judeu tũ ra, ãg ke gé, ãg tỹ tỹ Judeu nỹtĩ ag ke gé. Ti kuprĩg vỹ tỹ ãn pir nĩ, hã tỹ ãg kar tóg ti mré vēmén tĩ.

19 Hã kÿ ãjag kórég tũ nỹtĩ ha. ãjag pi(jé) tỹ êmã ù tá ke nỹtĩ ha', ti mỹ, ãjag tỹ tỹ fóg nỹtĩ ra, ãjag tỹ tỹ kanhgág nỹtĩ ra ke gé. ãg mré ke vỹ tỹ ãjag nỹtĩ ha, Topê tũ vỹ tỹ ãjag nỹtĩ ha. Topê krẽ vỹ tỹ ãjag nỹtĩ ha.

20 Topê jo ãn ri ke vỹ tỹ ãg nỹtĩ. Ti nũna runrur ri ke vỹ tỹ apóstolo nỹtĩ, Topê vĩ tó tĩ ag mré. Ti nũna téj ri ke vỹ tỹ Jesus Cristo nĩ. Ti kuge ri ke vỹ tỹ ãjag nỹtĩ, ãg mré.

21 ãn nũna tigrĩn ãn tóg jẽ nĩ, kÿ tóg komẽr hã kar kÿ jẽnh mũ. Ti kar kÿ jẽ kÿ tóg tỹ ãg Senhor tũ jẽ sir.

22 Cristo vỹ komẽr hã ti han mũ, ãn kar ri ke ti, hã vỹ: ãg, he mũ. Kÿ Topê kuprĩg vỹ krẽm êmãn nĩ, ãg kãkã. ã tỹ Jesus ki ge mũ ag to ken hã vễ.

3

Paulo tỹ fóg mré kanhgág ag mỹ Jesus kãmén

1 Hã kÿ sóg Topê mré vĩ tĩ, ãn, hã vỹ: Paulo, he mũ. Se kÿ ãn jé, Jesus Cristo tigrĩn. Isỹ ãjag to há jẽn kÿ sóg se kÿ jẽ, isỹ ã tỹ Judeu jykre han tũ kar ag to há jẽn kÿ.

2 ãjag hÿn tóg Topê tỹ isar han, mũ ên mẽ. Isỹ ãjag ki rĩr jé tóg isar han, isỹ ã tỹ Judeu jykre han tũ ag ki rĩr jé.

3 Topê ne ãn mỹ ã tỹ vãsỹ nén to jykrén mũ ên tó', hã ra ãg tóg ki kagtĩg ja nỹtĩgtĩ. Vãhã tóg ãn mỹ tó mũ ha', hã kÿ sóg ãjag mỹ kãmén sĩ han huri, Topê tỹ nén ã tãg to jykrén mũ ên ti.

4 ãjag tỹ ãn vẽn hã rãn tag ve kÿ ãjag tóg venh ke mũ sir, ãn jykre ti. Cristo vỹ nén ã tãg han jé kãtĩg ja nĩ, ãn ki kanhró sóg nĩ.

5 Ti tỹ ãn mỹ tag tó to hã ag tóg ki kagtĩg ja nỹtĩgtĩ, ãg jóg'jóg ag, ãprã ke kar

ag. ãri tóg ãg mỹ tó mũ, Topê ti, ã kuprĩg tỹ. Apóstolo ag mỹ tóg tó mũ ha, ãri, ti tũ ag mỹ, ãg jyvẽn tĩ ag mỹ ke gé.

6 Ti tỹ ãg mỹ nén ã tãg tó mũn hã vễ, ha mẽ. Vãsỹ Topê tóg Judeu ag hã mỹ vĩ há han ja nĩ. ãri tóg fóg ag mỹ, kanhgág ag mỹ vĩ há han mũ ha, Judeu ag mré. ãg kar vỹ tỹ Jesus Cristo há ri ke nỹtĩ ha, ãg tỹ ti ki ge kÿ nỹtĩn kÿ. Topê tỹ Judeu ag mỹ nén tó mũ ãn, ãg tỹ Jesus Cristo tigrĩn nén venh ke mũ ãn ve kãn jé ag tóg ke mũ gé, ãg mré, fóg ag, kanhgág ag. ã tỹ Jesus ki ge kÿ nỹtĩ ag hã vỹ venh ke mũ.

7 Tag to Topê tóg ãn mỹ: “hã fóg kar ag mỹ, kanhgág kar ag mỹ tónh tĩg,” he ja nĩgtĩ, kÿ tóg tag to isar han. Ti tar ãn kÿ tóg isar han, ãn rãnhrãj to.

8 Topê tũ kãsir ag kar jakrẽm ãn nĩ, hã ra tóg isar han, sỹ fóg ag mỹ, kanhgág ag mỹ Cristo kãmén jé. Cristo tigrĩn tóg ãg mỹ nén (ũ) há tãvĩ han ke mũ, Topê ti. Hã tó sóg tĩ, vẽn hã kar mỹ.

9 Vẽn hã kar mỹ sóg kãmén tĩ, Topê tỹ nén han ke ti, ti tỹ ã tỹ vãsỹ nén to jykrén mũ tag han ke ti. Vãsỹ tóg to: “tag han jé sóg ke mũ,” he ja nĩgtĩ. Ti tỹ nén kar han tũg ki tóg to jykrén ja nĩgtĩ. Ti hã ne nén kar han'. Kÿ tóg, ã tỹ ãn han ke to jykrén mũ ra tóg ã mỹ tó ja tũ nĩ ver.

10 ãri tóg ve há tĩ ha, ti tỹ vãsỹ nén to jykrén mũ ên ti. Kanhkã tãn ag mỹ tóg ve há tĩ ha, tá pã'i ag mỹ, Topê krĩ há tag vỹ ve há tĩ ha, ti jykre há pẽ ãn ti. Ag tỹ ã tỹ Jesus ki ge kÿ nỹtĩ ag ve kÿ ag tóg Topê jykre ki kanhró nỹtĩ, kanhkã tãn ag.

11 Vãsỹ tóg to jykrén, Topê ti, ti tỹ ãg pã'i tỹ Jesus Cristo tigrĩn nén (ũ) han sór mũ ên ti.

12 Ti hã ki ãg ge kÿ nỹtĩ, hã kÿ ãg tóg jatun mỹ Topê mré vēmén tĩ ha. ãg kanẽ jun mãn ke tũ ti nĩ ha, Topê ti.

13 Hã kÿ sóg ãjag mỹ: “sỹ ãjag jagfy jagtar nĩ tag to jykrén tũg nĩ,” he mũ. ãn jagtar mĩ êkrén kÿ Jesus to krónh ke sór tũg nĩ gé. ãjag jagfy ke vễ, isỹ nén vэг mũ tag. ãn jagtar tag tigrĩn ãjag tóg nén ã há venh ke mũ, ha vemnĩ.

Cristo tỹ ãg to há nĩ

14 Hã jé sóg Topě mré vēmén tĩ. Ěg jóg vĕ mÿr.

15 Ti tigrĩn ěg tóg rĩnrĩr nÿtĩ, ěprã ke kar, kanhkã tá ke kar ke gé, kÿ tóg ěg ki rĩr tĩgtĩ.

16 Kÿ sóg ti hã mÿ to vĩ tĩ, ti tÿ ã jykre tÿ ãjag tÿ tar' he jé, ti kuprĩg tÿ. Nén ũ kar vÿ tÿ ti tũ nÿtĩ, tar ti jĕ gé, hã kÿ sóg ti hã mÿ to vĩ tĩ,

17 ti tÿ Cristo tÿ ãjag ki ěmã han jé, ãjag tÿ ti ki ge nÿtĩn kÿ. Ti tÿ ěg to há nĩ vÿ tÿ ga ri ke nĩ, ěg tÿ ti ki jãrén jé, ka jãrén ri ke. Kÿ ěg tóg ti to tar nÿtĩ sir. Hã jé sóg ti mÿ ãjag tó tĩ gé.

18 Topě tÿ ěg kren han mũ vÿ ěg tÿ nén ve vãnh ri ke nĩ, ge ve ja tũ ěg nĩgtĩ. Kÿ sóg Topě mré vēmén tĩ, ti tÿ ãjag mÿ tag kãmén kãn jé, ti tũ kar ag mÿ ke gé. Nén (ũ) téj gy ri ke ti nĩ, nén (ũ) tãpér mág ri ke, kãgnó téj gy ri ke ti nĩ, nén (ũ) krÿg ja tũ ri ke ti nĩ, Topě tÿ ěg kren han mũ tĩ. Hã kÿ ěg tóg vĕsóg ki to jykrén kãn ke tũ nĩ.

19 Cristo vÿ ěg to há tãvĩ nĩ, tag to jykrén kãn ke tũ ěg tóg nĩ gé. Kÿ sóg Topě mÿ: “ha ag mÿ tag kãmén,” he tĩ, ãjag tÿ ti hã tÿ krĩn kÿ nÿtĩ jé.

20 Ha vé, Topě hã ne tar tãvĩ nĩ'. Hã kÿ tóg ěg tÿ ti mÿ nén (ũ) to vĩn kÿ (tóg) ěg tÿ ti mÿ nén (ũ) to vĩ mũ ěn kãfór han ki kanhró nĩ. Kÿ tóg ěg tÿ nén (ũ) to jykrén mũ kãfór han ki kanhró nĩ gé.

21 Kÿ ěg tóg ti hã mÿ vĩ há han ke mũ, ěg tÿ ti ki ge kÿ nÿtĩn kÿ, ěg tÿ Jesus Cristo ki ge kÿ nÿtĩn kÿ. Ěg tÿ ti mÿ vĩ há han vÿ tũ' henh ke tũ nĩ. Hã vĕ.

4

Ěg tÿ Cristo mré tÿ ũn pir nÿtĩ

1 Kÿ sóg ãjag jyvĕn sór mũ ha. Se kÿ inh jé nĩ, ěg Senhor tigrĩn, kÿ sóg ãjag jyvĕn sór mũ. Mũ há han sórmnĩ. Topě vÿ ãjag kuprĕg, kÿ ãjag tÿ vĕnh jykre há han ke hã to vãsan nĩ.

2 Ājag régre to: “ti kãfór vÿ tÿ inh nĩ,” he sór tũg nĩ. Jagnĕ mÿ komĕr hã vĩmnĩ. Jagnĕ to fe nÿtĩmnĩ. Jagnĕ to há nÿtĩmnĩ. Jagnĕ ajudar hemnĩ.

3 Topě kuprĩg vÿ tÿ ũn pir nĩ, kÿ tóg ãjag mÿ vĕnh jykre pir nĩm tĩ. Vãsan nĩ, ãjag tÿ vĕnh jykre pir ěn hã han jé, ãjag tÿ krĩ kuprã nÿtĩn jé.

4 Topě kuprĩg pir ěn vÿ tÿ ěg kar jagrĕ nĩ, kÿ ěg kar vÿ tÿ Cristo há ri ke nÿtĩ, jávo tóg tÿ ěg krĩ ri ke nĩ, Cristo ti. Ěg kar mÿ ti nén ũ há han ke mũ, jagnĕ ri ke, ti tÿ ěg kuprĕg kÿ.

5 Kÿ ěg Senhor vÿ tÿ ũn pir nĩ gé. Ěg kar vÿ ti ki ge kÿ nÿtĩ. Ti jiji hã tÿ ěg kygpe kÿ nÿtĩ gé.

6 Ěg jóg tÿ Topě vÿ tÿ ũn pir nĩ gé, ěg kar jóg ti. Ti hã ne tÿ vĕnh kar krĩg mÿ ke nĩ'. Ěg kar tÿ tóg ã tÿ ũn han sór mũ ěn han tĩ, kÿ tóg ěg kãkã nĩ gé, ěg jóg ti.

7 Cristo vÿ ěg tar han tĩ gé, ěg kar, ti rãnrãj to. Ũ mÿ tóg vĕnh rãnrãj ũ nĩm', nĩm' he tĩ.

8 Hã kÿ tag tóg rán kÿ nĩ, ha mĕ: “ti tÿ kanhkã ra tãpry kÿ tóg ũn sigse kÿ nÿtĩ ěn ag tatĩn vyr. Kÿ tóg ěprã ke ag tar han mũ gé, ag tÿ ti rãnrãj han ke to,” he ja tóg nĩgtĩ, Tope vĩ rán ki.

9 Ha vé, ti tãpry kÿ tóg ã tÿ kanhkã ra tĩg ke to hã tóg tére ja nĩ gé, ěprã.

10 Ũn tére mũ ěn vÿ tãpry mãn ja nĩ gé, kÿ tóg kanhkã pãtén kÿ tĩ mũ sir. Kanhkã pãtén kÿ tóg kanhkã kri nĩ nĩ sir. Kanhkã kri nĩn kÿ tóg nén (ũ) kar ki kanhró nĩ sir, ti tÿ ěmã kar vĕg nĩn kÿ.

11 Ti hã ne ã rãnrãj kar to ěg tar han tĩ'. Ũ ag vin kÿ tóg ag tÿ apóstolo hyn han. Ũ tÿ tóg ti tÿ ěg jyvĕn tĩ nĩnh ke han. Ũ mÿ tóg: “ũ tÿ inh vĩ mĕ ja tũ ag mÿ inh vĩ tónh tĩg nĩ,” he mũ. Ũ tÿ tóg igreja krĕm pã'i han, ũ mÿ tóg: “ũ tÿ igreja krĕm vĕnh mãn tĩ ag mÿ inh vĩ kãmén nĩ,” he mũ gé.

12 Tag to tóg ěg tar han tĩ, ěg tÿ jagnĕ tar han jé sir, ti rãnrãj to, ěg tÿ tÿ ti jávy nÿtĩn kÿ, ti ve fag ke gé. Ěg tÿ ěg rãnrãj tag ki króm kÿ Cristo há ěn vÿ tar pĕ nĩ ha, ěg tÿ tÿ ti há nÿtĩn kÿ.

13 Ti tÿ ěg kar tÿ vĕnh jykre pir han mũ ve sór vĕ, ěg tÿ ti ki ge kÿ nÿtĩn kÿ, ěg tÿ Topě kósin ki kanhró nÿtĩn kÿ. Kÿ ěg kar vÿ ěg rãnrãj to tar nÿtĩ sir, ěg tÿ jagnĕ mré tÿ ũn pir nÿtĩn kÿ. Kÿ ěg Cristo tÿ ěprã ke jykre kãfór nĩ ěn ri ke nÿtĩ sir, kÿ ěg tóg komĕr hã ti tÿ nén kar han mũ mré ti tÿ nén to jykrén mũ ki kanhrãn kãn ke mũ gé sir, kÿ ěg tóg ũn sanh há kanhró ri ke nÿtĩ sir.

14 Ëg tỹ gĩr ri ke nỹtĩn kỹ tóg ti mỹ há tũ nĩ. Gĩr ag ne ki kagtĩg nỹtĩ'. Kỹ ag tóg, ag tỹ nén ũ mẽ kỹ ag tóg kãnhmar nén ũ nón tĩ', nén ũ nón tĩ', he' he tĩ. Ëg tỹ ti vĩ to gĩr tỹ ki kagtĩg ěn ri ke nỹtĩn kỹ tóg ěg tỹ ũn ón mũ vĩ kri nĩm ja há (tóg) tĩ, ěg tỹ ki kagtĩg nỹtĩn kỹ. Ũ ag tóg Topẽ vĩ to ón tĩ. Ag tỹ ěg tỹ ãjag mré kygnẽ han sór vễ. Vĩ há nĩ ve ag tóg nỹtĩ, kỹ tóg ěg tỹ ag vĩ kri fi ja há tĩ sir.

15 Kỹ tóg há tĩnh mũ, ěg tỹ Topẽ tỹ ki há tó mũ ěn hã han kỹ. Kỹ ěg tóg jagnẽ to há tãvĩ nỹtĩnh mũ gé. Hã tỹ ěg tar nỹtĩnh mũ. Ti ki mog ri ke vễ sir, ti tỹ tỹ ěg kri nĩ nĩn kỹ, Cristo ti.

16 Ëg tỹ tỹ ti mré ke nỹtĩn kỹ ěg tóg tỹ ti há tỹ tỹ ũn pir ěn ri ke nỹtĩ. Ëg kar vỹ rãnhraj ke mũ, ěg tỹ ti jykre pir to tar nỹtĩ jé. Ëg kar vỹ tỹ jagnẽ mré ke nỹtĩ. Ëg kar tỹ Topẽ tỹ ěg mỹ nén nĩm ja ěn to vãsãnsãn kỹ ěg tóg ũn sanh há tar ri ke nỹtĩ sir. Mog jé ěg tóg ke mũ, ěg tỹ jagnẽ to há nỹtĩn kỹ.

Cristo tỹ ěg mỹ vễnh jykre tãg nĩm

17 Kỹ sóg ãjag jyvẽn sór mũ, ěg Senhor tỹ inh mỹ: “ha ag jyvẽn,” hen kỹ. Hã kỹ sóg ãjag mỹ: “ũ tỹ Topẽ ki kagtĩg ag jykre han sór tũg nĩ,” he mũ. Kórég ti nỹ, ag jykre ti, mỹr. Ag tỹ vėsóg ki nén to jykrén mũ ěn hã han ag tóg tĩ.

18 Kutu mĩ ag mũgtĩ, ki kagtĩg ag nỹtĩ. Hã ra ag tóg ki kanhrãn sór tũ nĩ gé. Hã kỹ ag tóg Topẽ tỹ ěg mỹ vễnh jykre nĩm ěn ki kagtĩg nỹtĩ.

19 Kỹ ag tóg vễnh jykre há to é he tĩ. Mỹ'ãg vãnħ ag nỹtĩ. Ag vễnh kavénħ vỹ ag mỹ há tĩ. Vễnh jykre kórég tỹ ag kókég mũ ra tóg ag mỹ sér tũgtĩ, kỹ ag tóg to krónħ ke jãvãnħ nỹtĩ. Ke tũg nĩ, ag jãvo.

20 Cristo jykre vỹ ge tũ nĩgtĩ, ki kanhró ãjag tóg nỹtĩ.

21 Ti kãme ki kanhró kar ãjag nỹtĩ ha, ti jykre ke gé. ãjag mỹ ag tóg kãmén kãn, Jesus jykre ti, ěg tỹ ti ki ge kỹ nỹtĩn kỹ nén han ke mũ ěn ti.

22 Ti ki ge kỹ nỹtĩn kỹ ěg tóg ěg tỹ vãsỹ nén han ja ěn ri ke han mãn ke tũ nĩ ha. Tag mẽ ãjag huri. ãjag jykre si ěn tovãnħ kãn jé ãjag tóg ke mũ. ãjag tỹ ãjag jykre si jagma mũn kỹ ãjag tóg ãjag tỹ nén to ěn mũ ěn hã han

mũ ja nĩgtĩ ver. Hã ra ěg tóg tag hã to ter ke mũ.

23 Kỹ Topẽ mỹ to vĩmnĩ, ti tỹ ãjag mỹ ãjag jykre kurynh kãn jé, ti tỹ ãjag fe jãnhkrig jé.

24 Vễnh jykre tãg hã han sórmnĩ, Topẽ tỹ ěg mỹ vễnh jykre tãg nĩm mũ ěn ti. Kỹ ěg tóg ti ri ke nỹtĩnh mũ, kuryj ěg nỹtĩnh mũ ha, há ěg nỹtĩnh mũ, ti há ri ke. Kỹ ěg vễnh vĩ há hã han ke mũ.

25 Hã kỹ jagnẽ mỹ ón mãn tũg nĩ. Ki hã tómnĩ, jagnẽ mỹ. Jagnẽ mré ke vỹ tỹ ěg nỹtĩ, ěg tỹ Cristo há ri ke nỹtĩn kỹ.

26 ãjag fe tỹ gỹm ke mũ ra Topẽ vĩ mranħ tũg nĩ. ãjag tỹ jagnẽ to jũ nỹtĩn kỹ kurã ũ jãvãnħ sór tũg nĩ. Kutu yg ke to hã tỹ há' hemnĩ.

27 Japo tỹ ãjag krĩn sór mũ ra ti vĩ jẽmẽ tũg nĩ.

28 Vãsỹ ãjag kãmĩ ũ vỹ ũ tỹ nén ũ pigju (ka)mẽ ja nĩgtĩ. Kỹ ěn han mãn tũg nĩ. ãjag rãnhraj nón ãjag mũnh ke mũ ũri. ãjag nĩgé tỹ nén ũ há han nĩ, ãjag tỹ ãjag rãnhraj to nén (ũ) kar ve jé. To vãsãn nĩ, ti tỹ ãjag mỹ kén jé, ãjag tỹ ãjag tỹ nén ũ tỹ ũn jagãgtar ag jagãgtãn jé.

29 Vễnh vĩ kórég tó sór tũg nĩ. Nén ũ há hã tỹ vễmén nĩ, ãjag tỹ ãjag vĩ tỹ jagnẽ tar han jé, ãjag tỹ jagnẽ jykre kurynh jé.

30 Topẽ kuprĩg fe kaj han sór tũg nĩ gé. Topẽ vỹ ěg mỹ ã kuprĩg jẽnẽ, ti tỹ hã tũgrĩn ěg nĩgĩg jé, ěg krenkren ke to. Ti tỹ tỹ ěg jagrẽ nĩn kỹ ěg tóg ki kanhró nỹtĩ, ěg tỹ Topẽ tỹ ěg krenkren han ke kurã ěn tá krỹg mũn ki.

31 Jagnẽ to jykrén kónãn tũg nĩ. Jagnẽ to krĩ rỹ han tũg nĩ. ãjag fe tỹ gỹm ke (ka)mẽ nỹtĩ tũg nĩ. Féfén tũg nĩ. Jagnẽ to vĩ kónãn tũg nĩ. Vễnh jykre pãno tovãnħ kãn nĩ.

32 Jagnẽ to vĩ há han nĩ. Jagnẽ mỹ komẽr hã vĩmnĩ. Jagnẽ mỹ vễnh pãte fón nĩ, Topẽ tỹ Cristo tũgrĩn ěg mỹ vễnh pãte fón ja ri kén.

5

Ëg jykre tãg

1 Topẽ tỹ vễnh jykre han tĩ ěn hã han nĩ, ãjag tỹ tỹ ti fe nỹtĩn kỹ, ti krẽ.

2 Jagnẽ to há kar nỹtĩmnĩ, Cristo tỹ ěg to há nĩ ri ke. Ëg jagfy tóg vễnh fẽg. Ëg tỹ Topẽ mỹ nén (ũ) pũn ri ke ti nĩ, ti tỹ ěg jagfy vễnh

fěg mũ ẽn ti. Topě mỷ nén ger há pũr ri ke ti nĩ, kỷ tóg Topě mỷ há tĩ sir.

³ Topě tũ vỹ tỹ ãjag nỹtĩ. Hã kỷ vãnh jykre pãno tỹ vēmén sór tũg nĩ, ãjag tỹ han sór tũ nĩ jé. Ěg prũ tũ mré nỹ, ěg mén tũ mré nỹ, tỹ vēmén sór tũg nĩ, ãjag tỹ nén e hã tỹ vãsãn (ka)mě tỹ vēmén sór tũg nĩ gé.

⁴ Kỷ jagně mỷ vĩ kónãn tũg nĩ, jagně to vĩ kónãn tũg nĩ gé. Fagrĩnh mỷ vĩ tũg nĩ gé. Nén ũ kavėj tỹ vēmén tũg nĩ gé. Ěg tỹ tag tó kỹn pi(jé) há nĩ', ěg tỹ tỹ Topě krě nỹtĩn kỷ. Ěg tỹ nén tónh ken hã vế, ha mẽ: “ã tỹ inh mỷ nén jěněg mũ kar tóg inh mỷ há nỹtĩ,” he jé ěg tóg ke mũ, Topě mỷ agradecer hen kỷ.

⁵ Tag to jykren, ha mẽ: ũ tỹ ã prũ tũ fi mré nỹ mũ ẽn, ũ fi tỹ ã mén tũ mré nỹ mũ ẽn fi pi(jé) Cristo tỹ tỹ ěg pã'i nĩ venh ke mũ'. Ũ tỹ ã tỹ nén e hã tỹ vãsãn mũ ẽn pi(jé) venh ke mũ'. Ěg tỹ vãnh kãggrá to jãn ẽn ri ke ti nĩ, ěg tỹ ěg tỹ nén e hã tỹ vãsãn mũ ẽn ti. Ũ tỹ ge pi(jé) Cristo venh ke mũ', Cristo tỹ tỹ ěg pã'i nĩ ẽn ti.

⁶ Ũ tóg ón kỷ ãjag mỷ vãnh vĩ há tó sór tĩ. Ũ tỹ ge vĩ jěmě tũg nĩ, ke tũ nĩ mũ ra Topě tóg ãjag to jũnh ke mũ. Ti vĩ mranh vế mỷr, kỷ tóg ũ tỹ ge to jũnh ke mũ.

⁷ Hã kỷ ag vĩ jěmě sór tũg nĩ.

⁸ Vãsỹ ãjag tóg vãnh jykre ki kuty hã han ja nĩgtĩ gé. Hã ra Topě tóg ãjag mỷ vãnh jykre ki kurã ẽn nĩm, ãjag tỹ ti ki gen kỷ. Kỷ vãnh jykre ki kurã tag hã han sórmnĩ.

⁹ Ěg tỹ vãnh jykre ki kurã hã han kỷ ěg tóg jagně mỷ vĩ há han ke mũ, vãnh jykre kuryj. Ki hã tó jé ěg tóg ke mũ gé, jagně mỷ.

¹⁰ Vãnh jykre tỹ ěg Senhor mỷ há nỹ ẽn hã han sórmnĩ. Ěn hã to jykren mág nĩ.

¹¹ Kejěn ãjag tóg ũ vэг tĩ, hã ra tóg vãnh jykre ki kuty han tĩ. Kỷ ti mré han sór tũg nĩ. Ti mỷ: “kórég ti nĩ, tovãnh nĩ,” hemnĩ.

¹² Vãnh péju kỷ ag tóg han tĩ, vãnh jykre kórég ti. Ěg mỷ'a tóg tĩ, ěg tỹ ag tỹ nén han tĩ ẽn ve kỷ.

¹³ Kejěn tóg ag tỹ nén han mũ kri kurãg tĩ, kỷ tóg ve há tĩgtĩ, ag tỹ nén han mũ ti. Kurã ki ěg tóg ti kórég nĩ ẽn vэг tĩ.

¹⁴ Kỷ tóg há nĩ ha, ěg tỹ vãnh jykre kórég to: kórég ti nĩ, hen kỷ. Kỷ ěg tóg tovãnh sór ke mũ. Hã kỷ ěg tóg tag tó tĩ, ha mẽ: “Topě vĩ mranh sór mãn tũg nĩ. Nũgme ki kutě sór

mãn tũg nĩ. Kỷ Cristo vỹ ã mỷ jěngrě han ke mũ,” he ěg tóg tĩ, ěg jãn kỷ.

¹⁵ Ĥjag tỹ nén han mũ to jykren nĩ. Krĩ tũ nĩ sór tũg nĩ, vãnh jykre há ki vãnh kanhrãn kỷ mũmnĩ.

¹⁶ Kurã kren tũg sórmnĩ. Nén ũ jagy ve jé ěg tóg ke mũ, hã kỷ tóg há tĩ, ěg tỹ kurã kren tũ nĩn kỷ.

¹⁷ Ěg Senhor vỹ ěg tỹ nén ũ há han mũ ve sór tĩ. Kỷ ti tỹ nén (ũ) ve sór mũ tag hã to jykren nĩ, ãjag tỹ tag hã han jé.

¹⁸ Vinho tỹ vėsén tũg nĩ, tỹ vãnh pėnmãn tũg nĩ. Vãnh jykre kórég vế, ěg tỹ nén ũ fa tỹ vėsén mũ ti, tỹ vãnh pėnmãn mũ ti. Tope kuprĩg tỹ ěg fãn tag hã ne há nĩ'.

¹⁹ Jagně mré vēmén kỷ Topě tỹ jãn nĩ, ti jé tómnĩ, ěg Senhor jé ti. Ti kuprĩg vỹ ěg kanhrãn tĩ gé, ěg tỹ ěg Senhor mỷ nén tó sór mũ to, ěg tỹ ti tỹ jãn há han jé. Ěg tỹ ti mỷ: “há kar ti nĩ,” henh ke vế gé.

²⁰ Ěg jóg tỹ Topě mỷ ěg tóg tónh ke mũ, ti hã mỷ ěg tóg: “ã tỹ ěg mỷ nén ven mũ vỹ há kar nỹtĩ,” henh ke mũ, ěg tỹ ěg Senhor tỹ Jesus Cristo jyjy tón kỷ.

²¹ Ěg tỹ Cristo kaměg kỷ tóg há tĩ, kỷ tóg ěg tỹ jagně jykre mũ mũn kỷ (tóg) há tĩ gé, ěg tỹ tỹ ti mré ke nỹtĩn kỷ.

Ũ tỹ jagně mré nỹtĩ fag jykre

²² Ũn týtá fag jé ãjag mén ag jykre mũ mũjěg. Fag mỷ tóg ěg Senhor ri ke nĩ, fag mén ti.

²³ Fi krĩ vế, fi mén ti. Cristo vỹ tỹ ti ki ge kỷ nỹtĩ kar ag kri ke nĩ, kỷ ěg tóg tỹ ti há ri ke nỹtĩ, ti tỹ ěg kren han kỷ.

²⁴ Hã kỷ ěg tóg tỹ ti krēm ke nỹtĩ, Cristo krēm ke. Ge ti nĩgtĩ, ũn týtá fag jykre ti. Fag mén krēm ke vỹ tỹ fag nỹtĩ, fag tỹ ãjag mén vĩ han jé.

²⁵ Kỷ sóg fag mén ag mỷ tag tó sór mũ gé. Ĥjag prũ to há tãvĩ nỹtĩmnĩ. Cristo vỹ ěg to há nĩ, ěg tỹ tỹ ti tũ nỹtĩn kỷ. Ěg jagfy tóg vãnh fěg,

²⁶ ěg tỹ tỹ ti tũ nỹtĩ jé. Kỷ tóg ěg kıkũnh, goj tỹ ěg kygpe kỷ, ti vĩ tỹ ke gé.

²⁷ Ti tỹ ěg há nỹtĩ ve sór vế, ěg tỹ vãnhmỷ nỹtĩnh ke tũ vế, ěg kaga ri ke nỹtĩnh ke tũ vế, ěg kórég nỹtĩnh ke tũ vế gé, ěg sĩnvĩ tãvĩ nỹtĩnh ke vế, ěg tỹ tỹ ti tũ nỹtĩn kỷ. Cristo prũnh ke ri ke vỹ tỹ ěg nỹtĩ.

28 Tag ri ke han nĩ, ãjag prũ tỹ. Fag to há nỹtĩmnĩ. “Inh há ri ke vỹ tỹ fi nĩ,” hemnĩ, fag to. Ủ tỹ ã prũ fi to há nĩn kỹ tóg vĕso há nĩ sir.

29 Vĕnh ki rĩr há han ěg tóg tĩ, jěg ěg tóg tĩ, ěg tar nỹtĩ jé. ěg pi(jé) vĕnh kókén sór tĩ'. Cristo vỹ ěg tỹ ge tĩ gé. ěg ki rĩr há han tóg tĩ gé.

30 Ti há vỹ tỹ ěg nỹtĩ, ěg kar, ěg tỹ ti ki ge kỹ nỹtĩn kỹ.

31 Tag vỹ rán kỹ nĩ, ha mĕ: “ũn gré tóg ã prũ fi to ã panh ré kỹ tĩ mũ, ã mỹnh fi ré kỹ ke gé. Ā prũ fi mré tóg tĩnh mũ. Fi mré tóg tỹ ũn pir nĩ sir, ti prũ fi mré,” he ja tóg nĩgtĩ, Topĕ vĩ rán ki.

32 Tag vỹ tỹ nĕn ũ sĩnvĩ pĕ nĩ. Kỹ tóg Cristo to rán kỹ nĩ gé, ti tỹ ũ tỹ ti ki ge kỹ nỹtĩ ag mré tỹ ũn pir nĩn kỹ.

33 Hã ra tóg ěg mỹ rán kỹ nĩ gé, ěg tỹ ěg prũ fag to há nỹtĩ jé, ěg tỹ vĕnh ki rĩr há han mũ tag ri ke. Kỹ tóg fag mỹ rán kỹ nĩ gé, fag tỹ ãjag mén vĩ kỹ jĕmĕn jé.

6

Ěg han mũ fag to vĕnh jykre

1 Kỹ sóg ãjag krĕ mỹ tag tó mũ, ha mĕ. “Ājag han mũ fag vĩ kri fimnĩ,” he sóg mũ, ag mỹ. Há ti nĩ, ěg Senhor jykren ha vĕ.

2 Ājag han mũ fag kamĕg nĩ. Topĕ tỹ ěg mỹ tag tó kỹ tóg ěg mỹ nĕn ũ há tó mũ gé, hã vỹ:

3 “ã han mũ fag kamĕg nĩ, ã tỹ tĩg há han jé, ã tỹ ga kri tĩg mág han jé,” he ja tóg nĩ, Topĕ ti.

4 Kỹ sóg ũn sanh ag mỹ: “ãjag krĕ mỹ vĩ tar pĕ han tũg nĩ, ag tỹ ãjag to jũ tũ nĩ jé,” he mũ gé. Ājag krĕ jyvĕn nĩ, ag mỹ ěg Senhor jykre kãmĕn nĩ, ag tỹ mũ mũn jé.

Camarada ag tỹ ãjag patrão mré nỹtĩ jykre

5 Ājag kãmĩ ũ ag tóg patrão krĕm nỹtĩ gé, fagrĩnh mỹ ti mỹ ti rãnrãj han tĩn kỹ. Ājag patrão vĩ kri fimnĩ. Ti kamĕg nĩ, ti to jũrn kemnĩ. Ti rãnrãj ki rĩr há han nĩ, ãjag tỹ Cristo rãnrãj ki rĩr tĩ ěn ri ke.

6 Ủ tóg kejĕn ti patrão tỹ ti mỹ vĩ há han hã jé (tóg) ti patrão tũ ki rĩr tĩ, ón kỹ. Tag han tũg nĩ. Ājag patrão tũ ki rĩr pĕ han nĩ, ãjag tỹ

tỹ Cristo camarada nỹtĩn kỹ, Topĕ jykre tỹ ãjag mỹ sér nĩn kỹ.

7 Ājag patrão rãnrãj ki rĩr kỹ mỹ sér nỹtĩmnĩ. Ājag tỹ ěg Senhor rãnrãj ki rĩr vĕ, ãjag tỹ ãjag patrão rãnrãj ki rĩr kỹ.

8 Ha vé, ěg tỹ nĕn ũ há han kỹ ěg tóg ti kaja venh ke mũ, kanhkã tá. ěg Senhor vỹ ěg mỹ ti kaja ven ke mũ, ti camarada ag mỹ, ag patrão mỹ ke gé, ti ki ge kỹ nỹtĩ kar ag mỹ.

9 Ājag kãmĩ ũ vỹ tỹ patrão nỹtĩ, kỹ ãjag camarada vỹ nỹtĩ, ãjag krĕm. Ag to há nỹtĩmnĩ. Ag mỹ vĩ kónãn tũg nĩ. ěg Senhor vỹ kanhkã tá nĩ. Ājag pã'i vĕ, ãjag camarada pã'i vĕ gé hã ra, ũ tỹ kanhkã tá nĩ ti. Ti mỹ ěg tóg tỹ ũn pir nỹtĩ, tag ki ũn mág mré ũn kãsir ag.

Topĕ tỹ ěg tỹ Japo katō vãsãnsãn jafã vin sór

10 Kỹ sóg ãjag mỹ tag tó sór mũ gé ver, ha mĕ. ěg Senhor ki ge kỹ nỹtĩ to tar nỹtĩmnĩ. Tar ti nĩ, kỹ tóg ěg tar han ki kanhró nĩ gé.

11-12 Tag ki ěg vĕnh génh han tĩ, ěg tỹ Japo kato vãsãnsãn kỹ nỹtĩn kỹ. Hã ra Topĕ tóg ěg mỹ ěg tỹ ti kato vãsãnsãn jafã nĩm tĩ. Kỹ mãn nĩ, Topĕ tỹ ěg mỹ ti kato vãsãnsãn jafã nĩm mũ ěn ti, kỹ Japo tóg ěg tỹ hĕ ri kenh ke tũ nĩ. Tar jé ěg tóg ke mũ ha. ěg pi(jé) ěprã ke ag kato vãsãnsãn tĩ', ěg pi(jé) ěg mré ke ag kato vãsãnsãn tĩ'. Pã'i ag nỹtĩ, ũ tỹ ěg kato vãsãnsãn mũ ag, hã ra ěg tóg ag vég tũ nĩgtĩ. Kutỹ tãn ag vĕ, ga to pã'i ag vĕ gé. Kanhkã krĕm ag ěmã nỹtĩ gé. Kórég kar ag nỹtĩ.

13 Kỹ mãn kãn nĩ, Topĕ tỹ ěg mỹ nĕn tỹ ag kato vãsãnsãn jafã vin sór mũ ěn ti, ãjag tỹ ag kato vãsãnsãn to tar nỹtĩ jé. Kejĕn ag tóg ěg kato vãsãn mág han ke mũ. Kurã ěn kã ag tóg ěg tỹ hĕ ri kenh ke tũ nĩ, Topĕ tỹ ěg tar han kỹ, ti tỹ ěg mỹ ěg tỹ ag kato vãsãnsãn jafã ěn vin kỹ.

14 Hã kỹ tar nỹtĩmnĩ. ěg Senhor vỹ ón vãnh nĩ. Ti ón vãnh vỹ ěg vĕsóg fĩn ja mág ri ke nĩ. Tỹ vĕsóg fĩn ri ke han nĩ, ti ón vãnh ri ke han to ken hã vĕ. Vĕnh jykre kuryj vỹ tỹ soldado tỹ camisa tỹ ferro ri ke nĩ. ěn tu ri ke han nĩ, vĕnh jykre kuryj han to ken hã vĕ.

15 ěg tỹ Topĕ vĩ sér tó sór mũ vỹ ěg pĕn né, ěg pĕn to ró ri ke nĩ, ěg tỹ vĕnh kar mỹ Topĕ tỹ ěg krĩ kuprãg ke mũ tónh ke mũ tag ti. ěn

rĩnh ri ke han nĩ, vẽn kar mỹ Topẽ vĩ kãmén to ken hã vễ.

¹⁶ Ëg tỹ ti ki rã kỹ tóg soldado tỹ vễjy ven jafã ma tĩ ãn ri ke nĩ. Satanás tỹ ãg kato vãsãn kỹ tóg ti tỹ no tỹ ãg to pẽg grug ri ke nĩ. Ëg tỹ vễjy ven jafã tỹ vễjy ven kỹ tóg tỹ nhyn ke tĩ, ti no gru ãn tỹ. Ëg tỹ Jesus ki rã to ken hã vễ.

¹⁷ Ëg kren han ke vỹ soldado sãpe ri ke nĩ, sãpe tỹ ferro ãn ri ke. Kỹ Topẽ vỹ vỹ rógro ri ke nĩ gé. Topẽ kuprĩg vỹ ãg mỹ kãmén tĩ', Topẽ vỹ ti. Topẽ tỹ ãg mỹ Japo kato vãsãnsãn jafã vin ke mũn hã vễ.

¹⁸ Kỹ Topẽ mré vēmén nĩ gé, ti mỹ nén kar to vĩmnĩ. Ti kuprĩg vỹ ãg jagfy vỹ tĩ gé. Topẽ mré vỹ to krónh ke tũg nĩ. Ëg tỹ to krónh ken kỹ tóg ãg nũr ri ke nĩ sir. Ke tũg nĩ. Ëg mré ti ki ge kỹ nỹtĩ kar to vĩmnĩ.

¹⁹ Kỹ inh jagfy ti mré vēmén nĩ gé. Topẽ vỹ tó sóg tĩ. Kỹ inh mré to vĩmnĩ, sỹ tó há han jé, isỹ inh kato vãsãnsãn mũ ag kamẽg tũ nĩ jé, isỹ vẽn kar mỹ Topẽ tỹ nén han sór mũ ãn kãmén há han jé, vẽn vỹ sér ãn.

²⁰ Topẽ vỹ inh mỹ tag nĩm ja nĩ, sỹ han jé, hã ra sóg ver se kỹ jẽ. Kỹ tóg sỹ ag kamẽg tũ nĩnh há tĩ, sỹ Jesus kãme tó kãn jé, sỹ ti tỹ inh mỹ: “ha ag mỹ kãmén,” he mũ tag tó kãn jé.

Paulo tỹ Tíquico jẽnẽnh ke

²¹ Kỹ tóg inh mỹ há tĩ, ãjag tỹ isỹ nén ve ja tag mẽ kãn jé, isỹ nén han mũ mré hã. Hã jé sóg ãjag mỹ Tíquico ti jẽnẽnh ke mũ. Ëg régre ã vễ gé, iso há tavĩ ti nĩ, Tíquico ti. Ëg Senhor rãnrãj han ti tĩ, ti to krónh ke tũ ti nĩgtĩ.

²² Ti hã vỹ ãjag mỹ inh kãmén ke mũ, ti tỹ ãjag fe tỹ há' he jé. Hã jé sóg ti jẽnẽnh ke mũ.

²³ Ëg jóg tỹ Topẽ jé ãjag krĩ kuprãg, ãg régre kar ag mré hã. Ti jé ãjag tỹ jagnẽ to há kar han. Ti jé ãjag tỹ ti ki rã há han, ãg jóg tỹ Topẽ ti, ãg Senhor tỹ Jesus Cristo ti ke gé.

²⁴ Topẽ jé ãjag tar han, ã tỹ ãg Senhor tỹ Jesus Cristo to há nỹtĩ ag kar, kỹ tóg tũ' he jãvãnh nĩ, ãg tỹ ti to há nỹtĩ ti.

Hã vễ.

PAULO TŶ CARTA HAN: FILIPOS TÁ KE AG MŶ CARTA

¹ Paulo tŷ rá vē, inh. Isŷ cidade tŷ Filipos tá ke ag mŷ rán hã vē. Kŷ Timóteo vŷ inh mré ājag mŷ jēnēg mŷ gé, vēnh rá tag ti, inh mré Jesus Cristo mŷ rānrāj tŷ tag ti. Isŷ ājag mŷ ti rá tag jēnē vē, ājag tŷ tŷ Jesus Cristo ki ge kŷ nŷtŷn kŷ. Kŷ sóg ājag pā'i ag mŷ jēnēg mŷ gé, ũ tŷ ājag ki rŷr tŷ ag mŷ ke gé.

² Ēg jóg tŷ Topē jé ājag tar han, ti jé ājag krŷ kuprāg, ěg Senhor tŷ Jesus Cristo ke gé.

Paulo tŷ Topē mré vŷ

³ Ājag to sóg Topē mré vŷ há han tŷ, sŷ ājag mŷ ěkrén kŷ.

⁴ Sŷ ājag to Topē mré vŷ kŷ inh fe tóg mrin ke tŷ. Inh mŷ tóg sér tŷ, sŷ ājag mŷ ěkrén kŷ.

⁵ Ājag tŷ inh mré Jesus kāmén kŷ tóg inh mŷ há tŷ, ājag tŷ inh mré ti to tar nŷtŷn kŷ. Kŷ sóg Topē mŷ vŷ há han tŷ, ājag to. Isŷ ājag mŷ ti vŷ tó vén kŷ ājag tóg kānhmar inh mré ti kāmén ja nŷgtŷ, kŷ ājag tóg ũri ti vŷ tó há han tŷ gé. Tovānh tŷ ājag nŷ. Kŷ tóg inh mŷ sér tŷ.

⁶ Tag ki kanhró sóg nŷ, ha mē. Topē vŷ ājag krŷn rā nŷ, komēr hã, nén ũ há kar to. Kŷ tóg ājag krŷn tŷgtŷ sir, ti tŷ komēr hã ājag krŷn kán jé, Jesus Cristo kātŷg mán ke kurā to hã. Ti hã vŷ ājag krŷn ke mŷ, Topē ti.

⁷ Tag to sóg jykrén, sŷ ājag mŷ ěkrén kŷ. Hã ra tóg há nŷ. Inh fe vŷ tŷ ājag nŷtŷ. Inh hã mré tóg ājag tar han tŷ, ěg Senhor ti. Hã kŷ ājag tóg inh mré jagāgtar nŷtŷ, inh se kŷ jē tag ti to. Isŷ vāsŷ kavár kŷ jē ja nŷn kŷ sóg ag mŷ Topē vŷ kāmén ja nŷgtŷ, kŷ ājag tóg inh mré to tar nŷtŷ ja nŷgtŷ gé, pā'i ag tŷ inh ki Jesus jēmēn kŷ ke gé. Kŷ ājag tóg ũri inh mré ti to tar nŷtŷ gé.

⁸ Sŷ ājag kar venh há tóg tŷ, kŷ Topē vŷ ki kanhró nŷ. Inh mŷ ājag tóg tŷ inh fe pē nŷtŷ, ěg tŷ Jesus Cristo mŷ tŷ ti fe pē ěn ri ke ājag nŷtŷ, inh mŷ.

⁹ Sŷ Topē mré vŷn kŷ sóg ti mŷ tag tó tŷ, ājag to, ha mē. “Jagnē to há ag nŷtŷ,” he sóg tŷ, Topē mŷ. “Ag tŷ komēr hã jagnē to há kar nŷtŷ han nŷ,” he sóg tŷ ājag to, Topē mŷ. “Ag kanhrān nŷ gé, ag tŷ komēr hã ā jykre ki

kanhrān kán jé, ag tŷ ki króm kán jé,” he sóg tŷ, ājag to.

¹⁰ “Ā tŷ ag kanhrān kŷ ag tóg nén (ũ) há kar ki kanhró nŷtŷn ke mŷ. Kŷ ag tóg to jykrén há han ke mŷ, ag tŷ nén ũ ve sór kŷ. “Tag vŷ há pe nŷ, tag vŷ há sŷ nŷ,” he jé ag tóg ke mŷ, ā tŷ ag kanhrān kŷ,” he sóg tŷ ājag to, Topē mŷ. Ājag tŷ tag to jykrén há nŷtŷn kŷ ājag tóg jānhkri nŷtŷn ke mŷ, kŷ ājag tóg mŷ'āg mán ke tŷ nŷ, Cristo kātŷg mán ke kurā ěn ká.

¹¹ Kŷ ājag tóg vēnh jykre há han kán ke mŷ sir, Jesus Cristo tŷ ājag mŷ ā jykre há ěn nŷm kŷ. Hã jé sóg Topē mŷ ājag tó tŷ. Ti tŷ ājag krŷ kugrynŷ kŷ vēnh kar tóg ti tŷ tŷ ũn mág nŷ venh ke mŷ. Kŷ ag tóg ti mŷ vŷ há han ke mŷ gé sir.

Jesus tŷ inh jykre

¹² Inh kanhkā', inh jagtar mŷ ra Jesus káme tóg vēnh kar kri rŷm ke mŷ. Tag to jykrén.

¹³ Vēnh kar tóg mē kán, ti vŷ ti, polícia ag mré hã, ũ tŷ palácio ki rŷr tŷ ag mré hã. Cristo tŷgrŷn sóg se kŷ jē, hã vég ag tóg mŷ.

¹⁴ Kŷ Jesus mré ke tŷ hēn ri ke ag vŷ fe tar nŷtŷ gé sir, ěg Senhor jykre to, inh se kŷ jē tag tŷgrŷn. Hã kŷ ag tóg Topē vŷ tó tŷ sir, ag tŷ to fe tar nŷtŷn kŷ, ag mŷmēg vānh nŷtŷn kŷ.

¹⁵ Ũ ag tóg iso jŷ nŷtŷ, ha kŷ ag tóg Jesus tó tŷ, ag tŷ inh ri ke han sórn kŷ. Kŷ ũ ag tóg iso há nŷtŷ, hã kŷ ag tóg ti tó tŷ sir.

¹⁶ Topē vŷ hã to sóg se kŷ jē, sŷ pā'i ag mŷ ti kāmén jé. Topē tŷ inh mŷ vēnh rānrāj nŷm hã vē. Hã vég ag tóg tŷ, ũ tŷ iso há nŷtŷ ag, kŷ ag tóg ti vŷ tó tŷ, ũ tŷ iso há nŷtŷ ag.

¹⁷ Ũ ag tóg hã ra iso jŷ nŷtŷ, hã kŷ ag tóg ón kŷ Cristo kāmén tŷ, ag tŷ inh vŷ káfór han sórn kŷ. Ag tŷ inh kato tē mŷ ag tŷ iso jŷ han sórn vēgtŷ gé, ag tŷ inh se tŷ hēn ri ke han sórn vē. Hã jé ag tóg Cristo vŷ tó tŷ.

¹⁸ Hã ra sóg ag to vēnh mŷ nŷ sórn tŷ nŷ. Cristo tó ag tóg mŷ mŷr. Ũ tóg ón kŷ tó tŷ, jo ũ tóg tó há han tŷ. Ag kar vŷ ti tó tŷ, kŷ tóg há tŷ. Hã kŷ tóg inh mŷ sér tŷ, kŷ sóg inh mŷ sér tŷ tŷ' he sórn tŷ nŷ.

¹⁹ Hã ra sóg kren ke mŷ gé, ha vemnŷ. Ki kanhró sóg nŷ. Ājag hã ne iso Topē mré vŷ

tĩ', kÿ Jesus Cristo vÿ isar han tĩ gé, ã kuprĩg tÿ. Hã kÿ sóg kren ke mũ.

²⁰ Kÿ sóg tag jãvãnh mũ, ha mẽ. Hën ri ke mũn ag tóg inh kyvãn ke mũ, hën ri ke mũn ag tóg isén ke mũ. Isÿ tag to jykrén kónãnh tũ nĩ jé, hã jé sóg ti mré vĩ tĩ. Isar han jé tóg ke mũ, sÿ nén ù kamëg tũ nĩ jé, sÿ ti kavénh tũ nĩ jé, inh mÿ'ãg tũ nĩ jé. Vënh kar tÿ isugrĩn Jesus tÿ tÿ ùn mág nĩ ven kÿ tóg inh mÿ sér tĩ.

²¹ Inh jykre hã vÿ tÿ Cristo ti nĩ, hã kÿ sóg iser kÿ ti venh tĩg ke mũ, kÿ tóg sér tĩ.

²² Kÿ sóg hã ra inh kren kÿ ti rãnhraj hã han ke mũ. Hã kÿ sóg sÿ nén han sór mũ ki kagtĩg nĩ.

²³ Inh kren ke mÿ inh mÿ hán tĩ vÿ, iser ke vó? he sóg tĩ. Iser kÿ sóg Cristo mré nĩ nĩ, kÿ tag tóg inh mÿ há pë nĩ, isÿ ti venh há tĩn kÿ.

²⁴ Jãvo isÿ ãjag mré nĩn kÿ sóg ãjag tar han ke mũ, kÿ tag tóg inh mÿ há kãfór nĩ.

²⁵ Hã tóg inh mÿ ge nĩ. Kren jé sóg ke mũ, he sóg tĩ, kÿ sóg ãjag kar mré nĩnh ke mũ. ãjag ve jé sóg ke mũ, ãjag tÿ komër hã inh vĩ mẽ kÿ ti vĩ kri fi kãn jé. Kÿ tóg ãjag mÿ sér tĩnh mũ, ha vemnĩ.

²⁶ Isÿ ãjag mré nĩ mãn ken kÿ tóg inh mÿ há tĩnh mũ. Kÿ ãjag fe tóg mrin ke tãvĩ han ke mũ, ãjag tÿ inh ve mãn kÿ. ãjag mÿ sóg tÿ ùn mág jë, Jesus Cristo tugrĩn.

²⁷ Ha vé, Cristo jykre hã han nĩ, tag hã to vãsãnsãnh nĩ. Hën ri ke mũn sóg ãjag venh kãtĩg ke mũ, hën ri ke mũn sóg ãjag venh kãtĩg ke tũ nĩ. Inh kãtĩ tũ ra jagnë mré vënh jykre pir han kÿ nÿtĩmnĩ, Jesus kãme hã tómnĩ, ti ki ge kÿ nÿtĩmnĩ. Sÿ tag mënň há tóg tĩ, ãjag to.

²⁸ Û tÿ ëg kato vãsãnsãnh mũ ag kamëg tũg nĩ, hã tugnĩn ag tóg ãjag tÿ nũgme ki vãr ke ki kanhró nÿtĩ, inferno ki. Hã tugnĩn ãjag tóg ãjag krenkren ke mũ ën ki kanhró nÿtĩ gé sir. Topë vÿ ëg tar han ke mũ, ëg tÿ ag tÿ hën ri ke jé gé, ù tÿ ëg kato vãsãnsãnh mũ ën ag tÿ.

²⁹ Cristo ki ge kÿ ãjag nÿtĩ, kÿ ãjag tóg ti tugrĩn jagãgtar nÿtĩnh ke mũ gé. Hã jé tóg ãjag kuprëg.

³⁰ Hã kÿ ãjag tóg inh kóm ti jagy vég tĩ gé. Ag tÿ vãsÿ inh kato vãsãnsãnh ën ve ja ãjag tóg

nĩgtĩ gé. Ûri sóg hã vég tĩ ver. Kÿ inh kóm tar nÿtĩmnĩ.

2

Topë kósin tÿ tÿ ëprã ke nĩ

¹ Ha vé, sÿ ãjag jyvën sór mũ, ha mẽ. ãjag tÿ Jesus jykre han kÿ nÿtĩ tag vÿ ãjag tar han tĩ. Ti tÿ ãjag to há nĩ tag vÿ sér tĩ. Ti kuprĩg vÿ tÿ ãjag jagrë nĩ. Kÿ ãjag tóg jagnë to há nÿtĩ gé, jagnë jagãgtãnh ãjag tóg tĩ gé.

² Kÿ inh jagãgtãnh nĩ gé, inh fe tÿ mrin kemnĩ gé, inh mÿ sér tĩ jé. Jagnë mré vënh jykre pir hã han nĩ, ha mẽ. Jagnë to há tãvĩ nÿtĩmnĩ. ãjag tÿ nén ù to jykrén kÿ jagnë mré to jykrén nĩ, ãjag tÿ vënh jykre pir hã han jé.

³ Vësÿ ùn mág han sór tũg nĩ, jagnë kãfór han sór tũg nĩ. “Tÿ inh ùn sĩ nĩ,” hemnĩ. Jagnë to: “inh kãfór ti nĩ,” hemnĩ gé.

⁴ ãjag tÿ ãjag tũ ki rĩr mré hã jagnë tũn ki rĩrmnĩ gé.

⁵ Jesus Cristo kóm ti jykre han nĩ gé, jagnë mÿ. Ti tÿ vënh jykre han hã vë, ha mẽ.

⁶ Topë hã pë ja ti nĩ mÿr, Jesus ti, ti tÿ ti mré nĩn kÿ. Hã ra tóg tá nĩ kÿ: “isũ vë, kanhkã ti, hã kÿ sóg ëprã ke ag to tĩg ke tũ nĩ,” he ja tũ nĩ.

⁷ Kanhkã tá ã tÿ nén tovãnh kãn sór ja ti nĩ, kÿ tóg ëg ri ke nĩ jé kãtĩg sór ja nĩ, hã kÿ tóg kãtĩg ja nĩ. Ëprã ke jagtar ri ke tóg nĩ, ti tÿ ëprã ke fi ki mur kÿ. Ëg tÿ ëprã ti ve kÿ tóg tÿ ëg hã pë nĩ, ti tÿ kanhkã tá tÿ Topë hã pë ja ra.

⁸ Vësÿ ùn mág han ja tũ tóg nĩ, kÿ tóg ã jóg vĩ hã han ja nĩgtĩ. Ti vĩ han kÿ tóg ter ja nĩ, cruz to sa kÿ tóg ter ja nĩ, mÿr, ha mẽ.

⁹ Hã kÿ Topë tóg ti tÿ vënh kar kãfór han sir, kÿ tóg ti jijin mũ sir, kÿ ti jygy tag tóg vënh kar jygy kãfór nĩ.

¹⁰ Ëg tÿ ti jygy mẽ kÿ vënh kar ag tóg ti krëm mügmüg ke kãn mũ sir, kanhkã tá ke kar ag, ëprã ke kar ag ke gé, vënh kuprĩg kar ag ke gé.

¹¹ Kÿ vënh kar ag tóg: “Jesus Cristo vÿ tÿ pã'i mág nĩ,” henh ke mũ sir. Tag hã tugrĩn ag tóg sir Topë to: “tÿ tóg ëg kãfór kar nĩ,” he mũ. Tag to jykrén nĩ, ãjag tÿ ti kóm han jé, Jesus Cristo kóm.

Ëg tÿ ëprã ke ag mÿ jëngrë há han

12 Inh kanhkã', ãjag ki sóg fe nĩ. Inh vĩ han ãjag tóg mũgtĩ, sỹ ãjag mré nĩn kỹ, hã ra sóg ũri ãjag mré nĩ tũ nĩ. Ge ra inh vĩ kri fi há han nĩ. Æjag krenkren ke vē, kỹ Topē jykre hã han nĩ. Topē kamēg nĩ, ãjag fe tỹ jūrũn kemnĩ. “Ti mỹ ěg to jũnh ke tũ nĩ vỹ?” hemnĩ. Kỹ ti jykre hã han nĩ.

13 Ti hã ne tóg ãjag krĩn há han tĩ', ti jykre tỹ ãjag mỹ sér tĩn jé, ãjag tỹ hã mĩ hã mũn jé.

14 Æjag tỹ ti jykre han kỹ ti jykre to vĩ vĩ he tũg nĩ, ti tỹ kejēn ãjag mỹ jagy ra. Kỹ jagnē mỹ jagnē vĩ kafān tũg nĩ gé, ti jykre to.

15 Hã tugnĩn ũ tóg ãjag to jykren kónān ke tũ nĩ, ãjag tỹ kygnēg tũ nĩn kỹ. Kỹ ãjag tóg jānhkri nỹtĩ. Kỹ ãjag tóg tỹ Topē krē nỹtĩ gé, ãjag tỹ ti jykre há ri ke nỹtĩn kỹ. Ěprā ke kar vỹ jykre pāno nỹtĩ, Topē vĩ mranh kỹ ag tóg nỹtĩ, ãjag tỹ ũn mré ga kri mũ ag. Kỹ ãjag tóg ag mỹ jēngre ri ke nỹtĩ, ãjag tỹ ag mỹ Topē vĩ kāmén kỹ, ũ tỹ ěg rĩnrĩr han mũ ěn vĩ ti.

16 Æjag tỹ tag han kỹ sóg tỹ ũn mág jēnh ke mũ gé, ãjag tigrĩn, Cristo kātĩg mǎn ke kurā ěn kǎ. Kỹ sóg ãjag to: “inh pi(jé) fagrĩnh mỹ ag to vāsān', inh pi(jé) fagrĩnh mỹ ag mỹ Topē vĩ kāmén',” hēnh ke mũ.

17 Hēn ri ke mũn ag isén ke mũ, kỹ inh kyvénh tỹ inh ki kutē kỹ tóg ěg tỹ Topē mỹ nén ũ pũn ri ke nĩnh mũ. Æjag tỹ ti ki ge kỹ nỹtĩ tigrĩn ke vē. Ge ra tóg inh mỹ sér tĩnh mũ. Inh fe tóg mrin kēnh ke mũ, ãjag kóm.

18 Kỹ tóg inh mỹ ti tỹ ãjag mỹ sér tĩnh há tĩ gé, iser ke ti.

Timóteo mré Epafrodito

19 Sỹ ãjag mỹ Timóteo jēnēnh há tóg tĩ, ěg Senhor tỹ to: “hej,” hēn kỹ. Sỹ ti jēnēnh ke vē, ti tỹ tá vỹn ke kỹ inh mỹ ãjag kāmén jé. Kỹ inh krĩ tóg ãjag to kǎnhvy' hēnh ke mũ sir, isỹ ãjag vēmé há mēn kỹ.

20 Ti hã ne tóg ãjag mĩ ěkrén mág tĩ', Timóteo ti. Ũ tóg ti ri ke tũ pe nĩ, ti tỹ ãjag to há nĩn ki.

21 Ag kar vỹ: “inh rǎnhrāj vỹ inh kutān mũ,” he kǎn mũ. Hã kỹ ag tóg Jesus rǎnhrāj han tũ nĩgtĩ.

22 Hã ra ãjag tóg Timóteo ki kanhró nỹtĩ. Inh kósin ri ke ti nĩ. Ěg krē ag vỹ ěg mré ěg rǎnhrāj han tĩ. Kỹ Timóteo vỹ inh mré Topē vĩ tó tỹ rǎnhrāj tĩgtĩ, ti tỹ tỹ inh kósin ri ke nĩn kỹ.

23 Ti hã jēnē jé sóg ke mũ, ãjag to. Hã ra sóg ver ag tỹ inh mỹ nén tónh ke jāvānh sór mũ, ũ tỹ inh ség mũ ag. Isỹ ag tỹ inh mỹ nén tó mũ mē kar kỹ sóg vāhā ti jēnēnh ke mũ.

24 Hēn ri ke mũn sóg kǎnhmar ãjag venh tĩg ke mũ gé. Ěg Senhor tỹ Jesus hã ne ki kanhró nĩ'.

25 Hã ra tóg sỹ vēsỹmér ũ jēnēnh há tĩ, ãjag to. Hã kỹ sóg Epafrodito mỹ: “ha ag to vỹn ké,” he mũ. Æjag hã ne ti jēnē ja nĩgtĩ', ti tỹ inh ki rĩr jé. Kỹ tóg inh mỹ há tĩ. Inh mré tóg Topē rǎnhrāj han tĩ mỹr. Kỹ tóg inh mré Topē vĩ to jagtar nĩ gé.

26 Hã ra tóg ãjag mĩ ěkrég mũ, Epafrodito ti. Kỹ tóg ãjag to krĩ kufy jagy nĩ sir, ãjag tỹ ti kaga mē ja ěn tigrĩn.

27 Kaga ja tóg nĩgtĩ mỹr, kỹ tóg ter kren ja nĩgtĩ. Hã ra Topē tóg ti jagāgtān, kỹ tóg há' he mũ sir. Ti ter ra sóg ijagtar tag krĩg mỹ vēsỹrénh mág ke mũ vē, hã ra Topē tóg ti jagāgtān, kỹ tóg inh jagāgtān gé.

28 Hã kỹ sóg ti mỹ: “ha tĩg, ě tĩg to fūrũn,” he mũ sir, ãjag fe tỹ mrin ke jé, ãjag tỹ ti ve kỹ. Hã kỹ inh jagtar tóg pāgsĩ' hēnh mũ gé sir.

29 Ti jun kỹ ti to mỹ sér nỹtĩmnĩ, ãjag tỹ ti ve mǎn kỹ, ěg Senhor tỹ ti jy nĩgǎn kỹ. Kỹ ti mỹ: “há tóg tĩ,” hemnĩ, ãjag mỹ sér tĩn kỹ, ti kātĩg kỹ.

30 Cristo rǎnhrāj tigrĩn tóg ter kren mỹr. Hã ra tóg tovānh ja tũ nĩ, ě ter kren mũ ra. Hã kỹ tóg inh ki rĩr há han. Æjag jēgja kǎ jēg kỹ tóg inh ki rĩr há han. Ũ tỹ ge mỹ vĩ há han nĩ.

3

Jesus tỹ ěg kurynh pē han

1 Inh kanhkã', vāhā sóg ãjag mỹ nén ũ tónh ke mũ gé sir, ha mē. Ěg Senhor ki ãjag ge kỹ nỹtĩ, hã kỹ mỹ sér nỹtĩmnĩ. Tag rán inh huri, hã ra sóg rán mǎn mũ. Sỹ ãjag mỹ tag tó to sóg krónh ke sór tũ nĩ. Æjag mỹ tóg há tĩ, sỹ ti tỹ ãjag mỹ sér nĩ to ãjag jyvēn kỹ.

2 Vēnh ki rĩr. Ón kỹ Topē vĩ tó tĩ ag vỹ junjun ke mũ, vēnh jykre pāno han mũ ag, ha vemnĩ. Inh mỹ ag tóg cachorro ri ke nỹtĩ. Ón kỹ ag tóg ãjag gré junun fár kym sór mũ. Hã kỹ vēnh ki rĩr.

³ “Ëg fár kym hã tigrĩn ãg tóg tỹ Topẽ krẽ nỹtĩ,” he ag tóg tĩ, ón kỹ. Hã tũ vẽ. Topẽ kuprĩg vỹ tỹ ãg jagrẽ nĩ, kỹ ãg tóg ãg jagrẽ tag tigrĩn Topẽ mỹ vĩ há han tĩ. Kỹ Jesus Cristo vỹ ãg mỹ tỹ ãn mág nĩ, ãg tỹ ti ki ge kỹ nỹtĩn kỹ. Hã tigrĩn ãg tóg tỹ Topẽ krẽ pẽ nỹtĩ. Ëg tỹ ãg fár kym mũ ra tóg tỹ nén ù tũ nĩ sir. Ëg fár vẽ mỹr, kỹ tóg ãg kren han ke tũ nĩ.

⁴ Ëg fár tỹ ãg kren han ki kanhró nĩ ra sóg tỹ inh kren han sór mũ vẽ. Moisés jykre hã tỹ ãg kren han ke ki kanhró nĩ ra sóg hã tỹ inh kren han sór mũ vẽ. Hã ra tóg ge tũ nỹ.

⁵ Vãsỹ inh jykre hã vẽ, ha mẽ. Isỹ kurã tỹ 8 (ke) han kỹ ag tóg inh gré junun fár kym, isỹ tỹ povo tỹ Israel krẽ nĩn kỹ, ãg jóg'jóg ve tỹ Benjamim krẽ'krẽ ag kã ù. Kỹ inh han mũ fag vỹ tỹ Hebreu pẽ nỹtĩ. Inh mog kỹ sóg tỹ Fariseu nĩ, hã ra Fariseu ag tóg Judeu ag jykre to tar tãvĩ nỹtĩ.

⁶ Sỹ ãg jykre to tar pẽ nĩn hã kỹ sóg Jesus ki ge kỹ nỹtĩ ag vóg kónãn. Topẽ tỹ Moisés mỹ vẽn jykre nĩm ja ãn ki króm kãn ja sóg nĩgtĩ mỹr. Vẽn jykre ãn mranh ja tũ sóg nĩgtĩ, ãn kã sóg tỹ ãn kuryj ja nĩgtĩ.

⁷ Hã kỹ sóg ag mỹ tỹ ãn há pẽ ja nĩgtĩ. Hã ra sóg ùri tag kar to: “nén ù tũ vẽ, inh kókén jé tóg ke mũ,” he mũ sir. Sỹ Cristo ki rã kỹ sóg ãn tovãnh kãn mũ sir.

⁸ Kỹ, hã vẽ. Inh jykre si kar tóg inh mỹ kórég nỹ, ùri, ti tỹ inh kókén kỹ. Nén pir hã ne há nỹ, hã vỹ: isỹ ãg Senhor tỹ Jesus Cristo ki kanhró nĩ jé, he mũ. Ëg tỹ nén ki kanhró kar kãfór ti nĩ, ãg tỹ ti ki kanhró nĩ ti. Tag to sóg inh jykre si ãn fón kãn. Inh mỹ tóg vẽn jãgfa prénhréj ãn ri ke nỹ, inh jykre si ãn ti, isỹ Cristo hã ki rã kỹ jẽn kỹ.

⁹ Kỹ sóg ti hã ki rã kỹ jẽ sir. ùri sóg Moisés jykre ki króm tigrĩn vêsỹ ãn mág han mãn sór tũ nĩ ha. Jesus ki rã hã tigrĩn sóg tỹ ãn mág jẽ ha. Hã tigrĩn Topẽ tóg iso: “há ti jẽ ha,” he mũ. Jesus ki rã tigrĩn ke vẽ ha.

¹⁰ Sỹ ti ki kanhrãn kỹ jẽ tag hã tóg inh mỹ há nỹ. Ti hã vỹ ã ter kar kỹ rĩr mãn, kỹ sóg ti mré rĩr mãn sór mũ gé. Hã jé sóg ti mré jagtar sór mũ gé, iser kỹ sóg ti ter ri ke han sór mũ gé.

¹¹ Sỹ rĩr mãn há tóg tĩ mỹr, iser kar kỹ. Hã jé sóg ti ri ke han sór tĩ.

Vẽnho to comparação

¹² Ver sóg ki kanhrãn kãn ja tũ nĩ, ver sóg tá krỹg ja tũ nĩ. Hã ra sóg vãsãn tĩ, sỹ komẽr hã ti ki kanhrãn kãn jé, ti tỹ inh ki kanhró nĩ ãn ri ke, isỹ tỹ ti tũ jẽn kỹ, Cristo ti.

¹³ Inh kanhkã', ver sóg tá krỹg ja tũ nĩ. Hã ra sóg tag han mũ, ha mẽ. Vêsỹjãm sóg mĩ ãkrén mãn tũ nĩ ha, vãsãn mãn', vãsãn mãn', he jé sóg ke mũ ha, isỹ kejẽn tá krỹg jé.

¹⁴ Ag tỹ jagnẽ mré pétẽ ri ke han sóg tĩ mỹr. Jagnẽ mré ag tóg pétẽ tĩ, ù tóg ganhar he sór tĩ. ãn ri ke han sóg tĩ. Inh ganho vỹ tỹ isỹ rĩr krỹg ja tũ venh ke ti nĩ. Hã jé Topẽ tóg ãg kuprẽg, Jesus Cristo tigrĩn.

¹⁵ ù tỹ Jesus to sygsanh mũ ag jé inh kóm han kãn. ù tỹ hã ra to: “hã tũ vẽ,” hen kỹ Topẽ jé ti kanhrãn.

¹⁶ Kỹ ãjag tỹ ti jykre mẽg mũ tag hã jagma mũmĩnĩ, ãjag tỹ tá junjun jé.

¹⁷ Inh kanhkã', inh jykre hã han kãn nĩ. Kỹ ù tỹ inh jykre ri ke han mũ ãn jykre tugnỹm nĩ gé, ãjag tỹ ag mré hã han jé.

¹⁸ ù ag tóg ón kỹ Jesus Cristo ki ge kỹ nỹtĩ, hã ra ag tóg ti jykre kato vãsãnsãn mũ, Jesus tỹ ãg jagfy cruz to ter mũ ra. Ag kãmén inh huri mỹr, ãjag mỹ. Tó tỹ hẽn ri ke han isóg huri. Hã ra sóg ãjag mỹ ag tó mãn ke mũ gé sir. Inh fe kaj tóg tĩ, kỹ sóg fỹ mũ sir, ag jykre to.

¹⁹ Nũgme ki ag tóg vár ke mũ, inferno ki, ha mẽ. Jẽn há tãvĩ han sór ag tóg mũ, tag hã tóg ag mỹ sér tĩ. Nén tỹ ãg mỹ'a han tĩ tag hã tóg ag mỹ sér tĩ. Ëg tỹ tag mĩ vэг tĩ ãn hã to ag tóg jykren sór tĩ.

²⁰ Ag jãvo ãg jamã vỹ tỹ kanhkã ti nĩ. Kanhkã tá tóg kãtĩg ke mũ, ãg kren han ke mũ ti, hã vỹ: ãg Senhor tỹ Jesus Cristo, he mũ. Ti hã jãvãnh ãg tóg nỹtĩ.

²¹ Ti hã ne tóg ãg han mãn ke mũ', ã kãtĩg kỹ'. Ëg tỹ ga kri mũn kỹ ãg tóg ver krój nỹtĩ, ãg tỹ tỹ ãprã ke nỹtĩn kỹ. Ti tỹ ãg han mãn kỹ, ti tỹ ãg mỹ ãg fár tãg han ken kỹ, kỹ ãg tóg ti ri ke nỹtĩn mũ, ti mág ri ke, ti tar ri ke, ti sĩnvĩ ãn ri ke. Ti hã tóg ãg tỹ ù tãg han mãn ke mũ, ti tỹ tỹ ãn tar nĩn kỹ. Ti tar tugnĩn tóg nén kar tỹ ã krẽm ke han mãn ke mũ gé.

4

Paulo tỹ ãg jyvẽn

¹ Inh kanhkã', tỹ ãjag tóg inh mỹ inh jãvy ri ke nỹtĩ, kỹ tóg sỹ ãjag venh há tĩgtĩ, sỹ ãjag to há nĩn kỹ. ãjag hã tugnĩn inh fe tóg mrin ke tĩ, ãjag hã tugrĩn sóg tỹ ùn mág jẽ. ãjag to sóg há pẽ nĩ. Hã kỹ tar nỹtĩmnĩ, ẽg Senhor jykre to.

² Vãhã sóg Evódia fi jyvẽn sór mũ, Síntique fi ke gé, ha mẽ. “Jagnẽ mré vẽn h jykre pir hã han nĩ,” he sóg mũ, ãjag mỹ. “Jesus mré ke vỹ tỹ ãjag nỹtĩ, kỹ jagnẽ kato vãsãn tũg nĩ,” he sóg tĩ.

³ Kỹ sóg ã mỹ ke mũ gé, vỹ. Inh ri kén ã tóg ẽg Senhor rãnhrãj han tĩ. Kỹ fag jyvẽn nĩ, fag tỹ jagnẽ to há nỹtĩ jé. Inh mré fag tóg vẽn kar mỹ Jesus kãmén tĩ, kỹ fag tóg Clemente mré Topẽ vĩ ti tó tĩ gé, inh mré ti tó mũ kar ag mré ke gé. Fag jygyj vỹ rãnrãn kỹ nỹtĩ, Topẽ livron ki, hã kỹ fag tóg rĩr krỹg ja tũ venh ke mũ. Hã kỹ tóg tỹ ù nỹ, fag tỹ jagnẽ to jũ ti.

⁴ Ẽg Senhor mré ke vỹ tỹ ẽg nỹtĩ, kỹ mỹ sér nỹtĩmnĩ. Tag tó inh huri, hã ra sóg tó mãn ke mũ sir, ha mẽ. Mỹ sér nỹtĩmnĩ mỹr, ha mẽ.

⁵ Vẽn kar to fe nỹtĩmnĩ. Ẽg Senhor kãtĩg mãn ke vỹ kakó tĩ ha, ha mẽ.

⁶ Krĩ kufy nỹtĩ tũg nĩ. Nén kar tómnĩ, Topẽ mỹ, ti mré vĩn kỹ. Kỹ ti mỹ nén kar to vĩmnĩ gé, ãjag tỹ nén ve sór mũ kar to. Kỹ ti mỹ nén kar to: “há ti nĩ,” hemnĩ gé, ãjag tỹ ti mỹ agradecer hen kỹ.

⁷ Kỹ Topẽ vỹ ãjag krĩ tỹ kuprã' henh ke mũ. Ẽg tỹ nén kar to jykren há ra ẽg tóg vėsóg ki ẽg krĩ kuprãg ki kagtĩg nỹtĩ. Ti hã ne ẽg fe tỹ há' he tĩ', ti hã ne ẽg krĩ kuprãg tĩ', kỹ tóg kuprã pẽ nĩgtĩ sir, ti tỹ ẽg krĩ tỹ kuprã' hen kỹ, ẽg tỹ Jesus Cristo ki ge kỹ nỹtĩn kỹ.

⁸ Inh kanhkã', vãhã sóg ãjag mỹ nén ù tó sór mũ gé. Nén ù há hã to jykren nĩ, hã vỹ: “ki hã tó,” he mũ. Ẽg tỹ nén ù to: “há ti nĩ,” he ẽn hã to jykren nĩ. Vẽn h jykre kuryj hã to jykren nĩ, nén ù jãnhkri hã to jykren nĩ. Nén ù sĩnvĩ kar to jykren nĩ gé, ki hã ke kar to. Tag kar to ẽg tóg: sér ti tĩ, he tĩ, hã kỹ to jykren mág han nĩ.

⁹ ãjag kanhrãn mág sóg huri, sỹ ãjag mỹ ti jykre kãmén kỹ. Kỹ ãjag tóg inh jykre tugnỹm ja nĩ gé. ãjag tỹ isỹ nén han mũ ẽn hã han nĩ. Kỹ ù tỹ ẽg krĩ kuprãg mũ ẽn hã vỹ ãjag tar han ke mũ, Topẽ ti.

Paulo tỹ ag mỹ agradecer he

¹⁰ Ha vé, inh fe tóg mrin ke mũ, ãjag tỹ inh mỹ nén ù jẽnẽn kỹ. Kỹ sóg to Topẽ mré vĩ há han', vĩ há han' he mũ. Inh mĩ ãjag tóg ẽkrég mũgtĩ, hã kỹ ãjag tóg inh mỹ nén ù jẽnẽn mãn. Vãsỹ ãjag tỹ inh mỹ ne jẽnẽn ke tóg tũ tĩ, hã kỹ ãjag tóg inh mỹ nén ù jẽnẽn ja tũ nĩgtĩ. Vãhã tóg jun, ãjag tỹ inh mỹ nén jẽnẽn mũ ti.

¹¹ Hã ra sóg ãjag mỹ isỹ nén ve sór mũ ẽn ti tó ja tũ nĩ. Sỹ nén vэг mũ kar vỹ inh mỹ há nỹ.

¹² Isỹ nén ù vэг tũ (hã) ra tóg inh mỹ há nỹgtĩ gé. Isỹ nén ù e vэг mũ ra tóg inh mỹ há nỹgtĩ gé. Nén kar tag ve sóg huri. Kejẽn sóg tógá nĩgtĩ, kejẽn sóg kókĩr nĩgtĩ. Kejẽn sóg nén ù kar vэг tĩ, kejẽn sóg nén ù vэг tũ nĩgtĩ.

¹³ Nén kar to sóg tar nĩ, ẽg Senhor tỹ isar han kỹ.

¹⁴ Hã ra tóg há nỹ, ãjag tỹ inh jagãgtãn kỹ, ãjag tỹ inh jagtar nĩ tag to jykren kỹ.

¹⁵ Vãsỹ ãjag tóg inh mỹ ù nĩm ja nĩgtĩ gé, isỹ ãjag mỹ Jesus kãmén ven kỹ. Sỹ ga tỹ Macedônia ki kutẽ kỹ ãjag hã tóg inh mỹ nén ù jẽnẽn ja nĩgtĩ, ãjag pir mỹ, ãjag, hã vỹ: Filipos tá ke ag, he mũ. Û pi(jé) ãjag mré isỹ nén vэг mũ to jykren ja nĩgtĩ', isỹ nén vэг tũ ẽn to ke gé. ãjag pir mỹ ãjag tóg inh mré to jykren inh hã, tag ki kanhró ãjag tóg nỹtĩ.

¹⁶ Isỹ cidade tỹ Tessalônica tá nĩn kỹ ãjag tóg inh mỹ nén ù jẽnẽn mãn ja nĩgtĩ gé, kar kỹ ãjag tóg ù jẽnẽn mãn', ù jẽnẽn mãn' he ja nĩgtĩ gé, ãjag tỹ inh ki rĩr há han jé.

¹⁷ Hã ra sóg isỹ jãnkamy venh ke ẽn to jykren sór tũ nĩgtĩ. ãjag tũ mág nỹtĩ kỹ tóg inh mỹ há tĩ.

¹⁸ Nén kar vỹ inh ki junjun há han, kỹ sóg ve kãn mũ, sỹ nén ve sór mũ ẽn ve kãn inh huri. Epafrodito vỹ inh mỹ vin kãn, ãjag tỹ inh mỹ nén jẽnẽn mũ ti. Topẽ mỹ nĩm ja vẽn, ãjag tỹ inh mỹ nén nĩm ja ti, kỹ tóg ti mỹ sér tĩ sir. Ti mỹ tóg ãjag tỹ ti mỹ nén ger há pũn ẽn kri nĩ nĩ sir, ãjag tỹ inh mỹ nén jẽnẽn mũ ẽn ti.

¹⁹ Ẽg jóg tỹ Topẽ vỹ ãjag mỹ nĩm kãn ke mũ, ãjag tỹ nén ve sór mũ ẽn ti. Ti hã ne tóg nén kar tỹ tũ nĩ', kanhkã tá nĩ ẽn ti', hã kỹ tóg ãjag mỹ nén kar nĩm ke mũ, Jesus Cristo tugrĩn.

²⁰ Ëg kar jé ãg jóg tỹ Topẽ to: “tỹ ti ãn mág nĩ, tỹ ti ãn tar nĩ,” hé, kỹ ãg tỹ ti mỹ vĩ há han vỹ tũ' henh ke tũ nĩ. Hã vễ.

Paulo tỹ ag mĩ êkrén

²¹ Ủ tỹ Jesus Cristo ki ge kỹ nỹtĩ kar ag mĩ sóg êkrég tĩ. Ëg kanhkã tỹ tag ki inh mré nỹtĩ ag vỹ ãjag mĩ êkrég tĩ gé.

²² Kar kỹ tag mĩ ủ tỹ Topẽ ki ge kỹ nỹtĩ kar ag vỹ ãjag mĩ êkrég tĩ gé, pã'i tỹ imperador ãn tỹ palácio krêm nỹtĩ ag kar ke gé.

²³ Ëg pã'i tỹ Jesus Cristo jé ãjag tar han. Hã vễ.

PAULO TÏ CARTA HAN: COLOSSOS TÁ KE AG MÏ CARTA

¹ Paulo tÏ rá vë. Topë vÏ inh fëg, sÏ tÏ Jesus Cristo apóstolo jë jé. Hã kÏ sóg ãjag mÏ carta tag rán mÏ. KÏ ãg régre tÏ Timóteo vÏ inh mré rán mÏ gé.

² Ëg tÏ cidade tÏ Colossos tá Topë tÏ ag mÏ rán hã vë, ãg kanhkã ag mÏ, ù tÏ Cristo ki ge tovãnh tÏ ag mÏ. Ëg jóg tÏ Topë jé ãjag tar han, ti jé ãjag krÏ kuprãg.

Topë kuprÏg tÏ ãg tar han

³ Ëg Senhor tÏ Jesus Cristo panh mÏ sóg vÏ há han tÏ, ãjag to, ti mÏ sóg agradecer he tÏ, kurã kar ki, sÏ Topë mré vëmén kÏ.

⁴ ãjag tÏ Jesus Cristo ki ge tag më inh, kÏ ãjag tóg nëji jagnë to há tãvÏ nÏtÏ gé, Topë ki ge kÏ nÏtÏ ag kar to ke gé.

⁵ Topë tÏ kanhkã tá ãg mÏ nén (Û) ven ke mÏ ãn hã to jykrén ãjag tóg tÏ nëji. Ti tÏ ãg mÏ nén ù ven ke mÏ më ãjag tóg huri. ãjag tÏ Cristo kãme sér ãn më kÏ ãjag tóg tag më gé.

⁶ Ga kar mÏ tóg tÏ ha, vënh vÏ há tag, hã kÏ tóg ãjag ki jun ja nÏ gé. Vënh vÏ há tag tóg Topë mÏ êkré kanë ri ke han tÏ, vënh kar tÏ ti ki ge kÏ. Hã kÏ ãjag tóg ti ki ge gé, ãjag tÏ ti vÏ më vén kÏ. Ën kã ãjag tóg Topë tÏ ãg jagãgtãn ki kanhrãn ja nÏ, kÏ ãjag tóg ki kanhró nÏtÏ ha.

⁷ Û tÏ ãjag mÏ tó vén mÏ vÏ tÏ Epafras nÏ. Jagnë to há tãvÏ ãg nÏtÏ, Epafras mré. Inh mré tóg Cristo rãnrãj han tÏgtÏ. ãjag ki rÏr há han tóg tÏ, ãjag mÏ ti vÏ kãmén kÏ. To krónh ke tÏ ti nÏgtÏ.

⁸ Ti hã vÏ inh mÏ ãjag tÏ ãg to há nÏtÏ tag tó, Topë kuprÏg tÏ ãjag tÏ ãg to há nÏtÏ han mÏ ãn ti.

⁹ Epafras vÏ më kÏ sóg ãjag jagfy Topë mré vëmén tÏ sir. Ti mÏ sóg to vÏ tÏ, ãjag tÏ ti tÏ ãjag ki nén ve sór mÏ ãn ki kanhrãn kãn jé, ti tÏ ãjag mÏ krÏ há nÏm jé, ti tÏ ã kuprÏg tÏ ãjag kanhrãn jé.

¹⁰ KÏ ãjag tóg ãg mré ãg Senhor jykre ki tÏ króm kenh ke ki kanhró nÏtÏnh mÏ gé, ãjag jykre tÏ ti mÏ há nÏn jé. Ëg tÏ vënh jykre há

han kÏ ãg tóg ti mÏ êkré kanë há ãn ri ke han tÏ. ãjag tÏ tag han kÏ tóg há tÏ. KÏ ãjag tóg Topë ki kanhrãn há han ke mÏ gé sir.

¹¹ KÏ ãjag tóg tÏ ùn tar nÏtÏnh mÏ gé sir. Ti hã ne ãjag tar han tÏ', ti tar nÏn kÏ. KÏ ãjag tóg ti to krónh ke tÏ nÏgtÏ. Vënh kar to ãjag fe nÏtÏnh mÏ.

¹² KÏ tóg ãjag mÏ sér tÏnh mÏ gé. KÏ ãjag tóg ãg jóg mÏ vÏ há han ke mÏ. Ti hã ne ãjag tÏ há' he mÏ', ãjag tÏ kanhkã ve jé. Ti tÏ ãg krÏn ken kÏ ãg tóg kurã krÏg ja tÏ ãn venh ke mÏ, kÏ ãjag tóg venh ke mÏ gé, ãg mré.

¹³ Ëg kygva tóg huri, hã kÏ ãg tóg tÏ kuty tân ag krëm ke tÏ nÏtÏ ha. Topë kósin krëm ke vÏ tÏ ãg nÏtÏ, ùri, Topë tÏ ù to: inh fe, he mÏ ãn krëm.

¹⁴ Ti hã ne ãg kren han mÏ', ti hã tugrÏn Topë tóg ãg mÏ vënh pãte fón mÏ, ãg tÏ ti vÏ mranh ja ti.

Jesus tugrÏn nén kar tóg vënh ven ke mÏ

¹⁵ Topë ri ke pë ti nÏ, ti kósin ti. Ëg pi(jé) Topë vég tÏ'. Ëg tÏ ti kósin ve kÏ ãg tóg Topë ki kanhró nÏtÏ. ã panh kósin ve vÏ tÏ ti nÏ. Topë tÏ nén (Û) kar hyn han kÏ tóg ã panh mré nÏ nÏ, ti kósin ti.

¹⁶ ã kósin tugrÏn tóg ã tÏ nén (Û) kar hyn han tÏ ãn nÏm ja nÏgtÏ gé, Topë ti. Kanhkã tá ke ãn hyn han kãn ja ti nÏgtÏ, Topë ti, ã kósin tugrÏn, ga kri ke kar hyn han ja ti nÏgtÏ gé, ãg tÏ nén vég tÏ kar hyn han ja ti nÏgtÏ gé, ãg tÏ nén ve vãnh kar hyn han ja ti nÏgtÏ gé. Pã'i kar hyn han ja ti nÏgtÏ gé, ùn tar ag kar, ùn mág ag kar hyn han ja ti nÏgtÏ, ùn kãsir kar ag mré hã. ã kósin tugrÏn tóg nén ù kar hyn han ja nÏ, kÏ tóg ti hã mÏ hyn han kãn ja nÏ, nén (Û) kar ti.

¹⁷ Nén kar tÏ vënh ven tÏg ki tóg kã nÏ nÏ, Cristo ti. Ti tugrÏn nén kar tóg vãhã vënh ven kãn tÏ.

¹⁸ Ti ki ge kÏ nÏtÏ kar ag krÏ ri ke ti nÏ, kÏ ãg tóg ti há ri ke nÏtÏ. Ûn ve vÏ tÏ ti nÏ, kÏ tóg rÏr mãn gé, ti ter kar kÏ, ãg rÏr mãn ken jo. Nén (Û) kar kri ke vÏ tÏ ti nÏ.

¹⁹ Topë mÏ tóg sér tÏ, ti kósin tÏ ti ri ke pë nÏn kÏ, ti tÏ tÏ ti ve pë nÏn kÏ.

²⁰ KÏ tóg ti ter tugrÏn vënh kar to há nÏ ha, Topë ti, Jesus tÏ cruz to sa tugrÏn, ti kyvënh jamën kÏ. KÏ Topë tóg ãg to jÏ tÏ nÏ ha, ù tÏ ga kri mÏ ag to, kanhkã tân ag to ke gé.

²¹ Hã kÿ tóg ãjag to há nĩ ha, ke gé. Vãsÿ ãjag tóg vënh jykre kórég hã han ja nĩgtĩ, hã kÿ ãjag tóg Topë kato vãsãnsã ja nÿtĩgtĩ.

²² Hã ra ti kósin tóg êg ri ke mur ja nĩ, kÿ tóg êg jagfy ter ja nĩ, hã kÿ Topë tóg ãjag to há nĩ ha, ãjag tÿ tÿ ti tũ nÿtĩ jé, ãjag tÿ há pë nÿtĩ jé, kÿ ãjag jykre si ên tóg tũ tĩ ha.

²³ Hã jé ti ki ge tovãnh tũg nĩ. Tar nÿtĩmnĩ, ti to krónh ke tũg nĩ. Æjag tÿ Jesus kãme sér ên mẽ kÿ ãjag tóg Topë tÿ êg mÿ nén (ũ) vin ke mũ ên kãme mẽ ja nĩgtĩ gé. Tag hã mĩ êkren nĩ, tovãnh tũg nĩ. Ga kri mũ kar ag vÿ mēg mũ ha, Jesus kãme sér ên. Inh rãnhraj hã vë, sÿ ag mÿ tónh ke ti, inh, hã vÿ: Paulo, he mũ.

Paulo tÿ vësÿrénh mág ja

²⁴ Æjag jagfy sóg vësÿrénh mũ. Hã ra tóg inh mÿ sér tĩ. Cristo vÿ vësÿrénh mág, êg tÿ ti ki ge jé, kÿ êg tóg ti vësÿrénh ên ri ke han ke mũ gé, ù tÿ hën ri ke ag tÿ êg tigrĩn ti vĩ ki króm sór jé.

²⁵ Topë ne inh mÿ: “ha vënh kar mÿ inh vĩ ti tóg,” he ja nĩgtĩ', sÿ ti rãnhraj ki rĩr jé, sÿ ãjag mÿ tóg jé gé, ti vĩ ti. Ti tÿ ãjag mÿ vënh vĩ jënë vë.

²⁶ Topë tóg vãsÿ ã tÿ nén han ke to jykrén ja nĩgtĩ, ã tÿ nén (ũ) kar hyn han tũg ki tóg to jykrén ja nĩgtĩ. Hã ra tóg ên kã ù mÿ tóg ja tũ nĩ ver. Vãhã tóg ù tÿ ti ki ge mũ ên ag mÿ tóg mũ, ti tÿ vãsÿ nén to jykrén ja ên ti.

²⁷ Êg hã mÿ tóg tóg mũ ha, ti tÿ povo kar mÿ nén ù há tãvĩ vin sór mũ ti, hã kÿ tóg to hã ù mÿ tóg jã tũ nĩ ver, ti tÿ êg hã mÿ tóg sór kÿ. Ti tÿ êg mÿ nén vin ken hã vë, ha mẽ: Cristo vÿ ãjag kãtã jamãn nĩ ha, hã kÿ ãjag tóg êg tÿ kãhkã tá nén venh ke ên ti venh ke mũ gé sir, êg mré, ù tÿ ti ki ge kÿ nÿtĩ ag.

²⁸ Cristo jykre tag hã tóg inh tĩ, vënh kar mÿ. Vënh kar kanhrãn há han sóg tĩ, Topë tÿ inh mÿ krĩ há nĩm jan tigrĩn. Kÿ sóg vënh kar jyvën tĩ gé, ag tÿ ti ki ge há han jé, ag tÿ kygnë sór tũ nĩ jé. Kÿ ag tóg há pë nÿtĩnh mũ, ag tÿ Cristo ki ge kÿ.

²⁹ Hã to sóg vãsãn tĩ, kÿ sóg to ron tĩ gé. Ti hã ne isar han tĩ', ti tar nĩn kÿ.

2

¹ Ha vé, ãjag jagfy sóg vënh rãnhraj mág pë to vãsãn tĩ, Laodicea tá ke ag jagfy ke gé, ù

tÿ inh ve ja tũ ag jagfy ke gé. Inh mÿ tóg há tĩ, ãjag tÿ isÿ vãsãn tag mẽn kÿ.

² “Ag tÿ tag mẽ kÿ ag hÿn tóg nén ù kamēg ke tũ nĩ, kÿ ag hÿn jagnë to há kar nÿtĩnh mũ,” he sóg tĩ. Kÿ ãjag tóg ki kanhrãn ke mũ gé, Topë tÿ nén to jykrén mũ ên ti. Inh mÿ tóg ãjag tÿ tag ki kanhrãn kãn há tĩ, inh mÿ tóg ãjag tÿ to krĩ há nÿtĩnh há tĩ. Topë tÿ nén to jykrén jan hã vÿ tÿ Cristo nĩ.

³ Êg tÿ ti ki kanhrãn kÿ êg tóg Topë ki kanhró nÿtĩnh ke mũ gé. Ti pãte êg tóg vënh vĩ sér ù ve mãn ke tũ nĩ, ti hã tigrĩn êg tóg Topë ki kanhrãn kÿ nÿtĩ.

⁴ Tag kãmén sóg mũ ãjag mÿ, ù tÿ ãjag krĩn kónãn tũ nĩ jé. ù tÿ ãjag krĩn kónãn sór mũ vĩ tóg há nĩ ve nĩ, hã ra tóg tÿ hã tũ nĩ.

⁵ Æjag vég tũ sóg nĩ. Hã ra sóg ãjag ki êkrég tĩ, kÿ tóg sÿ ãjag ve ên ri ke tĩ inh mÿ. Inh mÿ tóg sér tĩ, ãjag tÿ Cristo ki ge tovãnh tũ nĩn kÿ, ãjag tÿ ti to tar tãvĩ nÿtĩn kÿ.

Cristo jykre

⁶ Ha vé, Jesus Cristo ki ge kÿ ãjag nÿtĩ, êg Senhor ki. Kÿ ti jykre hã han nĩ.

⁷ Ti hã vÿ êg mÿ ga ri ke nĩ. Ti ki jãre han nĩ, ka jãre ên ri ke han nĩ. Kÿ tóg êg mÿ ãn tÿ kri jë jafã ri ke nĩ gé, ãn nũna tÿ kri gunh kÿ fëg ên ri ke ti nĩ gé. Ti ki ge tovãnh tũg nĩ. Tag hã mẽ ãjag, ãjag tÿ ti vĩ mẽ vën kÿ. Kÿ to tar nÿtĩmnĩ, Topë mÿ vënh vĩ há tóg kÿ.

⁸ Ha vé, vëso jykrén. Inh mÿ tóg ù tÿ ón kÿ ãjag krĩn kónãn sór ha mẽ tĩ. ù tóg krĩg tân tóg tĩ, ù tóg nén ù tân tóg tĩ gé. Nén kórég mré ke ag vë, nén ù tân kar ti. Kÿ ù tóg êprã ke jykre tóg tĩ gé. Cristo jykre tũ vë, êprã ke jykre kar ti. Hã kÿ ù tÿ ãjag mÿ tag tóg sór mũ ag vĩ jëmë tũg nĩ.

⁹⁻¹⁰ Cristo vÿ tÿ nén (ũ) kar kri ke nĩ, pã'i kar kri ke vÿ tÿ ti nĩ. Ti fãr vÿ êg ri ke ja nĩgtĩ, ti tÿ ga kri tĩ mũn kÿ, hã ra tóg tÿ Topë jë nĩ, ti fãr kãkã ti jë nĩ, Topë ti. Topë pë hã vë sir. Kÿ ãjag tóg há nÿtĩ gé sir, ãjag tÿ ti ki ge kÿ, há tãvĩ.

¹¹ Kÿ, êg tÿ êg gré junun fãr kym mũ vÿ ge nĩ, ha mẽ. Ti ki ge kÿ êg tóg êg jykre si tovãnh mũ sir. Judeu ag tóg ãjag gré junun fãr kym ja nĩgtĩ, vënh kar tÿ ag tÿ Topë jykre hã han mũ ên ki kanhró nÿtĩ jé. ùri êg tóg êg jykre si tovãnh mũ, vënh kar tÿ êg tÿ Topë jykre han mũ ki kanhró nÿtĩ jé. Êg tÿ ti mré

ter ri ke ti nĩ, ěg tỹ ěg jykre si tovãnh mũ ti, kỹ ěg tóg ěg tỹ nén ũ to én mũ ěn han mãn ke tũ nĩ. ěg tỹ Cristo mỹ vėnh fėg to ken hã vė.

¹² Ti mré ter ri ke han kỹ ěg tóg vėnh kej kãkã nỹ ri ke han mũ gé, ti mré. Vėnh kype to ken hã vė, batismo to ken hã vė, hã vỹ: ti mré vėnh kej kãkã nỹ ri ke han mũ, he mũ. Kỹ ěg tóg ti mré rĩr mãn ri ke han mũ gé sir, ěg tỹ goj kãtã kãkutė kỹ. ěg jykre si tỹ tóg hur tũ' hé, kỹ ěg rĩr mãn vė sir. Topė vỹ Cristo rĩn mãn, ti ter kỹ. ěg tỹ ti ki ge kỹ tóg ěg rĩn mãn mũ gé sir.

¹³ Vãsỹ ājag tóg vėser ri ke nỹtĩ ja nĩgtĩ. Ājag tỹ ti vĩ mranh tugrĩn, ājag tóg ājag kãgter ra mũ ja nĩgtĩ, ājag gré junun fãr kym tũ ja tugrĩn. Hã ra tóg ājag rĩn mãn ja nĩgtĩ, Cristo mré Topė ti. Ājag mỹ tóg hur vėnh pãte fón, ājag tỹ vėnh jykre kórég han ja ěn ti tỹ.

¹⁴ ěg név(e) rá ěn tỹ tóg tũ' hé huri, ěg mỹ. Rãn kỹ tóg nĩ ja nĩgtĩ, ěg név(e) ěn ti, hã vỹ: ěg tỹ ti vĩ mranh, he mũ. Tag to tóg ěg to jũ ja nĩ vė. Hã ra Cristo tóg tỹ tũ' hé. Cruz to tóg ti sa, ěg név(e) ěn ti, kỹ tóg tỹ tũ' hé. Kajãm kãn tóg huri.

¹⁵ Kỹ tóg Japo pã'i kar ag tỹ tũ' he ja nĩgtĩ gé, ũn tar ja ěn ag tỹ. Cruz to sa kỹ tóg ag tar tỹ tũ' hé, ũ tỹ ti kato vãsãnsãn mũ ěn ag tỹ, kỹ ěg kar tóg ag venh ke mũ, kỹ ěg tóg ag to é henh ke mũ sir. Cristo tóg ag pan kar kỹ ag tatĩn tĩg kãn ke mũ, nũgme ki ag vãm jé. Tag ve jé ěg tóg ke mũ.

¹⁶ Kỹ ũ tỹ vėjėn há to ājag mỹ: “ã tỹ tag kon kỹ Topė tóg ã to jũnh mũ,” hen kỹ hã ra kri nĩm tũg nĩ. Kurã kórég tó sór ag tóg tĩ gé, festa kar, kysã tãg ke gé, vėnh kãn ke kurã ke gé.

¹⁷ Vãsỹ ke ja vė, vėnh jykre tag, Cristo kãtĩg ke jo ke ja vė, tag. Cristo kãtĩg kỹ ěg tóg vėnh jykre tãg vėg nỹtĩ ha, kỹ ěg ti si tovãnh mũ sir.

¹⁸ ũ tóg ājag mỹ Topė tỹ jėnė jafã ag tó sór mũ gé. “Topė tỹ jėnė jafã vėg sóg tĩ, tag hã tóg inh mỹ sér tĩ,” he ag tóg tĩ. “Isỹ tỹ nén ũ tũ (hã) ra sóg vėg tĩ. Kỹ sóg kãnhkã tãn tag ag mỹ jãn sór tĩ,” he ag tóg tĩ, ón kỹ. Hã ra ag tóg tag hã to (ag tóg) tỹ ũn mág nỹtĩ sór mũ, ājag kãfór nỹtĩ sór ag tóg mũ.

¹⁹ Ag pi(jé) Cristo jykre han sór mũ'.

Cristo jykre hã tóg ã pir mỹ tar nĩ. ěg krĩ ri ke ti nĩ, Cristo ti, kỹ ěg tóg ti há ri ke nỹtĩ, ěg tỹ ti ki ge kỹ nỹtĩn kỹ. ěg krĩ vỹ ěg tỹ nén (ũ) han sór mũ ěn han tĩ, ěg kujej tỹ, ěg mó tỹ ke gé. Kỹ ěg há tóg mog mũ sir, ti tỹ ěg krĩ mré vėnh jykre pir han kỹ. Kỹ ěg tóg Cristo jykre han ke mũ, ti tỹ ěg krĩ ri ke nĩn kỹ. Hã ra ag tóg tag han sór tũ nĩ, ũ tỹ ājag krĩn kónãn tĩ ag.

Jesus mré ěg rĩnrĩr nỹtĩnh

²⁰ Hã kỹ ājag tóg Cristo mré ter ri ke han. Krĩg tãn kórég ag pi(jé) ājag tỹ ěn ri ke mãn mũ ha', nén ũ ũ kar tãn kórég ag ke gé. Kỹ ag jykre ěn vỹ ājag mỹ tũ' hé. Ājag tỹ ne jé han mãn sór nė? Ke tũg nĩ. Ājag pi(jé) tỹ ag mré ke nỹtĩ'. Ājag tỹ ne jé ag tỹ ājag mỹ vỹ jėmė sór nė, ag tỹ ón kỹ vėjėn há to:

²¹ “tag vóg tũg nĩ, Topė mỹn kórég nĩ, tag ko tũg nĩ, ěn vóg tũg nĩ,” hen kỹ? Ag vỹ tag jėmė tũg nĩ.

²² ěprã ke ag jykre vė, tag ti. Tag mĩ ke vė, ěg tỹ nén (ũ) vóg mũ ti. Tũg kãn jé tóg ke mũ, kejėn, hã kỹ ěg tóg Topė vỹ hã jėmėg tĩ.

²³ Ag jykre vỹ há nỹ ve nĩ. Krĩ há nỹ ve ag nỹtĩ. Kãnhkã tãn to ag há nỹtĩ, ag to ag jãn tĩ, kỹ ag tóg vėsỹ vėnh kar krėm ke nỹtĩ sór ve nĩ gé, vėsãvĩn vóg kónãn ag tóg tĩ gé. Tag hã to jykren kỹ ag tóg vėsỹ ũn mág han sór mũ jãvo. Ājag tỹ nén to én mũ ěn han ag tóg tĩ, vėnh jykre tag han kỹ, hã kỹ ag vỹ jėmė sór tũg nĩ.

3

¹ Ha vé, Cristo mré ājag tóg rĩnrĩr mãn. Hã kỹ ti jykre hã han sórmnĩ. Kãnhkã tá tóg nĩ nĩ, Topė pėgja tá ti nĩ, Cristo ti. Kỹ ti hã mĩ ěkrén nĩ, ājag tỹ ti mré tá junjun ti jé.

² ũ tỹ kynhmỹ nĩ ěn jykre hã han sórmnĩ. ěprã vėnh jykre to jykren tũg nĩ.

³ Ter jé ěg tóg ke mũ, ěg fãr tag ti. Hã ra ěg tóg Cristo mré Topė ki vėnh pėju ri ke han. Ti tỹ ěg jy nĩgãn to ken hã vė, ěg ter pė han tũ nĩ jé, ěg tỹ ti mré rĩnrĩr nỹtĩ jé.

⁴ Kejėn tóg vėnh ven ke mũ, Cristo ti, ěg rĩnrĩr han mũ ti. Kỹ vėnh kar tóg venh ke mũ, ěg tỹ ti mré rĩnrĩr nỹtĩ ti, ěg tỹ tỹ ũn mág nỹtĩ ti.

ěg jykre si mré ěg jykre tãg

⁵ Ājag jykre si tovānh nī, ājag tỹ nén to én mū ěn mỹ vĕnh nenh nī. Ēg jykre si hā vĕ, ha mĕ: ěg prū tū mré nỹ, ěg mén tū mré nỹ, nén vĕnh mỹ kar han, Topĕ tỹ nén ũ to: “han tũg nī,” he mū ra to én mū, ā tỹ nén e hā tỹ vāsān (ka)mĕ. Vĕnh kǎgrá to jān ěn ri ke ti nī, ěg tỹ ěg tỹ nén e hā tỹ vāsān sór kỹ.

⁶ Tag tugrīn Topĕ tóg ěg to jū mū, ti vī mranh hā vĕ.

⁷ Tag han ja ājag tóg nỹtĩgtī, vāsỹ, ājag tỹ vĕnh jykre kórég tag mī mūn kỹ.

⁸ Hā kỹ tag tovānh kǎn.

Fe gỹv (ka)mĕ han tũg nī. Jagnĕ to krī rỹ han tũg nī. Ũ to jykrén kónān tũg nī. Ũ mỹ vī kónān tũg nī, ũ to vī kónān tũg nī gé.

⁹ Jagnĕ mỹ ón tũg nī gé. Ājag jykre si ěn tovānh kǎn nī, kỹ tóg ěg tỹ ěg kur si nūnh ri ke nī.

¹⁰ Kỹ vĕnh jykre tǎg hā han kǎn nī gé, kỹ tóg ěg tỹ kur tǎg tu ri ke nī. Ēg tỹ tóg ũ tǎg han sór mū, Topĕ ti, ěg tỹ tỹ ti kǎnhvég ri ke nỹtĩ jé, ũ tỹ ěg han mū kǎnhmég ěn ri ke, ěg tỹ ti ki kanhrān pĕ han jé.

¹¹ Kỹ ěg tóg tỹ ũn pir nỹtĩ ha, fóg ag, Judeu ag, ũ tỹ Judeu jykre han mū ag, ũ tỹ ag jykre han tū ag ke gé, kanhgág ag, kanhgág jū ag, patrāo krĕm ke ag, ag patrāo mré hā. Ēg tỹ Cristo ki ge kỹ ěg tóg tỹ ũn pir nỹtĩ, kỹ Cristo hā vỹ tỹ ěg kar krīg mỹ ke nī.

¹² Topĕ vỹ ājag kuprĕg, ājag tỹ tỹ ti tū nỹtĩ jé, ti tỹ ājag to há tǎvī jĕn kỹ. Kỹ ti jykre hā han nī. Jagnĕ jagāgtān nī. Jagnĕ mỹ vī há han nī. Vĕsỹ ũn mág han sór tũg nī. Komĕr hā vīmnī. Jagnĕ to fen mág nỹtĩmnī.

¹³ Jagnĕ to jū tũg nī. Jagnĕ mỹ vĕnh pǎte fón nī, ũ tỹ ājag mỹ vī kórég han kỹ. Ēg Senhor vỹ ěg mỹ vĕnh pǎte fón tĩ gé, kỹ jagnĕ mỹ vĕnh pǎte fón nī, ti ri kén.

¹⁴ Ājag tỹ jagnĕ fe ri ke nỹtĩn kỹ tóg há kar tĩ. Kỹ ājag tóg vĕnh jykre pir han ke mū.

¹⁵ Cristo jé ājag krī kuprǎg, kỹ ājag tóg krī kǎnhvy nỹtĩnh mū ha. Ēg krī kuprǎ nīn kỹ ěg tóg jatun mỹ jagnĕ mré nỹtĩnh mū, ěg tỹ Cristo há ri ke nỹtĩ jé. Hā jé tóg ěg jé prĕr, Topĕ ti. Kỹ ti mỹ tag to agradecer hemnī.

¹⁶ Cristo vī hā tỹ jagnĕ mỹ tómnī, hā ki kanhrān sórmnī. Tag tỹ jagnĕ jyvĕn nī, tag hā to krī há han nī. Kỹ Topĕ mỹ vī há han nī gé. Ti mỹ jān nī, ti jé hā tómnī, ti kuprīg

tỹ ājag mỹ nén tó mū ti. Ti hā mỹ vī há han nī, ti mỹ: “inh mỹ tóg há tĩ, ā tỹ inh mỹ nén han mū ti,” hemnī.

¹⁷ Ājag tỹ nén ũ han kỹ ěg Senhor mré vĕmén kar kỹ han nī, ājag tỹ ti jykre hā han jé. Ājag tỹ nén ũ tó sór kỹ ti hā mỹ tó vĕn nī gé. Ēg Senhor tỹ Jesus jykre hā han jé ěg tóg ke mū, kỹ ěg tóg ti hā tugrīn (ěg tóg) ěg jóg tỹ Topĕ mỹ vĕnh vī há tónh ke mū gé sir, ti mỹ agradecer hen kỹ.

Ēg jykre tǎg

¹⁸ Kỹ sóg ũn mén nỹtĩ fag jyvĕn sór mū. Ājag mén jykre mī mūmnī. Ēg Senhor jykrén hā vĕ.

¹⁹ Ājag mén jyvĕn sór sóg mū gé. Ājag prū to há tǎvī nỹtĩmnī. Fag mỹ vī tar han tũg nī.

²⁰ Kỹ sóg ājag krĕ mỹ tag tó sór mū gé. Ājag han mū fag vī jĕmĕmnī. Ēg Senhor vỹ tag ve sór mū, ājag ki.

²¹ Kỹ sóg ũn sanh ag mỹ: ājag krĕ mỹ vī tar pĕ han tũg nī, ag tỹ ājag to jū tū nī jé, he mū gé. Krónh ke jé ag tóg ke mū, ājag tỹ ag mỹ vī tar pĕ han kỹ.

²² Ājag kǎmī ũ tóg patrāo mỹ rǎnrāj tĩ, fagrīnh mỹ. Ājag jyvĕn kỹ sóg ājag mỹ: ājag patrāo vī ki hā han nī, he mū. Ũ tóg kejĕn ā patrāo tỹ ti mỹ vī há han hā jé tóg ā patrāo tū ki rĩr tĩ, ón kỹ. Tag han tũg nī. Ājag patrāo tū ki rĩr pĕ han nī, ājag tỹ ěg Senhor kamĕg kỹ. Vĕnh jykre pir hā han nī, ājag patrāo mỹ.

²³ Tĩ rǎnrāj ki rĩr kỹ mỹ sér nỹtĩmnī. Ājag tỹ ěg Senhor tỹ Jesus rǎnrāj han ri ke ti nī, ājag patrāo rǎnrāj han mū ti.

²⁴ Ēg Senhor vỹ ājag mỹ ājag rǎnrāj kajām ke mū, ājag tỹ ti tū kar ag mré tá junjun ken kỹ. Tá ti vin han kỹ nỹtĩ, ti tỹ ājag mỹ nén vin ke mū ěn ti. Ājag patrāo pĕ vỹ tỹ ěg Senhor tỹ Cristo nī. Tĩ hā mỹ ājag tóg rǎnrāj tĩ.

²⁵ Ũ tỹ vĕnh jykre pǎno han mū ěn vóg kónān jé tóg ke mū, Topĕ ti, ag tỹ tỹ ũn mág nỹtĩ (hā) ra. Topĕ mỹ ěg tóg jagnĕ ri ke kar nỹtĩ, tag ki ũn mág ag mré ũn kǎsir ag. Vĕnh kar vóg kónān jé tóg ke mū, vĕnh jykre pǎno to, Topĕ ti.

4

¹ Ājag kǎmī ũ vỹ tỹ patrāo nỹtĩ, kỹ sóg patrāo hā jyvĕn sór mū ha. Ājag camarada

ag vỹ ãjag rãnrãj han tĩ. Kĩ ag mỹ vẽn h jykre kuryj han nĩ. Ag ki rĩr há han nĩ. Patrão ù vỹ tỹ ãjag krĩg mỹ ke nĩ, hã vỹ: ãg Senhor, he mũ, kanhkã tá nĩ ti. Tag to jykren.

Paulo tỹ ãg jyvẽn

² Topẽ mré vẽnén tovãnh tũg nĩ. Ti mỹ: “inh mỹ tóg há tĩ,” hemnĩ gé. Mũmẽg nĩ, ãjag tỹ ti mré vẽnén to krónh ke tũ nĩ jé.

³ Kĩ ti mré iso vẽnén nĩ gé. Topẽ vĩ tó sóg tĩ. Kĩ ti mỹ to vĩmnĩ, ag tỹ inh vĩ mẽ há han jé, sỹ ag mỹ Cristo kãmén kỹ, sỹ ag mỹ Topẽ tỹ nén han sór mũ ãn kãmén kỹ. Tag tigrĩn sóg se kỹ jẽ.

⁴ Hã ra sóg tó há han sór mũ, Topẽ tỹ inh mỹ vẽn rãnrãj tag nĩm kỹ. Hã jé iso ti mré vẽnén nĩ.

⁵ Û tỹ ãg jãvo Jesus ki ge tũ ag mỹ vĩ há han nĩ. Kurã kren tũg sórmnĩ.

⁶ Nén ù há tỹ vẽnén nĩ, vẽn kar mỹ sér tĩ jé, ag tỹ ãjag vĩ mẽn kỹ. Kỹ ãjag tóg vẽn kar mỹ kãmén há han ki kanhró nỹtĩnh mũ.

Paulo tỹ ag mũ ãkrén

⁷ Sỹ ãjag mỹ Tíquico jẽnẽ vẽ, ti tỹ ãjag mỹ isỹ nén (ũ) vég mũ kãmén kãn jé, isỹ nén (ũ) han mũ ti ke gé. ãg régre vẽ, Tíquico ti. ãg to há tãvĩ ti nĩ. ãg Senhor rãnrãj han ti tĩ, to krónh ke tũ ti nĩgtĩ.

⁸ Ti hã vỹ sỹ nén vég mũ tó kãn ke mũ, hã jé sóg ti jẽnẽg mũ, ti tỹ ãjag fe tỹ mrin ke jé.

⁹ Ti mré sóg ãjag mré ke tỹ Onésimo jẽnẽg mũ gé. ãg régre vẽ gé, ãg to há ti nĩgtĩ gé, Topẽ ki rã to krónh ke tũ ti nĩgtĩ. Ag hã ne ãjag mỹ tónh ke mũ', cidade tag ki nén kutẽ mũ ti.

¹⁰ Aristarco vỹ inh mré se kỹ jẽ gé. ãjag mũ tóg ãkrég tĩ. Marcos vỹ ãjag mũ ãkrég tĩ gé, Barnabé kanhkã ãn ti. Marcos to sóg ãjag mỹ vẽn vĩ jẽnẽ huri, ãjag tỹ ti mỹ: “ha kãrã,” he jé, ti tỹ kejẽn ãjag tá jun ti kỹ.

¹¹ Josué vỹ ãjag mũ ãkrég tĩ gé, ag tỹ ù to: Justo, he mũ tag ti. Judeu ag vẽ, Aristarco mré Marcos mré Josué ti. Inh mré ag tóg rãnrãj tĩ, Topẽ vĩ ki. Ag jãvo Judeu ù ag vỹ inh mré rãnrãj jãvãnh nỹtĩ gé. Kỹ ù tãgtũ tag ag tóg inh fe tỹ mrin ke tĩ, ag tỹ inh mré rãnrãj kỹ.

¹² Epafras vỹ ãjag mũ ãkrég tĩ gé, ãjag mré ke tag ti. Jesus Cristo rãnrãj han kỹ tóg

jẽ nĩ. ãjag to tóg Topẽ mré vẽnén tĩ, to tóg vãsãn tĩ, to krónh ke tũ ti nĩgtĩ, ãjag tỹ kygnẽg tũ nĩn jé, ãjag tỹ Topẽ tỹ ãg ki nén ve sór mũ ãn hã han sór jé, ãjag tỹ tag hã to tar nỹtĩ jé.

¹³ ãjag hã ki tóg ãkrég tĩ, tag vég sóg tĩ, kỹ tóg Laodicéia tá ke ag mũ ãkrég tĩ gé, Hierápolis tá ke ag mũ ke gé.

¹⁴ Lucas vỹ ãjag mũ ãkrég tĩ gé, médico ãn ti, ù tỹ ãg to há tãvĩ ãn ti, kar kỹ Demas ti ke gé.

¹⁵ Laodicéia tá ãg régre ag mỹ tómnĩ, sỹ ag mũ ãkrég mũ ti. Ninfa fi mũ sóg ãkrég tĩ gé, fi ãn tá vẽn mãn jafã ãn ki.

¹⁶ ãjag tỹ vẽn rãn tag to ke kar kỹ Laodicéia tá Topẽ ki ge kỹ nỹtĩ ag mỹ jẽnẽmnĩ, kỹ tá ke ag tũ to kemnĩ gé, vẽn kato, sỹ ag mỹ carta jẽnẽg mũ ti.

¹⁷ Kỹ Arquipo mỹ: ãg Senhor tỹ ã mỹ nén (ũ) tó mũ ãn han nĩ, to krónh ke tũg nĩ,” hemnĩ.

¹⁸ Vãhã sóg vêsóg ki ãjag mỹ rãn ke mũ ha', inh, hã vỹ: Paulo, he mũ. Isỹ se kỹ jẽ tag kã jatu' he tũg nĩ. Topẽ jé ãjag tar han tĩ. Hã vẽ.

PAULO TÏ CARTA HAN: TESSALÔNICA TÁ KE AG MÏ CARTA VE

¹ Paulo tÏ rá vë. IsÏ cidade tÏ Tessalônica tá ke ag mÏ rán hã vë. Tessalônica tá ãjag tóg vënh mǎn tÏ, Topë vÏ mÏ jé. Topë tÏ vÏ tÏ ãjag nÏtÏ, ãg jóg mág ti. Jesus Cristo tÏ vÏ tÏ ãjag nÏtÏ gé, ãg Senhor ti. SÏ ãjag mÏ vënh rá jënë vë, kÏ Silas vÏ jënëg mÏ gé inh mré, Timóteo ke gé. Topë mÏ sóg to vÏ tÏ, ti tÏ ãjag tar han jé, ti tÏ ãjag mÏ vënh jykre kusa nÏm jé.

Vënh kar tÏ Tessalônica tá ke ag jykre vég tÏ

² Kurã kar ki sóg ãjag to Topë mré vÏ tÏ. Ti mÏ sóg: “há ti nÏ, ã tÏ ag krÏn há han kÏ,” he tÏ, kurã kar ki.

³ SÏ ti mré vÏn kÏ sóg ãjag mÏ êkrég tÏ. Æjag tÏ ti ki ge kÏ nÏtÏn kÏ ãjag tóg nén ù há kar han mügtÏ. Æjag tÏ ti to há nÏtÏn kÏ ãjag tóg rǎnhrǎj mág han mügtÏ. Æjag tÏ ãg Senhor tÏ Jesus Cristo ve sór kÏ ãjag tóg to krónh ke tÏ nÏgtÏ. Tag mÏ sóg êkrég tÏ, kurã kar ki, sÏ Topë mré vÏn kÏ, ãg jóg mág mré.

⁴ Inh kanhkã', tÏ ãg tóg Topë fe nÏtÏ, ti tÏ ãg kuprëg ja nÏn kÏ. Tag ki kanhró ãg tóg nÏtÏ.

⁵ SÏ ãjag mré nÏn kÏ sóg ãjag mÏ Topë vÏ sér tó ja nÏgtÏ. Inh pi(jé) inh jykre tÏ vëmén ja nÏgtÏ'. Topë jykre hã tÏ sóg vëmén tÏ, Topë kuprÏg tÏ inh krÏn kÏ. Ti hã vÏ ãg tar han tÏ. Ki hã tó sóg mÏ ãjag mÏ, tag ki kanhró ãjag tóg nÏtÏ. IsÏ ãjag mré nÏn kÏ ãjag tóg inh ve ja nÏgtÏ, hã kÏ ãjag tóg inh jykre ki kanhró nÏtÏ. SÏ ãjag to há nÏn kÏ, hã kÏ sóg ãjag mÏ tó ja nÏ.

⁶ Inh ri ke han sór ãjag tóg mÏ, ãg Senhor ri ke ke gé. SÏ ãjag mÏ nén tó ja ên kri fig ãjag tóg tÏ. KÏ ãjag tóg to vësÏrénh jagy han tÏ, ùri, pâ'i ag tÏ ãjag to kórég nÏtÏn kÏ. Hã ra Topë kuprÏg vÏ tÏ ãjag jagrë nÏ, hã kÏ ãjag krÏ tóg kǎnhvÏ' he mÏ, ãjag vësÏrénh mÏ (hã) ra, êprã.

⁷ Hã kÏ vënh kar tóg ãjag tÏ nén han mÏ mëg mÏ sir, ga tÏ Macedônia tá, ga tÏ Grécia tá ke gé, ag tÏ ãjag kóm han kǎn jé sir, ù tÏ Jesus ki ge kÏ nÏtÏ kar ag ke gé.

⁸ Vënh kar vÏ ãjag tÏ nén han mÏ mëgmë kǎn huri. Topë vÏ tó ãjag tóg mÏ, hã kÏ ag tóg ga tÏ Macedônia tá mëgmë, ga tÏ Grécia tá ke gé, êmã kar mÏ hã. Æjag tÏ Topë ki ge mÏ mëgmë kǎn ag tóg huri. IsÏ ag mÏ tó sór kÏ ag tóg: “më ãg huri,” he tÏ.

⁹ KÏ ag tóg inh mÏ kǎmén mÏ, sÏ ãjag mÏ Topë vÏ tó ja ên ti. “Á vÏ kri fig ag nÏji mÏ, Tessalônica tá ke ag,” he ag tóg tÏ inh mÏ, ãjag to. “Topë ki ge kÏ ag nÏji nÏtÏ, vënh kǎggrá tÏ topë tovǎnh kÏ, ag tÏ Topë vÏ hã han jé sir, ùn rÏr mÏ vÏ ti, hã vÏ: Topë pë, he mÏ,” he ag tóg tÏ ãjag to.

¹⁰ “Ti kósin nÏji vÏn kenh ke mÏ, kanhkã tá. Ti kǎtÏg jǎvǎnh ag nÏji mÏ,” he ag tóg tÏ. “Topë nÏji ti rÏn mǎn, ti ter kar kÏ, Jesus ti. Ên nÏji ãg krenkren han mÏ, ãg tÏ Topë jÏ vég tÏ nÏ jé, Jesus kǎtÏg jǎvǎnh ag nÏji mÏ, Tessalônica tá ke ag,” he ag tóg tÏ ãjag to.

2

Paulo tÏ ag mÏ Topë vÏ tó há han

¹ Inh kanhkã', inh ve ãjag tóg, isÏ ãjag mré nÏ ja nÏn kǎ. IsÏ ãjag mÏ Topë vÏ tó kÏ ãjag tóg Topë ki rá. Tó há han ja sóg nÏ.

² Cidade tÏ Filipos tá ag tóg inh vóg kónǎn ja nÏgtÏ. Tá ag tóg iso é he ja nÏgtÏ. Tá kǎkutë kÏ sóg ãjag tá jun ja nÏgtÏ. Tag ki kanhró ãjag tóg nÏtÏ. Ge ra sóg ãjag mÏ tó, Topë vÏ sér ti. Æjag kamëg ja tÏ sóg nÏ, Topë tÏ isar han kÏ, sÏ inh jagtar jagy ên ve ja ra.

³ SÏ ãjag jyvën kÏ sóg ãjag mÏ ki hã tó ja nÏgtÏ, kygnë ja tÏ inh nÏ. Nén ù vënhmÏ tó ja tÏ sóg nÏgtÏ gé. Æjag tÏ nén ù to én ja tÏ sóg nÏgtÏ gé.

⁴ Topë hã ne inh jykre ve kÏ inh mÏ: “ha inh vÏ ti tó,” he ja nÏ'. Hã kÏ sóg tó mÏ sir. Êprã ke ag tÏ iso vÏ há han tÏ ra tóg inh mÏ tÏ nén ù tÏ nÏ. Topë tÏ iso vÏ há han ke tag hã tóg inh mÏ há nÏ'. Hã jé sóg ti vÏ hã ki króm sór mÏ. Ti hã ne ãg jykre ve kÏ ãg ki kanhró nÏ', Topë ti.

⁵ Hã kÏ sóg ãjag mÏ ón kÏ: “há ãjag tóg nÏtÏ,” he ja tÏ nÏgtÏ. Tag ve ãjag mÏr. Æjag tÏ nén ù to én ja tÏ sóg nÏgtÏ gé. Æjag ki sóg ganho ve sór ja tÏ nÏ gé. Topë hã ne tag vé'.

⁶ KÏ êprã ke ag tÏ iso vÏ há han tÏ ra tóg inh mÏ tÏ nén ù tÏ nÏ mÏr. Æjag tÏ inh mÏ vÏ há han tÏ ra tóg inh mÏ tÏ nén ù tÏ nÏ gé.

⁷ Cristo hã vỹ inh jẽnẽ ja nĩ, hã kỹ tóg, sỹ ãjag mỹ vỹ tar han há tóg tĩ vẽ. Hã ra sóg ke ja tũ nĩ. Komẽr hã sóg vỹ ja nĩgtĩ. Ëg tỹ ãg krẽ kãsir mré vỹ ri ke han ja sóg nĩgtĩ. Gĩr mỹnh fi tỹ komẽr hã vỹ ẽn ri ke han ja sóg nĩgtĩ.

⁸ ãjag to sóg há tãvĩ nĩ, hã kỹ sóg ãjag mỹ Topẽ vỹ sér tó kãn sór ja nĩgtĩ. Kỹ tóg inh mỹ tỹ nén ù tũ nĩ gé, sỹ ãjag jagfy ter ke ti.

⁹ Inh kanhkã', inh rãnrãj to jykrén nĩ. Inh rãnrãj vỹ inh kutãn tĩ. Kuty ki sóg inh rãnrãj han tĩ, kurã ki ke gé, isỹ vễjẽn comprar he jé. Hã kỹ sóg ãjag jẽn ko ja tũ nĩgtĩ. Topẽ vỹ hã tó ja sóg nĩ, ãjag kanhrãn kỹ. Tag to jykrén.

¹⁰ Isỹ nén han mũ ve kãn ãjag tóg, kỹ Topẽ vỹ inh vég tĩ gé. Topẽ jykre hã han isóg tĩ, vễnh jykre kuryj ti, nén ù vễnhmỹ han vãnh sóg nĩgtĩ. ãjag rĩnve sóg han, ãjag tỹ Jesus ki ge kỹ nỹtĩn kỹ.

¹¹ Gĩr panh vỹ ã kósin jyvẽn tĩ, kỹ tóg kejẽn ti jyvẽn tar han tĩ gé. Kỹ tóg kejẽn vỹ há han tĩ gé, ti fỹn kỹ. Ti ri ke han ja sóg mỹr, ãjag mỹ.

¹² Hã kỹ sóg ãjag fe tar han. ãjag jyvẽn ja sóg nĩgtĩ, kỹ sóg ãjag jyvẽn tar han ja nĩgtĩ gé kejẽn, kỹ sóg ãjag fe tỹ há' he ja nĩgtĩ gé, sỹ ãjag jyvẽn tar han kar kỹ. ãjag tỹ Topẽ jykre ki króm jé, hã jé sóg ãjag mỹ ke ja nĩgtĩ. Ti hã ne ãjag kuprẽg', ãjag tỹ ti tỹ tỹ ãg pã'i nĩ ve jé, ãjag tỹ ti jykre mág ve jé, ti jykre tỹ ãg kãfór nĩ ẽn ti.

¹³ ãjag tỹ Topẽ vỹ mẽ kỹ ãjag tóg to: “hej,” he ja nĩgtĩ. ãjag mỹ sóg tó, ti vỹ ti, kỹ tóg ãjag mỹ há ja nĩgtĩ. Tag to sóg Topẽ mỹ: “ã hã ne tóg ag krĩn', kỹ tóg inh mỹ sér tĩ,” he tĩ. Kurã kar ki sóg ti mỹ tó tĩ. Isỹ ãjag mỹ Topẽ vỹ tó kỹ ãjag tóg to: “Topẽ vỹ vẽ,” he ja nĩgtĩ. Hã ra tóg ge nĩ. Hã kỹ tóg ãjag jykre kugrynh mũ sir, Topẽ vỹ ti, ãjag tỹ ti vỹ kri fin kỹ.

¹⁴ Inh kanhkã', ga tỹ Judéia tá ke ag kóm ãjag tóg vễsỹrẻnh mũ. Tá ù ag tóg vễnh mãn tĩ, Topẽ vỹ mẽ jé, ag tỹ Jesus Cristo ki ge kỹ nỹtĩn kỹ. Kỹ ag mré ke ag tóg ag vóg kónãn tĩ, Israel ag. Ge ti nĩ gé, ãjag mré ke ag tỹ ãjag vóg kónãn ti. Hã kỹ ãjag tóg ag kóm vễsỹrẻnh mũ gé.

¹⁵ Israel pã'i ag vỹ Jesus tén, ãg Senhor ti. Topẽ vỹ tó tĩ ag kãgtén ag tóg tĩ gé. Kỹ ag tóg ãg vóg kónãn tĩ gé sir. Hã ki ag tóg Topẽ jũ

han tĩ. Ëprã ke kar ag kato vẫsẫsẫn ag tóg tĩ.

¹⁶ Hã kỹ ag tóg inh mỹ: “ker fóg ag mỹ vỹ hẽ',” he tĩ. “Ker kanhgág ag mỹ Topẽ vỹ tó hẽ', ag krenkren tũ nĩ jé,” he ag tóg tĩ inh mỹ. Hã ki ag tóg Topẽ vỹ mrynhmranh kãn tĩ. Kỹ ag tóg ti vỹ mranh kãn kỹ nỹtĩ ha. Hã kỹ Topẽ tóg ag to jũ mũ sir. Kỹ tóg ag vóg kónãn kãn ke mũ gé sir, vễnh kaja jé.

Paulo krĩ kufy

¹⁷ Inh kanhkã', isỹ ãjag vég tũ nĩn kỹ tóg inh mỹ e tĩ. Hã kỹ sóg fe kaj nĩ. Tãg ti tĩ ver, sỹ ãjag ve ja ti. Hã ra inh pi(jé) ãjag kã jatu' he mũ'. ãjag ve sór tãvĩ inh nĩ, kỹ sóg ãjag to kãtĩg kren.

¹⁸ Isỹ ãjag to kãtĩg ke vễ vễ, hã ra Satanás vỹ inh kato tẽ. Kar kỹ sóg to jykrén mãn, hã ra Satanás vỹ inh kato tẽ mãn. Hã kỹ sóg ãjag to jun ja tũ nĩ, inh, hã vỹ: Paulo, he mũ.

¹⁹ ãjag hã to sóg jykrén mũ, Jesus tỹ ãjag hã ki inh jykre ve jé, ti kãtĩg mãn kỹ, ãg Senhor ti. ãjag tỹ ti vỹ ki króm kỹ tóg vég mũ, inh rãnrãj ti, Jesus ti. ãjag hã to inh fe tóg mryn ke mũ, ãjag hã ki sóg tỹ ùn mág nĩnh mũ, Jesus mỹ. Hã kỹ sóg ãjag to jykrén tĩ.

²⁰ ãjag hã tugrĩn sóg tỹ ùn mág nĩ, ãjag hã tugrĩn tóg inh mỹ sér tĩ.

3

¹ ãjag to jykrén mág sóg tĩ, hã kỹ sóg Timóteo jẽnẽ ja nĩ, ti tỹ ãjag ve jé, ãg tỹ cidade tỹ Atenas tá nỹtĩn kỹ. Ti mỹ sóg: “ha inh ré kỹ tĩg,” he ja nĩ, “sỹ inh pir mỹ tag kã nĩ jé,” he ja sóg nĩ. “Ag hỹn ne han mũ'? he sóg mũ, kỹ ag venh tĩg, inh mỹ,” he ja sóg nĩ ti mỹ, isỹ ãjag to krĩ kufy ja nĩn kỹ.

² Timóteo vỹ tỹ Jesus mré ke nĩ. Topẽ camarada ri ke tóg nĩ. Cristo kãmén ti tĩgtĩ, inh ri ke. Kỹ tóg ãjag tá jun kỹ ãjag jyvẽn ja nĩ, ãjag fe tỹ há' he ja tóg nĩ, ãjag tỹ Jesus ki rã tovãnh tũg jé. Hã jé sóg ti jẽnẽ ja nĩ.

³ “Hẽn ri ke mũn ag hỹn krĩ kufy nỹtĩ, ag jagãgtar mũn kỹ,” he ja sóg nĩgtĩ ãjag to. “Ag mré ke ag ne tóg ag vóg kónãn mũ', Topẽ jykre to',” he ja sóg nĩgtĩ. Hã ra sóg ãjag mỹ tó ja nĩ, ãg jagãgtar ke ti, Topẽ jykre to.

⁴ Isỹ ãjag mré nĩ mũ ẽn kã sóg ãjag mỹ tó, ãg jagãgtar ke ti, ti tugrĩn. Hã ra tóg ge nĩ. Hã to ãjag tóg jagãgtar tĩ, vễsỹrẻnh tĩ sir.

⁵ Hã ky sóg Timóteo jênê, isy ãjag to krĩ kufy ja nĩn ky. “Ag my Topê tovãnh tũ nĩ vỹ?” he ja sóg nĩ. “Ëg krĩn kónãn tĩ ên my ag krĩn tũ nĩ vỹ, Japo ti?” he ja sóg nĩ myr. “Ti tỹ ag krĩn kónãn ky sóg tagrĩnh my ag my tó ja nĩ myr!,” he ja sóg nĩ ãjag to. Hã ky sóg Timóteo jênê ja nĩ.

Timóteo tỹ Paulo krĩ kuprãg

⁶ Hã ra tóg sir inh ki jun mãn mũ, Timóteo ti, ãjag ve kar ky. Ûri tóg jun. ãjag kãmén tóg mũ, tó há han tóg mũ, ky inh fe tóg mrin ke mũ sir. “Jesus ki ge to tar ag nỹtĩ,” he tóg mũ. “Jagnê to há ag nỹtĩ, ã mĩ êkrég ag tóg tĩ. ã ve sór ag tóg tĩ. ã tỹ ag ve sór ri ke han ag tóg tĩ,” he tóg mũ inh my, Timóteo ti.

⁷ Ky inh krĩ tóg kãnhvy' he mũ sir ãjag to. Inh jagtar mũ ra inh fe tóg há' he mũ sir, ãjag tỹ Jesus ki ge ky nỹtĩn ky.

⁸ ãjag tỹ ti to tar nỹtĩn ky tóg inh my inh rĩr mãn ri ke nĩ, ky sóg mrin ke ri ke han mũ sir.

⁹ Topê my sóg vĩ há han mũ sir ãjag to. Inh fe vỹ mrin ke mũ, sỹ ãjag tỹ nén han mũ ên mẽ ky. Hã ky sóg Topê my vĩ há han mũ sir, ãjag tỹ inh fe tỹ mrin ken ky.

¹⁰ Kutu kar ki sóg ti mré vémén tĩ, kurã kar ki ke gé. Sỹ ãjag ve sór nĩn ky sóg Topê my isĩg ke to vĩ tĩ, sỹ ãjag tar han sór ky, ãjag tỹ ti ki rã to tar nỹtĩ jé.

¹¹ Topê tỹ kejẽn inh my: “ha ag venh tĩg,” hen ky tóg inh my sér tĩnh mũ, ãg jóg mág tỹ inh my tag tó ky, Jesus ti ke gé, ãg Senhor ti.

¹² Ëg Senhor my sóg to vĩ tĩ, ti tỹ ãjag tỹ jagnê to há tãvĩ han jé. Jagnê to há ãjag nỹtĩ, ky sóg ti my to vĩ tĩ, ti tỹ tag to ãjag tar tãvĩ han jé, ãjag tỹ vènh kar to há nỹtĩ to tar nỹtĩ jé gé, isy ãjag to há nĩ ri ke.

¹³ Ky sóg ti my to vĩ tĩ gé, ti tỹ vènh jykre há to ãjag tar han jé. Kejẽn ãg Senhor tỹ Jesus vỹ kãtĩg mãn ke mũ, ã tũ kar ag mré. Ëg jóg tỹ Topê tỹ ùri ãjag tar han ky ãjag tóg kurã ên kã ti rĩnja tá jãnhkri nỹtĩnh mũ, ãjag tỹ kygnê ja tũ nĩn ky.

4

Jesus jykre mĩ ãg mũnh ke mũ

¹ Inh kãnhkã', vãhã sóg ãjag my nén ù tó sór mũ gé. Ëg Senhor tỹ Jesus rĩnve sóg ãjag jyvèn sór mũ. ãjag my sóg ti jykre tó huri,

ãjag tỹ ti japry jagma, ti jamĩn jagma mũ há han jé, ãjag tỹ Topê my há nỹtĩ jé. Tag han ãjag tóg mügtĩ. Gemnĩ. To tar nỹtĩmnĩ.

² Tag kãmén sór isóg mũ ãjag my, ãg Senhor tỹ Jesus tỹ inh my: “tag tómnĩ,” he ja nĩn ky.

³ Topê vỹ ãjag to jykrén, ãjag tỹ ti jykre há han jé. Ky ãjag prũ tũ fag mré nỹ tũg nĩ, ãjag mén tũ ag mré nỹ tũg nĩ gé.

⁴ ãjag tỹ ãjag prũ fi mré nỹ ky fi mré nỹ há han nĩ, Topê jykre han jé. Ky êprã ke ag vỹ ãjag to jykrén kónãn ke tũ nĩ gé. Fi tỹ prũg kónãn tũg nĩ.

⁵ Fi to én kónãn tũg nĩ gé, ãjag prũ fi to. Û tỹ Jesus ki rã tũ ag jykre han tũg nĩ. Û tỹ Topê jykre ki kagtĩg nỹtĩ ag jykre han tũg nĩ, ãjag prũ fi to. Fi tỹ prũg há han nĩ.

⁶ ãjag régre tỹ nén ù to én tũg nĩ. Ti tũ vè myr, ky ti tũ ki Topê vĩ mranh tũg nĩ. Topê há ne tag to jũ tĩ'. Ky ãjag régre tỹ nén ù vóg tũg nĩ. ãjag tỹ ti tũ vóg ky Topê vỹ ãjag vóg ke mũ gé, ti kajãm jé. Tag tó sóg huri ãjag my, tag to sóg ãjag my vĩ tar han huri, há ra sóg ãjag my tó mãn mũ gé.

⁷ Ëg tỹ vènh kavènh ky ãg tóg Topê jykre han tũ nĩgtĩ myr. Ti jykre vỹ kuryj nỹ. Ëg tỹ tỹ ti tũ nỹtĩ há jé tóg ãg kuprèg.

⁸ Êprã ke vĩ pijé', sỹ ãjag my nén tó mũ tag tĩ'. Topê vĩ vè myr. ãjag tỹ inh vĩ tag han tũ nĩn ky ãjag tóg Topê vĩ mranh mũ. Ti há ne tóg ã kuprĩg tỹ inh jagrê han ja nĩ', ky tóg tỹ ãjag jagrê han ja nĩ gé.

⁹ Nén ù to ãjag tar nỹtĩ, há vỹ: jagnê to há, he mũ. Hã ky sóg tag to ãjag my rán mág han ke tũ nĩ. Topê vỹ ãjag kãnhrãn, ãjag tỹ jagnê jagãgtãn ken ki. Ki há han ãjag tóg tĩ.

¹⁰ Ga tỹ Macedônia tá ke kar ag to ãjag há nỹtĩ, Jesus mré ke kar ag to ke gé. To tar nỹtĩmnĩ, to krónh ke tũg nĩ, ãjag tỹ tỹ Jesus mré ke nỹtĩn ky. Hã jé sóg ãjag jyvèn mũ.

¹¹ Vãsãn nĩ, ãjag tỹ jatun my nỹtĩ jé, jatun my ãjag rãnhrãj hyn han jé. ãjag rãnhrãj pẽ ên to tar nỹtĩmnĩ, há jé sóg ãjag jyvèn ja nĩ. Ky sóg to ãjag jyvèn mãn mũ, ãjag rãnhrãj to.

¹² Ky nén ù vỹ ãjag my tũ' henh ke tũ pẽ nĩ. Hã ki vènh kar tóg ãg jykre há ki kãnhró nỹtĩnh mũ. ãjag tỹ ãjag rãnhrãj to nén ù kar ve ky tóg há tĩ, ù tỹ ãjag my nén ù nĩm tũ nĩ jé, fagrĩnh my.

Jesus mré ke ter kÿ fy mág tũg nĩ

¹³ Inh kanhkã', sÿ nén ũ ki ājag kanhrãn há tóg tĩ gé, ha mẽ. Ēg mré ke ũ ag tóg kãgter kÿ nÿtĩ. Kÿ fy mág tũg nĩ ag jé. Jesus ki ge tũ ag ri ke han tũg nĩ. Ag ter kÿ ag tóg nén ũ há venh ke tũ nĩ. Hã kÿ ag tóg fy mág tĩ, Jesus ki ge tũ ag. Hã ra tóg ěg mÿ ge tũ nĩ.

¹⁴ Jesus vÿ ter ja nĩ, kar kÿ tóg rĩr mãn ja nĩ. Tag ki kanhró ěg tóg nÿtĩ. Hã ri ke ti nĩ, Jesus ki ge mũ ag kãgter ti. Topẽ vÿ ěg han mãn ke mũ, Jesus tugrĩn, ěg tÿ ti mré nÿtĩ jé sir.

¹⁵ Ēg Senhor vÿ inh kanhrãn, hã kÿ sóg tó mũ. Ti jẽnky ki tóg kutẽ, sÿ tónh ke tag ti, ha mẽ. Ver ěg rĩnrĩr nÿtĩ. Hẽn ri ke mũn ěg kãgter kãn ke tũ nĩ, ti kãtĩg ken jo. Kÿ ěg tóg ti kãtĩg venh mũ sir. Hã ra ěg tóg ũn kãgter mũ ag jo mũnh ke tũ nĩ. Ag hã mré ěg tóg mũnh ke mũ.

¹⁶ Ti kãtĩg vÿ ge nĩnh mũ, ha mẽ. Tére jé tóg ke mũ, ěg Senhor ti, kanhkã tá. Kÿ vẽnũ tóg mẽ há tĩnh mũ. Topẽ tÿ jẽnẽ jafã ag pã'i mág vÿ prẽr ke mũ sir. Topẽ tÿ vãkyn jafã vÿ mẽ há tĩnh mũ, trombeta ěn ti. Kÿ ũn kãgter mũ ag vÿ rĩnrĩr mãn mũ sir, Jesus mré ke ag.

¹⁷ Kar kÿ ěg tóg ag mré jãprynh mũ gé, ěg tÿ ti kãtĩg ke jo ter tũ hã ra. Ag mré ěg tóg jãprynh mũ, ũn rĩnrĩr mãn mũ ag mré. Kanhkã góg kãmĩ ěg tóg jãprynh mũ, kÿ ěg tóg ěg Senhor kato tẽgtẽnh mũ sir, kanhkã krẽm. Hã kÿ ěg tóg ti mré nÿtĩnh mũ sir, ěg Senhor mré, ěg tÿ kanhkã ra mũn kÿ. Ti rẽ kÿ ěg mũ mãn ke tũ nĩ sir.

¹⁸ Tag tómnĩ jagnẽ mÿ, ājag krĩ tÿ kãnhvy' he jé, ũn kãgter mũ ag to.

5*Jesus tÿ kãnhmar kãtĩg mãn ke*

¹ Inh kanhkã', ti kãtĩg ke ki kanhró ěg tóg nÿtĩ, hã ra ěg tóg ti kurã hã ki kagtĩg nÿtĩ, ti prÿg ke gé. Tag mẽ ājag tóg huri, hã kÿ sóg ājag mÿ tó mág ke tũ nĩ ha.

² Vãhãn kãtĩg, ěg Senhor ti, hã ra tóg tÿ nén ũ péju mé kãtĩg ri ke nĩnh mũ, ti kãtĩg ti. Ēg vatánh tá tóg ěg tũ mãg tĩ, nén ũ péju mé ti. Kÿ tóg ge nĩnh mũ, ěg Senhor kãtĩg ti.

³ Ti to há tũ ag vÿ: “jatun mÿ ěg nÿtĩ,” henh ke mũ. “Ũ vÿ ěg vóg ke tũ nĩ,” he jé ag tóg ke mũ. Ag tÿ tag tó mũ ra tóg vãhã kãtĩ

mũ, ěg Senhor ti. Kÿ ag tóg nũgme ki vár mũ sir. Ag tÿ to jykrén tũ hã ra ti kãtĩg kÿ ag tóg krenkren ke tũ pẽ nĩ, ha vemnĩ.

⁴ Inh kanhkã', ājag hã ne tóg tÿ Jesus mré ke nÿtĩ'. Hã kÿ tóg ājag ki kuty tũ nĩ. Kÿ ājag tóg ki kanhró nÿtĩ, kÿ ti kãtĩg vÿ ājag mÿ nén ũ péju mé kãtĩg ri ke tũ nĩ, ājag tÿ ti ki kanhró nÿtĩn kÿ.

⁵ Ti krẽ vÿ tÿ ājag nÿtĩ, hã kÿ tóg ājag ki kurã nĩ, ājag tÿ ki kanhró nÿtĩn kÿ. Kuty tũ ti nĩ, ěg ki. Ti kãtĩg ke ki kanhró ěg tóg nÿtĩ, hã kÿ tóg ěg ki kurã nĩ sir.

⁶ Kÿ ti kãtĩg ke kã jatu ke tũg nĩ. Vẽso jykrén nĩ, ājag tÿ ti kãtĩg ke to vẽnũ preparar ken jé, ājag tÿ kã jatu ke tũ nĩ jé.

⁷ Ũn nũgnũr mũ ag vÿ kuty kÿ nũgnũr tĩ, kÿ ag tóg ti kãtĩg ke kã jatu nÿtĩ. Kÿ ũn kronkron mũ ag vÿ kuty kÿ pẽnmev nÿtĩ, kãgter ag nÿtĩ gé. Kÿ ag tóg vẽso jykrén tũ nÿtĩ. Kuty tá vẽnũ jykrén hã vẽ.

⁸ Ēg jé kurã tá vẽnũ jykre há ěn ti han jãvo. Ēg jé vẽso jykrén kÿ ti ki rã to krónh ke tũg. Ēg jé jagnẽ to há to krónh ke tũg gé.

Kÿ ěg tóg vẽnũ génh jafã ag tar ri ke nÿtĩ. Kÿ tóg ěg mÿ soldado kur ri ke nĩ sir, ti ki rã ti, jagnẽ to há ti ke gé. Soldado tÿ camisa tÿ ferro ri ke ti nĩ, ěg tÿ ti ki rã kÿ jagnẽ to há to tar nÿtĩn kÿ. To tar nÿtĩn kÿ ěg krenkren ke mũ, nũgme ki vár ke tũ ěg nĩ. Tag mĩ ěkrén nĩ. Kÿ tóg ěg mÿ soldado tÿ sãpe tÿ ferro ri ke nĩ sir, ěg tÿ ti ve sór mũ to tar nĩ ti. To tar nÿtĩn kÿ ěg tóg vẽnũ preparar ke kÿ nÿtĩ, vẽnũ kãn kÿ ěg nÿtĩ, ti kãtĩg ke to.

⁹ Topẽ vÿ ěg kuprẽg, ěg tÿ ti jũ vég tũ nĩ jé, ěg krenkren jé, ěg tÿ nũgme ki vár tũ nĩ jé, Jesus Cristo tugnĩn, ěg Senhor ti.

¹⁰ Ti hã ne ěg jagfy ter ja nĩ', ěg tÿ ti tugrĩn rĩnrĩr nÿtĩ jé, ti mré nÿtĩ jé sir. Ēg tÿ ti kãtĩg ke jo kãgter mũ ra ěg tóg ti mré nÿtĩnh mũ, ti kãtĩg kÿ. Ēg kãgter tũ ra ěg tóg ti mré tá nÿtĩnh ke mũ gé, ti kãtĩg kÿ. Jagnẽ ri ke ěg nÿtĩnh mũ.

¹¹ Tag tómnĩ jagnẽ mÿ. Tÿ jagnẽ krĩ tÿ kãnhvy' hemnĩ gé, ũn ter mũ to. Kÿ tÿ jagnẽ jyvẽn nĩ gé, ājag tar nÿtĩ jé. Tó ājag tóg mũgtĩ, kÿ tó há han nĩ.

Vẽnũ jykre há ti

¹² Inh kanhkã', nén ũ tó jé sóg ke mũ gé. Ājag kãmĩ ũ ag tóg tÿ ājag pã'i nÿtĩ, igreja to,

Jesus mré ke ù ag. Ājag jyvĕn ag tóg tĩ, ājag to ag tóg vāsān tĩ.

¹³ Ēn ag kamĕg nĩ. Ag mĩ vĩ há han nĩ, ag to há tāvĩ nýtĩmnĩ, ag tỹ ājag ki rĩr kỹ. Jagnĕ krĩ rỹg tũg nĩ.

¹⁴ Inh kanhkā', tag ti tó jé sóg ke mũ gé, ha mẽ. Ũ tỹ vĕnhmỹ mẽ ag jyvĕn tar han nĩ. Ũ tỹ kānhmar krónh ke tĩ ag mré komĕr vĩmnĩ. Ũn fe krónhkrój ag fe tỹ tar' hemnĩ. Vĕnh kar mỹ komĕr hā vĩmnĩ.

¹⁵ Ũ tỹ ājag mỹ nĕn ù kórég han mũ ra ti mỹ nĕn ù kórég han tũg nĩ jāvo, vĕnh kajām tũg nĩ. Nĕn ù há tāvĩ han nĩ jagnĕ mỹ, vĕnh kar mỹ ke gé.

¹⁶ Kurā kar ki ājag fe tỹ mrin kemnĩ.

¹⁷ Kurā kar ki ĕg jóg mág mré vĩmnĩ, ājag tỹ ti to krónh ke tũ nĩn jé.

¹⁸ Nĕn ù kar to ti mỹ: “inh mỹ tóg há tĩ,” hemnĩ gé. Topĕ jykren hā vĕ. Jesus Cristo nón ĕg tóg ti jykre han ke mũ. Ēg tỹ nĕn ù vég mũ kar to ĕg tóg: “inh mỹ tóg há nĩ,” hĕnh ke mũ, Topĕ mỹ.

¹⁹ Topĕ kuprĩg tỹ ājag krĩn sór kỹ ti mỹ: “vó,” he tũg nĩ.

²⁰ Kejĕn Topĕ kuprĩg tóg ù krĩn tĩ, kỹ tóg Topĕ vĩ tó mũ sir. Ēn to é he tũg nĩ.

²¹ Ũ tỹ ājag mỹ vĩn kỹ to: “vĕnh vĩ há mỹ?” hemnĩ. Ti tỹ tỹ ājag mỹ vĕnh vĩ há nĩn kỹ jĕmĕmnĩ.

²² Ti há tũ nĩn kỹ jĕmĕ tũg nĩ, ājag tỹ nĕn ù kórég han tũg jé. Nĕn ù kórég han sór tũg nĩ.

²³ Topĕ vỹ ājag krĩ kuprāg tĩ. Ti mỹ sóg to vĩ tĩ, ti tỹ ājag tar han jé, ājag tỹ tỹ ti tũ nýtĩ to tar nýtĩ jé. Ti mỹ sóg to vĩ tĩ gé, ti tỹ ājag tỹ kygnĕ kamĕg jé, ti tỹ ājag jykre há han jé, ājag fe ti ke gé, ājag krĩ ti ke gé. Ēg Senhor tỹ Jesus Cristo kātĩg mĕn kỹ tóg ĕg jykre tugnỹm ke mũ sir, hā jé tóg ĕg jykre há han sór mũ.

²⁴ Ũ tỹ ĕg kuprĕg mũ vỹ ĕg jykre há han sór mũ, hā vỹ: Topĕ, he mũ. Fagrĩnh mỹ vỹ vĕnh ti nĩgtĩ.

²⁵ Inh kanhkā', iso Topĕ mré vĩmnĩ gé.

²⁶ Jagnĕ ki nhun ke ri ke han nĩ, Jesus mré ke kar ki, jagnĕ nĩgé kĕgmĩ kỹ.

²⁷ Ēg Senhor rĩnve sóg ājag mỹ tag tó mũ, ha mẽ. “Jesus ki ge kỹ nýtĩ kar ag tỹ isỹ nĕn rán mũ tag mẽ kĕn ke vĕ,” he sóg mũ mỹr. Hā kỹ sóg: “ag kar mỹ to kemnĩ,” he mũ.

²⁸ Ēg Senhor tỹ Jesus Cristo mỹ sóg to vỹ tĩ, ti tỹ ājag tar han jé. Hā vĕ.

PAULO TÏ CARTA HAN: TESSALÔNICA TÁ KE AG MÏ CARTA Û

¹ Paulo tÏ rá vë. IsÏ cidade tÏ Tessalônica t'a ke ag mÏ rán hã vë. Tessalônica tá ãjag tóg Topë vï mẽ jé vënhmãn tĩ. Topë tũ vÏ tÏ ãjag nÏtĩ, ãg jóg mág ti. Jesus Cristo tũ vÏ tÏ ãjag nÏtĩ gé, ãg Senhor ti. SÏ ãjag mÏ vënh rá jënë vë. KÏ Silas vÏ jënëg mũ gé inh mré, Timóteo ke gé.

² ãg jóg tÏ Topë mÏ sóg to vï tĩ, ti tÏ ãjag tar han jé, ti tÏ ãjag krĩ kuprãg jé gé. ãg Senhor tÏ Jesus Cristo mÏ sóg tag to vï tĩ gé.

Cristo tÏ ù tÏ ãg vóg kónãn mũ ag vóg kónãn ke

³ Inh kanhkã', isÏ kurã kar ki ãjag to Topë mré vï vë, ãjag to sóg ti mÏ vï há han tĩ. ãjag jykre tóg inh mÏ sér tĩ. ãjag hã ne tóg ti vï to tar tãvĩ nÏtĩ', kri fi kÏ. Jagnë mré ãjag tóg há tãvĩ nÏtĩ gé, ãjag kar ti. Hã kÏ sóg Topë mÏ vï há han tĩ, ãjag to.

⁴ Hã kÏ sóg Topë tũ kar ag mÏ ãjag tóg tĩ, ãg vënhmãn kÏ. "Tĩ vï kri fi to ag tar nÏtĩ, ag tÏ ag vóg kónãn mũ ra," he sóg tĩ ãjag to. "Ag jagãgtar mũ ra ag tóg ti to tar nÏtĩ," he sóg tĩ. IsÏ tag tóg inh mÏ sér tãvĩ tĩ.

⁵ Hã tugrĩn ãg tóg Topë jykre kuryj ki kanhró nÏtĩ, ãjag tÏ ti tovãnh tũ nÏn kÏ. KÏ ti tÏ nén han mũ vÏ kugryj kar nÏtĩ, ti tÏ nén tóg mũ kar ke gé. Jagtar ãjag tóg mũ, hã ra ãjag tóg ti tovãnh tũ nÏgtĩ. Ti tÏ tÏ ãg pã'i nÏ ve jé ãjag tóg ke mũ, kanhkã tá krÏg he jé ãjag tóg ke mũ, ti tugnÏn, ha vemnĩ. Hã kÏ ãjag tóg sir ti tugrĩn jagtar mũ sir.

⁶ Ha vé, ù tÏ ãjag jagãgtar han mũ ãn jagãgtar han jé tóg ke mũ gé, vënh kaja jé, Topë ti. Hã ki ãg tóg ti jykre kuryj ki kanhrãn mũ sir. Tag to jykrén.

⁷ Ag jãvo tóg ãjag tar han mũ sir, ãjag jagtar mũ hã ra, kÏ tóg sir ãjag jagãgtar tÏ tũg' he mũ gé sir, ãg kar mÏ, ãg Senhor tÏ Jesus Cristo tÏ kanhkã tá kãtÏg kÏ. Kanhkã tãn ag mré tóg kãtÏg ke mũ, kÏ ãg tóg ti vënh mũ sir.

⁸ TÏ tóg pi gru ve kãtÏg ke mũ. KÏ tóg ù tÏ Topë ki kanhrãn jãvãnh ag vóg kónãn ke

mũ sir, vënh kaja jé, ù tÏ ãg Senhor tÏ Jesus vï sér mranh mũ ãn ag.

⁹ Ag vóg kónãn jé tóg ke mũ, kÏ ag vësÏrénh vÏ tũ' henh ke tũ nÏ. ãg Senhor mré ag nÏtÏnh ke tũ nÏ sir. Ti jykre há ãn vënh ke tũ ag nÏ, ti tÏ tÏ pã'i mág pë nÏ ãn ti, ùn mág tãvĩ ãn.

¹⁰ ã kãtÏg kÏ tóg ag vóg ag vóg kónãn ke mũ. KÏ tóg vãhã ã tũ ag tÏ ùn mág han ke mũ sir. KÏ vënh kar tóg ãg tugrĩn ti jykre ve kãn ke mũ, ãg tÏ ti ki ge kÏ nÏtÏn kÏ. ãjag hã tóg inh vï kri fi, sÏ ãjag mÏ ti vï tón kÏ. Hã kÏ ãjag tóg kurã ãn vënh ke mũ.

¹¹ Hã jé sóg ãjag to Topë mré vï tĩ, kurã kar ki. Ti mÏ sóg: "ag tar han nÏ," he tĩ. "Nén ù há han sór ag tóg mũ, ã ki ge kÏ nÏtĩ ag, ã jykre han sór ag tóg mũ, kÏ ag tar han nÏ, ag tÏ kygnëg tũ nÏ jé. Ag kuprëg ã tóg, ag tÏ kurã ãn ve jé, kÏ ag tar han nÏ, ag tÏ kurã ãn tá krÏg jé," he sóg tĩ (mÏr), Topë mÏ.

¹² Ti tÏ ãjag kri tÏ ùn mág nÏ jé, hã jé sóg ti mÏ tóg mũ. Ti tÏ ãg kri tÏ ùn mág nÏn kÏ tóg ãg tÏ ùn mág han mũ gé. Topë tÏ ãg mÏ ã tÏ nén ù há nÏm ãn hã vë, ãg Senhor tÏ Jesus Cristo tÏ ke gé.

2

Jesus kato tã mág mũ ãn tÏ vënh ke

¹ Inh kanhkã', sÏ ãjag jyvënh há tóg tĩ sir. Kãnhmar ti kãtÏg mũ, ãg Senhor tÏ Jesus Cristo ti, kÏ ãg tóg vënh mãn mũ, ti tÏ ãg gé(g) tÏg jé sir. KÏ ãg tóg ti mré nÏtĩ.

² Ha ra tóg ver kór gy sÏ tĩ, kuvar gy sÏ ti nÏ ver. KÏ ù tÏ ãjag mÏ: "Topë kuprÏg tóg inh mÏ: ùri ke vë, hé," he mũ ra kri fi tũg nÏ, ãjag fe tÏ jũrũn ke tũg nÏ. ù tÏ ãjag mÏ: "Paulo vÏ inh mÏ tóg, kÏ tóg: ùri ke vë, hé," he mũ ra kri nÏm tũg nÏ gé. ù tÏ ãjag mÏ vënh rá ven mũ ra, to: "Paulo tÏ rá vë mÏr," he mũ ra kri fi tũg nÏ gé.

³ Ag jykre tugnÏm ra, ù tÏ ãjag krĩn kónãn sór mũ ag. ùri ke tũ vë ver, ti kãtÏg ke ti. ù tÏ hën ri ke ag vÏ ti tovãnh ke mũ ver, ti kãtÏg ke to hã. Ti kato tãgtã jé ag tóg ke mũ ver. KÏ ù tóg ver vënh ven ke mũ gé, hã vÏ: ù tÏ Topë vï mranh tĩ ãn, he mũ, ù tÏ nũgme ki kutënh ke mũ ãn ti, he mũ.

⁴ Ti ve pë vë, Topë vï mranh mũ ti, hã kÏ Topë vÏ nũgme ki ti fón ke mũ. ãn vÏ tóg

Topê kato tênh ke mũ ver, vênh kãgrá tỹ topê kato ke gé. Nén kar to: topê, he mũ kar kato tóg tênh ke mũ ver. “Topê kar kãfór vỹ tỹ inh nĩ,” he jé tóg ke mũ. Kỹ tóg vãhã sir Jerusalem tá Topê ìn krêm rãnh mũ, Topê nĩg ja ên tá tóg nĩnh mũ, kỹ tóg vêso: “tỹ sóg Topê nĩ,” henh ke mũ, ón kỹ.

⁵ Isỹ ãjag mré nĩn kỹ sóg ãjag mỹ tag tó ja nĩ. Mĩ êkrén nĩ, sỹ ãjag mỹ tó ja ên ti.

⁶ Mĩ êkrén kỹ ãjag tóg ki kanhró nỹtĩ sir, ù tỹ ver ti ki rĩr mũ ên ki. Ti kỹ ti ki rĩr nĩn kỹ tóg ver vênh ven tũ nĩ, ù tỹ ón kỹ: “tỹ sóg Topê nĩ,” he mũ ên ti. Ti kurã ki tóg vênh ven ke mũ sir vãhã.

⁷ Ûri ù tỹ hên ri ke ag tóg vênh jykre pãno han mũgtĩ, Topê vỹ mranh kỹ. Hã ra ag tóg ver vênh pigju kỹ han tĩ, kỹ ãg tóg ve hã han tũ nĩ, ag jykre pãno ti. Kỹ Û tỹ ón kỹ: “tỹ sóg Topê nĩ,” he mũ ên tóg vênh ven tũ nĩ gé ver. Û tỹ ti ki rĩr nĩ ên tóg ver ti ki rĩr mũ, ti vênh ven tũ nĩ jé ver.

⁸ Ti tỹ ti ki rĩr tovãnh kỹ tóg vênh ven ke mũ sir vãhã, ùn jykre pãno ên ti. Hã ra ãg Senhor tỹ Jesus vỹ ti tén ke mũ, ã jẽnger tỹ. Kỹ tóg ti tỹ tũ' he mũ sir, ã vênh ven ti kỹ, Jesus ti. ã jun kỹ tóg ti tỹ tũ' he mũ.

⁹ Hã ra ùn jykre pãno ên vỹ tóg Satanás jykre han mũ, Nén-Kórég tỹ ti krĩn kỹ. Kỹ tóg ón kỹ vênh jykre tar hyn han mũ, ãg tỹ nén han vãnh ên (mỹr). Kujá ag jykre ri ke han jé tóg ke mũ.

¹⁰ Vênh kar lograr he jé tóg ke mũ gé. Jykre kuryj nĩ ve tóg nĩnh mũ, hã ra tóg pãno nỹ. Kỹ ù tỹ nũgme ki vár ke mũ ag vỹ ti vỹ kri fi kãn ke mũ, ag tỹ Topê vỹ kri fig tũ nỹtĩn kỹ. Vênh vỹ há to ag tóg há tũ nỹtĩ, hã kỹ ag tóg krenkren ke tũ nĩ. Hã kỹ ag tóg ki rom ke mũ sir, nũgmen ki, infernon ki.

¹¹ Hã jé Topê tóg ag mỹ vênh ó jẽnh ke mũ, ón kỹ vênh jykre ên ti, ag tỹ vênh ó ên kri fi jé, ag tỹ kri nĩm sór nỹtĩn kỹ.

¹² Topê tỹ ag jykre tugnỹm kỹ tóg nũgme ki ag vãm ke mũ. Vênh vỹ há kri fi jãvãnh ag tóg nỹtĩ (mỹr). Vênh jykre pãno há to ag tóg hã tãvĩ nỹtĩ (mỹr), hã kỹ tóg ag vãm ke mũ, nũgme ki, Topê ti.

Topê tỹ ãg kuprẽg, ãg krenkren jé

¹³ Jãvo sóg ãjag to Topê mré vỹ há han tĩ, kurã kar ki (mỹr). Tỹ ãjag tóg Jesus mré ke

nỹtĩ, ãg Senhor mré ke ag. Kỹ tóg ãjag to há tãvĩ nĩ. Topê vỹ ãjag kuprẽg, nén kar há(r) ven ki, ãjag krenkren jé, nũgme to, inferno to. ã kuprĩg tỹ tóg ãjag tỹ ã tũ han ja nĩ. ãjag tỹ tag ve jé ãjag tóg ti vỹ kri fig mũ, vênh vỹ há ên kri.

¹⁴ Isỹ ãjag mỹ Jesus vỹ tón kỹ Topê vỹ ãjag kuprẽg, ãjag tỹ ãg Senhor tỹ Jesus Cristo mré tỹ ùn mág nỹtĩ jé.

¹⁵ Inh kanhkã', tar nỹtĩmnĩ, sỹ ãjag kanhrãn to, ãjag kỹ ti króm jé. Isỹ ãjag mỹ Jesus jykre tó mũ ên to tar nỹtĩmnĩ, sỹ ãjag mỹ nén rán mũ tag to ke gé.

¹⁶ ãg Senhor tỹ Jesus Cristo hã vỹ ãg to há tãvĩ nĩ, ãg jóg tỹ Topê ke gé. Kỹ tóg ãg krĩ kuprãg mũ sir, ãg tỹ to krónh ke tũ nĩn jé. Ti hã ne tóg ãg mỹ ã tỹ nén ù há ên ven ke mũ. Hã ve sór ãg tóg mũ.

¹⁷ Ti mỹ sóg to vỹ tĩ, ti tỹ ãjag fe tỹ há' he jé, ti tỹ ãjag tỹ nén ù há han jé, ãjag tỹ ki hã kãmén jé ke gé.

3

Topê tỹ ãg jy nĩgãn

¹ Inh kanhkã', vãhã sóg ãjag mỹ nén ù to vỹ mũ gé. Iso Topê mré vĩmnĩ, ãg Senhor vỹ tỹ vênh kar kri rũm ke jé, kãnhmar (mỹr), vênh kar tỹ ti vỹ to há nỹtĩ jé ke gé, ti mỹ vỹ há han jé (mỹr), ag tỹ ãjag ri ke nỹtĩ jé.

² Ti mỹ to vĩmnĩ, ti tỹ iyy nĩgãn jé, vênh jykre pãno han mũ ag jo, ùn jykre pãno ag jo ke gé. Û ag tóg Jesus ki ge jãvãnh nỹtĩ, hã kỹ ag tóg iso kórég nỹtĩ sir.

³ Hã ra ãg Senhor vỹ ã tỹ nén tó ja ên han ke mũ. ãjag tar han jé tóg ke mũ. ãjag jy nĩgãn jé tóg ke mũ gé, Japo jo, Nén-Kórég ên jo.

⁴ ãjag hỹn inh vỹ han ke mũ, kỹ tóg inh mỹ há tĩ. Topê vỹ ãjag krĩn ke mũ, ãjag tỹ sỹ ãjag mỹ nén tó mũ ên ki króm jé. Ki króm ãjag tóg mũ (mỹr), kỹ ãjag tóg to krónh kenh ke tũ nĩ sir.

⁵ ãg Senhor je ãjag krĩn, ãjag tỹ ti to há nỹtĩ jé, ti tỹ ãg to há ri ke. Ti jé ãjag krĩn, ãjag tar nỹtĩ jé, ãjag jagãgtar hã ra. Cristo vỹ ge ja nĩ gé. Kỹ ti nón gemnĩ.

ãg tỹ vênh rãnhraj to tar nỹtĩnh ke

⁶ Inh kanhkã', vãhã sóg ãjag jyvẽn mũ gé sir, ãjag jyvẽn tar han sóg mũ gé. ãg Senhor

tỹ Jesus Cristo jykre tỹ sóg ãjag mỹ tag tó mũ, ha mẽ: Jesus mré ke ù ag tóg vënhmỹ mẽ han sór nỹtĩ. Inh vỹ mranh sór ag nỹtĩ, sỹ ãjag mỹ nén tó ja ěn ti. Ěn mré vỹ măn tũg nĩ.

⁷ Sỹ ãjag mré nĩn kỹ sóg vënhmỹ mẽ han ja tũ nĩ. Tag ve ãjag (mỹr), kỹ ãjag tóg inh kóm han ki kanhrãn ke mũ.

⁸ Fagrĩnh mỹ sóg ãjag mré rãgró ko ja tũ nĩgtĩ (mỹr). Kajãm ja sóg nĩgtĩ (mỹr), sỹ ãjag mré nén ko ja ti. Kutu kar ki sóg rãhrãj ja nĩgtĩ, kurã kar ki ke gé. Kỹ sóg inh rãhrãj to ron mág ja nĩgtĩ. Sỹ ãjag tũ kagrãg tũ nĩ jé, hã jé sóg rãhrãj mág ja nĩgtĩ. Hã ve ãjag mỹr.

⁹ Sỹ ãjag tũ konh ke vë vë, hã ra sóg ãjag tỹ nén han ke mũ ěn han sór ja nĩgtĩ ãjag mỹ, ãjag tỹ to ki kanhrãn jé, ãjag tỹ inh kóm han jé sir inh nón.

¹⁰ Isỹ ver ãjag mré nĩn kỹ sóg ãjag mỹ tag tó ja nĩ gé, ha mẽ: “ũn rãhrãj vãnh ěn vỹ ne konh ke tũ nĩ,” he ja sóg nĩgtĩ ãjag mỹ.

¹¹ Æjag kãmĩ ù ag nẽji tag han vãnh nỹtĩ. Rãhrãj vãnh ag nẽji nỹtĩ, hã ra ag nẽji vënh kar to vỹ vỹ he tĩ.

¹² Ěn jyvën sór sóg nĩ, ěg Senhor tỹ Jesus Cristo jykre tỹ. Ag jyvën tar han jé sóg ke mũ, ha mẽ: “rãhrãj ra, jatun mỹ. Æjag tũ hã ko ra, ãjag rãgró ti. Û jën ko tũg ra,” he sóg mũ sir ãjag mỹ.

¹³ Inh kanhkã', nén ù há tãvĩ han kãn sórmnĩ. To krónh ke tũg nĩ.

¹⁴ Hën ri ke mũn ù tóg isỹ rá tag kri finh ke tũ nĩ. Ěn jykre végnĩmnĩ, kỹ ti mré vëmén tũg nĩ, ti mỹ'ãg jé sir, ti tỹ to jykrén măn jé.

¹⁵ Hã ra ti kato vãsãn tũg nĩ, ti to kry nĩ tũg nĩ. Jesus mré ke vë mỹr, kỹ ti jyvën nĩ, ti tỹ to jykrén măn jé.

¹⁶ Ha mẽ, ěg Senhor mỹ sóg to vỹ tĩ, ti tỹ ãjag krĩ kuprãg jé, ãjag jagtar hã ra. Ti hã ne tóg ěg krĩ kuprãg tĩ'. Ěg Senhor jé ãjag mré nĩgtĩ.

¹⁷ Sỹ vãhã vësóg ki ãjag mỹ rán vë, ù tỹ inh vỹ rán ja pãte, inh hã vỹ Paulo nĩ. Isỹ rán mũn hã vë. Ge inh nĩgtĩ, isỹ ù mỹ vënh rá jënën kỹ.

¹⁸ Ěg Senhor tỹ Jesus Cristo mỹ sóg to vỹ tĩ, ti tỹ ãjag tar han jé.

Hã vë.

PAULO TÛ CARTA HAN: TIMÓTEO MÛ CARTA VE

¹ Paulo tÛ rá vĕ. Topĕ ne inh kuprĕg ja nĭ', ĕg kren han tĭ ti. Isÿ tÛ Jesus Cristo apóstolo jĕ jé tóg inh fĕg ja nĭ. Ti hã ve sór ĕg tóg mÛ, Jesus Cristo ti.

² Isÿ inh kósin tÛ Timóteo mÛ rán hã vĕ. TÛ ã inh kósin pĕ ri ke nĭ, ã tÛ isugrĭn Topĕ vĭ kri fin kÿ.

Ēg jóg tÛ Topĕ mÛ sóg to vĭ tĭ, ti tÛ ã tar han jé, ti tÛ ã jagãgtãn jé, ti tÛ ã krĭ kuprã han jé, ĕg Senhor tÛ Jesus Cristo ti ke gé.

Ēg tÛ vyrmÿ vĕnh vĭ jĕmĕ sór ke tÛ

³ Isÿ cidade tÛ Éfeso tá kãkutĕ kÿ ga tÛ Macedônia ra tĭg kÿ sóg ã mÛ to vĭ, ã tÛ ver Éfeso tá ke ag ki rĭr jé. Ā mÛ sóg tó, ã tÛ tá nÿtĭ ag jyvĕn jé. Ón kÿ ag tóg Topĕ jykre kãmén sór tĭ. Tag to ag mÛ: “han tÛg nĭ,” hemnĭ.

⁴ Topĕ jykre tovãnh kÿ ag tóg vyrmÿ nĕn ũ ũ to jykren sór mÛ, hã vÿ: kanhkã tãn tÛ ó, he mÛ, kar ag tóg gufã ag jiji tó sór mÛ gé. Ag tÛ nĕn tó mÛ ĕn tó kãn ke tÛ ĕg tóg nĭ. Tag to jagnĕ vĭ kafãn mÛ vÿ kutĕ tĭ. Ēg pi(jé) tag tÛ Topĕ jykre han tĭ'. Topĕ jykren hã vĕ, hã vÿ: vĕnh kar tÛ ti ki rã, he mÛ.

⁵ Ēg tÛ Topĕ jykre han kÿ ĕg tóg jagnĕ to há tãvĭ nÿtĭ, ĕg fe kar tÛ, kÿ ĕg tóg jagnĕ mÛ vĕnh jykre pir han tĭ gé, ti ki rã há han jé ĕg tóg ke mÛ gé.

⁶ Tá ke ũ ag tóg vĕnh jykre há tag togvãnh, kÿ ag tóg véké vĕmén mÛ nĭ ha. Ag tÛ kygnĕn hã vĕ.

⁷ Topĕ tÛ vãsÿ ĕg jyvĕn tĭ ĕn tÛ ag tóg ãjag kanhrãn sór tĭ, ag tÛ ki kagtĭg (hã) ra. Ón kÿ ag tóg tó tĭ, ag tÛ ki kagtĭg nÿtĭn kÿ. Topĕ vĭ kãmén sór ag tóg tĭ, to ag tóg: “tag to ke vĕ,” he tĭ, ag tÛ ki kagtĭg nÿtĭn kÿ.

⁸ Ag jãvo ĕg tóg ki kanhró nÿtĭ, Topĕ tÛ vãsÿ ĕg jyvĕn tĭ ĕn há nĭ ti. Ēg tÛ to jykren há han kÿ ĕg tóg ti há nĭ vég tĭ.

⁹ Topĕ pi(jé) ũ tÛ ti vĭ ki króm mÛ ag tugrĭn ĕg jyvĕn ja nĭgtĭ'. Ū tÛ vĕnh jykre kuryj han vãnh ĕn ag tugnĭn ken hã vĕ, ũ tÛ ti vĭ han sór tÛ ag tugrĭn, ũ tÛ Topĕ to é he mÛ ag tugrĭn, ũ tÛ ti vĭ mranh mÛ ag tugrĭn, ũ tÛ

ti ki kanhrãn sór vãnh ag tugnĭn, ũ tÛ vĕnh jykre pãno han mÛ ag tugrĭn ke gé. Ū tÛ ge ag vÿ ãjag panh tén tĭ, ãjag mÿnh tén ag tóg tĭ, jagnĕ kãgtĕn ag tóg tĭ,

¹⁰ ãjag prÛ tÛ fag mré ag tóg nÿ tĭ, ãjag mén tÛ ag mré fag tóg nÿ tĭ, jagnĕ ki vÿn ke ag tóg tĭ, jagnĕ vĕne he ag tóg tĭ, jagnĕ mÛ ag tóg ón tĭ, jagnĕ to ag tóg ón tĭ gé, vĕnh jykre pãno kar han ag tóg tĭ, Topĕ tÛ nĕn ũ to: “kórĕg ti nĭ,” he mÛ ĕn han kãn ag tóg tĭ.

¹¹ Ū tÛ tag han mÛ tugnĭn tóg ĕg jyvĕn ja nĭ, Topĕ ti, ĕg tÛ han tÛg jé. Ti hã vÿ ĕg mÛ vĕnh vĭ sér tó ja nĭgtĭ', ti hã vÿ inh mÛ to: “ha vĕnh kar mÛ tónh tĭg,” he ja nĭ'. Topĕ hã ne ã pir mÛ há nĭ'. Jãvo ag tóg ti vĭ tag kato tĕ tĭ.

Topĕ tÛ ĕg jagãgtãn sór

¹² Ēg Senhor tÛ Jesus Cristo ne isar han tĭ', hã kÿ sóg ti hã mÛ vĭ há han tĭ. Ti hã ne iso jykren kÿ inh kuprĕg', sÿ ti rãnrãj han jé, kÿ tóg vég mÛ, sÿ to tar nĭ ti, ti tÛ isar han kÿ.

¹³ Sÿ tá krÿg ke tÛ vĕ vĕ, isÿ ti rãnrãj han jé. Vãsÿ sóg ti mÛ vĭ kónãn ja nĭgtĭ, ti vóg kónãn ja sóg nĭgtĭ, ti to jÛ pĕ han ja sóg nĭgtĭ gé. Hã ra sóg ti ki kagtĭg nĭ ja nĭgtĭ, kÿ sóg ti ki rã sór ja tÛ nĭgtĭ gé. Hã kÿ tóg inh jagãgtãn, sÿ ti ki rã jé.

¹⁴ Inh jagãgtãn há tãvĭ han tóg, ĕg Senhor ti, hã kÿ sóg ti ki rã há han, kÿ sóg ti to há tãvĭ nĭ gé, Jesus Cristo to.

¹⁵ Tag vÿ tÛ vĕnh vĭ há nĭ, ha mĕ, kÿ vĕnh kar tÛ tag to há nÿtĭ ran jé há tĭ vĕ, hã vÿ: Jesus Cristo vÿ ga kri mur, ti tÛ Topĕ vĭ mranh tĭ ag kren han jé, he mÛ. Topĕ vĭ mranh tĭ ag kar kórĕg kãfór vÿ tÛ inh nĭ.

¹⁶ Hã kÿ tóg inh jagãgtãn ja nĭ gé. Jesus Cristo tÛ vĕnh kar mÛ ven sór vĕ, ti tÛ Topĕ vĭ mranh tĭ ag jagãgtãn sór mÛ ti. Hã kÿ tóg inh jagãgtãn, sÿ ũ tÛ ti vĭ mranh mÛ ag kãfór han ja hã ra. Kÿ vĕnh kar tóg inh ve kÿ Topĕ tÛ ag to há ki kanhró nÿtĭn mÛ. Vĕnh kar vÿ ĕg rĭr krÿg ja tÛ venh ke mÛ, ĕg tÛ ti ki ge kÿ.

¹⁷ Topĕ hã ne ã pir mÛ tÛ pã'i mág nĭ'. Ā tÛ nĕn kar han to tóg nĭ nĭ, kÿ tóg ter ke tÛ nĭ gé. Ti vég tÛ ĕg tóg nĭgtĭ. Ā pir mÛ tóg tÛ Topĕ nĭ. Kÿ ĕg tóg ti hã mÛ vĭ há han ke mÛ,

ti to ke gé. Ti mý vī há han ke tag tóg tūg' henh ke tū nī gé. Amém.

Timóteo rānhrāj

¹⁸ Timóteo', inh kósin vỹ tỹ ã nī. Sỹ ã mý ã rānhrāj tag nīm vē. Vāsỹ ã tóg mẽ ja nī, Topē vī tó tĩ ag tỹ ã to nén tó ja ti. Kỹ ag vī mĩ ěkré. Soldado tỹ ã rānhrāj to vāsān ri ke han kỹ ã jē nī, Topē vī tó kỹ. Topē vī tó tĩ ag vī vỹ ã tar han ke mũ, ã tỹ ã rānhrāj to vāsān há han jé.

¹⁹ Ti ki rā to krónh ke tūg nī. Ā fe kavénh sór tūg nī. Ũ ag tóg ājag fe kavénh ja nĩgtĩ. Hã ra ag tóg kykũnh sór ja tũ nĩgtĩ, ag fe kavėj ti. Hã kỹ ag tóg ti ki rā kỹ tĩ tovānh tĩ, kỹ tóg ěg barco tỹ goj ki pun ke ri ke nī.

²⁰ Ag kāmĩ ũ vỹ tỹ Himeneu nī, Alexandre ti ke gé. Topē to é he ag tóg mũ ha ũri, hã kỹ sóg Satanás mý ag vin, ti tỹ ag vóg kónān jé. Satanás tỹ ag vóg kónān tugrĩn ag hỹn ki kanhrān ke mũ, ěg tỹ Topē to é henh ke tū ti.

2

Igreja krēm vėnh jykre

¹ Ā tỹ ã tũ ag jyvėn kỹ ag mý ag tỹ Topē mré vėmén ke hã tómnĩ. Ag mý: “Topē mré vėmén e han nī,” hemnĩ. “Ti mý nén ũ kar to vĩmnĩ, vėnh kar jagfy vĩmnĩ, ti mré, ti mý nén ũ kar to: “há ti nī,” hemnĩ gé,” hemnĩ ag mý.

² Pã'i mág ag jagfy Topē mré vĩmnĩ gé, pã'i kar ag to ke gé. Kỹ ag tóg jatu nỹtĩ. Kỹ ěg tóg jatun mý ag krēm nỹtĩn kỹ ěg rānhrāj nón mũnh ke mũ gé, ěg tỹ Topē to há nỹtĩn kỹ, ěg tỹ jagnė to há nỹtĩn kỹ ke gé.

³ Topē mý tóg há nī, tag ti, ũ tỹ ěg kren han tĩ ti mý, ti mý tóg sér tĩ.

⁴ Ti tỹ tag han sór vē, ha mẽ: ěprā ke ag krenkren han sór tóg mũ, vėnh kar tỹ ti tỹ ki hã tó mũ tag mẽ han kãn jé.

⁵ Pir ti nī, Topē ti. Pir ti nĩ gé, ũ tỹ Topē mré ěg jagfy vī mũ ti, hã vỹ: ěg mré ke tỹ Jesus Cristo, he mũ, ũ tỹ ěg ri ke mur ja ěn ti.

⁶ Ti hã ne vėnh fėg', ti tỹ vėnh kar kygãm jé. Topē tỹ ti mý kurā nīm ěn kã ke ja vē. Kỹ vėnh kar vỹ mẽnh ke mũ, ũ tỹ ve ja ag vī ti.

⁷ Hã kỹ tóg inh mý: “ha vėnh kar mý tónh tūg,” he ja nī. Sỹ tỹ ti apóstolo jē jé tóg inh kuprėg, hã kỹ sóg tó mũ. Ki hã sóg tó mũ.

Inh pi(jé) ón mũ'. Fóg ag to tóg inh jėnė, kanhgág ag to ke gé, sỹ ag mý vėnh vī há tó jé, ag tỹ Topē ki ge jé gé.

⁸ Kỹ tá Jesus ki ge kỹ nỹtĩ ag mý tómnĩ, ag kar tỹ igreja krēm Topē mré vėmén jé. Hã ra tóg há tũ nī, ũ tỹ ã jykre pāno tovānh sór tũ nĩn kỹ, ti tỹ Topē mré vėmén mũ (hã) ra. Ag tỹ Topē mré vėmén kỹ ag tóg ājag jũ tovānh ke mũ, ag tỹ ũn kato tē mũ ag tovānh jé ag tóg ke mũ gé. Tag tómnĩ ag mý.

⁹⁻¹⁰ Kỹ ũn tỹtá fag vỹ ge nỹtĩn mũ gé, ājag tỹ vėnh mǎn kỹ nỹtĩn kỹ. Fag sĩnvĩ han jafā vỹ tỹ fag jykre kuryj nī. Fag tũ hã vē. Tag han kỹ ěg tóg vėg mũ, fag tỹ Topē to há nỹtĩ ti. Kur to mý'ág tĩ ra rānh ke tũ fag nĩ hã ra. Fag tỹ ājag kur tỹ vėsĩ tǎvĩ han tĩ to ken hã vē, fag gǎnh to ke gé. Pi(jé) há nī', fag tỹ brinco mág tỹ vėso vin kỹ, jānka e tỹ vėso sa kỹ, kur kaja e tu kỹ, fag tỹ nén kar kaja e génh kỹ tóg há tũ nī, fag tỹ tỹ vėsĩ tǎvĩ han kỹ. Fag kur há vỹ há nī, kur sĩnvĩ ti.

¹¹ Ājag tỹ vėnh mǎn kỹ nỹtĩn kỹ fag vỹ vĩnh ke tũ nī. Mě tǎvĩ han jé fag tóg ke mũ, fag tỹ tỹ ag krēm ke nỹtĩn kỹ.

¹² Fag tỹ ag mý vėnh jykre nīm kỹ tóg há tũ nī. Fi tỹ fi mén krĩn sór nĩn kỹ tóg kórég nĩ gé. Fag tỹ ěmė kã nỹtĩn kỹ tóg há tĩ.

¹³ Tag to jykren nī, ha mẽ. Topē tỹ ũn han vén mũ vỹ tỹ Adāo nī, kar kỹ Eva fi. Ti tỹ tỹ fi kri ke to ken hã vē.

¹⁴ Kỹ Japo tỹ ũn krĩn kónān mũ fi vỹ tỹ fi nī ja nĩgtĩ. Adāo pijé'. Fi hã ne Topē vī mranh vén', kỹ tóg fi nón mranh ja nĩgtĩ gé, Adāo ti. Hã kỹ tóg há tũ nī, fag tỹ ag krĩn sór kỹ.

¹⁵ Hã ra fag krenkren ke mũ gé, fag krē mré hã. Kỹ tóg há nī, fag tỹ Jesus tovānh sór tũ nỹtĩn kỹ, fag tỹ ti to há nỹtĩn kỹ, jagnė to há ke gé, fag tỹ tỹ ti tũ nỹtĩn kỹ. Fag krĩ há nỹtĩn kỹ tóg há tĩ.

3

Igreja to pã'i mág

¹ Sỹ ke há vē, ha mẽ. Ũ tỹ igreja to tỹ pã'i mág nī sór kỹ tóg vėnh rānhrāj mág han ke mũ.

² Hã ra igreja to pã'i mág vỹ ge jėnh mũ, sỹ ã mý ti jykre kāmén ke vē, ha mẽ. Ũ tỹ kygnė tũ vỹ há nī, ũ tỹ prũ pir han kỹ nī, ũ tỹ nén ũ há to jykren mũ, ũ tỹ vėso jykren

mũ, ù tỹ kór há tá ke ag mỹ: “inh mré nĩnh kãtĩg,” he tĩ, ù tỹ ag kanhrãn há han tĩ,

³ ù tỹ vinho kron (ka) mẽ tũ, ù tỹ ã fe tỹ gỹm ke vãnh, ù tỹ vãnh kar mỹ komêr hã vĩ tĩ, ù tỹ vãnh kar krĩ kuprã nĩ ve sór tĩ, ù tỹ rico nĩ sór vãnh,

⁴ ù tỹ ã ãn krêm nỹtĩ fag ki rĩr há han tĩ, ù tỹ ã krê jyvẽn há han tĩ, ti krê ag tỹ ti kamêg jé.

⁵ ù tỹ ã ãn krêm nỹtĩ fag ki rĩr há han tũ nĩ tóg igreja krêm ke ag ki rĩr há han ke tũ nĩ gé.

⁶ ù tỹ Jesus ki rã tãg tóg tỹ pã'i jênh ke tũ nĩ ver, ke tũ nĩ mũ ra tóg inh mỹ ti tỹ: “tỹ sóg ùn mág nĩ,” henh ha mẽ tĩ, kỹ tóg inh mỹ ti tỹ Japo jykre han ha mẽ tĩ, Japo tỹ ti krĩn kỹ. Kỹ Topê tóg ti vóg kónãn ke mũ.

⁷ Vãnh kar tỹ igreja to pã'i to vĩ há han kỹ tóg há tĩ, ù tỹ Jesus ki ge tũ ag mré hã. Kỹ tóg mỹ'ãg ke tũ nĩ, ti tỹ kygnêg tũ nĩn kỹ. Kỹ tóg Japo jykre han mãn sór ke tũ nĩ gé. Hã kỹ ùn há tãvĩ vỹ tỹ pã'i jênh mũ.

Igreja to pã'i kãsir

⁸ Kỹ igreja to pã'i kãsir ag vỹ nỹtĩ gé. ù tỹ ge ag vỹ vãnh jykre há han kỹ nỹtĩnh mũ gé, vãnh vĩ pir han kỹ nĩ, vinho kron mág tũ, nén ù to én ke tũ, rico nỹtĩ sór ke tũ.

⁹ Topê vỹ ãg mỹ vãnh vĩ jênê, ãg tỹ ti ki rã jé, ãg tỹ ti vĩ tag to krónh ke tũ nỹtĩ jé, ãg tỹ ãg fe kavênh tũ nĩ jé gé. Ag tỹ ti vĩ tag to tar nỹtĩnh ke vễ, igreja to pã'i kãsir ag.

¹⁰ ù tỹ Jesus ki rã tãg nĩ kỹ tóg ver tỹ pã'i nĩnh ke tũ nĩ, ãg tỹ ver ti jykre ven jé. Ti tỹ kygnêg tũ nĩn kỹ tóg há tĩ, ti tỹ tỹ pã'i nĩnh ke ti.

¹¹ Kỹ ag prũ fag vỹ ge nỹtĩnh mũ gé. Fag tỹ nén ù há han kãn kỹ tóg há tĩ. Kỹ tóg há tĩ gé, fag tỹ ù mỹ vĩ kónãn tũ nĩn kỹ, fag tỹ nén ù há kar to jykrén kỹ, fag tỹ fag rãnrãj ki rĩr há han kỹ.

¹² Igreja to pã'i sĩ vỹ prũ pir han kỹ nĩnh mũ gé, kỹ tóg ã krê kanhrãn há han ke mũ gé, kỹ tóg ã ãn krêm nỹtĩ fag ki rĩr há han ke mũ gé.

¹³ ù tỹ ã rãnrãj tag ki rĩr há han kỹ tóg tỹ ùn mág jênh mũ. Jesus Cristo ki rã kỹ tóg jênh mũ, kỹ tóg Topê to kanê jur mãn ke tũ nĩ, jatun mỹ tóg nĩnh mũ.

Jesus kãmê

¹⁴ ã mỹ sóg vãnh rá tag han mũ, hã ra sóg kãnhmar ã ve sór mũ.

¹⁵ Hã ra sóg hên ri ke mũn kãtĩg vãnh han ke mũ, kỹ ã tóg Topê jo ãn krêm vãnh jykre ki kanhró nĩnh mũ. Hã jé sóg ã mỹ rãn mũ. Topê vỹ rĩr jê. Ti tũ vỹ tỹ ãg nỹtĩ, ù tỹ ti ki ge kỹ nỹtĩ ag. ãg hã vỹ vãnh vĩ há hã tóg tĩ, Topê vĩ to, vãnh kar tỹ mẽ jé. ãn nũna tugrĩn ãn vỹ tar jê. Jãvo ãg tugnĩn vãnh kar vỹ vãnh vĩ há ãn mẽnh ke mũ.

¹⁶ Ha vé, Topê tỹ ùri ãg mỹ nén tóg mũ tag vỹ tỹ nén ù há tãvĩ nĩ. Vãsy ag tóg mẽ ja tũ nĩ, ãg tỹ ùri mẽg mũ tag ti. Ti jykren hã vễ, ha mẽ:

Jesus Cristo vỹ ãg ri ke mur, ga kri, kỹ Topê tóg ti tỹ ùn mág han, tá, ti tỹ jykre kuryj nĩn kỹ.

Kỹ tóg ã tỹ jêgnê jafã ag mỹ ti ven, kỹ ti mré mũ tĩ ag vỹ povo kar mỹ ti tóg.

Hã kỹ ga kri mũ ag vỹ ti ki ge mũ, kỹ Topê tóg kãnhkã tá ti tỹ ùn mág han.

ãg tỹ Jesus kãmén hã vễ.

4

Ón kỹ Topê kãmén tĩ ág

¹ Ha vé, Topê kuprĩg vỹ ãg mỹ nén ù jagy tóg tĩ, ha mẽ. Jesus kãtĩg mãn ke tỹ kakó ãn kã ù ag nêji ti tovãnh ke mũ, ag tỹ vãnh ó hã ki rã jé, Nén-Kórég ag jykre ki, Japo tỹ ag kanhrãn mũn ki.

² ù tỹ Japo mré ke ag vỹ un'ón tĩ, hã ra ag tóg ag vĩ jêmê kỹ Jesus tovãnh ke mũ. Jykre régre han ag tóg tĩ, Japo mré ke tag ag. ãjag fe kygvãnh ja ag nỹtĩgtĩ, kỹ ag tóg ki kãtĩg nỹtĩ ha, ag tỹ un'ón mũ ti. “Vãnh vĩ há vễ,” he ag tóg tĩ, vãnh ó to.

³ “Prũg tũg ra, mén tũg ra,” he ag tóg tĩ. “Tag ko tũg ra,” he ag tóg tĩ gé, Topê tỹ nén han ja to. ãg tỹ Cristo ki ge há han kỹ, ãg tỹ ti vĩ kri fi kỹ ãg tóg ti hã mỹ to vĩ há han ke mũ, vễjên to, kỹ ãg tóg nén kar konh ke mũ.

⁴ Topê tỹ nén han mũ kar vỹ há nĩ. Kỹ ãg tỹ ti mỹ: “há ti nĩ, ã tỹ ãg mỹ vễjên tag ven mũ ti,” henh kỹ ãg jatun mỹ konh ke mũ. “Tag konh ke tũ inh nĩ,” henh ke tũ ãg tóg nĩ.

⁵ Topê vĩ vỹ nén kar jãnhkri han tĩ, kỹ ãg tóg to Topê mré vễmén tĩ gé, kỹ ãg tóg jatun mỹ konh ke mũ.

ãg mré ke kar ag kanhrãn nĩ

⁶ Tag kar tómnī, ěg mré ke kar ag mý. Ag mý kāmén ký ā tóg Jesus Cristo rānhrāj han há han mū. Topē vī vỹ ā mý tỹ vějēn ri ke nīnh mū, ký ā tóg tỹ tar jē, ā tỹ ti jykre mī tīn ký. Ki kanhró ā tóg nī, Topē jykre ti, ěg tỹ ti ki rā ký nýtī ti.

⁷ Ů tóg vyrmý nén ũ to jykren sór tī, tỹ vēnh ó han ký, Topē vī ki rán ký nī tū ěn. Tag jēmē sór tūg nī. Vēnh jykre kuryj hā mī tūg nī, tag hā to tar nīmnī.

⁸ Kejēn ěg tóg vākreg tī. ěg tỹ vākre to tar nýtīn ký tóg há sī nī. ěg tỹ jāvo vēnh jykre kuryj kar to tar nýtī tag vỹ há tāvī nī sir. Tag to ěg tóg tag mī mū há han tī, kar ěg tóg tá mū há han ke mū gé.

⁹ Tag vỹ tỹ vēnh vī há nī, vēnh jykre kuryj ti. Vēnh jykre kuryj tỹ vēnh kar mý há nī ra tóg há tī vē.

¹⁰ Vēnh jykre kuryj ve jé sóg rānhrāj mū, tag ve jé sóg vāsān mū. Topē hā ki ěg tóg nén ũ kar vэг tī, hā ký sóg ti hā to vāsān mū. Rīr ti nī, ěg jóg tỹ Topē ti. Ti hā ne ěg kren han tī', vēnh kar ag, ũ tỹ ti ki ge ký nýtī ag.

¹¹ Tag kāmén nī, tag to vēnh kar mý: “tag han ra,” hemnī.

¹² Kyrū ā tóg jē. Ů jé ā to é he tūg, ā kyrū jēn ký. Nén kar há ěn han nī, ag tỹ ve jé, ag tỹ ā kóm han sór jé, ā vī ri ke ěn ti, ā tỹ nén han mū ri ke, ā tỹ vēnh kar to há nī ri ke, ā tỹ Jesus ki rā ký jē ri ke, ā tỹ nén ũ jānhkri han ja ri ke ke gé.

¹³ Inh kātīg ke to hā ā tỹ nén han tī ěn han tīmnī ver. Ag mý Topē vī rán to kemnī, ag jyvēn nī, ag kanhrān nī gé.

¹⁴ ěg jyvēn tī ag ne ā mý tó', Topē tỹ nén to ā tar han ke ti, Topē kuprīg tỹ ag krīn ký, igreja to pā'i ag tỹ ājag nīgē tỹ ā kri fi ja ěn kā.

¹⁵ Ag tỹ ā mý nén tó ja ěn tovānh tūg nī. To jykren nī, to tar nīmnī, vēnh kar tỹ ā tỹ to tar nī ěn ve jé.

¹⁶ Vēsō jykren nī, ký ā tỹ Topē vī tỹ ag kanhrān ke ěn to jykren nī gé, ā tỹ kygnē tūg jé. Tag to tar nīmnī. Ā tỹ tag han ký ā kren ke mū, ký ũ tỹ ā vī mēg mū ag vỹ krenkren ke mū gé.

5

¹ Ůn si há ag mý vī tar han tūg nī. Komēr hā ag jyvēn nī, ěg tỹ ũ tỹ ěg han mū ěn mré

vī ri ke han nī, ā tỹ ũn si há ag mré vēmén ký. Ā tỹ kyrū ag jyvēn ký ěg tỹ ěg jāvy ag jyvēn ri ke han nī.

² Ā tỹ ũn si há fag jyvēn ký ěg tỹ ěg mýnh fi jyvēn ri ke han nī. Ā tỹ tátāg fag jyvēn ký ěg tỹ ěg ve fi jyvēn ri ke han nī. Ā tỹ fag jyvēn ký vēnh ki rīrmnī, ā tỹ fag to ěn tū nī jé.

Ů tỹ hē nỹ ũn mén ter ja fag ki rīr ke mū

³ Ů fag mén vỹ ter, hā ra tóg tū tī, ũ tỹ fag ki rīr ke ti. ěn fag ki rīrmnī.

⁴ Ůn mén ter ja ũ fag krē vỹ nýtī, fag krē'krē mré hā. Ký fag krē hā vỹ fag ki rīr ke mū'. Ag tỹ ājag mré ke fag jagāgtān ký tóg há tī, ũ tỹ ag han mū fag. Ag tỹ gīr nýtī kā fag tóg ag jē'ŷn ja nīgtī, ký ag tóg vēnh kaja jé fag jē'ŷn mū ha. Topē jykren hā vē, tag vỹ ti mý há nī.

⁵ Hā ra ũn mén ter ja ũ fag vỹ krē tū nýtī, ký ũ tỹ fag jē'ŷn ke tóg tū tī gé. Ký Jesus ki ge mū kar ag vỹ fag jē'ŷn ke mū, fag tỹ Topē hā ki nén ũ kar ve sór ký, ti mré vēmén ký, ti hā mý nén ũ kar to vī ký. Fag tỹ tag to krónh kenh ke tū vē, kurā mré hā, kuty mré hā ke gé.

⁶ Fag tỹ hā ra ag to kanhir sór ký fag tóg vēnh jykre pāno han mū, ký fag tóg mū kónān ke mū.

⁷ Tag tómnī, fag mý, fag tỹ tỹ prānh ke tū nī jé.

⁸ Ā rānhrāj jafā tá ke ag kāmī ũ tóg kejēn ā mré ke fag ki rīr tū nī, ā ěn krēm nýtī fag. ěn vỹ Jesus ki rā tovānh ja nī, ti tỹ fag ki rīr ja tū tugrīn. Kórég tāvī ti nī, tag ti. Ů tỹ Jesus ki rā ja tū kórég káfór ti nī.

Ů tỹ hē fag tỹ igreja ki rīr ke

⁹ Tá ũn mén ter ja fag vỹ ājag jiji ránrán sór mū, fag tỹ igreja ki rīr jé. Ůn si há fag jiji rán nī, ũ tỹ 60 anos káfór nýtī fag, ũn mén pir han ký nýtī ja fag.

¹⁰ Vēnh kar tỹ fi jykre há ki kanhró nýtīn ký fi jyjy rán nī, fi tỹ fi krē ki rīr há han ja nīn ký, fi tỹ kór há tá ke fag mý: “inh mré nīnh kātīg,” he ja nīn ký, fi tỹ ā ěn krēm Topē tū ag ki rīr há han ja nīn ký, fi tỹ vēnh kar jagāgtān ja nīn ký, ũn vēsýrēnh mū ag, fi tỹ nén ũ há kar to tar ja nīn ký. Ů tỹ ge fi jiji rán nī.

11 Ûn mén ter ja ù fag vỹ si há tũ nỹtĩ ver, kỹ fag jyjy rán tũg nĩ. Fag tỹ ù to én kỹ fag tóg Cristo tovãnh kỹ mén sór mũ.

12 Kỹ tóg vẽnhmỹ tĩnh mũ, fag tỹ fag jiji rán ja nĩn kỹ, hã vỹ: “mén mãn ke tũ inh nĩ ha, sỹ Cristo tũ hã ki rĩr jé,” he mũ. Fag mén sór kỹ fag tóg fag vỹ tag mranh mũ sir.

13 Kỹ fag tóg rãnrãj tũ nỹtĩn kỹ fag tóg ãn kar mĩ pasa he sór mũ, ha vemnĩ, kỹ fag tóg fagrĩnh mỹ vēmén ke mũ gé sir. Vẽnh kar tỹ nén han mũ tỹ fag tóg vēmén sór mũ, ha vemnĩ. Nén tó vãn h tó jé fag tóg ke mũ gé. Kỹ tóg há tũ nĩnh mũ.

14 Hã kỹ tóg há tĩnh mũ, fag mén mãn kỹ, ùn mén ter ja tỹ gĩr fag. Fag tỹ krẽ ve kỹ tóg há tĩ. Fag tỹ fag ãn ki rĩr há han kỹ tóg há tĩ gé. Kỹ ù tỹ ěg mỹ fag to vỹ sór mũ ra tóg ag mỹ vẽnhmỹ tĩnh mũ, ha vemnĩ.

15 Ha vé, ù fag vỹ Cristo tovãnh huri, ùn mén ter ja tỹ gĩr ù fag, kỹ fag tóg Satanás jykre han mũ sir. Kỹ tóg kórég nĩ.

16 Tá ke fag kãmĩ ù ãn krẽm ùn mén ter ja ù fag vỹ nỹtĩ. Fag hã vỹ fag jẽ'ỹn ke mũ. Fag tỹ fag mỹ: “Jesus ki ge mũ ag tỹ ã jẽ'ỹn kỹ tóg inh mỹ há tĩnh mũ vẽ,” henh ke tũ vẽ. Ke tũ nĩ mũ ra Jesus ki ge kỹ nỹtĩ ag vỹ ù tỹ hẽn ri ke fag ki rĩr ke mũ, kỹ fag jẽn vỹ fag kã kyn kenh mũ, fag tỹ e nỹtĩn kỹ. Jesus ki ge mũ ag vỹ ùn mén ter ja tỹ ge hã ki rĩr ke mũ, hã vỹ: ùn kanhkã tũ, ùn krẽ tũ, he mũ.

Jesus ki ge kỹ nỹtĩ ag tỹ igreja to pã'i ag jẽ'ỹn ke

17 Tá ke ag kãmĩ ù tóg tỹ pã'i nỹtĩ, igreja to. Ag tỹ ag rãnrãj ki rĩr há han kỹ ag tóg ěg mỹ tỹ ùn mág tãvĩ nỹtĩ. Igreja to pã'i ag kãmĩ ù tóg igreja ki ké ag kanhrãn tĩ, Topẽ vỹ tỹ, kỹ ag tóg to krónh ke tũ nĩgtĩ. Tag ag vỹ tỹ ěg mỹ ùn mág tãvĩ nỹtĩ. Ag tỹ igreja krẽm ùn kanhrãn tĩ ag jé ag mỹ kajãm mág, ù tỹ ag kanhrãn tĩ ag mỹ.

18 Tag vỹ rán kỹ nĩ, ag to, ha mẽ: “monh tỹ ěkrẽ jãnkre ki rãnrãj kỹ ti jẽnky tógfĩn tũg nĩ, ti jẽn kamẽg tũg nĩ,” he ja tóg nĩ, Topẽ vỹ rán ki. Kỹ tag vỹ rán kỹ nĩ gé: “ùn rãnrãj mũ ěn tóg ti kaja venh ke mũ, ã rãnrãj kaja ti,” he ja tóg nĩ gé, Topẽ vỹ rá ki. Ti tỹ ěg tỹ Topẽ vỹ tó tĩ ag mỹ kajãm to ken hã vẽ, ěg tỹ Jesus ki ge kỹ nỹtĩn kỹ.

19 Û tóg kejẽn ã mỹ igreja to pã'i jykre kórég tó sór mũ. Ûn régre ag tỹ ti jykre kórég ve ja nĩn kỹ ã mỹ tó kỹ ag vỹ jẽnẽmnĩ, ke tũ nĩn kỹ ùn tãgtũ ag vỹ ti. Ûn pir vỹ jẽnẽ sór tũg nĩ.

20 Pã'i ù tỹ kygnẽ kỹ vẽnh kar rĩnve ti jyvẽn nĩ, vẽnh kar tỹ ti mré ěg tỹ kygnẽg tĩ ěn kamẽg jé.

21 Tag han ra, ha mẽ. Ker han tũg hẽ'. Topẽ vỹ ã tỹ nén han mũ vég tĩ, Jesus Cristo ti ke gé, Topẽ tỹ jẽnẽ jafã ag ke gé, Topẽ tỹ ùn kuprẽg ja ag. Ti hỹn ã mỹ jagy nỹ, sỹ ã mỹ tó mũ tag. Hã ra vẽnh kar mỹ vẽnh jykre pir han nĩ. Û to: “ti tỹ iso há nĩn kỹ sóg ti mỹ vỹ tar han sór tũ nĩ, ti tỹ kygnẽ ja ra,” he sór tũg nĩ. Ge ra ti jyvẽn tar han nĩ.

22 Kỹ kãnhmar ù kri ã nĩgé fi sór tũg nĩ gé. Ti tỹ ã tỹ Topẽ vỹ mranh ja ěn tovãnh kãn ja tũ nĩn kỹ ã tóg ti mré mranh mũ, ã tỹ ge ra ti kri ã nĩgé fi kỹ, ti vỹ mranh tỹ ver ti kãkã nĩn kỹ. Kỹ vẽso jykrén nĩ gé, ã jãnhkri kar jẽ jé.

23 Goj tãvĩ kron sór tũg nĩ. Sĩn kỹ vinho kron nĩ. Vẽnh kagta vẽ ã mỹ, ã kaga nĩn kỹ, ã tỹ fe kórég (ka)mẽ nĩn kỹ.

24 Û ag tóg Topẽ vỹ mranh pẽ han tĩ, kỹ vẽnh kar tóg ag vég tĩ. Topẽ vỹ ag vóg kónãn ke mũ, ag tỹ ti vỹ mranh pẽ han to. Û ag tóg vẽnh péju kỹ mranh tĩ. Ag tỹ Topẽ vỹ mranh mũ ěn vỹ vẽnh ven ke mũ gé kejẽn, ha vemnĩ.

25 Ge ti nĩ gé, vẽnh jykre há mré. Vẽnh kar vỹ vég mũ, ù tỹ vẽnh jykre há han mũ ti. Kejẽn ù tóg nén ù há han tĩ, hã ra tóg vẽnh péju kỹ han tĩ. Vẽnh ven jé tóg ke mũ gé, ti tỹ han mũ tag ti.

6

Patrão camarada jykre

1 Tá ke ag kãmĩ ù tóg tỹ patrão camarada nỹtĩ. Kỹ ù ag patrão vỹ Cristo ki kagtĩg nĩ. Ti camarada ag mỹ kemnĩ, ag tỹ ãjag patrão kamẽg jé, ag tỹ ag patrão tũ ki rĩr há han jé. Kỹ ù tóg ěg to vĩnh ke tũ nĩ, Topẽ to, ti vỹ to, ag tỹ vẽnh jykre há han kỹ.

2 Û ag patrão vỹ Cristo ki rã ja nĩ. Ti camarada ag mỹ kemnĩ, ag tỹ ti to é he tũg jé. “Inh mré ke vỹ tỹ ti nĩ, inh patrão ti, ti tỹ Cristo ki rã kỹ. Kỹ inh hỹn ti vỹ han ke

tũ nĩ,” he tũg nĩ. Ti tỹ ãg mré Jesus ki rã kỹ ãg tóg ti to há nĩ. Kỹ tóg ãn vėsýrénh mũ ag jagãgtãn tĩ, ag patrão tĩ. Kỹ tóg há tĩ, ti camarada ag tỹ ti tũ ki rĩr há tãvĩ han kỹ. Tag tómnĩ, vėnh kar mỹ. Tag tỹ ag jyvėn nĩ.

Ón kỹ Topě kãmén tĩ ag

³ Û ag tóg vurmỹ jykrén kỹ nén ù tó sór tĩ. Topě vĩ rán kỹ nĩ ěn tó sór tũ ag nĩgtĩ. Ěg Senhor tỹ Jesus Cristo tỹ nén tó mũ ěn tovãnh kỹ ag nỹtĩ ha, vėnh vĩ há ěn, Topě jykre ěn.

⁴ “Ûn mág vỹ tỹ ãg nỹtĩ,” he ag tóg tĩ. Hã ra ag tóg jykre tũ nỹtĩ. “Topě hỹn tóg tag tó sór mũ, ti tỹ ěn tó kỹ,” he ag tóg tĩ, ón kỹ, ag tỹ ù tỹ ag mỹ vėnh vĩ há tó mũ ag kato tẽ sór kỹ. Kaga ag nỹtĩ, krĩ vėnhmỹ ag nỹtĩ, hã kỹ ag tóg fagrĩnh mỹ vĩ mũgtĩ. Ag vĩ tugnĩn jagně tũ ki vė'ĩ vỹ kutě tĩ, jagně to jũ ke gé, jagně to vĩ kónãn, jagně to jykrén kónãn,

⁵ jagně to féfén ke gé. Krĩ tũ nĩ ve ag nỹtĩ. Vėnh vĩ há ki kagtĩg ag nỹtĩ. Kỹ ag tóg ón kỹ Topě kãmén to ricon sór nỹtĩ.

⁶ Hỹ, Topě to ěg rico nỹtĩnh mũ, ěg tỹ ěprã ricon sór tũ nỹtĩnh kỹ.

⁷ Ha vé, ěg mur kỹ ěg tóg tỹ nén ù tũ mur, kỹ ěg ter ken kỹ ěg tóg nén kar tovãnh kỹ tĩg mũ gé.

⁸ Kỹ tóg há tĩ, ěg tỹ ũri vėjėn mré ěg kur ven kỹ, tag tãvĩn.

⁹ Ěg tỹ rico nỹtĩ sór kỹ tóg inh mỹ ěg tỹ Topě vĩ mranh ha mẽ tĩ. Kãnhmar ěg tóg nén ù to én', nén ù to én' he tĩ, kỹ tag tóg inh mỹ ěg kókén ha mẽ tĩ. Kỹ ěg tag to nũgme ki vár ke mũ. Pi(jé) há nĩ'.

¹⁰ Ěg tỹ jãnkamy mág to én kỹ ěg tóg nén ù kórég kar han sór tĩ. Ka jãre kórég ri ke ti nĩ, ěg tỹ jãnkamy mág ve sór mũ ti. Vėnh jykre kórég vė. Tag to ù ag tóg Jesus ki rã tovãnh huri, kỹ ag tóg vėsýrénh mũ ha, ag tỹ jãnkamy mág to há nỹtĩ tugnĩn.

Ã rãnrãj ki rĩr há han nĩ

¹¹ Ag jãvo ã hã vỹ tỹ Topě tũ nĩ. Kỹ vėnh jykre kórég tag tovãnh kãn. Ã tỹ nén han ken hã vė, hã vỹ: vėnh jykre kuryj, he mũ, Topě kaměg mũ, he mũ, ti ki rã kỹ tĩ, he mũ, vėnh kar to há nĩ, he mũ, vėnh kar to fen nĩ, he mũ, koměr hã vỹ, he mũ gé.

¹² Ěg tỹ ti ki rã kỹ ěg tóg ti jykre to vãsãnsãn ke mũ, ěg tỹ ka kunũnh sór kỹ to vãsãn ri ke. To tar nĩmnĩ, ã tỹ ěg rĩr krỹg ja tũ ve jé. Tag hã to tóg ã jé prěr, Topě ti. Kỹ ã tóg vėnh kar mỹ tó ja nĩ gé, kurã ěn kã. Ûn e ag vỹ ã vĩ ěn mẽgmě. Kỹ to tar nĩmnĩ.

¹³ Sỹ ã jyvėn sór vė, kỹ Topě vỹ mẽnh mũ. Ti hã ne nén kar rĩnrĩr han tĩ', Topě ti. Kỹ Jesus Cristo vỹ inh vỹ mẽnh mũ gé. Ti hã ne vėnh kãmén há han', pã'i tỹ Põncio Pilatos ěn mỹ.

¹⁴ Sỹ tag tó sór vė, ã mỹ, ha mẽ: ã rãnrãj ki rĩr há han nĩ. To krónh ke tũg nĩ, to kygně sór tũg nĩ gé. Tag han kỹ ěg Senhor tỹ Jesus Cristo tỹ vỹn ke ěn jãvãnh nĩ.

¹⁵ Ti kurã ki Topě vỹ ti mỹ: “ha tĩg,” henh ke mũ. Topě vỹ ã pir mỹ tỹ nén ù kar kri ke nĩ. Kỹ ěg tóg ti hã mỹ vĩ há han ke mũ. Pã'i kar kri tóg tỹ pã'i nĩ. Ûn mág kar kri tóg tỹ ùn mág nĩ.

¹⁶ Ti hã ne ã pir mỹ ter ke tũ nĩ'. Ti hã ne jėngrě kãkã nĩ nĩ', tá ěg jun ke tũ nĩ. Ěprã ke ù vỹ ti ve ja tũ nĩ gé, kỹ ěg tóg ti venh ke tũ nĩ gé, ěg tỹ tỹ ěprã ke nỹtĩnh kỹ. Ti hã ne tỹ ùn mág nĩ'. Ti hã ne tar nĩ'. Tũg' he jãvãnh ti nĩ, ti tỹ tỹ ùn mág nĩ ti. Amém.

Ěprã ùn rico ag

¹⁷ Ěprã ùn rico ag mỹ tómnĩ, ag tỹ vėso: “tỹ inh ùn rico mág nĩ,” he tũ nĩ jé. Kỹ tóg há tũ nĩ gé, ag tỹ: “isỹ nén ù kar tỹ tũ nĩnh kỹ isóg nén ù jagy venh ke tũ nĩ,” henh kỹ. Ag rico vỹ kãnhmar tũg' henh mũ. Ag jé Topě hã ki nén ù kar ve sór. Ti hã vỹ ěg mỹ nén ù kar nĩm tĩ, ěg fe tỹ mrin ken jé.

¹⁸ Ûn rico ag jé vėnh jykre kuryj han, ag jé ãjag tũ tỹ vėnh kãpãm, ag jé ùn jagãgtar ag jagãgtãn to krónh ke tũg.

¹⁹ Ag tỹ nén ù há kar han kỹ ag tóg kanhkã tá rico nỹtĩnh mũ, kanhkã tá ag tóg vin han ke mũ, ãjag tũ ti. Kỹ ag tóg ěg rĩr krỹg ja tũ venh ke mũ gé. Ã tỹ ěprã ùn rico ag mỹ tónh ken hã vė.

²⁰ Timóteo', ã tỹ Topě vỹ mẽ ja ěn kã jatu tũg nĩ, ki króm nĩ, to jykrén kỹ. Û ag tóg fagrĩnh mỹ vėmėn mág han sór tĩ, ón kỹ vỹ (ka)mě han kỹ. Ón kỹ ag tóg: “vėnh vĩ há vỹ jagně kato tẽ tĩ,” he tĩ, kỹ ag tóg Topě vỹ tỹ jagně kato tẽ ěn tó sór tĩ. Hã ra ag tóg fagrĩnh mỹ vỹ tĩ. Ag vỹ mẽ sór tũg nĩ.

21 “Ki kanhró ãg nýtĩ,” he ag tóg tĩ, hã ra
ag tóg Topẽ ki rã tovãnh huri. Kóreg ag nýtĩ.
Topẽ mỹ sóg to vĩ tĩ, ti tỹ ãjag tỹ ã to tar
han jé.
Hã vễ.

PAULO TÏ CARTA HAN: TIMÓTEO MÏ CARTA Û

¹ Paulo tÏ rá vë. Topë ne inh fëg', isÏ tÏ Jesus Cristo apóstolo jë jé. Inh mÏ tóg tó, isÏ vënh kar mÏ ëg tÏ Jesus Cristo tigrin rïnrïr nÏtinh ke tag tó jé. Topë tÏ ëg mÏ nén han sór mÏn hã vë.

² IsÏ inh kósin tÏ Timóteo mÏ rán hã vë, isÏ ù to há tävï nÏ ën mÏ. Ëg jóg tÏ Topë mÏ sóg to vï tÏ, ti tÏ ã tar han jé, ti tÏ ã jagägtän jé, ti tÏ ã krï kuprëg jé ke gé. Ëg Senhor tÏ Jesus Cristo mÏ sóg tag to vï tÏ gé.

Paulo tÏ Topë mÏ vï há han

³ Topë mÏ sóg vï há han tÏ. Ti hã mÏ sóg ränhräj tÏ, inh jóg'jóg ve ag ri kén. To kygnë sór vänh inh nÏgtÏ.

Ä tó sóg tÏ, sÏ Topë mré vëmén kÏ. To krónh ke tÏ inh nÏgtÏ, kurã kar ki, kuty ki ke gé.

⁴ IsÏg kÏ ã tóg fÏ ja nÏ. Hã mÏ sóg ëkrëg tÏ, hã kÏ sóg ã ve sór tävï nÏ, inh fe tÏ mrin ke jé.

⁵ Jesus ki rä há han ã tóg nÏ, ã fe kar tÏ, ã vóvó tÏ Lóide fi ri ke, ã mÏnh tÏ Eunice fi ri ke. Fag ri ke han kÏ ã tóg ti ki rä gé, ki kanhró sóg nÏ.

⁶ Hã kÏ sóg ã jyvën sór mÏ. Topë vÏ ã mÏ vënh ränhräj nÏm, isÏ inh nÏgé tÏ ã kri fi ja nÏn kÏ. Ën to tar nÏmñ.

⁷ Topë vÏ ëg mÏ ã kuprëg jënë, ëg kanë jur tÏ nÏ jé, ëg tar nÏtÏ jé, ëg tÏ jagnë to há nÏtÏ jé, ëg tÏ vëso jykrén jé.

⁸ Hã kÏ ëg Senhor to mÏ'äg tÏg nÏ. Ti kãmén nÏ, kÏ inh kãmén nÏ gé, isÏ ti tugnÏn se kÏ jë tag ti. KÏ ã tÏ ti tigrin vësÏrénh ke tag kamëg tÏg nÏ gé inh mré. Topë vï to ëg vësÏrénh tÏ, hã ra Topë tóg to ëg tar han tÏ gé.

⁹ Ti hã ne ëg kren han', ti hã ne ëg kuprëg', ëg tÏ tÏ ti tÏ nÏtÏ jé. Ëg tÏ vësóg ki to väsän pijé'. Ti hã ne to jykrén', kÏ tóg ëg jagägtän kÏ ëg kuprëg, Jesus Cristo tugnÏn. Ëg tÏ ti ri ke há nÏtÏ jé tóg ëg kuprëg. Hã ra tóg nén kar han ke to há tag to jykrén ja nÏgtÏ.

¹⁰ KÏ tóg ùri hã ëg mÏ tó, ëg kren han tÏ tÏ Jesus Cristo jënën kã. Ën vÏ ëg ter ke tag tÏ

tÏg' hé, kÏ tóg ëg rïnrïr han mÏ sir, ëg tÏ ëg rïr krÏg ja tÏ ve jé sir, ëg tÏ ti vï sér kri fi kÏ.

¹¹ KÏ tóg inh mÏ: “vënh kar mÏ inh vï tónh tÏg,” he ja nÏ gé, sÏ tÏ ti apóstolo jë jé, sÏ ti vï tÏ vënh kar kanhrän jé.

¹² Hã kÏ sóg se kÏ jë ha. Hã ra sóg mÏ'äg ke tÏ nÏ. Ti ki rä kÏ sóg jë ha, ti ki kanhró sóg nÏ, sÏ ùn ki rä ja ën ti. Nén ù kar to tóg tar nÏ, hã kÏ tóg inh ki rïr há han ki kanhró nÏ gé, sÏ ti mÏ vënh fëg kÏ, isÏ kurã tÏ ëgno pétëm há han jé.

¹³ IsÏ nén tÏ ã kanhrän ja ën kã jatu tÏg nÏ. Vënh vï há vë, sÏ ã mÏ nén tó ja ti. Tag ki króm kÏ inh ri kén kãmén nÏ. Ti ki rä to tar nÏmñ, vënh kar to há nÏmñ gé, Jesus Cristo tÏ nén han ja ën ri ke han nÏ.

¹⁴ Ti tÏ ã mÏ vënh ränhräj nÏm ja ën ki rïr há han nÏ, ù tÏ Topë vï tÏ ù han tÏ nÏ jé. Topë kuprëg vÏ ëg kãki jamã nÏ. Ën vÏ ã tar han ke mÏ, ã tÏ ti vï tó há han ke to.

¹⁵ Ha vé, ga tÏ Ásia tá ke kar ag vÏ isovänh kãn, Fígelo ke gé, Hermógenes ke gé. Tag më ã hÏn huri.

¹⁶ Topë mÏ sóg to vï tÏ, ti tÏ Onesíforo mré ke fag jagägtän jé, ùn tÏg mÏ ën ti. Iso há tävï ti nÏ ja nÏgtÏ. Iso mÏ'äg tÏ ja ti nÏgtÏ, ise kÏ jë (hã) ra.

¹⁷ Ti tÏ cidade tÏ Roma tag ki jun kÏ tóg inh jävänh tävï han ja nÏ, kÏ tóg kejën inh ve ja nÏ.

¹⁸ Ëg Senhor hÏn ti jagägtän ke mÏ, ti tÏ kurã tÏ ëgno ki ti kren han jé, kÏ tóg inh mÏ sér tÏnh mÏ. Ki kanhró ã tóg nÏ, ti tÏ Éfeso tá inh ki rïr há han ja ti. SÏ ã mÏ Onesíforo jykre tón hã vë.

2

Ëg väsän ke

¹ Inh kósin', Jesus Cristo ne ã tar han ke mÏ', kÏ krónh ke tÏg nÏ.

² Inh vï më ã, sÏ ùn e ag kanhränrän kÏ. Tag tómnÏ gé, ù ag mÏ. Û tÏ krónh ke tÏ ag mÏ tómnÏ, ù tÏ ã kóm ag kanhrän ke to jykre há nÏtÏ ag mÏ.

³ Ëg tÏ Jesus tigrin vësÏrénh ke to tar nÏmñ inh mré, Timóteo'. Jesus Cristo soldado ri ke ëg nÏtÏ.

⁴ Soldado jykre tag to jykrén nÏ. Ag pi(jé) vyr mÏ jykrén tÏ', soldado ag. Äjag pã'i vï ki

hã han ag tóg tĩ, ãjag pã'i tỹ ag to há nĩ jé. Hã kỹ ag tóg vyr mỹ ganho ve sór tũ nĩgtĩ. Soldado ag ri ke han nĩ gé, Timóteo'.

⁵ Kỹ ù ag tỹ corrida han mũ ag jykre to jykren nĩ gé. Ag corrida vỹ to vãnh jykre nĩ. Corrida to vãnh jykre ên hã han ag tĩ, ag tỹ ganhar ken jé. Û tỹ corrida han mũ ag ri ke han nĩ, Timóteo'.

⁶ Kỹ êpỹ ki rĩr tĩ ag vỹ rãnrãj mág han tĩ gé, hã kỹ ag tóg krãn kỹ ti kanẽ ko tĩ. Ag ri kén ã tóg venh ke mũ gé, ã tỹ nén ve sór mũ ti, ã rãnrãj mág kỹ, ha vemnĩ.

⁷ Tag to jykren há han nĩ, sỹ ã mỹ tó mũ tag to. Kỹ êg Senhor vỹ ã tỹ to jykren há tãvĩ han ke mũ sir.

⁸ Jesus Cristo mĩ êkren nĩ. Ti ter kar kỹ tóg rĩr mãn. Ti jóg'jóg ve vỹ tỹ Davi ja nĩgtĩ. Hã tó sóg tĩ, ti kãmén kỹ.

⁹ Hã kỹ sóg se kỹ jẽ, ferro tỹ mỹr. “Ti hỹn tỹ ùn jykre pãno nĩ,” he ag tóg tĩ iso, hã kỹ ag tóg ferro tỹ isé. Hã ra Topẽ vỹ pi(jé) se kỹ nĩ nĩ'. Tãmĩ tóg tĩ ha.

¹⁰ Hã kỹ sóg ise kỹ jẽ (hã) ra ti to tar nĩ, Topẽ tỹ ùn kuprẽg mũ ag jagfy, ag krenkren jé, ag tỹ Jesus Cristo ki ge tigrĩn, ag tỹ ti tugnĩn kanhkã tá junjun jé.

¹¹ Vãnh vỹ há vẽ, tag ti, ha mẽ: êg tỹ ti tigrĩn kãgter mũ ra êg tóg ti mré rĩnrĩr mãn ke mũ gé.

¹² Êg tỹ ti tigrĩn nén ù jagy kar to tar nỹtĩn kỹ êg tóg ti mré tỹ ùn mág nỹtĩnh ke mũ gé. Êg tỹ ti tovãnh kỹ tóg êg tovãnh ke mũ gé.

¹³ Êg tỹ ti to krónh ke tĩ ra tóg êg to krónh kenh ke tũ nĩ jãvo. Ti pi(jé) ón tĩ', hã kỹ tóg êg to krónh kenh ke tũ nĩ gé, ti tỹ: “krónh ke tũ inh nĩ,” hen kỹ.

Êg tỹ Topẽ rãnrãj han há han ke

¹⁴ Tag tómnĩ, vãnh kar mỹ. Tỹ ag jyvẽn nĩ, kỹ ag jyvẽn tar han nĩ gé. Topẽ vỹ ã vỹ mẽnũ mũ. Ag mỹ: “êg kato tẽ mũ ag vỹ kafãn sór tũg nĩ,” hemnĩ. “Jagnẽ vỹ kafãn pi(jé) êg tar han mũ'. Û tỹ tag mẽ kỹ tóg krónh ke sór mũ,” hemnĩ ag mỹ.

¹⁵ Vãsãn ra, Topẽ tỹ ã rãnrãj to: “há ti nĩ,” he jé, ã tỹ ã rãnrãj to mỹ'ãg tũ nĩ jé. Topẽ vỹ to vãsãn nĩ, ã tỹ ki kanhrãn há han jé, ã tỹ vãnh kar mỹ tó há han jé gé.

¹⁶ Û tỹ kanhir kỹ nén ù kórég tó kỹ jẽmẽ sór tũg nĩ, ùn vỹ (ka)mẽ ên vỹ ti. Û tỹ tag tó

mũ ag vỹ Topẽ to kórég tãvĩ nỹtĩ, kỹ ag vỹ vỹ ag kókén ke mũ, kỹ tóg ag jykre pãno pẽ han mũ.

¹⁷ Vãnh vỹ tỹ ge vỹ êg kar kókén ke mũ, komẽr hã, ti tỹ vãnh kar kri rũm ken kỹ. Vãnh kaga kórég tỹ vãnh kar kri rũm ke ri ke ti nĩ.

Û tỹ vãnh vỹ tỹ ge han mũ vỹ tỹ Himeneu nĩ gé, Fileto ke gé.

¹⁸ Tag ag vỹ un'ón tĩ, Topẽ vỹ to. “Rĩr mãn ri ke han êg huri, êg tỹ Cristo ki gen kỹ, hã kỹ êg rĩnrĩr mãn ke tũ nỹtĩ ha, êg ter kar kỹ, Jesus kãtig mãn kỹ,” he ag tóg tĩ. Ag tỹ tag tó kỹ ag tóg ù ag tỹ Jesus to krónh ke han tĩ, kỹ ag tóg Cristo tovãnh mũ ha ag tigrĩn.

¹⁹ Êg tỹ ìn han kỹ êg tóg ti tỹ kri jẽ jafã ên tar han tĩ. Ên ri ke ti nĩ, Topẽ jykre ti. Jesus Cristo kãmẽ vỹ há nĩ, kỹ tóg tũg' henh ke tũ nĩ, ù ag tỹ ón kỹ to vỹ mũ (hã) ra. Êg tỹ ti ki ge kỹ nỹtĩn kỹ tag vỹ êg to rãn kỹ nĩ, ha mẽ: “êg Senhor vỹ ã tũ ag ki kanhró nĩ,” he tóg mũ.

Kar kỹ tag vỹ rãn kỹ nĩ gé, ha mẽ: “vãnh jykre pãno tovãnh kãn ra, ãjag tỹ: inh Senhor vỹ tỹ ti nĩ, Jesus ti, he jé,” he tóg mũ. Cristo jykre to ken hã vẽ. Ón vãnh ti nĩgtĩ.

²⁰ Ha vé, ìn mág krẽm kukrũ vỹ e nỹtĩ. Û vỹ ouro tỹ há nỹtĩ, ù vỹ prata tỹ há nỹtĩ. Kỹ ù vỹ ka tỹ há nỹtĩ gé, ù vỹ go'or tỹ há nỹtĩ gé. Kukrũ há vỹ tỹ vễjẽn né nĩ, kỹ ùn kórég vỹ tỹ vãfãr né nĩ gé.

²¹ Kỹ tóg ge nĩ, ù tỹ kanhir kỹ nén ù kórég tó (ka)mẽ ên ag. Kukrũ kórég ri ke ag nỹtĩ. Hã kỹ Topẽ tóg ag mỹ: “inh rãnrãj han ra,” henh ke tũ nĩ sir. Êg tỹ ti kórég tovãnh kãn kỹ êg tóg kukrũ há ri ke nỹtĩ, kỹ Topẽ tóg êg mỹ: “inh rãnrãj han nĩ,” henh ke mũ gé sir. Ti tũ vỹ tỹ êg nỹtĩnh mũ, kỹ tóg êg mỹ ã rãnrãj nĩm sór mũ, êg tỹ han jé. Kỹ êg tóg vễsỹmér han sór mũ sir, ti tỹ êg mỹ tó kỹ, kỹ tóg Topẽ mỹ sér tĩ.

²² Kyrũ ag vỹ nén ù kar to én (ka)mẽ nỹtĩ. Ên tovãnh kãn. Vãnh jykre há hã mĩ tĩg sórmnĩ. Jesus ki rã hã to jykren nĩ, vãnh kar to há nĩmnĩ, krĩ kuprã nĩmnĩ, ù tỹ êg Senhor mré ke ag to, ùn jãnhkri ag to, vãnh kar to ke gé.

²³ Û ag tóg ón kỹ: “Topẽ hỹn tag tó sór mũ, ti tỹ ên tó kỹ,” he sór ti. Topẽ tỹ nén tó vãnh

ẽn tó sór ag tóg tĩ. Tag tigrĩn jagnẽ to jũ tóg kutẽ tĩ, hã kũ ag mré to jykren sór tũg nĩ.

²⁴ Û tỹ Topẽ mỹ rãnrãj tĩ jé vẽn kar to há nĩ. Ti tỹ kãnhmar ag to jũn kũ tóg tỹ ù nỹ. Ti tỹ komẽr hã vĩ kũ tóg há tĩ, ag kanhrãn jé, vẽn kar to fe há nĩn kũ.

²⁵ Û tóg ti vĩ kafãn sór mũ. Ẽn mỹ tóg vĩ há han ke mũ. Komẽr hã tóg ag mỹ Topẽ vĩ tónh ke mũ, Topẽ tỹ ag jagãgtãn jé, ag tỹ ãjag jykre tovãnh kũ, vẽn vĩ há hã nón mũ jé.

²⁶ Kũ ag krĩ há nỹtĩnh mũ. Japo tũ vỹ tỹ ag nỹtĩ ja nĩgtĩ, ti tỹ ag se jan kũ, ag tỹ ti rãnrãj han jé. Ag tỹ ti tovãnh kũ Topẽ tóg ag krenkren han ke mũ. Kũ tóg ag tỹ Japo jykre tag to vẽn nenh to ag tar han ke mũ, ẽg ke gé. Kũ tóg há tĩ.

3

Kurã tỹ ẽgno to hã vẽn jykre

¹ Tag to jykren, ha mẽ. Ga tỹ tũ' henh ke to hã ẽg tóg nèn ù jagy ve kãn ke mũ. Vẽn kar tỹ vẽn jykre pãno han mũ ve jé ẽg tóg ke mũ.

² ãjag jykre hã han sór jé ag tóg ke mũ. Nèn ù kar to én jé ag tóg ke mũ, ag rico nỹtĩ jé. “Tỹ inh ùn mág nĩ, tag han inh tĩ, tag han inh tĩ,” he jé ag tóg ke mũ. Jagnẽ to vĩ kónãn jé ag tóg ke mũ. ãjag panh vĩ ki hã han ke tũ ag tóg nĩ. “Kórég ti nĩ,” he jé ag tóg ke mũ, ù tỹ ag mỹ nèn ù há nĩm mũ ra. Topẽ to ag é henh ke mũ gé.

³ Jagnẽ to jykre kórég ag nỹtĩnh mũ, ãjag krẽ to ke gé. Jagnẽ mỹ vẽn pãte fón ke tũ ag nĩ gé. Jagnẽ to ag un'ón ke mũ. Vẽso jykren ke tũ ag tóg nĩ. Ag tỹ ù vóg kónãn kũ tóg ag mỹ sér tĩnh mũ. Vẽn jykre há kato tẽ jé ag tóg ke mũ.

⁴ ãjag régre ag vatãnh tá ag tóg ag to vĩ kónãn ke mũ gé. Û tỹ ãjag jykre kórég to ag vóg kónãn ke tag kamẽg vãnh ag nỹtĩ. Vẽso ag tóg: “vẽn kar kãfór vỹ tỹ inh nĩ,” henh ke mũ gé. Ag tỹ Topẽ to há nỹtĩnh ke vẽ vẽ, hã ra ag tóg ãjag tỹ nèn to én mũ ẽn hã han sór ke mũ.

⁵ Ón kũ ag tóg Topẽ to há nĩ ve nỹtĩnh mũ, hã ra ag tóg ti jykre han sór ke tũ nĩ, ti tỹ ẽg tar han tĩ tag vỹ ag mỹ há tũ nĩnh mũ. Û tỹ ge ag tovãnh nĩ, vỹ.

⁶ Ag kãmĩ ù ag vỹ ìn kar mũ mũnh mũ, kũ ag tóg ùn tỹtã jykre tũ fag mré vẽnén sór ke mũ, ù tỹ Topẽ vĩ mranh tĩ fag, ùn én sór (ka)mẽ fag. Ẽn fag mỹ ag tóg vĩnh mũ, fag tỹ ag vĩ ki han jé.

⁷ Ón kũ fag tóg vẽn kanhrãn to tar nỹtĩnh mũ, hã ra fag tóg vẽn vĩ há ki kagtĩg nỹtĩ, hã kũ fag tóg ag vĩ ki han mũ, ù tỹ fag mỹ ón mũ ag vĩn ki.

⁸ Û tỹ fag mré vẽnén mũ ẽn ag vỹ Topẽ vĩ kato tẽ nỹtĩ, vẽn vĩ há ẽn kato. Vãsỹ Janes vỹ Moisés vĩ kato tẽ ja nĩgtĩ, Jambres ti ke gé. Ag ri ke ag nỹtĩ, Topẽ vĩ kato tẽ ag tóg tĩ, ù tỹ fag nón mũ ẽn ag. Vẽn jykre pãno han (ka)mẽ ag tóg nỹtĩ, krĩ tũ ag nỹtĩ. Ón kũ ag tóg Jesus ki ge nỹtĩ ve nĩ, ag tỹ ón kũ ti vĩ tón kũ.

⁹ Hã ra ùn e vỹ ag vĩ kri finh ke tũ nĩ, ha vemnĩ. Vẽn kar vỹ ag krĩ tũ tag venh ke mũ, ha vemnĩ. Janes mré Jambres ri ke han jé ag tóg ke mũ. Vẽn kar vỹ ag krĩ tũ ki kanhró ja nỹtĩgtĩ gé, Janes mré Jambres ti.

Ẽg tỹ Topẽ to tar nỹtĩnh kũ ẽg nèn jagy vẽn ke mũ

¹⁰ Ag jãvo ã tóg inh vĩ kri fi há han tĩ, Timóteo'. Isỹ nèn han mũ ẽn ri ke han ã tóg tĩ gé. Isỹ nèn ve sór mũ ẽn ve sór ã tóg tĩ gé. Isỹ Jesus ki rã ri ke han ã tóg tĩ gé. Isỹ komẽr hã vĩ ri ke han ã tóg tĩ gé. Isỹ vẽn kar to há nĩ ri ke han ã tóg tĩ gé.

¹¹ Ag tỹ inh vóg kónãn ve ja ã nĩ gé, isỹ nèn ù jagy végtĩ ẽn ti. Inh vóg kónãn tỹ hẽn ri ke han ja ag tóg, Antioquia tá, Icônia tá, Listra tá ke gé. Ter kren pẽ han inh, tá. Hã ra ẽg Senhor tóg inh jy nĩgãn.

¹² Ha vé, ẽg tỹ Jesus Cristo jykre mũ mũnh kũ ẽg kar tóg ag tỹ ẽg vóg kónãn venh mũ.

¹³ Ẽg jãvo ùn jykre pãno ag vỹ komẽr hã vẽn jykre pãno han kãn kũ nỹtĩ, ùn un'ón mũ ag ke gé. Û ag lograr ke ag tóg tĩ, hã ra ag tóg ag lograr ke tĩ gé, vẽn kato.

¹⁴ Ag jãvo isỹ ã mỹ nèn tó ja ẽn mũ tĩg nĩ, ã tỹ nèn mẽ ja kar ẽn mũ, ã tỹ ki rã kũ jẽ ẽn mũ. Isỹ ã kanhrãn ja ẽn to tar nĩmnĩ. Inh jykre ki kanhró ã tóg nĩ.

¹⁵ ã sĩ kã ã tóg Topẽ vĩ mẽ, ã kónẽg kã. Ẽn kã ã tóg Topẽ vỹ rãn kũ nĩ ẽn mẽ. Topẽ vỹ rãn kũ nĩ ẽn to jãn kũ ã tóg ki kanhrãn mũ,

Ēg tỹ Jesus Cristo ki rã tugnĩn krenkren ke mũ ti.

¹⁶ Ũ tỹ hẽn ri ke ag vỹ Topẽ vỹ ránrán ja nĩgtĩ. Hã ra Topẽ kuprĩg tóg ag mỹ tó ja nĩgtĩ, ag tỹ nén rán ke ti, hã kỹ ag tóg ránrán. Ti vỹ rán kỹ nĩ to ken kỹ ěg tóg vẽn vỹ há ki kanhrãn mũ, kỹ ěg tóg kãmén há han ke mũ gé. Ēg mỹ tóg ěg tỹ kygnẽ ja ěn ven tĩ, kỹ ěg tóg jagnẽ mỹ ven tĩ gé. Tỹ Topẽ tóg ěg jyvẽn mũ gé, ti vỹ rán kỹ nĩ ki, kỹ ěg tóg jagnẽ jyvẽn ke mũ gé. Kỹ ěg tóg vẽn jykre kuryj ki kanhrãn tĩ gé, ti vỹ rán kỹ nĩ ki, ěg tỹ jagnẽ mỹ tó jé.

¹⁷ Topẽ tũ vỹ tỹ ěg nỹtĩ. Ti pi(jé) ěg tỹ vẽn kygnẽ ve sór mũ'. Ēg tỹ kygnẽg tũ nỹtĩn kỹ ěg tóg nén ũ kar há han to tar nỹtĩ. Ti tỹ tag ve sór vẽ, hã jé tóg ěg mỹ ã vỹ jẽnẽ ja nĩgtĩ.

4

¹ Inh kósin', sỹ ã jyvẽn ke vẽ, ha mẽ, kỹ Topẽ vỹ mẽnũ mũ, Jesus Cristo ti ke gé, ũ tỹ vẽn kar jykre tugnỹm ke mũ ěn ti, ũn rĩnrĩr nỹtĩ ag jykre, ũn kãgter nỹtĩ ag jykre ke gé. Vỹn ke mãn jé tóg ke mũ, ha vemnĩ, kỹ tóg tỹ pã'i mág jẽnũ mũ, ha vemnĩ. Ēg Senhor rĩnve sóg ã mỹ:

² “Topẽ vỹ kãmén ra,” henh mũ. Kejẽn ag tóg mẽ sór tĩ, kejẽn ag tóg mẽ sór tũ nĩgtĩ. Ge ra ag mỹ kãmén nĩ. Ag jyvẽn nĩ, ag mỹ ag tỹ vẽn kygnẽ ja ěn tómnĩ, ag jyvẽn tar han nĩ, ag tỹ mẽ jãvãnh kỹ. Ag jyvẽn to krónh ke tũg nĩ, ag tỹ kejẽn Jesus ki rã sór jé. Topẽ vỹ tó há han nĩ.

³ Kurã tỹ ěgno to hã ag tóg jẽmẽ sór ke tũ pẽ nĩnh mũ, vẽn vỹ há ti, ha vemnĩ. Kỹ ag tóg vẽn vỹ kórég nón mũ sór mũ, ag tỹ nén to ěn mũ ěn ti. Ũ tỹ ón kỹ ag mỹ tónh ke mũ ěn vỹ vẽme sér tónh ke mũ, kỹ tóg ag mỹ sér tĩnh mũ.

⁴ Vẽn vỹ há jẽmẽn ke tũ ag nĩ, hã kỹ ag tóg vẽn ó jẽmẽn ke mũ sir.

⁵ Ag jãvo nén ũ kar to jykren há han nĩ. ã tỹ nén ũ jagy ve kỹ kato tar nĩmnĩ. Cristo to vẽme sér ěn kãmén nĩ, vẽn kar mỹ. ã rãnrãj ki rĩr há han nĩ gé.

⁶ Ag hỹn kãnhmar isén ke mũ, Jesus Cristo tũgrĩn. Hã ra tóg inh mỹ tỹ nén ũ tũ nĩ. Jesus tugnĩn ke vẽ, iser ke ti, hã kỹ tóg inh mỹ tỹ nén ũ tũ nĩ.

⁷ Kejẽn ěg tóg rará tĩ, kỹ ěg tóg vãsãn tĩ. Ēg tỹ rará to vãsãn ri ke han inh, Topẽ rãnrãj han kỹ. Ēg tỹ carreira han kỹ ěg tóg vãsãn tãvĩ han tĩ gé, ěg tỹ ganhar he jé. Vẽnhvó tãvĩ han ěg tóg tĩgtĩ. Tag ri ke han inh, isỹ Topẽ rãnrãj han kỹ. Ti rãnrãj han kãn inh huri. Ti ki rã tovãnh ja tũ inh nĩgtĩ.

⁸ Ũ tỹ carreira ki ganhar he mũ ěn vỹ ka féj tỹ coroa ganhar he tĩ. Ēn ri ke nĩm jé tóg ke mũ inh mỹ, Topẽ ti, inh jykre kuryj to. Nĩm han kỹ tóg nĩ nĩ, Topẽ tỹ inh mỹ nén nĩm ke mũ ti, ag tỹ coroa vég mũ ěn ri ke ti. Kurã ěn kã tóg inh mỹ nĩm ke mũ, ěg Senhor ti. Vẽn kar mỹ ti nĩm ke mũ gé, ũ tỹ ti kãtĩg jãvãnh kỹ nỹtĩ ag kar mỹ.

Paulo tỹ nén ve ja

⁹ Kuri inh venh kãtĩg.

¹⁰ Demas vỹ isovãnh kỹ vyr. Ēprã vẽn jykre han sór ti nĩ, hã kỹ tóg isovãnh kỹ Tessalônica ra vyr. Crescente vỹ Galácia ra vyr, kỹ Tito vỹ Dalmácia ra vyr.

¹¹ Lucas vỹ inhhã inh mré nĩ nĩ. Marcos pére kãtĩg, ti tỹ inh rãnrãj han jé. Tag to tóg tar nĩ.

¹² Tĩquico jẽnẽ inh, ti tỹ Ēfeso ra tĩg jé.

¹³ Kỹ, ã kãtĩg kỹ inh mỹ inh capa ma kãtĩg. Trôade tá ti nĩ, Carpo ĩn krẽm. Kỹ inh mỹ inh livro gé kãtĩg gé, livro grĩngrĩn kỹ nỹtĩ ěn mré hã, nén ũ fãr ki rán kỹ nỹtĩ ěn mré. Isỹ livro ěn venh há pẽ tóg tĩ.

¹⁴ Alexandre, ũ tỹ ferro tỹ nén ũ kar han tĩ ěn vỹ iso kórég tãvĩ nĩ. Ēg Senhor vỹ ti jykre kórég to ti vóg kónãn ke mũ.

¹⁵ Ti kamẽg ra. Inh vỹ kato tẽ mág han tóg.

¹⁶ Fóg tỹ pã'i vỹ inh ki inh jykre jẽmẽ pin huri. Ēn kã ũ tóg inh mré ve ja tũ nĩ. Isovãnh kãn ag tóg. Topẽ mỹ sóg to vỹ tĩ, ti tỹ ag mỹ vẽn pãte fón jé.

¹⁷ Ag jãvo ěg Senhor vỹ isar han, ti tỹ inh mré tag kã jẽ nĩn kỹ. Hã kỹ vẽn kar vỹ ti vỹ mẽ huri, isỹ ag mỹ kãmén kỹ. Povo kar ag vỹ hur mẽ kãn. Kỹ ěg Senhor tóg inh jy nĩgãn, ag tỹ mĩg mỹ inh fón tũ nĩ jé.

¹⁸ Inh jy nĩgãn mãn jé tóg ke mũ gé, Nén-Kórég tỹ isỹ hẽ ri ke tũ nĩ jé. Inh ki tóg rĩr há han ke mũ, sỹ kanhkã ra tĩg há han jé, ti nĩgja ra. Ti hã mỹ ěg vỹ há han ke mũ'. Kỹ tóg tũg' henh ke tũ nĩ, ěg tỹ ti mỹ vỹ há han ke ti. Amém.

¹⁹ Priscila fi mré fi mén tỹ Áquila mĩ sóg
ěkrég tĩ, Onesíforo mré ke fag mĩ ke gé.

²⁰ Erasto vỹ Corinto tá nĩ nĩ. Jãvo Trófimo
tóg Mileto tá kaga nỹ ja nĩ, isỹ tá kãtĩ mũn
kã.

²¹ Kur kãtĩg mẽ han, prỹg tỹ kusa tá krỹg
tũ ki. Êubulo vỹ ã mĩ ěkrég tĩ, Prudente ti ke
gé, Lino ti ke gé, Cláudia fi ke gé, ěg régre kar
ag mré hã. Ěn ag vỹ ã mỹ abraços jěněg tĩ.

²² Ěg Senhor mỹ sóg to vĩ tĩ, ti tỹ ã tar han
jé, ti tỹ ãjag kar tar han jé gé.

Hã vě.

PAULO TÏ ÇARTA HAN: TITO MÏ CARTA

¹ Paulo tÏ rá vë. SÏ Tito mÏ rán hã vë. Topë mÏ sóg rãnrãj tÏgtÏ, kÏ Jesus Cristo vÏ inh fëg, sÏ tÏ ti apóstolo jë jé. Topë tóg ëprã ke ù ag kuprëg, ag tÏ ti ki ge jé. KÏ tóg inh mÏ: “ha isÏ ùn kuprëg ja ag mÏ tónh tÏg,” he ja nÏ. “Ag mÏ inh vÏ ti kãmén nÏ, sÏ ki hã tó mü ên ti, ag tÏ ã vÏ jëmë kÏ inh ki ge há han jé,” he ja tóg nÏ.

² Topë vÏ ëg mÏ: “rÏr krÏg ja tÏ ve jé ãjag tóg ke mü,” he ja nÏ. Hã ve sór ëg tóg mü. Topë tÏ nén tón hã vë, vãsÏ, hã ra tóg ón tÏ nÏgtÏ.

³ Vãhã tóg ëg mÏ ã vÏ tag jënë ja nÏ, ti tÏ ëg mÏ jënënh ke kurã ki. Jesus tÏ tóg ëg mÏ jënë ja nÏ. Hã to Topë tóg inh mÏ: “ha vënh kar mÏ tónh tÏg,” he ja nÏ, ëg kren han tÏ ên ti.

⁴ Hã kÏ sóg ã mÏ tó mü, Tito'. Inh kósin pë vÏ tÏ ã nÏ, ã tÏ inh mré Jesus ki rá kÏ jën kÏ. Ëg jóg tÏ Topë mÏ sóg to vÏ tÏ, ti tÏ ã tar han jé, ã krÏ kuprã nÏ jé ke gé. Ëg kren han tÏ tÏ Jesus Cristo mÏ sóg tag to vÏ tÏ gé.

Tito tÏ Creta ki ke ag ki rÏr

⁵ ã mÏ sóg: “ha ver goj vãso tÏ Creta tá jë,” he ja nÏgtÏ, ã tÏ tá isÏ nén han kãn ja tÏ ên han kãn jé. Hã kÏ sóg ã mÏ: “cidade kar ki igreja to pã'i vin,” he ja nÏ. ã tÏ ù kuprëg kÏ, ti tÏ tÏ pã'i jë jé, kÏ tag to jykrén nÏ, ha më.

⁶ ùn kãmë kórég tÏ jãvãnh jé ã tóg ke mü, ùn prÏ pir han kÏ nÏ ti. Ti krë tÏ Jesus ki rá kÏ tóg há tÏnh mü, ag tÏ nén ù vënhmÏ han tÏ nÏn kÏ, ãjag panh vÏ jëmën kÏ.

⁷ Ha vé, ù tÏ tÏ igreja to pã'i jë sór kÏ tóg tÏ ùn jykre há jën h mü, ù tÏ Topë tÏ ki rÏr há han mÏnh ke mü ti. Ti tÏ ã mré ke ag to: “ag kãfór vÏ tÏ inh nÏ,” henh ke tÏ vë. ùn fe tÏ gÏm ke (ka)më vÏ há tÏ nÏ, ù tÏ vinho kron (ka)më ti, ùn jÏ (ka)më ti. KÏ tóg ã tÏ rico kenh ke hã to én ke tÏ nÏ gé.

⁸ Ti tÏ ù tÏ kuvar há tá kãmü ag mÏ: “inh mré jë,” hen kÏ tóg há tÏ, ti tÏ vënh jykre há to há nÏn kÏ, ti tÏ vëso jykrén kÏ, vënh jykre kuryj han kÏ, Topë vÏ hã ki króm kÏ, ti tÏ vënh kanhrãnh kÏ tÏg kÏ.

⁹ Topë vÏ më ja tóg nÏ. KÏ ti tÏ tag kã jatu tÏ nÏn kÏ tóg há tÏ gé. KÏ tóg ù tÏ ã vÏ mëg mü ag kanhrãnh há han ke mü gé, ag jyvën há han jé tóg ke mü gé. ù tÏ ti vÏ kafãnh mü mÏ tóg tó há han ke mü gé, ti tÏ kã jatu tÏ nÏn kÏ.

¹⁰ Ha vé, ù tÏ hën ri ke ag tóg më jãvãnh nÏtÏ. Véké ag tóg ón kÏ vëmén tÏ. Ag tÏ ù lograr he sór vë. Judeu ag vÏ tag to tar nÏtÏ, ha më.

¹¹ Ëg tÏ ag vÏ tÏ tÏg' henh ke vë. Ha vé, ù fag ne ag vÏ kri fi sór mü', kÏ fag tóg Topë vÏ tovãnh sór mü, fag mén mré hã, fag krë mré hã. Un'ón ag tóg tÏ, ù tÏ fag kanhrãnh sór mü ag. Hã ra ag tóg hã to nén ù ve sór mü, jãnkamy ti, ag tÏ rico nÏtÏ jé.

¹² Ag kãmÏ ù vÏ ki hã tó ja nÏ, ag jyvën tÏ ù, ti tÏ ag kato tã kÏ tag tón kÏ, ha më: “Creta tá ke ag vÏ tÏ ùn ón mé nÏtÏ,” he ja tóg nÏgtÏ. “MÏg jÏ ri ke ag nÏtÏ. Rãnrãj vãnh ag nÏtÏ, hã ra ag tóg jën mág tãvÏ han sór tÏ,” he ja tóg nÏgtÏ.

¹³ Hã ra tóg ge nÏ. Hã kÏ ag jyvën tar han nÏ, ag tÏ Topë ki rá to tar nÏtÏ jé.

¹⁴ Ag mÏ: “Judeu ag tÏ vënh ó tó mü jëmë sór tÏg nÏ,” hemnÏ. KÏ ag tóg ag mÏ ëprã ke jykre tó sór mü gé, ù tÏ Topë vÏ há më vãnh ag. Ëg mré ke ag mÏ ké, ag tÏ ù tÏ ge vÏ jëmë tÏg jé.

¹⁵ Ha vé, ù tÏ vënh jykre kuryj han mü mÏ tóg kuryj kar tÏ, jãvo ù tÏ vënh jykre pãno han mü mÏ tóg pãno kar tÏ gé, ù tÏ ti ki ge tÏ ag mÏ. Ag krÏ vÏ kórég nÏ, kÏ ag tóg ãjag jykre pãno to: “há ti nÏ,” he tÏ, jãvo ag tóg vënh jykre há to: “kórég ti nÏ,” he tÏ gé.

¹⁶ “Topë ki kanhró ëg tóg nÏ,” he ag tóg tÏ, ón kÏ. Hã ra ag tóg ti jykre han vãnh nÏtÏ. Ag tÏ ti jykre han vãnh ki ëg tóg vëg tÏ, ag ón mü ti. ù tÏ ge to ti kórég nÏ, Topë ti, ag tÏ ti vÏ ki króm sór tÏ pë nÏtÏn kÏ. Nén ù há han ki kagtÏg ag nÏtÏ.

2

Vënh kar jyvën há han nÏ

¹ Ag jãvo Topë vÏ kãmén há han nÏ, ã tÏ ag jyvën kÏ, Tito'.

² Kófa ag mÏ: “nén ù há hã to jykrén nÏ,” hemnÏ. “Gøj fa kron sór tÏg nÏ. Nén há kar hã han sórmnÏ. Vëso jykrén nÏ. Ti ki rá há

han ky nýtĩmnĩ. Jagně to há nýtĩmnĩ. Ti tovãnh sór tũg nĩ,” hemnĩ, kófa ag mý.

³ Ky kófa fag jyvěn nĩ gé. “Věso jykrén nĩ,” hemnĩ fag mý. “Ů to vĩ kónãn tũg nĩ. Vinho to én sór tũg nĩ. Věnh jykre há hã han nĩ, věnh kar tỹ ve jé.

⁴ Ky ājag tóg tátãg fag kanhrãn há han ke mũ,” hemnĩ fag mý. “Fag kanhrãn nĩ, fag tỹ ājag mén to há nýtĩ jé, fag krě to,

⁵ fag tỹ věso jykrén jé, nén ũ věnhmý han sór tũg jé, fag tỹ ājag ĩn ki rĩr há han jé, věnh kar mý vĩ há han jé, fag tỹ ājag mén vĩ mranh sór tũg jé, hemnĩ, tátãg fag mý,” hemnĩ, kófa fag mý. Fag tỹ tag han ky ũ tóg Topě vĩ to é henh ke tũ nĩ, fag tũgrĩn.

⁶ Kyrũ ag jyvěn nĩ gé. Ag mý: “nén ũ kar to jykrén há han nĩ, ājag tỹ ěg tỹ nén to én tĩ ěn han tũ nĩ je,” hemnĩ.

⁷ Tag han nĩ gé, Tito', věnh kar tỹ ā jykre há tag ve ky ā kóm věnh jykre há han sór jé gé. Ā tỹ ag kanhrãn ky ki hã tómnĩ. Kanhir ky vĩ tũg nĩ.

⁸ Topě vĩ tó há han nĩ, ũ tỹ ā to: “kygně ti huri,” he tũ nĩ jé. Ky ũ tỹ ěg kato tẽ mũ ag vỹ nén ũ tónh ke tũ nĩ. Ky tóg ag mý'a tĩnh mũ, ag tỹ ón ky ěg kato vĩ ja nĩn ky.

⁹ Ů mý rãnrãj tĩ ag jyvěn nĩ gé. Ag mý: “ājag patrão vĩ han nĩ,” hemnĩ. “Ti mý há ěn han nĩ, ti tỹ ājag mý vĩ há han jé. Ti vĩ kafãn tũg nĩ.

¹⁰ Ti tũ péju(g) tũg nĩ. Ti tũ ki rĩr há han nĩ, ti tỹ ā to vĩ kónãn tũ nĩ jé. Ā tỹ ti tũ ki rĩr há han ky tóg Topě vĩ to vĩ há han ke mũ, ěg kren han tĩ ěn vĩ to, ā patrão ti, ti tỹ Topě vĩ mẽ ky,” hemnĩ, ũ mý rãnrãj tĩ ag mý.

¹¹ Topě tóg ěg jagãgtãn sór mũ, ěprã ke kar ag, ky tóg ěg kren han sór mũ. Hã jé Jesus tóg kãtĩg ja nĩ.

¹² Ky tóg ěg kanhrãn sór mũ gé, ěg tỹ ti kato tẽ tũ nĩ jé, ěg tỹ nén ũ to én sór tĩ ěn han tũ nĩ jé gé, ěg tỹ ga kri mũn ky. ěg kanhrãn sór tóg mũ, ěg tỹ věso jykrén jé, věnh jykre kuryj han jé, Topě jykre ti.

¹³ Ti kãtĩg ve sór ěg nýtĩ, hã ky tóg ěg mý sér tĩ. Tỹ ti pã'i mág tãvĩ nĩ, Topě ti. Tar tãvĩ ti nĩ, ěg kren han tĩ tỹ Jesus Cristo ti ke gé. Ti ve jé ěg tóg ke mũ, ky tóg sĩnvĩ tĩnh mũ, sér pẽ. Hã ky tóg há tĩ, ěg tỹ tag ki mũ há han ky.

¹⁴ ěg jagfy tóg ter ja nĩ, ti tỹ ěg jykre kórég ěn kókén jé. Ky tóg ěg kykũg mũ, ěg jãnhkri nýtĩ jé. Ky ěg tóg tỹ ti tũ nýtĩnh mũ sir, vyr mý. ěg pi(jé) tỹ ũ tũ nýtĩ ha'. Ti tũ vỹ tỹ ěg nýtĩ, ěg tỹ věnh jykre há to tar nýtĩ jé.

¹⁵ Tag kar tómnĩ, Tito'. Tỹ ag jyvěn tar han nĩ gé kejěn. Ā tũ vē mýr, ā tỹ ag jyvěn ke ti, ky ũ jé ā to é he tũg.

3

Topě jykre

¹ Ag mý: “governo vĩ jěměmnĩ, ěg pã'i vĩ ti,” hemnĩ. “Ag vĩ ki króm nĩ. Ag tỹ nén ũ há to: han nĩ, hen ky han sórmnĩ, vēsýmér,” hemnĩ.

² “Ů to vĩ kónãn tũg nĩ,” hemnĩ ag mý. “Ů vĩ kafãn tũg nĩ. Věnh kar mý vĩ há han nĩ. Věnh kar mý koměr hã vĩmnĩ,” hemnĩ ag mý.

³ Ha vé, vãsý ěg tóg kórég nýtĩ ja nĩgtĩ gé. Ki kagtĩg nýtĩ ja ěg nĩgtĩ. Ti vĩ mranh ja ěg tóg nĩgtĩ gé. Vãgfor mũ ja ěg tóg nĩgtĩ, ky ěg tóg ũ tỹ ón ky ěg mý věnh jykre tó mũ ěn vĩ han ja nĩgtĩ gé. ěg tỹ nén to én mũ ěn han kãn ja ěg tóg nĩgtĩ, nén ũ věnhmý kar ěn ti. Věnh jykre pãno han ja ěg tóg nĩgtĩ. Jagně tũ to én ja ěg tóg nĩgtĩ. ěg jykre kórég tag vỹ věnh kar mý kórég nĩ ja nĩgtĩ. Jagně to jũgũ (ka)mě (pě) ja ěg tóg nýtĩgtĩ.

⁴ Vãhã ěg tóg ki kanhró nýtĩ, Topě tỹ ěg jagãgtãn ky, ěg kren han tĩ ti. Ti tỹ ěg to há nĩ mẽ ěg tóg vãhã.

⁵ ěg pi(jé) věnh jykre kuryj han ja nĩgtĩ'. Hã ra tóg ge ra ěg jagãgtãn ja nĩgtĩ, hã ky tóg ěg kren han mũ sir. ěg han mãn ja tóg nĩ, ěg kygpe ky nýtĩn ky. Ā kuprĩg tỹ tóg ěg han mãn, ky ěg tãg nýtĩ ha.

⁶ ěg mý tóg ā kuprĩg jěně, ti tỹ tỹ ěg jagrě nĩ jé. Jesus Cristo hã tũgrĩn tóg ti jěně, ěg kren han tĩ ěn hã tũgrĩn.

⁷ Hã ky tóg ěg mý věnh pãte fón mũ sir. Ti tỹ ěg jagãgtãn hã vē. Ky tóg ěg mý ā tũ tovãnh sór mũ. Hã tó ja ti nĩ. Rĩr krýg ja tũ ve jé ěg tóg ke mũ. ěg tỹ tag ve jé tóg ěg mý ā kuprĩg jěně.

⁸ Tag vỹ ki hã ke nĩ. Hã ky věnh kar mý tómnĩ, ag jyvěn to krónh ke tũg nĩ. Ů tỹ Topě ki ge mũ ag jyvěn há han nĩ, ag tỹ věnh jykre há hã han sór jé. Ky ag tóg tag hã to vãsãn

ke mũ. Tag vỹ há nĩ. Kĩ tóg ěg mỹ nén ũ há han ke mũ gé, vėnh jykre há ti.

⁹ Judeu ũ ag tóg véké ón kũ vėmén sór tĩ. Tag jėmė sór tũg nĩ. Ājag gufã ag jiji tó sór ag tóg tĩ. Jagnė vĩ kafã ag tóg tĩ. Kĩ ag tóg Topė tỹ vãsỹ ěg jyvėn tĩ ěn to jagnė vĩ kafã mũ gé. Tag kar vỹ ěg mỹ nén ũ há han ke tũ nĩ. Nén ũ tũ vė, tag ti, hã kũ jėmė sór tũg nĩ.

¹⁰ Ũ tỹ vyrmỹ vėnh jykre han sór kũ ti mỹ: “ke tũg ra,” hemnĩ. “Ke tũg ra,” he régre han nĩ, ti tỹ kãnhmar ã vĩ jėmėg tũ nĩn kũ. Tag pãte ti tovãnh nĩ, ti tỹ mė jãvãnh nĩn kũ.

¹¹ Ti jykre vỹ pãno tãvĩ nĩ. Topė vĩ mranh ti tĩ. Topė vỹ ũ tỹ ge to: “kórég ti nĩ,” he tĩ.

Tito tỹ ne han ke ti

¹² Kejėn sóg ã mỹ Ártemas jėnė sór mũ, ke tũ nĩ kũ Tíquico ti. Ti tỹ ã tá jun kũ, vėsỹmér inh kukãm kãtĩg, cidade tỹ Nicópolis ra. Tá sóg kusa fĩn rãm ke mũ.

¹³ Zenas ki rĩr há han nĩ gé, lei to estudo han tĩ ěn ti, kar kũ Apolo ti ke gé. Kũ, ag tỹ mũ mãn ken kũ ag mỹ vin nĩ, jãnkamy tỹ ag mỹ tũg ke mũ ěn ti.

¹⁴ Kũ, ěg mré ke kar ag jyvėn há han nĩ, ag tỹ vėnh rãnhřãj há to tar nỹtĩ jé. Kũ ag tóg ũn jagtar ag mỹ vin ke mũ gé, ãjag tỹ nén ũ vėnh kãpãm kũ. Tag ne há nỹnh mũ'. ěg tỹ Topė jykre han to ken hã vė, kũ tóg ěg tỹ Topė mỹ nén ũ kanė han ri ke nĩ sir.

¹⁵ Inh mré nỹtĩ kar ag vỹ ã mĩ ěkrég tĩ. Kũ ěg mré Jesus ki ge mũ kar ag mỹ: “ãjag mĩ ti ěkrég tĩ, Paulo ti,” hemnĩ, ěg to há nỹtĩ kar ag mỹ.

Topė mỹ sóg to vĩ tĩ, ti tỹ ãjag kar tar han jé.

Hã vė.

PAULO TÛ CARTA HAN: FILEMOM MÛ CARTA

¹ Paulo tÛ rá vë, inh, isÿ se kÿ jë ra rá vë. Kÿ ãg régre tÛ Timóteo vÿ inh mré rán mÛ gé. Isÿ Filemom mÛ rán hã vë. Æ to há tävÿ sóg nÿ, Filemom'. Inh mré Æ tóg Cristo rãnrãj han tÿ gé.

² Kÿ sóg ãg régre tÛ Áfia fi mÛ rán mÛ gé, Arquipo mÛ ke gé, inh mré Cristo rãnrãj to vãsã tÿ tag ti, kar kÿ sóg ù tÛ Filemom ïn krêm vënh mãn tÿ ag mÛ rán mÛ gé, ù tÛ Topë vÿ mÿ jé vënh mãn tÿ ag mÛ.

³ Æg jóg tÛ Topë mÛ sóg to vÿ tÿ, ti tÛ ãjag tar han jé, ti tÛ ãjag krÿ kuprãg jé, ãg Senhor tÛ Jesus Cristo panh ãn ti.

Filemom jykre

⁴ Isÿ Topë mré vëmén kÿ sóg Æ mÿ ãkrég tÿ, Filemom', kÿ sóg Æ to Topë mÛ vÿ há han tÿ.

⁵ Æg Senhor tÛ Jesus ki rã há han kÿ Æ tóg nÿji nÿ, hã kÿ Æ tóg nÿji Jesus ki ge kÿ nÿtÿ ag to há tävÿ nÿ gé. Tag mÿ inh.

⁶ Hã kÿ sóg Topë mÛ to vÿ tÿ, ti tÛ Æ krÿn há han jé, Æ tÛ ti jykre hã mÿ tÿg ki kanhró há nÿ jé, Æ tÛ ãg mré Cristo ki rã kÿ jën kÿ. Kÿ tóg Æ krÿ tÛ há' henh ke mÛ, Æ tÛ komër hã ti vÿ ki króm ki kanhrãn kãn jé. Æg tÛ Cristo ki ge kÿ nÿtÿn kÿ ãg tóg vënh jykre sér to tar nÿtÿ.

⁷ Jãvy', inh fe tÛ mrin ke ja Æ nÿ, inh fe tÛ há' he ja Æ nÿ, Æ tÛ iso há tävÿ nÿn kÿ. Kÿ Topë ki ge kÿ nÿtÿ kar ag vÿ Æ jykre ki kanhró kar nÿtÿ. Kÿ ag fe tóg mrin ke mÛ gé.

Paulo tÛ Onésimo jagfy vÿ

⁸ Kÿ sóg Æ mÛ: "tag han jé Æ tóg ke mÛ," henh ke mÛ vë,

⁹ hã ra sóg Æ mÛ vÿ tar han sór tÛ nÿ. Komër hã sóg Æ mÛ to vÿ sór mÛ, Æ tÛ iso há nÿ tugrÿn tag han jé, sÿ Æ mÛ nén to vÿ sór mÛ tag ti. Ha vé, kófa inh nÿ ha, inh, hã vÿ: Paulo, he mÛ. Jesus Cristo tugrÿn sóg se kÿ jë ha.

¹⁰ Æ mÛ sóg inh kósin tÛ Onésimo jagfy vÿ sór mÛ. Inh kósin ri ke ti nÿ ha, ti tÛ isugrÿn Cristo ki rã kÿ, isÿ tag kã se kÿ jë hã ra.

¹¹ Vãsÿ tóg Æ tÛ ki rÿr tÿ vë, hã ra tóg Æ mÛ nén ù há han ja tÛ nÿgtÿ. Æri tóg há nÿ ha, kÿ

tóg Æ tÛ ki rÿr há han ke mÛ ha, ti tÛ inh ki rÿr há han mÛ tag ri ke.

¹² Sÿ Æ mÛ ti jënënh ke vë. Inh fe vÿ tÛ ti nÿ.

¹³ Hã kÿ sóg ti jënë sór ja tÛ nÿ vë, ti tÛ Æ jëgja ki inh ki rÿr jé, isÿ Jesus kãme sér tugrÿn se kÿ jën ki.

¹⁴ Hã ra sóg Æ mÛ ti jënënh ke mÛ, isÿ Æ mÛ: "mÛ há, ti tÛ inh ki rÿr mÛ tag ti?" he ja tÛ nÿn kÿ. Isÿ ti tÿg kamëg mÛ ra tóg Æ tÛ inh ki rÿr mÛ ri ke nÿ vë, hã ra Æ tóg ki kagtÿg nÿ vë, Æ tÛ inh mÛ nén ù há han mÛ tag ti. Hã kÿ sóg Æ mÛ ti jënënh ke mÛ, Æ tÛ Æ tÛ nén han sór mÛ ãn han jé, venh jykre há ãn ti.

¹⁵ Æ camarada ja vë, Onésimo ti, hã ra tóg Æ tovãnh kÿ vënh péju kÿ vyr. Vënh péju sÿ han tóg, hã ra tóg Æ to vÿn ke mãn ke mÛ ha, isÿ ti jënënh kÿ. Tÿg mãn ke tÛ ti nÿ ha.

¹⁶ Ti tÛ vënh péju kÿ tÿ mÛ ãn kã tóg tÛ Æ camarada jë vë, hã ra tóg tÛ Æ jãvy jë ha, Æri. Æ to há tävÿ tóg jë ha, ti tÛ Cristo ki rã kÿ jën kÿ. Ti to sóg há tävÿ nÿ gé, kÿ tóg Æ tÛ ti to há nÿ jé há tÿ gé. Æ camarada vÿ tÛ ti nÿ, hã ra tóg tÛ Æ jãvy nÿ gé, kÿ tóg Æ tÛ ti to há pÿ nÿn kÿn há tÿ.

¹⁷ Kÿ, Æ tÛ iso há nÿn kÿ ti mÛ komër hã vÿmÿnÿ, Æ tÛ komër hã inh mÛ vÿ ãn hã han nÿ, ti mÛ, ti tÛ inh jëgja ki Æ to jun kÿ.

¹⁸ Ti mÛ Æ tÛ nén ù péju kÿ ma vyr'? Ti mÛ Æ mÛ név(e) jé'? Kajãm jé sóg ke mÛ, ti jagfy.

¹⁹ Vësóg ki sóg Æ mÛ rán mÛ, inh, hã vÿ: Paulo, he mÛ. Kajãm jé sóg ke mÛ, ti név(e) ti, ki hã sóg tó mÛ. Hã ra Æ tóg inh mÛ név(e) jë gé, Æ tÛ isugrÿn Jesus ki ra kÿ.

²⁰ Ha vë, jãvy'. Inh fe tÛ mrin kemnÿ, inh mÛ han nÿ, sÿ Æ mÛ nén to vÿ mÛ tag ti, ãg tÛ jagnë mré ãg Senhor ki ge kÿ nÿtÿn kÿ. Inh fe tÛ há' hemnÿ, Æ tÛ tÛ inh mré ke nÿn kÿ, Æ tÛ inh mré Cristo ki rã kÿ jën kÿ.

²¹ Isÿ Æ mÛ nén to vÿ mÛ tag han já Æ tóg ke mÛ, ki kanhró sóg nÿ. Hã kÿ sóg Æ mÛ rán mÛ. Isÿ Æ mÛ nén to vÿ mÛ tag kãfór han jé Æ tóg ke mÛ gé, ki kanhró sóg nÿ.

²² Kÿ inh jo inh nÿr jafã ti kãn nÿ gé. Topë vÿ kãnhmar ãjag vÿ mÿnh ke mÛ, hã kÿ sóg ãjag venh kãtÿg ke mÛ, ha vemnÿ.

Æ tÛ Filemom tá ke ag mÿ ãkrég tÿ ag

²³ Epafras vÿ ãjag mÿ ãkrég tÿgtÿ. Inh mré tóg se kÿ jë, Jesus Cristo tugrÿn.

²⁴ Marcos vỹ ãjag mĩ ěkrég tĩ gé, Aristarco ti ke gé, Demas ti ke gé, Lucas ti ke gé. Inh mré ag tóg rãnrãj mũgtĩ, tag ag.

²⁵ Ěg Senhor tỹ Jesus Cristo jé ãjag tar han kãn. Hã vễ.

HEBREU AG MỸ CARTA

Topě kósin

¹ Topě vỹ vāsỹ ěg jóg'jóg ve ag mré vēmén (ka)mě ja nĩgtĩ. Ag mỹ tóg tó mǎn', tó mǎn', he ja nĩgtĩ. Ti vỹ tó tĩ ag mỹ tóg tó ja nĩgtĩ, vāsỹ, ag tỹ vĕnh kar mỹ ti vĩ kǎmén jé.

² Ūri tóg kakó tĩ ha, kurā tỹ ěgno ti, kỹ tóg ũri ģ kósin jĕnĕ, ti tỹ ěg mỹ Topě vỹ tó jé. Ti mré tóg nĕn ũ kar hyn han ja nĩgtĩ, Topě ti, ģ kósin mré. Kỹ tóg ti mỹ nĕn ũ kar tag vin ke mũ gé. Ti hǎ mỹ tóg vin sór mũ, Topě ti, ģ tũ kar ěn ti.

³ ěg tỹ Topě kósin ve kỹ ěg tóg Topě tỹ tỹ ũn mág nĩ ki kanhró nỹtĩ. Ti ri ke pĕ ti nĩ, ti hǎ pĕ, tỹ ti Topĕn hǎ ve nĩ, ti kósin ti. Ti vỹ vỹ tar nĩ, tỹ tóg ěg tỹ nĕn kar vég mũ tag ki rĩr tĩ, ģ vĩ tỹ. Ti hǎ vỹ ěg tỹ Topě vỹ mranh ěn tỹ tũg' he tĩ, kỹ tóg ěg jǎnhkrig kỹ ěg fĕg ke mũ. ěg jagfy ter kar kỹ tóg Topě pĕgja tá nĩ nĩ, ũn tỹ vĕnh kar tar kǎfór nĩ ěn pĕgja tá, ti kósin ti.

Topě kósin tỹ Topě tỹ jĕgnĕ jafǎ ag kǎfór nĩ

⁴ Topě kósin vỹ Topě tỹ jĕgnĕ jafǎ ag kǎfór nĩ, kanhkǎ tǎn ag. Ti jiji vỹ ag jygjy kǎfór nĩ gé. Hǎ kỹ ěg tóg vég tĩ, ti tỹ ag kǎfór nĩ ti.

⁵ Topě pi(jé) ģ tỹ jĕnĕ jafǎ ag kǎ ũ mỹ: “inh kósin vỹ tỹ ģ nĩ,” he ja nĩgtĩ'. “Ūri hǎ sóg ģ mỹ: tỹ inh ģ panh nĩ, he mũ,” he ja tũ ti nĩ, Topě ti, ģ tỹ jĕgnĕ jafǎ ag kǎ ũ mỹ. Kỹ tóg ag kǎ ũ to: “ti panh vỹ tỹ inh nĩnh mũ, kỹ tóg tỹ inh kósin nĩnh mũ,” he ja tũ nĩ gé. ģ kósin hǎ to tóg tag tó ja nĩ, Topě ti.

⁶ ģ kósin ve ěn jĕnĕ ja ti nĩ, ěg to, Topě ti. ģ tỹ ti jĕnĕn kỹ tóg tag tó gé, ha mĕ: “isỹ jĕgnĕ jafǎ ag vỹ ti krĕm mũg ke kǎn mũ, ha vemnĩ,” he ja ti nĩ, Topě ti.

⁷ Hǎ ra ti tỹ jĕgnĕ jafǎ ag to vĕnh jykre tag tóg rán kỹ nĩ, ha mĕ: “Topě vỹ ģ tỹ jĕgnĕ jafǎ ag tỹ kǎka ri ke han, kỹ tóg ag tỹ pĩ gru ri ke han mũ gé, Topě ti,” he tóg mũ gé, Topě vỹ rán ki, kanhkǎ tǎn ag to.

⁸ Kỹ tóg ģ kósin mỹ tag tó, ha mĕ: “Topě vỹ tỹ ģ nĩ. ģ tỹ tỹ pǎ'i mág nĩ vỹ tũg' henh ke tũ pĕ nĩ. Vĕnh jykre kuryj han ģ tĩ, ģ krĕm ke kar ag mỹ.

⁹ Vĕnh jykre kuryj to ģ há nĩ. Vĕnh jykre pǎno to ģ jũ nĩ. Hǎ kỹ sóg ģ kuprĕg, isỹ tỹ Topĕ nĩn kỹ, isỹ tỹ ģ pǎ'i nĩn kỹ. ģ tỹ sóg ũn mág han, ģ krĕm ke kar ag kǎfór ģ tóg nĩ. ģ tỹ tỹ pǎ'i mág nĩ tũgrĩn ģ fe tóg mrin kenh ke mũ, vĕnh kar fe tỹ mrin ke kǎfór,” he ja tóg nĩ gé, Topě ti, ģ kósin ti mỹ.

¹⁰ Kỹ tóg ti mỹ tag tó gé, ha mĕ: “ěg tỹ nĕn (ũ) kar han ve ki ģ tóg ga han, kanhkǎ ti ke gé, ģ nĩgé tỹ.

¹¹ Tũg' he kǎn jé tóg ke mũ, ģ tỹ nĕn han ja tag ti, jǎvo ģ hǎ tóg tũg' henh ke tũ pĕ nĩ. ģ tỹ nĕn han ja tóg ģ sinsin kỹ kũgnǎnh ke mũ, kur ri ke.

¹² Ti kǎnhpĕn jé ģ tóg (ke) mũ, ěg tỹ kur kónhpĕn ri ke. ěg kur kunũg ěg tĩ, ěg tỹ ũ kǎra rǎg jé. Tag ri ke han jé ģ tóg ke mũ, ģ tỹ han ja kar tag ti tỹ, ģ tỹn kókĕn kỹ. Hǎ ra ģ hǎ tóg tũg' henh ke tũ nĩ. Sin ke tũ pĕ ģ tóg nĩ jǎvo, kófǎn ke tũ pĕ a tóg nĩ jǎvo,” he ja tóg nĩ, Topě ti, ģ kósin ti mỹ.

¹³ Hǎ ra Topě pi(jé) ģ tỹ jĕgnĕ jafǎ ag mỹ: “inh pĕgja tá nĩ,” he ja nĩ'. “Nĩ ra ver, inh pĕgja tá, sỹ ģ kato vỹ mũ ag tỹ ģ krĕm vin jé, kỹ ag se vĕ sir,” he ja tũ ti nĩ, ti tỹ jĕgnĕ jafǎ ag mỹ. ģ kósin hǎ mỹ tóg tag tó.

¹⁴ Topě tỹ jĕgnĕ jafǎ ag vỹ vĕnh kuprĩg ri ke nỹtĩ, hǎ ra ag tóg Topě rǎnhrǎj ti han tĩ. Topě vỹ ag jĕgnĕg tĩ, ag tỹ ti tũ ag jy nĩgǎn jé, ũn krenkren ke mũ ěn ag jy.

2

ěg tỹ Topě vỹ to é henh ke tũ

¹ Hǎ kỹ tóg há tĩ, ěg tỹ ti vỹ mĕ kỹ ti jykre hǎ han kỹ, ěg tỹ tỹ prǎnh ke tũ nĩ jé.

² Topě tỹ jĕgnĕ jafǎ ag vỹ vāsỹ Topě vỹ ma kǎmũ ja nĩgtĩ. Hǎ ra ag tóg ki hǎ tó ja nĩgtĩ. Ū tỹ ag vỹ ki krov tũ ěn vóg kónǎn ja ti nĩgtĩ, Topě ti. “Ū tỹ ag vỹ mĕ sór tũ ěn ag vóg kónǎn jé sóg ke mũ,” he ja ti nĩ, hǎ kỹ tóg hǎ ra ke ja nĩgtĩ.

³ Kỹ ěg tóg ũri kren ke tũ nĩ gé, ěg tỹ ti to é hen kỹ, ti tỹ ěg kren han sór mũ ra. Nĕn ũ mág pĕ vĕ mỹr, Topě tỹ ěg krenkren han sór mũ tag ti. ěg pǎ'i vỹ ģ mré mũ tĩ ag mỹ tó vén, ti tỹ ěg kren han sór mũ tag ti. Ū tỹ ti vỹ mĕg mũ ag vỹ ěg mỹ tó ja nĩgtĩ gé, ti tỹ ěg kren han sór tag ti, hǎ kỹ ěg tóg ki kanhró nỹtĩ ha.

⁴ Kÿ Topê vÿ ù tÿ êg mÿ ti vÿ tó mũ ên ag vÿ to: “há ti nĩ,” he ja nĩ gé, hã kÿ tóg ag tar han, ag tÿ êg tÿ nén ù han vãnh ên hyn han jé, milagre ti, êg tÿ vêsóg ki nén han ki kagtÿg ên. Tag to ag tar nÿtĩ, Topê tÿ ag tân kÿ, ù tÿ ti vÿ tó tĩ ag. Kÿ tóg ag mÿ ã kuprÿg jênê gé. Ti hã ne to jykrén kÿ: “tag tar han jé sóg ke mũ, ên to, kÿ sóg ù ên tar han ke mũ, ù ù to,” he ja nĩ, ti vÿ tó tĩ ag to, Topê ti.

Topê kósin tÿ êg tÿ ùn mág han ke

⁵ Topê vÿ nén (ù) kar ên han măn ke mũ, kÿ tóg tÿ ù tãg nÿtĩnh mũ. Ên kri pã'i vÿ tÿ êg nÿtĩnh mũ, êg tÿ tÿ êprã ke nÿtĩ ra. Ti tÿ jêgnê jafã ag pi(jé) tÿ ga tãg kri pã'i nÿtĩnh mũ'.

⁶ Hã kÿ ti vÿ tó tĩ ù vÿ tag rán ja nĩ, ti vÿ rán ki, ha mẽ. Topê mÿ tóg: “tÿ êg tóg nén ù tũ nÿtĩ vê, êg tÿ tÿ êprã ke nÿtĩn kÿ, hã ra ã tóg êg hã mĩ êkrén kÿ nĩ nĩ,” he ja nĩ. “Tÿ êg tóg nén ù tũ nÿtĩ vê, êg tÿ tÿ êprã ke krê nÿtĩn kÿ, hã ra ã tóg êg ki rĩr tĩ.

⁷ Kÿ ã tóg prÿg pipir ki ã tóg êg tÿ ùn kãsir han ja nĩ, kÿ êg tóg ên kã ã tÿ jêgnê jafã ag krêm nÿtĩ. Tag pãte ã tóg êg tÿ ùn mág han ke mũ, ùn tar, pã'i mág tÿ ùn há nĩ ên ri ke, êg tÿ vãnh kar kri nÿtĩ jé.

⁸ Kÿ ã tóg êg krêm nén (ù) kar vin kãn ke mũ,” he ja tóg nĩ, Topê mÿ, Topê vÿ tó tĩ ti.

Ha vé, Topê vÿ êg krêm nén (ù) kar vin ja nĩ, êg tÿ tÿ nén (ù) kar pã'i nÿtĩ jé. Kÿ nén (ù) kar vÿ êg krêm nÿtĩ. Êg krêm nÿtĩ tũ vÿ tũ tĩ. Hã ra êg tóg ver vég tũ nĩgtĩ, nén (ù) kar tÿ êg krêm nÿtĩ ti. Ver tóg nén ù ù tÿ êg tũ tũ nÿtĩ ven nĩ.

⁹ Hã ra êg tóg Jesus hã tÿ tÿ ùn mág nĩ ên vég tĩ, ùri, ti tÿ tÿ ùn há nĩ ên, pã'i mág ri ke. Prÿg pipir ki Jesus tóg Topê tÿ jêgnê jafã ên ag krêm ke ja nĩ, kanhkã tân ên ag krêm, kÿ tóg êg kar jagfy ter ja nĩ, Topê tÿ êg jagãgtãn kÿ. Kÿ tóg ùri tÿ ùn mág pẽ nĩ nĩ, ti tÿ êg jagfy ter ja ên tugrĩn.

¹⁰ Topê vÿ tÿ nén (ù) kar kri ke nĩ, kÿ nén (ù) kar vÿ ti tugrĩn rĩnrĩr nÿtĩ. Hã kÿ tóg vãnhmÿ tũ nĩ, Topê tÿ Jesus mÿ: “ã jagtar tugrĩn ã tóg tÿ ùn há tãvĩ nĩnh mũ,” hen kÿ. Hã jé Jesus tóg jagtar nĩ ja nĩgtĩ, ti tÿ tÿ ùn há tãvĩ nĩn jé. Kÿ tóg ùn e krenkren han mũ sir. Êg jo tóg tĩg mũ sir, Topê krê kar ag jo,

êg tÿ ti ri ke há nÿtĩ jé gé, êg tÿ Topê jamã sĩnvĩ ên tá junjun jé, ti mré.

¹¹ Ha vé, Jesus vÿ êg tar han tĩ, êg tÿ Topê vÿ mranh măn sór tũ nĩ jé. Kÿ ù tÿ êg tar han mũ vÿ êg mré jóg pir nĩ, Jesus ti. Hã kÿ tóg êg to: “inh jãvy ag, inh ve fag,” he mũ. Êg to tóg mÿ'ãg tũ nĩ.

¹² Êg to tóg: “inh jãvy ag mÿ sóg ã jiji tónh ke mũ, jóg,” he ja nĩ. “Ag rĩnve sóg ã tÿ tÿ ùn há nĩ ên kãmén ke mũ, ã jé tó jé sóg ke mũ, ag to sóg mÿ'ãg ke tũ nĩ,” he ja tóg nĩ, Jesus ti, êg to.

¹³ Kÿ tóg: “Topê ki sóg rã kÿ jê,” he mũ gé. Kÿ tóg: “inh mré ke ag hã vê, Topê tÿ inh mÿ ùn vin mũ ag kar hã vê, fag ke gé,” he ja nĩ gé.

¹⁴ Jesus mré ke ên ag hã vÿ tÿ êprã ke ag nÿtĩ, fag ke gé. Hã kÿ Jesus vÿ ag mré ke tÿ êprã ke nĩ ja nĩ gé, hã kÿ tóg êg jagfy ter ja nĩ. Ti tÿ Japo tũg ke vê, ã ter tugrĩn. Japo vÿ êg tén sór to tar nĩ, hã ra Jesus vÿ ti tÿ tũ' henh ke mũ.

¹⁵ Kÿ tóg êg krenkren han ke mũ, êg tÿ êg ter ke kamêgmêg kÿ. Êg ter ke tugrĩn êg tóg nén (ù) tÿ êg tén ke mũ kar kamêg tĩ, nén (ù) tÿ êg vóg kónãn tĩ kar ke gé. Hã ra Jesus tóg êg krenkren han mũ, kÿ êg tóg nén ù kamêg măn ke tũ nĩ ha.

¹⁶ Ti pi(jé) Topê tÿ jêgnê jafã ag krenkren han mũ', kanhkã tân ag'. Abraão krê ag hã krenkren han tóg mũ, ag jóg mré hã, hã kÿ tóg rán kÿ nĩ.

¹⁷ Hã jé tóg ã jãvy ag ri ke nĩ ja nĩgtĩ, Jesus ti. Tÿ tóg êg hã pẽ ja nĩgtĩ. Êg tÿ nén (ù) kar han mũ ve kãn ja ti nĩgtĩ, êg jagtar mré hã. Hã kÿ tóg êg jagfy vãnh fêg, kÿ tóg êg tÿ Topê vÿ mranh tÿ tũ' he ja nĩ. Topê tũ ki rĩr tĩ to pã'i mág tÿ vãnh rãnrãj han mũ ên ri ke han ja ti nĩ, Jesus ti. Ti tÿ êg jagfy Topê tũ ki rĩr nĩn kÿ tóg êg jagãgtãn tĩ. Ki rĩr há han tóg tĩ gé, ti tÿ êg mré tÿ êprã ke ja nĩn kÿ.

¹⁸ Êg mré tóg jagtar ja nĩgtĩ, Jesus ti. Japo vÿ ti tÿ Topê vÿ mranh han sór ja nĩgtĩ gé, êg ri ke, hã ra tóg mranh ja tũ nĩ inhhã. Hã kÿ tóg ki kanhró nĩ, êg tÿ nén (ù) vég mũ kar ki. Hã kÿ tóg tag kar to êg tar han ki kanhró nĩ inhhã.

3

Jesus tÿ tÿ Moisés kri ke nĩ

¹ Inh kanhkã', Topê tũ vỹ tỹ ãjag nỹtĩ. Kỹ tóg ãjag kuprêg, ãjag tỹ kanhkã tá ve jé. Hã kỹ Jesus mĩ êkrén nĩ. Topê vỹ ti fêg. Kỹ tóg êg mỹ Topê tũ ki rĩr tĩ to pã'i mág ên ri ke nĩ, êg tỹ ti ki rã kỹ. Ti hã kãmén êg tóg tĩ gé.

² Ủ tỹ ti fêg mũ ên rãnrãj han tóg tĩ, Moisés ri ke. Moisés vỹ Topê tũ kar ki rĩr há han ja nĩgtĩ gé, Topê povo kar ki, ti ãn krêm ke kar fag ki.

³ Hã ra Jesus vỹ Moisés kãfór nĩ. Ủ tỹ ãn han tĩ vỹ ủ tỹ ãn ki rĩr tĩ ên kãfór nĩ. Ri ke ti nĩ, Jesus tỹ Moisés kãfór nĩ ti. Êprã ke vỹ tỹ ti nĩ, Moisés ti, kỹ Jesus vỹ ti kãfór nĩ.

⁴ Gĩr kar vỹ panh nỹtĩ gé. Ủ tỹ vãnh kar han mũ vỹ tỹ Topê ti nĩ.

⁵ Moisés vỹ Topê tũ ag ki rĩr ja nĩgtĩ, kỹ tóg ki rĩr há han ja nĩgtĩ. Topê camarada vỹ tỹ ti nĩ ja nĩgtĩ, kỹ tóg Topê ãn krêm ke fag ki rĩr nĩ ja nĩgtĩ. Hã ra tóg Cristo tỹ nén han ke ên kãmén ja nĩ gé, Moisés ti.

⁶ Cristo vỹ tỹ Topê kósin nĩ, kỹ tóg Topê tũ ag ki rĩr há han tĩ, hã ra ag tóg tỹ ti tũ nỹtĩ, ti ãn krêm ke kar ên ag, ã tỹ ãn ki rĩr tĩ ag, fag ke gé. Êg hã vễ, ti tũ vỹ tỹ êg nỹtĩ, ti ãn krêm ke vỹ tỹ êg nỹtĩ, êg tỹ ti to tar nỹtĩn kỹ, êg tỹ ti kãmén há han kỹ, ti tỹ êg mỹ sér nĩn kỹ, êg tỹ tá nén venh ke ti.

Êg tỹ vẽnkhán ke

⁷ Tag tó tóg mũ, Topê ti, ã kuprĩg tỹ, ha mẽ: “Ãjag tỹ ùri inh vĩ mẽ kỹ vãnh kutu han tũg nĩ,” he tóg.

⁸ “Ãjag jóg'jóg ve ag vỹ vãnh kutu han ja nĩgtĩ, kỹ ag tóg inh kato vãsãn ja nĩgtĩ, ag tỹ ga kórég ki nỹtĩn kỹ,” he tóg, Topê ti.

⁹ “En kã ag tóg iso vĩ pãtigtén ja nĩgtĩ gé. “Êg tỹ ti vĩ mranh mũ ra tóg êg vóg konãn ke tũ nĩ,” he ja ag tóg nĩgtĩ, ag tỹ isỹ nén han mũ ên ve ja ra, isỹ prỹg tỹ 40 (ke) ên ki ag ki rĩr há han mũ ra.

¹⁰ Hã kỹ sóg ag to jũ ja nĩ. Ag to sóg: “kórég ag nỹtĩ,” hé. “Vãnh jykre há to jykrén tũ ag tóg nỹtĩgtĩ,” he sóg. “Inh japry ve sór ja tũ ag tóg nỹtĩ, inh jamĩn ti,” he sóg.

¹¹ Kỹ sóg ag to jũ nĩn kỹ (sóg) ag to vĩ jũ han kỹ tag tó, ha mẽ. “Sỹ ag vẽnkhán han ke vễ vễ, hã ra ag tóg iso vĩ jũ han ja nĩ, hã kỹ ag tóg vẽnkhán han ke tũ nĩ ha. Hã kỹ ag ri ke han tũg nĩ, ãjag tỹ ùri inh vĩ mẽ kỹ, he sóg mũ,” he tóg, Topê ti.

¹² Inh kanhkã, tag to jykrén, ãjag tỹ Topê kato vãsãn sór tũ nĩ jé, ãjag tỹ ti vĩ mranh sór tũ nĩ jé gé, ãjag tỹ Topê tovãnh sór tũ nĩ jé. Ti hã ne êg rĩnrĩr han ki kanhró nĩ', Topê ti. Hã kỹ ti tovãnh tũg nĩ.

¹³ Jagnê jyvên nĩ, kurã kar ki, ùri mỹr. ãjag tỹ jagnê jyvên to tar nỹtĩn kỹ ãjag tóg Topê to tar nỹtĩn ke mũ gé, ha vemnĩ, kỹ ãjag kãmĩ ủ vỹ vãnh kutu han ke tũ nĩ. Êg tỹ ti vĩ mranh kỹ êg tóg kutu nỹtĩ, ha mẽ, ti vĩ mranh tỹ êg mỹ sĩnvĩ nĩn kỹ.

¹⁴ Ha mẽ, Cristo tũ vỹ tỹ êg nỹtĩ, êg tỹ ti tovãnh sór tũ nỹtĩn kỹ. Êg tỹ ti ki rã ve kã êg tóg ti to tar nỹtĩ ja nĩgtĩ. Êg tỹ ên ri ke ti to tar nỹtĩn kỹ êg tóg tỹ ti tũ nỹtĩ.

¹⁵ Hã kỹ tóg êg mỹ: “ãjag tỹ ùri inh vĩ mẽ kỹ vãnh kutu han tũg nĩ,” he mũ. ãjag jóg'jóg ve ag vỹ tóg vãnh kutu hyn han' he ja nĩgtĩ, kỹ ag tóg inh kato vãsãnsãn, isỹ ag jykre ve sór ja nĩn kỹ. Ag ri ke han sór tũg nĩ,” he tóg mũ êg mỹ.

¹⁶ Ủ tỹ hễ nỹ hỹn ti vĩ mẽ kỹ ti kato vãsãnsãn ja nĩgtĩ'? Ủ tỹ ga tỹ Egito tá kã pa ja ên ag hã ja vễ, ha mẽ, Moisés tỹ tá ag tatĩn kãtĩg kỹ.

¹⁷ Kỹ Topê hỹn ủ tỹ hễ to jũ ja nĩgtĩ, prỹg tỹ 40 (ke) ên ki? Ủ tỹ ti vĩ mranh ja ên ag hã to tóg jũ ja nĩ, hã kỹ ag tóg ga kórég ên ki tũ' he kãn.

¹⁸ Kỹ Topê hỹn ủ tỹ hễ to: “vẽnkhán ke tũ ag nỹtĩ ha,” he ja nĩgtĩ'? Ủ tỹ ti vĩ han sór tũ ên ag to ke ja vễ, mỹr, ha mẽ.

¹⁹ Ag tỹ ti tovãnh kỹ, hã kỹ ag tóg ag tỹ nén ve sór ja ên ve ja tũ nĩ sir, mỹr, ha mẽ.

4

¹ Topê vỹ êg mỹ tag tó ja nĩgtĩ gé. Ti tỹ êg vẽnkhán han sór vễ, kỹ ti vĩ to é he tũg nĩ. Vãnh ki rĩr há han nĩ, ãjag tỹ to krónh ke tũ nĩn jé.

² Mễ êg huri, Topê tỹ êg mỹ nén han sór mũ ên ti, ủ tỹ ga kórég mĩ mũ ên ag tỹ mẽ ri ke han êg tóg huri. Hã ra ag tóg véké mẽ ja nĩgtĩ, kri fi ja tũ ag nỹtĩgtĩ, ag tỹ mễg mũ ra. Hã kỹ tóg ag mỹ nén ủ há han ja tũ nĩ, Topê vĩ ti.

³ Êg tỹ ti ki ge hã kỹ êg tóg vẽnkhánkán ke mũ. Hã kỹ Topê vỹ tag tó, ha mẽ: “ag to jũ nĩn kỹ sóg ag to vĩ jũ han kỹ tag tó, ha mẽ.

“Sỹ ag vënhkán han ke vë vë, hã ra ag tóg vënhkán ke tũ nýtĩ ha,” he ja ti nĩ. Topě vỹ vãsỹ vënhkán ja nýtĩ, ti tỹ nén (ũ) kar pë han han ti kỹ. Kỹ nén (ũ) kar vỹ hyn han kỹ nýtĩ ha.

⁴ Hã kỹ kurã tỹ 7 (ke) ãn to tag tóg rán kỹ nĩ, ha mẽ. Topě tỹ nén kar hyn han kãn ja to tag tóg rán kỹ nĩ, ha mẽ: “kurã tỹ 7 (ke) ki Topě vỹ vënhkán, ã rãnrãj han kãn kỹ,” he tóg mũ, Topě vỹ rán ki.

⁵ Hã ra tóg Israel ù ag to tag tó ja nĩ gé, hã vỹ: “kỹ ag tóg vënhkánkán ke tũ nýtĩ ha,” he mũ gé.

⁶ Hã kỹ ù ag tóg vënhkánkán ke mũ. Vãsỹ Topě tóg ãg jóg'jóg ve ag mỹ ag vënhkánkán ke tag tó ja nýtĩ vë, hã ra ag tóg ti vỹ jëmë ja tũ nýtĩ, hã kỹ ag tóg vënhkánkán ke tũ nýtĩ ha. Kỹ Topě tóg ù ag kuprëg ja nýtĩ, kỹ tóg ag hã mỹ ag vënhkánkán ke ti nĩm mũ sir, ãg hã mỹ.

⁷ Kurã tãg nĩm ja ti nĩ gé, ãg vënhkán ke to, hã vỹ: “ũri,” he mũ. Hã kỹ Davi tóg kurã tãg tag to tag rán ja nĩ, ha mẽ. Ag tỹ ga kórég ãn tá kãpa kar kỹ, ag tỹ ga há tá junjun kar kỹ Davi tóg tag rán ja nĩ gé, ha mẽ: “ãjag tỹ ùri ti vỹ mẽ kỹ vënh kutu han tũg nĩ,” he ja tóg nĩ. Kurã tãg to ken hã vë.

⁸ Josué vỹ Israel ag mré ga há ãn ra tĩg ja nýtĩ. Hã ra ag tóg tá vënhkán pë han ja tũ nýtĩ ver, hã kỹ Davi vỹ ag mỹ kurã ù tó ja nĩ, ag vënhkán pë han ke ãn ti tó ja ti nýtĩ.

⁹ Ha mẽ, Topě povo vỹ vënhkán ke mũ, ha vemnĩ, ti tỹ ag mỹ kurã nĩv ki.

¹⁰ Û tỹ vënhkán pë ãn vëg mũ vỹ ã rãnrãj ki vënhkán ke mũ, Topě tỹ ã rãnrãj ki vënhkán mũ ãn ri ke, kurã tỹ 7 (ke) ãn ki.

¹¹ Hã kỹ vãsãnsãn, ãjag tỹ tỹ prãnh ke tũ nĩ jé, ãjag tỹ ga kórég kri mũ ja ãn ag nón ti vỹ mranh tũ nĩ jé, ãjag tỹ ãjag vënhkán ke ãn ve jé.

¹² Topě vỹ hã tũgrĩn ãg tóg rĩnrĩr nýtĩ. Æ vỹ hã tỹ tóg nén kar hyn han tĩ. Rógro jã régre vỹ nén (ũ) kym há nýtĩ. Hã ra Topě vỹ vỹ ti tỹ nén (ũ) kym há kãfór han tĩ, kỹ ti vỹ tóg ãg kãra rã tĩ, ãg nĩ ti kãra, ãg kukã ti kãra ke gé, ãg krĩ ti kãra ke gé, ãg kuprĩg ti kãra tóg rã tĩ gé. Kỹ tóg ãg tỹ nén (ũ) to jykren mũ kar ki kanhró nĩ, ãg tỹ nén (ũ) han sór mũ ki kanhró kar ti nĩ gé, Topě ti.

¹³ Nén (ũ) kar ki kanhró tóg nĩ, Topě ti, ã tỹ nén han mũ kar ki kanhró tóg nĩ. Nén ù tóg ti mỹ vënh péju kỹ nĩ tũ pë nĩ. Û tóg ti vatánh tá nén ù han ke tũ pë nĩ gé. Ki kanhró kar ti nĩ, ù tỹ ãg jykre tũgrĩn ke mũ ãn ti.

Jesus tỹ ãg jagfỹ vĩnh ke

¹⁴ Ti to tar nýtĩmnĩ, ha mẽ. Ti ki rã kỹ ãjag nýtĩ, kỹ ti to tar nýtĩmnĩ. ãg jagfỹ Topě tũ ki rĩr tĩ to pã'i mág vỹ nĩ nĩ, hã vỹ: Jesus, he mũ, Topě kósin, he mũ. ãn vỹ kanhkã tá jun huri.

¹⁵ Ti pi(jé) ãg krój nýtĩ tag ki kagtĩg nĩ'. Ki kanhró tóg nĩ mỹr. ãg ri kén tóg jagtar nĩ ja nýtĩ gé, kỹ Japo vỹ ti tỹ Topě vỹ mranh han sór ja nýtĩ gé, hã ra tóg inhhã mranh ja tũ nýtĩ.

¹⁶ Hã kỹ ãg tóg Topě mré vëmén ke mũ, jatun mỹ. Mũmëg vãnh nýtĩ jé ãg tóg ke mũ. ãg jagãgtãn jé tóg ke mũ, Topě ti, kỹ tóg ãg tar han ke mũ gé, ãg krój nýtĩn kỹ.

5

¹ Æprã ke tỹ Topě tũ ki rĩr tĩ to pã'i mág jykre vỹ ge nýtĩ, ha mẽ. Æ mré ke ag jagfỹ tóg vỹ tĩ, Topě mré, kỹ tóg ag jagfỹ Topě mỹ nén ù pũn tĩ gé, kỹ tóg ag mëg tãnh kỹ pũn tĩ gé, ag tỹ Topě vỹ mranh ja tũgrĩn.

² Hã ra tóg tỹ ãprã ke nĩ gé, ag mré, ag krój ri ke tóg nĩ gé, hã kỹ tóg ag krój nýtĩ ra ag jagãgtãn há han tĩ, ù tỹ Topě vỹ mranh sór tũ ra mranh mũ ãn ag.

³ Mranh tóg tĩ gé, Topě tũ ki rĩr tĩ to pã'i mág ãn ti, hã kỹ tóg ã tỹ mranh mũ ãn to Topě mỹ tãnh kỹ pũn tĩ gé, ã mré ke ag tũ ãn mré.

⁴ Hã ra tóg vëso: “inh hỹn Topě tũ ki rĩr sór mũ, kỹ inh hỹn tỹ tag to pã'i mág nĩnh mũ,” henh ke tũ pë nĩ. Topě hã ne ù to: “isũ ki rĩr tĩ to pã'i mág vỹ tỹ ã nĩnh mũ,” he tĩ', ti tỹ vãsỹ Arão kuprëg vën ãn ri ke.

⁵ Hã kỹ Cristo vỹ vësóg ki tag to jykren ja tũ nĩ gé. Ti pi(jé) vësỹ pã'i han ja nýtĩ', vësỹ Topě tũ ki rĩr tĩ ãn to pã'i mág han sór ja tũ tóg nýtĩ'. Topě hã ne ti mỹ: “inh kósin vỹ tỹ ã nĩ,” he ja nĩ'. “Ûri sóg ã mỹ: tỹ inh ã panh nĩ, he mũ,” he ja ti nĩ, Topě ti, Jesus mỹ.

⁶ Kỹ tóg ti mỹ tag tó gé, kỹ tóg rán kỹ nĩ gé, Topě vỹ tỹ rán kỹ nĩ ki, ha mẽ: “isũ ki rĩr jé

ã tóg ke mũ. Tũ' henh ke tũ ti nĩnh mũ, ã tỹ isũ ki rĩr nĩ ti, Melquisedeque tỹ isũ ki rĩr mũ ãn ri ke," he ja ti nĩ gé, Cristo mỹ, Topẽ ti.

⁷ Jesus vỹ, ã tỹ ga mĩ tũg kỹ jagtar nĩn kỹ (tóg) Topẽ mỹ to vĩ', to vĩ' he ja nĩgtĩ, ti tỹ ti kren han jé, ti ter tũ nĩ jé. Kỹ tóg fỹ gé, Topẽ mré vēmén kỹ. Vēsýrénh jagy han tóg. Kỹ Topẽ vỹ ti vĩ jēmẽ ja nĩ, Jesus tỹ ti mỹ to vĩn kỹ. Topẽ mỹ tóg tỹ ùn há nĩ, Jesus ti, hã kỹ tóg ti vĩ jēmẽ ja nĩ.

⁸ Topẽ kósin vỹ tỹ ti nĩ, Jesus ti, hã ra tóg ã jagtar tugrĩn (tóg) Topẽ tỹ nén tó mũ ki kanhrãn kãn ja nĩ, ti tỹ Topẽ vĩ hã han jé.

⁹ Ti tỹ vènh kanhrãn kãn kỹ tóg ãg kren pẽ han ki kanhró nĩ ge sir. Ëg jagfy tóg ter ja nĩ, kỹ tóg ãg kren han mũ, ãg tỹ ti vĩ ki króm kỹ.

¹⁰ Topẽ vỹ ti mỹ: "inh mỹ isũ ag ki rĩr mĩ, to pã'i mág vỹ tỹ ã nĩ, Melquisedeque ãn ri ke," he ja nĩ. Hã kỹ tóg tỹ pa'i nĩ, Jesus ti.

Ëg tỹ ti to krónh kenh ke tũ

¹¹ Sỹ ãjag mỹ tag kãmén kãn sór mũ ra tóg jagy tĩ. Tó jagy ti tĩ, tag ti. Kỹ ãjag tóg mẽ há han tũ nĩgtĩ gé. ãjag pi(jé) krĩ há nỹtĩ ver'.

¹² ãjag tỹ ù ag kanhrãn ke vè vè, ãjag tỹ vãsỹ Topẽ vĩ mẽ ja nỹtĩn kỹ. Hã ra ãjag tóg ver ki kagtĩg nỹtĩ. ãjag kã ù tỹ ãjag mỹ Jesus kãmén vén ãn tó mãn kỹ tóg há nỹnh mũ vè. Gĩr kãsir ri ke ãjag nỹtĩ. Gĩr kãsir ag vỹ leite hã kron tĩ, ãjag tỹ ver kãsir nỹtĩn kỹ.

¹³ Jãvo ùn sanh ag hã vỹ vèjèn kufy ko tĩ'. Gĩr tỹ leite kron mũ ri ke ãjag nỹtĩ, ãjag tỹ Jesus kãmé ãn ki kanhrãn kãn tũ nỹtĩn kỹ ver.

¹⁴ Û tỹ to jykrén há han mũ ãn vỹ ùn sanh há ri ke nĩ, kỹ tóg ki kanhró nĩ. "Tag vỹ há nĩ, tag vỹ há tũ nĩ, tag vỹ kuryj nĩ, jãvo tag vỹ kygnẽ kỹ nĩ," he jé tóg ke mũ, ù tỹ ki kanhrãn há han mũ ãn.

6

¹ ãjag tỹ ver gĩr kãsir ri ke nỹtĩ ra sóg ãjag mỹ Jesus kãmén vén ja ãn tó sór tũ nĩ ha. Sỹ ãjag mỹ ùn sanh ag tũ kãmén sór vè ha, ãjag tỹ ver to tar nỹtĩ tũ ra. Jesus kãmén vén jã ãn hã vè, gĩr tỹ ã pafa ja kron ãn ri ken hã vè, ha mẽ: vènh jykre kórég tovãnh jé ãg tóg ke mũ, ãg tỹ nén to ter ke mũ ãn tovãnh kãn jé ãg tóg ke mũ. Topẽ ki rã jé ãg tóg ke mũ.

² Û tỹ ti ki rã mũ ãn kype jé ãg tóg ke mũ, kỹ ãg tóg ti kri ãg nĩgé finh ke mũ gé, ti tỹ ãg mré Jesus ki rã kỹ jé jé. Kar kỹ ãg tóg ãg ter kar kỹ rĩr mãn ãn to jykrén ke mũ gé, Topẽ tỹ ãg jykre tugnỹm ke ãn to. Vènh kãmé tag kar vỹ gĩr tỹ ã pafa ja kron ãn ri ke nĩ.

³ Tag tó mãn sór tũ inh nĩ ha, ãjag tỹ vãsỹ mẽ ja tag. Sỹ ãjag mỹ tag pãte Jesus kãmén sór vè, kỹ tóg ùn sanh tỹ vèjèn kufy ko ãn ri ke nĩ. Topẽ tỹ tag to isar han kỹ sóg ãjag mỹ kãmén há han ke mũ.

⁴ Ha mẽ, ãg kãmĩ ù ag tóg ag tỹ Topẽ ki rã kar kỹ (ag tóg) ti tovãnh pẽ han ja nĩgtĩ. Kỹ ag tóg ti ki ge mãn ke tũ nỹtĩ ha. Ëg tỹ Topẽ ki ge kỹ tóg ãg kanhrãn ke mũ, vènh jykre há ki. Topẽ vỹ ãg mỹ kanhkã tá vènh jykre há ãn nĩm mũ. Ëg mỹ tóg ã kuprĩg jènẽg mũ gé.

⁵ Topẽ vĩ há nĩ ãn vèg ãg tóg tĩ. Ëg tỹ kanhkã tá nén venh ke ãn ve sĩ han ãg tóg tĩ, èprã, ãg tỹ Topẽ ki ge kỹ.

⁶ Û tỹ ti jykre tag ve kar kỹ ti tovãnh pẽ han kỹ tóg vènhmỹ nĩ. Kỹ tóg ti ki rã mãn ke tũ nĩ ha, ã jykre kórég tovãnh mãn ke tũ ti nĩ ha, ù tỹ ti tovãnh pẽ han mũ ãn ti. Ha vé, ãg tỹ ti ki rã há han kar kỹ ti tovãnh kỹ ãg tóg ti tỹ cruz to sa mãn ri ke han mãn mũ sir, Topẽ kósin ti. Ëg tỹ vènh kar tỹ ti to é he han mãn vè sir.

⁷ Èpỹ ri ke ti nĩ, ha mẽ. Ta tỹ ti kri kutẽ kỹ ga mrãn kỹ ãg jakré tóg mog há han tĩ, ãg tỹ ga há ki ti krãn ti kỹ. Ëg tỹ èpỹ há ri ke nỹtĩn kỹ, ãg tỹ Topẽ mỹ vènh jykre há han kỹ tóg ãg ve há han mũ, Topẽ ti.

⁸ Èpỹ ù tóg hã ra kórég nĩ. Kỹ sónh hã tóg ki munmur tĩ, vãnhi ti ke gé, kỹ tóg mogmog kónãn tĩ sir, ãg jakré ti. Ëg tỹ èpỹ kórég ãn ri ke nỹtĩn kỹ Topẽ vỹ ãg tovãnh ke mũ sir, kỹ tóg ãg mỹ vĩ kónãn han ke mũ, kỹ ãg kejèn pũr ke mũ, kurã ãn kã.

⁹ Ha mẽ, vĩ tar han inh huri. Hã ra ãjag tóg ti jagy tag venh ke tũ pẽ nĩ, ki kanhró inh nĩ. ãjag to sóg há nĩ. Krenkren jé ãjag tóg ke mũ, ki kanhró inh nĩ.

¹⁰ Rãnrãj há han ãjag tóg tĩ. Ti to ãjag há tãvĩ nỹtĩ. Ti tũ ki rĩr há han ãjag tóg tĩ gé. Topẽ vỹ tag vèg tĩ, ãjag rãnrãj há tag. Ti pi(jé) kã jatu nĩgtĩ'. Vènh jykre vènhmỹ han tũ pẽ ti nĩgtĩ, Topẽ ti.

¹¹ Hã ra sóg ãjag mÿ tag tó, ãjag tÿ ti to tar tãvĩ nÿtĩ jé, ãjag tÿ ti to krónh ke tũ nĩ jé. Kÿ ãjag tóg venh ke mũ, ãjag tÿ nén (ũ) ve sór mũ ên ti.

¹² ãjag tÿ ti to krónh ken kÿ tóg kórég nĩ. Û tóg êg jo Topê ki rã ja nĩgtĩ, hã ra ag tóg ti tovãnh ja tũ pẽ nĩgtĩ, kÿ ag tóg hur vé, Topê tÿ êg mÿ nén ven sór mũ ên ti. Tag ag ri ke han nĩ, ù tÿ êg jo ti tovãnh jãvãnh ên ag ri ke han nĩ.

Topê tÿ ã vĩ ên han kãn ke

¹³⁻¹⁴ Topê vÿ Abraão mÿ: “ã to vĩ há han jé sóg ke mũ, ã krẽ e han jé sóg ke mũ,” he ja nĩ. Kÿ tóg ti mÿ: “ã pi(jé) tag venh ke tũ nĩ”, inh hã vÿ ki kanhró nĩ,” he ja nĩ gé. Û tÿ ti kãfór nĩ ra tóg ên to: “ti hã vÿ ki kanhró nĩ,” henh ke vë vë. Hã ra ù tóg Topê kãfór nĩ tũ nĩ, hã kÿ tóg: “inh hã vÿ ki kanhró nĩ,” he ja nĩ, Topê ti.

¹⁵ Kÿ Abraão vÿ Topê tÿ ti mÿ nén tó ja tag to tar nĩ ja nĩgtĩ gé. Jatun mÿ tóg ã kósin ke ên jãvãnh ja nĩgtĩ, hã kÿ tóg kejën ti vé.

¹⁶ Êprã ke ag vÿ, ag tÿ jagnê mÿ vĩ há han sór kÿ ag tóg jagnê mÿ: “inh kri nĩ ên vÿ ki kanhró nĩ, sÿ ã mÿ nén han ke ti,” he tĩ. Tag tó kÿ ag tóg jagnê jũ tÿ tũ he tĩ. Û tÿ tag tó kÿ ag tóg ki kanhró nÿtĩ, ti tÿ ki hã tó ja ti. Êprã ke ag jykre hã vë.

¹⁷ Vënh jykre tag han ja ti nĩ, Topê ti, ti tÿ êg mÿ ã vĩ jënên kÿ. Ti tÿ êg mÿ nén tó ja ên ve jé êg tóg ke mũ. Êg tÿ tag ki kanhrãn há han hã jé tóg êg mÿ: “ki kanhró inh nĩ,” he ja nĩ. Tó ù han mãn ke tũ ti nĩ ha. ã tÿ tó ja ên hã han jé tóg ke mũ, ti tÿ: “ki kanhró inh nĩ,” hen kÿ.

¹⁸ Ti vĩ régre to êg tóg ki kanhrãn há han tĩ. Êg mÿ tó kar kÿ tóg: “ki kanhró inh nĩ,” he ja nĩ gé. Ti vĩ régre hã vë. Hã kÿ êg tóg venh ke mũ, ti tÿ êg mÿ nén tó ja ti. Tó ù han mãn ke tũ ti nĩ ha, hã ra tóg ón ja tũ nĩ gé, ti tÿ ón ki kagtĩg nĩn kÿ. Ti tÿ êg mÿ nén tó ja ên ve sór êg tóg mũ, hã vÿ: kãhkã, he mũ, hã kÿ tóg êg hã mÿ tó ja nĩ, Topê ti.

¹⁹ Êg tÿ kãhkã ve sór kÿ êg tóg to krónh ke tũ nĩgtĩ. Êg tÿ kãhkã tá ùn ve sór mũ hã vÿ êg tar han tĩ, êg tÿ tÿ prãnh ke tũ nĩ jé. Tá jun jé êg tóg ke mũ, ha vemnĩ, Topê jamã tá.

²⁰ Jesus vÿ tá jun vén, êg jo, kÿ tóg êg mÿ Topê to êpÿr ti han, Topê to êmĩn ti. Êg

jagfy tóg tÿ Topê tũ ki rĩr tĩ to pã'i mág nĩ, Melquisedeque ên ri ke. Kurã krÿg ja tũ ti nĩ, ti tÿ tÿ pã'i nĩ ti. Kÿ tóg êg jo Topê rĩnja tá nĩ nĩ, êg tÿ ti nón tá junjun jé gé.

7

Melquisedeque kãme

¹ Melquisedeque ên vÿ tÿ pã'i mág nĩ ja nĩgtĩ, cidade tÿ Salém kri, kÿ tóg Topê tũ ki rĩr nĩ ja nĩgtĩ gé, ù tÿ vënh kar kri ke nĩ ên tũ ki. Abraão vÿ pã'i tÿ 4 (ke) ên mré vënh génh han ja nĩ. Ti tÿ ag kãgtén kar kÿ Melquisedeque ên vÿ ti kato tẽ, kÿ tóg ti mÿ: “Topê vÿ ã ve há han, kÿ tóg ã ve há han mãn ke mũ gé,” he mũ.

² Kÿ Abraão vÿ ti mÿ dízimo ên nĩm mũ sir, ã tũ tÿ 10 (ke) kar ki tóg ùn pir nĩm mũ sir, Melquisedeque mÿ, ti tÿ ùn kato tẽ mũ ên ag tũ mãn ja tÿ dízimo ên ti. Ti jiji to ken hã vë, hã vÿ: vënh jykre kuryj to pã'i, he mũ, hã vÿ: Melquisedeque, he mũ. Kÿ tóg tÿ cidade tÿ Salém to pã'i nĩ, hã vÿ: ùn krĩ kuprã ên ag pã'i, he mũ.

³ Panh tũ ti nĩ, mÿnh tũ ke gé, jóg'jóg ve tũ ti nĩ gé. Û ki mur já tũ ti nĩ, kÿ tóg ter ja tũ nĩ gé. Topê kósin ri ke ja ti nĩ. Topê tũ ki rĩr kÿ tóg nĩ nĩ, ti kurã vÿ krÿg ja tũ nĩ, Melquisedeque kurã ti.

⁴ Pã'i mág pë vë, Melquisedeque ti, hã kÿ Abraão vÿ ti mÿ ã tũ tÿ dízimo nĩm ja nĩ gé. Hã ki êg tóg ki kanhró nÿtĩ, ti tÿ Abraão kãfór nĩ ti, Melquisedeque ti.

⁵ Û tÿ Israel ag kãmĩ dízimo mäg tĩ ag vÿ tÿ Levi krẽ nÿtĩ, ù tÿ Topê tũ ki rĩr tĩ ên ag. ãjag mré ke ki ag tóg dízimo ên mäg tĩ, ag kar tÿ tÿ Abraão krẽ'krẽ nÿtĩ ra.

⁶ Hã ra Melquisedeque pi(jé) tÿ Abraão mré ke nĩ ja nĩgtĩ'. Ge ra Abraão tóg ti mÿ dízimo ên nĩm ja nĩ, kÿ tóg ti mÿ: “Topê vÿ ã ve há han,” he mũ gé, Melquisedeque ti, Abraão mÿ, Topê tÿ Abraão mré vëmén kar kÿ, Topê tÿ ti mÿ: “ã kófa ra ã kósin ke mũ,” he kar kÿ.

⁷ Kÿ tóg Abraão kãfór nĩ, Melquisedeque ti, ti tÿ ti mÿ: “Topê vÿ ã ve há han,” hen kÿ. Ti kri ke vÿ tÿ ti jẽ.

⁸ Levi krẽ'krẽ ên vÿ tÿ êprã ke nÿtĩ gé, ù tÿ ãjag mré ke ki dízimo mäg tĩ ên ag. Hã ra Melquisedeque vÿ ter ja tũ nĩ nÿji, hã kÿ

tóg rán kÿ nÿ, Topê vÿ tÿ rán kÿ nÿ ki. Ûn ter tÿ vÿ Abraão ki dízimo mǎn ja nÿ, hǎ vÿ: Melquisedeque, he mÿ.

⁹ Kÿ, Abraão tÿ ti mÿ dízimo nÿm ên kǎ tóg ã krê'krê kósin tÿ Levi jagfy ti mÿ dízimo nÿm ja nÿ gé, Melquisedeque mÿ. Hǎ kÿ Levi krê'krê ag vÿ ájag mré ke ag ki dízimo ve ja nÿgtÿ gé sir.

¹⁰ Abraão tÿ Melquisedeque mÿ dízimo nÿm ên kǎ Levi vÿ mur ja tÿ nÿ ver, hǎ kÿ ti jóg'jóg ve tÿ Abraão vÿ ti jagfy dízimo nÿm ja nÿ. Nÿm kar kÿ tóg kejên Levi vovo han mÿ sir, Abraão ti, Melquisedeque tÿ ti mré vémén kar kÿ.

¹¹ Topê tÿ Levi krê'krê ag mÿ: “isÿ ki rÿrnmÿ,” he ên kǎ tóg ag mÿ tag to vênh jykre nÿm ja nÿgtÿ gé, ag tÿ ki rÿr ke to. Ag hǎ tÿ ki rÿr há han ke vê vê, hǎ ra ag tóg ki rÿr kǎn já tÿ nÿ, hǎ kÿ Topê tóg ù tÿ ki rÿr ke mÿ ù jênê ja nÿ, ù tÿ Melquisedeque ri ke ên, hǎ vÿ: Jesus Cristo, he mÿ. Ag tÿ ki rÿr há han ja nÿ ra Topê hÿn ti jênênh ke tÿ nÿ vê, kÿ Arão krê'krê ên ag hǎ vÿ ki rÿr nÿtÿnh ke vê vê.

¹² Kÿ, Jesus tÿ Topê tÿ ki rÿr kÿ Topê vÿ ti mÿ tag to vênh jykre tǎg han ja nÿ gé.

¹³⁻¹⁴ Hǎ kÿ tóg ki rÿr nÿ sir. Ti pi(jé) tÿ Levi krê'krê ag kǎ ù nÿ', êg Senhor tÿ Jesus ti. Judá krê'krê ag kǎ ù vÿ tÿ ti nÿ. Ge ra tóg Topê tÿ ki rÿr mÿ. Judá krê'krê ù tóg Topê tÿ ki rÿr ke tÿ tÿ vê, ag tÿ Topê mÿ nén ù pÿn ke tÿ vê vê. Ag rǎnrǎj tÿ vê vê, tag, Judá krê'krê ag, kÿ Moisés tóg ag to nén ù tó ja tÿ nÿ gé, ti tÿ Topê tÿ ki rÿr ke tag rán kÿ. Hǎ ra Jesus tóg Topê tÿ ag ki rÿr jê, ti tÿ tÿ Judá krê'krê ag kǎ ù nÿ ra. Topê tÿ ti mÿ vênh jykre tǎg nÿm hǎ vê.

Jesus tÿ Melquisedeque ri ke nÿ

¹⁵ Levi krê'krê ag vÿ Topê rǎnrǎj han kǎn ki kagtÿg ja nÿgtÿ. Hǎ kÿ Topê tóg ã tÿ ki rÿr ke ù jé prêr, ù tÿ Melquisedeque ri ke ên, hǎ vÿ: êg Senhor tÿ Jesus, he mÿ. Hǎ ki êg tóg végtÿ, Levi krê'krê ag tÿ ti rǎnrǎj han ki kagtÿg nÿtÿ ti.

¹⁶ Kÿ êg Senhor tÿ Jesus pi(jé) êprǎ ke ag jykre ri ke han kÿ Topê tÿ ki rÿr mÿ', kÿ êprǎ ke ù vÿ: “ha ki rÿr,” he ja tÿ nÿ gé. Topê tÿ ti mÿ nén tó jan hǎ vê. Ter mǎn ke tÿ ti nÿ ha, hǎ kÿ tóg ki rÿr há han mÿ ha.

¹⁷ Ti to tag tóg rán kÿ nÿ, Topê vÿ tÿ rán kÿ nÿ ki, ha mê: “isÿ ki rÿr jé ã tóg ke mÿ.

Tÿ' henh ke tÿ (pê) ti nÿ, ã tÿ isÿ ki rÿr nÿ ti, Melquisedeque tÿ isÿ ki rÿr nÿ ên ri ke,” he ja ti nÿ.

¹⁸ Tag tó kÿ tóg Moisés jykre ên tÿ tÿ' he mÿ, ti krój nÿn kÿ, ti tÿ êg há han mǎn ki kagtÿg nÿn kÿ.

¹⁹ Hÿ, Moisés jykre ên vÿ êg tar han ki kagtÿg ja nÿgtÿ, êg tÿ Topê vÿ ki króm han ki kagtÿg ja tóg nÿgtÿ, kÿ êg ti jykre han sór mÿ ra kǎnkǎ tá jun ke tÿ nÿ, êg tÿ Moisés jykre han mÿ ra. Vǎhǎ Topê tóg êg mÿ vênh jykre tǎg nÿm ja nÿ, ù tÿ Moisés jykre kǎfór nÿ ên, hǎ vÿ: Jesus jykre, he mÿ. Kÿ êg tóg Jesus tugerÿn Topê nÿgja tá junjun ke mÿ.

²⁰ Tag to Topê tóg vÿ kǎfór han ja nÿ. Moisés tÿ Levi krê'krê mÿ: “Topê tÿ ki rÿrnmÿ,” hen kÿ tóg vÿ kǎfór han ja tÿ nÿ.

²¹ Hǎ ra Topê tóg Jesus mÿ tag tó. Ti mÿ tóg: “isÿ ag ki rÿr jé ã tóg ke mÿ,” he ja nÿ. “Tÿg ke tÿ ti nÿ, ã tÿ isÿ ag ki rÿr tÿ ên ti. Vÿ kǎfór han inh mÿr. Tó ù han mǎn ke tÿ sóg nÿ, vênh jykre ù han mǎn ke tÿ sóg nÿ,” he ja tóg nÿ, êg jóg mág ti, ã kósin mÿ.

²² Hǎ kÿ Jesus jykre vÿ Moisés jykre kǎfór nÿ, Jesus tÿ êg mÿ vênh jykre tǎg nÿm mÿ ên.

²³ Nén ù ki tóg sir Moisés jykre ri ke tÿ nÿ, Jesus jykre ti, ha mê. Moisés jykre ki Topê tÿ ki rÿr tÿ ag vÿ e ja nÿtÿgtÿ. Ájag kǎ ù ter kÿ ag tóg jagnê jêgja kǎ ù fêg' he ja nÿgtÿ, ti tÿ Topê mÿ ti tÿ ki rÿr jé. Hǎ kÿ ag tóg e ja nÿtÿgtÿ, Moisés jykre ki Topê tÿ ki rÿr tÿ ag.

²⁴ Hǎ ra Jesus vÿ ter mǎn ke tÿ nÿ inhhǎ, Topê tÿ ki rÿr tóg nÿ nÿ, ù tóg ti jêgja kǎ jênh ke tÿ nÿ.

²⁵ Hǎ kÿ tóg ã tÿ ùn ki rÿr nÿ mÿ ag kar krenkren han tÿ, ù tÿ ti tugerÿn Topê jamǎ tá junjun ke mÿ ên ag kar. Rÿr tóg nÿ nÿ, kÿ tóg êg jagfy Topê mré vémén tÿ. Kurǎ krÿg ja tÿ ti nÿ, Jesus ti.

²⁶ Êg to ti há nÿ, Jesus ti, ti tÿ êg jagfy Topê tÿ ki rÿr nÿn kÿ. Topê kósin vÿ tÿ ti nÿ. Kygnê ja tÿ pê ti nÿ. Nén ù kórég venh ke tÿ êg nÿ, ti ki. Topê vÿ mranh tÿ ag mré ke tÿ vê. Kÿ tóg tÿ kǎnkǎ tǎn kar ag kri ke nÿ gé sir, ùri.

²⁷ Êprǎ ke ag tÿ Topê tÿ ki rÿr nÿtÿn kÿ ag tóg ájag tÿ Topê vÿ mranh ja tugerÿn Topê mÿ nén ù pÿn vén tÿ, kurǎ kar ki, kar kÿ ag tóg ájag mré ke ag tÿ Topê vÿ mranh tugerÿn ag jagfy Topê mÿ nén ù pÿn tÿ gé sir. Jesus vÿ Topê vÿ mranh ja tÿ nÿ inhhǎ. Hǎ kÿ tóg, ã

tỹ vĕnh fĕg kỹ tóg ag tỹ Topĕ mỹ nĕn ũ pũn ri ke han. Vĕnh fĕg pir han tóg, kỹ tóg ă tỹ vĕnh fĕg pir ěn ki ěg tỹ Topĕ vĩ mranh e ja ěn tỹ tũ' he kăn.

²⁸ Moisés tỹ ěpră ke ag mỹ: “Topĕ tũ ki rĩr,” hen kỹ ag tóg ki rĩr mũ, hă ra ag tóg kygnĕ mág kỹ nỹtĩ ja nĩgtĩ gé, ag tỹ tỹ ěpră ke nỹtĩn kỹ. Hă ra Topĕ tóg vĕnh jykre tăg han kỹ tóg ă kósın mỹ: “ki rĩr jé ă tóg ke mũ, tag to sóg vĩ kăfór han mũ,” he ja nĩ. ũ tỹ kygnĕ ja tũ pĕ ěn mỹ tóg tag tó ja nĩ, hă kỹ tóg kygnĕnh ke tũ pĕ nĩ gé.

8

Jesus hă tỹ ěg jagfy Topĕ tũ ki rĩr

¹ Ha mẽ, sỹ ăjag mỹ nĕn kămĕn ja ti. Tag tó sór ja inh nĩ, ha mẽ. ěg jagfy Topĕ tũ ki rĩr tĩ to pă'i mág hă vỹ nĩ nĩ. Topĕ pĕgja tá tóg nĩ nĩ, kanhkă tá.

² Topĕ nĩg jafă pĕ tá tóg ti tũ ki rĩr mũ. Topĕ nĩgja pĕ ěn pi(jé) tỹ ěpră ke ag tỹ há nĩ'. Topĕ hă tỹ há vĕ, ěn ti. ěn tá tóg nĩ nĩ, ěg jagfy, Topĕ tũ ki rĩr nĩ ěn ti.

³ Topĕ tũ ki rĩr tĩ to pă'i mág jykre hă vĕ, ha mẽ. Topĕ mỹ ag tóg nĕn ũ nĩ pũn tĩ, nĕn ũ ũ ke gé. Kỹ ũ tỹ ěg jagfy Topĕ tũ ki rĩr tĩ to pă'i mág tag vỹ Topĕ mỹ nĕn (ũ) nĩm ke mũ gé, Jesus ti, hă vỹ: vĕnh fĕg, he mũ.

⁴ Ti tỹ ver tag mĩ ga kri mũ ag mré ga kri tĩ ra Topĕ tóg ti mỹ vĕnh rănhrăj tag nĩm ke tũ nĩ vĕ, ti tỹ Topĕ tũ ki rĩr jé. ěpră ũ tỹ Topĕ tũ ki rĩr mũ ag vỹ nỹtĩ ver, ũ tỹ Judeu ag jykre ki Topĕ tũ ki rĩr mũ ũ ag.

⁵ Topĕ jo ĩn krĕm ag tóg nĕn ũ nĩ pũn tĩ, Moisés tỹ ag mỹ vĕnh jykre nĩm kỹ. Topĕ vỹ Moisés mỹ tó ja nĩ, ti tỹ kur tỹ Topĕ jo ĩn han jé. Ti mỹ tóg: “ă mỹ sóg ă tỹ nĕn han ke mũ ěn ti ven kăn huri,” he mũ. “Ă tỹ pănónh kri nĩ ěn kă sóg ă mỹ ven kăn. Sỹ ă mỹ nĕn ven mũ ěn hă han nĩ,” he ja tóg nĩ, Topĕ ti, Moisés mỹ, hă kỹ tóg han. ĩn ěn krĕm ag tóg ũri nĕn ũ ũ pũn tĩ, Judeu ag jykre ki, Topĕ tũ ki rĩr tĩ ag. Hă ra tóg tỹ kanhkă tá vĕnh jykre tag hă pĕ tũ nĩ ver. Nĕn sĩ ki tóg ri ke nĩ, ag tỹ nĕn han mũ ti, kanhkă tá vĕnh jykre ri ke sĩ ti nĩ. Jesus hă vỹ kanhkă tá vĕnh jykre pĕ ěn han kăn mũ.

⁶ Hă kỹ Jesus rănhrăj vỹ ěpră ke ag rănhrăj kăfór nĩ. Topĕ vỹ ěg mỹ Jesus jĕnĕ, ti tỹ ěg

mỹ vĕnh jykre tăg nĩm jé, kỹ tóg ti tỹ Moisés tỹ ěg mỹ vĕnh jykre há nĩm ěn há kăfór nĩ. Kỹ tóg ěg mỹ nĕn ũ há tăvĩ han ke mũ, Topĕ ti, ti tỹ Jesus jĕnĕn kỹ. Hă kỹ Jesus rănhrăj vỹ Moisés rănhrăj kăfór nĩ, Jesus tỹ ěg mỹ vĕnh păte fón ken kỹ.

⁷ Topĕ mỹ tóg păgsĩ ja nĩ, ă tỹ Moisés mỹ vĕnh jykre nĩm ja ěn ti, hă kỹ tóg vĕnh jykre tăg han to jykrĕn ja nĩ.

⁸ Ă povo jykre ve kỹ tóg ti mỹ kórĕg nĩ, hă kỹ tóg tag tó, ha mẽ. “Kănhmar sóg povo tỹ Israel mỹ vĕnh jykre tăg nĩm ke mũ, Judă krĕ'krĕ ag mỹ ke gé,” he ja tóg nĩ, ěg jóg mág ti.

⁹ Vĕnh jykre tăg tag vỹ isỹ ag jóg'jóg ve ag mỹ vĕnh jykre nĩm ja ěn ri ke tũ nĩnh mũ. Ag jóg'jóg ve ag mỹ sóg vĕnh jykre ũ nĩm ja nĩ gé, isỹ ga tỹ Egito tá ag kăpan kỹ. Ag nĩgé kăgmĩ kỹ sóg ag tatĩn kătĩ mũ, ag ga pĕ ra. Hă ra ag tóg isỹ ag mỹ vĕnh jykre nĩm ja ěn mranh, hă kỹ sóg sir ag togvănh ja nĩ,” he tóg, ěg jóg mág ti.

¹⁰ “Hă ra sóg văhă ag mỹ vĕnh jykre tăg han sór mũ, povo tỹ Israel ag mỹ, ha mẽ,” he tóg, ěg jóg mág ti. “Ăjag krĩ tỹ ag tóg isỹ ag jyvĕn mũ ěn ki kanhrăn ke mũ, kỹ ag tóg han sór ke mũ gé, ti tỹ ag fe kăkă nĩn kỹ. Ag Topĕ vỹ tỹ inh nĩnh mũ, kỹ ag tóg tỹ inh krĕ nỹtĩnh ke mũ gé, ěn kă.

¹¹ Kỹ ũ tóg ă mré ke ag kanhrăn măn ke tũ nĩ ha. “ěg jóg mág vỹ ge nĩgtĩ, ge ti nĩgtĩ,” he măn ke tũ ag nỹtĩ ha, jagnĕ mỹ. Ag kar vỹ inh ki kanhró nỹtĩnh mũ, ěn kă, ũn kăsir ag, ũn mág ag ke gé, ěn kă.

¹² Ag tỹ inh vĩ mranh mũ (hă) ra sóg ge ra ag jagăgtăn ke mũ. Vĕnh păte fón jé sóg ke mũ, ag tỹ inh vĩ mranh ja ěn ti,” he ja tóg nĩ, Topĕ ti.

¹³ Kỹ, Topĕ tỹ vĕnh jykre tăg han kỹ vĕnh jykre ve ěn vỹ ti mỹ tỹ vĕnh jykre sĩ nĩ sir. Hă ra nĕn (ũ) sĩ kar ěn vỹ kejĕn tũ' henh ke mũ, kănhmar.

9

Văsỹ Topĕ jykre mré ũri Topĕ jykre

¹ Topĕ tỹ ag mỹ vĕnh jykre ve ěn nĩm kỹ tóg ag mỹ ag tỹ nĕn han ke ěn kămĕn ja nĩ. Ag tỹ ti jo ĩn han tó ja ti nĩ, kar kỹ tóg ag tỹ ti jo ĩn krĕm ti mré vĕmĕn ke tó ja nĩ gé, ag tỹ ti mỹ nĕn (ũ) pũn ke ti ke gé.

² Kÿ ag tóg kur tÿ ãn ãn han, ti tÿ tÿ Topê jo ãn jê jê. Hã ra tóg vênh kãpãm kÿ nÿ, kur tÿ ke gé, kÿ ag tóg ãn vãfynyn ki jun vén mÿ ãn to ag tóg: “Topê mré vÿ jafã,” he tÿ. Ën tá mesa kri vela tÿ kri vin jafã vÿ jê, kar kÿ mesa ti ke gé, mesa tÿ kri pão vin jafã ãn.

³ Tag pãte tóg kur nÿ, jãnkã tÿ kur, kÿ kur ãn pãte ãn vãfynyn ù vÿ nÿ gé, ùn sÿ. Ën to ag tóg: “Topê nÿg jafã,” he tÿ, ãn vãfynyn ãn to.

⁴ Tá tóg Topê mÿ kri nén (ù) pÿn jafã nÿ, ouro tÿ há ti. Kri ag tóg nén ù ger há pÿn tÿ, ouro ãn kri. Kar kÿ Topê caixa vÿ tá nÿ gé. Ti to tÿr hã vÿ tÿ ouro nÿ. Caixa ãn kãkã ouro tÿ pénky vÿ nÿ, kÿ kanhkã tá vëjën vÿ pénky ãn ki nÿ, Topê tÿ ag mÿ pão jënê ãn ti, ag tÿ ga kórég kri mÿn kÿ. Kar kÿ Arão vãtó vÿ kã nÿ gé, ti kãtó ti, kãtó féj mÿ ãn ti. Caixa ãn kãkã tóg nÿ nÿ, vãtó ãn ti. Kar kÿ Topê tÿ Moisés mÿ vênhrã nÿm ja ãn vÿ kãki nÿtÿ gé, caixa ãn kãki. Pó régre ki tóg ránrán ja nÿ, Moisés ti, Topê tÿ ãg jyvën mÿ ãn ti. Pó régre ãn tóg caixa kãki nÿtÿ gé.

⁵ Caixa ãn kri tóg nÿtÿ, Topê tÿ jëgnê jafã régre ag kãgrã, querubim he mÿ ãn, ù tÿ Topê rÿnja tá nÿtÿ ãn. Fër ag nÿtÿ, kÿ ag fër tóg krÿg he kÿ nÿtÿ. Ag fër fënja krêm Topê vÿ ãg mÿ vênh pãte fón tÿ, ãg tÿ ti vÿ mranh ja ti. Hã ra sóg tag kãmén kãn sór tÿ nÿ ver.

⁶ Kÿ tóg vãfynyn régre nÿ, ãn tÿ kur ãn ti, Topê tÿ ãn ti. Ti vãfynyn ve ki ag tóg kãra ge tÿ, Topê tÿ ki rÿr tÿ ag, kurã kar ki. Tá ag tóg ãg rãnrãj ti han tÿ.

⁷ Ti vãfynyn ù ãn tá tóg kãra rã pin' he tÿ, prÿg kar ki, ag to pã'i mág ti, ti tãvÿ. Ag mÿg kyvénh ma tóg tÿ tÿ, Topê mÿ ven jê, Topê tÿ ti mÿ vênh pãte fón jê, povo kar mÿ ke gé, ag tÿ Topê vÿ mranh ja ãn ti, ag tÿ mranh sór tÿ ra mranh ja ãn ti.

⁸ Topê kuprÿg vÿ ãg mÿ kãmén mÿ, ùri, vênh jykre si ãn ti. Kur tÿ ãn vãfynyn vÿ ge nÿ, ha mÿ. Ti vãfynyn ve ãn tÿ ver ãn krêm nÿn kÿ ãg tóg ti vãfynyn ù tá jun ke tÿ nÿ ver, Topê nÿg jafã tá.

⁹ Ëg tÿ ùri vég mÿ tag ki kanhrãn jê, hã jê Topê tóg vênh jykre tag han ja nÿgtÿ, ãg tÿ to comparação han jê. Topê jo ãn ãn tá ag tóg Topê mÿ nén ù pÿn tÿ, kÿ ag tóg ag mÿg ti tãnh kÿ pÿn tÿ gé. Ag tÿ Topê mÿ sÿnvÿ nÿtÿ sór vë, hã jê ag tóg ti mÿ nén (ù) pÿn tÿ. Hã

ra ag tóg ti mÿ pÿn mÿ ra (ag tóg ti mÿ) sÿnvÿ tÿ nÿtÿ, ag jykre tÿ ver kórég nÿn kÿ.

¹⁰ Kÿ, ag tÿ ti mÿ pÿn há han jê ag tóg vênh jykre tÿ ge han tÿ gé, ha mÿ: vëjën to ag tóg jykren tÿ, kÿ ag tóg vëjën ù to: “tag konh ke tÿ ãg nÿ, tag kron ke tÿ ãg nÿ,” he tÿ, ti tÿ ag mÿ tóg kÿ nÿn kÿ. Kÿ ag tóg goj tÿ vênh kygpe tÿ hën ri ke han han tÿ gé. Tag ki vênh jykre kar vë, ãprã. Kÿ Topê tÿ vênh jykre tãg han kÿ ãn vÿ tóg tÿ' he mÿ sir.

¹¹ Vãhã Cristo vÿ hur kãtÿg, kÿ tóg tÿ ãg jagfy Topê tÿ ki rÿr to pã'i mág nÿ ha, kÿ tóg ãg kren pë han mÿ. Ti tÿ Topê jo ãn kãra rã vÿ ãn si ãn mág kãfór nÿ gé. Há tãvÿ ti nÿ, Jesus tÿ hë tá Topê tÿ ki rÿr nÿ ãn ti. Ëprã ke tÿ ãn há pijé', tag ki ãn pijé', kanhkã tá ke vë.

¹² Kÿ, Jesus tÿ ãn kãra rã kÿ tóg rã pir han, Topê nÿg jafã pë ãn kãra, Topê tÿ ãg mÿ vênh pãte fón jê. Kÿ tóg, ã tÿ kãra rã kÿ ti pi(jé) ag mÿg kyvénh ma vyr', cabrito ãn, monh tãgy ãn. Á kyvénh hã tÿ tóg ãg kren pë han, Jesus ti.

¹³ Û ter kÿ ù tÿ ti va mÿ mÿ ãn ag vÿ, ag tÿ Topê jo ãn kã ra ge sór kÿ ag vÿ Topê tÿ ki rÿr tÿ ag mÿ: “ha ãg to tÿ kó kó hé, ãg mÿg kyvénh tÿ,” he tÿ. Ag tÿ ag to tÿ kó kó he kar kÿ ag tóg jãnhkri nÿtÿ sir, ag tÿ cabrito kyvénh tÿ ag to tÿ kó kó hen kÿ, ke tÿ nÿn kÿ monh kyvénh tÿ, ke tÿ nÿn kÿ monh fi pÿr tÿ mrëj tÿ. Ag tÿ ag jãnhkri han jan hã vë.

¹⁴ Hã ra Cristo vÿ ã kyvénh hã tÿ ãg jãnhkri pë han. Topê kuprÿg tÿ ti krÿn kÿ tóg Topê mÿ vênh fëg, Cristo ti. Kygnê ja tÿ pë ti nÿ, hã kÿ tóg há kar nÿ, ti tÿ vênh fëg kÿ. Ti kyvénh vÿ ãg jãnhkri pë han mÿ, ãg jykre mré tóg ãg kuryj han mÿ, kÿ ãg tóg vênh jykre kórég han mãn ke tÿ nÿ sir, ãg tÿ ãg jykre si tugrÿn ter ke mÿ ãn ti. Vãhã ãg tóg Topê tÿ han há nÿgtÿ, ùn rÿr nÿ ãn tÿ ti.

Cristo tÿ ãg mÿ vênh jykre tãg ma kãtÿg

¹⁵ Hã kÿ Cristo vÿ ãg mÿ vênh jykre tãg ma kãtÿg. Ter ja tóg nÿ, Topê tÿ ãg mÿ vênh pãte fón jê, ãg tÿ ti jykre ve mranh ãn ti. Ti ter kar kÿ Topê tóg ù ag kuprëg huri, ag tÿ Topê tÿ kanhkã tá ãg mÿ nén ven ke ãn ki kanhrãn jê. Jesus tÿ ãg mÿ han hã vë.

¹⁶ Kejën ù tóg ã ter ke to hã: “iser kar kÿ ãn vÿ isÿ tag mãn ke mÿ, ù ãn vÿ isÿ ù mãn ke mÿ gé,” he tÿ. Rãn tóg tÿ, tag, kÿ tóg tógfÿg

tĩ, vènh rá ti. Kĩ ag tóg ag tỹ vènh rá ãn ve sór mũ ra ag tóg ti ter kar kũ hã vэг tĩ.

¹⁷ Ti tỹ ver ter tũ nĩn kũ ag tóg vènh rá ãn venh ke tũ nĩ. “Iser kar kũ,” he tóg, hã kũ ù tóg ver ti tũ mág tũ nĩ, ti tỹ ver ter tũ nĩn kũ, ù tỹ rán mũ ãn ti.

¹⁸ Ri ke ti nĩ, Topẽ tỹ ãg mũ vènh jykre nĩm ja ãn ti, ti si mré hã. Ag mæg ter kar kũ ke ja vè.

¹⁹ Hã kũ Moisés vỹ povo kar mũ Topẽ tỹ ti mũ nén tó ja ãn kãmén, Topẽ tỹ nén to ag jyvén mũ ãn ti. Ti tỹ ag mũ kãmén kar kũ tóg monh tãgy tãnh kũ ti kyvénh mãn ja nĩ, cabrito tãnh kũ ke gé. Goj mãn kũ tóg ki kujẽn ja nĩ gé, kũ tóg tỹ kujãjãg mũ, goj mré tóg ti kujãjãg mũ sir, carneiro kyki kusũg mré hã tóg tỹ kujãjãg mũ sir, re no fej mré hã. Kũ tóg livro kri tỹ kó he mũ, to tỹ krig ke tóg mũ gé, povo kar to tóg tỹ kó kó he mũ gé, ag tỹ jãnhkri kũ nỹtĩ jé.

²⁰ Ag to tỹ krig ke kar kũ tóg ag mũ: “Topẽ tỹ ãg mũ nén han ke mũ to vènh kyvénh hã vè,” he mũ, “Topẽ tỹ ãg mũ vènh jykre nĩm mũ to vènh kyvénh hã vè,” he tóg mũ, Moisés ti.

²¹ Kar kũ tóg ãn tỹ kur to tỹ krig ke mũ gé, pénky kar to tóg tỹ kó he mũ gé, ag tỹ Topẽ tũ han jafã kar to. Vènh kyvénh ãn tỹ tóg kri tỹ kó he kãn mũ, ag kar jãnhkri nỹtĩ jé.

²² Ha vé, ag tỹ vãsỹ Topẽ jykre ãn ki nén ù tỹ jãnhkri' he sór kũ ag tóg nén ù kyvénh hã tỹ jagnẽ jãnhkri' tĩ. Pir ti nĩ, ag tỹ nén ù kyvénh tũ ra tỹ jãnhkri' ke mũ ti. Hã kũ ãg tóg ki kanhró nỹtĩ. ãg tỹ Topẽ vỹ mranh kũ tóg ãg mũ ãg mæg ter hã tigrĩn vènh pãte fón ja nĩgtĩ, vãsỹ vènh jykre ãn ki.

Cristo tỹ ãg jagfy ter pir han

²³ Vènh jykre ãn vỹ kanhkã tá vènh jykre ri ke sĩ nĩ, hã kũ vènh mæg kyvénh vỹ nén kar ãn jãnhkri han ja nĩgtĩ. ãg tỹ hã ra kanhkã ve jé tóg há tũ nĩ, ãg mæg tỹ ãg jagfy ter mũ ti. ãg mæg vỹ ãg tỹ kanhkã tá jun han ki kagtĩg nĩ.

²⁴ Cristo hã vỹ ãg tỹ tá jun han ke mũ. Kũ tóg ãprã ke tỹ Topẽ jo ãn kãra rá ja tũ nĩgtĩ gé, kanhkã jykre ri ke sĩ ãn kãra rá ja tũ ti nĩ. Kanhkã pè ra tóg vyr, kũ tóg Topẽ rĩnja tá nĩ nĩ, Topẽ mré vèmén jé, ãg jagfy.

²⁵ Kũ ãprã ke ãn tóg ãprã Topẽ tũ ki rĩr tĩ to pã'i mág ãn tóg prỹg kar ki ag tỹ ãn vãfynyn

to: Topẽ nĩgĩafã, he mũ ãn kãra tóg rá tĩ, ag mæg kyvénh mãn kũ tóg ra rá tĩ. Hã ra Cristo vỹ vènh fæg pir han.

²⁶ Ti tỹ prỹg kar ki vènh fæg mũ ra tóg ter tỹ hẽn ri ke han ke vè vè, Topẽ tỹ ga han kar kũ. Hã ra tóg vãsỹ vènh ven ja tũ nĩ. ãri, kurã tỹ ãgno to hã tóg vènh ven pir han, kũ tóg vènh fæg pir han, ãg tỹ Topẽ vỹ mranh ãn tỹ tũ' he jé, ã ter tigrĩn.

²⁷ ãprã ke ag vỹ ter pir han tĩ gé. ãg ter kar kũ Topẽ vỹ ãg jykre tugnỹm ke mũ.

²⁸ Tag ri ke ti nĩ, Cristo tỹ vènh fæg mũ ti. Vènh fæg pir han tóg, ã tỹ ãn e tỹ Topẽ vỹ mranh tỹ tũ' he jé. Kejẽn tóg kãtĩg mãn ke mũ. Hã ra tóg ãg tỹ Topẽ vỹ mranh ja tigrĩn ter mãn ke tũ nĩ, ti kãtĩg mãn kũ. ãg jé prẽr jé tóg kãtĩg ke mũ, ti tỹ ù tỹ ti kãtĩg jãvãnh mũ ag jé prẽr jé.

10

¹ ãg tỹ Judeu ag jykre ve kũ ãg tóg ve sĩ han tĩ, Topẽ tỹ ãg mũ nén han sór mũ ti. Prỹg kar ki ag tóg Topẽ mũ tãnh kũ pũn', tãnh kũ pũn' he tĩ. Hã ra ag mæg tỹ ag jagfy ter mũ ra tóg ag jykre há han ki kagtĩg ja nĩgtĩ.

² Ag tỹ Topẽ mũ nén (ũ) pũn mũ ra ag tóg Topẽ vỹ mranh mãn', mranh mãn' he tĩ. Ag tỹ mranh tũ nĩ ra ag tóg ti mũ pũn mãn ke tũ nĩ vè, ti tỹ ag mũ vènh pãte fón jé. Hã ra ag tóg ki kanhró nỹtĩ, ag tỹ ti vỹ mranh tĩ tag, hã kũ ag tóg ti mũ nén pũn tovãnh tũ pè nĩgtĩ, ti tỹ ag mũ vènh pãte fón tovãnh tũ nĩ jé.

³ Prỹg kar ki ag tóg Topẽ mũ pũn tigrĩn (ag tóg) ag tỹ ti vỹ mranh ja ãn mũ ãkrég tĩ.

⁴ Hỹ, monh kyvénh vỹ ãg tỹ Topẽ vỹ mranh tỹ tũg' henh ke tũ pè nĩ, cabrito tỹ ãg jagfy ter mũ ãn ti ke gé.

⁵ Hã kũ Cristo tóg, ã tỹ ga kri mur ken kũ (tóg) Topẽ mũ: “ag tỹ ãjag mæg tãnh kũ pũn mũ ra tóg tỹ nén ù tũ nĩ ã mũ,” he ja nĩ. “Ag tỹ ã mũ nén ù ù pũn mũ ra tóg ã mũ tỹ nén ù tũ nĩ gé. Hã ra ã tóg ãnh mũ ãnh fãr ti nĩm, isỹ ag jagfy ter jé.

⁶ Ag tỹ ã mũ ag mæg pũn mũ ra tóg ã mũ sér tũ nĩ, ag tỹ ã mũ nén ù ù pũn mũ ra. Ag tỹ ã vỹ mranh tag tỹ tũ' he ki kagtĩg tóg nĩ, ag tỹ ã mũ nén pũn mũ tag.

⁷ Hã kũ sóg ã mũ: “ha vé, sỹ ã mũ vènh fæg ke vè,” he mũ, “isỹ ã tỹ ãnh ki nén ve sór mũ ãn tỹ ã mũ han jé,” he sóg mũ. Hã kũ tóg rán

kỹ nĩ, iso, ã vĩ rá ki,” he tóg, Cristo ti, Topẽ mỹ.

⁸ Ti mỹ tóg tag tó vén, ha mẽ. “Ag tỹ ãjag mễg tãnh kỹ pũn mũ ra tóg tỹ nén ù ù tũ nĩ ã mỹ. Ag tỹ ã mỹ ãjag mễg pũn mũ ra tóg ã mỹ sér tũ nĩ, ag tỹ ã mỹ nén ù ù pũn mũ ra. Ag tỹ ã vĩ mranh tag tỹ tũg' he ki kagtĩg tóg nĩ, tag,” he vén tóg. Hã ra tóg rán kỹ nĩ, Judeu ag tỹ Topẽ mỹ tag pũn jé. Ge ra Jesus tóg tag to: “nén ù tũ vễ,” he ja nĩ.

⁹ Tag tó kar kỹ tóg Topẽ mỹ: “ha vé, sỹ ã mỹ vễnh fễg ke vễ, isỹ ã tỹ inh ki nén ve sór mũ ẽn tỹ ã mỹ han jé,” he mũ gé, Topẽ mỹ. ã tỹ tag tó kỹ tóg vễnh jykre si ẽn tỹ tũ' he mũ, ùn tãg han jé.

¹⁰ Jesus tỹ Topẽ vĩ ki króm ja tugrĩn ẽg tóg ùri tỹ Topẽ krẽ nỹtĩ ha. Jesus Cristo vĩ ẽg jagfy ter ja nĩ, vễnh fễg kỹ. Ti ter pir ki tóg ẽg név(e) kajãm kãn, kỹ Topẽ tóg ẽg mỹ vễnh pãte fón kãn mũ sir.

¹¹ Êprã ke ag tỹ Topẽ tũ ki rĩr tĩ ag vĩ kurã kar ki ãjag rãnrãj han tĩ, Topẽ tũ ki rĩr jé. Kurã kar ki ag tóg Topẽ mỹ ãjag mễg tãnh kỹ pũn tĩ, hã ra ag tỹ Topẽ mỹ nén pũn mũ ẽn pi(jé) ag tỹ Topẽ vĩ mranh tỹ tũ' he ja nĩgtĩ.

¹² Ag jãvo Jesus Cristo vĩ vễnh fễg pir han, ã ter tugrĩn tóg ẽg tỹ Topẽ vĩ mranh ẽn tỹ tũ' he kãn. Tag han kar kỹ tóg Topẽ pễgia tá nĩ nĩ.

¹³ Tá tóg nĩ nĩ. Topẽ vĩ ti kato vãsãnsãn mũ ag tỹ ti pẽn krẽm vin ke mũ. Ag sigse kỹ nỹtĩ to ken hã vễ. Tag hã jãvãnh tóg nĩ nĩ, Jesus ti.

¹⁴ Ti tỹ vễnh fễg pir ẽn tugrĩn tóg Topẽ krẽ kar ag krenkren han kãn huri, kỹ ẽg Topẽ mỹ sĩnvĩ nỹtĩ.

¹⁵ Topẽ kuprĩg vĩ ẽg mỹ tag tó tĩ gé. Tag tó tóg mũ, ha mẽ.

¹⁶ “Tag pãte sóg ag mỹ vễnh jykre tãg han ke mũ,” he tóg, ẽg jóg mág ti. “Vễnh jykre tãg ẽn hã vễ, ha mẽ. Isỹ nén to ag jyvẽn mũ ẽn tỹ sóg ag fe kãkã nĩm ke mũ, kỹ tóg sỹ ag krĩ ki rán ri ke nĩnh mũ sir, kỹ ag tóg han sór ke mũ,” he tóg.

¹⁷ Tag tó kar kỹ tóg tag tó gé, ha mẽ. “Ag tỹ inh vĩ mranh ja ẽn mũ ẽkrén mãn ke tũ inh nĩ ha, ag jykre pãno ẽn mũ ẽkrén mãn ke tũ pẽ inh nĩ ha,” he tóg mũ gé.

¹⁸ Ha vé, Topẽ tỹ ẽg mỹ vễnh pãte fón kỹ ẽg tóg ti mỹ nén ù pũn mãn ke tũ nĩ ha, ti tỹ

ẽg mỹ vễnh pãte fón kãn kỹ nĩn kỹ, ẽg tỹ ti vĩ mranh ja kar ẽn ti.

Êg tỹ Topẽ to krónh ke tũ

¹⁹ Inh kanhkã, Jesus tỹ ẽg jagfy ter tugrĩn ẽg tóg jatun mỹ Topẽ nĩgafã tá jun ke mũ.

²⁰ Jesus tỹ ẽg jagfy ter ẽn tóg ti tỹ kur tỹ jãnkã ẽn fĩn rãm ri ke nĩ, ẽg tỹ ti nón fĩn rãm ri ke han jé, ẽg rĩnrĩr nỹtĩ jé. Topẽ jo ìn krẽm kur tỹ jãnkã nĩfe ẽn vĩ jaran ke kỹ sa nĩ, Jesus ter kỹ. Kỹ ẽg tóg rã genh há nỹtĩ ha.

²¹ Êg jagfy Topẽ tũ ki rĩr tĩ to pã'i mág vĩ nĩ nĩ, hã vĩ: Jesus, he mũ. Topẽ jamã tá ke ẽn ag kar kri ke vĩ tỹ ti nĩ.

²² Kỹ jatun mỹ Topẽ mré vễmẽn nĩ. Ti ki rã há han nĩ, ãjag fe tỹ ti ki gemnĩ, ãjag tỹ ti nĩgafã tá junjun jé. Ón kỹ ti ki ge sór tũg nĩ. Êg jãnhkri han tóg, ẽg jykre pãno kar tỹ tóg tũ' hé, ẽg tỹ to jykren mãn tũ nĩ jé. Êg tỹ jãnhkri han tóg, ẽg tỹ goj jãpri tỹ vễnh kype ẽn ri ke, kỹ ẽg há nỹtĩ.

²³ Ti tỹ ẽg mỹ nén tó mũ ẽn mũ ẽkrén nĩ, to krónh ke tũg nĩ, sỹ ãjag mỹ nén tó mũ ẽn to. Ve jé ẽg tóg ke mũ, ti tỹ ẽg mỹ nén tó mũ ẽn ti. ù tỹ ẽg mỹ tó ja ẽn vĩ ón vãnh nĩgtĩ, hã kỹ to krónh ke tũg nĩ.

²⁴ Jagnẽ mũ ẽkrén nĩ, ãjag tỹ jagnẽ jyvẽn jé. “Vễnh kar to há nĩmĩ,” hemnĩ jagnẽ mỹ. “Nén ù há kar han nĩ,” hemnĩ gé jagnẽ mỹ.

²⁵ ù ag tóg culto venh kãmũ vãnh nỹtĩgtĩ. Tag han tũg nĩ. Culto venh kãmũmĩ. Kỹ jagnẽ jyvẽn nĩ, ãjag tar nỹtĩ jé. Kakó ti nĩ, ti kãtĩg mãn ke kurã ti. Ve há ti tĩ ha, tag.

²⁶ Ha vé, Topẽ vĩ mẽ kãn ẽg huri. Êg tỹ ti ki rã kar kỹ culto venh kãtĩg tũ nĩ' hen kỹ, ẽg tỹ ge ra Topẽ vĩ mranh sór kỹ mranh tĩ kỹ tóg ù tỹ ẽg jagfy kajãm mãn ke tóg tũ tĩ.

²⁷ Hỹ, ẽg tỹ mranh sór kỹ mranh kỹ Topẽ vĩ ẽg vóg kónãn pẽ han ke mũ. Pĩ tỹ tóg ag tỹ tũ' henh ke mũ, Topẽ ti, ù tỹ ti kato vãsãnsãn mũ ag.

²⁸ ù tỹ Moisés tỹ ẽg jyvẽn mũ ẽn mẽ jãvãnh nĩ ẽn tén ja ag tóg nĩgtĩ, Israel ag, ùn régre ag tỹ ti jykre pãno ve ja tag tugrĩn, ke tũ nĩn kỹ ùn tãgtũ ag. Ti jagãgtãn ja tũ ja ag nĩgtĩ, ùn jykre pãno ẽn.

²⁹ Hã ki ẽg tóg vэг mũ, Topẽ tỹ ẽg vóg kónãn pẽ han ke mũ ti, ẽg tỹ Topẽ kósin to é he kỹ, ẽg tỹ ti vĩ mranh sór kỹ. Êg tỹ mranh

sór kÿ ěg tóg ti kyvénh to é he tĩ, ti jykre to. Ti tÿ ěg jãnhkri han ja ěn to é he ěg tóg tĩ sir. Ěg mÿ tóg tÿ nén ũ tũ nĩ sir, Topě kuprĩg tÿ ěg jagãgtãn ja ěn ti. Ũ tÿ tag han mũ vóg kónãn jé tóg ke mũ, Topě ti, ha vemñĩ.

³⁰ Hã kÿ tóg tag tó, ha mẽ: “ũn jykre pãno ag vóg kónãn jé sóg ke mũ, ag tÿ kajãm jé, ag tÿ nén ũ kórég han mũ kar,” he tóg, Topě ti. Ũ tÿ tag tó mũ ki kanhró ěg tóg nĩ mÿr. Hã ra tóg tag tó gé, ha mẽ. “Ã mré ke ag jykre tugnym jé tóg ke mũ, ěg jóg mág ti,” he ja tóg nĩ gé.

³¹ Rĩr ti nĩ, Topě ti. Ti tÿ ěg to jũ nĩn kÿ tóg jagy tãvĩ tĩ, nén ũ jagy kar kãfór ti nĩ.

Ěg tÿ to tar nÿtĩnh ke

³² Ājag tÿ vãsÿ ti mÿ vėnh fėg vén ja ěn kurã mĩ ěkrén nĩ. Ěn kã ag tóg ājag kato vãsãnsãn mág, kÿ ājag tóg ag to vėsÿrénh, kysã tÿ hėn ri ke ki, ājag tÿ Topě vĩ mẽ vén ěn kã. Hã ra ājag tóg to krónh krónh ke ja tũ nĩgtĩ.

³³ Ājag kã ũ to ag tóg vĩ kónãn mág' he ja nĩgtĩ, ěn kã, Topě kato vãsãnsãn mũ ag, kÿ ag tóg ājag vóg kónãn gé, hã ra vėnh kar vÿ vé, ag tÿ ājag vóg kónãn ja ti. Ājag kã ũ vóg kónãn ja ag tóg nĩgtĩ, kÿ tóg ājag kar mÿ jagy tĩ ja nĩgtĩ, ag mré, ājag tÿ tÿ ag mré Jesus ki ge nÿtĩn kÿ.

³⁴ Kÿ ag tóg ājag kã ũ sigse ja nĩ gé. Kÿ ājag tóg ũn sigse kÿ nÿtĩ ěn ag jagãgtãn ja nĩgtĩ, ag tÿ ājag mré Jesus ki ge kÿ nÿtĩ kÿ. Pã'i ag tÿ ājag tÿ nén gég mũ ra tóg ājag mÿ sér nĩ ja nĩgtĩ. Ājag tÿ kanhkã tá nén ũ há tãvĩ ěn venh ke hã mĩ ājag tóg ěkrén ja nĩgtĩ, ag tÿ ājag tÿ nén génh kÿ, Jesus tugrĩn. Ājag tÿ kanhkã tá nén venh ke ěn vÿ tũ' hėnh ke tũ pė nĩ.

³⁵ Kÿ ũri to krónh ke tũg nĩ gé. Ājag tÿ ti to tar nÿtĩn kÿ ājag tóg nén ũ há tãvĩ venh ke mũ, ha mẽ. Ājag vėsÿrénh ja ěn kaja ri ke ve jé ājag tóg ke mũ.

³⁶ Ěg tÿ ti tũ han to tar nÿtĩnh ke vė, ěg tÿ ti tovãnh ke tũ pė nÿtĩnh ke vė. Tag hã vÿ há nĩ. Kÿ ājag tÿ Topě tÿ ěg mÿ nén tó mũ ěn han kãn kÿ nÿtĩn kÿ ājag tóg venh ke mũ, ti tÿ ěg mÿ nén (ũ) ven ke mũ ěn ti.

³⁷ Hã kÿ tag vÿ rán kÿ nĩ, Topě vĩ rán ki, ha mẽ: “kãnhmar pė ti jun ke mũ, ũn kãtĩg

ke mũ ěn ti. Kãtĩg mé han jé tóg ke mũ, ha vemñĩ.

³⁸ Kÿ ũ tÿ inh ki ge kÿ nÿtĩ ěn ag hã vÿ krenkren ke mũ, inh mré ke ěn ag, isÿ ũn mÿ vėnh pãte fón mũ ěn ag. Jãvo ũ tÿ isovãnh mũ ěn vÿ inh mÿ kórég nĩnh mũ,” he tóg, Topě ti.

³⁹ Ěg pi(jé) ti tovãnh ke mũ', kÿ ěg tóg ũ tÿ ti tovãnh mũ ěn ag vãgfor ěn ri ke han ke tũ nĩ gé. Ti ki rã kÿ ěg tóg nÿtĩ, hã kÿ ěg krenkren ke mũ.

11

Ũ tÿ ěg jo Topě ki ge kÿ nÿtĩ ag

¹ Topě ki rã to ken hã vė, hã vÿ: ti tÿ ěg mÿ nén tó mũ ěn kri nĩm, he mũ. Ti tÿ nén ũ to: “ve jé ājag tóg ke mũ,” he mũ ěn kri fi jé ěg tóg ke mũ, ěg tÿ ver vėg tũ ra.

² Ti si ag vÿ kri nĩm kÿ ti ki ge ja nĩgtĩ gé. Hã kÿ ag tóg Topě mÿ tÿ ũn há ja nÿtĩgtĩ, vãsÿ ke ag, ha mẽ.

³ Ěg tÿ Topě ki rã kÿ ěg tóg ki kanhró nÿtĩ, ti tÿ Ā vÿ tÿ ěg tÿ nén vėg mũ kar hyn han ja ti. Ti vÿ vėg tũ ěg tóg nĩgtĩ, kÿ tóg ěg tÿ nén vėg tũ tÿ tóg ěg tÿ vėg mũ hyn han ja nĩgtĩ, Topě ti, Ā vÿ tÿ tóg nén kar hyn han ja nĩgtĩ.

⁴ Kÿ Abel vÿ Topě ki rã kÿ nĩ ja nĩgtĩ gé, hã kÿ tóg Topě mÿ pũn há han, ti tÿ ti mÿ Ā mẽg pũn kÿ. Jãvo ti kãke tÿ Caim vÿ ti ki rã ja tũ nĩ, kÿ tóg Topě mÿ nén ũ pũn tĩ (hã) ra (tóg) ti mÿ pũn kónãn. Abel tÿ Topě ki rã kÿ tóg Topě mÿ pũn há han ja nĩ, Abel tÿ ti mÿ pũn mũ ěn ti. Topě tÿ Abel to: “inh mÿ tóg tÿ ũn jykre kuryj nĩ,” he ja vė, hã kÿ ti tũ tóg pũr há han. Ter ti huri, Abel ti, hã ra ěg tóg ti tÿ nén han ja tugrĩn Topě ki ge ki kanhrãn mũ sir.

⁵ Enoque vÿ Topě ki rã kÿ nĩ ja nĩgtĩ gé, hã kÿ Topě vÿ ti jé prėr, ti tÿ kanhkã ra tũg jé, ti rĩr ra, ti ter tũ ra. Ti ve mãn tũ ag tóg, Topě tÿ ti jé prėr kar kÿ, hã ra tóg Ā ter tũ ra kanhkã ra vyr. Topě tÿ ti jé prėr to hã tag vÿ ti to rán kÿ nĩ Topě vÿ tÿ rán kÿ nĩ ki, ha mẽ: “Topě tÿ ti jykre ve kÿ ti fe tóg mrin ke mũ,” he ja ti nĩ, Enoque to.

⁶ Ěg tÿ Topě ki ge tũ nÿtĩn kÿ tóg ěg to há nĩnh ke tũ nĩ, Topě ti. Ěg tÿ Topě ra mũ sór kÿ ěg tóg tag to jykrén ke mũ, ha mẽ. “Topě vÿ nĩ,” he jé ěg tóg ke mũ. Kÿ ěg tóg ti to: “ěg tÿ ti to mũ kÿ tóg ěg mÿ nén ũ há ěn nĩm ke

mũ, ti tỹ ãg mỹ nén tó ja ãn ti,” henh ke mũ gé. Tag tó kỹ ãg tóg ti to mũnh ke mũ, kỹ tóg ãg mỹ han ke mũ, ha vemni.

⁷ Noé vỹ Topê ki rã kỹ nĩ ja nĩgtĩ gé, hã kỹ Topê vỹ ti mỹ tó ja nĩ, ag kar tỹ kar kỹ ti jagy venh ke ti, hã vỹ: ta kutẽ, he mũ. Kỹ tóg Topê vĩ kri fi kỹ canoa mág ãn han mũ, kỹ tóg han kãn kar kỹ (tóg) ki rã kỹ (tóg) kren mũ, ti prũ fi mré, ti krẽ mré ke gé. Topê ki rã kỹ tóg ù tỹ Topê kato vãsãnsãn mũ ag mré tĩg mãn ja tũ nĩ. Hã kỹ Topê vỹ ti mỹ ùn jykre kuryj ag tỹ nén venh ke ãn ven, ti tỹ ù tỹ ti ki rã kỹ nỹti ag mỹ nén ven ke ãn ti.

⁸ Abraão vỹ Topê ki rã kỹ nĩ ja nĩgtĩ gé, hã kỹ tóg Topê vĩ kri nĩm ja nĩgtĩ. Topê tóg ti mỹ: “ha tĩg,” he mũ, kỹ tóg tĩg ja nĩ, ga ù ra, Topê tỹ ti mỹ ga nĩm ke mũ ãn ra. ã tỹ ki kagtĩg ra tóg ra tĩg ja nĩ. ã jamã tá kãkutẽ kỹ tóg ã tỹ ki kagtĩg ãn ra vyr, Abraão ti.

⁹ Topê ki rã kỹ jẽ kỹ tóg ga ãn mĩ tĩg ja nĩgtĩ. Topê tỹ ti mỹ ga ãn nĩm sór ja vỹ, hã ra tóg tỹ ã tũ tũ ra tóg mĩ tĩg ja nĩgtĩ, tá. Kur tỹ ãn krẽm ãmãn kỹ tóg ga ãn mĩ tĩg ja nĩgtĩ, ti kósin tỹ Isaque mré, Isaque kósin tỹ Jacó mré ke gé. Ti krẽ'krẽ ag vỹ ti mré ga ãn venh ke ja nỹti gé, hã kỹ Topê tóg Abraão mỹ tó ja nĩ, hã ra ag tóg ver vég tũ nĩ.

¹⁰ Ge ra tóg tovãnh ja tũ nĩgtĩ. Cidade tỹ Topê tũ ãn ve sór ja ti nĩ, ù tỹ tũg ke tũ pẽ ãn. Topê hã vỹ cidade ãn han. To jykren kỹ tóg han. Ti pi(jé) ãprã ke ag cidade ri ke nĩ'. ãn ve sór kỹ tóg ti tovãnh ja tũ pẽ nĩ, hã kỹ tóg vé, Abraão ti.

¹¹ Sara fi vỹ Topê ki rã kỹ nĩ ja nĩgtĩ gé, hã kỹ fi tóg ã kófa pẽ ra (fi tóg) kufyg ja nĩgtĩ, Topê tỹ fag tỹ tag to tar han kỹ, Sara fi, fi mén tỹ Abraão mré. ù tỹ fag mỹ: “kósin ve jẽ ãjag tóg ke mũ,” he mũ ãn vĩ kri fi kỹ fag tóg ve ja nĩgtĩ.

¹² Hã kỹ ùn pir ãn, ùn kófa pẽ ãn krẽ'krẽ vỹ e tãvĩ nỹti, krĩg e ãn ri ke, goj fyr mĩ rỹnhryj e ãn ri ke, goj kafã tũ fyr ãn mĩ rỹnhryj e ãn ri ke.

¹³ Topê ki ge kỹ nỹtĩn kỹ ag kãgter, Abraão, Isaque, Jacó. Topê vỹ ag mỹ ga ãn tó ja nĩ, hã ra ag tóg ve ja tũ nĩ ver. ãjag tỹ ve pẽ han tũ ra ag kãgter. Ve sĩ han ja ag tóg nỹtĩgtĩ, Topê tỹ ag mỹ ga tó ja ti, hã ra ag tóg ve pẽ han ja tũ nĩ kỹ tóg ag mỹ ãg tỹ kór há tá nén ù vég mũ ri ke nĩ ja nĩgtĩ. Ag tỹ venh ke to tóg ag

mỹ sér gy tĩ hã ra. “Tag ki, ga kri ãg tóg ùn pygsa mũ ãn ri ke han tĩ, ãg jamã vỹ tỹ tag ki ke tũ nĩ,” he ag tóg tĩ.

¹⁴ Ag jamã pẽ jãvãnh kỹ ag tóg ga kri mũ ja nĩgtĩ, hã kỹ ag tóg: “ãg jamã pẽ tũ vỹ, tag ki,” he ja nĩgtĩ.

¹⁵ Ag pi(jé) ãjag jamã si ãn ra vỹn vỹn ke sór ja nĩgtĩ', hã kỹ ag tóg vỹn vỹn ke ja tũ nĩ.

¹⁶ ãmã há pẽ ãn ve sór ja ag tóg nĩgtĩ, kanhkã tá. Hã kỹ ag tóg Topê mỹ há ja nỹti, ti pi(jé) ag to mỹ'ãg ke mũ'. Hã kỹ tóg vỹso: “Abraão Topê, Isaque Topê, Jacó Topê vỹ tỹ ãn nĩ,” he tĩ, Topê ti. Cidade han tóg, ag mỹ, kanhkã tá.

¹⁷ Abraão vỹ Topê ki rã kỹ nĩ ja nĩgtĩ gé, hã kỹ tóg Isaque nenh ja tũ nĩgtĩ. Topê mỹ tóg ti fẽg, Topê tỹ ti mỹ ti kósin to vĩn kỹ. Ti kósin pir ja vỹ, hã ra tóg ti tãnh kren, Topê mỹ.

¹⁸ Topê tóg Abraão mỹ: “ã kósin tỹ Isaque krẽ vỹ e nỹtĩnh mũ,” he ja nĩgtĩ.

¹⁹ Kỹ tóg, ti tỹ ti tãnh kren kỹ tóg: “Topê hỹn ti rĩn mãn ki kanhró nĩ, isỹ ti tén kỹ,” he mũ. Hã kỹ tóg ti ve mãn gé. Ti tỹ ti tãnh kren kỹ tóg Topê mỹ ti tỹ ti tãnh ri ke nĩ ja nĩgtĩ, hã ra tóg ti ve mãn, Topê tỹ ti mỹ: “ti tãnh tũg ra,” henh kỹ.

²⁰ Isaque vỹ Topê ki rã kỹ nĩ ja nĩgtĩ gé, hã kỹ tóg Jacó mỹ vĩ há han, Esaú mỹ ke gé, ti tỹ ag mỹ ag tỹ nén venh ke ãn tó kỹ.

²¹ Jacó vỹ Topê ki rã kỹ nĩ ja nĩgtĩ gé, hã kỹ tóg ã ter ke to hã (tóg) José krẽ régre ãn ag mỹ vĩ há han gé. Kỹ tóg ã vátó to jẽ kỹ (tóg) Topê krẽm mũg ke mũ, kỹ tóg Topê mỹ: “Topê vỹ tỹ ã nĩ,” he ja nĩ.

²² José vỹ Topê ki rã kỹ nĩ ja nĩgtĩ gé, hã kỹ tóg ã ter ke nỹ ra tóg ã ter ken jo (tóg) Israel ag mỹ kãmén ja nĩgtĩ, ag krẽ'krẽ ag tỹ ga tỹ Egito tá kãpanh ke ãn ti. Kỹ tóg ag tỹ kãpanh ke ãn tó kỹ (tóg) ag mỹ to vĩ ja nĩ, ag tỹ ti kuka gé kãmũnh jẽ, ag kãmũnh ken kỹ.

²³ Moisés han mũ fag vỹ Topê ki ge kỹ nỹti gé, hã kỹ fag tóg Moisés péju, ti mur kar kỹ, kysã tãgtũ ki. Fag mỹ tóg sĩnvĩ nĩ ja nĩgtĩ, gĩr sĩ ti. Kỹ fag tóg pã'i mág kãmẽg sór ja tũ nĩ, pã'i mág tỹ: “gĩr gré ag kãgtén kãn nĩ,” he mũ ra.

²⁴ Moisés vỹ Topê ki rã kỹ nĩ ja nĩgtĩ gé, hã kỹ tóg, ã mog kar kỹ (tóg): “ĩnh pi(jé) tỹ Faraó kósin fi kósin nĩ',” he ja nĩgtĩ.

²⁵ Ti tỹ Topẽ povo ag mré jagtar nĩ ra tóg ti mỹ tỹ nén ù tũ nĩ ja nĩgtĩ. Hã ra tóg Egito tá ke ag mré rico nĩ sór ja tũ nĩgtĩ. Topẽ vĩ mranh kỹ ag tóg ón kỹ rico nỹtĩ ja nĩgtĩ, Egito tá ke ag.

²⁶ Ęg tỹ Cristo tigrĩn jagtar nỹtĩ tag tóg ti mỹ ěg rico nỹtĩ tag há káfór nĩ ja nĩgtĩ, hã kỹ Egito tá ke ag rico tag tóg ti mỹ kórég ja nĩgtĩ, Moises mỹ. Topẽ tỹ kanhkã tá ěg mỹ nén ù há nĩm ke ěn hã to tóg jykrén ja nĩgtĩ.

²⁷ Moisés vỹ Topẽ ki rã kỹ nĩ ja nĩgtĩ, hã kỹ tóg ga tỹ Egito tá kãkutẽ ja nĩgtĩ, pã'i jũ kamẽg vãnh nĩn kỹ. Topẽ vэг tũ ěg tóg nĩgtĩ, hã ra tóg Topẽ hã ki ěkrén kỹ nĩ ja nĩgtĩ. Ti vĩ tóg ti mỹ ti tỹ ti vэг nĩ ri ke nĩ ja nĩgtĩ. Hã kỹ tóg krónh ke ja tũ nĩgtĩ, Moisés ti.

²⁸ Moisés vỹ Topẽ ki rã kỹ nĩ ja nĩgtĩ, hã kỹ tóg Israel ag mỹ festa tỹ Páscoa ěn nĩm. Ag mỹ tóg: “ĩn jãnkã to tĩn, ovelha kyvénh tỹ,” he mũ, “Topẽ tỹ jẽnẽ jafã tỹ ajag krẽ ve ag kãgtén tũ nĩ jé,” he ja tóg nĩgtĩ, Moisés ti, Israel ag mỹ. Hã kỹ ag tóg festa tỹ Páscoa ěn han tĩ, ùri.

²⁹ Israel ag vỹ Topẽ ki ge kỹ nỹtĩ ja nĩgtĩ gé, hã kỹ ag tóg goj kusũg he mũ ěn kã rěgrěg há han inhhã, ěg tỹ ga kri mũ ěn ri ke han ag tóg. Mrinmrér ja tũ ag tóg nĩgtĩ. Egito tá ke ag tỹ ag nón kã rěgrěg sór mũ ra tóg ag kri rũm ke mũ sir, goj ěn ti, kỹ ag tóg nỹgnỹr kỹ kãgter kãn mũ sir.

³⁰ Israel ag vỹ Topẽ ki ge kỹ nỹtĩ ja nĩgtĩ gé, hã kỹ cidade tỹ Jericó jy ró ěn vỹ vėsóg ki kórég kãn ja nĩgtĩ. Ag tỹ pėnĩn mũ tỹ 7 (ke) han kar kỹ tóg vėsóg ki kórég ja nĩ, ag tỹ kurã tỹ 7 (ke) ki pėnĩn mũ kar kỹ.

³¹ Raabe fi vỹ Topẽ ki rã kỹ nĩ ja nĩgtĩ gé. Ûn mén (ka)mẽ vỹ tỹ fi nĩ ja nĩgtĩ, hã ra fi tóg Topẽ ki rã. Hã kỹ fi tóg Israel ag mỹ: “ha kãge jęg,” he ja nĩ, ù tỹ fi jamã venh kãmũ mũ ag. Hã kỹ ag tóg fi tén ja tũ nĩ gé. Cidade tá ke kar kãgtén ja ag tóg nĩgtĩ, ag tỹ Topẽ vĩ mẽ sór ja tũ tigrĩn, hã ra fi tóg inhhã kren ja nĩgtĩ.

³² Inh hỹn ù tónh ke mũ gé ver'. Isỹ ag tó kãn sór mũ ra tóg inh mỹ vėnhmỹ tĩ. E ag nỹtĩ, e tãvĩ, Gideão ti, Baraque ti, Sansão ti, Jefté ti, Davi ti, Samuel ti, Topẽ vĩ tó tĩ kar ag.

³³ Topẽ ki ge kãn kỹ ag nỹtĩ, hã kỹ ag tóg pã'i ag mré vėnh génh han, hã ra ag tóg pã'i

ěn ag tỹ hěn ri ke kãn. Vėnh jykre kuryj han ag tóg tĩ, vėnh kar mỹ. Kỹ Topẽ tóg ag mỹ ã tỹ ag mỹ vėnh jykre há tó mũ ěn tỹ ag mỹ ven mũ sir. Mĩg tỹ ù mãn sór mũ ra tóg ti tỹ hě ri ke ja tũ nĩgtĩ gé, mĩg ti.

³⁴ Pĩ gru jagy ěn vỹ ag tỹ hě ri ke ja tũ nĩgtĩ gé, ù tỹ Topẽ ki ge kỹ nỹtĩ ag. Û tỹ rógro tỹ ag tén sór mũ ra tóg ag tỹ hě ri ke ja tũ nĩgtĩ gé. Ag krój nỹtĩ ra ag tóg tar gy nỹtĩ ja nĩgtĩ. Vėnh génh han kỹ ag tóg rará há han, kỹ ag tóg ag kato vãsãnsãn mũ ag tỹ pétẽ han gé.

³⁵ Ûn tỹtã ù fag vỹ, ajag krẽ ter kar kỹ fag vỹ ag ve mãn, ag tỹ ag rĩn mãn kỹ, Topẽ ki ge kỹ nỹtĩ ěn ag.

Hã ra ag kato vãsãnsãn mũ ag vỹ ag to jũ mág, kỹ ag tóg ag kãmĩ ù ag vóg kónãn gé. Kỹ ag tóg ag kygrěg gé, ù tỹ Topẽ ki ge kỹ nỹtĩ ag, ag tỹ Topẽ to jũ kỹ, ù tỹ ag kygrěg mũ ag. Ag mỹ ag tóg: “ajag tovãnh jé ěg tóg ke mũ, ajag tỹ Topẽ tovãnh kỹ,” he ja nĩgtĩ, hã ra ag tóg Topẽ tovãnh sór ja tũ nĩ. Ag tỹ kanhkã tá rĩnrĩr nỹtĩ sór ja vė, hã kỹ ag tóg Topẽ tovãnh ja tũ nĩ.

³⁶ Ag kãmĩ ù ag to ag tóg é he mũ gé, kỹ ag tóg ag mrãnmrãn gé, ag sigse ag tóg, ke gé, kỹ ag tóg vese jafã kãtã ag vãm gé.

³⁷ Pó tỹ ag pin kỹ ag tóg ag kãgtén gé, ránran jafã tỹ ag tóg ag ránran gé, serrote tỹ. Rógro tỹ ag tóg ag kãgtén gé, Topẽ ki ge kỹ nỹtĩ ag. Ag tỹ hě mĩ mũn kỹ ag tóg carneiro fãr tỹ kur rĩnh ja nĩgtĩ, cabrito fãr tỹ kur ke gé, ag tỹ Topẽ ki ge tigrĩn jagtar nỹtĩn kỹ. Vějėn ve ja tũ ag tóg nĩgtĩ kejėn, jagãgtar ag tóg nỹtĩ, ag vóg kónãn ja ag tóg nĩgtĩ gé.

³⁸ Ag mré ke ag vỹ kórég pẽ nỹtĩ ja nĩgtĩ, hã kỹ ag tóg ùn há tag ag to kórég nỹtĩ ja nĩgtĩ. Kỹ ag tóg ga kórég kri mũ ja nỹtĩgtĩ, ag jo pétẽ kỹ, sór kri ag mũgtĩ, kỹ ag tóg pãnónh nor kãki nỹtĩ ja nĩgtĩ gé, ga nor kãki ke gé, ù tỹ Topẽ ki ge kỹ nỹtĩ ag. Ęprã ke ag vỹ ag to jũ mág nỹtĩ ja nĩgtĩ.

³⁹ Ag tỹ Topẽ ki ge kỹ nỹtĩn kỹ tóg hã ra ag to há nĩ, Topẽ ti. Hã ra ag tóg tag ki ve ja tũ nĩ ver, ag tỹ nén ve sór mũ ěn ti, Topẽ tỹ ag mỹ nén tó ja ěn ti.

⁴⁰ Topẽ vỹ ěg to jykrén ja nĩ gé, hã kỹ tóg ver ag mỹ ven ja tũ nĩ. Ti tỹ ěg mré ag mỹ ven sór vė, ěg tỹ jagnẽ mré kanhkã tá junjun jé.

12

Topê tỹ ãg kanhrãn sór mũ

¹ Ha vé, e tâvĩ ag nỹtĩ, ù tỹ ãg jo Topê tovãnh tũ ag. Ëg pênĩn ag e nỹtĩ, ãg ve kỹ. Kỹ tóg há tĩ, ãg tỹ Topê japry jagma mũ há han ke ti, ti jamĩn jagma. Ëg tỹ corrida han ri ke ti nĩ. Ëg tỹ tỹ vaj kỹ corrida han ken kỹ ãg tóg vẽnkhán há han ke mũ. “Sỹ tag han kỹ inh mũ corrida to krónh kenh ke tũ nĩ vỹ?” he ãg tĩ. “Ne nỹ isar han mũ, corrida to?” he ãg tóg tĩ gé. Ëg tỹ nén han ke mũ ãn tovãnh ãg tóg tĩ, ãg tỹ corrida to krónh ke tũ nĩ jé. Topê jykre ri ke ti nĩ, tag ti. “Tag mũ Topê to isar han mũ vỹ?” hemnĩ, ãgag tỹ nén han ke mũ ãn kar to. ãgag tỹ nén han ke mũ tigrĩn ti to tar nỹtĩn kỹn há tĩ. ãgag tỹ nén han ke mũ ãn tigrĩn ti to krónh kenh ha mẽ tĩn kỹ han tũg nĩ, tovãnh nĩ. Ti vĩ mranh sór tũg nĩ gé. Tag vỹ ãg kókén pẽ han tĩ. ãgag tỹ nén han tĩ tag kar tovãnh kỹ ãgag tóg ti jykre hã to krónh kenh ke tũ pẽ nĩ.

² Jesus hã mũ ãkrén nĩ, ti jykre hã tỹ krĩn kỹ nỹtĩmnĩ. Ti hã vỹ ãg tỹ Topê ki rã han, kỹ tóg ãg tỹ ti tovãnh ke tũ han ãn ki kanhró nĩ gé. Cruz to sa kỹ tóg ter mỹr, ag tỹ ti to é he mũ ra tóg ti mũ tỹ nén ù tũ tĩ. Ti tỹ kar kỹ nén venh ke ãn mũ tóg ãkrén ja nĩ, nén tỹ ti mũ sér nĩnh ke ãn mũ. Hã kỹ tóg ùri Topê pẽgja tá nĩ nĩ.

³ Jesus mũ ãkrén nĩ. Ëprã ke kar ag vỹ ti kato vĩ ja nĩgtĩ, ù tỹ Topê vĩ mranh mũgtĩ ãn ag, ge ra tóg Topê to krónh ke ja tũ nĩgtĩ, Jesus ti. Ti ki ãkrén kỹ to krónh krónh ke tũg nĩ, to: “ron inh mũ,” he tũg nĩ gé.

⁴ Ha vé, Topê vĩ mranh tũg nĩ. ãgag tỹ ti vĩ mranh sór mũ tag kato vãsãnsãn nĩ, ke tũ nĩ (mũ) ra ãgag tóg to ter mũ.

⁵ ãgag mũ Topê tỹ ãg jyvẽn ãn kã jatu'? Ëg jyvẽn kỹ tóg tag tóg, ha mẽ. ã krẽ mũ tóg tag tóg, Topê ti, ha mẽ: “inh kósĩn, isỹ ã vóg kónãn kỹ inh mũ vẽn nenh tũg nĩ,” he tóg. “Isỹ ã mũ vĩ tar han mũ ra to krónh ke tũg nĩ.

⁶ Isỹ ã to há nĩn kỹ, hã kỹ sóg ã mũ vĩ tar han tĩ. ã kanhrãn jé ke vẽ. Isỹ ã mũ: “inh kósĩn vỹ tỹ ã nĩ,” hen kỹ sóg ã mrãnmrãn tĩ gé, ã kanhrãn ti jé,” he tóg, Topê vỹ tỹ rán kỹ nĩ ki.

⁷ Hã kỹ ti tỹ ãgag mrãnmrãn tag to tar nỹtĩmnĩ. ãgag kanhrãn jé ke vẽ. Topê tỹ ãgag mũ: “inh krẽ,” he vẽ. Ëg panh vỹ ãg mrãnmrãn kỹ ãg kanhrãn ja nĩgtĩ gé. Vẽn kar jykre hã vẽ. Topê vỹ ã krẽ kar mrãnmrãn kỹ ag kanhrãn tĩ.

⁸ Kỹ, ti tỹ ãgag mrãnmrãn tũ nĩ ra ãgag pi(jé) tỹ ti krẽ pẽ nỹtĩnh mũ vỹ'.

⁹ Ha vé, ãg han mũ fag vỹ ãg mrãnmrãn tĩ, ãg kanhrãn jãvãnh nĩn kỹ, kỹ ãg tóg fag kamẽg tĩ. Kỹ ãg tóg Topê kamẽg kãfór han ke mũ, ù tỹ ãg rĩnrĩr han mũ ti, ãg jóg mág ti.

¹⁰ Kỹ ù tỹ ãg han mũ tóg ãg to ã jykre fi ja nĩgtĩ. To jykrén kỹ tóg ãg mrãnmrãn tĩ kejẽn, ãg sĩn kã. Kejẽn tóg ã tỹ kygnẽ kỹ nĩ ra ãg kanhrãn sór tĩ gé, ãg panh ti. Hã ra Topê tỹ ãg mrãnmrãn kỹ tóg to jykrén há han tĩ inhã. Ti tỹ ãg kãhrãn há han sór vẽ, ãg tỹ ti ri kén kygnẽg tũ nĩ jé, ãg tỹ ti ri kén há tâvĩ nỹtĩ jé.

¹¹ Ti tỹ ãg mrãnmrãn ãn kã tóg ãg mũ sér tũ nĩ ver. ãn kã tóg ãg mũ jagy tĩ. Kar kỹ ãg tóg vãhã vég tĩ, ti há nĩ ja ti, ãg tỹ kanhrãn há han kar kỹ. Ti tỹ ãg mrãnmrãn hã kỹ ãg tóg vẽn jykre há han ãn ki kanhrãn mũ sir, jagnẽ krĩ kuprãg ki ãg kanhrãn mũ gé sir.

Ëg tỹ jagnẽ tar han ke

¹² Krónh ke ve ãgag tóg nĩ, kỹ ãgag tóg tỹ ùn kaga tĩg kórég ãn ri ke nỹtĩ. To tar' he mãn nĩ, ãgag tỹ mũ há han mãn jé.

¹³ Topê japry kuryj hã jagma ãvãnh nĩ, kỹ ù tỹ ãgag mũ to krónh ke ha mẽ ãn ag vỹ ãgag mré to tar' he mãn mũ gé. Topê jykre tovãnh sór nĩ ve ãgag nỹtĩ, hã ra tóg ãgag tar han mãn sór mũ.

¹⁴ Vẽn kar mré vẽn jykre kuryj han sórmnĩ. Kỹ Topê vĩ ki króm kỹ kygnẽ sór tũg nĩ. Ëg tỹ tag to vãsãn tũ nĩn kỹ ãg pi(jé) ãg jóg mág venh ke mũ'.

¹⁵ Vẽn ki rĩr há han nĩ, ãgag kãmĩ ù tỹ Topê tỹ ãg jagãgtãn mũ tag to é he tũg jé. ãgag kãmĩ ùn pir tỹ vẽn jykre kórég to tar nĩn kỹ tóg ãg mũ ti tỹ ùn e ag krĩn kónãn ha mẽ tĩ, ag tỹ ti jykre kórég ãn ri ke nỹtĩ jé. Kỹ tóg ãg jakré kãmĩ vãn jagy ri ke nĩ. Ëg jakré kókég ti tĩ, vẽn jykre kórég tỹ ãg kókén ri ke.

¹⁶ Vẽn ki rĩr há han nĩ gé, ãgag kãmĩ ù tỹ Esaú jykre kórég ãn ri ke han tũ nĩ jé, ù tỹ Topê kato vãsãn tũ nĩ jé. Esaú vỹ Topê to

é he ja nĩgtĩ, kũ tóg vĕjĕn tigrĩn ã panh tũ ti mĩ vĩ há han ke ĕn kren. Ā jāvy mĩ tóg tovānh, ti panh tũ ti mĩ vĩ há han ke ĕn ti, ã jĕn ke pir tigrĩn mĩr. Ti tũ ã panh tũ ti mĩ vĩ há han ke ĕn to é he hã vĕ.

¹⁷ Kar kũ tóg mĕ sór ja nĩ, ti panh tũ ti mĩ vĩ há han ke ti, hã ra tóg mĕg tũ nĩ sir. Kũ tóg fĩ ja nĩgtĩ, ti panh tũ ti mĩ vĩ há han jé, vāhã tóg ti mĩ e nĩ ja nĩgtĩ, hã ra tóg sir rāké ja nĩ. Mĕg tũ tóg nĩ sir, ti panh tũ ti mĩ vĩ há han ke ti. Tag ri ke han sór tũg nĩ.

Topĕ jũ tũ jagy pĕ

¹⁸ Vāsỹ Topĕ vỹ ĕg jóg'jóg ve ag mĩ ã jykre nĩm ja nĩgtĩ. Pānónh tũ Sinai tá ag tóg junjun ja nĩgtĩ. Pĩ ve ag tóg, tá, kũ tóg tá kuty nĩ ja nĩgtĩ gé, kuty pĕ, kóho jũ ke gé.

¹⁹ Kũ trombeta ĕn vỹ kyr ja nĩgtĩ gé. Kũ Topĕ vỹ ag mĩ vĩ ja nĩ gé. Ag tũ ti vĩ mĕ kũ ag tóg jũrũn ke ja nĩgtĩ, kũ ag tóg ti mĩ to vĩ mũ, ti tũ ag mĩ vĕmĕn tũ nĩ jé, ti tũ ag kānhmỹ Moisés hã mré vĕmĕn jé, ĕgno ki.

²⁰ Ag mĩ tóg: “ājag mĕg ũ tũ pānónh tag rã hã jun kũ ti tĕn nĩ,” he ja nĩ, “pó tũ ti pin kũ, ājag krĕ ke gé, ājag prũ fag ke gé, ājag tũ tá nĕn vĕg mũ kar ĕn ti. Ti tũ pānónh tag vóg tigrĩn ti tĕn nĩ,” he ja tóg nĩ, Topĕ ti. Hã tóg ag mĩ e ja tĩgtĩ.

²¹ Topĕ tũ ag mré vĕmĕn kũ tóg ag mĩ e tãvĩ nĩ ja nĩgtĩ, Moisés mré hã, hã kũ tóg: “jũrũn ke inh, mũmĕg kũ,” he mũ gé, Moisés ti.

²² Hã ra tóg ag tũ nĕn ve ja ĕn ri ke tũ nĩ, ĕg tũ ũri Topĕ rĩnja tá jun ke ti. Pānónh ĕn ri ke tũ ti nĩ, ĕg tũ kankhã tá nĕn venh ke ti. Ēg tũ kankhã tá jun ken kũ ĕg ter mǎn ke tũ nĩ gé, ĕg tũ kankhã tá pānónh tũ Sião he mũ ĕn tá jun ken kũ. Topĕ jamã tá ke vĕ, ũn rĩr mũ ĕn jamã tá ke vĕ, hã vỹ: Jerusalém, he mũ, kankhã tá cidade ĕn ti. Topĕ tũ jĕgnĕ jafã ag vỹ tá nỹtĩ. E tãvĩ ag nỹtĩ, e tãvĩ, ti tũ jĕgnĕ jafã ag. Festa mág pĕ vĕ, tá.

²³ Kũ Topĕ krĕ sanh kar ag vỹ tá nỹtĩnh ke mũ gé, ũn tũ Jesus ki ge kũ nỹtĩ ag kar. Ag jygjy vỹ kankhã tá rán kũ nỹtĩ. Kũ Topĕ vỹ tá nĩ gé, ũ tũ vĕnh kar jykre tugnỹm ke ti. Kũ ũ tũ ĕg jo Topĕ ki ge kũ nỹtĩ ag kuprĩg vỹ tá nỹtĩ gé, ũ tũ ĕg jo tá junjun mũ ĕn ag.

²⁴ Kũ Jesus vỹ tá nĩ gé, ũ tũ ĕg mĩ vĕnh jykre tãg nĩm mũ ĕn ti, ũ tũ ĕg jagfy ter mũ ĕn ti, kũ ĕg tóg ti kyvĕnh tigrĩn jānhkri nỹtĩ,

Topĕ tũ ĕg mĩ vĕnh pãte fón ti kũ. Topĕ tũ Abel kyvĕnh ven kũ tóg jũ mũ, ũ tũ ti tĕn ja ĕn to. Topĕ tũ Jesus kyvĕnh ven kũ tóg jāvo ĕg mĩ vĕnh pãte fón mũ. Ēg tũn hã vĕ, Jesus tũ ĕg mĩ vĕnh jykre nĩm jan hã vĕ, hã kũ tóg Moisés jykre kãfór nĩ, Jesus ti.

²⁵ Hã kũ jĕmĕ há han nĩ. ũ tũ ājag mĩ Topĕ vĩ tó mũ ĕn vĩ jĕmĕ há han sórmnĩ. Ēg jóg'jóg ve ũ ag vỹ Topĕ vĩ mĕ sór ja tũ nĩgtĩ, ti tũ ag jyvĕn mũ ra. Hã kũ ag krenkren ja tũ nĩ. Kũ ĕg krenkren ke tũ nĩ gé, ĕg tũ ũ tũ kankhã tá nĩ ĕn to ĕg mré vĕmĕn sór mũ ĕn vĩ jĕmĕ sór tũ nĩn kũ, ti tũ ĕg jyvĕn mũ ti.

²⁶ Vāsỹ tóg, ã tũ ĕg jóg'jóg ve ag mré vĕmĕn kũ tóg ga tũ ragra ke han ja nĩgtĩ. ũri tóg ĕg mĩ tag tó, ha mĕ. “Ga tũ ragra ke pir han mǎn jé sóg ke mũ,” he tóg. “Ēn kã kankhã vỹ ragra ke mũ gé, ha vemnĩ,” he tóg.

²⁷ Ti tũ: “ke pir han mǎn jé sóg ke mũ,” hen kũ ĕg tóg ki kanhró nỹtĩ, ti tũ ã tũ nĕn han ja tag tũ tũ' he sór mũ ti, ti tũ ga tũ ragra kenh ken ki. Nĕn ũ tũ ragra kenh ke tũ ĕn hã tóg nĩnh ke mũ inhhã, hã vỹ: “Topĕ jamã, he mũ.

²⁸ Kũ tóg há tĩ, ĕg tũ Topĕ mĩ: “há ti nĩ, ã tũ ĕg mĩ nĕn han mũ ti,” hen kũ. Ēg jamã tãg vỹ inhhã ragra kenh ke tũ pĕ nĩ, ti tũ ĕg mĩ ĕg jamã nĩm ke ĕn ti. Kũ tóg há nĩnh mũ gé, ĕg tũ Topĕ rānhraj han há han kũ, ti tũ ti mĩ sér nĩ jé. Ti kamĕg jé ĕg tóg ke mũ gé, ĕg tũ tóg jũrũn kenh mũ.

²⁹ Topĕ vỹ pĩ tũ nĕn ũ kar kugprũg mũ ri ke nĩ.

13

Topĕ tũ ĕg jyvĕn

¹ Jesus ki ge kũ nỹtĩ ag tũ jagnĕ to há nỹtĩ to krónh ke tũg nĩ.

² ũ tũ kuvar há tá ājag to pasa ken kũ ti mĩ: “inh mré jĕ,” hemnĩ. Ēg jo ke ũ ag tóg, ag tũ ũ ag to: “inh mré nỹtĩ,” hen kũ (ag tóg) Topĕ tũ jĕnĕ jafã ag mĩ: “inh mré nỹtĩ,” he ja nĩgtĩ, ag tũ ag ki kagtĩg (hã) ra. Hã kũ tag han nĩ.

³ ũn sigse kũ nỹtĩ ag ki rĩrmnĩ. Ājag tũ kejĕn Jesus tigrĩn sigse kũ nỹtĩnh ke tag mĩ ĕkrĕn nĩ, hã kũ jagnĕ ki rĩr há han nĩ. Ag tũ ũn vóg kónãn mũ ag ki rĩrmnĩ gé. Kejĕn ag

tóg ãjag vóg kónãn ke mũ gé, Jesus tigrĩn, hã ky ag ki rĩr há han nĩ.

⁴ Ũ prũ fi to én tũg nĩ, ù mén to én tũg nĩ gé. ãjag prũ nĩtĩn ky ù fi mré nĩ sór tũg nĩ, ãjag mén nĩtĩn ky ù mré nĩ sór tũg nĩ gé. Topẽ vỹ ù tỹ vẽnh jykre kórég han (ka)mẽ ên ag to jũnh ke mũ, ù tỹ fag mré nĩ sór (ka)mẽ ên ag to, fag tỹ ag mré nĩ sór (ka)mẽ ên fag to ke gé.

⁵ Rico nĩtĩ sór tũg nĩ gé. ãjag tỹ nén vég mũ ên vỹ há nĩ. Topẽ vỹ ãg mũ tag tó, ha mẽ: “ãjag kã jatu' henh ke tũ pẽ sóg nĩ, ãjag ki sóg rĩr nĩ nĩ,” he tóg, Topẽ ti.

⁶ Hã ky tag tómnĩ, ha mẽ: “ãg jóg mág vỹ inh ki rĩr ke mũ,” hemnĩ. “Ti hã kamẽg isóg mũ. Êprã ke ù vỹ inh vóg ke tũ pẽ nĩ, ti tỹ inh ki rĩr nĩn ky,” hemnĩ, Topẽ vỹ kri fi ky.

⁷ Ũ tỹ ãjag mũ Topẽ vỹ tó vén mũ ên mũ êkrén nĩ. Ga kri mũn ky ag tóg Topẽ tovãnh ja tũ pẽ nĩgtĩ, ãjag tỹ ti tovãnh tũ ra ag tóg kãgter ja nĩ. Ag ri ke han sórmnĩ, ti ki rã ên tovãnh sór tũg nĩ gé, ag ri ke han nĩ.

⁸ Jesus Cristo hã vỹ ter tũ nĩ. Ti tỹ vãsỹ nén to jykrén mũ ên hã han ti tĩ, ùri, ky tóg hã han mãn ke mũ gé. Tỹ ù han ke tũ ti nĩ, ky tóg kurã krỹg ja tũ nĩ gé.

⁹ Ũ tỹ ón ky ãjag mũ nén ù ù tó sór mũ ên vỹ jẽmẽ tũg nĩ, ag tỹ ón ky Topẽ to nén ù ù tó mũ ra. ãjag krĩn kónãn jé ag tóg ke mũ. ãjag tỹ tỹ prãnh ke han sór jé ag tóg ke mũ. Topẽ vỹ ãjag tar han ki kanhró nĩ, ãjag jagãgtãn ky. Ũ tóg: “ã tỹ vẽjẽn tag kon ky ã tóg Topẽ jykre to tar nĩ,” he tĩ. Ag ón vẽ. Vẽjẽn vỹ ãg tỹ ti jykre to tar nĩ han ke tũ pẽ nĩ. Topẽ hã ne ãg tar han ki kanhró nĩ'.

¹⁰ Ha mẽ, Moisés jykre ki Topẽ mũ nén ù pũn tĩ ag pi(jé) ãg mré Jesus jamĩn ên konh ke mũ'.

¹¹ Ag tỹ Topẽ tũ ki rĩr tĩ to pã'i mág ên vỹ ag mẽg ù tãnh ky ti kyvẽnh ma tĩ tĩ, ag tỹ to: “Topẽ nĩgjafã,” he mũ ên ra. Ti tỹ ag mẽg kyvẽnh ên tỹ ãg tỹ Topẽ vỹ mranh mũ tỹ tũg' he sór vẽ vẽ. Hã ra ag tóg ãjag jamã jy ró pãnĩ to ag tóg ãjag mẽg tãnh ky pũn tĩ.

¹² Hã ky Jesus tóg cidade jy ró ên pãnĩ to ter ja nĩ gé, ti tỹ ãg jagfy ter ky, ãg jãnhkri han jé.

¹³ Ky ãg tóg ti jagtar ri ke han ke mũ gé. Ũ tỹ ti ki ge jãvãnh ag jykre han tũ ãg tóg nĩ,

ky ãg tóg ag mré han ke tũ nĩ gé. Jesus tỹ cidade jy ró pãnĩ to ter ja ên mũ ãg tóg êkrén ky nĩtĩ, ky ãg tóg ù tỹ ti ki ge tũ ag mré ag jykre han ke tũ pẽ nĩ.

¹⁴ Tag ki, ga kri ãg tóg ãg jamã pẽ venh ke tũ nĩ. Kanhkã tá ãg tóg ve sór mũ, ãg jamã ti.

¹⁵ ãg tỹ Jesus tigrĩn Topẽ mũ vỹ há han ky tóg há tĩ. ãg tỹ nén vég mũ kar to ãg tóg ti mũ: “ãg mũ tóg há tĩ, ãg mũ tóg sér tĩ,” henh ke mũ. ãg tỹ ti mũ nén ù pũn mũ ri ke tóg nĩ, presente ri ke tóg nĩ, ãg vỹ tag. “ãg jóg vỹ,” he jé ãg tóg ke mũ gé, ti to. Ti mũ vỹ há han ke to krónh ke tũg nĩ.

¹⁶ Jagnẽ ki rĩrmnĩ gé, jagnẽ mré nén kar han ky. Tag to krónh ke tũg nĩ gé. ãg tỹ Topẽ mũ nén ù pũn ri ke ti nĩ, ãg tỹ ti mũ presente han ri ke ti nĩ, ãg tỹ jagnẽ ki rĩr tĩ ti, ky tóg ti mũ sér tĩ.

¹⁷ Ũ tỹ ãjag kanhrãn tĩ ên ag vỹ jẽmẽmnĩ, ag tỹ ãjag mũ nén tó mũ ên ki króm nĩ. ãjag ki rĩr ag tóg nĩgtĩ, ãjag tỹ Topẽ tovãnh tũ nĩ jé, ky Topẽ vỹ ag rãnhraj tugnỹm ke mũ. ãjag tỹ ag vỹ jẽmẽn ky tóg ag mũ kufy tũ nĩnh mũ, ag rãnhraj ti, ky tóg ag mũ sér tĩnh mũ. Ti tỹ ag mũ kufy nĩn ky tóg há tũ nĩ gé, ãjag mũ.

ãg tỹ Topẽ mré vẽmẽn ke

¹⁸ Inh jagfy Topẽ mré vẽmẽn nĩ. Nén ù kórég han ja tũ inh nĩ, ki kanhró sóg nĩ. Isỹ nén ù kuryj han sór vẽ mũr, tag hã to sóg jykrén tĩ.

¹⁹ Ky inh jagfy Topẽ mré vẽmẽn nĩ, Topẽ tỹ kãnhmar ãjag to inh jẽnẽ mãn jé. Ti mũ tag to vĩn ky krónh ke tũg nĩ.

²⁰ Topẽ mré sóg vẽmẽn tĩ ãjag to. ãg krĩ kuprãg ti tĩ. Ky tóg Jesus ti, ãg Senhor ti rĩn mãn ja (ti) nĩ gé, ti tỹ ãg jagfy ter kar ky. ãg jagfy ter ky tóg ù tỹ mé ki rĩr tĩ ên ri ke nĩ, hã ra tóg ên kãfór nĩ gé, ti tỹ ãg ki rĩr há han nĩn ky. ãg jagfy ter ky tóg ãg mũ vẽnh jykre tãg ên nĩm ja nĩ, ù tỹ tũ' he vãnh ên.

²¹ Topẽ hã mũ sóg to vỹ mũ, ti tỹ ãjag tar han jé, ãjag tỹ nén (ũ) tỹ ti mũ há nĩ ên hã han jé. Ti há vỹ Jesus Cristo mũ: “ag tar han nĩ,” he ja nĩ. Ti hã mũ ãg tóg vỹ há han ke mũ, Jesus Cristo mũ, ky tóg tũ' henh ke tũ nĩ, ãg tỹ ti mũ vỹ há han ke ti. Amém.

²² Inh kanhkã, sÿ ãjag mÿ tag tó sór ja vë. Jatun mÿ mẽ sórmnĩ, sÿ ãjag jyvën mÿ tag. Inh pi(jé) vënh ránrán mág han. Vënh ránrán sĩ han sóg ãjag mÿ.

²³ Ha mẽ, êg régre tÿ Timóteo vÿ se kÿ jë mǎn tũ nĩ ha. Ti kava ag huri. Ti tÿ kãnhmar ki jun kÿ tóg inh mré ãjag venh kãtĩg ke mÿ.

²⁴ ãjag pã'i kar ag mĩ sóg êkrég tĩ, Topë ki ge kÿ nÿtĩ kar ag mĩ ke gé. Tag ki ke ag, ga tÿ Itália ki Topë ki ge kÿ nÿtĩ ag vÿ ãjag mĩ êkrég tĩ gé.

²⁵ Topë jé ãjag tar han kãn.
Hã vë.

TIAGO TỸ CARTA

¹ Tiago tỹ rá vĕ. Isỹ Israel ag mỹ rán hã vĕ. Ęg povo tỹ 12 (ke) vỹ tỹ ãjag nỹtĩ. Povo kar mĩ ãjag tóg mũgtĩ, fóg ag kar mĩ, kanhgág ag mĩ ke gé. Sỹ ãjag mỹ vĕnh rá jĕnĕ vĕ. Tỹ sóg Topĕ mỹ rãnrãj tĩ nĩ, Ęg Senhor tỹ Jesus Cristo mỹ. Hã kỹ sóg ãjag mỹ rán kỹ jĕnĕg mũ sir. Ājag mĩ sóg ěkrég tĩ.

Ęg tỹ Topĕ vĩ to: hỹ mỹ vỹ? henh ke tũ

² Inh kanhkã', ãjag tỹ Jesus tigrĩn nĕn ũ jagy ve kỹ to vĕnhmỹ nỹtĩ tũg nĩ. Mỹ sér nỹtĩmĩ hã ra.

³ Topĕ tỹ ãjag tỹ ti ki rã há han ja ve sór vĕ, hã kỹ ãjag tóg tag kar vég tĩ. Kỹ ti tovãnh sór tũg nĩ, kỹ ãjag tóg ti to tar nỹtĩnh mũ, ãjag tỹ nĕn ũ jagy vég mũ ra ti tovãnh tũ nĩn kỹ. Tag to jykrén.

⁴ Ājag tỹ nĕn ũ jagy vég mũ ra to tar nỹtĩmĩ, ãjag tỹ komĕr hã há nỹtĩ jé, Topĕ jykre ki króm há han kỹ. Komĕr hã ãjag tóg kygnĕnh ke tũ nĩ, nĕn ũ kar ki, ãjag tỹ ti to krónh ke tũ nĩn kỹ.

⁵ Ājag tỹ nĕn ũ to jykrén tũ nĩn kỹ Topĕ mỹ to vĩmĩ, ti tỹ ãjag kanhrãn jé. Ęg kanhrãn jé tóg ke mũ, Topĕ ti. To tóg: “han ke tũ inh nĩ,” henh ke tũ nĩ, vĩ tar han ke tũ ti nĩ, Ęg tỹ ti mỹ nĕn ũ to vĩn kỹ. Ęg to tóg fe há nĩ, hã kỹ tóg Ęg kanhrãn tag to há nĩ.

⁶ Ājag tỹ ti mỹ nĕn ũ to vĩn kỹ: “Ęg mỹ tóg han tĩ, Topĕ ti,” hemnĩ. “Ti mỹ inh mỹ han mũ vỹ?” he tũg nĩ. Ājag tỹ: “ti mỹ inh mỹ han mũ vỹ?” hen kỹ ãjag tóg venh ke tũ nĩ, ãjag tỹ ti mỹ nĕn to vĩ mũ ĕn ti. Kỹ ãjag tóg goj ri ke nỹtĩ. Goj tóg kejĕn fagrĩnh mỹ krém krém ke tũ, kãka tỹ ti kã nĩ kỹ. Kỹ tóg ra tũg, tá kãtũg ke mũ. ĕn ri ke tóg nĩ, ũ tỹ Topĕ vĩ kri fig tũ ĕn ti.

⁷⁻⁸ Fagrĩnh mỹ tóg Topĕ mỹ nĕn ũ to vĩ tĩ, ti tỹ: “ti mỹ inh mỹ han mũ vỹ?” hen kỹ. Venh ke tũ tóg nĩ sir. Krĩ régre ti nĩ. Nĕn ũ to jykrén kỹ tóg kãnhmar nĕn ũ hã to jykrén mãn mũ gé, vĕnh jykre pir han vãnh nĩn kỹ. Ki kagtũg tóg nĩ, hã kỹ tóg venh ke tũ nĩ gé sir.

Ũn jagtar ag mré ũn rico ag jykre

⁹ Ęg Senhor tỹ Jesus mré ke ũ ag tóg jagãgtar nỹtĩ. Hã ra ag tóg Ęg Senhor ki ge kỹ nỹtĩn kỹ ũn rico ri ke nỹtĩ, ag tỹ tỹ Topĕ krĕ nỹtĩn kỹ. Kỹ tag to jykrén nĩ, ãjag mỹ sér tĩ jé, ãjag jagtar nỹtĩn kỹ.

¹⁰ Kỹ Ęg Senhor tỹ Jesus mré ke ũ ag tóg rico nỹtĩ hã ra. Ag tỹ Ęg Senhor ki ge kỹ nỹtĩn kỹ ag tóg ũn jagãgtar ri ke nỹtĩ, Topĕ mỹ. “Ter jé Ęg tóg ke mũ, kỹ tóg Ęg mỹ há tĩ, Topĕ tỹ Ęg jagãgtãn ken kỹ, ũn jagtar ag ri ke,” hemnĩ, ãjag rico nỹtĩn kỹ. Re fej ri ke Ęg tóg nỹtĩ, Ęg kar.

¹¹ Rã tỹ jun ke kỹ tóg rỹ jagy tĩ. Kỹ tóg tugtóg tĩ, re ti, kỹ ti fej tóg kógungun tĩ gé. Kỹ ti sĩnvĩ ĕn tóg tũ' henh mũ sir. ĕn kãgter ri ke Ęg tóg nỹtĩ gé. Kỹ ũn rico ag tóg ke tĩ gé, kãgter kỹ. Kỹ ag há ĕn tóg tũ' he mũ gé sir, ag rãnrãj tỹ ag mỹ sér nĩ ra.

Ęg tỹ Topĕ vĩ mranh sór mũ

¹² Kejĕn ũ tóg Jesus tigrĩn Ęg to jũ nĩ. Ęg tỹ hã ra Topĕ tovãnh tũ nĩn kỹ tóg há tĩ. Kỹ Ęg Senhor tóg Ęg mỹ Ęg rĩr krỹg ja tũ ven ke mũ, Ęg tỹ Ęg jagãgtar mũ ra ti tovãnh tũ nĩn kỹ. Kỹ tóg Ęg tỹ carreira ki ka féj tỹ coroa ganhar he mũ ĕn ri ke nĩ sir. Ęg Senhor vỹ Ęg mỹ: “rĩr krỹg ja tũ ve jé ãjag tóg ke mũ, ãjag tỹ iso há nỹtĩn kỹ,” he ja nĩgtĩ, hã kỹ tóg Ęg mỹ tỹ presente han ke mũ.

¹³ Ājag tỹ Topĕ vĩ mranh sór mũn kỹ to: “Topĕ vỹ inh krĩn, sỹ ti vĩ mranh jé,” he tũg nĩ. Topĕ pi(jé) vĕnh jykre pãno han ja nĩgtĩ'. Kỹ ũ pi(jé) to Topĕ krĩn kónãn tĩ gé'. Kỹ tóg Ęg krĩn kónãn tũ nĩgtĩ gé (mỹr), Topĕ ti.

¹⁴ Ęg tỹ Topĕ vĩ mranh sór kỹn ge nĩ, hã nỹ ve nĩ, kỹ Ęg tóg to ĕn tĩ.

¹⁵ Ęg tỹ to ĕn kỹ Ęg tóg to jykrén mág nĩ. Kỹ Ęg tóg sir han sór mũ. Ęg tỹ han sór kỹ Ęg tóg han mũ. Kỹ Ęg tỹ ti vĩ mranh vĕ sir. Kar kỹ Ęg tóg mranh mãn', mranh mãn', he mũ gé, vĕnh jykre pãno vĕ sir. Hã ra Ęg tóg to nũgme ki vár ke mũ, inferno ki.

¹⁶ Inh kanhkã', ãjag to sóg há tãvĩ nĩ. Hã kỹ sóg ãjag mỹ: “kygnĕ tũg nĩ, Topĕ to,” he mũ.

¹⁷ Topĕ hã ne ã pin kỹ Ęg mỹ nĕn ũ há kar han tĩ'. Nĕn ũ há tãvĩ han tóg tĩ, Topĕ ti, ĕprã ke ag mỹ, hã vỹ: Ęg, he mũ. Ti hã tóg jĕngrĕ hyn han'. Rã tỹ Ęg ki kupũn tũ nĩn kỹ tóg fĕnja tĩ. Hã ra Topĕ tóg tag han tũ nĩgtĩ

(mÿr). Ti pi(jé) kejën ãg ki rÿr tũ nÿgtÿ'. Æg ki rÿr tóg nÿ nÿ hã ra.

¹⁸ Ti hã tóg ãg han mãn', ãg tÿ ti ki ge kÿ. Ti tÿ ãg han mãn sór kÿ tóg ãg han mãn. Æg to tóg ã vÿ há jënẽ. Vënh vÿ há tag tÿ tóg ãg han mãn mũ sir. Ti tÿ ãg han mãn kÿ ãg tóg ti tÿ nén han mũ kar kri ke nÿtÿ, ãg tÿ tÿ ti krẽ nÿtÿn kÿ.

Æg tÿ Topẽ vÿ ki króm ke

¹⁹ Inh kanhkã', tag to jykrén mág nÿ. Û tÿ nén ù há kãmén kÿ jëmẽ há han nÿ. Kãnhmar vÿ tũg nÿ. Kãnhmar jũ tũg nÿ gé.

²⁰ Æg jũ nÿtÿn kÿ ãg tóg Topẽ jykre han tũ nÿgtÿ (mÿr), ti jykre kuryj ti. Hã kÿ jũ tũg nÿ.

²¹ Hã kÿ nén tÿ ãg kavénh tÿ ên tovãnh kãn nÿ, vënh jykre pãno mré hã. Æg kókég tóg tÿ, ãg fãn tóg tÿ, vënh jykre pãno ti. Tovãnh ra. Jatun mÿ Topẽ vÿ mêmni. Topẽ hã ne ã vÿ tÿ ãg kanhrãn'. Æg tÿ kri fi kÿ ãg tóg krenkren ke mũ.

²² Kÿ Topẽ vÿ han kÿ nÿtÿmni. Æjag tÿ mæg mũ (hã) ra ki króm tũ nÿn kÿ ãjag tóg krenkren ke tũ nÿ. Ón kÿ ãjag tóg: “kren jé sóg ke mũ,” henh ke mũ.

²³ Æg tÿ jëmæg mũ (hã) ra ki króm tũ nÿn kÿ ãg tóg tag ri ke nÿtÿ, ha mẽ. Kejën ù tóg vënh vég mũ, ki vënh ve jafãn ki (mÿr, ha mẽ). Kÿ tóg ã kakã vég mũ sir.

²⁴ Æ kakã ve kar kÿ tóg to jykrén mãn tũ nÿ. Kÿ tóg ki kagtÿg' he mũ. Tÿg tóg mũ, kÿ tóg ã kakã ki kagtÿg' he mũ. Kÿ tóg fagrÿnh mÿ vënh ven ja nÿ sir. Ge ãg nÿtÿ, ãg tÿ Topẽ vÿ jëmæg mũ (hã) ra ki króm tũ nÿn kÿ. Kÿ ãg tóg fagrÿnh mÿ mẽ ja nÿ sir.

²⁵ Æg tÿ ti vÿ to jykrén mág kÿ tóg hã ra ãg mÿ sér tÿnh mũ. Topẽ vÿ vÿ há nÿ, ti jykre ti. Æg jykre pãno tÿ tũg' he tóg tÿ, ãg tÿ han mãn tũ nÿn jé. Kÿ ãg tóg ãg tÿ ti vÿ jëmæg kÿ nÿtÿn kÿ to jykrén ke mũ. Kã jatun ke tũ ãg tóg nÿtÿ sir. Kÿ ãg tÿ ki króm kÿ Topẽ tóg ãg mÿ vÿ há han ke mũ sir, ãg tÿ nén han mũ kar to.

²⁶ Û ag tóg Topẽ to: “ti to sóg há nÿ,” he tÿ. Hã ra ag tóg ù to vÿ kónãn tÿ, ãjag vÿ to jykrén tũ nÿn kÿ. Kÿ ag tóg ón kÿ: “ti to sóg há nÿ,” he ja nÿgtÿ. Kygnæg ãg tóg tÿ, ãg tÿ gen kÿ. Hã kÿ ãg tóg ón kÿ: “ti to sóg há nÿ,” he tÿ, ãg tÿ ù to vÿ kónãn kÿ.

²⁷ Æg tÿ ãg jóg tÿ Topẽ to há nÿtÿn kÿ, kÿ ãg tóg tag han mũ, ha mẽ: ùn panh ter mũ kar jagãgtãn kãn ãg tóg tÿ, ùn mén ter ja fag ke gé, ùn jagãgtar fag. Fag ki rÿr jé ãg tóg ke mũ, fag mÿ há tÿ jé. Kÿ ãg tóg nén ù vënhmÿ han ke tũ nÿ gé sir. Topẽ kato tẽ mũ ag jykre han ke tũ ãg tóg nÿgtÿ gé. Hã kÿ ãg tóg ti mÿ kavéj tũ nÿtÿ sir. Hã kÿ ãg tóg ón kÿ: “Topẽ to sóg há nÿ,” he tũ nÿgtÿ gé.

2

Æg tÿ jagnẽ to vënh jykre pir han ke

¹ Inh kanhkã', ãg Senhor tÿ Jesus Cristo ki ãjag ge mũ mÿr. Pã'i kar kãfór vë (mÿr), ãg Senhor tÿ Jesus Cristo ti. Ge ra ãjag ne tóg ùn rico ag to há nÿtÿ', kÿ ùn jagãgtar ag tóg ãjag mÿ tÿ nén ù tũ nÿtÿ. Ke tũg nÿ.

² Hën ri ke mũn ùn rico vÿ Topẽ vÿ jëmënh kãtÿg mũ, ãjag vënhmãn kÿ. Ti kur vÿ há tâvÿ nÿ, kÿ ti nÿgé kãnÿm ja vÿ tÿ ouro nÿ. Kÿ ùn jagtar vÿ kãtÿg ke mũ gé, kur kórég tu kÿ.

³ Kÿ ãjag hÿn tóg ùn rico mÿ: “ha tag kã nÿ, vënh nÿg ja há kri,” he tÿ. Jó ùn jagtar mÿ ãjag hÿn tóg: “ha tâ tá jẽ,” he tÿ, ke tũ nÿn kÿ: “ha inh mré nÿ, hã ra êprã nÿ, gan kri,” he ãjag hÿn tÿ.

⁴ Hã ki ãjag tóg ùn rico to há nÿ ve nÿ, ti tũ tigrÿn. Jãvo ãjag tóg ùn jagtar to é he mũ ve nÿ, ti jagtar nÿn kÿ. Ke tũg nÿ. Æjag tÿ jagnẽ ri ke nÿtÿ to jykrén nÿ, ke tũ nÿ mũ ra ãjag tóg vënh jykre pãno han mũ.

⁵ Inh kanhkã', jëmæg há han ra. Æjag to sóg há nÿ (mÿr), hã kÿ sóg ãjag jyvën mũ. Topẽ vÿ ùn jagãgtar ag kupræg, ag tÿ ti to ricon jé, ti ki ge kÿ. Ga mÿ mũn kÿ ag tóg jagãgtar nÿtÿ. Æg Senhor ki ge kÿ ag tóg há nÿtÿ jãvo. Topẽ tÿ tÿ ãg pã'i nÿ ve jé ag tóg ke mũ, ag tÿ ti to há nÿtÿn kÿ. Topẽ hã ne tag tó ja nÿgtÿ', ãg tÿ ti venh ke ti, kÿ tóg han ke mũ, ã tÿ tó ja ên ti.

⁶ Jãvo ãjag tóg ùn jagãgtar ag to é he tÿ. Ûn rico ag to ãjag tóg vÿ há han tÿ. Hã ra ùn rico ù ag tóg ãjag to kórég nÿtÿ gé. Kÿ ag tóg ãjag fóg mÿ ãjag to vÿ kónãn tÿ, ãjag fóg tÿ ãjag jé prër jé. Kÿ ãjag tóg to jagtar nÿtÿ sir, ag tÿ ãjag to vÿ kónãn tÿ ên to. Hã kÿ tóg sir vënhmÿ nÿ, ãjag tÿ ùn jagãgtar to é he tÿ.

⁷ Kÿ ùn rico ù ag tóg ãg Senhor to é he tÿ gé. Ti to ag tóg vÿ kónãn tÿ gé, hã ra ãg tóg tÿ

ti mré ke nýtĩ. Hã kÿ ag tóg ěg to vĩ kónãn mũ gé, ti to vĩ kónãn kÿ.

⁸ Topě tÿ vãsÿ ěg mÿ vĕnh jykre nĩm ja ěn ki króm nĩ, hã vÿ: “ã régre to há nĩmnĩ, ã tÿ vĕso há nĩ ri ke nĩmnĩ, ã régre tÿ,” he ja tóg nĩgtĩ ěg mÿ, Topě ti. Kÿ tóg rán kÿ nĩ. Ājag tÿ tag han kÿ tóg há nĩ.

⁹ Ājag tÿ hã ra ũn rico to há nýtĩn kÿ, ũn jagtar to kórég nýtĩn kÿ, kÿ Ājag tóg ti vĩ mranh mũ sir, ti tÿ ěg jyvĕn ja ti. Kÿ Topě tóg Ājag to jykren kónãn mũ, Ājag tÿ ti vĩ mranh kÿ.

¹⁰ Ha vé, hĕn ri ke mũn ěg kãmĩ ũ tóg Topě tÿ ěg mÿ vĕnh jykre nĩm ja kar ki króm tĩ. Hã ra tóg sir nĕn pir ki ti vĩ mranh mũ. Kÿ ti tÿ ti vĩ mranh kãn vĕ sir, ti vĩ pir mranh kÿ.

¹¹ Topě tóg ěg mÿ: “ã prũ tũ fi mré nÿ tũg nĩ, kÿ ã mén tũ mré nÿ tũg nĩ gé,” he ja nĩgtĩ. Kÿ tóg ěg mÿ: “jagnĕ tĕn tũg nĩ,” he ja nĩgtĩ gé. Hĕn ri ke mũn ěg tóg ěg prũ tũ fag mré nÿ tũ nĩgtĩ. ěg tÿ hã ra jagnĕ tĕn kÿ ěg tóg ti vĩ mranh kãn mũ, ti tÿ ěg jyvĕn ja ti.

¹² Kÿ tag to jykren nĩ, Ājag tÿ nĕn ũ han ke to jykren kÿ. ěg Senhor vÿ ěg jykre kar vég tĩ, ti tÿ ěg tÿ ti jykre ki króm mũ ve sór kÿ. Kÿ Ājag jykre to jykren nĩ, Ājag vĩ to ke gé.

¹³ ěg tÿ jagnĕ jagãgtãn tũ nĩn kÿ tóg ěg jagãgtãn ke tũ nĩ gé, ěg Senhor ti, ti tÿ ěg jykre tugnÿm ken kÿ, kurã ěn kã. ěg tÿ hã ra jagnĕ jagãgtãn kÿ tóg ěg jagãgtãn ke mũ gé, ti tÿ ěg jykre tugnÿm ken kÿ. Kÿ ti pi(jé) ěg vóg kónãn mũ sir'.

Ti ki rã há

¹⁴ Inh kanhkã', ũ tóg kejĕn: “ti ki sóg rã kÿ nĩ,” he tĩ, Topě to. Hã ra tóg ti vĩ han tũ nĩgtĩ. Kÿ tóg ón kÿ ti ki rã kÿ nĩ ja nĩ. Kren ke tũ tóg nĩ sir.

¹⁵ Kejĕn Jesus mré ke ũ tóg kur vég tũ nĩgtĩ, vĕjĕn vég tũ tóg nĩgtĩ gé, Jesus mré ke ũ fi ke gé.

¹⁶ Kÿ Ājag kãmĩ ũ tóg hĕn ri ke mũn ti mÿ, fi mÿ tóg: “tág',” he mũ. “Ha tĩg, jatun mÿ. Ā jé kusa mĕg tũ nĩ, ã jé kókĩr tũ nĩ,” he tóg mũ. Hã ra tóg fag mÿ nĕn ũ nĩm tũ nĩ. Kÿ tóg fagrĩnh mÿ fag mÿ: “ã jé jagtar tũ nĩ,” he ja nĩ.

¹⁷ Ge ti nĩ, ěg tÿ ón kÿ: “ti ki rã kÿ sóg jĕ,” hen kÿ. ěg tÿ ti vĩ han tũ nĩ kÿ ěg tóg fagrĩnh

mÿ: “ti ki sóg rã kÿ nĩ,” he mũ sir. Nĕn ũ tũ vĕ.

¹⁸ Ājag kãmĩ ũ tóg hĕn ri ke mũn: “ũ tóg Jesus ki rã kÿ nĩ, jãvo ũ tóg ti jykre han tĩ,” he sór mũ, Ājag tÿ ti jykre han sór tũ nýtĩn kÿ. Tag to sóg Ājag mÿ: “inh hÿn ne tugrĩn ki kanhrãn mũ, ã tÿ ti ki rã ja ti?” he mũ. “Ā tÿ ti jykre ki króm vãnĕh kÿ sóg ki kagtĩg nĩ. “Ti mÿ Jesus ki rã kÿ jĕ nĩ vÿ?” he jé sóg ke mũ ã to. Ā jãvo sóg ti jykre han tĩ inhhã. Hã to ã tóg ki kanhró nĩ, sÿ ti ki rã kÿ jĕ ti,” he jé sóg ke mũ, Ājag tÿ inh ki jĕmĕn kÿ.

¹⁹ “Topě vÿ tÿ ũn pir nĩ,” he Ājag tóg tĩ gé. Ājag tÿ ki hã tó vĕ. Kÿ Japo ag vÿ tag tó tĩ gé. “Pir tóg nĩ, Topě tĩ,” he ag tóg tĩ gé, Nĕn-Kórég ag. Ag tÿ ti pir ki kanhró (hã) ra ag tóg krenkren ke tũ nĩ, ag tÿ ti jykre han tũ nĩn kÿ. Hã kÿ ag tóg kamĕgmĕg kÿ jũrũn ke tĩ sir, ag tÿ Topě to jykren kÿ, Japo ag. Hã kÿ ěg tóg ěg tÿ Topě kãmĕn há (hã) ra krenkren ke tũ nĩ gé, ěg tÿ ti jykre han tũ nĩn kÿ.

²⁰ Ājag tÿ tag to jykren tũ nĩn kÿ Ājag tóg krĩ tũ (pĕ) nýtĩ (mÿr). ěg tÿ ti vĩ ki króm tũ nĩn kÿ ěg tóg ón kÿ ti ki ge kÿ nýtĩ. Nĕn ũ tũ vĕ sir, ěg tÿ ti ki ge kÿ nýtĩ tag ti. ěg mÿ tóg nĕn ũ há han ke tũ nĩ.

²¹ ěg jóg'jóg ve tÿ Abraão to jykren nĩ. Topě tóg ti mÿ: “ã kósin tÿ Isaque tãnh kÿ pũn, inh mÿ,” he ja nĩ. Kÿ tóg ti mÿ: “hej,” he ja nĩ sir, Abraão ti. Hã kÿ tóg Topě mÿ há nĩ sir, Abraão ti, ti tÿ ti vĩ ki króm to há ja nĩn kÿ. Kÿ tóg ti to: “inh ki rã há han ja ti nĩ,” he mũ, Topě ti, Abraão to.

²² Ve ra ha. Ti tÿ Topě ki rã kÿ jĕn kÿ, hã kÿ tóg ti mÿ: “hej,” he ja nĩ, Abraão ti. Kÿ tóg, ti tÿ ti mÿ: “hej,” hen kÿ (tóg) ti ki rã kÿ jĕ ěn to tar nĩ sir, Topě vĩ ki króm ke to. Ge ti nĩ (mÿr).

²³ Rán kÿ tóg nĩ gé, Abraão ti, kÿ tóg: “Topě vĩ kri tóg fi, Abraão ti,” he mũ, Topě vĩ tÿ rán kÿ nĩ ki. “Hã kÿ ěg jóg mág tóg ti to: “inh ki rã há han ja ti nĩ,” he ja nĩgtĩ. Kÿ Topě tóg ti to: “ũ tÿ iso há nĩ ěn,” he tĩ,” he tóg, Topě vĩ tÿ rán kÿ nĩ ki, Abraão to.

²⁴ Hã ki Ājag tóg vég mũ. ěg tÿ ti vĩ han kÿ tóg ěg to: “inh ki rã há han ja ti nĩ,” henĕ ke mũ gé. ěg tÿ ón kÿ ti ki rã kÿ nýtĩn kÿ ěg tóg hã ra ti mÿ há tũ nýtĩ, Topě mÿ, ěg tÿ ti vĩ ki króm tũ nĩn kÿ.

²⁵ Raabe fi to jykrén nĩ gé, ùn mén jafã ên fi to. Êg povo vỹ ù ag jêgnê ja nĩ, ag tỹ fi jamã ve jé, cidade mág ên ti. Kỹ fi tóg ag mỹ: “kãge jêg ra,” he ja nĩ. Kỹ fi tóg ag kanhrãn ja nĩ sir, fi jamãn ki, ag tỹ êpry ù mĩ kãpa jé, êmĩn ù mĩ, ag kato tẽ ag tỹ ag vég tũ nĩ jé. Tag to fi tóg kren mũ (mỹr), fi tỹ tag han to. Kỹ Topẽ tóg fi to: “inh ki rã há han fi,” he ja nĩ sir, fi tỹ ti vỹ kri fi to.

²⁶ Ge ti nĩ gé, êg mỹ. Êg tỹ ti ki ge kỹ nỹtĩn kỹ êg tóg ti vỹ kri fig mũ, Raabe fi ri ke. Êg tỹ ti vỹ han tũ nĩn kỹ tóg êg mỹ nén ù há han ke tũ nĩ gé, êg tỹ ón kỹ ti ki ge mũ tugrĩn, êg fár tỹ kuprĩg tũ ra ter kỹ nỹ ên ri ke ti nĩ.

3

Êg tỹ êg nũnê tỹ Topẽ vỹ mranh ke tũ

¹ Inh kanhkã', kãnhmar jagnê mỹ: “sỹ ã kanhrãn há tóg tĩ, ã tỹ kygnê to,” he tũg nĩ. Êg kar vỹ kygnêg tĩ. Kỹ Topẽ vỹ êg tỹ kygnê to êg vóg kónãn mág mũ, êg tỹ kãnhmar êg mré Jesus ki ge kỹ nỹtĩ ag kanhrãn sór kỹ.

² Êg kar vỹ kygnê (ka)mê nỹtĩ. Û tỹ ã vỹ ki kygnêg tũ pẽ nĩn kỹ tóg kuryj kar nĩ sir. Êg pi(jé) ne ki kygnêg tĩ', êg tỹ êg vỹ ki kygnêg tũ nĩn kỹ.

³ Cavalo to jykrén nĩ. Freio tỹ êg tóg ti jên kãra fig tĩ. Kỹ êg tóg tỹ ti vóg tĩ sir, cavalo ti, kỹ tóg ã tĩg ke ên ra tĩ mũ sir, ù tỹ cavalo kri nĩ ên ti.

⁴ Kỹ canoa mág to jykrén nĩ gé. Éhé tóg nỹ, hã ra kãka vỹ ti tĩn tĩ. Kỹ ag tóg ti vóg jafã tỹ ti vóg tĩ. Kỹ tóg ag mỹ ki ke tĩ. Ti vóg mũ ag mũnh ke ra tóg tĩ mũ sir. Ti vóg jafã sĩ ra tóg ki ke mũ, canoa mág ti.

⁵ Ge tóg nĩ, êg nũnê ti. Sĩ ti nĩ (mỹr), hã ra êg tóg tỹ vỹ mág han tĩ gé.

Pĩ ri ke tóg nĩ. Ti sĩ ra tóg kejên vãn pũn tĩ (mỹr), nẽn kar ti.

⁶ Ên ri ke tóg nĩ, êg nũnê ti. Tỹ êg tóg vãnh jykre pãno tó tĩ. Kỹ êg tóg êg vỹ tag to kavéj kar nỹtĩ, êg tỹ êg vỹ tag to ti vỹ mranh kỹ. Êg kãsir nỹtĩ ra êg tóg vãnh jykre pãno tó tĩ, êg sanh há nỹtĩ ra ke gé, êg kófa ra ke gé. Japo tỹ êg krĩn hã vỹ, êg tỹ êg vỹ ki Topẽ vỹ mranh jé.

⁷ Ha mẽ, bicho kar vỹ tỹ êg mẽg nỹtĩ. Û ag vỹ mĩg tỹ mẽg nỹtĩ, kỹ ù ag vỹ sēsĩ tỹ mẽg nỹtĩ, ù ag vỹ pỹn tỹ mẽg nỹtĩ, ù ag vỹ goj ki

ke kar tỹ mẽg nỹtĩ gé. Ti kar kanhrãn êg tóg tĩ mỹr, ha mẽ.

⁸ Hã ra êg pi(jé) êg nũnê kanhrãn tĩ'. Ti kanhrãn ki kagtĩg êg nỹtĩ. Vãnh jykre pãno tãvĩ tó sór êg tóg tĩ. Kỹ tóg veneno ri ke nĩ, êg vỹ ti. Tỹ êg tóg jagnê kãgtén ri ke han tĩ, êg nũnê tỹ, jagnê mỹ vỹ kónãn kỹ.

⁹ Tỹ êg tóg Topẽ mỹ vỹ há han tĩ, êg jóg mág mỹ, êg nũnê tỹ. Kỹ êg tóg tỹ êprã ke ag mỹ vỹ kónãn tĩ gé. Hã ra Topẽ tóg êg han, êg tỹ ti ri ke nỹtĩ jé. Kỹ êg tỹ jagnê mỹ vỹ kónãn kỹ êg tỹ Topẽ mỹ vỹ kónãn ri ke vỹ sir.

¹⁰ Êg jên kãtã tóg kãkutê tĩ, êg vỹ há ti, êg vỹ kónãn ti ke gé. Pir ti nĩ, êg jênky ti, hã ra êg tóg tỹ vỹ régre han tĩ. Tag vỹ kórég tãvĩ nĩ, inh kanhkã'.

¹¹ Goj tỹ vãnh kanê to jykrén nĩ, êganê to. Ti há nĩn kỹ tóg há nĩ, goj ti. Ti kajã nĩn kỹ tóg kajã nĩ. Ti pi(jé) tỹ goj régre nĩ', goj tỹ êg kanê ti. Pir tóg nĩ.

¹² Kỹ ka kanê to jykrén nĩ gé. Ka tỹ pẽnva ki êg tóg jymi vég tũ nĩgtĩ (mỹr). Kỹ êg tóg vãn h tỹ jóhó ki pẽnva vég tũ nĩgtĩ gé. Pir ti nĩ, ka kanê ti. Ge ti nĩ gé, goj ti. Ti kajã nĩn kỹ tóg kajã nĩ gé. Kỹ gemnĩ gé, ãjag nũnê tỹ. Vỹ pir han nĩ.

Topẽ tỹ êg mỹ krĩ há nĩm

¹³ ãjag mỹ krĩ há nỹtĩ'? ãjag mỹ Topẽ vỹ ki kanhró nỹtĩ'? Kỹ tóg há tĩ. Kỹ vãnh jykre há kar han kỹ nỹtĩmĩ. Hã ki vãnh kar vỹ ãjag krĩ há venh ke mũ sir. Hã ra tỹ vỹ mág han tũg nĩ. Tỹ vãnh kãfór han tũg nĩ gé.

¹⁴ ãjag tỹ ù to fe kórég nĩn kỹ tóg tỹ ù nỹ jãvo, ãjag tỹ jagnê kãfór nỹtĩ sór kỹ, jagnê to jũ (ka)mê nỹtĩn kỹ, ãjag tỹ vỹsỹ ùn mág han sór kỹ. ãjag tỹ tag han kỹ vỹso: “krĩ há inh nĩ, Topẽ vỹ ki kanhró inh nĩ,” he tũg nĩ. Vãnh ó vỹ, tag ti.

¹⁵ Topẽ tỹ êg kanhrãn ja pijé', êg tỹ ù to fe kórég nĩ ti, jagnê kãfór han sór mũ ti, jagnê to jũ (ka)mê ti ke gé. Êprã vãnh jykre vỹ (mỹr), Topẽ kato tẽ ti. Japo jykre vỹ (mỹr), êg fe jũ tag ti.

¹⁶ Êg tỹ jagnê kãfór han sór kỹ êg tóg jagnê kato tẽgtẽ mũ sir, êg tỹ vỹsỹ ùn mág han sór kỹ. Kỹ êg tóg vỹ mẽ han kỹ jagnê to vãnh jykre pãno han kãn mũ sir.

¹⁷ Êg tỹ hã ra Topẽ tỹ êg kanhrãn mũ han kỹ êg tóg tag han tĩ, ha mẽ: jãnhkri êg nỹtĩ,

kavéj tũ (mÿr). Jagně to ěg tóg krĩ kusa nÿtĩ. Jagně mÿ ěg tóg koměr hã vĩ tĩ gé. Ũ tÿ ěg mré vĩn kÿ ěg tóg ti vĩ mēnh mũ, ti vĩ há nĩn kÿ. Jagně jagãgtãn ěg tĩ sir. Nén kar há han ěg tĩ. Topě vĩ to ěg tar nÿtĩ. Jykre régre tũ ěg nÿtĩ.

¹⁸ Ěg tÿ ti jykre tag han kÿ ěg tóg jagně krĩ kuprãg mũ sir, ěg tÿ jykre kuryj nÿtĩ jé sir, ha mẽ.

4

Ěg pi(jé) tÿ Topě kato tēgtē mũ ag mré ke nÿtĩ

¹ Ājag hã ne tóg jagně to jũgũ nÿtĩ'. Hě ri ken kÿ hÿn'? Ājag tÿ nén ũ vēnhmÿ han sór nÿtĩn kÿ, hã kÿ ājag tóg jagně to krĩ rÿ nÿtĩ. Jykre pãno ājag tóg nÿtĩ (mÿr), kÿ ājag tóg vēnh jykre há kato tē nÿtĩ sir.

² Nén ũ to én mũ (hã) ra ājag tóg mãn sór mũ, hã kÿ ājag tóg vėg tũ nĩ (mÿr). Hã kÿ ājag tóg jagně kãgtén sór mũ sir, jagně tÿ nén ũ mãn jé. Jagně tÿ nén ũ to én kÿ ājag tóg jagně kato tēgtē ti. Ājag tÿ Topě mÿ to vĩ tũ nĩn kÿ, hã kÿ ājag tóg vėg tũ nĩgtĩ.

³ Ājag tÿ ti mÿ to vĩ mũ ra ājag tóg venh ke mũ vė, hã ra ājag tóg vĩ há han tũ nĩgtĩ gé, hã kÿ tóg ājag mÿ han tũ nĩgtĩ sir, Topě ti. Ti mÿ ājag tóg to vĩ mũ, ājag tÿ nén to én mũ ěn mãn jé. Hã ra tóg ti mÿ tÿ ũ nÿ, ājag tÿ nén to én mũ ěn ti. Hã kÿ tóg ājag mÿ han tũ nĩ sir, Topě ti.

⁴ Ěg tÿ Topě ki rã kar kÿ vēnh jykre pãno to én kÿ ěg tóg ti kato tē mũ sir. Ũn tÿtã kórég fi ri ke ěg nÿtĩ, ěg tÿ ge kÿ. Ā mén kavėnh fi tóg tĩ, ũ to én kÿ. Ěg tÿ ěprã vēnh jykre to én kÿ ěg tóg Topě kato tē mũ sir. Tag ki kanhrãn nĩ, to jykren mág han nĩ.

⁵ Topě vĩ tag to jykren nĩ, ũ tÿ vãsÿ rán kÿ nĩ ěn to, ha mẽ: “Topě kuprĩg vÿ tÿ ěg jagrě nĩ, Topě tÿ tÿ ěg jagrěn kÿ. Kÿ tóg ěg ki rĩr mũ sir. Kÿ ěg tÿ nén ũ vēnhmÿ to há nĩn kÿ tóg fe kaj nĩ, Topě kuprĩg ti,” he tóg, Topě vĩ rá ki. Ti pi(jé) véké tag tó ja nĩ'. Kÿ tag to jykren nĩ.

⁶ Hã ra tóg ěg tar han tĩ, Topě kuprĩg ti, ěg tÿ nén ũ vēnhmÿ han sór tag kato tē jé. Ěg jagãgtãn kÿ tóg ěg tar han tĩ. Kÿ tóg tag tó mũ sir, ha mẽ: “Topě vÿ ũ tÿ: “ũn mág vÿ tÿ inh nĩ,” he mũ ěn ag to kórég nĩ, hã ra

tóg ũ tÿ: “nén ũ tũ vÿ tÿ inh nĩ,” he mũ ěn ag jagãgtãn tĩ,” he tóg, ti vĩ rá ki.

⁷ Hã kÿ Topě mÿ: “hej,” hemnĩ, ti tÿ ājag krĩn kÿ. Japo mÿ: “nejé,” hemnĩ, ti tÿ ājag krĩn sór kÿ. Kÿ tóg ājag tovãnh ke mũ sir, Japo ti, ājag tÿ ti mÿ: “nejé,” hen kÿ.

⁸ Topě mré vĩ kÿ nÿtĩmnĩ, kÿ tóg ājag to há nĩ sir, ājag mré ti nĩ nĩ gé, ěg jóg mág ti. Ti vĩ mranh tĩ vÿ tÿ ěg nÿtĩ. Kÿ ti vĩ mranh tovãnh nĩ. Jykre régre ěg nÿtĩ gé. Kÿ vēnh jykre pir han kÿ nÿtĩmnĩ, hã vÿ: Topě jykre, he mũ.

⁹ Ājag tÿ Topě vĩ mranh kÿ mÿ jagy nÿtĩmnĩ. Vēsÿrénh nĩ, fÿmnĩ, ny mãn tũg nĩ. Fe kaj nÿtĩmnĩ. To krĩ kufy nÿtĩmnĩ. Mÿ sér tũ nÿtĩmnĩ, ājag tÿ Topě vĩ mranh kÿ.

¹⁰ Ěg Senhor mÿ: “kórég inh nĩ, isÿ vēnh jykre pãno han kÿ,” hemnĩ. Kÿ ti hã vÿ ājag mÿ vĩ há han ke mũ sir, kÿ ājag fe vÿ mrin ke mũ sir.

Ěg tÿ jagně to vĩ kónãn ke tũ

¹¹ Inh kanhkã', jagně to vĩ kónãn tũg nĩ. Ājag tÿ jagně to vĩ kónãn kÿ ājag tóg Topě jykre to vĩ kónãn mũ sir, kÿ ājag tóg to: “nén ũ tũ vė,” he mũ sir, Topě tÿ ěg mÿ vēnh jykre nĩn ja ěn to. Ājag tÿ hã ra ti jykre to vĩ kónãn kÿ ājag tóg ti ki króm ke tũ pē nĩ sir.

¹² Ũ tÿ ěg mÿ Ā jykre nĩm ja ěn vÿ pir nĩ, kÿ tóg ěg jykre tugnÿm ke mũ gé sir. Ti hã tóg: “ěn vÿ kren ke mũ, ěn vÿ kren ke tũ nĩ,” henh ke mũ, Ā pir mÿ, Topě ti. Hã kÿ tóg vēnhmÿ nÿ, ājag tÿ jagně to vĩ kónãn kÿ.

Ěg tÿ vėsÿ ũn mág han sór ke tũ

¹³ Ājag kãmĩ ũ tóg vėsóg ki ājag tÿ nén han ke to jykren sór tĩ, Topě ki jēmē sór tũ nĩn kÿ. “Hěn ri ke mũn sóg vaj kÿ ěn ra tĩ mũ, ke tũ nĩn kÿ vaj ũn kÿ,” he ājag tóg tĩ. “Cidade ěn ra sóg tũg mũ, tá sóg nĩnh mũ. Tá sóg prÿg pir tũg' he mũ. Kÿ sóg negociar henh ke mũ, sÿ rico nĩ jé,” he ājag tóg tĩ (mÿr).

¹⁴ Hã ra ājag pi(jé) ājag tÿ nén venh ke ki kanhró nÿtĩ', ha mẽ. Ne ve jé ěg ke mũ, vaj kÿ? Ha'. Ki kagtĩg ěg nÿtĩ. Ěg mÿ vaj kÿ ter ke tũ nĩ vÿ? Ha'. Krũj sĩ ri ke ěg nÿtĩ. Ve sĩ han ěg tĩ, krũj sĩ ti. Ěg tÿ ki ěvãnh mãn mũ ra tóg tũ' he mũ sir. Ge ěg nÿtĩ. Kãnhmar ěg tóg tũg' he tĩ, ěg ter kÿ.

¹⁵ Ājag tỹ ājag tỹ nén han ke to jykrén kỹ Topě mĩ ěkrén nĩ, ũ tỹ ěg mỹ ěg ter ke kurā tónh ke ěn mĩ. “Ti mỹ sỹ nén han ke to há nĩ vỹ?” hemnĩ.

¹⁶ Hã ra ājag tóg vėsỹ ũn mág han sór mũ, ājag tỹ: “tag han jé sóg ke mũ,” hen kỹ. Há tũ ti nĩ, ěg tỹ vėsỹ ũn mág han sór kỹ.

¹⁷ Kỹ tag tóg vėnhmỹ nỹ gé, sỹ tónh ke tag, ha mē. Kejėn ěg tóg nén ũ há to jykrén tĩ, ěg tỹ han jé. Hã ra ěg tóg han tũ nĩgtĩ. Kỹ ěg tỹ Topě vĩ mranh ũ vė gé sir, ěg tỹ nén ũ há han sór mũ (hã) ra han tũ nĩn kỹ.

5

Ūn rico ag vėsỹrénh ke

¹ Vãhã sóg ũn há ag to tag tó mũ sir, ũn rico ag to, ũ tỹ Jesus ki ge jãvãnh ěn ag to, ha mē. Ag mỹ sóg: “ha mē,” he mũ. “Kygfỹ ra. Vėsỹrénh mág han ra. Vėnh jagtar jagy ve jé ājag tóg ke mũ.

² Ājag tỹ nén ũ vỹ vag kãn ke mũ. Ājag kur sĩnvĩ ěn vỹ tãryj kãn ke mũ gé, ti ga tỹ kon kỹ.

³ Kỹ ājag jãnkamy vỹ vėso jãgfanh ke mũ. Ājag tỹ ũn jagãgtãn vãnh ja tigrĩn tóg vėso jãgfanh ke mũ. Tag ve kỹ vėnh kar vỹ ājag jykre kórég venh ke mũ. Kỹ ājag tóg to jagtar ke mũ, kỹ tóg pĩ tỹ ěg pũn ri ke nĩ, ājag jagtar ke ti, ājag vėsỹrénh ke ti. Ājag hã ne tóg ājag tỹ nén ũ génh mág', ěg tỹ kãnhmar kurā tỹ ěgno tá krỹg he mũ (hã) ra, Topě tỹ ěg jykre tugnỹm ke kurā ěn tá.

⁴ Ājag camarada ag vỹ ājag jakré tá rãnhãj mũ, hã ra ājag tóg ag mỹ kajãm tũ nĩgtĩ. Hã ra ěg Senhor vỹ vėg tĩ. Ājag camarada vėsỹrénh mē ti (mỹr). Vėnh kar pã'i vė (mỹr), ěg Senhor ti, nén kar pã'i vė gé.

⁵ Ājag tỹ nén ve sór mũ kar ve ājag huri, vėjėn mág, kur sĩnvĩ, ājag tỹ nén to ěn mũ kar ěn ti. Tag tãvĩ to ājag tóg jykrén tĩ, ājag tỹ ga kri mũn kỹ. Tãg gy ājag nỹtĩgtĩ, ěg tỹ ěg mēg jėn há han tĩ ri ke, ěg tỹ ti tãnh jé. Kakó ti nĩ, Topě tỹ ājag tãnh ke ti, mỹr, ha mē.

⁶ Kỹ ājag tóg ũn jykre kuryj ag vóg kónãn tĩ gé. Ag kãgtén ājag tóg tĩ, hã ra ag tóg ājag kato tē tũ nĩgtĩ, ājag kato vĩ tũ ag tóg nĩgtĩ gé. Jykre kórég ājag nỹtĩ,” he sóg mũ, ũn rico ag mỹ.

Ěg tỹ ěg Senhor kãtĩg mãn jãvãnh ke

⁷ Inh kanhkã', ěg Senhor kãtĩg ke jãvãnh nĩ, jatun mỹ, ag jãvo. Ěg tỹ ěkrãn kar kỹ ěg tóg ti mog jãvãnh tĩgtĩ, jatun mỹ. Kỹ ta tóg kri kutē mũ, kỹ tóg kri kutē mãn mũ gé sir. Kỹ vãhã ěg tóg ti kanē vėg mũ.

⁸ Tag ri ke han nĩ, jatun mỹ ti kãtĩg jãvãnh nĩ, ěg Senhor ti. Ti jãvãnh to tar nỹtĩmnĩ. Kãnhmar ti kãtĩ mũ, ěg Senhor ti, ha vemnĩ.

⁹ Inh kanhkã', jagnē vĩ to vĩ vĩ he tũg nĩ. Ke tũ nĩ mũ ra ěg Senhor tóg ājag jykre ve kỹ ājag vóg kónãn ke mũ. Ha vé, vãhã ti vėnh ven ke kãtĩg mũ kãnhmar, ũ tỹ ěg jykre tugnỹm ke mũ ěn ti.

¹⁰ Vãsỹ Topě vĩ tó tĩ ag to jykrén. Topě vĩ tó ag tóg tĩ, kỹ ũ tỹ mē jãvãnh ja ěn ag tóg ag vóg kónãn. Ge ra ag tóg jatun mỹ Topě vĩ tó ja nĩgtĩ, ag tỹ ag vóg kónãn mũ ra. Ag ri ke han nĩ, vãsỹ Topě vĩ tó tĩ ag ri ke.

¹¹ Ag jykre to jykrén nĩ. Ājag jagtar nỹtĩ ra ag tóg to krónh ke ja tũ nĩgtĩ gé. Hã kỹ Topě tóg ag mỹ vĩ há han mũ sir, ti vĩ tó tĩ ag mỹ.

Topě mré ke tỹ Jó kãme mē ājag huri. Ā jagtar ra tóg to krónh ke ja tũ nĩ gé. Kỹ vãhã Topě tóg ti ki rĩr há han mũ, ti jagtar kỹ. Hã ki ājag tóg ěg Senhor jykre vėg mũ sir. Ěg jagãgtãn tóg mũ, ti tỹ ěg jagtar nỹtĩ ven kỹ. Kỹ tóg sir ěg jagãgtãn tovãnh tũ nĩgtĩ.

¹² Inh kanhkã', ón kỹ vĩ tũg nĩ. Ón kỹ: “hej,” he tũg nĩ. Ki hã tómnĩ, ājag tỹ: “hej,” hen kỹ, Topě tỹ ājag vóg kónãn tũ nĩ jé. Kỹ ón kỹ: “Topě vỹ ki kanhró nĩ,” he tũg nĩ gé. Ón kỹ: “ũ tỹ kanhkã tá nĩ ěn vỹ ki kanhró nĩ,” he tũg nĩ gé. Ón kỹ: “ũ tỹ ga kri nĩ ěn vỹ ki kanhró nĩ,” he tũg nĩ gé. Ki hã tómnĩ. Ón tũg nĩ, jagnē mỹ.

Ěg tỹ ũn kaga ag to Topě mré vĩnh ke

¹³ Ājag tỹ nén ũ jagy ven kỹ Topě mré vĩmnĩ. Ājag mỹ sér tĩn kỹ Topě mỹ jãn nĩ, kỹ ti jé tómnĩ.

¹⁴ Ājag kaga nỹtĩn kỹ igreja to pã'i ag jé prėrmnĩ, Jesus tũ ki rĩr tĩ ag. Ěn ag vỹ ũn kaga to Topě mré vĩnh ke mũ, kỹ ag tóg azeite tỹ ũn kaga to tĩn ke mũ, ěg Senhor jiji tó kỹ.

¹⁵ Ag tỹ ěg Senhor mré vĩn kỹ tóg ũn kaga ěn tỹ há' henh ke mũ sir, ěg Senhor ti, ag tỹ ti tỹ há' henh ke to: “hỹ mỹ vỹ?” he tũ nĩn kỹ. Ěg Senhor vỹ ti tỹ há' henh ke mũ

sir. Ũn kaga tỹ ti vĩ mranh kỹ Topě vỹ ti mỹ vėnh pãte fón ke mũ gé sir.

¹⁶ Hã jé jagně mỹ tó, ãjag tỹ Topě vĩ mranh ja ti. “Ti vĩ mranh inh, tag han kỹ,” hemnĩ jagně mỹ. Kỹ jagně to Topě mré vĩmnĩ gé, ti tỹ ãjag tỹ há' he jé, ti tỹ ãjag kaga tỹ tũg' he jé. Ěg tỹ vėnh jykre kuryj han kỹ tóg ěg vĩ mẽ kỹ han mũ sir, Topě ti, ěg tỹ ti mỹ nén to vĩ', to vĩ' hen kỹ. Nén há kar ve jé ěg tóg ke mũ sir, ěg tỹ ti mỹ to vĩn kỹ, ěg Senhor mỹ.

¹⁷ Topě mré ke tỹ Elias mĩ ěkrén nĩ. Ěg mré tóg ěprã ke ja nĩgtĩ, Elias ti. Hã ra tóg Topě mré vĩ', vĩ' he ja nĩgtĩ, ta kutě tũ nĩ jé. Kỹ tóg kutě tũ ja nĩgtĩ, ta ti, prỹg tãgtũ kri kysã tỹ 6 ki.

¹⁸ Kỹ tóg Topě mré vĩ mãn ja nĩgtĩ, Elias ti, kỹ tóg kutě ja nĩ sir, ta ti. Kỹ nén kar tóg gan kri mur mãn ja nĩ, kỹ tóg kaněn mãn ja nĩgtĩ gé sir. Topě tỹ ti vĩ han hã vė. Tag mĩ ěkrén nĩ.

¹⁹ Inh kanhkã', kejěn ěg mré ke ũ tóg prãnh ke tĩ, vėnh vĩ há tovãnh kỹ. Kỹ ti jyvėn nĩ, ti tỹ kygně mãn tũ nĩ jé.

²⁰ Kỹ ũ tỹ ti mré vĩ mũ ěn tóg ti kren han mũ sir, nũgme to, ti tỹ ã jykre kygně ja ěn tovãnh kỹ. Kỹ Topě vỹ ti tỹ ã vĩ mranh ja ěn tỹ vėnh pãte fón mũ sir. Tag to jykrén nĩ.

Hã vė.

PEDRO TÛ ÇARTA HAN VËN

¹ Pedro tÛ ājag mÛ carta rān hā vĕ, Jesus Cristo tÛ inh fĕg hā vĕ, sÿ tÛ ti apóstolo jĕ jé. Sÿ Topĕ tÛ ũn kuprĕg mÛ ag mÛ rān hā vĕ. Ēg mré ke tÛ ag kāmĭ ājag tóg mÛgtĭ, ũ tÛ Jesus ki ge tÛ ag kāmĭ, Ponto tá, Galácia tá, Capadócia tá, Ásia tá, Bitínia tá ke gé.

² Topĕ vÿ ājag kuprĕg. Vāsÿ tóg to jykrén ja nĭ, ājag kuprĕg ke to, ĕg jóg tÛ Topĕ ti. Ājag mÛ tóg ā kuprĭg jĕnĕ, hā kÿ ājag tóg tÛ ti tÛ nÿtĭ, ājag tÛ Jesus Cristo vĭ kri fi jé, ti tÛ ā kyvĕnh tÛ ājag kygpe jé, ājag tÛ ti ri ke há nÿtĭ jé. Topĕ jé ājag tar han mĀn', han mĀn' hé, kÿ ājag jé krĭ kĀnhvy nÿtĭ.

Topĕ tÛ ĕg mÛ nĕn ũ há ven ke

³ Topĕ mÛ sóg vĭ há han tĭ, ĕg Senhor tÛ Jesus Cristo panh mÛ. Ēg jagāgtān tāvĭ han tóg tĭ. Jesus Cristo rĭn mĀn tóg, ti ter kar kÿ, kÿ tóg Jesus tigrĭn ĕg mur mĀn ri ke han tĭ gé. Kÿ tóg ĕg mÛ sér tĭ,

⁴ Ēg tÛ kanhkā mĭ ĕkrén kÿ. Tá ĕg tóg nĕn ũ sĭnvĭ kar venh ke mÛ. Tá ĕg tÛ vÿ tÛ' hĕnh ke tÛ pĕ nĭ. Kómóg ke tÛ tóg nĭ, tá ĕg tÛ ti, tá ũ tóg ti kókĕn ke tÛ nĭ gé.

⁵ Topĕ ki ājag tóg ge kÿ nÿtĭ, kÿ tóg ājag ki rĭr há han nĭ nĭ. Nĕn ũ kar han há tóg nĭ, kÿ tóg ĕg ki rĭr há han tĭ gé, Topĕ ti. Ājag krenkren han jé tóg ke mÛ, ājag tÛ ti tÛ ĕg mÛ nĕn nĭm ke mÛ ĕn ve jé. Nĭm han kÿ tóg nĭ nĭ, ti tÛ ĕg mÛ nĕn ven ke ĕn ti. Kurā tÛ ĕgno ki ĕg tóg ĕn venh ke mÛ.

⁶⁻⁷ Ver tóg ājag mÛ jagy tĭ. Ge ra mÛ sér nÿtĭmĭ. KĀnhmar tóg tÛ' hĕnh ke mÛ, nĕn tÛ ĕg mÛ jagy nĭ tag ti. Topĕ tÛ ĕg jykre ve sór vĕ, hā kÿ ĕg tóg ver nĕn ũ jagy ve vĕn tĭ. Ēg tÛ ti jagy to tar nÿtĭn kÿ tóg vĕg mÛ, ĕg tÛ ti ki rā há han kÿ nÿtĭ ti. Ha vé, ouro rÿg ĕg tóg tĭ, pĭ rÿ jagy ki, ĕg tÛ ti há nĭ ĕn ve jé. Ge ti nĭ, ĕg mré. TÛ' he jé tóg ke mÛ, ouro ti. Ouro kĀfór ti nĭ, ĕg tÛ ti ki rā ti. Ēg tÛ nĕn ũ jagy ve to tar nÿtĭn kÿ tóg ve há tĭ, ĕg tÛ ti ki rā há han kÿ nÿtĭ ti. Kÿ tóg ĕg to vĭ há han ke mÛ, Cristo ti. Ēg tÛ tóg ũn mág han ke mÛ, ũn

tar, Jesus tÛ vĕnh kar mÛ vĕnh ven ke kurā ĕn kĀ.

⁸⁻⁹ Ti to há ājag nÿtĭ, ājag tÛ ti ve ja tÛ (hā) ra. Ti ki ge kÿ ājag nÿtĭ, ājag tÛ ti vĕg tÛ ra. Hā kÿ ājag tóg krenkren ke mÛ. Ājag krenkren ke ĕn hā tóg ājag mÛ sér pĕ tĭnh mÛ, sér gy ti tĭnh mÛ, ha vemnĭ. Ājag fe tóg mrin ke tāvĭ han ke mÛ, kurā ĕn kĀ, ha vemnĭ.

¹⁰⁻¹¹ Topĕ vĭ tó tĭ ag tóg vāsÿ tó ja nĭgtĭ, Topĕ tÛ ũri ĕg krenkren han mÛ tag ti. Topĕ kuprĭg vÿ ag kanhrān ja nĭ. Ag mÛ tóg Cristo tÛ ĕg jagfy jagtar jagy han ke kāmĕn ja nĭ. Kÿ tóg ag mÛ ti tÛ kar kÿ tÛ ũn mág jĕnh ke tó ja nĭ gé, ti tÛ ĕg jagfy vĕsÿrĕnh kar kÿ tÛ ũn mág nĭnh ke ti. Kÿ ag tóg tag ve sór ja nĭgtĭ, vāsÿ Topĕ vĭ tó tĭ ag. “Kurā tÛ hĕ kĀ kĕnh ke nĕ hÿn?” he ja ag tóg nĭgtĭ, Cristo jagtar ke to. “Ti tÛ hĕ ri kĕnh ke nĕ?” he ja ag tóg nĭgtĭ gé. Tag ve sór tāvĭ ja ag tóg nÿtĭgtĭ.

¹² Hā ra Topĕ tóg ag mÛ: “inh pi(jé) ājag hā mÛ tag ven ke mÛ;” he ja nĭ. “Ājag nón ke ag hā mÛ ke vĕ, ag hā ne ājag tÛ nĕn tó mÛ venh ke mÛ,” he ja tóg nĭ, Topĕ ti, vāsÿ ti vĭ tó tĭ ag mÛ. Ti tÛ ag mÛ ājag tó jan hā vĕ. Hā kÿ ājag tóg hur mĕ, ti mré ke ũ ag tÛ ājag mÛ Jesus kĀme sér kāmĕn kÿ. Topĕ kuprĭg vÿ ag tar han ja nĭ, Topĕ tÛ ag mÛ ā kuprĭg jĕnĕn kÿ, kanhkā tá, hā kÿ ag tóg ājag mÛ ti kāmĕn kāmÛ ja nĭ. Ha vé, Topĕ tÛ jĕnĕ jafā ag tÛ ki kanhrān há tóg tĭ, ājag tÛ ti kĀme mĕg mÛ tag ti, hā ra ag tóg ki kagtĭg nÿtĭ.

Ēg tÛ Topĕ vĭ ki króm kĀn ke

¹³ Hā kÿ Topĕ tÛ ĕg mÛ nĕn tó mÛ hā han sórnmĭ. Vĕnh ki ĕmĕmĭ, Jesus tÛ ĕg mÛ nĕn nĭm ke mÛ ĕn hā mĭ ĕkrén nĭ. Jesus tÛ vĕnh ven ke kurā ĕn kĀ ĕg tóg venh ke mÛ sir, ti tÛ ĕg mÛ nĕn nĭm ke mÛ ĕn ti.

¹⁴ Vāsÿ ājag tóg ājag tÛ nĕn to ĕn mÛ ĕn han ja nĭgtĭ, ājag tÛ Topĕ vĭ mĕ ja tÛ nÿtĭn kÿ. Ūri Topĕ vĭ hā ki króm nĭ, ājag tÛ vāsÿ nĕn han ja ĕn tovānh kĀn nĭ.

¹⁵ Topĕ jykre hā han nĭ, kÿ tóg vĕnh ven mÛ, ājag tÛ tÛ ti tÛ nÿtĭn ti. Ājag tÛ ti jykre hā han jé Topĕ tóg ājag kuprĕg. Há tāvĭ ti nĭ, Topĕ ti, kÿ ti jykre ri ke han nĭ.

¹⁶ Tag tó ja ti nĭ, ha mĕ: “ũn há pĕ vÿ tÛ inh nĭ, kÿ inh ri ke nÿtĭ sórnmĭ, vĕnh jykre há hā han kÿ nÿtĭmĭ,” he ja tóg nĭ, Topĕ ti.

17 Ëg tỹ Topẽ mré vēmén kỹ ãg tóg ti mỹ: “ãg jóg,” he tí. Hã kỹ ãg tóg ti kamẽg ke mũ, ti tỹ tỹ ãg jóg nĩn kỹ. Ha vé, ãg kar tỹ nén han mũ vég ti nĩgtĩ, kỹ tóg vènh kar jykre ki kanhró kar nĩ, Topẽ ti, kỹ tóg vènh kar jykre tónh ke mũ. Ver ãg tóg ù tỹ ti ki kagtĩg ag kãmĩ mũgtĩ. Ëg tỹ ag kãmĩ mũn kỹ ãg tóg Topẽ ví ki króm há han ke mũ.

18 Kaja e to tóg ãg kygjãm ja nĩ, ki kanhró ãgag tóg nỹtĩ. ãgag jo ke ag vỹ ãgag jo vènh jykre kórég han ja nĩgtĩ, ãgag tỹ ag nón han jé. Hã ra tóg kaja e to ãgag kygvãn ja nĩgtĩ, ãgag tỹ vènh jykre kórég ên han mũn tũ nĩ jé. Kaja e to tóg ãg kygjãm. Ouro to ke pijé'. Prata to ke pijé', ti kaja ên ti. Tũ' he jé tóg ke mũ, ouro mré prata ti.

19 Hã ra tóg ã kyvénh hã to ãg kygjãm, kỹ tóg tũ' he jãvãnh nĩ, ti kyvénh ti. Nén ù kaja kãfór kar ti nĩ, ti kyvénh ti. Ûn há tãví vỹ tỹ ti nĩ, ù tỹ ã kyvénh tỹ ãg kygjãm mũ ên ti, hã vỹ: Cristo, he mũ. Kygnẽ ja tũ pe ti nĩ. Kỹ tóg ovelha hã tãví ri ke nĩ, ti tỹ ãg jagfy ter kỹ.

20 Topẽ vỹ ti kuprẽg, ti tỹ ãg jagfy ter jé. ã tỹ nén ù kar han tũ ki tóg ti kuprẽg, vãsỹ. Hã ra tóg ùri ga kri mur ja nĩ, ãgag tỹ ti ví mẽ jé, kurã tỹ ãgno to hã.

21 Ti tugrĩn ãgag tóg Topẽ ki ge kỹ nỹtĩ. Ti rĩn mũn ja tóg nĩ, Topẽ ti, kỹ tóg ti tỹ ùn mág han ja nĩ gé, kanhkã tá. Kỹ Topẽ ki rã há han nĩ. ãgag krenkren han jé tóg ke mũ, ha vemnĩ.

22 Topẽ ví pẽ ki króm ãgag tóg tĩ, hã kỹ ãgag tóg jãnhkrig kỹ nỹtĩ ha, ùri. ãgag mré ke kar ag to ãgag tóg há tãví nỹtĩ gé. Kỹ jagnẽ to há nỹtĩ to tar nỹtĩmũ gé. Ón kỹ jagnẽ to há nỹtĩ tũg nĩ.

23 Topẽ vỹ ãgag han mũn, kỹ tóg ãg mur mũn ri ke nĩ. ã ví tỹ tóg ãg han mũn ja nĩ. Rĩr ti nĩ, ùn ví mũ ti, hã vỹ: Topẽ, he mũ. Tũ' henh ke tũ ti nĩ. Ti tỹ ãg han mũn kỹ tóg tỹ ãg panh pir nĩ, ùn ter ke tũ ên ti. Ëg panh ter mũ ên ri ke tũ ti nĩ.

24 Hã kỹ tag tóg rán kỹ nĩ, ha mẽ: “ẽprã ke ag vỹ re ri ke nỹtĩ, re fej sĩnvĩ ên ri ke. Hã ra tóg kãnhmar tóg tĩ, re ti, kỹ ti fej tóg kãgter kãn tĩ. Kỹ ẽprã ke ag tóg kãnhmar kãgter tĩ gé, re fej ri ke.

25 Jãvo Topẽ ví vỹ tũ' henh ke tũ pẽ nĩ,”

he tóg, Topẽ ví tỹ rán kỹ nĩ ki. Tag mẽ ãgag. Topẽ ví sër to ken hã vẽ.

2

Jesus tỹ pó há ri ke nĩ

1 Hã kỹ ãgag jykre kórég tovãnh kãn nĩ. Ón mũn tũg nĩ. Û lograr he mũn tũg nĩ. Û tũ to ên mũn tũg nĩ. Û to ví kónãn mũn tũg nĩ gé.

2 Nẽnẽ vỹ leite kron (ka)mẽ nĩgtĩ. Topẽ ví vỹ ãg mỹ gĩr sĩ pafa mũ ên ri ke nĩ. Kãnhmar vènh ví há ên mẽ mũn', mẽ mũn' hemnĩ. Kỹ ãgag tóg mog há han ke mũ, ãgag krenkren jé.

3 Hã kỹ tag tóg ti to rán kỹ nĩ, ha mẽ: “ki kanhrãn sĩ han ãgag tóg huri, ãgag Senhor tỹ tỹ ùn há tãví nĩn ki,” he ja tóg nĩ, Topẽ ví rá ki.

4 Ëgag Senhor to kãmũ jẽg. Pó ri ke ti nĩ, ìn han mũ ag tỹ pó fón mũ ên ri ke ti nĩ. Hã ra tóg rĩr jẽ, ãgag Senhor ti. Ag tỹ ti fón mũ ra tóg Topẽ mỹ há tãví nĩ, pó kar ag há kãfór.

5 Kỹ ãg tóg pó ri ke nỹtĩ gé. Kỹ Topẽ kuprĩg vỹ ãg tỹ Topẽ jo ìn ri ke han ke mũ, pó tỹ ìn ên ri ke. Kỹ ti tỹ ãgag mỹ nén han sór mũ ên to ti mỹ vènh nenh tũg nĩ, ti mỹ: “hej,” hemnĩ. Jesus Cristo vỹ ãgag tar han sór mũ, ãgag tỹ ti tũ ki rĩr há han jé. Vãsỹ Topẽ tũ ki rĩr tĩ ag tỹ ti mỹ nén ù kar pũn ja ên ri ke tóg nĩ sir, ãg tỹ Jesus tũ han kỹ. ãgag tỹ ti tũ ki rĩr há han kỹ tóg ti mỹ há tĩnh mũ.

6 Hã kỹ tag tóg rán kỹ nĩ, ha mẽ. “Pó há kuprẽg ình, kỹ sóg tỹ ìn nũna ri ke han, Sião tá. Û tỹ ti ki rã kỹ tóg venh ke mũ, Topẽ tỹ nén tó mũ ên ti,” he tóg, Topẽ ví rá ki.

7 ãgag hã to tóg rán kỹ nĩ, ti ví tag, ãgag tỹ ti ki ge kỹ nỹtĩn kỹ. Û tỹ ti kato vãsãnsãn mũ ag to tag tóg rán kỹ nĩ gé, ha mẽ. Ag to tóg: “pó tỹ ìn han jafã fón ag tóg, pó tỹ ìn han tĩ ag,” he mũ. “Ag mỹ tóg kórég ja nĩ, pó ên ti. Hã ra Topẽ tóg pó ên hã tỹ ìn nũna han mũ,” he tóg, Topẽ ví rá ki.

8 Kỹ tag tóg rán kỹ nĩ gé, ha mẽ. “Pó ên tỹ ag tóg krĩm ke tĩ. Pãró vẽ sir, pó ên ti, kỹ ag tóg pãró tỹ krĩm krĩm ke kỹ vár mũ sir,” he tóg mũ gé, Topẽ ví rá ki. Û tỹ Topẽ ví kri fi sór tũ ag hã vỹ tỹ krĩmkrĩm ke tĩ. Topẽ tỹ nén han hã vẽ gé.

9 ãgag hã kuprẽg tóg, Topẽ ti, ãgag tỹ tỹ pã'i mág nỹtĩ jé, ti tũ ki rĩr tĩ to, ãgag tỹ tỹ ti povo

nýtĩ jé, vyr mý. Ājag kuprēg tóg, Topē ti, ājag tỹ ti tỹ nén han mũ kāmén jé, ti jykre tar ti, ājag tỹ tỹ ti tũ nýtĩn kỹ. Vāsỹ ājag tóg kuty mĩ mũ ja nĩgtĩ, hã ra tóg ājag tatĩ kãtĩg, ājag tỹ ũri kurã mĩ mũ jé, ti tỹ ājag mý jēngrē nĩm kỹ.

¹⁰ Ājag pi(jé) vāsỹ tỹ ũ tũ ja nýtĩgtĩ'. Ũri ājag tóg tỹ Topē povo nýtĩ, ti tũ. Ājag pi(jé) vāsỹ Topē tỹ ājag jagãgtãn sór mũ tag mẽ ja nĩgtĩ'. Ũri tóg hã ra ājag jagãgtãn, Topē ti.

Jesus tỹ vēnh jykre pãno to ěg kygvãn

¹¹ Inh kanhkã', tag ki ěg tóg ěg mré ke tũ ag jamã mĩ mũgtĩ. ěg jamã pijé', ga tag ti'. Hã kỹ sóg ājag jyvēn mũ. Ājag tỹ nén ũ to én mũ ěn han sór tũg nĩ. Ājag kókén jé tóg ke mũ, kỹ ājag tóg ěg Senhor tovãnh sór ke mũ, ha vemnĩ.

¹² Jesus ki ge kỹ nýtĩ tũ ag kãmĩ ājag tóg nýtĩ, hã kỹ vēnh jykre há tãvĩ han nĩ. Ājag to ón sór ag tóg tĩ, ājag to ag tóg: “jykre pãno ag nýtĩ,” he sór tĩ. Kỹ vēnh kar tỹ ājag jykre há ve kỹ ag ón ěn tóg ve há tĩnh mũ. Ājag jykre há ve kỹ ag tóg: “Topē jykre vỹ há nĩ,” hēnh ke mũ, hēn ri ke mũn, Topē tỹ ag kutãn kỹ.

¹³ ěg Senhor to há ājag tóg nýtĩ. Ti to há nýtĩn kỹ ěprã ājag pã'i ag vĩ ki króm nĩ gé. Pã'i mág pē tỹ imperador ěn vĩ ki króm nĩ, vēnh kar ag mý tỹ ũn mág ěn vĩ ti.

¹⁴ Ti krēm pã'i ag vĩ ki króm nĩ gé, governador ag. Pã'i mág pē ěn tỹ vin mũ ag vē, governador ag, ag tỹ ũn jykre pãno ag vóg kónãn jé, ag tỹ ũn jykre há ag to vĩ há han jé gé.

¹⁵ Ũ tỹ ki kagtĩg ag vỹ ājag to vĩ kónãn tĩ. Kỹ nén ũ há tãvĩ hã han nĩ, kỹ ag tỹ ājag kato ne tónh ke vỹ tũ tĩnh mũ, ha vemnĩ. Tag vỹ há nĩ, Topē mý.

¹⁶ Cristo vỹ ěg kygvã, vēnh jykre pãno to. Kỹ vēnh jykre pãno han mãn sór tũg nĩ. To: “inh kava ti huri, Cristo ti, hã kỹ sóg jatun mý han ke mũ, isỹ nén to én mũ kar ti,” he tũg nĩ. Topē tũ vỹ tỹ ěg nýtĩ, kỹ ti jykre hã han nĩ. Hã jé tóg ěg kygvã, ěg tỹ tỹ ti tũ nýtĩ jé.

¹⁷ ěprã ke ũ to é he tũg nĩ. ěg mré Jesus ki ge kỹ nýtĩ ag kar to há nýtĩmĩ. Topē kamēg nĩ. ěprã ke tỹ pã'i mág tỹ imperador ěn kamēg nĩ gé.

Ěg tỹ Cristo ri kén jagtar nýtĩnh ke

¹⁸ Ājag kãmĩ ũ ag tóg patrão mý rãnhraj tĩ, fagrĩnh mý. Ājag patrão vỹ ki króm nĩ, ag kamēg nĩ. Ājag kãmĩ ũ patrão vỹ há nĩ, komēr hã tóg vỹ tĩ, ājag to jykren há han tóg tĩ. Ājag tỹ ti to há nýtĩn kỹ tóg há tĩ. Ājag kãmĩ ũ patrão tóg kórég nĩ. ěn to vỹ há han nĩ gé, ti kamēg nĩ gé.

¹⁹ Kejēn tóg fagrĩnh mý ājag to jũnh ke mũ, ājag patrão kórég ti. Ājag tỹ Topē jykre han sór mũ to tóg ājag to jũnh ke mũ. Ge ra ti to jũ tũg nĩ, kỹ Topē tóg ājag mý vỹ há han ke mũ.

²⁰ Kejēn ājag patrão tóg ājag tỹ kygnē to ājag mrãnmrãn tĩ. Tag vỹ tỹ nén ũ tũ nĩ. Ti tỹ ājag jykre há to ājag mrãnmrãn kỹ Topē tóg ājag mý vỹ há han ke mũ.

²¹ Hã jé Topē tóg ājag kuprēg.

Cristo vỹ ěg jagfy vēsýrēnh gé, mýr, ha mẽ. Ti vēsýrēnh tugrĩn ěg tóg ti kóm tar nýtĩnh mũ, ěg tỹ kejēn ti kóm jagtar nýtĩnh ken kỹ.

²² Nén ũ kórég han ja tũ ti nĩ. Ũ pi(jé) ti ón venh mũ', ti ón vãnh nĩn kỹ.

²³ Ag tỹ ti mý vỹ kónãn mũ ra tóg ag mý vỹ kónãn ja tũ nĩ. Ag tỹ ti vēsýrēnh han mũ ra tóg ag mý vỹ ja tũ nĩ gé. Topē hã mĩ tóg ěkrén ja nĩgtĩ. “Ti hã ne ag jykre tugnỹm ke mũ', inh jykre ti ke gé,” he ja ti nĩ. “Ti hã ne ag vóg kónãn ke mũ',” he ja ti nĩ, Cristo ti.

²⁴ Ha vé, Cristo vỹ ěg tỹ Topē vỹ mranh ja ěn kajãm ja nĩgtĩ, cruz to tóg ter ja nĩgtĩ. Hã tugrĩn ěg jykre si tóg tũ tĩ ha, ti tỹ ěg jykre si tỹ tũ' hēn kỹ. Vēnh jykre há hã han jé ěg tóg vēnh fēg kỹ nýtĩ. Ti vēsýrēnh tugrĩn ěg tóg tỹ ũn há nýtĩ.

²⁵ Vāsỹ ěg tóg vēnh mēg tỹ carneiro vãgfor ri ke nýtĩ ja nĩgtĩ. Hã ra tóg hur ěg tatĩn, ěg vãgfor ja ra, Jesus ti. Kỹ ěg tóg ti mré mũ mũ sir, carneiro fag tỹ pastor mré mũ ri ke. Ti hã ne ěg ki rĩr nĩ ha'.

3

Fag tỹ ag mré vēnh jykre há han ke

¹ Sỹ ũn týtã fag jyvēn hã vē, ha mẽ. Ājag mén vỹ han nĩ. Ājag kãmĩ ũ fag mén ag vỹ ver Topē ki rã sór ja tũ nĩ. Ge ra ti mré ti vỹ ki króm nĩ, ti tỹ tỹ ã mén nĩn kỹ. Ti tỹ ã jykre há ve kỹ tóg hēn ri ke mũn ti ki rã sór ke mũ, ã tỹ ti mý nén ũ tó tũ ra.

² Topě kaměg kŷ ti jykre hã han nĩ, ãjag jãnhkri nŷtĩ jé. Kŷ ãjag mén ag vŷ ãjag jykre há vènh ke mũ.

³ Vēsĩnvĩ han sór tũg nĩ, ãjag gãnh tŷ, pó sĩnvĩ kaja e tŷ ke gé, kur kaja e tŷ ke gé. Ěg tŷ vēsĩnvĩ han sór ke tũ vè.

⁴ Ājag jykre hã sĩnvĩ han nĩ, hã vŷ: koměr hã vĩ, he mũ, vĩ mág tũ, he mũ. Vènh jykre sĩnvĩ tag vŷ há nĩ, Topě mŷ, kŷ tóg tũ' henh ke tũ nĩ gé.

⁵ Gen kŷ fag tóg nŷtĩ ja nĩgtĩ gé, ěg mŷnh'mŷnh ve fag, Topě tũ fag, ũ tŷ Topě ve sór ja fag. Fag mén jykre hã mĩ fag tóg mũ ja nĩgtĩ,

⁶ Sara fi ke gé. Abraão jykre mĩ fi tóg tĩ ja nĩgtĩ, hã kŷ fi tóg ti to: “inh pã'i vè,” he ja nĩgtĩ. Kŷ vènh jykre há hã han nĩ. Ũ tŷ ãjag tŷ vènh jykre há han kaměg mũ ra ge ra han nĩ. Kŷ ãjag tóg tŷ Sara fi krē'krē fag ri ke nŷtĩ.

⁷ Kŷ sóg ag jyvèn sór mũ gé. Ājag prũ fag ki rĩr há han nĩ, ha mẽ. Fag pi(jé) ãjag tar ri ke nŷtĩ'. Hã ra Topě tóg fag mŷ rĩr krŷg ja tũ ěn nĩm ke mũ gé, ti tŷ ãjag mŷ rĩr krŷg ja tũ nĩm ěn ri ke. Ājag tŷ ãjag prũ fag ki rĩr há han kŷ ãjag tóg jatun mŷ Topě mré vēmén ke mũ.

Ěg tŷ kejèn Cristo jykre to jagtar ke

⁸ Vãhã sóg ãjag mŷ tag tó sór mũ, ha mẽ. Jagně mré vènh jykre pir han nĩ. Ũ fŷ kŷ ti mré fŷmnĩ, ũ mŷ sér tĩn kŷ ti mré mŷ sér nŷtĩmnĩ. Jagně to há tãvĩ nŷtĩmnĩ. Jagně mré koměr hã vĩmnĩ. Jagně kãfór han sór tũg nĩ.

⁹ Ũ tŷ ãjag mŷ nén ũ kórég han mũ ra ti mŷ nén ũ kórég han tũg nĩ. Ũ tŷ ãjag mŷ vĩ kónãn mũ ra ti mŷ vĩ kónãn tũg nĩ gé. Vènh kajãm sór tũg nĩ. Hŷ, vènh kar to Topě mŷ: “ag ve há han nĩ,” hemnĩ. Topě vŷ ãjag ve há han sór mũ, hã jé tóg ãjag kuprĕg.

¹⁰ Hã kŷ tag tóg rán kŷ nĩ, ha mẽ: “ãjag mŷ jatun mŷ nŷtĩ sór mũ', nén ũ kar tŷ ãjag mŷ sér tĩ jé'? Kŷ vĩ kónãn mãn tũg nĩ. Ón mãn tũg nĩ gé.

¹¹ Vènh jykre pãno han mãn tũg nĩ, vènh jykre há hã han nĩ, vènh kar krĩ tŷ kãnhvy' he sórmnĩ gé, tag hã to vãsãn nĩ, ti tŷ ãjag mŷ sér tĩ jé.

¹² Ěg Senhor vŷ ũ tŷ vènh jykre kuryj han mũ ag ki rĩr há han mũ. Ag tŷ ti mŷ nén ũ to

vĩn kŷ tóg ag vĩ mĕg mũ, Topě ti. Hã ra tóg ũ tŷ vènh jykre pãno han mũ kato tĕ tĩ, Topě ti,” he tóg, Topě vĩ rá ki.

¹³ Ũ vŷ ãjag mŷ nén ũ kórég han ke tũ nĩ, ãjag tŷ vènh kar mŷ nén ũ há han sór kŷ.

¹⁴ Kejĕn ãjag tóg hã ra vènh jykre há tigrĩn vēsŷrĕnh ke mũ, Topě vĩ tigrĩn. Kŷ mŷ sér jagy nŷtĩmnĩ. Ěprã ke ag kaměg tũg nĩ. Ag vĩ jĕmĕ sór tũg nĩ, ag tŷ ãjag tŷ ti tovãnh han sór mũ ra.

¹⁵ “Cristo vŷ tŷ inh pã'i nĩ, kŷ sóg ti hã kaměg nĩ,” hemnĩ. Tag hã mĩ ěkrĕn nĩ. Kejĕn ũ tóg ãjag mŷ: “ne to ke nĕ, hã vŷ: Cristo ki rã, he mũ?” he tĩ. Ěn mŷ kãmén kãn nĩ.

¹⁶ Ũ tŷ ge mŷ koměr hã vĩmnĩ. Topě vŷ vĕg nĩ nĩ, ãjag tŷ ti mŷ nén tó mũ ěn ti. Fe kavĕj nŷtĩ sór tũg nĩ. Kŷ ãjag tóg ũ tŷ Cristo jykre to vĩ kónãn sór mũ ag vĩ tŷ tũ' henh ke mũ, ha vemnĩ.

¹⁷ Kejĕn ãjag tóg vènh jykre há to jagtar ke mũ, Topě tŷ tag to jykren kŷ. Hã ra tóg há nĩ. Ājag tŷ vènh jykre kórég to jagtar nŷtĩn kŷ tóg kórég nĩ.

¹⁸ Cristo hã to jykren nĩ, ha mẽ. Ter ja tóg nĩ, ěprã ke ag tŷ Topě mŷ név(e) nŷtĩ tigrĩn. Ā ter pir ki tóg kajãm kãn. Jykre kuryj tóg nĩ, Jesus ti, hã ra tóg ũn jykre pãno ag jagfy ter ja nĩ. Ti tŷ Topě mŷ ěg tatĩn tũg sór vĕ. Tĩ tén ja ag tóg nĩ, hã ra Topě kuprĩg vŷ ti rĩn mãn.

¹⁹ Topě kuprĩg vŷ ti tar han, kŷ tóg vènh kuprĩg ag jamã ra vyr gé, ag mŷ Topě vĩ sér tó jé, vènh kuprĩg sigse kŷ nŷtĩ ag mŷ.

²⁰ Vãsŷ ag tóg ti vĩ mĕ sór ja tũ nŷtĩ, vènh kuprĩg sigse kŷ nŷtĩ ěn ag. Noé tŷ ga kri tũg kŷ, ti tŷ barco mág han mũ ěn kã ke ja vĕ. Ěn kã Topě tóg ver ag to fe nĩ ja nĩ, kŷ tóg ag vóg kónãn jãvãnh ja nĩ ver. Noé tŷ barco han kãn ja ra tóg ag vóg kónãn mũ sir, Topě ti. Kŷ ũ tŷ 8 (ke) ag tãvĩ vŷ krenkren mũ, barco ěn kãki. Goj var kŷ barco tóg kri tĩ nĩ, kŷ tóg ag krenkren han, barco ti.

²¹ Goj tŷ ãjag tóg kygpe kŷ nŷtĩ, ãjag krenkren jé. Barco tŷ goj kri tũg ri ken hã vĕ, hã vŷ: batismo, he mũ. Ājag mro pijé'. Vènh jykre to ken hã vĕ. Topě tŷ ěg tŷ ěg fe kavĕj tŷ jãnhkri han to ken hã vĕ. Ěg tŷ Topě mŷ vènh fĕg to ken hã vĕ, hã vŷ: batismo, he mũ. Topě vŷ Jesus Cristo rĩn mãn ja nĩ,

hã ky tóg ẽg krenkren han ke mũ gé.

²² Kanhkã tá tóg nĩ nĩ, Jesus ti, ky tóg Topẽ pẽgja tá nĩ nĩ. Tá tóg tỹ ùn mág nĩ, Topẽ tỹ jẽgnẽ jafã ag kri, ùn tar kar ag kri, ẽg tỹ kanhkã tá ùn vég tũ kar ẽn ag mré hã. Vẽnh kar kri ke vỹ tỹ ti nĩ, Jesus ti.

4

Vẽnh jykre tăg

¹ Ha vé, Cristo vỹ jagtar nĩ ja nĩ, vễsỹrénh ky. Ky tag to tar nỹtĩmnĩ gé, ajag tỹ ti kóm jagtar nỹtĩn ky. Tag vỹ ki hã ke mũ, ha mẽ: ù tỹ ẽprã jagtar ky tóg Topẽ vỹ mranh tũ nĩgtĩ.

² Hã ky ùri Topẽ vỹ hã han sórmnĩ, ti vỹ tovãnh tũg nĩ, ajag tỹ ga kri mũn ky. Ajag tỹ nén to ẽn mũ ẽn han sór tũg nĩ.

³ Vãsỹ ajag tóg ù tỹ Topẽ ki kagtĩg ag jykre han ja nĩgtĩ, prỹg tỹ hẽn ri ke ki, mỹr, ha mẽ. Ẽn kã ajag tóg ajag prũ tũ fag to ẽn (ka)mẽ han ja nĩgtĩ, ajag mén tũ ag to ke gé. Ajag tỹ nén to ẽn mũ ẽn han ajag tóg nĩgtĩ. Kronkron mũ ja ajag tóg nĩgtĩ, krĩ tũ ja ajag tóg nỹtĩgtĩ. Vẽnh mãn ky ajag tóg kronkron ky kãgter mũ ja nỹtĩgtĩ gé, vẽn kãggrá mỹ festa kórég ẽn han ja ajag tóg nĩgtĩ gé.

⁴ Ùri ajag tóg tag han mãn sór tũ nỹtĩ ha, hã ky tóg ag mỹ e tĩ, ù tỹ vẽn jykre kórég to tar nỹtĩ ag mỹ. Ag mỹ tóg e tĩ, ajag tỹ ag mré ag jykre pãno han mãn sór tũ nỹtĩn ky, ajag tỹ ag krĩ tũ jãvo krĩ há nỹtĩn ky. Hã ky ag tóg ajag to vỹ kónãn tĩ, ùri.

⁵ Hã ra Topẽ tóg ag jykre vég nĩ nĩ. Vẽn kar jykre tugnỹm ti tĩ mỹr, ky tóg ag mỹ ag jykre to: “tag vỹ há nĩ, ẽn vỹ kórég nĩ,” henh ke mũ, ùn rĩr mũ ag jykre to, ùn kãgter mũ ag jykre to ke gé.

⁶ ù tỹ hẽn ri ke ag tóg Jesus mur ke to hã kãgter ja nĩgtĩ. Ẽn ag mỹ tóg vẽn vỹ sér tónh vyr gé, Cristo ti, vẽn kuprĩg ag jamã ra, ag krenkren jé. Ag tỹ han ja to Topẽ tóg ag vóg kónãn, ag tỹ ajag tỹ ga kri mũgtĩ kã vẽn jykre han mũ ẽn to. Hã ra Topẽ tóg ag rĩnrĩn mãn sór ja nĩ gé, hã ky tóg ag kãgter mũ ra ag mỹ vẽn vỹ jẽnẽg mũ gé, ag tỹ kanhkã tá junjun jé.

⁷ Kakó ti tĩ ha, ga tag tỹ tũg' henh ke kurã ti. Vẽso jykren nĩ, krĩ há han nĩ, ajag tỹ Topẽ mré vẽn hã han jé.

⁸ Ky jagnẽ to há tãvĩ nỹtĩmnĩ. Tag to krónh ke tũg nĩ. Ẽg tỹ jagnẽ to há nỹtĩn ky ẽg tóg jagnẽ mỹ vẽn pãte fón ke mũ, ẽg tỹ Topẽ vỹ mranh mũ ti, ti e nỹtĩ hã ra.

⁹ ù tỹ kuvar há tá ajag to pasa ky ti mỹ: “inh mré jẽ,” hemnĩ. Tĩ to vỹ tũg nĩ, ti to mỹ sér nỹtĩmnĩ.

¹⁰ Ky, Topẽ vỹ ẽg tar han tĩ. ù tóg nén ù to tar nĩ, jãvo ù tóg nén ù ù to tar nĩgtĩ gé. Ẽn ki rĩrmnĩ, ajag tỹ nén ù to tar nỹtĩ ẽn hã ki rĩrmnĩ, vẽn kar tỹ ajag tugrĩn tar nỹtĩ jé. Ẽg tỹ Topẽ tỹ nén to ẽg tar han mũ ẽn ki rĩr há han ke vẽn, tag vỹ Topẽ mỹ há nĩ. Ẽg tar pẽ han ti tĩ, Tope ti.

¹¹ Ajag kãmĩ ù vẽnén ky Topẽ vỹ hã tỹ vẽnén nĩ. ù tóg Topẽ tũ ag ki rĩr tũgtĩ, kỹn jé Topẽ mỹ to vỹ, ti tỹ to ti tar han jé. Ajag tỹ ajag rãnrãj tag ki rĩr há han ky Jesus ki ge ky nỹtĩ kar ag vỹ Topẽ mỹ vỹ há han ke mũ. Jesus Cristo hã vỹ tỹ ùn mág nĩ, ti hã vỹ tar nĩ, ky tóg tũg' henh ke tũ pẽ nĩ. Amém.

Ag tỹ Jesus tugrĩn ẽg vóg kónãn ke

¹² Inh kanhkã', ajag to sóg há tãvĩ nĩ. Nén ù jagy pẽ vég ajag tóg mũ. Ge ti nỹgtĩ, ky to jykren tũg nĩ. Ẽg kar vỹ tag vég tĩ, Jesus tugrĩn.

¹³ Mỹ sér nỹtĩmnĩ. Ajag jagtar ky ajag tóg Cristo tỹ ẽg jagfy jagtar mũ ẽn ri ke vég tĩ. Ajag tỹ ti ri ke jagtar ky ajag tóg ti mré tỹ ùn mág nỹtĩnh ke mũ gé, ti tỹ tỹ ùn mág nĩnh ke kurã ẽn kã. Ẽn kã tóg ajag mỹ sér gy tĩnh mũ, ha vemnĩ.

¹⁴ Hỹ, tá tóg ajag mỹ sér tãvĩ tĩnh mũ, ag tỹ ùri ajag mỹ vỹ kónãn han mũ ra, ajag tỹ Cristo ki rã ky nỹtĩ tugrĩn. Ag tỹ ajag to vỹ kónãn tugrĩn ajag tóg ki kanhró nỹtĩnh ke mũ, Topẽ kuprĩg tỹ tỹ ajag jagrẽ nĩ ti. Tĩ kuprĩg vỹ ajag tỹ ùn mág han ke mũ, Topẽ tỹ tỹ ùn mág nĩ ẽn ri ke.

¹⁵ ù ag tóg ajag tỹ ù tén tugrĩn jagtar nỹtĩ, ajag tỹ ù tũ péju tugrĩn ke gé. Ky ù ag tóg ajag tỹ crime han tugrĩn jagãgtar nỹtĩ gé, ajag tỹ vẽn kar to vỹ tugrĩn ke gé. Ajag tỹ ag mré vẽn jykre pãno tugrĩn jagtar ky tóg Topẽ mỹ há tũ nĩ. Ajag tỹ ti vỹ mranh ke tũ vẽn vẽn.

¹⁶ Ajag tỹ hã ra Cristo tugrĩn jagtar ky tóg ti mỹ há tĩ. Tag to mỹ'ãg tũg nĩ. Tag to Topẽ

mỹ vĩ há han nĩ, ãjag tỹ tỹ Cristo mré ke nỹtĩn kỹ.

¹⁷ Topê vỹ vãnh kar jykre tugnỹm kãn ke mũ, kurã kakó ki. Hã ra tóg ù tỹ ti ki ge kỹ nỹtĩ ag jykre tugnỹm vén ke mũ. Ti tỹ ãg jykre tugnỹm kỹ ãg tóg nén ù jagy ve kren ke mũ. Kỹ ù tỹ ti ki ge tũ ag vỹ nén ù jagy pẽ ên ve kãn ke mũ, ha vemnĩ, ù tỹ ti vĩ kato tẽ mũ ag.

¹⁸ Hã kỹ tag tóg rán kỹ nĩ, ha mẽ: “ù tỹ Topê vĩ há han sór mũ ag vỹ ter kren ke mũ. Kỹ ù tỹ ti vĩ mranh tĩ ag vỹ kren ke tũ pẽ nĩ, ù tỹ ti kato tẽ mũ ag,” he ja tóg nĩ, Topê vĩ tỹ rán kỹ nĩ ki.

¹⁹ Topê tỹ ãg to: “tag vỹ ti jagy venh ke mũ,” hen kỹ ãg tóg venh ke mũ. Kỹ, ãg jagtar mũ ra ãg vãnh jykre há hã han kỹ nỹtĩnh ke mũ. ù tỹ ãg han mũ ên to jykrén jé ãg tóg ke mũ, Topê to. Ti pi(jé) ãg tovãnh ke mũ!. ãg mré tóg nĩ nĩ.

5

Pedro tỹ ãg jyvẽn

¹ Vãhã sóg ù tỹ Jesus ki ge kỹ nỹtĩ ag to pã'i ag jyvẽn sór mũ, ha mẽ. ãjag ri ke inh nĩ, isỹ tỹ ãjag kóm ù tỹ Jesus ki ge kỹ nỹtĩ ag to pã'i jẽn kỹ. Cristo jagtar ve ja inh nĩ gé hã ra. Ti vãnh ven mãn ke kurã ên kã sóg tỹ ùn mág jẽn h ke mũ gé.

² Kỹ sóg ãjag mỹ tag tó sór mũ, ha mẽ. ãjag krêm ke ag ki rĩr há han nĩ. ù tỹ carneiro ki rĩr tĩ ên tỹ ã mẽg ki rĩr há han tĩ ên ri ke han nĩ. Topê tỹ ãjag mỹ vãnh rãnrãj nĩm jan hã vẽ. ãjag rãnrãj tỹ ãjag mỹ sér tĩn kỹ tóg há tĩ. ãjag tỹ ãjag rãnrãj han sór tũ nĩn kỹ tóg ù tĩ. Kỹ ãjag ganho mĩ êkrén sór tũg nĩ gé. Topê tũ vẽ, ãjag rãnrãj ti, hã kỹ ki rĩr há han sór mĩnĩ.

³ Kỹ ãjag krêm ke ag ki rĩr mĩnĩ, ag mỹ komêr hã vĩmĩnĩ. Ag rĩnve vãnh jykre há hã han kỹ nỹtĩmĩnĩ, ag tỹ ãjag jykre há ve kỹ ãjag kóm han sór jé.

⁴ Kãnhmar ti kãtĩg mãn ke mũ, ãg pã'i mág ti, ãg ki rĩr tĩ ti. Kỹ tóg ãjag tỹ ùn mág han ke mũ. ãjag mỹ tóg krĩ tógfĩ ri ke vin ke mũ, ãjag tỹ tỹ ùn mág nỹtĩn kỹ, hã ra tóg kórég vãnh nĩ, ãg krĩ tógfĩ ên ti.

⁵ Kỹ sóg kyrũ ag jyvẽn sór mũ. ãjag mỹ sóg: “ùn sanh tỹ ãjag mỹ nén ù tó mũ ên han nĩ,” he sór mũ.

Kỹ sóg vãnh kar jyvẽn sór mũ gé. Vãnh kar mỹ sóg: “jagnẽ to é he tũg nĩ,” he mũ. “Jagnẽ ki rĩr há han nĩ, jagnẽ mỹ nén ù há kar han nĩ,” he sóg mũ. Tag vỹ rán kỹ nĩ, Topê vĩ rá ki, ha mẽ. “Topê vỹ ù tỹ jagnẽ to é he mũ ag kato tẽ tĩ. Hã ra tóg ù tỹ: “ùn sĩ vỹ tỹ inh nĩ,” he mũ ên to há nĩ,” he tóg, Topê vĩ rá ki. Hã kỹ vỹsỹ ùn mág han sór tũg nĩ.

⁶ Topê vỹ tar nĩ, kỹ tóg kejẽn ãg mỹ nén ù jagy jẽnẽg tĩ. Ti kato tẽ tũg nĩ hã ra, ti tovãnh sór tũg nĩ gé. Kỹ tóg ã kurã ki ãjag tỹ ùn mág han mãn ke mũ, ha vemnĩ.

⁷ ãjag krĩ kufy nĩn kỹ ti hã mỹ tómnĩ, kỹ tóg ãjag mỹ ãjag krĩ kuprãg ke mũ. Ti hã vỹ ãg ki rĩr nĩgtĩ.

⁸ Vãnh ki rĩr mĩnĩ. Nũr ri ke han tũg nĩ. Ha vé, ãg kato vãsãn tĩ ên, Japo ên tóg ãg to vãjig tĩgtĩ. Mĩg kókĩr ri ke ti nĩ, ti tỹ ãg mãn sór kỹ.

⁹ Hã kỹ ti kato vãsãnsãn nĩ, Jesus Cristo ki rã tovãnh tũg nĩ gé, ù tỹ ãjag tỹ ti tovãnh han sór mũ ra. Ha vé, ãg kanhkã kar ag vỹ jagtar tĩ, ãjag kóm, ga kri ke kar ag. Ag mĩ êkrén kỹ tar nỹtĩmĩnĩ.

¹⁰ Kurã pipir ki ãjag tóg jagtar tĩ. Kar kỹ Topê vỹ ãjag tỹ ùn há tãvĩ han ke mũ, ãjag tỹ kygnẽ mãn tũg jé. Ti hã vỹ ãg tar han tĩ, ãg tỹ ti to krónh ke tũ nĩ jé. Ti hã vỹ ãjag tỹ ùn há han ke mũ gé, kỹ ãjag tóg ti tovãnh ke tũ pẽ nĩ. ãg to há pẽ ti nĩ, Topê ti. ãg kuprẽg tóg mỹr, ãg tỹ Cristo tugrĩn kanhkã ve jé, êmã sĩnvĩ pẽ ên ti, ù tũg vãnh ên ti.

¹¹ Topê hã vỹ ã pir mỹ tar nĩ'. Ti hã vỹ tũ' henh ke tũ nĩ'. Amém.

Pedro tỹ ag mĩ êkrén

¹² Tó sĩ han sóg ãjag mỹ, kỹ Silas tóg inh mỹ ãjag mỹ rán mũ, inh vĩ ti. ãg kanhkã vỹ tỹ ti nĩ, Silas ti, Jesus tovãnh jãvãnh ti nĩgtĩ, kỹ tóg iso há nĩ gé. Isỹ ãjag tar han sór vẽ, hã kỹ sóg ãjag mỹ inh vĩ jẽnẽg mũ. Sỹ ãjag mỹ: “Topê vỹ ãg tar han ke mũ mỹr,” he mũ gé. Ti to krónh ke tũg nĩ.

¹³ Cidade tỹ Babilônia tá ãg nỹtĩ, kỹ tag ki ù tỹ ãjag mré Jesus ki ge kỹ nỹtĩ ag vỹ ãjag mĩ êkrég tĩ. ãjag mré tóg ãg kuprẽg, Topê ti. Kỹ inh kósin tỹ Marcos vỹ ãjag mĩ êkrég tĩ gé.

¹⁴ Jagnẽ ki nhun ke ri ke han nĩ, jagnẽ nĩgé kãgmĩ kỹ, ãjag tỹ tỹ jagnẽ mré ke nỹtĩn kỹ.

Cristo mré ke vỹ tỹ ãjag nỹtĩ. Topě jé ãjag
krĩ tỹ kãnhvy' hé. Hã vễ.

PEDRO TỸ CARTA HAN MÃN

¹ Simão Pedro tỹ ãjag mỹ carta rán hã vë. Jesus Cristo tỹ inh fë vë, sỹ ti rãnrãj han jé, sỹ tỹ ti apóstolo jë jé. Isỹ ù tỹ inh mré Jesus Cristo ki ge ký nỹtĩ kar ag mỹ rán hã vë. Topë vỹ ãg kuprëg, ùn jykre kuryj ên vỹ ãg kuprëg, ãg tỹ ãg krenkren han mũ tỹ Jesus Cristo ki ge jé. Nén ù sér vë, ti ki ge mũ ti.

² ãjag to sóg Topë mré vỹ tĩ, ãjag tỹ ãg Senhor tỹ Jesus Cristo ki kanhrãn há han jé, Topë ki ke gé, ãjag tỹ komër hã ti ki kanhrãn kãn jé. Ký tóg ãjag tar han ke mũ. Ký tóg ãjag krĩ tỹ kãnhvy' henh ke mũ gé.

Topë tỹ ãg kuprëg

³ Topë ki kanhró ãg tóg nỹtĩ. ãg kuprëg tóg, ti tỹ ãg tar han jé, ti tar nĩ ên ri ke. Ký tóg ãg tỹ ùn mág han ke mũ gé, ti tỹ tỹ ùn mág nĩ ên ri ke. ãg tỹ tag ki kanhró há han ký ãg tóg ti to tar nỹtĩ, ãg tỹ ti jykre jagma mũ há han jé.

⁴ Ký Topë tóg ãg mỹ nén ù há tó ja nĩgtĩ gé. ù tóg ãg mỹ vënh vỹ há tỹ ge tónh ke tũ nĩ. Topë tỹ ãg mỹ vỹ há han ri ke venh ke tũ ãg tóg nĩ. Tag tó ti ãg mỹ, ha mẽ. ãprã ke kar vỹ nũgme ki vár ke mũ, ãjag tỹ nén to ên mũ ên han tugrĩn. Ag jãvo ãg tóg krenkren ke mũ, ký ãg tóg Topë ri ke nỹtĩnh ke mũ, mỹr, ha mẽ.

⁵ Hã ký vãsãn, ãjag tỹ ti ki rã to tar nỹtĩ jé, ãjag tỹ ti ki rã tugrĩn vënh jykre há hã han jé. Vënh jykre há han ký vënh kanhrãn ký mũmĩ gé.

⁶ Vënh kanhrãn ký mũ ký vëso jykren nĩ gé. Vëso jykren ký ti tovãnh tũg nĩ gé. Ti tovãnh tũ nĩnh ký ti jykre hã mũ mũmĩ gé.

⁷ Ti jykre hã mũ mũn ký jagnë to há tãvĩ nỹtĩmĩ gé, ãg kanhkã kar ag to. ãg kanhkã to há nỹtĩnh ký ãprã ke kar ag to há nỹtĩmĩ gé.

⁸ ãjag tỹ tag han kãn ký tóg há tĩ. Ký ãjag tóg ãg Senhor tỹ Jesus Cristo ki kanhrãn há han ke mũ gé, ký ãjag tóg vënh jykre há to krónh ke tũ nĩ gé. Ký ãjag tóg komër hã ti ki kanhrãn kãn ke mũ, ha vemnĩ.

⁹ ù tỹ vënh jykre há han sór tũ nĩnh ký tóg ùn kyvó ri ke nĩ, ùn êvãnh kórég, ùn kutu ri ke ti nĩ sir. Ên vỹ ãg Senhor ki kagtĩg nĩ. Vãsỹ Topë vỹ ti kykũnh ja nĩ, ti tỹ Topë vỹ mranh ja ên to. Hã ra tóg kã jatun ký nĩ ha, hã ký tóg ti kórég han mãn sór mũ.

¹⁰ Inh kanhkã', Topë vỹ ãjag kuprëg. Ký vãsãnsãn, vënh kar tỹ ãjag jykre há tugrĩn ki kanhró nỹtĩ jé, ti tỹ ãjag kuprëg mũ ên ti. Ký ãjag tóg tỹ prãnh kenh ke tũ nĩ, ha vemnĩ.

¹¹ Kanhkã ve jé ãjag tóg ke mũ, ha vemnĩ, ãg Senhor tỹ Jesus Cristo tũ ti, ãg krenkren han tĩ ên tũ ti. Tũ' henh ke tũ ti nĩ, ti tỹ tá tỹ ùn mág nĩ ti.

¹² Hã ký sóg ãjag mỹ tó mãn', tó mãn' he mũ. Ki kanhró ãjag tóg nỹtĩ, vënh vỹ há to tar ãjag tóg nỹtĩ, ãjag tỹ mäg mũ ên to.

¹³ Ge ra sóg ãjag jyvën mãn sór mũ, ãjag tỹ kã jatu tũ nỹtĩ jé. Isỹ ãjag mré nĩ mũ ên kã sóg ãjag mỹ tag tó, ãjag jyvën mág inh. Ký kã jatun nỹtĩ tũg nĩ.

¹⁴ Ha vé, kãnhmar sóg iser ký inh fãr tovãnh ký tũg ke mũ, ki kanhró sóg nĩ. ãg Senhor tỹ Jesus Cristo vỹ inh mỹ isỹ kãnhmar tũg ke ti tó.

¹⁵ Hã ký sóg vënh rán tag to fũrũn mũ, ãjag tỹ iser kar ký kã jatun tũ nỹtĩ jé.

Pedro tỹ Jesus ve ja

¹⁶ Ha vé, inh pi(jé) ãjag mỹ ón mũ', isỹ ãjag mỹ ãg Senhor tỹ Jesus Cristo kãtĩg vén mũ ên tón ký, isỹ ti jykre tar tón ký. Ti ve inh, sỹ ãjag mỹ nén tó mũ ti. Ti ve inh, ti tỹ tỹ ùn mág pë nĩ ti.

¹⁷⁻¹⁸ Ti jóg tỹ Topë vỹ ti tỹ ùn mág han. Ti tỹ tóg ùn tar han gé. ãg tỹ Jesus mré pãnónh kri nỹtĩ ên kã ãg tóg kanhkã tá vënh vỹ ên mäg mũ, ãprã nỹtĩnh ký. Ký tóg ti to tag tó, ù tỹ vënh kar kri ke ên ti, Topë ti, ha mẽ. “Inh kósĩn pir hã vë,” he ja tóg nĩ, Topë ti, Jesus to. “Inh fe pë vë,” he ja tóg nĩ. Topë tỹ pãnónh ki kãtére mũ ên kri ke ja vë. Ên tá sóg Jesus tỹ tỹ ùn mág jë vé.

¹⁹ Hã ký ãg tóg ù tỹ vãsỹ Topë vỹ tó tĩ ag vỹ kri fig mũ, tovãnh tũ ãg nỹtĩ. Kri nĩmĩ gé, ãjag. Lampião grug ri ke ti nĩ ãg mỹ, ag vỹ ti. Lampião grug vỹ ãg mỹ kuty tá jëngrë han ti. Kurã ke kãtã ãg tóg lampião grug ve mãn sór tũ nĩgtĩ. Kurã ke kãtã krĩg mág hã vỹ ãg

fe tỹ mrin ke tĩ. Jesus to ken hã vễ, hã vỹ: krĩg mág, he mũ.

²⁰ Kỹ, ãjag tỹ Topẽ vĩ rá to ken kỹ tag to jykrén nĩ, ha mẽ: ãg pi(jé) vễsóg ki to jykrén ke mũ', Topẽ vĩ rá to', Topẽ tỹ ã vĩ tó tĩ ag mỹ nén tó mũ ãn to'. Topẽ hã ne to ãg krĩn ke mũ'.

²¹ Kỹ Topẽ vĩ tó tĩ ag pi(jé) vễsóg ki ãjag krĩ ki to jykrén kỹ rán ja nĩgtĩ gé'. Topẽ kuprĩg tỹ ãjag krĩn mũ ãn hã rán ja ag tóg nĩgtĩ, hã kỹ tóg tỹ Topẽ vĩ nĩ, vễnh rán ki.

2

Ón kỹ Topẽ vĩ tó tĩ ag

¹ Hã ra ù ag tóg ón kỹ Topẽ vĩ tó ja nĩgtĩ gé, vãsỹ, Israel ù ag. Tag ve jé ãjag tóg ke mũ gé. Û ag tóg ón kỹ ãjag mỹ Topẽ vĩ kãmén sór ke mũ, ha vemnĩ. Æn ag vỹ vỹ ón kỹ ãjag mỹ mẽ há tĩ mẽ tĩnh ke mũ, hã ra tóg ãjag kókén ke mũ. Æg Senhor tovãnh jé ag tóg ke mũ, ù tỹ ãg kygjãm ja ãn ti. Hã ra Topẽ vỹ vãhã ag tỹ tũ' henh ke mũ.

² Ge ra ù tỹ hẽn ri ke ag tóg ag jykre pãno han ke mũ, ag mré. Kỹ ù tỹ ag mré vễnh jykre pãno han mũ ãn ag tugrĩn Topẽ jykre kato vĩ vĩ henh ke vễ, tag tỹ mẽ há' henh ke vễ sir, ti tỹ ki hã tó mũ ra.

³ Ag tỹ jãnkamy mág ve sór vễ, hã kỹ ag tóg ón kỹ vễme sĩnvĩ tó sór mũ, ag tỹ ãjag lograr he jé. Hã ra ù tỹ ag vóg kónãn ke mũ ãn tóg ag vég tĩ. Ag tỹ tũ' he jé tóg ke mũ, kãnhmar, ha vemnĩ.

⁴ Topẽ tỹ jẽgnẽ jafã ù ag vỹ Topẽ vĩ mranh. Æn ag vóg kónãn tóg huri, Topẽ ti. Ag pi(jé) krenkren'. Nũgme ki tóg hur ag vãm, Topẽ ti. Tá ag tóg sigse kỹ nỹtĩ, ferro tỹ corrente tỹ. Tá tóg kuty nỹ. Tá ag tóg Topẽ tỹ vễnh kar jykre tugnỹm ke kurã ãn jãvãnh nỹtĩ.

⁵ Kỹ Noé mré ke ag vỹ nỹtĩgtĩ gé. Topẽ vỹ ag vóg kónãn ja nĩ gé. Goj var tỹ tóg ù tỹ ti vĩ mranh mũ ag tỹ tũ' he kãn. Ag pi(jé) krenkren'. Û tỹ 8 (ke) ag tãvĩ vỹ krenkren, ãn kã, hã vỹ: Noé, he mũ, ù tỹ vễnh kar mỹ: “Topẽ vĩ kri fimnĩ,” he mũ ãn ti, kar kỹ ti mré ke tỹ 7 (ke) ãn ag ke gé. Ti mré ga kri mũ ù ag vỹ tũ' he kãn.

⁶ Topẽ vỹ cidade tỹ Sodoma tá ke ag, cidade tỹ Gomorra tá ke ag vóg kónãn ja (tóg) nĩgtĩ gé, kỹ cidade ãn tá ãn tóg kugpũr kãn ja nĩ. Æg tỹ tag ve kỹ ãg tóg Topẽ tỹ ùn

jykre pãno ag vóg kónãn ke ãn ki kanhró nỹtĩ gé.

⁷ Cidade ãn tá ùn pir vỹ kren, hã vỹ: Ló, he mũ. Æn vỹ jykre há nĩ ja nĩgtĩ, kỹ ti mré ke ag jykre kórég vỹ ti mỹ e nĩ ja nĩgtĩ, tag to tóg krĩ kufy han ja nĩgtĩ.

⁸ Kurã kar ki tóg ag kãmĩ ag jykre pãno ve ja nĩgtĩ, kỹ ti krĩ tóg kufy jagy nĩ ja nĩgtĩ, ti tỹ ag jykre kórég ve kỹ, ag vỹ kórég ke gé. Æn vỹ ã pir mỹ kren, Ló ti.

⁹ Û tỹ Topẽ to: “ùn mág vỹ tỹ ti nĩ,” he mũ ag krenkren han ki kanhró tóg nĩ, Topẽ ti. Hã ra tóg ù tỹ vễnh jykre pãno han mũ ag vóg kónãn ke mũ, ti tỹ vễnh kar jykre tugnỹm ke kurã ãn kã.

¹⁰ Û ag vóg kónãn mág pẽ han jé tóg ke mũ, Topẽ ti, hã vỹ: ù tỹ ãjag tỹ nén to énn mũ han tĩ ãn ag, he mũ, ùn vễnh kavénh tĩ ag, he mũ, ù tỹ: “Topẽ pi(jé) tỹ ãg Senhor nĩ,” he mũ ãn ag, he mũ.

Ón kỹ Topẽ vĩ tó tĩ tag ag vỹ ãg vỹ kafãn tĩ. “Inh hã tóg ki kanhró nĩ,” he ag tóg tĩ. Kỹ ag tóg kanhkã tãn ag kamẽg vãnh nỹtĩ gé. Ag to ag tóg vĩ kónãn tĩ, kanhkã tãn ag to, ón kỹ Topẽ vĩ tó tĩ ag.

¹¹ Topẽ tỹ jẽgnẽ jafã ag vỹ tag han tũ nĩgtĩ, ha mẽ. Kanhkã tãn ag to ag tóg vĩ kónãn tũ nĩgtĩ, Topẽ rĩnve, Topẽ tỹ jẽgnẽ jafã ag. Ag tỹ ù tỹ ón kỹ Topẽ vĩ tó tĩ ag tar kãfór nỹtĩ ra ag tóg kanhkã tãn ag to vĩ tũ nĩgtĩ.

¹² Ag jãvo ù tỹ ón kỹ Topẽ vĩ tó tĩ ãn ag vỹ krĩ tũ nỹtĩ, vãnh kãmĩ sẽ ag jykre tũ ri ke ag nỹtĩ. Vãnh kãmĩ tóg tĩgtĩ, sẽ ti, ãg tỹ ti to vãjig kỹ ti tén jé. Hã jé tóg mur tĩ. Tag ri ke ag nỹtĩ, ù tỹ ón kỹ Topẽ vĩ tó tĩ ag. ãjag tỹ kanhkã tãn ag ki kagtĩg nỹtĩn kỹ ag tóg ag to vĩ kónãn tĩ. Hã kỹ Topẽ tóg ag tỹ tũ' henh ke mũ, ãg tỹ sẽ tén tĩ ãn ri ke.

¹³ Ag tỹ ãjag jykre pãno kajãm hã vễ. Kurã ki ag tóg ag tỹ nén to énn mũ ãn han tĩ, mỹr, ha mẽ. Kỹ ag tóg ãjag mré jẽg tĩ gé, ãjag tỹ festa han kỹ. Ha ra ag tóg nén tỹ ãg mỹ'a han tĩ ãn hã han tĩ, ag tỹ ãjag mré jẽn kỹ. ãjag kavénh ag tóg tĩ. Jykre régre ag nỹtĩ, ón kỹ ag há nĩ ve nỹtĩ.

¹⁴ Ûn tỹtã fag kar to énn ag tóg tĩ, fag ki ãvãnh kỹ. Topẽ vĩ mranh sór ag tóg tĩ, ti vỹ mranh to ag tóg krónh ke tũ nĩgtĩ. Ûn krój ag krĩn kónãn ag tóg tĩ, ag tỹ ag mré mranh

jé. Ag topê vỹ tỹ jãnkamy nĩ. Topê vỹ ag vóg kónãh ke mũ, ha vemnĩ.

¹⁵ Topê japry ti, ti jamĩn ti tovãnh ag tóg, vãgfor kỹ ag nỹtĩ. Beor kósin tỹ Balaão ên ri ke han ag tóg tĩ. Ên vỹ jãnkamy to há tãvĩ nĩ ja nĩgtĩ. Hã kỹ tóg ã jykre kórég ên to jãnkamy ve sór mág ja nĩ.

¹⁶ Hã ra Topê tóg ti mỹ vỹ tar han, ti tỹ ti vỹ mranh kỹ. Hã kỹ ti mēg fi tóg ã vỹ vãnh ra ti mỹ vỹ ja nĩgtĩ, êg tỹ jagnē mrē vēmén ri ke han ja fi tóg nĩgtĩ, ti mēg fi. Ti mỹ vỹ kỹ fi tóg ti tỹ vēnh jykre kórég han ke mũ ra tỹ tũ' he mũ, ti mỹ, ù tỹ Topê vỹ tó tĩ ên mỹ, ti tỹ ón kỹ Topê vỹ tó tĩ sór mũ ên kã.

¹⁷ Ón kỹ Topê vỹ tó tĩ ag vỹ goj nĩhỹg ja ki goj tũ ên ri ke nỹtĩ. Kanhkã góg ri ke ag tóg nỹtĩ gé, kãka tỹ vėjo kanhkã góg ag vóg kỹ tỹ tũ' he ên ri ke ag nỹtĩ, ù tỹ ón kỹ Topê vỹ tó tĩ ag. Topê vỹ kuty tãvĩ tá ag vin han ke mũ.

¹⁸ “Ún mág vỹ tỹ inh nĩ,” he ag tóg tĩ, ón kỹ. Krĩ tũ ag nỹtĩ. Nén ù vēnhmỹ kar to én ag tóg tĩ, nén ù tỹ êg kavénh tĩ ên to én ag tóg tĩ. Vēnh jykre pãno han kỹ ag tóg ù tỹ ùri Topê ki ge sór mũ ag krĩn kónãh tĩ, ù tỹ ùri êg tỹ kygnē kỹ han tĩ ên tovãnh sór mũ ag.

¹⁹ “Jatun mỹ êg tóg êg tỹ nén han sór mũ ên han kãn ke mũ,” he ag tóg tĩ, ón kỹ. “Topê vỹ êg to jũnh ke tũ nĩ,” he ag tóg tĩ, ón kỹ. Hã ra ag tóg êprã vēnh jykre hã mĩ mũgtĩ, nén tỹ êg kavénh tĩ ên hã han ag tóg tĩ. Kỹ tóg tỹ ag jagrē nĩ, êprã vēnh jykre ti. Êg tỹ nén ù tovãnh sór mũ ra tovãnh ki kagtĩg nỹtĩ ên vỹ tỹ êg jagrē nĩ sir, mỹr, ha mē.

²⁰ Êg Senhor tỹ Jesus Cristoki kanhró ja ag tóg nỹtĩ vē, êg kren han mũ ên ti. Ti tugrĩn ag tóg êprã vēnh jykre kavéj kar tovãnh ja nĩgtĩ vē, êg tỹ nén tugrĩn ter ke mũ tovãnh ja ag tóg nĩgtĩ vē. Hã ra ag tóg ãjag tỹ nén tovãnh mũ ên han mãn mũ, kỹ tóg tỹ ag jagrē nĩ mãn mũ sir. Kỹ tóg ùri kórég kãfór nĩ, ag mỹ.

²¹ Ag tỹ Topê japry ên, ti jamĩn ên sãn ja tũ nĩ ra tóg há tĩ vē. Hã ra ag tóg ti sãn sĩ han kar kỹ kyrãgrã mũ. Topê tỹ ag mỹ vēnh vỹ há jēnēg mũ ên tovãnh ag tóg.

²² Ag to êg tóg tag tó tĩ, ha mē: “cachorro vỹ ã tũgtũv ên ko mãn tĩ,” he êg tóg tĩ. “Porco tóg ã vēnh kype há han kỹ jē ra óré mĩ vēsĩn mãn tĩ, kỹ tóg vēnh kavénh mãn tĩ,” he êg tóg

tĩ gé. Û tỹ vēnh jykre kórég tovãnh kar kỹ han mãn tĩ ag to ken hã vē.

3

Jesus kãtĩg mãn

¹ Inh kanhkã', ãjag to sóg há tãvĩ nĩ. ãjag mỹ sóg vēnh rá ù han huri, kỹ sóg ãjag mỹ rán mãn mũ ha. Inh vēnh rá kar ki sóg ãjag jyvēn tĩ, ãjag tỹ nén jãnhkri hã to jykren kỹ nỹtĩ jé, ãjag tỹ tag kã jatu nỹtĩ tũ nĩ jé.

² Topê vỹ tó tĩ ag vỹ vãsỹ Topê vỹ tó ja nĩgtĩ. Ên mĩ êkren nĩ. Kỹ apóstolo ag vỹ ãjag mỹ tó ja nĩgtĩ gé, êg Senhor tỹ nén to êg jyvēn mũ ti, êg kren han tĩ ên vỹ ti. Ên mĩ êkren nĩ gé.

³⁻⁴ Tag to jykren nĩ, ha mē. Kurã tỹ êgno to hã êprã ke ù ag vỹ ãjag to é henh ke mũ, ha vemnĩ. “Ti mỹ kãtĩg mãn mũ vỹ?” he jé ag tóg ke mũ. “Ti tỹ vãsỹ kãtĩg mãn ke vē vē, hã ra êg jo ke ag vỹ vãsỹ tũg, ti tỹ ã kãtĩg mãn ke tó mũ ra ag tóg kãgter. Kãtĩg ke tũ ti nĩ. Ga vỹ nĩnh mũ, tũ' henh ke tũ ti nĩ, ga ti, ha vemnĩ,” he jé ag tóg ke mũ, êg to é he kỹ, ha vemnĩ. Ûn jykre kórég ag vē, ù tỹ tag tó mũ ag. ãjag tỹ nén to én mũ ên hã han ag tóg tĩ.

⁵ Topê tỹ vãsỹ nén han mũ ên ki kagtĩg ag tóg nỹtĩgtĩ, ag tỹ ki kanhrãn sór tũ nỹtĩn kỹ. Topê tỹ vãsỹ nén han jan hã vē, ha mē. Kanhkã han tóg, vãsỹ, ga ti ke gé. ã vỹ tỹ tóg nén kar hyn han ja nĩgtĩ, Topê ti. Ga ên vỹ goj tỹ vēnh kãpãm kỹ nỹ ja nĩ, kỹ ù tóg goj kri nỹ ja nĩ gé.

⁶ Ga ên kri ke kar ag vỹ hur tũg, goj tỹ, goj var mũ ên tỹ.

⁷ Kỹ êg tỹ ùri nén vég mũ tag vỹ tũ' henh ke mũ gé, ha vemnĩ. Topê vỹ ti tỹ tũ' henh ke to kurã nĩm huri, kỹ tóg pĩ tỹ ti tỹ tũ' henh ke mũ, Topê tỹ: “tág’,” hen kỹ. Kurã ên kã Topê vỹ ù tỹ ti vỹ mranh mũ ag tỹ tũ' he kãn ke mũ gé. Ag vóg kónãh ke kurã vē sir.

⁸ Inh kanhkã', tag to jykren nĩ, ha mē. Topê kurã vỹ êg kurã ri ke tũ nĩ. Kurã pir vỹ ti mỹ prỹg tỹ mil (ke) ri ke nĩ, kỹ prỹg tỹ mil (ke) vỹ ti mỹ kurã pir ri ke nỹtĩ gé.

⁹ Kỹ tóg ã tỹ êg mỹ nén tó mũ ên tovãnh ke tũ nĩ, Topê ti. Û tóg: “han sór tũ ti nĩ, hã kỹ êg tóg vég tũ nĩgtĩ,” he tĩ, ón kỹ. Hã ra ag tóg hã tũ tó tĩ. Ti tỹ ver êg to fe nĩ vē, hã kỹ tóg kãtĩg vãnh han. Ti pi(jé) êg kãmĩ ù tỹ nũgme ki kutē mũ ve sór mũ'. Hã kỹ tóg ver êg mỹ

kurã ù nĩm mãn', kurã ù nĩm mãn' he mũ, kÿ vãnh kar jé ãjag jykre kórég tovãnh, ag krenkren jé.

¹⁰ Hã ra tóg kãtĩg mãn ke mũ, ha vemnĩ. Vãhã tóg kãtĩg ke mũ, kÿ tóg ù tÿ ãg tũ péju(g) tĩ tÿ ãg vatánh tá kãtĩg ri ke nĩnh ke mũ. Ën kã kanhkã tóg tov kÿ kréj ke kÿ văr ke mũ. Kanhkã tá nén kar vÿ jonh ke kãn ke mũ gé, krĩg kar ag, pĩ ãn tÿ ag tÿ kréj ken kÿ. Kÿ vãhã ga vÿ tũ' henh ke mũ, ga kri ke kar ag ke gé.

¹¹ Ge kÿ nén (ũ) kar vÿ tũ' henh ke mũ. Hã mĩ êkren kÿ vãnh kãn sórmnĩ. Topẽ tÿ ãg mÿ nén tó mũ ãn hã han nĩ. Topẽ mÿ vãnh vin nĩ.

¹² Topẽ kurã ãn jãvãnh nĩ, Topẽ rãnrãj to vãsãnsãn nĩ, ti kurã ãn tÿ kãnhmar tá krÿg jé. Kurã ãn kã kanhkã vÿ pũr ke mũ, kÿ kanhkã tá nén kar vÿ jonh ke kãn ke mũ gé, krĩg kar ag.

¹³ Topẽ vÿ ã tÿ ãg mÿ nén tó mũ ãn han kãn ke mũ. Kanhkã tãg han jé tóg ke mũ, ga tãg ke gé. Tá tóg vãnh jykre kuryj tãvĩ nĩ. Ëg tÿ ga tãg tag, kanhkã tãg tag venh ha pẽ tóg tĩ.

¹⁴ Inh kanhkã', ãjag to sóg há tãvĩ nĩ. Topẽ kurã tag jãvãnh kÿ ãjag tóg nÿtĩ. Kÿ vãsãnsãn nĩ, ãjag tÿ kygnẽ tũg jé. Vãsãnsãn nĩ, ãjag tÿ Topẽ mÿ jãnhkri nÿtĩ jé, ãjag tÿ ti há ri ke nÿtĩ jé. Kÿ ãjag tóg ti kato vãsãnsãn tũ nĩ.

¹⁵ Ha vé, ti tÿ ver ãg to fe nĩn hã kÿ ãg tóg ãg jykre kórég tovãnh kÿ krenkren ke mũ. Tag rán tóg huri ãjag mÿ, ãg kanhkã tÿ Paulo ti. Ti to sóg há tãvĩ nĩ, Paulo to. Topẽ vÿ ti mÿ krĩ há tãvĩ nĩm.

¹⁶ Kÿ tóg, ti tÿ ù mÿ carta han kÿ tóg isÿ nén rán mũ tag ri ke han tĩ gé. Ti vĩ tóg inh vĩ ri ke pẽ nĩ. Carta e han tóg huri, Paulo ti, kÿ ti carta ù vÿ to jykrén jagy tĩ gé. Kÿ ù ag tóg ti carta to ke mũ ra kí kagtĩg nÿtĩn kÿ ti to vĩ kónãn sór mũ. Û tÿ ki kagtĩg ag vẽ, ùn krój ag vẽ, ù tÿ Paulo tÿ rá to vĩ kónãn mũ ag. Topẽ vĩ rá ù to ag tóg vĩ kónãn tĩ gé, ãn ag. Tag tigrĩn ag tóg kãgter ke mũ, ha vemnĩ.

¹⁷ Inh kanhkã', ãjag mÿ sóg rán kãn huri. Hã kÿ vãnh ki rĩr há han nĩ. Ker ù tÿ ãjag mÿ ón kÿ kri nĩm hẽ'. Ke tũ nĩ mũ ra ag tóg ãjag lograr henh ke mũ, ù tÿ ãjag fe kavénh sór mũ ag, ùn jykre pãno ag. ãjag tÿ ag vĩ kri fi tigrĩn ãjag tóg vãgfor ke mũ, ha vemnĩ. Ëg

tÿ kãgnó ki tĩr ri ke han jé ãjag tóg ke mũ, ha vemnĩ.

¹⁸ Ëg Senhor ki kanhrãn ke hã to tar nÿtĩmĩ. Ti tÿ ãg tar han mũ tag hã ve sórmnĩ, ãg kren han tĩ tÿ Jesus Cristo ti. Ti hã mÿ ãg tóg vĩ há han ke mũ, ùri, kar kÿ kanhkã tá ke gé, kÿ tóg tũ' henh ke tũ pẽ nĩ. Amém.

JOÃO TỸ CARTA HAN VĒN

Topě vī

¹ Topě tỹ ver nén kar han tũg ki tóg nĩ nĩ, Topě vī ti, hã vỹ: Jesus Cristo, he mũ. Topě tỹ Jesus mré nén ũ kar hyn han kỹ tóg rĩr nĩ, Topě vī ti. Sỹ ãjag mỹ Jesus Cristo tag kãmén ke vĕ. Mĕ inh, ti vī ti. Ti ve inh ke gé, inh kanĕ tỹ. Ti ki inh ěvãnh, ti vóg inh, inh nĩgĕ tỹ.

² Ęg rĩnrĩn tĩ ěn vỹ vĕnh ven, hã kỹ sóg ti vé. Ti hã tó sóg tĩ, hã kỹ sóg ãjag mỹ ti kãmén mũ. Ā tỹ nén kar han tũg ki tóg kã nĩ nĩ, ũ tỹ ti han ja tũ hã ra. Ęn kã tóg ã panh mré nĩ ja nĩ sir. Hã ra tóg ěg mỹ vĕnh ven.

³ Kỹ sóg ti vé. Ti vī mĕ sóg ke gé. Hã kỹ sóg ãjag mỹ ti kãmén mũ ha, ãjag tỹ inh mré ti ki kanhrãnh jé. Ęg jóg tỹ Topě mré ke vỹ tỹ ěg nỹtĩ, ti kósin tỹ Jesus Cristo mré ke ke gé, kỹ ěg tóg tỹ jagnĕ mré ke nỹtĩ gé.

⁴ Ājag mỹ sóg tag rán kỹ jĕnĕ sór mũ, ti tỹ ãjag mỹ sér tĩ jé, ãjag mỹ há tãvĩ tĩ jé ke gé.

Topě vỹ jĕngrĕ ri ke nĩ

⁵ Ha vé, ti tỹ ěg mỹ nén tó mũn hã vĕ, ha mĕ. Ti vī mĕ kỹ sóg ãjag mỹ tó sór mũ, ha mĕ. Topě vỹ jykre kuryj nĩ, hã kỹ tóg kurã ri ke nĩ, jĕngrĕ ri ke, ki kuty tũ pĕ ti nĩ, Topě ti.

⁶ Kỹ, ěg tỹ: “ti mré ke vỹ tỹ inh nĩ,” hen kỹ ěg tóg kuty ki vĕnh jykre kórég ěn han ke tũ nĩ, ke tũ ra ěg ón kỹ: “ti mré ke vỹ tỹ inh nĩ,” he tĩ. Vĕnh ó vĕ sir. Kỹ ěg tóg ón kỹ nén ũ kar han tĩ gé.

⁷ Ęg tỹ ti kóm kurã ki vĕnh jykre há ěn han kỹ ěg tóg jagnĕ to há nỹtĩ. Jagnĕ mré ke vỹ tỹ ěg nỹtĩ, ěg tỹ vĕnh jykre há han kỹ. Kỹ ti kósin tỹ Jesus vỹ ěg kykũnh ke mũ sir, ã kyvĕnh tỹ, ěg tỹ ti vī mranh ja (hã) ra.

⁸ Ũ tóg kejĕn: “inh pi(jé) Topě vī mranh tĩ,” he sór mũ. Ti ón vĕ. Hã ra tóg ti hã mỹ tỹ vĕnh vī há mĕ tĩ, ti ón mũ ti.

⁹ Ęg tỹ Topě vī mranh kỹ ěg tóg ti mỹ tónh ke mũ. “Ā vī mranh inh, tag han kỹ,” he jé ěg tóg ke mũ. Kỹ tóg ěg mỹ vĕnh pãte fón ke mũ sir. Tag tó ja ti nĩ, kỹ tóg han ke mũ. Kuryj ti

nĩ mỹr. Kỹ tóg ěg kykũnh ke mũ sir, ěg jykre pãno tỹ tũg' he jé.

¹⁰ Ęg tỹ: “inh pi(jé) ti vī mranh ja nĩgtĩ,” hen kỹ ěg tóg Topě to: “ti ón vĕ,” he mũ. Kỹ ěg pi(jé) ti vī ki kanhrãnh há nỹtĩ'.

2

Jesus vỹ ěg tar han ke mũ

¹ Inh krĕ, sỹ tag rán vĕ ãjag mỹ, ãjag tỹ ti vī mranh sór tũ nĩ jé. Kejĕn ãjag kãmĩ ũ tóg Topě vī mranh tĩ hã ra. Kỹ ũ tóg ti jagfy vĕnh ke mũ ha, ěg jóg tỹ Topě mỹ, hã vỹ: Jesus Cristo, he mũ, ũn jykre kuryj jĕ ěn ti.

² Ti hã tóg ũ tỹ ti tén ke mũ ag mỹ vĕnh fĕg', ti tỹ ěg jagfy ter jé, ti tỹ ěg tỹ Topě vī mranh tỹ tũ' hen jé. Hã kỹ tóg ěg mỹ vĕnh pãte fón sór mũ. Hã ra tóg ěg tãvĩ mỹ vĕnh pãte fón sór tũ nĩ. Ęprã ke kar mỹ ke vĕ, mỹr'.

³ Ha vé, ěg tỹ Topě vī kri fi kỹ ěg tóg vĕso: “vãhã inh ti ki kanhró nĩ,” henh ke mũ.

⁴ Ũ tóg kejĕn: “ti ki kanhró sóg nĩ,” he tĩ. Hã ra tóg ti tỹ ěg mỹ nén tó ja ěn han tũ nĩgtĩ. Ti ón vĕ. Ti pi(jé) Topě tỹ ki hã tó mũ ki kanhró nĩ'.

⁵ Ęg tỹ hã ra Jesus vī kri fi kỹ ěg tóg Topě to há nỹtĩ. Kỹ ěg tóg ti to há tãvĩ nỹtĩ ha ke gé. Tag han kỹ ěg tóg ti ki kanhrãnh mũ, kỹ ěg tóg ti ki ge kỹ nỹtĩ ha, ha mĕ.

⁶ Ũ tóg ti to: “ti ki sóg rã kỹ jĕ,” he tĩ. Kỹ tóg ti jykre han kãn mũ sir. Jesus Cristo tỹ nén han ja han kãn tóg mũ. Kỹ tóg ti ki rã kỹ jĕ sir.

Ęg tỹ jagnĕ to há nỹtĩnh ke

⁷ Ājag to sóg há tãvĩ nĩ. Inh pi(jé) ãjag mỹ nén ũ tãg rán sór mũ'. Nén ũ si rán sór inh mũ, ha mĕ. Vãšỹ Topě tóg ěg jyvĕn ja nĩgtĩ, ěg tỹ jagnĕ to há nỹtĩ jé. Cristo mur tũg ki tóg ěg mỹ tag tó ja nĩgtĩ, kỹ ãjag tóg vãšỹ mĕ ja nĩgtĩ gé.

⁸ Hã ra tóg tãg nĩ gé, sỹ ãjag mỹ rán mũ tag ti. Cristo vỹ ěg mỹ tó mãn ja nĩ, ěg tỹ jagnĕ to há nỹtĩ jé, kỹ tóg ki króm ja nĩ, kỹ ěg tóg ti nón ki króm sór mũ gé. Ki hã tó ja ti nĩ, kỹ tóg nén ũ tãg ri ke nĩ, Cristo tỹ Topě nón tó mãn kỹ. Ha vé, komĕr hã tóg kurãg tĩ. Kurã kãtĩg kỹ ti kuty tỹ tũg' he tĩ, komĕr hã. Jesus tỹ ěg mỹ: “jagnĕ to há nỹtĩmĩ,” he to ken hã vĕ, hã vỹ: kurã, he mũ.

⁹ Ũ tóg kejën: “inh hÿn kurã mĩ tĩg mũ ha,” he tĩ, hã ra tóg ã régre to jũ nĩ, ã irmão to. Ĕn vÿ kuty mĩ tĩ nĩ ver.

¹⁰ Ũ tÿ ã régre to há nĩ ěn hã vÿ kurã mĩ tĩg ke mũ. Ĕn vÿ ã régre tÿ prãnh ke han ke tũ pẽ nĩ.

¹¹ Ũ tÿ ã régre to jũ nĩ ěn vÿ kuty mĩ tĩ mũ. Kuty to vẽn h jykre han kÿ tóg jẽ nĩ ver. Kÿ tóg ã tÿ hẽ ra tĩg ke tag ki kagtĩg nĩ gé. Kyvó ri ke ti nĩ, ti tÿ kuty mĩ tĩn kÿ.

¹² Inh krẽ, sÿ ãjag mÿ rán vẽ. Ājag tÿ Topẽ vĩ mranh ja ěn vÿ vẽn h pãte fón kÿ nĩ nĩ, Jesus Cristo tigrĩn.

¹³ Ājag kãmĩ ke ũ vÿ sanh há nÿtĩ. Sÿ ãjag mÿ rán vẽ gé. Ũ tÿ ã tÿ nén kar han mũ to hã kã nĩ ěn ki kanhró ãjag tóg nÿtĩ. Ājag kãmĩ ke ũ vÿ kyrũ nÿtĩ. Sÿ ãjag mÿ rán vẽ gé. Nén-Kórég vÿ ãjag tÿ hẽ ri ke ja tũ nĩgtĩ.

¹⁴ Inh krẽ, sÿ ãjag mÿ rán vẽ. Ĕg jóg mág ki kanhró ãjag tóg nÿtĩ. Ājag kãmĩ ke ũ vÿ sanh há nÿtĩ. Sÿ ãjag mÿ rán vẽ. Ũ tÿ ã tÿ nén kar han mũ to hã kã nĩ ěn ki kanhró ãjag tóg nÿtĩ. Ājag kãmĩ ke ũ vÿ kyrũ nÿtĩ. Sÿ ãjag mÿ rán vẽ. Tar ãjag nÿtĩ. Topẽ vĩ ki kanhró ãjag tóg nÿtĩ. Nén-Kórég vÿ ãjag tÿ hẽ ri ke ja tũ nĩgtĩ.

¹⁵ Ĕg tÿ tag ki nén ũ kórég vég mũ tag ki vẽ'ĩ sór tũg nĩ, tag ki vẽn h jykre ki vẽ'ĩ sór tũg nĩ gé. Ĕg tÿ tag to há nÿtĩn kÿ ěg tóg ěg jóg mág to há tũ nÿtĩ.

¹⁶ Ĕprã vẽn h jykre pi(jé) tÿ Topẽ jykre nĩ'. Ĕprã vẽn h jykre hã vẽ, ha mẽ: nén ũ kar to ěn ěg tóg tĩ. Ĕg tÿ nén ũ ve kÿ ěg tóg ěn mãn sór tĩ. Kÿ ěg tóg: “ũn mág vÿ tÿ inh nĩ, isũ to, isÿ nén ũ kar to,” he tĩ gé. Topẽ jykre pijé'. Ĕprã vẽn h jykre hã vẽ.

¹⁷ Hã ra tóg kãnhmar tũ' henh ke mũ, ěg tÿ nén vég mũ tag ti, ti tũg kÿ ěg tÿ ne to ěn ke tóg tũ tĩ gé. Ũ tÿ Topẽ vĩ han tĩ ěn vÿ tũ' henh ke tũ nĩ jãvo.

Ũ tÿ Cristo kato tẽ

¹⁸ Inh krẽ', kurã tÿ ěgno vÿ kakó tĩ ha. Kurã ěn kakó nĩn kÿ Cristo kato tẽ pẽ ěn vẽn h ven ke mũ. Tag mẽ ãjag huri. Hã ra ag tóg hur vẽn h vinven, ũ tÿ ti kato tẽ mũ tÿ hẽn ri ke ag. Hã ki ěg ki kanhró nÿtĩ, kurã tÿ ěgno kakó nĩ ti.

¹⁹ Ĕg mré ke ag vẽ vẽ, ũ tÿ ti kato tẽ mũ tag ag, hã ra ag tóg ón kÿ tÿ ěg mré ke ja nÿtĩgtĩ. Ag tÿ tÿ ěg mré ke pẽ nÿtĩ ra ag tóg ver ěg mré mũnh ke mũ vẽ. Hã ra ag tóg ti tovãnh kÿ ti kato tẽ mũ ha. Hã ki tóg ve há tĩ, ag tÿ tÿ ěg mré ke tũ nÿtĩ ti.

²⁰ Ājag kar vÿ vẽn h vĩ há ki kanhró nÿtĩ. Jagrẽ ãjag nÿtĩ, ũn jykre há ěn kuprĩg tÿ, hã kÿ ãjag tóg ki kanhró nÿtĩ.

²¹ Hã kÿ sóg ãjag mÿ rán mũ, ãjag tÿ ki kanhró nÿtĩn kÿ. Ājag pi(jé) ki kagtĩg nÿtĩ'. Ũ tÿ vẽn h vĩ há tó mũ ěn pi(jé) ón tĩ'.

²² Kÿ ũn nÿ hÿn ón tĩ'? Ũ tÿ ge vÿ ón pẽ han tĩ, ha mẽ: ũ tóg Jesus to: “ti pi(jé) tÿ Cristo nĩ'” he tĩ. “Topẽ tÿ ti jẽnẽ pijé', Topẽ kósin pijé'” he ag tóg tĩ gé, Jesus to. Ũ tÿ Cristo kato tẽ mũn hã vẽ. Ĕg jóg to ag tóg ón tĩ, ti kósin to ke gé.

²³ Ũ tÿ Jesus to: “ti pi(jé) tÿ Topẽ kósin nĩ'” hen kÿ tóg ěg jóg mág ki kagtĩg nĩ gé. Kÿ ũ tÿ Jesus to: “Topẽ kósin vÿ tÿ ti nĩ,” hen kÿ tóg ěg jóg mág ti ki kanhró nĩ gé.

²⁴ Vãsÿ ãjag tóg ti vĩ mẽ vén. Ĕn kã jatu tũg nĩ, ěn hã mĩ ěkrén nĩ. Ājag tÿ tag to tar nÿtĩn kÿ ãjag tóg Topẽ kósin ki ge kÿ nÿtĩ, ti panh ki ke gé. Hã kÿ ãjag tÿ nén mẽ vén ja ěn tovãnh tũg nĩ.

²⁵ Ti hã vÿ ěg mÿ tó ja nĩ, ěg tÿ ěg rĩr krÿg ja tũ venh ke ti.

²⁶ Ũ ag tóg ãjag krĩn kónãn sór mũ, ãjag mÿ ón kÿ, ti vĩ tó kÿ. Hã kÿ sóg ãjag mÿ vẽn h rán tag han mũ.

²⁷ Hã ra ãjag tóg jagrẽ nÿtĩ, Topẽ kuprĩg tÿ. Kÿ tóg ãjag kanhrãn mũ sir, Topẽ kuprĩg ti. Ti hã vÿ ěg kanhrãn tĩ, kÿ ũ vÿ ěg kanhrãn mãn ke tũ nĩ ha. Nén kar kãmén ti tĩ, ěg mÿ, ěg jagrẽ ti. Vẽn h vĩ há há tó ti tĩ. Ti pi(jé) ón tĩ'. Ti tÿ ãjag mÿ tó mũ ěn hã mĩ mũmnĩ, ti tÿ ãjag mÿ: “Jesus hã ki ge kÿ nÿtĩmnĩ,” hen kÿ.

²⁸ Inh krẽ', ti ki ge kÿ nÿtĩmnĩ. Kÿ tóg há tĩ. Kãnhmar ti kãtĩg ke mũ, kãnhmar ti vẽn h ven ke mũ. Kÿ ěg tóg mÿ'ãg ke tũ nĩ, ti kãtĩg kÿ, ěg tÿ ti ki ge kÿ nÿtĩn kÿ. Ĕg mÿ'ãg kÿ ěg tóg ti kãtĩg kÿ vẽn h pigju sór mũ. Hã kÿ ke tũg nĩ.

²⁹ Ti hã ne vẽn h jykre kuryj hã mĩ tĩg ja nĩgtĩ'. Kÿ ũ tÿ vẽn h jykre kuryj han mũ vÿ tÿ ti kósin nĩ. Tag mĩ ěkrén.

3

Jesus jāvy ag

¹ Ha vé, ěg jóg mág tóg ěg to há tãvĩ nĩ, hã kÿ tóg ěg to: “inh krē,” he mũ sir. Ti krē vÿ tÿ ěg nÿtĩ, Jesus jāvy. Hã kÿ ěprã ke ù ag vÿ ěg jykre ki kagtĩg nÿtĩ. Ag pi(jé) Topě ki kanhró nÿtĩ', hã kÿ ag tóg ěg jykre ki kagtĩg nÿtĩ gé, ěg tÿ tÿ ti krē nÿtĩn kÿ.

² Ājag to inh há tãvĩ nĩ. Ūri ěg tóg tÿ Topě krē nÿtĩ. Kãnhmar ěg tóg ti mré nÿtĩnh mũnh mũ. Kÿ ěg hÿn hē ri ke nÿtĩnh mũ, kanhkã tá? Ha'. Kar kÿ ěg venh ke mũ, ti kãtĩg kar kÿ. Ěn kã ěg tóg tÿ ti hã pē nÿtĩnh mũ, ěg tÿ ěg kanē tÿ ti ve kÿ. Ti ve pē han jé ěg tóg (ke) mũ, kurã ěn kã.

³ ěg tÿ tag hã ve sór vē. Hã kÿ ěg vēnh jãnhkrig ke mũ, ěg tÿ ti jãnhkri nĩ ěn ri ke nÿtĩ jé, vēnh jykre pãno tovãnh kãn kÿ.

⁴ ěg tÿ ti vĩ mranh kÿ ěg tóg mranh mũ sir, ti tÿ ěg mÿ nén tó ja ti. Hÿ, mranh kÿ ěg tóg mranh tĩ, ti tÿ ěg jyvēn ja ti.

⁵ Hã ra Cristo vÿ kãtĩg ja nĩ, ti tÿ ěg tÿ ti vĩ mranh ja tÿ tũg' he jé. Tag ki kanhró ěg tóg nÿtĩ. Ti pi(jé) mranh ja nĩgtĩ', Topě vĩ ti, inhhã.

⁶ ěg tÿ ti ki ge kÿ nÿtĩn kÿ ěg tóg mranh mãn sór tũ nĩ ha. Ū tÿ ver mranh mãn sór kÿ tóg ti ve ja tũ nĩ, ti ki kagtĩg nĩ sir.

⁷ Inh krē', ker ù vĩ jēmē hē', ù tÿ ājag krĩn kónãn sór mũ vĩ ti. Ū tÿ vēnh jykre kuryj han mũ ěn hã vÿ kuryj nĩ, Topě kuryj nĩ ěn ri ke.

⁸ Ū tÿ Topě vĩ mranh mũ ěn vÿ tÿ Japo mré ke nĩ. Japo hã ne Topě vĩ mranh tũgtĩ'. Topě tÿ nén ù kar han mũ ěn kã Japo ne ti vĩ mranh vén', kÿ tóg ūri ti vĩ mranh tĩ nĩ gé. Hã ra Topě kósin vÿ Japo tÿ nén han mũ kókén ja nĩ, hã jé tóg mur ja nĩ.

⁹ ěg tÿ tÿ Topě krē nÿtĩn kÿ ěg tóg Topě vĩ mranh mãn sór vãnh nÿtĩ ha, ěg tÿ Topě kuprĩg tÿ jagrē nÿtĩn kÿ. Topě vĩ mranh mãn sór ke tũ ěg nĩ ha, ěg tÿ tÿ ti krē nÿtĩn kÿ.

¹⁰ ěg tÿ ag jykre tugnÿm kÿ ěg tóg ù tÿ tÿ Topě krē mré Japo krē ki kanhró nÿtĩ. Ū tÿ vēnh jykre kuryj han jãvãnh ěn pi(jé) tÿ Topě krē nÿtĩ', ù tÿ ě régre to há tũ nĩ ěn pi(jé) tÿ Topě krē nÿtĩ gé'.

Ěg tÿ jagnē to há nÿtĩnh ke

¹¹ Tag mē ājag tóg, ājag tÿ Topě vĩ mē vén kÿ, hã vÿ: “jagnē to há nÿtĩmnĩ,” he mũ.

¹² ěg pi(jé) Caim jykre han ke mũ'. Satanás mré ke ja vē, Caim ti, hã kÿ tóg ě jāvy tén. Ne nÿ hÿn ti jũ han, kÿ tóg ti tãnh? Jykre kórég ja ti nĩ, jāvo ti jāvy vÿ jykre há ja nĩ. Hã kÿ tóg ě jāvy tãnh, ti jykre há ěn to. Hã kÿ jagnē jykre vég mũ ra jagnē to jũ tũg nĩ.

¹³ Inh kanhkã', ù tÿ Topě ki rã tũ ag pi(jé) ěg to há nÿtĩnh mũ'. Tag jé ājag mÿ kórég nÿ tũg hã ra.

¹⁴ Ha vé, jykre tãg ěg nÿtĩ, kÿ ěg tóg ěg rĩr krÿg ja tũ venh ke mũ. ěg jykre si tovãnh ěg huri. Tag ki kanhró ěg nÿtĩ, ěg tÿ ù tÿ ěg mré ti ki rã kÿ nÿtĩ kar ag to há nÿtĩn kÿ. Ū tÿ ěg mré Jesus ki rã mũ to há tũ nĩ ěn vÿ venh ke tũ nĩ, ěg rĩr krÿg ja tũ ti.

¹⁵ ěg tÿ ù to kórég tĩ nĩn kÿ ěg ti tén ri ke han huri. Kÿ ěg tÿ ù tén kÿ ěg pi(jé) ěg rĩr krÿg ja tũ venh ke mũ', tag ki kanhró ājag nÿtĩ.

¹⁶ Cristo vÿ ěg tÿ jagnē to há nĩ tag tÿ ěg kanhrãn. Vēnh fēg tóg, ù tÿ ti tén ke mũ ag mÿ, ti tÿ ěg jagfy ter jé. Hã kÿ ěg tóg ěg mré ke jagfy ter ke tag to tar nÿtĩnh ke mũ gé, ù tÿ ag jagfy ěg tén sór kÿ.

¹⁷ Ha vé, ù tóg tag ki nén ù mág vég tĩ. Jãvo ti mré Jesus ki rã kÿ nĩ ù tóg tÿ nén ù tũ nĩ. Hã ra tóg ti jagãgtãn sór tũ nĩ. Ěn vÿ Topě to há tũ nĩ gé.

Kanē jur ke tũ ěg nĩ

¹⁸ Inh krē', ājag vĩ tãvĩ tÿ jagnē to há nÿtĩ tũg nĩ, krĩg mÿ. Jagnē ki rĩrnmĩ. Jagnē to há tãvĩ nÿtĩ to ken hã vē.

¹⁹ Kÿ ěg tóg ki kanhró nÿtĩ, ěg tÿ tÿ ù tÿ ki hã tó mũ ěn krē nÿtĩn kÿ. Kÿ Topě tóg ěg kanē jun mãn ke tũ nĩ ha. Jatu ěg nÿtĩ ha, ěg tÿ jagnē to ha pē nÿtĩn kÿ.

²⁰ Kejēn ěg tóg ěg kygnē ja to ěkrég tĩ. Hã ra Topě tóg ki kanhró kar nĩ. ěg kãfór tóg nĩ, Topě ti, hã kÿ tóg kãnhmar ěg vóg kónãn ke tũ nĩ.

²¹ Inh krē', kejēn ěg tóg Topě jykre ki króm há han tĩ. Kÿ ěg tóg: “inh hÿn kygnē ja tũ nĩ,” he tĩ. Kÿ ěg tóg jatun mÿ Topě mré vēmén tĩ sir.

²² Kÿ tóg ěg mÿ nĩm ke mũ, ěg tÿ ti mÿ nén to vĩ mũ ti. Tĩ tÿ ěg mÿ nén tó mũ ěn hã han

ĕg tóg tĩ, nén tỹ ti mỹ há nĩ hã ki króm ĕg tóg tĩ, hã kỹ ĕg tóg jatun mỹ ti mỹ nén ũ to vĩ tĩ.

²³ Ti tỹ ĕg mỹ nén tó mũn hã vĕ, ha mĕ: “inh kósin tỹ Jesus Cristo ki gemnĩ, kỹ jagnĕ to há nỹtĩmnĩ,” he ja ti nĩ ĕg mỹ. Ēg tỹ tag han mũ hã ve sór ti mũ.

²⁴ Ēg tỹ ti vĩ ki króm kỹ ĕg tóg sir ti ki ge kỹ nỹtĩ. Kỹ Topĕ tóg tỹ ĕg mré ke nĩ sir. Ā kuprĩg jĕnĕ ja tóg nĩ ĕg mỹ, kỹ ti kuprĩg tóg ĕg mỹ tó tĩ, Topĕ tỹ tỹ ĕg mré ke nĩ ti.

4

Topĕ kato tĕ mũ ag kuprĩg ti

¹ Ājag to há tãvĩ sóg nĩ, ha mĕ. Kãnhmar ũ vĩ jĕmĕ sór tũg nĩ, ti tỹ: “Topĕ kuprĩg vỹ tỹ inh jagrĕ nĩ,” he mũ ra. Komĕr hã ti vĩ tugnỹm, ājag tỹ ve jé, ti tỹ Topĕ kuprĩg tỹ jagrĕ nĩ ti. Ón kỹ Topĕ vĩ tó tĩ ag vỹ mĩ mũgtĩ, ũ tỹ hĕn ri ke ag, ha mĕ.

² Ũ tỹ Topĕ kuprĩg tỹ jagrĕ nĩ ĕn vỹ tag tó tĩ, ha mĕ: “Jesus Cristo ti, Topĕ kósin ti vỹ ĕg ri ke han kỹ mur ja nĩ,” he ti tĩ, ũ tỹ Topĕ ki rã kỹ jĕ ti.

³ Ũ tỹ Jesus to tag tó tũ nĩn kỹ tóg Topĕ kuprĩg tỹ jagrĕ tũ nĩ. Cristo kato tĕ tĩ ĕn kuprĩg tỹ tóg jagrĕ nĩ, ha mĕ. Ēn vỹ vĕnh ven ke mũ, ũ tỹ ti kato tĕ mũ ti. Tag mĕ ājag huri. Hã ra tóg hur jun, kỹ tóg mĩ tĩ ha.

⁴ Inh krĕ', Topĕ tũ vỹ tỹ ājag nỹtĩ. Ón kỹ Topĕ vĩ tó tĩ ag fĩn rãm ājag huri. Ha vé, Topĕ kuprĩg tỹ ĕg jagrĕ vỹ ag jagrĕ kãfór nĩ. Hã kỹ ĕg tóg ĕg kato tĕ ag fĩn rãm kãn huri.

⁵ Topĕ ki rã tũ ag vĕ, hã kỹ ag tóg ũ tỹ Topĕ ki ge tũ ag vỹ ag vỹ jĕmĕg tĩ.

⁶ Ag jãvo ĕg tóg tỹ Topĕ tũ nỹtĩ. Kỹ ũ tỹ Topĕ ki kanhró nĩ ĕn vỹ ĕg vĩ mĕnh mũ. Ti tũ tũ ag vỹ ĕg vĩ mĕ sór tũ nỹtĩ. Hã ki ĕg tóg ki kanhró nỹtĩ, vĕnh jagrĕ tỹ vĕnh vĩ há tó mũ ti, vĕnh jagrĕ tỹ ag tỹ kygnĕ han tĩ ĕn ti ke gé.

Topĕ vỹ ĕg to há nĩ vén

⁷ Ājag to sóg há tãvĩ nĩ, ha mĕ. Jagnĕ to há nỹtĩmnĩ. Ēg tỹ jagnĕ to há nỹtĩn kỹ ĕg tóg Topĕ jykre han tĩ. Ti hã vỹ ĕg to há nĩ vén. Ēg tỹ jagnĕ to há nỹtĩn kỹ ĕg tóg tỹ Topĕ krĕ nỹtĩ, Jesus jãvy, kỹ ĕg tóg Topĕ ki kanhró nỹtĩ gé.

⁸ Ēg tỹ jagnĕ to há tũ nỹtĩn kỹ ĕg tóg Topĕ ki kagtĩg nỹtĩ, kỹ ĕg ti ki rã ja tũ nĩ. Topĕ jykre vĕ, hã vỹ: ĕg to há, he mũ, ti tỹ ĕg to há nĩ sór nĩn kỹ. Hã kỹ ĕg tóg jagnĕ to há nỹtĩn ke mũ gé.

⁹ Tag to ĕg tóg ki kanhró nỹtĩ, Topĕ tỹ ĕg to há nĩn ki, ha mĕ: Ā kósin pir jĕnĕ ja tóg nĩgtĩ, Topĕ ti, ti tỹ ga kri mur jé, ĕg tỹ ti kósin tugrĩn rĩr krỹg ja tũ ĕn ve jé.

¹⁰ Ēg pi(jé) ti to há nỹtĩ ja nĩgtĩ'. Ti hã ne ĕg to há nĩ vén', hã kỹ tóg Ā kósin jĕnĕ, ti tỹ ĕg jagfy ter jé, ti tỹ ĕg tỹ ti vỹ mranh tỹ tũg' he jé. Ti tỹ ĕg to há nĩn hã vĕ.

¹¹ Ha vé, inh krĕ', Topĕ vỹ ĕg to há tãvĩ nĩ. Hã kỹ tóg há nĩ gé, ĕg tỹ jagnĕ to há nỹtĩn kỹ.

¹² Ũ pi(jé) Topĕ vég tĩ'. Ēg tỹ jagnĕ to há nỹtĩn kỹ tóg hã ra ĕg ki ĕmãn mũ ha, Topĕ ti. Kỹ ĕg tóg ti to há tãvĩ nỹtĩn mũ gé sir, ĕg tỹ jagnĕ to há nỹtĩn kỹ.

¹³ Topĕ vỹ Ā kuprĩg tỹ ĕg jagrĕ han. Ēg jagrĕ tag to ĕg tóg ti tỹ ĕg ki ĕmãn mũ tag ki kanhró nỹtĩ, ĕg tỹ ti ki ge kỹ nỹtĩ tag ti ke gé.

¹⁴ Topĕ vỹ Ā kósin jĕnĕ, ti tỹ ga kri mur jé, ti tỹ ĕg kren han jé. Tag ve sóg, hã kỹ sóg tó mũ.

¹⁵ Ũ tóg Jesus to: “Topĕ kósin vĕ,” he tĩ. Topĕ vỹ ti kãkã ĕmã nĩ, ũ tỹ tag tó mũ ĕn kãkã, kỹ tóg Topĕ ki rã kỹ jĕ nĩ gé.

¹⁶ Topĕ vỹ ĕg to há nĩ, tag ki kanhró ĕg tóg nỹtĩ. Kỹ ĕg tóg ti vỹ kri fig mũ gé, ti tỹ ĕg mỹ: “ājag to sóg há nĩ,” hen kỹ.

Topĕ vỹ ĕg to há nĩ. Kỹ, ĕg tỹ ti to há nỹtĩn kỹ ĕg tóg ti ki ge kỹ nỹtĩ, kỹ Topĕ vỹ ĕg ki ĕmãn ha.

¹⁷ Topĕ vỹ ĕg tar han sór mũ, ĕg tỹ ti to há tãvĩ nỹtĩn jé. Ēg tỹ ti to há nỹtĩ ki kygnĕg tũ nĩn kỹ ĕg tóg kurã ĕn kã kanĕ jur ke tũ nĩ, ti tỹ ĕg jykre tugnỹm ke kurã ĕn kã. Cristo tỹ ga kri tĩg kỹ nén han mũ ĕn ri ke han jé ĕg tóg (ke) mũ, hã kỹ ĕg tóg kanĕ jur ke tũ nĩ.

¹⁸ Ēg tỹ Topĕ to há nỹtĩn kỹ ĕg kanĕ jur ke tũ pĕ nĩ. Ha vé, ĕg tỹ Topĕ to há nỹtĩn kỹ kygnĕg tũ nỹtĩn kỹ ĕg tóg mũmĕg ki kagtĩg nỹtĩ gé. Topĕ tỹ ĕg vóg kónãn ke to ĕg tóg ti kamĕg ke mũ. Ēg mũmĕg vỹ ĕg vĕsỹrenh han mũ.

¹⁹ Ti hã vỹ ĕg to há nĩ vén inhhã, hã kỹ ĕg tóg ũri ti to há nỹtĩ ha.

²⁰ Ũ tóg kejĕn: “Topĕ to sóg há nĩ,” he tĩ. Hã ra tóg ũ tỹ ĕg mré Jesus ki rã kỹ jĕ to kórĕg

nĩ. Ti ón vë. Ëg régre mré Ëg mügtĩ, gan kri. Ëg tỹ Ëg régre to há tũ nỹtĩn kỹ Ëg hỹn hẽ ri kenh ke mü, Ëg tỹ Topẽ to há nỹtĩ jé, Ëg tỹ ũn vég tũ ěn to? Ëg tỹ Ëg régre to há tãvĩ nỹtĩn kỹ, hã kỹ Ëg tóg Topẽ to há nỹtĩ gé.

²¹ Tag tó ja tĩ nĩ, Ëg mỹ, Ëg tỹ ti vĩ ki króm jé, Topẽ ti, ha mẽ: “ãjag tỹ Topẽ to há nĩ sór kỹ ãjag régre to há nỹtĩmĩ gé,” he ja ti nĩ.

5

Ũ tỹ Jesus ki rã tũ ag jykre fĩn rãm ěg huri

¹ Ëg tỹ Jesus to: “Cristo vỹ tỹ ti nĩ, Topẽ kósĩn vỹ tỹ ti nĩ,” hen kỹ Ëg tóg tỹ ti jãvy nỹtĩ. Kỹ Ëg tỹ Ëg jóg mág to há nỹtĩn kỹ Ëg tóg ti krẽ ũ ag to há nỹtĩnh ke mü gé, ũ tỹ Ëg mré ti ki ge kỹ nỹtĩ ag to.

² Ëg hỹn hẽ ri kenh ke mü, Ëg tỹ Jesus jãvy ũ ag to há nỹtĩ jé? Topẽ to ěg há nỹtĩnh mü, kỹ Ëg tóg ti vĩ ki króm ke mü gé. Jagnẽ to há to ken hã vë.

³ Ëg tỹ Topẽ to há nỹtĩ sór kỹ Ëg tóg ti vĩ ki króm ke mü gé. Ti to há nĩ to ken hã vë. Ti vĩ pi(jé) kufy nĩ, Ëg tỹ nén ki króm ke ti.

⁴ Jesus jãvy ag ne ũ tỹ ti ki ge tũ ag jykre fĩn rãm tĩ. Ëg hỹn hẽ ri kenh mü, Ëg tỹ ti ki ge tũ ag jykre fĩn rãm jé? Topẽ ki rã jé Ëg tóg ke mü. Ëg tỹ ti ki rã kỹ Ëg tóg hur fĩn rãm.

⁵ Ëg tỹ Jesus to: “Topẽ kósĩn vỹ tỹ ti nĩ,” hen kỹ Ëg tóg fĩn rãm ke mü, ũ tỹ ti ki ge tũ ag jykren fĩn.

Jesus vỹ tỹ Topẽ kósĩn nĩ

⁶ Jesus Cristo tỹ ga kri tĩg kỹ tóg goj tỹ vënh kype kỹ jẽ, kỹ ti kyvënh tóg ti ki kãkutẽ gé, ti ter kỹ. Kỹ tóg nén ũ régre han ja nĩ. Nén ũ pir pijé!. Ti vënh kype tãvĩ pijé!. Ti vënh kype vỹ nĩ, kar kỹ ti kyvënh ti ke gé, ti tỹ Ëg jagfy ter tag ti. Kỹ Topẽ kuprĩg vỹ ěg mỹ ti kãmén tĩ gé. Ti pi(jé) ón tĩ, Topẽ kuprĩg ti.

⁷ Kỹ Ëg ũ tãgtũ tigrĩn ti tỹ tỹ Topẽ kósĩn nĩ ki kanhró nỹtĩ,

⁸ Topẽ kuprĩg tigrĩn, kar kỹ ti vënh kype ja tigrĩn, kar kỹ ti kyvënh tigrĩn ke gé, ti tỹ Ëg jagfy ter kỹ. Nén ũ pir hã tó ag tĩ ti to, hã vỹ: “Topẽ kósĩn vỹ tỹ ti nĩ,” he mü.

⁹ Ěprã ke ag tỹ ěg mỹ nén ũ tó kỹ Ëg tóg ag vỹ kri fig tĩ. Topẽ vỹ ěprã ke ag vỹ kãfór nĩ, kỹ ti vỹ ki hã ke tãvĩ nĩ gé. Kỹ ũ tỹ ěg mỹ

Topẽ kósĩn tó mü vỹ tỹ Topẽ ti nĩ, hã kỹ tóg tỹ vënh vỹ há nĩ.

¹⁰ Ëg tỹ Topẽ kósĩn ki rã kỹ Ëg tóg ti ki kanhró nỹtĩ. Ti ki rã kỹ Ëg tóg to jykren há han ke mü. Topẽ hã vỹ ã kósĩn kãmén tĩ. Ëg tỹ ti vỹ to: “vënh vỹ há vë,” he sór tũ nĩn kỹ Ëg tóg ti to: “ti ón vë,” he mü sir, Ëg tỹ ti vỹ kri fi sór tũ nĩn kỹ.

¹¹ Tag tó ti tĩ, Topẽ ti, ha mẽ. “ãjag tỹ rĩr krỹg ja tũ venh ke han jé sóg ke mü. Inh kósĩn ter ja to ãjag tóg rĩr krỹg ja tũ venh ke mü,” he tóg, Topẽ ti.

¹² Ëg tỹ ti kósĩn ki ge kỹ Ëg tóg ěg rĩr krỹg ja tũ venh ke mü. Ëg tỹ jãvo ti ki ge tũ nĩn kỹ Ëg tóg rĩr krỹg ja tũ venh ke tũ nĩ.

Topẽ vỹ ěg vỹ jëmëg tĩ

¹³ ãjag hã ne Topẽ kósĩn ki ge kỹ nỹtĩ!. Kỹ ãjag tóg ěg rĩr krỹg ja tũ venh ke mü. Sỹ tag tó sór vë, ãjag mỹ, hã kỹ sóg rán mü.

¹⁴ Ëg tỹ ti mré vënh jykre pir han kỹ Ëg tóg jatun mỹ ti mré vëmén ke mü gé. Kỹ Ëg tóg ti mỹ nén ũ kar to vỹ tĩ. Nén tỹ ti mỹ há nĩ ěn hã to vỹ jé Ëg tóg ke mü. Ëg tỹ ti mỹ nén tỹ ti mỹ há nĩ ěn hã to vỹ kỹ tóg ěg vỹ mënhe ke mü sir.

¹⁵ Ti tỹ ěg vỹ mẽ kỹ tóg ěg mỹ han ke mü gé sir. Ěn kã ti pi(jé) han ke tũ nĩ, Ëg tỹ ti mỹ nén to vỹ mü tĩ.

¹⁶ Kejën ěg tóg ěg mré Jesus ki rã kỹ jẽ ũ vég tĩ, hã ra tóg Topẽ vỹ mranh mü. Hã ra tóg Topẽ tovãnh sór tũ nĩ. Topẽ tovãnh sór tũ ra tóg kygnẽ kỹ mranh mü, Topẽ vỹ ti. Kỹ Ëg tóg Topẽ mré vëmén ke mü, ti to, kỹ Topẽ vỹ ti krĩn ke mü, ti tỹ ti jykre kórég tovãnh jé, ti tỹ ěg rĩr krỹg ja tũ ve jé. Ëg kãmĩ ũ tóg kejën Topẽ tovãnh pẽ han mü. Ěn to sóg ãjag mỹ: “ti to Topẽ mré vëmén,” he sór tũ nĩ.

¹⁷ Ëg tỹ vënh jykre vënhmỹ sĩ han kỹ Ëg tóg ti vỹ mranh tĩ. Ëg tỹ sĩn kỹ mranh mü ra tóg kórég nĩ, kỹ tóg hã ra ěg mỹ vënh pãte fón sór mü, kỹ Ëg tóg ti tovãnh pẽ han ke tũ nĩ. Ëg tỹ ti tovãnh pẽ han kỹ ěg nũgme ki vár ke mü, infernon ki.

¹⁸ Ëg tỹ tỹ Jesus jãvy nỹtĩn kỹ Ëg tóg ti vỹ mranh mãn sór tũ nĩ. Ëg jy nĩgãn ti tĩ, Topẽ kósĩn ti, Satanás tỹ ěg vóg tũ nĩ jé.

¹⁹ Ëg hã ne tỹ Jesus jãvy nỹtĩ'. Tag ki kanhró ãg tóg nỹtĩ. Jãvo ãprã ke ù ag vỹ tỹ Satanás krẽm ke kar nỹtĩ.

²⁰ Topẽ kósin vỹ kãtĩg ja nĩgtĩ. Tag ki kanhró ãg tóg nỹtĩ. Ëg nĩgrẽg róm tóg, ãg tỹ Topẽ ki kanhrãn jé, Topẽ pẽ ti. Ti ki ge kỹ ãg nỹtĩ, ãg tỹ ti kósin tỹ Jesus Cristo ki ge kỹ nỹtĩn kỹ. Ti hã vỹ tỹ Topẽ pẽ nĩ, Jesus Cristo panh ti. Ti hã vỹ ãg tỹ ãg rĩr krỹg ja tũ venh ke han tĩ.

²¹ Inh krẽ', vẽn h kãggrá tỹ topẽ jykre han sór tũg nĩ. Hã vẽn, sỹ ãjag mỹ nén rán sór mũ ti.

JOÃO TỸ CARTA HAN MĂN

¹ João kófa tỹ rá vễ. Isỹ fi mỹ rán hã vễ, Topẽ tỹ fi kuprêg kỹ, fi krê mỹ ke gé, hã vỹ: Topẽ ki ge kỹ nỹtĩ kar, he mũ. Ājag to sóg há tãvĩ nĩ, ha mẽ. Kỹ ù tỹ vễnh vĩ há kri fig mũ kar vỹ ājag to há nỹtĩ gé inh mré.

² Vễnh vĩ há vỹ ěg kãkã nĩ nĩ, tovãnh ke tũ pẽ ěg tóg nĩ. Hã kỹ ěg tóg jagnẽ to há nỹtĩ.

³ ěg jóg tỹ Topẽ mré sóg vễmẽn tĩ, ti tỹ ājag jagãgtãn jé, ti tỹ ājag tar han jé, ti tỹ ājag krĩ kuprãg jé ke gé. Jesus Cristo mỹ sóg tag to vĩ tĩ gé, ěg jóg mág kósin mỹ. Ti vĩ kri fig ěg tóg tĩ, vễnh vĩ há kri, kỹ ěg tóg jagnẽ to há nỹtĩ gé.

Ěg tỹ jagnẽ to há nỹtĩnh ke

⁴ Ā krê kãmĩ ù vỹ vễnh vĩ há nón mũ mũ, jỹ, kỹ tóg inh mỹ sér pẽ tĩ, sỹ tag mẽ kỹ. ěg jóg tỹ ěg mỹ nén tó ja ẽn han kãn sór ag nễji mũ.

⁵ Kỹ sóg ã mỹ rán mũ, jỹ. Ā mỹ sóg: “jagnẽ to há nỹtĩmnĩ,” he mũ. Nén ù tãg pijé', sỹ ã mỹ nén rán mũ tag ti. Vãsỹ ěg tóg tag mẽ, ěg tỹ ti ki rã vén kỹ.

⁶ ěg tỹ Topẽ to há nỹtĩnh kỹ ěg tóg Jesus tỹ ěg mỹ nén tó ja ẽn han kãn ke mũ sir. Ti tỹ ěg mỹ nén tó vén hã vễ, hã vỹ: “jagnẽ to há nỹtĩmnĩ,” he mũ.

Ũ ag tóg Jesus to ón tĩ

⁷ Ũ tỹ hẽn ri ke ag vỹ mĩ mũgtĩ, hã ra ag tóg Jesus Cristo to ón tĩ. Ti to ag tóg: “ti pi(jé) ěg ri ke mur ja nĩ', ěprã ke fi kósin pijé',” he tĩ. Ag ón vễ. Cristo kato tẽ ag vễ.

⁸ Vễnh ki rĩrmnĩ, ājag tỹ ag vĩ kri fig tũ nĩ jé, ājag rãnhrãj tỹ ājag mỹ tũ' he tũ nĩ jé. Vãsãn nĩ, ājag tỹ tá ti kaja ve jé, Topẽ tỹ ěg mỹ nén nĩm sór mũ ti.

⁹ Ũ tóg Cristo kãme pãtén sór mũ, ti vễme pãte tóg ù tó sór mũ. Ti tovãnh to ken hã vễ. Ũ tỹ ge pi(jé) Topẽ ki rã kỹ jẽ ha'. ěg tỹ Jesus kãme mĩ mũn kỹ ěg tóg ěg jóg mág ki rã kỹ nỹtĩ, ti kósin ki ke gé.

¹⁰ Kejẽn ù tóg ājag tá jun tĩ, hã ra tóg tag tó tũ nĩgtĩ. Kỹ ti mỹ: “inh mré nĩnh kãtĩg,” he sór tũg nĩ gé. Ti mỹ: “Topẽ vỹ ã ve há han,” he tũg nĩ gé.

¹¹ ěg tỹ ù tỹ ge mỹ: “Topẽ vỹ ã ve há han,” hen kỹ ěg tóg ti jykre to: “há ti nĩ,” he mũ gé. Kỹ tóg ěg tỹ ti mré ón mũ ri ke nĩ sir, ěg tỹ ti mỹ vĩ há han kỹ.

¹² Sỹ ājag mỹ nén rán sór mũ vỹ ver e tĩ, hã ra sóg rán kỹ jẽnẽ sór tũ nĩ. Sỹ ājag ki jun sór vễ, kỹ sóg ājag mỹ tó sór mũ, ājag mré vễmẽn sór isóg mũ, ěg tỹ jagnẽ fe tỹ mrin ke jé.

¹³ Ā régre fi krê vỹ ã mĩ ěkrég tĩ. Topẽ tỹ ùn kuprêg mũ fi vễ. Hã vễ, sỹ ājag mỹ nén rán sór mũ ti.

JOÃO TỸ CARTA Ủ HAN MĂN

¹ João kófa tỹ rá vễ. Sỹ inh mré ke tỹ Gaiο mỹ rán hã vễ.

² Ǻ to sóg há tǻvĩ nĩ. Hỹ, há tǻvĩ sóg nĩ, ǻ to. Ǻ to sóg Topễ mré vễmén tĩ, ti tỹ ǻ mỹ nén há kar nĩm jé, ǻ kaga tũ nĩ jé ke gé. Topễ to tar ǻ tóg jễ, tag ki kanhró, sóg nĩ.

³ Ǻ mré ke ag tóg inh ki junjun, kỹ ag tóg inh mỹ tó, ǻ tỹ vễnh vĩ há nón tĩ mũ ti, ǻ tỹ to tar nĩ ti. Kỹ tóg inh mỹ sér pễ ti.

⁴ Inh krễ tỹ vễnh vĩ há nón mũn kỹ tóg inh mỹ sér tǻvĩ tĩ, nén ủ tỹ inh mỹ sér nĩ kar kǻfór, hã kỹ tóg inh mỹ sér tĩ, ǻ tỹ vễnh vĩ há nón tĩg kỹ.

⁵ Ǻ to sóg há tǻvĩ nĩ, Gaiο'. Ẽg mré ke ag ki rĩr há han ǻ tóg nĩgtĩ, ủ tỹ kór há tá kǻmũ mũ ag mré hã.

⁶ Tag tó ag tóg tag ki, igreja krēm, ǻ mré ke ag. Ag to há tǻvĩ ǻ nễji nĩ. Ag ki rĩr mǻn nĩ gé, ag tỹ ǻ ki junjun kỹ, kỹ ag mỹ nĩm nĩ, nén ủ tỹ ag mỹ tũ ẻn ti.

⁷ Topễ rǻnhrǻj han ag tóg tĩ. Jesus Cristo jyjy tó kỹ ag tóg hẻn ra mũgtĩ, kỹ ag tóg ủ tỹ ti ki ge kỹ nỹtĩ tũ ag tũ mǻn vǻnh nĩgtĩ.

⁸ Hã kỹ tóg há tĩ, ẻg tỹ ủ tỹ ge ki rĩr há han kỹ, ẻg mré ke ag. Ẽg tỹ ag ki rĩr há han kỹ tóg ẻg tỹ ag mré Topễ vĩ há tó mũ ri ke nĩ sir.

⁹ Ǻ jamǻ tá igreja krēm vễnh mǻn tĩ ag mỹ sóg vễnh rá jẻnẻ, hã ra Diótrẹfes vĩ inh vĩ mẻ jǻvǻnh nĩ. Ag kri tỹ ủn mǻg jẻ sór ti nĩ, Diótrẹfes ti.

¹⁰ Isỹ tá jun kỹ sóg ti mỹ tónh ke mũ, ti jykre pǻno ti, vễnh kar rĩnve. Ón kỹ tóg iso fẻfẻn tĩ. Hã ra tóg nén ủ kórẻg ủ han tĩ gé, hã kỹ tóg ẻg mré ke ag tỹ ǻjag tǻ junjun kỹ tóg ag mỹ: “inh mré nĩnh kǻmũ jẻg,” he vǻnh nĩgtĩ. Kỹ tóg ủ ag tỹ ag mỹ: “inh mré nĩnh kǻmũ jẻg,” he sór mũ ra tóg ag tỹ ag mỹ vĩ há han kamẻg tĩ gé. Ag mỹ tóg: “igreja krēm ǻjag tóg rǻ mǻn ke tũ nĩ ha,” he tĩ, ag tỹ ẻg mré ke ag mỹ vĩ há han sór kỹ. Jykre kórẻg tǻvĩ ti nĩ, Diótrẹfes ti. Hã kỹ sóg ti kato tẻnh ke mũ, ha vemnĩ.

¹¹ Ti jǻvo sóg ǻ to há tǻvĩ nĩ, Gaiο'. Ủ tỹ nén ủ kórẻg han mũ ra ti kóm han sór tũg nĩ. Nén

ủ há hã han sórmnĩ. Ẽg tỹ nén ủ há kar han kỹ ẻg tóg tỹ Topễ krễ nỹtĩ gé. Ủ tỹ ti kórẻg han mũ vĩ Topễ ki kagtĩg nĩ.

¹² Demétrio vĩ tỹ ủn jykre há nĩ, hã ra. Vẻnh kar vĩ ti to vĩ há han tĩ. Ki hã ag tóg tó tĩ, ag tỹ ti to vĩ há han kỹ, hã kỹ sóg ag mré tó mũ gé. Isỹ vẻnh vĩ há hã tó mũ ki kanhró ǻ tóg nĩ.

¹³ Sỹ ǻ mỹ nén rán sór mũ vĩ ver e tĩ, hã ra sóg rán kỹ jẻnẻ sór tũ nĩ.

¹⁴ Kǻnhmar sóg ǻ venh ke kǻtĩg mũ. Kỹ ẻg tóg jagnẻ mré vễmén ke mũ.

¹⁵ Ǻ jẻ jatun mỹ nĩ nĩ. Tag ki inh mré ǻ to há nỹtĩ ag vĩ ǻ mĩ ẻkrẻg tĩ. Kỹ ǻ jamǻ tá inh mré ke kar mỹ: “ǻjag mĩ tóg ẻkrẻg tĩ,” hemnĩ iso. Vyrmỹ ag mỹ tómnĩ, sỹ ag mĩ ẻkrẻg mũ ti.

Hã vễ, sỹ ǻ mỹ nén rán sór mũ ti.

JUDAS TŶ CARTA

¹ Judas tŷ rá vĕ, Tiago jãvy ti. Jesus Cristo mŷ sóg rãnrãj tĩgtĩ. Isŷ ũ tŷ ěg jóg tŷ Topĕ tŷ kuprĕg ja ag mŷ rán hã vĕ, ti tŷ ũ to há ag mŷ. Ti tŷ ãjag kuprĕg kŷ tóg ãjag jy nĩgãn tĩ gé, Jesus Cristo tigrĩn.

² Topĕ mré sóg vĕmĕn tĩ, ti tŷ ãjag jagãgtãn pĕ han jé, ti tŷ ãjag krĩ kuprã pĕ han jé, ti tŷ ãjag tŷ jagnĕ to há tãvĩ han jé ke gé.

Ŭ tŷ Topĕ to un'ón mŷ ag

³ Inh krĕ', ãjag mŷ sóg Topĕ tŷ ěg kar kren han tag tónh ke nĩ vĕ, inh vĕnh rá tag ti ki. Hã ra vãhã ũ ag tóg ãjag krĩn kónãn sór mŷ ha, hã kŷ sóg ãjag mŷ: “Topĕ ki rã to tar nŷtĩmnĩ,” he mŷ. Topĕ tŷ ěg mŷ nĕn tó mŷ vŷ pir nĩ, hã vŷ: Topĕ jykre to tar nĩ, he mŷ. Ā tŷ ag kar mŷ tóg tag tó ja nĩ. Ŭ tŷ tag kato vĩ kŷ ti vĩ jĕmĕ sór tũg nĩ.

⁴ Ha vé, ũ ag tóg Topĕ to un'ón tĩ, ãjag krĩn kónãn jé. Ŭn jykre pãno ag vĕ, hã ra ag tóg jykre há nĩ ve nŷtĩ, hã kŷ ãjag tóg ag vĩ kri fi sór mŷ. Hã ra ag tóg ón kŷ: “ěg jóg tŷ Topĕ vŷ ěg jagãgtãn mŷ, hã kŷ ěg jatun mŷ vĕnh jykre vĕnhmŷ kar han ke mŷ,” he tĩ, ũ tŷ ãjag krĩn kónãn mŷ ag. ěg Senhor tŷ Jesus Cristo to ag tóg: “ti vĩ han ke tũ ěg nĩ,” he tĩ. Ti hã ne tŷ ěg kri ke nĩ', Jesus ti. Hã ra ũ tŷ ti vĩ han sór tũ ag tóg rán kŷ nŷtĩ gé. Vãŷ ag tóg ag to rán ja nĩgtĩ, Topĕ vĩ rán tĩ ag, kŷ ag tóg Topĕ tŷ ũ tŷ ge ag vóg kónãn ke mŷ ěn tó ja nĩgtĩ.

⁵ Ha vé, vãŷ ěg Senhor vŷ ga tŷ Egito tá ã povo tŷ Israel mré kãkutĕ ja nĩgtĩ, ag tŷ ãjag ga ra mŷ jé. Hã ra ag kãmĩ ũ ag tóg ti vĩ kri fi vãnh ja nŷtĩgtĩ. Hã kŷ Topĕ vŷ ag tŷ tũg' he kãn, ũ tŷ ti vĩ kri fi jãvãnh ja ag. Tag mĕ ãjag huri. Ki kanhró ãjag nŷtĩ. Hã ra sóg rán mãn sór mŷ, ãjag tŷ mĩ ěkrĕn jé.

⁶ Kŷ kanhkã tãn ag vŷ ge ja nĩgtĩ gé. Ag kãmĩ ũ ag tóg Topĕ tŷ ag mŷ nĕn nĩm ja ěn tovãnh. Ājag jamã tovãnh ag tóg. Kŷ Topĕ vŷ ag sigsé, kŷ tóg ěmã kuty tá ag vin han. Ag se vŷ tũg' henh ke tũ nĩ. Topĕ tŷ ěg kar jykre tugnŷm ke kurã ěn kã tóg ag jykre tugnŷm ke mŷ gé.

⁷ Kar kŷ cidade tŷ Sodoma mĩ ěkrĕn nĩ gé, cidade tŷ Gomorra mĩ ke gé, ti pĕnĩn ěmã kãsir mĩ ke gé. ěn tá ke ag ne vĕnh jykre pãno tãvĩ han tĩ ja nĩgtĩ', kanhkã tãn ag ri ke. Jagnĕ mré nŷ kónãn tãvĩ han ja ag tóg nĩgtĩ, kŷ ag tóg ũ ag to ěn ja nĩgtĩ gé, ag mré ke tũ ag, ũn gré tŷ ũn gré ũ mré nŷ sór kŷ. Kŷ Topĕ vŷ pĩ nhyr vãnh ki ag vãm ja nĩgtĩ, ěg tŷ ag to jykren kŷ to ki kanhró nŷtĩ jé.

⁸ Kŷ ũ tŷ Topĕ to ón mŷ ag vŷ vĕnh jykre kórĕg han mŷ ěn ag ri ke han tĩ gé. Topĕ vĩ mranh kŷ ag tóg nĩgtĩ. Ag vĕnh péti tóg ag mŷ sér tĩ. Hã ra ag tóg vĕnh kavĕnh tĩ, ãjag jykre pãno tigrĩn. “ěg pi(jé) tŷ ũ krĕm ke nŷtĩ',” he ag tóg tĩ. Kŷ ag tóg ěg tŷ ũn vĕg tũ ag to vĩ kónãn tĩ gé, ũ tŷ kanhkã tá tŷ ũn mág nŷtĩ ag mŷ.

⁹ Topĕ tŷ jĕnĕ jafã to pã'i tŷ Miguel vŷ tag han ja tũ nĩgtĩ, ha mĕ. Satanás mré tóg rará, ti tŷ Moisés ter ma tĩg sór kŷ, Miguel ti. Hã ra tóg Satanás mŷ vĩ kónãn ja tũ nĩgtĩ, ti tŷ tŷ pã'i nĩ ra. Ti mŷ tóg: “ěg Senhor jé ã vóg kónãn,” he ja nĩgtĩ, Miguel ti.

¹⁰ Hã ra ũn ón tĩ tag ag vŷ kanhkã tãn ag to vĩ kónãn tĩ, ag tŷ ag ki kagtĩg (hã) ra. Bicho ri ke ag nŷtĩ, ag tŷ ãjag tŷ nĕn to ěn mŷ ěn han mŷn kŷ. Krĩ tũ ag nŷtĩ, hã kŷ ag tóg nĕn ũ vĕnhmŷ kar han tĩ. Hã ra Topĕ vŷ ag vóg kónãn ke mŷ.

¹¹ Ag ve kónãn ti tĩ, Topĕ ti. Caim tŷ Topĕ vĩ kato tĕ ja ěn ri ke han ag tóg mŷ. Ag tŷ rico nŷtĩ sór kŷ ag tóg vĕnh jykre kórĕg tó tĩ, Balaão tŷ vĕnh jykre kórĕg tó ja ěn ri ke. Coré ri ke ag tóg Topĕ kato tĕ tĩ, hã ra ag tóg tag to nũgme ki vár ke mŷ.

¹² Ājag tŷ Jesus ki ge kŷ jagnĕ to há nŷtĩn kŷ ãjag tóg igreja krĕm festa han tĩ. ěn kã ag tóg ãjag mré jĕn tĩ gé, ũ tŷ Topĕ to ón tĩ ag. Hã ra ag tóg ki ãjag kavĕnh tĩ gé. Jatun mŷ ag tóg jĕn mág tĩ. Mŷ'ãg vãnh ag nŷtĩ. Ŭ to jykren vãnh ag tóg nŷtĩ gé. Ājag jĕn mág hã mĩ ag tóg ěkrĕg tĩ. Kejĕn kãka tóg kanhkã góg tatĩn kãtĩg mŷ, hã ra tóg kutĕ tũ nĩgtĩ. Tag ri ke ag nŷtĩ, véké ag tóg vĩ tĩ. Ka ũ tóg kanĕn vãnh nŷtĩ. ěn kunũg ěg tóg tĩ, ti jãre mré hã, kŷ tóg kanĕn mãn ke tũ pĕ nĩ sir. Ter ti nĩ ha. Tag ri ke ag tóg nŷtĩ gé, ũ tŷ Topĕ to ón mŷ ag.

¹³ Kejĕn goj kafã tũ tóg krĕm ke mŷ, kŷ tóg jĕngĕj nĩ. Tag ri ke ag nŷtĩ gé. Ti jĕngĕj vŷ tŷ

ag jykre pãno nĩ. Vẽnh ven ti tĩ. Krĩg tĩ tĩ ri ke ag tóg nỹtĩ gé. Sĩnvĩ nĩ ve tóg nĩ, hã ra tóg ón kũ tĩ tĩ, krĩg tĩ tĩ ti. Tag ri ke ag nỹtĩ. Topẽ vỹ kuty ki ag vãm ke mũ, kũ ag tóg tá kãpa mãn ke tũ pẽ nĩ, ù tỹ Topẽ to ón mũ ag.

¹⁴ Ag hã to tóg rán ja nĩ, Enoque ti. Adão krẽ tỹ ki krẽg mãn tỹ 7 (ke) vỹ tỹ ti nĩ, Enoque ti. Ti hã vỹ ag to: “ha vé, ẽg Senhor vỹ jun ke mũ, ti tỹ jẽnẽ jafã ag mré hã,” he ja nĩ. “E tãvĩ ag nỹtĩ, ti tỹ jẽnẽ jafã ag.

¹⁵ Ti kãtĩg kũ tóg ẽprã ke ag jykre tugnỹm kãn ke mũ. Kũ tóg ùn jykre pãno ag vóg kónãn ke mũ, ag jykre pãno to, ag tỹ Topẽ kato tẽ to, ag tỹ ti to vỹ kónãn to. Û tỹ ti vỹ mranh tĩ ag vỹ ti mỹ vỹ kónãn pẽ han tĩ, hã kũ tóg ag vóg kónãn ke mũ,” he ja tóg nĩ, Enoque ti.

¹⁶ Topẽ to ón mũ ẽn ag tỹ nén ù jagy ve kũ tóg ag mỹ kórég nĩ, hã kũ ag tóg: “Topẽ ne tóg jykre kórég nĩ,” he tĩ. Ājag tỹ nén to én mũ ẽn hã han ag tóg tĩ. Hã ra ag tóg ón kũ vỹ mág tĩ. Kũ ag tóg vẽn kar mỹ vỹ há han tĩ, ón kũ, ag tỹ ājag vỹ há to nén ù ve jé, ag tỹ to rico nỹtĩ jé.

Ēg tỹ apóstolo ag vỹ jẽmẽn ke

¹⁷ Ag jãvo apóstolo ag vỹ mĩ ẽkrén nĩ, inh krẽ'. Ēg Senhor tỹ Jesus Cristo hã vỹ apóstolo ag vin ja nĩgtĩ, hã kũ ag vỹ mĩ ẽkrén há han nĩ.

¹⁸ “Kurã tỹ ẽgno to hã ag tóg ājag to é henh ke mũ,” he ja ag tóg nĩgtĩ, apóstolo ag. “Ājag tỹ nén ù kórég to én mũ ẽn hã han sór ag tóg mũgtĩ, ù tỹ ājag to é henh ke mũ ẽn ag,” he ja ag tóg nĩgtĩ. Apóstolo ag tỹ tó jan hã vẽ.

¹⁹ Ag hã vẽ, sỹ ājag mỹ ùn tó mũ ag. Û tỹ Topẽ to ón mũ ẽn ag hã vẽ. Ēg tỹ jagnẽ kato tẽ han sór ag tóg mũ. Ag tỹ nén ù to én mũ tag hã ne ag mỹ há tĩ'. Ag pi(jé) Topẽ kuprĩg tỹ jagrẽ nỹtĩ'.

²⁰ Ag jãvo ājag tóg Topẽ jykre ki ge kũ nỹtĩ, Topẽ tũ ki, kũ to jagnẽ tar han nĩ, inh krẽ'. Topẽ kuprĩg tỹ ājag krĩn kũ Topẽ mré vẽn nĩ.

²¹ Topẽ vỹ ājag to há tãvĩ nĩ. Ti tovãnh tũg nĩ. Ēg Senhor tỹ Jesus Cristo tỹ ājag jagãgtãn ke tag hã ve sórmnĩ, kũ ājag tóg ẽg rĩr krỹg ja tũ venh ke mũ.

²² Û ag tóg tag to tar tũ nỹtĩ ver, “hỹ mỹ vỹ?” he ag tóg tĩ. Tag ag jagãgtãn nĩ.

²³ Ag kren han nĩ, pĩ jo ag jy nĩgãn kũ. Kũ ù ag tóg ājag tỹ nén to én mũ kar ẽn han tĩ. Ag jagãgtãn nĩ gé. Hã ra vẽso jykrén nĩ gé, ājag tỹ ag jykre pãno nón mũ sór tũ nĩ jé. Kavéj ag nỹtĩ, ag jykre kórég to. Kũ ag kavéj tag to én sór tũg nĩ. Vẽso jykrén tãvĩ han nĩ.

Topẽ tỹ tỹ ùn mág nĩ

²⁴ Topẽ vỹ ẽg tỹ prãnh ke tũ han ki kanhró nĩ. Kũ tóg ẽg tỹ ùn há tãvĩ han ki kanhró nĩ gé, ti tỹ kejẽn ẽg jé prẽr ken kũ, ẽg tỹ ti rĩnja tá nỹtĩ jé. Tá tóg sĩnvĩ pẽ nĩ, sér pẽ.

²⁵ Pir ti nĩ, Topẽ ti, ẽg kren han tĩ ti. Ēg Senhor tỹ Jesus Cristo tugrĩn tóg ẽg kren han tĩ. Ti hã ne tóg tar nĩ', ti hã ne tóg tỹ ùn mág nĩ', ti hã ne tóg tỹ pã'i nĩ', ti hã ne tóg tỹ vẽn kar kri ke nĩ'. Vãsy tóg kã nĩ nĩ, nén ù kar han tũg ki, ùri ke gé, hã ra tóg tũg' henh ke tũ pẽ nĩ gé, ti tỹ tỹ ùn mág jé ti.

Amém.

JOÃO Tÿ ĘG Tÿ NÉN VENH KE MÛ RÁ

¹ Topě vÿ Jesus Cristo mÿ nén (ũ) tÿ hên ri ke ven, ěg tÿ kãnhmar nén venh ke mÛ ti, kÿ Jesus vÿ ěg mÿ ven, ěg tÿ tÿ ti camarada nÿtĩn kÿ. Kÿ tóg ã tÿ jêně jafã jêně, ti tÿ ti camarada tÿ João mÿ tó jé gé.

² Ve kãn ja ti nĩ, João ti, Topě tÿ ti mÿ nén ven mÛ ti, Jesus Cristo tÿ ti mÿ nén ven mÛ ti ke gé. Ti tÿ ve kÿ tóg rán ja nĩ, João ti, hã vÿ nĩ.

³ Ũ tÿ vênh rá tag to ke mÛ ag mÿ tóg vĩ há han ke mÛ, Topě ti, ũ tÿ vênh vĩ tag męg mÛ ag mÿ ke gé. Topě tÿ tó mÿn hã vë, ěg tÿ ti vĩ ki króm jé. Kãnhmar ěg tóg tag ki rán kÿ nĩ tag ve kãn ke mÛ, kakó tãvĩ tóg tĩ ha.

João tÿ ěmã tÿ 7 (ke) tá Jesus mré ke ag mÿ ti vĩ tó

⁴ João tÿ rá hã vë. Isÿ ga tÿ Ásia tá Jesus mré ke ag mÿ rán hã vë, cidade tÿ 7 (ke) ki ke ag mÿ.

Topě jé ãjag tÿ tar' hé, kÿ ãjag jé krĩ kãnhvy nÿtĩ. Topě vÿ nĩgtĩ. Vãšÿ tóg nĩ ja nĩgtĩ, kÿ tóg ũri nĩ nĩ, hã ra tóg kãtĩg ke mÛ gé. Ti kuprĩg vÿ ti mré nĩ gé, kÿ tóg tÿ ũ tÿ 7 (ke) ve nĩ, ti kuprĩg ti. Topě nĩgia tá tóg nÿtĩ, ti kuprĩg tÿ tÿ ũ tÿ 7 (ke) ve ěn ti. Ti kuprĩg ěn jé Topě mré ãjag krĩ tÿ kãnhvy' hé,

⁵ Jesus Cristo mré ke gé. Jesus vÿ Topě vĩ tó há han ja nĩgtĩ, to tóg krónh ke ja tũ nĩgtĩ. Kÿ tóg ã ter kar kÿ rĩr mãn ven ja nĩ. Kÿ ěg rĩnrĩr mãn ke mÛ gé, ti nón. Kÿ Jesus tóg ěprã pã'i ag kri tÿ ũn mág jé gé.

Ěg to há tãvĩ ti nĩ, Cristo ti. Ti kyvénh tóg ěg jagfÿ ti ki kãkutě, tÿ tóg ěg krenkren han, ěg tÿ Topě vĩ mranh ja to.

⁶ Kÿ tóg ěg tÿ pã'i han ke mÛ gé, ti krēm. Topě tũ ki rĩr jé ěg tóg ke mÛ gé, ti jóg tũ ki. Ti hã ne ã pir mÿ tÿ ũn mág nĩ', Jesus ti. Ti hã ne ã pir mÿ tar nĩ', ũri, kÿ tóg tũ' henh ke tũ nĩ, ti tar nĩn kÿ. Hã vë.

⁷ Ha vé, kãtĩg mãn jé tóg ke mÛ, kanhkã góg kãmĩ. Vênh kar vÿ ti venh ke mÛ, ěn kã, ũ tÿ ti kusón mÛ ag mré hã. Kÿ povo kar vÿ ti tugrĩn jagtar kãn ke mÛ. Jagtar jé ag tóg

ke mÛ, vėsÿrénh jé ag tóg ke mÛ, ha vemnĩ. Hã vë.

⁸ “Ũn ve vÿ tÿ inh nĩ, hã ra sóg tÿ ěgno nĩnh ke mÛ gé,” he tóg, ěg pã'i mág ti. Vãšÿ tóg nĩgtĩ, kÿ tóg ver ũri nĩ gé, kÿ tóg kãtĩg ke mÛ gé, ũ tÿ nén (ũ) kar han ki kanhrãn mÛ ěn ti.

João tÿ Jesus ve

⁹ Ājag mré ke vÿ tÿ inh nĩ, inh, hã vÿ: João, he mÛ. Jesus mré ke vÿ tÿ inh nĩ, ãjag mré. Jagtar inh nĩ gé, ãjag jagãgtar ri ke inh nĩ gé, hã ra sóg ãjag kóm to krónh ke tũ nĩgtĩ gé, kÿ sóg ãjag mré Topě tÿ tÿ ěg pã'i nĩ venh ke mÛ gé. Goj vãso tá inh nĩ nĩ, ti jÿjÿn hã vÿ: Patmos, he mÛ. Ki sóg se kÿ nĩ nĩ, isÿ Topě vĩ tó ja tugrĩn. Jesus vÿ ěg mÿ ki hã tó ja nĩ. Ti vĩ ěn tó ja inh nĩ, vênh kar mÿ, hã tugrĩn isóg se kÿ jé.

¹⁰ Domingo ũ kã Topě kuprĩg tóg inh mÿ nén nē ven. Inh pãnĩ tá sóg jamã hár(a) vênh vĩ mē, kÿ tóg trombeta kyr mē ja nĩ, vênh vĩ ěn ti.

¹¹ Kÿ tóg inh mÿ: “rán nĩ, ã tÿ nén vég mÛ tag ti,” he ja nĩ. “Livro ki rán nĩ. Inh mré ke ag mÿ livro tag jêněmnĩ, cidade tÿ Éfeso ra, cidade tÿ Esmirna ra, cidade tÿ Pérgamo ra, cidade tÿ Tiatira ra, cidade tÿ Sardes ra, cidade tÿ Filadélfia ra, cidade tÿ Laodicéia ra ke gé,” he ja tóg nĩ, inh pãnĩ tá inh mÿ vênh vĩ tó mÛ ěn ti.

¹² Kÿ sóg vėsÿjãm ěvãnh, sÿ ũ tÿ inh mré vĩ mÛ ěn ve jé. Isÿ vėsÿjãm ěvãnh kÿ sóg néj tÿ kri vin jafã tÿ 7 (ke) vé, vela tÿ kri vin jafã ěn, ouro tÿ tóg hÿn han kÿ nÿtĩ.

¹³ Néj tÿ kri vin jafã ag kuju kã ũ tóg jé nĩ, hã ra tóg tÿ ěprã ke nĩ ve nĩ. Kur téj tu kÿ tóg jé nĩ, ouro tÿ tóg vėsóg fĩn kÿ jé nĩ gé, ti fe kri, ũ tÿ tÿ ěprã ke nĩ ve ěn ti.

¹⁴ Gãnh kupri pē tóg jé, vênh męg tÿ carneiro kyki kupri ri ke tóg nĩ, ti gãnh ti, kukryr kó ri ke. Kaně gru tóg jé nĩ, pĩ gru ri ke.

¹⁵ Pěn jęngrě tóg jé nĩ, ouro jęngrě ri ke. Ěg tÿ pĩ ki ouro vãm kÿ ti tÿ jonh ke kÿ jęngrě sĩnvĩ han ěn ri ke ti nĩ, ti pěn ti. Ti vĩ vÿ goj krog tÿ óóh he ěn ri ke nĩ.

¹⁶ Krĩg tÿ 7 (ke) génh kÿ tóg jé nĩ. Ā pęgia tÿ tóg krĩg tÿ 7 (ke) génh kÿ jé nĩ. Kÿ rógro jã vÿ ti jęnkã tá kãkutě mÛ. Jã régre ti nĩ, rógro ti, jã há. Ti kakã vÿ kókov nĩ, rá tÿ ěg nĩno kã

sa ký kókov ěn ri ke ti nĩ, ũ tỹ tỹ ěprã ke nĩ ve ěn kakã ti.

¹⁷ Sỹ ti ve ký sóg ti pĕn krĕm kutĕ mũ, ga kri. Ter ve han inh. Hã ra tóg ã pĕgja tỹ inh mĕg mũ, ký tóg inh mỹ: “inh kamĕg tũg nĩ,” he mũ. “Ũn ve vỹ tỹ inh nĩ, ěgno ke gé.

¹⁸ Rĩr inh jĕ nĩ. Ter ja inh nĩ, hã ra sóg rĩr jĕ nĩ, ký sóg ter mãn ke tũ pĕ nĩ. Isỹ ũ mỹ: “ter jé ã tóg ke mũ,” hen ký tóg ter ke mũ. Isỹ ũ mỹ: “ter ke tũ ã tóg nĩ,” hen ký tóg ter ke tũ nĩ gé, ký tóg vĕser jamã venh ke tũ nĩ gé,” he tóg.

¹⁹ “Rán nĩ, ã tỹ nĕn vég mũ tag ti, ěprã ke ag tỹ ũri nĕn vég mũ ti, ag tỹ kar ký nĕn venh ke mũ ti ke gé,” he tóg.

²⁰ “Krĩg ag vég ã tóg jĕ nĩ, inh nĩgĕ kãki. Ký ã tóg néj tỹ kri vin jafã ag vég mũ gé, ouro tỹ vela tỹ kri vin jafã tỹ 7 (ke) tag ag. Nhỹ ã mỹ kãmĕn, ã tỹ nĕn vég mũ tag ti. Krĩg tỹ 7 (ke) tag ri ke ag nỹtĩ, Topĕ tỹ jĕgnĕ jafã ag. Inh ki ge ký nỹtĩ ag ki ag tóg rĩr tĩ, Topĕ tỹ jĕgnĕ jafã tag ag. Sỹ ã mỹ cidade tỹ 7 (ke) tó mũ ěn tá ag nỹtĩ, inh mré ke ag, ag tỹ ũn ki rĩr mũ ag. Kar ký néj tỹ kri vin jafã ri ke ti nỹtĩ, ũ tỹ inh ki ge ký nỹtĩ tag ag,” he tóg, ũ tỹ tỹ ěprã ke nĩ ve ěn ti.

2

Jesus tỹ Ēfeso tá igreja tá ke ag mỹ ã vĩ jĕnĕ

¹ “Ũ tỹ cidade tỹ Ēfeso tá inh mré ke ag ki rĩr mũ ěn mỹ tag rán nĩ, ha mĕ,” he tóg, ũ tỹ tỹ ěprã ke nĩ ve ěn ti. “Ũ tỹ ã mỹ vĕnh vĩ jĕnĕg mũ vỹ krĩg tỹ 7 (ke) génh ký jĕ nĩ, ti pĕgja tá ti nĩgĕ kãki, hemnĩ. Ký tóg néj tỹ kri vin jafã tỹ 7 (ke) kãmĩ tĩ mũ gé, hemnĩ.

² Ājag tỹ nĕn han mũ ki kanhró sóg nĩ, he ti, hemnĩ iso. Vãsã Ājag tóg tĩ. Iso krónh ke tũ Ājag tóg nỹtĩ. Ũn jykre pãno ag tóg Ājag mỹ kórĕg nỹtĩ. Ājag kãmĩ ũ tóg ón ký: apóstolo vỹ tỹ ěg nỹtĩ, he ja nỹtĩ. Ag jykre tugnỹm ký Ājag tóg ag ón mũ tag to ag pan.

³ Iso tar Ājag tóg nỹtĩ. Isugrĩn Ājag tóg jagtar, ge ra Ājag tóg iso krónh ke ja tũ nĩ.

⁴ Hã ra sóg nĕn ũ sĩ tó sór mũ, Ājag mỹ. Ājag tỹ nĕn han mũ ũ tóg inh mỹ há tũ nĩ. Ājag tỹ inh ki ge vén ký Ājag tóg iso há tãvĩ nỹtĩ ja nĩgtĩ, ký tóg há tĩ ja nĩ, hã ra Ājag tóg ũri krónh ke mũ.

⁵ Ājag tỹ vãsỹ iso tar ěn mĩ ěkrĕn nĩ. Ājag jykre kórĕg tovãnh nĩ. Ājag tỹ inh ki ge vén ěn ri ke han mãn nĩ, iso há tãvĩ nỹtĩ mãn nĩ. Ājag tỹ tag han sór tũ nỹtĩn ký sóg Ājag ki jun ký (sóg) Ājag tỹ néj tỹ kri vin jafã ěn ma tĩg ke mũ, ha vemnĩ.

⁶ Nĕn ũ tóg hã ra há nĩ, Ājag tỹ nĕn han mũ ũ ti. Nicolaítas he mũ ěn ag jykre to Ājag tóg kórĕg tãvĩ nỹtĩ, isỹ ag jykre to kórĕg kóm, he tóg, hemnĩ, Ēfeso tá ke ag mỹ, vĕnh rán ki,” he tóg inh mỹ, ũ tỹ tỹ ěprã ke nĩ ve ěn ti.

⁷ “Ũ nĩgrĕg nỹtĩ ag tỹ tỹ jĕmĕ jé, Topĕ kuprĩg vĩ ti. Ũ tỹ inh ki ge ký nỹtĩ ag hã mỹ tóg tó tĩ, Topĕ kuprĩg ti,” he tóg. “Ũ tỹ isovãnh tũ ěn vỹ ka kanĕ há konh ke mũ, ka tỹ ěg rĩnrĩr han mũ ěn kanĕ, Topĕ jakré ěn kanĕ,” he tóg, ũ tỹ tỹ ěprã ke nĩ ve ěn ti. Ti tỹ Ēfeso tá ke ag mỹ vĕnh vĩ jĕnĕg mũn hã vĕ.

Jesus tỹ Esmirna tá igreja tá ke ag mỹ ã vĩ jĕnĕ

⁸ Ký tóg: “ũ tỹ cidade tỹ Esmirna tá inh ki ge ký nỹtĩ ag ki rĩr mũ ěn mỹ tag rán nĩ, ha mĕ,” he mũ gé, ũ tỹ tỹ ěprã ke nĩ ve ěn ti. “Ũ tỹ ã mỹ vĕnh vĩ jĕnĕg mũ vỹ tỹ ũn ve nĩ, hã ra tóg tỹ ěgno nĩ gé, hemnĩ. Ter ja ti nĩ, hã ra tóg rĩr mãn, hemnĩ iso.

⁹ Isugrĩn ag tóg Ājag to kórĕg nỹtĩ, ký Ājag tóg jagãgtar nỹtĩ. Ki kanhró sóg nĩ. Ge ra Ājag tóg inhhã rico ri ke nỹtĩ. Ājag to ag tóg vĩ kónãn tĩ, ũ tỹ ón ký: “Judeu vỹ tỹ ěg nỹtĩ, Topĕ tũ vỹ tỹ ěg nỹtĩ,” he mũ ag. Ag pi(jé) tỹ Topĕ tũ nỹtĩ. Satanás tũ vỹ tỹ ag nỹtĩ.

¹⁰ Ājag jagtar han jé ag tóg ke mũ, isugrĩn. Mũmĕg tũg nĩ hã ra. Japo vỹ Ājag kato vãsã ke mũ, ký ag tóg vĕseja kãtã Ājag vãm ke mũ. Japo tỹ Ājag jykre ve sór hã vĕ. Kurã tỹ 10 (ke) ki ke vĕ, ag tỹ Ājag vóg kónãn ke ti. Isovãnh tũg nĩ, ag tỹ Ājag tĕn sór mũ ra. Ký Ājag tóg rĩr krỹg (ja) tũ venh ke mũ, ký tóg Ājag mỹ sér tĩnh mũ, he tóg, hemnĩ, vĕnh rán ki,” he tóg, ũ tỹ tỹ ěprã ke nĩ ve ěn ti, inh mỹ.

¹¹ “Ũ nĩgrĕg nỹtĩ ag tỹ tỹ jĕmĕ jé, Topĕ kuprĩg vĩ ti. Ũ tỹ inh ki ge ký nỹtĩ ag hã mỹ tóg tó tĩ, Topĕ kuprĩg ti,” he tóg. “Ũ tỹ isovãnh tũ ěn vỹ nũgme ki vár ke tũ nĩ,” he tóg, ũ tỹ tỹ ěprã ke nĩ ve ěn ti. Ti tỹ Esmirna tá ke ag mỹ vĕnh vĩ jĕnĕg mũn hã vĕ.

Jesus tỹ Pérgamo tá igreja tá ke ag mỹ ã vỹ jẽnẽ

12 Kĩ tóg: “ũ tỹ cidade tỹ Pérgamo tá inh ki ge kỹ nỹtĩ ag ki rĩr mũ ãn mỹ tag rán nĩ, ha mẽ,” he mũ gé, ù tỹ tỹ ãprã ke nĩ ve ãn ti. “ũ tỹ ã mỹ vẽnĩ vỹ jẽnẽg mũ vỹ rógro jã régre vyn kỹ jẽ nĩ, ùn jã há ãn, hemnĩ iso.

13 Satanás nĩgja tá ãjag tóg ãmã nỹtĩ, ki kanhró sóg nĩ. Iso tar ãjag tóg nỹtĩ. ãjag régre tỹ Antipas tén ja ag tóg nĩ, ti tỹ inh jyjy tó tigrĩn. Ge ra ãjag tóg iso: “ti ki kagtĩg sóg nĩ,” he ja tũ nĩ, ãjag tỹ Satanás jamã tá nỹtĩ ra.

14 Hã ra sóg nén ù tó sór mũ gé, ãjag mỹ, ti tỹ inh mỹ há tũ nĩn kỹ. ãjag kãmĩ ù ag tóg Balaão jykre han sór mũ. Balaão vỹ Balaque mỹ kãmén ja nĩ, ti tỹ Israel krẽ ag krĩn kónãn jé, Topẽ vỹ mranh ke to. Ti tỹ ag krĩn kónãn kỹ ag tóg vẽnĩ kãggrá to festa ko ja nĩgtĩ. Ag tỹ ón kỹ vẽnĩ kãggrá to: topẽ, he mũ ãn mỹ festa ja vỹ. ãn ko kỹ ag tóg ãjag prũ tũ fag mré nỹgnỹ' he ja nĩgtĩ gé. Tag han sór ag tóg mũ gé, Balaão kóm, ãjag kãmĩ ù ag, kỹ tóg inh mỹ kórég nỹ.

15 Kỹ ãjag kãmĩ ù ag tóg Nicolaítas he mũ ãn ag jykre han sór mũ gé.

16 Tovãnh nĩ, ãjag jykre tag. Ke tũ nĩ mũ ra sóg ãjag ki jun ke mũ, sỹ ù tỹ vẽnĩ jykre tag han mũ ag kato vãsãn jé, rógro tỹ inh jẽnkã tá kãkutẽ mũ ãn tỹ, hemnĩ, vẽnĩ rán ki,” he tóg, inh mỹ, ù tỹ tỹ ãprã ke nĩ ve ãn ti.

17 “ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vỹ ti. ù tỹ inh ki ge kỹ nỹtĩ ag hã mỹ tóg tó tĩ, Topẽ kuprĩg ti,” he tóg.

“ũ tỹ isovãnh tũ mỹ sóg kanhkã tá vỹjẽn ãn nĩm ke mũ, vỹjẽn tỹ péju kỹ nĩ ãn. Ag mỹ sóg pó kupri nĩm ke mũ gé. Kri vẽnĩ jyjy tãg tóg rán kỹ nĩ. ù pi(jé) vẽnĩ jiji tag ki kanhró nĩnh mũ'. ù tỹ pó kupri ãn mãg mũ ãn hã tóg ki kanhró nĩnh mũ, ã pir mỹ, ti jyjy tãg ki, he tóg, hemnĩ,” he tóg, ù tỹ tỹ ãprã ke nĩ ve ãn ti. Ti tỹ cidade tỹ Pérgamo tá ke ag mỹ vẽnĩ vỹ jẽnẽg mũn hã vỹ.

Jesus tỹ Tiatira tá igreja tá ke ag mỹ ã vỹ jẽnẽ

18 Kĩ tóg: “ũ tỹ cidade tỹ Tiatira tá inh ki ge kỹ nỹtĩ ag ki rĩr mũ ãn mỹ tag rán nĩ, ha mẽ,” he mũ gé, ù tỹ tỹ ãprã ke nĩ ve ãn ti. “ũ tỹ ã mỹ vẽnĩ vỹ jẽnẽg mũ vỹ tỹ Topẽ kósĩn nĩ,

hemnĩ,” he tóg. “Ti kanẽ vỹ pĩ gru ri ke nĩ, ti pẽn vỹ ouro jẽngrẽ ri ke nĩ gé, hemnĩ iso.

19 ãjag tỹ nén han mũ vég sóg tĩ. Iso há tãvĩ ãjag tóg nỹtĩ, inh ki rã pẽ han kỹ ãjag tóg nỹtĩ. Inh rãnrãj han ãjag tóg mũgtĩ, to krónh ke tũ ãjag tóg nĩgtĩ. Vãsỹ ãjag tóg inh jykre to tar nỹtĩ ja nĩgtĩ, kỹ ãjag tóg ùri to tar kãfór nỹtĩ gé.

20 Hã ra sóg nén ù sĩ tó sór mũ gé, ãjag mỹ, ti tỹ inh mỹ há tũ nĩn kỹ. Jezabel fi vỹ kamẽg ja tũ ãjag tóg nĩgtĩ, hã kỹ fi tóg ón kỹ vỹ tĩ nĩ. Inh camarada ag krĩn kónãn fi tóg tĩ, ag tỹ fi mré nỹ jé, ag tỹ vẽnĩ kãggrá mỹ nén (ũ) nĩ pũn mũ ãn ko jé gé.

21 Fi tovãnh isóg mũ vỹ, fi tỹ ã jykre tugnỹm jé, hã ra fi tóg ã jykre kórég tovãnh sór tũ nĩ.

22 Fi kagãg jé sóg ke mũ. ù tỹ fi jykre han mũ ag vóg kónãn jé sóg ke mũ gé, ag tỹ fi jykre kórég tovãnh jãvãnh nỹtĩn kỹ.

23 Fi krẽ kãgtén kãn jé sóg ke mũ gé. Kỹ inh ki ge kỹ nỹtĩ kar ag vỹ inh jykre ki kanhró nỹtĩnh mũ. Vẽnĩ kar tỹ nén to jykrén mũ ãn ve kãn sóg tĩ, vẽnĩ kar tỹ nén han sór mũ ãn ke gé. ãjag tỹ nén han mũ ãn ri ke han jé sóg ke mũ, ãjag mỹ, ha vemnĩ.

24 ãjag kãmĩ ù ag tóg hã ra fi jykre han ja tũ nĩgtĩ, ãjag tỹ Tiatira tá nỹtĩ ra. ãjag pi(jé) fi tỹ vẽnĩ jykre han mũ han ja nĩ'. Ag tỹ nén to: “Satanás jykre jagy,” he mũ ãn han sór ja tũ ãjag nĩgtĩ. Hã kỹ sóg ãjag mỹ nén ù jagy tónh ke tũ nĩ gé.

25 ãjag tỹ nén han mũ to tar nỹtĩmĩ, gen kỹ inh kãtĩg mãn ke tag jãvãnh nỹtĩmĩ.

26 ù tỹ isovãnh tũ ãn ag tỹ sóg pã'i hyn han ke mũ, povo kar kri, ù tỹ inh vỹ ki króm mũ ag tỹ, ù tỹ iso krónh ke tũ ãn ag tỹ ke gé. Inh panh vỹ isỹ pã'i han, hã kỹ sóg ãjag tỹ pã'i han ke mũ gé, inh kóm,

27 ãjag tỹ inh kóm tỹ povo kri pã'i nỹtĩ jé. Kỹ ãjag tóg ag to vãsãn ke mũ, ferro tỹ ag mrãnmrãn kỹ, ãg tỹ go'or tỹ kukrũ gãm mũ ãn ri ke.

28 Tar ãjag tóg nỹtĩnh mũ, kỹ sóg ãjag mỹ krĩg mág nĩm ke mũ gé, he tóg, hemnĩ, ag mỹ, vẽnĩ rán ki,” he tóg, ù tỹ tỹ ãprã ke nĩ ve ãn ti.

29 “ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vỹ ti. ù tỹ inh ki ge kỹ nỹtĩ ag hã mỹ

tóg tó tí, Topê kuprĩg ti,” he tóg, ù tỹ tỹ êprã ke nĩ ve ên ti. Ti tỹ cidade tỹ Tiatira tá ke ag mỹ vẽnĩ vĩ jẽnẽg mũn hã vẽn.

3

Jesus tỹ Sardes tá igreja tá ke ag mỹ ã vĩ jẽnẽ

¹ Kĩ tóg: “ù tỹ cidade tỹ Sardes tá inh ki ge kũ nỹtĩ ag ki rĩr mũ ên mỹ tag rán nĩ, ha mẽ,” he mũ gé. “Û tỹ ã mỹ vẽnĩ vĩ jẽnẽg mũ vỹ Topê kuprĩg tỹ jagrẽ nĩ, ti kuprĩg tỹ 7 (ke) nĩ ve ên tỹ, kũ tóg krĩg tỹ 7 (ke) mũn kũ jẽ nĩ gé, hemnĩ iso,” he tóg. “Ăjag tỹ nén han mũ ki kanhró sóg nĩ. Vẽnĩ kar vỹ Ăjag to: “há ag nỹtĩ, tar ag nỹtĩ,” he tĩ, hã ra Ăjag tóg iso krónh ke ja nĩ, hã kũ Ăjag tóg ùn kãgter mũ ri ke nỹtĩ.

² Nũr tovãnh nĩ, tar nỹtĩmũ, ke tũ nĩ mũ ra Ăjag kãgter pẽ han kãn ke mũ. Ăjag jykre tugnỹm inh, hã ra tóg há tũ nĩ ver. Topê vỹ Ăjag tỹ nén han mũ to há tũ nĩ ver.

³ Vẽnĩ vĩ sér mẽ Ăjag mỹr, kũ to jykrén há han nĩ. To tar nỹtĩmũ, to vãsãn nĩ. Ăjag nũgnũr kũ sóg Ăjag krĩg mỹ jun ke mũ, ù tỹ êg tỹ nén péju(g) tĩ tỹ êg nũr krĩg mỹ jun mũ ri ke han jé sóg ke mũ. Inh jun ke kurã ki kagtĩg Ăjag tóg nỹtĩ mỹr.

⁴ Ăjag kãmĩ ù ag tóg hã ra vẽnĩ kavénh ja tũ nĩ, Sardes tá. Tag ag vỹ kur kupri ên rĩnh ke mũ, inh mré ag nỹtĩnh ke mũ.

⁵ Û tỹ isovãnh tũ ên ag vỹ kur kupri ên rĩnh kãn ke mũ. Ag jygy kykũnh ke tũ inh nĩ, inh livro ki. Ûn rĩnrĩr ke mũ ag jygi vỹ ki ránrán kũ nỹtĩ, inh livro ên ki. Ên ag jygy tó jé sóg ke mũ, inh panh mỹ, ti tỹ jẽgnẽ jafã kar ag mỹ ke gé, he tóg, hemnĩ, vẽnĩ rán ki,” he tóg, inh mỹ, ù tỹ tỹ êprã ke nĩ ve ên ti.

⁶ “Û nĩgrẽg nỹtĩ ag tỹ tỹ jẽmẽ jé, Topê kuprĩg vĩ ti. Û tỹ inh ki ge kũ nỹtĩ ag hã mỹ tóg tónh ke mũ, Topê kuprĩg ti,” he tóg, ù tỹ tỹ êprã ke nĩ ve ên ti. Ti tỹ cidade tỹ Sardes tá ke ag mỹ vẽnĩ vĩ jẽnẽg mũn hã vẽn.

Jesus tỹ Filadélfia tá igreja tá ke ag mỹ ã vĩ jẽnẽ

⁷ Kĩ tóg: “ù tỹ cidade tỹ Filadélfia tá inh ki ge kũ nỹtĩ ag ki rĩr mũ ên mỹ tag rán nĩ, ha mẽ,” he mũ gé. “Û tỹ ã mỹ vẽnĩ vĩ jẽnẽg mũ vỹ tỹ ùn há pẽ nĩ, ùn tar tãvĩ, kũ tóg ki hã

tó tí, hemnĩ. Davi ên tỹ jãnkã róm jafã vyn kũ tóg jẽ nĩ, jãnkã nón jafã ên ti, chave ên ti, hemnĩ. Ti tỹ jãnkã ù róm kũ ù tóg nĩfénh mũn ke tũ nĩ, kũ ti tỹ jãnkã ù nĩfénh kũ ù tóg nón mũn ke tũ nĩ gé, hemnĩ, iso,” he tóg.

⁸ “Ăjag tỹ nén han mũ ki kanhró sóg nĩ. Tỹ nén mág tũ Ăjag nỹtĩ. Hã ra Ăjag tóg isỹ Ăjag mỹ nén tó mũ ên ki króm kũ nỹtĩgtĩ, isovãnh ja tũ Ăjag tóg nỹgtĩ. Ăjag mỹ sóg êg tỹ jãnkã róm tĩ ên ri ke han, kũ ù tỹ Ăjag jo nĩfénh ke tóg tũ tĩ.

⁹ Ha mẽ, sỹ nén tónh ke ti. Ăjag mỹ sóg ù ag jẽgnẽnh mũ, Satanás mré ke ù ag. Ón kũ ag tóg: “Judeu vỹ tỹ êg nỹtĩ, Topê mré ke vỹ tỹ êg nỹtĩ,” henh ke mũ. Ag ón hã vẽn. Ag tỹ ke sór tũ ra ag tóg Ăjag krẽm mũg kenh ke mũ, Ăjag mỹ: “êg kãfór Ăjag tóg nỹtĩ,” hen kũ, ha vemnĩ. Ăjag to há tãvĩ sóg nĩ. Hã kũ Ăjag kato vãsãnsãn mũ ag vỹ tag venh ke mũ, ha vemnĩ.

¹⁰ Inh vĩ ki króm Ăjag tóg mũ mỹr, sỹ Ăjag mỹ: “isovãnh tũg nĩ,” hen kũ. Hã kũ sóg Ăjag jy nĩgãnh ke mũ, ga kri ke kar ag tỹ nén ù jagy venh ke kurã ên kã. Ti jagy tãvĩ ve jé ag tóg ke mũ, êprã ke kar ên ag, isỹ ag jykre tugnỹm ken kũ.

¹¹ Kãnhmar inh kãtĩg ke mũ. Ăjag tỹ inh ki ge kũ nỹtĩ tag tovãnh tũg nĩ, ke tũ nĩ mũ ra ù ag tóg Ăjag jẽgja kã jẽ kũ nén tỹ Ăjag mỹ sér tĩnh ke mũ ên venh ke mũ inhhã.

¹² Û tỹ isovãnh tũ ên ag tỹ sóg ãn nũna ri ke han ke mũ, kanhkã tá, Topê jo ãn ri ke ên tá. Tá ag pa mũn ke tũ nỹtĩ ha. Ag kri sóg Topê jiji rán ke mũ gé, Topê jamã jygy ti ke gé. Cidade tỹ Jerusalém tãg to ken hã vẽn. Kanhkã tá tóg kãtérenh kenh ke mũ, Topê tá, Jerusalém tãg tag ti. Kar kũ sóg ag kri inh jiji tãg rán ke mũ gé, he tóg, hemnĩ, vẽnĩ rán ki,” he tóg inh mỹ, ù tỹ tỹ êprã ke nĩ ve ên ti.

¹³ “Û nĩgrẽg nỹtĩ ag tỹ tỹ jẽmẽ jé, Topê kuprĩg vĩ ti, ù tỹ inh ki ge kũ nỹtĩ ag hã mỹ tóg tónh ke mũ, Topê kuprĩg ti,” he tóg, ù tỹ tỹ êprã ke nĩ ve ên ti. Ti tỹ cidade tỹ Filadélfia tá ke ag mỹ vẽnĩ vĩ jẽnẽg mũn hã vẽn.

Jesus tỹ Laodicéia tá igreja tá ke ag mỹ ã vĩ jẽnẽ

¹⁴ Kĩ tóg: “ù tỹ cidade tỹ Laodicéia tá inh ki ge kũ nỹtĩ ag ki rĩr mũ ên mỹ tag rán nĩ,

ha mẽ,” he mũ gé. “Ũ tỹ ã mỹ vênh vĩ jënêg mũ jyjyn há vỹ: “ki há tóg mũn há vễ,” he mũ, hemnĩ,” he tóg. “Ki há tóg tóg tĩ, nén ù kar ki. Ôn vãnh ti nĩgtĩ, hemnĩ. Ti há tugrĩn Topê tóg nén (ũ) kar han ja nĩgtĩ, hemnĩ iso,” he tóg.

¹⁵ “Ăjag tỹ nén han mũ ki kanhró sóg nĩ. Ăjag pi(jé) goj rỹ jagy ri ke nỹtĩ', kỹ ăjag pi(jé) goj kusa ri ke nỹtĩ gé'. Ăjag tỹ goj rỹ jagy ên ri ke nỹtĩ ran há tĩnh mũ vễ, ăjag tỹ goj kusa ên ri ke nỹtĩ ran há tĩnh mũ gé vễ vễ.

¹⁶ Hã ra ăjag tóg goj rỹ mẽ ri ke nỹtĩ, ăjag tỹ iso krój nỹtĩn kỹ. Hã kỹ sóg ăjag vãm sór mũ, êg tỹ rěrĩr tá goj rỹ mẽ ên pra kỹ kujẽn ên ri ke han jé sóg ke mũ, ăjag tỹ, ha vemnĩ.

¹⁷ Vêso ăjag tóg: “rico êg nỹtĩ, há êg nỹtĩ, nén ù tóg êg mỹ tũ' he tũ pẽ nĩ,” he tĩ. Hã tũ tóg ăjag tóg tĩ. Jagăgtar ăjag tóg nỹtĩ, mỹr, ha mẽ. Tỹ nén tũ ăjag tóg nỹtĩ, jykre kórég ăjag tóg nỹtĩ, kur tũ ăjag tóg nỹtĩ, kyvó ăjag tóg nỹtĩ, ăjag tỹ há nỹtĩ ve ra. Hã ra ăjag tóg ki kagtĩg nỹtĩ, ăjag kórég nỹtĩ tag ki.

¹⁸ Hã kỹ sóg ăjag mỹ: “inh ki mãn kãmũ jêg, ouro há ên ti,” he sór mũ, ăjag tỹ rico nỹtĩ jé. Kur kupri kajãm nĩ, ăjag tỹ kator nỹtĩ tũ nĩ jé, ăjag mỹ'ăg tũ nĩ jé. Vênh kagta kajãm nĩ, ăjag kanê mỹ, ăjag tỹ ve há han mãn jé.

¹⁹ Isỹ ù to há nĩ ên mỹ sóg vĩ tar han tĩ, ti kanhrãn jé. Vêso jykren kỹ ăjag jykre kórég togvãnh nĩ.

²⁰ Mẽ há han nĩ, sỹ ăjag mỹ nén tóg mũ tag. Re tá inh jê nĩ, jänkã tá, kỹ sóg tỹ tórón' tórón' ke mũ, tỹ tag' tag' ke sóg mũ. Ũ tỹ inh vĩ mẽg mũ mỹ tóg há tĩ, kỹ tóg inh mỹ nón ke mũ, jänkã ti, kỹ sóg ti ãn kãra rãnh ke mũ. Kỹ sóg ti mré jên ke mũ, kỹ tóg inh mré jên ke mũ gé, ha mẽ.

²¹ Ũ tỹ isovãnh tũ ên mỹ sóg: “inh mré nĩ,” he sór mũ, kỹ tóg inh ri ke tỹ ùn mág nĩnh ke mũ. Inh panh mré sóg tỹ ùn mág nĩ ha, isỹ ti tovãnh ja tũ nĩn kỹ, kỹ tóg tá inh mré nĩnh ke mũ gé, he tóg, hemnĩ, vênh rán ki,” he tóg, ù tỹ tỹ êprã ke nĩ ve ên ti.

²² “Ũ nĩgrêg nỹtĩ ag tỹ tỹ jêmẽ jé, Topê kuprĩg vĩ ti, ù tỹ inh ki ge kỹ nỹtĩ ag há mỹ tóg tónh ke mũ, Topê kuprĩg ti,” he tóg, ù tỹ tỹ êprã ke nĩ ve ên ti. Ti tỹ cidade tỹ Laodicéia tá ke ag mỹ vênh vĩ jënêg mũn há

vễ.

4

Ag tỹ kanhkã tá Topê mỹ vĩ há han

¹ Kỹ sóg kynhmỹ êvãnh, kỹ sóg kanhkã jänkã vé, há ra tóg róm ke kỹ jê nĩ. Kỹ sóg vênh vĩ ên jêmẽ mãn, vênh vĩ tỹ trombeta kyr ri ke ên, kỹ tóg inh mỹ: “ha kãtãpry,” he mũ. “Ă mỹ sóg ven sór mũ, ăjag tỹ kar kỹ nén venh ke mũ ti,” he tóg, vênh vĩ ti.

² Kỹ vãnh Topê kuprĩg tóg inh krĩn mũ, kỹ sóg nén nén vэг mũ. Kanhkã tá tóg nĩgia sĩnvĩ jê nĩ, kỹ ù tóg kri nĩ nĩ.

³ Ti kakã tóg jêngrê nĩ, pó sĩnvĩ jêngrê ên ri ke, pó tỹ jaspe jêngrê ên ri ke, pó tỹ sardônio jêngrê ên ri ke. Nĩgia sĩnvĩ ên vỹ ta no ri ke nĩ, kỹ tóg jêngrê jê gé, ta no ên ti, pó tỹ esmeralda jêngrê ên ri ke.

⁴ Nĩgia sĩnvĩ ên pênĩn nĩgia sĩnvĩ ù tóg nỹtĩ gé, ù tỹ 24 (ke) ti nỹtĩ. Nĩgia ên kri kófa ag tóg nĩgnĩ kỹ nỹtĩ, kófa tỹ 24 (ke) ag. Kur kupri rĩnh kỹ ag tóg nỹtĩ, ouro tỹ krĩ tógfĩ rĩnh kỹ ag tóg nỹtĩ gé.

⁵ Nĩgia sĩnvĩ ên tá ta tỹ kómkóm ke ri ke ên tóg vênh ven mũ, kỹ ta tỹ tỹrỹr he ri ke ên tóg mẽ há tĩ gé, vênh vĩ ke gé. Ti jo pĩ jónhkó gru tỹ 7 (ke) tóg nỹtĩ gé. Topê kuprĩg to ken há vễ, ù tỹ 7 (ke) nĩ ve ên, há vỹ: pĩ jónhkó gru tỹ 7 (ke), he mũ.

⁶ Nĩgia sĩnvĩ kakãm nén ù tóg nỹ nĩ, kỹ tóg vidro tỹ goj nĩ ve nĩ, goj jãpri, goj kókov (pẽ).

Kỹ nĩgia sĩnvĩ ên pênĩn ù ag tóg nỹtĩ, ù tỹ 4 (ke) ag, ùn kanê e tãvĩ ag. Ag kakã ki ag tóg kanê e nỹtĩ, kar kỹ ag pãnĩ tá ke gé.

⁷ Ag kãmĩ ù tóg mĩg ve ri ke nĩ, kỹ ù tóg monh tãg ve ri ke nĩ gé, kỹ ù tóg êg kakã ve ri ke nĩ, jãvo ù tóg kónhkó mág tẽ tĩ ve ri ke nĩ.

⁸ Ag kar vỹ fêr tỹ 6 (ke) nỹtĩ. Kỹ ag tóg ăjag fêr ki kanê e nỹtĩ gé, fêr ven ja tá, ti kãtã ke gé. Kurã kar ki ag tóg jãn tĩ, kuty kar ki ke gé, jãn to krónh ke jãvãnh ag tóg nỹtĩ. Ag jãn há vễ, ha mẽ: “ùn mág', mág', mág' vỹ tỹ ti nĩ, êg jóg tỹ Topê ti, ù tỹ nén kar han ki kanhró nĩ ên ti. Vãsỹ tóg nĩ ja nĩgtĩ, kỹ tóg ùri nĩ gé, jãvo tóg kãtĩg ke mũ gé,” he ag tóg tĩ, jãn kỹ, nén nê tỹ 4 (ke) ên ag.

⁹ Gen kỹ ag tóg Topê mỹ jãn tĩ, ti tỹ tỹ ùn mág nĩ ên há tỹ ag tóg jãn tĩ. Ti mỹ vĩ há han ag tóg tĩ. Ti mỹ ag tóg: “nén kar hyn han há

ã tóg nĩ,” he tĩ. Û tỹ nĩgja sĩnvĩ ên kri nĩ mũ mĩ ag tóg jãn tĩ, ùn rĩr nĩ ên mĩ. Ti rĩr nĩ vỹ tũg' henh ke tũ pẽ nĩ.

¹⁰ Ag tỹ ti mĩ jãn kỹ kófa tỹ 24 (ke) ên ag vỹ mũgmũg ke tĩ, ù tỹ nĩgja sĩnvĩ kri nĩ ên krêm. Mũgmũg ken kỹ ag tog ti mĩ: “Topẽ vỹ tỹ ã nĩ,” he tĩ, ùn rĩr nĩ ên mĩ. Ti rĩr nĩ vỹ tũg' henh ke tũ pẽ nĩ. Kỹ ag tóg ãjag krĩ tógfĩ ên vin tĩ, nĩgja sĩnvĩ ên krêm.

¹¹ Ti mĩ ag tóg tag tó tĩ, ha mẽ: “êg Senhor vỹ tỹ ã nĩ, Topẽ vỹ tỹ ã nĩ. Nén ù kar hyn han ja ã nĩgtĩ. To jykrén kỹ ã tóg nén ù kar hyn han ja nĩgtĩ, hã kỹ tóg ki nỹtĩ, ã tỹ nén hyn han mũ kar ên ti. ã hã ne ã pir mĩ tá krỹg he mũ', kỹ vênh kar vỹ ã mĩ vĩ há han ke mũ, ã to: “ùn mág vỹ tỹ ti nĩ,” hen kỹ, kỹ ag tóg ã vĩ ki króm tĩ gé,” he ag tóg tĩ, kófa ag, ù tỹ nĩgja sĩnvĩ kri nĩ ên mĩ.

5

Jesus tỹ livro mãn

¹ Kỹ sóg livro vég mũ, livro ên vỹ grĩn kỹ nỹ. Û tỹ nĩgja sĩnvĩ kri nĩ ên vỹ livro ên mãn kỹ nĩ nĩ, ti pẽgja tỹ. Kátá tóg rán kỹ nĩ, ti ven ja tá ke gé. Tógfĩn kỹ tóg nĩ nĩ, livro ti. Tógfĩn ja tỹ 7 (ke) tóg nĩ. Ti tógfĩn kri tóg go'or nĩ gé, ù tỹ kygvãg tũ nĩ jé.

² Kỹ sóg Topẽ tỹ jẽnẽ jafã éhé tãvĩ vég mũ gé. Vĩ tóg mũ, jamã hár(a), kỹ tóg: “ù nỹ hỹn tá krỹg mũ, ti tógfĩn kavãn ti jé?” he mũ.

³ Hã ra ag tóg ù tỹ tá krỹg mũ vég tũ nĩ, kanhkã tá, êprã, vênh kuprĩg ag kãmĩ ke gé. Kỹ ù tỹ livro kavãn ke tóg tũ tĩ, ti rá ve jé.

⁴ Kỹ sóg fỹ mũ. Inh mĩ tóg e tĩ, ù tỹ livro kavãn ke tũ tĩn kỹ, êg tỹ ti rá ven jé.

⁵ Kỹ kófa ag kã ù tóg inh mĩ: “fỹ tũg ra,” he mũ. “Povo tỹ Judeu kãmĩ ùn pir tóg mũg tar ri ke nĩ, Davi krẽ'krẽ ag kã ùn pir ên vỹ tóg vênh kar tỹ hẽn ri ke ja nĩ. Ên vỹ ti tógfĩn tỹ 7 (ke) ên kygvãn ki kanhró nĩ, kỹ tóg livro ki rá ên venh ke mũ,” he tóg inh mĩ, kófa ti.

⁶ Kỹ sóg nĩgja sĩnvĩ ên jo cordeiro vég mũ, mé krẽ ên ti. Nén nẽ tỹ 4 (ke) ag vỹ ti pẽnĩn nỹtĩ, kófa ag ke gé, cordeiro ên pẽnĩn ag nỹtĩ. Kỹ tóg tỹ ag tỹ tãnh kỹ rĩr mãn ên ri ke jẽ. Nĩka tỹ 7 (ke) ti nĩ, kanẽ tỹ 7 (ke) ke gé, cordeiro ên ti. Topẽ kuprĩg to ken hã vẽ, ù tỹ 7 (ke) nĩ ve ên ti, hã vỹ: nĩka tỹ 7 (ke) mré

kanẽ tỹ 7 (ke), he mũ. Topẽ vỹ ti jẽnẽ ja nĩ, ti tỹ ga kar mũ tĩg jé, Topẽ kuprĩg ti.

⁷ Kỹ cordeiro ên vỹ ù tỹ nĩgja sĩnvĩ kri nĩ ên tá jun mũ, kỹ tóg ti ki livro ên mæg mũ, ù tỹ ã pẽgja tỹ livro mãn kỹ nĩ ên ti ki.

⁸ Kỹ nén nẽ tỹ 4 (ke) ên ag vỹ mũgmũg ke kãn mũ, kófa tỹ 24 (ke) ag ke gé, cordeiro ên krêm ag tóg mũgmũg ke kãn mũ sir. Kófa ag vỹ vākyn jafã tỹ harpa génh kỹ nỹtĩ. Pénky tỹ ouro génh kỹ ag nỹtĩ gé. Pénky ên kãki tóg fór nĩ, ti pũn kỹ ger há han jafã ên tỹ, hã vỹ: êg tỹ Topẽ mré vēmén tĩ, he mũ.

⁹ Cordeiro ên mĩ ag tóg jãn mũ, Jesus jé tag tó ag tóg mũ, ha mẽ. “ã hã ne tá krỹg mũ,” he ag tóg mũ. “ã hã ne livro mãn kỹ ti tógfĩ kygvãg mũ ha'. ã tén ja ag tóg, kỹ ã tóg ter kỹ êprã ke ag kygjãm, Topẽ mĩ, pã'i ag kar krêm ke ag kãmĩ, vênh vĩ kar tó tĩ ag kãmĩ, nação kar ag kãmĩ, povo kar ag kãmĩ ã tóg ù ag kygjãm ja nĩgtĩ.

¹⁰ ã tỹ ùn kygjãm mũ ag mĩ ã tóg vênh rãnhřaj nĩm ja nĩ gé, ag tỹ ã mĩ ã tũ ki rĩr jé, ag tỹ tỹ Topẽ camarada nỹtĩ jé. Kỹ ag tóg êprã ke ag krĩg mĩ tỹ ùn mág nỹtĩnh mũ,” he ag tóg, kófa ag, jãnjãn kỹ.

¹¹ Kỹ sóg Topẽ tỹ jẽgnẽ jafã tỹ hẽn ri ke vég mũ gé, mil tỹ mil tỹ hẽn ri ke. Ag e tãvĩn ra êg tóg ag nĩgkrén ke tũ nĩ. Nĩgja sĩnvĩ ên jo ag tóg nỹtĩ, nén nẽ tỹ 4 (ke) ên mré, kófa ag mré ke gé.

¹² Jãnjãn kãn ag tóg mũ gé, jamã hár(a), kỹ ag tóg: “cordeiro tag tén ja ag tóg nĩ, hã kỹ tóg ùri tỹ ùn mág jẽ,” he mũ. “Tỹ tóg vênh kar kri ke jẽ ha, rico tóg jẽ ha, ki kanhró tóg jẽ ha, tar tóg jẽ ha, tỹ tóg ùn mág jẽ ha, sĩnvĩ tóg jẽ ha, vênh kar vỹ ti mĩ vĩ há han mũ ha,” he ag tóg, Topẽ tỹ jẽgnẽ jafã ag.

¹³ Kỹ vãhã kanhkã tãn kar ag vỹ jãnjãn mũ, êprã ke kar ag ke gé, vênh kuprĩg kar ag ke gé, goj ki ke kar ag ke gé. Ag kar vỹ jãnjãn mũ ha, jamã hár(a), kỹ ag tóg: “ù tỹ nĩgja sĩnvĩ kri nĩ mũ ên mĩ êg tóg vĩ há han ke mũ ha, cordeiro ên mĩ ke gé,” he mũ. “ãjag pir mĩ ag tóg tỹ ùn mág nỹtĩ, ãjag pir mĩ ag tóg sĩnvĩ nỹtĩ, vênh kar kri ke vỹ tỹ ag nỹtĩ, kỹ ag tóg tũg' henh ke tũ pẽ nĩ,” he ag tóg mũ sir, vênh kar pẽ ti.

¹⁴ Kỹ nén nẽ tỹ 4 (ke) ên ag vỹ tóg vĩ mũ gé sir. “Hã vẽ,” he ag tóg mũ. Kỹ kófa ag

tóg mũgmũg ke kãn mũ sir, “Topẽ vỹ tỹ ã nĩ,” hen kỹ.

6

Jesus tỹ livro tógfĩ kygvãn

¹ Kỹ sóg cordeiro tỹ ti tógfĩ ve kavãn vég mũ sir, ti tógfĩ tỹ 7 (ke) ên ag kã ùn ve ên ti. Kỹ sóg nèn nẽ tỹ 4 (ke) ag kã ù vỹ mễg mũ gé sir. Ti vỹ vỹ ta tỹ tỹrỹr he ri ke nĩ. “Tág’,” he tóg.

² Kỹ sóg vễsỹjãm êvãn kỹ cavalo kupri vég mũ. Û tỹ kri nĩ vỹ vyj tỹ no rěr tỹ pễg jafã vyn kỹ nĩ nĩ. Ti mỹ ag tóg kri tógfĩ jun mũ, ti tỹ tỹ êprã ke kri ke jẽn kỹ. Kỹ tóg vễnh kar ag tỹ ã krêm ke han tĩ mũ.

³ Kỹ cordeiro vỹ ti tógfĩ ù kavãg mũ gé. Ti tógfĩ régre tá krỹg vễ sir. Kỹ nèn nẽ ag kãmĩ ù tóg: “tág’,” he mũ gé.

⁴ Kỹ cavalo kusũg vỹ jun mũ. Û tỹ kri nĩ mũ ên mỹ ag tóg rógro téj jun mũ, ti tỹ êprã ke ag tỹ jagnẽ kato vãsãnsãn han jé, êprã ke ag tỹ jagnẽ kãgtén jé sir.

⁵ Kỹ cordeiro ên tóg ti tógfĩ ù kavãg mũ gé. Ti tógfĩ tãgtũ tá krỹg vễ sir. Kỹ nèn nẽ ag kãmĩ ù tóg: “tág’,” he mũ gé. Kỹ sóg vễsỹjãm êvãn kỹ cavalo sá vég mũ sir. Û tỹ kri nĩ ên vỹ êg tỹ nèn ù kar kufyg jafã mãn kỹ nĩ nĩ, êg tỹ nèn ù kar kãmũn jafã ti.

⁶ Kỹ sóg nèn nẽ tỹ 4 (ke) ên kã vễnh vỹ ù jẽmễg mũ gé, kỹ tóg: “trigo tỹ quilo pir mãn jé ag tóg ke mũ, por dia kaja to,” he mũ, “ke tũ nĩn kỹ ag tóg cevada tỹ quilo tãgtũ mãn ke mũ, por dia kaja ên to. Azeite vóg tũg nĩ hã ra, vinho vóg tũg nĩ gé, ên vỹ kaja pir nĩnh mũ,” he tóg mũ, vễnh vỹ ti.

⁷ Kỹ cordeiro ên tóg ti tógfĩ ù kavãg mũ gé. Ti tógfĩ tỹ 4 (ke) tá krỹg vễ sir. Kỹ nèn nẽ ag kãmĩ ù tóg: “tág’,” he mũ gé.

⁸ Kỹ sóg cavalo ù vég mũ, hã ra tóg vễser jógtánh ri ke nĩ. Û tỹ kri nĩ ên tóg êg tén tĩ, kỹ vễnh kuprĩg ag vỹ ti nón kãmũ mũ gé, ti kãtĩg ên kã. Ag tỹ êprã ke ag tỹ vễnh kãpóv tỹ 4 (ke) ag kã ti vễnh kãpóv pir ag kãgtén ke vễ, rógro tỹ, ag kókĩr tỹ ke gé, vễnh kaga tỹ ke gé, mĩg tỹ ke gé.

⁹ Kỹ cordeiro vỹ ti tógfĩ ù kavãg mũ gé. Ti tógfĩ tỹ 5 (ke) tá krỹg vễ sir. Kỹ sóg nĩgja sĩnvĩ ên krêm êvãn kỹ êprã ke ag kuprĩg vigvég mũ, ag tỹ Topẽ vỹ tũgrĩn ùn kãgtén mũ ag

kar kuprĩg ti. Topẽ vỹ tóg to krónh ke ja tũ ag tóg nỹtĩ, hã kỹ ag tóg ag kãgtén ja nĩgtĩ, ù tỹ ag vỹ jẽmễ sór tũ ên ag.

¹⁰ Ên ag vỹ jamã hár(a) tag tóg mũ, ha mễ: “kake’,” he ag tóg mũ. “Ûn mág vỹ tỹ ã nĩ. Æ tỹ nèn tóg mũ ên han ã tóg tĩ. Hã ra êg tóg hur ã tỹ nèn han ke mũ jãvãn mág. Æ mỹ kãnhmar êprã ke ag jykre tugnỹm sór tũ, ã tỹ ag vóg kónãn jé, ag tỹ êg kãgtén ja tag tũgrĩn?” he ag tóg mũ, ag tỹ Jesus tũgrĩn ùn kãgtén mũ ên ag.

¹¹ Kỹ ag tóg ag mỹ kur kupri junjun mũ sir, kỹ ag tóg ag mỹ: “toreg ver’,” he mũ. “Û ag tóg nỹtĩ gé, ag tỹ ùn kãgtén mũ ù ag. Ag tỹ ãjag kãgtén ja ri ke han ke vễ, ãjag mré ke ù ên ag tỹ. Topẽ vỹ ag nĩgré, kỹ tóg ki kanhró nĩ, ag tỹ ù tỹ hèn ri ke kãgtén ke mũn ki. Ag tỹ ãjag mré ke ên ag kãgtén kãn kar kỹ tóg ag jykre tugnỹm kãn ke mũ, ha vemnĩ,” he tóg, ag tỹ ùn kãgtén mũ ên ag mỹ.

¹² Kỹ sóg cordeiro ve mãn mũ, kỹ tóg livro tógfĩ ù kavãg mũ gé. Ti tógfĩ tỹ 6 (ke) tá krỹg vễ sir. Kỹ ga tóg jũrũn ke mũ ha. Rã vỹ kuty’ he mũ, êg tỹ ù ter kỹ kur sá tu tĩ kuty ên ri ke. Kysã vỹ kusũg’ he mũ gé.

¹³ Kỹ krĩg vỹ vár kãn ke mũ gé. Kejẽn kãka tóg ka tỹ vyryn vyryn ke tĩ, kỹ ti kanẽ tóg vár kãn tĩ, ti tánh ra. Ge ti nĩgtĩ, krĩg vár kãn ke mũ tag ti.

¹⁴ Kỹ kãnhkã vỹ tũg’ he mũ gé, êg tỹ livro grĩn ên ri ke ti nĩ, kãnhkã tũg ti. Pãnónh vỹ tũg kãn mũ gé, goj vãso kar ke gé.

¹⁵ Êprã ke ag vỹ pãnónh nor krêm vễnh pigjunh mũ, pãró vãso krêm, pãnónh vãso krêm ke gé, pã’i ag, vễnh kar kri ke ag, soldado ag pã’i ag mré hã, ùn rico ag mré hã, ùn tar ag mré hã, ùn camarada ag mré hã, ag patrão ag mré hã, êprã ke kar ag mỹr, ha mễ.

¹⁶ Kỹ ag tóg pãnónh mỹ vỹ mũ, pãró mỹ ke gé. “Ha êg kri vár, ha êg kri tỹ tam ké,” he ag tóg mũ, ón kỹ, pãró mỹ. “Ha êg pigju. Cordeiro ên vỹ êg to jũ mũ, kỹ ù tỹ nĩgja sĩnvĩ kri nĩ ên vỹ êg ki êvãn mũ. Ag jo êg pigju,” he ag tóg mũ ón kỹ, êprã ke kar ag, pãnónh kar mỹ.

¹⁷ “Ag tỹ êg to jũnh ke vễ. Pétẽm ti huri, kurã kórég tag ti. Krenkren ke tũ êg tóg nĩ,” he ag tóg mũ, êprã ke kar ag, cordeiro ên jũ

kamëg kÿ.

7

Topë tÿ jëñë jafã tÿ ùn e ag ránrán

¹ Kÿ sóg ga fyr mÿ ëvãnh kÿ Topë tÿ jëgnë jafã tÿ 4 (ke) ag vigvég mÿ. Ga péno tÿ 4 (ke) ki ag jëgiëg kÿ nÿtÿ. Kãka tÿ 4 (ke) vÿ tá nÿtÿ gé. Kÿ ag tóg kãka tÿ 4 (ke) ën ag ki rÿr nÿtÿ, kãka tÿ hë kãtã mÿ tÿ nÿ jé. Kÿ kãka tóg tÿ tÿ, ga kri, goj kri ke gé, ka kãmÿ ke gé.

² Rã jur ja tá sóg Topë tÿ jëñë jafã ù kãtÿg vég mÿ gé. Topë tÿ ëg ránrán jafã ma tóg kãtÿ mÿ. Kÿ tóg kanhkã ra tãpÿr mÿ. Kÿ tóg Topë tÿ jëgnë jafã tÿ 4 (ke) ën ag mÿ vÿ mÿ. Topë vÿ ag mÿ: “ga mré goj kókén nÿ,” he ja nÿ, ù tÿ 4 (ke) ën ag mÿ.

³ Kÿ ù tÿ vënh rán jafã ma kãtÿ mÿ ën tóg ag mÿ: “toreg ver’,” he mÿ. “Ga vóg tÿg nÿ ver, goj ke gé, ka ke gé,” he tóg. “Ëg tÿ ver Topë camarada ag ránrán sór vë, vënh rán jafã tag ti tÿ, ag kakã ki,” he tóg, Topë tÿ jëñë jafã ti, ù tÿ 4 (ke) ën ag mÿ.

⁴ Kÿ tóg ag rán tÿ mÿ. Û tÿ 140 mil (ke) ag hã vë, fag mré hã, ti tÿ Israel krë'krë ag kar kãmÿ ùn ránrán mÿ ag. Ti número mÿ ình.

⁵ Judá krë tÿ 12 mil (ke) tóg rán kÿ nÿtÿ, Rubem krë tÿ 12 mil (ke) ke gé, Gade krë tÿ 12 mil (ke) ke gé,

⁶ Aser krë tÿ 12 mil (ke) ke gé, Naftali krë tÿ 12 mil (ke) ke gé, Manassés krë tÿ 12 mil (ke) ke gé,

⁷ Simeão krë tÿ 12 mil (ke) ke gé, Levi krë tÿ 12 mil (ke) ke gé, Issacar krë tÿ 12 mil (ke) ke gé,

⁸ Zebulom krë tÿ 12 mil (ke) ke gé, José krë tÿ 12 mil (ke) ke gé, Benjamim krë tÿ 12 mil (ke) ke gé. Ën ag ránrán kãn tóg mÿ, Topë tÿ jëñë jafã ti.

Ûn e tÿ Topë mÿ vÿ há han

⁹ Tag pãte sóg ùn tÿ hën ri ke ag vigvég mÿ. E tãvÿn ag nÿtÿ, e tãvÿn, kÿ ù tÿ ag nÿgkrén ke tóg tÿ tÿ. Tÿ ag ëprã ke ja nÿtÿ. Nação kar kãmÿ ke ù ag vÿ tá nÿtÿ, pã'i kar krëm ke ù ag ke gé, povo kar kãmÿ ù ag ke gé, vënh vÿ kar tó tÿ ag kãmÿ ù ag ke gé. Kur kupri rÿnh kÿ ag tóg nÿtÿ, ùn e ën ag. Nÿgja sÿnvÿ ën péñÿn ag tóg jëgiëg kÿ nÿtÿ, cordeiro rÿnve tá, tãnh féj génh kÿ ag tóg nÿtÿ.

¹⁰ Ën ag vÿ jamã hár(a): “Topë hã vÿ ëg krenkren han mÿ,” he mÿ. “Û tÿ nÿgja sÿnvÿ kri nÿ ën vÿ ëg krenkren han mÿ, cordeiro ti ke gé,” he ag tóg mÿ, jamã hár(a), ùn e ën ag.

¹¹ Topë tÿ jëgnë jafã kar ag vÿ nÿgja sÿnvÿ ën péñÿn nÿtÿ gé, ùn e ën ag mré. Kófa ën ag péñÿn ag nÿtÿ, nén në tÿ 4 (ke) ën ag péñÿn ke gé. Nÿgja sÿnvÿ ën krëm ag tóg mÿgmÿg ke mÿ, kÿ ag tóg ù tÿ kri nÿ ën mÿ: “Topë vÿ tÿ ã nÿ,” he mÿ.

¹² Kÿ ag tóg: “ha vé, vënh kar jé Topë hã mÿ vënh vÿ há tó,” he mÿ. “Topë hã vÿ sÿnvÿ jë, Topë hã vÿ ki kanhró nÿ, Topë hã mÿ ëg tóg vënh vÿ há tó tÿ. Tÿ tóg ùn mág jë, vënh kar kri tóg jë, tar tóg jë, Topë ti, ùri, kÿ tóg tÿ' henh ke tÿ nÿ gé. Hã vë,” he ag tóg mÿ, Topë tÿ jëgnë jafã ag.

¹³ Kÿ kófa ën ag kã ù tóg ình mÿ: “ag tÿ hë ri ke në hÿn, hã kÿ ag tóg kur kupri rÿnh kÿ nÿtÿ?” he mÿ.

¹⁴ Kÿ sóg ti mÿ: “ình pi(jé) ki kanhró nÿ,” he mÿ. “Á hÿn tóg ki kanhró nÿ,” he sóg ti mÿ. Kÿ tóg ình mÿ: “nén ù jagy mág pë ve ja ag tóg nÿtÿ, cordeiro tugrÿn,” he mÿ. “Ag vóg kónãñ jagy han ja ag tóg. Ag kur kygfa ag, cordeiro kyvënh tÿ, kÿ tóg kupri nÿtÿ, ag kur ti.

¹⁵ Kÿ ag tóg Topë nÿgja sÿnvÿ péñÿn nÿtÿ. Ti rãnrãj han ag tóg tÿ, kurã kar ki, kutÿ ki ke gé, ti ìn krëm. Û tÿ nÿgja sÿnvÿ kri nÿ ën vÿ ag jÿ nÿgãñ mÿ.

¹⁶ Ag pi(jé) kókir mãn ke mÿ', ag pi(jé) og'og sór mãn mÿ'. Rã vÿ ag ki hupÿn mãn ke tÿ nÿ ha, nén ù gru ke gé,

¹⁷ cordeiro tÿ ag ki rÿr kÿ, ù tÿ nÿgja sÿnvÿ tá jë ën ti. Ag tatÿ tÿg jé tóg ke mÿ, goj nÿhÿg ja ra, goj tÿ ag rÿnrÿr han mÿ ën ra tóg ag tatÿ tÿg ke mÿ. Topë vÿ ag kygfÿ tÿ tÿg' henh ke mÿ,” he tóg ình mÿ, kófa ti, ùn e ën ag to.

8

Jesus tÿ ìvÿro tógfÿ tÿ ëgno kavãñ

¹ Kÿ cordeiro vÿ ìvÿro tógfÿ tÿ ëgno kavãg mÿ. Ti tógfÿ tÿ 7 (ke) tá krÿg hã vë. Kÿ tóg katÿ' he mÿ, kanhkã tá, meia hora ki.

² Kÿ sóg Topë tÿ jëgnë jafã tÿ 7 (ke) ag vég mÿ. Ag mÿ ag tóg trombeta tÿ 7 (ke) junjun mÿ. Topë nÿgja sÿnvÿ jo ag tóg nÿtÿ.

³ Kÿ Topê tÿ jênê jafã ù tóg tá jun mũ gé, kÿ tóg ouro tÿ pênky ma kãtĩ mũ, êg tÿ pênky ki Topê mÿ ti ger há pũn jafã ên ti. Nĩgia sĩnvĩ ên to tóg jê mũ, Topê tÿ jênê jafã ti. Kÿ ag tóg ti mÿ ka jênjo ger há tÿ hên ri ke jun mũ, ti tÿ Topê mÿ pũn jé, Topê nĩgia to jên kÿ. Êprã ke tÿ Topê ki ge kÿ nÿtĩ kar ag tóg Topê mré vémén tĩ. Ag vĩ ja ên mré tóg ti ger há ên pũn sór mũ, Topê mÿ, Topê tÿ jênê jafã ti.

⁴ Kÿ tóg sir pũn mũ, Topê kato jên kÿ. Kÿ ti ger há ên tóg kynhmÿ tãpÿ mũ sir, Topê tũ ag tÿ ti mré vémén ja ên mré hã.

⁵ Kÿ Topê tÿ jênê jafã ên tóg pênky ên fãh mũ, pránh gru tÿ. Topê mÿ nén ù kar pũn jafã tá tóg pránh gru ên mãg mũ, kÿ tóg pênky kãkã nĩm mũ. Kÿ tóg ga kri ti fón mũ sir, pênky ti, pránh gru tÿ kãkã nĩn kÿ. Kÿ ta tóg kómkóm ke kÿ tÿrÿr he mũ, jũ kÿ tóg mrãrãn ke mũ gé, ga kri. Kÿ ga tóg jũrũn ke mũ gé sir.

Ag tÿ trombeta kynkyn

⁶ Kÿ Topê tÿ jêgnê jafã tÿ 7 (ke) ên ag tóg vênh kãn mũ sir, ag tÿ trombeta kynkyn jé.

⁷ Kÿ ùn tóg ã tũ kyn vén mũ. Kÿ nãfy tóg êprã ke ag kri vár mũ, pĩ mré hã, vênh kyvênh mré hã ke gé. Kÿ ka vênh kãpóv tãgtũ ag kã ti vênh kãpóv pĩr tóg kugpũr kãn mũ, ga vênh kãpóv pĩr ke gé. Re vÿ pũr kãn pẽ han mũ sir.

⁸ Kÿ Topê tÿ jêgnê jafã tÿ 7 (ke) ên ag kã ù tóg trombeta kyn mũ gé. Trombeta régre tá krÿg vê sir. Kÿ nén ù tóg goj kafã tũ ki kutê mũ, hã ra tóg tÿ pãnónh gru nĩ ve nĩ, pãnónh mág tãvĩ. Kÿ goj vênh kãpóv tãgtũ ag kã ti vênh kãpóv pĩr tóg vênh kyvênh ri ke nĩ ha.

⁹ Goj ga vênh kãpóv tãgtũ ag kã ti vênh kãpóv pĩr tóg kãgter kãn mũ gé. Goj kri mũ mũ ên, barco ên vênh kãpóv tãgtũ ag kã ti vênh kãpóv pĩr tóg tũ' he kãn mũ gé, pãnónh ên tugrĩn.

¹⁰ Kÿ Topê tÿ jêgnê jafã tÿ 7 (ke) ên ag kã ù tóg trombeta kyn mũ gé. Trombeta tãgtũ tá krÿg vê sir. Kÿ krÿg mág pẽ tóg kanhkã tá kãtére mũ, hã ra tóg gru nĩ, pĩ gru ên ri ke. Kÿ tóg êganê vênh kãpóv tãgtũ ag kã ti vênh kãpóv pĩr kri kutê mũ, goj nĩhÿg vênh kãpóv tãgtũ ag kã ti vênh kãpóv pĩr kri ke gé.

¹¹ Krÿg ên jyjyn hã vÿ: “Fa,” he mũ. Kÿ goj ên tóg fa nĩ sir. Kÿ êprã ke tÿ hên ri ke ag kãgter mũ, goj kórég ên kron kÿ.

¹² Kÿ Topê tÿ jêgnê jafã tÿ 7 (ke) ên ag kã ù tóg trombeta kyn mũ gé. Trombeta tÿ 4 (ke) tá krÿg vê sir. Kÿ nén ù tóg rã kókég mũ, kÿ jêngrê tóg sĩ' he mũ ha, kysã jêngrê ti ke gé, krÿg kar jêngrê ti ke gé. Jêngrê vênh kãpóv tãgtũ ag kã ùn pĩr tóg tũg' he mũ ha. Kÿ kurã tóg sĩ nÿ ha, jãvo kuty tóg kuty tãvĩ nÿ ha.

¹³ Kÿ sóg kónhkó mág vэг mũ, ti tẽ tĩn kÿ, kynhmÿ. Ên vÿ jamã hár(a) prêr mũ. “!..Jagy ti tĩnh mũ, jagy ti tĩnh mũ, jagy ti tĩnh mũ, êprã ke ag mÿ..! !..Topê tÿ jêgnê jafã tãgtũ ù ag vÿ ãjag tũ ti kynkyn ke mũ ha, kÿ tóg kórég tãvĩ nÿnh mũ ha, êprã ke ag mÿ..!” he tóg mũ, kónhkó mág ti.

9

¹ Kÿ Topê tÿ jêgnê jafã tÿ 7 (ke) ên ag kã ù tóg trombeta kyn mũ gé. Trombeta tÿ 5 (ke) tá krÿg vê sir. Kÿ sóg krÿg vэг mũ. Kanhkã tá tóg kãtére ja nĩ, êprã, krÿg ên ti. Kÿ ag tóg ti mÿ nũgme nón jafã fig mũ, chave ti, krÿg ên mÿ.

² Kÿ tóg róm mũ sir, nũgme ti, hã ra nĩja tóg tá tũmtũm ke mũ, nĩja tar pẽ. Kÿ rã tóg kuty' he mũ, nĩja ên to. Ga kri tóg kuty' he kãn mũ.

³ Nĩja ên kãtã tóg vãhã kãpa mũ, tÿ ópã tÿ hên ri ke nÿtĩ ve ti, hã ra tóg pÿn kakrã tar ri ke nÿtĩ, tÿ ópã nÿtĩ ve ên ti.

⁴ Ti pi(jé) re ko tĩ', ti pi(jé) ka féj ko tĩ', ti pi(jé) êkré ko tĩ gé'. Ti tÿ êprã ke ag mÿ vênh kaga han kãtĩg vê. Êprã ke ù ag tóg tÿ Topê tÿ rágrã tũ nÿtĩ, ag kakã ki. Ên ag mÿ vênh kaga han jé ag junjun mũ, tÿ ópã nÿtĩ ve ên ag.

⁵ Ag pi(jé) êprã ke ag kãgtén mũ hã ra'. Kysã tÿ 5 (ke) ki ag tóg êprã ke ag mÿ vênh kaga nĩm mũ. Ag tÿ ag vóg kÿ tóg pÿn kakrã tÿ êg tugtãn ri ke nĩ, ti kaga ti.

⁶ Kÿ êprã ke ag tóg ter sór mũ ha, ti kaga jagy to, hã ra ag tóg ter ke tũ nĩ, kysã tÿ 5 (ke) ên ki. Ag tÿ ter sór mũ ra ag tóg ter ke tũ pẽ nĩ.

⁷ Ópã ên tóg tÿ cavalo nÿtĩ ve nĩ, cavalo tÿ vênh génh mũnh ke ri ke tóg nÿtĩ. Ouro tÿ krĩ tógfĩ ag tóg nÿtĩ. Ag kakã vÿ êg kakã ri ke nĩ.

⁸ Ag gãnh vỹ fag gãnh téj ri ke nĩ gé. Ag jã vỹ mĩg jã ri ke nĩ.

⁹ Ag fe fár tóg ferro tỹ camisa ri ke nĩ. Ag fēr tỹ rãnrãnh he tóg mẽ há tĩ, kỹ tóg cavalo tỹ hēn ri ke tỹ carroça tỹ hēn ri ke nỹgnỹn ri ke nĩ, ag tỹ vēnh génh mũnh ken kỹ.

¹⁰ Ag my kã tóg nĩ, ag préj ti, pỹn kakrã préj ri ke ti. Ag my tỹ ag tóg ěprã ke ag vóg kónãn tĩ, kysã tỹ 5 (ke) ki.

¹¹ Ũ tỹ nũgme ki rĩr tĩ ěn, ũ tỹ Topẽ tỹ jēnē jafã ri ke nĩ ěn vỹ tỹ ag pã'i mág nĩ, ópã ěn ag pã'i mág. Hebreu ag vĩ ki ti jiji vỹ: Abadom, he mũ, kỹ tóg Grego ag vĩ ki: Apolião, he mũ, hã vỹ: nén ũ kar kókég tĩ, he mũ, ěg vĩ ki, hã vỹ: Apolião, he mũ.

¹² Nén jagy ve ve inh huri, sỹ nén jagy rēgre venh ke nē ha.

¹³ Kỹ Topẽ tỹ jēgnē jafã tỹ 7 (ke) ěn ag kã ũ tóg trombeta kyn mũ gé. Trombeta tỹ 6 (ke) tá krỹg vē sir. Kỹ sóg vēnh vỹ mẽg mũ. Topẽ mỹ nén ũ pũn jafã tỹ ouro tá tóg mẽ há tĩ, vēnh vỹ ti. Mesa ěn péno tỹ 4 (ke) ki, mesa tỹ Topẽ jo jē ěn ki tóg mẽ há tĩ, vēnh vỹ ti.

¹⁴ Vēnh vỹ ěn tóg ũ tỹ ũri kyn mũ ěn mỹ: “Topẽ tỹ jēgnē jafã tỹ 4 (ke) ěn kygvãn tĩg,” he mũ. “Ũ tỹ goj mág tỹ Eufrates tá sigse kỹ nỹtĩ ěn ag kygvãn tĩg,” he tóg.

¹⁵ Kỹ tóg ag kygvãn tĩ mũ, ũ tỹ 4 (ke) ěn ag. Tá ag tóg jãvãnh nỹtĩ ja nĩgtĩ, ag tỹ ěprã ke tỹ hēn ri ke ag kãgtén jé. Topẽ vỹ ag mỹ ag tỹ prỹg ki ag kãgtén ke, kysã ki ag kãgtén ke, kurã ki ag kãgtén ke, hora ki ag kãgtén ke mũ ěn nĩm ja nĩ. ěprã ke vēnh kãpóv tăgtũ ag kã ũn pir ag kãgtén kãn jé ag tóg ke mũ, Topẽ tỹ jēgnē jafã tỹ 4 (ke) ěn ag.

¹⁶ Ag krēm soldado ag número mẽ inh, ũ tỹ cavalo kri mũgtĩ ag. 200 mil (ke) ag nỹtĩ, ag krēm soldado ag.

¹⁷ Kỹ sóg ag vég mũ, soldado tỹ cavalo kri mũ mũ ag. Ferro tỹ camisa ag nỹtĩ, kỹ ũ ag tóg kusũg nỹtĩ, pĩ kusũg ri ke, ũ ag tóg tánh nỹtĩ, pó tỹ safir tánh ri ke, ũ ag tóg māréro nỹtĩ, pó tỹ enxofre māréro ri ke. Cavalo krĩ vỹ mĩg krĩ ri ke nỹtĩ. Ag jēnkã tá pĩ gru tóg kãkutē mũ, nĩja ke gé, pó tỹ enxofre nĩja ke gé, vãn pũr nĩja ri ke ěn ti.

¹⁸ Tag tỹ ag tóg ěprã ke ag kãgtén ke mũ, pĩ tỹ, nĩja tỹ, pó tỹ enxofre nĩja tỹ ke gé, cavalo ag.

¹⁹ Nén tỹ cavalo jēnkã tá kãkutē mũ ěn vỹ ěprã ke ag kãgtén ke mũ, kỹ ag my vỹ ag kãgtén ke mũ gé. Ag my vỹ tỹ pỹn hã ve nĩ, pỹn krĩ. ěn tỹ ag tóg ěprã ke ag kókén ke mũ gé, ag my tỹ.

²⁰ ěprã ke ũ ag tóg hã ra krenkren ke mũ ver. Ag kãgtén kãn ke tũ ag tóg nĩ ver. Kỹ ũn krenkren mũ ag pi(jé) Nén-Kórég ag tovãnh mũ', vēnh kãggrã tovãnh tũ ag nỹtĩ, ouro tỹ vēnh kãggrã ěn, prata tỹ vēnh kãggrã ěn, ferro kusũg tỹ vēnh kãggrã ěn, pó tỹ vēnh kãggrã ěn, ka tỹ vēnh kãggrã ěn ke gé. Ver ag tóg tag kar to: “Topẽ vỹ tỹ ti nĩ,” he tĩ gé. Ag tỹ vēsóg ki vēnh kãggrã hyn han mũ ra tóg ag mỹ tỹ Topẽ nĩ ve nĩ, ti kanē tũ ra, ti nĩgrēg nor tũ ra, ti tỹ ã pēn tỹ tĩg vãnh (hã) ra.

²¹ Ag pi(jé) ag jykre tovãnh sór mũ', ěprã ke krenkren mũ ěn ag. Jagnē kãgtén ag tóg mũgtĩ, kujá jykre han ag tóg mũgtĩ, curandeiro jykre ěn ti. Ājag prũ tũ fag mré ag tóg nỹgnỹ mũgtĩ, ãjag mén tũ ag mré fag tóg nỹgnỹ mũgtĩ gé, jagnē tỹ nén ũ pigju(g) ag tóg mũgtĩ gé, ěprã ke ag.

10

Livro sĩ

¹ Kỹ sóg Topẽ tỹ jēnē jafã tar ũ vég mũ. Kanhkã tá tóg kãtère mũ, ěprã. Kanhkã góg vỹ ti kri rũm kỹ nỹ nĩ. Ti krĩ kri ta no tóg vēnh ven mũ. Ti kakã vỹ rã ri ke nĩ, ti fa vỹ pĩ gru ri ke nỹtĩ, ti fa jēngrē ti.

² Livro sĩ mãn kỹ tóg jē nĩ, livro tỹ jén ke kỹ tóg ma jē nĩ. Ā pēgja tỹ tóg goj kafã tũ sãn mũ, kỹ tóg ã jakãnh tỹ ga sãn mũ.

³ Prēr tóg mũ sir, jamã hár(a), kỹ tóg tỹ mĩg kyr mẽ tĩ, ti prēr ti. Kỹ ta tỹ tỹrỹr he tỹ 7 (ke) vỹ ti vĩ kafãn mũ, jamã hár(a).

⁴ Kỹ sóg ta tỹ tỹrỹr he mũ vỹ ěn rãn sór mũ. Hã ra ũ tỹ kanhkã tá vỹ mũ tó inh mỹ: “rán tũg nĩ,” he mũ. “Ta tỹ tỹrỹr he mũ ěn vỹ tó sór tũg nĩ, ũ mỹ,” he tóg.

⁵ Kỹ Topẽ tỹ jēnē jafã ěn, ũ tỹ goj mré ga kri jē mũ ěn tóg ã nĩgé tỹ kanhkã ki ven mũ, ã pēgja tỹ.

⁶ Kỹ tóg: “sỹ ki hã tónh ke vē,” he mũ. “Topẽ vỹ ki kanhró nĩ, sỹ ki hã tó mũn ki,” he tóg. “Ũn rĩr nĩ ěn vỹ ki kanhró nĩ, ũn ter vãnh ěn vỹ ki kanhró nĩ, ũ tỹ kanhkã han mũ ěn vỹ ki kanhró nĩ, ũ tỹ ga han mũ ěn ti,

ũ tỹ goj han mũ ên ti, ù tỹ ùn rĩnrĩr nỹtĩ kar ag hyn han mũ ên ti. Ên hã vỹ isỹ ki hã tó mũ ki kanhró nĩ,” he tóg. “Ha vé, ã tỹ nén han ke mũ ên tovãnh mãn ke tũ ti nĩ ha, Topê ti.

⁷ Ti tỹ jěgně jafã tỹ 7 (ke) ên ag kã ù vỹ trombeta kyn ke mũ, kỹ tóg ù tỹ 7 (ke) tá krỹg ke mũ. Ti tỹ kyn kỹ Topê vỹ ã tỹ nén han sór mũ ên han ke mũ ha, ã tỹ vãsỹ to jykrén mũ ên ti. Hã tó ja ti nĩ, ti rãnrãj han tĩ ag mỹ, ti vĩ tó tĩ ag mỹ ke gé, Topê ti,” he tóg, Topê tỹ jěně jafã ti.

⁸ Kỹ kanhkã tá ke ù tóg inh mré vēmén mãn mũ. Inh mỹ tóg: “ha tĩg,” he mũ. “Livro sĩ tỹ jén ke kỹ nĩ ên mãn tĩg,” he tóg. “Ù tỹ goj mré ga sãn kỹ jě ên ki livro mãn tĩg,” he tóg, kanhkã tá ke ên ti.

⁹ Kỹ sóg ti ra tĩ mũ, kỹ sóg ti mỹ livro to vĩ mũ. Kỹ tóg inh mỹ: “té, ko ra,” he mũ. “Mỹg ri ke tĩ nĩ, ã tỹn kon kỹ. Ko kar kỹ tóg hã ra fa nĩnh mũ, ha vemnĩ,” he tóg.

¹⁰ Kỹ sóg livro sĩ ên mãn kỹ ko mũ. Kỹ tóg mỹg ri ke nĩ. Isỹn ko kar kỹ tóg fa nĩ sir.

¹¹ Kỹ ù tóg inh mỹ: “Topê tỹ nén hyn han ke mũ tó mãn jé ã tóg ke mũ,” he mũ. “Ti tỹ povo kar ag tỹ nén hyn han ke mũ tó jé ã tóg ke mũ, ti tỹ nação kar ag tỹ nén hyn han ke mũ ên ti, ti tỹ pã'i krēm ke kar ag tỹ nén hyn han ke mũ ên ti, ti tỹ pã'i kar ag tỹ nén hyn han ke mũ ên ti ke gé,” he tóg, vėnh vĩ ti.

11

Ù tỹ Topê vĩ tó tĩ ag

¹ Kỹ ag tóg inh mỹ vãn jun mũ, vãn tỹ nén ù kãmun jafã ti. Kỹ ù tóg inh mỹ: “tág’,” he mũ. “Topê jo ãn kãmun nĩ, Topê mỹ nén ù pũn jafã mré hã. ù tỹ krēm Topê mré vēmén kỹ nỹtĩ ên ag nĩgrén nĩ gé.

² Topê jo ãn vãso ên kãmun tũg nĩ hã ra. Fóg ag tũ vė, kỹ kãmun tũg nĩ. Kysã tỹ 42 (ke) ki fóg ag tóg cidade ên kókén ke mũ, Topê tỹ cidade ù to: isũ vė, he mũ ên ti.

³ ù tỹ inh vĩ tó tĩ régre ag jěgně jé sóg ke mũ. Êg tỹ nén ù tỹ êg mỹ e nĩn kỹ kur kórég rĩg tĩ ên rĩnh jé ag tóg ke mũ, sacco ên, ùn régre ên ag. Isỹ ag mỹ nén tónh ke mũ ên tó jé ag tóg ke mũ, kurã tỹ 1260 (ke) ên ki,” he tóg inh mỹ, ag kãmĩ ù ti.

⁴ Topê vĩ tó tĩ régre ên ag vĩ Topê vĩ to tar nỹtĩ, ka tỹ oliveira tar nĩ ên ri ke ag nỹtĩ.

Topê vĩ tó ag tóg tĩ, kỹ ag tóg néj gru ri ke nỹtĩ, néj tỹ kri fěg jafã ên kri nỹtĩn kỹ. ù tỹ êprã ke ag kri ke ên rã hã ti nỹtĩ, vela tỹ kri fěg jafã régre ên ag. Tag ri ke ag nỹtĩ, Topê vĩ tó tĩ régre ên ag.

⁵ ù tỹ ag kato vãsãn kỹ ag tóg pĩ tỹ ag jěnkã tá kãkutě mũ ên tỹ ag tỹ tũ' he tĩ, ù tỹ ag kato vãsãnsãn mũ ag tỹ. Hã kỹ ag kãgter kãn' he tĩ, ù tỹ ag vóg kónãn sór mũ ag.

⁶ Ag tỹ Topê vĩ tón kỹ ag tóg ag tỹ ta kutě kaměg sór kỹ ti kutě kaměg tĩ, kỹ tóg kutě tũ nĩgtĩ. Kỹ, ag tỹ goj tỹ vėnh kyvėnh ri ke han sór kỹ ag tóg tỹ vėnh kyvėnh ri ke han tĩ gé. Ag tỹ ga kri ke ag vóg kónãn sór kỹ ag tóg ag vóg kónãn tĩ gé. Nén ù jagy tỹ hěn ri ke han ag tóg tĩ, Topê vĩ tó tĩ régre ên ag.

⁷ Kejěn ag tóg kãmén kãn mũ sir, Topê tỹ ag mỹ nén tó mũ ên ti. Kỹ nũgme tá mĩg tóg kãkutě mũ, kỹ tóg ag to rá ke mũ. Ag tỹ hě nỹ ri ken kỹ tóg ag kãgtén mũ, mĩg ên ti.

⁸ Ājag kãgter kỹ ag tóg cidade kuju tá vár kỹ nỹtĩ nĩ, êg Senhor tỹ cidade tá ka to sa ja ên tá. Cidade ên tá ke ag jykre tóg cidade tỹ Sodoma tá ke ag jykre ri ke nĩ, ga tỹ Egito tá ke ag jykre ri ke ti nĩ gé.

⁹ Kurã tãgtũ mré kurã kuju ki ag tóg vėser ên vigvėg mũ. Vėnh kar ag vĩ ag vigvėg mũ, povo kar ag, pã'i krēm ke kar ag, vėnh vĩ kar tó tĩ ag kar ke gé. Ag pi(jé) ga krēm ag pigjunh ke mũ', vėser ên ag.

¹⁰ Êprã ke kar ag mỹ tóg sér tĩ, ag kãgter ti. Festa mág han ag tóg mũ. Jagně mỹ ag tóg presente jěgněg mũ. Topê vĩ tó tĩ tag ag vĩ êprã ke ag vóg kónãn jagy han ja nĩgtĩ, hã kỹ ag kãgter tóg vėnh kar mỹ sér gy tĩ sir.

¹¹ Kurã tãgtũ kri kurã kuju tũg kỹ Topê tóg hã ra ag rĩn mãn mũ sir, ti kuprĩg tỹ. Kỹ vėnh kar ag tóg jũrũn ke pě han mũ sir.

¹² Kỹ kanhkã tá vėnh vĩ tóg ag mỹ mẽ há tĩ, Topê vĩ tó tĩ régre tag ag mỹ. Kỹ tóg ag mỹ: “kunĩg,” he mũ. Kỹ ag kato vãsãnsãn mũ ag vĩ ag tỹ kanhkã ra jãpřy vėg mũ sir, kanhkã góg kãmĩ.

¹³ Kỹ ga tóg jũrũn ke mũ sir. Cidade tá ãn kókég tóg mũ, ga tỹ jũrũn ke ti. ãn vėnh kãpóv tỹ 10 (ke) ag kã ùn pir kókén kãn tóg mũ. Êprã ke tỹ mil tỹ 7 (ke) vĩ kãgter mũ, ên kã. ùn kãgter tũ ag kaně tóg jur mũ. Ag mũměg vĩ ag kãgtén kren mũ. Kỹ ag tóg

Topê to: “Ûn mág vỹ tỹ ti nĩ,” he mũ vāhã. “Tar ti nĩ, ù tỹ kanhkã tãn ag kri nĩ ên ti,” he ag tóg mũ vāhã.

¹⁴ Nén jagy ù vỹ hur tũ' hé. Nén jagy ù tóg ver kã nĩ nĩ.

Trombeta tỹ êgno kyr

¹⁵ Kĩ Topê tỹ jêgnê jafã tỹ 7 (ke) ên ag kã ù tóg trombeta kyn mũ gé sir. Trombeta tỹ 7 (ke) tá krỹg vê. Kĩ kanhkã tá vênh vỹ tỹ hên ri ke tóg mē há nỹtĩ. “Vāhã tóg êprã ke kar ag kri tỹ ùn mág jê, Topê ti, êg Senhor ti ke gé,” he ag tóg, ù tỹ kanhkã tá vỹ mũ ag. “Vāhã ag tóg nén ù kar ki rĩr nỹtĩ ha, Topê ti, ã kósin mré, kũ tóg tũ' henh ke tũ nĩ, ag rãnrãj ti,” he ag tóg, ù tỹ kanhkã tá vỹ mũ ag.

¹⁶ Kĩ kófa tỹ 24 (ke) ên ag, ù tỹ Topê mré ãjag nĩgja kri nĩgnĩ kũ nỹtĩ ên ag vỹ ti krêm mũgmũg ke kãn mũ. Kĩ ag tóg Topê mũ: “Topê vỹ tỹ ã nĩ,” he mũ sir.

¹⁷ Jãn ag tóg mũ gé sir, ha mē. “Topê, pã'i mág, nén ù kar han há ã tóg nĩ,” he ag tóg mũ, jãn kũ. “Vāsỹ ã tóg nĩ nĩ, kũ ã tóg ùri nĩ nĩ gé. Êg mũ tóg sér tĩ, ã tỹ tỹ pã'i mág nĩn kũ, ã tỹ vênh kar ki rĩr kũ tóg sér pē tĩ. Á tar nĩ kũ ã tóg pã'i ù ag pan kãn.

¹⁸ Ag to jũ jé ã tóg ke mũ ha. Ûn kãgter ja ag jykre tugnyĩm kãn jé ã tóg ke mũ ha. Povo kar vỹ ã kato vāsãnsãn ja nĩgtĩ, kũ ã tóg ag kato vāsãn mũ ha. Á kurã vỹ hur jun, kũ ã tóg ã rãnrãj han tĩ ag mũ ag rãnrãj kaja ti ven ke mũ, ã vỹ tó tĩ ag mũ ke gé, ã tũ kar ag mũ, ùn mág ag mũ, ùn kãsir ag mũ, ù tỹ ã kamêg nỹtĩ kar ag mũ ã tóg ag rãnrãj kaja ven ke mũ ha. Á kurã vỹ hur jun, kũ ã tóg ù tỹ êprã ke ag kókén ja ên ag kókén kãn ke mũ ha,” he ag tóg mũ, kófa tỹ 24 (ke) ên ag.

¹⁹ Kũ ù tóg Topê jo ãn nón mũ, ãn tỹ kanhkã tá jê ên. Kũ Topê jo ãn jãnkã róm kũ jê kũ Topê caixa ên tóg ve há' he kũ nỹ nĩ, Topê tỹ ã tũ ag mré jykren kũ ag mũ caixa fig mũ ên ri ke ti. Kũ ta tóg kómkóm ke mũ, tỹrỹr he ke gé. Ga vỹ ragra ke jagy han mũ sir, kũ nãfy vỹ vár mũ gé sir, nãfy mág.

12

Mĩg fêr kãme

¹ Kũ kanhkã tá nén ù vênh mũ tóg vênh ven mũ. Ûn tỹtã fi vỹ tóg vênh ven mũ. Kũ rã tóg fi mũ tỹ fi kur nĩ. Kysã sãn kũ fi tóg jê

nĩ. Fi krĩ tógfĩ vỹ krĩg tỹ há nĩ, krĩg tỹ 12 (ke) tỹ.

² Kũfy fi tóg jê nĩ, hã ra fi tóg kaga mũ, kũ fi tóg jagtar nĩ sir.

³ Kũ kanhkã tá nén ù ù tóg vênh ven mũ gé. Mĩg fêr kusũg tóg vênh ven mũ. Á pir ra tóg krĩ tỹ 7 (ke) nĩ, nĩka tỹ 10 (ke) ti nĩ gé. Ti krĩ tógfĩ tóg nỹtĩ, ti krĩ tỹ 7 (ke) to.

⁴ Á my tỹ tóg krĩg tỹ hên ri ke kókég mũ, kũ tóg êprã vár mũ, krĩg tỹ hên ri ke ti. Krĩg vênh kãpóv tãgtũ ag kã ùn pir kókén kãn tóg mũ. Kũ tóg ùn tỹtã ên fi jo tá jê nĩ, fi kósin tỹ mur ken kũ, mũg fêr kusũg ên ti. Ti tỹ fi kósin mãn sór vê, ti mur kũ.

⁵ Kũ tóg mur mũ sir, fi kósin ti, hã ra tóg gré nỹ. Tỹ tóg pã'i mág pē jênh ke mũ, êprã ke kar kri. Ag kri jên kũ tóg ag mũ vỹ tar gy han ke mũ. Ti mur kũ ag tóg kanhkã ra ti va mũ mũ, Topê nĩgja sĩnvĩ ên ra, mũg fêr jo.

⁶ Kũ ùn tỹtã ên fi tóg ga kórég ra vênhvãg tĩ mũ, mũg fêr jo vênh péju kũ. Tá Topê tóg fi mũ fi tỹ ki vênh péjunh ke han ja nĩ. Tá ù tóg fi mũ vỹjên vin tĩ, kurã tỹ 1260 (ke) ki.

⁷ Kũ kanhkã tá vênh génh tóg kutê mũ. Topê tỹ jêgnê jafã ag to pã'i mág tỹ Miguel vỹ mũg fêr ên kato vāsãn mũ, ã krêm ke ag mré. Kũ mũg fêr ên tóg ã krêm ke ag mré Miguel to rará mũ gé sir.

⁸ Hã ra ag tóg ti tỹ hên ri ke mũ sir, kanhkã tá ke ag, mũg fêr ên ti tỹ. Kũ ag tóg kanhkã tá ti kutêm mũ, ti mré ke kar ag mré hã.

⁹ Mĩg fêr ên kutêm ag tóg mũ sir. Pỹn ve tỹ ùn ve fag krĩn kónãn ên hã vê, Japon hã vê, Satanás hã vê, êprã ke ag tỹ Topê kato vāsãnsãn han mũ ên hã vê, hã vỹ: mũg fêr, he mũ. Ag tỹ kanhkã tá ti kutêm kũ ag tóg ga kri ti fón mũ sir, ti krêm ke kar ag mré hã. Kũ ag tóg ga kri mũgtĩ ha, Japo ag.

¹⁰ Kũ sóg kanhkã tá vênh vỹ ù mēg mũ gé. Jamã hár(a) tóg vỹ mũ, kũ tóg: “tãg',” he mũ. “Êg krenkren han tóg huri, Topê ti. Vāhã vênh kar tóg vé, Topê tỹ tỹ ùn mág pē nĩ ti. Vāhã Cristo tóg vênh kar mũ ã tỹ tỹ ùn tar nĩ ên ven huri. Ag tỹ ùn kutêm mũ ên tóg êg mré ke ag kato vỹ kónãn ja nĩgtĩ, Topê mũ, kurã ki, kuty tá ke gé. Hã ra tóg kutêm kũ jê ha.

¹¹ Êg mré ke ag vỹ ti tỹ hên ri ke ja nĩgtĩ, cordeiro kyvênh ên tugrĩn, vênh vỹ há ên

tugrĭn, ag tÿ vĕnh kar mÿ Topĕ vĭ tó tĭ ěn tugrĭn. Ag kã ũ kãgtĕn ja ag tóg nĭgtĭ, hã ra tóg ag mÿ tÿ nĕn ũ tũ nĭ ja nĭgtĭ, ag tÿ Jesus tugrĭn ag kãgtĕn mũ ra. Hã kÿ ag tóg Japo tÿ hĕn ri ke ja nĭ.

¹² Ti kutĕm kÿ jĕn kÿ tóg kanhkã tãn kar mÿ sér tĭ ha. Hã ra tóg ga kri mũ ag mÿ jagy tĭnh mũ, goj kri mũ ag mÿ ke gé. Japo vÿ ag mré jĕ ha, ga kri, ag tÿ kanhkã tá ti kutĕm kÿ. Kÿ tóg jũ jagy han kÿ kãnĕ tĭ. Ti kurã vÿ kakó nĭ ha. Tag tugrĭn tóg jũ jagy han kÿ kãnĕ tĭ nĭ, Japo ti,” he tóg, ũ tÿ kanhkã tá vĭ mũ ti.

¹³ Kÿ mĭg fĕr ěn tóg ěprã jĕ mũ. Kÿ tóg ũn tÿtã ěn fi vóg kónãn sór mũ, ũ tÿ gĭr vĕg mũ ěn fi.

¹⁴ Kÿ ag tóg fi mÿ fĕr mág junjun mũ, kónhkó mág fĕr ěn ri ke. Kÿ fi tóg tÿ ga kórég ěn ra tĕ tĭ mũ. Tá fi tóg vĕnh péju kÿ nĭ nĭ, prÿg tãgtũ kri prÿg kuju ki. Kÿ pÿn kórég ěn tóg tá fi vóg tũ nĭ ha, fi vĕnh péju ja tá.

¹⁵ Kÿ tóg goj var ri ke han mũ, pÿn ti. Ti jĕnkã tá tóg kãkutĕ mũ, goj var ti. Ti tÿ ũn tÿtã ěn fi nãr han sór vĕ.

¹⁶ Hã ra ga tóg fi mÿ goj ěn tÿ gym ke mũ, goj tÿ mĭg fĕr jĕnkã tá kãkutĕ mũ ěn tÿ, kÿ fi tóg ga tugrĭn kren mũ sir.

¹⁷ Kÿ mĭg fĕr tóg jũ kÿ tĭ mũ, ũn tÿtã ěn fi tovãnh kÿ. Kÿ tóg fi krĕ kato vãsãn jé tĭ mũ gé, hã vÿ: ũ tÿ Topĕ vĭ ki króm mũ ag, he mũ, fi krĕ ag, hã vÿ: ũ tÿ Jesus to krónh ke tũ ag, he mũ, ũn tÿtã ěn fi krĕ ag.

¹⁸ Kÿ mĭg fĕr ěn tóg goj fyr ra tĭ mũ.

13

Mĭg régre ag kãme

¹ Kÿ mĭg ũ tóg goj mág kãtã kãkutĕ mũ. Ā pir ra tóg krĭ tÿ 7 (ke) nĭ, nĭka tÿ 10 (ke) ti nĭ gé. Ti krĭ tógfĭ tóg ti nĭka kri nÿtĭ, kÿ ti jygji tóg ti krĭ kri rãnrãn kÿ nÿtĭ, ti tÿ tÿ pã'i mág nĭn kÿ, goj kãtã mĭg ěn ti. Hã ra Topĕ to vĭ kónãn vĕ sir, ti krĭ to rãnrãn kÿ nÿtĭ ěn ti.

² Goj kãtã mĭg ěn tóg mĭg rá ri ke nĭ. Ti pĕn tóg urso pĕn ri ke nÿtĭ. Ti jĕnky tóg mĭg kusũg jĕnky ri ke nĭ. Kÿ mĭg fĕr ěn tóg goj kãtã mĭg tÿ pã'i mág pĕ han mũ, ti tÿ ag nĭgja kri nĭ jé, ti tÿ Ā jykre tar ěn han jé ke gé, mĭg fĕr jykre ěn ti.

³ Ti krĭ ũ fynh ja ag tóg nĭ, kÿ tóg ter kren, hã ra tóg há' he mãn, goj kãtã mĭg ěn ti. Ēprã

ke kar ag vÿ ti vĕg mũ, kÿ tóg ag mÿ e kar tĭ. Ti vĭ kri fig ag tóg mũ.

⁴ Mĭg fĕr ěn to ag tóg: “Topĕ vĕ,” he tĭ, ěprã ke kar ag, ti jykre tar tugrĭn, ti tÿ goj kãtã mĭg ěn tar han ja tugrĭn. Goj kãtã mĭg ěn to ag tóg: “Topĕ vĕ,” he tĭ gé. “Ũ tóg ti ri ke tũ pĕ nĭgtĭ,” he ag tóg tĭ. “Ũ tóg ti tar kãfór tũ nĭ,” he ag tóg tĭ gé, ěprã ke ag, mĭg ěn to.

⁵ Goj kãtã mĭg ěn vÿ vĭ vĕnhmÿ han jĕ nĭ. Ā vĭ tÿ tóg Topĕ kato vãsãn mũ. Kysã tÿ 42 (ke) ki tóg tar jĕ nĭ, vĕnh kar kri.

⁶ Kÿ tóg Topĕ to vĭ kónãn mũ, Topĕ jygy to ke gé, ti jo ĩn to ke gé, kanhkã tãn kar ag to tóg vĭ kónãn mũ gé.

⁷ Kÿ tóg Topĕ tÿ ũn kuprĕg mũ ag kãgtĕn to vãsãn mũ gé, kÿ tóg ag tÿ hĕn ri ke mũ gé sir, goj tãn tÿ mĭg ěn ti. Hã ra Topĕ tóg ver ti to fen nĭ. Kÿ povo kar ag, nação kar ag, pã'i krĕm ke kar ag, ũ tÿ vyr mÿ vĭ nÿtĭ ěn ag kar vÿ mĭg ěn vĭ hã jĕmĕg mũ.

⁸ Ēprã ke kar ag vÿ ti to: “Topĕ vĕ,” he' he tĭ. Ag jãvo ũ ag jygji tóg rãnrãn kÿ nÿtĭ, Topĕ livron ki. Ũ tÿ rĭr krÿg ja tũ venh ke mũ ěn ag vÿ ki rãnrãn kÿ nÿtĭ. Topĕ tÿ nĕn ũ kar han ke to hã tóg ag jygji rãnrãn ja nĭgtĭ, livro ěn ki. Cordeiro tÿ ag jagfy ter ja ěn tũ vĕ, livro ěn ti. Ũ tÿ ki rãnrãn kÿ nÿtĭ ag vÿ mĭg ěn jykre han tũ nĭgtĭ.

⁹ Ũn nĭgrĕg nÿtĭ ag tÿ tÿ jĕmĕ jé.

¹⁰ Topĕ tÿ Ā ki ge kÿ nÿtĭ ũ ag to: “nĭgfĕnh kÿ ag nÿtĭnh mũ, isugrĭn,” hen kÿ ag tóg nĭgfĕnh kÿ nÿtĭnh mũ, cadeia ki. Ti tÿ ag to: “rógro tÿ ag tóg ag kãgtĕn ke mũ,” hen kÿ ag tóg rógro tÿ ag kãgtĕn ke mũ sir. Ũ tÿ Topĕ mÿ vĕnh vin mũ ěn ag jé to krónh ke tũg, ag jé Topĕ tovãnh tũg.

¹¹ Kÿ sóg mĭg ũ vĕg mũ gé. Ga kãtã tóg kãkutĕ mũ. Nĭka régre ti nĭ, cordeiro nĭka ri ke. Ti vĭ tóg hã ra mĭg fĕr ěn vĭ ri ke nĭ.

¹² Goj kãtã mĭg ěn rĭnve tóg Ā tÿ han mũ kar hyn han tĭ, Ā jykre tar ěn ti, ga kãtã mĭg ti. Kÿ tóg ěprã ke kar ag to vãsãn mũ, ag tÿ goj kãtã mĭg ěn to: “Topĕ vĕ,” he jé, ũn ter kren mũ ěn to.

¹³ Ga kãtã mĭg tag vÿ nĕn ve vãnh tÿ hĕn ri ke hyn han mũ. Pĭ tÿ kanhkã tá kãtĕre han tóg tĭ, ěprã ke kar ag rĭnve.

¹⁴ Ti tÿ ěg tÿ nĕn han vãnh tÿ hĕn ri ke hyn han kÿ tóg ěprã ke kar mÿ ón mũ, ag tÿ ti

kamêg jé. Goj kátá mĩg ên rĩnve tóg milagre tỹ hên ri ke hyn han mũ. Kỹ tóg êprã ke ag mỹ ke mũ, ag tỹ goj kátá mĩg kãggrá han jé. Ag tỹ mĩg ên fynh mũ ra tóg ter ja tũ nĩ, hã kỹ tóg vênh kar mỹ: “ha ti kãggran,” he mũ, ga kátá mĩg ên ti.

¹⁵ Kỹ tóg goj kátá mĩg kãggrá ki hu he mũ, kỹ tóg rĩr mũ, ti kãggrá ti, kỹ tóg vĩ mũ gé. Kỹ tóg ù tỹ ti to: “Topê vê,” he jãvãnh ên ag kãgtén kãn mũ sir, ti kãggrá rĩr jê ên ti.

¹⁶ Ga kátá mĩg ên tóg tỹ êprã ke kar ag kri ke nĩ, ùn mág ag kri, ùn kãsir ag kri ke gé, ùn rico ag kri ke gé, ùn jagãgtar ag kri ke gé, ù tỹ tỹ camarada nỹtĩ ag kri ke gé, ag patrão ag kri ke gé. Kỹ tóg ag kar to vãsãn mũ, ag tỹ ãjag pẽgia tá ãjag nĩgê pãnĩ ki ti jiji rãnrán jé, ke tũ nĩ kỹ ti número ti. ãjag kakã ki ag tóg ti jyjy rãnrán mũ gé.

¹⁷ Û tỹ gen kỹ rãnrán kỹ nỹtĩ ag hã tóg nén ù comprar he tĩ, nén ù vender he tĩ gé inhhã. Ûn rá tũ ag vỹ nén ù comprar he mãn ke tũ nỹtĩ ha. Vênh rá tag vỹ tỹ ga kátá mĩg ên jyjy nĩ, ke tũ nĩn kỹ ti número ti. Ti número vỹ ti jiji tó tĩ gé.

¹⁸ Ûn krĩ há ag hã tóg ti número to jykrén há han ke mũ. Ûn krĩ tũ ên ag pi(jé) to jykrén ke mũ, ti número to. Êprã ke jyjy vê, ti número ti, hã vỹ: 666, he mũ.

14

Ûn krenkren kỹ nỹtĩ ag jãn

¹ Kỹ sóg ki êvãnh kỹ cordeiro ên ve mãn mũ. Pãnónh kri tóg jê nĩ, pãnónh tỹ Sião he mũ ên kri, cordeiro ên ti. Ûn e ag tóg ti mré tá nỹtĩ, ù tỹ 144 mil (ke) ag. Cordeiro ên jyjy tóg ag kakã ki rãn kỹ nĩ, ù tỹ ti mré tá nỹtĩ ag kakã ki. Cordeiro ên jóg jiji vỹ ag ki rãn kỹ nĩ gé.

² Kỹ sóg kanhkã tá nén ù mẽg mũ. Tỹ tóg sa krog mẽ tĩ, tỹ tóg ta tỹ tỹrỹr he ri ke tĩ gé. Kỹ tóg tỹ ag tỹ vãkyn jafã tỹ harpa kyn ên ri ke tĩ gé, ti kyr ti.

³ Vêjãn tãg tó ag tóg mũ gé, nén nê tỹ 4 (ke) ên ag rĩnve, kófa ag rĩnve ke gé, nĩgja sĩnvĩ ên tá. Û tỹ 144 mil (ke) ag vỹ Topê jé tãg tag tó há nỹtĩ, ên ag tãvĩ. Êprã ke ja ag vê, hã ra ag tóg krenkren kỹ nỹtĩ, ù tỹ ti jãn tãg tó mũ ên ag.

⁴ Jãnhkri ag nỹtĩ. Ag pi(jé) fag vóg ja nĩgtĩ, cordeiro mré mũ ja ag tóg nĩgtĩ, ag tỹ tỹ êprã ke ra. Êprã ke ag kãmĩ tóg ag kygãm ja nĩ, cordeiro ti. Kỹ ag tóg tỹ Topê tũ nỹtĩ, cordeiro tũ ke gé. Ag mỹ ag tóg há pẽ nỹtĩ.

⁵ Ag pi(jé) ù mỹ ón ja nĩgtĩ. Kynê ja tũ pẽ ag tóg nĩgtĩ.

Topê tỹ jênê jafã tãgtũ ag

⁶ Kỹ sóg Topê tỹ jênê jafã ù vég mũ gé. Kanhkã krêm tóg tẽ tĩ mũ. Kỹ tóg Topê vĩ ma kãtĩ mũ, Topê vĩ ên vỹ tũg' henh ke tũ nĩ. Ti tỹ êprã ke kar ag mỹ Topê vĩ tónh ke vê, nação kar ag mỹ, povo kar mỹ ke gé, pã'i krêm ke kar ag mỹ, vyr mỹ vĩ nỹtĩ kar ag mỹ ke gé.

⁷ Kỹ tóg prêr mũ sir. “Topê hã kamêg nĩ, ti hã to: ùn mág vỹ tỹ ti nĩ, hemnĩ,” he tóg, Topê tỹ jênê jafã ên ti. “Ti kurã vỹ hur jun. Êprã ke ag jykre tugnỹm jé tóg ke mũ ha. Û tỹ kanhkã han mũ mỹ: “Topê vỹ tỹ ã nĩ,” hemnĩ, ù tỹ ga han mũ ên mỹ, ù tỹ goj han mũ ên mỹ, goj nĩhỹg mré hã. Ên hã mỹ: “Topê vỹ tỹ ã nĩ,” hemnĩ,” he tóg, Topê tỹ jênê jafã ên ti.

⁸ Ti nón Topê tỹ jênê jafã ù tóg jun mũ gé, kỹ tóg: “kókén kỹ tóg nỹ nĩ,” he mũ. “Cidade tỹ Babilônia vỹ kókén kỹ nỹ ha,” he tóg. “Êprã ke kar to tóg vãsãn ja nĩ, Babilônia to pã'i ti, ag tỹ ti mré ãjag prũ tũ fag mré nỹgnỹ jé, fag tỹ ti ri ke ãjag mén tũ ag mré nỹgnỹ jé, kỹ tóg vênh kar tỹ ti mré vinho fa pẽ kron ri ke nĩ,” he tóg, Topê tỹ jênê jafã ù ên ti.

⁹ Kỹ Topê tỹ jênê jafã ù tóg ag nón kãtĩ mũ gé. Ên vỹ prêr kỹ: “!..êprã ke ù ag tóg mĩg to: topê vê, he ja nĩgte..!” he mũ, prêr kỹ. “!..Ti kãggrá to ag tóg: topê vê, he ja nĩgte..! ãjag kakã ki ag tóg ti rá han ja nĩgte..! Ag nĩgê pãnĩ ki ag tóg rãnrán kỹ nỹtĩ gé..!”

¹⁰ Ên ag vỹ Topê tỹ ag to jũ jagy han venh ke mũ ha..! Kỹ tóg ag tỹ vinho kron ri ke nỹ nĩ ha..! Topê vỹ jũ jagy han kỹ jê ha..! Kỹ ti tỹ ag to jũnh ke tóg kar kỹ nỹ ha..! Kỹ tóg êg tỹ vinho tỹ copo fãn kỹ fêg ên ri ke nĩ ha..! ti tỹ ag to jũnh ke ti..! Topê tỹ vênh kãn kỹ jê to ken hã vê..! Û tỹ mĩg to: topê vê, he ja ên ag vỹ jagãgtar mág venh ke mũ ha..! cordeiro rĩnve..! Topê tỹ jêgnê jafã ag kar rĩnve ag jagtar kãn kỹ nỹtĩ ha..! Pĩ ki ag

tóg jagāgtar ke mũ ha..! pó tỹ enxofre pũr nĩja ki ke gé, vãn pũr nĩja ri ke ěn ki..!

¹¹ Ag tỹ pĩ ki jagāgtar mũ ěn nĩja tóg kanhkā to tãpry mũ ha..! Tũg' henh ke tũ ti nĩ, pĩ ěn ti..! Ũ tỹ mĩg to: topě vĕ, he mũ ěn ag vỹ vĕnhkánkán ke tũ pĕ nĩ..! ũ tỹ ti kãggrá to: topě vĕ, he mũ ěn ag kar ti..! ũ tỹ ti jyjy tỹ ránrán kỹ nỹtĩ ěn ag kar ti..! Vĕnhkán ke tũ ag nỹtĩ ha..! kurā ki, kuty mré hã..!" he tóg, prĕr kỹ, Topě tỹ jĕnĕ jafā ũ ěn ti.

¹² Ũ tỹ Topě ki ge kỹ nỹtĩ ag jé ti to krónh ke tũg, ag jé Topě tovãnh tũg, ũ tỹ Topě vĩ kri fig mũ ag, ũ tỹ Jesus to tar nỹtĩ ag.

¹³ Kỹ sóg kanhkā tá vĕnh vĩ ũ mĕg mũ gé. Kỹ tóg: "tag rán nĩ, ha mĕ," he mũ, ũ tỹ kanhkā tá vĩ mũ ti. "Ũ tóg ěg Senhor ki ge kỹ nỹtĩ, gen kỹ ag tóg kãgter ja nĩ. ěn ag mỹ tóg sér tãvĩ tĩ ha," he tóg, ũ tỹ kanhkā tá vĩ mũ ti. Kỹ Topě kuprĩg tóg: "hỹ," he mũ gé. "Ag rãnrãj kaja vég ag tóg mũgtĩ, kỹ ag tóg ag rãnrãj to vĕnhkán kỹ nỹtĩ ha," he tóg, Topě kuprĩg ti, ũn kãgter mũ ag to, ũ tỹ ěg Senhor ki ge kỹ nỹtĩ ag to.

Topě tỹ jĕnĕ jafā ag tỹ ěprā ke ag vóg kónãn

¹⁴ Kỹ sóg kanhkā góg kupri vég mũ gé sir. Ũ tóg kanhkā góg ěn kri nĩ nĩ, tỹ tóg ěprā ke nĩ ve nĩ. Hã ra tóg krĩ tógfĩ tỹ ouro nĩ nĩ, kỹ tóg ěg tỹ trigo kre jafā vyn kỹ nĩ nĩ gé. Jukén kỹ tóg nỹ, trigo kre jafā ěn ti.

¹⁵ Kỹ Topě tỹ jĕnĕ jafā ũ tóg kãtĩ mũ gé, Topě jo ĩn kãtá. Kỹ tóg ũ tỹ kanhkā góg kri nĩ ěn mỹ: "trigo kre jafā tỹ krenh tĩg nĩ," he mũ. "Tỹ ti krenh ke kurā vĕ. Vĕnh kãn kỹ ag nỹtĩ nĩ, ěprā ke ag," he tóg.

¹⁶ Kỹ ũ tỹ kanhkā góg kri nĩ ěn tóg trigo kre jafā ěn tỹ krenh tĩ mũ.

¹⁷ Kỹ sóg Topě tỹ jĕnĕ jafā ũ vég mũ gé. Topě jo ĩn kãtá tóg kãkutĕ mũ. Uva kre jafā vyn kỹ tóg tá kãkutĕ mũ.

¹⁸ Kỹ Topě tỹ jĕnĕ jafā ũ tóg jun mãn mũ gé. Topě jo ĩn kãtá tóg kãkutĕ mũ gé, Topě mỹ nĕn ũ pũn jafā ěn tá. Topě tỹ jĕnĕ jafā tag vỹ pĩ ki rĩr tĩgtĩ. Kỹ tóg ũ tỹ uva kre jafā vãg mũ ěn mỹ: "uva kre jafā tỹ krenh tĩg," he mũ. "Ga kri ti nỹtĩ, uva kanĕ ti. ěn krenh tĩg. Rã há ti nỹtĩ ha," he tóg.

¹⁹ Kỹ tóg tĩ mũ, Topě tỹ jĕnĕ jafā ěn ti. Uva kanĕ krég tóg mũ sir. Kỹ tóg uva jĕgmĩ jafā

ki ag vãm mũ, hã vỹ: Topě tỹ vĕnh kar to jũ, he mũ, hã vỹ: uva jĕgmĩ jafā, he mũ.

²⁰ Cidade fyr tá tóg jĕ nĩ, uva jĕgmĩ jafā ěn ti, kỹ ag tóg uva jĕgmĩg mũ sir, Topě tỹ jĕnĕ jafā ěn ag. Kỹ ag tóg tá ag kyvĕnh kujĕg mũ, ěprā ke ag kyvĕnh ti, kỹ tóg tãra tĩ mũ, 300 (ke) quilômetros ra, ag kyvĕnh ti. Tỹ tóg goj mág nỹ ve nĩ, ag kyvĕnh ti. Cavallo tỹ kã jĕ ra tóg pun kenh ke mũ vĕ.

15

Topě tỹ jĕnĕ jafā ag tỹ ěprā ke ag vóg kónãn mãn

¹ Kỹ sóg kanhkā tá nĕn ũ vég mũ gé. Inh mỹ tóg e tĩ, isỹ nĕn nĕ ěn ve kỹ, kỹ tóg inh kanĕ jun mũ. Topě tỹ jĕnĕ jafā tỹ 7 (ke) ag vigve inh. Ga kri ke ag vóg kónãn jé ag tóg ke mũ, vógvóg tỹ 7 (ke) ki. Ag tỹ ga kri ke ag vóg kónãn kar kỹ Topě tóg jũ mãn ke tũ nĩ ha.

² Kỹ sóg goj tỹ vidro kãki pĩ gru vég mũ. Kỹ sóg ũ ag vigvég mũ gé, ũ tỹ mĩg ěn kato vãsãnsãn mũ ěn ag. Ag pi(jé) ãjag tỹ tỹ ěprā ke nỹtĩ ra mĩg kãggrá ěn to há nỹtĩ ja nĩgtĩ', ag pi(jé) vĕnh ki ti número rán ja nĩgtĩ', ti jyjy tĩ'. Ag pi(jé) mĩg vĩ kri nĩm ja nĩgtĩ'. Hã kỹ ag vỹ goj tỹ vidro jo nỹtĩ, kỹ ag tóg vãkyn jafā tỹ harpa vyn kỹ nỹtĩ nĩ, Topě tỹ ag mỹ harpa vin mũ ěn.

³ Kỹ ag tóg Topě mỹ rãnrãj tĩ tỹ Moisés tỹ jé ěn tó mũ, tĩ tỹ jãn ti. Cordeiro ěn mỹ ag tóg jãn mũ, ha mĕ: "Topě kósin vỹ tỹ ã nĩ, pã'i mág vỹ tỹ ã nĩ, vĕnh kar kri ke vỹ tỹ ã nĩ," he ag tóg mũ, cordeiro mỹ, jãn kỹ. "Nĕn ũ há tãvĩ han ja ã tóg nĩ, ge ve ja tũ ěg tóg nỹtĩ. Ā jykre vỹ kuryj tãvĩ nỹ, ki hã tó ã tóg tĩgtĩ. Povo kar kri ã tóg jĕ nĩ.

⁴ Vĕnh kar ag vỹ ã kamĕg tĩ, pã'i mág kar ag. Vĕnh kar ag vỹ ã jiji to: "ũn mág vỹ tỹ ti nĩ," he tĩ. Ā hã ne ã pir mỹ há nĩ'. Povo kar tóg ã tá junjun ke mũ, kỹ ag tóg ã mỹ: "Topě vỹ tỹ ã nĩ," henh ke mũ. Ā jykre kuryj ěn ve kãn jé ag tóg ke mũ, povo kar ag," he ag tóg mũ, jãnjãn kỹ, ũ tỹ mĩg kato vãsãnsãn mũ ěn ag.

⁵ Kar kỹ sóg kanhkā tá Topě jo ĩn vég mũ. Ti jãnkã nón ag tóg mũ, kur tỹ ĩn ěn róm kỹ, Topě nĩg jafā ěn.

⁶ Kỹ Topě tỹ jĕgnĕ jafā tỹ 7 (ke) ěn ag tóg tá kãpa mũ, ũ tỹ ga vóg kónãn ke mũ ěn ag. Kur

kupri jãnhkri rĩnh ký ag tóg kãmũ mũ, pyrfé tỹ kur rĩnh ký, ký ag tóg ouro tỹ vėsógfĩn ký nỹtĩ gé, ãjag fe kri.

⁷ Ký nén nẽ tỹ 4 (ke) ên ag kãmĩ ù tóg ag mỹ ouro tỹ pẽnky junjun mũ, Topẽ tỹ jẽgnẽ tỹ 7 (ke) ên ag mỹ. Pẽnky tỹ 7 (ke) junjun ag tóg mũ, ag mỹ. Fór ti nỹtĩ, pẽnky ti, Topẽ jũ tỹ. Topẽ vỹ tũ' henh ke tũ pẽ nĩ. Ti jũ tỹ tóg fór nỹtĩ, pẽnky ti.

⁸ Ký Topẽ jo ĩn ên krêm tóg nĩja nĩ. Topẽ tá tóg tũmtũm ke kãtĩ mũ, nĩja ên ti, Topẽ tỹ tỹ ùn mág nĩn ký, ti tar nĩn ký. Topẽ tỹ jẽgnẽ jafã tỹ 7 (ke) ên ag tỹ ga vóg kónãn ke to hã ù tóg Topẽ jo ĩn ên kãra rãnh ke tũ nĩ.

16

Topẽ jũ

¹ Ký sóg vẽnũ vĩ ù jẽmẽg mũ, Topẽ jo ĩn ên kãtã. Topẽ tỹ jẽgnẽ jafã tỹ 7 (ke) ên mỹ tóg vĩ mũ, ùn vĩ mũ ên ti, ký tóg: “pẽnky tỹ funfór ên tỹ ga kri kugjẽn mũjẽg,” he mũ.

² Ký Topẽ tỹ jẽnẽ jafã ù tóg tĩ mũ, ti pẽnky ki nĩ ên tỹ ga kri kujẽn jé. Ký ù tỹ mĩg ên jiji tỹ ránrán ký nỹtĩ ên ag kar vỹ fugfóm jagy han mũ, kaga jagy. Û tỹ mĩg kãggrã to: “Topẽ vỹ tỹ ti nĩ,” he mũ ag kar vỹ fugfóm kãn mũ.

³ Ký Topẽ tỹ jẽnẽ jafã ù tóg goj kafã tũ ki ã pẽnky ki nĩ ên kujẽg mũ gé. Ký goj tóg vẽnũ kyvẽnũ ri ke nĩ ha, ag tỹ ù tãnh mũ kyvẽnũ ên ri ke. Ký goj kãmĩ mũ kar ag vỹ kãgter mũ ha.

⁴ Ký Topẽ tỹ jẽnẽ jafã ù tóg ã pẽnky ki nĩ ên kujẽg mũ gé, pẽnky tãgtũ vẽ sir. Goj mág mré goj kãsir kar ki tóg kujẽg mũ, ti tũ ti, goj nĩhỹg kar ki ke gé. Ký tóg vẽnũ kyvẽnũ kar nỹtĩ ha, goj kar ti.

⁵ Ký ù tỹ goj ki rĩr tĩ ên tóg: “ũn há vỹ tỹ ã nĩ,” he mũ, Topẽ mỹ. “Vãsỹ ã tóg nĩ ja nĩgtĩ, ký ã tóg ùri nĩ nĩ gé,” he tóg mũ, Topẽ mỹ. “Vẽnũ jykre há han ký ã tóg nĩ nĩ.

⁶ Û tỹ ã ki ge ký nỹtĩ ag kãgtén ag tóg, ù tỹ ã vĩ tó tĩ ag mré hã. Ký ã tóg ag mỹ vẽnũ kato vẽnũ kyvẽnũ nĩm mũ sir, ag tỹ kron jé. Ag tỹ ag tỹ ag kãgtén kajãm hã vẽ,” he tóg, Topẽ mỹ, Topẽ tỹ jẽnẽ jafã ti.

⁷ Ký sóg vẽnũ vĩ ù jẽmẽg mũ gé. Topẽ mỹ nén ù pũn jafã tá tóg vĩ mũ, ùn vĩ mũ ti, ký tóg: “Topẽ vỹ tỹ ã nĩ, pã'i vỹ tỹ ã nĩ, vẽnũ kar kri ke vỹ tỹ ã nĩ,” he mũ. “Kuryj ti nĩ, ã jykre

ti, ký ã tóg ki hã tó tĩ, ký ã tóg ki hã ag vóg kónãn tĩ gé,” he tóg mũ, ùn vĩ mũ ên ti.

⁸ Ký Topẽ tỹ jẽnẽ jafã ù tóg ã pẽnky ki nĩ ên kujẽg mũ gé. Pẽnky tỹ 4 (ke) vẽ sir. Rã ki tóg ã tũ kujẽg mũ. Ký rã tóg vẽnũ kar kri hupũn jagy han mũ, ký ag jagtar mũ.

⁹ Ký ag tóg kugpũr mũ sir, vẽnũ kar, rỹ jagy tỹ. Ký ag tóg Topẽ to vĩ kónãn mũ sir, ti tỹ ag vóg kónãn tũgrĩn. Ge ra ag tóg ãjag jykre tovãnh sór tũ nỹtĩ, Topẽ mỹ ag tóg vẽnũ vin sór tũ nỹtĩ.

¹⁰ Ký Topẽ tỹ jẽnẽ jafã ù tóg ã tũ kujẽg mũ gé. Pẽnky tỹ 5 (ke) vẽ sir. Mĩg ên nĩgja kri tóg ã tũ kujẽg mũ. Ký tóg kuty nỹ, mĩg ên krêm ke kar ag mỹ. Ký tóg vẽnũ kar mỹ e tãvĩ tĩ. Kaga jagy han ag tóg mũ, ag fugfóm to. ãjag kaga jagy tũgrĩn ag tóg ãjag nũnẽ kyprãg mũ.

¹¹ Ký ag tóg Topẽ tỹ kanhkã tá nĩ ên mỹ vĩ kónãn mũ, ag kaga to, ag tỹ ti jagy vég mũ kar to. Ge ra ag tóg ãjag jykre kórég tovãnh sór tũ nỹtĩ.

¹² Ký Topẽ tỹ jẽnẽ jafã ù tóg ã tũ kujẽg mũ gé. Pẽnky tỹ 6 (ke) vẽ sir. Goj tỹ Eufrates ki tóg ã tũ kujẽg mũ. Ký tóg tóg kãn mũ, goj tỹ Eufrates ti. Hã ký pã'i tỹ rã jur ja tá kãmũ ên ag tóg kãmũ mũ ha, ký goj tóg ja ên vỹ tỹ ag japry nỹ ha, ag jamĩn.

¹³ Ký sóg vẽnũ kuprĩg tãgtũ vég mũ, hã ra tóg tỹ pépo ve nỹtĩ, vẽnũ kuprĩg ag. Û tóg mĩg fẽr ên jẽnã tá kãkutẽ mũ, ù tóg goj kãtã mĩg ên jẽnã tá kãkutẽ mũ, ù tóg ón ký Topẽ vĩ tó tĩ ên jẽnã tá kãkutẽ mũ gé.

¹⁴ Japo ag vẽ, vẽnũ kuprĩg tỹ tỹ pépo nỹtĩ ve ên ag, hã ra ag tóg êg tỹ nén han vãnũ hyn han mũ. Ký ag tóg êprã ke to pã'i kar ag mré vẽnũ mũ gé, ag tỹ vẽnũ génh ke to vẽnũ mãn jé, Topẽ tỹ ag mỹ kurã nĩv ên ki. Topẽ hã ne tỹ ùn mág nĩ'.

¹⁵ “Ha vé, ãjag tỹ nén ù péju(g) tĩ ên kãtĩg ri ke ti nĩnh mũ, inh kãtĩg mãn ke ti. ãjag nũgnũr tũ nỹtĩn ký tóg há tĩ, ãjag kur kynkar ký nỹtĩn ký tóg há tĩ. Ký mỹ sér nỹtĩmnĩ. Ký ãjag tóg kator nỹtĩnh ke tũ nĩ. Mỹ'ãg'ãg ke tũ ãjag nỹtĩ, ù ag tỹ ãjag vég mũ ra,” he tóg, êg Senhor ti, êg mỹ.

¹⁶ Japo tag ag vỹ pã'i kar tỹ vẽnũ mãn han mũ, êmã tỹ Armagedom tá, Hebreu vĩ ki êmã ên jyjy vẽ.

17 Kÿ Topê tÿ jênê jafã ù tóg ã tũ kujêg mũ gé. Pénky tÿ 7 (ke) hã vê. Kanhkã krêm tóg ã tũ kujêg mũ. Kÿ nÿgja sÿnvĩ ên tá, Topê jo ïn kãkã nÿgja ên tá vênh vÿ tóg mē há ti, kÿ tóg: “nén kar tóg kar kãn kÿ nÿ ha,” he mũ, vênh vÿ ti.

18 Kÿ ta tóg kómkom ke mũ, tÿrÿr he tóg mũ gé, kÿ ga vÿ ragra ke jagy han mũ gé. Ga tÿ ragra ke tÿ ge ve ja tũ êg tóg nÿtĩ. Êg tÿ ga mĩ mũn kã tóg ragra ke tÿ ge han ja tũ nĩ.

19 Cidade mág ên tóg vênh kãpóv kÿ nÿ ha, vênh kãpóv tágtũ tÿ. Kÿ ga kar mĩ cidade tóg kókén kÿ nÿtĩ nĩ. Topê pi(jé) cidade tÿ Babilônia kã jatu ja nÿgtĩ'. Cidade ên ki ke ag to tóg jũ távĩ han mũ, Topê ti, ag to tóg fe gÿv han mũ. Hã kÿ tóg ag vóg kónãn jagy han mũ, kÿ tóg êg tÿ vinho kron ri ke nĩ.

20 Kÿ goj vãso kar tóg tũ nÿtĩ ha ke gé, pãnónh kar tóg tũ nÿtĩ gé.

21 Kÿ nãfy tóg vár mũ gé. Éhé távĩ ti nĩ, nãfy ên ti, ùn pir tóg quilo tÿ hên ri ke nĩ, kukryr tÿ nãfy ên. Êprã tóg vár mũ. Kÿ êprã ke ag tóg Topê mÿ vÿ kónãn mũ gé sir, nãfy tag to, ti jagy távĩ nÿn kÿ.

17

Ûn tÿtã kórég fi

1 Kÿ Topê tÿ jênê jafã ù tóg ïnh ki jun mũ, ù tÿ pénky mãn mũ ja ên ag kã ù. Kÿ tóg ïnh mÿ: “kunÿg,” he mũ. “Nhÿ ã mÿ cidade mág ti ven, cidade tÿ goj tÿ hên ri ke tá nÿ ên ti. Cidade ên ki ke ag vÿ ùn mén (ka)mē fi ri ke nÿtĩ, kÿ Topê vÿ ag vóg kónãn ke mũ, ùn mén (ka)mē fi ri ke ên ag.

2 Pã'i kar vÿ fi mré nÿ ja nÿgtĩ, ùn mén (ka)mē ên fi mré. Êprã ke kar mÿ tóg sér tĩ, fi jykre ti, kÿ tóg ag tÿ kronkron kÿ kãgter ri ke nĩ, ag tÿ ùn mén (ka)mē ên fi mré nÿ ti,” he tóg ïnh mÿ, Topê tÿ jênê jafã ti.

3 Kÿ Topê kuprÿg tóg ïnh krÿn mũ, kÿ sóg nén nē ve kÿ ga kórég ra tĩ mũ. Topê tÿ jênê jafã ên vÿ ïnh pére tĩ mũ. Tá ùn tÿtã fi tóg nĩ nĩ. Fi mēg tÿ mÿg kri fi tóg nĩ nĩ, hã ra tóg kusũg jê, fi mēg ti. Vênh jygji tóg fi mēg krÿ ránrán kÿ nÿtĩ, kÿ tóg vênh kri tÿ rũm ke kÿ jê, vênh jygji rágrá tÿ. Vênh jygji ên tóg Topê to vÿ kónãn kÿ nÿtĩ. Fi mēg vÿ ã pir ra krÿ tÿ 7 (ke) nĩ, nÿka tÿ 10 (ke) ti nĩ gé.

4 Ûn tÿtã ên fi vÿ kur kusũg tu kÿ nĩ nĩ, kur kósóg pē. Ouro tu fi tóg nĩ gé, pó sÿnvĩ, pérola. Ouro tÿ copo mãn kÿ fi tóg nĩ nĩ. Hã ra tóg nén ù kórég kar tÿ fór jê, nén ù kavéj kar tÿ, copo ti. Fi tÿ vênh jykre pãno han mũ to ken hã vê.

5 Fi jiji vÿ fi kãkã ki rán kÿ nĩ, ù tóg ã vÿ ki fi jygy tag mē ja tũ nĩ ver. Hã ra tóg: “Babilônia hã vê,” he mũ, fi jiji ti. “Ûn mág vÿ tÿ ïnh nĩ,” he tóg. “Ûn mén (ka)mē kar fag mÿnh vÿ tÿ ïnh nĩ, ù tÿ nén ù kavéj kar han tĩ ag mÿnh vÿ tÿ ïnh nĩ, êprã, ag tÿ ïnh jykre han kÿ,” he tóg mũ, fi jygy ti.

6 Hã ra fi tóg kron kÿ ter nĩ, fi tÿ ù tÿ Topê ki ge kÿ nÿtĩ ag kyvénh kron kÿ. Û tÿ hên ri ke ag kãgtén ja ag tóg nÿgtĩ, Jesus tugrÿn, ag tÿ Jesus tovãnh sór tũ tugrÿn, hã ra fi tóg ag kyvénh kron kãn ja nĩ.

Ïnh mÿ tóg e tĩ, sÿ fi ve kÿ.

7 Kÿ Topê tÿ jênê jafã tóg ïnh mÿ: “mÿ ã mÿ e?” he mũ. “Nhÿ ã mÿ fi kãmén, fi mēg tÿ mÿg ti ke gé, fi mēg krÿ tÿ 7 (ke) ên, fi mēg nÿka tÿ 10 (ke) ên, fi tÿ kri nĩ jafã ên ti,” he tóg, Topê tÿ jênê jafã ti.

8 “Fi mēg tag vÿ vãsÿ jê ja nÿgtĩ. Ûri tóg ki tũ nĩ, hã ra tóg kãnhmar nũgme tá kãkutênh ke mũ, Topê tÿ ti kókén pē han jê. Kÿ tóg êprã ke ag mÿ e tÿnh mũ, ag tÿ fi mēg tag venh ken kÿ, ùn jygji tÿ Topê livro ki rán kÿ nÿtĩ tũ ag mÿ. Topê tÿ nén (ũ) kar han to hã tóg ag rán ja tũ nĩ, kÿ ag tóg rÿnrÿr ke tũ nÿtĩ. Ên ag mÿ tóg e tÿnh mũ, ag tÿ fi mēg tÿ mÿg ven kÿ. Vãsÿ tóg nĩ ja nÿgtĩ, kÿ tóg ver ki tũ nĩ, hã ra tóg kejên kãtÿg mãn ke mũ ha.

9 Topê tÿ ùn kanhrãn mũ ên ag hã vÿ fi mēg to jykrén ke mũ. Ti krÿ tÿ 7 (ke) vÿ tÿ pãnónh tÿ 7 (ke) nÿtĩ. Pãnónh ên kri fi tóg nĩ nĩ, ùn tÿtã kórég ên fi. Pã'i tÿ 7 (ke) to ke vê gé, hã ra, ti krÿ tÿ 7 (ke) ên ti.

10 Pã'i tÿ 5 (ke) vÿ hur tũg, ùn pir vÿ ùri nĩ, ùn pir ù vÿ kar kÿ kãtÿg ke mũ gé. Ti kãtÿg ken kÿ tóg nÿg sÿ pē han ke mũ, ù tÿ êgno ên ti.

11 Fi mēg tag, ù tÿ vãsÿ nĩ ja kar kÿ ùri kã nĩ tũ ên vÿ tÿ pã'i ù nĩ gé. Pã'i tÿ 8 he mũ vÿ tÿ ti nĩ. Pã'i tÿ 7 (ke) ên mré ke vÿ tÿ ti nĩ gé. Topê vÿ ti tÿ tũ' henh ke mũ gé.

12 Ti nÿka tÿ 10 (ke) vÿ tÿ pã'i tÿ 10 (ke) nÿtĩ gé. Ên ag vÿ ver kãmũ tũ nÿtĩ. Fi mēg mré

ag tóg tỹ pã'i nýtĩnh ke mũ, hã ra ag tóg nĩg sĩ pẽ han ke mũ gé.

¹³ Jagnẽ mré ag tóg vẽnħ jykre pir han ke mũ, pã'i tag ag, fi mẽg ẽn mré. Fi mẽg mỹ ag tóg vẽnħ vin ke mũ.

¹⁴ Cordeiro ẽn kato ag tóg vãsãnsãn ke mũ. Hã ra cordeiro tóg ag tỹ hẽn ri kenh ke mũ, ti mré ke ag mré, ù tỹ ti tovãnh ja tũ ag mré, ùn kuprẽg kỹ nýtĩ ag mré. Kỹ cordeiro ẽn vỹ tỹ pã'i kar kri ke jẽ. Pã'i mág ag kar kri tỹ pã'i ti jẽ mỹr," he tóg inh mỹ, Topẽ tỹ jẽnẽ jafã ti.

¹⁵ Kỹ tóg inh mỹ: "goj ve ja ã nĩ gé," he mũ. "Goj ẽn tá fi tóg nĩ, ùn týtã kórég ẽn fi. Povo kar to ken hã vẽ, hã vỹ: goj, he mũ, ẽprã ke kar to ken hã vẽ, nação kar to ken hã vẽ, vurmỹ vỹ nýtĩ ag kar to ken hã vẽ gé, hã vỹ: goj, he mũ," he tóg.

¹⁶ "Kỹ fi mẽg vỹ ti nĩka tỹ 10 (ke) ẽn mré (tóg) fi to kórég tãvĩ nýtĩnh ke mũ. Fi tũ kunũnh kãn jé ag tóg ke mũ, fi kur mré hã, kỹ fi tóg kator nĩnh ke mũ, ùn kórég ẽn fi. Fi nĩ ko jé ag tóg ke mũ gé, kỹ ag tóg fi pũn ke mũ gé.

¹⁷ Ag tỹ ki kagtĩg ra Topẽ tóg ag krĩn tĩ, ag vatãnh tá, kỹ ag tóg Topẽ tỹ ag mỹ fi to vẽnħ jykre nĩv ẽn hã han tĩ. Topẽ tỹ ag krĩn kỹ ag tóg jagnẽ mré vẽnħ jykre pir hã han tĩ, kỹ ag tóg fi mẽg mỹ vẽnħ vin tĩ gé, pã'i tỹ 10 (ke) ẽn ag. Gen kỹ ag tóg nén kar kãnkãn ke mũ ẽn pêtẽm ke mũ, Topẽ tỹ vãsỹ tó ja ẽn kar ti," he tóg, Topẽ tỹ jẽnẽ jafã ti.

¹⁸ "Kỹ ùn týtã kórég ẽn fi, ã tỹ ùn vэг mũ ẽn fi vỹ tỹ cidade mág ẽn nĩ. Ẽprã pã'i kri ke kar fi nĩ," he tóg inh mỹ, Topẽ tỹ jẽnẽ jafã ẽn ti.

18

Babilônia tỹ tũ' he

¹ Kar kỹ sóg Topẽ tỹ jẽnẽ jafã ù vэг mũ gé. Kanhkã tá tóg kãtẽre mũ. Tar pẽ tóg jẽ, jẽngrẽ tóg jẽ gé, kỹ ti jẽngrẽ tóg kurã han mũ, ẽprã, Topẽ tỹ jẽnẽ jafã ẽn ti.

² Ẽn vỹ prẽr mũ. "...Kókén kỹ ti nỹ ha..!" he tóg mũ, prẽr kỹ. "...Babilônia vỹ kókén kỹ nỹ, cidade mág ẽn ti..!" he tóg. "...Japo ag, vẽnħ jagrẽ kórég ag vỹ tá ẽmã nýtĩ ha..! Jẽsĩ kavėj kar, sêsĩ kórég kar vỹ tá nýtĩ ha, cidade jy ró ẽn kãmĩ..!"

³ Ẽprã ke kar vỹ cidade ẽn jykre han ja nĩgte..! Kỹ tóg ag tỹ ù mré nỹ kónãn ẽn ri ke ne..! Vinho kron mág ri ke ti ne..! cidade ẽn jykre ti..! Ẽprã pã'i ag vỹ tá vẽnħ jykre han ja nĩgte..! Kỹ tóg ùn týtã kórég fi mré nỹ ri ke nĩ, ag jykre kórég ti..! Nén ù vender he tĩ ag vỹ cidade ẽn tugrĩn rico nýtĩ ja nĩgte..! tá ke ag tỹ rico tãvĩ ja nýtĩn kã..! Hã ra tóg kókén kỹ nỹ ha..!" he tóg, prẽr kỹ, Topẽ tỹ jẽnẽ jafã ti.

⁴ Kỹ sóg kanhkã tá vẽnħ vỹ ù mẽg mũ gé, ù tỹ Topẽ ki ge kỹ nýtĩ ag mỹ tóg: "mũ jé ha," he mũ, ù tỹ kanhkã tá vỹ mũ ẽn ti. "Cidade tá kãpamnĩ, ke tũ nĩ mũ ra ãjag tóg ag mré Topẽ vỹ mranh ke mũ, kỹ Topẽ tóg ag mré ãjag vóg kónãn ke mũ gé, ti tỹ cidade kókén ken kỹ," he tóg, ù tỹ kanhkã tá vỹ mũ ti, ù tỹ Topẽ ki ge kỹ nýtĩ ag mỹ. Cidade ẽn kókén ke to hã tóg ag mỹ tó mũ.

⁵ "Topẽ vỹ ag jykre pãno ve kãn, kỹ tóg kã jatu tũ nĩ. Ag tỹ Topẽ vỹ mranh vỹ e tãvĩ nýtĩ, kỹ ti pãnfi tóg kanhkã pêtẽm mũ, ag tỹ Topẽ vỹ mranh pãnfi ti.

⁶ Ag tỹ ãjag mỹ nén han ja ẽn ri ke han nĩ, ag mỹ," he tóg, ù tỹ Topẽ ki ge kỹ nýtĩ ag mỹ. "Ag tỹ ãjag mỹ ti kórég pir han kỹ ag mỹ ti kórég régre han nĩ, vẽnħ kato. ãjag mỹ ag tóg ti kron jafã kórég ven ja nĩ. Ag mỹ ti kron jafã kórég ven régrég nĩ.

⁷ Sĩnvĩ ja ag nýtĩ, tỹ nén ù mág ja ag nýtĩ. Ag jagtar han nĩ, ag sĩnvĩ tag to. Ag jagtar han nĩ, ag tỹ nén ù mág tag to, ù tỹ nén ù mág tũ ag jagtar han nĩ gé, ag mré. "Ûn mág vỹ tỹ ẽg nýtĩ," he ag tóg mũ. "Û pi(jé) ẽg jagtar han ke mũ!" he ag tóg mũ.

⁸ Hã ra ag tóg vãhã venh ke mũ, ag jagãgtar ke ti, ag vêsỹrénħ ke ti, ag vãnħprãg ti, kỹ tóg ag tỹ vẽnħ kaga jagy han ri ke nĩ sir. Kurã pir ki ag tóg tag ve kãn ke mũ, kỹ ag tóg pĩ ki kãgter ke mũ. Topẽ hã vỹ ag vóg kónãn ke mũ, pã'i mág ti. Tar pẽ ti jẽ nĩ mỹr, Topẽ ti," he tóg, ù tỹ kanhkã tá vỹ mũ ti, ù tỹ Topẽ ki ge kỹ nýtĩ ag mỹ.

⁹ Kỹ ẽprã pã'i ag vỹ venh ke mũ, cidade nĩja ti. Cidade ki ke ag mré tóg ag mỹ sér nĩ ja nĩgtĩ. Ag mré ag tóg nén (ũ) kar vĩgve ja nĩgtĩ, kỹ tóg ag tỹ fag mré nỹ ri ke nĩ ja nĩ, ag tũ mág ẽn ti. Cidade pũr nĩja ve jé ag tóg ke mũ ha, kỹ ag tóg fỹnh mũ, jagtar ke mũ.

10 Kuvar há tá ag tóg nýtĩnh ke mũ, ag kanẽ jur kũ, ag tũ cidade ki ke ag vãnhrãg jagy mẽ kũ. Kũ ag tóg jagtar kũ: “jagy tãvĩ tóg tĩ,” henh ke mũ sir, pã'i ag. “Éhé tãvĩn ja ti nĩ, cidade tũ Babilônia tag ti, tar pẽ ja ti nĩ. Hã ra ag tóg hora pir ki ti kókén kãn,” he jé ag tóg ke mũ, pã'i ag.

11 Kũ nén (ũ) vender he nýtĩgtĩ ag vỹ jagtar kũ fỹnh ke mũ gé, cidade tũ to. Tá ag tóg nén (ũ) tũ hẽn ri ke ve ja nĩgtĩ,

12 ouro ti, prata ti, pó sĩnvĩ ti, pérola ti, pyrfé tũ kur ti, kur tũ seda ti, kur kusũg ti, kur kusũg sã ti, ka kaja e ti, elefante jã tũ nén han mũ ti, ka sĩnvĩ tũ nén han mũ ti, ferro tũ nén han mũ ti, ferro kusũg tũ nén han mũ ti, pó tũ mármore tũ nén han mũ ti,

13 canela ti, vễjẽn ger há ti, ka jẽnjo pũn kũ ger há tũ incenso ti, ka jẽnjo pũn kũ ger há tũ mirra ti, vẽnhrĩ tũ jafã ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ùn gré ag, ùn tũtã fag mré hã. Tag kar tũ ag tóg negocio hyn han tũ ja nĩgtĩ, vender he nýtĩgtĩ ag, hã ra tóg tũ tũ ha.

14 Kũ nén ù vender he nýtĩgtĩ ag tóg jagtar kũ tag tónh ke mũ, ha mẽ. “Nén kar ve ja ẽg tóg nĩgtĩ, cidade tá, kũ tóg ẽg mũ sér nĩ ja nĩgtĩ. Riqueza ẽn tóg tũ' he kãn. ù tóg nén kar ẽn to ẽn mũn ke tũ nĩ ha. Ve mũn ke tũ ẽg tóg nĩ ha, nén (ũ) kar ẽn ti,” he jé ag tóg ke mũ, nén (ũ) vender he nýtĩgtĩ ag.

15 Kũ ag tóg kuvar há tá nýtĩnh mũ. Cidade ẽn tá negocio han to ag tóg vẽnhrã han ja nĩgtĩ, hã kũ tóg ag mũ e tũ. Tãtã nýtĩn kũ ag tóg jũrũn ke mũ, ag tũ cidade tá ke ag jagãgtar ve kũ. Fỹ jé ag tóg ke mũ, vễsỹrẻnh jé ag tóg ke mũ.

16 Kũ ag tóg: “jagy tãvĩ tóg nĩ,” henh ke mũ. “Hã tãvĩ ja ag nýtĩ, cidade tag ki ke ja ag. Kur sĩnvĩ rĩnh ja ag tóg nýtĩ, pyrfé tũ kur, kur kusũg, kur kusũg sã. Ouro rĩnh ja ag tóg nýtĩ, pó sĩnvĩ, pérola.

17 Hora pir ki ag tóg tũ' he kãn ja nĩ, ag tũ nén (ũ) kar mré hã,” he jé ag tóg ke mũ gé, nén ù vender he nýtĩgtĩ ag.

18 Kũ barco to pã'i ag vỹ nýtĩnh ke mũ gé, goj kri mũ mũ kar ag, barco ki rĩr tũ kar ag, ù tũ goj kri rãnhrãj mũ kar ag ke gé. Tãtã nýtĩ kũ ag tóg cidade nĩja ẽn ve kũ (ag tóg)

prẻnprẻr mũ sir. “Cidade ẽn ri ke ve mũn ke tũ ẽg tóg nĩ ha,” he jé ag tóg ke mũ.

19 Kũ ag tóg ga funfur tũ vẽnhrĩ kri vãm ke mũ sir, ag mũ e tũn kũ. Fỹ jé ag tóg ke mũ, vễsỹrẻnh jé ag tóg ke mũ. “Jagy tãvĩ tóg tũ,” he jé ag tóg ke mũ. “Hã tãvĩ ja ag nýtĩ, cidade tag ki ke ja ag. Vẽnhrĩ kar vỹ ag tũ mũn kũ vẽnhrĩ hyn han ja nĩgtĩ, ù tũ barco kãmĩ goj kri mũgtĩ ag. Kũ tóg jagy tãvĩ tũ. Hora pir ki tóg tũ' he kãn ja nĩ,” he jé ag tóg ke mũ gé, goj kri mũgtĩ ag.

20 “Kanhkã tá nýtĩ kar'. Mũ sér nýtĩmũ. Topẽ ki ge kũ nýtĩ kar', mũ sér nýtĩmũ. Apóstolo kar', Topẽ vĩ tó tũ kar', mũ sér nýtĩmũ. Tũ' he kãn ag huri, cidade ẽn tá ke kar ag. Topẽ vỹ hur ag vóg kónãn, ag tũ ãjag vóg kónãn ja tugrĩn.”

21 Kũ Topẽ tũ jẽnẽ jafã tar ù tóg pó mág vãg mũ. Kra tũ pó ri ke ti nĩ, pó mág ẽn ti. Kũ tóg goj nig ki ti fón mũ, jũ kũ, kũ tóg: “isỹ pó fón mũ tag ri ke ti nĩnh mũ, cidade tũ Babilônia kókén ti,” he mũ. “Kókén kãn kũ tóg nĩ. ù tóg ti ve mũn ke tũ nĩ ha, cidade ti.

22 Kãki ag tóg harpa kyn mũn ke tũ nýtĩ ha, tũnh mũn ke tũ ag nĩ ha, vãn tũ vãkyr ẽn kyn mũn ke tũ ag nĩ ha, trombeta ti ke gé. Vãkyr mẽ mũn ke tũ ẽg nĩ ha, cidade tũ Babilônia tá. ù tóg ki rãnhrãj mũn ke tũ nĩ ha, ù tóg ki nĩ mũn ke tũ nĩ ha. ù tóg ki tynyn mũn ke tũ nĩ gé.

23 ù tóg ki lampião grug mũn ke tũ nĩ ha. ù tóg ki vẽnhrĩ prũg to festa han mũn ke tũ nĩ gé. Hã tãvĩ ja ag nýtĩ, tá nén (ũ) kar vender he nýtĩgtĩ ẽn ag, kũ vẽnhrĩ kar vỹ ag vỹ jẽnẽ ja nĩgtĩ. Povo kar krĩn kónãn ja ag tóg nĩgtĩ, kujã tũ ẽg mũ ón tũ ẽn ri ke han ja ag tóg nĩgtĩ.

24 Topẽ vĩ tó tũ ag kãgtẻn ja ag tóg nĩgtĩ, cidade ẽn tá ke ag, Topẽ ki ge kũ nýtĩ ag kãgtẻn ja ag tóg nĩgtĩ. ẽn hã tá tóg vẽnhrĩ ven ja nĩ, ag tũ ùn kãgtẻn mũ kyvẻnh kar ti. Hã kũ ag tóg ag kar kyvẻnh kajãm kãn ke mũ,” he tóg mũ, Topẽ tũ jẽnẽ jafã tar ẽn ti.

19

1 Kũ sóg kanhkã tá nén ù mẽg mũ gé sir, hã ra tóg ù tũ hẽn ri ke ag jãn mẽg nĩ. Jãn kũ ag tóg cidade ẽn to tag tó mũ, ha mẽ. “Topẽ mũ vỹ há han nĩ. Topẽ ne ẽg krenkren han ki kanhró nĩ. Ti hã ne tũ ùn mág nĩ. Ti hã ne tar jẽ'.

² Ti tỹ nén han mũ vỹ kuryj kar nỹ. Ûn týtá kórég ên fi vóg kónãn tóg huri. Êprã ke kar kókén ja fi tóg nĩ, fi jykre pãno tỹ. Topẽ vỹ fi vóg kónãn, fi tỹ ti rãnrãj han tĩ ag kãgtén ja nĩn kỹ,” he ag tóg, kanhkã tân ag, cidade tỹ Babilônia to.

³ Kỹ ag tóg jãn mãn kỹ tag tó mũ gé, ha mẽ. “Topẽ mũ vĩ há han nĩ. Cidade ên pũr nĩa vỹ kanhkã ra tâpny mũ. Tũ' henh ke tũ ti nĩ, nĩa ên,” he ag tóg mũ gé, jãn kỹ, kanhkã tân ên ag.

⁴ Kỹ kófa tỹ 24 (ke) ên ag tóg mũg ke kãn mũ, nén nẽ tỹ 4 (ke) ên ag mré hã. Topẽ mũ ag tóg: “Topẽ vỹ tỹ ã nĩ,” he mũ, ù tỹ nĩgja sĩnvĩ kri nĩ ên mũ. Kỹ ag tóg: “hã vẽ,” he mũ gé. “Topẽ mũ vĩ há han nĩ,” he ag tóg mũ, jamã hár(a).

Cordeiro vẽn prũg

⁵ Kỹ nĩgja sĩnvĩ ên tá vẽn vĩ tóg mẽ há tĩ gé. “Û tỹ Topẽ mũ rãnrãj tĩ,” he tóg. “Û tỹ Topẽ kamẽg tĩ,” he tóg. “Ûn mág’,” he tóg. “Ûn kãsir’,” he tóg. “Topẽ mũ vĩ há han, ãjag kar,” he tóg, vẽn vĩ ên ti.

⁶ Kỹ sóg ù tỹ hẽn ri ke ag jãn mẽg mũ gé. Tỹ tóg sa krog vĩ mẽ tĩ, tỹ tóg ta tỹ tỹrỹr he mẽ tĩ gé, ag jãn ti. Jãn kỹ ag tóg tag tó mũ, ha mẽ. “Topẽ mũ vĩ há han nĩ,” he ag tóg. “Û tỹ nén ù kar han ki kanhró nĩ ên tóg tỹ pã'i mág pẽ jẽ, ãg pã'i mág ti, Topẽ ti.

⁷ Kỹ tóg ãg mũ sér tãvĩ tĩ. Vĩ sér han jé ãg tóg ke mũ ha. “Tỹ ti ùn mág pẽ jẽ,” he jé ãg tóg ke mũ gé. “Cordeiro tỹ vãhã prũg ke nẽ ha. Ti prũnh ke fi vỹ vẽn kãn huri.

⁸ Æ kur kupri ên tu kỹ fi tóg jẽ nĩ, fi kur jẽngrẽ ên,” he ag tóg, ùn e ag, jãn jãn kỹ. Fi jykre tãg to ken hã vẽ, hã vỹ: fi kur kupri jẽngrẽ, he mũ, fi tỹ Topẽ jykre há ên han kỹ nĩ hã vẽ. Û tỹ Topẽ ki ge kỹ nỹtĩ kar ag to ken hã vẽ, hã vỹ: cordeiro prũnh ke, he mũ.

⁹ Kỹ Topẽ tỹ jẽnẽ jafã tóg inh mũ: “inh vĩ tag rán nĩ,” he mũ. “Û tỹ hẽn ri ke ag tóg cordeiro prũg tỹ festa konh ke mũ. Topẽ vỹ ù tỹ ti festa ko mũ ag kar ve há han mũ,” he tóg. Kỹ tóg: “Topẽ tỹ tón hã vẽ,” he mũ gé. “Hã ra Topẽ tóg ón vãn nĩgtĩ,” he tóg, Topẽ tỹ jẽnẽ jafã ti.

¹⁰ Kỹ sóg ti krẽm mũg ke mũ, sỹ ti mũ: “Topẽ vỹ tỹ ã nĩ,” he jé. Hã ra tóg inh mũ: “ke tũg ra,” he mũ, Topẽ tỹ jẽnẽ jafã ên ti. “Topẽ

mỹ rãnrãj han jafã vỹ tỹ inh nĩ, ã ri ke, ã kanhkã ag ri ke, ù tỹ Jesus tỹ ki hã tó mũ ki króm mũ ên ag kar ri ke sóg nĩ, Topẽ rãnrãj han kỹ,” he tóg. “Topẽ hã mũ: Topẽ vỹ tỹ ã nĩ, hemnĩ,” he tóg inh mũ, Topẽ tỹ jẽnẽ jafã ên ti.

Topẽ vĩ tó tĩ ag vỹ Jesus tỹ ki hã tó mũ ên hã kãmén tĩ.

Û tỹ cavalo kupri kri nĩ

¹¹ Kỹ sóg kanhkã róm kỹ nỹ vég mũ. Cavalo kupri vỹ tá jẽ nĩ. Û tỹ ti kri nĩ jyjyn hã vỹ: “ùn ón vãn,” he mũ. “Û tỹ nén (ũ) há to krónh ke vãn,” he tóg mũ gé, ti jiji ti. Ti hã vỹ jykre kuryj nĩ, ù tỹ cavalo kupri kri nĩ ên ti, kỹ tóg ki hã tó tĩ gé. Nén ù há hã to tóg vãsãn ti gé.

¹² Ti kanẽ vỹ tỹ pĩ gru ve nĩ. Ti krĩ tógfĩ vỹ e nỹtĩ. Ti kri ti jyjy tóg rán kỹ nĩ, hã ra ù pi(jé) ti jiji ki kanhró nỹtĩ'. Ti hã vỹ ã pir mũ ã jyjy ki kanhró nĩ'.

¹³ Ti kur vỹ kyvẽn nĩ. Ti to ag tóg: “Topẽ vĩ,” he tĩ.

¹⁴ Kanhkã tá soldado ag tóg ti nón kãmũ mũ. Cavalo kupri kri ag tóg kãmũ mũ, kanhkã tân ag, ti soldado ag. Kur kupri rĩnh kỹ ag tóg kãmũ mũ.

¹⁵ Û tỹ ag jo tĩ mũ ên jẽnã tá rógro jã régre tóg kãkutẽ mũ. Rógro tag tỹ tóg povo kar ag tỹ hẽn ri kenh ke mũ. Tỹ ag kri jẽ kỹ tóg vẽn jykre tar han ke mũ, ag to. Uva jẽgmĩ jafã tá tóg jẽgmĩnh ke mũ, uva ti, hã vỹ: Topẽ tỹ vẽn kar to jũ jagy han mũ, he mũ, hã vỹ: uva jẽgmĩ, he mũ.

¹⁶ Ti kur ki tag tóg rán kỹ nĩ, ha mẽ. “Pã'i kar ag kri pã'i,” he tóg, vẽn rán ki. “Ûn mág kar ag kri ke,” he tóg mũ gé, vẽn rán ki. Tĩ kre ki tóg rán kỹ nĩ gé.

¹⁷ Kỹ sóg Topẽ tỹ jẽnẽ jafã ù vég mũ gé. Rã kri tóg jẽ nĩ. Kỹ tóg sēsĩ kar jé prër mũ, jēsĩ tỹ kanhkã krẽm tẽgtẽ tĩ ag kar. Jamã hár(a) tóg ag mũ: “!..kuneg..!” he mũ. “!..Vẽn mãn kãmũ jeg..!” he tóg. “!..Topẽ tỹ festa konh kãmũ jeg..!”

¹⁸ Pã'i kãgter konh kãmũ jeg..! Soldado to pã'i ag, soldado ag, cavalo ag, ù tỹ cavalo kri mũgtĩ ag, ù tỹ tỹ camarada nỹtĩ ag, ag patrão ag, ùn mág ag, ùn kãsir ag, êprã ke kar ag kãgter mũ nĩ konh kãmũ jeg..!” he

tóg, Topě tỹ jěně jafã ti, sēsĩ ag kar jé prěr kỹ.

¹⁹ Kỹ sóg goj kátá mĩg ěn ve mãn mũ gé, ěprã pã'i kar ag ke gé, ag soldado ag mré hã. Věnh mãn kỹ ag tóg nỹtĩ, ag tỹ ũ tỹ cavalo kupri kri nĩ ěn kato vãsãnsãn jé, ag tỹ ti krēm ke ag kato vãsãnsãn mág han jé.

²⁰ Kỹ ag tóg mĩg ěn ség mũ, ũ tỹ ón kỹ Topě vĩ tó tĩ ěn ag mré hã, ũ tỹ mĩg rĩnve nén ve vãnħ tỹ hěn ri ke hyn han ja ěn ti. Ti tỹ milagre hyn han tugrĩn ũ tỹ hěn ri ke ag tóg ti vĩ kri nĩm ja nĩgtĩ. Ti tỹ ag krĩn kónãn hã vĕ, ũ tỹ ti rá tỹ ránrãn kỹ nỹtĩ kar ag, ũ tỹ ti kãggrã to: “Topě vĕ,” he mũ kar ag. Kỹ ũ tỹ mĩg ěn ség mũ ag tóg pĩ gru fir ki ti fón mũ, pĩ mág pĕ ki, ũ tỹ ón kỹ Topě vĩ tó tĩ ěn mré hã. Ag rĩnrĩr hã ra ag tóg pĩ grug fir ěn ki ag vãm mũ, ag sigse kỹ. Pó tỹ enxofre pũr nĩja ěn ki ag tóg vãm mũ, vãn pũr nĩja ri ke ěn ki.

²¹ Ag soldado ag kãgtén ag tóg mũ gé sir, rógro tỹ, rógro tỹ ũ tỹ cavalo kupri kri nĩ ěn jĕnkã tá kãkutĕ mũ ěn ti. Kỹ jĕsĩ kar ag tóg vĕnh fãn mũ sir, ũn kãgter mũ ag nĩ kon kỹ.

20

Satanás tỹ prỹg tỹ mil (ke) ki se kỹ jĕ

¹ Kỹ sóg Topě tỹ jĕně jafã ũ vĕg mũ gé sir. Kanhkã tá tóg kãtére mũ, Topě tỹ jĕně jafã ti. Nũgme jãnkã nĩfénh jafã vyn kỹ tóg kãtére mũ, ti chave ti. Ferro tỹ corrente vãg tóg mũ gé.

² ěn vỹ mĩg fĕr ěn ség mũ, hã vỹ: pỹn ve tỹ ũn ve fag krĩn kónãn mũ, he mũ, hã vỹ: Japo, he mũ, hã vỹ: Satanás, he mũ, mĩg fĕr ěn ti. ěn se kỹ tóg ferro tỹ ti mrĩnh mũ sir. Kỹ tóg se kỹ jĕ nĩ, prỹg tỹ mil (ke) ki.

³ Nũgme ki tóg ti fón mũ sir, mĩg fĕr ti tỹ, Topě tỹ jĕně jafã ěn ti, kỹ tóg nũgme jãnkã nĩfénh há han mũ sir, chave tỹ. Kỹ mĩg fĕr ěn tóg povo ag krĩn kónãn mãn ke tũ nĩ ha ver, prỹg tỹ mil (ke) ki. Prỹg tỹ mil (ke) tag tỹ tũ' hen kỹ ag tóg ver ti kavãn sĩ han mãn ke mũ, mĩg fĕr ti.

⁴ Kỹ sóg nĩgja sĩnvĩ tỹ hěn ri ke vigvĕg mũ. ũ tỹ kri nĩgnĩg kỹ nỹtĩ ag vỹ tỹ pã'i nỹtĩ, ag tỹ vĕnh kar jykre tugnỹm ke to pã'i. Kỹ sóg ěprã ke kuprĩg tỹ hěn ri ke ag vigvĕg mũ gé, ag tỹ ũn kãgtén ja ěn ag kuprĩg. Ag tỹ vĕnh kar mỹ Jesus kãmén ja tugrĩn ag tóg ag

kãgtén ja nĩ, ag tỹ Topě vĩ tó tugrĩn. Mĩg ěn to ag tóg: “Topě vĕ,” he ja tũ nĩgtĩ, ti kãggrã to ke gé. Mĩg rá ěn tỹ ag tóg vĕnh rán ja tũ nĩ gé, ag kakã ki, ag nĩgé pãnĩ ki ke gé. ěn ag vỹ tỹ Cristo mré pã'i nỹtĩnh ha, prỹg tỹ mil (ke) ěn ki.

⁵ Vĕser ũ ag vỹ ver rĩnrĩr mãn ke tũ nĩ. Prỹg tỹ mil (ke) ěn tỹ tũ' hen kỹ ag tóg kejĕn rĩnrĩr mãn kãn ke mũ. ũ tỹ Cristo mré tỹ pã'i nỹtĩ tag ag vỹ rĩnrĩr vĕn ke mũ.

⁶ ũ tỹ rĩnrĩr vĕn mũ mỹ tóg vĩ há han ke mũ, Topě ti. Topě tũ vỹ tỹ ag nỹtĩ. Kãgter mãn ke tũ ag tóg nỹtĩ ha. Topě tũ ki rĩr jé ag tóg ke mũ, Cristo tũ ki ke gé. Prỹg tỹ mil (ke) ki ag tóg tỹ pã'i nỹtĩnh mũ, Cristo mré hã.

Satanás kutĕ

⁷ Kejĕn prỹg tỹ mil (ke) ěn tóg tũ' he mũ. Kỹ ag tóg Satanás ěn kavãn sĩ han mãn ke mũ.

⁸ Kỹ tóg tĩ mũ, povo tỹ Gogue ag mré Magogue ag krĩn kónãn jé, tãtã, ga fyr tá, Satanás ti. E tãvĩ ag nỹtĩ, goj fyr tá rỹnhřj ri ke ěn ag, goj kafã tũ fyr tá rĩnhřj ri ke ěn ag. Ag vĕnh mãn kãn han jé tóg ke mũ, Satanás ti.

⁹ Kỹ ag tóg tá kãmũ mũ, ũn e tãvĩ ěn ag. ũ tỹ Topě ki ge kỹ nỹtĩ ag kato ag tóg kãmũ mũ, cidade ěn kato, Topě tỹ cidade to há nĩ ěn kato. Ag tỹ ag tỹ tũ' he kãn sór vĕ. Hã ra pĩ tóg kanhkã tá kãtére mũ, kỹ tóg ag kãgtén mũ. ũ tỹ Topě ki ge kỹ nỹtĩ ag tỹ tũ' he sór mũ ěn ag kãgtén tóg mũ, pĩ ti.

¹⁰ Japo ěn, ũ tỹ ag mỹ ón mũ ěn fón pĕ han ag tóg mũ, pĩ grug fir ěn ki, pĩ mág pĕ ěn ki, pó tỹ enxofre pũr nĩja ěn kãki, vãn pũr nĩja ri ke ěn kãki. Goj kátá mĩg ěn vỹ tá nĩ ha, pĩ grug fir ěn kãkã, kar kỹ ón kỹ Topě vĩ tó tĩ ěn ti ke gé. Pĩ grug fir ěn kãki ag tóg nỹtĩ, tá kãpa mãn ke tũ pĕ ag tóg nỹtĩ ha. Tá ag jagtar tãvĩ nỹtĩ ha.

Vĕnh kar jykre tugnỹm ke kurã

¹¹ Kỹ sóg nĩgja mág pĕ vĕg mũ gé, nĩgja kupri. ũ tóg kri nĩ nĩ. Ti rĩnve ga tóg tũ' he mũ vãhã, kanhkã ti ke gé. Vĕnh ven mãn tũ tóg nỹtĩ ha, kanhkã mré ga ti.

¹² Kỹ sóg vĕser kar vigvĕg mũ, ũn mág ag, ũn kãsir ag ke gé. Nĩgja kupri ěn jo ag tóg nỹtĩ. Kỹ livro vỹ tá nỹtĩ gé. Livro ěn kygvãg ag tóg mũ. Vĕnh kar jykre vỹ livro ěn ki

ránrán kÿ nÿtĩ. Kÿ livro ù vÿ tá nĩ gé, ên kavāg ag tóg mũ gé. Û tÿ rĩr krÿg ja tũ venh ke mũ ag jygy vÿ livro ên ki ránrán kÿ nÿtĩ. Kÿ Topê tóg vêser kar jykre tugnÿm ke mũ, kÿ tóg ag mÿ ag tÿ nén venh ke mũ ti tónh ke mũ. Ag tÿ ãjag tÿ nén han ja kajām ke vê, ag tÿ ãjag jykre tÿ livro ki ránrán kÿ nÿtĩ ên kajām kân ke vê.

¹³ Û tÿ goj ki kãgter mũ ag vÿ tá nÿtĩ gé, ù tÿ vêser jamã tá nÿtĩ ag kar ti. Vênh kar vÿ tá nÿtĩ. Ag tÿ nén han mũ kar kajām kân jé ag tóg ke mũ ha.

¹⁴ Kÿ ù vÿ ter măn ke tũ nĩ ha. Êg ter ke tag vÿ hur tũg. Û tÿ pĩ grug fir ên kãki văr ke tag ag vÿ kãgter ri ke han ke mũ, kÿ tóg ag kãgter pẽ han ri ke nĩ sir, ag tũg pẽ han tũ ra.

¹⁵ Kÿ ùn jygy rán kÿ nÿtĩ tũ ên ag vÿ pĩ grug fir ên kãki văr kân ke mũ, ùn jygy tÿ Topê livro ki ránrán kÿ nÿtĩ tũ ên ag.

21

Kanhkã tãg mré ga tãg

¹ Kÿ sóg kanhkã tãg vég mũ gé, ga tãg ke gé. Kanhkã ve ên tóg hur tũg, ga ve ên ke gé, goj ti ke gé.

² Kÿ sóg Topê tÿ cidade tag, Jerusalém tãg tag vég mũ gé. Kanhkã tá tóg kãtère mũ, Topê tá, cidade tãg tag ti. Cidade sĩnvĩ han ja ag tóg nĩgtĩ, kÿ tóg ag tÿ tá vênh prũg to festa han ke nĩ ve nĩ. Cidade sĩnvĩ tóg ùn prũnh ke fi sĩnvĩ ri ke nĩ, fi tÿ ã mén ke ti jãvãnh kÿ.

³ Nĩgia kupri ên tá vênh vĩ tóg mẽ há tĩ, kÿ tóg: “Topê jamãn hã vê,” he mũ. “Topê tÿ êprã ke ag mré êmãn hã vê,” he tóg. “Ag mré tóg nĩ nĩ ha, ti tũ vÿ tÿ ag nÿtĩnh ke mũ ha. Topê vÿ ag mré nĩnh mũ ha, kÿ tóg tÿ ag Topê nĩ sir.

⁴ Ag kanẽ var tÿ tũ' he kân jé tóg ke mũ ha. Û tóg ter măn ke tũ pẽ nĩ ha, hã kÿ ù tóg fe kaj nĩ măn ke tũ nĩ gé, jagtar ke tũm, kaganh ke tũm. Tũg ti nĩ ha, vênh jykre si kar ti. Vênh ven măn ke tũ ti nĩ ha, vênh jykre si ti,” he tóg, vênh vĩ ên ti.

⁵ Kÿ ù tÿ nĩgia kupri kri nĩ ên tóg: “nén (ũ) kar han măn jé sóg ke mũ ha,” he mũ. Kÿ tóg inh mÿ: “inh vĩ tag rán nĩ,” he mũ gé. “Sÿ ki hã tó vê. Vênh ven kân jé tóg ke mũ, sÿ ã mÿ nén tó mũ tag ti,” he tóg.

⁶ Kÿ tóg: “hÿ, vênh ven kân ti huri,” he mũ gé. “Ûn ve vÿ tÿ inh nĩ, kÿ sóg tÿ êgno nĩ gé. Isÿ nén (ũ) kar han to hã sóg nĩ nĩ, kÿ sóg nén (ũ) kar tũg mũ ra nĩnh mũ gé. Û tóg goj kron sór mũ. Ên mÿ sóg goj ven tĩ, kaja tũ ra. Isÿ ti mÿ goj ven mũ ên vÿ ti ter tũ han ke mũ.

⁷ Û tÿ isovãnh tũ ên mÿ sóg nĩm ke mũ, presente tag ti, ha mẽ: ti Topê vÿ tÿ inh nĩnh mũ, kÿ tóg tÿ inh kósin nĩnh mũ gé,” he tóg inh mÿ, ù tÿ nĩgia kupri kri nĩ ên ti.

⁸ Hã ra ù ag tóg pĩ grug fir kãki, pĩ mág pẽ ên kãki văr ke mũ, hã vÿ: ùn mũmẽg (ka)mẽ ag, he mũ, ù tÿ isovãnh mũ ag, he mũ, ù tÿ vênh jykre pãno tÿ vênh kavénh tĩ ag, he mũ, ù tÿ ù tén tĩ ag, he mũ, ù tÿ ã prũ tũ fag mré nÿgnÿ mũ ag, he mũ, ù tÿ ã mén tũ mré nÿgnÿ mũ fag, he mũ, kujá ag, he mũ, curandeiro ag, he mũ, ù tÿ vênh kãggrá jykre mĩ mũ mũ ag, he mũ, ùn ón mũ ag, he mũ gé. Pĩ grug fir ên kãki tóg ag vãm kân ke mũ, pó tÿ enxofre pũr nĩja ên kãki, vãn pũr nĩja ri ke ên kãki. Kÿ tóg ag kãgtén pẽ han ri ke nĩ sir,” he tóg, ù tÿ nĩgia kupri kri nĩ ên ti.

Jerusalém tãg

⁹ Kÿ Topê tÿ jẽnẽ jafã ù tóg inh ki jun mũ, ù tÿ pénky kãkã nĩ ên tÿ ga kri ke ag vóg kónãn mũ ên ag kã ù. Inh mÿ tóg: “kunĩg,” he mũ. “Cordeiro prũnh ke fi venh kãtĩg,” he tóg inh mÿ.

¹⁰ Kÿ Topê kuprĩg tóg inh krĩn mũ sir, kÿ sóg nén nẽ vég mũ. Topê tÿ jẽnẽ jafã ên tóg inh pére tĩ mũ, pãnónh téj (gy) kri. Pãnónh kri jẽ kÿ tóg inh mÿ Topê tÿ cidade tãg ven mũ sir, cidade tÿ Jerusalém, he mũ tag ti, ù tÿ kanhkã tá kãtère mũ tag ti, Topê tá.

¹¹ Sĩnvĩ pẽ tóg nĩ, Topê sĩnvĩ ên ri ke ti nĩ, kókov tóg nĩ gé, pó tÿ jaspe kókov ri ke. Pó tÿ tonh vÿ tÿ ti nĩ, jaspe ti, kÿ tóg pó kókov fĩn êváj ên ri ke nĩ.

¹² Cidade jy ró tóg téj gy nÿ, vênh ra hã tóg téj gy jẽ gé. Ró ki jãnkã tÿ 12 (ke) vÿ nÿtĩ. Kÿ Topê tÿ jẽgnẽ jafã tÿ 12 (ke) ag vÿ ki rĩr nÿtĩ, jãnkã ki. Kĩ vênh jygy tóg ránrán kÿ nÿtĩ, jãnkã ki, Israel jóg'jóg ve tÿ 12 (ke) ên ag jygy ti.

¹³ Rã jur ja kãtá tóg jãnkã tãgtũ nĩ. Rã pur ja kãtá tóg jãnkã tãgtũ ù nĩ gé, kanhkã tãpér

kátá tóg jänkã tãgtũ ù nĩ gé, kanhkã tãpér ù kátá tóg jänkã tãgtũ ù nĩ gé.

14 Pó tỹ 12 (ke) kri tóg hyn han kỹ nĩ nĩ, cidade ti. Pó ên ki vênh jygjy tóg ránrán kỹ nỹtĩ gé, apóstolo tỹ 12 (ke) ên ag jygji ti, cordeiro tũ ên ag jygjy ti.

15 Kỹ ù tỹ inh mré vĩ mũ ên, Topê tỹ jẽnê jafã ên tóg ti kãmun jafã vyn kỹ jê nĩ, ti kãmun jafã tỹ ouro ti. Kỹ tóg cidade kãmun sór mũ, cidade jy ró ti, ti jänkã ti ke gé.

16 Péno tỹ 4 (ke) ti nĩ, cidade ti, kỹ ti tãpér vĩ ti téj ri ke nĩ. Kỹ Topê tỹ jẽnê jafã ên vĩ kãmun mũ sir, cidade ti, ti kãmun jafã tỹ. Quilômetro tỹ 2 mil kri 200 (ke) ti nĩ, ti tỹ téj e kỹ nỹ ki, ti tãpér ki ke gé, ti tỹ vênh ra jẽn ke gé. Vênh ri ke kar ti nĩ, ti kãmur ti.

17 Kỹ tóg cidade jy ró ên kãmun mũ gé. Ti tãpér vĩ metro tỹ 64 (ke) nĩ. Metro tag vĩ tỹ êprã ke ag kãmun jafã nĩ, hã ra Topê tỹ jẽnê jafã vĩ kãmun mũ, êprã ke ag kãmun jafã tỹ.

18 Ró vĩ pó tỹ tonh tỹ jaspe tỹ han kỹ nỹ. Kỹ cidade vĩ ouro tỹ han kỹ nĩ, hã ra tóg fĩn êváj nĩ, vidro fĩn êváj ri ke.

19 Cidade jy ró tóg pó tỹ tonh mág kri han kỹ nĩ. Pó ên to pó tỹ tonh ù tóg nỹtĩ gé, ùn e ag. Pó tỹ tonh mág ù tóg tỹ jaspe nĩ, kỹ ù tóg tỹ safira nĩ, kỹ ù tóg tỹ ágata nĩ, jo ù tóg tỹ esmeralda nĩ,

20 jo ù tóg tỹ sardônio nĩ, jo ù tóg tỹ sárdio nĩ, ù tóg tỹ crisólito nĩ, ù tóg tỹ berilo nĩ, ù tóg tỹ topázio nĩ, ù tóg tỹ crisópraso nĩ, ù tóg tỹ jacinto nĩ, ù tóg tỹ ametista nĩ gé. 12 (ke) ti nỹtĩ, pó mág ti.

21 Kỹ ti jänkã tỹ 12 (ke) vĩ pérola tỹ hyn han kỹ nỹtĩ. Jänkã pir vĩ pérola pir nĩ mýr, ha mẽ. Kỹ êpry mág ên, êmĩn mág ên vĩ ouro tỹ han kỹ sa, hã ra tóg fĩn êváj nĩ, vidro fĩn êváj ri ke.

22 Hã ra sóg Topê jo ìn vég tũ nĩ, cidade ên tá. Topê vĩ vênh kar kri nĩ, kỹ tóg nén (ũ) kar han ki kanhró nĩ gé. Topê hã vĩ cidade ên tá êmã nĩ, cordeiro ti ke gé, hã kỹ tóg tá ag jo ìn tũ nĩ.

23 Kỹ rã tóg tá tũ nĩ gé, kysã ke gé. Topê tỹ jẽngrê vĩ ki kurã han tĩ, kỹ tóg tá kutyg vãnh nĩ sir. Cordeiro ên vĩ cidade ên tá rã ri ke nĩ.

24 Kỹ vênh kar tóg Topê tỹ cidade ki jẽngrêg ên tugrĩn êvãnh há han tĩ, povo kar

ag. Êprã pã'i kar ag vĩ ãjag tỹ nén (ũ) kar gé kãmũnh mũ, ag tỹ tá vin han jé.

25 Jänkã vĩ nugnon kỹ nỹtĩ, kurã kar ki. Kutyg tũ nĩn kỹ ag tóg jänkã nĩgfénh tũ nĩgtĩ.

26 Povo kar ag vĩ ãjag tỹ nén (ũ) gé kãmũnh ke mũ, cidade ên mũ.

27 Hã ra nén ù kórég vĩ kãrãnh ke tũ pẽ nĩ. ù tỹ vênh jykre pãno han mũ ag vĩ rã genh ke tũ nĩ, ùn ón mũ ag ke gé. ùn jygji tỹ livro ki ránrán kỹ nỹtĩ ên ag hã vĩ ra genh ke mũ. ù tỹ rĩr krỹg ja tũ vég mũ ên ag jygjy vĩ ránrán kỹ nỹtĩ, cordeiro tỹ livro ên ki.

22

1 Kỹ Topê tỹ jẽnê jafã tóg inh mý goj mág ven mũ. Goj ên vĩ êg rĩnrĩr han tĩ. Kómkóm ke ti tĩ, goj ên ti, pó kupri fĩn êváj tỹ kómkóm ke ên ri ke, goj ti. Goj ên nĩhỹg vĩ Topê nĩgja tá nĩ, cordeiro nĩgja ên tá.

2 Kỹ tóg cidade kujy mũ tĩ mũ, êpry mág jagma, êmĩn mág ên jagma, goj ti. Ti fyr tá ka tóg nỹtĩ, ti fyr ù tá ke gé. Ka kanê ên vĩ êg rĩnrĩr han tĩ gé. Ên vĩ prỹg pir ki kanê tỹ 12 (ke) han tĩ. Kysã kar ki tóg ã kanê hyn han tĩ. Ti féj vĩ tỹ vênh kagta kar nĩ, vênh kaga kar tỹ tóg hághá' he kãn tĩ.

3 Topê tỹ nén ù to jũ vĩ tá nĩnh ke tũ pẽ nĩ, cidade ên tá.

Topê nĩgja vĩ cidade ên tá nĩ nĩ, cordeiro nĩgja ên ti, kỹ vênh kar vĩ ti to: “Topê vê,” henh ke mũ, Topê rãnrãj han tĩ ag kar.

4 Topê ve jé ag tóg ke mũ, kỹ ti jiji vĩ ag kakã ki rán kỹ nĩnh mũ.

5 Tá tóg kutyg vãnh nỹgtĩ, hã kỹ ag tóg tá lampião grug ke tũ nĩ. Rã vĩ tá tũ nĩ gé. Topê vĩ ag mý tỹ jẽngrê han tĩgtĩ, êg pã'i ti. Kỹ tá nỹtĩ ag tóg tỹ pã'i nỹtĩnh ke mũ gé. Ag tỹ tỹ pã'i nỹtĩnh ke tag vĩ tũ' henh ke tũ nĩ.

Jesus kãtĩg mãn

6 Kỹ Topê tỹ jẽnê jafã ên tóg inh mý: “inh vĩ vĩ tỹ ki hã ke nĩ,” he mũ. “Vênh ó pijé,” he tóg. “Êg jóg tỹ Topê vĩ ù tỹ ã vĩ tó tĩ ag mý ã kuprĩg jẽnê, ti tỹ ag kanhrãn jé. Hã kỹ tóg ã tỹ jẽngrê jafã ag kã ù jẽnê, ti tỹ ti mý rãnrãj tĩ ag mý tó jé, nén tỹ kãnhmar kutênh ke mũ ti,” he tóg, inh mý, Topê tỹ jẽnê jafã ti.

7 Jesus vĩ tag tó mũ, ha mẽ. “Ha vé, inh kãtĩg mãn ke nẽ ha. Nén tỹ livro tag ki rán

kỹ nĩ tag to jykren há han nĩ, kỹ Topẽ tóg ãjag mĩ vĩ há han ke mũ,” he tóg, Jesus ti.

⁸ Tag kar ve inh, mẽ inh ke gé, inh, hã vỹ: João, he mũ. Isỹ ve kãn kar kỹ sóg ù tỹ inh mĩ tag ven mũ ẽn krẽm mũg ke mũ, sỹ ti mỹ: “Topẽ vỹ tỹ ã nĩ,” he jé.

⁹ Hã ra tóg inh mỹ: “ke tũg nĩ,” he mũ. “Ã ri ke sóg nĩ, isỹ Topẽ rãnrãj han kỹ. ã régre ag ri ke sóg nĩ, ù tỹ Topẽ vĩ tó tĩ ag ri ke sóg nĩ, ù tỹ livro tag ki nén rán kỹ nĩ mẽg mũ ag ri ke sóg nĩ gé. Topẽ hã mỹ: “Topẽ vỹ tỹ ã nĩ,” hemnĩ,” he tóg, inh mỹ, Topẽ tỹ jẽnẽ jafã ti.

¹⁰ Kỹ Jesus vỹ tag tó mũ gé, ha mẽ. “Livro tag ki nén rán kỹ nĩ tag péju sór tũg nĩ,” he tóg, inh mỹ. “Kakó ti nĩ ha, ãjag tỹ nén tỹ ki rán kỹ nĩ tag venh ke mũ ti.

¹¹ ù tỹ vãnh jykre pãno han mũ ẽn jé han kỹ nĩ nĩ. ù mỹn hỹn há tĩgtĩ, ti jykre kavéj ti. Ti jé ã jykre kórég hã mĩ tĩg. ù tóg vãnh jykre kuryj han tĩ. Ti jé to tar nĩ. ù ag tóg tỹ Topẽ tũ nỹtĩ. Ag jé ti to krónh ke tũg,” he tóg, Jesus ti.

¹² “Ha vé, inh kãtĩg mãn ke nẽ ha. ãjag kaja ma sóg kãtĩg ke mũ, ha vemnĩ. Vãnh kar vỹ ve kãn ke mũ, ag tỹ nén han mũ kaja ti.

¹³ Topẽ vĩ kar han sóg tĩ. ùn ve vỹ tỹ inh nĩ, ùn tỹ ẽgno vỹ tỹ inh nĩ gé. Isỹ nén kar han vén to hã sóg nĩ, kỹ sóg nén kar tỹ tũ' he mũ ra ẽgno kã nĩnh ke mũ gé,” he tóg, Jesus ti.

¹⁴ “ù ag tóg ãjag jykre kugrynh sór tĩ, hã kỹ ag tóg ẽg tỹ ẽg kur kygfa ri ke han tĩ. ẽn ag mỹ tóg vĩ há han ke mũ, Topẽ ti. Ka kanẽ tỹ ẽg rĩnrĩr han tĩ ẽn ko jé ag tóg ke mũ, kỹ ag tóg cidade ẽn jãnkã ra genh ke mũ gé.

¹⁵ Hã ra ù ag tóg ẽn ra genh ke tũ nĩ, hã vỹ: ù tỹ vãnh jykre pãno tỹ vãnh kavénh tĩ ag, he mũ, kujá ag, he mũ, curandeiro ag, he mũ, ù tỹ ã prũ tũ fag mré nỹgnỹ mũ ag, he mũ, ù fag tỹ ãjag mén tũ ag mré nỹgnỹ mũ fag, he mũ, ù tỹ ù tén mũ ag, he mũ, ù tỹ vãnh kãggrá jykre mĩ mũ mũ ag, he mũ, ùn ón mũ ag, he mũ, ù tỹ ù ag lograr he mũ ag,

he mũ gé. ẽn ag vỹ cidade ra genh ke tũ pẽ nĩ,” he tóg, Jesus ti.

¹⁶ “Isỹ jẽnẽ jafã jẽnẽ inh, inh, hã vỹ: Jesus, he mũ. Ti jẽnẽ inh, ti tỹ ãjag mỹ ãjag tỹ nén venh ke mũ kar tó jé, ù tỹ inh vĩ jẽnẽ jé vãnh mãn tĩ ag kar mỹ. Davi krẽ'krẽ ag kã ù ẽn vỹ tỹ inh nĩ. Krĩg mág hã sóg nĩ,” he tóg, Jesus ti.

¹⁷ Kỹ Topẽ kuprĩg vỹ Jesus mỹ: “kur kãtĩg,” he mũ. ù tỹ ti ki ge kỹ nỹtĩ kar ag vỹ ti mỹ tag tó tĩ gé, ag tỹ tỹ ti prũnh ke fi ri ke nỹtĩn kỹ. ù tỹ ag tỹ ti jé prẽr mẽg mũ ag jé ti mỹ: “kur kãtĩg,” he kãn.

Kỹ Jesus tóg: “ù tỹ goj kron sór mũ ẽn jé iso kãtĩ,” he mũ, “sỹ ti mỹ goj jun jé, fagrĩnh mỹ. Goj ẽn vỹ ti rĩr han ke mũ, ha vemnĩ,” he tóg, Jesus ti.

João tỹ ve ja

¹⁸ Vãhã sóg tag tó sór mũ, inh, hã vỹ: João, he mũ, ha mẽ. ù tóg kejẽn isỹ nén rán mũ tag ve kỹ pãte ù rán mãn sór ke mũ gé hẽn ri ke mũn. ẽn vóg kónãn tãvĩ han jé tóg ke mũ, Topẽ ti, kỹ tóg sỹ nén ù jagy tó mũ ẽn ve kãn ke mũ, ha mẽ.

¹⁹ Kejẽn ù tóg hẽn ri ke mũn isỹ nén rán mũ ù tỹ nén ù tũ han sór mũ. ẽn tũ mág tỹ tóg tũ' henh ke mũ gé, Topẽ ti, kỹ tóg ka kanẽ tỹ ẽg rĩnrĩr han mũ ẽn konh ke tũ nĩ. Topẽ tỹ cidade nĩv ẽn ra rãnh ke tũ tóg nĩ gé, sỹ cidade kãmén mũ ẽn ra.

²⁰ ù tỹ inh mỹ tag kar ven mũ ẽn vỹ: “inh kãtĩg mãn ke nẽ ha, sỹ ki hã tó vỹ,” he mũ.

Hỹ, kur kãtĩg, ẽg Senhor tỹ Jesus'.

²¹ Ẽg Senhor tỹ Jesus jé ãjag kar tar han. Hã vỹ.

Ẽg tỹ Topẽ vĩ rá venh ke

Ẽg tỹ Topẽ vĩ rá ve kỹ ki kanhrãn kỹ ki krov kỹ ẽg hã han ke mũ. Kurã kar ki ẽg tóg to sĩ han ke mũ, kỹ ẽg tóg kãnhmar fĩn rãm ke mũ. Kỹ tóg há tĩ gé, ẽg tỹ prỹg kar ki Novo Testamento tag fĩn rãm kỹ, ẽg tỹ tỹ vãnh kanhrãn há han jé. Ẽg tỹ fĩn rãm jé ẽg tóg gen kỹ to kenh mũ, ha vé: